



*Fromondo*

1649















23, 64 7/8 1904





85965  
PHILOSOPHIÆ CHRISTIANÆ  
**DE ANIMA**  
LIBRI QVATVOR.

*Auctore*  
**LIBERTO FROMONDO**  
HACCVRIANO,

In Academia Lovaniensi S. Th. Doct. & Prof. Regio,  
Seminarij Leodiensis Præfide,

ET  
Insignis Ecclesiæ Collegiæ B. PETRI Lovanij  
DECANO



$\frac{J}{S}$  <sup>qu</sup> **LOVANI,**  
Typis HIERONYMI NEMPAEI Anno 1649.  
Cum Gratia & Privilegio.



DE ANIMA

LIBRO QUINTO

LIBERTO FROMONDO

HACCIANO

In Aulam...  
S... ..




LIBRO QUINTO



SERENISSIMO PRINCIPI  
FERDINANDO BAVARO,  
ELECTORI COLONIENSI,  
PRINCIPI LEODIENSI,

*Sacri Rom. Imperij per Italiam Archicancellario &c.*

SERENISSIME PRINCEPS

 TVDIA melioris ætatis  
meæ, longo rerum alia-  
rum intervallo jacentia, &  
à sene jam retractata atque  
interpolata, CELSITVDINI  
SVÆ oblatum venio. Cui enim potius  
debeam? Natale solum invitabat, & be-  
neficium (ultroneâ SVÆ CELSITVDINIS be-  
nignitate collatum) Præsidentiae Semi-  
narij sui in hac celeberrima Academia,  
quod referre non poteram, istam saltem  
grati animi confessionem flagitabat.

Nec munusculi materia, quæ de ANI-  
MÆ philosophiâ est, spero, ingrata erit.

)( 2

Hoc



Hoc enim jam & olim Illustrissima  
Domus Bavarica, inter primas illas &  
capitales Orbis Christiani Familias,  
peculiare ferè habet; ut Philosophiæ,  
Mathematicarum, ceterarumque Mu-  
sarum amore & familiaritate, Nobilita-  
tem suam non revilesceat aut obscurari,  
sed magis inclarescere existimet. Quod  
hodieq; in CELSITVDINE SVA, in Ser.<sup>mo</sup> SVÆ  
CELSITVDINIS Fratre, MAXIMILIANO Bava-  
riæ Duce, & nuper in Ser.<sup>mo</sup> patruo  
ERNESTO, Principe nostro, cuius virtu-  
tum & Dignitatum SVA CELSITVDO heres  
fuit, cōspeximus. De ceteris vetustioris  
ævi, in Historiarum memorijs legimus.

Sed illustre præter alia exemplum in  
HENRICO Bavarix Duce & Rom. Impe-  
ratore: in quo dubites, an sanctitas vitæ  
(quâ inter Cælites, cum castissima con-  
juge sua Cunegunde relatus est) an lit-  
terarum, barbaro illo seculo, cultus &  
doctri-



doctrina, an virtus armorum palmam  
habuerit.

Hic enim ille est, qui An. Christi MII. S. Hehr.  
2. Imp.  
An. 1002.  
post Ottonem III. Imperator creatus,  
veluti sol quidam, præcedentis seculi  
tenebris illuxit, & ex ferreo (ut Baronius  
appellat) aureum fecit. Cum enim uni-  
versus tunc Christianus Orbis in ferro  
& tumultu esset, *Per ipsū tota Germania,*  
ait Genebrardus, *Gallia, Italia fuerunt* Genebr.  
in Chron.  
ex Sigè-  
berto,  
Palme-  
rio &c.  
*pacatissima; ut aureū hōc imperante vigere*  
*videretur seculum.* Id autem divinā, & ar-  
morum virtute perfecit. Nam An. MV.  
inquit idem Chronologus, *Arduinum,*  
*Longobardorū Regē, ab Italis Impera-*  
*torem salutatum, acie interemit, universas*  
*cis Padum urbes subegit, & Italiam com-*  
*posuit.* Bernardum Saxonia Ducem rebel-  
lantem subegit, Slavos & Polonos, qui ei  
auxilio venerant, tributarios fecit. Anno  
MIX. Balduinum IV. Flandrensiū Comi-



*tem, & ceteros rebelles domuit. An. MXIII.  
cunctos Saracenos Italiâ, Calabriâ, Cam-  
paniâ, Picentino agro expulit, & Apuliam  
diu ab ijs possessam recuperauit.*

Deinde Benedictum VIII. Summum Pontificem, Sede suâ pulsum, restituit. A quo Pomum, sive Orbem aureum cum infixâ Cruce, Benedicto divinitus ostensum, primus omnium Imperatorum accepit, & nunc, tanquam Imperij Rom. Insigne, ad Cæsares posteros transmissum videmus.

Plurima alia sunt Principum Bavarorum in Ecclesiam, & Remp. Christianam illustria beneficia; quæ longum, nec hic attinet, recensere. Hoc tamen propius nos tangit, & Ecclesiæ Leodiensis insigne beneficium ac ornamentum fuit.

*Quod Ser.<sup>mus</sup> Princeps Ernestus, ut Statuta Seminarij Lovanienfis narrant, prudenter adverterit ( futurorum periculo-  
rum,*



rū, capto nunc ab hæreticis Mosætraje-  
cto, quali divinus & prælagus) necessariū  
esse, propter vicinorum ac passim gliscen-  
tium hæreticorum vafras subtilesq; Reli-  
gionis Catholica depravationes: tum pro-  
pter diversarum Parochialium Ecclesiarū,  
in oppidis præsertim ac famosioribus Diæcesis  
sua locis amplitudinem; præter Seminarium  
in civitate Leodiensi erectum, aliud etiam in  
vicina Lovaniensi Academia instituere. In  
quo, qui majoris expectationis fuerint, dili-  
gentiùs in studio Theologico instituerentur,  
& huius sue institutionis, graduum Schola-  
sticorum susceptione, publicum testimonium  
consequerentur.

Hoc deniq; Austriaco Bavaricoq; san-  
guini, qui mutuis inter se jam olim affi-  
nitatibus cognationibusq; mixti & con-  
fusi, peculiare & ferè propriū est: molli  
clementiq; & quod tyrannico longissi-  
mè abest imperio, subditos suos regere.

Alij



Alij quidam Principes, aut Ministri  
circa ipsos, ultrò nec laceßiti arma ra-  
piunt, non ut injuriam propulsent, sed  
ut faciant: nec bello ad subditorum pa-  
cem utuntur, sed per calcatas eorum op-  
pressiones & misérias ad famam glo-  
riamque bellicæ virtutis ferro & igni  
grassantur. Veteri Caligulæ Cæsaris  
elogio, PHAETONTES ORBIS; facti non  
tam ut suos regant, quàm ut alienos fla-  
gellent, & Mundum incendant.

Suet. c. II  
Calig.

Quanto à talibus moribus intervallo  
Bavarici Principes! Et exemplū potest-  
ne dari illustrius, quàm in CELSITVDI-  
NE VESTRA, FERDINANDE PRINCEPS?  
Tot enim jam anni sunt, quòd Leod-  
enses subditos non armis, quæ fervidi  
quidam suadebant, sed paternæ clemen-  
tiæ artibus, intra veterem obedientiæ  
gyrum conatur reflectere. Hoc est verè  
Principem, id est Patrem Patriæ, non  
durum



durum Dominum exercere; & præclaram illam Romani Sapientis ad suum Neronem sententiam in se graphicè exprimere: *Nihil gloriosius Principe impunè laeso.*

Senec. lib. 1.  
c. 20. de  
Clement.

In quâ gloriâ, & subditorum redditurâ brevî obedientiâ ac pace, Deum Opt. Max. rogamus, ut **C E L S I T V D I N E M** **S V A M** diutissimè superesse, & præesse concedat, & post exhaustam longâ senectute vitam mortalem in terris, æternam donet in cælis. In quo voto, toto animi affectu acquiesco

SER.<sup>m2</sup> **C E L S I T V D I N I S S V Æ**

Humillimus Servus

**L. FROMONDVS.**

Die XIII. Maij,  
Christi Ascendentis  
festo. An. MDCXLIX.

)( )(

AD



## AD LECTOREM.



**T**heologum, & hoc ætatis, id est senem, de Anima philosophari; quidam fortasse in probro ponent; sed facti mei pœnitere nondum statui. Pars enim ista Philosophia nobilissima amœnissimaq; est, ac proximè Theologiam nostram, ut supremus æther calum, tangit. Imò pluribus locis sic ei permiscetur, ut nec Theologum agere sine hac Philosophia, nec sic philosophari sine Theologia possis. Nisi enim Theologia, & maxime sacrarum Scripturarum fax aliqua præluceat, quidnam, quaeso, per lubrica ista humanarum ratiocinationum & tenebrosa, ibimus? Sane, nos perditum, cum antiquis illis & luscitiosis Mundi sapientibus.

Quàm enim nihil ferè certi comprehensiq; de natura Animæ illi habuerint, à Romano Stoico discere licebit.

Senec. lib. 7  
c. 24. Nat.

Multa sunt, inquit, quæ esse concedimus; qualia sint ignoramus. Habere nos animum, cujus imperio & impellimur & revocamur, omnes fatebuntur; quid tamen sit animus ille rector dominusque nostri, non magis tibi quisquam expediet, quàm ubi sit. Alius illum dicet esse spiritum, alius concentum quendam, alius vim divinam & Dei partem, alius tenuissimum aërem, alius incorporalem potentiam. Non deerit qui sanguinem dicat, qui calorem. Adeò animo non potest liquère de ceteris rebus, ut adhuc ipse se quærat.

Senili quoque ætate, quando anima corpori malè hæret, & ad evolandum se quodammodo levat & accingit, nullum ad Philosophiam istam tempus magis aptum idoneumq; est. Nonne Socrates, cum jam frigore cicutæ extinguitur; Seneca, cum sanguinem & vitam, abruptis venis effundit in balneum; Cato Uticensis, cum morti suâ manu destinat, de immortalitate animæ maxime seriò disputant? Hujus quippe quæstionis præcipuè & propriè locus, ubi moriendum est: ut spe melioris & immortalis vitæ solemur misera & fugientis amissionem. Nos præsertim Christiani, quos spes non confundit; sicuti miseros illos confundit, qui cum cognovissent Deum, non sicut Deum glorificaverunt.

Rom. I.

Igitur lineamenta quadam de Anima, & veluti imaginem monogrammam, quam juvenis olim in futuri Operis perfectionem delineaveram, in senectute jam in media, & ipso ineuntis Climæ æterici limine, carne implevi



implevi, cute coloribusq<sup>ue</sup> induxi, ac novos insuper è sacris litteris, aut Patri-  
tribus nervos plurifariam intendi. Certè tamen Dei ope facere volui: an  
effecerim, tu Lector arbitrare.

Quia verò lineamentorum, & ideæ primæ amplitudo longè ultra hujus  
Operis modum tendebatur, contrahere necesse fuit, & multa quæ in col-  
lecto & preparato jam erant, rejicienda fuerunt, ne nimis enormem bre-  
vioris & festinati ædificij plenitudinem redderent.

Nemo autem recentium qui in manibus sunt Philosophorum se irâ,  
aut invidiâ, à me in laude, aut commemoratione præteritum conquera-  
tur. Ego enim in singulis Dei lumen & gratiam miror venerorq<sup>ue</sup>, non in-  
video. Quosdam eorum olim legi, sed repetere jam nimis serum erat, nec  
vacabat seni, & tot aliorum studiorum ac rerum negotioso.

Itaque veræ Philosophiæ fontes, Aristotelem, S. Augustinum, S. Tho-  
mam, Scotum, & id genus paucos majorum gentium, ut sic dicam, Phi-  
losophos revivere satis habui. Et maxime, quia olim expertus eram, mu-  
steos illos Philosophorum rivulos, qui ab alijs fontibus fluere malunt &  
gaudent, multum recentis & inutilis limi trahere; & cum fessis longis ra-  
tiocinationum erroribus suas undas diu vexaverint, in Aristotelis tan-  
dem fontes, aut flumina, vel propè reverti, ut philosophiam suam, non  
sibi tantum, sed alijs probent.

Dicant enim Bodinistæ & Campanellistæ quidquid lubet: aliud lon-  
gè ingenij acumen, & veritatis lumen in Aristotele, quàm in Demo-  
crito, Epicuro, Paracelso, Chymicorum filijs, ceterisq<sup>ue</sup> citra &  
ultra Aristotelis ævum, quos illi, deserto Aristotele, malunt sequi. De re  
inferioris naturæ loquor: nam de superioribus & divinis, Plato longè  
ultra Aristotelem ausus, & evit. Sed ille omnia, aut pleraque ex Moyse,  
& Hebræorum sacris hausisse, olim à multis creditus est.

Aristoteles verò in supernis illis majorem caliginem vidit, quàm dige-  
rere, aut penetrare lux humana mentis posset; ideoq<sup>ue</sup> ad res inferiores in-  
genij aciem convertit; & penetravit, ut nemo profundius.

Ego enim providentiam divinam circa Aristotelem egisse, quod circa  
Homerum & Virgilium, circa Demosthenem & Ciceronem, existimo.  
Ante Homerum & Virgilium fuerunt in Græcia & Latio Poætæ, ante  
Demosthenem & Ciceronem, Oratores; sed per istos, in tantum fastigium  
artes illas evexit, quò nemo antecedentium aspiravit; & qui sequentur,  
non ascendendo, sed descendendo proficerent.

Nec omnia tamen in re naturæ Aristotelis dicta sic adoro, ut nus-



quam errasse putem. Nam etiam quandoque bonus dormitat Homerus: & sunt, qui in versibus S. Gregorij Nazianzeni, elegantia quiddam vident, quod in Homero desiderant. Nec ego dicere ausim, nihil esse in Quintiliano, quod imitari malim, quàm rem ejusdem argumenti in Cicerone.

Denique, quod Aristoteles inter Philosophos, Homerus & Virgilius inter Poetas, Demosthenes & Cicero inter Oratores, hoc S. Augustinus inter SS. Patres. Ut magno merito, SS. Patrum vertex appellatus sit.

Nec tantum in rebus divinis, sed in Philosophia etiam naturali Augustinus alijs supereminet. Quam tamen nec ab Aristotele, aut alio Magistro didicisse, est in comperto. Ut legendo & attendendo, saepe obstupescam, unde illa rerum naturæ tam abditarum lux ei & notitia; nisi divinitus infusam suspicarer. Ad hoc enim suffecisse illi ingenium, quantumvis admirabile & maximum, sine alio superiori lumine, credat qui potest, ego hæcenus non potui.

Hunc ergo in tenebris rerum non tantum divinarum, sed etiam naturalium, & præsertim Animæ, tanquam divinam facem sequi malui & amavi. Unde enim potius, & purius, quàm à talibus puris mentibus, tanquam mundissimis speculis suam, id est, omnis veritatis lucem Deus ad nos reflecteret? Vale.

---

## CENSURA

**H**OC Opus, quatuor libris comprehensum, variâ eruditione plenum est: & totam philosophiam Christianam de Anima, compendiosè, dilucidè, solidè, ac stylo amœno exponit, & eam ob rem dignissimum est quod in lucem eat. Dat. Lovanij die 13. Maij 1649.

IACOBVS PONTANVS S. Theol. Doctor  
& Professor, Librorum Censor.

PHILO.





PHILOSOPHIÆ CHRISTIANÆ  
**DE ANIMA**  
LIBER PRIMVS

De Anima in genere.



Niversum hunc DE ANIMA Tractatum in Libros IV. distribuemus. Liber I. de Anima in genere. II. de Anima vegetativa. III. de Anima sensitiva. IV. de Anima rationali differet. Omnia tam breviter, quàm materiæ ubertas; tam dilucidè, quàm tenebræ ejus & opacitas permittet, & Deus lucem ac ingenium dabit. Si non assequor quod volui, conatus saltem non defuit.

CAPUT I.

*Quid sit Anima.*

**Q**uàm perplexum & difficile sit, solis ingenij humani viribus ad veram animæ cognitionem pervenire, veterum Philosophorum magnorumq; ingeniorum dissensus & pugna satis dicunt. Et nos in iisdem Labyrinthis erraremus, nisi Deus Scripturâ & revelatione sua ab erroribus istis, tanquam Ariadnes filo, utcumque nos expeditisset.

**ARTICV.**

PHILOS. CHRISTIANÆ

ARTICVLVS I.

*Quid Philosophi veteres de anima sint opinati.*

**V**etustissimi Philosophorum, rudi adhuc & nascente Philosophiâ, animam nihil aliud, quàm spiritum quendam corporeum, crassiori materiæ infusum existimaverunt. Videbant enim ignem, aërem, ventum, & omnem universum spiritum, rem mobilem esse & irrequietam; ac proinde suspicati sunt ejusmodi aliquid animam esse, quo corpora animata intus subagitantur, & in omnem differentiam sitûs propellerentur. Hinc Heraclitus, Zeno, Stoici animam ignem, aut spiritum calidum esse opinati sunt; Anaxagoras & Anaximenes aërem, Democritus rotundarum atomorum congeriem, Hippocrates spiritum animale, Empedocles sanguinem, alij aliud simile corpus, per venas & arterias, aliaque corporis animati organa agilitate sua discurrens. Vnde Aristoteles. Democritum, & ejusdem crassæ Minervæ Philosophos irridens, ait eos Dædalo similes esse, qui ligneam Venerem fabricasse dicitur, quæ infuso visceribus argento vivo, sponte, nullo extrinsecus impellente graderetur. Simili enim modo Philosophi illi animam instar argenti vivi, animalium corporibus infusam, & lubrico per venas & interaneos meatus lapsu, seipsam movere, & membra ad progrediendum impellere imaginati sunt. Ab hac crassâ Philosophiâ, Latini *Animam*, quasi *ἄνεμος*, id est *ventam* appellaverunt.

Ceterum ad refellenda horum veterum ægrotorum somnia, non opus est multarum lucernarum oleum consumere.

Themist.

Lib. I. c. 17.  
de anima.

Vnico enim argumento satis eos confutat Themistius. Nam si anima esset tale corpus per venas animantis discurrens, ait, tam facili negotio, animali extincto vitam redderemus, quàm utrem, ubi aërem suum expiravit, inspirato per siphonem iterum aëre, inflamamus.

Deinde, ut Aristoteles docet, anima non movetur per se in suo corpore, nec per canales ejus, sicut ventus per Organorum



rum fistulas discurrit; sed per accidens solum ad motum sui corporis se movet.

Denique etsi tenuissimâ fortasse apparentiâ hic error vesti-ri posset, si nullus alius actus vitalis animæ esset, præter motum localem progressivum; quo tamen colore affirmari potest, nobilissimos sensuum externorum & internorum actus, item spirituales intellectus & voluntatis operationes, ab insensibili & corporeo ignis & aëris elemento vitaliter emanare?

Huic tamen vetustissimorum Philosophorum errori proxi-mus est Thomas Campanella: qui negat animam sensitivam esse corporis organici formam, sed esse spiritum animale, qui nulli organo corporis affixus, de sensorio uno in alterum vagabundus transcurrit: *sicut multi in nave milites, inquit, & gen-tes in domo, & homines in civitate, in officinis, plateis, adibus, & vijs diversas obeunt functiones.*

Vnde alibi spiritum illum ambulatorium, non tantum ani-mam, sed animal vocat. Definit enim animal, *Spiritum habi-tantem in crassâ mole, ad communis vitæ usum organisatâ.* Adeoque corpus organicum non erit pars animalis; sed vagina, aut do-mus; nec solæ testudines & cochleæ, sed etiam homines, equi, boves, secundum Campanellæ Philosophiam, sunt domipor-tæ. Ita dum Aristoteli ubique ex professo oppedit, & amore novitatis, rudes antiquorum cogitationes elegantiori Philo-sophiæ ab Aristotele, Platone, & nobilibus illis ingenijs dola-tæ & perpolitæ, anteponit, atque à S. Thoma reliquisque Dominicanæ suæ Familiæ columinibus longissimè refugit, in crassissimos istos, & alios in omni ferè materia errores se præ-cipitat.

Certè autem, præter spiritus illos animales, levitate sua effrenes & vagabundos, aliqua stabilior, ac eorum rectrix ani-ma, singulis corporis organis affigi debet, quæ eos advocet, ijs utatur, & diffuentes coërceat.

Sympathia denique potentiarum animæ satis indicat, unam animam esse, quæ sub varijs potentijs uno eodemque tempore operatur; non autem mobilè aliquam & vagam, quæ de orga-no uno in alterû successivè, ad nunc hîc, nunc alibi operandû,

tanquam ad varias officinas discurrat.

Alij igitur Philosophi magis spirituales & ingeniosi, ut Pythagoras & Plato, animam numerum quendam harmonicum esse dixerunt. Quos itidem Aristoteles refellit; non quia ipsi errarent, sed quia verbis mysticis veritatem obscurando, alijs errandi occasionem præberent. Pythagoras enim & Plato Arithmeticis ac Geometricis quibusdam proportionibus & figuris arcana Philosophiæ suæ velabant, ne sacra ista Cereris omnibus patescerent. Quos tamen ubique insectatur Aristoteles, non propter sententiarum falsitatem; sed *judicio quidem omnium doctissimorum*, ait eruditus ille Platonicus Bessarion, *ne quis primo aspectu sermonis arreptus, sentiret quod alienum est à rei, de qua agitur, rectâ verâq; ratione.* Vnde nec ex eo, inquit, quod Plato in figuras planas, rerum naturalium elementa resolvit, sequitur. (quod Aristoteles illi objectat) partem lineæ non esse lineam, aut lineam ex punctis constitui, aut magnitudinem non esse in infinitum divisibilem, aut reliqua quæ ex Mathematicâ ratione obijci possant. Et Andr. Libavius Epist. ad Georg. Limnæum: *Resistit quidem Peripateticorum Princeps Præceptoris sui Platonis, triangulis, & Pythagora numeros conatur infringere. At si intellexisset omnia essentialia esse, non tam fuisset adversatus. Quanquam ego putem non tam Magistris illis se opposuisse, quàm perperam explicantibus doctrinam discipulis, & Philosophiam, totam ad numeros & figuras mysticas, neglectâ utilitate publicâ, transferentibus.* Ut pateat iterum, quàm non immeritò olim in Labyrintho nostro, negaverim Platonem Epicureis, omnem corpoream magnitudinem in atomos & puncta ultimò resolventibus, accensendum esse.

Bessar.  
lib. 2. c. 10  
contra Cal-  
luniat.  
Plat.

Labyrinth.  
42.



## ARTICVLVS II.

*An anima nihil sit aliud, quàm temperies sui corporis, aut spiritus vitales, ut Medicis quibusdam, & Epicureis placet.*

**D**icaearchus, teste Cicerone, cum essentiam animæ comprehendere non posset, ut uno saltu extra omnes difficultates se expediret, dixit, animam nihil esse.

Aliàs tamen, si Plutarcho credimus, idem *harmoniam quandam* Plut. lib. 4.  
& *temperiem quatuor elementorum*, esse definivit. c. 2. Placit.

Eadem vel proxima sententia Hippocrati & Galeno à quibusdam tribuitur; ideoque Iul. Scaliger *nefandum Hippocratis deliramentum* appellat: à quo, inquit, non absunt Galeni *trepidationes*. Scal Exerc. 101. Nam quid sit anima se nescire, sæpenuerò Galenus fatetur; & cum hominum mores à temperie corporis tam potenter inclinari perpenderet, semel apertè dicere ausus fuit, *Ingentem sibi iam oboriri suspicionem, ut totam animæ substantiam, esse corpoream credat.* Galen. lib. Quoddam mor- res temper. seqq. Nullam enim aliam animam in corpore

animalis, præter temperiem, aut calidum innatum, aut spiritum, qui in hepate, corde, cerebro fabricatur, agnoscere videtur. Et in eundem sensum etiam Hippocratem non solus Scaliger, sed alij quidam interpretantur. In hunc quoque errorem passim defiliunt nostri temporis Epicurei & Athei. Nihil enim ipsis, ad enecandam animæ humanæ immortalitatem expeditius visum, quàm si ipsam temperamentum aliquod, aut spiritum corporeum & corruptibilem esse constituent.

Sed isti non tantum in Deum impij, & in naturæ humanæ dignitatem injuri, sed in naturali Philofophia stupidi & obtusi sunt. Quomodo enim tam nobiles sentiendi, & intelligendi operationes ab elementaribus qualitatibus, sine alia causa principali eliciantur; quomodo moles humani corporis, in pedes tam diu, tantâ facilitate librari, suspendi, & in omnem differentiam sitûs, à sola temperie corporis, aut spiritibus etiam vitalibus, animalibus moveri valeat, intelligi non potest: nisi anima alia in nobis habitet, quæ spiritus illos, lubricos &

diffuentes regat, contineat, agat, & aliò dilapſos perpetuo ſupplemento reſarciat.

Argent. in  
Artem Gal.

Deinde, ut pulchrè Io. Argenterius: *Si actiones qua in corporibus reperiuntur, non ex alia cauſa, quàm ex temperamento proveniunt, erunt proſectò mores & actiones porcorum ſimillima moribus & actionibus hominum: cum caro ſuilla ſimilis ſaporis & temperamenti cum carne humana, à Galeno eſſe dicatur, Methodi 7. & alibi.*

Scalig.  
Exerc. 307.

Et eruditus Scaliger: *In anima eſt facultas ad movendum antrorſum, retrorſum, dextrorſum, ſiniſtrorſum; quod in elemento nullo. Alia quæque longè illuſtriores ſunt anima potentia, qua non ſunt in elementis. Sed hæc de motu manifeſtiora propius tangunt, atque trunt iſtos Elementarios anima carnifices.*

Sed corrupto temperamento, homo moritur, inquiunt Epicurei; ergo anima nihil aliud eſſe videtur, quàm temperamentum.

Quibus ſcitè reſpondet Argenterius: *Perinde hoc eſſe, ac ſi quis dicat, animam eſſe caput, eo quòd capite ſublato, cogatur illa corpus deſerere. Aut ſi quis dicat, hominem eſſe domum, quòd ea ſlagrante, aut ruente, homo vel obruatur, aut abire cogatur.*

Andr. Laurent. lib. 7.  
q. 1. Anat.

Denique ridiculum eſt, propter morum diſſonantiam, aliam animam juveni, aliam ſeni inferere. Sic enim per ſingulos ætatum gradus, animarum admittenda eſſet metamorphoſis; & puer in adoleſcentem, adoleſcens in juvenem, hic in virum, vir in ſenem, imò maſculus in ſpadonem, propriiſſimè emoreretur. Nam *maxima & panè incredibilis eſt teſtium viſ, ait Laurentius, non modò ad fecunditatem, ſed etiam ad temperamenti, habitûs, ſubſtantia propriæ, & morum alterationem. Hic veluti Lares focum quæ contineri vult Galenus, quo univerſum corpus incaleſcat. Temperiem enim immutari docent, non modo execti, ſed etiam attriti, contorti, refrigerati, & convulſi teſtes. Ex calida enim temperie in frigidam ſtatim fit converſio. Imò vir caſtratione quodammodo vertitur in feminam.*

Igitur argumenta Galeni ſolùm evincunt, temperiem & vitales animalesque ſpiritus, eſſe instrumenta principalis animæ, & iſtam ab illis in varios impetus & mores inclinari. Nec enim inſolens & novum eſt, ut perfectio, vel imperfectio eſſe-



Ad effectus plurimum debeat bonitati, vel malitiæ instrumentalis causæ. Hinc quidam ex corporis temperie ad virtutes, alij ad vitia dicuntur à natura facti, ut D. Thomas <sup>D. Th. 1.2. q. 63. a. 1.</sup> docet. Hinc Iura illegittimos, tanquam irregulares, ab Ecclesiasticis Ordinibus arcent; quia tales frequenter, sicut temperiæ, ita vitia & incontinentiam parentum imitari solent, ait Sixtus V. in terribili illo Diplomate, adversus illegittimorum promotionem, An. 1587. edito. Et ut Bonifacius Martyr Regi Anglorum scribit: *Commixtione meretricum, degeneres populi, & ignobiles, & furentes libidine, nec in bello seculari fortes, nec in fide stabiles, nec honorabiles hominibus, nec Deo amabiles procreantur.* Non quia meretricum filij animas alterius speciei, sed quia temperiem (quam etiam educatio mala adjuvat) maculosam, & ad vitia factam habent. Vnde non magis ea de causa, oportet temperiem vocare animam, quam τὸν πρῶτον εἶτε τὸν δεύτερον τὸν τρίτον, ferram aut asciam fabrum appellare, ut Aristoteles alicubi <sup>Arist lib. 2. c. 7. de partib.</sup> eleganter & scitissime. Licet autem quæ jam diximus, solum animam rationalem, & sensitivam non esse nudam corporis temperiem, directè probent; ex similitudine tamen operationum, facillè colligitur, animam quoque vegetativam plantarum, esse aliquid nobilius & eminentius, quam qualitarum primarum temperiem, ut Art. IV. magis dilucebit.

## ARTICULVS III.

*Medici quidam Hippocratem & Galenum ab errore Epicureorum liberare conantur.*

Cum Hippocrates & Galenus corporis temperiem, aut calidum innatum, vel spiritum in hepate, corde, cerebro elaboratum, animam appellant, Andr. Laurentius <sup>Laurent. lib. 10. q. 3.</sup> de animâ Medicâ, non de Philosophicâ, aut Theologicâ loquitur, qui eos existimat. Dum animam temperiem appellat Galenus, non vult, inquit, temperiem formam esse hominis ratione utentis; sed formam Medicam, quæ sola in Medici considerationem cadit. Illud namque quod nec servari potest præsens, nec absens restitui, non cadit in <sup>Medici</sup>

*Medici contemplationem. At intelligens anima, nec præsens servari potest: solum autem temperamentum & præsens servari, & absens restitui potest. Erit igitur solum temperamentum forma hominis Medica: quia Medicus humanum corpus considerat, non quatenus Physicum, materia constans & formâ, sed quatenus sanabile & agrotabile.*

Fernel.

lib. 2. c. 4.  
de abdit.

Similia fermé Fernelius. Ait enim, Galenum agere de anima, ut per temperiem & qualitates affixa est corpori, & maneatne superstes, an extinguatur cum corporis temperie, id extra Medicorum curam esse.

Hippocr.

lib. de car-  
nib.

Hippocrates alicubi etiam amplius dicere videtur. Senempe in re Medica plerumque loqui de anima ex veterum opinione. *Nunc vero, inquit, ut sententiam meam patefaciam: Profecto mihi videtur, id quod calidum caloremve dicimus, quiddam non mortale esse.* Unde Fernelius statim colligit, eum verbis istis animæ immortalitatem stabilivisse. Fortasse autem Hippocrates animam immortalem, *calidum*, aut *calorem* appellavit, quomodo nomen effectûs solet ad causam, & contrâ, nomen causæ solet ad effectum, per metonymiam transferri. Nam calidum innatum calorque naturalis ab anima tanquam fonte conservantur; & reciprocè, anima ab illis tanquam dispositionibus, in corpore retinetur. Nam hoc etiam pacto Scriptura sacra sanguinem, animalis animam vocat. Vbi enim Deuteron. 12. Latine legimus, *Cave, ne sanguinem comedas: sanguis enim eorum pro anima est*, Hebræi & 70. legunt, *Sanguis enim est anima*. Non, inquam, propriè, sed metonymicè sanguis est anima; quia sanguis calore & temperie sua, temperamentum corporis fovet, animam in corpore conservat & retinet: unde effuso sanguine animal illicd expirat. Hanc metonymicam improprietatem indicare, credo, voluit S. Hieronymus, quando vertit, *sanguis pro anima est*, id est, instar animæ; non autem, *est anima*, ut in Hebræo legerat. Quam etiam phrasin imitatur Poëta, cum, *Purpuream vomit ille animam*, dixit.

Deuteron.  
12.

Virgil.

Faveo igitur Hippocrati & Galeno, ut quando temperiem corporis, aut spiritum naturalem, vitalem, animale, animam appellitant, eâ phrasi loquantur, qua Scriptura sacra sanguinem, animam vocat. Et sanè Galenus lib. 3. c. 3. de locis affect.



effect. disertè dicit, spiritum animale, non animam esse, sed *primum anima instrumentum, in omnibus sensibilibus operationibus, & ijs quæ à consilio & voluntate proficiscuntur.* Censet igitur animam esse aliquid supra illud instrumentum, nec eam magis esse propriè spiritum animale, quàm faber sit securis.

Attamen, quin de substantia animæ, etiam rationalis, vehementer cum tot alijs Philosophis, dubitaverint ( & præsertim Galenus, qui fluctum suum tam sæpe manifestat ) ambigi non potest. Hæc enim est caligo & potestas tenebrarum humani intellectus, quam fidei Christianæ lux non illuminat.

Valde etiam metuo, ne quando interdum dicunt, *animam hominis de calo esse, aut, esse spiritum corporibus elementaribus sublimiorem;* non statim ideo ipsos animæ nostræ spiritualitatem & immortalitatem adstruere; sed loqui, ut Poëtam illum, qui *animam divinæ particulam auræ;* id est, auræ æthereæ, in qua sidera volant & palantur, particulam decerptam, & corpori humano insertam, vocavit. Sicut enim sidera Deos appellabant ( quod apertè Galenus facit ) ita superiorem ætherem, in quo tanquam suo elemento Dij illi vivunt, *divinam auram* vocaverunt. Divina autem illa aura, corporea est, & fortè corruptibilis, aërique nostro simillima; nisi quòd subtilior, & sublimiorem in universo stationem obtineat. Ejusmodi autem divinæ auræ particula, anima rationalis non est, cùm hæc sit incorporea & incorruptibilis. Nec aura vivificare corpora nostra potest, cùm ipsamet vitâ careat.

Horat.

## ARTICVLVS IV.

*Animam non accidens, sed substantiam esse.*

**A**nimam rationalem, substantiam esse, ex ejus incorruptibilitate & immortalitate ( quam ei postea asseremus ) facillimè probatur. Si enim à corpore superstes manet, non est igitur accidens; quod sine subjecti sustentaculo naturaliter esse non potest.

Si autem anima rationalis non est accidens, sed substantia,

B

facili

facili conjecturâ assequimur, animas quoque sensitivas brutorum, esse substantias, non accidentia. Similitudo enim operationum sensitivarum, quas in bruto & homine advertimus, id satis evincit. Si namque in homine substantia quædam est, quæ per oculos videt, per aures audit &c. quis ambiget, illud quoque esse substantiam, & quidem valde nobilem, quod corpori equi aut bovis inclusum, per oculos etiam, velut per fenestras, forâs prospicit, & per aures in sonitum se extendit? Similis consequentia ad animas plantarum nos deducit. Si enim quod in homine, & brutis animantibus, alimentum attrahit, coquit, & per singula membra dispensat, substantia est; profectò nemo nisi pertinax, animam arboris, cujus simillimas operationes advertit, substantiam esse negabit. Est enim arbor quodammodò homo inversus: cujus caput (id est radix) in terram defixum, brachijs & cruribus sursum in ramos effusis.

Alio quoque modo probari potest, supponendo (quod inferius probandum erit) animam rationalem esse formam substantialem, quæ cum materia prima compositum unius naturæ absolvit. Hinc enim sequitur, materiam primam esse ens substantiale incompletum: unde in brutis & plantis eam aliqua substantiali formâ compleri etiam oporteat; ne in illis perpetuò incompleta maneat. Hoc autem substantiale materiæ primæ complementum, nihil est aliud, quàm anima sensitiva bruti, & vegetativa plantæ.

## ARTICVLVS V.

*Non sola anima, sed formæ etiam quædam inanimæ aliquam partium materiæ suæ conformationem flagitant.*

**C**Redo Iul. Scaligero potius, quàm Cardano & Campanellæ: lapides & metalla non vivere; sed omnium lapidum & metallorum figuras casu (ut Centauri & castella figurantur in nubibus) non à forma eorum substantiali sic factas esse, nondum possum accredere.

Rideat.



Rideat ergo Scaliger Cardanum his & similibus exemplis:

Scalig.  
Exerc. 102.

*Rupes imminet Oceano Scythico, quæ Zlota Babba, hoc est, Anus aurea dicitur. Anus enim præ se fert formam. Est promontorium à specie quam refert, Nasus sacer appellatum, in finibus Finlappiorum. In Islandico Oceano rupes est Monachi figurâ, quæ portum facit. Rideat, inquam, Scaliger, non improbo. Verum licet cum ipso confitear, lapideos illos Anum, Nasum, Monachum casu, non à natura formæ inhabitantis, sic figuratos fuisse; quid tamen faciet tot alijs exemplis, ubi non unum, aut alterum individuum illius speciei, sed omnia prorsus, à primo ad ultimum, eâdem figurâ insignita sunt? Nam crytalli omnes sexangulæ, berylli teretes ut cylindri, androdamantes quadrati ut tessellæ. Vna adamantis species, ait Bodinus, est sexangulari figurâ, & utraque extremitate tam affabrè & concinnè turbinatâ, ut nulli artificio comparari possit. Et Plinius. Quare crastallus sexangulis nascatur lateribus, non facile ratio inveniri potest: eo magis, quod neque mucronibus eadem species est. Et ita absolutus est laterum levor, ut nulla id arte possit æuari. In quibusdam Cubæ Insulæ vallibus omnes lapides circumcisè rotundi. Nec tamen mutuo confrictu in orbem sic triti; ut de umbilicis, seu rotundis lapillis in æstuarijs maris, quos *ῥόκκας* vocat, Aristoteles dicit.*

Georg.  
Agricola  
lib. 1. c. 13.  
fossil.

Plin. lib. 37.  
c. 2.

Quid jam de limacum, testudinum, concharum, ostreorum, buccinorum, & infinitæ varietatis crustaceorum testis, tam impensâ ingenij subtilitate, in tot labyrinthorum formas cuniculatim elaboratis, tam multiplici circumcurrentium striarum ordine inaratis; & modò in turbinem, modò in metam fastigiatis, aut millesimo alio naturæ lusu distortis & effigiatis, dicam? Et tamen plerique & nobiliores Philosophi non magis crustaceos istos Lares, quàm Diogenis dolium, animatos esse existimant. Ova deinde, ac plurima plantarum semina, partes quasdam heterogenias & similes organicis habere videntur; cum tamen Aristoteles ea vivere neget, quia negat propriè mori. Denique sanguinem plurimi Medicorum sine anima esse dicunt; qui tamen partibus heterogenijs; ut fibris, & diversis humoribus constat.

Arist. 2. 17.  
de respirat.

Multi quoque lapides & gemmæ similem viventibus,

Boeth. lib. 2  
c. 95. de  
gemmis.

colorum in diversis partibus suis varietatem, pingente naturâ habent. Quod in jaspide, & achate est maximè insigne & conspicuum. Inveniuntur achates, ait Ansel. Boethius, Rudolphi Cæsaris Medicus, quæ nemora, flumina, arbores, animalia, fructus, flores, herbas, nubes, & quidquid excogitari possit, non obscure referant. Celebratur ab Auctoribus Pyrrhi Regis achates, in qua spectabantur novem Musæ, & Apollo citharam tenens, non arte, sed sponte ita discurrentibus maculis & coloribus, ut Musis quoque singulis redderentur insignia, non secus ac si arte elaborata fuisset. Et postea, de Imp. Rudolphi iaspidibus: Vidi, inquit, in scrinio Imp. Rudolphi II. Domini mei Clementiss. quasdam iaspides nemora, palustria loca, arbores, nubes, & flumina ita naturaliter referentes, ut procul aspicienti non lapis, sed pictura putaretur. Et rerum subterranearum consultissimus Agricola: Quædam fossilia divisa, inquit, diversarum rerum effigies representant; ut enorchis testium, entrochos rotarum, enostas osium &c.

Illa autem colorum, in omnibus ejusdem speciei lapidibus varietas, & illa veluti membrorum distinctio & multiformitas, videtur à formâ substantiali inanima talium corporum provenire, quæ animæ imitatrix aliquam temperamenti in alijs alijsq; materiæ suæ partibus, varietatem, unde illa coloris & figuræ diversitas resultat, videtur postulare. Nam quicumque in crystallis sexangularibus, in ostreorum omniumque crustaceorum figuris, alias causas invenire tentaverunt, videmus incassum se defatigasse.

Nec tamen propter istas figuras, & rudes rerum animatarum similitudines, vitam lapidibus & saxis (quod Cardanus, Campanella, Keplerus, alijque ferè Chymicorum faciunt) donare oportet. Nam etiam si nonnulli lapides corpus in varias membrorum imagines, non à casu, sed à natura effigiatum habeant; membra tamen ista, non nisi æquivocè membra & organa dici possunt; unde nec corpus eorum organicum est. Est enim corporis animati propriū, organicum esse, & distinctionem membrorum, non quomodocumque, sed eo fine postulare, ut forma ejus varias in membris, & per membra operationes exercent, quibus ipsum vivens seipsum perficiat & exornet.



exornet. Et hoc sensu Aristoteles corpus animatum, & corpus organicum, promiscuè pro iisdem usurpat. Corpora verò illa inanimata non eo fine, ut in seipsa actione immanente agant, rudimentum illud membrorum postulant; sed potius, ut functiones suas certo numero, mensurâ, & modo forâs, actione transeunte spargant. Res exemplo magis conspicua fiet. Fac, Octavæ Sphæræ substantialem inanimam formam, præter figuram totius corporis sui rotundam, tot partes, veluti membra, quot sunt sidera ei infixâ, postulare; & omnia temperie naturali, ac Influentijs inter se distincta esse: diversæ tamen illæ siderum complexiones, & Influentiæ, velut & singulorum magnitudines ac figuræ, ad Mundi elementaris fundendas modulandasque alterationes sunt à natura destinatæ. Secus verò res habet in corpore animato. Nam membra & organa ejus (ut oculi, aures, lingua, manus, pes &c.) diversas complexiones, magnitudines, figuras, potentias habent, non ut forâs functiones suas effundant; sed ut domi eas contineant, & corpus suum vitali & immanente actione perficiant. Sunt ergo organa corpori animato, tanquam domestica suppellex, quâ anima in culinâ & familiâ, ut sic dicam, sui corporis tantum utitur.

Itaque sicut natura, à planta, per spongas & ζώοντα, seu plantanimalia, ad perfectum animal brutum, & per simiam, ad hominem sensim ascendit; ita ab inanimatis ad plantam, per rudimenta quædam plantarum, paulatim proficit: adeoque conformatio illa quorundam veluti membrorum, quæ in lapidibus & metallis insensibilibus apparet, nihil est aliud quàm rudimentum quoddam naturæ, membra & organa plantarum animaliumque facere, ut sic dicam, condiscantis. Et hoc est, quod Cardanum, Campanellam, Keplerum, & omnes qui vitam lapidibus & metallis inculcant, fefellit. Nam, ut præclare Aristoteles: *Adeo ab inanimatis paulatim sensimque ad animata natura transit, ut continuatione ipsâ lateat eorum confinium,* *& medium utriusnam sit extremi, ambiguum sit.* Sed tamen propter celebritatem Auctorum, qui Aristotelem hîc calcando, magni

Arist. lib. 8.

c. r. Histor. animal.

quibusdam apparent, pauld longius rem istam introspiciamus.

## ARTICVLVS VI.

*An lapides & metalla vivant, ut placet Cardano, Campanella, & alijs.*

Arist. lib. 1.  
c. 2. de  
anima.

**T**Hales, inquit Aristoteles, dicit *magnetem animam habere, quia ferrum movet*. Cardanus non tantum magnetem, sed ceteros lapides, & metalla animat. Campanella liberalior, omnibus corporibus, etiam simplicibus terræ, aquæ, aëri, igni vitam, & quidem sensitivam donat: Io. Keplerus, Rudolphi II. Cæsaris Mathematicus, terram animâ etiam intelligente exornat.

Sed non est, cur à Peripateticâ & verâ Philosophiâ, paradoxorum amore, aut sophisticis eorum argumentis recedamus.

Igitur lapidibus & metallis animam vegetatricem, cum Aristotele, & rerum metallicarum doctissimo Agricola, negamus. Non enim generant, nutriuntur, crescunt, plantarum legibus & more.

Lapis enim aut metallum, aliud simile vitaliter non generat; sed quoties novum individuum nascitur, non ex semine alterius, aut alio vitali modo gignitur, sed ex halitu terræ & aquæ, vel corporum mixtorum in unum *q̄b̄p̄a* convoluto & fermentato, à causâ efficiente inanimatâ coalescit.

Georg.  
Agricola  
lib. 5. c. 11.  
de ortu  
subterr.

*Mixtura aqua & terra, inquit Agricola, calore subterraneo ad aliquam spissitudinem coquitur; sed succum, qui sic provenit, postea frigore densari, ut fiat metallum, sentimus.*

Non etiam vitali attractione, concoctione, distributione, agglutinatione alimenti, lapides & metalla nutriuntur; quidquid contradicant Cardanus, Campanella, & eorum sequaces.

Nam licet in quibusdam similitudo quædam venarum appareat, non tamen re verâ venæ sunt, nec organa ad vitalem suctum alimenti facta, sed meatus quidam casu, sine lege, sine proportio-



proportione hâc illâc discurrentes; quos aër aut spiritus metallicus materiâ densiori interceptus exaravit.

Deinde in auro, crystallis, & plurimis lapidibus pretiosis, nulli, aut vix sunt pori ac meatus; adeoque tales lapides aut metalla alimento intra viscera sua attracto ali non possunt.

Metalla verò quæ in venis metallicis nutriri, & velut in truncos, & ramos crescere scribit Cardanus, non etiam vitaliter, & servatâ partium in omnem dimensionem proportionem, incrementum illud rapiunt; sed per novum materiæ ad hanc aut illam partem extrinsecus additamentum: & moles, aut figura qua se metallum induit, non ab anima venit, sed à loci capacitate, & venarum concavitate, quæ per rupes discurrunt: quemadmodum plumbeæ glandes figuram rapiunt ferreæ formæ, cui liquatum plumbum infunditur.

Non igitur Campanellæ credimus, qui Apenninos, Alpes, ceterosque montes vitaliter crevisse existimat. *Apenninorum substantia lapidea*, inquit, *in montes superbissimos crevit. Vbi videre licet passim tanquam ramos arboreos in figuram oblongam quadratam expandi. Nec quidem potest sol subito erexisse substantiam hanc in montes Apenninos, & Alpes, & Pyrenæos Hispanicos, & Acroceraunos Dalmatas &c. qui per miliaria plurima extenduntur, & in aërem tantopere attolluntur.* Campanell.  
lib. 3. c. 13.  
de sensu.

Verùm etsi sol tantas moles erigere non potuerit, Deus tamen olim tertio conditi Mundi die potuit, quando

*Iussit & extendi campos, subsidere valles,*

*Fronde tegi silvas, lapidosos surgere montes.*

Ovid.

Terrenam enim materiam excavati alvei fluminum ac maris, in littora ejecit, moxque in rupes & montes duravit. In locis quoque mediterraneis montes quosdam in auras extulit, ut subterraneæ & fontium matrici abyssò, ac deinde ignibus subterraneis, & metallorum officinis locum infernè aperiret. Præter paucas tamen veluti talparum metas, quas vel è terræ plano in monticulos, vel è maris fundo in Insulas, seculis posterioribus, spiritus, aut ignis subterraneus, ut olim in Meteorologicis nostris differebamus, evexit. Si enim Alpes, & Apennini paulatim, ut arbores, crescerent, proce-  
riores.

Lib. 4. c. ult.  
a. 7. Meteor.

riores sanè non paulò hodie essent, quàm olim, quando Hannibal per eos extraxit suum exercitum. Et tamen, ut ex veterum Geometrarum mensuris colligere licet, antiqua tot seculorum excelitas adhuc manet.

Sed ne quidem corallium, aut arborem Chymicam Io. Baptistæ Portæ vivere, unquam Campanellæ dabimus. Corallium, inquit Campanella, arborem lapideam intra mare esse, nemo ignorat. Quod agrotis appositum, colorem amittit, ubi febricitant: ubi cessat febris, iterum rubescit, uti cara, cui est similis, & ejus affectiones compatitur ( & inde sensum quoque ei inesse probat. ) Porta narravit mihi, addit, argentum, intra quasdam ipsius aquas Chymicas, conversum fuisse in arborem parvam frondosam formosamq;.

Scalig.  
Exer. 102.

Sed corallium, aut arborem istam vitalem & animatam esse, nisi alijs argumentis, quàm figurâ illâ ramalium, probetur, non concedimus. Potest enim corallium, potuit illa Bapt. Portæ Chymica arbuscula, ex halitu inanimo, ut metalla in visceribus terræ, concrevisse; sicut de auro Hungarico narrat Scaliger. In Hungaria, inquit, exit aurum è terra solo, quasi germinans, filamentis specie, longitudine quaternum circiter digitorum, aliquando etiam denum. Natura est, non tanquam planta, sed quasi succi glaciati, atque ex terra venis expressi. Velut in summis glebis olim vicina Dalmatia.

Si autem in montibus, lapidibus, & metallis nulla vita vegetativa, multo minùs sensitiva inerit. Nulla enim sensus instrumenta in talibus corporibus homogeneis advertimus, nec contusa malleis ulla signa reddunt doloris & sensus. Quàm enim ridiculum, quod dicere non pudet Campanellam: Si calamus scriptorius, aut Eremitæ Augustiniani lorea corrigia conijciatur in ignem, contrahi, & convolvi in spiras impatientiâ doloris; non secùs, ac si quis vivam anguillam in ignem projiceret? Cùm tamen aliam causam illius motus & jactationis mortuæ corrigiæ ( nempe spiritus fugitivos, quos ignis è corio resolvit ) reperire difficile non sit, etiamsi omni dolore & sensu careat.

ARTICV



## ARTICVLVS VII.

*An terra vivat, ut Keplerus contendit.*

**M**irum profectò est Kepleri Mathematici Cæsarei, de anima terræ, machinamentum, cui struendo viginti annos se sudasse narrat.

Terræ enim elementum, animal quoddam magnum esse existimat.

*Vt enim corpus nostrum, ait, in cutis superficie pilos; sic terra plan-* Kepler.  
lib. 4. c. 7.  
Harmonic,  
*tas arboresq; profert. Et sicut in pilis pediculi; ita in terra, cruce, ci-*  
*cade, variag; insecta, & monstra marina nascuntur. Et ut corpus no-*  
*strum lacrymas, blennam, auriumque recrementa, & gummi ex faciei pu-*  
*stulis; sic tellus electrum & bitumen. Vtq; vesica urinam; sic terra mon-*  
*tes flumina fundunt. Et ut corpus excrementum sulphurei odoris, cre-*  
*pitusque, qui etiam inflammari possunt; sic terra sulphur, ignes subter-*  
*raneos, tonitrua, fulgura. Vtque in venis animantis generatur sanguis,*  
*& cum eo sudor extra corpus eiectus; sic in venis terra, metalla &*  
*fossilia, vaporq; pluvius.*

Et Keplero vehementer assentiens Campanella, ac Pytha- Campanel.  
lib. 3. c. 5.  
de sensu.  
goram in consensum ducens: *Pythagoras animal corpulentum, in-*  
*quit, terram esse putat; cuius pili ac crines sunt planta & arbores, ossa*  
*lapides. Animalia in ea sunt, sicut pediculi in capite nostro; & in cen-*  
*tro calidam esse vult, sicut cor in nobis.*

Homines igitur, equi, boves, & elephantes sunt pediculi  
terræ, si Pythagoræ & Campanellæ credere volumus. Et  
hanc tam ingeniosam Pythagoræ Philosophiam eò subtilitatis  
provexit Campanella; ut non solum in terra, sed etiam in aqua,  
aëre, & igne animas sensitivas invenerit; imò omnes qualita-  
tes primas, calorem, frigus, deinde lucem, imò (si Deo placet)  
tenebras etiam, corpora quædam animata & sensitiva  
esse deprehenderit. Vnde hac in parte ultra Manichæorum  
deliria videtur progressus: qui, ut ait S. Augustinus, *Quod ha-* S. August.  
Tract. 4. in  
Io.  
*beat vitam lapidis, & habeat animam paries, & resticula, & lana, &*  
*vestis, delirantes dicere solent. Et cum repressi fuerint & repulsi, quasi*

Id. 1.

de Scripturis proferunt, dicentes: *Vt quid dictum est, Quod factum est in ipso, vita est? Si enim omnia in ipso facta sunt, omnia vita sunt. Vbi sententiam istam: Quod factum est, in ipso vita erat, in hæresis suæ patrociniū male interpungebant, ut notat S. Augustinus; comma postponentes particulæ, in ipso, cum tamen præponere oporteat: ut significetur, non quod vestis, aut arca in opere ipso externo vita sit, aut vitam habeat, sed quia vivit anima artificis, ubi sunt ista omnia, antequam proferantur.*

Campanel.  
lib. 2. c. 5.  
de sensu.

Ad illam autem tam crassam & pinguis Minervæ Philosophiam, temperamento sui corporis, & spirituum vitalium subtilitate se vehementer adjutum Campanella credit. Nam spiritus qui corpore ejus exhalabant, adeo tenues, æthereos, macro, & nulla viscolitate implicitos fuisse dicit, ut defectu pellis, nulli inde pediculi formari quiverint. Eum enim loquentem, ad risum & amoenitatem in brevi hoc transitu, audiamus. *Caro putrescens, inquit, in loco præsertim calido, vermes producit, & urina calor in pulvere pulices, & unctuosus sudor humanus pediculos. Quos ego unus non produco; ac mihi appositi, aut fugiant, aut citò pereunt. Meus enim calor illis non convenit; cum sim ego corpore absolutus exsiccatusq̃, & spiritibus abundans vividis; excrementaq̃ tenuia resoluta, non apta ad producendum corticem, constipandumq̃, ulla unctuositate includendo spiritu. Sed hoc alibi, fortasse viderimus, cum de ingenij humani bonitate differemus.*

Nunc, terram ullâ vitâ vivere, Campanellæ & Keplero pernegamus. Nulla enim in primis vitæ vegetativæ (quæ omnium prima est) in corpore terræ, instrumenta, quibus alimentum attrahat & concoquat, videmus.

Imò verò alvei fluminum, & subterranei meatus, sunt oesophagus & venæ, inquit Keplerus, per quas terra alimentum suum bibit.

Verum, non virtute aliqua vitali, aqua fluminum à tellure tanquam alimentum attrahitur, sed proprio & ultroneo suo pondere, per prona alvei in terram, vel in mare delabitur. Et simili quoque pondere aqua marina, alveo suo excidit, & in cuniculos venasque subterraneas evolvitur; non vitali aliquo

suctu.



factu proleatur. Deinde aqua illa non est proprium & vitale terræ alimentum; quandoquidem in eam non convertatur servatâ illâ incrementi partium proportionem, quam viventia observare solent.

Sed facultas saltem generativa vitali, corpori terræ inest, iterum obijcit Keplerus. Nam *ab ea, in terra superficie tot stirpium genera spontanea, tot insecta formantur. Inest deinde, ait, facultas formatrix in intimis terræ visceribus, planè similis ei, quæ est in feminis: ut species foris occurrentes, intus exprimat, ut aves, pisces, Reges, Pontifices, Monachos, milites fossiles.* Kepler. Lib. 1. Epit.

Sed profectò, si terræ inest facultas vitalis generativa, non arbores & plantas in superficie, Reges, Pontifices, Monachos in visceribus suis; sed aliam terram similem, tanquam filiam gigneret; sicut plantæ, & animalia sibi similia generare solent. Arbores autem, & Reges, Pontifices, ac Monachi lapidei specie differunt ab elemento terræ. Vnde Aristoteles, longè quàm Keplerus aut Campanella sapientior, terram non matrem, sed *quasi matrem, & quasi feminam, Solem verò & cælum, quasi patrem arborum & plantarum appellat. Terra enim, veluti mater, succum suum in materiam generationis plantarum subministrat, quam Sol & cælum calore & Influentijs suis maritat.* Arist. lib. 1. c. 2. de generationat. animal.

Ridiculum autem est, dicere terram appulsu navis ad littus, aut conspectu Monachi fortè exterritam, materiam lapidis in suis visceribus, in figuram navis, aut Monachi conformare; velut mulier gravida simili terrore foetum suum signat & deformat. Vbi enim sunt oculi terræ, quibus navem, aut Monachum videre potest?

Lapides igitur illi, vel casu, propter materiæ situm, in navium, Regum, Pontificum, Monachorum speciem figurantur; vel fortasse forma substantialis talis lapidis aut mineralis, ejusmodi figuram flagitare interdum potest.

Formæ enim quædam inanimæ, ut Artic. V. dicebamus, aliquam quandoque materiæ suæ configurationem (quæ tamen organica non sit) postulant. Si autem terra nec nutritur, nec crescit, nec generat vitaliter, vitâ sanè vegetatrice caret. Vnde nec vitâ sensitivâ vivere potest. Nam vegetatrix

vita est sensitivæ fundamentum, ut in omnibus animalibus experimur. Operationes quippe animæ vegetativæ, operationibus sensitivæ subalternantur. Nam per chylosin, & chymosin materiam præparando, vegetatrix tandem in corde spiritus vitales, & denique in cerebro spiritus animales elimat & perficit, quibus anima sensitiva operationes suas administrat. Habet se igitur anima vegetativa ad sensitivam, ut naupagus ad nauclerum. Fabricat enim ille naves, quibus iste utitur.

Præterea, nulla sensuum externorum, aut internorum organa in terræ elemento visuntur. Videre autem, audire, olfacere &c. sine organis ad hoc à natura factis, non tantum insolens est, sed etiam contra rationem sensitivæ functionis, quam anima sensitiva, non quomodocumque, sed per species sensibiles intra organum aliquod receptas, & certo modo ibi figuratas modificatasque, moliri debet.

Kepler.  
lib. 4 c. 7.  
Harmon.

Verum terra, non per oculum, sed per radium suum, stellæ lucem videre potest, imaginatur & ait Keplerus; si radius animæ, à centro terræ recta in cælum missus, radio stellæ occurrat. *Actuatur enim tunc, inquit, & veluti illuminatur radius animæ à radio stellæ, in eandem rectam congruente; sicut actuatur color rerum visibilibus à lucis adventu; & sicut actuatur visio, cum nos colligimus & perpendimus nos videre.*

Sed, si sine organo oculi, per duorum radiorum concursum, visio sic fieri potest, quid causæ est, cur anima hominis cæci & exoculati, in media sua fronte non videt, quando radius solis directè frontem ejus tangit? Nam anima ejus, aut animæ si quis est invisibilis radius, radio solis ibi occurrit, ac ei se permiscere, & ab eo actuari potest; quidquid per actuationem istam Keplerus intelligat.

Si deinde est potentia videndi in terra, utique & potentia tangendi inerit; cum tactus sit omnium sensuum primus. At quis credat terræ inesse tactum, quandoquidem tot rastris, ligonibus, aratri tergum ejus proscissum, nullo indicio se ista vulnera sentire significet?

Motum quoque terræ, tam diurnum, circa suum centrum, quam annum, circa solem, etsi Keplero & Copernicanis daremus



daremus (quem tamen in Antaritharcho & Vestâ olim rejecimus; ) nego tamen illum animale esse, & ab anima terræ fieri. Nam omnis motus animalium vitalis, non quomodo-  
cumque, sed certis à natura fabricatis instrumentis, ut nervis, musculis, pedibus, alis &c. efficitur; quorum nihil simile in terræ elemento advertimus. Vbi enim sunt telluris alæ, quibus tantâ pernicitate intra Planetas annuo motu circumvolat; ubi nervi & muscoli, quibus rapidissimâ vertigine quotidie circa centrum suum se rotat? Si ergo Pythagoras, Aristarchus, Copernicus non mentiuntur, motus ille terræ uterque non ab anima corpus terræ inhabitante, sed à causa aliqua externa, ut motus projectorum, effici debet. Vnde ex tali motu, non probabiliori argumento terram vivere colliges, quàm sagittam, aut tormenti globum, quos arcus, aut pulvis accensus excutit.

Nec argumentum quotidianæ reciprocationis marini æstûs, ad asserendam telluri animam, plus momenti etiam habet. Fingit enim Keplerus in terræ visceribus, ingentium pulmonum folles esse, quibus vitaliter inspirando & respirando, terra senis horis Oceanum & quædam alia maria reciprocet. Quam causam marini æstûs, in Meteorol. nostris satis confutavimus.

Lib. 5. c. 2.  
a. 8. Meteor

Sed quod animam etiam rationalem terræ inesse credit, & inculcat Keplerus, hoc omne paradoxum superat. Sanè enim Ecclesia Christi jam nulla animalia rationalia, præter homines, qui terram calcant (inter quos non est ipsa terra) agnoscit. Deinde hæc opinio Kepleri, inter Origenis errores à SS. Patribus damnata censi potest. Nam unus ejus error erat: *Solem, & lunam, & astra cetera, esse animantia*, ut S. Hieronymus narrat. Keplerus autem inter astra & animantia cæli, terram ponit, eamque circa solem in centro Mundi (ut ipse credit) immobilem, cum luna ceterisque Planetis annuâ periodo circuire jubet.

S. Hieronymus  
Epist. ad  
Avitum

Deinde non solum terram, sed etiam solem & lunam stellâsque universas, tam palantes quàm fixas, Origenem, aut potius imaginationem suam secutus, Keplerus animat, ut

proximo Articulo videbimus.

Præcipuum verò & palmare argumentum, quo ipse animam rationalem telluri asserit, est istud.

Sub certis siderum posituris & aspectibus, videmus aërem commoveri & turbari, sub alijs requiescere & componi. Hi autem effectus non possunt in illos siderum aspectus, tanquam in causas efficientes referri; cum aspectus unius sideris ad alterum sit solum relatio quædam certæ propinquitatis, aut distantiae, quæ nihil efficere valet, cum sit ens rationis. Vnde colligit, non Planetarum & siderum aspectus esse, qui tempestates cient, & aëris statum conturbant, sed *animam terra, ab aspectu admonitam, & velat excitatam, ciere meteora & tempestates.*

Sed quis credat, animam tam rudis & stolidi corporis (qualis est terræ massa) tam ingeniosam, sapientem, & Astronomam esse, ut siderum accessus, recessus, configurationes, & aspectus, infinito melius quàm omnes Astrologi (quorum calculus tam sæpe delirat) intellectu comprehendat? Vnde enim ista anima scientiam illam accepit? Certè enim non studio: cum nullius Ptolemæi aut Hipparchi Scholam unquam intraverit. Igitur species intelligibiles, & scientiam rerum cælestium à Deo infusam habet: & sic non tam anima terræ informans, quàm Angelus quidam elemento terræ assistens erit. Angelorum enim, non animarum rationalium est, species rerum cognoscendarum à Creatore infusas accipere.

Igitur cum Aristotelis, Hipparchi, & Ptolemæi potiùs Philosophiâ, dicamus terræ globum inanimem esse, nec siderum aspectus intelligere, ut ad quosdam, tanquam sibi inimicos, irascatur, & spiritus tempestatum in aërem evomat; ad quosdam verò alios, velut amicos, spiritum suum revocet & contineat; quæ sunt melancholicæ Kepleri & Campanellæ imaginationes. Sed Planetæ sub certis aspectibus aërem commovent, aut tranquillat; quia ex simili propinquitate, aut distantia mutuos Influentiarum radios, quibus corpora sua feriunt, in aërem & Mundum elementarem reflectunt, eâ proportionem, quæ ad talem effectum est necessaria. Nam eo etiam fine, ut opinor, circa Saturnum sidera Austriaca, circa Iovem



Iovem Medicea, circa Solem Borbonia choreas ducunt: ut inquam, radios Principis Planetæ quem circumludunt, modulentur, & in Mundum elementarem detorqueant, ad effectus quos Creator novit, nos ignoramus. Vnde etiam primum est suspicari, ad mutuam illam radiorum reflexionem, prout inferiori Mundo expedit, modulandam, omnium Planetarum superficies esse aliquâ inæqualitate asperatas, non exactâ & Mathematicâ rotunditate circumcisas. Certè enim tales montium & vallium asperitates, ad luminis solaris reflexionem, in corpore Lunæ, per Arundinem Batavicam nos deprehendere putamus.

Denique, terram non esse rationale animans, inde satis probatur, quia nec vegetativum, nec sensitivum est: gradus autem rationalitatis, in eodem corpore gradum vegetativum & sensitivum supponit, ut statim dicemus.

## ARTICVLVS VIII.

*An sidera sint animata.*

**P**latonici, & Philosophorum plurimi olim magno consensu cælum & sidera vivere, & quidem vitâ rationali, opinati sunt.

Hanc quoque sententiam Græci & Arabes Interpretes Arist. lib. 2. c. 2. de cælo passim Aristoteli tribuunt. Vnde & Theophrastus, Aristotelis discipulus & in Lyceo successor, Præceptoris mentem optimè affecutus, animas cælo & sideribus dedit. Quin imò S. Thomas Lib. 2. c. 70. contra Gent. eam etiam opinionem Aristoteli adscribit; licet 1. p. q. 70. a. 3. tam Aristotelem quàm Platonem excuset, & de anima cæli assistente, non informante interpreteretur.

Stoici quoque ab eadem mente, *stellas νοερά ἀνὰμυαλα*, *faces intellectu præditas* appellabant. Nec aliud Ptolemæus & vetustiores Astronomi sensisse putantur. Et Tychonem quoque nuper hîc etiam Platonizantem audi. *Cælum animatum esse*, *ipsaq; cælestia corpora animantia quadam cæli, vitali spiritu prædita*, *man.*

Arist. lib. 2.  
c. 2. de cælo

Tych. Epist.  
ad Roth-  
man.

Orig. Epist.  
ad Brande-  
burg.

non abs re sensisse videtur divina illa Platoniorum Philosophia. Et David Origanus: Rectius statuunt, inquit, qui cum Hermete, Zoroastre, Orpheo, nostrisq; Gilberto totum animatum agnoscunt, ipsiq; astrorum & terra globis animas interiores, Deum, ut est in Psalmis & Iobo, cum iubilo laudantes, assignant.

S. August.  
c. 58. En-  
chirid.

Inter SS. Patres, præsertim Latinos, magna olim ea de re etiam dubitatio. S. Augustinus eorum vertex, & omnium circumspiciendissimus, quia nihil usquam resolutè asserere solet, nisi sacris litteris, aut Ecclesiæ Traditionibus expressum, aut certâ ratione comprehensum videat, hîc etiam vacillat. Nam nec illud quidem, ait, certum habeo: utrum ad eandem Angelorum societatem pertineant sol & luna & cuncta sidera; quamvis nonnullis lucida corpora esse, non cum sensu vel intelligentia videantur. Alibi tamen avertam magis à Platone inclinationem suam ostendens: Neque Platoni, inquit, continuo concedendum est, globos istos luminum, sive orbiculos, luce corporea super terras, seu die, seu nocte fulgentes, suis quibusdam proprijs animis vivere.

Lib. 13. c. 16  
Civit.

S. Hieronymus simili etiam fluctu fluctuat. Nam ubi Ecclesiastes ait, *Lustrans universa, in circuitu pergit spiritus*, dubitat, *An ipsum Solem, spiritum nominaverit; quod animet, & spiret, & vigeat, & annuos cursus expleat. An quod & Luna lucentem globum, & astra Titania*

*Spiritus intus alit, totamque infusa per artus*

*Mens agitat molem, & magno se corpore miscet.*

Isa. 30.

Hos enim Poetæ versus in Commentarium suum attrahit.

Et in ista Isaïæ verba, *Erit lux luna, sicut lux solis &c.* loquitur de luna & sole, tanquam de animalibus rationalibus, quæ laboris & cursus sui præmia consecutari sint; licet ea quidam, inquit, organa lucis intelligentes, insensibilia esse contendant: quod sanè Patres Græci Basilii, Nazianzenus, Chrysostomus, Cyrillus, Damascenus, & alij passim, unico pænè Origene excepto, docent. Imò ipse etiam Hieronymus alibi, inter Origenis errores hunc numerat: *Solem, & lunam, & astra cetera, esse animantia.*

S. Hierony.  
Epist. ad  
Avitum.

Sed tamen, quia nulla eo tempore extabat Ecclesiæ declaratio, liberum adhuc erat Platoni & Origeni consentire. Imò S. Thomas, tanto post tempore, negat esse de fide, cælos & stel-



& stellas inanimas esse. Hoc enim quod dictum est, inquit, de cali S. Th. lib. 2. c. 70. contra Gent. animatione, non diximus quasi asserendo secundum fidei doctrinam; ad quam nihil pertinet, siue sic, siue aliter dicatur. Et Scotus etiam sub- Scot. in 2. d. 14. q. 1. dubitans: Breviter, ait, si cali non sunt animati, hoc est creditum, non ratione conclusum. Quia nulla est conditio in corpore illo ita perfecta manifestè apparens repugnare animationi.

Nam licet tempore S. Thomæ & Scoti, in V. Synodo, Anno Christi DLIII. damnatio istius erroris, inter ceteros Origenis Anathematismos dudum præcessisset, vulgò tamen incognita erat; quia inter Acta Synodi, ab Origenistis, ut existimat Baronius, mutilata, non reperitur. Et licet Liberatus Diaconus Afer, & Nicephorus Callistus ejus damnationis meminerint, Auctor tamen uterque non omnino irrefragabilis est, & Nicephorus post obitum S. Thomæ, Historiam suam scripsit.

Sed postquam reperta jam est ab Ant. Augustino Epistola Iustiniani Imp. ad Mennam Patriarcham Constantinop. quam Baronius, ne iterum periret, Annalibus suis ad An. Christi DXXXVIII. inseruit, satis est manifestum, errorem Origenis de animatione cælorum, à V. Synodo fuisse condemnatum. Nam Orientis & Occidentis Orthodoxi Episcopi, qui tunc temporis Constantinopoli convenerant, nomine Imp. Iustiniani Epistolam illam conscripserunt, qua inter ceteros Origenis Anathematismos, hunc à futura Synodo damnari postulabant:

*Si quis dicit, calum, & solem & lunam, & stellas, & aquas quæ super calos sunt, animatas, & materiales esse quasdam virtutes, Anathema sit.* Nullum autem indicium est, hunc Anathematismum à V. Synodo neglectum fuisse; præsertim cum Liberatus & Nicephorus ejus mentionem faciant, & verisimile sit, ipsos ex quibusdam V. Synodi exemplaribus non omnino mutilatis excerptisse. Nicephorus autem Articulum damnatum ita concipit: *Calum, solem, lunam, stellas, & aquas quæ super calos sunt, animatas & rationales quasdam virtutes esse.*

Itaque hodie, ut minimùm, temerarius est, qui cælum & sidera animâ rationali prædita esse credit.

Psal. 148.  
Job. 38.

Dixi, *animâ rationali*; quia si quis solâ animâ vegetativâ, aut etiam sensitivâ tantum, cælum & sidera animaret, nihil, ut opinor, in Synodum V. sed in Philosophiam naturalem solum peccaret. Synodus enim Origenem, his & similibus Scripturis: *Laudate eum Sol & Luna: Aqua quæ super calos sunt laudent nomen Domini: Cum me laudarent simul astra matutina &c.* ad errores Platoniorum, de animabus cælorum intellectu præditis, abutentem, tantum condemnare voluit; parum interim sollicita, an aliquâ aliâ animâ brutâ & non intelligente, cæli animarentur.

Bodin, lib.  
Theatr.

In eandem verò Synodi Censuram Bodinus cum Rabbiniis suis incidit, qui sidera definit, *Animalia celestia intellectu ac luce prædita*. Sed tamen non bellè philosophantur, qui solam animam vegetativam sideribus inferunt, & aquis ac vaporibus pasci nimis simpliciter asserunt; quod Seneca, Plinius, & alij faciunt. Quæ enim flumina, quæ maria alendis uno die tot vastissimis siderum corporibus sufficerent? Deinde, si solidi quidam Planetarum orbes Mundum elementarem includunt, quâ viâ, per istam orbium soliditatem, alimentum illud ad Planetas superiores, & fixarum orbem perveniet? Profecto non poterit: & fame citò tabescet quidquid siderum in cælo est, præter proximam nobis Lunam, si fortè os contiguum Mundo elementari habeat, unde fugere alimentum possit.

Si verò in stellis non est anima vegetativa quæ ipsas nutriat; nec erit sensitiva, quæ vegetativam, ad spirituum, quibus in operationibus sensitivis indiget, fabricationem, præsupponit, ut Articulo præcedenti dicebamus. Deinde nulla oculorum, aurium, & ceterorum sensuum instrumenta sunt in stellis.

Campanel.  
lib. I. c. 13.  
de sensu.

Quam tamen rationem, & Peripateticos, ut solet, ridet bonus Campanella. Cujus egregiam Philosophiam, tanquam veteris & delirantis ægroti somnium audiamus.

*Stultum est, inquit, asserere Mundum sensûs expertem esse, quoniam caret oculis, auribus, pedibus, & manibus. Hæc enim instrumenta conveniunt spiritui animali, materiâ crassâ circumsepto, ideoque indigenti foraminibus (quæ sensoria sunt ad sentiendum exteriora) ac instrumentis*



mentis ad motum, & sustentationem crassa molis, quam veltat. At Mundo, ad motum sufficit rotunda figura. Manus ejus, radij sunt, & virtus diffusiva ad operandum se extendens; non quidem inclusa ponderosis brachijs impredientibus robur ejus. Oculi sunt stella, ac luminaria, qua vident, & videre dant nobis, qui crassâ interclusi mole, per fenestras sensoriorum aspicimus agrè, tunicis carceris nostri impredientibus ea: in toto aëre ac calo patent, absque fenestris & specillis vidente. Siquidem & visus tactus est.

Igitur Campanellæ Philosophia est: Quodd aër, cælum, & omnia corpora universi (quæ sensu prædita esse dicit) videant sine oculis: & quodd oculi nostri suis tunicis potius hebetent, quàm adjuvent animæ nostræ visionem.

Res prorsus ridicula, & ab ignorantia crassissimâ naturæ profecta; quæ non de nihilo, nec ad impediendum animæ foras prospectum, sed ad figurandam & formandam in fundo oculi speciem visibilem, visioni prorsus necessariam, oculum & tunicas ejus sic fabricavit. Alias enim effossis oculis, animæ liberiùs foras prospiceret, & videret clariùs.

Itaque visiones siderum sine oculis, cursus venti sine pedibus, & alia id genus, quæ pro actionibus vitalibus animæ sideris, vel venti Campanella adfert, non verè, sed metaphoricè tantum, & licentiâ quadam Poeticâ vitales dici possunt. Hac enim metaphorâ,

*Sol oculis juvenem, quibus aspicit omnia, vidit.*

Ovid.

Et simili figurâ cecinit alius,

*Tyriam reptantia saxa*

Stat.

*Ad chelyn, & duras animantem Amphionæ cautes.*

Non igitur statim atque apud Poëtam, aut quemvis aliū invenit Campanella Solem videntem, aut saxa & cautes ad Amphionis chelyn animatas, currentes & saltantes; credere debet propriam visionem, & animaleū motum talibus corporibus esse. Hoc enim

*Nec pauci credunt, nisi qui nondum are lavantur.*

Statim enim à prima Syntaxi docentur, inter proprietatem & metaphoram distinguere.

Igitur nullo, aut tenuissimo probabilitatis fuco anima vege-

tativa aut sensitiva cælis & sideribus asseri potest. Colore tamen in speciem probabiliore, quoddam aliud animæ genus, quæ intellectu solum & potentiâ loco motivâ prædita sit, nisi Synodus V. obstaret, concedi posset. Sed talem etiam tamen vera Philosophia spernit. Nam potentia loco motiva animalis non est sine nutritiva, quæ spiritus animales ei fabricat, quibus tanquam instrumentis membra sua movet. Sic enim omnium animalium motus progressivos exerceri videmus. Vnde non corporearum sed spiritualium substantiarum est, solam potentiam loco motivam vitalem intellectui & voluntati conjunctam habere.

Restat igitur, ut motus localis cæli vitalis non sit, nec ab anima informante, sed ab Intelligentia assistente, vel à formâ inanimâ (qualis illa quæ gravia deorsum, levia sursum movet) impressus. Sed à formâ inanimâ Aristoteli & Peripateticis moveri non placet: igitur totus discursus eò tandem appellit, ut ab Intelligentia assistente motus iste fiat, quod S. Thomas 1. p. q. 70. a. 3. optimè probat.

## ARTICULVS IX.

### Definitio animæ.

**A**ristoteles refutatis suo more veterum definitionibus, hanc nobis animæ definitionem substituit:

*Anima est perfectio prima corporis naturalis, potentiâ vitam habentis.* Quod fermè perinde valet, ac si dixisset: Est forma substantialis corporis viventis. Hæc autem forma est vita prima, à quâ vita secunda, sive operatio vitalis profluit.

Arist. lib. 2.  
c. 1. de anima.

De voce Græcâ, *ἐντελέχεια*, quam *perfectiōe* vertimus, Grammatici & Philologi litigant. Cicero & Politianus, *ἐνδελέχεια* scribendum contendunt. Argyropylos cum plerisque, *ἐντελέχεια* potiùs; & Ciceronem Græcæ linguæ hîc ignarum fuisse, frendente Politiano, dicit.

Sed à partibus Argyropyli, hominis Græci, stare oportet. Nam *ἐνδελέχεια*, quæ *assiduitatem*, aut *assiduam agitationem* significat,



significat, vox est Aristotele longè vetustior, & promiscui usûs; *ἐτελέχεια* verò Aristoteli videtur peculiaris, idemque valet ac *perfectio*, vel *habitus perfectionis*. Vnde non ineptè Aristoteles formam hoc nomine appellat; quia ipsa cum subjecto suo compositum perficit & consummat. Non tam verò aptè, sed satis barbarè Hermolaus Barbarus *ἐτελέχεια*, *perfectibiam* vertit.

Per ergo *ἐτελέχεια* *πρώτη* perfectionem primam, vel ut alij vertunt, *actum primum* (actus enim actuando materiam, perficit compositum) removentur à definitione omnes perfectiones, seu actus secundi: ut intellectus, & universæ potentiae vitales animæ, quæ in eodem corpore naturali supponunt actum priorem, videlicet animam, à qua per naturalem emanationem profluunt.

Interpretes quidam per *corpus naturale*, in definitione positum, materiam primam intelligi volunt. Sed insolens est, ut Aristoteles materiam primam appellet corpus naturale. Et expressè mox ait, animam esse perfectionem, seu actum corporis naturalis, habentis principium motûs & quietis in semetipso. Deinde, animam esse talis corporis rationem & essentiam.

Vnde *corpus naturale* propriè, sive pro composito ex naturis accipit; ut optimè S. Thomas exponit.

In corpore, cuius anima dicitur actus, inquit, etiam anima includitur; eo modo loquendi, quo calor est actus calidi, & lumen actus lucidi. Non quòd seorsim sit lucidum sine luce, sed quia est lucidum per lucem. S. Thom.

Corpus autem naturale in genere, restringitur ad corpus naturale animatum, per verba sequentia, *potentiâ vitam* (utique secundam, sive operationem vitalem) *habentis*. Cujus nempe vitæ secundæ illa ipsa perfectio prima est principium.

Definitur igitur anima directè & immediatè per ordinem ad corpus naturale quod ipsa constituit; indirectè verò & remotè, per ordinem etiam ad operationem vitalem. Nam illud corpus naturale non aliter specificari & distingui ab alijs corporibus naturalibus potuit, quam per actionem vitalem, quæ à forma talis corporis naturalis profluit.

Arist. lib. 2.  
c. 2. de ani-  
ma.

Lib. 2. c. 3.  
de calo.

Vnde postea per immediatum ordinem ad actiones vitales sic eam definit: *Anima est principium primum vegetandi, sentiendi, intelligendi, & movendi se localiter.* Et quia *ἕν τι ἑκάστω ἀποφύκει ἕνεκα τοῦ ἐργῶν* propter suam operationem; ut finem; dicit hanc posteriorem definitionem continere causam finalem prioris. Nam per se. *ἢ* illa prima corporis naturalis &c. sive anima; est agens quoddam, cujus finis est vegetare in plantis, sentire in brutis, intelligere in hominibus, localiter movere in his & istis.

Explicat etiam Aristoteles, quali potentiâ corpus animatum vitam secundam habeat. Non enim, inquit, quemadmodum τὸ ἀνέρου *semen* animalium, καὶ ὁ καρπὸς *& fructus*, sive semen arborum, quod *ἐπὶ καρπῶ* & fructu includitur. Nam hæc semina in potentiâ tantum remotâ habent vitam secundam; quatenus in animal, vel plantam vitâ primâ animari possunt, ac deinde vitam secundam exercere. Corpus verò naturale quod per animam constituitur, potentiâ propinquâ vitam secundam habet; quandoquidem vitam primam, quæ vitæ secundæ fons & principium est, in se contineat.

Plutarchus autem & Laërtius definitioni Aristotelis addunt particulam, *organici*. Sed non ex mente Philosophi. Nam *corpus naturale potentiâ vitam habens*, & *corpus organicum*, apud eum unum idemque valent. Vnde paulò pōst definitionem suam totam sub istis terminis repetit: *Est igitur anima perfectio prima corporis naturalis organici*. Nam corpora naturalia inanimata propriè organica non sunt, ut suprâ Artic. V. differuimus. Necessaria autem animæ sunt corporis organa, quia ad operationum vitalium exercitium illis instrumentis indiget.

Quia tamen Scaliger, Argenterius, Fienus, & Medici multi contendunt, animam in liquido & necdum organico animalium semine, actionem vitalem exercere, dum ipsamet sibi prima corporis organa incipit conformare; idcirco definitio sub istis concepta terminis (*Anima est perfectio prima corporis naturalis potentiâ vitam habentis*) certior est, quàm si loco, *potentiâ vitam habentis*, substituatur particula, *organici*. Si enim opinio illa vera esset (quam tamen infrâ refutabimus) anima homi-



hominis, aut equi infusa liquido adhuc & inorganico semini, non esset propriè perfectio & forma corporis organici; esset tamen perfectio corporis potentiâ vitam habentis.

## ARTICVLVS X.

*Quid vita secunda, sive actio vitalis.*

**A**Nte omnia, vita secunda debet esse actio, non in subiectum externum transiens, sed supposito suo aliquo modo immanens. Nam *viventia sunt*, ait post Aristotelem S. Thomas, *quæ seipsa movent*.

Officium quippe animæ est, aliquâ actione immanente compositum suum ornare & perficere. Inanimata verò in materiam externam solum agunt; ut ignis in lignum. Quin verò anima intellectiva, & sensitiva per actiones immanentes intellectuales & sensitivas, in compositum suum reflectantur, & illud perficiant, dubium nullum est.

Anima etiam vegetativa plantarum idem etiam evidenter facit; quando saltem plantam suam nutrit & auget. Sed quando aliud individuum generat, videtur non tam in se agere, quàm in materiam externam, ex qua novum individuum fabricatur.

At tamen etiam generando, in compositum suum sufficienter reflectitur & agit, ut actio ejus, saltem latè, immanens appellari possit: *in quantum humor plantæ intraneus in semen convertitur*, ait S. Thomas. Ac deinde: *In plantis*, inquit, *indicium vita est, quòd id quod in ipsis est movent ad aliquam formam*. Est tamen vita plantarum imperfecta; quia emanatio in eis, licet ab interiori procedat, tamen paulatim ab interiori exiens quod emanat, finaliter omnino extrinsecum invenitur. Humor enim arboris primò ab arbore egrediens fit flos, & tandem fructus ab arboris cortice discretus, sed ei colligatus. Perfectò autem fructu, omnino ab arbore separatur; & in terram cadens, sementinâ virtute producit aliam plantam.

Cujus simile fit etiam in generatione animalium. Nam anima vegetativa animalis, dicitur actione immanente generare, quantum

S. Th. lib. 4.  
c. 11. contra  
Gent.

S. Th. ibid.

quantum ipsa potest, dum partem humoris corporis sui in semen excoquit; ex quo deinde in utero, tanquam terrâ suâ, formatur & ultimò generatur novus foetus.

Igitur ante omnia, ut initio dixi, actio vitalis debet à vita prima sic emanare, ut in vivente ipso remaneat.

Sed tamen hoc adhuc ad vitalitatem non sufficit. Nam forma lapidis lapidem deorsum movet; nec tamen actio ejus est vitalis. Item forma aquæ calefactæ revocat aquam ad naturale frigus; nec tamen aqua vivit. Aristoteles, ut hoc argumentum solvat, negat lapidem & corpora gravia seipsa movere, quando cadunt versus centrum, sed moveri à causa generante. Similiter nec aqua est, quæ propriè reducit se ad frigus, sed reducitur à causa quæ illud elementum produxit.

Actio enim illa est naturalis resultantiæ, quæ non proximo agenti, sed remoto tantum tribui solet. Nec sine ratione. Nam causa quæ dat esse, dat etiam consequentia ad esse, sive dat naturales proprietates, sine quibus illud esse imperfectum, & mutilum quodammodò esset. Munus quippe veri opificis est, non tantum opus suum inchoare, sed illud etiâ consummare. Sic qui animam producit, censetur naturales facultates quæ ex anima resultant, ei tribuere. Nam resultantia ista, est solum appendix primæ & principalis actionis, quâ producta est illa natura, ex qua proprietas resultat.

Quando ergo primo instanti existentie naturæ, aut etiam tempore sequenti (quoties dispositio subjecti, aut occasio alia fert) ejusmodi naturalis proprietas à natura resultat & exilit, actio principalis agentis quod naturam illam produxit, censetur adhuc durare, & priorem suum effectum hoc additamento complere, mediante naturâ tali tanquam instrumento. Vnde quemadmodum projiciens, non tantum in principio motus, quando lapis è manu exit, sed toto tempore quo impetus durat, dicitur per impetum illum tanquam per instrumentum separatum, lapidem movere; ita quamdiu, & quoties è natura lapidis resultat motus deorsum, agens quod naturam illam produxit, censetur per naturam lapidis, tanquam per instrumentum itidem à causa principali separatum, motum illum



illum efficere, & conari naturam à se productam ad naturalem suum statum reducere.

Hinc vita secunda, sive actio vitalis generaliter definiri potest, & solet: Actio immanens directa. Actionem directam vocant Philosophi, quæ non est naturalis resultantiæ. Talis enim directè & immediatè emanat à suo principali agente, non ex consequenti tantum & indirectè; quemadmodum actio resultantiæ, quæ per modum sequelæ, appendicis, & accessorij cujusdam, ex termino directæ actionis resultat.

Hoc quoque hinc adnotandum est: Quod etsi omne vivens (etiam irrationale) dicatur actione immanente directâ, modo quodam generali se movere; vivens tamen rationale, quando voluntariè agit, peculiari modo dicitur se à seipso & per se movere: quo modo non se movent agentia naturalia, non tantum inanimata, sed etiam quæ vitâ vegetativâ, aut sensitivâ vivunt. Hæc enim non tam seipsa agere, quàm à natura agi, & in actiones suas cogi ac præcipitari dicuntur. Vnde breviter Aristoteles: *Neque inanimatum ullum, inquit, agere dicimus, neque etiam animatum, præter hominem.*

Arist. lib. 1.  
c. 12. Magn.  
moral.

Hinc licet bruta, quando appetunt, aliter se moveant, quàm gravia, quando cadunt versus centrum (nam appetitus brutorum est actio vitalis, immanens & directa, casus gravium est actio per resultantiam, ut jam dictum est; ) nondum tamen ad illam perfectionem & dignitatem se movendi perveniunt, quam vivens rationale exercet, dum per voluntatem appetendo, se movet. Mens enim humana, quia est imago Dei, ex quadam *ἡγεμονικὴ ἐξουσία* principali & supereminenti potestate ita se movet, ut cum expressâ, vel virtuali reflexione actum suum sibi imperet. Cujus indicium est, quod indifferenter utrumlibet (ubi rationes utrimque sufficientes proponi possunt) eligere valeat.

Bruta verò, comparatione ad hunc modum agendi voluntarium, dum appetunt, dicuntur moveri potius, & compelli, cogique à natura sua, quàm seipsa movere. Appetitus enim eorum præceptus est & effrenis more ceterorum agentium naturalium; cum ratione careant, qua se refrenent. Vnde

E. D. Dama-

D. Damasc.  
lib. 2. c. 27.  
Orthod.

D. Damascenus: τὰ ἀλογα ἄγωνα μάλλον, ὑπὸ τῆς φύσεως, ἢ παρ' ἄγους Irrationalia animalia ducuntur potius à natura, quàm ducant.

D. Th. q. 24  
a. 2. Verit.

Ac mox subdit: Homo verò cum sit rationalis, naturam potius ducit, quàm ducatur ab ea. Et post eum D. Thomas: Omne, inquit, quod est liberi arbitrij, agit, & non solum agitur. Sed bruta non agunt, sed aguntur, ut Damascenus dicit: ergo bruta non sunt liberi arbitrij.

Idem lib. 2.  
c. 48. contra  
Gent.

Et alibi: Ex hoc homo dicitur præ ceteris animalibus liberum arbitrium habere; quia ad volendum iudicio rationis inclinatur, non impetu natura, sicut bruta.

## CAPUT II.

### De conformatione corporis animati.

**Q**uia Aristoteles corporis animati proprium esse dicit, organa habere, seu quibusdam partibus figurâ & temperie inter se distinctis, tanquam variâ suppellectile instructum esse, quibus anima operationes suas vitales administrat; meritò Philosophi & Medici de fabro & causa efficiente horum organorum, ac totius conformationis corporis animati multa quærunt & differunt.

## ARTICULVS I.

*Anima seminis non conformat prima membra foetus. Vallesius, Sennertus, Scaliger, Argenterius &c. rejecit.*

**P**urimi Medicorum semini plantarum, & animalium animam saltem vegetativam inesse, & ab ea foetum conformati credunt.

Nescio, an Ciceroni quoque non eadem mens. Nam sanguinem, inquit, bilem, pituitam, ossa, nervos, venas, omnem denique membrorum, & totius corporis figuram, videor posse dicere unde concreta, & quomodo facta sint: per animum ipsum. Sed certius & evidentius sensum suum alij explicant.

Valles. 2.  
c. 9. Contr.

*Semen animalium, inquit Vallesius, deferit generantem facultatem, atque*



atque vivit vitâ plantæ; qua fruitur fœtus usque ad tempus sentiendi. Et Sennertus: Cum potentia, ait, & operationes animæ propriissimæ in semine appareant, animam ei inesse negandum non est.

Sennert.  
lib. de Coh.  
sens. c. 9.

Sed potentias & operationes animæ proprias in semine mero, & ante rudem saltem membrorum delineationem, non magis agnoscimus, quam in fimiâ potentias & operationes hominis. Imitatur quippe solum & simulat in quibusdam operationes vitales; sicut magnæ similitudinem animæ vacuam, non animam verè habet.

Scaliger verò omnium brutorum seminibus animam non solum vegetativam, sed etiam sensitivam, nec tantum vialem, sed ejusdem ultimæ speciei quæ in ipsis genitoribus est, inesse contendit.

Vnde dicit, semen canis esse canem imperfectum, articulationibus tantum carentem, & mutilum canem integri canis esse parentem.

Quamquam sanè potius dicere debuerit: Canem illum semineum liquidumque, ac sine capite, ventre, caudâ mutilum & mancum, non esse alterius integri canis parentem, sed sibi met ipsi ex suo semineo luto domum architectari; quandoquidem Scaliger censeat eandem numero animam esse, quæ primùm in semine liquido veluti natat, & postea in corpore consistenti, & membris suis expresso, operationes vitæ exercet.

Vnde audacter addit, Aristotelis perpetuam sententiam esse: In semine inesse animam, quæ sibi corpus fabricet. In quo sanè Magistro suo, quem non solum æstimat, sed pænè adorat, fallum imponit. Nec loca, quæ citat, amplius evincunt, quàm semini animalium vim conformatricem inesse: quod libenter damus, sed negamus inesse animam, ut paulò post latius disseremus.

Iul. Scal.  
Exerc. 6.

Argenterius verò ne quidem à semine humano animam rationalem excludit, etsi eam à Deo creari, & immortalem esse affirmet. Ceterum, inquit, testes ipsi semen efficiunt, ob talem vim quam habent à natura: ut solus fructus (veluti poma, pira) seminum suum in se efficit, in quo forma est singularum partium & totius. Eaq; forma in semine est actu: ut in semine hominis anima hominis est actu.

Argenter.  
Comment.  
2. in Artem  
Gal.

est actu. Alioqui quomodo semen agentis, opificis, & artificis rationem habere posset, si in eo forma est solum potentia? Id enim nullam agendi vim habere potest.

Plin.

Vnde audacissimè & Magistraliter concludit: Est ergo semen hominis iam homo, quia formam hominis habet. Desunt solum membra expressa, delineata, ac figurata. Ab hac crassa Philosophia Democritus Venerem damnavit, ut in qua homo alius exiliret ex homine.

Sed si ita est: vir igitur sine feminâ, verum hominem intra se & in vasis spermaticis generat: & proinde qui se polluunt, homicidæ sunt, & tot homines interficiunt, quot fundunt stillas seminis. Femina quoque, quia semen etiam suum, ut Medici cum Galeno censent, habet, & fabricat, sua etiam homicidia, effundendo perpetrabit. Denique quando viri & feminæ semina in utero miscebuntur, animas quoque duas in unum corpus, quod ex ijs seminibus fermentatur, commisceri oportebit: unde in unoquoque humano corpore suis membris instructo, duæ erunt, ut minimum animæ rationales & immortales, quarum una in semine paterno, altera in semine materno advecta fuerit.

Nec simile est, quod de pomorum ac pirorum semine addit Argenterius. Nam semina arborum, ut sint fecunda & genitiva, non debent coalescere & fermentari ex diversi sexûs seminibus. Vnde pomum potest perfectum & ad novæ arboris generationem idoneum semen intra se concoquere, & usque ad animæ alicujus introductionem perficere, sine mixturâ seminis alterius sexûs (si tamen etiam semen arboris animatum esse oportet;) quod Aristoteles etiam & nos negamus. Carnes enim & pericarpia pomorum, animam quidem suam habere, sed proprium arboris semen, quod in illis continetur, inanimatum esse dicimus.

Quomodo autem semen inanimatum corpus pro superventurâ animâ conformet, quod impossibile credit Argenterius, postea viderimus.

Arist. lib. 2.  
c. 3. de ge-  
nerat. ani-  
mal.

Certè Aristoteles negat semina & conceptus esse animatos, etiam animâ vegetativâ, antequam alimentum attrahant, & operationes vitales animæ vegetatricis exercent. Animam vegeta-



vegetalem, ait Interprete Gazâ, in seminibus & conceptibus nondum separatis, haberi potentiâ statuendum est, non actu; priusquam eo modo, quo conceptus qui iam separatur, cibum trahant, & officio eius anima fungantur.

Et postea, ovum, quod est pulli semen, ζῶον ὄν animalis materiam, non animal appellat. Ut intelligas à Philosopho exerrare etiam Gardinium, qui affirmat ovum animal irrationale & avem esse. Habet enim, inquit, in actu primo animam sensitivam, in se transfusam per coitum: ita ut extrinsecus advenire alia anima non debeat, ut pullus exurgat; sed tantummodo per incubationem hac excitari, & in actum secundum deduci.

Lib. 3. c. 2.  
de generat.  
animal,

Prorsus ex sententia sacerdotum Ægypti, qui ova carnes liquidas appellabant, ideoque ijs, ut volatilibus abstinebant. Viderint ergo hujus Philosophiæ hodie Mystæ, quomodo Ferijs sextis ova, id est liquidos pullos sorbere audeant.

S. Hieron.  
lib. 2. c. cōtra  
Iovin,

Verius, & Aristoteli consentienter apud Plutarchum Senecio, qui ait Ovum adnatum quid esse, veluti sanguinem, & lac animalis, post nutritionem & concoctionem. Si igitur ovum sit veluti lac gallinæ; certè si lac exanime sit, ut plerique omnes Medici censent, igitur nec ovum animatum erit. Vnde Aristoteles negat ova, & semina plantarum propriè mori; quia mori non potest, quod vitam in antecessum non habuit.

Plut. lib. 2.  
c. 3. Sym-  
pos.

Arist. lib. de  
respirat.  
c. 17.

Alicubi tamen, scio, ova viventia vocat illa quæ à zephyrijs, sive subventaneis distinguit; non quia anima ἐν ψυχῇ & actu ipsis insit, sed quia quadam fecunditate vivunt, cum sterilia non sint, quemadmodum ova subventanea; sed ex ipsis, ait Aristoteles, ἐν ψυχῇ ἐν ψυχῇ actu animatum, sive pullus vivus generari potest.

Lib. 2. c. 5.  
de generat.  
animal.

Animalium etiam involucrium semina dicit esse tertiæ concoctionis superflua recrementa; ideoque pusillos homunciones salaciores & fecundiores esse proceris, quia illi plus excrementi & seminis habent; cum minus alimenti in corpusculorum suorum substantiam convertant, adeoque plus recrementi ijs superfluit. Concoctionum autem excrementa, ut bilis, melancholia, sudor &c. animata esse non solent.

Denique definitionem animæ explanans, negat corpus animatum.

Lib. 1. c. 2.  
de anima,

animatum eo tantummodo *δυνάμει* potentia vitam secundam habere, sicut habent semina arborum & animalium (potentia nempe solum remota) sed propinqua. Quia videlicet, ut ante explicavimus, in corpore animato est ipsa *ἐντελέχεια*, seu actus primus, qui est principium vite secundae, sive operationis vitalis. In seminibus vero non est talis potentia propinqua ad vitaliter operandum, sed solum remota; quatenus sunt capacia animae, quae est vita prima, unde fluunt postea illae operationes vitales.

S. Th. lib. 2.  
c. 89. contra  
Gent.

Hinc S. Thomas consentienter, & adversus illam Vallesij, Scaligeri, Argenterij, Sehnerti imaginationem: *Ipsamet virtus*, ait, *qua cum semine deceditur, & dicitur formativa, non est anima, neque in processu generationis fit anima. Sed cum ipsa fundetur, sicut in proprio subiecto, in spiritu cuius est semen continuum, sicut quoddam spumosum; operatur formationem corporis, prout agit ex vi anima patris. Et alibi negat, semen quasi quoddam parvum animal in actu; sed habere virtutem ad productionem totius corporis, derivatam ab anima generantis. Et antea: Virtus illa activa, inquit, qua est in semine, ex anima generantis derivata, est quasi quaedam motio ipsius anima generantis; nec est anima, aut pars anima, nisi in virtute; sicut in serra vel securi non est forma lecti, sed motio quaedam ad talem formam.*

Idem 1. p.  
q. ult. a. ult.

Idem 1. p.  
q. 118. a. 1.  
ad 3.

Si igitur in semine, ne quidem est anima vegetativa, nisi postquam alimentum trahere, & officio talis anima fungi coeperit (hoc est, ubi rudimentum saltem aliquod organorum, per quae alimentum trahat, deproperatum & semifactum fuerit) ut supra Aristotelem philosophantem audiebamus; profecto multo minus anima sensitiva aut rationalis, à principio, quando semen totum adhuc liquidum, informe, & inorganicum est, ei inesse poterit. Dignitas enim gradus quem animae in ordine formarum universi obtinent (quantum experientia & ex communi sapientium sensu intelligi potest) organicas aliquas dispositiones in materia sua flagitat, antequam secundum ordinem naturae, eam ingredi valeat. Et formarum inanimatarum (ut terrae, aquae, ceterorumque elementorum, item lapidum, ac metallorum) vilitas est, quod rudis & indiscreta partium



partium figuris materia ijs sufficiat.

Nec Apostolus Philosophiæ isti S. Thomæ & Peripateticæ contradicit, cum resurrectionem mortuorum in rudi & familiari exemplo figurans ait : *Inspiciens, tu quod seminas, non vivificatur, nisi prius moriatur.* Non enim vult in seminibus plantarum propriam vitam esse ( aliàs jam essent vivificata ante seminationem ) sed tamen *mori*, id est corrumpi, dicit, quia in terram jacta putrescunt & dissolvuntur : quomodo Poëta quidam olim cecinit,

*Mors etiam saxis, marmoribusq. venit.*

Sic quoque Christus Dominus dixit, *Nisi granum frumenti cadens in terram mortuum fuerit:* morte videlicet metaphoricâ, si ipsum præcisè germen, quod propriè semen est, & in quo vis conformativa novæ segetis consistit, accipiamus. Aliàs pulpa ipsa grani, quæ modicum illud seminis germen circumdat ( nisi verustate evanida sit ) re verâ vivit; quandoquidem in spica vitaliter nutriatur, ac in omnem dimensionē proportionē servatâ crescat. Germen verò ipsum, est superfluum alimenti pulpæ; sicut semen animalium est excrementum inanime quod nutritioni testium superfluit. Vnde figura germinis triticei grani non est organica, sed germen eam figuram induit à concavitate loculamenti pulpæ, in quod secernitur dum adhuc molle est & in quo induruit.

## ARTICVLVS II.

*Opinio Argenterij, & quorundam Medicorum, qui animam rationalem semini adhuc informi, ad illud conformandum, inesse dicunt, ex sacris litteris refelli potest.*

**N**on tantum opinio Argenterij, qui animam rationalem virili semini, etiam nondum è vasis spermaticis effuso inesse credit; sed etiam tot aliorum, qui saltem statim à concubitu & in prima mixtione & fermentatione cum semine alterius sexûs, ante omnem organorum delineationem

tionem, rude illud *φύσιμα* animâ rationali animari volunt, ex sacra Scriptura confutari potest.

Nam inprimis Cajetanus ( et si dubitem, an ad istam subtilitatem aspexerit Apostolus ) in Commentario 2. Cor. 5. contrarium colligit, ex istis verbis: *Scimus enim, quoniam si terrestris domus nostra huius habitationis ( Græcè, τοῦ οὐρανοῦ huius tabernaculi ) dissolvatur; quod adificationem ex Deo habemus, domum non manu factam, æternam in cælis.*

Cajet. 2.  
Cor. 5.

Vbi duas istas voces, *tabernaculum*, & *domum non manu factam*, quas Apostolus è regione sibi opponit, subtiliter & more suo penficulans: *Corruptibile corpus dicitur domus tabernaculi*, ait Cajetanus, *ad significandum, quod est anima domus, ut ab extrinseco ei facta, quemadmodum tabernaculum.* Nullius enim hominis anima efficit sibi ipsi corpus; quamvis alat & augeat. Contrà, gloriosum corpus dicitur *domus non manufacta*; quia ab ipsa anima gloriosa fit corpus gloriosum, & non ab extrinseco. Fieri siquidem ab extrinseco, significatur per fieri manu; quia manufacta sunt manifestissimè ab extrinseco.

Igitur, subtili Cajetano Interprete, corpus nostrum terrestre vocatur tabernaculum manu factum, quia non anima ipsum ab initio inhabitans, illud construit ( sicut hirundo incola nidi sui, lutum circa se componit; ) sed artifex externus, quomodo tabernaculum à scenopœo, qui in illo non habitat, manu confui & fieri solet. Corpus verò gloriosum fiet ab anima inhabitante, cùm in instanti resurrectionis, gloria animæ in corpus redundabit.

Sed capitalis locus est Exod. 21. ex quo intelligitur, animam rationalem non ingredi humani seminis materiam, nisi post aliquam membrorum conformationem. Ibi enim legimus istam legem:

Exod. 21.

*Si rixati fuerint viri, & percusserit quis mulierem prægnantem, & abortum quidem fecerit, sed ipsa vixerit ( Hebr. si egressi fuerint nati eius, & non fuerit mors ) subiacebit damno, quantum maritus mulieris expetierit, & arbitri judicaverint. Sin autem mors eius fuerit subsequuta ( Hebr. si mors fuerit ) reddet animam pro anima.*

Vbi mors, non solum matris, sed etiam foetus intelligi debet, ut satis in textu Hebræo innuitur, qui indefinitè dicit,

*Si mors*



*Si mors fuerit:* nempe matris, vel prolis. Imò lex ista videtur præcipuè ad mortem foetus respexisse; quia ex alijs ibi scriptis legibus satis compertum erat, eum qui matris, aut cuiuslibet hominis ex utero in lucem editi homicidium perpetrasset, mortis reum esse.

Quomodo verò foetus nondum editi homicidium factum esse, intelligi posset, commentariolo versionis suæ addito, exponunt 70. Interpretes, ac locum illum sic vertunt: *Si rixentur duo viri, & percusserint mulierem in utero habentem, & exierit puerulus eius ineffigiatus, multâ à multâbitur, prout indixerit vir mulieris. Si autem effigiatus fuerit, dabit animam pro anima.* Vbi significant morte, quæ est homicidarum poena, multandum esse, qui foetum membris & figurâ humani corporis expressum & effigiatum, in ventre matris interfecerit; quia ejusmodi foetus, homo, & anima rationali præditus fuit. Si verò tali figura effigiatus non fuerit, non fore homicidij reum, quia embryonem tantum, qui nondum homo erat, occidit. Vnde quod in Hebræo erat, *Si mors fuerit*, Græcè reddiderunt, ἐὰν δὲ τὸ πᾶν ἴον ἐξῆλονται, si verò puerulus effigiatus fuerit; interpretantes, unde cognosci debeat, an mors illa sit mors hominis.

Pulchrè, & Afro virilique suo stylo id describit Terrullianus. *Ex eo foetus in utero homo, à quo forma completa est. Nam & Moysi lex tunc abortus reum, talionibus judicat, cum iam hominis est causa, cum iam illi vitæ & mortis status deputatur.* Tertull. lib. de anim. c. 37.

Vnde autem reputari posset, utrum mors esset hominis, an foetus vitâ humanâ nondum animati, obscurum erat; & ideo 70. Interpretes, ut signo aliquo externo id intelligi valeret, pueruli effigiem aspiciendam suggererunt; quæ si humana esset, vitâ hominis vixisse intelligeretur, & excussor ejus, poenæ talionis homicidarum subjaceret.

Et quamquam ea explicatio non expressa inveniatur in Hebræo, æstimanda tamen est, propter 70. Interpretum auctoritatem; quorum versione Ecclesia ab initio, & ipsi Apostoli usi sunt: quia *Spiritus qui in Prophetis erat*, ut ait S. Augustinus, *quando illa dixerunt, idem ipse erat etiam in Septuaginta.* S. August. lib. 18 c. 43. Civit.

viris, quando illa interpretati sunt. Et quod maximè ad rem nostram facit, dicit eos qui Græcam editionem Septuaginta ex Hebræorum codicum inspectione emendare aggressi sunt, non ausos detrabere quod Hebræi non habebant, & Septuaginta posuerunt; sed tantummodò addidisse quæ in Hebræis inventa, apud Septuaginta non erant. Et postea: *Quidquid verò est apud Septuaginta, in Hebræis autem codicibus non est, per istos maluit, quàm per illos, idem Spiritus dicere; sic ostendens utrosque fuisse Prophetas.*

Accessit denique nupera Sixti V. Pontificis auctoritas, qui in limine Græci Textus Septuaginta Interpretum, jussu ejus emendati ac editi, hoc præfatur: *Volumus & sancimus, ad Dei gloriam, & Ecclesiæ utilitatem, ut Vetus Græcum Testamentum juxta Septuaginta, ita recognitum & expositum, ab omnibus recipiatur, ac retineatur; quo potissimum ad Latina vulgata editionis, & veterum SS. Patrum intelligentiam utantur: Prohibentes, ne quis de hac nova Græca editione audeat in posterum, vel addendo, vel demendo, quidquam immutare.*

Caus. 32. q.  
2. c. 8. 9. 10.  
S. August.  
q. 80. in  
Exod.

SS. Patres quoque discrimen illud effigiati & ineffigiati, sive formati & informis foetus, à 70. Interpretibus insinuatam, passim recipiunt: quorum aliquot testimonia etiam in Canones sacros redacta sunt. Ut istud S. Augustini: *Quod lex non formatum puerperium noluit ad homicidium pertinere, profectò nec hominem deputavit quod tale in utero geritur.* Et si tamen ( ut nihil dissimulemus ) videatur ambigere, an etiam ante expressam in foetu hominis effigiem, anima rationalis in eo non delitescat. Si enim, addit paulò post, *illud informe puerperium iam quidem fuerit, sed adhuc quodammodò informiter animatum ( quoniam magna de anima quaestio non est precipitanda indiscussa, temeritate sententia; ) ideo lex noluit ad homicidium pertinere: quia nondum potest dici anima viva in eo corpore quod vitâ ( secundâ ) caret; si talis est in carne nondum formatâ, & ideo nondum sensibus præditâ.*

Ista enim S. Augustini verba respiciunt illam ejus dubitationem, quæ ad finem usque vitæ ei duravit: An non solum caro nostra, sed etiam anima sit ex traduce. Ita videlicet, ut sicut semen, ex quo fabricatur corpus, deceditur à corpore parentis; ita anima foetus ab ejusdem parentis animâ decidatur.

seu



seu potius accendatur, velut candelæ unius flamma ab altera. In hanc enim partem sollicitabatur S. Augustinus, quia hac ratione videbatur facilior & intelligibilior modus explicandi, quomodo peccatum originale, quod animam afficit, à parente in filium per originem trajiceretur.

Sed tamen nunquam id S. Augustinus affirmaverat. Vnde cum Iulianus falsè ei opinionem illam adscriberet; eo quod dixisset, omnes homines in Adamo unum fuisse, homo autem nihil aliud esset, quàm anima & corpus simul. Respondet ei Augustinus: *Omnes qui ex illo nati sunt, ille unus fuerunt, sive secundum solum corpus, sive secundum utramque hominis partem, quod me nescire confiteor, nec me pudet, ut vos, fateri nescire quod nescio.*

Lib. 2.  
c. 178.  
Oper. im-  
perf.

Ecce igitur, ut in Opere isto ultimo, cui immortalis est, se nescire fateatur, An secundum utramque hominis partem, corpus scilicet & animam; omnes non fuerint unum in Adamo, tanquam in causa utriusque partis efficiente.

Alibi quoque ait, scrupulosissime inter doctissimos queri ac disputari (quod utrum ab homine, inquit, inveniri possit, ignoro) quando incipiat homo in utero vivere. Vtrum sit quedam vita & occultata (in semine informi, ut statim post significat) qua nondum motibus viventis appareat. Verum licet dicat se nescire, quia non certò sciebat, longè tamen probabilius esse existimabat (quod verissimum est) animam rationalem cum semine à parente in prolem non traduci; sed formato & constructo jam corpore, à Deo solo creari, & corpori tanquam domicilio, extrinsecus infandi, atque tunc demum hominem generari, & inde foetuum homicidia incipere.

Enchirid.  
c. 86.

Hinc cum Iulianus & Pelagiani Traduciarium eum appellarent, calumniam istam à se respuens: *Aiunt nos, inquit, animam traducem, cum peccati traduce contueri. Quod ubi & quando in eorum, qui adversus istos defendunt Catholicam fidem, vel sermonibus audierint, vel litteris legerint, nescio. Quia etsi invenio à Catholicis de hac re aliquid scriptum, nondum contra istos fuerat veritatis suscepta defensio, neque id agebatur, ut eis responderetur. Vbi, credo eum ad Tertullianum respicere, qui non solum corpora, sed etiam animas posterorum ex una Adami anima dicit redundare,*

Lib. 3.  
c. ult. ad  
Bonif.

Tertull.  
c. 25. de  
anima.

*& cum carnis figuratione compingi, atque produci.*

Non igitur Traducianorum numero accensendus Augustinus, sed potius ijs, qui materiæ jam formatæ & membris humani corporis expressæ animam rationalem demum immitti censuerunt. Et in eadem classe & mente S. Hieronymus: *Semina, inquit, paulatim formantur in utero, & tam diu non reputatur homo, donec elementa confecta suas imagines membraq; suscipiant.*

S. Hieron.  
q. 4. ad  
Algal.

Auctor  
q. vet. & no.  
v. testam.  
c. 23.

Canonem autem Moyses omitto; quia ex Pseudo-Augustino, ut Majores nostri Lovanienses rectè adverterunt, desumptus est.

Huc etiam addi potest Bulla Sixti V. An 1587. quæ omnes voluntariorum homicidarum poenas fulminat in procurantes abortum *tam animati, quàm inanimati, formati, vel informis fætus.* Vbi animatum & formatum, inanimatum & informe pro iisdem habet.

Quas tamen poenas Gregorius XIV. ad terminos iuris communis, & ad homicidas fœtus animati formati revocavit.

Exod. 21.

Falluntur autem qui putant 70. Interpretes in Hebræo legisse, *ischon*, id est *puerulus*, vel *virunculus*, pro *ason*, id est *mors*. Nam *παιδίον αὐτοῦ* *puerulus ejus*, respondet Hebrææ voci *ieladecha*, id est *nati ejus*, non autem voci *ason*, sive *mors*. Deinde inter litteras Hebraicas, Schin (qua scribitur *ischon*) & Samech (qua scribitur *ason*) nimis evidens est discrimen, ut falli potuerint 70. Interpretes, accipiendo unam pro altera.

Propheta quoque, & summus Philosophus Iob, humani corporis conformationem describens, corpori suis membris & organis instructo animam rationem demum supervenire, non materiam rudem adhuc & inorganicam subire significat.

Iob. 10.

Gen. 2.  
Gen. 3.

*Memento queso, quòd sicut lutum feceris me* (quando in prima mea origine conditus sum de limo terræ) *& in pulverem reduces: quoniam primo homini peccatori dixisti, Pulvis es & in pulverem reverteris.*

Exod. 1. 2.  
Reg. 16.  
2. Paral. 6.  
&c.

Et deinde ad secundam originem suam progressus, qua non ex luto jam, sed ex semine in utero matris est concretus: *Nonne, inquit, sicut lac mulsisti me?* Hebr. *effudisti me?* Quali origine, dicitur filius egredi de femore, de lumbis, aut utero patris sui.

Dicit



Dicit autem, *sicut lac*; quia semen humanum ἀφρώδες καὶ λευκὸς spumofum & album est instar lactis, ut Aristoteles ait. *Et sicut caseum me coagulasti?* Quando semen paternum cum semine materno, in utero coagulatum & fermentatum est.

Quod postquam factum fuit, *Pelle & carnibus vestisti me*. Sed tamen antè, *Ossibus & nervis compegisti me*. Inter enim hæc duorum membrorum, ordo est inversus. Secundum enim modernos & Experientissimos Anatomicos, in foetu adhuc toto femineo, prius ossium & nervorum lineamenta tenduntur, quàm in ipsum matris sanguis attrahatur, ex quo carnes, & parenchymata coagulantur.

Denique, ubi fabrica tota humani corporis, quantum ad partes illas principales fuerit absoluta: *Vitam* inquit (per animæ rationalis infusionem) & *miserecordiam* (varia misericordis tuæ beneficentiæ munera, ut animæ facultates, ingenium, & multarum virtutum moralium qualiacumque semina, ut quidam explicant; vel potius, ne remanerem naturaliter filius iræ, sicut ceteri, ut S. Augustinus mavult) *tribuisti mihi*. Et denique, *visitatio tua* (qua perpetuò mihi ades, & gubernas) *custodiit spiritum meum*. S. Aug. lib. 5. c. 13. contra Iul.

Talem quoque ordinem inter formationem corporis in utero matris, & animæ rationalis infusionem, similitudine quadam indicasse videtur Deus, quando *formavit primum hominem de limo terræ; & inspiravit in faciem statuæ* sic à se formatæ, & omnibus suis membris expressæ, *spiraculum vite*. Gen. 2.

Denique ejusdem rei imago, in illa corporum regeneratione apud Ezechielem apparet. Vbi postquam *acceperunt ossa ad ossa, unumquodque ad iuncturam suam, & nervi & carnes ascenderunt, & extensa est in eis cutis desuper; spiritum tamen adhuc non habebant*. Sed ubi à quatuor ventis venit insufflans spiritus, & ingressus est in ea, *vixerunt, steteruntque super pedes suos*. Ezech. 37.

Hanc denique, de præformatione corporis ante animæ rationalis adventum doctrinam, in suis Pastoralibus & Ritualibus Libris Ecclesia sequitur. Nam eos tantum infantes, aut abortus baptizari præcipit, qui humana effigie insigniti sunt; effluxiones verò minime, etiam si membranâ aliqua inclusæ,

Hippocrat.  
lib. de nat.  
pueri.

& stamina quædam ac rudimenta inchoatæ conformationis in ijs apparerent. Qualis fuit genitura sex dierum à concubitu quæ effluxit Psaltriæ, ad imperium Hippocratis septies ex alto desilienti. *Similis autem erat, inquit, ovo crudo, ablata exteriori testâ, in quo humor contentus membranâ interiore, ruber & rotundus pellucebat. Conspiciebantur quoque fibra alba & tennes in illo humore membranâ contento, cum sanie crassa & rubra; & ipsa membrana, parte exteriori, ad instar sugillatorum, cruore suffusa erat.*

S. Ansel.  
lib. de con-  
cept. virgi-  
nal. c. 7.

Ejusmodi tamen effluxiones, si vera est sententia Argente-rij, Fieni, & aliorum, anima rationali animatæ sunt, & baptizari deberent. Quorum proinde opinionem insignis absurditatis damnat S. Anselmus. *Quod enim, ait, mox ab ipsa conceptione ( id est seminum permixtione ad ordiendam conformationem, ut Medici nomen conceptionis usurpant ) infans rationalem animam habeat, nullus humanus suscipit sensus. Sequitur enim, ut quoties susceptum semen humanum, etiam ab ipso momento conceptionis, perit, antequam perveniat ad humanam figuram, toties damnetur in illo anima humana; quoniam non reconciliatur per Christum: quod est nimis absurdum.*

Denique, si anima rationalis sui corporis conformationem orditur; ergo in molis, & Fratribus Lombardorum, ac in monstris humana specie carentibus, qualia interdum feminæ in lucem edunt, inerit anima rationalis. Nam molæ fibras & venas, ac alia primæ conformationis rudimenta habent. Fratres verò Lombardorum ( sic vocant Medici, quia in Lombardia feminæ sæpiùs tales partus gignunt ) membris etiam omnibus in harpiam, aut feram bestiam, aliudve monstri genus, volucre interdum, aut involucre, perfectè deformati, non tantum primis lineamentis inchoati, visuntur. Quales etiam in Belgio, & semel Lovanij in vicinia nostra, editos scimus.

Lemn.  
lib. 1. c. 8.  
Occult.

Admirabile exemplum, ex muliere Zelanda dabit tibi Levin. Lemnius Lib. 1. c. 8. de Occult. *Istud verò erat, ait, adunco rostro, longo teretiq; collo, oculis vibrantibus, cauda acuminata, eximiâ pedum agilitate. Quod post primum lucis intuitum, conclave stridoribus implevit, atque ultrò citroq; discurrens latebras quarebat. Ac tandem mulieres pulvinis ipsum impetentes, & suffocantes peremerunt.*

Hoc



Hoc quoque monstri genus à feminis etiam Belgicis interdum (etsi raro) edi narrat, & id ex multo brassicarum esu & cerevisiarum potu fieri credit Lud. Vives.

Lud. Vives  
lib. 1. de  
anima.

Et Tornamira causæ non absimili, generationem Fratrum Italicorum adscribens: *In Italia*, inquit, *dicuntur Fratres Lombardorum, quia in eorum terra multum generantur, causâ multiplici. Quia illa mulieres abundant spermate proprio, & quia comedunt fructus & herbas in patella.*

Tornamira

Vnde liquet, ex impuro sanguine matrum, & uteri recrementis, quorum abundantia ex brassicarum & ejusmodi herbarum frequenti esitatione provenire solet, etiam si semen paternum sincerum foret, talia monstra generari. Hinc Medicus alter ait in Apulia quoque tales Fratres interdum gigni, propter corruptionem nutrimenti. *Quia dicitur*, inquit, *communiter, quod Italica femina pessimè vivunt (sicut ex fructibus & herbis) sed bene induunt.*

Gordon

Veluti ergo statuarius & plastes aliàs minimè malus, ex materia inobedienti & inepta deformem, & ab idea artis delirantem imaginem format; ita virile semen, quantumvis artifex & generosum, si in immundi uteri cloacam cadat; aut si etiam opere jam rectè instituto, immunda ejusmodi coluvies superveniens ipsum interturbet, membra & figuram humani corporis inchoatam, ad brutam vel abnormem aliam detorquebit.

Quæro igitur, cur tales Lombardorum, aut Zelandorum Fratres, non sint re verà homines, si anima rationalis à principio semen humanum ingrediatur, ut ipsam conformet? Nam talia monstra, ut Medici fatentur, à virtute conformatrice humani corporis impeditâ & delirante proveniunt: unde si illa virtus sit anima ipsa, vel facultas animæ rationalis; sanè ipsa in Fratre Lombardo, absoluto opere suo, quantumvis denormi & monstroso, remanebit. Atque ita verus homo erit, & baptizare illud, non pulvinarium conjectu obruere & suffocare oportebit. Cum tamen obstetrices quæ tales partus enecant, nemo culpet.

ARTICV-

## ARTICVLVS III.

*An solus Deus conformet membra corporis hamani in ventre matris.*

**S**criptura sacra multis locis videtur id palàm significare. *Osibus & nervis compegisti me*, aiebat Iobus, explicatus Artic. præcedente. Priusquam te formare in utero, novi te, ait Deus ad Ieremiam. Et Psaltes: *Qui plantavit aurem, non audiet? aut qui finxit oculum, non considerat?*

Et Apostolus: *Posuit Deus membra, unumquodque eorum in corpore, sicut voluit.* Et iterum: *Seminas nudum granum, ut puta tritici, aut alicujus ceterorum: Deus autem dat illi corpus, sicut vult.* Alibi Deus comparatur figulo, qui ex eadem massa facit aliud vas in honorem, aliud in contumeliam.

Vnde SS. Patres sacrae Scripturae doctrinam sequentes, & phrasim usurpantes, passim dicunt Deum, sicut initio hominem unum ex luto, ita nunc ex femine ceteros architectari. *Quis enim Christianus ignorat*, clamat S. Augustinus ad Iulianum, quòd ille, qui primum hominem fecit ex pulvere, omnes fabricetur ex semine? Et alibi eundem dicit auctorem rotunditatis pomi, qui & cæli. *Quâ vi divinâ*, inquit, & ut ita dicam, *effectivâ*, quæ fieri nescit, sed facere, accepit speciem, cum Mundus fieret, & rotunditas celi & rotunditas solis; eadem *vi divinâ & effectivâ*, quæ fieri nescit, sed facere, accepit speciem rotunditas pomi, & cetera figura naturales (ut rotunditas capitis, vel oculi) quas videmus in rebus quibuscumque nascentibus, non extrinsecus adhiberi, sed intimâ Creatoris potentiâ, qui dixit: *Cælum & terram ego impleo*, & *cujus sapientia attingit à fine usque ad finem fortiter & disponit omnia suaviter.*

Nec opus alia testimonia congerere, quæ ex hoc eodem Augustino, aut alijs Patribus possunt. Spiritus sancti enim stylo scribunt, ut dixi, qui in Scripturis suis, Deo corporum & rerum omnium architecturam & conditionem tribuit. Vnde eos eodem sensu & modo, quo Scripturas sic loquentes, interpre-



interpretari oportet. Scripturæ verò causas secundas, sub architecto Deo ministrantes, minimè excludunt. Nam ecce poma, quæ Deus in arboribus rotundat & maturat, quia id ministerio solis & siderum facit, non tantum Dei, sed etiam *cali, & solis ac luna poma vocantur.*

Deuter. 33.

Attamen Deus intimiori & vehementiori, ut S. Thomas loquitur, efficaciâ in effectus creatos, quàm causa secunda, influit; & propterea creator, conditor, & auctor omnium effectuum (modò malitiam moralem non involvant) dicitur; quos titulos SS. Patres causis secundis nec tribuunt, nec bellè ac in rigore tribui possunt. Rationem ejus rei S. Augustinus loco proximè citato insinuat: *Quia Dei occulta potentia cuncta penetrans incommutabili presentia facit esse quidquid aliquo modo est, in quantumcumque est: quia nisi faciente illo, non tale, vel tale esset, sed prorsus esse non posset.* Quæ verba significant, quòd propter essentialem rei creatæ à divina potentia dependentiam, Deus omnem creatam existentiam ex suo nihilo immediatè extrahere debeat; & si quando causa secunda operi huic manum etiam suam misceat, eam Dei omnipotenti manu non minùs quàm ipsum effectum, sustentari oporteat. Et hoc est, quod SS. Patres vocant *creare*, aut *condere* aliquam creaturam; quod soli Deo dicunt competere. Vnde Augustinus: *Multi parvuli deformes, multi orbi, vel morbidi, multi horridi monstrosi, nascuntur; nec ideo illam totam substantiam, omnesq; partes ejus, & quidquid in ea substantialiter existit & vivit, potuit creare, nisi unus, bonus, & verus Deus.*

D. Th. lib.  
2 c. 89.  
contra  
Gent.S. August.  
lib. 12. c. 25.  
Civit.Lib. 6. c. 10.  
contra Iul.

Nam rem creare Augustino est altissimo modo in eam, & usque ad ultimas, ut sic dicam, essentialis ejus radices actione sua illabi, & essentialis dependentiæ fune, eam è suo nihilo ad existentiam extrahere.

Non tamen semper, ubi Deus tali essentiali influxu, cum causa secunda ad effectum concurrir, creator, conditor, & auctor talis effectus dici potest; sed solum quando non tantum externâ causalitate, sed internâ etiam voluntate effectum illum attingit. Quod fit, quando in tali effectui sibi complacet, & ex ista complacentia omnipotentiam suam ad illum efficiendum

3. August.  
lib. 1.2.  
6.14. Civit.

efficiendum applicat. Vnde pravorum nostrorum affectuum creator, conditor, auctor non dicitur; quia ex ultronea voluntatis suæ complacentia, in eos nobiscum non influit, sed à prava voluntate nostra velut attractus, ad cooperandum ex generali causæ primæ officio condescendit. Probat verò elegantiori exemplo S. Augustinus, Deum omnis foetus in utero matris, ac omnis creaturæ esse formatorem & conditorem. Nam, si non fabros & architectos, inquit, sed Reges, quorum voluntate, consilio, & imperio urbes fabricata sunt, ut Romulum Romæ, Alexandrum Alexandria, dicimus conditores: quanto potius non nisi Deum debemus conditorem dicere naturarum; qui neque ex ea materia facit aliquid quam ipse non fecit, nec operarios habet, nisi quos ipse creaverit; & si potentiam suam, ut ita dicam, fabricatoriam rebus subtrahat, ita non erunt, sicut antequam fierent, non fuerunt.

Videte comparisonem & antithesin. Romulus vocatur Romæ conditor, quia sola voluntate, consilio, & imperio admovit fabros non à se creatos, qui materiæ non à se creatæ, speciem urbis forinsecus, ut antè Augustinus dixerat, imponent. Deus verò non tantum sic voluntate conditor, sed etiam opere faber est. Nec talis faber, qui materiæ alienæ figuram artificialem extrinsecus tantum circumponit, sed qui etiam in intimam rei essentiam activitate sua penetrat; & materiam non ab alio, sed à se factam, in opus suum adhibet. Si denique causas secundas ad idem opus cooperatrices convocare lubet, istæ quoque ab eodem conditore factæ sunt, nec magnum operi admoveere, nisi ipso adiutore valent. Nec denique ipsum opus postquam ex nihilo suo extractum, vel momento temporis, nisi suppositâ Dei manu, potest subsistere.

Tot igitur titulis, supra Romulum & urbium conditores, Deus corporis humani & totius hominis, à primis & imis fundamentis est conditor; etiamsi non solus, sed famulantibus causis secundis, illud opus inchoet, promoveat, & consummet.

Et de causis secundis in semine latentibus, bellè & manifestè alibi S. Augustinus: Ipsa jam membra omnia, inquit, sunt latenter in semine; cum etiam natis nonnulla adhuc desint, sicut dentes,



dentes, ac si quid ejusmodi. In qua ratione uniuscuiusque materia indita corporali, jam quodammodo, ut ita dicam, liciatum esse videtur (veluti tela in licijs & staminibus suis jam est, cum textor eam orditur) quod nondum est; imò quod latet, sed accessu temporis erit, vel potius apparebit.

Et hinc, quia in diversis feminibus sunt alia licia & stamina, sive aliæ feminales (ut alibi S. Augustinus vocat) rerum rationes; ideo Deus principalis artifex, ex uno semine triticum, ex alio hordeum, ex hoc hominem, ex isto equum conformat. Et licet det unicuique semini proprium corpus, sicut vult, I. Cor. 15. ut Apostolus ait; rationes tamen volendi hoc corpus fabricare præ illo, præmisit ipse in semine; ideoque ex semine bovis nunquam equum, nec ex semine equi unquam bovem solet fabricare. Quemadmodum enim aves diversæ species, & Deus cum ijs, non unius ideæ & figuræ nidos ædificant; ita vis plastica diversi seminis aliter & aliter corpus suum configurat, sub manu & directione omnipotentis & omniagentis Plastræ, Dei.

Vnde etsi verum sit, quod paulò antè, cum adversario suo Iuliano, dicebat S. Augustinus: Deum eundem esse, qui jam fabricat homines ex semine, & qui olim Adamum fabricavit ex pulvere; non tamen iisdem instrumentis, aut eodem modo. Causas enim seminales instrumentales jam invenit in semine, quæ non fuerunt in agri Damasceni (ex quo Adam plasmatus creditur) pulvere. Cui doctrinæ firmandæ etiam hoc argumentum jam mihi se ingerit. Quòd illi errores naturæ qui in corporum quorumlibet conformatione miscentur, abesse deberent ab opere quod solà Dei manu, sine alio instrumento, fabricaretur. Et tamen tam multi & spissi sunt ejusmodi errores, ut Aristoteles dicat, Quòd veluti in artefactis, ita in natura operibus plura sint prava, quàm proba. Adeoque sicuti in picturis & statuis nihil est tam emendatum, quin ad elegantiam aliquid addi possit; ita in conformatione vultuum & membrorum animati corporis semper est aliquid, quod sciens & curiosus quispiam aliter positum malit. Imò naturam ab arte hinc superari Scaliger censet, & audacter dicit:

Lib. 3. c. 17  
contra Iul.

Aristot.  
sect. 10.  
Problem.

Naturam

Scalig.

Exerc. 307.

*Naturam in eo superat ars, inquit, quia multis eventis à primo homine symmetria illa depravata fuit. At nihil impedit plastem, quominus attollat, deprimat, addat, demat, torqueat, dirigat. Equidem ita censeo: Nullum unquam corpus humanum tam affabrè fuisse à natura factum ( duo scilicet excipio, unum primi hominis, alterum veri hominis veri Dei ) quàm perfectè finguntur hodie doctis artificum manibus.*

Meritò igitur, si Scaligero credimus, cùm Petronius olim formosissimam per hyperbolem mulierem signare vellet, mulierem omnibus simulacris emendatiorem appellavit.

Si tamen non tantùm faciem, aut totius corporis externam superficiem aspiciamus, sed etiam interiora organa, per ductus, ambages, & labyrinthos suos gyrania inspiciamus; nullus plastes Polycletus, nullus Archimedes machinarius, naturæ admirabilissimum istud opus superare, imò propinquâ imitatione accedere valebit; cùm ne quidem imaginatione & ideâ artis comprehendere possit.

In illa etiam superiori duorum formosorum corporum exceptione, Adami, & Christi ( quæ supra omnium platarum & artificum artem esse putavit, quia facta & figulata immediatè Dei manibus ) uxorem illius omittere non debuit. Nam circa costam ex qua fabricata est, Deus etiam faciei & totius corporis pulpas iisdem manibus circumposuit, & lineamenta circinavit.

Ex dictis jam patet, quomodo Scripturæ initio citatæ, quæ Deo conformationem foetus in utero tribuunt, sint exponendæ. Deus quippe causa principalis est, ceteræ tantùm instrumentariæ. Fabro autem potius effectus tribuitur, quàm secu-

S. Tho. ad  
Galat.  
lect. 4.

*Verè dicitur Deus segregare ex utero, ait S. Thomas, licet sit opus natura, quæ est quasi instrumentum Dei: quia opera etiam nostra tribuuntur Deo, sicut principali auctori, Isa. 26. Omnia enim opera nostra operatus es in nobis &c. Sicut & effectus principali agenti attribuantur. Ideo dicitur Job. 10. Pelle & carnibus vestisti me, &c. Et alibi adhuc expressius & impressius: Deus, inquit, est propriè causa ipsius esse universalis in rebus omnibus, quod inter omnia est magis intimum rebus; unde sequitur, quod Deus in omnibus intum*

Tho. 1. p.  
3. 105. a. 5.

*operetur.*



operetur. Et propter hoc in sacra Scriptura, operationes natura Deo attribuantur, quasi operanti in natura, secundum illud Iob. 10. Pelle & carnibus vestisti me, ossibus & nervis compegisti me.

Eadem ratione dicitur Deus vestire lilia agri, & plantis incrementum dare.

Matt. 6.  
1. Cor. 3.

## ARTICVLVS IV.

*Angelos non esse fabros primi domicilij animæ.*

**D**iximus nec Deum solum, nec animam ipsam rationalem, sensitivam, aut vegetativam ordiri prima lineamenta corporis figurandi ex semine. Semen quippe esse ab initio inanimatum, ex Aristotele, & aliunde probavimus.

An igitur Genios, quos Angelos vocamus, fortasse hujus operis administratos facimus? Hanc enim cogitationem excitat nobis Tertullianus. *Omne hominis, inquit, in utero serendi, struendi, fingendi paraturam aliqua utique potestas, divina voluntatis ministra modulatur; quamcumque illam rationem agitare sortita: nos stylo Scholastico diceremus, Cujuscumque rationis sit.* Pergit deinde Tertullianus: *Hac astimando, ait, etiam supersticio Romana Deam finxit Alemonam, alendi in utero fetus. Et Nonnam, & Decimam, à sollicitioribus mensibus (sunt enim matres nono, aut decimo gestationis mense, magis sollicitæ, cum jam in vicino est partus) & Partulam, quæ partum gubernet, & Lucinam, quæ producat in lucem. Nos officia divina, Angelos credimus.*

Tertull.  
lib. de ani-  
ma c. 37.

Ecce, refutatis falsis istis Dearum numinibus, officia Angelorum Deo & Naturæ ministrantia substituit.

Quid si ergo Angelum futuri mox homuncionis Custodem, prima membrorum ejus fila & lineamenta ducere, & unamquamque ingeniosæ istius machinulæ particulam suo situ & ordine disponere dicamus, & ab isto officio Figulinum appellamus?

Fortasse enim tali etiam aliquo ejusmodi ministro, in primi hominis figuratione Deus est usus, qui per invisibilia Ange-

lorum

Gen. I.

lorum ministeria ipse invisibilis, visibilem Mundum gubernat. Licet enim SS. Patres opinionem illam Origenis, Philonis, & Hebræorum ( Quod Deus Pater Angelis, lutum & operam suam ministrantibus, loquatur, cum ait, *Faciamus hominem ad imaginem & similitudinem nostram* ) ne argumentum unum, ex hoc loco adversus Arianos promptum, manibus ipsorum excidat, duriter refellant; non negant tamen Angelos, sub manu & rotâ ejus, tanquam archifiguli, lutum figurasse; venas & arterias ceterosque interaneorum meatus perforasse, omnemque membrorum paraturam & supellectilem discrevisse: modo non ad ipsos, sed ad focias SS. Trinitatis personas verba ista æterni Patris, *Faciamus hominem &c.* dirigantur. Quid igitur præter morem faciet Deus, si in primâ cujusque hominis, aut animantis ex semine coagulatione, ministerium Angelicum advocet? Certè enim, si tam ingeniosum & stupendum opus, quod omnes Archimedis machinas, omnia Mundi horologia admiratione superat, Deus non solus componit & concinnat; quos majoris ingenij & industriæ in hoc opere famulos, quàm Angelicas mentes ei dare possumus?

Deinde, in corporum humanorum regeneratione, Angeli, nullo Theologorum dubitante, pulveres colligent, ut iterum coagulentur quæ soluta & dispersa fuerant. Cur non igitur similem manum accommodent in primâ generatione?

Verùm fuerint sanè ad primam illam hominis Protoplasti ex luto figulationem adhibiti Angeli, colligant quoque sparsos ubique terrarum pulveres in corporum nostrorum reformationem; non placet tamen, ut jam prima nostra membra forment ex semine.

Nam post primum illum hominem ex luto formatum, natura sic à Deo instituta est, ut loco crudæ & inertis massæ ex terra & aqua temperatæ, materia alia decoctior, actuosior & efficacior succederet, in qua vis alterandi, concoquendi, & digerendi inesset, quod semen appellamus. Ejusmodi autem virtus ad conformationem foetus necessaria est; quâ tamen (omnium confessione) carent Angeli. Nam ultra motum localem



localem, nihil per se circa res corporeas efficere valent; sed si concoquere quidquam, aut alterare velint, id applicando activa passivis, ut loquimur, perficere debent. Vnde etiam si partes seminis localiter ordinare, & futurorum membrorum fundamenta suis locis motu locali disponere valeant; indigent tamen aliâ causâ alterante, quæ ossa, nervos, venas, arterias &c. ad aliquam siccitatem & consistentiam concoquat, & alijs membris alias qualitates imprimat.

Quid igitur jam necesse est, Angelicam manum huic operi immiscere, cum illa causa secunda semen alterans, & unumquodque membrum in suam temperiem decoquens, sub manu summi artificis sufficiat ad digerendum & suis locis distribuendum, ac denique ad figuram illam concinnandam modulandamque, quam forma substantialis heterogenea, vel certè temperies & crasis qualitatum cujusque membri postulat? Figuræ enim istæ, quæ à causis naturalibus imprimuntur, solent ex aliqua, vel aliquibus qualitatibus alijs, quæ per agentia illa naturalia inducuntur, resultare, aut certè etiam quandoque à virtute aliqua veluti magnetica, quæ partes ejusdem corporis alias attrahit, alias repellit; ut unaquæque intalem situm migret, & se disponat, sicut figura totius corporis flagitat.

Superflua igitur est opera Angelorum in corporum animatorum conformationibus. Nec quando Peripatetici dicunt, *Opus naturæ est opus Intelligentiæ*, creatam aliquam Intelligentiam, sive Angelum, sed increatam, id est Deum intelligunt; cujus omnipotens manus in omni opere naturæ cum natura ipsa, tanquam instrumento suo, occultè operatur. Itaque per Angelos Tutelares Deus homines tam in utero, quam extra uterum à multis malis præservat; ipse verò solus animas creat, & corpora cum sola virtute instrumentali, quam parentes semini impresserunt, conformat.

## ARTICVLVS V.

*Nec anima matris est causa efficiens conformationis sui foetus.*

**A**N igitur tandem anima matris, quæ uterum ejus informat, & undique semen circumdat & constrin-  
git, organa & membra sui foetus conformat?

Nam licet sapiens illa Machabæorum mater ad filios suos concionetur: *Nescio, qualiter in utero meo apparuistis: neque enim ego spiritum & animam donavi vobis & vitam, & singulorum membra non ego ipsa compegi*; tamen multa anima ejus naturaliter facere poterat, quæ bona mater nesciebat. Et licet filiorum membra, non ex artis & ideæ alicujus directione compe-  
gisset, ut Polycletus statuarum membra effingere solet; fortas-  
se tamen anima uteri ejus, sine idea & operis sui ullo intelle-  
ctu, semen conformat; quemadmodum in jecore sanguinem,  
aut in ventriculo chylum excoquit. Sed non existimo. Nam  
licet uterus matris naturali sua temperie, & qualitatibus,  
quibus fornax illa ad fermentandum & excoquendum semen  
imbuta est, foetum suum perfundat; non ipsa tamen propriè  
est ille artifex qui membra disponit, fingit, & figurat.

Probari inprimis potest exemplo conformationis planta-  
rum, quarum uterus est terra. In forma autem terræ non est  
tanta virtus, quæ innumerabilia illa genera arborum, fruti-  
cum, herbarum, florum conformare possit. Talem enim for-  
mam, nobilissimam esse oporteat; cum tamen terræ elemen-  
tum, ut loco, ita dignitate infra cetera omnia esse credatur.  
Nec enim Senecæ magis, quàm Keplero & Campanellæ  
credo. *Non esse terram dico*, inquit ille, *sine spiritu vitali & ve-*  
*geto, & alente omnia. Hunc nisi haberet, quomodo tot arbustis spiri-*  
*tum infunderet, non aliunde viventibus, & tot satis? Quemadmodum*  
*tam diversas radices aliter atque aliter in se mersas foveret, quasdam*  
*summâ receptas parte, quasdam altius tractas, nisi multum haberet ani-*  
*ma, tam multa, tam varia generantis, & hancstu atque alimento suo edu-*  
*cantis?*

Nihil



Nihil tamen animæ terra habet, mi Seneca, nec stirpium radices attrahit & sibi propriè immergit; sed stirpes ipsæ radices suas in terram agunt, & tam altè quàm animæ ipsarum activitas valet, in eam depangunt. Nec spiritum etiam vitalem terra arbuſtis infundit; sed arbuſta ipſa ex ſucco terræ inanimato, ſpiritus illos ſibi fabricant. Nec animam quoque, aut corporis ſui conformationem à terra, ſive à forma terreſtri habent; ſed rerum iſtarum principia in ſemine cujuſque arbuſti inſunt: unde tot diverſorum ſeminum genera plantas diverſiſſimæ figuræ, coloris, virtutis conformant; quod in uno & ejuſdem temperamenti horto, aut agro fieri videmus.

Quod ergo facit terra, hoc eſt. Suis, & cæli impendentis qualitatibus veluti ſubacta & fermentata, ſemina injecta fovet, & virtutes eorum conformatrices ad opus excitat, corpusque ſuum præbet, ut radices in ipſum deſigant, & ubi anima vegetatrix advenerit, ſuccum ejus in alimentum ducant.

Deinde foetum animalis ab anima matris non conformari, oſtenditur ex omnium oviparorum, quæ incubatu gignuntur, conformatione. Nam avis incubans eſt inſtar uteri matris viviparæ; nec ſecus gallina carnis ſuæ & plumarum calore ova calefactat & fovet, quàm uterus caniculæ, aut feminæ hominis exceptum ſemen, quod miſcendo & fermentando concoquit. Avis verò incubantis anima membra pullorum non figurat; igitur nec catellæ anima catulos ſuos conformat. De ave incubante, res videtur ſatis in comperto. Nam ſi ipſa pullorum membra conformaret, ex ovis quarumcumque avium ſemper pullos ſuæ ſpeciei excluderet. Vt gallina ovis pavonum, aut perdicum incubans, pullos gallinaceos, non pavoninos, vel perdicinos effigiaret & excluderet. Quod experientia refellit. Igitur cauſa conformatrix non in gallina incubante, ſed in ipſis ovis; quandoquidem ex ovo pavonino pavus, ex ovo cuculi cuculus, à quacumque ave foveatur, exeat. Imò neceſſe non eſt, ut ſit avis quæ ovum foveat; ut ex eo pullus ſui generis proveniat.

Nam ova tepenti ſimo obruta, perinde pullaginem procreant, ac ſi à matre fuiſſent fota, ut Ariſtoteles teſtatur. Te-

pore quoque fornacum Ægypti excludi ova, pro compertâ res est, & fama omnibus nota. Modum à Scaligero exscribere, non erit fortasse injucundum. *In Ægypto ad Cairum, inquit, furnos construunt, alij alio multiplici fornice imposito. In quorum tholi supremi medio foramen est, per quod caloris vis, quæ immodica posset officere, subit atque exhalat. In imo ignem accendunt moderatum. Ovorum multas centurias in fornicum superiore planitie disponunt. Statis diebus erumpit turba. Quos illi non numero, sed mensurâ venales habent. Modiolum statuunt sine fundo, quem ut complerunt, tollunt. Neque hac fabula est; sed fabula illi ipsi qui negant.*

Scalig.

Exerc. 25.

Sueton.

Tib. c. 14.

Livia quoque Tiberij mater, & Augusti postea uxor, cùm pragnans, an marem editura esset, ait Suetonius, varijs captaret omnibus, ovum incubanti gallinæ subductum, nunc suâ, nunc ministrarum manu per vices, usque eo fovit, quoad pullus insigniter cristatus exclusus est.

Columel.

lib. 1. c. 35.

Nemo tamen, opinor, dicet, ab anima Liviae, aut ministrarum ejus, membra & cristam illius gallinacei conformata & fabricata fuisse. Deinde in reptilibus & quadrupedibus, quæ extra uterum sine semine, ex colluvie fermentatâ, ut Columella loquitur, proveniunt, res est manifesta.

Nulla igitur uteri materni anima serpentes, anguillas, mures, scarabeos, & tot genera muscarum ac insectorum quæ ex putri nascuntur, conformat. Igitur sicut ibi, non uterus aut ejus anima, sed vis quædam in putredine, à calore solis vel ab alio agente fermentatâ, materiam illam ad animalis formam digerit ac figurat; ita quando semen in utero conformatur, omnino veri simillimum est, non ab anima uteri hoc fieri, sed à virtute aliqua quæ in semine continetur.

Denique uteri concavitas non contingit, nisi, ut summum, superficiem convexam seminis intra uteri capacitatem conglobati; non autem intimas ejus partes, in quibus tamen viscera, ilium spiræ, plurimæ venæ, arteriæ, nervi, & tot aliæ maximi operis & ingenij partes ducendæ, & texendæ sunt; & quarum conformatio non magis ab anima uteri distante videtur posse effici, quàm furni calefacti fornix possit conformare interiora panis, quem intra se coquit; aut quàm artifex

valeat



valeat imaginem sculpere scalp tro, quo lignum non tangit.

Debet ergo spiritus aliquis in ipso semine delitescere, qui totum undique pervadat, & illud in ilia, venas, arterias, nervos, & tot alios tubos, ac concavitates cuniculatim perforet, & universi organi fistulas suis locis digerat & distinguat.

Nec adversatur nobis S. Hieronymus, cùm hoc officium utero materno tribuit: *In generatione hominis, inquit, recipit terra, id est vulva, quod suum est, & receptum confovet, confotum corporat, corporatum in membra distinguit.* Hoc enim vulva sive uterus facit, fovendo & fermentando semina, virtutemque plasticam, & spiritum in quo vehitur excitando, ut organorum fistulas ipse perforet, ac membra distinguat. Hujus enim spiritus immediatam activitatem S. Hieronymus non excludit; sicut nec *Dei manum, qua inter illas secretas ventris angustias, ait, semper operatur, idemque est corporis & anima creator.* Creationem appellans illam actionem, quam ex SS. Patrum sententia Artic. III. enarrabamus. Quam nempe quis ex intimo ac summo S. August. lib. 3. c. 9. Tria. causarum cardine aliquid efficit, ut eleganter & sublimiter loquitur S. Augustinus.

## ARTICVLVS VI.

*Virtus inanimati seminis à parentibus decisa, prima foetus  
stamina in utero matris orditur.*

**I**gitur, si nec Deus solus, nec Genij Angelici, nec anima matris, nec anima seminis conformant foetum in utero matris, restat ut in semine ipso, quantumvis inanimato, sit virtus aliqua organopoea, quæ prima lineamenta organici corporis, sub Dei supremi artificis manu, ducat; & hoc rudimentum edusque perducatur, quousque necessarium est, ut prima anima vegetativa vialis corpus illud ingredi, & utcumque ibi (licet initio fortè non satis commodè) nidulari valeat. Debent quippe, statim ubi utriusque sexus semina calore & virtute uteri permixta & fermentata fuerint, rudimenta quædam instrumentorum animæ vegetativæ deproperari, per quæ embryo animatus alimentum trahat, & instrumenta ipsa paulatim

perficiat, ceterasque animæ vegetantis functiones obeat. Quemadmodum enim ex cibo potuque primum in ventriculo coquitur chylus, deinde in jecore fit sanguis, ex sanguine ros, ex rore gluten, ex glutine cambium, ex cambio pars viventis, configurata membro cui adhæserit; ita semen in utero non illicò animatum est, sed per varias alterationes præcedentes (quæ tamen sæpe celeriter absolvuntur) coqui & fermentari debet, antequam rudem aliquam, à virtute conformatrice, membrorum figuram, & unâ animam vegetativam suscipiat.

Vis autem illa conformatrix, etsi ad operationem suam figuratis organis, sicut anima vegetativa, non indigeat; organa tamen sine organis (ne in infinitum retrocedatur) conficere, aut saltem inchoare & delineare novit.

Ad hoc autem opificium, heterogeneitas seminis plurimum eam adjuvat. Nam veluti hepar sive jecur chymum diversarum & heterogenearum partium conficit (in eo enim sanguis, pituita, & utraque bilis continetur) & veluti in ipso sanguine, præter liquidas partes, sunt fibræ sicciores, per quas partem animalis ad quam appellit, comprehendit, & ei adhærescit; ita semen non est corpus homogeneum, sed partibus heterogeneis diversi temperamenti constat; ut ex illis virtus conformatrix, quæ in spiritibus seminis maximè viget, variæ temperiei organa, ut ossa, nervos &c. ordiri possit.

Materia enim seminis partim sanguine venoso, partim spiritu arterioso constat; quos natura per geminos canales, venam scilicet & arteriam seminalem, ad officinam ubi cuditur semen, mittit. Et hinc tenuior, spiritalior, & spumosior pars seminis ex spiritu arterioso, crassior ex sanguine crassiori venoso conficitur. Licet tamen in sanguine etiam arterioso, non tantum venoso, præter partes magis tenues & liquidas, sunt etiam fibræ sicciores (quæ sanguinem arteriosum extra venas concreescere etiam faciunt) ex quibus in semen excoctis, virtus conformatrix partes etiam sicciores, sicut ex fibris sanguinis venosi, fabricare aggreditur.

Præterea, sicuti officina seminis, sive testes, unam partem  
crassioris



crassioris seminis ad capitis, alteram ad pedis &c. conformationem alterat & procudit; ita unicuique parti materiae seminis suum etiam spiritum talis aut talis membri, foetus organicum excoquit, & illi parti crassioris seminis, quae in talis membri materiam cedere debet, assignat & ei permiscet, ut activitate sua talem materiam in temperiem & figuram talis membri conformet.

Eadem quoque de feminino semine ratio. Nam officinam quoque seminis in uteri fundo habent, & in foetus coagulationem & conformationem, semen quoque suum conferunt feminae, ut jam passim contra Aristotelem (ut putant) cum Galeno suo docent Medicorum filij.

Vbi verò maris & feminae semina in utero maritata, ac in unum *φύμα* fermentata fuerint, spiritus virilis seminis, tanquam magis actusosi & artifices, languidos feminei seminis spiritus ad opus excitant, ut juncti simul, & velut unâ manu, ex eadem utriusque seminis crassiori materia, secundinas, seu membranas quibus involvendus est foetus, ac stamina & fila quaedam membrorum futuri corporis, veluti nere & texere incipiant.

Vnde prima ista ossium, nervorum, venarum, arteriarum, ligamentorum, cartilaginum, membranarum &c. mollis & mucosa textura, tota adhuc seminea est, ut Hippocrates & experimenta affirmant: ac demum, ubi foetus animâ saltem vegetatrice animatus fuerit, & ducere sanguinem matris didicerit, tunc carnes, cor, jecur, & cetera parenchymata, ex sanguine materno per umbilici canalem attracto, conformari incipiunt. Tales enim partes non ex mero semine, sed ex sanguine plurimo coagulantur & formantur. Fortasse illam primam ex semine solo inchoatam, ac deinde carne, & sanguineis parenchymatibus, plenius & formosius absolutam conformationem significare voluit S. Hieronymus, ubi ait, *Natura non erubescenda, sed veneranda est. In uterum primum semen iacitur informe, ut sulcis & fundo ejus quasi quodam glutino adhæreat. De qua & Propheta, initij sui recordatus, ait: Incompositum meum* (Versio nostra, Imperfectum meum) *viderunt oculi tui*

S. Hieron.  
in c. 4. ad  
Galat.

Psal. 138.

Deinde per novem menses restricto sanguine, menstruo matris, futurus homo coagulatur, corporatur, pascitur, atque distinguitur: ut quam in utero palpitavit, statuto tempore fundatur in lucem.

Sed qua ratione vis illa seminis conformatrix, sive anima sit, sive inanima, tanta arte, ingenio, membrorum materiam illam in tot venarum, arteriarum, & intestinorum tubulos, cum tanta ad usum proportionem perforaret, gyret, & circumflectat; quomodo deinde membris omnibus suum locum & situm in corpore assignet, nullum ingenium humanum potest capere. Narrat Galenus, se totâ vitâ in hujus rei admiratione & investigatione fuisse, atque à Philosophis sui ævi lucem quæsisisse, sed tenebras tantum majores, & tristitiam retulisse. Hoc verò tantum sibi in certo & comperto esse: *ἀνὴρ σοφιστά-λου τε, καὶ δυνατά-λου δημιουργοῦ, sine sapientissimo & potentissimo Opifice*, tam ingeniosum & admirabile opus perfici non posse.

Et hujus rei admiratio & stupor, causa fuit, cur Subtilis Scotus, & alia magna ingenia negaverint, ullam aliam causam, præter summum Numen, illius *animantis machina*, ut Columellus lib. 3. c. 1. la appellat, opificem esse.

Sed majoris admirationis res adhuc erit, si non Deus solus (quid enim magni miri, si infinitæ sapientiæ manus hoc efficere possit?) sed talis etiam virtus vili creaturæ communicari valeat, quâ sub manu Omnipotentis illius Opificis in omnes conformandi corporis figuras gyros, spiras, & labyrinthos se moveat; ita ut ultroneo propriæ naturæ impetu, non mero artificis tractu (ut celte, aut ascia ducuntur & trahuntur à sculptoris manu) summi Opificis manum comitetur, & ingenij ejus tam expressam similitudinem participet.

Vnde in hanc admirationem alicubi defixus S. Augustinus: *Quàm multa usitata calcantur*, inquit, *qua considerata stupentur?* Sicut ipsa vis seminum, quos numeros habet, & quàm vivaces, quàm efficaces, quàm latenter potentes, quàm in parvo magna molentes, quis adeat animo, quis promat eloquio? Nemo, nemo profectò. Ita ut Sapiens meritò olim dixerit: *Quomodo ignoras, qua ratione compingantur ossa in ventre pregnantis; sic nescis opera Dei, qui fabricator est omnium.*

Vbi



Vbi tamen, ad novissimum sententiæ istius membrum at-  
tende. Nam ut admirationis illius magnitudinem diminuatur,  
cetera quoque opera Dei nesciri dicit. Et re verâ, si cujuscum-  
que operis naturalis, non superficiem tantum noscitare, sed  
fundum scrutari velimus, tenebrosam abyssum tantum inve-  
niemus & nihil certi ac comprehensi referemus. *Et reverâ hæc* Lib. 6. c. 7.  
*est utilitas occultorum operum Dei,* inquit S. Augustinus, *ne prom-* contra Iul.  
*pta vilescant, ne comprehensa, mira esse desistant. Vnde & Scriptura*  
*dicit: Sicut ossa in ventre pręgnantis; ita non cognoscis opera Dei*  
*quacumque faciet universa.*

Vnde & alibi vetamur in eorum altitudinem & profundi-  
tatem curiosè inquirere. *Altiora te ne quęsieris, & fortiora te ne* Eccles. 3.  
*scrutatus fueris: sed quę pręcepit tibi Deus, illa cogita semper, & in*  
*pluribus operibus ejus ne fueris curiosus.* Ad ingenij autem huma-  
ni deprimendam, & ut illud obedientius in obsequium divinę  
fidei captivemus, istas ubique operibus suis tenebras asper-  
sit Deus. Aliàs studijs naturalium operam aliquam dare, &  
aliquod usque in illa, non ad fundum usque, in ea velle pene-  
trare, non curiosum, sed Ecclesię Dei, ad hæresum confuta-  
tionem, necessarium. Hæretici enim undique se armant, &  
res etiam istas naturę in sui defensionem rapere solent. Et  
certè videmus, quàm varia scientia, de animę præsertim na-  
tura, S. Augustino necessaria fuerit, in acerrimo illo adver-  
sus Manichęos & Pelagianos conflictu. Itaque virtutem illam  
admirabilem seminis (quę *numeros tam vivaces, efficaces, & la-*  
*tenter potentes in se continet, ut modò dicebat S. Augustinus*)  
imaginor stupendum istud naturę opus sic architectari.

Vbi semen ab utero, aut aliã causã satis actuatam & fer-  
mentatum fuerit, discerpitur in partes, & unaquęque pars  
protruditur, aut spontè occupat illum in toto situm, quem na-  
tura & figura fabricandi corporis flagitat.

Sed à quã causã partes sic moventur, inquires, & tali ordine  
in toto se componunt, ut nullum ingenium humanum imi-  
tari, itò ne imaginari possit.

Dic tu mihi antè: Quãnam de causã, pars una magnetis  
Septentrionem, altera Meridem semper aspiciat, & si inde  
avertas.

Gilbert.lib.  
de magnet.

avertas, perpetuò in eundem situm & aspectum se restituat? Quare deinde magnete confracto, cuspis septentrionalis meridionalem à se abigit?

Nihil aliud, credo, respondere poteris, quàm talem esse naturam & naturalem proprietatem magnetis, quam ex illo motu & effectu utcumque intelligimus, etsi ejus rei fundum inspicere & comprehendere nequeamus.

Cogitemus igitur, in partibus heterogeneis seminis, & præsertim in spiritibus qui unamquamque partem comitantur, & veluti animant, tales facultates morrices, ex natura & conditione formæ substantialis, aut temperiei, vel occultarum qualitatum, inesse. His facultatibus unaquæque seminis pars ad aliam cum qua naturalem cognationem & sympathiam habet, se vertet; aliam verò partem à se repellit, quacum hostilitatem & antipathiam quandam naturalem exercebit.

Vero etiam simile est, hanc partium seminis commotionem & localem ordinationem, præviâ aliquâ, ad notas vel ignotas qualitates alteratione fieri; quemadmodum Aristoteles & experientia docet, actione caloris, ea quæ sunt ejusdem generis congregari, separari verò quæ sunt generis diversi.

Postquam autem seminis partes una in situ capitis, altera colli, tertia ventris &c. sunt dispositæ, spiritus, præcipuus organorum faber, unicuique parti infusus, eam alterare & in illam formam transfigurare incipit, quam natura animæ, quæ corporis illius futura est inquilina, postulat. Nam anima parentis, à quo semen decisum est, in officina ad hoc à natura deputata, virtutem non cujuscumque corporis, sed talis quale ipsa inhabitat, conformatricem semini imprimit; & in eo quoddam novi animalis ejusdem speciei procudit compendium. Et inde est, ut ex semine hominis, homo, ex equi, equus, non aliud animal generetur; nisi quodam naturæ adulterio, diverforum animalium semina in unum uterum conijciantur, aut semen simplex, uteri vitio, ab idea artis deliret; ut quando ex semine humano harpia, seu Frater Lombardorum gignitur, ut Artic. 11. dictum est.

ARTICV.



## ARTICVLVS VII.

*Reijciuntur quæ contra hanc inanimati seminis vim conformatricem obijci à quibusdam Medicis solent.*

**M**ulta aduersus vim istam seminis inanimi conformatricem obijciunt Medici.

Primo, Facultas vitalis esset in corpore inanimato, ait Sennertus. Nam prima corporis membra conformare, tam videtur esse actio vitalis, quàm eadem postea per vitalem accretionem augere.

Resp. Facultatem illam non magis propriè vitalem esse, quàm simia sit homo. Imitatur enim facultatem vitalem, sed re verà non est.

Si tamen ad actionis vitalitatem sufficeret, ut principium ejus proximum, etsi vitâ careat, sit tamen à vivente decisum, & ut instrumentum ab eo separatum, virtuteque ab ipso acceptâ agat; seminis, licet inanimati, actio conformatrix vitalis foret. Sed hoc pacto motus lapidis per aërem projecti manu viventis, esset quoque vitalis; ut Fienus non absurdè in nos regerit.

Fatemur igitur conformationem illam non esse proximè, propriè, ac rigore summo vitalem; quia vita prima remotè solum & per interjectum instrumentum in eam influit. Vnde Aristoteles dicit ἐργον τοῦ γεννᾶντος opus generantis esse, conficere vitaliter semen. Ipsum verò semen esse instar horologiorum & mirabilium machinarum, quæ αὐτόματα, sive spontina appellantur; quarum unâ parte manu tactâ, in reliquas omnes motus successivè sic continuatur, ut tota machina vivere videatur. Sic enim semen, impressâ sibi in officina testium, per actionem proximè vitalem, virtute conformatrice, avulsum à genitore, pergit in utero feminæ, materiam foetus movere, & moliri ex ea novi animalis conformationem. Quæ proinde actio remotè tantum vitalis est, licet proximè vitali simillima.

Convenientissimè autem sapientissimus naturæ Auctor

talem ordinem instituit, ut sicut à corporibus inanimatis ad animata, à plantis ad bruta, à brutis ad hominem sensim & gradatim in hac rerum universitate scanditur; ita à facultatibus merè naturalibus ad vitales simili ordine ascenderetur: adedò ut supremum ordinis inferioris, sit tam propinquum infimo ordinis superioris, ut ad utrum ordinem pertineat, difficile sit discernere.

Itaque facultas ista conformatrix merè naturalis, & formæ quidem inanimæ potentia est, sed talis ingenij, ut operationem vitalem animæ vegetativæ imitetur, & rudimentum aliquod operis inchoet, quod animæ vegetativæ ad perficiendum, in manus quasi tradat.

Qui ergo ex hac similitudine illius operationis cum vitali animæ operatione, colligunt conformatricem vitaliter operari; simili errore errant, quo Thales olim putavit magnetem vivere, quia vitali motu videbatur cuspidem suam, quotiescumque avertitur, ad Septentrionem iterum convertere.

Secundò, Plus ingenij habet, inquiunt, ista conformatio, quàm in actionem inanimati seminis non vitalem possit competere.

Resp. Eodem argumento probabimus in araneis, & hirundinibus esse animam plusquàm rationalem; quia tantâ artificij subtilitate sua opera texunt, & fingunt, ut nullum hominis ingenium, omni nisu & industriâ, ad perfectionem illam valeat pertingere. Experiatur enim quæcumque artifex hominis manus, An araneorum stamina & tramas, An avicularum Lares & cunas, An apum cellaria & favos, pari ungue & artificio circumscribere & componere valeat. Mentior, si valebit.

Natura enim, sive animata sit, sive inanima, à sapientissimo Universi Opifice & Rectore instituta & instructa, plura & mirabiliora, non tantum ordiri, sed etiam pertexere & perficere potest, quàm ullus Archimedes, aut humanum ingenium omni studio & arte, lineamentis etiam adumbrare possit.

Nec minùs sanè mirum est, animam vegetatricem (sive quamcumque aliam placet rudi & inorganico semini immittere) sine



tere) sine instrumentis, sine ullâ ideâ artis, ineffabilem illam animantis machinæ structuram moliri & componere, quàm si formæ inanimi seminis velis hoc opus imponere. Nam anima vegetativa, aut sensitiva, vel etiam rationalis nullo propriè ingenio, intellectu, aut ideâ artis in simili opere dirigitur. Et si magni Auctores interdum fortè sic loquantur, metaphorica dictio est; quia anima in ista tam admirabili compositione operatur, ultrà quàm excellentissimo artifex ingenio, intellectu, & omnibus artis suæ ideis utens, posset & valeret. *Natura animalis anima est*, ait Scaliger. *Ipsa sibi fabricat calces, dentes, cornua ad vitam tuendam. Itaque ipsa utitur, & scit quo sit utendum modo, sine objecto, aut phantasia ulla.*

Scalig.  
Exerc. 307  
§. 29.

Iam verò, si absque phantasia & propriæ ideæ contemplatione & aspectu, tale opus anima efficere potest; nulla profectò ratio est, cur forma quoque seminis inanima, per potentiam non vitalem, tantundem; aut saltem opus illud idem inchoare primis lineamentis, & monogrammis adumbrare non valeat.

Tertiò, Surculus ab arbore una recisus, & insertus in alteram, ab anima, quam secum defert, prioris arboris in ramum suæ speciei conformatur: ergo seminis conformatio fit etiam ab anima.

Sed neganda sequela. Nam sicut anima totius arboris ramos, stolones, folia, & fructus quotannis novos eijcit & reformat; ita non mirum, si animæ, quæ cum furculo deciditur, particula vim materiam suam dilatandi, & in ramos ac folia explicandi, à matre sua arbore retineat. Hoc enim viventis imperfecti, qualis arbor, proprium est, ut animæ pars, post recisionem diu supervivat, & vitæ operationes exerceat. Vnde ramos revulsos, & terræ, aut alteri arbori implantatos, recrescere & fructum referre videmus.

Semen verò non est pars arboris, sed superfluum quoddam recrementum, quod anima quidem caret, ut Artic. I. diximus; sed tamen vim conformandi, ab anima arboris unde decisum est, retinet.

Quartò, & ferè simili argumento; Anima, inquit, non

tantum plantarum, sed etiam quorundam animalium, partes amissas reformat & regenerat; ergo in semine anima eadem partes illas primum formaverat & genuerat.

Antecedens plurimis exemplis ostendi potest. Nam hirundinibus & serpentibus exsecti reparantur oculi, lacertis & serpentibus amputatæ recrescunt caudæ, ut Aristoteles testis, & polypis erosa, aut defracta brachia renasci, sicut colotis & laceratis caudam, haud falsum, ait Plinius. Similiter & cancris abruptæ chelæ regerminant.

Arist. lib. 2.  
c. ult. Hist.  
animal.  
Plin. lib. 9.  
c. 29.

Et hæc causa est, cur cancris fluvialibus chele primores adæ inæquales reperiantur, ait Bodinus, ut altera justam magnitudinem affecta, altera brevissima videatur, quasi nunc germinaret.

Bodin. lib.  
3. Theatr.

Fatemur igitur animalibus quibusdam imperfectis, membra quædam interdum recrescere ut arboribus, & ab anima quæ corpora illa nutrit, ex abundanti affluentia alimenti reparari; negamus tamen consequens esse, prima membrorum lineamenta, ex semine liquido & prorsus informi, ab eadem anima conscripta fuisse. Nam prima membra delineandi, & aliquodque ruditer figurandi artem, forma inferior, & animâ ignobilior, quæ in semine est, novisse potest: velut Apellis minister tabulam conscribillare, & primum imaginis rudimentum inchoare valet, quam deinde Magister perficiat.

Vade quintò, iam ferme patet, quid solenni isti argumento reponi debeat: Anima corpus suum nutrit, alimentum trahendo, applicando, & figurando, prout forma cujusque membri postulat; igitur prima etiam membrorum rudimenta conformare potest & novit.

Sed neganda iterum sequela. Anima enim nutrire potest membra sui corporis, quia organa & instrumenta jam habet, quibus vitaliter id facere possit: forma verb quæ prima membrorum lineamenta ducit, sine organis, more formarum inorganicarum, hoc agit; sicut ignis subterraneus metalla coquit, aut magnes ferrum trahit. Facultates verò quibus anima operatur, organicæ sunt, & organis ad usum ejus conformatis insidere debent; quia dignitas animæ vegetativæ & sensitivæ talibus ministris, in omni operatione suâ vitali indiget.

ad 771127

Sextò,



Sexto, Si in semine inanimato sit virtus conformatrix; ergo inquierit, ubi semen maris & feminae (ut in animalibus perfectis) ad generationem necessarium est, duplex quoque erit vis conformatrix; quarum una alteram, in opere conformandi impediet & obturbabit.

Sed argumentum hoc fortius in Argenterium, Scaligerum, Sennertum, & alios regei potest, qui animam inferunt liquido, nec adhuc ex vasis suis effuso semini. Nam si paternum semen animam suam habet, non est ratio, cur maternum semen suam careat. Semina igitur duo in utero permixta, duas animas conformatrices habebunt, quarum una alterius opus confunderet, aut interpellabit. Deinde in unico foetu duae semper animae, confusione quadam monstruosa, inerunt, quarum una à patre, altera à matre decisa fuerit. Quale absurdum nullum sequitur, si femina parentum inanimata esse dicamus.

Igitur in semine duplicem conformatricem concedimus. Semen enim matris spiritus etiam suos conformatores, etsi tardiores ac invalidiores habet. Hi inter se commixti, & calore ceterisque uteri qualitatibus confermentati, se invicem in opere conformationis adjuvant. Et saepe spiritus materni seminis tantum valet, ut sexum & figuram corporis in similitudinem matris trahat. Pugnam enim aliquam inter utrumque spiritum, dum unus patri, alter matri similem prolem temperare & figurare contendit, Aristoteles admittit. Ac aperte *κίνησις* motum, & actionem à semine quoque materno in opus conformationis conferri, Lib. 4. c. 3. de generat. animal. docet, & aliquoties repetit. Vnde prout paterni, aut materni seminis (quod facilius evenit, ubi mater juvenula, & pater senex) activitas vicerit, in hujus, aut illius similitudinem opus confectum dicit. Aliquando vero mutuas vires hac pugna & contentione ita confundi, ut proles nemini suorum majorum similis prodeat, sed commune tantum relinquatur, quod homo sit.

Vnde existimo non usquequaque verum, quod Aristoteli tribui solet: Matrem tantum passivè ad conformationem & generationem prolis concurrere. Nam etsi sic quandoque

loquatur, id solum comparatione majoris activitatis seminis paterni intelligi debet: quomodo inter qualitates primas siccitatem & humiditatem passivas appellat; quia licet otiosæ non sint, languidius tamen agunt, quàm calor & frigus, quas idcirco qualitates activas vocat. Dicit deinde, ex semine ac sanguine matris materiam, ex semine patris causam efficientem subministrari fabricandæ proli; non tamen quia pater nihil materiæ, vel mater nihil efficientis activitatis conferat, sed quia materiam affatim convehere, præcipuum est matris munus, fabrum verò agere & architectari maximè est patris. A principali autem, ut solet, denominationem sumit.

Et sanè, nisi aliqua femini matris detur etiam activitas, ut Galenus advertit & urget, nulla solida est ratio, cur tam sæpe prolem (feminea, sive mascula sit) in totum, aut in partem, lineamentis matris descriptam videamus. Sicut enim non cerussa, aut purpurissum, ceteræque materiæ quibus pictores colorant suas imagines, sed artifex penicillus lineas ducit, & figuram vultûs ac membrorum in imaginem circumscribit; ita in formatione foetûs, si mater nil nisi materiam inactuosam & inertem suppeditet, nec spiritus seminis ejus quidquam agat; nulla profectò est causa, cur figura vultûs materni corporis proli imprimatur.

Quod enim quidam dicunt, ideas aliquas figuræ materni vultûs in semine feminino velut supernatare, quas in elaborando & plasmando foetu, vis conformatrix seminis virilis aspiciat, ut ad earum similitudinem vultum prolis exprimat; vanum & ridiculum apparet: cum virtus plastica bruti, aut humani corporis non magis utatur phantasmate in opere suo, quàm virtus plastica arboris, cujus anima, in omni vegetativa sua operatione, sensu & phantasiâ caret, qua ideam intueri possit.

ARTICV:



## ARTICVLVS VIII.

*Vis formatrix quæ est in semine animalis, post inductam animam  
viablem vegetativam, usque ad formam membrorum ani-  
malis, materiam conformare pergit.*

**Q**uia enim unumquodque animal, ad speciei suæ propagationem semen excoquere & perficere studet; ideo non cessat donec talem ei virtutem incoxerit, quæ non tantum prima & rudia animæ vegetatricis instrumenta cudere sciat, sed etiam ut opus suum usque ad fabricationem instrumentorum animæ sensitivæ continuare norit & valeat. Et hæc est causa, cur Aristoteles, S. Thomas, Scotus, & maximi quique Philosophi ac Medici animam vegetativam, & deinde sensitivam prodromas (quas aliqui viales appellant, quia via sunt, aut viam sternunt ad ulteriorem animam) adventui animæ rationalis præmittant. Quandoquidem enim vis illa seminis organifica non statim organa pro animæ rationalis dignitate constare & perpolire valeat, sed antea per rudimenta quædam organorum (quæ tamen inferioribus animabus introducendis sufficiant) limam & asciam ducere debeat; necesse est, & naturæ ordo flagitat, ut inferiores istæ animæ antegrediantur, & corpus semiforme subeant ante nobilioris animæ superventum.

Hanc Philosophiam tradere putatur Aristoteles, cum ait: *Animam vegetativam in feminibus & conceptibus nondum separatis haberi potentia statuendum est, non actu; priusquam eo modo quo conceptus qui jam separatur, cibum trahant, & officio ejus anima fungantur. Principio enim hæc omnia vitam stirpis vivere videntur. De anima quoque sensitiva pari modo dicendum est, atque etiam de intellectu. Omnes enim potentia prius haberi, quam actu necesse est.*

Arist. lib. 2.  
c. 3. de generatione animalis.

Vnde paulò antea dicebat: *Animam sensitivam quæ animal est, tempore procedente recipi, & rationalem quæ homo, certum est. Non enim simul & animal sit & homo, nec animal & equus. Eademque in ceteris*

*ceteris animalibus ratio est. Finis enim postea contingit.*

D. Th. lib. 2  
c. 89. contra  
Gent.

Et eidem Philosophiæ clarissimâ expositionis face lucem  
D. Thomas affundens: *Formatio corporis*, inquit, præcipuè quan-  
tum ad primas & principales partes, non est ab anima genita, nec à  
virtute formativa agente ex vi ejus, sed agente ex vi anima generati-  
va patris; cujus opus est, facere simile generanti secundum speciem.  
Hac igitur vis formativa eadem manet in spiritu prædicto, à principio  
formationis usque ad finem. Species tamen formati non manet eadem.  
Nam primò habet formam seminis, postea sanguinis (sanguine ut in-  
terpretor, per umbilicum embryonis, ad carnium & paren-  
chymatum formationem attracto, & semini permixto) & sic  
deinde quòdusque veniat ad ultimum complementum. Licet enim generatio  
simplicium corporum non procedat secundum ordinem, eo quod quodli-  
bet eorum habeat formam immediatam materiæ primæ; in generatione  
tamen corporum aliorum oportet esse generationum ordinem, propter  
multas formas intermedias inter primam formam elementi, & ultimam  
formam, ad quam generatio ordinatur: & ideo sunt multa generatio-  
nes & corruptiones sese consequentes.

Et respondens ijs, qui aliquid absurditatis in ista genera-  
tionum & corruptionum continenti successione, misceri ima-  
ginabantur: Nec est inconveniens, ait, si aliquid intermediarum  
generatur, & statim postmodum interrumpatur; quia intermedia non  
habent speciem completam, sed sunt ut via ad speciem: & ideo non gene-  
rantur ut permaneant, sed ut per ea, ad ultimum generatum pervenia-  
tur.

Ac paulò post: Quanto igitur, inquit, aliqua forma est nobilior,  
& magis distans à forma elementi, tanto oportet esse plures formas  
intermedias, quibus gradatim ad ultimam veniatur, & per consequens,  
plures generationes medias. Et ideo in generatione animalis & homi-  
nis, in quibus est forma perfectissima, sunt plures forme, & generatio-  
nes intermediae, & per consequens, corruptiones; quia generatio unius  
est corruptio alterius.

Ac tandem concludens: Anima igitur vegetabilis, qua pri-  
mò inest, cum embryo vivit vitâ plantæ, corrumpitur; & succedit  
anima perfectior, qua est nutritiva & sensitiva simul: & tunc embryo  
vivit vitâ animalis. Hac autem corruptâ, succedit anima rationalis ab  
extrinseco



*extrinseco immissa, licet precedentes fuerint virtute seminis.*

Eant nunc Medici quidam, qui tantæ absurditatis arcessunt & inclamant Peripateticam istam animarum successi-  
onem, cui vultum adeo probabilem Doctor Angelicus appin-  
xit.

Et addere Subtilem Scotum ei possumus, qui illam anima-  
rum sibi gradatim succedentium scalam etiam struit. *Constat* Scot. in 2<sup>o</sup>  
*enim, inquit, naturam in semine non sistere, sed ulterius procedere,* d. 18,  
*& ascendere usque ad ultimam formam perfectam.*

Hæc quoque plurimorum Medicorum est sententia. Nam  
vero simile non est, semen primam suam formam substan-  
tialem adhuc retinere, quando in utero, non tantum coagu-  
latum, fermentatum, & crustulâ suâ obductum est; sed initia-  
libus etiam partium omnium spermaticarum staminibus con-  
scriptum est, & ex reliquo semine, cui innatat, tenue quod-  
dam ( ut Ficus & alij quidam existimant ) fugit alimentum.

Vnde tunc formæ seminis, formam aliam successisse ne-  
cessarium est; quæ non profectò alia quàm anima quædam  
vegetativa esse potest. Cui deinde, perfectione & politurâ  
operis procedente, anima sensitiva, ac postremò rationalis  
succedat; si architecturam hominis natura moliatür. Nam  
materiam rudem omnino & impolitam, animæ rationalis in-  
capacem esse, rationibus, & Scripturis sacris antea probavi-  
mus.

Huic etiam animarum successioni, ex doctrinâ Hippocra-  
tis à Galeno traditâ, lux aliqua affulgebit.

Totum hoc conformationis opus, ait Laurentius, admirandus Andr. Lau-  
Hippocrates, ut refert Galenus Lib. 1. de semine, quatuor distinxit rent. lib 8.  
temporibus. Primum tempus, id est quo seminis species præpollet, G. Anat.  
vovv appellat. Nihil enim præter semina coagulata, & crustulâ obducta  
videas. Secundum, xónua ( id est conceptus, aut germen ) vo-  
cat; quo rudis partium quædam adumbratio, & moles quasi carnea  
conspicua est. Tertium, quo trium principiorum, & partium omnium  
spermaticarum prima stamina cernere licet. Eam animalis constitutio-  
nem ἐμβρυον, live embryonem vocat. Quartum & postremam,  
cùm perfecta est partium discretio descriptioque. Tunc πρὸς τὴν  
K  
καὶ τὸν

κώπορ, id est puerulum, & infantem appellat.

Primo tempore, negat, ut videtur, Aristoteles supra citatus, animam vegetativam esse ἐνεργείᾳ ἄκτῳ sed tantum δυνάμει potentia, in femine (seu γυναικὸς γενitura), coagulato & crustulâ suâ obducto. Vnde totum istud primi temporis opus, à virtute inanimâ seminis est, nondum ab anima.

De tempore quoque secundo, sive κοινὰς conceptus, levi partium adumbratione signati, idem dicit. Quod proinde etiam primæ adumbrationis rudimentum, ad eadem sola virtute conformatrice inanimati seminis, fabricatum esse oportet.

Attamen eo rudimento absoluto, anima vegetativa (ita imaginari lubet) domicilium istud qualequale subintrat, & dum sibi illud perficere studet, animæ sensitivæ paulò post superventuræ, id est hosti à quo expellenda est, domicilium parat. Sic in bellis nostris fieri videmus. Gallus Landracum, Armenteriam, Cominum, Dyxmudam à se captas novis operibus cingit, loricat, & munit; pro se quidem, sed quæ Hispano serviant, postquam ille depulsus fuerit.

Supervenit autem hæc anima sensitiva in fine secundi temporis, quando κοινὰς conceptui succedit ἐμβρυος embryo, trium principiorum cerebri, cordis, jecoris, & omnium partium spermaticarum staminibus lineatus & descriptus.

Vbi verò anima sensitiva corpusculum embryonis subiit, illicd etiam opus antecedentis animæ continuat, & sibi quoque studens, operas suas & domesticam totam supellestem animæ rationali relinquit, quæ circa terminum tertij temporis ei succedit, quando ex sensitivo embryone fit ἰσθμὸς sive vitulus, ut Hebræi vocant, sive παιδίον puerulus, ut Septuaginta Interpretes & Hippocrates vocant, id est embryo rationalis.

Sic mihi, Lector, ex infinita opinionum, quæ Philosophorum, quæ Medicorum farragine, me expedire visum fuit: si quis certius aliquid attulerit, manum extendimus, & lubenter recipiemus. Harum quoque rerum Lib. II. c. vi. Art. xiv. xv. xvi. xvii. mentio redibit.

Notanda denique magna varietas celeritatis, in diversorum



rum animalium tam viviparorum, quàm oviparorum conformationibus. Non enim omnia æquali tempore uterum gestant, aut incubant ovis. Ocyssimè autem conformari videntur, quæ in nullius uteri, aut ovi officinâ excoquantur; sed foris ex putri, quisquilijs, vaporis & exhalationis, aquæ cælestis & pulveris mixturâ, admirabili prorsus naturæ agilitate deproperantur. Sic enim infinita muscarum, & aliorum insectorum eburriunt examina: veluti murium (ut illi qui An. 1617. agros in Belgio vastaverunt) exercitus, aut ex uno infervidum pulverem deciduo imbre, ranunculorum myriades. Talium autem animalium extra uterum, tanta naturæ celeritate gregatim figuratorum, par solet esse corporis modus ac mensura; ut nullus inter ipsa pater aut mater agnoscatur, sed omnia ejusdem ævi, & parentis cæli filios esse intelligantur. Quo, opinor, argumento Io. Bodinus, Oceani nostri Zelandici haringos, sine semine, sed ex sale & cælo fermentari perficique existimavit.

In ista tamen haringorum nativitate aliquid est quod vicem seminis subit. Nunquam enim talis generatio ex crudis immediatè elementis fieri potest, sed occultum aliud semen ex elementorum primordijs temperatum fermentatumque, agente maximè sole, lunâ, alijsve cæli sideribus, aut calore ignis, intercedere debet.

Vnde ne quidem prima quadrupedum reptiliumque ex terra, volucrum pisciumque ex aqua productio, ex crudâ terræ vel aquæ materiâ, sed excoctis antea ad ista opera varijs seminibus, facta fuit. Ideoque dixit Deus, *Producat terra bestias terræ, & Producant aqua volatile, & cete grandia*: quia videlicet duo ista elementa complexu suo fovebant semina, unde animalium istorum examina mox ebullierunt. Dicit hoc scitè & profundè omniscius Augustinus: *Omnium rerum, ait, quæ corporaliter visibiliterque nascantur, occulta quadam semina in istis corporis Mundi elementis latent. Alia sunt enim hæc jam conspicua oculis nostris, ex fructibus & animantibus; alia verò occulta istorum seminum semina. Vnde iubente Creatore produxit aqua prima natatilia & volatilia, terra autem prima germina, & prima sui generis animalia*

Gen. 1.

Lib. 3. c. 8.

*animalia. Neque enim tunc huiusmodi fœtus ita producti sunt, ut in eis quæ producta sunt, vis illa consumpta sit; sed plerumque desunt congrua temperamentorum occasiones, quibus erumpant, & species suas peragant.*

Sic etiam, quando Deo permittente, dæmones muribus, locustis, erucis, alijsve animalium insectis agros & spes agrorum depopulari volunt, semina ejusmodi præparant, quæ soli & cælo concoquenda & fermentanda exponunt. Unde cum illi murium greges per totum fermè Belgium, Anni 1617. Autumno eruperunt, veneficæ testatæ sunt, se saccos medicati cujusdam pulveris à dæmonibus accepisse, quem per agros spargerent.

Exod. 7. 8.

Sic etiam Magi in Ægypto Moysem imitati, operâ dæmonum, serpentes & ranas mirâ & præcipiti naturæ festinatione produxerunt; ut ea, ait S. Augustinus, qua secreto natura sinu abdita (tanquam semen in utero) contuebantur, erumperent; explicando mensuras & numeros & pondera sua, quæ in occulto acceperant ab illo, qui omnia in mensura & numero & pondere disposuit.

Lib. 3. c. 9.  
Trin.

## ARTICVLVS IX.

*Iul. Scaligeri & aliorum de successione animarum dubitationes dissipantur.*

Scalig.

Exerc. 290.

**V**arijs dubitationibus adversarium suum Cardanum Scaliger, super ista animarum successione exagitat. *Queritur, inquit, an hæc anima sint ejusmodi, ut prima non abeat sed à secunda supergrediente contineatur, tum à tertia secunda; quasi lamellarum orbes, quibus cepe constant. An subcuntis accessu prior deleatur, tum à secunda prima, tum ab ultima secunda.*

Resp. Hoc postremum eligimus Iuli Scaliger, & priorem semper à posteriore deleri dicimus.

*Ergo, inquit, deleta prima anima, fœtus morietur, rursusq. nascetur in secunda. Quæ destructa, rursus miser interibit; tertioq. oriatur in postrema.*

Resp. Acumen & subtilitatem tuam hæc desidero mi Scaliger.



liger. Non enim magis est idem foetus qui moritur, & resur-  
git; quàm idem animal, quod in erucâ aut bombyce vitam  
amittit, & resumit in papilione. Multi enim credunt animam  
animæ hîc proximè succedere, & pedestrem erucam in papi-  
lionem volucrem ac diversæ speciei transformari. Pompo-  
natus certè, nec solus, id affirmat. *Experimento & ex Historijs* Pomponat.  
lib. de In-  
cant.  
*animalium scimus, inquit, unum animal transformari in aliud imme-  
diatè, ut erucam in papilionem, ex verme in volatile animal.*

Foetus igitur vegetativus tantùm, non est ejusdem spe-  
ciei cum sensitivo. Nec magis absurdum est, tot animarum  
successiones intra breve illud tempus (quo in utero, aut extra  
uterum, foetus raptim conformatur) admittere; quàm forma-  
rum inanimarum strenuissimas transmutationes, quando ex  
ligno arido fit subito flamma, quæ illicò extinguitur in  
fumum, & fumus mox vertitur in aërem. Sic in corpore no-  
stro, chylus illapsus in jecur strenuè transit in sanguinem, san-  
guis cordi infusus, in spiritum vitalem, spiritus vitalis cere-  
bro illatus, in spiritum animale.

*Sed quod maximè arduum aequè ac miserum est, addit Scaliger:*  
*In prima generatione non generabitur Cæsar Dictator, sed beta,*  
*aut lactuca.*

Resp. Minimè id miserum, aut metuendum. Foetus enim  
vegetativus unde Cæsar's conformatio inchoatur, non est be-  
ta aut lactuca, fungus aut pepo. Non enim crescunt tales fru-  
ctus in horto, sed coquuntur in utero. Est igitur aliud quod-  
dam, animâ quidem vegetativâ, sed viali ac transitoriâ, non  
fixâ ac permanente vivens: non opus naturæ perfectum, sed  
futuri operis rudimentum. Quod non magis est Cæsar, quàm  
Mercurius, sal, & sulphur sint aurum Chymicorum. Nam in  
alembicis, & metallicis quoque fodinis natura per multas ru-  
dimentorum metamorphoses, ad perfectum & solidum me-  
tallum tandem perrungit.

Similiter, nec embryo sensitivus aliud, quàm vialè & fugi-  
tivum animal est. Nec Scaliger, aut alij quidam mirari de-  
bent, ab Aristotele aut Plinio in certam aliquam animalium, ut  
terrestrium, volucrum, aut natatiliū classem non redigi; quia  
nunquam

nunquam gradientem in terrâ, volentem in aëre, aut natantem in aqua viderant. Sicut neque Dioscorides, aut Hortulani inter olera sua, foetus vegetativi meminerunt, quia inter pepones, cucumeres, & melones quid simile non animadverterunt. Non enim ad solem maturefcit in horto, sed coquitur in utero. Animalia igitur & plantæ, quæ in classes olim digesta, perfecta sunt, & animas in termino, non viales habent.

Bodin.  
lib. 2.  
Theatr.

Non malè tamen, nec ad hanc rem ineptè Bodinus, corpus naturale dividit in *inchoatum*, & *perfectum*. Hoc quidem, ait, *formam perfectam est assecutum. Illius autem materia ad formam perfectiorem tendit, ut semen progerminans, & metallica rudimenta*. Semini autem embryonem utrumque, tam vegetativum quàm sensitivum potuit accensere. Nihil enim aliud sunt, quàm semen quoddam paulò decoctius & elaboratius. Et licet formam substantialem primi & inanimati seminis exuerint, ac animam induerint, ista tamen anima solum est vialis, quæ corpus naturale inchoatum tantummodò constituit, in quo natura terminum suæ operationis non figit, sed per illud tanquam per semen, ad fabricam corporis ulterioris tendit.

Sed homo hoc pacto, non hominem proximè generabit, sed *betam vel lactucam*, vel quid simile de genere vegetativorum, ut Cardano suo statim Scaliger objectabat.

Arist. lib. 2.  
c. 1. de ge-  
neranimal.  
S. Tho. I. p.  
q. 78. a. 2.

Resp. Generativa vitalis actio generantis, ad formam seminis, quod intra corpus generantis coquitur, non autem ad novum corpus vivens proximè terminatur. Nam *conscire semen est opus generantis*, ait Aristoteles. Vnde S. Thomas facultatem illam seminificam, potentiam generativam meritò appellat. Oportet, inquit, *esse aliquam potentiam rei viventis per quam semen praparetur; & hæc est vis generativa*. Terminus autem remotus est embryo vegetativus, deinde sensitivus, ac denique rationalis. Per isthæc enim novi hominis præcedentia rudimenta, activitas humani seminis, non impedita, ad humanum & rationalem embryonem tandem pervenit. Nec hoc magis absurdum, aut mirum est, quàm ab anima humana primùm in ventriculo chylum, deinde chymum in jecore, postea



postea rorem, gluten, ac cambium in unoquoque membro coqui & formari, antequam alimentum in partem sui corporis animâ rationali animatam convertat.

Obiectant verò alij: Cur ergo etiam in hominis nutritione, per animas vegetativam & sensitivam non transitur ad rationalem; cum nutritionis & primæ conformationis eadem videatur esse ratio?

Resp. Non est ratio eadem. Nam prima conformatio novo homini integrum domicilium parat; quod variâ membrorum supellectile, ex parvula particula materiæ seminis instrui debet. Deinde singula membra foetus nutriri & crescere, secundum harmonicas quasdam proportionem oportet; quod sine anima vegetativa fieri non potuit. Animam quoque sensitivam deinceps succedere necesse fuit, ut virtuti conformatrici seminis, adjumento esse possit, in figurandis & perpoliendis organis, quibus anima rationalis ad usum & operationes suas vitales humanas indiget. Embryo enim sensitivus humanus componitur ex tali formali expressâque animâ sensitivâ, qualem anima rationalis eminenter & virtute in se continet; ideoque artem, ut sic dicam, novit talia membra conformandi & perpoliendi, qualibus anima rationalis utitur in operationibus suis sensitivis. Quanquam, ut dubitationem meam hîc non celem, quam Lib. II. Cap. VI. Artic. XVI. pluribus expandemus; non tanta videatur mihi esse necessitas, animam peculiarem sensitivam, inter vegetativam & rationalem interponendi, quantas ponendi vegetativam, quæ opus à facultate conformatrice inanimati seminis inchoatum promoveat. Nam fortasse ejusmodi anima vegetativa sufficiens est ad promovendam eîusque conformationem humani corporis, donec domicilium, & universa organorum supellex; ad animæ rationalis inhabitationem idonea, fabricata sit; nisi quantum perfectionis deest, quod sola virtus seminis superaddere debet, ut animam illam vialem abigat, & animam superiorem introducat.

Quod enim quidam obijciunt, Animam vegetativam non callere artem fabricandi instrumenta pro operationibus sensitivis; facile negari potest; si loquamur de ejusmodi anima vegeta-

vegetativa, quæ ultima non est, sed ad alteram est vialis, ei-  
 quæ famulatur & subservit: sicuti faber ferrarius novit artem  
 cudendi malleum, aut securim, quam faber lignarius ad suum  
 opus adhibet. Et sanè, gradus animæ vegetativæ in anima ra-  
 tionali inclusus, omnia hominis membra nutrit, servando fi-  
 guras, proportionibus, & temperies omnium, quas anima ratio-  
 nalis in omnibus operationibus suis sensitivis & rationalibus  
 exigit. Hoc enim flagitat ratio & essentia illius animæ, quæ  
 naturâ suâ subalterna est, & famulatrix animæ superioris.

Arist. lib. 2.  
 c. 3. de ge-  
 nerat. ani-  
 mal.

Attamen successio animæ sensitivæ vialis, etiam in bruto-  
 rum generationibus sustineri potest, propter S. Thomæ, Scoti,  
 & Aristotelis auctoritatem; qui disertè ait: *Non simul fit animal  
 & homo, neque animal & equus.* Unde videntur esse quædam  
 notæ aut ignoræ dispositiones, quas anima sensitiva vialis in-  
 troducere debeat; nec ad hoc animâ vegetativâ vialis, vel  
 sola virtus seminis (nisi adjuncta ab anima viali sensitiva) sufficiat.

In nutritione verò nulla animarum vialium successio, aut  
 interpositio necessaria est; quia chyli, chymi, roris, glutinis,  
 cambij transformationes (quæ nutritionem & inductionem  
 animæ rationalis in materiam alimenti antegrediuntur) ani-  
 marum vicem supplent, sufficienterque materiam illam præ-  
 parant ac disponunt, ut in fine animam rationalem suscipiat.  
 Nulla enim hîc partium alimenti organica conformatio præ-  
 requiritur; sed ipsa anima rationalis, quæ est in membro quod  
 alitur, secundum illam figuram quam membrum exigit, ali-  
 mentum agglutinat, fingit, figulat, & circumponit.

Si autem doctrinam jam traditam attentè legisti, fugit quoq;  
 & evanescit illa difficultas, quam quidam pro magna & insu-  
 perabili habent: Quod anima vialis ad sui destructionem ope-  
 rari videatur, quando animæ secuturæ locum parat. Nam illa  
 adveniente, cedere loco, & perire debet.

Verum, anima vialis non inducit ultimas dispositiones ad  
 introductionem animæ superioris; sed hoc facit spiritus seminis,  
 primorū lineamentorū artifex, qui toti materiæ embryonum  
 infusus, non cessat provehere & expolire suum opus, donec ad  
 ultimam dispositionem illius superioris animæ perveniat, cujus  
 est semen



est semen. Ideo enim anima rationalis in corpore patris fabricat semen, ut hoc sit instrumentum propagationis speciei ejus; nec ut opus conformationis inter imperfectos & viales embryones hæreat, sed ut illud usque ad introductionem animæ rationalis perducatur. Vnde figuras & temperamenta embryonum supergreditur, & diruit, *adificat, mutat quadrata rotandis*, operasque priores tanquam perfunctorias & viales destruit, ut ad finem suum & operis culmen pertingat.

Sed peracto opere, quod spiritus ille fabricator cum virtute sua conformatrice evadit? inquirunt.

S. Thomas objectionem olim prævidit, & respondet: *Virtus activa qua erat in semine, esse desinit dissoluto semine, & evanescit spiritu qui inerat. Nec hoc est inconveniens: quia vis ista non est principale agens, sed instrumentale. Motio autem instrumenti cessat effectu jam producto in esse.* S. Tho. 1. p. q. 113. a. 1.

Alibi tamen aliquid aliud (et si Cajetanus utrumque in concordiam redigere conetur) & fortasse magis Medicum & verum, responderat: *Virtus formativa qua in principio est in semine, ait, manet adveniente etiam anima rationali; sicut & spiritus, in quos ferè tota substantia spermatis convertitur, manent. Et illa qua fuit prius formativa corporis, fit postmodum corporis regitiva. Sicut etiam calor qui fuit dispositio ad formam ignis, manet forma ignis adveniente, ut instrumentum formæ in agendo.* S. Tho. q. 3. a. 9. de potent.

Hoc est quod Medici quidam dicunt, spiritum seminis verum in humidum primigenium corporis, fierique instrumentum animæ ad operationes vitales chylicationis, nutritionis &c. Nec enim spiritus ille fugax est & volatilis, sed pinguiculus & lentus. Quomodo enim aliàs in utero, ut operi suo incumbat, nec illud imperfectum deserat, contineri posset? Vnde semen crassum, pingue, & minimè dilatum serosumque generationi est maximè idoneum. Et inde ratio Aristotelis, cur semen ebriosorum sit plerumque infecundum: quia non quod humidum, ait, sed quod consistens crassumque est semen, hoc vim procreandi obtinet. Io. Freitas. Aristot. Sect. 3. Problem. Fernel. lib. 7. c. 9. de procreat. hom.

Sed Fernelium hæc audivisse juvabit: Non enim, inquit, ut multi Aristotelem interpretantur, spiritus evanescit, aut avolat à semine, sed in eo persistit, omnium partium conformator & opifex; in quibus ra-

dictus ac penitus inherens, prima fit partium omnium natura. Hæc ubi conformaverit, postea semper assistens, in omnem vitam, quantum potest, diutissime & saluberrime conservat. Itaque hic spiritus, non modo primum vehiculum & instrumentum est procreatricis facultatis (in ea enim constituta est summa illa divinaque vis conformandi) sed etiam reliquas omnes naturales, quibus nutrimur & augemur, earumque auxilias is unus in se omnes sustinet & comprehendit.

Denique, non tantum est instrumentum animæ ad veterum partium nutritionem, & circumponendum ijs alimentum eâ figurâ & artificio, quo olim à spiritu illo seminis conformatae sunt; sed etiam ad nova interdum membra figuranda figurandaque: ut cum homini dentes, bobus & cervis cornua extruduntur; aut recisæ quibusdam partes, ut brachia polypis, chelæ cancris, caudæ serpentibus & lacertis recrefcunt & reformantur.

## CAPUT III.

*De divisione animæ in vegetativam, sensitivam, & rationalem.*

**A**ristoteles, & passim alij post eum, animam in vegetativam, sensitivam, & rationalem dividunt. Divisionis autem sufficientia ex hac S. Thomæ doctrina intelligi potest.

S. Th. 1. p. 1. q. 78. a. 1. Anima enim est talis forma corporis, quæ actione directâ immanente, in compositum suum agit, & illud perficit; eaque ratione à formis substantialibus inanimatorum distinguitur, ut Cap. I. Art. X. satis disputatum fuit.

Hic autem modus agendi, & reflexâ in suppositum suum actione ipsum perficiendi, indicat majorem quandam eminentiam talis formæ supra corpus, quam forma terræ, lapidis, aut cujuscunque corporis inanimati supra corpus suum inanimatum obtineat: cum non illud aliqua actione perficiat, aut moveat, sed omnis motus qui in illud corpus cadit, externo alicui agenti principaliter attribui debeat.

Vel ergo anima compositum suum perficit, non tantum per potentiam



potentias corporeis organis inhærentes, sed etiam per qualitates primas elementares, corporum inanimatorum proprias, tanquam per causas instrumentales. Et infimum genus animæ, inanimatorum formis maximè vicinum & cognatum habemus: quam animam vegetativam vocamus. Hæc enim per calorem, frigus, & totam qualitatum primarum temperiem, alimentum alterat, & in substantiam sui corporis convertit.

Alia anima, etsi organis corporeis, tam ipsa quàm omnes potentie ejus naturales insideant, & à corpore sustententur; in operationibus tamen sibi proprijs, non utitur qualitatibus primis, secundum materialitatem, & conditionem illam quodammodo, ut sic dicam, pinguiorè, qua ipsæ elementa, & corpora inanimata temperant; sed quibusdam alijs qualitatibus corporalibus, in quandam veluti spiritualitatem extenuatis. Quod signum est, animam talem ad formam spirituale propius, quàm animam vegetativam, accedere. Et ista est anima sensitiva; quæ in videndo, audiendo &c. speciebus sensibilibus, tanquam instrumentis utitur.

Denique est tertia anima, quæ nec ipsa, nec potentie ejus propriæ ab organis corporeis dependent. Et hæc est anima rationalis.

Ad genus animæ sensitivæ reduci debet anima Zoophytorum, sive plantanimalium. Licet enim Zoophyta terræ, velut arbores, radicibus defixa sint, & terrestre alimentum succu eliciant; si tamen pungas, sensum & dolorem contractione testantur. Inter Zoophyta sunt spongiæ, & urticæ marinæ; imò Aristoteli etiam ostrea: Nam *planta*, ait, *sunt quasi ostrea terrena, & ostrea sunt plantæ aquatiles.*

Genus enim istud crustaceorum non graditur, aut serpit, sicut domiportæ, sed motum solum dilatationis & contractionis habet intra suam cochleam.

Ad Zoophyta quoque pertinet arbor Indica, quam incolæ Pudicam vocant, ut narrat Iul. Scaliger; *quæ appropinquante homine vel animali ramos constringit, recedentibus pandit. Quapropter*, inquit, *aut afflatum percipere dicendum est, aut radicis, propter soli motum, compressionem agitationemve.*

Scaliger  
Exerc. 181.  
§. 28.

L 2 Sicut

Sicut autem hoc animal figurâ induitur arboris; ita Tartaricus frutex, quem Borametz, id est Agnum appellant, est mera planta similitudine animalis. Crescit enim, ait Scaliger, agni figurâ ad pedum ferè ternum altitudinem; quem pedibus, ungulis, auribus, toto capite, praterquam cornibus, repræsentat. Pro cornibus pilas gerit, singularis cornu specie. Obducitur corio tenuissimo, cujus detracti usus ad capitum tegmina incolis. Sic

Ludit in humanis divina potentia rebus.

Zoophyta denique sunt frondes arboris in Insula Cimbulum, cujus frondes in terram lapsa, ait Scaliger, reptatione quadam seipsas movent & promovent, tacta abeunt, aut refugunt.

An verò omnes omnino arbores & plantas inter Zoophyta numerare oporteat;

Manichæi, Campanella, & quidam alij melancholici affirmabunt, quia sensum inesse omnibus plantis, adeoque plant-animalia, esse existimant.

Sed antequam credamus, organa sensuum in truncis, aut ramis arborum ostendere nobis deberent: quod nunquam facient. Negat ergo arbores sentire S. Augustinus, & deplorat, se à Manichæis perductum ad eas nugas, ut crederet sicum plorare cum decerpitur, & matrem ejus arborem lacrymis lacteis. Ecclesia quoque in Dom. Palmarum, ramos palmæ insensibiles appellat, dum orat: Deus, qui miro dispositionis ordine, ex rebus etiam insensibilibus dispensationem nostræ salutis ostendere voluisti &c.

## ARTICVLVS I.

An tres istæ animæ species sint infimæ, an genera subalterna.

**A**nima vegetativa est genus latissimum, in tot species animarum divisibile, quot sunt diversæ plantarum species. Diversitas verò ista (specifica (quemadmodum Aristoteles de animalibus dicit) ex vita, actionibus, moribus, partibus desumi debet. Vnde animæ vegetativæ quæ longè aliter prima corporum suorum membra, per semen suum conformant, & alio deinde alimento vivunt, vel longè diversis alimenti figurationibus.

Arist. lib. 1.  
c. 1. Histor.  
animal.



rationibus eadem membra nutriunt, nequaquam ejusdē naturæ & speciei sunt. Quis enim in quercu & corylo, in rosa & lilio eandem specie animam vegetativam esse credat?

Gradus quoque animæ vegetativæ, qui animæ sensitivæ brutorum, aut animæ rationali hominis veluti inoculatus & insertus est, specie ab anima purè vegetativa omnium plantarum distinctus est. Alio quippe modo, ac per alia longè instrumenta corpus bruti, aut hominis nutrit, quàm anima quercus quercum, aut anima rosæ rosam.

Anima sensitiva genus etiam valde latè patens est. Et specierum diversitas ex vita, actionibus, moribus, partibus brutorum colligitur, ut paulò antea ab Aristotele audiebamus. Quis enim ex tam difformi membrorum configuratione, moribusque istarum animarum tam dissionis, felem à mure, accipitrem à passere, specie distingui non videat? Gradus quoque sensitivus quem anima rationalis imbibit, ejusdem naturæ & speciei cum sensitivo brutorum nequaquam est. Quod ex morum quoque, ingeniorumque diversitate facile intelligitur. Licet enim anima rationalis sensitivas quasdam potentias, ut visum, auditum &c. ejusdem fortè rationis cum similibus brutorum potentijs habeat; imaginativa tamen, & appetitus inferior hominis eminentiâ dignitatis, imaginativam & appetitum brutorum longè excellere videntur. Vnde nec eadem sensibilia homines & bruta appetunt, nec iisdem delectantur. Gradus igitur sensitivus animæ rationalis, ex quo imaginativa & appetitiva humana promanant, à gradu sensitivo animæ v.g. leoninæ, ex quo imaginativa & appetitiva leonis resultant, specie dissidet. Hoc est quod affirmat S. Thomas, cum ait:

*Animam sensitivam in nobis esse virtuosiores & nobiliorem quàm in brutis: & hoc propter adiunctionem ulterioris & nobilioris perfectio-* S. Th. 3. p. 1. q. 2. a. 5.  
*nis, scilicet animæ rationalis; cui gradus ille sensitivus subservire*  
*debet.*

An verò anima rationalis sit species infima, potest majorem habere dubitationem. Si enim verum est quod Agellius Agell. lib. 9. c. 2. ex quibusdam veterum memorijs narrat, quosdam in Indiæ montibus homines esse Cynocephalos, caninis caputibus & latratibus.

latratibus. Alios verò Monoscelos, singulis cruribus saltuatim currentes, vivacissima pernicitatis. Quasdam etiam nullis cervicibus, oculos in humeris habentes. Alios deinde apud extrema India, corporibus hirtis, & avium ritu plumantibus, nullo cibatu vescentem, sed spiritu florum naribus hausto victitantem. Pygmaeos quoque haud longè ab ijs nasci, quorum qui longissimi, non longiores esse, quàm pedes duos & quadrantem.

Plin. lib. 7.  
c. 7.

Addit & Plinius, Arimaspos, uno oculo in fronte media insignes. Item Satyros subsolanis Indorum montibus (Cartadulorum, inquit, dicitur regio) perniciosissimum animal, tum quadrupedes, tum recti currentes humanâ effigie. Qui propter velocitatem, nisi senes, aut agri, non capiuntur. Item in Albania gigni quosdam glaucâ oculorum acie, à pueritia statim canos, qui noctu plusquam interdum cernant. Item in quadam convalle magna Imai montis silvestres, ait, vivunt homines, adversis post crura plantis, eximia velocitatis, passim cum feris vagantes.

Alex. ab  
Alexan.  
c. 8.  
Iob. 26.

Marinos denique homines, ut Tritones, Sirenes, Nereides addere possumus. Nam puellas marinas humanâ facie, quas antiqui Nereides appellant, se in littore Peloponesi vidisse Theodor. Gaza, & Georg. Trapezuntinus, viri litterarum & doctrinæ famâ illustres, olim facti sunt. Quin & Iobus gigantum sub aquis gementium meminit: Ecce gigantes gement sub aquis, ait, & qui habitant cumeis. Videntur igitur in speluncis fundi ac alvei maris, quædam gigantum familiæ habitare; ut olim in Ætnæ spelæis & antris Polyphemus, ceterique

Virgil.

*Ætneî fratres cælo capita alta ferentes,*

Verùm, etsi animas rationales specie differentes, posse à Conditorè creari, nulla fortasse contradictionis implicantia veter; omnes tamen quæ creatæ sunt, & quotidie creantur, unius speciei sunt.

Arist. lib. 1.  
c. 6. Histor.  
animal.

Vnde meritò Aristoteles dicit, hominem οὐκ ἔχει διαφορὰ τῷ ἔδος, non habere differentiam secundum speciem: ac proinde quicumque sub cælo vivunt homines, solâ corporum temperie, membrorum conformatione, aut alio quovis accidente, non specie & essentiâ distingui. Nam omnes ab uno primo parente fluxerunt, cujus natura & essentia eadem in totam posteritatem descendit. Dicit hoc divinus ille in medio



medio Areopagi Ecclesiastes Paulus : *Fecit Deus ex uno*, ait, *omne genus hominum inhabitare super universam faciem terra.*

Fabulosi igitur sunt homines illi Solares, Lunares, Ioviales, & omnium Planetarum novi incolæ, quos Keplerus & Copernicani nuper nobis fabricaverunt. Certè enim, *ex uno* illo terreno Adamo non *omne genus hominum* fluxit, si aliud cælestium hominum genus est, quod siderum Orbes inhabitat. Nec propter homines illos fideros, astra Borbonia Solem, Medicea Iovem, Austriaca Saturnum circumludunt, ut Capernicani fingunt; sed propter nos qui *super universam faciem terra habitamus*; ut nempe ludiones illi, Solis, Iovis, Saturni &c. Influentias ita modulentur, ut numero, pondere, ac mensurâ illâ in hunc Mundum inferiorem reflectantur ac dispensentur; quem admodum à cælestis illius horologij fabricatore est olim constitutum.

Mutum quoque marinorum hominum genus, qui supernè facie humanâ formosi, infernè turpiter desinant in piscem, nullum agnoscimus. Itaque Tritones, Sirenes, Nereides, Glauci, pisces non homines sunt. Aliàs enim, si ex sola facie hominis judicandum est, Religiones quoque Monachorum, & coetus Episcoporum sub mari erunt; quia quædam marina monstra, Monachorum, Episcoporum capita gestant. Innumera enim salacissimorum piscium semina, fluctibus & perpetua inquietudine maris, per infinitorum discriminum figuras convoluta, quidlibet formare & repræsentare valent.

Gigantes ergo illi, qui apud Iobum *sub aquis gemunt*, sunt Iob. 26. dracones, cete grandia, & balænx pisces, non homines. Aut certè (qui multorum Interpretum est sensus) sunt gigantes illi *potentes à seculo viri famosi*, generalis diluvij aquis olim submersi, qui fictione & phrasi Poëtica, quasi adhuc viverent, dicuntur mole aquarum oppressi gemere. Gen. 6.

Cynocephali verò, Monosceli, Pygmæi, Arimaspi, Satyri, ceteræque inter homines & bruta dubiæ formæ, ad simiarum, aut alterius bruti animantis genus pertinent; nisi tamen fabulentur qui talia narrant. Philosophorum enim *credulam nationem* meritò Seneca appellat, qui ejusmodi commenta, ab aliquibus temere

temerè vulgata, in materiam exercitij & acuminis ingeniorum rapiunt.

Si tamen homines essent ( quod ex loquela maximè potest intelligi ) monstra nostri generis sunt , deformitate corporis, & silvestris cujusdam temperamenti feritate, non animâ rationali à nobis distantia.

Sicut enim apud nos talia interdum monstra ex parentibus minimè monstrosis nascuntur ; ita fieri potest, ut conformationis vitium cum semine eorum , ad posteros traducatur.

Hippocrat.  
lib. de aëre  
& aquis.

Quemadmodum Hippocrates narrat, Macrocephalos Asiæ populum , universos omnes longis, instar peponum capitibus nasci, consuetudine in naturam versâ; quia obstetrices mollia initio infantium capita fasciis astringentes , ea turbinare ( formosum id esse reputantes ) solitæ fuerant.

S. August.  
lib. 16. c. 8.  
Civit.

Supremus autem corporum architectus , seminum istos errores non corrigit ; imò providentiâ suâ à recto detorquet ( si S. Augustino credimus ) *sciens universitatis pulchritudinem quarum partium vel similitudine, vel diversitate contextas. Sed qui totum inspicere non potest, tanquam deformitate offenditur; quoniam cui congruat, & quò referatur, ignorat.*

Ibid.

Vnde de hisdem Plinij & Agellij monstrosis nationibus quæstionem instituens: *Si homines sunt, inquit, de quibus illa mira conscripta sunt: Quid si propterea Deus voluit etiam nonnullas gentes ita creare, ne in his monstros, quæ apud nos patet ex hominibus nasci, ejus sapientiam, qua naturam fingit humanam, velut artem cuiusdam minus perfecti opificis, putaremus errasse? Non itaque nobis videri absurdum debet, ut quemadmodum in singulis quibusque gentibus, quedam monstra sunt hominum; ita in universo genere humano, quedam monstra sint gentium. Ac tandem universam disputationem in nodum & clausulam istam colligens: Monstra illa, inquit, aut nulla sunt: si sunt, homines non sunt: aut ex Adam sunt, si homines sunt.*

Dixerat quippe antè: *Quisquis uspiam nascitur homo, id est rationale animal mortale, quamlibet nostris inusitatam sensibus gerat corporis formam, seu colorem, sive motum, sive sonum, sive qualibet parte, qualitate naturæ, ex illo Protoplasto originem ducere, nullus fidelium dubitaverit.*



*dubitaverit.* Ite jam ergo Copernicani, & dicite nobis, quibus scalis in Regionem Planetarum ascenderint sideri vestri homines, quos Lunæ montes vallesque, ac omnium Planetarum Orbes incolere arbitramini. Eò enim ex terra scandere, & coloniam duxisse debuerunt, si ex terreno nostro Protoplasto sint progeniti.

## CAPUT IV.

*De unione, qua anima corpus organicum informat.*

**V**T anima corpus suum animet, opus est aliquâ unione ejus ad corpus; quod etiam in anima rationali verum est, ut Lib. IV. docebimus. Non enim est solum forma assistens, ut Plato olim putavit, sed etiam informans sui corporis,

Vnicâ autem unione, non pluribus est opus, ut & forma materiæ, & reciprocè materia formæ uniatur; veluti una fibula sufficit, quæ utramque togæ partem mordeat & constringat.

Eadem quoque unio vocatur informatio, quatenus consideratur ut modus formæ connectens eam cum suo subjecto: vocatur itidem subjectio, quatenus subjectum per eam subijcit se formæ, & illam in se suscipit.

Sed utrius extremi modus sit ista unio, disputant Lib. II. Physic. Peripatetici. Nobis videtur, utrique extremo, id est materiæ & formæ, proximè adhærere, ut modus duobus modificatis inadæquatis. Hunc enim conceptum statim ingerit ratio unionis inter duo immediata extrema; nisi aliquid aliud stupendum & ineffabile intercedat, quod impediatur ne unio utrumque extremum proximè & intrinsecè apprehendere valeat. Quale quid in unione hypostatica Verbi cum humanitate Christi evenire, plurimi Theologorum existimant; quia contra Verbi divini perfectionem & immutabilitatem factum iri videtur, si modus creatus ei sic infigatur, ut intrinsecè eum in se suscipiat.

M

Sed

Sed si unio eadem ( quæ in vulgari jam Philosophia dicitur esse purus quidam modus ) materiam & formam corporis naturalis proximè afficiat; igitur, exclamant quidam, unus idemque purus modus, realiter idem erit duobus realiter distinctis.

Resp. Nihil absurdi in eo committi. Nam ista phrasis: Idem modus unionis *est realiter idem* cum materia & forma quas inter se connectit, habet hunc sensum negativum: *Non distinguitur realiter strictè* ab illis duobus: quod in Philosophia communi est verissimum. Sed de anima rationali peculiaris est difficultas.

### ARTICVLVS I.

*An unio animæ rationalis ad corpus sit spiritalis, an materialis.*

**S**I eadem unionis fibula unico, ut ita dicam, morsu animam rationalem & materiam primam humani corporis apprehendat; videtur esse spiritalis, quatenus animam spiritualem attingit, & tamen etiam materialis, quatenus materiæ primæ proximè, ut subiecto incumbit,

Verùm tamen unio ista absolutè, non spiritalis, sed materialis dici debet. Nam modus materialis est, qui à materia prima dependet, Talis autem est illa unio. Vnde cum modus spiritalis definiatur, qui à materia, sive à substantia corporea est independens; & negatio ista omnem à materia dependentiam neget, palàm est, ejusmodi unionem non posse appellari immaterialem, sive spiritualem, etiamsi partim etiam à spiritu dependeat.

Hinc etiam illam à materia conditionem contrahit, ut partibus integralibus constet, etiamsi anima rationalis ejusmodi partium experta sit.

Sicut enim hæc anima non eadem indivisibili præsentia locali spargitur & replicatur per totum suum corpus, sed per aliam præsentiam capiti, & per aliam pedi hominis assistit; ita aliâ substantiali partiali unione materiæ capitis, aliâ materiæ pedis adhærescit. Aliàs enim abscisso pede, & destructâ

unione



unione ad materiam pedis, unio ad ceteras corporis partes consequenter & connaturaliter collaberetur, & homo totus interiret.

Sed tamen etiamsi unionem istam, spiritualement appellaremus, nullâ absurditate partes integrales ei concederemus; quandoquidem præsentia Angeli, aut animæ rationalis ad spatium locale, spiritualis sit, & tamen partibus integrantibus minimè careat. Accidentia enim spiritualia partes integrales intensivas non respuunt; quare quibusdam partes etiam extensivas, dare non possumus? Quod enim substantiæ spirituales strictæ entitatis, ut Angeli, & animæ rationales, talibus partibus carere putentur, peculiaris ratio est; quia illæ partes essent ipsis inutiles: Deus autem & natura nihil faciunt frustra. Possunt verò partes integrales utilissimæ & necessariæ esse modis quibusdam spiritualibus, ut per multos partiales suos modos, substantiam spiritualement spatio, aut materiæ divisibili sistere præsentem valeant; quod per unicum indivisibilem præsentia, aut unionis modum facere non possunt; quidquid Vasquez & Hurtadus contradicant. Nam Vasquez volens probare, præsentiam Angeli ad spatium divisibile, indivisibilem tamen esse, ait, *Hoc facile intelligi. Nam sicut, inquit, modus in anima rationali, quem habet in corpore, tamen facit eam esset unitam corpori divisibili; sic etiam modus Angeli potest ipsum corpori divisibili unire, etiamsi in se indivisibilis sit.* Et addit deinde: *Quocirca non possum non admirari Theologos & Philosophos nostri temporis (Suarium maximè habet in oculis) qui concedentes Angelo præsentiam quam vocant localem, ratione substantia ipsius Angeli, affirmant eam esse modum quendam substantia Angeli, indivisum quidem comparatione Angeli, sed divisum & extensum respectu loci. &c.* Hos igitur, ait, Doctores vehementer miror; quòd de Angelis spiritualibus differentes, nondum corporea hæc materialia obliviscantur, & in subiecto spirituali & omnino indiviso constituant aliquod accidens formaliter loco extensum, & ut dici solet, loco commensuratum, cujus partes inter se dista sunt & loco distantes. Hoc enim proprium videtur corpora & accidentis corporei, cuius capax non est substantia spiritualis.

Vasq. r. p.  
d. 188. c. 7.

Tota igitur causa tantæ admirationis est; quòd habere partes extensas & loco distantes, *videatur proprium corporis, & accidentis corporei*. Hoc verò est quod disputamus & ambigimus: An scilicet divisibilitas ista integralis ita sit accidenti corporeo propria, ut in nullum spirituale accidens competere possit. Vicimus autem posse. Non enim ideo suam spiritualitatem necessariò amittit. Spirituale enim idem est ac incorporeum. Incorporeum verò dicitur, quod nec capax est corporeæ quantitatis, nec à substantia corporeæ quantitatis capace dependet. Hæc verò negatio duplex, præsentia Angelicæ, & præsentia animæ rationalis competit, etiamsi partes extensas contineant. Non tamen unioni substantiali animæ rationalis ad corpus convenit; quia unio ista à materia prima corporeæ quantitatis capace dependet.

Suar. lib. 4.  
c. 17. de  
Angel.

Merito ergo & modestè Franc. Suarez admiratione illâ Vasquij se tactum sentiens, respondet: *Non erubesco confiteri ingenij mei tarditatem. Nam suppositis nonnullis principijs in quibus convenimus, intelligere non valeo, quomodo esse possit talis modus ( præsentia Angelicæ, aut animæ rationalis ) indivisibilis in ordine ad spatium vel corpus; vel, cur opposita divisibilitas repugnet spirituali accidenti, in subjecto spirituali existenti.*

Difficultas etiam altera hîc est, quæ multorum imaginationem fatigat. Quomodo nempe, anima integraliter indivisibilis, partibus materiæ divisibilibus uniri possit. Videtur enim singulis tantum partium materiæ punctis, non partibus in infinitum divisibilibus proximè aptari & cohærere.

Non multum hîc laborant, qui Democriti & Epicuri paradoxum, de compositione continui ex meris & finitis punctis, ab Aristotele olim explosum, nuper in Scholas revocaverunt. Apud eos quippe, singulæ animæ rationalis uniones ad singula materiæ puncta terminantur, & ijs solis proximè & immediatè insunt. Præter ejusmodi puncta nullas alias partes sine fine divisibiles admittere volunt, quia subtilitatem illius divisionis in infinitum ( quam tamen cum Aristotele & Mathematicis, S. Augustinus, S. Thomas, Scotus, Occam, & omnes Peripateticorum Scholæ docent ) imaginatione



tione satis liquidâ apprehendere non valent.

Sed omittamus istos, quos multis sat argumentis olim in nostro LABYRINTHO exercuimus.

Sit ergo materia humani corporis in partes syncategorematicè infinitas divisibilis. Imò nulla sint omnino indivisibilia & Mathematica puncta quæ continui partes inter se connectant. Aio tamen, non esse imaginatione, aut explicatu difficilior, quomodo anima indivisibilis, singulis partibus divisibilibus materiæ uniatur, quàm quomodo Deus sit intimè & ita continuè præsens omnibus universi hujus partibus, ut præsentia ejus nullibi discontinuetur & interhiscat. Aut etiam difficilior non est, quàm imaginari, quomodo Angelus toti suæ replicationis sphaeræ non tantum punctatim & discretim, sed etiam per ipsas partes continuè, se præsentem sistat.

Itaque etiam si anima rationalis sit indivisibilis, singulae tamen ejus præsentia sunt, more continui, in infinitum divisibiles, & correspondent ac adaptantur partibus materiæ similiter sine fine divisibilibus.

Si anima verò sine ulla sui replicatione ad spatium indivisibile, ut sic dicam, redacta, & tamen materiæ unita cogitetur, unione nihilominus terminativè divisibili partibus proximis uniatur; quomodo fermè (in sententia illorum Peripateticorum qui puncta infinita partibus infinitis interspargunt) punctum unitur partibus quas proximè copulat, aut terminat.

## ARTICVLVS II.

*An animæ animalium imperfectorum, quæ irrationales seu insecta vocantur, sint totæ in qualibet parte sui corporis.*

**D**E plantarum animabus, res non meretur mitti in disputationem, quia experientia clamat, non esse totas in qualibet parte, sed integraliter expansas, ad expansionem materiæ quam informant. Alia enim est pars animæ in ramo, alia in arboris trunco. Nam evidens est, partem animæ avelli cum ramo, quandoquidem ramus terræ replantatus

plantatus, aut arbori alteri insertus, actiones vitales adhuc exerceat, regerminet, & fructus ferat.

Arist. lib. de  
Juvent. c. 2.

De animabus animalium insectorum idem existimat Aristoteles: nempe non esse in qualibet corporis parte totas, sed integraliter divisibiles; ita ut tota anima crucæ, bruchi, cicadæ, aut papilionis toti corpori, pars parti inhaereat. *Similiter enim, inquit, se habent secundum hoc, planta & genus insectorum. Necessè enim est & nutritivam animam actu quidem in habentibus esse unam, virtute autem plures. Ac de insectis subjungens: Similiter autem & sensitivum principium. Videntur enim habere sensum diversa ipsorum. Discrimen tamen inter plantarum, & insectorum partes istud interponit: Sed ut fervetur natura, planta quidem possunt (ut cum rami avulsi, & in terram replantati, in arborem novam se diffundunt) hac autem (insecta) non possunt, quia non habent instrumenta ad salutem, sive necessaria in singulis partibus recisis organa, quibus salutem & vitam diu, tanquam integra animalia, tolerare valeant.*

S. August.  
lib. de  
quant. ani-  
mæ c. 31.

Egregium verò & jucundum exemplum talis animalculi dissecti, & in partibus suis adhuc viventis & sentientis, narrat S. Augustinus Libro de Quant. anim. Cum naper, inquit, in agro essemus Liguria, nostri illi adolescentes qui tunc mecum erant studiorum suorum gratiâ, animadvertenter humi jacentes in opaco loco, reptantem bestiolam multipedem, longum dico quendam vermiculum. Vulgò notus est, hoc tamen quod dicam, nunquam in eo expertus eram. Verso namque stylo quem fortè habebat unus illorum, animal medium percussit. Tum ambæ partes corporis, ab illo vulnere, in contraria discesserunt, tanta pedum celeritate, ac nihilo imbecilliore nisu, quam si duo huiusmodi animantia forent. Quo miraculo exterriti, causæq; curiosi, ad nos, ubi simul ego & Alipius considebamus, alacriter viventiæ frustra illa detulerunt. Neque nos parùm commoti, ea currere in tabula quaquaversum poterant, cernebamus: atque unum istorum stylo tactum, contorquebat se ad doloris locum, nihil sentiente alio, ac suos alibi motus peragente. Quid plura? Tentavimus quatenus id valeret, atque vermiculum, imò iam vermiculos in multas partes concidimus: ita omnes movebantur, ut nisi à nobis illud factum esset, & conuolarent vulnera recentia, totidem illos separatim natos, ac sibi quemque vixisse



vixisse crederemus.

Fuit ergo vermiculus iste de genere insectorum, quæ Aristoteles πολυπόδα *multipedia*, & *scolopendras* appellat. Oblonga videlicet, & multorum pedum ordinibus gradientia. *Diutius enim*, inquit, *divulsa vivunt, quibus corpus longum pedesq; multi.* Et pars quæ abscissa est, in utrumque se movet extremum, & versus caput, & in caudam: ut in ijs quas vocant scolopendras, sive centipedas, moveri videmus. Vnde de talibus alibi narrat: *Assimulantur*, inquit, *talia animalia multis animalibus, quæ simul coaluerint.* Nam talium vermiculorum corpus longâ nodorum ac internodiorum serie, qualia fermè in arundinum calamis videmus, annulatim componitur (unde insecta etiam annulosa vocantur; adeoque si per singulos internodiorum nodos annulosque divididas, tot videbuntur esse animalia, quot sunt unius animalis frustra. Nam ideo ἐντομα *insecta* vocantur; quasi in seipsis sectilia sint in varias partes, quæ seorsum vivere, sentire, & se movere valeant.

Lib. de Invent. c. 2.

Hujus autem unica causa esse videtur, quòd in singulis frustis sit tactus, imaginatio, appetitus sensitivus, & potentia loco motiva. In singulis quippe annulis & præcinctionibus oportet sit aliquid capiti & cordi analogum, in quo imaginativa, & appetitus animalis resideant. Nisi enim dolorem imaginatione perciperent, non eum appetitu aversarentur, nec potentia loco motiva fugam arriperent.

Illud igitur S. Augustini, & Aristotelis in scolopendra experimentum (& simile in vespis, apibus, crabronibus, & omni genere muscarum sæpe videmus) satis evidenter demonstrare videtur, talium insectorum animas esse cum corpore suo divisibiles. Nec enim à spiritibus vitalibus, qui post animæ mortem aut recessum, residui in corpore manent, exerceri potest motus partium tam ordinatus & diuturnus.

Deinde, exemplo vermiculi à discipulis S. Augustini in partes dissecti, & Aristotelis testimonio, τὰ διαρούμενα αὐτῶν ἐχουσι ἄφοδον *partes eorum diversæ sensum habent.* Sensus autem sine anima non est.

Arist. lib. de Invent. c. 2.

## ARTICVLVS III.

*An animæ animalium perfectorum sint totæ in qualibet corporis parte.*

**A**ristoteles, qui animas insectorum divisibiles facit, videtur animas brutorum perfectorum excipere. Cùm enim dixisset, animalia annulosa & insecta assimilari multis animalibus, quæ simul in unum coaluerint, addit: τὰ δ' ἄπτερά οὐκ ἐν κοίτῃ, animalia verò optimè constituta hoc non patiuntur, quia natura ipsorum, ut possibile est, maximè est una. Quapropter paruum sensum quedam partium divisarum faciunt; quia habent aliquam animalem passionem. Separatis enim visceribus, faciunt motum; ut & testudines avulso corde.

Arist. lib. de  
Iuvent. c. 2.

Vnde si animæ equi, bovis, canis, leonis ita sint unæ, ut partibus integralibus careant, necesse est ut totæ sint in singulis corporis sui partibus, quemadmodum anima rationalis; hoc tamen discrimine, quòd mortales sint, & sustentaculo corporis indigeant. Stant enim ista simul: Animam canis esse in pede, capite, ac toto corpore indivisibiliter eandem, & tamen esse mortalem. Nam licet abscissâ caudâ, vel aure, nulla pars animæ canis intereat, non ideo est, quia sit immortalis, sed quia eadem anima tota (id est, nullâ parte exceptâ, cùm, in ista sententia, partes nullas habeat) sustentatur à reliquo corpore. Vnde sicut idem numero corruptibile lumen, à duabus facibus, in genere causæ efficientis conservatum, non corrumpitur, si facem unam amoveas, quia ab altera adhuc sufficienter conservatur; ita anima canis, amputatâ caudâ non interit, quia ab alia parte corporis (quantum satis est ad retinendam existentiam suam) dependere & sustentari perseverat.

Hæc sententia probabilis est, & quia putavit esse Aristotelis, S. Thomas eam defensat: imò S. Augustinus, qui Aristotelem nunquam viderat, solo ingenij acumine duce (& quidem quoad etiam animas insectorum) in eandem delapsus est.

Attamen



Attamen quibusdam experimentorū exemplis videtur refelli. Nam Averroes arietem decollatum aliquodūque sine capite progressum se vidisse narrat. Constat etiam, in sacrificijs hostias interdum extracto corde, ē poparum & sacrificulorum manibus aufugisse; imò capras excordes aliquando balasse testatur Asclepiades, Magni Pompei Medicus. Galenum quoque audiamus: *Potest, ait, cor eximi illæsis voluntarijs ættonibus. Id quod in nonnullis sacrificijs contingit, in quibus animantia cernuntur, corde iam aris imposito, non respirare tantum, aut clamare fortiter, sed etiam fugere, quousque effusione sanguinis emoriantur.* Nonne etiam videmus columbas, perinde atque vespas, & id genus volucra insecta atque imperfecta, abstracto capite, adhuc volitare? Sed aliud, & domesticum exemplum, in principe avium aquilâ narrabo.

Averr. lib. 7  
Phyſic.

Galen. lib. 2  
de placit.  
Hippocr.

In domo paterna ruri, patruus quidam meus aquilam (raro in his Belgicis Provinciis spectaculo) lato alarum remigio supervolantē, ac deinde in agrum defuisse conspicatus, glauco bombaria, cum repandere alas & avolare pararet, extremas pennas ita perstrinxit, ut volitare tantum posset, & capi se sineret.

Manſit in familia noſtra multis menſibus, inter pecora & canes domesticos cicur planè & familiaris. Sed cum fortè ſemel, inter comedendum, rixa quædam inter eam, & dilectum opilionem noſtro canem incidiffet, & ipſa furens irâ beſtiam unguibus & roſtro pænè diſcerpiſſet; tanta repente opilionem amentia invaſit, ut arreptâ falce putatoriâ, reginæ avium ſuper limen oſtij, caput uno ictu amputaverit. Sed ecce quid acciderit. Truncum corpus ē manu illius carnificis dimiſſum, impetu ſe in ærem elevans, vicini horrei ſatis altū culmē tranſvolavit.

His igitur & ſimilibus exemplis confici videtur, animas perfectorum, non ſecus ac ſectorum animalium, eſſe integraliter diviſivas, & unam animæ partem in corpore aquilæ aut columbæ trunco, & tamen adhuc volante remanere; alteram verò in capite, hiantē adhuc, &, quantum valet, etiam ſe movente ſuperſtitem eſſe.

Hæc nihilominus omnia nondum conficiunt animas perfectorum ejusmodi animalium eſſe integraliter diviſibiles. Nam ſimilia ferme hominibus uno & celeri ictu capite truncatis evenire poſſunt; & tamē animâ hominis indiviſibile eſſe dicimus.

N

Non

Non uno enim exemplo constat, truncum hominis manere immobile in pedes, ablato capite, & impelli interdum oportere à carnifice, ut statim cadat. Ad aliquot etiam passus, sine capite processisse nonnunquam visum fuit. Vnde illud Aristotelis: *Corpus hominis, detracto capite progredi, irrationale non est.*

Arist. lib. 3.  
c. 10. de  
partib.

Audivi quoque à fide digno, qui spectaculo decapitandi hominis Antuerpiæ olim interfuerat: Caput celerrimo ictu à carnifice præcisum, postquam aliquot saltus in theatro fecisset, in turbam desiliisse. Et cum canis quidam ad sanguinem delingendū accurrisset, arreptam mordicus ejus auriculam fuisse dentibus resecti capitis. Vnde canis exterritus, pendulo ad ejus aurem capite, cum clamore abscurrit, totumque forum horrore & fugâ spectatorum implevit.

Aliud ex Historia Turcica afferre possumus. Nam Mahometes 2. qui An. 1453. Constantinopolim expugnavit, crudelis & feralis juvenis, Christianos quosdam captos, ad longitudinem cruciatûs, & ut sic morerentur, ut mori se sentirent, interfici sic jubebat: ut Turcico acinace per diaphragma (sive diazoma, ut Aristoteles appellat) medij dividerentur. In quo supplicio videre erat, iniquum, utramque dimidiati hominis partem in pulvere & sanguine se volutantem, & motu ac rotatione suâ doloris sensum & acerbiteratem testari.

Quid ergo hîc dicimus? An animam rationalem in duas etiam partes fuisse cæsam? Hoc certè non debemus, nec possumus. Igitur quæcumque alia causa illius motûs & sensûs partium hominis assignabitur, eadem in aquilâ, aut columbâ sine capite volante, locum habebit.

Alterum quoque, & admirabilius, ex Historia Naturali Indica Iosephi Acoſta adjungimus.

Ios. Acoſta  
lib. 5. c. 14.  
Hist. Nat.  
Indica.

Auctor agens de Mexicanorum sacrificijs, & narrans quomodo homines bello, aut potius venatu captos solebant Idolo suo immolare: *Accidit, inquit, quondam res admirabilis; & tamen vera, ac relata à fide dignis. Cum enim Hispani in quodam tali sacrificio spectatores adessent, & sacrificulus de more, aperto validi juvenis pectore, cor magnâ agilitate extraxisset, & corpus iam excors, per multorum graduum altitudinem, è summo culmine pyramidis, ubi dirum*



*dirum illud sacrificium peragebatur, devolvisset; & corpus iam ad solam pervenisset, patriâ suâ linguâ ad astantes Hispanos dixit: O Domini, ipsi me interfecerunt. Unde orta permixta horrore miseratio, & sumptus impetus liberandi populum illum ab ista carnificina & nefanda diaboli tyrannide.*

Probat verò Acoſta id nec impossibile naturaliter, nec incredibile eſſe, exemplo caprarum & hostiarum, quas extracto corde, respirare, & interdum balare, ex Galeno antea retulimus.

Ex quibus omnibus colligi videtur, omnia in partibus corporis humani sic fieri, quemadmodum in quolibet animali perfecto videmus; & proinde palpitationem & motum partium dissecti arietis, aut columbæ, invalidum eſſe argumentum divisibilitatis ejusmodi animarum. Quid enim ad exempla illa hominum respondebimus? Nempe, in partibus reſectis humani corporis, partes nullas animæ rationalis remanere; sed propter naturale vinculum ad partes sui corporis, quod anima retinet quamdiu potest, totam brevi aliquo tempore manere replicatam in duobus spatijs discontinuis, donec spiritus & calor naturalis evaneſcat, temperiesque illa diſſolvatur, quæ ad conservationem unionis animæ rationalis eſt neceſſaria. Aut certè, ſi nullo instanti temporis anima humana partes discontinuas informare poſſit; ſpiritus vitales & animales, qui in arterijs & nervis totoque corpore, abſente anima reſidui manent, dum effugere & ſe extricare conantur, illum motum partium concifarum facere. Hoc autem utrumque animabus brutorum perfectorum applicari poterit, ſi dicantur integraliter indiviſibiles, quemadmodum anima rationalis.

In exemplo autem illo corporum humanorum juiſſu Mahometis, per diaphragma, ſive ſeptum tranſverſum, acinace in duas partes cæſorum, notandum hoc eſt. Partem inferiorem, à diaphragmate deorſum, non potuiſſe perſentire dolorem, à quacumque cauſa ſe moveret & contorqueret; quia cum parte & regione corporis ſuperiore, in qua eſt cerebrum & imaginatio, non communicabat: ſine imaginatione autem & influxu cerebri per ſpiritus animales, non ſentitur dolor, ut in paralyſi, aut apoplexia patet.

Ille verò Mexicanus extracto corde loqui (perinde atque capræ Asclepiadis excordes balare) potuit; quia in eo erant omnia instrumenta vocis, & anima, corde sublato, non in instanti fortasse corpus deserit; sed tantisper in eo hæsitat, donec spiritus vitales per membra dispersi effugiant, & temperiem hominis dissolvant in qualitates cadaveris.

Nihilominus, licet exempla superius allata non evincant, animas brutorum perfectorum esse integraliter divisibiles; alijs tamen argumentis opinio ista (quam Cajetanus *communem modernarum phantasiam* vocat) fit valde verisimilis.

Cajet. 1. P.  
9. 7.

Primo, quia animas insectorum, ex vitæ & actionum vitalium, quæ in partibus divisis manet, diuturnitate, divisibiles esse, cum Aristotele, S. Thomâ, & communi antea probavimus: & tamen quædam insectorum (ut apum & formicarum) animæ nobiliores sunt aliquorum animalium perfectorum (asini, porci, aut cameli) animabus, ut ex moribus & ingenio colligi potest, & affirmat S. Augustinus. Nam *illud, quantum opinor, ait, concedet adversarius plus asino sapere apiculam, quorum comparare magnitudines, plus profecto est quam asininum.* Et alibi camelum asino, in isto ingenij stupore jungit, ei que apiculam sapientiâ anteponebat.

S. August.  
lib. de  
quant.  
anim. c. 24.

Si autem ingeniosæ & argumentosæ apiculæ anima, stolidi asini, aut cameli animabus nobilior est, & ad humanam propius accedit; quare magis quàm anima asini, in partes integrabiles sectilis esset? Nam compositio animæ ex partibus integrabilibus est signum imperfectionis, & majoris cujusdam materialitatis, profundiorisque immersionis in corpus. Etenim illa forma materiæ suæ cognatior est, quæ se ei coëxtendit, & ita in eam procumbit, ut non tota colligatur in singulis materiæ partibus, sed tota toti, & pars parti inhæreat, ac incumbat.

Vnde profecto, si omnia animalia perfecta (qualia etiam asini, boves, sues, & cameli) animas indivisibiles, & totas in singulis partibus habent, verisimilior est S. Augustini, quàm Aristotelis sententia: Insectorum quoque, sive imperfectorum animas.



animas etiam indivisibiles esse. Nec enim hæc animalia imperfecta vocantur, quia animas ceteris ignobiliores habeant; sed quia vilius quodammodo, ac in domicilio rudiori, & varietate domesticæ suppellectilis negligentius instructo habitant. Quod non semper ignobilioris animæ inquilinæ est signum, quando aliæ & excellentiores naturæ dores, ut ingenium, solertia, providentia superant. Quæ omnia in formica, aut apicula, quàm in sue ( quæ animam pro sale tantum contra putredinem carnis habere dicitur ) majora & excellentiora sunt.

Si igitur, excellentia istâ non obstante, apiculæ anima dividua est in partes integrales; nescio cur suis, aut asini animam individuant, & quodammodo spiritaliorem facere debeamus.

Secundò, materialitas & mortalitas animæ brutorum perfectorum postulare videtur, ut materiæ coëxtendatur, & pars una animæ à parte materiæ ( ex qua etiam educitur ) altera pars ab altera parte dependeat, sive sustentetur.

Sic enim corporum inanimatorum, plantarum, & animalium infectorum formas, & omnia accidentia materialia dependere videmus à suis subjectis; ut tota videlicet forma in totum, pars in partem subjecti procumbat. Vnde si pars ejusmodi formæ corruptibilis unionem ad partem subjecti amittat, corrumpitur & evanescit. Idem igitur brutorum perfectorum formis eveniet, quæ itidem sunt formæ materiales.

Hinc nullum accidens, vulgari Philosophorum pronunciatum, de subjecto uno in aliud transire potest: quia solutâ hac unionem ad subjectum à quo sustentabatur, entitas accidentalis collabitur & in nihilum cadit; adeoque in aliud subjectum evolvere se nequit. Hoc ergo idem cuicumque formæ substantiali materiali accidet: quia ipsa quoque, non minus quàm accidens, à subjecta materia sua sustentatur. Et tamen anima asini quantumvis materialis, si est indivisibilis, & tota in singulis corporis sui partibus, de uno subjecto in aliud naturaher transibit. Ut quando, nutriendo corpus suum, in novam alimenti materiam se replicat, & interea corrumpitur antiqua pars asini corporis, quam anima asini deserit.

Apparet igitur, strictiorem esse dependentiam formæ à subjecto sustentante, quàm à causa creata efficiente, quæ non sustentando & recipiendo in se intrinsecè suum effectum, sed extrinsecà sibi influentiâ existentiam illius attingit. Vt proinde mirum non sit, si idem lumen aëris à duabus facibus successivè pendere possit; non verò eadē forma à duobus successivè subjectis. Denique hæc opinio conformior est imperfectioni omnis animæ irrationalis, & materialis; videturq; replicatio illa ejusdem indivisibilis formæ per totum suum subjectum, esse animæ rationali & immateriali propria: quæ sicut spiritualitate Angelum imitatur; ita etiam replicatione indivisibilis substantiæ suæ per spatium & sphaeram, quam ei natura circumscripsit.

Hæc tamen, & alia parvis momenti argumenta non tam valida sunt, ut pertinacem, aut fortiter resistentem cogant; etsi Capreolus & Soncinas deserto S. Thomæ, ad Durandi, Scoti, Occami partes, cum recentioribus transferint. Suarez quoque etsi Lib. I. c. 13. de Anima, animalium perfectorum animas indivisibiles multis argumentis asseruisset, in Metaphysica deinde divisibiles esse maluit. Conimbricenses verò quæstionem istam indifferenter habent, & in utramque problematis partem versat.

Arist. lib. de  
Juvent. c. 2.

Aristoteles autem, si verba quæ initio citavimus attentè relegantur: non ait perfectorum, sive *bene constitutorum* animalium animas indivisibiles esse, sed non posse sic, quemadmodum insectorum, dividi: ut scilicet partes seorsim diu incolumes perdurare, & operationes vitæ sicut antè ( ut nutrirî, progredi, sentire, lætari, dolere ) obire valeant. Hæc verò animalia insecta possunt; quia compositio illa corporum ipsorum per incisuras, multa quodammodo animalia, ut ait Aristoteles, in unum compingit; ut mirum non sit, si partes tam diu superstites, tanquam integra animalia, post & divisionem permaneant.

Animalia verò perfecta aliter, & perfectiùs composita sunt: ita nempe, ut omnes partes ab unico principio motum & sensum recipiant; à quo si separentur, statim vitales operationes & vitam



& vitam amittant. Nam aliàs τὸ ψυχικὸν πάθος aliquam animalē passionem, in partibus etiam animalium perfectorum, modico tempore exerceri Aristoteles fatetur; ut in motu arietis, aquilæ, columbæ decapitatæ, & alijs exemplis antea à nobis demonstratum est.

## ARTICVLVS IV.

*Quare S. Augustinus putaverit animas animalium insectorum etiam indivisibiles.*

**S.** Augustinus non tantum animam rationalem, sed omnium brutorum, etiam imperfectorum animas credidisse videtur esse indivisibiles; hoc præcipuè argumento, quod sæpe repetit.

Nam omne, inquit (quantum experiri possumus) animal, si in aliqua parte corporis, etiam remota à capite, pungatur, anima quæ in capite est illicò admonetur, & caput, manum, vel pedem &c. ad locum doloris convertit. Etenim vilissimus etiam vermiculus, si caudam ejus pungas, capitellum versus locum vulneris contorquet. Signum igitur est, eandem indivisibilem animam, esse in capite, quæ est in cauda. Si enim alia pars animæ in capite habitaret, nesciret quid sentiret altera quæ in cauda domicilium habet. Verbis suis loquentem audiamus, *Moles omnis quæ occupat locum, ait, non est in singulis suis partibus tota, sed in omnibus. Quare alia pars ejus alibi est, & alibi alia. Anima verò non modò universa mole corporis sui, sed etiam unicuique particula illius tota simul adest. Partis enim corporis passionem tota sentit, nec in toto tamen corpore. Cum enim quid dolet in pede, advertit oculus, loquitur lingua, admovetur manus. Quod non fieret, nisi id quod anima in eis partibus est, & in pede sentiret, nec sentire quod ibi factum est, absens posset. Non enim nuntio aliquo credibile est fieri, non sentiente quod nuntiat: quia passio quæ fit, non per continuationem molis currit, ut ceteras anima partes quæ alibi sunt, latere non sinat. Sed illud tota sentit anima quod in particula fit pedis, & ibi tantum sentit, ubi fit. Tota igitur singulis partibus simul adest, quæ tota simul sentit in singulis.* S. August. lib. de immortal. anim. c. ult.

Lib. contra Epist. fundam c. 16. &c.

Et

Lib. de  
Quantit.  
anim. c. 31.

Et licet de anima rationali ibi sermo sit, in Libro tamen sequenti, De Quantit. animæ, ad omnes animas animalium, etiam insectorum, hoc extendit. Vnde cum *Palpantes lacertarum, caudas amputatas à cetero corpore*, suus Adeodatus & historiolam Artic. superiori recitatam vermiculi Liguriæ cujus partes à corpore resectæ in tabula discurrebant, ipse sibi objecisset; difficultate velut oppressus, unica obscurâ similitudine vocis, *Lucifer*, respondet. Cujus significatio non secatur in partes, licet ipsum sonum, qui est tanquam corpus significationis velut animæ, in *Luci* & *fer* dividas. In quibus tamen partibus nonnulla etiam est significatio; licet illa perierit, qua integra vox, *Lucifer*, stellam matutinam significat.

Quid autem per isthanc similitudinem indicare voluit Augustinus? An duas novas animas resultare in partibus animalis insecti, dum dissecatur? An potius interfectâ per divisionem veteri animâ, quasdam ejus veluti reliquias, sive spiritus vitales qui ipsas vibrent & moveant, in partibus superstites remanere?

Sed quidquid demum cogitaverit, profectò istâ, quantumvis ingeniosâ, similitudine ingenio suo non satisfecit. Vnde ad Adeodatum subjungit: *Quæ autem subtilissimè de hoc disputari possunt, ita ut non similitudinibus, quæ plerumque fallunt, sed rebus ipsis satis fiat, ne in presentia expectes. Concludendus est tam longus sermo &c.* Deinde fatetur: *A doctissimis viris dici, animam per seipsam nullo modo, sed tamen per corpus posse partiri.*

Itaque hîc fluctuat S. Augustinus. Et tota ratio, cur argumentum illud, de anima in capite sentiente puncturam pedis, tanti ad asserendam animæ, etiam insectorum, indivisibilitatem fecerit; fuisse videtur, imperfecta illo tempore, rei Anatomicæ cognitio. Satis jam verò deprehensum est, ab organis sensuum, nervos & canales quosdam usque in cerebri arcem tendi, per quos spiritus animales fluunt, & imaginationi, quæ in illa arce præsidet, renunciant puncturam, dolorem, aut quidquid aliud in remota corporis parte sentitur: & sic quidè, ut nuntij isti minimè sentiant quod nuntiant. Nam spiritus animales, insensibiles sunt. Contra tamen id quod  
Augusti-



Augustinus credebatur. Nam in initio Artic. citatus aiebat, *non esse credibile*, trajectionem illam sensus doloris à pede ad caput, fieri aliquo nuntio non sentiente quod nuntiat: ideoque conjectabat eandem indivisibiliter animam esse, quæ sentit tactu dolo-rem in pede, & cognoscit imaginatione in capite. Et tamen quod incredibile esse dicebat, credunt jam, & scire se profitentur Medicorum filij. Cujus rei suspicione si afflatus fuisset, magnum illud ingenium, quod Marte & acumine suo, sine Aristotelis, aut cujusquam alterius Naturalis Philosophi lectione & ductu, in res naturæ tam altè penetravit, aliud magis reconditum ex profunditate sua nobis deprompsisset.

## CAPUT V.

*De unitate & multitudine animarum in eodem corpore.*

**P**hilosophi quidam secundum gradus vitæ secundæ, multiplicant vitas primas in eodem composito. In plantis igitur unicam animam vegetativam; in brutis vegetativam unam, & alteram sensitivam; in homine tres, vegetativam, sensitivam, & rationalem cumulant.

Alij verò, licet non in eadem parte corporis plures animas congregent, per membra tamen eas dispensant: putantque aliâ specie animâ caput, aliâ pectus, aliâ pedes vivere. Res ista meretur in disputationem diffundi; ut sciamus, an instar equi Trojani pluribus animabus impleamur, aut instar Centaurorum binis ternisve compingamur, ut ille apud Poë-

*Nascenti cui tres animas Feronia mater;*

*Horrendum dictu, dederat, terna arma movenda,*

*Ter letho sternendus erat.*

*Æneid. 9.*

ARTICV.

ARTICVLVS I.

Philoponi opinio, de pluralitate animarum in eodem  
bovine, non satis valide à quibusdam recen-  
tioribus rejecitur.

**P**hiloponi Græci Aristotelis Interpretis, & quorundam aliorum sententia est, in eodem homine tres esse animas, serie quadam inter se sic ordinatas, ut *Anima sensitiva*, ait Philoponus, *ad animam rationalem materia rationem obtineat*, hæc vero ad illam habeat rationem formæ. Similiter anima vegetativa ad sensitivam materia rationem sustinet; veluti etiam corpus ad animam vegetativam.

Itaque cenſet animam hominis vegetativam proximè in-  
eſſe materiæ primæ; ſenſitivam verò vegetativæ, & ratio-  
nalem ſenſitivæ, tanquam proximo ſubjecto.

Conimbricenses autem, Toletus, Cavellus, Hurtadus, & alij quidam id refellunt: quia homo ex tot animabus compactus, non sit futurus ens unius naturæ.

Sed in promptu pro Philopono est responsio. Quod animæ illæ omnes sint formæ incompletæ, & inter se sic subordinatæ, ut una alteram in se excipiat. Sicut ergo ex materia prima & unica forma substantiali, ens unius naturæ conflatur; ita ex duabus formis incompletis, quarum una alteri se subijcit, ens unius naturæ coalescere potest.

4. de an- Sed forma substantialis, ait Hurtadus, non est subiectum alterius  
forma substantialis: Ille enim est essentialis conceptus materiae primae.

Verum, esse subiectum formæ substantialis, non est totus & adequatus conceptus materiæ primæ, reponet Philoponus, nisi ei addatur, quod sit tale subiectum formæ substantialis, quod ad officium informandi ineptum sit. Anima autem vegetativa, etsi animam sensitivam in se suscipiat, ipsa tamen erga materiam primam officium informandi exercet. Sic enim in compositione Logica, differentia latior strictiorem, ut sen-



ut sensitivum rationale, in se suscipere cogitatur: & tamen non est materia prima Logica; quia sensitivum respectu gradus adhuc latioris, videlicet substantiæ corporeæ, munus formæ Logicæ exercet.

Deinde, si Scoto licuit formam corporeitatis supponere animæ sensitivæ, aut rationali, tanquam subiectum ejus; quare animam vegetativam subicere eidem sensitivæ, vel rationali, Philopono non licebit?

Sed *forma corporeitatis est naturâ suâ forma incompleta, disponens materiam: at vegetativa & sensitiva sunt completa*, ait Cavellus.

Cavell.  
disp. 1. sect.  
7 de anim.

Sed negabit etiam istas animas esse completas Philoponus.

Accurrit verò Toletus. *Homo*, ait, *esset compositus ex bruto & anima rationali; scilicet ex bruto præcedenti, & superveniente anima rationali.*

Tolet lib. 2  
c. 3. q. 7 de  
anima.

Philoponus respondebit, compositum ex corpore humano & animâ hominis sensitivâ non esse propriè brutum. Nam brutum, ex anima sensitivâ ultimâ compositum esse debet; quæ alterius rationis & speciei est ab anima sensitiva hominis. Hæc enim ultima non est, sed naturâ suâ capax formæ ulterioris.

Sed addit Toletus, *Hanc propositionem futuram falsam, Homo est animal. Item, non fore intrinsecam, nec per se, sed sicut istam; Album est dulce.*

Sed falli Toletum dicet Philoponus. Nam homo ( hoc est compositum ex materia prima & triplici animâ subordinatâ, ut Philoponus sentit ) verè, intrinsecè, ac per se essentialiter includit animam sensitivam alicujus animalis. Vnde hæc propositio, Homo est animal, vera, intrinseca, per se, ac essentialiserit.

Illud denique axioma, quod ab Averroë mutuatum, identidem jactatur: *Quidquid advenit enti in actu, est accidens*, facile de ente in actu perfectò, & per ultimam formam constituto, Philoponus interpretabitur: negabitque formam illam esse necessariò accidentariam, quæ advenit enti adhuc incompleto, & composito ex materiâ primâ, & animâ vegetativâ, vel sensitivâ incompletâ, quæ naturâ suâ ad animam ulteriorem destitatur.

Averr. lib. 1  
Comment.  
63. Physic.

Et nonne, quæso, aliquid simile respondere oportet Averroem, ubi ei objectatur, Quomodo forma substantialis corporis mixti non sit accidens, cum adveniat elementis in actu per formas suas substantiales constitutis, quas ipse actu, licet refractas, existimat remanere in mixto?

Alijs igitur machinis struem illam & suggestum animarum, quem struxit Philoponus, dissicere oportet.

Philoponum autem imitati sunt Princeps Nominalium Occamus, & inter Scotistas Franc. Mayronius; nisi quodd duas tantum animas realiter distinctas, sensitivam & rationalem, corpori nostro inculcent: nam vegetativam cum sensitiva in unam coalescere jubent.

Occamum tamen suum ( quod mirum est ) Gregorius Arim. Gabriel, Marsilius, & universa Nominalium classis hîc deferunt, excepto ferè unico Thomâ Bricoto, qui Occami & S. Thomæ sententiam utrimque, & problematicè defenfat.

## ARTICVLVS II.

*Opinio Philoponi & Occami nimis gravi Censurâ à Toletus & alijs notari videtur.*

**S**ynodus 8. Generalis, circa Annum 870. Constantino- poli congregata, Can. 11. dicit: *Quosdam id temporis in tantum impietatis venisse, ut hominem duas animas habere impudenter dogmatizent. Tales igitur impietatis inventores, & similia sapientes, cum vetus & novum Testamentum, omnesq; Ecclesia Patres unam animam rationalem habere hominem asseverent, Sancta & Universalis Synodus anathematizat.*

Quidam ex isto Canone, tres Philoponi, & duas Occami animas à Synodo damnatas fuisse existimant. Toletus illam opinionem saltem *erroneam & temerariam*, Conimbricenses *minus tutam* appellant.

Sed Cavellus, & quidā alij Censurâ istam nimis severitatis arcessunt. Videtur quippe S. Synodus duas Manichæorum rationales animas, quarum una à principio bono, altera à malo descen-



descendat, tantum voluisse damnare. Ait quippe Synodus, *Vetus & novum Testamentum*, omnesque Patres asseverare, hominem unam animam rationalem habere. Quod profecto de Patribus adversus Manichæos disputantibus dici videtur. Nam de anima mere sensitiva, an sit alia in homine præter rationalem, parum videntur curasse Patres, nec *vetus & novum Testamentum* tam aperte de re ista loquuntur.

Deinde Canon ille adversus Photium Sedis Constantinopolitanæ, depulso Ignatio, invasorem editus est, qui Philosophiâ seculari tumens, & Ignatio doctior videri volens, Manichæorum de duabus animabus errorem, ex Philosophia sua confirmabat; sive id ex animo faceret, sive simulando, & tentando solum ( ut ipse se postea excusavit ) an in Ignatio satis Philosophiæ & eruditionis esset, ad refellendas hæreses, quæ humanæ Philosophiæ quæstiones implicitas, aut connexas habent.

Narrat enim Anastasius Bibliothecarius Photium à Constantino Philosopho magna sanctitatis, viro fortissimo, eius amico, increpatum fuisse, dicente, Cur tantum errorem in populum spargens, tot animas interfecisset? Et respondisse: Non studio quenquam ledendi talia proposuisse, sed probandi, quid Patriarcha Ignatius ageret, si suo tempore qualibet hæresis per syllogismos Philosophorum exorta pateret; qui scilicet viros exterioris sapientia repulisset. Vbi verba ista notanda, quibus dicit, *Errore tanto tot animas interfecisse*: quæ de hæresi manifestè damnatâ intelligi tantum possunt.

Addit deinde Toletus Conc. Viennense, quod Platonicos, asserentes animam rationalem non esse formam corporis informantem damnat: Perinde autem est, ait Toletus, dicere animam rationalem non esse eandem cum sensitiva & vegetativa; & dicere non esse formam informantem. Vnde hanc sententiam, inquit, puto aut erroneam, aut valde periculosam.

Sed iterum Censor est nimis severus. Nonne enim anima rationalis informare corpus suum potest, etiam si operationes vegetativas, aut sensitivas, non per seipsam, sed per aliam animam exercent? Quid si enim ab anima sensitiva species intelligibiles haurire eam oporteat, & ob id necessaria sit unio-

ejus ad corpus? Quid si deinde anima rationalis in operationes sensitivas non tamen sola, sed cum anima sensitiva eam determinante, influere debeat? Quomodo quidam animam vegetativam operari nutritionem, non per se solam & immediatè, sed per formas heterogeneas carnis, ossis, nervi &c. censent.

Itaque sententia illa Philoponi & Occami, quæ præter rationalem, unam aut alteram irrationalem animam infercit in eodem homine, falsa quidem & contra veram Philosophiam, sed non contra fidem Catholicam est, quantum opinor.

Valent.  
Tom. 1.  
d. 6. p. 3.

Scripturæ denique, quas Gregor. Valentia & alij congerunt, ut, *Inspiravit in faciem eius spiraculum vite*, Gen. 2. *Animam non possunt occidere*, Matt. 10. &c. ubi fit mentio animæ hominis in singulari tantum numero; evitari ab Occamo poterunt, si dicat, principalem, ultimam, & specificam qua homo distinguitur à brutis, animam designari; de anima verò sensitiva, quæ utrisque communis est, parum curari.

S. August.  
lib. 6. c. 8.  
contra  
Faustum.  
lib. 10. c. 13.  
de Genes.  
lib. de duab.  
anim. c. 14.

Allegatur quoque S. Augustinus, qui multis locis ait, Manichæos aliam quandam animam, ex naturâ malâ & Deo bono contrariâ oriundam finxisse, qua caro adversus spiritum concupiscit. Quam dicunt fuisse animam tantum sensitivam, qualem Occamus animæ rationali subjungit.

Sed sanè falluntur. Nam mala illa anima Manichæorum non erat solum sensitiva, sed simul rationalis: cum Dei mali quoddam segmentum, sicut bonam animam Dei boni particulam esse somniarent. Deum verò suum malum intellectu & voluntate præditum, haud secus ac Deum bonum existimabant. Vnde animam malam malâ suâ voluntate perpetuò malè velle & peccare, animamq; bonam ad simul peccandum ab ea cogi dicebant. Nunquam verò S. Augustinus dicit, aut indicat animam malam ideò esse ad bene agendum, aut bene volendum incapacem, quia instar animæ bruti, rationis particeps non esset.



## ARTICVLVS III.

*Vnica anima est in unoquoque homine. quæ ex tribus gradibus vegetativo, sensitivo, rationali solâ ratione distinctis coalescit.*

**H**Æc enim Aristotelis, S. Augustini, S. Thomæ, Scoti, Henrici, Durandi, & Principum Philosophorum philosophia est.

Nam Aristoteles ait, cogitare, amare, odisse ( utique per phantasiam, & appetitum sensitivum ) esse operationes non solius animæ intellectivæ, sed communes composito ex anima intellectivâ & corpore, *quatenus talem animam habet.* Unde ejusmodi operationes cessant corrupto corpore: *mens autem, sive anima rationalis, fortasse divinius aliquid est, inquit, & incompatibile.* Si igitur mens illa corpori conferta, in operationes phantasie, & appetitus sensitivi influit, ipsa gradum animæ sensitivæ intra se continet, adeoque alia anima sensitiva, quæ realiter ab anima rationali distinguatur, necessaria non est.

Arist. lib. 1.  
c. 4. tex. 66.  
de anima.

Unde Gabriel novaculam istam Occami: *Non sunt multiplicanda entia sine necessitate* ( sive, ut Gabriel loquitur, *Non est ponenda pluralitas sine ratione evidenti, aut experientia, vel auctoritate, cui non licet contradicere* ) egregie in suum auctorem strinxit. Multiplicat enim entia sine necessitate Occamus, dum animam sensitivam hominis à rationali distinguit. Axioma autem illud novaculam Occami & Nominalium voco; quia per illud omnes entitates distinctas circumcidunt & abradunt, relicta solâ nominum pluralitate; unde & Nominalium appellationem sortiti sunt.

Gabr. in 2.  
d. 16. q. 1.

Deinde eodem argumento uti possumus, quo S. Augustinus duas Manichæorum animas rejicit. Cum enim illi ex rebellionem carnis & spiritus, sive, *quia in deliberando nunc in malam partem, nunc in bonam putat assensio*, duas illas animas homini conarentur:

conarentur.

**S. August.** conarentur inferere; **S. Augustinus** unicam potius inde  
 lib. de duab. astruendam esse contendit. *Cur enim non magis, inquit, hoc si-*  
 anim. c. 13. *gnum est unius anima, qua libera illa voluntate huc & illuc ferri, hinc*  
*atque hinc referri potest? Nam mihi cum accidit, unum me esse sentio*  
*utrumque considerantem, alterutrum eligentem; sed plerumque illud*  
*libet, hoc decet; quorum nos in medio positi fluctuamus. Nec mirum:*  
*ita enim nunc constituti sumus, ut & per carnem voluptate affici, &*  
*per spiritam honestate possimus. Quare non duas animas fateri cogor.*  
*Possumus enim melius & multo expeditius intelligere duo genera re-*  
*rum bonarum, quorum tamen neutrum ab auctore Deo sit alienum,*  
*unam animam ex diversis afficere partibus, inferiore ac superiore, vel,*  
*quod rectè ita dici potest, exteriore atque interiore.*

In pugna igitur carnis & spiritus, anima quæ carnalium vo-  
 luptatum dulcedinem & blandimenta, ab una parte conside-  
 rat, eadem est cum anima quæ virtutis honestatem, ab altera  
 contemplatur; ut utra præponderet intelligat, & se ei inlinet.

Igitur unica anima est, quæ sensitiva est & rationalis. Nam  
 animæ sensitivæ est, per imaginationem voluptates sensibiles  
 sibi repræsentare, easque per appetitum sensitivum appetere.  
 Rationalis verò animæ officium est, virtutis honestatem per  
 intellectum apprehendere, & eam voluntate diligere.

Quam doctrinam sæpe, & adversus Iulianum apertè con-  
 firmat **S. Augustinus**. *Motibus suis, ait, anima quos habet secun-*  
 Lib. 6. c. 14. *dum spiritum adversatur alijs motibus suis, quos habet secun-*  
 contra Iul. *dum carnem. Et rursus motibus suis quos habet secundum carnem, ad-*  
*versatur alijs motibus suis, quos habet secundum spiritum. Et ideo di-*  
*citur caro concupiscere adversus spiritum, & spiritus adversus carnem.*

Et alibi iterum: *Bonis desiderijs, quibus sola anima concupiscit,*  
 Lib. 10. *cum adversatur aliquid quod eandem animam secundum carnem dele-*  
 c. 12. de *stat, tunc dicitur caro concupiscere adversus spiritum, & spiritus ad-*  
 Genes. *versus carnem. Sic enim dicta est caro, in eo quod secundam ipsam fa-*  
*cit anima, cum ait, Caro concupiscit; quemadmodum dictum est, Au-*  
*ris audit & oculus videt. Quis enim nesciat, quod anima potius & per*  
*aurem audiat, & per oculum videat?*

Vnde **S. Anselmus** Magistri sui sensum secutus, & optimè  
 lib. de con- *assecurus: Quidquid faciunt membra, inquit, totum imputandum est*  
 cept. virg. *voluntati.*  
 c. 4.



voluntati. Quod cum ita sit, miratur forsitan quis, cur pro culpa voluntatis, membra puniantur vel sensus. Verum non ita est: non enim punitur, nisi voluntas. Nam nihil est alicui pœna, nisi quod est contra voluntatem; membra autem & sensus per se nihil volunt. Sicut igitur voluntas in membris & sensibus operatur; ita in illis ipsa torquetur aut delectatur. Quod si non accipit; sciat in sensibus & membris non nisi animam, in qua est voluntas, sentire & operari, & ideo in illis torqueri aut delectari.

Attende ad ista verba: In sensibus & membris non nisi anima, in qua est voluntas, sentit & operatur. Quānam enim phrasi magis disertā dicere potuit, solam animam rationalem, sine alia sensitiva distincta, sensuum nostrorum operationes exercere?

Et sanè, si alia anima esset, quæ carnales voluptates in homine appetit, & alia, quæ ad spiritualia bona se erigit; quæ quæso, ratione, gratia voluntati animæ rationalis infusa, inferioris animæ sensitivæ motus reprimere valeret? Elevet enim se quantumlibet in altum voluntas animæ rationalis; appetitum tamen animæ sensitivæ secum sursum non reflectet, nec refrenare aut suspendere eam poterit, quin affectus suos versus terram declinet. Si enim anima sensitiva realiter à rationali distinguatur, nulla inter eas sympathia erit; qualis est inter duas potentias (ut voluntatem, & appetitum sensitivum) quæ in eadem anima radican-  
tur.

Si veroingas, animæ rationalis influxum necessarium quoque esse ad animæ sensitivæ operationes; & ideo appetitus sensitivi passiones, quibus ad voluptates carnis se inclinât, posse ab anima rationali per sympathiam quandam reprimi ac suspendi: statim illius influxus superfluitas apparebit. Nam appetitus animæ sensitivæ brutorum tali influxu animæ superioris non indiget. Ac deinde, si anima rationalis ad appetitus sensitivi passiones concurrere debet, non opus est aliâ animâ sensitivâ, quæ animam rationalem ad talem concursum determinet; cum per nudam potentiam appetitivam accidentalem sufficienter determinari queat.

Ex superioribus S. Augustini testimonijs facile intelligitur, quid sibi velit, quando spiritum hominis ab ejus anima distinguir.

S. Aug. lib.  
de fide &  
symbolo  
c. 10.

stringit. Ut cum alicubi dicit: *Tria sunt quibus homo constat, spiritus, anima, & corpus. Quæ rursus duo dicuntur; quia sæpe anima simul cum spiritu nominatur. Pars enim quadam ejusdem rationalis, qua carent bestia, spiritus dicitur. Principale nostrum, spiritus est. Deinde vita, qua coniungimur corpori, anima dicitur. Postremo istud quod visibile est ultimum nostrum, est corpus.*

Lib. 15. c. 1  
Trinit.

Non enim vult spiritum & animam in anima rationali esse res duas reapse, sed sola consideratione distinctas, sive quodam loquendi more, ut alibi disertè dicit. *Nomine mentis, ait, nonnulli Auctores lingua Latina, id quod excellit in homine, & non est in pecore, ab anima, qua inest & pecori, suo quodam loquendi modo distinguunt.*

S. Tho. 1. p.  
q. 76. a. 4.

Quam doctrinam illustrans S. Thomas: *Dicendum est, ait, quod nulla alia forma substantialis est in homine, nisi sola anima intellectiva. Et quod ipsa, sicut virtute continet animam sensitivam & nutritivam; ita virtute continet omnes inferiores formas, & facit ipsa sola quidquid imperfectiores formæ in alijs faciunt. Et similiter dicendum de anima sensitiva in brutis, & de anima nutritiva in plantis, & universaliter de omnibus perfectioribus respectu imperfectiorum.*

S. Tho.  
ibid. a. 3.

Deinde utens eleganti Aristotelis comparatione, qua animam rationalem pentagono, sive figuræ quinquangulæ assimilat, quæ tetragonum & trigonum, seu quadrangularem & triangularem in se continet; & tamen figura unica est. *Sicut, ait, superficies quæ habet figuram pentagonam, non per aliam figuram est tetragona, & per aliam pentagona (quia superflueret figura tetragona, ex quo in pentagona continetur;) ita nec per aliam animam Socrates est homo, & per aliam animal, sed per unam & eandem.*

Denique, si in homine aliqua anima purè sensitiva substaternatur rationali, materia prius ad illam disponetur, quàm ad animam rationalem ei superinductam, Occamo etiam fatente; quemadmodum in prima hominis in utero formatione, dispositiones ad animam vegetativam & sensitivam vialem antecurrunt dispositiones animæ rationalis. Cum autem ædificia incipiant à culmine dissolvi, ultimæ dispositiones quæ animam rationalem sensitivæ superinduxerunt, resolventur in morte hominis, ante animæ sensitivæ dispositiones; & sic  
homo.



homo non totus morietur, sed compositum ex anima sensitiva & humano corpore superstes remanebit,

Non ignoro Bricoti responsionem: Non posse scilicet hoc naturaliter accidere, quia anima rationalis, inquit, corpore non egreditur, nisi sensitivam secum trahat. Sed sine ratione & gratis hoc asseritur; cum diversæ sint utriusque animæ dispositiones. Vnde in mortibus hominum videbimus sæpe ipsos ( nisi utriusque animæ dispositiones à causis vehementibus simul destruantur ) in satyros & homines silvestres resolvi, & ex lecto mortis non efferri ad sepulchrum, sed in silvas auferre. Fatetur enim Bricotus, quid simile eventurum, si virtute divinâ eriperetur homini anima rationalis, sensitivâ solâ remanente. *Illud enim esset brutum talis speciei, inquit, cujus dicuntur esse homines silvestres; qui propter magnam similitudinem in figura, corporibus, & operationibus, dicuntur homines; carent tamen anima rationali.* Sed tales satyros & silenos, similisque turpitudinis & formæ semihomines, corpore nostro nos circumferre credemus, quando viderimus homines integros, cum moriuntur, in ejusmodi monstra destrui ac resolvi.

Tho. Bricoti lib. 2. de anima.

## ARTICVLVS IV.

*An formæ quædam substantiales inanimæ, præter animas, in viventibus sint ponendæ. Et primum, An elementorum formæ.*

**P**hilosophi ac Medici non pauci, non contenti unicâ formâ viventis, quæ est anima, multis alijs substantialibus formis inanimis corpora viventia onerant.

In primis enim formas substantiales elementorum, non tantum in viventibus, sed in quovis mixto remanere superstites qui lam credunt. *Sunt enim, ait Vallesius, qui elementa non minus retinere suas naturas asseverant, atque priusquam in hanc compositionem coivissent.* In horum numero est Avicenna, Auctor non om-

Franc. Valles. lib. 1. c. 1. Controv.

nino contemnendus. Alij ( in quibus Aristotelem, Galenum Hippocratem statuo ) solas elementorum qualitates servari, reliqua corrumpi putant. Est Averroes, qui media via voluit incedere, dicens retinere elementa formas, quæ substantiales appellantur, sed remissas, & suas naturas non constituentes; ac proinde neque specierum tribuentes appellationes.

Arist. lib. 2.  
c. 1. de par-  
ab animal.

Lib. 3. c. 3.  
de celo.

Galen. lib. 1.  
de elem.

Lactant.  
lib. 2. divin.  
Instit.

S. August.  
lib. 20. c. 14.  
contra  
Faust.

Bodin.  
lib. 2.  
Theat.

Et sanè Aristoteles, ( etsi Dandinus & alij ambigua quædam loca in contrarium ducant ) dilucidè alicubi ait, *Mixtum fortasse melius dici posse, ex virtutibus confici elementorum. Humiditas enim & siccitas, caliditas, & frigiditas materia sunt corporum mixtorum.* Addit autem particulam dubitandi, fortasse; quia alibi *Quando dicit, elementa divi & per se esse virtute vel actu, inesse corpori mixto.*

Galenus verò & Hippocrates, si interdum dicant elementorum formas manere in mixto, mirum non est; quia non alias in elementis formas, quàm qualitates primas agnoscunt, ut Medicorum doctissimi etiam fatentur. *Esculem & potulentum*, ait Galenus, ex aëre, igni, aqua, & terra gignuntur. *Quæ sanè ex nullo amplius corpore constituta sunt, sed ex materia & qualitatibus tantum: quas ipsorum esse principia concedimus, elementa autem nequaquam. Tamen si elementa ab ipsis qualitatibus habeant, quod elementa sint. Siquidem si summus calor materia accedat, iam id totum elementum ignis evadet: similiterque de ceteris qualitatibus tribus dicendum. Eadem videtur Lactantij sententia: Substantia ignis, calor est; inquit, aquæ, humor.*

Verùm Philosophia verior formas substantiales, qualitatibus primis excellentiores, in elementis admittit. *Nam elementa, quamvis in alias formas ( corporum mixtorum ) formanda; tamen quia iam elementa sunt, etiam speciebus proprijs distinguuntur,* ait S. Augustinus; *Hyle autem ( sive materia prima ) non sunt, quia illa est prorsus informis.*

Formas verò elementorum substantiales manere incolumes in mixtis negat S. Thomas, Scotus, Durandus, & tota Philosophorum Nobilitas.

Errant igitur Bodinus, Dandinus, & quotquot contra eos pugnant. *Tamen si non videtur ignis in physicis corporibus,* ait Bodinus.



ait Bodinus, *inest tamen in omnibus compositis, etiamsi plus hic appareat, quam illic. Quî sic Bodine? Argumento sit, ait, quod omnia corpora motu vehementi calorem, vehementiore ardorem, vehementissimo flammam concipiant. Qui si non esset in compositis, non ex ijs eliceretur. Argumento sit, quod ligna arentia citius, viridia tardius attritu solo inflammantur, & in arentibus lignis pingua omnium celerrimè attrita ignem promuat, ut lauri, ficus, nucis, hedera, olea, picca.*

Ignis tamen nec in chalybe & silice, nec in omnibus istis lignis aridis latet, mi Bodine, sed attritu & rarefactione pinguium & inflammabilium spirituum, qui intus latent, generatur & excitatur.

Quare verò potius mixta ex elementis, quàm elementa ex mixtis oriri dicantur, si materiâ eâdem constent, & qualitates primas communes habeant, rationem concinnam reddit S. Thomas: *Quia in quolibet genere id quod maximè dicitur est principium aliorum, & alia dicuntur secundum ordinem ad ipsum: sicut ignis, qui est maximè calidus, est causa caliditatis in corporibus mixtis; quæ in tantum dicuntur calida, in quantum participiant de igne.* S. Th. I. 2. q. 90. a. 2.

Quia igitur elementa qualitates illas primas, ex quibus refractis mixti temperies componitur, habent sibi naturales in summo gradu; ideo mixta illas ab elementis participare dicuntur; etiamsi fortasse à sole, stellis, vel ab alijs causis acceperint.

Quantum verò ad materiam, prima corpora mixta in principio Orbis conditi, ex terra & aqua à Deo facta sunt. Deinde alimenta, ex quibus vivencia jam nutriuntur & incrementa sumunt, ex terra & aqua succum materiamque proximè aut remotè rapiunt; ideoque merito tam qualitatibus primarum temperiem, quàm materiam totam indidem mutuari dicuntur.

Denique contra eos qui elementorum formas viventibus & omnibus mixtis inculcant, semper pugnat illud commune S. Thomæ & aliorum argumentum: *Quod forma substantialis perfectior virtute contineat omnes formas inferiores, & faciat*

*ipsa sola quidquid imperfectiores forme in alijs faciunt.* Vnde unica anima in plantis, brutis, hominibus, proximè unita materiæ primæ cum suis qualitatibus primis refractis, omne id præstat corpori suo, quod possent formæ elementorum, si inter animam & materiam primam interjicerentur. Nullo igitur usui formæ istæ elementares in mixto relinquuntur; & solùm ad falsificandum Aristotelis & Peripateticorum vulgatum ac receptum istud axioma, Generatio unius est corruptio alterius. Certè enim generatio mixti proximè ex elementis, non est corruptio elementorum, si elementa secundum suas formas compositionem mixti ingrediuntur.

Ratio verò illa S. Thomæ, quòd forma unica perfectior materiæ sufficienter tribuat quidquid forma imperfectior posset, satis etiam ostendit, formam corporeitatis ex supervacuo asseri, & animæ rationali substerni à Scotistis. Nam, ut alibi adhuc S. Thomas asseverat: *In homine non est alia forma substantialis, quàm anima rationalis: & per eam homo, non solum est homo, sed animal, & vivum, & corpus, & substantia, & ens.* Per solam animam rationalem, inquam, homo omnia ista est, sed inadæquatè, & tanquam per partem sui principalem. Quia inadæquatè est etiam omnia illa per materiam, tanquam per partem minùs principalem & ignobiliorem. Sicut enim quodlibet totum suam essentiam ab omnibus partibus suis simul, integre & completè habet; ita à partibus singulis solùm inadæquatè.

Verè igitur Gabriel: *Homo non plus est corpus per formam, quàm per materiam. Ita enim materia dat esse corporeum composito, sicuti forma.* Imò verò, ut acute Gregorius, ampliùs per materiam homo habet esse corporeum, quàm per rationalem, aut quamcumque aliam formam. *Corpus enim* inquit *dicitur esse corpus, principaliter per materiam. Et sic dico, quòd homo sit corpus per materiam id est, quia ex materia compositus. Nec est corpus per aliquam aliam formam ab anima intellectiva distinctā.* Dicitur re verà enim corpus, quia est compositus ex forma substantiali, & materia capace corporeæ quantitatis. Vnde capacitatem illam, non à forma ulla substantiali corporeitatis, aut alià quacumq; sed à materia habet,

S. Tho. q. de  
spirit. creat.  
a. 3.

Gabriel. in  
2. d. 16. q. 1.

Greg. Arim.  
in 2. d. 16.  
q. 2.



habet, quæ sola in tali composito, corporeæ quantitatis est capax. Vnde incredibile est, quod contrà Cavellus reponit: *Quod anima nequeat per ullam potentiam informare quod corpus non est; cum sit essentialiter actus corporis. Et si per impossibile, informaret materiam, nullâ præcedente formâ corporis, animal non esset; quia nullam animalem functionem exercere posset, quia careret organis.*

Hoc incredibile est, inquam. Quia ipsamet forma corporeitatis talis corporis viventis, temperiem & figuram organorum, tanquam dispositiones suas accidentarias præsupponeret, non eas introduceret. Talia igitur organa sic accidentaliter temperata & configurata si animæ rationali, vel sensitivæ, aut vegetativæ immediatè dentur, nullâ formâ substantiali corporeitatis præjacente, & inter illas animas ac materiam intercedente; satis utique ad functiones animales exercendas instructæ erunt.

Nec quando Aristoteles dicit, *Animam esse formam corporis organici*, vult animam à corpore organico, tanquam formam informantem à subiecto suo condistingui; quasi corpus aliud physicum, per formam aliquam corporeitatis constitutum, ei præjacere oporteat; sed quòd ipsa anima tale corpus organicum, tanquam forma componens, constituat, ut suprâ Cap. I. Art. IX. cum D. Thoma, & Aristotele ipso exposuimus. Ait quippe animam esse, τὸ τὴν ἐν τῷ σώματι τοιοῦτον ὡς αὐτὸ, *quod quid erat esse* (sive partem essentialis) *talis corporis*, quod paulò antè organicum appellaverat. Ac mox eleganti similitudinem istam illuminat. Veluti, inquit, si aliquod instrumentum artificiale, v. g. securis, esset corpus naturale, figura securis esset forma substantialis, & pars essentialis ejus; quâ absente, illud instrumentum esset tantum æquivocè tale. Ita anima est pars essentialis corporis naturalis organici; qua abscedente, corpus istud non ampliùs ejusdem rationis univocæ manet.

Vel certè, si corpus, in definitione animæ, pro parte tantum compositi animati condistincta ab anima, accipi debet, respondere oportebit, quod Gregorius: *Corpus accipi pro materia organizata. Et sic sola animata, inquit, consueta sunt dici esse composita ex corpore.*

Gregor.  
Arim. in 2.  
d. 16. q. 2.

ARTICV-

## ARTICVLVS V.

*An in corpore animato, præter animam, sint formæ substantiales inanimæ organorum & membrorum, ut oculi, auris, cerebri, cordis, carnis, ossis &c.*

**F**ormas quasdam organicas membrorum corporis animati, Medici & Philosophi quidam nuper invexerunt; quæ recedente animâ, etiam in cadavere, sine aliâ formâ cadaveris superinductâ, maneant, quam additis etiam convitijs & contumelijs longissimè respuunt.

Sed, si quæ præcedenti Artic. diximus adversus formam corporeitatis, & formas elementorum, quas aliqui viventibus & mixtis inferciunt, valent; etiam contra istam formarum organicarum & heterogenearum, ut appellant, multitudinem valebunt. Omnis enim, inquam, ista formarum suppellex superflua est, quarum vicem & munus totum unica anima abundè implet. Manet quippe semper invictum illud S. Thomæ pronunciatum: *Forma superior virtute continet omnes formas inferiores, & facit ipsa sola quidquid imperfectiores forme faciunt.*

Quod tamen S. Thomæ dogma non sic accipendum (ut quidam adversarij ei objectant) quasi forma substantialis possit tribuere materiæ quidquid formæ accidentales possunt; ut anima rationalis dare corpori humano esse album, quia albedo (quæ utique est imperfectior animâ rationali) hoc potest: sed loquitur de formis subordinatis, & gradatim secundum perfectionem ascendentes; quarum una perfectionem inferiorem, altera superiorem corpori suo tribuit. Veluti forma lapidis dat esse compositum physicum, forma plantæ esse principium vegetationis, forma bruti esse principium sensationis, forma hominis esse principium ratiocinationis corpori suo tribuit.

Tres autem illi inferiores perfectionis gradus sursum ascendere



ascendere & in unam animam rationalem confluere sic possunt, ut unica anima eminenti & excellenti modo omnes illos contineat, Anima enim rationalis est instar triremis, in qua tres ordines remorum sunt, etsi tantum sit unica navis. Quanquā tamen ad solas operationes vitales remis, sive organis propriè indigeat. Vnde instar biremis potius est, in qua inferior remorum ordo, sunt potentiarum vegetativarum organa; superior, organa potentiarum sensitivarum. Quibus iisdem in operationibus rationalibus utitur, quamdiu est in corpore.

Remi verò isti & organa, ut sint operationum vitalium idonea instrumenta, per temperies, & figuras, aliaque accidentia sufficienter instruuntur, sine formis substantialibus organicis, quæ nihil omnino ad operationes vitales organorum conferre valent: aut dicant, quid valeant?

Quam rem exemplo isto possumus declarare.

Vt enim oculus sit idoneum animæ organum ad elicendam visionem, non aliud requiritur, quàm ejus rotunditas, & tunicarum humorumque omnium talis conformatio, temperies, & perspicuitas, ut species visibilis ad perpendicularem in ijs refracta, ad oculi fundum & ultimum retinæ parietem perveniat, & ibi picturam suam distinctè efformet. Præter autem illa oculi & partium accidentia, peculiaris forma substantialis organica, ad idonei organi compositionem, est prorsus otiosa & supervacanea. Vnde nec à natura fabricatur, quia nihil agit frustra.

Deinde, cum homo & omne vivens in essentia sua corpus organicum includat, quomodo erit ens unius naturæ, si multiplicem illam diversissimarum formarum organicarum suppellectilem includat? Nam forma oculi non videtur unione integrali per se cum formis organicis proximarum partium posse in unum coalescere; nec forma ossis cum forma vicinæ carnis magis unum per se efficere, quàm forma lapidis cum forma terræ. Lapides enim ossa terræ solent appellari. Unio quippe integralis unum per se constituens, inter partes solo numero distinctas, aut saltem non specie physicâ diversas, debet proximè intercedere: formæ autem ossis & carnis, ut ceteræ

Q

pleræque

pleræque ferè omnes, quas Auctores earum, heterogeneas appellant, maximo inter se essentiæ physicæ, & perfectionis intervallo distant; adeoque in unum per se integraliter non magis coire queunt, quàm machinæ Archimedis, aut horologii particulæ, quod æris, ferri, ligni, artificiali nexu cohesum & concinnatum est.

De anima verò etiam sensitivâ brutorum, & vegetativâ plantarum, quæ per organa sua divisibiles sunt, aliter est philosophandum. Nam licet alia pars animæ equi sit in ossè, alia in carne; ejusdem tamen speciei physicæ sunt, ideoque integraliter per se uniri valent. Quod ex nobilitate animæ supra formas inanimas, & quadam elevatione supra suum corpus provenit. Nam essentiæ animæ equi, exempli causâ, postulat multis partibus integralibus suis solo numero distinctis sic inexistere, ut una formæ pars, materiæ unius organi sic temperatæ & conformatæ, altera pars, alterius organi materiæ aliter temperatæ ac conformatæ inexistat. Hoc enim solum in repræsenti, inter animam equi & hominis est discrimen: quòd anima hominis eadem prorsus & indivisibilis, omnibus istis organis variè temperatis postulet inexistere; anima verò equi per partes suas integrales, quarum unam in uno, alteram in altero organo habeat. Atq; hæc, sine dubio, sententia Aristotelis est, quidquid eum Dandinus vellicet, & aliò trahere tentet. Cur enim toties dicit faciem, oculum, ossa, carnes &c. hominis mortui, esse solum æquivocè talia, non secus ac oculum lapideum &c. nisi quia ejusmodi organa & membra, non ex formis inanimis, quæ in cadavere manent, sed ex animâ totius, physicè composita esse sentit? *Non enim est facies, ait, quæ caret anima, neque caro, sed postquam fuerint corrupta, æquivocè dicuntur facies & caro; veluti si lignea essent aut lapidea.*

Arist. lib. 2.  
c. 1. de ge-  
nerat. ani-  
mal.

Quomodo deinde verum est, quod tam sæpe inculcat & reculcat: *Omnem corruptionem esse alterius generationem*: Ac postea: *Vnius generationem in substantiis, semper esse alterius corruptionem*; & contra, *unius corruptionem esse alterius generationem*; si abeunte animâ nihil novi generatur, sed materia sola cum suis antiquis formis organicis manet, ut Dandinus & alij existi-

lib. 1. c. 3.  
de generat.



existimant? Et ut intelligamus, corruptionem veteris & generationem novi compositi physici, nullo temporis intervallo a se invicem distare, ait, in omni generatione corporis naturalis, totum mutari in totum, ut *aër in aquam, vel aqua in aërem*; ita videlicet, ut nulla temporis vacua intercapedine, formæ substantiali veteri nova immediate succedat. Quod tamen in opinione Dandini & Organistarum, qui corpus animatum istâ formarum organicarum supellectile instruunt, minime verum est. Nam migrante animâ, domicilium, nullo succedente proxime inquilino, vacuum manet.

Lib. 1. c. 4.  
de generat.

Quia verò formam cadaveris ( nisi homo vivus ardore ignis in flammam, aut in exhalationem proxime vertatur ) animæ rationali succedere Peripatetici dicunt; Dandinus omnes ingenij & eloquentiæ nervos ad expugnandam miseram illam formam cadaveris convertit.

*Non est, inquit, credendum illam cadaveris, quam isti introducunt, vilissimam, inertissimam, omniq. operatione destitutam formam, in cuiusdem corporis possessionem succedere, quæ propria fuerat animæ, nobilissima forma atque ad omne operationis genus solertissima. Corporis, inquam, organici, quod ad plurimas operationes exercendas, omni organorum genere instructum est. Non mihi persuadebit quisquam, eam posse dare materiam naturam carnis, & ossis ac ceterarum partium, ut dabat anima, æquamque esse vim & potentiam abiectissimæ formæ, ac divinisimæ.*

Dandin.  
lib. 2. tex. 11  
digress. 8. p.  
3. de anima

Sed non intelligere videtur Dandinus, quid Peripatetici circa istam formam cadaveris philosophentur & dicant.

Non enim volunt temperies & figuras organorum ab ea produci, conservari, aut postulari tanquam naturales suas proprietates: cum illi formæ cadaveritiæ indifferens sit, an cadaveris caput rotundum, an triangulare, an manus mortui in quinque digitos diffusa, an unidigitalis sit.

Sicut enim operationes organicas non exercet, ita nec organa tali exercitio destinata flagitat. Sed organa pro operationibus animæ olim fabricata invenit; quemadmodum forma lateris, quadrangularem luti materiam intrat, quam laterum plastes induxit; aut forma substantialis panis subit figuram,

quam massæ pistor impressit; non indignatura quamcumque aliam ipse imprimere voluisset. Vnde cadaver concisum in partes, formam suam substantialem retinet, nec figurarum apparatus, quem in bove recens jugulato invenit, pili facit. Vnde imaginatio Dandini fallitur, dum *naturam carnis & ossis &c.* à forma cadaveris, quemadmodum ab anima quæ præcessit, *dari*, nos existimare credit.

Quodd autem nobilissimæ animæ, vilis cadaveris forma proximè succedat, quid mirum? Nonne idem Dandinum dicere oportet, cum in veneficæ vivicomburio, animæ rationali vilissima exhalationis, nidoris, & fumi forma succedit? Illa quippe forma animæ succedit, cujus dispositiones inductæ, contrarias animæ dispositiones eijciunt, & sic animam fugant. Tales autem inanimis & vilissimæ formæ dispositiones esse solent. Quales enim dispositiones sunt nobilibus dispositionibus maximè contrariæ, nonne viles?

An verò in ossis, carnis, nervi, venæ, arteriæ materiâ, & omnibus partibus mortui animalis sit eadem specie forma cadaveris, ex dispositionibus, per quas anima ex unoquoque suo organo expellitur, æstimandum est. Vt, exempli gratiâ, si aliâ contrariâ temperie anima ex cerebro, aliâ ex corde aut jecore expellitur; aio diversam specie cadaveris substantialem formam per illas dispositiones inductam esse; nec idem esse cadaver, sed multa specie distincta, quamvis unam materiam continuam habeant; sicuti quando diversi specie arborum rami, per insitionem in eandem arboris materiam implantantur, & continuantur.

Nec mirari debet Dandinus, formam istam vocari cadaveris; cum cadaver, inquit, potius animæ absentiam, quam formam positivam significet. A cadendo quippe nomen habet, ut Grammatici volunt; quia corpus animâ sustentante vacuum, cadere solet.

Sed nomen aliud simplex det nobis, quo exprimamus formam illam positivam, quæ animæ in materia proximè succedit, & nomen claturam ejus fortasse recipiemus.

Formas enim illas proprijs nominibus ignotas, non ut volumus,



lumus, sed ut possumus, circumloqui debemus. Quo enim nomine simplici formam lapidis, auri, argenti, & omnium inanimatorum exprimere possumus? Non possumus: & forma lapidis, forma auri &c. dicendum est, aut tacere oportet. Nomina in lapidis (clamat ad Cardanum Scaliger in simili quæstione) Scalig.  
Exerc. 307. qui quotidie tuis oculis obversatur, formam: & Phyllida solus habet. 6. 12. Nego tibi ullam formam esse nobis notam plenè & planè; nostramq; scientiam esse umbram in sole. Neque verum est, forma substantialis speciem recipi in intellectu. Non enim in sensu unquam fuit.

Verum, otiosa & iners, est inquit Dandinus, forma cadaveris.

Resp. Non inertior mi Dandine, quàm forma silicis, quem in platearum stratis quotidie calcamus. Dormiunt enim quodammodo pleræque mixtorum inanimatorum substantiales formæ, nec actione aliquâ nobis sensibili evigilant; excepto magnetæ, & paucis mineralibus, aut gemmis, quæ virtutis aliujus & actionis satis sunt vigiles & compertæ.

Dic igitur nobis, quam actionem forma silicis, aut saxi exerceat; & similem aliquam, aut analogam formæ cadaveris assignabimus. Certè enim per naturalem suam & activam temperiem, quam in materia sua flagitat, aliquid tenuiter & somnuculosè agere potest.

Sed quare forma ista cadaveris non conservat corpus suum mortuum à putredine? interrogat Dandinus.

Interrogo vicissim ergo, & potiori ratione: Quare formæ organicæ singula sua membra, ut una oculus, altera cor, tertius jecur &c. non diutius conservant; cum singulæ, organorum temperies sint formis suis organicis connaturales, ut ipse & alij Organistæ imaginantur?

Resp. igitur: Multas qualitates cadaveris non esse formæ cadaveris naturales, sed dispositionum veteris animæ esse reliquias; quæ proinde à forma cadaveris non adjutæ, à contrarijs agentibus facillimè expugnantur.

Quare deinde, pepones, melones, cucumeres, pruna, corna, pira, mala, & omnes *καρπὸὶ ὅπῃοι* fructus horni, tam subito marcescant, & in putredinem fatiscant; cum suas habeant formas substantiales, à quibus naturalis eorum temperies conservatur?

Q. 3.

Denique

Denique, qui non eandem esse hominis vivi & mortui carnem dicunt, sensui adversantur, qui eandem esse indicat, inquit Dandinus.

Sed quo sensu identitatem istam viderit Dandinus, ignoro.

Certe Aristoteles sensu minimè carebat, qui tamen carnem hominis mortui toties dicit esse tam æquivocè carnem, quàm cadaver hominis est æquivocè homo.

Averr. lib. I  
de anima.

Et Commentator ejus, nullam aliam formam præter animam, per omnia corporis organa diffusam agnoscens: *Non differunt membra leonis à membris cervi, ut, nisi quia anima differt ab anima.*

Vnde si caro animalis vivi, in esse carnis per animam constituebatur; profecto fugiente animâ, non manet eadem specie caro, sed solum cadaver carnis, quod æquivocè tantum est caro.

Accidentia autem, ut color, sapor, mollities, & quædam adhuc qualitatum primarum (excepto vitali calore) temperies non indicant priorem formam aliquam substantialem organicam eandem in cadavere permanere, quæ fuerit in vivente; sed accidentia ista formæ priori & posteriori (ut sæpe accidit) communia esse. Aut certè, si formæ posteriori naturalia non sunt, signum est, posterius compositum, quale hîc est cadaver, non omnino in statu suo naturali genitum esse; sed sicut aqua calida interdum generatur ex aëre.

Tandè, quasi naturæ advocatus in nos Dandinus declamans, *Quid vos coëgit, inquit, novam hanc inertem, otiosam, & inutilem formam cadaveris entitatem invohere? Quàm multas ponitis ortus atque interitus? Quàm multas genitas formas atque corruptas, non sine summo dolore & gemitu totius naturæ?*

Verùm, sub tuo potius tot formarum, quas ei imponis, onere natura gemit, & Peripateticorum opem adversum te implorat Dandine.

Nam quamlibet corporis viventis partem sex, ut minimùm, substantialibus formis oneras; quatuor videlicet elementorū, ignis, aëris, aquæ, terræ formis; unâ deinde formâ organicâ; quibus denique sextam, animam superinijcis, ne perpluant.

Generatio verò & corruptio, mutabilitasque rerum, naturæ stantùm



tantum lusus, non onus est. Hoc lusu aqua exhalatur in vaporem, vapor vertitur in nubem, nubes in pluviam, pluvia in herbam, herba in bovis carnem, caro bovis in hominem; & mille alijs gyris & circulis divina sapientia ludit in Orbe terrarum. Quid ergo miraris, si corpus morientis animalis induat cadaveris formam, rursus exuat, & eat in putredinem, ex putredine in terram, aut quod naturæ orbe circumducitur?

Fatigat nos deinde Dandinus interrogando, A quam causâ forma cadaveris generetur?

Sed dicat ipse nobis, quidnam sit formæ lapidis, tot mineralium, & inanimatorum pater? & pro forma cadaveris eundem inveniemus, aut ei affinem. Qui enim dispositiones ad cadaveris formam inducendam præmittit, est causa instrumentalis; principalis verò, Creator omnium Deus: qui etiam ut multis placet, solem, aut aliam cælestem causam assumit in consortium.

Si hæc curiositati tuæ non satis sint, vide quæ infra Lib. II. Cap. VI. Art. XVII. de causa principali formarum animantium dicturi sumus. Illa enim ad causam inanimatorum transferri possunt, & debent.

## ARTICVLVS VII.

*Medica quoque pro formis organicis argumenta parum valent.  
Fernelius, Vallesius, alijque confutati.*

**M**edici paulò pinguioris Philosophiæ esse solent, & sensuum errores minùs quàm Platonicis, aut Peripateticis, magistrâ ratione corrigere norunt.

Quia igitur carnes & ossa animalis vivi & mortui, quâ mollietie, quâ durtie, & qualitatum primarum temperie simillima vident, idcirco eandem formam organicam in utrisq; manere credunt. *Vitâ excedente, similarium partium;* ait eruditus Fernelius, *unaquæque, os, nervus, caro suam sibi formam retinet, & quod superas os est, non homonymâ, sed simplicem, & illi peculiariter tributâ appellatione.*

Fernel.  
lib. I. c. 4.  
de abdit.

Caro.

Caro enim, in Fernelij & Organistarum Philosophiâ, compositum est, non ex anima quæ in morte discedit, sed ex forma inanima carnis, quæ eadem numero in vivente & mortuo manet: & proinde caro mortua non homonymè & solo nomine, ut vult Aristoteles, sed synonymè & eadem ratione est caro, ut Fernelius credit.

Quod etiam adeo manifestum visum est Campanellæ, ut Aristotelem, & sapientiæ Ordinisque sui columnen S. Thomam, omnesque qui sapiunt aliter, stultitiæ insimulare non dubitet. *Corpus, inquit, distinctum est in ossa, nervos, carnes, & viscera, totaque in membra differentia colore, dispositione, actione, temperamento, & difformitate, ut nullo pacto uniforme sit, & unica forma constare possit. Aqua quidem uniformis est, & ignis, & res similes; & hac unica informantur forma: at animal tanta ornatur difformitate, ut stultum sit, putare ob una forma ipsum posse informari.*

Tho. Campanella  
lib. 2. c. 18.  
de sensu.

Scalig.  
Exerc. 346.

Sed timeat potius Campanella, ne in classem stultorum à Iul. Scaligero redigatur: *Latet enim plebeia ingenia, inquit, membra cadaveris alia esse specie ab ijs quæ fuerant viventis. Soli sapientes hac hauriunt ex penitioribus natura fontibus.*

Si enim profundè & paulisper ultra oculorum sensum, in hunc Democriti puteum descendamus, facile apparebit, quomodo unica specie anima ad totum suum corpus, variâ organorum supellectile instructum, habitudinem immediatam dicere valeat; etiamsi organa ista non per formas substantiales diversas, sed per sola accidentaria temperamenta, & figuras accidentales tornata sint, ut sic dicam, & distincta. Hæc enim est, ut suprâ iterùm dictum fuit, formæ animatæ sublimitas, ut quia varias operationes in corpore uno exercet, varia etiam earum instrumenta, varijs & discrepantibus qualitatibus cussa & formata postulet. Et cur, quæso, anima hominis, vel equi non tam potest materiam primam sui corporis, tali qualitatibus varietate in membris suis respersam, immediatè respicere & informare, quàm formas illas organicas oculi, carnis, ossis &c. quibus alij animam proximè infigunt? Vel si negent (ut aliqui faciunt) formas suas organicas ab anima informari, sed animam solum ijs assidere, seu juxta ipsas eidem, proximè



proximè materiæ insidere; earum formarum superfluitas jam manifestior erit. Evellantur enim ipsæ, & relinquatur sola anima, materiæ primæ solis temperamentis & figuris accidentalibus distinctæ, unita; remanebit profectò corpus vivens, ad operationes suas vitales, sine formis illis substantialibus organicis, sufficienter instructum & expeditum.

Præterea hoc incommodi nascitur, si anima & formæ organicæ sibi in eadem proximè materia solum affideant; quòd unio inter ipsas tantum futura sit integralis, non essentialis, sive per modum actûs & potentiae. Vnde sequitur, hominem aut equum non esse ens unius naturæ. Componetur enim ex anima & formis heterogeneis organicis diversæ longè speciei, inter quas non potest unio per se integralis intercedere.

Denique, si oculus formâ unâ heterogeneâ indiget, ut à naso, vel ab aure distinguatur; non solum totus oculus, sed singulæ ejus tunicæ, cornea, uvea, aranea, retina, adhærens; singuli humores aqueus, crystallinus, vitreus, suas etiam formas heterogeneas habebunt; singuli quoque aurium flexus & diversæ per minutissimarum particularum configurationes. Atque ita innumerabili formarum substantialium multitudine naturam onerant, dum unicam cadaveris formam volunt evitare.

Duo tamen argumenta Medica sunt, quæ me olim primo occurfu ferè terruerunt; sed jam bene inspecta, intima eorum non respondent suæ fronti.

Primum est. In plantis & animalibus mortuis, ait Fernellius, remanent virtutes quædam ad variorum morborum medelam, in officinis pharmacopolarum notæ, quibus attrahuntur, aut expelluntur humores noxii, & varijs alterationibus corpus humanum imbuitur. Ergo aliquæ formæ substantiales, quæ quibusdam vivæ plantæ partibus inerant, in mortuis etiam superstites manent, à quibus illæ virtutes dimanant & conservantur.

Exemplis rem istam probat Fernellius. *Cortex mali citrij*, ait, *calet, quæcumque verò illo integuntur interanea, & velut viscera, non parùm frigent. Cassia fistula medulla lenit alvumque subducit, cortex*

Fernel. lib.  
I. c. 4. de  
abdit.

*menses potenter movet, adeoq; fetum etiam excludit. Et de animalibus.*

*Leporis pulmo, inquit, suspiriosos juvat, sanguis calculum committit, ossiculum quod in poplite posteriori est arenulas deturbat, coagulum appositione, conceptum retinet, pilus erumpentis sanguinis impetum sistit.*

Hoc præcipue argumento ad formas organicas admittendas, se convictum Clar. vir. Thomas Fienus Academiæ nostræ nuper Archiater, aliquando mihi est fassus.

Sed argumentum non tam validum est, ut rem tantam extorquere possit.

Nam virtus illa occulta, cujus effectus in herbis & animalibus mortuis deprehenditur, non in partibus organicis quæ antea vivebant, plerumque residet, sed in succis vel spiritibus inanimatis, qui intra poros & meatus corporum animatorum (veluti sanguis in venis, & spiritus vitalis aut animalis in arterijs vel nervis) continentur.

Illi ergo succi, vel spiritus formam eandem substantialem, virtutesq; ab ea dimanantes, post mortem plantæ vel animalis retinent; quia etiam cum illæ plantæ & animalia viverent, isti succi aut spiritus non erant partes eorū, sed corpora inanimata, intra venas animatorum abscondita. Vnde per chymicam destillationemeducta, vel ossibus animalium in pulverem comminutis, talis virtus perdurat. Evanescuntibus autem spiritibus, paulatim & ipsa virtus languescit; manifesto satis argumento, quod non à forma organica, sed à forma illorum spirituum evanescentium dependeat.

Si quando verò ipsi viventis organo talis virtus inhæreat, & absente tamen animâ, adhuc in cadavere perseveret; non est necesse, ut à forma aliqua substantiali organica ibi conservetur, sed vel immediate à causa prima tantum, vel à quadam primarum aut aliarum qualitatum temperie & crasi, quæ remanet in cadavere: quia ista temperies non ita ab animæ irradiatione dependet, quemadmodum sensus, & ejusmodi potentia, quæ non magis sine anima in corpore mortuo remanere possunt, quàm radius luminis in aëre sine sole.

Vnde



Vnde argumentum Zabarellæ etiam evanescit, quo ex odore, qui in flore vivo & mortuo idem manet, colligit aliquam formam substantialem, à qua odor ille pendeat, in mortuo residuam esse, quæ antea vivo inerat. Odor quippe est qualitas secunda, ex quadam primarum temperie emanans: temperiem verò istam non est necesse (totam saltem) cum anima floris interire. Veluti enim anima ipsa, & formæ inanimatorum non dependent in conservari ab aliqua causa secunda efficiente, sed à causa prima tantum; ita nihil obstat, quo minùs aliquæ qualitates sint similis indolis ac ingenij. Vt, inquam, ab anima vel immediatè, sed mediante aliarum qualitatum crasi emanent, & dependeant in fieri, ut Philosophi loquuntur, sed non in conservari. Nonne enim calor ab igne in aquam effunditur, & in eâ permanet, non conservante, imò extincto igne?

Alterum Medicorum argumentum est, non longè dissimile.

In stomacho sive ventriculo animalis, præter animam & calorem naturalem, oportet aliquam virtutem verrendi cibum ac potum in cremorem quendam, quem vocamus chylum; in jecore vim sanguinem, in corde spiritum vitalem, in cerebro spiritum animalè excudendi. Quod inde, inquiunt, patet: quia si cibus & potus non in stomachum, sed in aliud corporis conceptaculum (ut in alvum, aut uterum) conijcerentur, nullus inde chylus efficeretur, etiamsi nec anima, nec calor naturalis inde absint. Igitur à virtute chylica formæ organicæ stomachi chylus, à virtute sanguifica formæ jecoris sanguis, &c. proveniunt.

Definiendum est, ait Laurentius, *chylosin non tam caloris vi, quàm insita ventriculi proprietate fieri. Certum quidem est coctionem omnem caloris operâ & ministerio perfici: nam propterea ventriculum omni ex parte, & superiore & inferiore, & dextrâ & sinistrâ, & anteriore & posteriore, natura fovet; sed talis coctio calori non debetur ut calor est (ita enim igneus, & febrilis coqueret, qui omnia corrumpit) sed ut est animæ instrumentum: chylicatio verò à sola ventriculi forma & proprietate perficitur. Neque enim alibi uspiam, quàm in ventriculo chylicat calor, quantumvis validus.*

Andr. Laurent.  
rent. lib. 6.  
q. 19. Anatom.

Sed quid hòc argumento iterum efficitur? Hoc profectò

R 2 tantum

tantum: In ventriculo, præter animam & calorem naturalem, aliam peculiarem isti membro virtutem chylicandi inesse: an verò virtus ista à forma quadam organica ventriculi, an ab anima solum dependeat, alijs argumentis oportet investigare. Quòd enim magis ab animâ, quàm à formâ inanimâ organica emanet, ingens suspicio est; quia recedente animâ, etsi forma organica Medicorum in cadavere maneat, ventriculus tamen nihil chylicat.

Itaque respondemus quod in superiori argumento: Virtutem chylicandi ab anima dimanare, & ab ea sic suspendi, ut non tantum in fieri, sed etiam in conservari dependeat. Sic enim etiam dependent facultas attractiva & expulsiva alimenti, quæ sunt ministræ ejus. Vnde mirum non est, quòd recedente animâ, facultas chylicatrix, quemadmodum attractrix & expultrix, illicò evanescat. Potentiæ enim propriè vitales, quæ à natura solum destinantur ad operationem, quâ anima vegetatrix vitaliter vegetat & perficit suum corpus, dissipantur & evanescent cum anima. Non sic autem virtutes illæ herbarum, de quibus in priori argumento: quia non ad actionem vitalem, qua anima negotietur circa suum corpus, sed ad transeuntem in subiectum externum, à natura principaliter sunt destinatæ. Quod providentia planè divinâ sic factum: ut in herbis & animalibus etiam vita functis, morborum remedia Medici invenirent. Si enim cum animâ virtutes illæ effugerent, pharmaca inde coqui & confici non possent. Ad hoc quippe necesse est, per distillationes & præparationes, herbarum & animalium animas interfici.

Quare verò virtus chylicandi ab anima resultet, non alibi, sed in ventriculo; temperies, aut occulta alia dispositio ventriculi ad hoc determinat animam; sicut ob aliam dispositionem visus in oculo, auditus in ultimo aurium amfractu resultant. Addamus & tertium quorundam Medicorum argumentum.

Quando transfixo corde, aut jugulo, anima hominis subito avolat, temperies nulla nova, inquirunt, pro forma cadaveris introducitur: ergo in tali saltem morte, materia corporis cum veteribus suis formis organicis sola manet, sine novæ formæ introductione.

Sed



Sed nego, nullam etiam tunc in membris alterationem fieri, per quam abruptitur vinculum illud, quo (eleganti Platonis verbo) anima corpori  $\pi\pi\sigma\pi\epsilon\sigma\alpha\tau\alpha\iota$  adfibulatur, & materia utcumque saltem & imperfectè semper novæ formæ præparetur.

Dicat ipse formarum organicarum princeps architectus Fernelius: *Repentè ac recens extincto iugulatove animali, ait, partes similes suam singula aliquamdiu retinent temperaturam: in istis tamen partibus neque insitus calor, neque spiritus inest.* Fernel. lib. I. c. 4. de abdit.

Igitur licet temperamentum illud ex mixtura elementorum resultans (ex quo color, mollities, durities, & id genus qualitates secundæ in corpus emanant) idem aliquamdiu in mortuo, quod fuit in vivo, perseveret; attamen calor vitalis & propria animalis temperies, quæ à spiritu vitali & irradiatione cordis fovetur & pendet, frigore contrario (quod frigidi humores, aër internus externusque, aut aliæ causæ frigorificæ subito, nullâ jam animâ impediente effundunt) extinguuntur.

Si verò materia nondum ad novæ formæ introductionem sufficienter sit præparata, anima in veteri suo vinculo tantisper hæsitat. Hoc enim in Schola Aristotelis & S. Thomæ semper fixum manet: Corruptionem unius esse generationem alterius, nec formam veterem unquam sic migrare, ut domicilium omni successore vacuum relinquat.

Vallesius denique Historiam sacram Medicinæ suæ permiscens: *Secutus, ait, quod & rationi magis consonum, & divinis etiam oraculis, ut ego existimo, congruentius est, affirmo esse in nobis ante animam, formas merè corporales heterogeneorum, quibus ossa, carnes, & nervi inter se differunt, non minus profecto (nisi me meis sensibus credere nolunt) quam aurum, argentum, & plumbum. His bene temperatis accedere actum quendam perfectiorem: corporalem cum quoque, & velut naturam quandam meliorem (ita enim placet vocare, potius quam animam) qua nutriuntur. Omnesque hos actus educi ex potentia materia. His potremò accedere extrinsecus animam, quæ nobis vim sentiendi & intelligendi præstet. Non enim intelligendum est, illud corpus hominis, in quod inspiravit Deus spiraculum vitæ, Gea.* Valles. c. 4. Philof. sacra.

fuisse statvam quandam luteam, camq; accessione illius spiritus, factam esse carneam & osseam, sed corpus quoddam ex ossibus, nervis, carne, & cute, non quidem aridis, sed floridis ac viventibus; immobile tamen adhuc & sensus expers: & hac, accedente spiritu, recepisse. Quæ verba omnia, propter sententiæ & imaginationis amœnitatem, rescribere volui.

Igitur Vallesij sententiâ est: super formas carnis, ossis &c. heterogeneous animam vegetativam corporalem & mortalem induci, quæ membra vegetet, & flore quodam induat. Postremò spiritum, sive animam rationalem à Deo inspirari, quæ motum, sensum, & intellectum corpori præstet. Et hunc ordinem, in prima etiam lutei Adami formatione, à Deo fuisse observatum.

Sed qui præcedentibus Articulis tradita receperit, hoc non credet. Nam præter formas organicas, duas insuper animas, vegetativam & rationalem, corpori nostro Vallesius infercit. Nec Deus, ut opinor, luteo homini prius formas organicas & animam vegetantem impressit, quàm animam rationalem inspiravit; sed crudum lutum in organorum omnium temperies subito decoxit figuravitque, ac eodem temporis momento, spiritum, qui & esse carnis, & esse vegetativum, sensitivum, rationale (miro naturæ compendio) luto suo tribueret, inspiravit. Quid enim est esse carnem? Nihil aliud profectò, quàm esse partem integram corporis animari, ex animâ & materiâ primâ, illis accidentibus subactâ quæ ad temperamentum carnis requiruntur, compositam. Non quòd accidentalis ista temperies conceptum principalem & essentialem carnis ingrediatur (sic enim caro non esset ens unius naturæ) sed secundariò à voce, *caro*, connotatur.



## ARTICVLVS VIII.

*Nec argumenta Theologica satis fortiter formas organicas  
asserunt.*

**Q**uidam Theologi, præsertim recentiores, pugnam tandem istam ad Triarios, & fortissima, ut putant, argumenta ex armamento suæ Theologiæ, deducunt. Quæ enim circa mysteria Incarnationis & Eucharistiæ, aut venerationem sacrarum Reliquiarum disputantur, non satis, sine formis organicis, expediri possunt, ut ipsis videtur.

Primò enim, corpus Christi quod jacuit mortuum in sepulchro non foret idem cum corpore Christi vivo; quod tamen affirmant SS. Patres. Nam S. Athanasius Epist. ad Epictetum ait, Idem corpus pependisse in cruce, jacuisse in sepulchro, & resurrexisse.

Sed telum istud non valde ferit, sed in æquivoco tantum ludit. Nam SS. Patres corpus accipiunt vulgariter, ut vulgus & homines passim solent; pro altera videlicet parte hominis, visibili & palpabili, corporeæ quantitati & qualitatibus sensibilibus subjecta: quomodo vulgò dicimus hominem compositum esse ex anima & corpore.

An verò in illud Christi corpus, animâ viduatum, alia forma substantialis, ut cadaveris, aut quæcumque alia successerit; an verò solum tanquam vacuum omni inquilino habitaculum, manserit,

*Theologi certant, & adhuc sub iudice lis est.*

Vnde Gabriel. *Corpus Christi iacens in sepulchro, ait, fuit materia prima Christi sine formâ substantiali, qualificata formis accidentalibus, & unita verbo. Nec enim impossibile est, materiam stare nudam absque formâ substantiali.*

Gabriel. in  
2. d. 16. q. 1.

Alij ergo qui litigant, & sudant, quomodo corpus vivum & mortuum idem sit, in æquivoco laborant. Corpus enim accipiunt pro corpore aliquo completo ex materia & forma, sub corpore quod est genus corporis animati & inanimati, in serie

serie prædicamenti substantiæ : SS. Patres autem, ut ante dixi, pro corpore ; quod est altera pars physica corporis animati ; ratione cuius integrum corpus animatum etiam corpus vocatur. Nam gratiâ materiæ suæ, non gratiâ animæ, est corporeæ quantitatis subiectum.

Carnem quoque pro composito physico accipit Aristoteles, quando tam sæpe repetit, Carnem vivam & mortuam non magis esse univocè carnem, quàm integrum hominem vivum & mortuum esse univocè hominem. Quam tamen Aristotelis sententiam tam procul Agidius Coninck reijcit, ut dicere audeat, *Ex principijs fidei evidenter sequi contrarium. Nam nisi caro Christi, ait, viva & mortua dicatur univocè caro Christi, nullo modo dici poterit eadem caro sumpta ex Virgine, posita in sepulchro, & elevata in calum : quod tamen nemo Catholicus auderet negare. Quare si Aristoteles contrarium dicat, per fidem corrigendus est.*

Sed nullâ opus correctione. Aliàs etiam S. Thomas, qui tam frequenter illud Aristotelis etiam usurpat, corrigendus esset.

Quando igitur viva & mortua caro, eadem univocè caro dicitur, non pro toto composito physico, sed pro altera parte compositi, sive pro materiâ carneâ, temperamento & qualitatibus carnis adhuc utcumque imbutâ, accipitur. Nam hoc modo est eadem caro, sicuti totum corpus, primò sub anima corporis sui vivit, deinde sub formâ cadaveris, mortua jacet in sepulchro.

Nec enim, ut sic eadem maneat, fingere oportet miraculum illud Gabrielis, ut jaceat spoliata omni forma substantiali.

Itaque cum Peripatetica & S. Thomæ Philosophia audacter sustineamus, formam cadaveris, recedente animâ Christi, in materia corporis successisse. Quod fieri debuit, ut veritas corporis viventis demonstraretur, ait Medina, & ostenderetur corpus Christi emortuum esse eiusdem rationis cum nostris, quando morti traduntur. Corpora autem nostra emortua, sine dubio, habent formam cadaveris substantialem.

Mansit tamen idem corpus Christi, quod fuit vivum sub anima Christi, & sub alienâ, non Christi sed cadaveris formâ, fuit

S. Tho. 3. p.  
q. 50. a. 5.



fuit mortuum. Addit etiam S. Thomas, corpus Christi specialius quàm ceterorum hominum, fuisse idem, quoad integram nempe Verbi divini supposititalitatem, qua materia illa in sepulchro jacens suppositabatur, non secus ac integra viventis Christi natura.

Utrum verò deinde Verbum formam illam cadaveris immediate assumpsit, sus deque disputant Scholastici.

Franc. Suarez affirmat: quia etsi in resurrectione Verbum illam formam dimiserit, nihil tamen in hoc Theologorum axioma, *Quod Verbum semel assumpsit, nunquam dimisit*, committitur. Nam in via tantum & obiter, non per se, & ex primaria intentione illam formam cadaveris assumpsit, ait Suarez.

Axioma verò illud, de eo intelligi debet, quod primariò & per se assumptum fuit; qualis est tota humanitas, & integræ partes essentielles ejus. Deinde de illo, quod dimissum à Verbo, in rerum ratione manet. Res enim quæ per corruptionem sui, corpore Christi excidit, potiùs deserit unionem Verbi, quàm Verbum ipsam deferat. Sic particulas materiæ, quæ per resolutionem & corruptionem, corpore Christi defluebant, propriè Verbum non deferabat, sed ipsæ quasi ultrò se subducebant. Quomodo etiam forma cadaveris per Christi resurrectionem evanescens, ultrò unionem ad Verbum deseruit.

Alijs tamen (nec fortassis immeritò) talis formæ cadaveris assumptio, tanquam actus otiosus, displicebit. Quænam enim utilitas ejus? Quid verò incommodi, si in Christo mortuo solâ materiâ à Verbo assumptâ, forma cadaveris in propria sua partiali subsistentia (si quam tamen subsistentiam talem habeat; de hoc enim ambigunt Philosophi) permanferit? Nunquid enim corpori Christi multæ substantiæ permisceri potuerunt, quæ proprias subsistentias retinebant; ut fortè spiritus vitales & animales, qui per arterias & nervos discurrunt: certius autem, phlegmata, sudores, & tot alia recrementa, quæ per omnes humani corporis vias fluunt? Solum enim huic Incarnationis mysterio sufficit, ut illa natura, quæ Verbi divini subsistentiâ proximè terminatur, careat propriâ.

Secundò, corpus Christi, inquit, in quod ex vi verborum, panis in Eucharistiæ confectiōe transmutatur, aliud esse non potest, quàm corpus ex materia prima & formis organicis constitutum; quod in mortuo & vivente Christo debuit prorsus esse idem. Vnde si in triduo mortis facta fuisset consecratio, in idem omnino corpus, inquit, panis conversus fuisset, in quod Christus converterat ultimâ coenâ, & quod olim ex Virgine fuerat conceptum. *Omnes enim Patres*, ait Ægidius Coninck, *communi consensu docent, idem corpus eandemq; carnem natam ex Virgine, datam discipulis in cœna, iacuisse in sepulchro, & assumptam in calum.* Non esset autem eadem caro mortua & viva; si viva per animam, mortua per formam cadaveris constitueretur.

Ægid. Coninck 3. p. 76. a. 2.

Sed hæc SS. Patrum assertio evertit fundamentum & finem, propter quem Leon. Lessius, Io. Prepositus, Ægidius Coninck (tres præcipui inter Theologos, formarum organicarum fabricatores) formas illas confinxerunt. Finis enim eorum fuit, ut idem prorsus physicè ac realiter esset corpus Christi vivum & mortuum. Cujus tamen contrarium potiùs verba illa Patrum indicant. Nam *caro nata ex Virgine*, vel tota, vel maximâ ex parte, post triginta tres annos, cum suis primis formulis organicis defluerat, ut in alijs hominibus fieri solet. Vnde illa caro data discipulis, suspensa in patibulo, & posita in sepulchro, ex alimento corporis Christi per tot annos concreverat, & morali solum imaginatione, non physicâ identitate, eadem erat cum illa quæ olim apiculæ unius magnitudine, ut Medici dicunt, in utero Virginis concepta, & incremento Virginei sanguinis aucta, prodierat in lucem. Non ergo idem omnino realiter & mathematicè, quoad materiam & organorum formulas, corpus Christi jacuit priùs in utero, & postea in sepulchro. Nec SS. Patres in talibus locutionibus illum identitatis rigorem intendunt, quem formarum organicarum fabricatores ipsis affingunt.

Nihilominus per ista sacrosancta verba, *Hoc est corpus meum*, panem convertit in corpus suum adultum, & tantum quantum tunc gerebat, unius & idem illud (nisi quantulum spatii noctis & dici,



& diei novæ materiæ per nutritionem accessu, & veteris per corruptionem decessu variatum fuit ) quod paulò pòst jacuit in sepulchro. Corpus verò istud fuit altera compositi physici pars, organis humani corporis, non per formas substantiales organicas, sed per temperamenta & figuras accidentales instructa & distincta. Erat enim corpus humanum, ait rectè Sotus, quod dicitur compagem ex ossibus, & nervis, & carne, & diversis organis, hoc est diversarum complexionum & qualitatum. Sot. in 4.  
d. 10. q. 1. a. 2.

Accipitur verò hîc corpus, inquit, pro altera parte compositi, ut distinguitur ab anima; quam ideo non includit in recto, ut supponat pro aggregato ex corpore & anima. Et ejus rei rationem concinnam reddit: quia Christus Dominus dedit nobis corpus suum & carnem in cibum ad manducandum: corpora autem animalium, dum nobis in cibum veniunt, occisa sunt, atque adeo animam non includunt.

Vnde iterum: Ex vi consecrationis manet hîc corpus Christi, quod supponit pro altera parte compositi, connotando illam formam, à qua recipit esse corporeum, quæ est anima rationalis.

Sed quomodo igitur fuit idem in sepulchro, cùm ibi habuerit esse corporeum à forma cadaveris? Quare enim non sequitur, ait Sotus: Erat corpus ab alia forma; ergo non erat idem?

Respondet: Hoc esset verum, si forma esset pars intrinseca corporis, sicut anima est pars hominis. Et tamen non est nisi extrinseca, sicut albedo albi.

Itaque sententia Soti non videtur ab opinione Gabrielis, Marsilij, & Nominalium, nisi in eo differre, quòd isti velint corpus Christi mortuum caruisse omni forma substantiali; Sotus verò det ei formam cadaveris, à qua in esse suo corporeo dependebat; licet ipsa intrinsecam ejus compositionem non intraverit.

Si autem corpus, non pro altera parte compositi, sed pro toto composito ex materia & forma accipiatur, sine dubio, corpus Christi in triduo mortis non fuit idem cum eo, quod in cena ultima Christus habuit; cùm gradus etiam infimus formæ corporeitatis, quem anima rationalis materiæ Christi viventis tribuebat, differat realiter à gradu simili corporeitatis, quem in morte habuit à forma cadaveris; quemad-

modum gradus vegetativus, quem eadem anima rationalis dat homini, longè diversus est à gradu vegetativo, quem anima plantæ tribuit arbori.

Vnde corpus ex materia & forma intrinsecè compositum; quod in sepulchro jacuit, non fuit propriè corpus Christi, nisi secundum quid. Christus enim in essentia sua physica non includit illud esse corporeum, quod forma cadaveris composito ex materia Christi & forma cadaveris dedit.

Et hinc ulterius pronomen, *Hoc*, à Christo vivente & ab alio sacerdote in triduo mortis pronunciatum, aliud corpus designat, & sumitur æquivocè. Ut jam appareat, quanto convenientius vox, *Corpus*, in forma consecrationis, pro altera tantum parte physica in recto accipiat, ut dicunt Nominales, & Sotus; qui etiam D. Thomam huc trahit. Sic enim, sive corpus illud animæ rationali, sive formæ cadaveris substratum fuerit, semper est idem corpus.

Ex superiori igitur ratiocinatione constat, quàm necesse non sit, propter Eucharistiæ mysterium formas organicas fabricare, & Aristotelem panem convitijs inceslere, cum ait: *recedente animâ animal desinere, nec ullum membrum, nisi ratione figura, idem relinqui; modo eorum, quæ fabula transisse in lapidem narrant.* Alludens, credo, ad metamorphosin Niobes in saxum, De qua Poëta:

Arist. lib. I.  
c. I. de partib.  
Ovid. 6.  
Met.

*In vultu color est sine sanguine, lumina mæstis  
Stant immota genis, nihil est in imagine vivum.  
Ipsa quoque interius cum duro lingua palato  
Congelat, & vena desistunt posse moveri.*

S. Aug. lib.  
de fide &  
Symb. c. 1.

Nec solum cum Aristotelis & S. Thomæ, sed etiam S. Augustini Philosophiâ pugnant illi novorum organorum fabri. Alia testimonia non congero: *Homo*, inquit S. Augustinus, *exceptâ formâ (exteriori, quæ oculis patet) membrorum, quæ diversis generibus animantium diversa tributa est, non distat à pecore, nisi rationali spiritu, qui mens etiam nominatur.* Quod falsum est, si præter spiritum rationalem, homo tantâ præterea formarum substantialium supellectile instruitur, quibus distat à pecore. Nec de alia forma membrorum, nisi exteriori & visibi-



& visibili alibi loquitur, quando de Lazari suscitatione ait: *Resuscitavit putentem, sed tamen in cadavere putente adhuc erat forma membrorum: ille in novissimo die ad unam vocem, cineres est restitutus in carnem.* Tract. 491 in Ioan.

Ultimum tandem telum, de Reliquiis Sanctorum in nos torquet Dandinus. *Reliquias Sanctorum*, ait, propterea summa veneratione colimus; quod corpora sint, aut corporum partes Sanctorum virorum. Oportet autem aliquam in illis, præter materiam, inesse substantia formam, quâ idem numero corpus, eademq; pars esse dicatur. Dand. lib. 2. digress. 8. p. 3. de anima.

Mirum profectò hoc telum in manus resumì, quod olim à Gregorio Arim. tam egregiè exarmatum fuit.

In corporibus Sanctorum, inquit, nova substantiales formæ introductæ sunt; quod neminem puto debere negare. Alioqui pulveres & cineres, in quos resoluta sunt multorum corpora Sanctorum quos veneramur, fuissent partes essentielles ipsorum Sanctorum dum viverent: quod absurdum & manifestè falsum est. Et ideo quilibet habet concedere, quòd tales Reliquias veneremur, non quia fuerint ipsa partes Sanctorum, sed quia pars earum fuit pars Sanctorum. Illam autem dico solam materiam. Greg. in 28 d. 16. q. 2.

Nam corpora ignibus, more Romano, concremata, & in favillas ac cineres, cum omnibus suis (si quas habuissent) formis organicis dissipata, venerationem tamen non amittunt.

Post longum igitur discursum, gradum hîc sisto, & aio, Lessium nimis confidenter opinionem, de formis organicis partium heterogenearum, vocasse verissimam, & corpore Christi longè digniorem, quàm alteram qua formam cadaveris introducit. Leon. Less. 3. p. q. 76. a. 2.

Quid enim in ista forma cadaveris homines imaginantur? Non enim gravius, quàm formæ organicæ, oler. Et licet corpora animalium putrescere sinat, tantundem formæ organicæ faciunt. Imò Suarez (quod tamen suprâ Artic. VI. non probavimus) asserit formam humani cadaveris tam nobilem esse, & animæ rationali affinem, ut requirat aliquam organizationem propriam & accommodatam corpori humano. Suar. 3. p. q. 76. a. 2. disp. 51. sect. 4.

Addit quoque Lessius, Medicis hac in re esse maximè credendum.

Ego verò puto, Aristoteli & Philosophis magis. Nam Medicis sufficit demonstratione *Quia est*, ex effectibus colligere talem herbis, aut animalibus proprietatem inesse, ex qua possint corporibus nostris medelam sperare, aut timere perniciem: ceterum qualis sit in fundo suo illa proprietas, substantiane, accidentis, & de quo prædicamento, Philosophorum est hoc inquirere, & litigare.

Denique, si tantæ apud nos fidei Fernelius, & aliquot alij recentiores Medici esse debent, oportebit quoque ejusdem fidei simplicitate, non tantum formas organicas animalibus & plantis, sed etiam quatuor elementorum substantiales formas omnibus corporibus mixtis inculcare; quia Medicorum pluri mi hoc etiam faciunt.

## ARTICVLVS IX.

*An anima sit in omnibus partibus sui corporis.*

**R** Aptim hoc expedio, & aio animam in toto corpore suo, non autem tantum in aliqua ejus parte habitare. Nam etsi multi olim Philosophi ac Medici videantur eam vel in cerebro, vel in corde tantum posuisse; & ipsam Regi Persarum aut Assyriorum (qui pedem domo nunquam efficientes, regnum suum per Satrapas emissarios administrant) comparasse; de principali tamen animæ sede, quam vel τὸ ἡγεμονικόν, vel τὸ κύριον appellabant, loquebantur. Quemadmodum Aristoteles etiam τὸ κύριον principale, & quasi sedem regiam animæ vegetativæ, dicit esse in corde, τὸ κύριον verò animæ sensitivæ, in cerebro. Ex corde quippe per articularum tubulos, spiritus vitales, animæ vegetativæ ad nutritionem adiutores; ex cerebro spiritus animales, motus & tensionis opifices, per nervorum traduces, ad corporis remotas partes perveniunt. Etsi interim in partibus illis remotis insit anima saltem vegetativa, quæ omnes illas partes nutrit. Si autem vegetativa, ergo & sensitiva, & rationalis; quia tres illi gradus in anima humana sola ratione sunt distincti.

*Quid enim est in intestinis corporis, ubi non est ipsa?* ait S. Augustinus

Aristot. lib.  
de juvent.  
c. 3



gustinus. Et tamen etiam quaque interna atque vitalia oculis corporis inquisivit, & quidquid ex eis discere potuit, per oculos corporis didicit. Et certè ibi erat etiam quando illa nesciebat. Et cum viscera intrinsecus nostra non possint sine anima vivere, facilius ea potuit anima vivificare, quàm nosse.

S. August.  
lib. 4. c. 5.  
de orig.  
animæ.

Falluntur igitur Pythagoras, Plato, & Galenus, qui tres animas, in homine specie distinctas, non quidem in eadem qualibet parte, supra se per modum actûs & potentiæ congestas, ut Philoponus Articulo III. confutatus censuit; sed per diversas sedes & membra digestas; ut anima rationalis in cerebro, irascibilis in corde, concupiscibilis in jecore delitescat. Vnde eleganter Plato dicere solitus est, animam immortalem à mortali, colli Isthmo separatam esse. Tanquam si Peloponesus esset caput hominis, in quo aiebat animam rationalem habitare, & Isthmus Corinthiacus collum, sejungens caput à pectore; sicut Peninsula illa, Isthmi interjectu removetur à Græciæ continente. Et hujus veritatis tam certum se putat Galenus, ut scientificas clamet se demonstrationes habere.

Plat. in  
Timæo

Non credo tamen Galene. Profer illas, & conabimur pseudographas ostendere. Certè enim triplicem illam Platonis animam, sedibus & habitaculis distinctam Aristoteles olim egregie confutavit.

Galen. lib. 7.  
c. ult. de  
placit.

Nam in animalibus insectis, ait, animæ plures non sunt sedibus distinctæ; sed eadem specie anima sensitiva est in toto corpore. Pars enim corporis à reliquis decisa, sensum & motum habet, ut ex Aristotele & S. Augustino, supra, Cap. IV. Art. II. demonstratum fuit. Non ergo in una parte est anima irascibilis, aut concupiscibilis tantum sine sensitiva, quæ motum illum & sensum debet efficere. Si autem in illis animalibus insectis animæ tres non sunt sedibus distinctæ; non est ratio, cur in ceteris oporteat fingere.

Arist. lib. 7.  
c. ult. de  
anima.

Deinde ex triplici anima specie distincta, quarum una tantum rationalis, altera tantum irascibilis, tertia tantum concupiscibilis est, non potest, ait Aristoteles, forma unius naturæ integraliter coalescere. Unio quippe integralis per se, flagitat extrema solo numero diversa.

Ejus

Plat. in  
Theat.

Erit ergo homo quasi Centaurus, ex anima equi & hominis, malè & per accidens inter se hærentibus, compactus. Quod profectò etiam Plato est confessus, cum dicere est solitus, tres illas animas, non sicut Vlysses & turba Græcorum in equo Trojano, sine ordine & inconditè; sed harmonicâ quadam conspiratione inter se devinctas esse, ut milites in acie. Certè enim milites in aciem unam compositi, ordine tantum, non unione per se integri unum sunt.

S. August.  
lib. 10. c. 13. de  
Gen. nesc.

Videtur autem Plato in illam de animarum in homine uno multitudinem, eodem quo Manichæi argumento inductus esse. Cum enim Manichæi viderent, ait S. Augustinus, non posse carnem sine anima concupiscere, aliam quandam animâ suam, ex alia natura Deo contraria, carnem habere putaverunt, unde concupiscat adversus spiritum.

Tertull. lib.  
de anima  
c. 14.

Sed propter istam, inter spiritum & carnem pugnam, non est necesse animam in partes concidere. Nam eadem anima diversis affectibus à seipsa discordare potest: sicut per sensuaria (sensuum organa) varijs modis emicat, ait Tertullianus, non tam concisa, quàm dispensata.

S. August.  
lib. 6. contra  
Iul.  
c. 14.

Eadem quippe anima est, quæ secundum spiritum, & secundum carnem concupiscit. Motibus enim suis anima quos habet secundum spiritum, adversatur alijs motibus suis, quos habet secundum carnem; & ideo dicitur spiritus concupiscere adversus carnem.

Rom. 7.

Eadem quoque anima ad hominem interiorem, & exteriori pertinet. Ad interiorem quatenus rationalis; ad exteriori, quatenus sensitiva. Cum enim secundum spiritum concupiscit, Condelectatur legi Dei secundum interiorem hominem; cum secundum carnem, Videt aliam legem in membris suis, repugnantem legi mentis sue.

Gabr. in 2.  
c. 16. q. 1.

Duo autem isti hominis interioris & exterioris affectus non ita contrarij sunt, ut in eadem anima se compati nequeant. Vnde nec ideo duæ animæ in diversis corporis sedibus cum Platone, aut in ijsdem omnibus membris, cum Manichæis, Philopono, & Occamo, fingendæ sunt. Aliàs enim in eodem cane, aut felle animam sensitivam geminam compingere oportet, ut adversus Occamum suum rectè perpendit Gabriel. Nam gustus appetit, & tactus refugit idem, ait, ut patet in cæcis, cum offertur



*offertur cibus conveniens, sed nimis calidus.*

Igitur non tantum spiritus & caro, five voluntas & concupiscentia, possunt in idem objectum partim inclinari, & partim ab eo refugere; sed etiam unus idemque bruti appetitus eundem cibum ut gustui blandum appetit, ut tactui inimicum fugit.

Nec refert, quod concupiscentia, qua concupiscit spiritus, sit actus liber, concupiscentia vero carnis sit actus necessarius. Nam etiam secundum eundem & supremum mentis suae apicem, anima per intellectum necessariò, per voluntatem liberè operatur. Imò ab eadem voluntate actus quidam primò primi necessariò emicant, & actus deliberati liberè effunduntur.

## ARTICVLVS X.

*An anima per partes sui homogeneas, an heterogeneas, omnia membra corporis sui informet.*

*Paul. Venetus, Augustinus Nyphus, Suarez, Hurtadus reiecti.*

**P**ostquam animam unam eandemque per totum corpus diffusam, & materiam primam omnium membrorum immediatè, sine formis inanimis organorum, informare diximus; hæc denique quæstio restat: An ipsiusmet animæ partes, homogeneæ, seu ejusdem planè rationis & perfectionis sint, an heterogeneæ, & difformitati membrorum sui corporis se conformantes & accommodantes.

Quæstio in anima rationali, quæ partibus integrantibus caret, & per ejusdem indivisibilis substantiæ replicationem, totum corpus suum implet, locum non habet. Quauquã de unionè ejus ad corpus, quæri etiam possit, An uniformiter, aut cum quadam partium suarum difformitate, per omnia membra diffusa sit. Antea enim eam esse integraliter divisibilem probavimus.

Paulus Venerus & Augustinus Nyphus olim, Suarez & Hurtadus nuper, animas brutorum & plantarum partibus heterogeneis

terogeneis veluti confutas esse volunt: aiuntque animam leonis in capite leonini corporis veluti caput etiam suum, in pede aut cauda, pedem aut caudam habere. Dicunt enim partem animæ quæ informat materiam capitis, naturâ suâ solummodò aptam esse ad informationem talis partis, ineptam verò quæ pedis vel caudæ materiam informet. Quam opinionem Hurtadus *apud recentiores esse communem* dicit. Sed fallitur, & fallit.

Rem istam unico ferè argumento conficiunt: Quia pars animæ quæ informat bruti caput, postulat determinatè capitis, non alterius membri dispositiones: igitur alterius rationis, aut entitativæ perfectionis est ab altera animæ parte, quæ pedis, caudæ, cordis, jecoris &c. dispositiones flagitat.

Vnde in istorum Philosophorum Schola, si quis cani aures præscindat, non tantum corpus caninum, sed etiam animam mutilabit, partemque talem revellet, cui in toto corpore nulla amplius similis erit.

Contraria sententia est veterum Thomistarum, Scotistarum, Nominalium, & plurimorum recentiorum, eorum præsertim, qui in intensione qualitatum, gradus Hurtadi & Suarezij heterogeneos rejiciunt.

D. Th. lib. 2  
c. 64. con-  
tra Gent.

Et certè D. Thomas negat animam esse *rationem harmonicam compositionis*: quia cum in diversis partibus corporis, inquit, sint *diversæ rationes seu proportionēs compositionis*, singula partes corporis haberent singulas animas. Aliam enim animam haberet os, & caro, & nervus; cum sint secundum diversam proportionem composita: quod patet esse falsum.

Quod argumentum supponit, falsum & absurdum esse, singulis membris corporis inesse singulas animas, non solum totales, sed etiam diversas partes unius heterogeneas, secundum harmonicam proportionem temperiei qualitatum primarum uniuscujusque partis corporis.

Deinde D. Thomas & D. Augustinus, qui animas omnium animalium perfectorum statuunt integraliter indivisibiles, ut superius ostendimus, non possunt existimasse animam leonis, aut canis secundum partes heterogeneas aut homogeneas,

per



per membra corporum diffundi.

Quænam verò Aristotelis de partibus istis heterogeneis mens etiam fuerit, patet ex refutatione trium animarum Platonis, quarum unam in cerebro, alteram in corde, tertiam in jecore nidulari & habitare dicebat.

Refellit enim, quia si hoc verum est, homo ens unius naturæ futurus non esset, ut Artic. superiori narratum fuit. Arist. lib. 1.  
c. ult. de  
anima,

Simile enim argumentum adversus Venetum, Nyphum, & ceteros quibuscum disputamus, pugnat.

Si namque anima leonis ex partibus heterogeneis, quarum una cerebrum, altera cor, aut jecur informat confuta est, non est magis ens unius naturæ, quàm mendici pallium, quod ex nigro, viridi, rubro, & tot alijs scrutorum particulis confarctinatum est. Adeoque homo, licet corpore uno continuo constet, re verâ tamen, quantum ad animam, erit instar Centauri, aut Tragelaphi, qui ex animabus specie physicâ discordantibus, & ideo integraliter per se non cohererentibus, compositi sunt. Hinc enim Philosophi Tragelaphum, perinde ac Chimæram, pro exemplo entis rationis usurpare solent. Nam re verissimâ, ens rationis est, si unionem per se integram inter hirci & cervi animas (quas Tragelaphus nomine suo comprehendit) ratio fingat. Talis enim unio integralis impossibilis est.

Pars autem heterogenea animæ leonis, quæ cerebrum informaret, specie quoque & perfectione essentiali diffideret à parte ejusdem animæ quæ cor aut jecur inhabitat. Ergo nec istæ etiam possunt integraliter unum constituere.

Quod evidentius est in opinione Hurtadi, qui partem animæ leonis quæ est in osse, negat esse sensitivam, sed vegetativam tantum, quia os sensu caret. Quomodo igitur unione integrali cum anima carnis, quæ simul vegetativa & sensitiva est, coalescet? Suarez verò contendit, animam carnis & ossis, aut cerebri & cordis, etsi heterogeneæ sint, unius tamen speciei esse; veluti, ait, *declarari potest exemplo duarum visionum sensibilium Petri & Pauli; quæ licet solo numero distinguantur, nihilominus ita comparantur, ut una representet Petrum, & non possit* Hurtad.  
disp. 2. sect.  
5. de anim.,  
  
Suar. lib. 1.  
c. 2. de  
anima.

*repræsentare Paulum, & alia è converso. Ob quas habitudines dici possunt habere entitates dissimilares, licet ejusdem speciei sint.*

Verùm licet duæ visiones, quarum una candorem Petri, altera candorem Pauli pro objecto habet, non discrepent specie physicâ, quia sunt equalis perfectionis essentialis; specie tamen logica ( ut jam loquuntur Philosophi Lovanienses ) differunt, propter habitudines essentielles ad duo objecta numero distincta. Tales enim duæ visiones essentialiter magis inter se distant, quàm duæ ejusdem objecti; quæ tamen numero differunt. Si autem illæ magis quàm numero differant; ergo specie. Nam post distinctionem numericam, quæ minima est, proximè sequitur specifica.

Verùm, etsi res solâ specie logicâ distinctæ ( ut duæ substantiæ partiales, aut præsentie locales capitis & colli in eodem corpore humano ) per se integraliter fortasse uniri possint; non tamen res specie physicâ differentes, inter quas est tanta & tam notabilis perfectionum essentialium inæqualitas, quantum inter animam cerebri, & cordis esse intelligimus; si una tantum flagitat naturâ suâ temperiem conformationemque cerebri, altera temperiem & conformationem tantum cordis.

Si enim res tam distantes, integraliter concreescere in unum per se valeant, nihil est causæ, cur formæ lapidum, lignorum, & calcis in unum ædificium colligatæ, in ens unius naturæ coalescere non possint.

Itaque dicendum est, partes animæ leonis, ac cujuscunque animalis & plantæ, esse homogeneas, & ejusdem planè speciei ultimæ, non secus, ac partes formæ aquæ, aut lapidis.

Frustrâ enim tot diversæ specie animæ partiales, & sine ratione, imò contra rationem, multiplicantur.

Si enim anima rationalis, sine ullis partibus integralibus, eadem tota & indivisibilis cerebrum, cor, hepar, carnes, & ossa informare, & omnibus illis esse cerebri, esse cordis &c. conferre potest; nulla est ratio, quare una anima leonis, aut anima arboris, divisibilis quidem integraliter, sed sub homogenea & uniformi partium suarum multitudine, heterogenea & difformia corporis sui membra informare non valeat.

Essentia



Essentia enim cujuscumque animæ, ut ex definitione pater, corpus organicū flagitat; ac proinde licet in se uniformis, difformia tamen organa habitudine essentiali respicit. Vnde statim evanescit illud Hurtadi:

*Si forma equi esset omnino per omnia membra similis, inquit, sicut forma ignis, haberet corpus similibus accidentibus aptum, ut forma ignis.*

Convertat enim Hurtadus argumentum suum contra animam rationalem, & illicò videbit, quàm imbecille sit. Nam licet anima rationalis, non tantum sibi similis, sed una eademque indivisibilis per omnia membra hominis sparsa sit; non ideo tamen similia & ejusdem temperamenti accidentia in omnibus membris postulat: aliàs totum hominem carneum, aut totum osseum esse oporteret.

Veluti ergo anima rationalis ex vi essentialis suæ, varietatem organorum postulat; ad quæ per extensionem virtualem, sive per substantiæ suæ replicationem se extendit; ita forma equi per formalem partium homogenearum extensionem tantumdem valet.

Sed pergit Hurtadus: *Si nulli parti, inquit, in anima leonis, conveniat petere determinatè dispositiones capitis; nec etiam toti forma conveniet petere determinatè eas dispositiones. Nam tota forma nihil est formaliter, præter omnes suas partes unitas.*

Sed argumenti sophisma ex isto simili statim se prodit: Nulla pars cæli primi mobilis postulat esse determinatè in Oriente; ergo totum cælum id non postulat. Totum enim cælum postulare potest per partem aliquam hanc vel illam in confuso, spatium illud determinatum Orientis occupare, licet nulla determinatè pars id postulet.

Sic essentia animæ leonis postulat per aliquam confuse partem inesse capiti, licet nulla determinata pars hoc flagitet.

Et accipiamus unicam partem leonini corporis homogeneam, ut os cranij capitis, per quod anima non partibus heterogeneis, sed homogeneis extenditur. Hurtadum deinde interrogo: Quæ fieri possit, ut tota illa cranij anima partem aliquam in scincipite, & alteram in occipite cranij habere

postulet; cum nulla determinatè ejusdem animæ pars, potiùs incipit, quàm occipit informare petat? Solvat hunc nodum Hurtadus, & eodem ungue illum quem nectit solvemus.

Ad hoc autem penitus extricandum, perpendere oportet, In essentijs rerum, quarum singularia partibus integralibus constant, nullas determinatas partes integrales formaliter includi. Si enim in essentia lineæ, v. g. partes aliquæ integrales determinatè includerentur, vel singulares essent, vel universales. Non universales, quia unica est linea universalis, non plures. Non singulares, quia sic oporteret aliquas determinatè lineas partiales singulares omnibus inferioribus lineæ universalis inexistere; quod omnino falsum est.

Igitur essentia lineæ universalis solum postulat inexistere pluribus singularibus lineis, quarum unaquæque integraliter componatur ex pluribus partibus solo numero distinctis.

Sic ergo quoque, essentia animæ leonis in genere, non debet apprehendi ut composita ex partiali anima leonini capitis, & cordis &c. sed ut apta inexistere pluribus singularibus animabus leoninis, quarum unaquæque constet pluribus partibus integralibus ejusdem speciei, per quas totum corpus leoninum valeat implere; & per unam partem sui integram caput, per alteram cor &c. informare. Non quasi una determinata pars animæ sit essentialiter alligata capiti, altera cordi; sed quòd ista pars in capite potiùs sit, quàm in corde, hoc provenit ex determinatione causæ primæ, sive similis causæ, quæ determinat solem, ut in hac parte aëris hoc lumen, in ista istud, potiùs quàm aliud numero distinctum, efficiat.

Aliud tamen præterea, & vetustum contra nos argumentum est, quod contemni non debet.

Oculus bovis & leonis, inquebant quidam, differunt specie per diversas specie animas; ergo oculus & cor bovis, specie quoque per distinctas specie animas different. Nam oculus bovis & oculus leonis, temperie & ceteris accidentibus naturalibus similiores sunt, quàm oculus & cor ejusdem bovis.

Sed bellè & musicè respondit olim Trajectensis noster  
Marfi-



Marfil. in  
2. q. 11. 246.  
Marfil. Nam licet oculi diverforum specie animalium, inquit, habeant complexiones propinquas in calido & frigido, proportionales tamen eorum sunt omnino dissonantes. Sicut in Musica non concordat septima nota cum octava, etiamsi proxima sit; sed magis concordat octava cum prima. Septima enim destruit octavam; quam dulcius resonare facit prima, vel quinta ei conjuncta.

Igitur pari modo, licet temperiei & conformationis similitudine oculus bovis & oculus leonis sibi magis appropinquent, quam oculus & cor bovis; harmonicam tamen quadam proportionem, quam sub eadem anima devinciri & colligari possunt, oculus bovis & cor bovis magis inter se concordant. Eadem enim bovis anima oculum & cor bovinum in unum corpus confederata & devincta respicit, & informare potest; non oculos bovis & leonis, qui ad diversa corpora pertinent.

Illam verò inter oculum & cor bovis proportionem & concordiam Fernelius à spiritu naturali effici credit: qui cum  
Fernel. lib. 1.  
1. c. 4. de  
abdit.  
unus sit, ait, è simplici fonte scaturiens, non nisi unius simplicisque anima vehiculum & nexus esse potest. Et deinde: Vis illa naturalis, inquit, quæ canis ossi moderatrix præest, eadem non patet ossi asini regere; & canis tamen cartilaginem & carnem, perinde atque os moderatur. De hac ergo partium similitudine si rectè judicare voles, non est æstimandum substantia temperamentum, aut crassitudo, sed ipsius suæ quadam proprietas & is spiritus, qui accidenti formam illam certo modo præparat.

In eundem sensum interpretandus D. Thomas (quem  
S. Th. q. 1.  
a. 4. de spi-  
rit. creat.  
ad 14.  
Suarez & Hurtadus in suam sententiam frustra sollicitant) ubi ait: Caro mea cum carne tua magis convenit secundum rationem speciei (accidentariæ, & temperamenti carnis) quam caro mea cum osse meo. Sed secundum analogiam ad totum, est è converso. Nam caro mea & os meum possunt ordinari ad unum totum constituendum; non autem caro mea & caro tua.

Et inde probat, eandem numero animam rationalem posse carnem & ossa ejusdem corporis informare, etiamsi diversorum corporum carnes non possit.

Denique ut finiam, non tantum in animalibus, sed etiam in plantis, animæ partibus homogeneis constant, licet arbor  
aliana

aliam temperiem & conformationem in radice, trunco, & ramo, aliam in cortice, & ligno postulent. Dicit Fernelius: *Viventis stirpis, inquit, lignum, cortex, folium, flos, atque fructus, omnia unius sunt formæ, unag, specie continentur: ut animantis os, caro, vinculum, cartilago, specie nequaquam dissident.*

De folio tamen, flore, & fructu est quod ambigam. Videntur enim folia, flores, & fructus in arboribus, quod crines, & plumæ in animalibus. Hæc autem non animâ sensitivâ totius, sed solâ vegetativâ, Lib. II. Cap. V. Art. VI. animabimus.

## CAPUT VI.

*De potentijs animæ in genere.*

**E**Xpeditis quæ ad substantiam animæ, & informationem corporis pertinent, sequitur proximè, ut de potentijs ejus, quæ sunt naturales ipsius proprietates, generaliter aliquid dicamus. Specialiter verò de singulis, quæ singulas species animarum sequuntur, differendum in Libris sequentibus.

## ARTICVLVS I.

*Potentia vitales realiter ab anima distinguuntur.*

**T**Res Philosophorum Scholæ in hac Arena pugnant. Occamus cum suis Nominalibus, nullam inter animam & potentias ejus distinctionem interponit: Scotus formaliter, D. Thomas realiter distinguere putat. Sed quid per distinctionem formalem Scotus intelligat, obscurum est, nec inter Scotistas satis convenit. Si distinctio formalis sit solum rationis ratiocinata, ut quidam interpretantur, vix ullum discrimen est inter Scotum & Nominales. Non potest verò intelligi illa, quam hodie modalem appellant: quia nullibi Scotus indicat, potentias animæ esse puros ejus modos.

Nec



Nec sanè restam vivaces, & actuosæ, possunt esse puri tantum modi; cum isti tenuis, semivacuæ, & otiosæ entitatis esse soleant. Si igitur distinctio à parte rei inter animam & potentias ejus interjici debeat, erit realis stricta, qualis inter res plenæ entitatis ( ut inter animam & corpus, inter frigus & aquam &c. ) intercedere solet.

Et hæc est ubique S. Thomæ sententia; quam Thomistæ varijs argumentis stabiliunt, sed multis invalidis; ut proinde delectu hîc uti necesse sit. Sed tamen nec ea quæ adferemus tam valida erunt; ut à pertinacibus labefactari, & quoquo modo eludi non possint. Raræ quippe in rebus naturæ, extra mathematicas disciplinas, tam evidentes & robustæ demonstrationes reperiri possunt, quæ assensum à pugnacibus etiam & contentiosis extorquere valeant.

Sed bene est, quòd Aristoteles ingenij intemperantis esse dicat, in quavis materia mathematicas demonstrationes exigere.

Hæc quoque sententia communi modo loquendi, quo potentias animæ, tanquam proprietates quasdam naturales ab essentia ejus dimanantes apprehendimus, est accommodatior, & varios præterea in Theologia usus habet: ut quando habitus supernaturales, ad intellectum & voluntatem pertinentes, distinguere solemus, secundum similitudinem & proportionem, qua illæ potentiaæ naturales inter se, & ab anima distinguuntur, &c.

Probatur igitur primò: *Deus creaturis quas ad bonum naturale habendum diligit, sic providet, ait S. Thomas, ut non solum moveat eas ad actus, sed etiam largitur eis formas & virtutes quasdam quæ sunt principia actuum, ut secundum seipsas inclinentur ad hujusmodi motus. Et sic motus quibus à Deo moventur, sunt creaturis convenientiores & faciles, secundum illud Sap. 8. Et disponit omnia suaviter.* S. Th. 1. 2. q. 110. a. 2.

Vbi rationem à priori, & pro materia hujus capacitate, sanè optimam allegat. Nam sicut Deus formæ ignis providet calorem, ab ea realiter distinctum, formæ aquæ frigus &c. ut per istas qualitates, tanquam propinquiora & instrumentalia principia operationes suas naturales exerçant; ita de potentijs vitalibus accidentarijs providit animæ, per quas facilius &

Sap. 8.

suavius operaretur, sub omnipotentia & concursu ejus qui omnia disponit suaviter.

Nam propterea etiam natura invenit habitus, qui potentias ipsas animæ, velut adventicio aliquo pondere in actus suos inclinent, ut sic adhuc pronius, facilius, & suavius operarentur.

Quæ res probabilior adhuc apparebit, si cogitemus, substantiam animæ ad multos & valde differentes actus esse indifferentem; & proinde nihil bellius, & ad agendum accommodatius fieri posse, quam ut per potentias & accidentaria instrumenta magis restricta & particularia, ad hanc vel illam actionis speciem determinaretur, & adjuvaretur, ut omnibus sufficere posset.

An verò hæc necessitas operandi per talia accidentaria instrumenta, oriatur ex generali imperfectione & impotentia substantiæ creatæ; an verò talis substantiæ, qualis est anima, quævis forma substantialis, est incompertum.

Franc. Suarez, & plurimi Thomistæ in generalem creatæ substantiæ limitationem & imperfectionem refundunt. Vnde & in Angelis, intellectum & voluntatem à natura Angelica realiter distinguunt. Quidquid id est: omnes formæ substantiales corporum nobis notæ (quantum conjectare possumus) sic agunt, ut non futilis inde suspicio nascatur, simile esse omnis substantiæ creatæ activæ ingenium.

Quæ suspicio augetur, quia in Deo intellectus & voluntas, ratione ratiocinatâ ab essentia divina & inter se distinguuntur; ergo in creatis potentiæ illæ distingui videntur à parte rei; cum in Deo omnia simpliciora esse soleant, quam in creaturis. Et facile dissolvi possunt quæcumque contra distinctionem istam à Nominalibus & alijs objectantur, ut mox videbimus.

Secundò, facultates, quibus anima utitur in alteratione & conversione alimenti in substantiam viventis (ut calor naturalis, & temperies partium corporis) re ipsâ distinguuntur ab anima; ergo & sensus & appetitus sensitivus, intellectus & voluntas, quæ sunt instrumenta animæ ad ceteras ejus operationes.



tionem. Quæ est aperta mens & phrasis S. Anselmi, cum ait: Sicut visum, qui est instrumentum videndi, habemus etiam cum non videmus; visus autem quod est opus ejus, non est nisi cum videmus: ita voluntas, instrumentum scilicet volendi, semper est in anima, etiam cum non vult aliquid; velut cum dormit. Voluntatem vero, quam dico usum, si ve opus eiusdem instrumenti, non habemus nisi quando volumus aliquid.

S. Ansel.  
lib. de arb.  
arb. c. 7.

Idem alibi: Instrumentum volendi est vis illa anima, qua utimur ad volendum; sicut ratio instrumentum ratiocinandi, qua utimur cum ratiocinamur, & visus instrumentum videndi, quo utimur, dum videmus. Vnde ibidem, Voluntatem definit, Instrumentum seipsum movens. Propter videlicet libertatem motus voluntatis, & peculiarem modum se movendi & agendi, quem anima exercet, dum per voluntatem deliberatam operatur; qui in ceterarum potentiarum officijs & actibus minimè reperitur.

Idem lib de  
concord.  
grat. & li-  
beri arb.  
c. 21.

Vnde Gregorius Arim. sententiæ quæ potentias ab anima distinguit, tam compertum S. Anselmum habuit, ut det manus, & dicat: Ad Anselmum & Magistrum, quamvis aliqui conveniunt eos exponere, dico tamen, quod mihi apparet, eos fuisse illius opinionis, sicut & multi alij solennes Doctores. Quia tamen Augustinus videtur mihi eis contrarius, nec necessitatem video ponendi butusmodi distinctionem, idcirco teneo oppositum, salvâ semper aliorum reverentia. Sed de S. Augustino postea viderimus.

Gregor.  
Arim. in 23  
d. 16. q. 3.  
a. 2.

Tertiò, anima per organi alterationem amittit quandoque visum, auditum, aut sensum alium, etiam si dispositiones in organo permaneant sufficientes ad retinendam animam: igitur sensus est qualitas quædam distincta ab anima, quæ alias, aut plures in organo dispositiones exigit, quàm anima.

Io. Buridanus, & Thomas Bricotus, Philosophi de classe Nominalium respondent: Ipsas organi dispositiones, esse potentiam ipsam animæ instrumentalem.

Sed perperam. Nam temperamentum, aut figura oculi nequit cum anima efficienter concurrere ad visionem. Vnde anima ab ipsis adjuvari non potest, ut facilius & suavius actum vitalem organicum exerceat.

Deinde virtutes alimenti attractrices, & expultrices excrementorum, omnium, ut puto, Medicorum consensu, à temperie & figurâ organicâ distinguuntur; ergo & visus, & auditus, ceterique sensus, qualitates nobiliores sunt temperamenti (quæ nihil amplius sunt, quàm coetus qualitatum primarum) & figuris suorum organorum.

Quartò, in quibusdam animalium, & herbarum cadaveribus, virtutes quædam animæ remanent, quibus Medici utuntur in medicamentis. Hæ ergo certissimò ab anima jam absente, realiter distinguuntur: cur non igitur etiam potentiæ sensitivæ, quæ non tantùm in fieri, ut illæ medicæ virtutes, sed etiam in conservari ab anima dependent?

Quintò, si potentiæ sensitivæ, & rationales idem prorsus sint quod anima: ergo inter se etiam prorsus idem erunt. Quæ enim, in rebus creatis, idem sunt uni tertio, etiam inter se in unum coalescunt.

Vnde intellectus hominis erit idem ac omnes sensus, tam exteriores, quàm interiores: & ista vocabula (intellectus, phantasia, visus, auditus &c.) erunt nomina plura, res autem una. Nam eadem anima vocabitur visus, quatenus per oculorum quasi fenestras, foràs prospicit; auditus, quatenus per aurium foramina sonos percipit &c.

Imò, si operationes sensuum tam externorum, quàm internorum recipiantur proximè in solam animam (ut multi præsertim recentium Nominalium philosophantur) non tantùm res, sed etiam nomen, *intellectus*, sensui poterit tribui. Quare enim visus hominis in oculo non intelligit lumen solis, quando cognitione spiritali, in animam solam receptâ, illud cognoscit? Quòd enim cognitio ista formetur, vel proximè occasione speciei sensibilis, organo ab externo objecto impressæ; vel remotè tantùm, & occasione alterius speciei intelligibilis, quæ per organa sensuum quodammodo trajecta & rapta est in animam; ad rationem & nomen intellectiōis parum referre videtur.

Vnde Gregorius Arim. tandem admittit, visum & quemlibet sensum hominis, esse ipsum intellectum hominis. quem  
ad tale



ad tale objectum sensibile comparamus: veluti etiam, inquit, appetitum sensitivum & intellectivum in homine, non esse duas potentias essentialiter distinctas, sed eandem & ipsam animam.

Greg. Arim.

Quæ videtur etiam Tertulliani fuisse opinio. *Quid sensus, inquit, nisi ejus rei qua sentitur, intellectus? Quid intellectus, nisi ejus rei qua intelligitur, sensus? Vnde ista tormenta crucianda simplicitatis, & suspendenda veritatis? Si corporalia quidem sentiuntur, incorporalia verò intelliguntur; rerum genera diversa sunt, non domicilia sensus & intellectus, id est, non anima & animus.*

Tertul lib.  
de anima  
c. 18.

Nisi malumus eum intelligere, non de divisione animæ humanæ in plures potentias, sed in duas partiales animas, quarum una sit sensitiva, altera rationalis, sive anima, & animus. Hac enim bifariâ sectione, quasi tormento, discerpatur & cruciabitur, phrasi Tertulliani, animæ simplicitas. Si deinde sensus sint intellectus, & operationes sensuum in animam solam proximè imprimantur; quare eorum, quæ aliquando scivimus, obliviscimur? Certè enim in Angelos ideo nulla oblivio cadere potest; quia species memorativas in solam memoriam intellectivam recondunt, nec alias species corruptibiles phantasticas in memoria aliqua organica (qua Angeli carent) reservant. Angelis autem homines similes erunt, si intellectus sit eorum phantasia. Sic enim intellectus omnem cognitionem, quam phantasticam appellamus, in se rapiet, & omne cujuscumque cognitionis vestigium spiritali ventri animæ, nullum ventriculo cerebri (ubi species phantasticas reponimus) imprimetur. Atque ita per resolutionem partium cerebri, nulla species memorativa dilabatur, nulla humore cerebri diluetur & oblitterabitur. Cur igitur homo memoriæ magis madidæ, & obliviosior, quàm Angelus, erit?

Quæret postremò aliquis, cur ad asserendam potentiarum ab anima distinctionem, non utamur eo argumento, quo Occupamus animæ humanæ simplicitatem in duas animas, vegetativam & rationalem discidit: quia nempe, *caro concupiscit adversus spiritum, & spiritus adversus carnem; & hac sibi invicem adversantur?* Si enim appetitus carnalis sensitivus adversatur appetitui spiritali & intellectuali, nonne duæ istæ potentiae tam

Galat. 5.

contrariæ, & inter se, & ab anima distinguuntur?

Resp. Argumentum infirmum esse. Nam anima quæ sub istis potentijs operatur, etiam sibi ipsi adversatur. Unde facile intelligi potest, quomodo ad illam carnis & spiritus pugnam necesse non sit, unam potentiam ab altera realiter distinguere, cum etiam si anima nuda, & nullis potentijs à se distinctis succincta cogitetur, ipsa tamen in contrarias inclinationes distrahi, & sibi ipsi adversari valeat. Nam etiam in sententia nostra, quæ appetitum inferiorem à superiori distinguit, pugna ista qua inferior superiori rebellat, non solum in appetitu inferiori hæret, sed in superiorem quoque ascendit, ipsa-que voluntas contrarijs motibus seipsam exagitat. Constat hoc enim experientiâ, & S. Augustinus sæpe dicit.

S. Aug. lib. 8

c. 5. Confes.

*Duc voluntates mee, inquit, una vetas, alia nova, illa carnalis, ista spiritualis confligebant inter se, atque discordando dissipabant animam meam.*

Ibid. c. 10.

*Et iterum: Cum eternitas delectat superius, & temporalis boni voluptas retentat inferius, eadem anima est, non totâ voluntate illud, aut hoc volens; & ideo discerpitur gravi molestia, dum illud veritate præponit, hoc familiaritate non deponit.*

## ARTICULVS II.

*An Aristoteles distinxit potentias ab anima.*

Arist. lib. 2.

c. 1. de anima.

**Q**uia Nominales, Peripatetici quoque esse & audire volunt, Aristotelem in classem suam attrahere conantur. Et per istum maximè locum, ubi ait, *Si oculus esset animal, visus esset ipsi anima*. Igitur, inquit, anima quæ est in oculo, est ipsa potentia visiva; per quam constitueretur in esse integri animalis, nisi oculus esset pars integralis animalis. Sed falluntur, ut verba sequentia attendenti statim parebit. *Visus enim, inquit, est essentia oculi illa, quæ secundum rationem. Oculus autem materia visus est. Quo deficiente, non est amplius oculus, nisi æquivocè; sicut lapideus, aut depictus.*

Itaque considerat oculum tanquam compositum accidentarium



tarium ex organo illo animato & visu, sive potentiâ visivâ; ejus *essentia secundum rationem*, sive pars essentialis, quæ totius compositi rationem complet (hoc est, pars essentialis formalis) est visus.

Voluit enim per tale compositum accidentarium, tanquam per aliquid notius, manifestare, quomodo anima ingrediatur essentialiam corporis animati; sicuti nempe visus ingreditur essentialiam oculi visivi, qui est idoneum animæ instrumentum ad vitales organi functiones exercendas. Quod proximè antè exemplo compositi artificialis adhuc ostenderat. Vbi dixerat, quod si securis esset animal, figura artificialis esset ejus anima. Addideratque figurâ istâ artificiali abolitâ, securim non nisi æquivocè fore securim; quemadmodum jam dicit, oculum cæcum, deleto visu, tanquam parte essentiali illius organi, esse tantum æquivocè oculum.

Quid verò de distinctione potentiarum ab anima Aristoteles censeat, alibi satis indicat.

Ut cum Empedoclem, & veterem Philosophiam refellit, quæ intellectum à sensu non distinguebat. Item, quando mentem vocat *ὄργανον instrumentum* animæ, sicut manum corporis. *Natura*, inquit, *duo instrumenta nobis inseruit, quorum opera instrumentis extraneis uti valeret; manum, inquam, corpori dedit, animo mentem.* Deinde statim post, scientiam, mentis instrumentum appellat. *Menti namque, ait, utilis est scientia, ut tibicini tibia.* Atqui scientia à mente, & tibia à tibicine distinguitur; ergo & mens, sive intellectus ab anima.

Alibi quoque dicit, in operationibus vegetativis calorem naturalem esse instrumentum animæ; & ideo eos qui arbitrati sunt animam esse calorem, similes illis esse, qui *serram aut asiam fabrum esse arbitrarentur.*

Igitur, cum toties etiam inculcet, intellectum esse animæ instrumentum, nullâ ratio, nullum indicium est, eum non loqui de tam proprio & distincto ab anima instrumento hic, quàm ibi. Calor autem, sine controversia, realiter distinguitur ab anima, cui in actu nutriendi ministrat.

Nonnunquam etiam generaliter definit, *Ad omnem animæ functionem*

Arist. lib. 3.  
c. 3. de anima.

Problém.  
sect. 3e.

Lib. 2. c. 7.  
de partib.

Lib. 1. c. 2.  
de generat.  
animal.

functionem instrumento opus esse. Ac deinde, *Melius esse, si fieri potest, non idem instrumentum ad usus dissimiles haberi.* Quapropter

Lib. 4. c. 6. multa ejusdem animæ instrumenta agnoscit. Et tamen multas  
de partib. in eodem homine animas negat. Negat autem animas realiter  
Lib. 1. c. ult. distinctas; igitur & instrumenta realiter distincta agnoscit.  
de anima.

Lib. 3. c. 10. Memini quoque alibi dixisse, *Intellectum à Deo, tanquam lu-*  
Rhetor. *men accensum esse in anima.* Lumen igitur istud distinguitur ab  
anima. Vnde non inscitus sanè Aristotelis Interpretes Franc.  
Toletus, dicere est ausus, *se arbitrari certissimè Aristotelem ejus*  
Tolet. lib. 2  
q. 9. de *sententia fuisse.*  
anima.

Alia tamen Platonis, præceptoris ejus, sententia; omnes-  
que sensus corporeos ab anima distinctos videtur palàm ne-  
gare. Vnde hominem dicit videre *δι' ὀφθαλμῶν, οὐκ ὀφθαλμοῖς*  
Plat. in *per oculos, non oculis:* quemadmodum per fenestras, non fene-  
Thezt. *stris foràs prospicimus.* Et M. Tullius ex eo: *Non est ullas*  
Cic. lib. 1. *sensus in corpore,* ait; *sed ut non solum Physici docent, verum etiam*  
Tuscul. *Medici, qui ista aperta & patefacta viderunt, via quasi quadam sunt*  
*ad oculos, ad aures, ad naves à sede animi perforata.* Itaque sæpe aut  
*cogitatione, aut aliqua vi morbi impediti, aperti atque integris & ocu-*  
*lis & auribus, nec videmus, nec audimus.* Vt facillè intelligi possit, ani-  
*mam & videre & audire, non eas partes, quæ quasi fenestra sunt ani-*  
*mi: quibus tamen sentire nihil queat mens, nisi id agat, & adsit.*

Sed hæc à Platone dici nihil mirum, qui animam rationa-  
lem negat esse formam corporis, sed ei insidere, ut nautam  
navi. Nauta autem non nave ut instrumento, sed per fene-  
stellam navis in mare prospicit.

### ARTICVLVS III.

An S. Augustinus potentias ab anima distingui existimaverit.

**M**AJOR inter Theologos dubitatio, & certamen est, an  
S. Augustinus animam à suis potentijs distinxerit.  
Henricus Gandavensis, & Gregorius Ariminensis  
fortiter negant, & Sanctum illum Patrem ad Scholam No-  
minalium abducunt. Sed tamen testimonia etiam non desunt,  
quibus



quibus in S. Thomæ potiùs Scholâ retineri possit.

Nam profectò de quinque corporis nostri sensibus, tanquam de rebus diversis, & inter se distinctis, sæpissimè loquitur. Præter quos, sensum etiam aliquem interiorem omnibus exterioribus præidentem agnoscit. Vno aut altero loco id eum docentem audiamus: *Hic sensus interior, inquit, nec visus, nec auditus, nec olfactus, nec gustus, nec tactus dici potest, sed nescio quid aliud, quod omnibus communiter præidet. Quod cum ratione comprehendimus, hoc ipsum tamen rationem vocare non possum; quoniam & bestiis inesse manifestum est.*

S. August.  
lib. 2. c. 3.  
de lib. arb.

Et videtur illos sensus ab anima re ipsâ separare, cum alibi ait: *Est alia vis, non solum, qua vivifico, sed etiam qua sensifico carnem meam, quam mihi fabricavit Dominus; iubens oculo, ut non audiat, & auri ut non videat; sed illi, per quem videam, huic, per quam audiam; & propria singillatim ceteris sensibus sedibus suis & officiis suis, quæ diversa per eos ago unus ego animus.*

Lib. 10. c. 7.  
Confess.

Vbi sanè, non accipit sensus pro ipsa sensuum operatione (quomodo Gregorius Arim. ceterique Nominales solent S. Augustinum interpretari) sed pro ipsis animæ potentijs, quandoquidem sensus distinguat à sensuum officijs, quæ sunt eorum operationes, & dicat animum diversa (scilicet videre, audire &c.) per eos agere.

Sæpe etiam eos à sensu animi, sive ab intellectu distinguit. *Videntur, inquit, quæ præstò sunt (unde & præsentia nominantur) vel animi, vel corporis sensibus.* Et mox addit, sensus corporis esse quinque.

Epist. 112.  
c. 2.

Nonnulli membra corporis, tanquam à sensibus distincta nominat, & dicit, membra ac sensus dari à Deo ex propagine; & tamen, an anima nostra sic etiam detur, dubitat. *Corporis membra, ait, & corporis sensus, corporis formam, & corporis omnino substantiam Deus hominibus dat, quamvis ex propagine det. Quid si ergo sic etiam anima & spiritus hominis, & à Deo datur, & tamen ex propagine sui generis datur? Quod ego nec defendo, nec refello.*

Lib. de orig.  
animæ

Plurima alia testimonia citari possent, si foret opus.

Sed Henricus & Gregorius Arim. quædam etiam in partem suam recitant, & præsertim ex Libris de Trinit. ubi

S. Augustinus totis ingenij viribus, SS. Trinitatis imaginem in memoria, intelligentia, voluntate animæ nostræ ostendere conatur.

Bib. 10.

q. ult. Trin.

Ait verò, *Hæc tria, memoria, intelligentia, voluntas, quoniam non sunt tres vitæ, sed una vitæ, nec tres mentes, sed una mens; consequenter utique nec tres substantiæ sunt, sed una substantia.* Deinde: *Tria hæc eo sunt unum, quia una vitæ, una mens, una essentia.*

S. Th. 1. p.

q. 77. a. 1.

Sed hunc locum optimè S. Thomas explanat. Quod anima respectu suarum potentiarum sit totum potentiale; *totum verò potentiale, inquit, adest singulis partibus secundum totam suam essentiam, sed non secundum totam suam virtutem.*

Notandum enim est, animam intrare quodammodò & animare vitâ primâ potentias suas vitales, ut actus qui à potentijs exeunt sint vitales, & unâ à vitâ prima scaturiant. Vnde imaginari oportet illas potentias, ut composita quædam accidentaria ex substantia animæ, & ex ipsa potentia accidentali secundæ speciei prædicamenti qualitatis.

Sic enim magis illustris & perspicua est in animâ nostrâ imago Trinitatis. Sicut enim eadem essentia divina, per identitatem tres personalitates divinas subintrat; ita eadem animæ essentia tres illas potentias suas spirituales memoriam, intellectum, & voluntatem, per unionem saltem subingreditur, & cum ijs tria composita accidentaria ex eadem numero anima componit: ad figurandam quandam saltem rudem imaginem mysterij, quo in divinis eadem essentia cum tribus personalitatibus tres divinas personas constituit.

S. August.

lib. 1. c. 2.

Trin.

Hinc fortasse intelligi potest illud alibi Augustini: *Detracto corpore, si sola anima cogitetur, aliquid ejus est mens, tanquam caput ejus, vel oculus, vel facies: sed non hæc ut corpora cogitanda sunt.* Trium autem illarum potentiarum, & ex substantia animæ, tres quasi radices, per rationem distinguendæ sunt; quarum una est velut apex totius substantiæ animæ, & potentiam intellectivam subintrat; alia memoriam, tertia voluntatem. Prima ergo illa radix & substantialis apex, cum accidentali intellectu in unum quasi convolutus, est *mens anima, tanquam caput ejus, vel oculus, ut loquitur S. Augustinus.*

Et



Et alibi iterum ait, *Intellectum esse aliquid animæ, sicut oculus est aliquid carnis.* Tract. 73.  
in Io.

Et Auctor Libri de spiritu & anima, qui non Augustini, sed tamen plurima ab Augustino confarcinat: *Dicitur spiritus, mens rationalis, inquit, ubi est quædam scintilla, tanquam oculus animæ, ad quem pertinet imaginatio & cognitio Dei.* Lib. de  
spirit. &  
anima. c. 10.

Sic jam S. Bernardi phrasis non erit etiam intellectu difficilis, qui S. Augustinum, ut solet, imitatus ait: *Tria in anima intucor, rationem, voluntatem, memoriam; & hæc tria animam esse.* S. Ber. ser.  
11. in Cant.  
Nam aliàs videtur ipsas formales & accidentarias potentias quibus subest anima, ab ipsa distinguere, quando postea dicit: *Arbitrij libertas (quæ apud ipsum voluntatem & intellectum complectitur) est planè divinum quiddam, præfulgens in anima, tanquam gemma in auro.* Idem serm.  
81. in Cant. Gemma autem certè aliud est ab annulo aureo, cui inferitur.

Nec præcedentibus adversatur S. Augustinus, ubi videtur organum ipsum, sensum appellare, ac proinde in fabricatione actus vitalis sensitivi, nihil aliud quàm animam & organum corporeum agnoscere: *Sensus oculorum, inquit, non ob aliud sensus corporis dicitur, nisi quia & ipsi oculi membra sunt corporis. Et quamvis non sentiat corpus exanime; anima tamen commixta corpori per instrumentum sentit corporeum. Et idem instrumentum sensus vocatur.* S. August.  
lib. 1. c. 2.  
Trio.

Verùm hoc instrumentum animæ (mente S. Augustini) non est nuda materia oculi, sed sumpta simul cum visu corporeo, illam materiam informante, & cum ea idoneum animæ instrumentum constituyente. Mox quippe subdit. *Qui sensus etiam passione corporis, cum quisque excacatur, interceptus extinguitur; cum idem maneat animus, & ejus intentio, luminibus amissis.* Potest enim quispiam, salvâ substantiâ oculi, visum & lumen oculorum amittere: ergo sensus tunc amittitur, non quia anima recedat, & oculus moriatur; sed quia potentia visiva accidentaria extinguitur: aut certè intercipitur, si organo ipsi non stabiliter inhæreat, sed per cerebri irradiationem, in oculos descendat, ut multi Medici philosophantur. Quod etiam fortasse S. Augustinus hîc utendo verbo, *interceptus*, aspexit.

Nam propriè interceptur visus, si è cerebro per nervos opticos delabi debeat, & canalibus istis humore aliquo oppletis, (ut in guttâ serenâ accidit) luminis è cerebro manantis fluxus interceptur.

Cùm igitur S. Augustinus antea dixit, *Instrumentum corporeum sensus vocatur*; sensum, non pro nuda potentia sentiendi, sed pro integro instrumento corporeo, quo anima in actu sentiendi utitur, accepit: id est pro composito accidentario ex substantia oculi & potentiâ visivâ ejus. Ne quis etiam existimet, S. Augustinum usurpassè hoc loco visum pro visione, ut sæpe solet, non pro ipsa potentia visiva, quæ in tenebris, aut oculis clausis, in nobis manet; ibidem de eo differens ait: *Sensus ante obiectum rei visibilis nisi esset in nobis, non distarem à cæcis, dum nihil videmus, sive in tenebris, sive clausis luminibus. Hoc autem distamus, quòd nobis inest, etiam non videntibus, quo videre possumus, qui sensus vocatur; illis verò non inest.*

Igitur non tantùm de operatione sensûs, sed etiam de potentia sentiendi, tanquã de re aliqua ab anima distincta, loquitur.

Nec aliud etiam vult, opinor, S. Augustinus in loco qui nobis ab Henrico & veteribus Nominalibus objicitur, ubi ait: *Cùm differimus de natura mentis humana, de una quadam re differimus; nec eam in hac duo quæ commemoravi (rationem, & appetitum rationalem) nisi per officia geminamus.*

Non enim negat nudas potentias intellectûs, & voluntatis, quæ sunt diversorum officiorum instrumenta, à se invicem distingui; sed negat animam per istas potentias in duas partes secandam & geminandam esse. Vult enim, sicut in Deo unica simplicissima essentia est in tribus distinctis personis; ita unam & simplicem hominis animam in plures animas, propter potentialium diversitatem, secandam non esse. Legamus enim quod præcessit, & fortè non obscurè videbimus.

*Quiddam, ait, rationale nostrum (apicem animæ, qui intellectum & voluntatem sustinet) non ad unitatis divortium separatum, sed in auxilium societatis quasi derivatum, in sui operis dispersitur officium. Et sicut caro est duorum in masculo & femina; sic intellectum nostrum & actionem, vel consilium & executionem, vel*  
*rationem.*



rationem & appetitum rationalem; vel si quo alio modo significantius dici possunt, una mentis natura complectitur. Vt quemadmodum de illis dictum est: Erunt duo in carne una; sic de his dici possit, duo in mente una.

Deinde verba illa superius nobis objecta subjungit, quibus ait, se in intellectum & voluntatem animam dividendo, non aliter eam geminare, sive geminam facere, quam per officia. Substantia quippe animæ eadem est, officia verò intelligendi & volendi diversa. Vbi interim non negat officia ista, per potentias instrumentales ab anima exerceri. Imò talia instrumenta sub officijs possunt comprehendi.

Dicit ergo, quòd sicut Adam & Eva duo homines distincti erant in carne una; ita intellectus & voluntas duæ distinctæ potentiæ, in una tamen animæ essentia. Non verò in duabus animæ distinctis partibus: quasi supremus animæ vertex sit biceps, ut Parnassus, & intellectus uni verticis iugo, voluntas alteri insideat.

Denique ceteri quoque SS. Patrum talibus ferè loquendi formulis utuntur, ut quandam inter animam & potentias distinctionem interponere videantur. Vnde S. Gregorius Nazianz. per quatuor animalia Ezechielis, totidem animæ potentias designari existimat. *Existimamus, ait, per hominem, vim rationalem intelligi; per leonem, irascibilem; per vitulum, concupiscibilem; per aquilam, conscientiam reliquis incumbentem, qui à Paulo* Ezech. 1.  
Naz. Orat. 46. *spiritus hominis dicitur. Per eum qui insidet, Patrem; per spiritum, Spiritum sanctum; per nubem, Filium.*

Ecce igitur humanæ animæ, in curru & animalibus illis quæ SS. Trinitas regit, imaginem. Currus est anima rationalis: cujus rotas implet & impellit Spiritus sanctus. *Spiritus enim vita erat in rotis.* Ezech. 1. Pater, auriga insidens. Filius, assumptâ humanæ naturæ nube protegens. Animalia circa currum, quæ pari passu gradiuntur, aut quiescunt cum rotis, sunt potentiæ animæ, quas Spiritus sanctus, animam movendo, pari motu ire, aut cessare facit.

Attamen, ut animi mei suadum hîc aperiâ: dum per varia S. Augustini loca cogitationem mîto; videtur mihi

S. August. lib. de quant. anim. c. 14. minimum curæ ei fuisse, An potentia realiter ab anima distinguerentur, nec ne; sed sufficit ipsi, modò anima (quam alicubi quasi cardinem quandam in agendo, cunctarum corporalium motionum vocat) in operationes vitales, tam corporales, quam spirituales, activitatem suam exerat; parum, aut nihil pensi habens, an proximè per nudam essentiam suam, an per potentias & facultates à se discretas, id faciat. Vnde varietas illa loquendi, qua nunc in Aristotelem, nunc in Platonem libratur & inclinatur.

Lib. de quant. anim. c. 30. In ejusmodi enim naturæ rebus non semper totas ingenij vires intendit & impendit; sed aliquid sæpe obvium ex Philosophia maximè Platonis (qui illo ævo longè notior, & nobilior erat Aristotele) in rem præsentem rapit. Vt patet de actione videndi, quam fieri ejaculatione radij ab oculo in rem visam, toties cum Platone dicit. Hoc autem Platonium quoque videtur, cum *Animam esse oculorum potentiam* ait. Plato enim, ut Artic. superiori narravimus, nullas potentias animæ organicas à substantia animæ distinctas admittit.

D. Th. 1. p. q. 77. a. 5. ad 3. Non ergo de nihilo D. Thomas, *In multis*, ait, *que ad Philosophiam pertinent, Augustinus utitur opinionibus Platonis, non asserendo, sed recitando.*

S. August. lib. 5. c. 14. contra Iul. Medicis etiam, & præsertim Sorano, quem *Medicina auctorem nobilissimum* vocat, multa credidit. Vt Lib. 5. c. 14. contra Iul. Lib. 7. c. 13. Genes. & alibi videre licet.

## ARTICVLVS IV.

*Quid adversus distinctionem potentiarum ab anima obijcerent Nominales.*

SI Aristotelis, & S. Augustini testimonia seponantur, de quibus jam diximus, unico ferè argumento (quod *novaculam Nominalium* nuper appellavimus) distinctio nem potentiarum ab anima refecant antiqui Nominales.

Greg. Arim. in 2. d. 16. q. 1. a. 2. *Ad hoc enim movet me maximè ratio, ait Gregorius: Quòd pluralitas rerum non sit ponenda, ad quam nec experientia, nec ratio experien-*



*experientia procedens, nec auctoritas sacra cogit. Aliàs enim frustra poni videtur.*

Sed sat multa, ut opinor, argumenta, & quædam etiam ab experientiâ deducta, Art. I. iuggestimus. Satis enim expertum est, calorem naturalem esse distinctum animæ vegetativæ instrumentum; & inde ad animæ sensitivæ & intellectivæ instrumenta distinguenda gradum fecimus. Et alia cumulavimus, quæ ostendunt non esse frustraneam istam distinctionem. Sic enim anima ad varia actionum vitalium genera determinatur, & adjuvatur, ut facilius & suavius per potentias eodem inclinantes operetur. Veluti etiam quibusdam potentijs, habituum quoddam quasi pondus superijcitur, ut illa operandi facilitas & suavitas magis adhuc augeatur.

Illà quippe potentiarum diversitas & varius apparatus est quædam veluti *supellex in officina vite*, ut de toto corpore respectu animæ, eleganter loquitur Tertullianus. Supellex autem & instrumenta quædam necessaria sunt ad istius officinæ opera; non sicut scutella Diogenis, quam veluti minimè necessariam abiecit, ubi rusticum è rivo cavâ manu bibentem conspexisset.

Tertul. lib.  
de anima  
c. 40.

Nec natura ubique est tam parca, quàm clamitant Nominales. Nam licet superflua non cumulet; multa tamen vel ad ornatum, vel ad faciliore operandi modum creatis agentibus suppeditat. Nam ut in hanc rem egregie Aristoteles, *Melius est, si fieri potest, non idem instrumentum ad usus dissimiles habere.*

Arist. lib. 7.  
c. 6. de  
partib.

Secundò, novi quidam Nominales obijciunt, animam in operationibus vitalibus fore otiosam, si potentijs à se distinctis eas exerceat.

Vnde Hurtadus mirari se dicit quosdam Thomistas, qui & potentias distinguunt ab anima, & tamen credunt eam cum potentijs suis proximè operari; aitque D. Thomam cum *ipsa aperto Marte pugnare*. Quia nempe D. Thomas sæpe negat substantiam creatam immediatè operari. Attamen Thomistæ illi verum dicunt, & Hurtadus fallitur.

Hurt. disp. 4.  
sect. 4. de  
anima.

Licet enim S. Thomas neget substantiam creatam operari sine medio instrumento, sentit tamen eam actioni instrumenti se etiam

se etiam immiscere. Nonne enim, etiamsi securis secet, & malleus tundat; faber tamen etiam brachia movet? Sic visus videt, & intellectus intelligit; sed etiam anima, & quidem principaliter, idem agit, & ista sua instrumenta ad opus applicat. Sunt enim instrumenta non separata, sed quoad causalitatem conjuncta cum causa principali, quæ cum ipsis proximè in eandem actionem influit. Non repugnant enim ista, mediante instrumento operari, & tamen activitatem suam in actionem instrumenti proximè inferere; sic ut habitudinem essentialem actionis ad suum principium, tam causa principalis, quam causa instrumentalis proximè terminet.

Et ut Hurtadus S. Thomæ mentem satis perspicuè videat; D. Th. 1.2. ecce ubi de sympathia potentiarum animæ differit: *Dicendum, q. 37. a. 1. ait, quod quia omnes potentie animæ in una essentia animæ radican- tur, necesse est, quod quando intentio animæ vehementer trahitur ad operationem unius potentie, retrahatur ab operatione alterius. Unius enim animæ non potest esse nisi una intentio. Et propter hoc, si aliquid ad se trahat totam intentionem animæ, vel magnam partem, non compati- tur secum aliquid aliud quod magnam attentionem requirat.*

Idem q. 82. Et alibi: *Una potentia impeditur in actu suo, quando alia vehe- a. 3. suppl. menter operatur; quia una de se non sufficit ad tam intensam operationem, nisi ei subveniatur per id quod erat alijs potentijs, vel membris influendum à principio vitæ.*

Vides igitur, quomodo principium vitæ, quod est anima, in actiones potentiarum proximè etiam influat, ideoque si unius potentie actioni se valde effusè impendat, aliquid activitatis ceteris potentijs subtrahi oporteat?

Tertiò, forma substantialis aquæ calefactæ, immediatè sine instrumento reducit se ad frigus; imò anima ipsa est principium activum omnium suarum potentiarum, per aliquam naturalem resultationem, ait D. Thomas; & ad hoc non indiget instrumentis: cur igitur ad actiones vitales magis indigeat?

Resp. quod potentie spectent ad naturale & permanens quoddam animæ complementum; non sic actus vitalis. Quod ergo magnum mirum, si anima ex appetitu naturali, quem habet ad sui conservationem & perfectionis suæ stabilimentum, potentias



potentias sola immediatè sine instrumento ex se effundat, si-  
bi que ipsi instrumenta conficiat; sine quibus tamen instru-  
menti actiones suas vitales exercere non valeat? Est enim si-  
cut mater familias quæ colum, & fusos, sartagines, & ollas sibi  
comparat, quibus ad culinæ & domesticas functiones indiget.

Nec quidquid est proxima causa causæ, etiam proxima  
causa causati esse potest. Faber quippe ferrarius vomerem  
conficit; etiam si eo uti, & arare nesciat. Forma aquæ calefactæ  
per naturalem resultantiam immediatè reparat suum frigus;  
& tamen sine frigore reparato, vicinum aërem frigefacere ne-  
quit.

Quartò, Pomponatius negat esse intelligibile, quod vulgò Pet. Pom-  
ponat. lib. 3  
c. 6 de fato. tamen inter Philosophos jactatum: Voluntatem esse cæcam.  
Itaque ne cæca maneat, jubet eam cum intellectu confluere  
in unam potentiam, & utramque esse animam ipsam. Sic  
quoque appetitus inferior, ne cæcus sit, debet cum phan-  
tasia coalescere in unum.

Sed non est opus. Nam etiam si manus cæca sit, potest ta-  
men tangere quod ei ostendit oculus; nec ad hoc necesse est,  
ut manus & oculus in unum membrum concrecant.

Licet ergo voluntas cæca vocetur, quia anima per istam  
potentiam nihil videt & cognoscit; non tamen fertur in inco-  
gnitum, quia eadem anima vult per voluntatem, quod ipsa  
per intellectum cognovit.

In hoc igitur, cum novis Nominalibus, hallucinatur Pom-  
ponatius, quod intellectum & voluntatem imaginetur duas  
potentias sic ab anima divulsas, ut ejusdem animæ influxum  
non participant.

Sic enim difficile est explicatu, quomodo voluntas, si cæca  
sit, non feratur in incognitum; quandoquidem eo casu nihil  
videatur posse adjuvari & dirigi per intellectus cognitionem.  
Sed jam omnis difficultas evanescit, si cogitemus, eandem  
animæ essentiam, quæ sub utraque potentia, tanquam causa  
principalis sub instrumentis latet, velle illud per voluntatem,  
quod intelligit per intellectum.

Nominales denique tam novi, quam veteres vicisse causam  
se ja-

se jactant per S. Augustini sententiã, in Libro de spirit. & anima c. 13. ubi ait: *Dicitur anima dum vegetat, spiritus dum contem-  
platur, sensus dum sentit, animus dum sapit, dum intelligit mens, dum  
discernit ratio dum recordatur memoria, dum vult voluntas. Ista ta-  
men non differunt in substantia quemadmodum in nominibus; quoniam  
omnia ista una anima est: proprietates quidem diversa, sed essentia una.*

Hurt. disp.  
4. sect. 4.  
de anima.  
Henr.  
quodl. 3.  
q. 14.

Vade Hurtadus, inter novos. Nominales hîc ferè præci-  
pius, *Non potuit, inquit, clariùs à nobis esse S. Augustinus.* Et Vi-  
talis Zuccolius: *Sufficit, inquit, Doctori nostro (Henrico Ganda-  
vensi, qui Nominalibus hîc viam præivit) tanquam Theologo,  
Theologis Theologorum sapientissimum adducere Augustinum, quo re-  
fellat aliorum argumenta, & suam comprobet sententiam.* Hugo Ca-  
vellus deinde, *expressissimè, ait, pro nobis est Augustinus.* Roderi-  
cus Arriaga novissimè eandem sententiam affirmat, *aucto-  
ritate, ut loquitur, expressâ, D. Augustini, Libro de spiritu & ani-  
ma.*

Arriag.  
disp. 3. sect.  
3. subsect 4.  
de anima.

Sed Liber iste, sine dubio, non est S. Augustini; cùm cap. 17.  
Boëthium citet, annis ferè 100. S. Augustino posteriorem.  
Quod etiam non ignoravit S. Thomas, ideoque ait, *Non esse  
necessarium, verbis illius Libri fidem adhibere.*

S. Tho. 1. p.  
q. 82. a. 5.  
ad 3.

Deinde verba illius Auctoris retorquere possumus in No-  
minales. Addit enim, *potentias illas animæ proprietates diversas,  
sed essentiam unam esse; substantialem essentiam videlicet, quæ est  
substantia animæ unica, in qua illæ proprietates, seu poten-  
tiæ radicatae sunt.* Voluit igitur istâ phrasi S. Augustinum imi-  
tari, qui ut imaginem SS. Trinitatis in anima nostra expres-  
sionem inveniret, dicit (ut Art. præcedenti citavimus) in-  
tellectum & voluntatem in mente nostra, eandem naturam  
esse, quam *nisi per officia geminamus.* Et tamen proximè dixerat,  
*quemadmodum de primis parentibus dictum est, Erunt duo in carne  
una; sic de intellectu & voluntate dici posse, Duo in mente una.*

S. August.  
lib. 12. c. 3.  
Trin.

Et nonne apud illum Pseudo-Augustinum etiam legerunt:  
*Ex duabus substantiis constat homo, animâ & carne: animâ cum ra-  
tione, carne cum sensibus suis: quos tamen sensus non movet caro, abs-  
que anima societate? Si autem sensus moventur ab anima & car-  
ne; nonne animæ & carnis instrumenta tibi esse videntur, &  
ab ijs.*

Auctor lib.  
de spirit. &  
anim. c. 3.



ab ijs tam distingui, quàm securis à fabro?

Meminit etiam Gregorius Arim. Libri, vel Sermonis S. Augustini *De Imagine*: in quo quædam causæ Nominalium faventia dixisse narrat. Laudat quoque Sermonem istum Hurtadus. Sed nihil, præter nomen apud Gregorium, vidisse apparet. At enim, *Ut refert Gregorius*. A me certè undique conquistus, nusquam inter Opera S. Augustini Liber iste apparuit. Rogavi Exim. Collegam tunc nostrum Cornel. Iansenium, qui postea Ipris in Flandria Episcopus, virum in S. Augustini lectione diligentissimum & assiduum, si quis unquam: qui de tali Sermone, vel fando, vel legendo se quidquam inaudivisse negavit. Itaque nihil Nominalibus præsidij in istis spurjis S. Augustini Libris. Nec causâ habuit Navarrus, cur à S. Thomâ ad Nominales transcurreret: addens: *Omnes Parisienses, exceptis Dominicanis*, illam indistinctionem potentiarum ab anima defendere. Laudatque Ioan. Majorem Parisiensium Nominalium facilè principem, *Per multas*, inquit, *propositiones dilucidius quàm alij omnes, hoc explicantem*. Sed quid Ioan. Majori reponi possit, Artic. hóc & præcedentibus satis est explicatum.

Navarr.  
Manual.  
præfud. 3.

## ARTICVLVS V.

*Potentia organica animæ in quo proximè sunt subjecto.*

**D**E intellectu & voluntate, nulla difficultas; quia hæ potentia organica non sunt, sed merè spirituales, & anima rationalis eas secum aufert, cum separatur à corpore.

Sunt igitur immediatè in sola substantia animæ, tanquam subjecto. De potentijs verò quæ organis corporis inhaerent, est dubitatio.

Sicuti enim organum, v. g. oculus materia prima & forma substantiali constat; ita ambigi potest, An potentia visiva à materia sola, an à forma sola, an à toto composito ex utraque, proximè sustentetur.

Et quantum ad potentias animæ bruti vix ambigitur, quin materiæ proximè inhæreant, cui anima ipsa bruti proximè infigitur & immergitur.

Sicut enim operatio talis potentiæ nunquam extra corpus, sed semper in organo corporeo exercetur; ita potentiam inhære materiæ talis organi, non soli animæ bruti, oportet. Nam recipere in se, per modum subiecti totalis & adæquati, suas operationes, & potentias quibus eas exercet, proprium est animæ immortalis, & à materia independentis. Vnde Aristoteles independentiam animæ rationalis à corpore colligit ex eo, quod operationem aliquam sibi soli inhærentem, nec cum corpore communicantem habet. Si enim imaginatio bruti in sola anima bruti, tanquam subiecto adæquato, formetur; cur tali animæ non debetur conservatio extra corpus? In illo enim separationis statu minimè otiosa erit, aut frustrà; cum cognoscere & appetere aliquid poterit sine corpore.

Igitur anima bruti omnes operationes suas vitales in materiam corporis sui effundit: & consequenter etiam potentias quibus operationes illas exercet. Nam operationes sensitivæ & appetitivæ brutorum censentur esse strictè immanentes; ac proinde proximè recipi in potentias naturales, à quibus proximè emanant.

Si ergo visio equi sit in materia oculi equini; ergo & visus ipse, quo mediante, ut subiecto propinquiore, visio in materiam istam recipitur, eidem materiæ (& quidem immediatius) debet inesse.

Si autem tam visio quàm visus equinus in materiam organi recipiantur; igitur & visio & visus hominis, materiam oculi humani pro subiecto habent: nec alio modo visio in oculo hominis, quàm in oculo equi exercetur. Quod etiam eadem tunicæ, iidem humores, eadem figura, & tota utriusque oculi conformatio satis liquidè adtestantur. Igitur anima rationalis, non secus ac anima equina, visum & omnes sensus suos externos, internos, ac appetitum sensitivum, in materias organorum, per naturalem emanationem effundit; & per tales, ac super tales potentias, operationes suas sensitivas, & appetitivas.



petitivas inferioris appetitûs exercet.

Sed, An in solam organi materiam, an partim etiam in animam recipiantur, ambiguum est, & utrimque ventilari potest.

Quid enim absurdi eveniet, si dicas, omnes potentias sensitivas & earum operationes, in sola materia organi, ut subiecto proximo hæreere? Non enim Leon. Lessio credere possum, Actum aliquem non posse esse vitalem, si potentia à qua elicitur, in anima ut subiecto non insit. *Non enim*, inquit, *pro-* Leon. Less. *cedet ex vi anima, sed ex vi illius qualitatis corporalis. Sicut diffusio* lib. 3. c. 6. *specierum visibilium non est actus vitalis; quia vis effectrix, nempe* de summo bono. *calor, non est in anima, sed in corpore.*

Sed nonne tamen concoctio alimenti, & conversio in substantiam viventis, est actus vitalis; etiamsi anima pro instrumento utatur calore naturali, qui soli corpori, non animæ inhæret? Quare enim anima, in eadem materiâ primâ corporis cum calore naturali permixta, nequeat calorem intimè & penetrativè sibi præsentem, ut instrumentum ad nutritionem efficiendam assumere, & in actionem illam caloris vitaliter influere? Ideo autem diffusio illa specierum visibilium, cujus meminit, non est actio vitalis; quia nulla vita prima, sive anima tali actioni se immiscet, sed à solo colore totaliter emanat.

Verùm, licet olim in hac philosophia & cogitatione fuerim; nunc tamen magis placet, potentias sensitivas, non in sola materia prima organi, sed in toto composito, id est, partim in corpore, partim in anima, tanquam subiecto proximo & adæquato insigere; & de ipsis aliter, quàm de potentijs vegetativis philosophandum esse.

Ratio est, quia actiones vitales sensitivæ sunt strictiori modo vitales, & perfectiùs principio suo effectivo (quod est anima) immanentes, quàm animæ vegetativæ actiones. Sufficit enim vitalitati actionis vegetativæ, ut aliquo rudiori modo in eodem supposito maneat cum anima vegetativa, quæ illam actionem elicit. Actio verò vitalis sensitiva in ipsam etiam animam sensitivam, saltem partialiter, recipi, & eam vitaliter afficere debet. Ergo & potentia, qua mediante anima talem

actionem elicit, & recipit, eodem modo, saltem partialiter, in anima sensitiva subiectari postulat. Nisi enim visus v. g. partim saltem, & ut subiecto inadaquato, animæ equi insideret, actio videndi, quæ in visum recipitur, animam equi vitali informatione non attingeret. Cognitionem autem sensitivam postulare, ut per informationem redeat in animam, à qua per efficientiam emanat, exemplo cognitionis intellectualis probari potest. Nam cognitio intellectus ita ab anima, ut agente principali emanat, ut in eandem animam reflectatur & eam informet: igitur cognitio sensitiva, ut rationem cognitionis vitalis obtineat, partialiter, ut minimum, in animam sensitivam, unde egreditur, reflecti, & eam informare debet. Anima enim sensitiva ita actionem suam vitalem elicere debet, ut eam in se experiatur, & quodammodo sentiat; sicuti anima rationalis cognitionem suam intellectivam experitur & percipit. Cujus rei indicium est sympathia illa, quæ inter imaginationem & appetitionem bruti intercedit. Sic enim anima equi à sua imaginatione afficitur, & quasi tangitur, ut evigilet, & ad appetendum, quod imaginatio proponit, se transferat.

Vnde jam pulchram naturæ gradationem in actionibus trium animarum vitalibus videre licet.

Animæ enim vegetativæ operatio (ut nutritio, accretio, generatio) in solam materiam corporis recipitur: animæ verò sensitivæ sensatio & appetitio in materiam corporis & animam simul: animæ denique rationalis intellectio & volitio à sola anima, non à materia simul, dependent. Atque hæc sententia non tantum Gabrielis & Nominalium, sed S. Thomæ quoque, Cajetani, & doctissimorum Thomistarum, imò S. Augustini, & Aristotelis mihi esse videtur.

S. Th. 1. p.  
q. 77. a. 5  
Arist. lib. de  
somno &  
vigil. c. 1.  
Lib. 1. c. 4.  
de anima.

Nam S. Thomas Aristotelem interpretans, ait, *Potentiam sensitivam esse in conjuncto* (sive in toto composito ex materia & forma) *sicut in subiecto.*

Dixerat verò Aristoteles, *Non anima proprium esse sentire, neque corporis, sed coniuncti.* Veluti alicubi etiam ait, *Passiones appetitus sensitivi non esse animæ (sicut est intellectio) à materia*



τὸν κοινὸν sed communis, sive conjuncti & compositi ex anima & corpore.

Et S. Thomas in eandem sententiam adhuc manifestius: *S. Tho. I. p. q. 76. a. 8.*  
*Dicendum, inquit, quod potentiarum anima quadam sunt in ea, secundum quod excedit totam corporis capacitatem, scilicet intellectus & voluntas. Unde hujusmodi potentia in nulla parte corporis esse dicuntur. Alia verò potentia sunt communes anima & corpori. Unde talium potentiarum non oportet, ut qualibet sit in quocumque est anima; sed solum in illa parte corporis, qua est proportionata ad talis potentia operationem.*

Hinc Cajetanus Magistri sui vestigia legens, ait ejusmodi *Cajet. I. p. q. 75. a. 2.*  
 operationes organicas sensitivas recipi in composito ex anima & corpore, tanquam in proximo susceptivo. S. Augustinus quoque in eadem mihi viderur esse mente, & sensus tam externos, quam internos, eorumque operationes in anima, saltem tanquam subiecto inadæquato posuisse. Ut cum hæc, & similia tam sæpe repetit: *S. August.*  
*Aliquid esse in anima, quo corpora sentimus; quod facimus quinque sensibus corporis. Lib. 4. c. 20. de orig. animæ. Anima ovium Iacob inhaesisse discolorem phantasiam, ex intuitu virgarum, per oculos impressam. Lib. 3. c. 8. Trin. Primordia seminum sequi intentionem materna anima, & qua in ea facta est, phantasiam, per corpus, quod avide aspexit. Quod iterum exemplo ovium Iacob probat. Lib. 11. c. 2. Trin. Memoriam retinere illam speciem quam per corporis sensum anima combibit. Lib. 11. c. 3. Trin. Illas anima partes, qua corporum similitudinibus informantur, nos cum bestiis habere communes. Lib. 10. c. 5. Trin. Animas vigilantium & dormientium, imaginibus afficit. Epist. 72. Aciem recordantis animi converti ad memoriam, ut ex eo quod ista retinuit, illa formetur. Lib. 11. c. 3. Trin. Animum ostendere non se diffusum esse per locos, quia maximorum locorum imaginibus non quasi capitur, sed potius eas capit; non sinu aliquo sed vi potentiaque ineffabili; qua licet eis & addere quodlibet, & detrahere, & in angustum eas contrahere, & per immensa expandere, &c. Lib. contra Epist. Fundam. c. 17.*

Quæ testimonia, & plurima quæ colligi possent, clarè significant sensuum omnium, ac etiam consequenter appetitus sensitivi operationes, ab anima tanquam subiecto excipi, non autem

autem in solo corpore residere : ac proinde potentias etiam, quæ sunt talium operationum principia, cum suis speciebus, imaginibus, & habitibus eidem animæ, ut subjecto incumbere: etsi de speciebus, quæ non ab anima, sed ab objectis sensuum externorum organis imprimuntur, fortasse verifamilius sit, soli materiæ organi inhærere.

Sed statim objicit se difficultas, quomodo v. g. visio partim materiæ, partim animæ oculi incumbere valeat. Non enim uno pede, ut sic dicam, uni, altero alteri insidet; sed eadem visio indivisibiliter, & immediatè utrique.

Gabriel. in  
2. d. 16. q. 1

Respondet non ineptè Gabriel, *Accidens posse esse simplicius suo subjecto*; ac proinde idem proximè duplici subjecto posse inhærere. Sicut enim facillè intelligitur, quo pacto eadem totalis visio, aut imaginatio, aliuvæ animæ conceptus, aut affectus, etiam si in se unus idemque sit, ad duo tamen objecta partialia ordinem essentialem dicat; ita unica conceptus visivi unio geminum subjectum parziale, materiam nempe & formam sui organi respiciat, & utrique simul conceptum illum infigat. Sic etiam unica (meâ & multorum opinione) unio est, quæ materiam & formam constringit, & habitudine essentiali utrumque extremum simul & copulatim respicit.

In visione tamen, ceterisq; operationibus sensitivis hominis, major apparet dubitatio. Quomodo enim conceptus visivus, qui materialis & divisibilis est, potest animæ rationali indivisibili, quæ est forma oculi humani inhærere?

Gabriel.  
ibid.

Respondet iterum, & bene, Gabriel: *Non videri magis impossibile, ut accidens divisibile inhæreat formæ indivisibili, inexistenti subjecto divisibili* (id est, animæ rationali quæ inexistit materiæ organi) *quàm ipsam formam indivisibilem inhærere subjecto divisibili.*

Sicuti ergo anima rationalis indivisibilis, & tota spiritualis, potest inexistere materiæ primæ divisibili, tanquam subjecto adæquato; quidni & conceptus visivus oculi humani, eidem animæ, ut subjecto inadæquato, valeat inhærere?

Denique, unio animæ rationalis ad materiam, etsi partim à materia dependeat, tamen ab anima rationali, ut altero extre-



extremo, ergo nihil vetat, quin etiam conceptus visivus simili habitudine & materiam oculi, & animam rationalem simul aspiciat.

Cum autem anima rationalis separatur à corpore, etiam si visus & aliæ potentiaë sensitivæ ei partim inhæreant, non tamen secum eas auferat, sicut intellectum & voluntatem, sed ipse extinguuntur, quia partim etiam materiae inhærent, & nisi in corpore & anima simul, subsistere non possunt.

## ARTICVLVS VI.

*Potentia anima speciem, & distinctionem suam sumunt ab objectis.*

**Q**Via potentiaë animæ sunt quædam naturales inclinationes, quæ animam in hoc, aut illud objectum faciunt propendere; ideo habitudine quadam essentiali versus illa objecta respiciunt, & merito differentias suas essentielles ab illis dicuntur accipere. Ex varietate enim objectorum quæ respiciuntur, varietas respectuum nascitur.

Sed tamen, quia potentia est essentialiter virtus efficiendi aliquem actum, habitudo & inclinatio ejus essentialis propinquius actum respicit, quam objectum. Actus enim quodammodo ducit potentiam versus tale, aut tale objectum. Quia enim visus est potentia efficiendi visionem, & visio non nisi respicit colorem, aut lumen; ideo visus versus idem etiam objectum ducitur à sua visione & inclinatur. Cum hoc tamen discrimine: quodd unusquisque actus objectum suum particulare (ut visio albi, albedinem, visio nigri, nigredinem) habeat; potentia verò omnia universim actuum suorum objecta comprehendat. Vnde eadem potentia actus specie distinctos, circa objecta specie distincta elicere potest. Ut autem objecta specie distincta terminare possint actus ab eadem potentia emanantes, convenientiam aliquam in modo immutandi potentiam, aut se illi objiciendi habere debent. Alias nulla foret ratio, cur ad eandem potius potentiam, quam ad diversas spectarent.

Capreol.  
q. 3. Prolog.

Sic omnes colores in hoc conveniunt, quod per medium extrinsecum, diaphanum, sine alteratione medij, vel organi immutentur sensum, ut Thomistarum facile doctissimus ait. Vnusquisque enim sensus uno certo & peculiari modo ab objectis suis immutari & ad operandum excitari postulat; unde si quod objectum illo modo & ingenio immutandi caret, extra sphaeram & circumferentiam objecti adæquati talis sensus summoverti debet. Hac de causa sonus, odor &c. non pertinent ad objectum visus: sicut nec è contrà, color ad objectum auditus, aut olfactus.

Arist lib. 2.  
c. 4. de anima.

Etsi verò omnes Philosophi ac Theologi post Aristotelem, doceant, potentias, habitus, & actus accipere speciem suam ab objectis; rem tamen istam valde implicuerunt & obtenebraverunt varijs & innumeris ferè objectorum distinctionibus. Objectum enim aliud est formale, aliud materiale, per se, per accidens, primum, secundarium, Quod, Quo, Cui, ratio sub quâ, per quam, propter quam &c.

Objectum formale primò vocatum est forma quædam circa quam potentia aliqua proximè versatur. Quæ appellatio ab objectis sensuum externorum sumplisse videtur initium. Manifestum enim est, quod sensus proximè tendant in formam aliquam accidentalem, & in illa hæreant, nec acie suâ usque ad subjectum, & materiam tali formæ substratam penetrent.

Hinc factum est, ut dixerint, potentiam & actum ejus non ab objecto materiali ( quod est subjectum talis formæ ) sed ab objecto formali tantum, speciem suam accipere.

Hoc enim actum & potentiam ipsam specificat, quod respectum ejus essentialem proximè, & secundum se terminat. Hoc autem in visu v. g. est color, non paries, aut hix; quia acies videndi ad materiam illam colori subjectam non pertingit.

Arist lib. 2.  
c. 3. Topic.

Simili modo in potentia appetitiva & actibus ejus, res se habet. Aliquando enim in objecto primario hærent, aliquando etiam usque ad objectum materiale, per se, & non tantum merè per accidens penetrant. *Is enim qui dulcedine delectatur, ait Aristoteles, vinum expetit, non quia vinum, sed quia dulce est.*

Dulce.



*Dulcedinem enim per se concupiscit, vinum autem per accidens: quia si austerum sit, non concupiscit amplius.*

Et alibi querens: *Cur vini dulcis, quod suavius est, vinolentum neminem esse arbitramur? Resp. An quod vinum dulce nullum saporem obtinet proprium vini, sed alienum? Igitur dulcis rei, non vini avidus appellandus est, qui vini dulcis desiderio tenetur. Modò enim dulcedinem percipiat, de subiecto nihil curat.*

Problem.  
Sect. 3.

Vnde D. Thomas: *Vnitatis potentia & habitus, inquit, consideranda est secundum obiectum, non quidem materialiter, sed secundum rationem formalem obiecti. Puta, homo, asinus, & lapis conveniunt in una formali ratione colorati, quod est obiectum visus. Ab illa igitur ratione formali colorati, hoc est à colore, non ab homine, asino, lapide unitatem & speciem suam visus accipit: licet non tantum colorem hominis, aut asini, sed etiam hominem & asinum videre dicamur; per accidens scilicet, & tanquam in veste illà coloris, sub qua latent.*

D. Th. resp.  
q. 1. a. 3.

Hinc nomen obiecti formalis tractum est longius, ut significaret omne illud quod secundum se proximè à potentia attingitur, etiam si forma non sit. Sic essentia divina vocata obiectum formale visionis beatificæ, & substantia creata respectu conceptus, quo Angelus, vel homo proximè & in se eam attingit.

Fieri autem potest, ut plura obiecta, ordine quodam propinquioris & remotioris, sed tamen in se & per se, non per accidens tantum uno eodemque actu attingantur. Nam eadem visione beatificà essentia divina proximè aspicitur, & remotè creatura aliqua, ad quam visio illa per mediam essentiam divinam, quasi penetrat & descendit. Item, quando Angelus essentiam alicujus creaturæ comprehendens, unico actu essentiam illam penetrat, & usque ad proprietates ab ea dimanantes pertingit.

Quo casu, utrumque obiectum est per se, sed unum primum, quod proximè, non alterius interventu, attingitur; alterum secundarium, ad quod remotè, & penetrando obiectum aliud quasi interpositum, actus pervenit.

S. Thomas tamen, & plurimi Scholastici sic loquuntur, ut

actum à solo objecto primario, non à secundo speciem suam accipere velint. Dicunt enim omnes visiones beatificas esse ejusdem speciei, propter objecti primarij identitatem; etiam si unus Beatus in essentia divina alias creaturas, quàm alter aspiciat.

Deinde tale objectum secundarium, vocant etiam materiale & per accidens; & comparant cum pariete aut nive, quod est propriè materiale & per accidens objectum respectu visionis.

Quæ tamè comparatio profectò in eo claudicat, quòd parietis substantia albedini subjecta, nullo pacto in seipsa per visionem albedinis attingatur, sed tota visio in colore illo hæreat; in superioribus verò exemplis, actus usque ad objectum secundarium penetret & descendat.

Ex qua penetratione manifestum esse videtur, oriri in tali actu aliquam essentialem, aut entitativam diversitatem ab alio actu qui non penetrat; aut si penetrat, ad alia objecta secundaria deflectit. Magis enim in entitativa sua perfectione inter se similes sunt duo actus, quibus in essentia divinâ eadem creatura videtur, quàm cum alio actu, quo alia creatura aspicitur. Nec ista similitudo major ex pari intensiōe aut remissione, vel ex forma aliqua accidentali, sed ex nuda actuum entitate nascitur. Ac proinde, si in omni rigore velimus philosophari, videntur duo tales actus, qui ad diversa objecta secundariò, & tamen per se terminantur, specie logicâ differre.

Quando verò S. Thomas & alij Theologi id negant, & à solo objecto primario speciem petendam esse dicunt, solam habitudinem principalem & quasi capitalem, quatenus ad objectum primarium & immediatum terminatur, pro essentiali reputant; appendiculam verò, quâ eadem habitudo ad objecta secundaria, ultra primarium quodammodo excurrit, instar proprietatis cujusdam essentiam consequentis, & ei velut appendice, potius imaginantur, quàm essentia partem, quæ quod in re est principale, & maximè intimum, ac veluti centrale constituere solet. Aut certè nonnunquam ad entitatem (quemadmodum etiam partes integrales intensivæ, vel extensivæ)

non



non ad essentiam rei, pertinere dicunt.

Ex simili quoque, ut opinor, imaginatione ortum est, ut assensus conclusionis, non à conclusione objectivâ syllogismi, quam tamen intrinsecè & in se attingit; sed ab antecedente, & motivo quod intellectum ad illum assensum determinat, speciem suam rapere, dicere solent. Nam sicuti quando Angelus unico oculi, ut sic dicam, conjectu & sine discursu, proprietatem in essentia, & consequens in antecedente videt, proprietas quæ in consequente ponitur, est objectum secundarium & remotum, ad quod intellectus Angeli penetrando antecedens, excurrit; ita quoque quando per discursum homo unicum illum Angeli assensum in duos quasi resolvit, quorum uno antecedenti, altero consequenti assentit; assensus consequentis dicitur etiam ab antecedente (sive à motivo quod in antecedente ponitur) specificari; non autem ab ipso consequente objectivo, in quod tamen directè tendit, cum actuali, vel virtuali reflexione intellectus super motivum antecedentis.

Vnde quia in assensu illo unico, quo intellectus Angeli perspicacior, per antecedens usque ad consequens penetrat, consequens vocatur objectum materiale illius assensus; ita etiam in discursu humani & obfusioris intellectus, consequens syllogismi appellant objectum materiale, etiam si secundum se assensu scientifico directè attingatur; negantque specificationem istius assensus inde sumi, sed à motivo antecedentis, tanquam objecto formali, sive objecto Quo, & ratione sub qua elicitur talis assensus. Hinc istud, & talia tam sæpe D. Thomas: *In scientia Geometria materialiter scita sunt conclusiones; formalis verò ratio sciendi sunt media demonstrationis.* Et ab istis medijs, non à conclusionibus quæ inde deducuntur, speciem actus scientifici desumi dicit.

D. Th. 2. 2.  
q. 1. a. 1.

Totâ verò istâ nominum varietate (objectum Quo, ratio formalis sub Qua, per Quam, propter Quam, & ejusmodi) nihil aliud quam idem objectum formale significatur, quatenus sub uno, aut alio respectu ad objectum materiale concipitur.

Objectum verò *Cui*, est terminus, cui aliquod objectum *Quod* defertur. Vt Deus est objectum *Cui* religionis. Cultus enim ei per religionem, tanquam primo creaturæ principio defertur. Creditor est objectum *Cui* iustitiæ, quâ debitor ei debitum suum solvit. &c.

Hoc autem objectum *Cui*, potius ad materiale, quàm ad formale objectum spectat. Nam præter illud, est aliud objectum formale, propter quod Deo, aut proximo aliquid debitum offertur. Excellentia namque primi principij, quæ in Deo apprehenditur, est objectum formale, propter quod Deo cultus defertur. Item, jus in re, vel ad rem, quo quis debitor alteri solutionem defert, per quam jus illud vult dissolvere, est objectum formale actûs iustitiæ.

Applicatio quoque objecti formalis ad varia materialia, censetur variare objectum formale, & speciem actûs mutare. Sic plurimi Theologi docent adorationem imaginis respectivam specie differre ab adoratione absolutâ prototypi; quia excellentia prototypi, etiam si utriusque adorationis sit objectum formale, aliter tamen prototypo, tanquam forma subjecto applicatur, & aliter imagini, tanquam terminus relationi à qua respicitur. Vnde prior applicatio, intrinseca; posterior extrinseca est.

Pari modo, multi amorem Dei ab amore proximi specie distinguunt, quia licet eadem divina bonitas & perfectio sit formale objectum utriusque; intrinsecè tamen Deo, extrinsecè proximo applicatur.

Simile quid in actu charitatis, & actu spei licet animadvertere. Nam propter divinam bonitatem Deo quasi inhærentem, Deus in se charitate amatur; speramus verò eandem, tanquam summum nostrum bonum possidere; sed extrinsecè per visionem intellectûs & fruitionem voluntatis, nobis applicatam.

Denique, si obscuras istas differentias actuum animæ nostræ acutè & altè introspeciamus, licet semper aliquam differentiam ab objecto suo formali rapiant; non est tamen necesse, ut illa semper sit differentia ultima, qua actus unus à quocumque



cumque alio essentialiter distinguitur. Possunt etenim duo actus specie diversi idem undique objectum formale attingere, & vel ex parte modi tendendi, vel causę efficientis, differentias distinctas contrahere. Tales videntur esse, velleitas, & efficax volitio ejusdem per omnia objecti. Modi enim efficaciter, & ineffaciter tendendi in eundem directę scopum; quorum unus impressiori, & velut robustiori modo penetrat; alter infirmiori, & tanquam extremam solum superficiem attingat, videntur actus specie distinguere. Similiter assensus, & nuda apprehensio ejusdem propositionis obiectivę.

Visio quoque, & imaginatio, circa hunc colorem ita versantur, ut imaginatio nihil omnino aliud in isto colore attingat, quod oculus non viderit. Species enim phantastica ab oculo in cerebrum trajicitur, quę hunc colorem qui ante oculos est, eodem modo ( quantum est ex parte objecti ) exprimat, quo modo ab oculo conspectus fuit. Imaginatio tamen specie a visione oculi distinguitur; quia ex essentiali sua ratione, a sensu interno; visio a sensu externo, emanare postulat.

Ac denique duo actus, unus naturalis, alter supernaturalis ( si multis Theologis credimus ) in idem undique objectum materiale & formale ita tendere possunt, ut nihil in objecto attingat unus, quod non & alius; & tamen specie inter se distinguere nemo dubitat. Tales fortasse sunt actus temperantię naturalis, & supernaturalis circa idem omnino objectum; aut actus unus fidei, quem hæreticus propter divinam auctoritatem; & alter, quem Catholicus propter eandem auctoritatem, & circa eandem propositionem elicit.

Quidam tamen totis viribus contendunt actum naturalem a supernaturali semper objecto formali distinguere, & inde differentiam ultimam, qua inter se specie distinguuntur, perpetuam petendam esse.

Tanner.  
disp. 2. q. 2.  
d. 2. de spe  
& char.

Sed nunquam acquiescere potui. Sunt enim alię habitudines in actibus, præter illam quę est ad objectum: cur ergo per illas habitudines distinguere non poterunt actus, etiam si in objecto, tam materiali quàm formali convenient?

In S. Thomę Theologia, præter virtutes cardinales acqui-

fitas

fitas naturalis ordinis, sunt aliæ supernaturales infusæ: quoniam autem obiecto formali ab invicem discretæ? Loquimur verò de obiecto formali quod per se ab actu attingitur: istud enim solum est, quod habitudinem essentialem actus terminat, & speciem tribuit. Si enim sit tantum formalitas quædam obiecti, quæ actu non attingitur, non magis speciem actui dare potest, quam dulcedo lactis (quæ à visu non attingitur) visionem albedinis lactis specificare, & à visione albedinis nivis distinguere valeat.

Actus autem virtutis iustitiæ, aut temperantiæ supernaturalis, in quodnam objectum formale dirigitur, ipsumque attingit, quod ab actu iustitiæ, aut temperantiæ naturalis non perinde attingi potest?

Quidam aciem intellectus per omnia versantes, tandem non aliud invenerunt, quam quod actus iustitiæ, & temperantiæ supernaturalis, actu fidei supernaturalis dirigi postulent; actus verò naturales cognitione tantum naturali regantur. Sed profectò actus intellectus, qui actum voluntatis dirigit, non est pars obiecti formalis, sed ipsum obiectum formale, in quod collimet, voluntati proponit. Vnde isti non evadunt, sed succumbunt difficultati.

Alij denique varias in eodem objecto materiali attingibilitates, ut vocant, pro obiectis formalibus sibi fingunt; qualis est in colore visibilitas, in objecto scientiæ, scibilitas &c. Sed istæ sunt tantum relationes rationis; quæ non præcedunt actus, sicut obiectum formale debet, sed sequuntur ipsos, sicut relatio suum terminum, aut suam rationem fundandi sequi solet.

Hæc generatim & breviter jam quasi digito monstrasse sufficiat, pluribus hanc rem Lib. IV. disputaturi, ubi de operationibus intellectus & voluntatis, Deo dante, differemus.




PHILOSOPHIÆ CHRISTIANÆ

# DE ANIMA

## LIBER SECVNDVS

De Anima vegetativa.



Tactatis quæ ad animam in genere visa sunt pertinere, descendimus ad species; inter quas prima est vegetativa. Hæc ulterius in tot species subalternas dispergitur, quot sunt modi insigniter diversi administrandi operationes vegetatrices. Longè enim aliter, & per alia instrumenta, arbores & animalia nutriuntur, accrescunt, & generant; & inter animalia, aliter homo, aliter quadrupes, volucris, piscis.

De anima vegetativa plantarum & brutorum pauca, de hominis plura differemus; quia Philosophiam Theologiæ ancillam formamus. Mysteriorum autem fidei, & Casuum conscientiæ non pauca ab animæ hominis vegetativæ operationibus dependent, nec sine earum cognitione, ab imis fundamentis intelligi possunt.

## CAPVT I.

*Quid anima vegetativa.*

Videtur compendiosissimè posse definiri: Anima, cujus vitalis operatio ad substantiam viventis tendit. Tres enim generaliter sunt principales ejus operationes vitales, nutritio, accretio, generatio. Per nutritionem convertitur alimentum in substantiam viventis. Eadem verò conversio vocatur etiam accretio, quatenus per eam, simul

A a

cum

cum nova parte substantiæ, accedit viventi major quantitas. Vnde accretio re verâ proximè ad substantiam terminatur, licet nomen accretionis sortiatur, quatenus remotè comparatur ad quantitatem, quæ substantiæ est appendix. Generatio ad novi individui viventis substantiam tendit. Alimenti quoque attractio, alteratio, ac in varias formas viales, ut chyli, chymi &c. transmutatio, tendunt etiam, saltem remotè, & tandem appellunt, ad substantiam viventis; quia nutritioni ministrant, adducendo aut præparando ei materiam, in quam inducat formam viventis.

Animæ autem sensitivæ & intellectivæ operationes, non ad substantiam viventis generandam, aut aggenerandam tendunt; sed ad accidentia varia, ut ad cognitiones sensuum & intellectûs, ad affectus appetitûs & voluntatis, quibus substantiam ornant sui corporis.

## CAPUT II.

*De Alimento.*

**P**Rima operatio animæ vegetantis est nutritio, cujus materia circa quam, seu objectum, est alimentum: quod proinde ordine naturæ, prius cognosci debet; quia actiones specificantur à suis objectis, & per illa definiuntur.

Quid nutritio.

Nutritio enim est conversio alimenti in substantiam viventis, facta ab anima vegetativa, virtute caloris naturalis, ut fiat instauratio partium viventis, quæ defluunt.

Nutritionem autem animaliam perfectorum præire debent tres principales alimenti concoctiones, quarum prima in ventriculo, secunda in jecore seu hepate, tertia in unoquoque corporis membro perficitur. In animalibus quoque imperfectis, imò etiam in plantis, partes quædam ventriculo, & hepati analogæ sunt, in quibus alimentum coquitur & perficitur, antequam in substantiam cujusque partis faceßat.

Non indignabuntur autem, spero, Æsculapij & Medicorum filij, si eorum paulisper fines ingrediamur: quia olim Sapientes

*Philo-*



*Philosophiam Medicinæ forerem vocaverunt, & Aristoteles ait Naturalium, Philosophorum σχαπιδάτους σχεδὸν εἰς τὰς ἀρχὰς ἰατρικὰς τελειῶσαι elegantissimos ferè in principia Medicinæ desinere, & Medicos incipere, ubi desinunt Philosophi Naturales.*

Tetull. c. 3.  
de Anima

Arist. lib. de  
sensu c. 1.

## ARTICVLVS I.

*An alimentum debeat esse corpus mixtum.*

**F**RANC. Vallesius negat aquam, aut ullum elementum alere, & Medicos plerosque consentire dicit. Ac de aqua, rem credit esse certam; quia est substantiæ fluxæ & sero similis, nec ullius pinguedinis particeps, quâ possit corpori nostro affigi. In ea mente videtur Aristoteles: *Cibum oportet esse compositum, ait, quia quæ nutriuntur non sunt simplicia.* Sed sanè, si aqua non alit, frustra lignum plantatum super aquas, ad humorem mittet radices suas: falsum erit, plantatum unquam esse pinum, quam pluvia nutritur: falsus S. Augustinus, cum dixit, imbrem, quem nubes fundunt, in vinum & vitem converti. Rami quoque ab arbore matre avulsi, in domibus & templis nostris flaccidam & languentem vitam aquæ fuctu aliquamdiu tolerant. Quid deinde S. Paulus Eremita, & tot alij Anachoretæ facient, qui ad siccum panem nil præter fontanam addebant? Non enim solâ materiâ panis, sed etiam humido alebantur; aliàs enim non liquidum, sed concretum in venis sanguinem habuissent. Aristoteles deinde docet omne animans humido nutriri. Et de aqua difertè, τὸ ὕδωρ δύσμεν ὄζος καὶ ὄινος, aqua potentiâ est acetum & vinum. Si verò aqua in vinum, quod quasi pars vitiæ & vitis est; cur non etiam in folia & pampinos converti potest? Et alibi, aquam generale esse alimentum, ait, & in omnibus, etiam siccis alimento esse. Vnde Homerus aquam τροφικώτατον maximè alibilem vocat. Et Athæneus, aquam alere, inquit, manifestum est, quod eâ solâ nutriantur quadam animalia, ut cicade. Quippe thymo pascuntur apes, & rore cicade. Alit ergo sanè aqua, sed materiæ siccæ ac solidiori, antequam sumatur, aut in ventriculo saltem, permixta fermentataque,

Valles.  
lib. 6. c. 6.  
Contr.

Aristot. c. 6  
de Sensu.

Ierem. 17.

Isa. 44.

S. August.  
Tract. 8.  
in Ioan.

Arist. lib. 8.  
c. 5. Metaph.

Lib. 4. c. 2.  
de Generat  
animal.

Virgil.

S. Thom. 4.  
d. 2. q. 1. a. 4.

tataque, ut per chylosim & chymosim valeat in sanguinem converti, ac deinde in carnem concrefcere. Verè igitur alicubi. S. Thomas: *Quamvis aqua in se non nutriet, tamen commixta nutrit.* Et quidem tam celeriter, ut si post siccitatem pluvia superveniat, herbe antea flaccide subito erigant caput, & sic crescere festinent, ut lintea fortè in viridario superextensa paulillo tempore penetrent, si fila non satis compressè texta sint, ut mihi narravit qui viderat.

Si autem aqua sola ventriculo infundatur, nihil, aut minimum inde rapit vivens, quia lubrico & celeri motu trajicit intestina, & in vesicam elabitur; ut patet in Spadanâ, quæ eadem mensurâ quâ hausta est, egeritur. Sed tamen etiam vino idem ferè continget, si jejunis intestinis, nullo solidioris cibi sustentaculo, committatur. Hoc voluit, credo, Aristoteles, cum dixit, τὰ ὑγρὰ δυσπεπτάτα, *humida difficillimè concoqui.* Fugiant enim & elabuntur, antequam possint subigi; deinde nullo solidiori retenta & commacerata, vix possunt corpori viventis affigi. Unde cum Aristoteles ait, *oves potu maxime pinguescere, idèq; pastores salem paleis solere inspergere, ut sitibunda plüs aqua hauriant,* intelligit non ex solâ aquâ, sed sicciori alimento confermentatâ, illam ovium pinguedinem concrefcere. Nam ne pisces quidem solâ aquâ nutriuntur, sed solida quæ aquis innatant, unâ devorant, aut aquæ fundum fodiendo scrutantur, ut herbarum radices vellicent, sicut fatentur, qui eos in vivarijs alunt.

Meritò igitur dixit Aristoteles, alimentum oportere mixtum esse, quia mixtum est corpus animantis, in quod debet transire. Non quia in qualibet parte alimenti debeant omnium elementorum formæ esse, aut formæ quædam aliæ heterogeneæ, quæ sint necessariae dispositiones ad introducendam animam viventis, ut quidam Medici sunt nuper commenti; sed quia, ut elementum facesset in substantiam viventis, debet antea alijs elementis, aut mixtis permisceri, ut fiat una conveniens crasis, capax animæ viventis. Et hoc, credo, tantum volunt, qui negant animal, aut plantam puro elemento ali.

Sed:



Sed elementum non potest proximè transire in vivens, in-  
quies.

Quid mirum? quia nec panis potest, qui tamen maximè  
alic. Sufficit igitur ad nutritionem, ut aqua mutetur in sub-  
stantiam viventis, sicut panis, caro, piscis: id est, particula  
quædam ejus cum solidiori cibo fermentata, in ventriculo  
coquantur primò in chylum, deinde in chymum, postremò  
in partem viventis. Calor enim naturalis partium viventis  
non est tam efficax & validus, ut alimentum crudum, aut  
prout ventriculo iniicitur, in partem viventis convertat; sed  
qualitates alimenti contrariæ frangi, subigi, & domari antea  
in ventriculo, jecore, venis debent, ut à calore partium pos-  
sint vinci.

Olim quoque vulgatum est, chamæleontem, *nec cibo, nec* Plin.  
*potu, nec alio quàm aëris alimento ali.* Negat tamen id Andr. Lau-  
rentius, quia fortasse apud Scaligerum legit, *Io. Landium vi-*  
*disse chamæleontem lingue repentino iaculatæ muscam, quæ in eius* Scalig.  
*esset pectore, legisse.* Sed idem tamen Scaliger, *quod aër illi pro cibo* Exer. 196.  
*aliquamdiu sit, ex eo ait patere; quod & annum integrum aiunt ine-*  
*diam tolerare, & ubi accepit hiatu auram & occlusit malas, turget*  
*ei venter.* Unde ex aëreo & futile hoc alimento, pellicula &  
cartilago totus est chamæleon, *nec usquam carnem, nisi pauxil-* Arist. lib. 2.  
*lum in capite, maxillis, & extremo cauda habet.* Alic igitur etiam c. 11. Hi-  
aër, qui tamen elementum est. stor. ani-  
mal.

Deinde Hippocrates, Galenus, & Medicorum quis non?  
ex aëre pulmonibus, aut naribus attracto, spiritum vitalem  
in corde, animale in cerebro ali. affirmant. Spiritus autem  
isti aut vivunt, aut certè quasi partes viventis habentur.

Medicis concors est S. Augustinus, qui aërem *stabile alimen-* S. Aug. lib.  
*tum vocat, & aurâ istâ undique circumfusâ corpus intrando, ali, &* 4. c. 3. de  
*relevari exeundo, dicit.* Origin.  
animæ.

In igne quoque, ut pisces in aqua, pyraustas gigni & vive-  
re Aristoteles prodidit; quidni ergo etiam igne partim &  
atomis per ignem volitantibus ali. possint? Historiam tamen  
Aristotelis de Cypri pyraustis, Medici quidam, scio, irrident;  
sed affirmat Plinius cum Philosophis. *In Cypri ararijs fornacibus,* Arist. lib. 5.  
c. 19. Hi-  
stor. animal.

*inquit,* Plin. lib. 11.  
c. 36.

S. Aug.  
lib. 12. c. 4.  
Civit.  
Sen. lib. 5.  
6. Natur.

inquit, ex medio igni maioris muscæ magnitudine volat pennatum quadrupes. Appellatur Pyralis, à quibusdam Pyrausta. Quamdiu est in igne, vivit, cum evasit longiore paulò volatu, emoritur. Huc respiciens, credo, S. Augustinus, in ardore ignis nonnulla animalia, per convenientiam salubriter vivere dixit. Seneca quoque ignis qui omnia consumit, inquit, quadam etiam creat, & quod videri non potest simile veri, sed tamen verum est, animalia igne generantur.

Et Scaliger negantibus os ferulæ batuens: Ferulæ, inquit, castigandi sunt, qui hoc quasi temerè proditum ab Aristotele calumniantur, temerarij ipsi reprehensores. Cum ea quæ in alijs terrarum mariumque tractibus inventa sunt, contemplamur, omnia iam libet credere. Sed barbara ingenia, addit, levissimis momentis impelluntur ad divini atque incomparabilis Herois obrectationem.

Plin. lib. 19  
c. 1.

Certè enim si lapis friabilis & textilis amiantus, tam ignibus inviolabilis est, ut mappæ ex eo textæ, impunè iaciuntur in ignem, ut maculas & sordes exugat, sicut vidisse se testatur Plinius; nescio cur quasi ferreæ quædam muscæ creari à Deo non possint, quæ in igne vivant, & eo, ut pisces aquâ, nutriantur.

Gen. 3.

Ultimum denique elementum terra, quidni in serpentis, aut alijs animalculi nutrimentum cedere possit? Maledicens enim olim serpenti Deus, *terram comedes*, inquit, *cunctis diebus vitæ tuæ*.

Terrâ igitur, saltem impurâ, & imbribus, alijsque miscellis fermentatâ vivere animal potest. Et nonne certo etiam sic nutricantur & vivunt arbores?

Ex superiori doctrina patet jam infirmitas argumenti, quo Theologi quidam probant, stillam aquæ, quæ calici Eucharistico infunditur, non posse in vinum verti, quia nullum vivens elemento nutritur. Nam & viventia quædam elementis nutriuntur; & verius est, vinum non vivere, ne quidem in vua, multo minùs in calice aut vase. Nec fortè necesse est, aquæ misceri aliud solidius elementum, aut corpus mixtum, ut in vinum convertatur; quia vino, sicut corpori solido affigi aqua non debet, sed ut liquidum liquido permisceri.



## ARTICVLVS II.

*An spiritus odoriferi carniū, florum, tabaci &c. alimentum  
esse possint corporis humani.*

**P**linius narrat Indorum quandam gentem *halitu tantum* Plin. lib. 7  
vivere, & odore quem naribus trahant. Nullum illis cibum,  
nullumq; potum: tantum radicum florumq; varios odores &  
silvestrium malorum, quæ secum portant longiore itinere, ne  
desit olfactus. Sed & Marf. Ficinus censet, odores qui ex re- Ficin. l. 2.  
bus nutrientibus expirant, ut pomis, pane, recenti, & c. 18. De  
maximè carnibus assis, & vino etiam nutrire. vit. produc.

Aristoteles tamen negat, aërem, aut spiritus etiam corpo- Arist. cap.  
ribus mixtis exhalantes alere; quia non habent eam corpu- 5. De sensu  
lentiam & crassamentum, quod necessarium est, ut possint  
corpori humano adglutinari, & cum eo in vnum concreſcere.  
Vnde Agellius ait, historiam illam Plinianam, *omnem admirati-* Agell.  
*onis*, imò fidei, *modum egredi*. Attamen aromatum, rosarum, lib. 9 c. 44  
& id genus spiritus benigni, corpus, & præcipuè cerebrum  
recreant, & conducunt sanitati. Deinde in pulmones cum  
aëre attracti, in sinus cordis penetrant, & ex ijs sanguini arte-  
rioso permixtis fabricantur spiritus vitales in corde, & deinde  
animales in cerebro; sicque possunt fluidam illam hominis  
substantiam, si non solidas ejus partes, nutrire. Verum hæc  
non est propria nutritio, nec facta ab anima, quæ spiritui  
vitali aut animali insit, cum longè verius sit, hos spiritus ex-  
animes esse. Vnde nec propriè partes hominis sunt, sed sub-  
stantiæ quædam tenues & raræ, quæ per arterias & nervos  
fluunt, ab illis (ut aër à siphonibus & fistulis, per quas meat)  
discontinua. Si tamen spiritus odorati non liberè vagentur,  
sed solidiori alimento compediti sint & impliciti, possunt  
cum cetero alimento tantum crassamentum à facultate nutri-  
tiva accipere, ut in partem viventis solidiorem, aut in humi-  
dum ejus radicale valeant constipari & facessere.

Quid ergo? inquires, nonne vulgatum est, coquos culinæ  
sunt

suæ nidoribus, tabacobibulos fumis pasci, & vires recreare?

Neand. in  
Tabaco.  
log.

Fateor, minùs esurire coquos, & quicumque ollarum halitus ore patulo excipiunt. Sed aliud est, nutriri, aliud inedia tolerare. Nam aliquid inde in stomachum vadit, quod famen quidem solatur, sed spe vanâ, dum fumo inflatus, credit materiam se solidam habere, unde chylum valeat elaborare. Similiter nec tabacopotæ (quidquid ipsi jactent) nutriuntur fumo tabaci, sed ut rectè Tabacologus quidam, *pituitosos è cerebro humores*, vapore & qualitate fumi, *eliciunt, quos succi melioris penuriâ, in suum nutritum convertit ventriculus*. Imò, si plusculum ex fumo, aut spiritu tabaci in ventriculum descendat, sentimus eum, tanquam ab inimico torqueri, & ad vomitum provocari. Vnde licet Ficino daremus, ex spiritu vini & carnis assæ leve & fugax quondam nutrimentum rapi, quia spiritus illi rerum nutrientium sunt, & stomacho blandissimi; non tamen id dabimus de spiritu tabaci medicamentoso, & stomachi inimico. Hinc in Synodo nupera Episcopatus Canariarum præcipitur sub poena excommunicationis latæ sent. *Ne quis Clericus intra duas horas post celebratam Missam, sumat tabacum*: idque propter periculum vomitûs. Potest etiam tabacum, alterando corpus, & inflammando spiritus, vigorem quandam & vires corpori conciliare. Sed non solidas & fixas, quales subministrat alimentum, sed inanes & fugitivas, quales ebrietas solet. Nam & tabacum etiam inebriat. An verò sacerdos, aut communicans dici possit naturaliter jejunus ad communionem, à Theologis intra XL. istos annos, quibus Tabacaria hæresis Europæorum invasit animos, coeptum est disputari. Et nos ergo etiam de re ista aliquid philosophemur.

### ARTICVLVS III.

*An spiritus tabaci naturale ieiunium solvat.*

**I**N primis, ut res aliqua jejunium naturale frangat, non est necesse, ut sit alibilis; nam medicamenta non alunt, & tamen stomachus qui ea sumpsit, non est amplius naturaliter



raliter jejunos. Vnde tabacum, quod inter medicamenta numeratur, in stomachum descendens, etsi naturale fortasse jejunium solveret, non tamen Ecclesiasticum, quale illud est, quod Ecclesia in Quadragesima præcipit.

Sed distinguendum est inter tres modos, *in folio, in pulvere, in fumo*, quibus tabacum sumi solet.

Antonin. Diana, vir qui dum scrupulos & angustias conscientiarum metuit, eas egregie relaxat, uno fere verbo se expedit. Tabacum, sive in folio, sive in pulvere, in ventriculum demissum, ait non solvere jejunium naturale, quia intrat stomachum per nares, ac per modum respirationis, non per os, per modum cibi aut potus. Vnde cum Franc. Suario, Grando, & quibusdam alijs credit, si aqua, in notabili etiam quantitate, assumatur per nares, non solvere naturale jejunium; quod faceret, si tantundem per os biberetur. Hinc consequens videtur, ut si quis etiam integrum poculum aquæ aut vini, per nares (quod fieri potest, & patet per phlegmata, quæ e naribus in foramina palati retrahuntur, & deglutiuntur) sugeret in ventriculum, maneret naturaliter jejunos ad sacram communionem. Quod sanè mihi videtur esse ridiculum. Nam Ecclesia non tam modum & viam sumendi per os, aut per nares, æstimat, quàm cibi aut potus quantitatem, quæ ante sacras Eucharistiæ species, perventura est ad ventriculum. Indecens enim existimat, ut aliquid tale extrinsecus assumatur per oesophagum, quod sacram hostiam præcedat. Id verò quod per nares in palatum, & deinde per oesophagum in ventriculum traicitur, non intrinsecus per modum pituitæ, aut sanguinis e capite decidit, sed extrinsecus infunditur. Cùm ergo Conc. Toletanum dicit, *Nullus post cibum potumque quàmlibet minimum sumptum, Missas facere præsumat*; etsi de sumptione quæ ore fit, fortasse solum cogitaverit, quia non alia via cibus potusque intrare solent; si tamen Patres illi rogati fuissent, quid censerent, de eo, qui ore fortè impedito, jussus esset à Medicis, pharmacum per nares attrahere; respondissent, ut existimo, talem jejunum non esse. Nam alias, si homines, aut hominum monstra, Astomi, id est, sine ore nascerentur, quibus narium

Dian.  
Tract. 13.  
Miscel. 1.

Conc. Tolet.  
let. 7. can. 2.

factu visitandum esset, non possent jejunium naturale solve-  
re, quod videtur incredibile. Nec S. Thomas, qui huc citatur,  
ait cibum, ut dicatur comedi, necessariò oportere per os assu-  
mi, sed *exterius*; quod fit, etiamsi per nares fumatur. *Come-*  
S. Tho. 4  
d. 8 q. 1. a. 4. *stio*, inquit, *principaliter dicitur à sumptione exterioris cibi; quam-*  
*vis terminetur ad traiectionem cibi in ventrem, & ulterius ad nutri-*  
*tionem.* Vnde tantum infert: *Et ideo quæ interiorius geruntur, sine*  
*exterioris cibi sumptione, non videntur solvere jejunium natura, nec*  
*impedire Eucharistia perceptionem; sicut deglutitio saliva.*

Censeo tamen cum Diana, Alphonso Legionensi, & alijs,  
tabaco in folio, aut pulvere per nares attracto, non solvi jeju-  
nium naturæ; non tamen quia per nares intrat, sed quia ad  
stomachum non descendit, eâ saltem quantitate, quæ æstimari  
debeat. Vnde perinde erit, etiamsi ori imponatur. Nam solum  
salivam & pituitam è capite attrahit; & licet aliquid pulvisculi,  
aut spiritus tabaci (secus tamen, si totum folium) pituitæ  
permixtum, in ventriculum vnâ descenderet, pro nihilo, aut  
tanquam particula salivæ duceretur.

Multo minùs tabaci fumus per syringem ore attractus jeju-  
nium solvit. Quia aut per nares expiratur, aut si quid in sto-  
machum etiam notabili quantitate illabitur, non tamen per  
modum cibi aut potûs; licet per metaphoram & abusivè, bi-  
bere tabacum vulgò dicatur, qui fumum ore fugit. Cibi enim  
& potûs humani ratio in materia non tam spiritali, sed cor-  
Dian. ibid. pulentiori consistit. Vnde verum existimo, quod Diana addit:  
*Quòd si quis ex industria aperto ore fumosum halitum carnis in magna*  
*quantitate, tempore Quadragesima, respirando attraheret, nec jejunium*  
*naturale, nec Ecclesiasticum solveret.* Halitus enim illi, uti etiam  
fumus tabaci, inter cibos & edulia haberi non debent; licet in  
Tribunali quodam Belgico nuper, morali, aut conviviali  
potiùs ratione, quàm physicâ speculatione, aliter fuisse judi-  
catum sciam. Cum enim inter Hispaniæ & Angliæ Reges  
convenisset, ut nulla edulia Angli veherent in Hollandiam,  
navis Anglica intercepta est à Flandris Duynkercanis, quæ  
tabacum eò vehebat. Disputatum ergo, an tabacum inter edu-  
lia cenferi deberet. Et debere, est judicatum; quia Angli inter  
mensas



menſas ſecundas, tabaci ſyringas apponunt. Quando ergo Theologi aiunt, id quod ſumitur per modum reſpirationis non frangere jejunium naturæ, de tali ſubſtantia rara & ſpiritali intelligi debent, non de omni, quod per nares & inſtrumentum reſpirationis intrat ſtomachum, etiamſi aqua, vinum, aut ſimilis liquor eſſet, ut philoſophatur Diana, meo calculo, non bene. Pergit verò Diana, ac cum Io. Sancio, & Card. Lugo aſſerit, eum ad Euchariftiam manere jejunum, qui in magna quantitate deglutiret nummos aureos, plumbum, aut lapillos; quia non ſunt cibi. *Cibi enim nomine, inquit, non intelliguntur, niſi ea, quæ per ſe loquendo, alterari poſſunt à ſtomacho.* Et hanc regulam à Card. Lugo præformatam recipit: *Si cibus ſit in quantitate notabili, nullum videtur eſſe diſcrimen inter ieunium naturale & Eccleſiaſticum, niſi excuſet materia paruitas. Vnde ſi quis deglutiret, ait, in magna quatitate nummos aureos, non frangeret jejunium Eccleſiaſticum; ergo nec frangeret naturale.*

Verum, ſi hanc regulam recipimus, amphora rhabbari epota jejunium naturale non ſolvit, quia jejunium Eccleſiaſticum non ſolveret; quod tamen paſſim jam ab reiicitur omnibus. Nec Theologi dicunt, oportere eſſe cibum aut porum, id quod jejunium naturale ſolvit; ſed debere ſumi per modum cibi aut potûs, id eſt, comedi, aut bibi, ſive extrinſecus aſſumi, & propria actione vitali in ſtomachû traijci: quomodo etiam venena, & mera medicamenta ſumi poſſunt, licet minimè ſint cibi. Nam tantum quod coctum à natura accedit & corpori adheſcit, alimentum appellatur, inquit Ariſtoteles; quod autem domari non poteſt, ſed venas ingreſſum, per exceſſum caliditatis vel frigiditatis perturbat, hoc naturam habet medicamenti. Si Diana fortè reponat, venena poſſe alterari à ſtomacho, etiamſi non valeant concoqui, ideoque generali nomine ciborum poſſe appellari. Hac jam ratione, etiam aurum, plumbum, lapides erunt cibi; cum imperfectam quoque alterationem à ventriculo poſſint ſuſcipere.

Itaque non malè Nugnus, quem reſellit Diana, aſſimat, eum qui papyrus degluſijt, non manere naturaliter jejunum, nec poſſe eo die Euchariftiam ſumere. Et Antonius Legio.

Henriq. de  
Euchar.  
c. 40.

nensis, à Dianâ quoque reiectus, *Quantum ad me, inquit, censeo hoc praeceptum tam tenerum & delicatum, & hanc doctrinam esse veram; ut si quis comedat plumbi frustum, aut aliquem nummum, frangat ieiunium naturale, nec illo die possit recipere sacram communionem.* Henriquez quoque: *Quod si rem parvam, etiam non nutritivam, inquit, ut papyrus, per modum cibi aut potus traiecisset, etiam per ignorantiam, ieiunius non censeretur.* Nam aliàs feminae gravidæ, cittâ laborantes, post picem, ceram, lapillos, carbones, quos viriato & absurdo appetitu devorant, manerent naturaliter jejunæ. In magna etiam & Saguntina fame, calceorû coria, animalium cornua, & id genus non edulia, ad fallendam, non saturandam famis impatientiam, edi solent; & tamen istis, opinor, naturale jejunium solvitur. Licet verò ea quæ defferuimus de tabaco, jejunium naturale minimè solvente, vera existimem, indecens tamen est, ante sacram communionem sumere, meritoque nupera Synodus Provincialis Mechliniensis sacerdotibus inhibuit. Duæ quoque Indicæ Synodi, Limensis in Peru, & Mexicana præcipiunt: *Ne ullus sacerdos ante Missam, aut quævis alia persona ante communionem, quidquam tabaci per modum fumalis evaporationis, aut quovis modo percipiat.* Quas Synodos, ut fatetur Diana, S. Congregatio Card. approbavit. Vnde Franc. Niger: *An usus tabaci, inquit, ante Missam sit licitus? Utuntur omnes communiter, & dicunt, non esse illicitum, ac præcipuè Hispani. Ego tamen laudarem contrarium: quia sapissimè descendit in guttur, & videtur irreverentia, & video timoratos scrupulizare.*

#### ARTICVLVS IV.

*An alimentum debeat esse ignobilius vivente.*

Caiet. 2.2.  
B. 1.4.2.2.

**A** Limenrum, inquit Cajetanus, *suapte natura debet esse imperfectius illo quod alitur; quia ordinatur ad id quod alitur, sicut medium ad finem. Constat autem universaliter, finem esse perfectiorem ijs quæ suapte natura ordinantur ad finem. Et alibi ipse: Bestialitas, inquit, quæ quidam vescuntur carnibus humanis,*



manis, est contra præcepta iuris naturalis. Sicut enim naturaliter sola femina humana est habilis ad coitum hominis; ita naturaliter sola vegetabilia & animalia irrationalia sunt materia habilis ad nutriendum hominem. Vnde cum Deus post diluvium omnia animantia homini concessit in cibum, non concessit hominem. Aliàs, cum nullus in cibo soleat hominibus esse usus morticinæ carnis, liceret homines venari, ut Anthropophagi in India faciunt, & eos occidere in cibum.

Deinde ne quidē bruta solent edere carnes animalium ejusdem speciei: ut pro miraculo habeat Plinius, cuculum absumi ab accipitre: sola omnium avium, inquit, à suo genere interempta. A suo genere, dixit, quia re verâ distincte speciei est cuculus ab accipitre. Vnde multo magis contra naturā est, hominem homini accipitrem, aut lupum fieri, & carnes ejus devorare. Non quod palatum nostrum à carniū humanarum sapore abhorreat (cum Galenus carnibus suillis simillimas esse fateatur) sed potius, quia inter carnem unius & alterius hominis nimia similitudo, & naturæ quædam cognatio est. Vnde veluti natura concubitum patris & filiae, fratris & sororis, ob nimiam propinquitatem, abhorret; ita carniū humanarū esum; per quem homo comedens & comesus longè strictius & magis propriè fiunt una caro, quàm pater & filia, frater & soror per copulam incestuosi concubitūs. Et veluti natura gaudet personas sanguine disjunctas ad copulam conjugalem adducere, ut sic multiplicentur in genere humano amicitiae, & dissita sibi appropinquent; ita unumquodque animal carnibus alterius speciei in cibo potius afficitur, ut diversa in unum suppositum coeant, & naturalem amicitiam contrahant, ac veluti conjugium.

Mirum est, quod narrat Eruditissimus nuper Christiani SSimi Regis Medicus, Andr. Laurentius, Veneream luem à quibusdam doctis existimari ex Anthropophagia ortum habere. Andr. Laur.  
c. 2. de lue.  
Vener. Medicus quidam non incelebris, inquit, cum iter faceret per Italiam, & Neapolim transiret, habita diligenti super hoc malo inquisitione, ait se ex hospite suo, sene octogenario intellexisse, lixas & caupones, qui exercitui Caroli VIII. Francorum Regis, ante Neapolim An. 1495. cibaria subvehere soliti fuerunt, urgente supra modum

dum fame, clanculum militibus carnes humanas manducandas exhibuisse; quo facto celeriter se malum hoc in unum sum exercitum diffudisse. Hinc credebat Medicus ille, luem Veneream ideo hominibus supervenisse, quod comederint carnes suis similes. Hanc opinionem suam ut robararet, dixit, nutritum se complura animalia, ut canes porcosque carnibus eiusdem speciei, puta canum porcorumque, quibus paulo post capilli disfluxerint, ulceribusque totum corpus oppletum fuerit, ut perpetuo tumore & debilitate correpta manserint.

Galen. lib. 3  
de Aliment.  
Scal. lib. 1  
de Plant.

Alij tamen ab Indis Occidentalibus Hispanos malum illud attulisse volunt; sed tamen morbum apud Indos popularem esse; & ex Anthropophagia illorum barbarorum natum addunt. Tanto horrore natura nostra Thyesteas istas carnum humanarum dapes detestatur. Ut sane ignorem, an satis acute coniectaverit Galenus, carnes porcinas in cibo hominibus omnium saluberrimas esse, quia sapore & temperamento carnibus humanis sunt vicinissimæ. Certè Iul. Scaliger vecordes vocat Medicos, qui perdicibus porcina anteponunt.

Adipe tamen humano, & Mumijs, sive cadaveribus humanis balsamo conditis, in medicina uti licitum est; quia ut alterent, non ut nutrant corpus humanum, ista adhibentur.

Victor. Re-  
lect. de  
Tempe-  
rant.

Leff. lib. 13.  
c. 21. de  
Perfect.  
divin.

Addit & aliam rationem Franc. Victoria, cur carnibus humanis vesci illicitum; quia fieret iniuria Resurrectioni, cum confunderentur corpora hominum. Quod latius diffundens Leon. Lessius: Cyclops aliquis in Brasilia, inquit, à puero carne humana educatus, comederit centum homines, sive solus, sive cum alijs: ex quibus tempore mortis extant in corpore ipsius centum libra materia corporalis diffusa per omnia membra. Haec centum libra sunt alijs corporibus debita, & in illa deberent distribui, si in substantiam corporis Cyclopi conversæ non fuissent: nunc autem non possunt integra restitui illis corporibus, quia corpus Cyclopi non potest destitui tanta materia corpori suo necessaria: nam debet ita resurgere, ut quantum fieri potest, sit idem quod cecidit, & quod resurgit. Vnde necesse erit maiorem partem istius materia ipsi restitui, minore portione in alia corpora, quæ comesta ab eo fuere, distributa.

Sed profectò similis corporum confusio eveniet, etiam si nemo Cyclops carnes humanas devoret. Innumerabilium enim



enim corporum humanorum materiæ per aërem, aquam, terram sparsæ, in corpora nostra, sorbendo aërem, bibendo aquam, fruges terræ, aut animalia frugibus pasta comedendo, redeunt; quas divina sapientia in Resurrectione per corpora nostra ita dispensabit, ut qui prior est tempore, potior sit jure, si S. Augustino credimus. *Redditur enim, inquit, caro illa homini, in quo esse caro humana primitus cepit. Ab illo quippe altero tanquam mutuo sumpta deputanda est, quæ sicut æs alienum ei redhibenda, unde sumpta est.* Si quis verò nil nisi alienum habeat, ceteri aliquid ei de suo remittere debebunt, ut aliquam saltem veteris corporis particulam retineat. Quod facillimè intelligitur, si corpora nostra ex infinitis particulis confuta sint, non ex finitis Epicuri atomis.

S. Aug.  
lib. 22. c. 20  
Civis

Nec tamen contemnendum Victoriæ & Lessij argumentum. Nam qui carnes humanas vorat, directè quodammodò & per se corporum resurgentium materias conturbat; qui verò fruges, aut pecudes ex materia humana pastas comedit, indirectè & per accidens suam cum alterius hominis materiam miscet: imò naturam sequitur ducem, quæ corpora humana putrefacta, in fruges aut pecudes prius deijcit, ac rursus, quasi circulo quodam, per cibos humanos, in homines revocat.

Sed lupi, inquit, humanas carnes devorant, vilis accipiter lusciniæ, & multa bruta nobiliorum carnes aucupantur, aut venantur in cibum; quomodo ergo lex naturæ vetat, ne nobiliora in ignobiliorum escas absumentur?

Verùm brutis lex ista non est posita. Apperitus enim eorum sine rationis freno in quidlibet delectabile fertur: unde etiam cum alterius speciei animalibus, asinus cum equa, pardus cum leonacoëunt, quæ homini sunt nefanda; quia rationem habet, quæ cupiditates suas regere, & intra recti ac honesti limites coercere debet, sequique æternam legem, quæ est *Dei voluntas, ordinem naturalem conservari iubens, perturbari vetans.*

S. Aug. lib.  
22. c. 27.  
contra  
Faust.

Hunc verò ordinem assumendi in cibum, res infra hominem, tam imperturbabilem Victoria, Valentia, Azorius, aliq̃ue esse existimant; ut ne quidem in extrema necessitate carnes huma-

humanas comedendi fas esse putent. Si enim ad sanitatem alias certò morituri hominis, non licet viro cælibi cum femina non suâ concumbere, nec licebit, inquit, ob simile vitæ periculum, naturæ ordinem à Deo fixum pertubare, & carnes hominis ab hostibus aut iudice occisi comedere. Scio quid Caietanus & Lessius respondere conari sint; sed mentem meam non implent, & magis faveo S. Thomæ, qui *co-  
8. Tho. 2. 2. mestionem carniū humanarum, & coitum cum bestijs, aut masculis,  
q. 142. 2. 4. non veretur quodammodò æquiparare.  
ad 3.*

Cum verò respondent aliqui, fornicationem esse intrinsecè malam, non autem esum carniū humanarum, petunt principium, ait Victorius: Nam per se multò gravius est, inquit, comedere carnes humanas, quàm fornicari. Nec sanè latis constans mihi videtur Caietanus: qui cum dixisset, solas res infra hominem esse naturaliter idoneum hominis alimentum, sicut sola femina humana est idonea ad viri concubitum (significans ordinem illum utrumque à Deo naturæ conditore, esse immobiliter constitutum) mox tamen alterum ita relaxat, ut in vitæ periculo licere asserat, humanas carnes comedere.

## ARTICVLVS V.

*An carnes crudæ in cibo utiliores coctis.*

**D**Iogenem nunquam igne ad molliendos cibos usum narrat Plutarchus; & eum nonagenarium crudo pede bovis devorato interemptum, addit Laërtius. Et Medici quidam affirmant crudas utiliores esse; quia succum maximè alibilem, & quintam essentiam carniū, coquendo ignis vaporat & exugit. Egregiè Fernelius: *Multa tum in animantium,  
Fernel. lib. 2. c. 18. de tum in stirpiū genere, morte extincta vires etiam nū retinent, sed quas  
abdit. multo efficaciores habebant dum viverent. Et partes & excrementa  
tum stirpium, tum animantium, è vivis illis tacitas vires habent multo  
efficaciores, quàm qua è mortuis eximuntur: & quacumque è mortuis  
sumuntur, efficaciora sunt cruda, quàm cocta. Et causam esse dicit,  
quia sicut viventium interitu, extincto spiritu, magna simul celestis  
qui*



quæ eo tenebatur, vis perit; ita coctione ignisque fervore multa dissipantur, quæ derelicta fuerant. Igitur naturæ reparandæ cibi crudi, quàm cocti, sunt aptiores. Nam spiritu quodam vitali, carni viventium animalium permixto, spiritus noster vitalis, humidum radicale, & tota temperies humana maximè re- Ibid. c. 13.  
 creatur. Hinc animalia rapacia, quæ venatu vivunt, ut aquila, milvus, accipiter, leo, lupo, ursus, vulpes, conger, delphinus, thunnus, mullus, omnia vivâ prædâ oblectantur, nec nisi necessitate, abiecta cadavera attingunt, inquit Fernelius Quia nempe salubribus vivæ carnis spiritibus natura eorum avidissimè gaudet, & reficitur. Sic maximè salutare infantibus alimentum est, lac cum spiritibus suis è mamilla suctum. Vnde si idipsum lac, ait idem Auctor, proprio calore dissipato frigescat, nunquam, quantumvis denuò igne recalescat, potest bonitatem vimque pristinam recuperare; & infans qui eo solo alitur, brevi totus extabescit. Ac tandem concludens: His ergo rationibus statuo, inquit, utile nobis è vivis animalibus alimentum fore, si illorum materiam vincere & atterere valeremus: & recens casus carnes, quæ tenera sint, præ maceratis ac semiputribus utiliores, quod à vivis minùs absint.

Cardanus verò, etiam posse à ventriculo nostro carnes Cardan. lib. 2. Subtil.  
 crudas vinci & atteri non desperat. Si carnes, & ova cruda comedere consuetum esset, ad vitæ diuturnitatem non parum conduceret, ait. Sed homines maluerunt lautè parumque vivere, quàm diu ferarum aut rusticorum ritu. Mirum ergo, cur Deus crudum agnum non jussit edi ab Israëlitis, sic ex Ægypto festinantibus; nam idcirco assum, non elixum comedi voluit, quia assatio est velocior, ait S. Thomas. Aristoteles quoque ferinos appellat, qui carnibus crudis vescuntur, & Theologi nostri peccari & Numen offendi tali cibo putant. Quis enim, inquit eruditus Exod. 12.  
 Azorius, liberum à vitio & culpa putet illum hominem, qui absque S. Tho. 1. 2. q. 102. a. 5. ad 2.  
 ulla necessitatis causa, crudas & adhuc sanguine imbutas animantium carnes, canum, luporum, aut corvorum more devorat? Ostrea tamen & limaces excipere oportet, quos non tantùm crudos, sed Azor. Tom. 1. lib. 7. c. 22.  
 etiam vivos vorari apud quosdam est solemne. Comedat ergo cruda cum lupis & Polyphemo Cardanus, ego potiùs Democrito assentiar, qui negat cibos sponte nascentes viris con- Athena. lib. 3.

templationi deditis convenire. Ventriculi enim calor & vires studijs & meditationibus debilitantur, & igne, quem optimum cibi condimentum vocat Plutarchus, oportet eas adjuvare. *Omnia enim quæ cruda bona sunt, inquit Sennertus, cocta bonitatem vix amittunt, sed potius meliora redduntur.* Nec enim ignis universum succum alibilem ex carnibus, aut alijs coctis exugit, sed largiter adhuc relinquit, & eum qui in poris est reliquus, cruditate digestâ mitigat, ut facilius à ventriculo domari possit. Non enim calor ignis diversæ rationis est à calore naturali ventriculi, quidquid aliter Fernelius & quidam Medici. Vnde ignis inchoare opus & concoctionem potest, cui calor naturalis possit succedere. Nam calore balnei, ventriculi calorem adjuvari fatetur Aristoteles: calore fornacum Ægypti ex ovis excluduntur pulli, calore naturali seminis galli excitato & adjuto ab elementari. In Belgij quoque frigidissima Arduenna, ubi præter Junium, Iulium, Augustum, totus pene annus hiemat, melones igne supposito perfectissimè, & tanquam Italico cælo, maturantur. Et Tho. Erastus duas se vites in Germania vidisse narrat, quæ toto anno ferrent fructus; quia ad parietes per quos serpebant, intrinsecus struebatur ignis. Igitur ignis quo molliuntur cibi, amicus est caloris naturalis.

Arist. lib. 4.  
Meteor.

## ARTICVLVS V.

*Vtrum assis, an elixis carnibus vesci utilius.*

**N**on consentiunt Medici. Si assæ humidiores sunt elixis, ut Aristoteli placet, præferendæ videntur, quia plus utilis ad nutrimentum succi habent, quàm elixæ. Certè in Scripturis sanctis frequentior assorum, quàm elixorum mentio. Igitur in re ista, omnium hominum maximè sapiunt fortassis Angli, apud quos quotidie circuit verum, & in eodem prandio ac cæna, variorum assorum inferuntur succeduntque missus.

Exod. 12.  
2. Reg. 6.  
Tob. 6.  
Luc 24. &c.

Galen. lib. 21. de simplic. facul.

Galenus tamen carnes elixas negat sicciore assis, & cum  
Aristo-



Aristotele pugnare videtur; quod sæpe & libenter facit. Placet tamen Hieronymi Magij concordia, qui Galenum, tanquam Medicum, pinguiusculè de carne elixa, in jusculo suo natante, Aristotelem verò de carne sola, præcisè & philosophicè locutum existimat. Nam certè ratio Aristotelis optima. *Excernitur, inquit, ex elixis humidum à calore, qui est in humido extrinseco. Quapropter elixa sicciora sunt assis.* Aqua enim in olla fervens poros & meatus carniū usquequaque pervadit, & rorem, gluten, & cambium, id est omnem succum alibilem eluit, relicto panè solo stamine & subtemine, quibus caro contexta fuit. Vnde juscula quod in carne elixa est utilissimum ferè continent; quandoque tam densè, ut refrigerata, glutine suo concrecant; quod in elixa vitulina est evidentius. Assatio verò rorem ferè solum, non gluten & cambium, quod in carne est maximè alimentosum, extrahit. Vehementer ergo fallitur Athenæus, dum credit, *assaturam dissipare quod in carne melius est, & assa sicciora crudioraq; esse elixis.*

Arist. lib. 4.  
c. 3. Meteor.

Athenæus  
lib. 14.

Deinde assatio velocius perficitur elixatione, ut paulò antè audivimus à S. Thoma, ideoque à fugientibus ex Ægypto Iudeis præcepit Deus agnum Paschalem assari potius, quàm elixari. Velocius igitur penetrant sicci spiritus assantis ignis in intima carnis, assantque quantum sufficit ad esum, antequam rorem, gluten, & cambium rarefacere & evaporare valeant. Ob has fortasse carnis assæ dotes, Heroës olim sine elixo, solis assis prandia sua celebrabant, si Servio Virgilij Commentatori, & Eubulo Poëtæ credere volumus. Quod etiam ex quotidiana diætâ pueri Herculis poteris conjectare: cui

Exod. 12.

Athenæus  
lib. 1.

*Prandium, carnes assatæ, & grandis è canistro panis*

*Doricus, qui facile fossorem satiare posset.*

*Sed finito die, exiguum sine igne sumebat canam.*

In cæna quoque Menelai apud Homerum, *ῥὰ τὰ βοὸς πλοῦρα ὀνίλᾳ, terga bovis pingua assa* video, elixi nihil.

Carnes tamen elixæ, propter aquæ & juris permixtionem, magis lubricant aluum, & ideo commodiores studiosis, quibus sæpe ex otio & alijs causis morosa est alvus. Hinc quibus soluta & præceps est, præcipit Celsus, abstinere à carnibus

Cor. Celsus  
lib. 1. c. 6

jurulentis, vesci assis. Nec sanè etiam perpetuum fuit, ut à mensis suis elixa rejecerint Heroës. Nam ollarum & ahenorum in convivijis eorum etiam mentio.

Virgil.

*Pars in frustra secant, verubusque trementia figunt,  
Littore aheni locant alij, flammæque ministrant.*

## ARTICVLVS VI.

*An edere carnes expediat Musarum cultoribus.*

**H**Uic enim à via paulisper divertere, tanquam ad amœnum hospitium, libuit; & etiam quia nobis litterarum cultoribus scientia hæc ad valetudinem & vitam pro- rogandam utilis. Cur enim Plutarchum, qui Libellum de sanitate *pro viris doctis & Politicis* scripsit, cur veteres Philosophos imitari pudebit, qui ut sibi Medici essent, postquam corporum suorum robora, inquieta cogitatione, nocturnaue vigiliâ minuerunt, inquit Celsus, Medicinam primi colere, & sapientiæ partem facere coeperunt? Et certè S. Basilium, propter frequentes suos morbos, Medicinam didicisse, scribit Nazianzenus. Sapientibus enim & studiosis curam sanitatis habere oportet, ait Epistola ad Hippocratem Democritus, quia *ἀνθρώποις ὁ νοῦς μένεται, mens crescit, ubi adest sanitas*. Morbi quippe hebetant animum, & cogitationem à ferijs ad corporis dolores avertunt. Ut nesciam, quid Platoni venerit in mentem, dum ut posset vacare Philosophiæ, elegit villam Academicam, ab urbe procul, non solum desertam, sed & pestilentem; ut cura & assiduitate morborum, libidinis impetus frangeretur, discipuliq; sui nullam aliam sentirent voluptatem, nisi earum rerum quas discerent. Sed tamen profectò rarissimi tam firmi sunt, quibus animus non egrescat cum corpore, studiorumque voluptatem morbi dolor non obtundat, aut interpellet. Imò iste idem Plato alibi sapientior, ait animum & corpus esse velut equos duos jugales, quorum unum sine altero pascere & recreare non oportet; ne ille qui improbo labore atteritur, languidus & elumbis sodalem adjuvare non valeat.

Cels. Cel-  
sus lib. 1.

Naz. Orat.  
20.

S. Hierony.  
lib. 2. c. 7  
contra  
Iovin-

Plut. lib. de  
esu carn.

Carnes porrò sapientibus & litteratis tam assas quàm elixas, sine discrimine extorquet è manibus Plutarchus. Putat enim.  
Athleta.



Athletarum solum cibos esse, ad corporis robur, & adversarios sternendos in Arena, non litteratorum: nec ingenium inde valescere, sed debilitari. Incrassant enim, inquit, carnes ingenij subtilitatem & retundunt acumen. Hinc earum usu abstinuerunt multi Philosophi, corpore satis, ingenio maximè valentes. Zeno Stoicorum parens anno nonagesimo octavo vitâ excessit, *incolumis & integer, ac sine morbo*, inquit Laërtius. *Erat autem, addit, simplicissimi victus, crudisq; tantum cibis utebatur.* Aut, ut narrabat antè, *edebat modicè panem & mel, & paululum suavis vini bibebat.* Democritus solo etiam odore mellis, multorum, aut halitu recentis panis, trium dierum inedia quandoque toleravit. Plotinus illustris ille Platonius, abstinentiâ carnis, & sæpe etiam panis, ad sexagesimum sextum annum duravit; perpetuis noctu diuque studijs, & insomniâ magis, quàm morbo extinctus. Chrysantius, sub Iuliano Apostatâ Philosophus, carne vix aut parcissimè vescabatur, octogenario major, à Medicis nimis effusè sanguinem mittentibus interfectus. Iam veteres Aegypti & alibi Anachoretas censere quid attinet?

Laërt. in  
Zenon.

Consentit quoque noster Hieronymus. *Qui agrotat, inquit, non aliter recipit sanitatem, nisi tenui cibo & castigato victu, quæ dicitur d'aila tenuis diæta, dicitur. Quibus ergo cibis recipitur sanitas, his & servari potest.* Et in hanc sententiam Epicurum ipsum & Galenum citat, qui ait, *Athletas nec vivere posse diu, nec sanos esse: animas eorum nimio sanguine & adipibus, quasi luto involutas, nihil tenue, nihil celeste cogitare.* Ad ingenium quippe, & sublimium contemplationem, tenuitate sanguinis & spirituum opus est, quam animalium carnes fortè non præstant. Vnde apud Galenum, lactis & mellis frequens commendatio. Nisi quod mel non omni, sed senili naturæ maximè dicat convenire. *Lactis verò commoda sunt, inquit alibi, ventris moderata deiectio, succi bonitas, & nutritio; pascuis quoque ipsis animalium, quorum lacte sumus usuri, non parum ad hæc conferentibus.* Hinc à natura datum lac infantibus, deinde senibus, qui bis pueri. Est enim humor maximè alibilis, pueritiæ incrementa accelerat, & senectutis detrimenta supplet. Hinc gentes quæ Nomadicam & pastoritiam vitam colunt, formosioribus hodieque corporibus visuntur.

S. Hieron.  
lib. 2. c. 8.  
contra  
Iovin.

Galén. lib.  
2. de Na-  
tur. facult.

Adr. Tur-  
neb. lib. de  
Vino.

ait Gallorum doctissimus Turnebus, & quæ nationes plurimum lacte, butyro, caseo utuntur corpora gignunt pulchriora, illiq; homines tam salubribus & vegetis utuntur corporibus, ut Medicis propè nihil egeant.

Vesal. lib.  
5. c. 18.

Bonitatem quippe succi ejus, ex temperie coquentium mamillarum, & præparatione in venarum amfractibus, antequam sanguis eò perveniat, colligere poteris. Mamillarum glandulosa substantia, ait Vesalius, est ad iustitiam temperiei, ut in venis adductum sanguinem, in lac familiare hominis alimentum convertere concoquereque possit. Vena etiam non minore industria, ex remotis longiq; partibus, multis amfractibus, ut sanguis melius mamillis præparetur, sunt correctæ. Merito igitur Empedoclem Aristoteles carpit, quod lac πύον λευκόν pus album vocaverit. Lac enim, inquit, est res concocta prorsus; putredo autem contraria concoctioni. Habet enim se lac ad sanguinem, ex quo in mamillis percoquitur, sicut vinum ad omphacium, quod uva paulatim in vini dulcedinem maturat.

Hinc fortasse propter istas lactis & mellis dores, tanquam blandissimum humani corporis alimentum, in laudibus Terræ promissionis, toties Scriptura abundantiam lactis & mellis commemorat, & rivos ac flumina salutaribus istis liquoribus, velut ibi manantia deprædicat.

Galen. lib.  
16. de Vsu  
part.

Nostri etiam Theologi quidam, in illud Isa. 7. Butyrum & mel comedet, ut sciat reprobare malum, & eligere bonum, censent, lac butyrumque (quod lactis velut est oleum) & mel ingenio & acumini conducere. Lac enim ex sanguine exactè cocto gignitur, ait Galenus, ideoque boni & laudabilis succi. Vnde in sanguinem bonum & temperatum facile rursus redit. Inde spiritus vitales animalesque probi, mobiles, & ad omne imaginationis & ingenij famulitium expediti. Substantia quoque ipsa cerebri lacteo fortè hoc alimento gaudet, & rectè ac temperatè ad mentis operationes se habet. Ut in hoc fortasse alimentum non temerè quis magnum illud ingenium Plotini Philosophi referat, qui, ut narrat in vita ejus Porphyrius, ad annum ætatis octavum, nutricis ubera suxit. Lac enim probatissimi succi habetur; sed præ ceteris lac muliebre, ait Galenus, tam

Galen. lib.  
de Eu-  
chym.

quam



quam natura eiusdem, nobisq; familiarissimā. Certè Zoroastres, Magiæ ille parens, lacte solo in cibo potuque omni vita est usus.

Mel quoque est quasi lac apum, roridæ & levis substantiæ, senibus & frigidis naturis commodum. Illis enim in optimum vertitur sanguinem, ait Sennertus post Galenum. Et iste alicubi, *Mel despumatum*, inquit, *per se optimum nutrimentum frigido ventriculo*, id est, qualis ferè veris cultoribus litterarum, quibus studia spiritum & calorem ventriculi exhauriunt. Talibus enim censet Galenus, *uberius cum lacte, etiam mel dandum esse*. Galen. lib. 7. Method.

Hinc mulsum, quod ex melle conficitur, in senum, aut frigescentis ventriculi potu à veteribus laudatum. *Multi senectam longam*, ait Plinius, *mulsi tantum nutritu toleravere, neque alio ullo cibo*; celebri Pollionis Romuli exemplo. Centesimum annum excedentem eum Divus Augustus hospes interrogavit, *Quanam maxime ratione vigorem illum animi corporisque custodisset? At ille respondit, intus mulso, foris oleo*. Plin. lib. 22. c. 24.

Cibus quoque Brachmannum, seu Gymnosophistarum, lac, mel, ficus, passæ, ait Scaliger; & in virorum apud Galenū & Laërtium illustrium diæta, rarè carnes. *Caro namque crassa est*, inquit, *& crassè alit*. Herba tametsi crassiores, tamen ex earum subtilissimis partibus consistit alimentum. Itaque Septentrionales barbaros, Scythas, Sarmatas, Indos. Lituanos multa vescentes carne, crasso obsitos ingenio, stupidos, bardos videmus: Egyptios, Syros, Assyrios, Chaldaeos longè omnium sapientissimos. Athenæus ex Aristoxeno scribit, *Pythagoricorum nutrimentum fuisse, panem cum melle; additque morbum nullum sensuros, qui pransuri eo cibo quotidie vescantur: & ideo Corsos esse tam longævos, quod melle apud eos abundantissimo nunquam non utantur*. Certè Democritus melle totà vitā usus & delectatus, ad annos novem & centum eam produxit. Et cuiusdam percontanti, *qua ratione vitam sanius degeret*, inquit Athenæus, *respondit, Si corporis interiora melle irrigaret, exteriora oleo*. Marsil. Ficinus, Medici filius, & ipse Medicus, Philosophiā verò summus Platonius, suadet senibus, *ad loca apibus amica confugiant, mellaque hieme degustent*. Mel enim cibus, inquit, *est senibus in primis amicus, nisi ubi bilis timetur incendium*. Amicus ca- Scalig. Exerc. 252.

*seus recentissimus &c.* Athenæ. lib. 2. Ficin. lib. 2. c. 12. de Vita pro- duc.

Hæc fortè inculcatiùs à me dicta, propter quosdam delicatulos, qui dedecus existimant, lac & delicias illas agrestes mensis suis inferri.

Quia tamen lac obstructions hepatis, & calculos renum gignit, non eo quotidie, aut sæpe utendum. Quia deinde carnes à Deo datæ hominibus in escam post diluvium, cum terra jam & stirpes, aquis tam diu submersæ, multum de pristino ad alendos fructus vigore amisissent, & homines ipsi vitijs tam corporis quàm animi, primævâ & optimâ temperie decidissent; quid salubritati corporis expediat, divinitus edocti, utamur hoc Dei beneficio, & carnibus ad valetudinem & ingenium sobriè vescamur. Quò tandem etiam condescendit Plutarchus: modò carnes, inquit, paucae, & tanquam fundus sint, cui res aliæ leviores, & sine sanguine, superstruantur. Et de Plinij hac in re opinione Insulanus: *Plinius tum salubritati consulit, tum studijs gratificatur nostris. Nam abstinentiam carnis imperat non perpetuam quidem, sed qua quibusdam temporum intervallis adhibeatur. Ut intelligamus Plinio facile constituisse, & à carnis frequenti quotidianoq; usu offerri naturæ laborem digerendi, & recreari stomachum varietate, & carnis alimentum nostris esse corporibus utile. Carnes enim succos homini maximè salutares continent: ut ideo Dom. Sotus sibi persuadere nequeat (quod tamen multi existimant) nullū earū usum fuisse ante diluvium. Incredibile enim, inquit, est, posteros illos Adæ, ingenij sagacitate præstantes, intra mille sexcentos amplius annos, speculando, aut experiendo non agnovisse naturam carniū ad cibum esse accommodatissimam. Nam succus triplex, ros, cambium, gluten, quibus carnes animalium turgent, optimi sanguinis humani & subtilissimorum spirituum materia sunt. Aves tamen, & inter eas maxime montanas, ut in genere piscium saxatiles, omnibus præfert Galenus: quia boni nutrimenti sunt, & minimum excrementi habent. Turdis primam gloriam dat Martialis, alij perdicibus, Sennertus caponibus. Hinc ad valetudinem, & ingenij præsertim acumen, Baldus Ic. solas aves, ut aliquando audisse memini, in cibo quotidiano habuit. Quo factum, ut ad annum vitæ 76. pervenerit; cum tamen*

Insul. c. 26.  
de Rat.  
vict. salubr.

Sot. lib. 5.  
q. 1. a. 1.  
de Iust.



men puer præcoci ingenij fuisset, quales non solent esse vi-  
tales.

Avium tamen, & subtilium alimentorum usus, stomacho so-  
lum convenit crassiora minimè tolerant. Qui verò validior est, fuga-  
cem ex ijs fumum reportat, vel humorem, ait Ficinus. Sed cultores  
serij Musarum ferè stomacho minùs valent. Nec ex studijs tantum  
hoc illis accidit, sed felicioribus ingenijs hoc innatum. Hac enim spiri-  
tus subtilitate gaudent, qua cum corporis robore raro conjungitur, in-  
quit Thriverus. Et Sapiens noster: Faciendi plures libros nullus  
est finis, frequensque meditatio, carnis afflictio est. Celsus quo-  
que, ut antè dicebam, Pythagoram, Empedoclem, Demo-  
critum Medicinam coepisse Philosophiæ suæ adjungere ait,  
ubi corporum suorum robora, inquietà cogitatione, nocturnaue vi-  
gilia minuerant. Et nonne Philetæ Sophistæ sepulchro inscul-  
ptum Græcum Epitaphium:

*Hospes, sum Philetas: ratiocinatio mendax & captiosa*

*Me perdidit, & noctium vespertina studiorum cura?*

Vnde Scaliger nescit, quid Cardano venerit in mentem, dum  
dixit lucubrationes & studia eruditorum, ad valetudinem &  
longævitatē conferre. Sed hoc tamen etiā propiùs &  
acutiùs meretur inspicere.

Marf. Ficini  
lib. 2. c. 6.  
de Vita  
produc.  
Thrivers. in  
lib. 1. c. 2.  
Cor. Cels.  
Ecclesi. 12.

Scal. Exerc.  
109.

## ARTICVLVS VII.

*An Scaliger meritò reprehendat Cardanum, Quòd, dixerit  
studia ad vitæ longitūdinem conferre.*

**C**ardanum videntur refellere tot hodie & olim Musarum  
Martyres, qui aquâ intercute, destillationibus,  
tabe, calculo, alijsque sedentariorum morbis, se litteris  
immolaverunt. Etenim, καμνει τῷ σώματι, φιλόσοφον, *infirmari*,  
*Philosophicum est*, ait S. Gregor. Nazianzenus. Hinc pal-  
lidi & sepulchrales vultus. Vt meritò, Zenoni Stoicorum  
Principi, juveni adhuc, & quo modo vitam optimè institue-  
ret quærenti, Oraculum Apollinis responderit, *Si mortuis*  
*concolor esset*. Quo statim ad Philosophiam & studia se vocari  
intellexit.

D d

Ac

Ac licet quispiam existimare posset, à studijs, ciborum orexim, & digerendi celeritatem incitari, quia studiosi multi, non edunt sed vorant, longiori studio fatigati: attamen id fortasse non robur stomachi, sed imbecillitas est.

Non enim plerumque naturalis, sed canina fames esse videtur, ex melancholiæ, aut pituitæ acris morsificatione. Melancholici enim voraces sunt, inquit Aristoteles. Aut certè ventriculus spiritu vitali, vi imaginationis sursum attrahentis, panè exhaustus, remedia inanitatis quærit, & cibum, ad spirituum instaurationem, sollicitat. Simili errore, coquus quidam sciolus apud Athenæum, jactat se scire pro cujusque ventriculo parare cibum, ideoque solitum, *pernas & pedes* coquere pro Philosophis: *Ad δὴ πᾶσιν γὰρ τὸ ζῶον εἰς ὑπερβολὴν vorax enim est*, inquit, *hoc animal supra modum*. Et de quodam inter contemplativos suos Thaulerus: *Cum vice quadam*, ait, *discipulus admirans suo dixisset Magistro, manducare se & bibere, & tamen in nullo fieri corpulentior*; Respondit ille, *Non hoc admirandum esse, cum quidquid alimenti suo corpori administraret, internis exercitationibus absumeretur*. Imaginativa namque in studio aut meditatione vehementi, consumptis ferè cerebri spiritibus, alios ex corde, ventriculo, & undique arripit; evidenti saltem in me experimento. Vnde si quid statim à cibo intentius speculamur, ventriculi meditullium infra sternum, spiritibus inaniri, & manifestè refrigerescere compungique sentimus, cum gravi concoctionis & valetudinis noxa.

Nec refert, plurimos Philosophos & litteratores, vitam ultimam ferè senectutem extraxisse: ut Heraclitum, & Empedoclem in sexagesimū, Aristotelem in septuagesimum; quo etiam Socrates veneno infectus est. Hippocratē, octogesimo Platonem octogesimo quarto, Theophrastum octogesimo quinto, Xenocratem Platonis in Academia successorem, octogesimo secundo, offenso ad æneam sartagine pede, & læsa fronte interiisse. Deinde Pythagoram, Diogenem, Carneadem nonagesimo, Democritum centesimonono, Epicurum septuagesimo secundo, Chrysippum septuagesimo tertio ætatis anno defecisse; immensæ tamen lectionis &

scri-

Athenæ.  
lib. 9.

Io. Thau-  
ser. ser. 1.  
de Pascha.



scriptionis virum, qui septingenta & quinque volumina scripsit; & inter etiam epulas, studij tam intemperatis, ut evolante ad alia ingenio, manus cessaret, & hianti ori ancilla Melissa cibum ingerere deberet. M. Varro ætatis octogesimo Libros de Re rustica se scribere dicit. Porphyrius ad extremam senectutem pervenit. Origines ad annum septuagesimum, homo studiorum & diligentiae infinitus, & sex millium librorum scriptor, ut testis Epiphanius.

Et ut ad nostros veniam. S. Augustinus ad septuagesimum sextum, S. Hieronymus, ut quibusdam placet, ad nonagesimum octavum: ac denique propius nostra tempora, Albertus Magnus ad octogesium secundum, Bessarion & Iovin. Pontanus ad septuagesimum septimum, Marfil. Ficinus ad octogesium (homunculus tamen vix tripedalis, quales Aristoteles longæuos esse negat,) Baldus Ic. ad septuagesimum sextum pervenit. Pomponatius sexagesimo tertio, stranguriâ, non senio finitus est; homullus aliâ strium pedum instar Ficini, & in studijs suis Peripateticis tam anxius; ut cum Aristotelis quædam pronunciata non posset cum arbitrij humani libertate in concordiam reducere, exclamet: *Ista sunt qua me premunt, qua me angustiant, qua me insomnem & insanum reddunt.* Aitque se instar Promethei ad Caucasum religati, perpetuis curis & cogitationibus rodi, non sitire, non famescere, non dormire, non comedere, non expuere, ab omnibus irrideri. Vnde meritò mirum est tam vitalem fuisse. Erasmus ad septuagesimum, Martinus Navarrus ad nonagesimum quartum annum duravit. Pomponius Lætus septuagenarius, gelidi vini haustu extincto ventriculi calore exanimatus. Augustinus Niphus pari ævo, infano amore puellæ citra libidinem appetitu consumptus est. Eodem demum septuagesimo Io. Argyropylus; quamvis vini & cibi intemperantior, & abdomine multo ventricosus, deinde febris ex immodico melonum esu correptus, interiit. Non, inquam, ista referunt. Nam quantum studia de vigore & valetudine detrabant, tantum sobrietas, castitas, modica cura corporis; ad hæc vitatio perturbationum, tranquillitasque & gaudium mentis restituebant. Quod Galeni Medicorum, post Hippocratem,

Pomponat.  
lib. 3. c. 7.  
de fato.

Principis exemplo egregiè firmari potest. Qui tenet à valetudine, & corpore à natura infirmo, nec curarum vacuo, sanissimus tamen vixit, & quidem ad annos ( res mira, & ferè incredibilis ) centum quadraginta, si Cæl. Rhodigino credimus; adeo ut ab anno ætatis 28. *ne minimo laboraverit morbo, ut ipse fatetur, nisi fortè diaria febris, ob lassitudinem.* Hanc autem valetudinis constantiam sobrietati, & diætæ ad regulas Medicorum castigatissimæ, ac magnâ parte, refrenationi iræ & omnium animi perturbationum imputare se dicebat. Præceptum enim istud Cor. Celsi ipse ceterique illi sapientes probè tenebant: *Imbecillis stomacho ( quo in numero, inquit, magna pars urbanorum, omnesq; panè cupidi litterarum sunt ) observatio maior necessaria est: ut quod vel corporis, vel loci, vel studij ratio detrahit, cura restituat.* De sobrietate & castitate quoque Pythagoræ nonagenarij Laërtius: *Solo melle, sive favo ac pane contentum vixisse quidam autumant, vinumq; interdum non gustare solitum. Nunquam verò deprehensus est saturari, vel Veneris rebus, aut ebrietati operam dare.* Calvus etiam Orator, *laminis plumbeis lumborum renumque parti adligatis, frigidiorè naturâ impetus Veneris cohibuisse traditur, viresque corporis studiorum labori custodisse,* inquit, Plinius, *Tantum illi credebant voluptatum æstu, & genituræ fluxu minui vires corporis.*

Denique, etsi multi litterati stomacho & toto corpore invalidi, vitam tamen in longum etiam sic trahere possunt. Præclarè enim Aristoteles: *Est quedam, inquit, separata à robore & sanitate facultas diu vivendi: multi enim sine corporis viribus diu vivunt.* Nam parva & languida flamma diu lucet, si ei oleum diu guttatim instilletur. Valetudo ergo litteratorum, similis est valetudini senum; quæ sanitas quidem est, si d non sine querimonia, inquit Galenus.

Hanc tamen languidam eruditorum sanitatem nulla causa potentius sustinet, quàm gaudium ortum ex præcedentium studiorum fructu, & pulcherrimarum rerum contemplatione, ut Iul. Scaligero respondit non ineptè Cardanus. *Nam si animi tristitia vitam decurtat, quia spiritus tristis exsiccat ossa, par est, inquit, securam latitiam producere vitam, & bonam valetudinem adjuvare.*

Galen. lib.  
5. de sanit.  
tuenda.

Cor. Cels.  
lib. 1. c. 2.

Laërt. in  
Pythagor.

Plin lib.  
34. c. 18.

Arist. lib. 1.  
c. 5. Rhet.

Cardan.  
Act. in Ca-  
lumnias.



adiuvare. At contemplatio exhilarat animam, ideoq; vitæ auxiliatur. Verum multum interest, addit, inter contemplationem, quæ est meditatio eorum quæ sciuntur, tum inventionem rerum novarum, quæ admodum delectant; & inter molestiam animi, quæ acquiritur discendo, interpretando cum difficultate; ut mihi nunc calumniatoris intemperies & absurdas gerras, quas cum intellexeris, nihilo evadas sapientior; & disceptationes contentiosas ac scribendi laborem. Hæc namque factor de vita & bona valetudine subducere. Ob id studiosissimi vel prima iuventa interiere, ut Io. Murandula, & Longolius. At cum eò pervenerint, ut quasi absque labore, contemplatione frui possint, valde parum senescunt. Quod & exemplo suo probat. Denique specialis Dei providentia eruditis, ad studiorum maturitatem, producit vitam, expertumque quod alicubi pronunciat S. Thomas, *Rarò utilis Doctor invenitur in Ecclesia, quin sit longævus.*

S. Tho. in  
Epist. ad  
Philem,

Igitur, ut redeam unde à proximo Articulo digressus sum. Edant carnes, ad humidi primigenij, & subtilium spirituum instaurationem, litterarum studiosi; parcè tamen, nè cum valetudini & ingenio student, virtutem amittant. Non enim necesse est, ait S. Hieronymus, viro sapienti & Philosopho Christi, tantam habere fortitudinem, quæ Athletis & militibus necessaria est, quàm cum habuerit, ad vitia provocetur. Illi arbitrantur carnes sanitati congruas, qui volunt abuti libidine, & in cænum demersi voluptatum, ad coitum semper exastuant. Christiano sanitas absque viribus nimis necessaria est.

S. Hieron.  
lib. 2. c. 8  
contra Iovin.

Nec omnes etiam carnes litterarum amatoribus præscribimus. Sunt enim quædam carnes robustissimi, sunt quædam mediij alimentij. Illas Athletis & valentissimis relinquimus, istas nostris litteratis assignamus. Nam plerique eorum adhuc mediocriter firmi sunt: *mediocriter autem firmos media materia optimè sustinet*, inquit Celsus. In media verò materia collocat omnes aves à minimis usque ad phænicopterum. Inter quadrupes verò, solum leporem. Ad quam leporis fortasse dotem respexit Martialis, cum cecinit, *Inter quadrupedes gloria prima lepus.*

Cels. lib. 2.  
c. 18.

At alij quidam melancholicum cibum esse dicunt. Sed alij doctiores melancholiam sanare docent. Galenus ait carnem

Henric.  
Heerus  
de Spad.  
font. c. 14.

leporis meliorem sanguinem gignere, quàm caro ovilla possit; deinde sanguinem leporis suavitate, columbarum & gallinarum superare. *Si sanguis laudabilior, ergo, & caro, qua eius ideam refert, quæque nihil est aliud, quàm sanguis musculus, vel eorum fibris annexus & coagulatus, & in carneam substantiam concretus, ait nonster Heerus.*

Galen.

S. Hieron.  
contra  
Iovin.

Ova quoque commoda litteratis, præsertim qua tremula dicuntur, id est modicè cotta, omnium ad nutriendum præstantissima, inquit Galenus. Ova enim sunt carnes liquida, ut vocat Hieronymus, ex sanguine, ut lac, formata, & lemen proximaque materia ad novam pulli structuram. Vnde mediæ naturæ (quemadmodum etiam lac) inter carnes & vegetabilia sunt, meritoque ideo ab Ecclesia, in strictiori illa Quadragesimali abstinentia, cum lacticiinijs prohibentur.

## ARTICVLVS VIII.

*An vini potus sit hominibus salutaris.*

**A** Dr. Turnebus, qui omnia scivit, si Michaeli Montano credere volumus, Libellum de vino, imò contra vinum, elegantem scripsit, in quo omnibus eloquentiæ & argumentorum viribus, vinum à mensis & potu quotidiano proscribit, & intra pharmacopœorum officinas compellit. Medicamentum enim potiùs, quàm familiare poculum esse contendit; cuius, inquit, *vel cyathum unum aut alterum sano & valenti quotidie gustasse, propè nimium sit.* Et ne quis hæc, tanquam litteratoris, & Philosophi minimè Medici opiunionem elevarer, nominare possim, inquit, *si necesse sit, ex nobilissimo Medicorum Collegio primarios homines & claros, huius disputationis meæ approbatores.* Ac ex ijs Fernelium, vnum fuisse existimo. Argumentorum summa ferè est. *Vini calorem à natura nostra esse alienissimum. Etenim animantium calor lenis est, mitis, blandus; vini calor ex putredine quadam natus, sentitur asperior, acrior, ferventior, & humori inustus, ut calci suus ardor.* Adde jam adulteria (ut nunc ipsum bibimus) nostrorum cauponum. *Alius enim*

Adr. Tur-  
neb.

*gypso,*



*Gypso, alius calce, alius sulphure, alius marmore, alius aqua marina, alius iumentorum stercore saporem vini non tam excitat, quàm vitiat: alius resina corrumpit ad capitis dolorem & vertigines efficaci, ut ex eo nomen crapula ipsa meruerit. Ardore autem illo vini humidum primigenium non tam instaurari, quàm depasci videtur. Nam ut doctissimus Fernelius: Velut calx ad arboris radicem con-*  
*spersa fructum accelerat, arborem verò perimit; ita calidius alimentum, maximeq; vinum, suscitato calore spiritus facultatesque erigit, mortem verò maturat. Dum enim corporis calorem auget, substantiam minuit; dumq; innati calidi spiritum & calorem halitu fovet, eius substantiam, quæ humidum est primigenium, dissipat exorbetq; omnem vitam alacriorem ac vegetiorem, sed tamen breviorē facit. Vinum quoque adolescentibus datum, ossa & nervos desiccac ac indurat, nec ad justam corporis humani mensuram laxari & crescere finit. Hinc contractas Gallorum suorum hodie staturas & vires enervatas conqueritur Turnebus. Olim enim, quando aqua & lac potus erat, staturâ proceri, cute candidi, crine rutili; nunc plerique omnes, inquit, breves sunt, multoque plures nigri, quàm vel candidi vel rutili; ut immutato victu, non solum corpora, verum etiam color degeneraverit. Afri contra, olim à vini potu breves, hodie prolixiores, postquam Mahometis legem & vini abstinentiam coeperunt colere. Eadem enim de causa Turcæ plerumque alti sunt & enormi corpore. Huic rei argumento etiam esse possunt simiæ & catelli, qui parvi & pumili manent, si vinum assuescant bibere. Hinc cum corpore vita quoque corrumpitur; quandoquidem in omni genere animalium procera vivaciora sint brevibus. Sic bellatorem equum, quàm parvulum mannum, grandem molossum, quàm catellum Meli-*  
*reum ævi longiorem videmus.*

Deinde pubertatem & maturitatem in adolescentibus accelerat vini potus, adeoque citius vitam finit. Vita enim nostra duobus quasi motibus, projectorum simillimis, componitur; quorum unus sursum it, alter deorsum redit. Quo autem brevior est linea per quam gravia sursum projiciuntur, eo citius reflectuntur, & in terram recidunt. Sic qui celerius ad summum vitæ suæ culmen perveniunt, citius quoque deficiunt

Fernel.  
lib. I c. 14  
de morbor.  
caus.

Sen. Epist.  
108.

deficiunt & moriuntur. Hæc fortè, & alia contra vinum, & omnem vitæ luxum, cum Præceptorem suum Attalum Stoicum, declamantem olim audisset Seneca adhuc juvenis, vino in perpetuum abstinuisse se dicit. *Inde ostreis, inquit, boletisque in omnem vitam renunciatum est: inde in omnem vitam unguento abstinemus, inde vino caret stomachus: inde in omnem vitam balneum fugimus.*

Aristot.

Potum ergo aquæ in zythum saltem, seu cerevisiam decoctæ, vino in sanitate longè præfert Turnebus, & illius salutarem potum causam esse credit, cur hodie in Britannia nonnulli ad annos 120. extendere vitam ferantur; aut si vinum bibant, inquit, multo saccharo acrimoniam ejus mitigant, & inimicos naturæ spiritus obtundunt. Gens enim illa dulcibus potionibus valde delectatur. Vnde & cerevisiæ, cibisque ferè, ut audiui, omnibus saccharum admiscunt: voluptatem secuti, an naturam? Nam *πάντα τρέφεται τῷ γλυκύῃ omnia nutriuntur dulci*, inquit Aristoteles.

1. Tim. 5.

Tit. 2.

Sed ut Turnebo demus, plurima esse vera, quæ adversus vini malitiam dicit, de frequente tamen & largiore ejus potu, intelligere oportet. Nam aliàs *modici vini usum*, propter stomachum & frequentes infirmitates, Timotheo suo adhuc juveni suadet Apostolus; nec anus ab omni vino, sed *multo vino servire*, prohibuit. Christus etiam *vinarius*, & *potator vini* non diceretur à Phariseis, nisi *vinum biberet*, ait Augustinus.

Eccli. 31.

Et filius Sirachi: *Exultatio animæ & cordis, vinum moderate potatum. Sanitas est animæ & corporis, sobrius potus.*

Animæ quidem sanitas, quia eam exhilarat, cor spiritibus dilatando, quod melancholicæ frigiditas, aut curæ aliqua anxietas constrinxerat. Vnde vetus & amœnus Poëta Apollini, sive Soli omnia luminanti & hilaranti, Liberum, id est Bacchum sive vinum comparat.

*Sic Apollo, deinde Liber sic videtur ignifer.*

*Ambo flammis creati, prosatig ex ignibus.*

*Ambo de comis calorem, radio dio conferunt.*

*Noctis hic rumpit tenebras, hic tenebras pectoris.*

Nam Bacchus ideo *Liber dictus*, ait Seneca, non ob licentiam linguæ, sed



gua, sed quia liberat servitio curarum animum. Et M. Varro:

*Hoc hilaritatis dulce seminarium,*

*Hoc aegritudinem ad medendam invenerunt.*

Nam corporis quoque, vinum est sanitas. *Morbis enim melancholicis ( & nos experti sumus, ait, Lipsius noster ) aut frigidis* Lip. ad Senec. de tranquill. c. ult. *medetur.* Nam ventriculi calorem adjuvat, arterioso sanguini spiritum & materiam confertam subministrat, qua crassior in venis sanguis percoquitur, omnia membra animalis incallescunt, & vis nutritiva per omnes corporis partes dispersa robur & vigorem accipit. In partem quoque viventis materia vini abit: neque facile Hieronymo Mercuriali crediderim, qui vinum non alere, sedimenti tantum esse vehiculum contendit. Placet magis quod docet, puto, experientia & Galenus, qui vinum facillimo negotio in substantiam viventis facessere credit. *Avium caro non magno negotio, inquit, vinum omnium minimo assimilari potest.* Vnde & falli videntur qui ipsum ad pharmacopœas relegant, & inter medicamenta ponunt. Nam esse alimentarem potum, inde intelligitur, quia medicamenta solent esse ingrati saporis, ut raro & parca ab hominibus sumantur; vini autem sapor gratiam & illecebram maximam habet. Vt Aristoteles dicere ausus sit: *Omnes homines opsonijs, vinis, Venereis, neminem dolore oblectari.* Arist. lib. 7. c. 14. Ethic.

Vnde nec placet doctissimi Vallesij paradoxum, qui vulgare istud, *Vinum est lac senum*, verum esse negat. *Vinum esse lac senum, non valde probo, inquit. Censeo potius senibus sensim esse dandum dilutius, usquedum in extremo senio constitutus, toto vino detracto, detur pro eo mulsæ, aut decocta aqua.* Rationem istam haber. Quia si vinum meracum corpori senili & frigido infundatur, periculum est, ne calore suo calorem naturalem extinguat, calefaciendo & evaporando tenue quod restat humidi primigenij, quo calor naturalis alebatur; veluti flammula lampadis emoritur, si quis carbonem ardentem iniiciendo, oleum exsiccat; qua etiam comparatione alicubi usus est Aristoteles. Arist. sect. 3. Problem. Galen lib. 5. de sanit.

Sed cur non potius hic audimus Galenum? *Vinum, inquit, ut pueris adversissimum, ita senibus quàm aptissimum est.* Idem quoque Cui, & Latini Hippocratis, ac passim Medicorum sensus.

E e

Et

Et nonne natura etiam, sine alio Medico præceptore, senes hoc docet? Naturaliter enim meracum avidius quàm dilutum bibunt, ut senilem & segnem ventriculum excitent; sicut annosi Musici etiam nescientes, altius & vocalius intonant, ut vincant duritiem sui auditûs, inquit Plutarchus.

Hinc Homerus, qui mira arte & ingenio unicuique personæ, quod maximè decet & convenit, accommodat, Nestorem triseclisenem & Heroum vetustissimum, vini appetentissimum facit, ideoque poculum ejus tam curiosè, quàm Achillis clypeum describit. Bibant ergo vinum senes, & quicumque senili & imbecillo stomacho, quales plerumque litterati, sed moderatum. Hoc enim eas vires non habet (quod metuebat Vallesius) ut humidum primigenium ventriculi exhalet, sed spiritu suo seipsum potius digerit, inquit Aristoteles, & calorem ventriculi excitat ac juvat. Vnde fractis jam in ventriculo, ejus viribus, ad hepar transmittitur, ut ex eo non crudo, sed satis excocto optimus gignatur sanguis, reparando in singulis partibus humido primigenio maximè idoneus. Nec modicum illud vini, quod temperantes litterati forbillant, facile despumat in libidinem, cùm spumas & spiritus ejus, studijs & ingenij igne in castas cogitationes facile decoquant. Largiores verò haustus & invitationes, mentis & corporis oculos obnubilant. Poëtæ tamen plusculum hîc sibi indulgent, & *vinum*, equum suum esse jactant:

Οἶνος τοῖ χαρίεντι πέλει μέγας ἵππος αἰοδῶ. Quod quidam sic Latine vertit:

*Vinum equus est lepidus magnus veloxque Poëtæ.*

Nisi enim Poëticus furor vapore vini incendatur, languidus est & ambulat pedestris.

*Possum nil ego sobrius, bibenti*

Martial.

*Succurrunt mihi quindecim Poëtæ.*

Spiritus enim animales, spiritu vini raro & agili incitati, mobiliores & celerius discurrunt per cerebri amfractus & carnales, unaque promptius verborum fragmina & hemistichiorum, è sellis memoriæ revehunt ante imaginationis conspectum. Quod melancholia paululum calefacta etiam facit. Vnde Maracus,



racus, Poëta Syracusanus, nunquam præstantior, quàm cum mente alienaretur, inquit Aristoteles. Æschylus in popinis carmina sua fundebat.

Arist. sect.  
29. Probl.

*Laudibus arguitur vini vinosus Homerus.*

Horat.

Et ipse Epicuri de grege porcus:

Juvenal.

— satur est, cum dicit Horatius, Ohe.

Quippe,

Horat.

*Nulla placere diu, neque vivere carmina possunt,*

*Quæ scribuntur aqua potioribus.*

Ita boni isti Castalios suos frontes in vini amphoras convertebant, Hæc etiam licentiâ Poëtica turba illa Italorum Poëtarum nuper abusi: inter quos Princeps & Archipoëta, lauro, brassicâ, pampino à socijs creatus coronatusque, Camillus Quernus Apulus; quod non minus facilis & extemporalis in effundendis versibus, quàm infundendis cyathis esset. Hic est, qui Leoni x. cænanti adstans, & à Pontifice, qui fabulis & familiaritate eruditorum delectabatur, jussus distichum extemporale de se expuere, subito hexametrum istud fudit,

*Archipoëta facit versus pro mille Poëtis.*

At cum aliquantisper in pentametro hæsitaret, suggestit ei festivè ex tempore Pontifex:

*Et pro mille alijs Archipoëta bibit.*

Sed tales à viris honestis & eruditis minimè imitandi. Sapi-entem potius audient. *Quàm sufficiens est homini erudito vinum exiguum, & in dormiendo non laborabis ab illo, & non senties dolorem.* Vbi largiùs autem fortè ad extinguendam sitim & ventriculi æstum, hauriendum est, ferocia ejus lymphis castranda, si cui natura fervidior, & à pruritu Veneris est metus.

## ARTICVLVS IX.

*An varietas cibi ac potus utilior, quàm simplicitas.*

**S**anus homo, qui & bene valet, & sua spontis est, nullis obligare se legibus debet, ac nec Medico, nec iatralipta egere, inquit Celsus. Ac deinde: *Nullum cibi genus fugere, quo populus utatur: interdum in convivio esse, interdum ab eo se retrahere: modò plus iusto, modò non amplius assumere: bis die potius, quàm semel cibum*

Cor. Cels.  
lib. 1. c. 1.

E e 2

capere:

capere: & semper quàm plurimum, dummodò hunc concoquat.

Favorabilia prorsus, & ad genium præcepta, sed pro sanis inquit; nam imbecillis stomacho (quo in numero magna pars urbanorum, omnesq; panè cupidi litterarum sunt) observatio maior necessaria est. Nihilominus etiam istis utile non est, uni generi diætæ pertinaciter inhærere, sed alternare, ut unus cibus sit medicina alterius, & posterior naturam relever, si quid noxæ, aut fastidii prior attulerit.

Sed hîc quærimus, an in eodem prandio, aut cæna, varietate ferculorum uti, pro sanitate sit, siue quis robusto, siue imbecillo stomacho fuerit.

Plut. lib. 4.

q. 1. Sym.

pos.

Plin. lib. 23.

c. 1.

Argent.

Comment.

3. in Art.

Galen.

Marcion apud Plutarchum, salubriorem varietatem existimat. Variæ enim sunt partes humani corporis, quarum una isto, alia alio ciborum genere meliùs nutritur & gaudet. Latius potus ossa alit, frugum nervos, aqua carnes, ait alicubi Plinius.

Consentit ingeniosus & subtilis Medicus Io. Argenterius: Natura unicum & uniforme nutrimenti genus aversatur, inquit, quare nec appetit, & proinde nec retinere, nec concoquere probè potest.

Arist. sect. 1.  
Problem.

34.

Aristoteles tamen varietatem illam apertè damnat. Ταραχὸς γὰρ, καὶ οὐ μὴ πένσις, Turbulenta enim, nec uniformis ea concoctio est, inquit. Et Hippocrates panem & mazam, atque his finitima, quibus homines copiosè & semper uti solent, in cibo maximè laudat; quia nihil habent intemperati neque vehementis, sed omnia unum sunt, & simplex, & validum.

Non sic in turba, & diversissima temperie ciborum. Vbi etiam qui concoctu erit facilior, citiùs ventriculo elabi festinabit, turbabitq; ceterorum nondum perfectam concoctionem, crudosq; secum in intestina abripiet; aut si ijs implicitus, expedire se è ventriculo non possit, torrebitur ultrà quàm maturitas chyli exigit. Deinde alimenta difformis temperamenti se mutuò corrumpunt, & obturbant, ait Aristoteles, ne facillè coalescere possint cum partibus viventis. Denique, si eligatur unicus & laudabilis succi cibus, jecur inde plurimum sanguinis, minimum bilis, melancholiæ, & pituitæ conficiet: ubi in varia ciborum farragine, affatim materiæ invenitur



venitur pro omnibus istis excrementitijs humoribus, quibus inquinatur puritas sanguinis. Nam licet, Hippocrate & Galeno fatentibus, bilis, melancholia, pituita non contineantur in materiâ ipsa cibi & potûs, sed ex cibo & potu à facultate jejorisi fabricentur, perinde ac sanguis; varietas tamen illa humorum oritur ex materiæ diversa complexione, ob quam una pars in bilem, alia in melancholiam &c. aptior est transmutari. Vbi verò cibi multi & differentis temperiei in una ventriculi olla coquantur, fieri non potest, quin plures partes humoribus excrementitijs generandis idoneæ reperiantur.

Verùm experientia quotidiana hanc opinionem refellit, ait Argenterius. Nullus enim est, qui in quacumque cibatione non utatur pane, carne, oleribus, caseo, & vino absque aliqua concoctionis perturbatione.

Sed ei Aristoteles fortè respondebit: In cibo & potu magnam esse vim consuetudinis, ut Medici omnes fatentur: proinde ab assuetis non fieri passionem. Et licet quotidiano victu aliquid de optima valetudine decerpatur, non tamen sentitur, nisi cùm detrimentum insigne paulatim factum fuerit.

Ne tamen nimis severi simus, & ut mensarum nostrarum consuetudini aliquid demus, varietas aliqua permittenda, ob duas causas.

Primò, ad vitandum fastidium, quod unitas ferculi facile parit; sicque natura minus sumat, quàm ad omnium partium corporis nutrimentum necesse sit. Deinde varietas ista ad solutionem alui conducit, quam litterarum amatores duram sæpe & pertinacem experiri solent, ex vita sedentaria, & quia studium vapores attrahendo in caput, excrementa indurat, & alium suspendit. Vnde inter fluxæ alui remedia, *Non uti cibus varijs*, ponit Hippocrates Latinus.

Cor. Celsus  
lib. I. c. 6.

Aristoteles quoque alio fine bellaria & secundas mensas primis adijci non abnuir, *ἕτερα τοῦ πρώτου ἵνα ἴσως, ut sufficienter bibamus*. Vult enim non tantum inter prima fercula, sitis causa, haustus aliquot interpoui, sed in fine quoque mensæ cibum plusculum irrigari, & rorem istum bellarij temperari.

Arist. sect.  
22. Probl.

In ista tamen ciborum varietate, proclivis est in crapulam & nimiam repletionem lapsus. Difficile enim est inter tot

fercula & gulæ irritamenta, sibi temperare. Vult lucta inter spiritum & carnem, etiam in viris spiritualibus, quam Augustinus etiam, tantus vitæ spiritualis Magister, adhuc in se consistebatur.

S. Aug. lib.  
10. c. 31.  
Confess.

*His tentationibus gulæ, quotidie conor, inquit, resistere & invoco dexteram tuam ad salutem meam, & ad te refero astus meos, quia consilium mihi de hac re nondum stat. Audio vocem iubentis Dei mei, Non graventur corda vestra crapulâ & ebrietate. Ebrietas longè est à me, misereberis, ne appropinquet mihi. Crapula autem nonnunquam subrepi servo tuo, misereberis, ut longè fiat à me. Frigida ergo manu, & suspensa in Deum mente, viro religioso sumendus est cibus, cavendumque ne cum putamus valetudinis, negotium agamus voluptatis. Vnde licet condimenta ciborum vendita non sint, cum sponsa in Canticis optet sponso suo dare poculum conditum, inquit Victoria; periculum tamen semper est, ne blandimenta ista, quæ ad faciliorem cibi potusque descensum inventa sunt, ad plenitudinem nimiam & crapulam nos abducant; faciamusque, ut ait quidam, quod avari nautæ, qui plenâ etiam vecturâ, tamen onera nunquam reiiciunt, & ita subinde onerant navem, ut pondere demergatur.*

Cant. 8.  
Victor. Re.  
lect. de  
Temper.

Optimum igitur ad virtutem & corporis salubritatem fuerit Galeni consilium audire. *Non decet, inquit, propter sitim, sorbentium instar, totum calicem exhaurire, nec propter famem in conspectu omnium insatiabiliter ventrem explere. Sed danda opera est, ut omnibus unâ canantibus minus opsonij assumamus, & à cibis gulam nimium irritantibus abstineamus; moderatè interim vescentes ijs, quæ salubria habentur. Et in istis etiam ipsis adducto animo oportet esse, nec nimis effundi; imitarique C. Lælium, illum à M. Tullio sic ubique laudatum, qui veniebat ad cenam, ut animo tranquillo desideria natura satiare: non verò tumentibus buccis non tam edere, quàm tuburcinari, quod in Bocotis Menander ridet & carpit; indeque proverbium, Porcus Bæotus. Tales Aristoteles γαστρίμαργοι ventri furentes appellat: quales maximè, inquit, esset solent, qui valde servili sunt ingenio. Quâ verecundiâ meritò omnes ab hianti ista ingluvie deberemus reprimi.*

Galen. lib.  
de Curand.  
affect.

Cic. lib. 2.  
de Finib.

Arist. lib. 3.  
c. 13. Ethic.

Deligenda igitur statim in principio mensæ salubriora alia quot



quot fercula, ad quæ manum extendas, obfirmato adversus cetera animo, & arridenti ac gestienti versus omnes patinas gulæ injectis maturè frenis. Sed & honestis fabulis avertere animum à patinis, utile, & usitatum olim Philosophis. *Sicut Lydi tempore famis, non comedunt nisi alternis diebus, inquit Plutarchus, reliquum vero temporis implent aleâ & lusibus, ut fallant interpellationem vacui ventris; ita viri litterati inter epulas propositionem aliquam Geometricam, aut Libellum versare, aut lyram subinde tangere debeant, ut minus comedant.*

Plut. lib. de  
Sanit.

De Geometrica tamen propositione, non omnino placet. Geometria enim, & figurarum omnis apparatus nimis multum habet imaginationis, & consumit spiritus; velut etiam quidquid ingenio recenter fabricari, vel ex abdita memoria evocari debet. Res ergo faciles tantum & in promptu positæ super mensam tractari debent. Quales inter secundas præcipuè mensas, jucundæ disputationes, *bellaria eruditorum* appellari solent. Quanquam hoc tamen etiam à me expertum: Ventriculi functiones minùs lædi gravibus disputationibus & acri intentione mentis, dum adhuc cibus potusque ingeruntur, & omnia adhuc in turba sunt, sidentibus gravioribus, & quæ leviora sunt scandentibus; quàm mox à prandio aut cæna, quando omnia secundum æquilibrj leges disposita quiescunt, & ventriculus calore naturali spirituque collecto, primæ concoctioni incumbit. Tunc enim seriæ cogitationes spiritus ventriculi ministros confertim in cerebrum rapiunt & necessario calore ollam destituunt, maximè sensibili noxâ. Cæsar Macrinus consilium illud Plutarchi secutus, cum cibi vini que avidissimus esset, *convivio litteratos adhibebat*, ait Capitolianus, *ut loquens de studijs liberalibus, necessario abstineret.*

Isid. Capi-  
tol.

Religiosi verò, & Ecclesiastici quicunque magis pij, aut elegantes, Anagnosten adhibent, qui è Libris sacris, aut Historijs recitet aliquid super mensam, ut pars animalis ad pastum incurvata sursum revocetur, & mens una cum corpore pascatur. Hoc Augustinus, hoc Ambrosius, & SS. Patres factitabant, paulò quàm nos hic scrupulosiores & conscientia tenerioris. Nam in delectatione creaturæ, sine relatione

ad

ad Deum, hære, peccatum à Deo vindicandum existimabant. Ideo pugnam & æstum animi sui explicans Augustinus. *Sæpe incertum est, inquit, utrum adhuc necessaria corporis cura subsidium petat, an voluptuaria cupiditatis fallacia ministerium suppetat. Ad hoc incertum hilarescit infelix anima, & in eo preparat excusationis patrocinium, gaudens non apparere, quid satis sit moderationi valetudinis, ut obtentu salutis obumbret negotium voluptatis. His tentationibus quotidie conor resistere. Vnde alibi monitum ejus. Discernere ac nosse debemus, quid necessitas refectiois, quid libido edacitatis exposcat, quorum negotium est, contra concupiscentem carnem spiritu concupiscere, & delectari legi Dei secundum interiorem hominem, ejusq; delectationis serenitatem nullis libidinosis delectationibus nubilare. Et ut doctrinæ & vitæ ejus sanctitatem videas: Quis mente sobrius, inquit, non mallet, si fieri posset, sine ulla mordaci voluptate carnali, vel arida sumere alimenta, vel humida, sicut sumimus hæc ærea, quæ de circumfusus auris respirando & spirando sorbemus & fundimus? Tam, inquam, aversus erat ab omni terrena voluptate, ut optaret, fauces non majori pruritu cibos in stomachum, quàm aërem in pulmones trajicere. Quod etiam inter Ethnicos censebant qui erectioris & supra vulgum animi. Nam Socrates voluptatem in cibo ac potu non desiderabat, ait Plutarchus. Et de Lælio suo, cùm lapathum & olera hortensia esitaret, M. Tullius: *Non lapathi, inquit, suavitatem, accipenser Gallonij Lælius anteponebat, sed suavitatem ipsam negligebat.* Vnde talium, & quotquot plusculum auræ cælestis habent, mensæ breves sunt, & dimidiatâ horâ, aut integrâ horulâ absoluntur. Quod etiam Medici suadent ad salubritatem, ut omnia simul concoquantur, & ne supervenientium cruditas præcedentium perturbet cocturam.*

Aug. lib. 10.  
31. Confess.

Lib. 4. c. 14  
contra Iul.

Cic. lib. 2.  
de Finib.

## ARTICVLVS X.

*Quo ordine sumi debent à nobis alimenta.*

**P**otum statim initio mensæ propinare nemo probat, præter paucos, qui dicunt liquida citissimè digeri, ideoque præmittenda esse. Sic faciunt coci nostri, dum aquam ollæ primùm infundunt, deinde elixandas carnes injiciunt.

Verum



Verum afortorum sunt istæ leges, qui mente statim capi, aut curarum oblivisci volunt. Vnde Homerica Helena, ut tristitiæ nubem Telemacho & hospitibus suis dispelleret, vinum statim in principio convivij, & quidem medicatum apposuit. Vinum enim, aut cerevisia vacuo & æstuanti ventriculo infusa, in vapores mox resolvitur, qui in caput scandunt, & mentem alienant. Destillationes quoque generant, quibus nihil perniciosius ijs qui Libris vacant. Vnde Plinius: *Vinum ieiunos bibere, novitio invento, inutilissimum est.* Inventum verò istud novitium, à Principatu Tiberij Cæsaris, de quo alibi Auctor idem: *Tib. Claudio Principe ante hos annos XL. institutum, ut ieiuni biberent, potusq; vini antecederet cibos; externis & hoc artibus, ac Medicorum placitis, novitate aliquâ sese commendantium.* Sic Medici illi de corio & vitâ nostrâ ludunt, & gloriæ ac vanitati suæ nos immolant.

Odyss. 4.

Plin. lib. 23

c. 1.

Lib. 14.

c. 22.

Vt igitur in ventriculo bene temperato fames naturaliter sitim præcedit; ita cibus ante potum præmitti debet. Nam si potus antecedit, nullo ciborum retinaculo frenatus, levi mutatione, è ventriculo in intestina elabitur, frustraturque sine suo; qui erat, macerare ac temperare cibum, ut uterque in unam massam fermentatus, verterentur simul in liquidum chyli cremorem, alendo animali idoneum. Vnde amicos invitando, naturâ duce, cibum præponimus potui: *Comedite amici, & bibite, & inebriamini charissimi.*

Cant. 5.

Liquidus tamen cibus, ut juscula & sorbilia non malè vacuo stomacho committentur; quomodo illud Scholæ Salernitanæ scitum;

— à potibus incipe canam, Villanovanus interpretatur.

Cibi enim liquidi non tam præcipiti cursu stomachum, quam potus, deserunt; quia crassamentum aliquod habent, retinenturque pertinaciùs à ventriculo, quia materiam in quam calorem suum & vires diutiùs exerceat, continent. Hoc etiam commodi liquida ista præsumpta præstant, quòd intestina lubricent, & adstrictæ alui defectiones adjuvent.

Inter solidiores cibos Medici quidam, crassos & concoctus difficiles præmittendos censent, quia ventriculus in fundo

Ff

carnosior

carnosior & calidior est, ideoque validior ad conficiendum. Dicunt etiam se ordinem elementorum Mundi imitari, in quibus terra & crassiora tenuioribus subsidunt. Videtur etiam Cor. Celsus lib. 1. c. 2. Celsus approbare: *Cibus*, inquit, à *salsamentis*, *oleribus*, *similibusque rebus melius incipit*. Nisi *salsamenta* ista, non carnes salvas, sed colymbades & juscula salsa ac pingua Threvirus interpretaretur. *Primam enim*, inquit, *partem mensæ sibi vindicant quæ ventrem movent; qualia sunt juscula salsa & pingua*. Quapropter carnes salvas cum cerevisia Threvirus in finem vellet potius differri. Consentit Galenus, qui *humida, pingua, dulcia* præmitti vult, ad lubricandam aluum. Hippocrates quoque, Galenus, ac Medici veteres leviolem & cocturæ facilioris cibum præmitti jubent, ut statim atque percoctus fuerit, Pylorus, sive Ianitor (quod est inferius ventriculi orificium) transitum ei aperiat, ut in intestina elabi possit, nec durioris cibi concoctionem expectare cogatur, & interea torreri ultra quam naturalis maturitas & perfectio chyli postulat; quod fieret, si durior cibus præmitteretur, & ventriculi fundum occuparet. Hac fortasse causa Romani sub Cæsaribus, cœnam à lactucis inchoare instituerunt, cum majores eorum in finem rejecissent. Vnde quidam:

Martial.

*Claudere quæ canas lactuca solebat avorum,  
Dic mihi, cur nostras inchoet illa dapes?*

Quia, inquam, lactuca, quamvis cruda, comperta est facilis digestionis, & minimo statim calore emarcescere. Ad hæc, lentitiam pituitæ in vacuo ventriculo reliquæ digerit, aluum ciet, & appetentiam cibi acuit, teste Plinio. Ingentem apud Romanos gratiam adepta, postquam ab Antonio Musâ Augusti Medico tempestivè adhibita, Principi reddidit sanitatem. Vtilis quoque castitatis & Musarum cultoribus, præcipuè lactuca rotunda, minimâ radice, latis folijs, quæ Eunuchion vocatur, quia hac maximè Veneri refragetur, ait Plinius.

Plin. lib. 19  
c. 8.

In hac dilectum Adonin à Venere sepultum Poëtæ ideo fabulantur, vocantque *νεφέλιον* mortuorum edulium: etsi omnium lactucarum esu sit jucundissima, ait Athenæus.

Athenæ.  
lib. 2.

Attamen non sola lactuca, sed integræ mensæ, quæ vocabantur *frigida*,



*frigida, ut aestrea, echini, cruda omnia olera, tanquam levis armaturæ pedites, ab ultimo agmine ad frontem traducta, locum nunc obtinent primum, ait Plutarchus, qui cum Martiali vixit. Nec tamen salubritas corporis inde quæsitæ, sed commendatio ex novitate & soliti ordinis commutatione, si Senecæ credimus.*

Plut. lib. 2.  
q. 9. Sym-  
pos.

Paria tamen etiam Medici juniores, de substernendis cibis levioribus, censent; contra morem nostrum, qui primas men-  
sas procinâ & bubulâ ferè oneramus, succedentibus ovinâ,  
vitulinâ, & volatilibus. Sed in reddenda ratione, videntur  
cum Medicis veteribus, supponere, inferius ventriculi orifi-  
cium in fundo ipso esse, non in latere dextro; & situ quidem  
altissimo, ubi Vesalius & vera Anatomia eum ponit. Sed ju-  
vat verba ejus hic adscribere.

Senec.  
Epist. 114.

*Alterum ventriculi orificium, inquit, cibos in cremorem emutatos ad intestina transmittens (unde etiam πύλωψ Græcis, nobis autem Ianitor, & inferius os appellatur) in dextra eius sede consistit; non quidem, ut totus Anatomicorum chorus arbitratur, in dextræ sedis inferiori regione, sed in elatissima, dextroque ventriculi lateri proxima. Et causam, cur ingeniosa natura eum ibi posuerit, subnectens. Non enim sat erat, ait, mutuo è διεστέλλεσθαι hac orificia invicem non opponi, ne cibus adhuc immutatus, occlus è ventriculo laberetur; verum inferius à superiori remotius abduci oportuit, & ex elatiori quoque ventriculi sede explantari, quo minus cibus sua gravitate ventriculū subterfugeret; sed tunc primum confectus & in cremorem exquisitè mutatus, ventriculi potius excernendi robore, quàm suo pondere, in intestina propelleretur. Verum etiam oculis res ista spectari meretur. Turpe enim est, nescire quid, aut qualis stomachus noster, de quo nobis tam sæpe sermo: à cujus valitudine, totius corporis vigor & salus suspenditur, cum omnibus membris præcoquat alimentum. Vnde non tantum communis coquus, sed etiam Rex corporis à quibusdam, inquit Vesalius, appellatur.*

Vesal. lib. 1.  
c. 3.

Vide igitur Lector, apud istum Anatomicorum Principem Lib. v. Figuram xv. Spondeo, non te vidisse, & cum cura inspexisse poenitebit. Ibi autem, cernes ventriculū instar sacci oblongi jacentis, & protensi à latere hominis sinistro

Et 2. ad dex-

ad dextrum; sic tamen, ut sinistra ejus pars, quæ obtusior & capacior, aliquanto depressior sit, quàm dextra, quæ moliter sursum in acumen assurgit. Superius ejus orificium qui propriè dicitur stomachus, per quem cibus è summa gula illabitur in ventriculum, non perforat ventriculum in medio sed declinando paulisper in sinistrum latus. Nec Ianitor sive orificium inferius respondet è regione orificio superiori, sed est in summo gibbo seu acumine lateris dextri; nec aliâ ratione vocatur orificium inferius, quàm quia reflectitur in intestina inferiora, & per ipsum in ista delabitur chylus. Aliàs enim altiolem situm obtinet, quàm orificium superius, mirâ naturæ & Dei providentiâ. Si enim introitus cibi in ventriculum esset elatior, quàm exitus, è pleno ventriculo cibus indigestus, per Ianitorem vi exiliret; sicut in aquæductibus artificialibus, aqua è tubis fontium in altum compressa salit, si scaturigo, unde aqua deducitur, altior sit quàm orificium fontis.

Ex tali autem ventriculi conformatione, etiâ patet, non necessariò priùs exire è ventriculo quod priùs ingestum fuit. Nam cibus qui per superius orificium primus in ventriculum decidit, gravitate suâ imam illam & sinistram ventriculi capacitatem petit; id est, locum à Ianitore & ab exitu remotissimum. Cibus verò qui posterius superijcitur, necessariò in dextrum latus versus Ianitorem magis declinat, & januæ quæ exeundem est, magis appropinquat.

Porrò post aliquantum cibi, infundendus est potus, sed Græcantium more, parvis haustibus, ut cibus potiùs irrigetur quàm inundetur: juxta Salernitanam legem, *Inter prandendum sit sæpe parumq; bibendum*. Sic enim cibus potusque in unum *cupapa Massam*, ad chylosin perquàm idoneum, commiscuntur. Aliàs, ubi magnis haustibus certatur, & voluptatis, non sanitatis causa agitur, nihil ferè refert, cibus, an potus præcedat, & inter cibos, gravesne an leves; cum omnia in ventriculo natent, & juxta naturales æquilibrij leges, quod gravius est, in fundum desidat. Et inde est, ut quia ficus graves sunt, in liquido ventriculo mergantur, & novissimè *estata*, ultima  
tamen



*tamen evomantur*, ait Aristoteles. Sed tam humidæ mensæ nec Theologicæ, nec Philosophicæ sunt, nisi fortasse Epicureo-  
tum.

Arist. sect.  
22. Probl.

Statim post primum cibum, cerevisiam præmittere vino, ut Belgæ solemus, magis probat Villanovanus: quia vinum penetrabilius, & periculum est, ne avehat secum in intestina superfluitates ( quibus vacuus ventriculus abundare solet ) & vnà illud modicum cibi adhuc crudum, quod initio præsumptum fuit. Celsus & quidam alij suadent haustu aquæ frigidæ, aut certè tenuis & frigidulæ nostræ cerevisiæ claudere refectiorem, ad constringendum supernè ventriculum. Hoc enim concoctionem roborat, exhalationes, ne in cerebrum evolent, comprimit, & alui dejectionem magis strenuam facit. Vnde huic etiam fini, *aliquid astringens post cibum sumere*, Galenus monet. Similiter & *stomachum roborantia, ut mala, pira, & Punica*. Quod Hollandis nostris malophagis non displicebit, nec nos abhorremus.

Galen. lib. 6  
de sanit.

Non miretur quisquam Philosophum ad ista raptim descendere. Eruditorum enim valetudo & longa vita Reip. necessaria est, quam multi & studiorum intemperantiâ, & diætæ neglectu corripere solent, crudiq; in sepulchrum decidunt, antequam studiorum ipsorum fructus, Resp. potuerit decerpere. Vnde nec pigebit, à summo Philosopho Platonico etiam ista addere. *Cibus esto duplex ad potum, panis duplex & sesquialter ad ova, triplus ad carnes, quadruplus ad pisces, herbas, fructus humidiores. Ne incipiat à potu mensa, neque potus sit semel uberior. Semper stypticum aliquid ( quod etiam ex Galeno paulò antè dicebamus ) absque potu, vel modico, sequatur mensam.*

Marfil. Fictia. lib. 2.  
c. 6. de Vita produc.

Panis autem, inquit Galenus, *is saluberrimus est homini neque iuveni, neque exercitationibus dedito, qui tum salis, tum fermenti habet plurimum, maximeq; fuerit, antequam assetur, subactus*. Salem autem pani addendum esse significare volebant veteres, dum in eodem templo semper apud Cererem, Neptunum collocabant, ait Plutarchus. Sit etiam triticeus, nec omni fursure excribratus, sed miscellaneus. Fursur enim alium obstinatum relaxat, quia *aliquid facultatis deterforie habet*, ait Galenus.

Galen. lib. 1  
de Aliment.

Valles. c. 27  
Phil. sacr.

Ezech. 4.  
Psal. 104.

Luc. 11.

*Vnde intestinis exasperatis, celeris eorum fit deiectio. Quia verò panis ceteris omnibus cibis permiscetur, Scriptura panem pro omni cibo usurpat. Deinde regem ciborum appellare jure possumus, quia mediocritatem omnino & tenuium & crassorum tenet, inquit Vallesius, facultatum medicamentosarum maximè expers, & merè alimentum. Est enim moderatum quiddam, addit, neque calidum, neque frigidum, neque humidum, neque siccum, neque facultate medicamentosa expurgandi, aut sistendi, aut laxandi, aut aliud ejusmodi faciendi. Sed si tantillum, inclinat in calidum, quo natura gaudet & fruitur. Firmitatem quoque ceteris alimentis fluxis & imbecillis præcipuè præstat, ut corpori nostro affigantur, & hæreant pertinaciùs. Vnde meritò Ezechiel baculum panis, quo membra invalida sustentantur, David firmamentum panis, appellat. Et antè, inter laudes Creatoris ponit, quòd pane cor hominis confirmet. Christus etiam panem quotidianum petere nos docuit; quia cibus iste unus sine alijs sufficit, non alij sine ipso. Qui enim pane parcius utuntur, copiosè autem carnibus aut piscibus, ait Lemnius, corpore efficiuntur laxo, carne fluida, halitu graueolenti ac vitiosi; qualis in Poëta Euripide olim notatus.*

## ARTICVLVS XI.

*Plurimi Medici suadent cenam largiorem prandio.*

relem.  
Thriver.  
in Cels.

Cels. lib. 1  
c. 3.

**M**ulti olim Philosophi, ut diem totum studijs vacuum haberent, mensas in vesperū differebant, aut in prandio non nisi mel ex pane lingeant, quod non multam concoctionem desideraret, inquit Thrivèrus. Christiani quoque veteres jejunia sua non ante vesperam solvebant: & hodie etiam tam longum jejunium tolerabile esset, nisi gulæ intemperantia mutasset consuetudinem. Quòd enim nunc sæpius in die venter nos interpellat, est, quia consuetudo nos fecit ejus debitores. Sanè Cor. Celsus suadet, saltem hieme, semel die cibum capere, nisi si venter nimis adstrictus est.

Sed frustrà hodie tentemus homines ad victum tam castigatum reducere: & re verà plerisque utilius est, bis modicè, quàm



quàm semel plenissimè corpus reficere. Calor enim naturalis sub ista plenitudine obruitur, aut vix respirat; & ignis luculentior est, si paucis per intervalla lignis eum nutrias, quàm si magna simul strue eum opprimas. Longa deinde inedia ventriculum cruditatibus pascit, & bilem auget. Hinc gallinæ ab incubitu, & longâ fame furunt, sues & canes à partu famelicæ, iracundæ & impatientissimæ sunt. *Vetus adagium est*, ait Sofia Plautinus, *fames & mora bilem in nasum conciunt*. Nam tempore famis, cibus antea sumptus immodicè coquitur, & in bilem vertitur.

Plaut.  
Amphi.

Prandeamus igitur & cænemus, quamdiu sani sumus. Sed si Hippocratem, Galenum, Philosophos pænè omnes audiamus, inquit Villanovanus, cæna largior erit, quàm prandium. Imò, *si prandet aliquis, utilius est, exiguum aliquid, & ipsum siccum sine carne, sine potione sumere*, ait Celsus. Prandium enim tanquam leve quoddam & perfunctorium jentaculum soli sumebant, cænam verò, tanquam plenam & legitimam refectiorem, in multorum coetu: unde cæna quasi *κοινὴ* dicta, id est, *communio*, seu multorum convivium. Hinc de prandio suo Horatius: *Pransus non avidè, quantum interpellat* (hoc est, impediat) *inani Ventre diem durare*. Nam bolos tantùm aliquot latranti stomacho objiciebant, ut impatientiam ejus solarentur magis, quàm ut implerent ejus appetitum. Hinc de avunculo suo Plinio seniore Plinius junior: *Cibum interdiu levem, veterum more sumebat*. Idem quoque Cæsarem Augustum factitasse notat Beroaldus. Quia verò prandium i'tud olim circa meridiem, ut nos, sumebant, Suetonius *cibum meridianum*, antiqui *merendam* appellabant. *Merendam antiqui dicebant pro prandio*, inquit Festus, *quòd scilicet medio die caperetur*.

Cor. Cels.  
lib. 1. c. 3.

Horat. lib.  
1. satyr. 6.

Plin. Epist.  
ad Macrum  
Suet. Aug.  
73.

Siccum autem prandium ideo jubet esse Celsus, quia nihil aut minimum inde exhalat in caput. Vnde libera studiosis mens usque ad cænam; nec augentur sic, sed siccantur potiùs destillationes. Experientiâ quippe cognitum est, modico & sicco ientaculo consumi catarrhos, & tamen unâ astrictæ alui dejectiones incitari; quod multi experiuntur.

autem

autem & certius id fiet, si mora, & id genus lubricantia alium & celeriter transeungia, æstate primo cibo assumantur.

Horat. lib.

2. satyr. 4.

Vnde monitum Horatij jam intelligitur — ille salubres

*Æstates peraget, qui nigris prandia moris*

*Finiet, ante gravem qua legerit arbore solem.*

Vult enim, opinor, prandium, seu primum diei & leve illud ientaculum, finiiri, hoc est absolvi solo mororum rorulentorum esu, quæ manè ante ardorem solis colligantur. Renuit verò ( si Medicus est ) prandia sua æstiva finire, sive claudere moris, quæ priori cibo superijciantur. Nam *mora celerrimè pertranscunt*, ait Galenus, *cibisq; alijs præstant, si in ventriculum purum inciderint, & sumpta in primis epulis fuerint. Quòd si post alios cibos sumantur, aut pravam succum in ventriculo offenderint, celerrimè computrescunt cum alijs cibis,*

Galen. lib.  
2. de alim.

Quia autem veteribus illis molestum erat sem-inani ventre durare ad solis occasum, cæna in horam diei decimam, deinde in nonam, id est tertiam pomeridianam retracta est:

Martial.

*Imperat extructos frangere Nona thoros.*

Hinc Belgæ Gallizantes adhuc hodie prandij tempus, *Nonam* vocant, nomine à Romanis olim in Belgio dominantibus retento. Dividebant autem Romani diem artificialem semper in duodecim horas; quæ æstate longiores, hieme necessariò breviores erant.

Cur verò Medici magis probent cænam largiorem prandio, duplex est causa. Primum, quia duplo longius est tempus inter cænam præcedentis diei & prandium sequentis, quàm inter prandium & cænam ejusdem diei: igitur largior cæna facilius & perfectius longiori illo tempore concoquitur. Concoctio enim spatio indiget. Deinde nox & somnus cænam excipit; somnus autem ventriculum roborat, & concoctionem adjuvat. Calorem enim & spiritus ab organis sensuum & superficie corporis, ad centrum & partes vitales revocat. Adde jam, mentem & omnes sensus nocturno somno sopitos non distrahere animam, quo minùs totâ virium mole in concoctionem & operationes vegetativas incumbat; cum à prandio, studia & cogitationes pomeridianæ digestio-

nem



nem interpellent. Hinc Cardanus Medicus filium Medicum instituens, *Prande bis*, inquit, *pane & modica carne, vel pisce asso, bibes parcissimè: cæna sit ad satietatem.*

## ARTICVLVS XII.

*Litterarum tamen studiosis cæna prandio parciore & siccior conuenit.*

**L**Argior enim cæna hanc noxam habet; quòd multi & conferti vapores ex ea tanquam ollâ bulliente, tempore somni exhalent in caput; unde catarrhi & vertigines, maximè ubi cænæ nostræ plusculum madidæ sunt, aut fumantes. Hinc Laurentius ait, nihil perniciosius esse catarrhis (quales plerique verè & ex professo studiosi) quàm bibere proximè antequam quis cubitum concedat. Cui malo veteres illi Græculi, Græcantes & bibaculi, remedium ab hedera, myrto, rosæ petebant, quibus se inter pocula coronabant. Quos imitari invicem se hortantur asoti illi apud Sapieniem: *Vino pretioso & unguentis nos impleamus. Coronemus nos rosæ, antequam marcescant.* Hederam enim, myrtum, & rosas frigerare & astringere spiritum vini, lenireque æstum capitis censebant. Sed hederam præcipuè, ideoque eâ Bacchum suum coronabant. Nam *hedera naturæ est*, inquit Tertullianus, *cerebrum ab heluco* (id est, crapulâ, & gravedine capitis) *defensare.* Sed præstat vitare causas, quàm quærere remedia malorum. Vnde Musarum cultoribus suadeo universim, cænâ leviori, quàm prandio defungi, imitarique Platonem, cujus cæna, ut olim inter Philosophos ferebatur, efficiebat, *ut homines manè bene valerent.* Cerebrum quippe litteratoribus plerumque friget, consumptis per meditationes spiritibus, qui ipsum calefactabant: unde halitus ex cænâ copiosiore in caput scandentes, faciliè refrigerantur, & repluunt in destillationes. Tempus enim inter cænâ & somnum nimis breve est ad halitus illos digerendos, aut dissipandos, ne tempore somni in nubem coëant. Prandium verò capiti minus nocet, quia tempore pomeridiano

Andr. Laurent. lib. de Catar. c. 5.

Sap. 2. Athenæ lib. 15.

Tertull. c. 7. de Coron. milit.

meridiano homines vigilant, ore aperto loquuntur, excreant, liberiùs respirant, pori corporis motu & calore hiant, ut faciliùs undique cibi potusque exhalationes in auras expirent, & destillationum vertiginumque materiam consumant. Quid alijs nescio, certè sic mihi usu venit. Inde fortasse illud quod ex Avicenna doctissimus Victoria refert: *Veteres non nisi in prandio usos carnibus, in cæna verò solo pane.*

Victor. re-  
lect. de  
temper.

Aut si paulò largior cæna placet, pisces minori onere stomachus nocturnus feret & digeret, quàm carnes. Imitaberisque Lusitanos quosdam, qui Antuerpiæ & alibi, ut audivi, pisces toto anno vesperi obsonant. Egregiè defensi à Clarissimo Medico, & eorum consanguineo, Lud. Nonnio, qui docet præcipuas veterum cænarum lautitias piscibus constituisse, saluberrimos & commodissimos esse, non quidem Athletis & agricolis, qui multo & crasso sanguine ac viribus indigent, sed *ij qui forenses vitam, qui otia, ac studiorum amœna sectantur.* Pisces enim, saltem saxatiles & marini, *sanguinem, inquit, laudabilem, inter crassum & serosum, medium suppeditant.*

Lud. Non-  
nius c. 8.  
Ichtyo-  
phag.

Deinde hac de causa litterarum studiosis cæna levior esse debet, quia qui verè & insigniter docti esse volunt, lucubratōres antelucani, & lectis suis leviter affixi esse debent: quod difficulter à pigritia sua impetrabunt, si cænâ pleniorē sint onusti. Audient itaque præceptum Salernitanum:

*Et sis nocte levis, sit tibi cæna brevis.*

Sact. c. 21

Idem Aristotelis in Problematis fuit consilium; & Domitianum Cæsarem ei potiùs acquievissè, qui prandebat ad satietatem, ut non temerè super cænam, præter Matianum mabum, & modicam in ampulla potiunculam sumeret, narrat Suetonius. Cum tamen ex more veterum, levis cibus & facilis interdum sumeretur, addit Beroaldus.

Andr. Lau-  
rent. lib. de  
Catarr. c. 5.

Imò ne quidē in prandio ad saturitatē replebuntur litterati, si non mali Medici audiant consilium. *Catarrhis obnoxij,* inquit Laurent. *nunquam ad satietatē repleantur, sed reliquijs desiderij adhuc in anima prurientibus à mensa consurgant.* Et de cæna deinde addit: *Neque dubium est, quin si omni septimana semel à cæna abstinerent, plurimum*



plurimum commodi perciperent. Et universim oraculum Hippocratis est, ἀοκνοῖς ὄγῳ, ἀοκνὴ τροφῆς, ἀοκνὴ πόσιον *studium sanitatis est insatietas cibi, & impigritia laboris.*

Præcepto igitur Platonici Philosophi acquiescimus: *Mense tibi sint in novem diei horis duæ, & utrobique parca; parciore cæna.* Hæc quippe est illa laudata olim cæna Platonis, ex qua quiespiam etiam postero die bene haberet, ut ait Plutarchus. Hæc sanctorum Monachorum cænæ, quæ animos non demergunt profundo somno, nec inquietant portentosis imaginibus, sed levi tantum ac in superficie ferme hærenti salubriter corpus reficiunt, inquit Chrysostomus. Et ante eum Sirachides: *Vigilia, cholera, & tortura viro infrunito* (Græcè ἀπλήρω, inexplibili) *somnus sanitatis in homine parco.* Græcus magis disertè, ἐπὶ ἐντέρω μετέπει, *in intestino moderato*, quod nempe vespertinâ cænâ non nimium se replevit.

Prandium verò, etsi pleniusculum, horis tamen pomeridianis à ventriculo non invalido facilè concoquitur, & corporis firmitati ac valetudini concoctio ista magis, quàm nocturna, facit. Dicit Plinius: *Somno concoquere, corpulentie, quàm firmitati utilis.* Ideo Athletas malunt cibos ambulatione perficere. Experimentum quoque, tribus circiter à prandio elapsis horis, ubi prima chyli cruditas victa, nihil, aut minimum ventriculi actionem interpellari à studiis & operationibus mentis. Vnde iusta refectio meridie assumpta, non tanto obstaculo est, quantum Medici quidam clamant, pomeridianis studiis.

De prandiis tamen Philosophorum & sapientum loquimur, qui horulâ aut semihorâ expediuntur, non quæ in multas horas trahuntur, cum pernecie studiorum & sanitatis. Melius quippe omnia in ventriculo perficiuntur, si concoqui simul incipiant, nec dudum post cruda supercujciantur semicoctis. Nec enim parum valetudini nocet, inquit Hippocrates, ἐπὶ κοιλίῳ ἐπιζέσσαντι καὶ ἐζυμώμενῳ *in ventrem bullientē & fermentatum* recentes cibos ingerere.

Senes autem non tantum prandere & cænare, sed etiam ientare vult Galenus. Parum enim & sæpe refici debent, ut sensim alatur, non obruatur modicus qui superest in ipsis ignis. Tutius imbecillo seni, inquit, *exiguum dare ter die, sicuti*

Marfil. Fic.  
cin. lib. 2.  
c. 6. de  
Vita pro-

Chryf. ho-  
mil. 14 in  
1. Tim.

Eccli. 31.

Plin. lib. 11.  
c. 53.

Hippocr.  
lib. de  
prisca Me-  
dic.

Galen. lib.  
5. de Sa-  
nit.

*Antiochus Medicus solitus est se cibare. Iuvabit autem in exemplum Antiochi istius diætam ex ipso narrasse. Circa tertiam, vel ad summum, quartam horam, Antiochus panem cum Attico melle sumebat. Pro melle autem, Belgis sit butyrum, nullo aut modico sale aspersum. Post sextam autem (hoc est nostram duodecimam) iam exercitatus & lotus prandebat mediocriter; primum ijs sumptis quæ aluum deiciunt. Post hac maximè piscibus, vel quos saxatiles vocant, vel qui in alto mari degunt. Rursus in cana à piscium usu abstinuit: sumpsit autem aut far cum mulso, aut avem ex iure simplici. Quæ quidem victus ratione, sensibus & membris omnibus integris ad extremum duravit. Quare autem in iure simplici aviculam illam vespertinam Medico - Philosophus iste sumebat? An quia Plinio fortasse credebatur, homini cibum utilissimum esse simplicem, & acervationem saporum pestiferam, & condimenta perniciosiora? Nam etiam Galenus attestatur, inquit Thriverus, aromata ægrius concoqui, quàm ipsam carnem. Quoniam rudis ferè est horum substantia, quæ plus negotij ipsâ carne exhibet; sicut & omnis alia herba, etiam calidat: quanquam rudis aliquis, hæc similia ad carniū concoctionem multum momenti habere putet.*

Plin lib. 1.  
6. 53.

Cels. lib. 1.  
6. 2.

Vnde condita omnia duabus de causis inutilia sunt, ait Hippocrates Latinus, quoniam & plus propter dulcedinem assumitur, & quod modò par est, tamen ægrius concoquitur. Aromata deinde ardentibus spiritibus caput petunt, ideoque incommoda studiofis. Ob has fortasse causas, in omnibus quæ describit convivij, Homerus ciborum copiam videtur condimentis & lautitij prætulisse.

### CAPUT III.

*De chylosi, seu prima concoctione quæ fit in ventriculo.*

**T**Res alimenti principales concoctiones sunt, *χύλωσις* chylosis, *χύμωσις* chymosis sive *αἱματώσις* sanguificatio, & *ὁμοιωσις* assimilatio, quæ fit ab unaquaq; parte viventis, cum alimentum sibi assimilatur, ut facessat in substantiam ejus. Hæ porro concoctiones, tanquam dominæ, suas admini-



administras habent, & unaquæque tres, vim attracticem, re-  
tentricem alimenti, ac expultricem superflui.

## ARTICVLVS I.

## De vi alimenti attractrice.

**A** Sclepiades alimentum à partibus viventis attrahi ne-  
gavit, *impudenter* & contra sensum, inquit Galenus.  
Quomodo enim in summa cacumina arborum terræ  
succus perveniat, nisi vis aliqua eò attrahat? Nam grave cor-  
pus nunquam sponte suâ in altum subit. Palàm etiam est,  
ventriculùm cibos ex ore attrahere; aliquando tam avidè, ut  
nobis retinere conantibus, vi cripiat. Orexis enim cibum  
*ἀρπάζει rapidum* facit, ut loquitur Homerus. Imò in magna  
& latranti fame ventriculus, tanquam canis ad suspensum in  
sublimi bolum, se erigit, ait Galenus, ut cibum è faucibus de-  
ripiat. Iuvatur autem à circularibus villis extremis tunicę œso-  
phagi, qui contractione suâ derrudunt, quod ventriculus attra-  
hit. Est præterea ad laryngem in primo introitu œsophagi,  
musculus & velut spincter quidam, quem laxamus & con-  
stringimus, quando deglutire volumus. *Cum enim homo sit ani-*  
*mal politicum, ait Laurentius, ad contemplationem & actionem, non*  
*oportebat, primum cibi ingressum, & postremum excrementorum exi-*  
*tum esse perpetuum, ut in plantis, sed ex eius arbitrio pendentem.*

Andr. Lan-  
rent. lib. 9.  
c. 26. Anst.

Erravit ergo Cicero, cum agitatione & motibus lingua cibum  
depelli & quasi detrudi in stomachum, dixit. Iuvat hoc quidem  
aliquid, sed præcipua causa est in illa vellicatione & attra-  
ctione stomachi, quam per fibras ejus rectas fieri docet Ga-  
lenus. Contrahunt enim se fibræ rectæ sursum per œsopha-  
gum usque ad gulam extentæ, ut è faucibus in ventriculùm  
cibum detrahant.

Cic. lib. 2.  
de Natur.  
deor.

Arbores verò sine ulla radicum, aut fibrarum contractio-  
ne, immobiles alimentum è terra sugunt. Vnde ista arbo-  
rum attractio vocatur à Fracastorio *simplex*; altera in animali-  
bus, *organica*. Hæc enim motu locali alicujus organi perfici-  
citur: prior verò similis est virtuti, qua simplici effusione  
qualitatis

Fracast.  
c. 12.  
Sympath.

qualitatis tractoriæ, magnes immobilis trahit ferrum. Vnde magnetica appellari potest. Tali etiam virtute pars unaquæque animalis, sanguinem è venis fugit, & sibi apprimit, ut percoctum & condensatum in substantiam suam transmutet.

Arist. lib. 3.  
c. 3. de Part.  
animal.

Galen. lib. 3  
de Placit.  
Hippocr.  
& Platon.

Potus eadem vi, ac per eundem œsophagi canalem, in ventriculum detrahitur, ut cibus non assetur, aut frigatur, sed elixetur cum potu. Ridiculum enim est, inquit Aristoteles, quod censuit Plato: cibus in ventriculum, potum verò in pulmones per asperam arteriam descendere. Si enim modicâ interdum è cerebro defluxione suffocentur pulmones, quomodo aliquot pocula vini, aut cerevisiæ possint perferre? Sed tamen Platonem hîc adversus discipuli Aristotelis solennes calumnias defensat Galenus. Non enim censuit Plato, inquit, universum potum in pulmones per mediam asperæ arteriæ laxitatem deferri, sed pauculum humoris per parietes, tanquam delinimentum quoddam sensim defluere: *quod verissimum*, ait, & *rationi consonum est. Nam si sitibundo animali coloratam aquam propines, ac deinde jugulatum disseces, pulmones ejus eodem colore tinctos invenies.*

S. Ang.  
lib. 4. c. 14.  
contra Iul.

Ibid.

Vt autem homines & bruta lubentiùs cibum potumque sumerent naturâ in gulâ ( id est summo orificio œsophagi, sive canalîs à gutture ad ventriculum ) delectationem constituit, quâ blandè pars ea titilletur, & ad traijciendum alimentum invitetur. Pulchrè, ut solet, S. Augustinus: *Alimentorum sustentaculis indigemus. Si suavia non sint quæ ore sumuntur, nec sumi possunt, & nauseando saepe respuuntur, & perniciofa sunt cavenda fastidia. Non solum ergo cibo, sed etiam cibi sapore indiget infirmitas corporis nostri; non propter exsaturandam libidinem, sed propter tuendam salutem.* Aliàs, Christianam & rationalem animam tam procul abesse debere, ut propter libidinem & voluptatem saturandam sumat cibum, censet Augustinus, ut fidenter interroget: *Quis mente sobrius non mallet, si fieri posset, sine ulla mordaci voluptate carnali, vel arida sumere alimenta, vel humida, sicut sumimus hæc aërea, quæ de circumfusus auris respirando & spirando sorbemus & fundimus?* Perperua enim & constans ubique ejus Theologia est: *Multa à nobis licitè fieri per voluptatem, nulla propter*



pter voluptatem. Si enim in voluptate hæretur, sine relatione ad finē quod referri deberet, inelamabit mox dilectus Christo Apostolus: *Nolite diligere Mundum, neque ea quæ in Mundo sunt.* Dili-  
git verò ea quæ in Mundo sunt, qui ea propter se amat. Ea autem delectatio quæ in summo guttore sentitur, tactus potius est, quàm gustus. Vnde pisces, qui defectu linguæ, vix sensum ullum gustus habent, voluptate tamen cibi non carent, quia omnium ferè esculentorum, in devorando, gula tactione, suavitatis & gratia existit, inquit Aristoteles. Vt non immeritò appetentia inordinata hujus suavitatis, gula etiam appelletur, & à Cicerone vitium gutturis.

1. Io. 2.

Arist. lib. 4.  
c. 11. de  
part. ani-  
mal.  
Cic. Pro  
M. Calio.

Hinc etiam quo boli & haustus sunt pleniores, eo delectatio major, quia arctius gulæ tactum stringunt, & titillant vehementius. Celeritas quoque succedentium bolorum voluptatem auget, quia multi contactus vicini & dense succedentes, instar unius plenioris sunt.

Hanc gulæ voluptatem pertinere maximè ad sensum tactus, inde quoque satis apertum; quòd res etiam insipidæ, in transitu gutturis suam affricent voluptatem. Sic prunâ integra, aut solidi botuli lavore suo guttur perstringentes, sine sapore tamen avidos gulones delectant. Vbi autem œsophagi & ventriculi orexis hebescere incipit, non amplius percipitur illa gulæ voluptas, sed tota tunc cibi potusque delectatio in lingua, palato & ore tantum sentitur ex sapore, quem contrectat & percipit linguæ, aut palati gustus.

Posita autem est lingua in ore, tanquam in quodā atrio, ante fauces & œsophagi januam, ut gustu suo saporibus exploret; ut si placeant, in ventriculum transmittat, si non, expuat. Quod enim linguæ & palato blanditur, ferè etiam ventriculum bene compositum, & hominem sanum juvat.

In refrenanda autem illa vi attractrice, quando stomachus à præcedenti corporis exercitatione, aut jejunijs hiat & latrat, multum laborant pij. In meditatione sua & ante ciborū conspectum, mira proponunt, & continentissimi futuri sibi videntur; at ubi mensa ante oculos, & nidor afflavit nares, prurire primum incipiunt, deinde ubi bolus unus aut alter irritavit orexim,

orexim, excusso freno pars animalis toto impetu sæpe patinas involat, ut vix ulla vi à ratione possit retineri.

Talibus leges istas ponit Filius Sirachi: *Si in medio multorum sedisti, prior illis ne extendas manum tuam, nec prior pascas bibere. Ac in fine mensæ: Cessa prior causa disciplina, & noli nimius esse, ne fortè offendas.* Ne fortè etiam oneretur corpus, & libertas animæ pręgravetur, ait S. Hieronymus. Liber enim homo superesse corpori suo debet, & licet non semper tam erectus, ut nubes superet & sidera vertice tangat, nunquam tamen luto suo immergi oportet. *Epulas igitur ante ora positas* (S. Augustini monitum est) *cum animi tranquillitate aspiciet, & cunctanter ac cum frigore quod necesse decerpit.* Vel si Galenum non tantum valetudini, sed etiam honestati hic præcepta dantem, magis audire juvat; verba ejus antè recitavi Cap. 1. Art. VI. *Sed δὲς καὶ τῶν τὰ καλὰ βίης & τῶν τὰ καλὰ βίης. Non propter sitim, inquit, decet, sorbentium instar, totum calicem exhaustire: nec propter famem, in conspectu omnium, insatiabiliter ventrem explere. Sed danda est opera, ut omnibus unà cenantibus minus obsonij assumamus, & à cibis nimium gulam irritantibus abstinemus, moderatè interim vefcentes ijs, quæ salubria habentur.*

Temperantia enim quantitatem, qualitatem, & modum sumendi ciborum moderari debet, ne in istis quæ sita voluptas valetudini noceat. De quantitate & qualitate res est clara; sed modum etiam sumendi aliquid ad salubritatem referre, facillè ostenditur. Nam aviditas multum aëris unà cum cibo devorat, quem pleni boli, aut largi haustus, totum undique stringentes oesophagum, suo impulsu deprimunt in ventriculum. Vnde cibi & potus ab aëre intertexto prohibentur in ventriculi fundum descendere; ubi tamen vis concoquendi maximè viget. Deinde qui avidè vorat, non bene & minutatim cibum dentibus conficit; & hinc altera causa cruditatis, aut prævæ concoctionis. Exemplo luporum & carnivororum animalium, quæ idcirco Aristotele teste, longæva esse non solent. Qui tamen avidè comedunt, habentur in Belgio strenui operarij: nam labor impiger ventriculum vacuat & appetentiam acuit. Sæpe tamen hoc etiam fallit: nec

Eccli. 31.

S. Hieron.  
lib. 2. c. 8.  
contra Iovian.  
via.

Galen. lib.  
de curand.  
affect.



nec credo tam in alio opere, quàm dentibus strenuum fuisse, illum Senatorem Romanum, quem Imp. Caligula Prætorem extra ordinem designavit; quia in publico epulo, avido & acri dente vorantem, & tuburcinantem conspexisset.

Suet. c. 18  
Calig.

Bœoti olim ab ista intemperantia infames inter Græcos fuerunt, ideoque *Bœotica* sive adagio invaluit; quodd instar famelicæ suis, inflatis buccis super mensam omnia commanderent. Et hinc stupor & hebetudo mentis, quæ ex multa repletionem solet oboriri. Ut non de nihilo existimet Erasmus, Flandricum *Bot*, hoc est, *stupidus*, contractum esse ex *Bœoto*. Nam huic lingua proprium est, inquit, *voces multarum syllabarum in unam syllabam contrahere*.

Eraf. in  
Adag. Bœo-  
tica sive

Constat etiam, addit, *vel ob Romanum Imperium latissimè propagatum, vel ob commercia negotiatorum, voces Germanica, Gallica, Britannica lingue fuisse mixtas.*

Christianus verò paulò spiritualior, sublimiori cogitatione mentem & spiritum docetur patinis eripere. Quando necessaria percipis alimenta, ait devotus Rusbrochius, *animo ad Dei conspectum sublevato, cum Christo & Angelis omnibus discumbe inter sodales, donag, & fercula ex Deo manantia suscipe: sic secundum hominem interiorem escà reficieris aternâ. Et Venerabilis Blofius: Quamvis aliquam delectationem terrenam inter edendum aut bibendum sentias, non tamen intrò admittas, non ei inhereas. Exquisitas & suaves epulas vitiosè non requiras; imò tales tibi oblatas, pro Dei amore sape intactas relinquant; cum Dominus Iesus felle & aceto potatus fuerit. Alij tamen simplicius, & ne spiritum disputationibus istis culinarijs & terrenis nimium implicent, jubent sub uno simplici Dei obtutu & recordatione, ad appositos cibos indifferenter (modò non apertè valetudini noxios) extendere manum, & tanquam de Dei manu accipere. Et hac facillimâ praxi experiri se dicunt, citius ad cælestem quandam & firmam temperantiam, quàm violentis & fragilibus propositis, pervenire: scientes, quoniam aliter non possunt esse continentes, nisi Deus det. Quidquid sit, vita tamen austeritatem, addit Blofius, ne temerè amplexeris, licet plerosque Sanctos vitam multum rigidam duxisse cognoscas. Nam illi à Spiritu sancto plenius illustrati, sciebant Deo placere,*

Rusbroe.  
c. 8. lib. de  
septem cu-  
stod.

Blof. c. 2.  
Inst. spirit.

Sap. 3.

placere, ut ita viverent. Ac postea: *Cilicium, durities lecti, esus panis, potus aqua, flagellatio corporis, ac similia pro Dei honore purè peracta, ipsi quidem Domino placent, & ad carnem edomandam inuenibus robustis non parùm prosunt. veruntamen verus Dei amor hominem multo vicinìus Deo coniungit, & carnis petulantiam citiùs efficaciusq; compescit ac superat.* Imò sine amore Dei fortiore, terrenarum & infimarum voluptatum isti laquei absolutè diffringi non possunt; sine quo cilicia, flagella, jejunia frustra sunt. Vnde Propheta Sanctus, inter tentationum istarum laqueos se versans & æstuans, & à quo liberandus esset, intelligens: *Oculi mei, inquit, semper ad Dominum, quoniam ipse evellet de laqueo pedes meos.* Et jam victor ac liberatus exclamat: *Gloria mea, & exaltans caput meum:* id est mentem, quæ est animæ caput, ait S. Augustinus; quam divinus amor elevat, & omnium terrenarum voluptatum deprimentibus ponderibus superesse & supervolare facit.

Psal. 24.

Psal. 3.

## ARTICVLVS II.

*Qua ratione alimentum coquatur in ventriculo.*

**I**N plantis prima & rudis concoctio in radice, altera sequitur in trunco, aut scapo, & inde alimentum in ramos, folia, muscaria, ad ultimam & perfectam cocturam dispergitur. In animalibus os, aut aliud membrum ori analogum, primæ coctionis rudimentū inchoat. Quibus sunt dentes, cibum etiam comminuunt, ut promptiùs à ventriculo conficiatur, calore per micas & particulas faciliùs penetrante. Quæ dentibus carent, & duro cibo vescuntur, ut gallinæ, columbæ, & plerumque avium genus, ventriculos carnosiores & fervidiores habent, ut integra etiam grana facile possint mollire & conficere.

Cibus autem & potus in eadem ventriculi capacitate, tanquam ollâ, ad elixationem permiscuntur, & inde per chylosin in unam veluti pultem excoquuntur, quem Medici & Philosophi chylum appellant. Is in hominum ventriculis plerumque alibidi coloris est, ut cremor hordei. Et si non semper, ut Clariss. Academix nostræ Archiater D. Vop. Fort. Plempius notat: quia ijs, qui se nigrioribus alimentis & vino rubro implerunt

Vop. Fort.  
Plempius  
lib. 2. c. 8.  
Fund. Me-  
dic.



*implerunt, inquit, nigricat chylus,*

Nec tamen imaginari oportet ventriculum ita fervere & bullire, ut ollam supposito valido igne. Nam tepet solummodo, nec solo calore, quemadmodum ignis, agit in chylum, sed totâ suâ temperie; & fortasse occultis quibusdam alijs qualitatibus, quas agnoscunt Medicorum solertissimi. Ventriculus autem cibum potumque injectum, obliquarum fibrarum ministerio, ut rem maximè amabilem complectitur, & stringit aded arctè, & undique compressè, *ut ipsis adhærescere videatur, nec inane quidquam relinquat*, ait Fernelius. *Alioqui cibus in tanta capacitate huc illuc fluitans, neque lateribus ventriculi coarctatus, haudquaquam plenè concoqui posset.* Vnde etiam Pylorus seu Ianitor (quod inferius ventriculi orificium est) ita stringitur, ut ne quidem gutta liquoris, ante tempus excidere possit. Orificium quoque superius, quâ cibus iniicitur, & propriè stomachus appellatur, latiorque est quàm Ianitor, etiam sumpto cibo contrahitur, occluditurque, aut connivet, ne fumi nimis conferti è ventriculo exhalantes concoctionem destituant & refrigerent; veluti olla aperta segniùs coquit carnes, quàm operculata. Quibus deinde stomachus ob voracitatem, aut temperiem humidam nimis hiat nec constringi exquisitè potest, vertigini, suffusioni, hemicranîæ, & doloribus capitis obnoxij sunt, & faciliùs ceteris inebriantur.

Fernel. lib.  
6. c. 1. de  
funct.

Concoctionem ventriculi promovet atra bilis, quam idcirco natura ex splene in cavitatem ventriculi per meatus destitatos deducit & exonerat. Nam acrimoniâ suâ ventriculum intendit contrahitque in seipsum, ait Galenus, *ut ad unguem cibos complectatur, retineatque, quousque fuerint percocti.*

Galen.  
lib. 7. de  
usu part.

Igitur ventriculus calore suo nativo, ac totâ temperie operatur illud, sive universam cibi potusque massam, in chylum, id est, candidam, & substantiæ suæ concolorem, ait Velalius, massam percoquit. Et si paulisper ab eo abeat Clar. noster Plempius, ut antè monui.

Addit Fernelius, & occultam quandam ventriculi Facultatem, sine cujus ope struthiocamelus ferrum, corurnix veratrum, capra cicutam nunquam digerere possint; cum

H h 2 ardentissimus

ardentissimus leonis ventriculus cibum tam contumacem domare non valeat.

Riolanus tamen facultatem istam occultam Fernelij, *asylum ignorantie*, ab alijs appellari dicit. Ego prudentiæ asylum vocari malim; ubi manifestus effectus in notas vulgò qualitates referri non potest. Nam Galenus præceptorem suum Pelopem fugillat, qui ad simplices elementorum qualitates omnes ejusmodi effectus reducere conabatur; Scaliger verò summæ impudentiæ id esse affirmat. Laurentius tamen non occultæ qualitati, sed formæ substantiali ventriculi confectionem chyli tribuit. Quod non omnino displicet, si præter animam, formas alias heterogeneas cum Medicis, in ventriculo, corde, jecore, & ceteris membris viventium ponere vellemus, quod Lib. I. disputatum fuit.

Galen. lib.  
de conSit.  
artis Me-  
dicæ.

Porro, ad concoctionem conducit *quies, calefactio modica, cibus parcus & boni succi, potus vini parùm calefacientis*, inquit Galenus. Calor etiam innatus, ait alibi, valde juvatur à calore simili extrinsecus applicito. *Vnde nonnulli*, inquit, *puellos, aut catellos per quietem ventri imponunt*. Vt non de nihilo Vallesius laudet prudentiam servorum Davidis, adeò jam senis & defecti, ut *cùm operiretur vestibus, non caleferet*; calore scilicet innato languente, nec effluvia calida ampliùs exhalante, quæ vestibus retenta, fatis essent ad eum calefactandum. Nam Abisag adolescentulam ei quæsierunt, quæ senem calefaceret *domiendo in sinu eius*. Quod præcipuè in ea ætate effectum est, ait Vallesius, *qua non potuerit virginem agnoscere. Alioqui multo magis lassisset congressus, quàm contulisset admotio*.

Valles. c. 39  
Sacra Phil.  
los.

3. Reg. 1.

Aristoteles autem utrem calentis olei plenum solebat ventriculo suo superponere, ut Laërtius narrat. Alij vulpium, feliolum, cygnorum, agnorum vellera stomacho appressa gestant.

Calorem quoque balnei crudo ventriculo opitulari Aristoteles scribit. Quies etiam coctionem promovet, quia spiritus introrsum continet, quos motus & agitatio versus corporis superficiem exspertit. Deinde agitatio actionem ventriculi obturbat, ne fixè in eandem chyli partem incumbat; veluti caro ante ignem veru circumacta, minùs aduritur, quàm si in eo.



in eodem vestigio quieta actionem ignis exciperet. Modesta tamen & brevis inambulatio ad subsidentiam cibi, ad aërem per ractus expellendum, & perfectam cibi potusque in unum *φύραμα* contemperationem conducit, eamque huic fini Aristoteles laudat. Somnus quoque, & propter quietem, & quia spiritus coctores introrsus revocat, ventriculum adjuvat.

Dormire quoque contracto corpore, & adductis genibus, suadet Aristoteles; quia calor viscerum ventriculo appressus, fovet ipsum & calefacit. Deinde cubandum potius, inquit, in dextrum latus: sic enim hepar calidum viscus, quod in latere dextro est, supponetur ventriculo, tanquam ollæ validus ignis. Citiùs etiam sic veniet somnus; quia ventriculus calore hepatis incitatus, vapores soporiferos plures & magis confertos in cerebrum exhalabit.

Cibus modicus exactiùs concoquitur, quàm multus & confertus; quia à calore ventriculi ambiente faciliùs usque ad chyli centrum penetratur. Plenitudo ventriculum etiam distendit, & vires caloris diductione & extenuatione subiecti distingit. Major quoque cibi quantitas calori ventriculi contumaciùs resistit. Vnde crapula, & cruditas. Hinc oraculum Galeni: *cibus debet optimè concoqui; quod fiet, si modicus sit.*

Bonitas quoque succi facit, ut ventriculo citò obediat, & in chylum salutare facessat. *Aves autem piscesq; ferè omnes, boni succi censentur,* inquit Galenus, *exceptis lacustribus, palustribus, & que in immundis fluminibus atque turbidis degunt.*

Galen. lib. de Eulichym.

Modici etiam vini calor, qui ventriculi innatum calorē non dispergat, sed eum ad cibi suiq; concoctionē molliter adjuvet, chyli perfectionem accelerat. Sed debet minutis haustibus cibo superfundi, ut ei blandè misceatur, & retineatur. Altràs celerimè in vesicam vsque transcolabitur, & sine fructu exhibit. Vinum enim, nisi cibo alio solidiori implicetur, citissimè tantum alteratur, quantum ad apertionem Ianitoris, & expulsionem è ventriculo sufficiat. Vnde etiam in ore pauxillo tempore retentum statim rubedinem & calorem mutat, ut notavit Thriver. in. Fernelius. Aromata verò post Hippocratem, Galenum, Celsum in cibis damnat Thriverus; etsi coquorum vulgus plurimum.

Thriver. in. c. 1. Celsi.

rimum momenti ad ventriculi digestionem habere existimet. Nam *aromatum substantia ferè rudis est*, ait Thriverus, & *plus negotij ipsa carne exhibet*: sicut & *omnis alia herba, etiam calida*. Eodem modo philosophatur Plinius. *Homini cibus utilissimus, simplex*, ait. *Acervatio saporum pestifera, & condimenta perniciosiora*. Et ut universim dicat. *Difficulter autem perficiuntur omnia in cibus acria, nimia, & avidè hausta, & æstate, quàm hieme difficilius, & in senectâ, quàm in iuventute*.

Cels. lib. 1.  
c. 2.

Super omnia autem, stomacho pleno, caveant serijs studijs incumbere studiosi. Nam *post satietatem, nihil agendum*, monet Celsus. *Cerebrum enim, in seria meditatione, spiritus maximè ad se rapit, atque exercet*, ait Thriverus, *quos melius erat, ad concoctionem concurrere*. Leves tamen & hilares quæstiunculas, inter mensas secundas ventilare licet, quas *eruditorum bellaria* vocat Plutarchus. An autem chylo suo nutriatur ventriculus, Vallesius & Argenterius affirmant. Finis enim attrahendi cibum, inquit, est, ut ventriculus eo se nutriat; reliquum verò chyli, quo non indiget, alijs membris proijcit.

Alij tamen Medici melius, meo calculo, negant. Nam chylus etiam percoctissimus nimis adhuc crudus est, ut sic immediatè in substantiam ventriculi transmutari possit. Deinde venulæ quædam ab hepate sunt, per quas sanguine irrigantur tunicæ ventriculi, & communi illo sanguineo alimento nutriantur, ut ceteræ corporis partes. Multa præterea alia organa humores trahunt, quibus non aluntur; ut cystis flavam bilem, renes & vesica urinam; propter naturæ quandam consonantiam, ex qua voluptatem veluti quandam, ex talium corporum contactu percipiunt; sicuti etiam magnes rapit ad se ferrum, etsi eo propriè non nutriatur. An autem cruditas, aut prava concoctio chyli valeat per duas sequentes concoctiones emendari, dissident Medici. Affirmant quidam, clysterum nutrientium exemplo, quorum materia infernè injecta non coquitur in stomacho, sed ex intestinis immediatè trahitur ad hepar. Deinde pulli in ovorum testis, crudo vitello nutriuntur, quem per umbilicum in hepar attrahunt, nullo per stomachum transitu.

Negant



Negant tamen Galenus, Andr. Laurentius, alijque cruditatem illam posse ab hepate emendari, ubi natura solet chylum ante chymum præmittere.

Veluti enim humanus ventriculus ex carnibus crudis, aut impræparatis chylum idoneum perficere non potest; sic nec hepar sanguinem temperatum ex pravo chylo. Nam sicut culina nostra habet se ad ventriculum; ita ventriculus ad hepar, cui materiam præcoquit, ut inde sanguinem conficiat. Ex crudo igitur chylo non gignitur plerumque maturus sanguis; nisi in casu aliquo raro, de quo adversus Galenum latè differt Vallesius.

In arboribus tamen sanè res aliter habet. Nam oleæ furculus in oleastrum insertus, succum in trunco amari oleastri, tanquam in ventriculo malè coctum, in dulcem olivam percoquit. Simile evenit, quoties furculus inseritur arbori diversi generis:

Virgil!

*Vi sæpe alterius ramos impunè videmus*

*Vertere in alterius, mutataque insit a mala*

*Ferre pyrum, & prunis lapidosa rubescere corna.*

Nam radix & truncus pruni, succum terræ pro ligno & fructu pruni sibi naturali præparat, quod vitium tamen furculus corni corrigit, & in lapidosâ sua corna perfectè convertit. Quanquàm tamen etiam in platano & quibusdam alijs arboribus hoc fallat. Nam platanus, & robur saporis fructuum qui inferuntur, corrumpunt, ut testatur Plinius.

### ARTICVLVS III.

*Quanto tempore ventriculus indiget, ut chylum perficiat.*

**S**icut non omnium ventriculorum est idem robur, ita nec uno temporis spatio absolvunt chylosim. Iuventus enim, quàm senectus, hiems anni, quàm æstas, quando calor viscerum major est, citiùs concoquunt & opus suum perficiunt.

Medici tamen vulgò sex aut septem horas in corporibus optimè affectis, isti operi constituunt, idque experientia didicerunt, inquit

Argent. in  
artem Ga-  
len.

inquit Argenterius. Et hinc est, ut totidem horis somni tem-  
pus definiant:

*Septem horis dormisse sat est iuveni quæ senique.*

Somnum enim natura invenit ad cænx concoctionem, & prandij cruditates perficiendas, si quæ fortasse ventriculo curis diurnis in opere suo, interpellato adhuc inhæserint. Vnde Novavillanus: *Debet somnus, inquit, esse tantus, ut completa sit prima digestio, & cibus ad hepar transeat. Et non est fortè malum, addit, tantum prolongare somnum, donec secunda digestio ( quæ fit in hepate ) sit completa.* Sed fortasse non perinde à vigilia & operationibus sensuum impeditur secunda digestio, ac prima; quandoquidem major putetur inter cerebrum & ventriculum, quam inter cerebrum & hepar, intercedere sympathia, & mutuarum actionum obturbatio. Vnde hepar ad perficiendam chymosin fortè non eget somno, quemadmodum ventriculus indiget ad chylosin. Nam nec eo indiget tertia concoctio, quæ die non minùs, quàm nocte fervet in singulis membris. Deinde septem illæ somni horæ non tantum chylosi, sed & chymosi sufficiunt. Apertè enim Sennertus: *Dormiendum consue, donec cibus in ventriculo & hepate sit concoctus, spiritusque absumpti, instaurati.* Ad hoc autem, ait, brevius quàm sex horarum temporis spatium vix sufficit. Vnde magis enucleatè Riolanus: *Concoctionem quatuor, distributionem verò tribus horis absolvi Medici existimant.* Ut sic universa periodus, à coepta concoctione ventriculi, ac deinde hepatis, usque ad distributionem sanguinis in venas & membrorum irrigationem, septem horas colligat.

Sennert.  
lib. 4. p. 2  
Instit.

Arist. lib. 8.  
c. 6. Physic.

Licet Aristoteles paulò aliter, qui septem horas somni soli concoctioni, distributionem donat vigiliæ. Nam τρεῖς πειλομένης καθεύδουσι, διαπνέοντες δὲ ἐγείρονται, quando alimentum concoquitur, inquit, animalia dormiunt, quando verò distribuitur, expergiscuntur. Vnde licet ista distributio à primâ vigilia matutina fortè inchoetur, diffusionem tamen per omnia & ultima membra S. Thomas extendit usque ad meridiem; & inde factum credit, ut prandere soleamus circa diem medium. *Est enim debita & communis, inquit, consuetudo comedendi hominibus circa*

S. Tho. 2. 2.  
q. 147. a 7.

circa



*circa horam sextam ( diei artificialis , qui est meridies ; ) quia videtur iam esse completa digestio nocturno tempore , calore naturali intus revocato propter circumstantis noctis frigus , & diffusio humoris per membra , cooperante ad hoc calore diei usque ad summum Solis ascensum .*

Et chymosin saltem comprehendi intra illud somni tempus inde patet , quodd post septem horarum somnum , urina tincta flavo colore appareat ; ergo chymosis jam perfecta est , quia urina est serum sanguinis in hepate percocti , & per rivus venarum distributi .

Hinc statim causa se prodit , cur primus somnus , circa horam noctis undecimam , aut duodecimam sit profundissimus , ideoque in militia ad nocturnas expeditiones eligi soleat . Nam isto somno concoctio prima in ventriculo peragi debet , quæ , ut primam cibi potusque cruditatem facilius vincat , à sensuum vigilia minimè interpellari oportet . Vnde ventriculus , ut sensus omnes perfectius tunc sopiat , fumos , tanquam ex olla , crassiores & magis confertos in cerebrum exhalat . Hoc est quod in Livio P. Decius apud milites suos differit . *Si nox opportuna est eruptioni , sicuti est , hac perfectio noctis aptissima hora est .* Signo secunda vigilia convenistis , quod tempus mortales somno altissimo premit . Noctem enim ab occasu solis in quaternas ad auroram vigilias distinguebant , & unicuique tres horas tribuebant ; ut tota nox duodecim universim horis , perinde atque dies , constaret . Vnde secunda illa vigilia in mediam noctem desinebat , id est primi somni tempus complectebatur .

T. Liv.  
Dec. I.

Gallus gallinaceus videbitur fortasse curiosis , tempus primæ concoctionis , à tempore secundæ , cantu suo interpolare & distinguere . Nam ideo fortè circa finem secundæ vigiliæ , id est circiter mediam noctem , absolutâ chylosi , cantu plaudentibus alis exultat : deinde ad chymosin redormit leviori somno , usque ad finem quartæ vigiliæ , seu auroram . Quem imitantur illi , qui in utramque aurem dormire dicuntur ; primò in dextram profundiore somno , deinde in sinistram leviori .

Et sanè tamen hanc duplicis somni periodum non esse ne-

cessariam primæ concoctioni, patet; quia in fine secundi somni, non tantum chylus perfectus est, sed genitura quoque reparata est gallinaceis, ex sanguine secundæ concoctionis; & quidem tam abunde, ut unus ad Venerem toti gallinarum cohorti sufficere possit. Hinc etiam homines extremâ humani somni periodo, magis pruriunt, & qui casti esse volunt, corripiunt se mox è stratis, aut mentem sanctis, vel serijs cogitationibus occupant, ne libidinosis dent locum.

Sot. lib. 10.  
q. 5. a. 1.  
de Iust.  
Rial. 118.  
Memini etiam me alicubi apud Sotum legere: Patres Dominicanos ex Constitutionibus suis solitos ad dissipanda noctium phantasmata, inter se vestiendum, Horas Virginis memoriter recitare. Improbatur idem Sotus alibi relaxationem illam, qua mos vetus Ecclesiarum surgendi media nocte ad confitendum Domino, translatus est in aliam horam; quia teste S. Ambrosio, non inconsulto dixit Regius Psalter, *Media nocte surgebam &c. Tunc enim fervet carnis illecebra, coquitur cibus, potusque digeritur. Qua occasione tentator multis tentamentis & carnem illidit, & animam occupat.* Quod verum est, si quis primo occasu solis, cum gallinaceis cubile peteret. Tunc enim (hieme saltem, quando noctes productiores) digestio & genituræ reparatio circa mediam noctem perfecta esset: nunc verò, quando hora nona, aut decima vespertina cubitum concedimus, horam mediæ noctis somno uno & continenti trajicimus, & quartâ aut quintâ matutinâ, strato ad divinas laudes exurgendi tempus opportunissimum erit.

Quod verò de septem somni horis diximus, intelligi debet, à sanis & valentibus non oportere produci ulterius: aliàs plerisque sex horæ sufficiunt; experienciâ ferè omnium hominum adultorum, exemplo glirium, qui tres menses continuos in anno dormiunt. Quod tempus si æqualiter per omnes dies anni naturales distribuatur, singulo cuique diei naturali sex horæ obvenient.

Galen. lib. 6  
de sanis.  
Galenus quoque fatetur concoctionem etiam diurnam ac tempore vigiliæ, sex horis posse perfici. Nam ait se solitum, quartâ horâ diei tantum panis in jentaculum assumere, quantum horâ decimâ, id est, post sex horas, possit concoctum esse.

ARTICV.



## ARTICVLVS IV.

*Quanto tempore indigent species Eucharisticae, ut à ventriculo corrumpantur.*

**E**X his quæ hætenus differuimus, quispiam non rectè philosophari Theologos fortasse existimabit, qui dimidiâ tantum horæ spatio, species sacramentales panis & vini à ventriculo confici & corrumpi; adeoque corporis & sanguinis Dominici præsentiam non diutius in visceribus nostris hærare, docent.

Sed qui hoc dicit, perpendere etiam debet, an species illæ à ventriculo vel alijs causis, in semicrudo adhuc chylo corrumpi non possint, ante perfectam illam concoctionem, & tantam chyli maturitatem, quantam exigit, ut è ventriculo in intestina à natura sponte dimittatur. Nā in vino inprimis satis liquet, quòd nisi alio cibo solido, in ventriculo retineatur sæpe etiam ante horæ quadrantem mutato colore, sapore, & omnibus ferè vini accidentibus emeitur, nec unquam ad naturam vini revertitur. Imò, quia in ore inchoatur quoddam primæ concoctionis rudimentum, *vinum subrubrum paucò momento ore conceptum, tum ardorem, tum ruborem deponit*, ait Fernelius; & odorem quoque, ut addit Vallesius.

Fernel.  
lib. c. 6.  
de funct.

Species verò panis pertinaciùs quidem quàm species vini, in ventriculo durant, sed tamen tantilla particula à ventriculo, præsertim jejuno & appetente, dimidiatâ fortasse horâ, potest destitui. Quo enim minùs cibo oneratus fuerit ventriculus, eo citius temperiem & formam mutat rerum quæ ingeruntur. Multitudo enim & varietas tardat concoctionem. Vnde in ebrietate, aut crapulâ, post horam etiam unam aut alteram, cruda sæpe omnia revomuntur; præsertim ubi potu nimio stomachus redundat & cibi natant. Quo enim plus aquæ est in olla, eo tardiùs carnes eodem igne coquuntur. Vnde in ventriculis pituitosis, senilibus, aut à morbo languentibus, suadeam horam integram ut minimum, à sacra communione, vomitum

vomitum sustinere.

Tolet. lib. 2  
c. 29. Sum.

Tantundem etiam temporis, ientaculum, aut prandium differre debent, qui ex sancta reverentia (etsi hic nullum sit præceptum) profanos cibos præsentia Christi superijcere nolunt. Nimis enim breve tempus huic rei, meo iudicio, assignat Toletus, qui credidit, *fortè dimidiâ quartâ hora, species à calore naturali consumi*. Calor enim iste naturalis non est tam acer & vehemens, ut bullire faciat ventriculum, sicut olla bullit super ignem; sed tepefacit tantum, ut experiri licet, si chylus etiam perfectè coctus revomatur.

De consecrat. d. 2.  
can. 23.

S. Tho. 3.  
p. q. 80.  
a. 8. ad 6.

Olim autem sex circiter horas expectare iuebantur, ut omnes species Eucharisticae, perfectâ chylosi, & fortasse chymosi, dissipatae essent. Nam si *manè Dominica portio editur*, ait Papa Clemens, *usque ad sextam ieiunent Ministri qui eam consumpserunt: si tertia vel quarta hora (diei artificialis, divisi in 12. horas) acceperint, ieiunent usque ad vespèram. Quem Canonem S. Thomas dicit per contrariam consuetudinem esse abrogatum.*

Navar. c. 25  
a. 23. Manual.

Est tamen *consuetudo Urbis, digna maxima Maximorum Pontificum prudentia, quam Orbis imitari deberet*, ait Navarrus, *ut damnato ad mortem denunciatur sententia post mediam noctem, ut liceat ei confiteri & communicare quatuor horis ante mortem, ut iam corruptâ tanto temporis spatio, panis specie moriatur.*

Verùm Ecclesia ad cautelam, quatuor horas accipit, ubi una, aut dimidiata fortasse sufficeret; nisi tamen morituri ventriculus, imaginatione & anxietate vicinae mortis (quod credo) in concoquendo sit segnior. Aliàs existimo tautillum chyli quod conficitur ex pane Eucharistico, post horam, aut dimidiam in ventriculo valenti, licet adhuc semicoctum, tantum differre à pane qui ingestus est, quantum fortè omphacium (quod vulgò agrestam vocant) à succo terræ. Nam sicut terræ succus à vite attractus, mutatur primò in omphacium & crudum quoddam vini rudimentum, ac deinde maturatur in vinum; ita panis, aut cibus, à ventriculo primùm corrumpitur in imperfectam quandam chyli cruditatem, odore terro & sapore (ut ex vomitibus patet) à priore cibo

multum.



multum differentem, & deinde in chylum maturum & perfectum, qui ad sui perfectionem pluribus horis indiget, ut antè est disputatum.

In sputando autem post sacram communionem, major est libertas. Spura enim maxima ex parte, non ex ventriculo, ubi coquitur cibus, sed ex pulmonibus ascendunt, aut descendunt ex cerebro. Vnde si species panis descenderint in ventriculum, non possunt ferè redire ad os, nisi per vomitum, aut resolutæ in exhalationem, quæ levitate sua ascendat sursum, in qua exhalatione jam species panis dissipatæ sunt, & præsentia Christi evanuit. Non sunt autem in ventriculo pulmones, qui per oesophagum cibos excutere in os valeant, sicut phlegmata per asperam arteriam excutiuntur.

De speciebus vini quas in Missa sumunt sacerdotes, videtur majus periculum. Si enim statim à Missa salivam expuant, apparet misceri aliquid de speciebus & humore vini, etiam si totum descendisset in ventriculum. Nam vinum calore ventriculi facillimè & illicò resolvitur in vapores vinaceos, qui momento ferè sursum redire possunt.

Attamen verisimile est, in vapore vini non remanere præsentiam corporis Christi, uti nec vini essentiam. Nam apertè Aristoteles, interprete Gaza: *Si vapor vini exhalarit, non postmodum in vinum concrescit, sed in aquam.* Aut certè, si non in aquam elementarem, saltem in aquam vitæ, aut alium liquorem concrescit, qui non videtur naturalis vini omnes proprietates & essentiam retinere.

Arist. sect. 13. Publem.

Si quid etiam specierum vini in ore sacerdotis communicantis remaneat, citò etiam evaporatur, aut in salivam transit. Nam vinum rubellum, si modico tempore in ore contineatur, colorem, odorem, vires amittit, ut ex Fernelio & Vallesio antè diximus; nec unquam, credo, ad vini perfectam naturam redibit. Quia tamen res hæc physica & dubia, sacerdos post calicis sumptionem, aliquanto tempore, in mysterij reverentiam, à sputando absteineat.

Cavendum quoque, ne fortè particula specierum panis inter dentes, aut in aliquo oris sinu adhæreat. Facile enim

post horam unam, aut alteram incorrupta expueretur. Nam calor naturalis longè debilior est in ore, quàm in ventriculo, & tardius species corrumpere valet.

## CAPUT IV.

## De chymosi.

**S**ecunda alimenti concoctio fit in hepate, vocaturque chymosis seu chymi confectio, ex chylo quem ventriculus hepati præcoxit ac præparavit. Vbi enim ventriculus in perficiendo chylo satis officio functus fuit, Ianitor, si-ve inferius ejus orificium, valvas suas aperit, & ventriculus vi expultrice chylum in intestina deturbat. Hic dum per multarum spirarum circuitus, & velut labyrinthorum flexus intestina perambulat, à venis mesenterij exugitur, succusque ad chymosin & sanguificationem in hepar trajicitur, partibus chyli crassioribus & magis terrestribus prolabantibus interea in alvum, tanquam infimam corporis sentinam; unde postea suo tempore foràs per intestinum rectum deturbantur:

Hinc patet, quomodo explicandum quod Dominus differt apud Matthæum, *Omne quod in os intrat, in ventrem vadit, & in secessum emittitur.* Non enim dixit, *Totum*, sed *Omne*, id est, cujuscunque generis cibi aliquid, si-ve crassiores & terrestres partes, quæ ceterarum sunt purgamenta, in secessum emittuntur. Vnde Marcus quasi explanans Matthæum, *Omne extrinsecus introiens*, inquit, *in secessum exit, purgans omnes escas:* subtrahendo & secernendo se videlicet, per modum purgamenti, à parte succulenta & alibili, quæ in corpore remanet, & in ipsum convertitur. Hinc etiam sapore & alijs qualitatibus pars ista plurimum differt. *Omnibus enim alimento est, quod dulcissimum & coctissimum*, inquit Aristoteles.

Arist. lib. 4.  
c. 8. de  
generat.  
animal.

ARTI-



## ARTICVLVS I.

*Qua ratione sanguis generetur in hepate.*

**P**ostquam hepar, sive jecur utilem chyli succum ad se per venas mesaraicas, aut lacteas, ut alijs placet, & venulis angustissimis exceptum, tanquam sponsia com-  
bibit, calore suo naturali, & totâ suâ temperie sanguificâ eum in sanguinem excoquere incipit. Brevi autem tempore, chyli candorem in rubedinem sanguineam, & totum temperamen-  
tum mutat, sibi que proximè quàm potest, assimilât. Est enim hepar viscus rubeum, & instar sanguinis in grumum concreti, & firmiter compacti.

Quia verò materia chyli unde conficiendus sanguis, non est unius undique temperamenti, idcirco sanguis suas etiam fæ-  
ces & purgamenta habet. Nam præter sanguinem, qui est opus quod natura principaliter intendit ad nutritionem ani-  
malis, hepar quatuor præterea humores, melancholiâ, bilem fla-  
vam, pituitam, & serû conficit. Nec enim quinque isti humores inveniuntur in alimentis, ita ut concoctione tantum separen-  
tur, sed in hepate fabricantur, ut rectè post Galenum suum do-  
cet Vallesius. Nam qui contrâ sentiunt, inquit, *cur ex melle in in-  
venis ventriculo bilis, in ventriculo senis bonus succus proveniat, ni-  
hil probabile afferre possunt.*

Valles. lib.  
I. c. 13,  
contr.

Sic Chymicorû alembicus, instar hepatis, ex materia hetero-  
genea res varias conficit; quas Chymici se separare falsò ima-  
ginantur, cum eas igne artifice in ollis suis potiùs generent.

Ceterum totum, *φύμα* aggregatû ex quatuor alibilibus hu-  
moribus appellatur chymus. Bilis atra est gravissima, instar  
elementi terræ, pituita est similis aquæ, sanguis aëri, flava  
bilis igni. Serû verò non est alibile. Secus pituita, quæ est  
sanguis crudus.

Si sanguis cum istis omnibus excrementitijs humoribus ve-  
nas illaberetur, atro ictero ab atra bile, flavo ictero à flava bile,  
& varijs generibus morborum corpus laboraret. Si deinde  
atra

atra bilis cum sanguine cor peteret, spiritus vitales tetri & melancholici fabricarentur, qui deinde cerebrum petentes, homines in maniam agerent, ut in morbis melancholicis videmus.

Igitur ad faeces istas sanguini detrahendas, triplex quasi sentina in vicino posita est. Lien ad bilem atrā, cystis sive folliculus hepatis ad bilē flavam, renes ad serum attrahendum. Sanguis autem cum suā pituitā, & sero in venas effunditur. Pituita, ut cruditate domitā, in sanguinem percoquatur. Serum, ut eo tanquam liquidiore vectore, ad ultima venarum expeditius sanguis perveniat. Deinde ad renes revocatur per venas emulgentes, & a renibus traiecitur in vesicam per ureteres, & inde emeitur forās. Hinc patet, quā necessariō urina colore, & alijs qualitatibus referre debeat temperiem sanguinis, cui sic permixta fuit, & vi renum attractrice inde abstracta.

Reliquiae tamen seri, quas non tam exactē renes emulgere possunt, sanguini permixtae in venis manent, ut eum per extremos tandem & capillares angustissimos meatus, usque ad ultimā hominis cutē pervehant. Quo officio post quā humor ille perfunctus fuerit, in sudorem per poros exprimitur.

Arist. lib.  
3. c. 5. de  
partib.

Negare tamen videtur Aristoteles, sanguinem usque ad extremam omnino cutem pervenire. *Procedunt*, inquit, *venae in minores ex amplioribus, quousque arctiores reddantur, quā ut sanguinem transmittere possint. Quamobrem exitus sanguini nullus patet: licet excremento vaporis humidi, quem sudorem vocamus, satis pateat. Sed ne illi quidem, nisi corpore calefacto, & venularum clausulis patefactis.* Veruntamen extrema etiam cutis sanguine alitur, sed eo tam tenui & sudoribus diluto, ut non appareat rubor. *Nonnullis tamen accidit*, inquit Aristoteles, *ut cruentum quoddam excrementum sudarent propter vitiatum corporis habitum, scilicet cum corpus fluxum laxumq; esset.* Sic in magna illa Christi agonia, cum toto corpore, reciproco motu aestuaret & fluctuaret sanguis, apertis & hiantibus poris excidit sudor sanguineus, sicut gutta (ὀρούσαι grumi) sanguinis decurrentis in terram.

Luc. 22.

Aliquando verō sic pori corporis constringuntur, ut nihil feri & sudoris exire valeat per cutem, sed totum retrō in renes revertatur,



revertatur, & in vesicam transcoletur. Hac de causa in hieme constipatis gelu poris, effusius lotium reddunt homines, quàm æstate, licet parcius bibant. Nec semper etiam verum, quod Medici quidam dictitant, urinæ copiam potui respondere. Nam si potus à cibo solidiori sustentetur, ne mox præterfluat, sanè in substantiam viventis, non minùs quàm cibus vertitur. Imò plus alimenti esse à potu quàm à cibo docet Aristoteles, quia *humidum alimentum*, inquit, *est valentius, quàm siccum, quoniam plurimum est, ex q̃ & cibus ipsis, non nisi quod humidum est, vim nutriendi habet.* Nam ideo & ventriculus, & hepar, quantum valent, solidum & siccum cibum dissolvunt ac in humorem liquant. Vnde etiam ex cibo, non ex solo potu, aliquid in urinam vadit: ut patet ex quibusdam qui nihil aut vix bibunt, ut ille Lasyras Lasyonius apud Athenæum, & tamen ut ceteri mejunt. Quanquam non negem partem etiam urinæ nec à potu, nec a cibo esse, sed ab humoribus superfluis qui confluunt & urinam augment, sicut torrentes aliorum incurrentes, flumina inflant. Deinde adeps & carnes per colligationem in materiam urinæ abire possunt. Hinc differentia urinarum apud Hippocratem, *aquearum, biliosarum, purulentium, abradentium, stranguriosarum, oleosarum.* Sic colligato adipe, *obesum quendam & tumidulum vidi*, inquit Fernelius, *ex multa mictione, diebus circiter octo mirum in modum extenuari & concidere.*

Arist. sect.  
1. Problem.

Athenæ  
lib. 2.

Hippoc.  
lib. 1. sec. 2  
Epid.

Præter verò serum, quod indomitum est nec in sanguinem excoqui potest, est quidā alius affinis humor in venis sanguini quoq; permixtus, qui pituitæ nomen accepit. Est enim pituita *Humor primus ex cibo incoctus.* Qui nempe deinde percoqui & perfici potest. Hic autem humor est crudus quidam sanguis, qui à venis excoqui, & alendo corpori utilis effici valet. Nam venę de virtute sanguificā hepatis participāt, & ad hoc insigniter ab arterijs, quas singulæ singulas suppositas habere solent, adjuvantur. Sanguis enim arteriarū calidior & spiritalior est, quàm venarum. Plurimi Medici sanguini ab omnibus suis facibus depurato, præter pituitam, addunt etiam spiritum naturalē, tanquam subtilissimam ejus partē. Pulchrè autem Aristoteles

Arist. lib. 6.  
c. 3. Topic.

Arist. lib. 2.  
c. 5. de  
partib.

teles venas & arterias rivis & canalibus comparat, quibus horti undique diffecantur & irrigantur. Nam *ut in hortis rigandis, inquit, de una origine fonteq; uno aqua rivis permultis diducitur, aliq; ab alijs ductus subinde excipiunt, quousque humor in omnes partes deveniat; ita venarum rivus in omnes corporis partes expanduntur.* Sanguis enim in hepate satis excoctus, & in amplissimam venam, quam vocant cavam, destillans, in minores deinde ac minores venas, tanquam venæ cavæ ramos excipitur, & sic per totum corpus, ad illud potandum & alendum, dispergitur.

Ad hanc omnium membrorum, ex uno sanguinis fonte irrigationem & potationem eleganter alludit Apostolus: *Omnes in uno spiritu* ( *ἐν ἑνὶ πνεύματι*, in unum spiritum ) *potati sumus.*  
 1. Cor. 12. Nam optimus Philosophus Paulus, ait Cajetanus, *conformiter ad Philosophos in naturalibus loquitur. Alimentum siquidem secundum Philosophos consistit in humido, & per modum suctus alitur corpus. Constat autem suctum, speciem esse potandi.* Sicut ergo omnia membra animalis, ex cibo & potu in sanguinem percocto & liquefacto corporaliter potantur & aluntur; ita omnia membra viva corporis Christi, quod est Ecclesia, eodem cibo & potu Eucharistico spiritualiter. Et sicut cibo & potus corporalis in incrementum corporis humani, ita cibo & potus Eucharisticus in incrementum gratiæ spiritualis quodammodò vertitur.

Arist. lib. 3.  
de partib.

Ceterum particulam sanguinis purioris cor ad se attrahit, & eam in spiritum vitalem extenuat. Quem in arterias deinde effundit, ad fovendum calorem naturalem, qui insitus est omnibus partibus viventis, tanquam commune instrumentum, quo anima partium nutritionem perficit. Officina autem in qua cor spiritum vitalem fabricat, est sinister ejus sinus; à quo etiam ortum habent arteriæ, ut spiritum elaboratum in ipsas tanquam rivorum alveos, sinus ille exoneret. Vnde concinnè Aristoteles cor vocat *ἐστὶν αἷον* focum animalis, propter officinam istam spirituum quibus calor naturalis per totum corpus diffunditur. Vi autem quadam *σπυγνὴν* pulsatilem dilatat se cor per diastolen, & contrahit per systolen, unaque omnes arterias, sanguinis impulsu, aut alià vi movet, ad eventis



eventilandum suum, & omnium partium ad quas arteriæ pertingunt, calorem naturalem. Nam per dilatationem aërem externum per poros cutis arteriæ attrahunt, per contractionem fumidas & superfluas exhalationes expellunt.

Ex oeconomia & qualitate hujus pulsûs, Medici de affectu cordis & sanguinis arteriosi, in febris, & alijs morbis judicant. Isto etiam pulsu aliqua pars spiritûs vitalis sursum in plexus choroides, & deinde in cerebrum expuitur, ut inde formetur spiritus animalis, quo motus localis animalium, & operationes sensuum administrantur.

An autem perpetua circulatio sanguinis per venas & arterias ita fiat, ut sanguis arteriosus, per anastomoses, quibus inter se conferuntur venarum & arteriarum extremitates, perpetuò effluat ex arterijs in venas, & ex venis iterum redeat ad cor, à corde rursum per arterias in venas (quòd Harvei, Medici Angli nuperum inventum est, & quibusdam alijs ingeniosis placeat) Medicorum filij adhuc cogitent. Licet enim experimentis & argumentis admodum verisimilibus id probare videantur; metuo tamen, ne in ista circulatione circulatoriæ aliquæ præstigiæ, aut alius lateat error. Nam experimenta quæ adferunt (ut subitus venarum tumor infra brachij ligaturam, quâ Chirurgi in phlebotomia utuntur &c.) aut profectò nihil, aut circulationem illam valde rapidam & torrentem esse probant. Qui autem fieri potest, ut per anastomoses, quæ sunt *invisibiles quadam atque angusta planè via*, ut Galenus loquitur, sanguis arteriosus cum suis crassamentis & fibris (quas etiam in eo experientia & Medici jam, contra Erasistratum agnoscunt) tam rapidè & citò trajici possit? Deinde, si ita fiat; cur venæ non perinde atque arteriæ subsiliunt & micant? Præsertim si vera est altera eorundem opinio: Quòd arteriæ ab impetu sanguinis arteriosi, quem cor in eas evomit, pulsum suum solennem habeant. Nam sanguis arteriosus, tanquam torrens in sanguinis venosi fluvium incurret, ac eum inflabit, facietque ut venarum tunicæ, non secus ac arteriarum, ad singulos incurfus subsiliant.

Ut autem hoc argumentum evadant, non aliud respondere

possunt, quàm sanguinem arteriosum non impetu, sed tardâ quadam transsudatione, per angustas anastomoses, vel etiam per ipsam carnis substantiam, tanquam per spongiam, in venas lentè pervenire. Hoc autem est, præcipuas experientias, quibus circulationem suam persuadere volunt, penitus interimere. Si enim tam lentè transsudet, quomodo tempore aliquot pulsum sic implet venam brachij?

Cogitent igitur, an alterum illud argumentum, sumptum ex copia sanguinis, quem singulo quoque die cor per systolen in arterias vomit, non possit solvi, dicendo: Non totam illius sanguinis materiam ex vena cava proximè hauriri, sed partem ejus ex arteria aorta, per conniventes ejus valvulas, in diastole ad cor revocari, ut perfectiùs elaboretur. Tam celeri enim & unico per cor transitu, non videtur quomodo sanguis venosus in spiritum vitalem & sanguinis arteriosi qualitatem valeat excoqui.

Ceterùm, ex puritate & bonitate sanguinis, non tantùm totius corporis sanitas pender, sed acies intelligendi, & ingeniosorum sanguinem aliquando contemplati (& Medici dicunt) cum refrixisset, brevi & subili stamine contextum, non longis & crassis fibris, ut stupidorum, deprehendimus. Quo enim subtilior & tenuior sanguis, eo spirituum vitalium, ac deinde animalium, quibus ingenium utitur, subtilitas est major.

Ciborum autem & potus qualitas plurimum refert in sanguinis bonitatem. Nam sanguis & lac animalium sapore & odore sæpe produunt, quibus herbis pasta sunt. Vnde Galenus, *Talium animalium*, inquit, *carnes perpetuò exhibere oportet, quale volumus corpus humanum reddere*. Non enim in ventriculo, hepate, venis, & postremò in singulis membris ita perdomatur alimentum, ut nihil de prioribus proprietatibus suis retineat. Hinc *lactuca frigidum, vinum calidum sanguinem, suâque nature consentaneos profert humores*, inquit Fernelius: *Azymus panis & castanea crassum atque lentum, vitellus & pullus gallinaceus tenuem &c.* Probabile quoque est, ait Philosophus quidam Platonicus, *longeva quadam animalia, ut cervum, ad vitam conferre longævam; si tamen huiusmodi carnes juvenes comedantur*. Quam doctrinam

Gal. lib. II.  
de simpl.  
med.

Fernel. lib.  
I. c. 14. de  
morb. caus.

Ficin. lib.  
c. 6. de vita  
prod. c.



nam quidam, & inter eos Campanella, eousque extendunt, ut carnes vulpinas præscribant ijs qui astutiam, caninas, qui sagacitatem sibi comparare volunt. Quibus si credendum est, vervecinis fortasse abstinere oportebit, ne verveces & stolidi efficiamur.

## ARTICVLVS II.

*An sicut sanguis in hepate, ita vinum in uva generetur.*

**A**D hanc quæstionem libuit paulisper in transitu di-  
vertere, quia Theologi quidam argumento sangui-  
nis, qui in solo hepate generatur, negant vinum extra  
uvam posse gigni, ideoque aquam in calice Eucharistico,  
ajunt nunquam à vino in vinum verti. Favere videtur Scri-  
ptura, quæ vinum vocat *sanguinem uve meracissimum*. Vva Deutr. 32  
igitur est ut hepar, vinum ut sanguis. Vnde sicut hepar est  
unica causa à natura determinata ad sanguinis, ita uva  
ad vini generationem. *Vitis agnosco proprietatem*, inquit;  
Aquilonius, *quæ aquam succumque terra prolectum in uvam* Franc.  
Aquil. lib. 5.  
prop. 18.  
Optic.  
*traducit, unde postea fit vinum: at vinum expressum non magis po-  
test aquam in suam naturam commutare, quam emortuus arboris ra-  
mus alimentum capeßere ac nutrirî. Nam vinum nec seminalem, nec  
plantalem vim habet*. Eandem quæstionem omnium diligentis-  
simè tractat & diffundit Rev.<sup>mus</sup> & Eruditissimus vir Paulus  
Aresius, Episcopus Derthonensis, in Libr. Arist. de Generat.  
& postea, in peculiari Libello, *de aquæ transmut. in sacrif. Missæ*. P. Ares.  
lib. 1. c. 10.  
q. 52. de  
generat.

Plurimis verò argumentis, & invictis, ut credit, negat  
vinum posse ullo eventu aquam in se convertere; non si uni-  
ca gutta aquæ in mille amphoras vini infundatur: additque,  
Aristotelem, S. Thomam, Scotum, aliosque tam Philosophos  
quàm Theologos veteres à se stare, quos tamen alij ad se  
conentur pertrahere,

Sed tamen profecto in limine isto statim offendit, & in-  
gniter labitur. Nam Aristoteles satis disertè indicat modi-  
cum aquæ infusum vino converti in vinum, ut lignum in  
ignem, ut cibus vertitur in carnem. Et ibidem in fine cap.

Arist. lib. 1.  
c. 5. de ge-  
nerat.

S. Th. 3. p.  
q. 2. a. 1. &  
q. 74. a. 8.  
ad 2. q. 77.  
a. 8.

Scot. 2.  
d. 19. q. 1.

And Libau.  
lib. 2. Epist.  
Chymic.

Arist. lib. 1.  
c. 10. de  
generat.

Sandæ in  
Theol. My-  
stic.

comparat animal senescens cum vino, quod ab infusa aqua paulatim debilitatur, nec potest in fine nisi vinum debile & & aquosum ex aqua conficere.

Nonne hoc etiam S. Thomas satis dilucidè? *Ex his quæ pluri-  
mum distant*, inquit, *non potest fieri mixtio. Solvitur enim species unius  
corum*; puta, *si quis guttam aquæ amphoræ vini apponat*. Vnde alibi  
apertè aquam in calice, *in vinum converti*: & quidem per *corru-  
ptionē aquæ*, ut ex objectione patet. Ac deinde: *Gutta aquæ multo  
vino permixta, transit in speciem vini, ut dicitur lib. 1. de generat.*

Et Subtilis Scotus: *Vinum*, inquit, *primò convertit aquam in se.*  
*Toties autem potest apponi aqua, quod deficiet virtus vini in conver-  
tendo.* Ceteros Scholasticos tam veteres, quàm novitios quid  
attinet huc turmatim citare? Sed Aresius alijsque ad Oenopo-  
las & Chymicos provocant. Isti enim aquam, quæ multis men-  
sibus vino permixta fuit, docent arte à vino incolumem sepa-  
rare. At ego Chymicis ipsorū, hunc unum inter artis Principes  
Chymicum oppono. Andreas Libavius est, in Epistola ad Phil.  
Scherbium. *Confundere aquam & vinum*, inquit, *Oenopolarū est, se-  
gregare, ut vinum exeat, vel aqua, tentatum potius est, quàm præstitum.*  
Nec modos illos, per vas hederaceum, per arundines, aut bibu-  
las sambuci medullas &c. magnopere æstimat. Nec ego sanè  
alias experientias & artificia Io. Bap.<sup>te</sup> à Porta, per pondera  
scilicet, & alias id genus valde æstimo. Nam phlegma vini, pon-  
dere sensibiliter non differt ab aqua elementari. Vnde licet  
aliquid extrahant ex vase, quod gravius sit vino perfectè matu-  
ro, non tamen ex pondere dicere possunt, an vinum crudum, an  
aqua sit. Consentit etiam Libavius isti Philosophi pronuntiato:  
*Quod exuberat, alterum in naturam suam vertit.* Et id in mixtura  
vini & aquæ etiam verum esse dicit. Sed *Oenopola*, inquit, *au-  
cturi suum vinum, excedunt aquæ modum.* Plerumque enim situ-  
latim potius, quàm guttatim vina sua, ex avaritiâ diluunt.

Fallitur ergo Mysticus ille qui audacter asserit, *Aristotelem,  
Plinium, omnesque nostri temporis Medicos & Chymicos negare, fieri  
conversionem substantialem aquæ in vinum transfusa.*

Sed nonne tamen aquam, saltem per destillationem, vino  
detrahunt Chymici?

Sanè



Sanè detrabere possunt, si tanta copia infusa fuerit vino, ut non potuerit digeri. Aliàs, non aquam extrahent, sed vinum aquosum, quod suam aquam adhuc resipit, ut optimè S. Thomas. Imò non tantùm ex vino lymphato, sed ex purissimo, quale uvâ expressum est, humorem aquaticum, quod phlegma vocant, educunt Chymici. Nam veluti sanguis animalis ab atra, & flava bile, & sero suo repurgatus, adhuc tamen est corpus heterogeneum, ex spiritu naturali, pituitâ, sive sanguine crudiori, & sanguine percocto perfectoque constans; ita sanguis uvæ, sive vinum omnibus suis facibus eructatis & deterfis purissimum, tres adhuc partes in se continet, florem sive spiritum vini, vinum mediocris consistentiæ, & phlegma. Hoc verò phlegma, aqueum, & in toto vino ponderosissimum est, ideoque fundum vasis petit. Et ista est aqua, quam Oenopolæ & Chymici ajunt se à vino generosiori per artem separare. Id est, re verâ aqua elementaris non est, sed humor ei similis, informatus à forma vini; sed ita spoliatus generosi vini qualitatibus, ut vini cadaver magis, quàm vinum esse appareat.

Vnde iterùm falluntur, cum aquam esse, gustu se dicunt discernere. Nam hac ratione, in carnibus etiam caponis judicabunt insipidum terræ elementum formaliter contineri. Si enim ex capone elixo quintam essentiam, & totum succum per linteum exprimas, ea quæ remanent, *ad eam omni carnis substantiâ, odore & qualitate orbata sunt, ut canibus obiecta, nec olfacere dig-  
nentur*, ait Io. à Porta. Sapor enim carnum in succo, quourgent carnis pori, non in stamine & subtemine, sive in aridis illis filis, quibus prima carnis veluti tela contextitur, præcipuè consistit. Sapor itidem vini non in phlegmate ejus, nec etiam in tenuissimo spiritu præcipuè viget; sed in mediocris corpulentia vino, quod medium vasis, inter spiritum & phlegma vini; sicut in Mundo elementari aër inter ignem & aquam, locum tenet. Fæces verò & hypostasis vini, quæ in imo vasis subsidunt, terrestres elementi similitudinem habent. Hinc vulgatum illud olim inter Philosophos & Medicos: *Vinum in medio vasis, oleum in summo, mel in imo præstantissimum esse.*

Io. Porta  
libro Magia.

Hæc

Cap. Cum  
Martha de  
cebrat.  
Miss.

Hæc scitè & exactè pensculatis summus Philosophus Innocentius III. Pont. Max. Physicorum, & Chymicorum experientiam, in separatione aquæ à vino, non magni pendit. Nam alij tenent, inquit, quòd aqua cum vino transsubstantiatur in sanguinem, cum in vinum transeat mixta vino: licet Physici contrarium asseverent, qui aquam à vino per artificium posse asserunt separari. Vbi ait, ex sententia quorundam, quam postea approbat, modicum illud aquæ calici infusum, mediatè transsubstantiari in sanguinem, ubi tamen antè in substantiam vini transierit: quidquid Physici dicant, aquam in calice, aut in dolio, à vino non posse in vinum converti. Nam etiam ante Pontificatum adversus istos Physicos dixerat: *Quis ambigat, aquam in vinum transire, cum multo vino modicum infunditur aqua?*

Lib. 4. de  
sacram. al-  
tar. c. 31.

Sed si aqua infusa dolio muretur in vinum, quid opus vinum novum emere? inquierent. Certè enim, qui unicam etiam scintillam ignis habet, non emit ignem, sed tantum ligna, ut inde ignem accendat. Sic ergo, qui dolium vini habet, modò aquam, id est, materiam vini habeat, quam dolio paulatim & successivè infundat, non est quòd aliud vinum emat. Nam ubi prior cyathus aquæ, in vinum conversus erit, secundum cyathum infundat, & sic deinceps. Si enim non amplius vini depromat, quàm aquæ infundit, dolium nunquam deficiet.

Arist. lib. 1.  
c. 5. de  
generat.

Sed argumentum hoc ab Aristotele & Scoto paulò antè solutum audivimus. Quia nempe vinum infusà paulatim aqua redditur ad convertendam alteram aquam debilius. Nam vinum, etsi fortius, repatitur ab aqua, nec à vino debili & aquatico quod ex aqua factum est, juvatur, sicut à vino generoso. Simili prorsus modo, quò animal convertendo alimentum in suam substantiam, fit quotidie ad convertendum imbecillius. Dilucidè Durandus: *Sicut virtus vini convertentis aquam, paulatim per admixtionem aquæ debilitatur, ut tandem fiat aquosum; sic virtus conversiva alimenti, primò quidem fortis existens, postea debilitatur, deinde deficit, ita ut neque possit aliquid convertere.*

Sed vinum hoc aquaticum per naturalem resultantiam reducere se ad naturam maturi & generosi vini, inquierent, quale



quale fuit illud quod Christus ex aqua confecit in Cana Galilææ, valebit. Nam aqua calefacta, per talem resultantiam reducit se ad frigus.

Et sanè, si omnia corpora naturalia se reducerent ad qualitates suas naturales, argumentum nos acriter stringeret. Sed quis unquam vidit senem, per naturalem resultantiam redire ad temperiem juventutis? Quis marmor cariosum, aut calceos veteres resilire ad decorem pristinæ novitatis? Cur deinde forma substantialis vini, quæ est in phlegmate & parte crudiore vini, non producit in se per resultantiam, maturi vini temperiem? Cur pomum in arbore crudum, sine sole & autumno, non transilit ad maturitatem?

Resultantia igitur illa videtur propria esse elementis: ne tam facile forsan interire possint simplicia ista corpora, quorum qualitates tam necessariae sunt animantibus, & universis corporibus mixtis. Mixta verò aut nulla, aut paucissima, propter peculiarem quandam naturam, semotis agentibus contrarijs resiliunt ad naturales suas temperies. Et ea quæ resilire videntur, ad unicam ferè qualitatem elementi dominantis; quia sic etiam universi necessitas exigit. Sic plumbum & metalla igne liquata revocare se videntur (etsi aëri circumfuso aliqui id tribuant) ad naturale frigus, quo consistentiam recuperent, ne inutilia remaneant plurimis humanis usibus. Cum ergo tot alia mixta naturali resultantia careant, de vino nemo mirari debet.

Verum nullum corpus mixtum inanimatum, inquit, corpus aliud in se convertere potest. Nam si totum universum circumspicimus, mixta animata quidem aliud in se transformant per nutritionem; elementa etiam hoc possunt, se invicem, aut mixta devorando; quomodo ignis aërem, aut lignum consumit. Sed mixtum inanimatum nec aliud mixtum, nec simplex elementum in se corrumpere valet. Aurum enim lapidem aut aquam in se, etiamsi proximè attingat, nunquam transformat; ergo nec vinum vertere aquam in se poterit.

Verum nimis generaliter, & audacter assumunt, Nullum mixtum

Scal. Exer.  
102.

Agricol.  
lib. 10. c. 20  
&c. fossil.

mixtum inanimum vertere in se aliud mixtum, vel elementum. Vbi enim tam latè unquam & diligenter scrutati sunt rerum naturas? Nonne enim lapides & metalla quædam materias circumpositas sibi agglutinant, & in se fortasse convertunt? Vnde cùm Cardanus dixisset lapides vivere, quia crescunt; Scaliger respondit, non crescere actione vitali, ut viventia, sed *per additamenta tamen grandescere*. Quia nempe, infuso in poros humore lapidescente, pleniores, aut extrinsecus adhærente, majores fiunt. Nónne rerum subterranearum scientissimus Georg. Agricolâ etiam docet, *terraneos succos, qui lapidibus & metallis adhaferint, mutare compositionem*? Nónne dicit lapides afflari quadam aurâ & naturâ metalli illius quod in venis attigerint, & hac ratione, lapides quosdam aurarios, argentarios, plumbarios, ferrarios appellari? Quod autem metallum tales lapides perficere, & usque ad metalli speciem adducere non possit, non est indicium, quòd metallum nihil agat, sed quòd adeò actuosum non sit, ut inchoatum opus ad exitum perducere valeat. In metallis enim & lapidibus qualitates primæ, & siquæ aliæ, in unam temperiem sic redactæ & contractæ sunt, ut segnes sint ad producendas sibi similes.

Lib. 4. c. 11.  
de ortu  
subter.

Ios. Acoſta narrat in Indijs reperiri, & se vidisse smaragdos mediâ parte virides, alterâ adhuc candidos, serpente paulatim per candorem virore, ut pars viridis & smaragdina videatur candidam alterare, & pedetentim vertere in smaragdum. Sic quoque metalla per venas suas serpere videntur, ut quod perfectè concoctum est, juvet ad crudioris concoctionem. Quod tamen non ita apparet, aut fieri potest, in corporibus illis duris solidis, quæ intra mutuos poros non se infnuant; aliàs enim multis in locis *succus lapidescens, vel solus, vel aquis permixtus*, inquit Agricola, *recipitur in stirpium meatus, aut animantium, & præterquam quòd est materia, causa efficientis rationem suscipit, ac sic se in ipsorum corpus induit, ut id totum secum convertat in lapidem*.

Viden' ergo, ut succus lapideus in se stirpē totā transformet? Sic Albertus Magnus narrat se vidisse nidū aviculæ cum pullis totum lapideum, quia in lacum, aut limum talis succi decide-



deciderat. Sunt etiam lapides prægnantes, qui alios intra se ex succo aliquo, aut vapore concipiunt, ut *attites callimum*, inquit Agricola; imò adamas aliquando adamantem, ait Boetius.

*Prodit enim Rueus*, inquit, *adamantem unum alium gignere, ac Dominam Heverensem è Luxemburgorum Illustri genere, duos habere hereditarios adamantes, qui alios crebrò producant, ut eos, quicum-*

Ansel. Boet  
lib. 2. c. 3.  
de lapid: &  
gem.

*que statis temporibus intuetur, congenerem sibi prolem eniti palam indicet. Quid de lapide illo fissili in Aſſo oppido Troiadis, qui corpora defunctorum in se condita devorat, & in lapidem vertit, veri nominis sarcophagus? In Aſſo Troiadis*, inquit Pli-

Plin. lib. 36.  
c. 17.

*nius, sarcophagus lapis fissili venâ scinditur. Corpora defunctorum condita in eo absumi constat intra XL. diem, exceptis dentibus. Mutianus specula quoque & strigiles & vestes & calceamenta illata omnia lapidea fieri auctor est. Hæc fortasse contemnentur, ut fabulosa, quia nunquam vidimus: sed similitudine majorum naturæ miraculorum, quæ negare non possumus, facile defenduntur.*

Si deinde sulphurariæ egesto sulphure, terrâ repleantur, hæc iterum naturâ sulphuris induit; quod, credo, nō aliqua cælis influentia, sed locus circumquaque sulphureus facit. Ferrū etiam in Elba Insula Florentinorum, quasi stirpibus circumcisis, renasci, & fodinas illas nullis seculis exhauriri, scribit Bodinus.

Bodin. lib. 2  
Theat.

Sic quoque bitumen recreſcit, & à bitumine simili fortè regeneratur in terræ visceribus, ut alendis per centenos, & etiam millia annorum ignibus subterraneis, sufficere possit, quibus thermæ & aquæ medicatæ caleſcunt, ut diximus olim in Meteorologicis.

Si igitur tot corpora mixta inanimata, verâ aut vero simili Philosophiâ, alia ejusdem speciei sibi adglutinent, aut generent, cur ita mirantur, si vinum ex aqua producat vinum? Sed ex unico saltem elemento fieri non potest corpus mixtum, iterum respondent.

Sed demus hoc ipsis. In aqua tamen nostra, etiamsi purissima videatur, nunquam est unicum solum elementum, sed atomi quædam terrestres, aliaque per eam insensibiliter volitant. Illustri non ita pridem exemplo Gregorij XIV. Pont. Max. ex gente Sfondrata Mediolanensi, quem calculus

multarum unciarum tam citò finivit. Is autem, Medicorum sententiâ, ex aqua concretus fuerat, quam ad annum ætatis decimum octavum solam meramque biberat. Nam omnis aqua, inquebant, etiam quæ limpidissima, qualem Italiæ fontes fundunt, & sincerissima putatur, atomos tamen aliquas & hypostasim habet, quæ de facili coit & duratur in lapidem.

Deinde ex unico elemento nil vetat generari mixtum, modò in materiam unci elementi qualitates & temperies corporis mixti imprimantur. Nam corpus mixtum non ex substantijs quatuor elementorum, *sed melius fortasse dici potest*, inquit Aristoteles, *ex virtutibus confici elementorum. Humiditas enim & siccitas, caliditas & frigiditas materia corporum sunt compositorum.* Quod in compositione liquidorum mixtorum faciliùs intelligi potest. Nam materia eorum aquea non ita indiget permisceri elemento terræ, quemadmodum in compositione solidorum, quales sunt lapides & metalla. Quia enim hæc corpora solida habent consistentiam firmam, ideo liquiditas ipsorum aquea per terræ mixturam alligari & solidari debet. Liquida verò quale est vinum, non egent terrenâ istâ soliditate; imò est contra ipsorum naturam, sed aquea liquiditas ipsis sufficit.

Hoc deinde pro magno obijciunt. Quòd antequam uva vinum excoquat, succus antea in terra præparari, deinde in vitis ligno, ac postremò in ipsa uva; quæ denique etiam calore externo, aprico collium, & multis solibus indiget ad vini maturitatem & perfectionem. Hæ autem præparationes non præcedunt in materia aquæ infusæ calici aut dolio, ut ex ea vinum generari possit.

Fateor, ad vini exactæ maturitatis generationem præparationes illas requiri; veluti ut maturus, & optimus sanguis generetur in hepate, debet concoctio in ventriculo, & chylofis chymosin præcessisse. Sed tamen, sicut vivere possumus *ventriculo cibum non commutante, si succis utamur; licet non rectè vivere, & bono frui sanguine*, ut ait doctissimus Vallesius: ita vinum crudeum & aquosum generari potest ex aqua, quæ antea mutationem præparatoriam non perpeffa fuerit in venis ligni, à radice usque ad uvam. Si enim, inquam, Medici, ubi

ventri-

Arist. lib. 2.  
c. 1. de  
partib.

Valles. lib.  
6 c. 3. con-  
trou.



ventriculus digerere non potest, per clysteres in intestina succos infernè iniiciunt, qui per venas mesaraicas rapti ad hepar, mutantur in verum sanguinem, licet minùs perfectum; cur etiam ex aqua cruda vinum crudum & phlegmaticum à vino generari nequibit?

Errant enim sanè, qui integro anno, terræ succum, ad conficiendum in vite vinum, præparari dicunt. *Alteratur prius in radice*, ait Aresius, *deinde stipite, tertio in ramis, quarto in ipso fructu*, & ad hac integer saltem annus requiritur; quomodo ergo spatio unius hora poterit vinum immediate in se convertere aquam?

Ares. lib. i.  
c. 10. de  
generat.

Sed ista alteratio quæ tam diu in antecessum præcedit, non præparat proximè ad vini generationem; sed primùm ad gemmas vitis, deinde ad pampinos, folia, flores, postremò ad uvas, quæ sunt instrumenta & vasa, in quibus postea materia vini tandem percoquitur. Quàm vero citò & repentè propria vini materia à radice in uvam traijciatur & vinum conficiatur, patet, quando pluvia post siccitatem, maturis uvis, in vineam cadens, mox avidè in uvas sorbetur, & statim etiam ad oculum, acini uvarum incipiunt vino, ex aqua illa pluviali celeriter confectio, etsi non excoctissimo, turgescere. Nec existimandum est, vinum istud novum facultate vitali folius uvæ concoqui, sed etiam à vino maturo quod præerat in uvis, adjuvari. Nam sicuti sanguis non solum per facultatem sanguificam hepatis, aut etiam venarum (postquam in venas est illapsus) concoquitur, sed etiam sanguinis pars coctior & maturior agit in pituitam crudiores, juvatq; ad ejus perfectionem; ita vinum in uva maturum, adventantem crudum aquæ pluvie succum mitigat, & transitum in vinum accelerat. Hoc quoque argumentum magis molestum, quàm arduum est.

Non habet, inquit, vinum eas qualitates, quibus naturales aquæ dispositiones expellere possit, ad vini generationem. Nam vinum est formaliter frigidum & humidum, sicut aqua. Vnde licet haustum accendat calore viscera intus, ait Plinius, *foris* Plin. lib. 14  
*tamen infusum refrigerat*. Igitur vinum aquæ frigus potius frigore

fuò formali intendet, conservabitq; quàm calore virtuali expellet. Nam calor virtualis non exerit vires suas in aquam, sed in ventriculum animalis, ubi à calore ejus naturali excitatus fuerit. Vnde aquam frigidam permixtam vino, calefieri aut tepescere minimè experimur.

Verùm quæro vicissim ab adversarijs, quas qualitates uva imprimat aquæ pluviali, quando ex ea vinum coquit? An frigus tantùm & humiditatem? Non credo. Nam aqueus humor illas à seipso habet; nec unquam sic aquam in vinum destrueret. Itaque fateri debent, alias quasdam dispositiones introduci ab uva in materiam aquæ.

Ac in primis, calor aliquis non tantùm virtualis, sed etiam formalis imprimitur. Nam uva, & omnis planta, calore aliquo naturali prædita est ad digerendum alimentum, etiamsi propter tenuitatem & majus frigus, non apertè sentiatur. Deinde siccitatem quandam producit; quæ maximè in spiritibus vici apparet, in quibus igneæ qualitatis aliquid inesse videtur, cum mustum digerant & faciant effervesce.

Galen. lib. 1  
de nat. fa-  
cult.

Sic ergo omnes quatuor primæ qualitates insunt vino; & calorem ac siccitatem quam accepit ab uva, potest in aquam dolio infusam transfundere. Quippe siccitas & humiditas sunt etiam qualitates activæ, ut contra Stoicos & Aristotelem (sicut putat) docet Galenus: *Licet calidum & frigidum, inquit, in animalibus & stirpibus magis agant, siccum verò & humidum pati videantur; non tamen sic res se habet in omnibus.*

Sandæ in  
Theol. My-  
stic.

Sed quomodo interim tantulo calore, tantulâ siccitate, aqua in vinum ab uva corrumpitur? Nonne enim aqua ab igne fervens, aut gelu in glaciem exsiccata, adhuc manet aqua? Est enim *tenacissima natura*, ait non-nemo; adeò ut si illam in candentem ollam ferream conjicias, & vapores alembico excipias, totam omnino & integram recipies. Igitur in uva ad aliquantum caloris & siccitatis alterata, aquæ formam non perdet. Possumus hinc per aliquas semitas fortasse non difficulter evadere. Vt si negemus cum Galeno & Curtio, ullam aliam formam substantialem esse in aqua, præter qualitates primas, frigus & humiditatem. Deinde si demus quidem aquæ formam



Formam substantialem, sed cum plerisque hodie Medicorum, dicamus eam manere formaliter in corpore mixto; ita ut sine expulsionem formæ substantialis aquæ, vinum fiat ex aqua: sicut Scaliger ait, *formam elementi misceri cum superveniente forma* Scal. Exere lapidis, aut vini, atque ab ea perfici, contineriq; ab hac illam, sicut <sup>101</sup> quadratum in pentagono.

Sed recedendum non est à viâ Aristotelis, S. Thomæ, Scoti, Theologorum ferè omnium & regiâ. Damus ergo, in aqua formam esse substantialem, & eam expelli è materia sua per formam vini. Caliditas tamen & siccitas exigua, quas vinum producit in materia aquæ sibi permixtæ non sufficerent ad expellendam formam aquæ, nisi virtualis calor, & aliæ occultæ proprietates ac dispositiones formæ vini, expellerent occultas formæ aquæ dispositiones. Nam nullas alias dispositiones ad formas corporum mixtorum & elementorum agnoscere, quàm quatuor qualitates primas, non solum imprudentiam, sed impudentiam esse, clamat Iul. Scaliger. Certè enim cum venena quædam occidunt hominem, incolumi toto primarum qualitatum temperamento, debent aliquam dispositionem occultam animæ rationalis interimere, cujus nomen & essentiam ignoramus. Temperies deinde humanæ carnis simillima est porcina, ut notat Galenus. Ut ergo anima rationalis potius in carnem illam inducatur, quàm anima porcina, aliæ occultæ humanæ dispositiones inesse debent, quæ animam porcina respuant. Si quis tamen simplicitati elementorum non satis congruere putet, ut forma aquæ habeat alias occultas dispositiones præter frigus & humiditatem; dicat audacter, formam aquæ, non expelli à vino quia calor virtualis & aliæ dispositiones occultæ formæ vini ita remittant frigus & humiditatem aquæ, ut amplius non posset cum frigore & humiditate vini permanere forma substantialis aquæ; sed quia non potest cum accidentalibus dispositionibus occultis formæ vini. Nihil enim causæ est, cur forma substantialis non possit formæ accidentali proximè repugnare. Cum enim elementa, ordine à natura statuto destinantur ad generationem mixtorum, & quædam formæ mixtorum postulent qualitates primas ali-

cujus

cujus elementi in eo gradu, qui non repugnat formæ elementari; debent necessariò dari quædam aliæ dispositiones formæ talis mixti, quæ expellant proximè formam elementi, ut ex elemento possit generari tale mixtum. Res in exemplo nostro clariùs lucebit.

Forma vini, aut forma aquæ rosarum, quæ sunt corpora mixta, postulant frigus & humiditatem, v. g. in gradu sexto aut septimo, sub quibus permanere potest forma aquæ elementaris. Si igitur nullæ aliæ sint naturales dispositiones formæ aquæ, ut supponitur, quam frigus & humiditas; non poterit, ne quidem in vite, ex aqua generari vinum: quia à causa efficiente vinum non expellentur ex materia aquæ frigus & humiditas, quas etiam forma vini habere postulat. Igitur ut destruaturs forma aquæ & locum faciat formæ vini, debent aliquæ aliæ dispositiones occultæ ante formam vini præmitti, quæ repugnent proximè cum forma aquæ & eam ex materia depellant; etiamsi in materia remaneant frigus & humiditas, quæ aliàs ad ibi retinendam formam aquæ sufficerent.

Hoc etiam forte demonstrari potest à simili. Nam juxta Peripateticos & S. Thomam, in generatione hominis est quædam animarum successio, ut Lib. 1. fusè differuimus. Animam autem vegetativam quid ex embryone humano proximè expellit? Non aliud sanè fortasse, quàm dispositiones quædam perfectiores animæ sensitivæ, quæ post vegetativam in materia embryonis sequitur; etiamsi in materia ista maneant inferiores dispositiones animæ vegetativæ, quas etiam anima sensitiva habere requirit. Sicut ergo dispositiones animæ sensitivæ nobiliores expellunt animam vegetativam, & dispositiones animæ rationalis animam sensitivam embryonis; quia animæ istæ sunt viales & transitorie: ita etiam fortasse dispositiones formæ vini expellunt formam aquæ; quia formæ elementorum sunt etiam quodammodo viales respectu formarum corporum mixtorum. Nam veluti per formas successivas embryonis, materia statuitur in via ad formam viventis perfectioris; ita materia elementi suo modo est in  
via



via ad perfectiorem formam mixti.

Hoc quoque notandum, ut conversionem aquæ in vinum facilius imaginemur. Quod spiritus vini perpetuo agat & digerat, quantum potest, suum phlegma, extenuando ipsum & excoquendo. Quomodo etiam aquam infusam alterare & digerere potest.

Hinc patet, spiritosa & insigniter calorifica vina citius phlegma suum, aut aquam infusam digerere; nisi sint nimis crassa & pingua, quale est Hispanicum. Nam talia vina usque ad minima naturalia vix possunt fortasse aquam interfecare, ut partes vini plures & majores particulam aquæ extrinsecus circumstant, & intrinsecus dissecant, ac brevi tempore undique oppugnando, in se convertant & absorbeant. Sic etiam oleum nec facile alios liquores interfecat, nec ab ijs interfecatur. Vnde argumentum nullum est, quo probant, vinum non converti in se aquam, quia converti non potest oleum. Quanquam longo tempore oleum fortè etiam expugnari possit à vino.

Ex his quoque intelligi potest, quod vinum tenue possit in generosius converti, si differant inter se specie, ut aliqui censent. Negare tamen videntur hanc differentiam inter Theologos S. Thomas, Richardus, & plures. Nam vites transplantatæ ab uno vino degenerant in aliud. Quod verò Galenus negat ullum vinum album esse calidum, non ideo magis necessario vinum album à rubro specie differt, quàm Belga ab Æthiope. Nec dictum Galeni simpliciter, inquit Vallesius, sed comparatione ad vina rufa & flava intelligo. Calent ergo etiam vina alba, sed lenius quàm rufa. Florem enim quoque suum, & spiritum calorificum habent vina alba, quo per insolationem exhausto, exanimantur quasi, & moriuntur in acetum.

Hoc denique, quod suggerit S. Thomas non neglectim prætereundum, licet ferè negligi, aut refelli à recentioribus videam.

Censet enim S. Thomas, aquam in vinum posse corrumpi, sine prævia alteratione, per solam partium, usque ad minima naturalia, divisionem. Et profectò videtur esse verum, si vera

Arist. lib. 1.  
c. 4. Phisic.

est sententia Aristotelis, & Commentatoris, ac S. Thomæ, Soti, & Thomistarum, Durandi, Ariminensis, Conimbricensium, quam Toletus dicit esse *multo probabilior*. Videlicet, minimum naturale, non tantum in viventibus, sed etiam in inanimatis homogeneis dari; quia omnis formæ substantialis ea naturalis est conditio, ut determinatam materiæ extensionem requirat, tanquam naturalem suam dispositionem, in qua actiones suas explicare & exercere valeat; ut sub extensione minori separatim existere & agere non possit. Si enim anima, ut omnes fatentur, certæ magnitudinis organa ad operationes vitales requirat, ut v. g. determinatam extensionem carnis (quæ organum homogeneum est) ut tactu calorem percipiat; non videtur ratio solida, cur etiam forma aquæ in corpore suo homogeneo non postulet certam extensionem, ut frigefacere, aut sibi similem aquam generare possit; ac per consequens, ut in tali materia subsistere valeat. Nam esse est propter operari, ut ait Philosophus.

Si autem opinio ista Aristotelis, & veterum passim Interpretum, falsa non est, jam assignare erit partem minimam aquæ, quæ seorsim ab alijs naturaliter existere possit. Vnde si hæc à vino, quod est corpus diversæ speciei, interfecetur, peribit forma aquæ in utraque parte, quia jam utraque per divisionem facta est minor minimâ. Nec poterunt duæ istæ particulæ formæ aquæ se sustinere arripiendo unionem integram cum forma vini interposita, quia nulla potest esse unio integralis inter formas tam diversæ speciei. Restat ergo, ut utraque particula materiæ aqueæ suscipiat formam proximam vini, cum unione integrali ad reliquam vini formam, ut istâ unione sustententur in rerum ratione. Nam, ut rectè Durandus, in integraliter conjunctis non datur minimum, quia continuum est divisibile in infinitum, adeoque pars in eo minima non est.

Durand. 2.  
d. 18. q. 1.

Generatur ergo ex illis particulis aquæ vinum, cum dispositionibus vini imperfectis (sicut interdum generatur aqua calida) quas vel vinum introducit, vel causa prima supplens defectum secundæ, sicut in multis alijs occasionibus facere eam oportet.



oportet. Nec Deus hunc defectum supplet, vinum maturum producendo, quale fuit illud *bonum* & excellens in hydrijs Cananæ Galilææ; sed crudum, & in infimâ dispositione necessariâ ad formam vini, quale est primum & imperfectissimum, quod à vino circumfuso produci posset, si ei sufficiens daretur tempus. 10. 2.

Cum autem magna quantitas vini modicum aquæ infusæ, fluiditate suâ undique interfecet, facile accidere potest, ut tota omnino aqua in particulas minimis naturalibus minores disseccetur, & sic omnes universim guttulæ in crudi saltem vini substantiam destruantur.

Nec hoc experientiâ Aresij solidè refellitur: qui ait, se hiberno & gelante cælo vidisse glaciei frustula natantia in vino, quæ ipse guttulas aquæ concretæ & nondum in vinum conversæ, fuisse existimat. Nam non tantum aqua, sed vinum aquaticum, imò vini meri phlegma, aut totum ipsum etiam funditus vinum, cui nihil unquam aquæ infusum fuit, magno frigore in glaciem concrevit. Vnde Anno 1468. cum Leodiū à Carolo Audace Duce Burgundiæ, & Ludovico XI. Rege Galliæ captum est, vinum Leodij in vasis glaciatum, frustatim militibus distribuebatur, ut scribit Phil. Cominæus, Carolo Duci tunc à cubiculis. Res non indigna narratu. *Vinum, inquit, viris circa Ducem honoratis ad securim distribuebatur. Nam intra amphoras & cados sic congelatum erat, ut necesse esset frustatim concidere, frustaque pileis, corbibus, & alijs id genus, non poculis excipiebantur.* Cominæ.  
c. 42. Lud. XI.

## ARTICVLVS III.

*An sanguis sit animatus.*

**P**ars Thomistarum affirmat, altera negat; quia S. Thomas tam ambigüe loquitur, quàm Aristoteles quem sequitur.

Bañes hanc litem diligenter disputavit, & cum Cajetano, Medina, alijsque fortiter sanguinis animationem defendit; additque, hanc opinionem ad eas quæstiones, quæ ad Theologiam & res fidei pertinent explicandas, esse sine dubio accommodatiorem. Nam Ban. lib. 1.  
de generat.

Silvest. in  
Rosa aurea

si sanguis humanus anima rationali sit animatus, facilius sustinetur, v.g. quomodo sanguis Christi fuerit divinitati hypostaticè unitus; quod à Clemente VI. & Pio II. definitum Silvester narrat. Deinde ratio in promptu erit, cur Christus post resurrectionem venas corporis sui resumpto sanguine repleverit, potius quàm aëre, æthere, aut alio fluido corpore. Sicut enim alias sui corporis partes resumpsit, ita etiam sanguinem: quia si anima rationali informatur, inter partes integrantes hominis censeri debet.

Nihilominus Capreolus, Sotus, Victoria, eum Scoto, Durando, ac Medicis negant sanguinem, etiam in venis, esse animatum, sed corpus esse exanime, quo per venas tanquam per tubulos & canales distributo, omnia corporis membra irrigantur & aluntur. Sanguis enim *τελευτᾷα τροφή τοῖς ζώοις τοῖς ἐνδικοῖς ἐστὶ*, *ultimum alimentum animalibus sanguineis est*, inquit Aristoteles. Alimentum autem animâ viventis tandiu adhuc caret, donec partibus viventis agglutinatum fuerit, & ultimas dispositiones ad animationem necessarias acceperit. Non ergo animatus est sanguis, antequam transeundo per rorem, cambium, & gluten, in partem viventis tandem sit transformatus.

Cajet. 3. p. q.  
5. a. & q. 54  
a. 2.

Eludit tamen hoc argumentum Cajetanus: quia sicut elementa sunt partes universi, & simul sunt materia transiens corporum mixtorum; ita sanguis potest esse pars animata corporis humani, & tamen etiam partium solidarum alimentum.

Sed comparatio ista in ipsum retorqueri potest. Nam elementa differunt formis substantialibus à corporibus mixtis in quæ transmutantur; ergo & sanguis alia forma substantiali præditus est, quàm os, aut caro in quam per nutritionem vertitur.

Deinde si sanguis animâ carnis animatus est; ergo nutritio carnis ex sanguine non est actio substantialis, sed accidentalis, qua sanguis essentialiter & in specie sua idem manens, crassescit & inspissatur in carnem. Hoc verò contra Philosophum est, & S. Thomam: falsumque erit, quod iste alicubi ait,  
*humidum*



*humidum nutrimentale esse, quod nondum pervenit ad suscipiendam perfectè naturam speciei, sed est in via ad hoc, sicut est sanguis, & alia huiusmodi.* Profectò enim, si in sanguine humano est anima rationalis, susceperit perfectè naturam speciei. Nec refert, quòd liquiditate & alijs imperfectis qualitatibus à ceteris partibus differat; nam etiam unum membrum temperie accidentali est altero ignobilius. S. Th. 1. p. q. ult. a. 1. ad 3.

Frustrà quoque Cajetanus & Bañes provocant ad alia S. Thomæ loca, & præcipuè in 4. d. 44. Nam hîc quoque contra ipsos est, si attentè legatur.

Negat enim ibi rorem, cambiũ, gluten (qui sunt tres humores per quos intermedios sanguis in partem viventis transit) fore in corporibus resurgentium, quia *sunt in ipso actu transcundi de forma in formam.* Vnde apertè supponit, tres illos humores non vivere vitâ humanâ, sed per alias suas formas transire ad formam hominis. Si autem ros, cambiũ, & gluten non vivunt; igitur nec sanguis, ex quo proximè ros conficitur. *Ros enim est humiditas*, inquit ibi S. Thomas, *in foraminibus parvarum venarum*; sanguine videlicet è majoribus venis in illa foramina delapso, & ibi decocto in rorem.

Sanguis tamen, etsi crudior, & à forma viventis remotior, quàm ros, cambiũ, gluten, resumetur in venas corporum resurgentium; quia *habet formam determinatam, secundum quam continetur inter partes corporis*, ait S. Thomas. Continetur enim venis, nec solum tanquam materia nutritionis, sed ut formâ suâ determinatâ, sicut loquitur. S. Thomas, & naturalibus suis qualitatibus membra omnia foveat, & in temperie sua naturali conservet. Non sic ros, cambiũ, & gluten, quorum formæ transitoria & viales sunt; ad hoc solum à natura factæ, ut materia sanguinis per eas ad formam viventis perveniat; sicuti ferè materia seminis, per formam embryonis ad formam perfecti animalis transit. Hinc patet, quò pacto Aristoteles & S. Thomas sanguinem interdum partibus animalis accenseant: ferè scilicet eodem sensu, quo Cajus I C. dixit, *fructus pendentes partem fundi videri*; licet specie à fundo differant, fixa in fundum radice, solâ contiguitate, non conti-

144 D. d. rei vindic.

nuitate ei cohæreant. Ita circiter, sanguis tubulis venarum tantum contiguus, per omnia membra sic discurrit, & ijs inferitur, ut quasi pars totius esse videatur; maximè cum necessarius sit ad fovendam naturalem propriarum partium temperiem: Vnde & ad corporis integritatem pertinere dicitur, non minùs, aut etiam magis, quàm crines & ungues, qui ex superfluo alimenti ad solum ornatum à natura conformantur.

Quod verò Bañes ait, sanguinem per fibras continuari cum suis venis, falsum apparet; quia universus sanguis cum fibris & pituita ceterisque humoribus quos vehit, labitur per venas, ut aqua turbida per canales. Testatur id apertè Aristoteles: *Non enim*, ait, *quæ cunctis non cunctis sanguis continuus aut concretus est carni, sed in corde ac venis, quasi in vasis continetur.* Vnde Medina etiam refellitur, qui non quidem venis, sed cordi & partibus principalibus sanguinem continuari contendit. Non enim aliter istis continuatur, quàm venis.

Quaquam hoc discontinuitatis argumento res ista non firmiter nitatur. Nam quid sit, continuum, aut discontinuum esse, satis obscurum est; & fortasse continuitate quadam fragili & fluxa (velut aqua continuatur aquæ) sanguis aliqua sui parte, hepatis, cordi, aut etiam venis non tantum contiguus, sed etiam continuus est. Videtur enim continuitatis ratio maximè à natura & conditione extremorum quæ sibi proximè applicantur, petenda esse. Fortasse autem hepar (quod ferè non est aliud, quàm sanguis quidam concretus) cor, venæ, arteriæ cum sanguine naturaliter satis consentiunt, ut proximo contactu coalescant in continuum, & extrema sint unum; velut Aristoteles nobis continuum definit. Neque refert, quòd sanguis per venas fluat; quia aqua per aquam mota, ut fluvius magno impetu in mare se evomens, & eodem aquarum filo inter aquas maris aliquamdiu fluens, non est, ut ego existimo, cum marinis aquis discontinuus, sed abrupta priori continuitate, alteram mox cum parte aquæ marinæ sequenti arripit; ita ut continuitas continuitati perpetuè succedat, quemadmodum localis præsentia, præsentia. Quis ergo scit, an tanta fortè sanguinis cum hepate, corde, venis, arterijs sit naturæ con-

Arist. lib. 2.  
c. 3. de  
partib.  
Medina 3.  
p. 9. s. 2.



congruitas, ut in momentaneo etiam eorum contractu, non solâ contiguitate, sed etiam verâ continuitate ipsis se alligetur.

Adde jam multos Philosophos existimare, non requiri inter partes mathematicam continuitatem, sed physica vincula & ligaturas; quæ solâ contiguitate continentur, sufficere. Vasq. 3. P. 45. a. 2.  
 Nam carnes & ossa, ait Vasquez, non eadem superficie mathematicè uniantur, ut constet (quanquam nesciam, unde ei tam clarè constet) nihilominus eadem formâ & animâ vivunt. Ex qua Philosophia dixit Medina: *In explicando quòd sanguis unitur reliquis partibus corporis permanentibus, non est maius negotium, quam explicare, quomodo cum ossibus partes carnis continentur.* Medin. 3. P. 9. a. 3.

Hoc tamen contra animationem sanguinis alterum est & validum argumentum. Nam semen & lac animata non sunt, & tamen ex sanguine fiunt, & perfectius cocta & elaborata sunt, quàm sanguis ipse. Igitur nec ipse animatus est. Si enim sanguis qui crudior & inelaboratior est, habeat animam, mirum esset, cur natura sanguinem in semen & lac decoquens & perficiens, animam ex materia sanguinis expelleret; ut formam aliquam inanimam & imperfectiorem induceret.

Qui autem lac, animatum esse dixerit, neminem me legisse memini. Semen verò animat Bañes cum Bartholino, Sennerto, & Philosophis Medicisque non paucis, qui animam inesse semini dicunt ad architectandum sibi corpus. Quod Libro I. rejecimus. Et sanè S. Thomas non aliud dicit, quàm *semen habere virtutem ex forma generantis, & esse in potentia ad substantiam ipsius.* Et alibi: *Virtus activa quæ est in semine ex anima generantis derivata, nec est anima, aut pars anima, nisi in virtute.* Et apertissimè Lib. 2. contra Gentes, semen animâ etiam vegetativâ exanimat. Et quidni faceret? Nam præceptor ejus Aristoteles huic ei expressè præjuebat. *Animam enim vegetativam, inquit, in seminibus haberi potentia, statuendum est, non actu.* Itaque verius est, quod Fernelius, Fienus, & doctissimi Medicorum docent, semen inanime esse: ac proinde, inanimem etiam esse sanguinem, qui in semen excoquitur. S. Th. 1. p. 3. q. ult. a. 2. q. 118. a. 1. S. Th. lib. 2. c. 89. contra Gent. Arist. lib. 2. c. 3. de gen. animal. Fernel. lib. 1. c. 7. de Abdit. Fien.

Distinctio verò sanguinis in purum, & impurum seu nutritimentalem (quasi prior animâ rationali informatus sit, non postea.

Silvest. in Rosa aurea

Medin. 1.  
2. 9.

posterior ) conficta à Silvestro , & absurda est, nec apud probatos Auctores reperitur, ait Medina; licet Silvestrum imprudenter secuti sint Cajetanus & Bañes. Nam nec Philosophi, nec Medici alium sanguinem agnoscunt quàm venosum, qui in venis, & arteriosum, qui arterijs continetur. Uterque autem est nutrimentalis, nec ratio est, cur unus potius, quàm alter animetur. Si verò sanguis caret animâ, multò magis alij humores ei permixti; ut pituita, quæ crudus est sanguis, bilis flava & atra, quæ sanguinis sunt quædam recrementa. Serum verò, sive urina longius adhuc ab animatione abesse videtur.

Trid. seff.  
13. c. 3.

Vocatur tamen sanguis interdum pars hominis ( quomodo etiam Conc. Trid. post S. Thomam & Aristotelem loquitur ) sed dilatando paulisper significationem *partis*, ut pars nominetur, quidquid ad integritatem totius aliquo modo spectat, sicut ungues etiam & crines dicuntur animalis partes. Sed sanguis potiori ratione, quia est salutaris quidam humor per omnes, non tantum venas & arterias, sed omnium ferè partium meatus & poros diffusus, ut dilabentem earum substantiam, humidumque radicale sarciat, & calorem temperiemque naturalem foveat.

Arist. lib. 2.  
c. 10. de  
partib.

Tam latè usurpat *partem* Aristoteles, ubi ait, *partes humidæ esse nutrimento siccis*; ac inter humidæ partes *sanguinem* recenset: cum tamen non multo post aperte neget, esse partem propriam animalis. *Sanguis enim*, inquit, *sensu præditus non est, quippe qui nulla pars sit animalium*. Et quid mirum, si nomen *partis* aliquando usque ad comprehendendum sanguinem ampliet, cum etiam urinam, & sedimentum alvi interdum partes animalis appellet? *Partes animalium*, inquit, *molles ac humide*, ut sanguis, sanies, adeps, sebum, medulla, semen genitale, fel, lac, pituita, sedimenta alvi atque vesica. Nemo tamen eò absurditatis veniet, spero, ut alvi & vesicæ excrementis animam inculcare velit.

Lib. 1. c. 1.  
Histor.  
anim.

Lib. 3. c. 19  
Histor.  
anim.

Nec verum est, quod Bañes Aristoteli imponit: eum expressè asserere, sanguinem esse animatum. Solum enim asserit, sanguinem unum inter humores, fervere in venis & arterijs (non autem



autem vitâ propriâ vivere ) quamdiu animal vivit. Deceptus autem est Bañes ambigüâ interpretatione Theod. Gazæ, Aristot. lib 3. c. 19. Hicor. qui vertit, *Quamdiu vita servatur, sanguis unus animatur & servet.* Non propriam animationem intelligens, sed motum quendam qui videtur esse ab intrinseco, & similis motui animatorum. Quomodo etiam argentum vivum vivere dicimus.

Cùm verò ait Scriptura, *animam carnis in sanguine esse*, non est sensus, quòd anima carnem informans, etiam sanguinem informer; sed quòd anima in carne per sanguinem foventem conservetur. Vnde alibi sanguis, anima ipsa vocatur. *Sanguis animalium pro anima est* ( Hebr. *sanguis ipse anima est* ) & idcirco non debes animam comedere cum carnibus. Quod sensu metonymico verum est; quomodo vocamus vitam nostram, id quod nobis eam conservat, aut jucundam facit. Vnde ut sensum hunc S. Hieronymus indicaret, vertit, *sanguis pro anima est*, hoc est, instar animæ; quia ad animæ in carne conservationem tam necessarius, ut sanguine omni effuso, anima illicò carnem & corpus suum deferat. Hinc apud Poëtam, *Purpuream vomit ille animam.* Et apud alium, succi, quibus tanquam sanguine, plantæ aluntur & foveantur, *Plantarum virides animæ* vocantur. Levit. 17. Deuter. 12. Mi. nil.

Propter hanc verò dependentiam vitæ nostræ, & temperamenti corporis à sanguine, ingenium quoque, & mores animæ nostræ, sanguinem sequuntur. Hinc stupidorum hominum sanguis crassius & fibrosus est, ingeniorum tenuis & subtili stamine contextus; quod etiam ad oculum, ubi in pelvi refrixit & concrevit, animadvertere licet. Arist. lib. 2. c. 2. de partib.

*Animalia enim ingeniosiora sunt*, ait Aristoteles, *quæ sanguinem habent frigidiorum & tenuiorem.* Attamen quia frigus vitæ & robori inimicum est, *optimè composita sunt*, inquit, *quæ sanguinem calidum, tenuem & sincerum habent: quippe quæ unâ & viribus corporis, & anima ingenio plurimum valeant.* Non ergo de nihilo, stuporis infamatur asinus, cuius sanguinem (inter ea quæ animal generant) crassissimum, ut hominis tenuissimum esse Aristoteles dicit. S. Aug. lib. 2. c. 6. contra Advers.

S. Augustinus alio, probabili etiam sensu illas Scripturas explicat. *Anima omnis*, inquit, *sanguis est, quomodo dictum est.*

*Petra erat Christus. Non quia hoc erat, sed quia hinc significabatur. Additq; animam invisibilem toto corpore diffusam, aptissime per sanguinem significari, quia sanguis per venas omnes ab ipso corde diffusus, in nostro corpore plus ceteris humoribus principatur; ita ut ubicumque fuerit vulnus inflictum, non humor alius, quam ipse procedat.*

Medin. 3.  
p. 9. s. a. 2.

Nec tamen, quia sanguis inanimatus est, idcirco non est in Christi corpore à verbo hypostaticè assumptus. Verbum enim non tantum animatas anima rationali partes (quod Medinam fefellit) sed etiam quæcumque ad humani corporis integritatem spectant, etsi anima careant, ut sanguinem, crines, ungues &c. in divinum suum suppositum arripuit, ut Thomistæ quidam alij, & ex recentioribus Suarez, plurimique docent.

#### ARTICULUS IV.

*De triplici spiritu, qui ex sanguine gignitur.*

**T**riplicem spiritum è sanguine gigni tradunt peritissimi Medicorum: naturalem, vitalem, animale. Primus in hepate, alter in corde, tertius in cerebro generatur. Hos vocant *influentes*, ut distinguant à spiritu *insito*, qui unicuique parti viventis insitus insertusque est, tanquam subtilissima pars humidi radicalis, ipsum depascens & paulatim desiccans, velut flamma oleum.

Spiritus naturalis fit in hepate & venis, estque tenuior pars & velut exhalatio quædam sanguinis, *νεφελώδης* tamen & *nebulosa*, inquit Galenus; crassior quippe pigriorque, quam vitalis & animalis spiritus. Hòc spiritu naturali tanquam vehiculo adjuvatur sanguis, ut promptius per venarum canales meet & discurrat. Deinde ipse in humidi radicalis partium viventis, & in spiritus insiti alimentum cedit; veluti crassioribus partibus sanguinis aluntur crassiores partes corporis.

Spiritus vitalis formatur in sinistro cordis sinu, ex spiritu naturali & puriore parte sanguinis, quam hepar in dextrum cordis sinum effundit; ut ibi antè præparatus, in sinistram si-

num



num transsudet, tanquam in fornacem totius corporis fermentissimam, ubi spiritus vitales & sanguis arteriosus perficiuntur. Deinde uterque in magnam arteriam, quæ aorta vocatur, simul effunduntur, ac inde per varios angustiorum arteriarum tubos, in universum corpus derivantur. Vnaquæque verò arteria suam ferè comitatur venam, & ei se supponit, ut spiritus sui vitalis calore sanguinem qui est in venis percoquat; quia hic crudior est, & multum pituitæ permixtum habet. Denique ad singula corporis membra appellantur arteriæ sic conjugatæ venis, ut alimenti commeatum invehant, & humidum radicale ac spiritum insitum, perpetuò exhalantem recreent. Quòd præcipuè facit spiritus vitalis arteriarum, quia fervidior & actuosior est, quàm spiritus naturalis, qui eodem per venarum canales appellit. Vnde merito cor rex viscerum, sol microcosmi, & focus animalis appellatur.

Spiritus naturalis pulsum nullum in venis habet; pulsat verò in arterijs spiritus vitalis, per cordis diastolen & systolen (id est dilatationem, & compressionem) & hocce reciprocationis motu calorem partium, exsufflatis fuliginibus, eventilat, ac aërem recentem in arterias, per tenuissimos curis meatus attrahit. In tantum ab hoc arteriarum pulsu S. Th. q. 3. a. 10. de potent. humani corporis temperiem pendere S. Thomas existimat, ut ne quidem in corporibus Beatorum cessaturum credat.

Pars autem spiritus vitalis à corde per arterias carotides, si-ve soporales, ad officinam cerebri scandit, ubi in spiritum animale, *longè clarissimum tenuissimumq;*, ait noster Vesalius, Vesal. lib. 7. cap. 1. de Fabr. ad divinas principis animæ operationes elaboratur. Nec tamen solus spiritus vitalis est materia spiritus animalis, sed etiam (omnium ferè Medicorum sententiâ) aër qui per nares primoribus cerebri ventriculis inspiratur, spiritui vitali mixtus & temperatus, in spiritum animale transformatur. Vocatur autem animalis, non quasi animæ pars sit, inquit Galenus (contra veterem & rudem Philosophiam, quam renovare nuper infeliciter Campanella est conatus) sed quia primum animæ ad operationes animales est instrumentum. Idem

autem spiritus animalis omnibus sensibus famulatur; ut idem malleus, inquit Aristoteles, ad varias operationes fabriles servit.

Antequam verò spiritus vitalis ad cellulas cerebri, ubi spiritus animalis officina est, perveniat, in quibusdam labyrinthicis plexibus, sive arteriolarum inter se complexarum rebus, quæ choroides vocantur, præparatur; eo modo, quo venæ mesaraicæ, sive lacteæ præparant sanguis materiam, antequam hepati infundatur; & sicut dexter cordis sinus sanguinem ad spiritum vitalem sinistri sinus præcoquit. Sic quoque materia lactis, & seminis ad destinata à natura vasa non pervenit, nisi cruditatis aliquam partem in plexibus quibusdam, quæ in principalium officinarum viciniam & quasi suburbii sunt, exuerint. Solet enim natura non subito, & veluti per saltum opera sua perficere, sed molliter & pedetentim, per medias præparationes ad perfectionis finem perducere.

Cellulæ autem, seu ventriculi, cerebri sunt propriæ officinæ (quæ ideo ἐργαστήρια vocantur) in quibus spiritus animales ultimam formam accipiunt. Differt enim specie hic spiritus à spiritu vitali, sicut chymus à chylo, ut rectè contra Argenterium Laurentius; quod ex utriusque longè diversis accidentibus & operationibus etiam colligi potest. Spiritus enim animalis est tenuis, subtilis, lucidus, purus, & mobilis, inquit idem, magisque temperatus quam spiritus vitalis; qui fervidior ex ardenti cordis officina prodit.

In cerebri autem substantia est temperamentum elementorum ad justitiam, ut credit Vesalius, ideoque maxime idonea ibi officina ad spiritum vitalem temperandum, & transformandum in animale; quidquid resistat Io. Argenterius, Medicus nimis subtilis, & Galeni nimis ex professo hostis.

Porro ventriculi cerebri quatuor sunt, licet S. Augustinus tres solum recenseat, secutus Medicos sui ævi, qui binos priores pro unico habebant. Hi enim duo priores, qui ab alijs superiores vocantur, ad dextram & sinistram collateraliter, ut gemelli locati sunt. Figura verò eorum non rotunda, sed instar humanæ auris, aut lunæ falcatæ, semicircularis.

Duo

Andr. Laurent.  
lib. 10.  
9. 7. Anat.

Vesal. lib. 7  
c. 1. de  
fabrica

S. August.  
lib. 7. c. 16.  
de genef.



Duo isti in tertium, seu medium sinum confluunt, tantum ferè ab occipite, quantum ab osse frontis distantem. Tertius ulterius in quantum desinit, qui cerebello & spinali medullæ communis est, ideoque ad occiput, & omnium postremus est.

Primi duo sunt omnium capacissimi, ultimus omnium angustissimus: etsi Fernelius hunc ampliorem sinu medio esse dicat.

Spiritus animales utcumque in plexibus labyrinthæ præparati, in priores sinus effunduntur; & postquam hîc laborati, in tertio sinu magis perficiuntur, ac denique in quarto perfectè elaborantur; ut inde in nervos, & in totum cerebri corpus diffundantur. *Stabulatur enim spiritus animalis*, ait Laurentius, *non modò in ventriculis, sed etiam in poris & tota substantia cerebri medullari; ut secundum poros pertineat ad principem facultatem (imaginatricem, intellectui ancillantem) secundum ventres, ad sensum & motum.* Duo quippe sunt, juxta Medicos, præcipua officia animalis spiritus, qui ventriculis cerebri continetur. Primum, ut vim sentiendi ad organa sensuum deferat, & sensibilibus species, à sensibus externis perceptas in cerebrum tanquam judicem & censorem referat, ibique imagines illas conservet. Nam species sensibiles inherere spiritui animali; satis convincitur ex vertigine, qua pueri per luserum se circumagunt, ut quidquid vident in orbem volvi appareat. Cujus ratio nulla, nisi quia species visibiles objectorum incurrunt in spiritus animales in orbem raptos, à quibus portantur pariter & rotantur. Alterum officium est, per nervos motorios deferre vim motricem ad partes, quæ insitam eam non habent, ut Lib. III. explicatius dicendum est.

Ceterum Vesalius negat ventriculos cerebri ullâ membrana succingi, refellitque Galenum, qui tres priores ventriculos tenui meninge obduci & lacunari existimat, ut hac membrana partes cerebri sustententur, ne in se concidant; cum cerebri substantia videatur esse nimis mollis & fluxa, ut seipsâ possit, ne in ventriculos illos confluat, sustentari.

Quin etiam, addit Vesalius, præter id quod ventriculi membranis neuntiquam succinguntur, illæ obstaculo essent, quo minus cerebri

*Substantia materiam suis ventriculis oblatam, in animales spiritus, interstitio quodam præpedita, emutaret. Quæ tamen ratio mihi non placet; quia actio cerebri per tenuissimam & ferè superficialem membranam, ut lumen per vitrum, facillimè trajici potest. Deinde, quid si illa membrana interposita eandem cum cerebro virtutem ad transmutationem spirituum animalium obtineat? Et sanè interiorem ventriculorum superficiem tenui membranâ succinctam negare, contra sensum esse, clamat Thomas Eraustus; quam sibi manifestè ostensam in capite bovino, & humano, à nobili Chirurgo, & Doct. Anatomico Ant. Franc. Pigafettâ Vincentino ait. Cui & Clarissimi Plempij nostri autopsia consentit.*

Non dubitant verò Medici, primum horum ventriculorum usum, esse spirituum animalium fabricationem; alioqui frustra essent conditi quatuor, ait Laurentius. Constatque inter omnes, inquit, *partes illas esse cerebri nobilissimas, cum ex eorum compressione & vulnere præcipitem mortem inferri quotidie observemus*: ita ut divino propemodum miraculo tribuat Galenus sanitatem juvenis cujusdam Smirnæi, qui altero ex binis anterioribus ventriculis sauciato, superstes fuit: *qui nec temporis quidem momento, inquit, vivere potuisset, si utrumque simul vulnus violasset*. In ijs enim quæ à natura geminantur, minori periculo alterum offenditur, quàm utrumque simul. Ambo enim simul, ait Galenus, perinde se habent, atque si unicum à natura factum esset.

Hoc verò admiratione & meditatione dignum mihi videtur. Quòd Medici recentiores per Anatomiam cerebri exactiorem deprehenderint (secus, quàm existimavit Galenus) omnes nervos, non solum motorios, sed etiam sensorios, ab ea spinalis medullæ parte, quæ intra cranium conditur, propaginem ducere. *Quod qui non videt*, ait confidenter Plempius noster, *Tiresiâ est cecior*. Ingenti sanè argumento, quòd quartus & postremus cerebri ventriculus (quo spinalis medullæ illa pars excavatur) sit ultima & absolutissima spirituum animalium officina; ex qua illi extremam limam & perfectionem adepti, per sensorios nervos ibi paratos, in organa sensuum effundantur.

ART I.



## ARTICVLVS V.

## De lacte &amp; semine.

**P**Ars quoque sanguinis aliquam in lac feminae, & altera in maris feminaeque semen excoquitur. Sicut enim natura foetum in utero purissimo matris sanguine per umbilicum nutrit; ita tertio, aut quarto à conceptu mense sanguinem ad mammas ducere incipit, ut lacteus & dulcissimus cibus exituro in lucem foetui præparetur. Vnde non ineptè Ægypti sacerdotes *lac, sanguinem mutato colore* appellabant, ideoque ab eo, ut à sanguine abstinebant; uti & ab ovis, quia *carnes liquidas* esse dicebant.

S. Hieronij  
lib. 2. c. 9.  
advers.  
Iovin.

Vt autem mammae lac in dulcedinem excoquere, & perfectè dealbare valeant, per varios venarum & arteriarum labyrinthos sanguis circumducitur & in ijs præparatur, antequam mamas intret; à quarum substantia glandulosa & fungosa absorbetur, & ibi in lac percoquitur. Substantia enim mamarum ex myriadibus venularum & arteriolarum contexta est, quæ sanguinem & spiritus vitales sorbent, velut spongia aquam, alterantque, ut hepatis venulae chylum. Vnde quemadmodum hepar sanguine suo, ita mamillae lacte, uti & vasa spermatica semine aluntur. Argumento satis evidenti, quòd sicut hepar imaginem & temperiem sanguinis duriusculè concreti obtinet; ita mamarum glandulae coagulati lactis, & vasa spermatica concreti seminis quandam speciem habent.

Nec ex alia materia, quàm sanguinis oportet lac Virgineum quo Christus parvulus nutritus est, quasi cælitus creatum imaginari; licet Ecclesia in Vigilia Epiphaniae de eo canat, *Ipsum Regem Angelorum sola Virgo lactabat ubere de cato pleno*. Cælum enim non aliter ubera Virginea implevit, quàm quia, ut Ecclesia ibidem accinit, *nesciens mater Virgo virum, peperit*. Nam ad prius miraculum, quo sine semine virili filium concepit, connaturaliter ubera ejus impleta sunt, ut ceteris prægnantibus; sanguine nempe ex uteri venis sursum naturaliter regurgit.

regurgitante, & regionem māmillarum petente, ut post Hippocratem Medici docent.

Agell.

lib. 12. .c. 1.

Ceterum, veluti ad ingenium & totam pueri indolem, plurimum refert, quo semine & sanguine primum coaguletur, & quali deinde sanguine in utero matris alatur; ita quali lacte extra uterum nutricetur. *Non enim frustra creditum est, ut egregie Favorinus Philosophus disserit apud Agellium, sicut valet ad fingendas animi atque corporis similitudines vis & natura seminis; non secus ad eandem rem, lactis quoque ingenia & proprietates valere.* Vnde totis eloquentiæ viribus persuadere conatur, ut nobilis & Senatorij ordinis puerpera filiolum suum proprio nutriat lacte. *Quod est enim hoc contra naturam, inquit, imperfectum atque dimidiatum matris genus; peperisse, & statim ab se abieciisse? Quæ, malum, ratio est, nobilitatem istam nati modò hominis, corpus & animum ingentis benignè primordijs inchoatum, insitivo degenerique alimento lactis alieni corrumpere? Id herclè ipsum est, inquit, quod sæpenumero miramur, quosdam pudicarum mulierum liberos, parentum suorum neque corporibus neque animis similes existere.* Hunc quoque nobilium feminarum nutricandi liberos alieno lacte morem SS. Patres, & præsertim Chrysostomus, vehementer incessunt.

Semen quoque non ex omnibus partibus corporis decidi, ut olim rudi adhuc Anatomia, existimavit Hippocrates, sed materiam ejus per venas & arterias spermaticas sanguinem è vena cava, spiritum vitalem ex arteria magna (quam Aristoteles, fortè quia Macedones *vaginam* aptè vocant, ait Venæ alius, aortam vocat) deorsum ad vasa spermatica attrahi, & ibi tanquam in propriâ & geminâ officinâ, in semen perfectè excoqui, communis & certa jam Medicorum sententia est. Vnde materia seminis duplex est, sanguis, & spiritus vitalis. Qui licet ex diversis fontibus hauriantur, in fine tamen fermè viæ. in unum canalem conflunt; ut permixti, & in *parastatis varicosis*, id est, labyrintho quodam mirabili varicum instar variè sinuato & implicito, præparati, in officinam testium descendant, ubi in semen percoquuntur.

Hinc quia semen fit ex sanguine, qui eodem semine nati,  
confan-



confanguinei vocantur, ut nobilis Medicus, Soranus olim dicere solitus est.

Vasa autem spermatica ( testes enim suo nomine appellare, tanquam peccato originali dehonestatos, veremur Theologi, ideoque vasa cum Plauto vocare malimus: etsi origo vocabuli *testium* non inhonesta, quia *μαρτυρες τῆς ἀπὸ πύθνης τῶν ἀπὸ πύθνης τῶν ἀπὸ πύθνης τῶν ἀπὸ πύθνης* ) sanguinem per venas, & spiritum vitalem per arterias trahunt; primariò ut nutriantur, deinde ut quod superfluit nutritioni, temperie quadam illarum partium illi impressâ, in semen & speciei propagationem cedat: eo modo, quo hepar chylum ad se rapit, ut sanguinem quo nutriatur inde conficiat; & quia plus conficit, quàm indigeat, superfluum in venam cavam, ut inde totum corpus irrigetur & alatur, erivat. Hòc tantùm discrimine, quòd vasa spermatica reliquum illud seminis, quod eorum nutritioni superabundat, non conferant in reliquarum partium individui alimentum, sed in speciei propagationem. Vocatur ergo semen superfluum alimenti, non quomodo excrementa alvi, quæ alendo corpori prorsus sunt inidonea; sed *tanquam excessus quantitatis alimenti, sive tanquam pars alimenti non necessaria ad alendum*, ut optime Aristotelem & S. Thomam explicat Cajetanus. Sed brevius adhuc Gerson: *Semen, ait, est superfluum ultima digestionis, superfluum non qualitate, sed quantitate.*

Cajet. r. p.  
q. ult. ault.  
Gerson.  
Tract. de  
pollut.

Nec enim folius alimenti vasorum spermaticorum semen est superfluitas, sed quodammodo etiam alimenti totius corporis. Non quòd singulæ corporis partes sanguinem à se alteratum, & ideà quadam sui ei impressâ insignitum, ad vasa spermatica mittant, ut quidam existimant; sed quia sanguis primariò alendis membris sui corporis dicatus est, conficiendo autem, ad propagandam speciem, semini tantùm secundariò; adeò ut sanguis in semen eam sui partem conferre censeatur, quàm membra respuunt, aut ex vena cava, tanquam sibi superfluum non trahunt. Hinc in pueris semen nullum, inquit Aristoteles, quia toto suo sanguine ad incrementum corporis indigent. Similis ratio, cur pingues, qui totum partem sanguinis fontem in arvinam, adipem, & molem corporis

Arist. lib. r.  
c. 18. de  
gen. anim.

Argent.  
Com. 3. in  
Artem.  
Gal.

absumunt, minus seminis & fecunditatis habeant. Qui autem Veneri nimium indulgent, attracto nimis sæpe & avidè in vasa spermatica sanguine ceteris partibus alendis necessario, macrescunt, & corporis totius valetudinem gravissimè lædunt. Nam *ex spirituum & puri sanguinis consumptione*, inquit post Galenum Argenterius, *vires debilitari oportet, corpus minui, & veluti tabescere, cruditatibus abundare, sensus omnes, rationem, & alia omnia animi officia perperam exerceri.* Sed cerebrum, artus, stomachum, nervos, & ceteras partes frigidas Venere præcipuè, ait, *affendi; quia spiritalis substantia cum calido innato dissolvitur, quam dissolutionem difficilius ferunt partes frigide.*

Hoc quoque noxam aggravat, quòd vasa spermatica, maximè pinguem, oleosam, & aëream sanguinis portionem ad se adtrecent, & utilissimo ad humidi radicalis reparationem alimento ceteras partes destituant. Vt non de nihilo dixerit Avicenna, *Quadragesies plus dissolvere seminis, quam sanguinis vacuationem.* Quid jam de lue Venerea, & tot morborum generibus, quæ ex Venere nascuntur, quid de ira numinis, bellis & flagellis, quibus Deus Principes aliquando suis regnīs & fortunis exiit, quæ tamen omnia mala, præter æterna quæ postea manent, humanæ libidinis insaniam refrenare non possunt. Tanta est concupiscentiæ istius & tam præceps effrenitas, postquam iustitiâ originali exutus homo, habenas quibus continebatur amisit.

Andr. Laurent. lib. 3.  
94. Anat.

Quod autem Laurentius addit, spiritum qui sanguini permixtus seminis materiam absolvit, *ab omni corpore ad testes influere, & singularum partium ideam, ac vim earum formatricem deferre*, satis non possum capere. Nam nonne ipse cum Vesalio & alijs Medicis fatetur arteriam spermaticam, quæ spiritum ad vasa illa spermatica defert, inseri aortæ, & spiritum, quem generando semini confert, inde sugere? An igitur spiritus illi aërei, tenuissimi, & per universum corpus oberrantes, ut ait, ad aortam ex omnibus partibus redeunt, ut inde ab arteria spermatica possint exsugī? Certè nec ego, nec alij mecum, opinor, credent. Quibus enim vijs spiritus isti ad aortam redeunt?

Ceterum admirabilem vasis spermaticis, ad universum corpus



corpus alterandum, vim inesse constat. Nam virile illud & masculinum temperamehtum ab eorum *επιρροή* influxu & irradiatione, ut Medici loquuntur, pendet. Quippe calorem & robur ex propria facultate obtinent, inquit Fernelius, *hasq; vires in omne corpus effundunt; quemadmodum cerebrum nervis tum sentiendi tum movendi vim, cor arterijs pulsandi facultatem impertit.* Vnde non pauci ad cerebrum, cor, hepar ( tres principales corporis partes ) quartam hæc vasa spermatica adiiciunt. Illis enim præsentibus, ait Argenterius, corpus calidius & siccius evadit: illis vero exectis, degenerant mares à sua natura, & temperiem atque molliem mulierum induunt. Imò Galenus ausus est vasa illa cordi quodammodo in principatu præferre: quia cor, inquit, tantum vivendi, testes verò bene vivendi principium sunt. Quanto autem melius est, bene vivere, quàm simpliciter & solum vivere; tanto in animalibus testes corde sunt præstantiores.

Fernel.  
lib. 7. c. 3.  
de homin.  
procreat.

Galen.  
lib. 1. de  
femine.

Hinc spadones olim, militiâ, ut effeminati arcebantur: dubitatumque est, an qui altero tantum careret, jure militaret. Sed tales non rejici Traiani rescripto affirmatum est, inquit Arrius: Nam & duces Sylla & Cotta memorantur eo habitu fuisse natura.

1. Qui enim  
D. de re  
milit.

Sed etiam eunuchis utroque orbis minimè quandoque animi emasculantur, ut Narseti illi Gothorum terrori & victori sub Imp. Iustiniano. Verùm Persa erat, apud quos olim spadones tam masculo animo, ut mererentur etiam regnare.

Quantum tamen temperies eorum à virili demutet, ex discrimine carniū inter gallos & capones, inter arietes & verveces, inter hircos & capros, inter verres & maiales, inter tauros & boves castratos æstimare licet. Nam castratorum animalium carnes quadam dulcedine gustum movent, inquit Fernelius; quæ verò à non castratis acceptæ, odore & sapore testiculos referunt, evomuntque grave quoddam virus acerbitalis suæ.

**P**ostquam per chylosin & chymosin cibus & potus in sanguinem mutati, & per venarum traduces canalesque in omnia membra corporis dispersi sunt, singulæ partes vi quadam attractiva, ex maioribus venis per minores aliquid sibi maximè utile & familiare rapiunt; poros suos inde implent, & calore naturali, ac tota temperie sua, tertiam concoctionem, quæ ultima est, inchoant. Ac primùm materiam sanguineam, mutatâ temperie & colore, in humorem decoquunt, quem Medici, ex similitudine rorem vocant. Deinde rorem in gluten, tenacitate quadam jam parti viventis adhærens; & gluten in cambium densant; & è cambio tandem partem vivam, inductâ in materiam cambij animâ, efficiunt. Ante tamen animationem, tempore, aut naturâ continuitas, seu unio integralis cum parte viventis præcedere debet; quia anima partis discontinuum alimentum animare non potest, ut Cardanum monet Scaliger. Quidam tamen Medici cambium ante gluten ponunt, & gluten in partem viventis immediatè facessere dicunt.

Scal. Exerc.  
1. 1. §. 16.

Ad hanc distributionem & naturæ œconomiam alludit [1. Cor. 2.] eleganter Apostolus, ubi ait, omnes Christianos, qui *in uno spiritu* (per unum spiritum) *in unum corpus*, Christi mysticum, baptizati sunt, & gratiâ Spiritus sancti, quasi communi animâ, in primâ hac per baptismû generatione, quasi membra ejusdem corporis, inter se coagulati sunt; eodem deinde divino Eucharistiæ cibo ali ac *in uno spiritu* (Græcus *in unum spiritum*) potari, ut spiritualiter nutriantur ac crescant. Nam veluti omnia membra liquidum alimentum è venis fugunt & potant; ita omnes fideles, membra ejusdem Ecclesiæ quæ est corpus mysticum Christi, idem alimentum Eucharisticum, quasi è Christi venis hauriunt: hóc solum discrimine, quòd membra corporis naturalis alimentum suum in corpus, membra verò corporis Christi in spiritum, seu spirituale gratiæ incrementum convertant. Non solum autem sanguis qui in venis est, sed san-



sed sanguis quoque cum spiritu suo vitali cedit in corporis alimentum. Nam humidum radicale singularum partium, sanguine maximè arterioso ali, & spiritus insiti, qui calore suo humidum radicale, ut flamma oleum, depascunt, spiritu vitali maximè reparari debent.

## ARTICVLVS I.

*Quid nutritio. Quid accretio.*

**N**utritio est omnium concoctionū quas natura in ventriculo, hepate, corde & unaquaq; parte viventis molitur, finis. Definatur enim mutatio alimenti in substantiā viventis facta ab anima vegetativa, virtute caloris naturalis, ut fiat reparatio partium quæ absumi coeperant. Transít enim hac mutatione materia alimenti à privatione formæ viventis, & etiam à forma cambij, sive ultimi alimenti, ad animā viventis, sive ea anima solū sit vegetativa, ut in plantis, sive sensitiva simul, ut in brutis, sive vegetativa, sensitiva, & rationalis simul, ut in hominibus. Causa ejus principalis est anima vegetativa partis, quæ alimentū in se convertit. Falli autem videntur, qui animam in nutritione & concoctionibus prodromis otari putant, & totum coquendi & mutandi negotium relinqui calori naturali & temperamento partium viventis. Nam si anima otatur, concoctio & nutritio non erunt actus vitales, cum physicè non egrediantur à vita prima. Deinde temperies quæ manet in ossē, aut carne mortuā, nunquam similem temperiem sanguini sibi appposito imprimet; velut securis sine manu artificis nunquam scamnum fabricabit. Nam licet calor naturalis, si in cadavere maneret, alterare materiam ad similem calorem posset, sicut calor in aqua alium producit; tamen siccitas v. g. ossis, quæ qualitas est vix activa, ab anima elevari & adjuvari debet, ut sanguinem in partem ossis exsiccet. Quod evidentius est, quando ossa, seu ossium prima & mollia lineamenta, in foetu adhuc tenero, aluntur in ventre matris. Nam siccitas eorum minima & ferè nulla, vix ullius activitatis inter tot humectantia, esse potest, nisi anima eam ad siccandum.

candum alimentum adjuvet. Denique sicut in attrahendo, retinendo, circumponendo, & figurando alimento secundum figuram & compositionem partis alendæ, necessaria est actio animæ, quæ omnia ista principaliter efficiat; ita etiam nulla ratio est, cur in ipsa coctura & alteratione alimenti, animæ operatio non interveniat. Cujus rei indicium etiam est, quod, ut multis placet, inter quasdam operationes vegetativas, & sensitivas sit talis sympathia, ut una alteram sistat, aut retardet. Hoc enim ideo existimatur accidere, quia ab eadem anima physicè dependent, quæ pluribus simul intenta, non potest integras vires præbere singulis.

Vnde non omnino allubescit, quod alicubi Suarez ait, alterationes illas alimenti non pendere ab anima, sed à *solis* *qualitatibus*. Magis quod quidam Medicus: *Calor elementaris*, inquit, *dum forma elementari subservit, calefacit tantum, attenuat, rarefacit, homogenea cogit; sed dum nobiliori forma, anima scilicet* *mancipatur, nobiliores effectus promit: illius enim ministerio arbuta gemmas trudent &c.*

Suar. lib. 2.  
c. 18. de  
Orat. n. 7.  
And. Laur.  
lib. 1.  
c. 9. de  
strum.

Certius tamen est, animam ad ultimam mutationem, quæ est nutritio, concurrere, quàm ad prævias illas alimenti alterationes: quia illa est actio substantialis, quæ à substantia animæ, non ab accidentali temperie membri viventis principaliter produci potest.

Causa tamen instrumentalis quâ anima utitur in conversione alimenti est calor naturalis. Vnde à Græcis *ζῆν vivere*, inquit Plutarchus, formatum est à *ζῆν fervere*. Non quod solo calore utatur anima in vitæ vegetativæ operationibus, sed quia inter qualitates primas calor maximè actuosus, & primum instrumentum est; quo anima alimentum calefacit, rarefacit, ea quæ sunt ejusdem generis, ab ijs quæ sunt diversi separat, ut carni, ossibus, nervis, & unicuique parti corporis conveniens alimentum præparetur; ut frigus, siccitas, & humiditas cujusque partis facilius suas qualitates alimento sibi cognato imprimat, & illud assimilet. Nam aliàs calor naturalis non est unicum animæ vegetativæ instrumentum, sed ipsa in assimilando alimento, toto temperamento suo uti debet. Nec



bet. Nec enim calor naturalis potest servire animæ ad efficiendum frigus, & ceteras qualitates primas à calore diversas, quæ requiruntur ad temperiem qua alimentum, assimilari debet parti viventis antequam in substantiam ejus mutetur. Vnde Aristoteles carnem animalis non calore, sed frigore potius concrefcere docet; hõc argumento, quòd vi ignis resolvi & liquefcere potest.

Itaque non solum calorem illum actuosum, sed frigus, humiditatem, siccitatem, pigras & in vnam temperiem fractas & alligatas qualitates anima arripit, elevatque ut coëfficiant (quod per se solæ nunquam potuissent) similem temperiem in materia alimenti. Hoc enim admirabile naturæ opus alia probabiliori ratione vix puto posse explicari.

Nec verum existimo, quod Medici quidam fingunt, calorem naturalem animantium, naturæ cælestis, non elementaris esse, ideoque animam mirabiliora per eum solum, sine alio instrumento, opera posse operari. Magis enim assentior S. Thomæ, qui calorem istum igneum & elementarem appellat, aitque *generationem carnis & determinationem augmenti, & alia huiusmodi esse ab anima vegetativa, qua utitur calore igneo, sicut instrumento.* Vnde difficile est intellectu quod alicubi Scotus: *In mixto animato, inquit, est calor alius quàm in igne, licet sint in aliquo similes. Calor enim ignis alterat ad ignem, & ille alius alterat ad carnem, non ad ignem. Vnde qualitas mixti est perfectior, quàm qualitas elementi.* Non enim existimo illum esse perfectioris, aut aliùs speciei, sed in mixto animato subordinari perfectiori agenti principali, quæ est anima; ideoque ad perfectiores effectus elevari, quàm calorem ejusdem speciei & perfectionis in igne elementari.

Nimis autē simplices fuerunt illi Theologi, qui nihil alimenti in substantiā viventis converti existimaverunt, decepti falsâ interpretatiunculâ verborum Christi, *Omne quod in os intrat, in ventrem vadit, & in secessum emittitur.* Quasi nihil ingesti per os alimenti, corpori in transitu adhærescat, sed universū per patentes meatus foras transcoletur. Cum potius verus sensus sit, quòd de quolibet cibo aliquid impurum per secessum emittatur, inquit S. Thomas.

S. Th. I. p.  
q. ult. a. 1

S. Aug.  
c. 40. de  
vera relig.

S. Thomas. Nam aliàs alimenta in corpore nostro *corrupta, id est, amittentia formam suam*, ait eleganter S. Augustinus, *in membrorum istorum fabricam migrant, & corrupta reficiunt, in aliam formam per convenientiam transseuntia.*

Nec tantùm subtilissimi quidam alimenti spiritus, qui nulum cetero alimento pondus addunt, vertuntur in substantiam viventis, ut contendunt Chymici; sed succi etiam crassiores & ponderosi. Nec magis ipsis credo afferentibus pondus excrementorum alvi æquale esse ponderi totius alimenti in ventriculum injecti; quàm cineres æquiponderare lignis ex quibus fuerunt resoluti. Non enim de nullâ materiâ membra animalium sic grandescunt & dilatantur, nec de nihilo tot crines, cornua, ungulæ, ungues, versus superficiem corporis extruduntur. Nec unus ille spiritus Chymicus sufficit, aut satis idoneus est, ut in tot partes solidas crassescat & condensetur. Videtur tamen interdum excrementorum pondus æquare ingestum alimentum; quia collectitiæ quædam & vetustiores corporis cloacæ, cum hesterno cibo fortè egeruntur; sicut non rarò, plus reddi per lotium apparet, quàm liquidi haustum est; quia veteris aquæ lacunæ, aut partium humentium colliquationes se miscent, ac urinæ torrentem inflant & augent.

Naz. Orat.  
37.

Causa verò finalis nutritionis, est reparatio ruinarum corporis, quod per contrariorum intus & foris ipsum oppugnantium actiones continuò resolvitur & diffluit. Nunquam enim corpus nostrum in eodem statu permanet, sed instar aquæ dilabimur, *ἀεὶ πρὸς ἑλὲς τε καὶ μεταπίπτοντες* *semper fluentes & decedentes*, ait Nazianzenus. Verissimè enim, etsi cum aliorum risu, dixit olim Heraclitus: Equum qui ad aquandum egreditur, non eundem ad stabulum reverti. Per cutem enim corporis, innumeris poris instar cribri perforatam, cum sudore & alijs excrementis, partes quoque viventis antea animatæ resolvuntur, & in auras perpetuò diu noctuque expirant. Ne igitur animal brevi tempore totum erogetur & diffluat, in locum decedentium partium aliæ per nutritionem continuò reponuntur, Nec id ut casustulit, sine arte & ingenio, sed

tanto



tanto naturæ artificio, ut nec veterum partium decessu, nec accessu novarum, figura & proportio membrorum ullatenus violetur. Loquor de ijs quæ fiunt ut plurimum & secundum naturam, non de tophis & fungis, alijsque ebullientibus præter naturam, à quibus figuræ & proportionibus membrorum interdum denormantur.

Quia verò inter partes animalis, nullæ fugaciores quam spiritus insiti, qui calore, & levitate sua facillimè dilabuntur, & partes solidas calore destituunt; ideo spiritus naturalis sanguini venoso, & præcipuè spiritus vitalis sanguini arterioso additi sunt, ut novo semper comœatu, per venarum & arteriarum canales, spiritus insitos & humidum radicale (quod isti depascunt velut flamma oleum) suppleant & recreent.

Ceterum, si plures partes alimenti accedant & à vivente animentur, quàm interea partes animatæ exanimentur & recedant, vivens dicitur accrescere: si contrà, plures à vivente recedant, dicitur decrescere: si pari numero accedant & decedant, manet quasi in æquilibrio, sine profectu aut defectu.

Hinc patet, verum esse quod ait Aristoteles, διαφέρει τροφή καὶ αὐξησις τῷ λόγῳ *nutritionem & accretionem differre ratione,* Arist. lib. r. c. 5. de generat. videlicet solâ. Nam eâdem mutatione, quâ proximè itur à privatione animæ viventis ad ipsam animam in materia alimenti, itur remotè à minori quantitate viventis ad majorem, si interea viventi aut nihil materiæ suæ & quantitatis defluat, aut minus, quàm per nutritionem accedat. In accretione enim quantitas nova nō producitur, sed vetus alimenti quantitas cum suo subjecto, ab anima viventis occupatur. Hac quippe solâ mutatione fit, ut tota quantitas quæ viventi in termino mutationis ad quem inest, sit major quàm quantitas prior, quæ eidem viventi inerat sub termino a quo mutationis, & quæ simul in vivente manet cum quantitate alimenti quæ per nutritionem accessit, ut optimè hanc rem explicat Val. Franc. Val. lib. 2. c. 20. controuv.

Hinc sequitur, animam iisdem instrumentis uti in accretione perficienda, quibus in nutritione utitur.

Vnde accretio definiri solet, mutatio facta ab anima vegetativa, virtute caloris naturalis, qua corpus animatum secundum omnes suas partes sanas & illæsas, servatâ proportionem, majorem quantitatem acquirit. Quæ definitio est nutritionis universalis omnium membrorum viventis. Proportio autem ista hoc exigit, ut majora membra tanto majorem partem alimenti ad se rapiant & convertant, quanto eorum moles molem aliorum superare debet. Finis enim accretionis est commoda & debita uniuscujusque membri magnitudo, quam anima ad naturalem suam in unoquoque functionem administrandam exigit. Vnde hoc eodem fine exquisitissimam alimenti portionem ad partes nobiliores, magis rudem & inelaboratam ad ignobiliores transmittit: *optimum patrem familias imitata*, ut egregie Aristoteles, *qui optimum cibum liberis, vilissimum servis distribuit.*

## ARTICULVS II.

*Qua proportionem partes corporis humani accrescant.*

**E**X hac quoque membrorum proportionem resultat harmonica quædam totius corporis symmetria, quæ vocatur pulchritudo. Proportionem verò membrorum, si errore aliquo naturæ vitiata non est, hanc nobis describit Vitruvius.

Vitru.  
lib. 3. c. 1.

Hominis mediocris proceritas sex pedes habet; & ei circiter æqualis est extensio, quæ inter summos manuum digitos expansis brachijs patet. Caput à mento ad radices imas capillorum; item manus ab articulo ad extremum medium digitum, est decima pars longitudinis totius corporis. Caput verò à mento ad summum verticem est octava. A summo pectore ad imas radices capillorum, sexta ad summum verticem, quarta. Tota facies ab infimo mento ad summam frontem in tres partes æquales dividitur. Prima ab imo mento ad narium foramina protenditur; altera ab imis naribus ad sinum medium inter duo supercilia; tertia hinc ad summam frontem, sive



tem, sive imas radices capillorum. Pes totius altitudinis corporis, pars sexta est, cubitus quarta. Reliquas proportionones, qui harum rerum curiosus est, à Medicis Anatomicis petere poterit. Hoc tamen non neglectim Theologo transeundum: quòd Deus in fabrica Arcæ, qua semen generis humani ab aquis diluvij servatum, proportionem humani corporis aspexerit. Nam ideo *facta est trecentorum in longitudine cubitorum, quinquaginta in latitudine, triginta in altitudine*, inquit S. Augustinus, *quia si iacentem hominem metiaris supinum, vel prorum, sexies tam longus est, à capite ad pedes, quàm latus à dextra in sinistram, vel à sinistra in dextram; decies tam longus, quàm altus à terra, sive à dorso ad ventrem*. Medium hominis erecti, & centrum circuli qui per verticem, pedes, & extremos brachiorum expansorum digitos describeretur, Galenus umbilicum malè statuit; Vesalius eum corrigens, paulo infra, in concursu ossium pubis restituit.

S. Aug.  
lib. 15. c. 26  
Cavit.

Ad hoc proportionale omnium partium incrementum eleganter alludit Apostolus, cum universa membra corporis mystici Christi, sive Ecclesiæ electorum, simili proportionem in charitate crescere dicit, sub capite Christo: qui non tantum cerebri, sed & cordis, ac jecoris in corpore illo mystico officium administrat. *Ex quo*, Christo, inquit, tanquam capite omnibus membris superposito, & ea inter se spiritu suo colligante, *totum corpus Ecclesiæ compactum* (Græcè, *συμπελογούμενον* *harmonicè compositum*) cum certâ proportionem & harmonicâ symmetriâ membrorum, & *connexum per omnem iuncturam*, cum capite suo, *subministrationis*, quâ juncturâ tanquam ponte, subministratur & traiecitur influxus capitis in membra, *secundum operationem* (Græcè *ἐνέργειαν*, *efficaciam*, per intimam operationem & efficaciam, qua unumquodque membrum alimentum alterat & in se convertit, ut crescat, *in mensuram*, usque ad magnitudinem proportionatam *uniuscuiusque membri*. Membra enim majora magis crescunt & augentur in charitate & vita spiritali. *Augmentum corporis facit*, per virtutem à Christo capite per singula membra diffusam. Vnde caput istud mysticum non tantum cerebrum, ut antè dice-

Ephes. 4.

S. Tho.  
Ephes. 5.  
Lect. 5.

bam, sed etiam cor & jecur continet, à quo spiritus vitales & sanguis mysticus fluunt in omnes partes. Nec solum *per fidem compaginatur*, & *per charitatis subministrationem connectentem augetur hoc corpus*, ait S. Thomas, *sed etiam per actualem motionem ad operationem, quam Deus facit in nobis, qui operatur omnia in omnibus*, 1. Cor. 12.

Breviter, Christus iecur electorum suorum membrum est, quatenus charitate habituali ea alit, & veluti humidum radicale quotidie instaurat: cerebrum est, quatenus spiritu suo ad opera bona eos prævenit & excitat; quemadmodum cerebrum spiritu animali per nervos effuso, loco-motivam & sensus, veluti dormientes, ad operationes suas suscitatur.

Cajet.  
Ephes. 4.

Hoc quoque *admirabile*, ut loquitur hîc & expendit Cajetanus. Quod Apostolus non tantum dicat, mysticum Christi corpus *augeri secundum omnes partes proportionaliter*, sed videatur etiam asserere hanc negativam: *Non augeri partem aliquam sine augmento omnium*; sicuti in corpore naturali non crescit unum membrum, nisi omnium proportionale incrementum concomitetur, ne disproportionio & enormitas aliqua in corpore existat, quam natura quantum potest averfatur.

Ephes. 2.  
Philip. 2.

Et sanè proportionale illud electorum Ecclesiæ militantis in gratia & charitate augmentum non tantopere mirabitur, qui cum Apostolo & SS. Augustino & Thoma reputabit, Deum ita omnia operari in omnibus, ut creemur in Christo Iesu in operibus bonis, & operetur in nobis velle & perficere pro bona sua voluntate. Si enim præveniendi inchoare, & adjuvando prosequi debet omnia bona opera, quibus electi in charitate crescunt; quid mirum, si sapientia ejus, quæ singulos actus eorum bonos præfinire debet, talem in ijs ordinem & proportionem seruet, qualem solet in opere suo naturali, quo viventibus proportionale, secundum uniuscujusque membri magnitudinem & modum, incrementum præstat? Si enim Ecclesiam in cælis triumphantem proportionem quadam admirabili, secundum ideam divino suo ingenio dignam, ex hominibus meritorum claritate dissimillimis (*stella enim à stella differt*



*differt claritate, sic & resurrectio mortuorum*) ordinat & componit; cur etiam in distributione meritorum Ecclesiæ militantis, quibus electos ad diversos illos gloriæ gradus subvehit, proportionem nullam custodiat? Nonne etiam Ecclesia in terris militans est *castrorum acies ordinata*? Nonne ipse *omnia in mensura & numero & pondere disponit*? Sap. 27

Veruntamen nonne, inquires, dum unus electorum in gratia & charitate crescit, alius sæpe decrescit, aut per culpam lethalem, omnem charitatem & vitam animæ amittit?

Ita, sine dubio, est. Sed peccata etiam talibus cooperantur in bonum, & ipsi quodammodo crescunt, ubi decrescere, imò emori videntur. *Et recale*, addit Cajetanus, *quod sicut in corpore non qualibet nutritione fit augmentum, sed multis nutritionibus disponitur corpus, & post certum tempus augetur; ita in corpore Christi mystico. Vel, ut magis disertè S. Thomas: sicut natura per aliquod tempus operatur disponens ad augmentum, & nihil augens actus, & postmodum producit in effectum id ad quod disposuerat, augendo ipsum animal vel plantam; ita in corpore Christi mystico, aliqua membra non perpetuò crescunt, sed ad incrementum postea recipiendum, lapsibus etiam humiliantibus disponuntur. Nec circa unius membri incrementum Dei providentia, quæ ad omnia vigilat, quidquam operatur, quin stabili & ordinatissima lege, circa alia simul negotietur, quæ conducunt ad numerum, pondus, & mensuram meritorum, quæ totum corpus etiam in hac vita obtinere debet: ut sic per nexus & conjunctiones subministratum & constructum (ut alibi Apostolus, hac similitudine corporis naturalis delectatus, repetit) crescat, quadam membrorum proportionem, in augmentum Dei, quod ipse per charitatem in cordibus eorum operatur.* S. Tho. 2. 2. q. 24. a. 6. Coloss. 2

Dubitant tamen Philosophi, an nutritio & accretio non sint mutationes continuæ sicut motus localis, qui tantum spatij tanto tempore conficit, & in qualibet parte illius temporis proportionaliter aliquid minus.

## ARTICVLVS III.

*An nutritio & accretio sint mutationes continuæ.*Arist. lib. 8.  
c. 3. Physic.

**B** Reviter, Aristoteli & S. Thomæ assentimur. Nutritionem nempe, & accretionem multis intervallis interrumpi solere, dum post peractam unam alimenti conversionem, aliud succedit, quod in rorem aut gluten, aut cambium excoqui per aliquem temporis lapsum debet, antequam altera nutritio in eadem parte membri, succedere possit. Vnde optimè & graphicè Aristoteles hanc rem cum gutta excavante lapidem, aut stirpe quæ è rupe nascendo, saxum diffindit, comparat. Nec enim prima, secunda, tertia, & singulæ guttæ aliquam particulam detrahunt lapidi, sed guttæ certo numero præeuntes materiam disponunt, ut gutta quæ agmen illud præcedentium sequitur, minutissimum quid demordeat. Sic virgultum è rupe germinans, & saxum infernè impellens, non statim rimulam aperit: sed paulatim alendo ita se inflat & vires intendit, ut rupem se insinuando tandem diffindat.

Non nego tamen, quin materia cambij intra rotundum porum carnis conclusa, & undique in orbem à temperie carnis oppugnata, possit successivè & continuè ultimam dispositionem ad animam recipere; adeò ut animæ informatio à circumferentia materiæ cambij versus centrum successivè serpat, sicuti forma ignis per materiam stupæ, quæ successivè & continuè sine interruptione inflammatur.

Quod enim objectant quidam: In viventibus assignari partem materiæ minimam, in quam totam simul, animam introduci oporteat, ita ut non antè possit in dimidium, quàm in totum; facile refellitur. Nam intelligi hoc debet de integro vivente, quando primùm generatur. Quando enim in nutritione pars aggeneratur, minor & minor sine fine aggenerari potest; quia materia alimenti in ipsa aggeneratione integraliter materiæ viventis unitur, aut etiam tempore quandoque prius



prius, quando ex rore gluten, aut cambium efficitur. Possunt enim materiae quae diversis formis substant, unione integrali cohaerere, ut patet in membro, aut ramo arido, qui integraliter unitus est viventi. Vnde cambium, aut gluten possunt continuari cum materia carnis, etiam si nondum formam viventis susceperint. In continuis autem non datur minima pars, ac proinde non potest tam parva pars alimenti continui aggenerari, quin possit sine fine minor. Vnde particula quae esset minimum naturale, ut vocant, licet divisa à toto, non posset nisi in instanti tota simul generari; quando tamen toti continuatur, potest successivè aggenerari, atque ita nutritio & accretio continuè per eam serpere, sic ut anima prius in dimidium, quàm in totum introducatur.

## ARTICVLVS IV.

*De tertiae concoctionis excrementis.*

**S**icut chylosis, & chymosis, ita tertia alimenti concoctio sua excrementa habet. Hæc autem sunt, quæ sensibiliter, vel insensibiliter per poros extremæ cutis, à virtute expultrice foràs excernuntur. Ad hunc quippe finem tota cutis cribro crebrius undique perforata est. Sensibiliter excernuntur sudores, & materiae quædam aridiores, quibus cutis frequenter obducitur & loricatur, nisi homo abluat. Sed insensibiliter multo plura omni momento expirant, quibus nocte lecti, interdum vestes hominum calefiunt. Vnde, si oculos tam subtiles haberemus, homines aspiceremus tanquam totidem magna thuribula, innumerabilibus foraminibus fumos undique exhalantia. Medicinæ enim ejus rei curiosi majorem excrementorum molem, per occultam istam cutis transpirationem, quàm per evidentes alvi & vesicæ dejectiones, expelli existimant.

Viri plura expirant quàm feminae, quia calidiores sunt, & poros magis apertos habent. Vnde quoties lavant manus, aquæ limpiditatem inquinant, ut in pelvi licet deprehendere; non  
sic femi-

Aristot.  
sect. 8.  
Problem.

sic feminæ. Corpora autem quo *ευπνότερα καὶ ἀραιότερα* spirabiliora & laxiora, eo salubriora sunt: pinguis enim habitus robori, latus sanitati magis conducit, inquit Aristoteles. Maxime autem cute ij expirant, qui alvo difficili ac morosâ sani tamen sunt. Natura enim alicunde à superfluis se exonerare debet, & ubi ordinariâ non potest, alias vias molitur.

Fortasse etiam pij quidam & contemplativi (quales novimus) qui pulmonibus vix respirant, per poros cutis laxius dehiscentes, fuligines cordis expellunt, & indidem aërem frigusque abundantius per arterias extremæ cuti applicitas, ad mitigandum cordis æstum, sorbent. In tanta enim respirationis & refrigerandi cordis necessitate, mirum profectò, & prope divinum miraculum est, quomodo tot horas abstinere possint à pulmonum motu, & frigidi aëris inspiratione. Et tamen rem ita habere, ab ipsis sæpe audivimus, qui minimè mendaces, & diuturna cum ijs conversatione, facile verum deprehendebamus. Porro diversa corporum temperies, aliâ etiam qualitate, tertiæ concoctionis excrementa imbuunt. Hinc ruforum hominum sudores & spiritus gravius, quàm ceterorum olent. Hinc canes solo odore spirituum, heros suos ab alijs distinguunt. Feras quoque vestigant per odorem effluviolorum, quæ illæ seminant, quâcunque vadunt. Quorundam etiam animalium halitus, tam qui per cutem, quàm qui pulmonibus expirantur, pestilentes sunt. Hinc quibusdam tantis felium horror; quia spiritu earum se malè affici, sæpe etiam usque ad animi deliquium, sentiunt. *Minimè enim fabulosum est*, inquit Paræus, *quod vulgus dicitur*, Feles infantibus exitiales esse. Ipsarum enim ori toto corpore incumbentes, fuliginis exitum & thoracis motum intercipiunt, ac pestiferâ quam de se emittunt aurâ, tenellorum infantium spiritus insciant & præsocant. Quod monere volui, ut parentes intelligant, unde morbi, & mortes aliquando immaturæ suorum parvulorum. Nihil enim in Belgio vulgarius est, quàm feles tractari manibus & osculis infantium.

Paræ  
lib. 20.  
c. 34.

Ex effluvijs quoque cutis generantur crines. Nam cum transpiratione insensibili, etiam crassioris excrementi nonnihil excernitur, ait Galenus,



ait Galenus, à quo pili & cutis sordescunt. Materia quippe eorum est exhalatio lenta, quæ tamen multum terreni habet, ut facile possit exsiccari. Plurimam ijs materiam præbet cerebrum humanum, amplissimum & humidissimum; unde luxuriant in capite maximè pili, sicut arbores juxta lacus & fluenta aquarum lætissimè proveniunt. Qui plus caloris, cutem quoque capitis laxiorem habent, ideoque pilos crassiores; quod longæviritatis est indicium. Densitas quoque eorum idem significat; quia temperamento calido & humido silva densior enasci solet: vita autem calore & humore continetur. Pilosi præterea ac hirti tam in hominibus, quàm avibus, inquit Aristoteles, ob eandem causam salaciores sunt. Quod enim in hominibus crines, hoc in avibus plumæ sunt: ex simili quippe materia & causa geniti. Lepores quoque, cui animalium uni, ut ait Aristoteles, in ore, & sub pedibus crines, salacissimi sunt.

Galen.  
lib. 1. de  
sanit.  
tuend.

Color crinium temperiem etiam hominis ferè indicat, & quis in eo abundet humor. Sic nullos plures atræ bile & insaniâ tentari videmus, quàm quibus pilus est ater. Vt tamen nigredo in pupilla placet, ita *nigricapilli*, ait S. Bernardus, *can- didis vultibus etiam decorem augent & gratiam*. Idèò formam suam commendans sponsa Canticorum: *Nigra sum, sed formosa*, inquit, *filia Ierusalem*. Feminæ tamen hodie & olim ad pulchritudinis gratiam videntur fulvæ cæsariem prætulisse, aut qualem in uxore sua Poppæa, *succineam* appellabat, & carmine deprædicavit Nero Cæsar. Laudat quoque in Davide adolescente Scriptura: *Erat enim*, ait, *adolescens rufus, & pulcher aspectu*. Et si à flavâ bile tingi videatur color iste. Vnde hominum ruforum, & quibus lentigine aspersa facies, morsus virulenti sunt, perinde ac iratorum, inquit Paræus. Canitiem ex defectu caloris, qui finit crinium materiam putrescere, oriri existimant Aristoteles & Medici; calvitiam autem ex humidi defectu. Vnde & à vertice capitis calvities incipit, ubi minimum carnis est, sed nuda ferè & sicca cute cranium tegitur; canities à temporibus, quæ carnosiora sunt, & plus humidi habent.

S. Ber. ser.  
25. in  
Cant.

I. Reg 17

Canities autem non tantum senectute, sed subito terrore, aut curâ aliquâ coquente citissime aspergitur. Sic sollicitudine unius noctis, imò momento pænè uno, ex pavore mortis multi incanuerunt. Illustre exemplum in affini illo. Franc. Gonzagæ Mantuæ Principis, qui, ut refert Scaliger, suspectus conjurationis in carcerem conjectus, manè repente canus aparuit. Illustrius in Didaco Osortio nobili Hispano, qui sub Ferdinando Catholico, auditâ mortis sententiâ, ita exhorruit, ut pallor vultus statim etiam crinem rapuerit. Simile in Monacho quodam Forojulienfi narrat Campanella. Horæ enim spatium, & minori expertum est, ex tali animi consternatione canitiem festinari.

Scal. Exerc.  
313.

Ovid.

Arist. lib. 5.  
c. 4. de ge-  
ner. ani-  
mal.

Causa una est, quod pavor & anxietas spiritum, sanguinem, & calorem in præcordia revocent. *Palluit, & subito sine sanguine frigida sedit.* Inde enim frigus in capite & extremis membris, quo materia pilorum veluti gelatur; nec tantum ea quæ sub cute latet, sed etiam quæ extrâ in capillis est; ut pruina capillamenta è ramis arborum pendula subito frigore canescunt in hieme. Vnde Aristoteles, à Comœdis senium convitiantibus, canitiem *πράχιν*, *pruinam* appellari dicit. Sicut verò aër, aut exhalatio aërea pruinae illigata, illum præcipue candorem facit, sicut etiam in aquarum bullis & spumis videmus; ita fortè retracto è crinibus calore & tepenti humido, quod opacitatem nigredinemque, aut colorem medium concinnabat, aëre in tenuissimos capillorum meatus se insinuante, canities repente succedit. Sed tamen etiam materiam quæ circa radices est, putrefactam fuisse, patet; quia capilli postea ad naturalem colorem non redeunt, sed in posterum nutriuntur & crescunt ex materiâ albente, & ut sic dicam, canâ.

Ex frigore quoque cutis eodem, horrent & arriguntur in magno pavore capitis pili.

Vigil.

*Obstupui, steteruntq; comæ, & vox faucibus hæsit.*

Ac denique ex simili frigorifica causa, studiosi litterarum ante senium canescunt, operationibus mentis spiritus & calorem absumentibus, unde cerebrum & materia crinium refrigerat. Calvitie



Calvitiei verò altiore causam suggerit nobis Vallesius, <sup>Valler. c. 66. Philos. sacræ.</sup> cerebri scilicet in senectute contractionem, qua à cranio se revellit, ut humore suo non amplius ita pascere valeat superpositam crinium silvam. Et in hunc sensum ducit difficilem & obscuram illa Ecclesiastæ sententiam: *Antequam recurrat vitta aurea*, id est, ante senectutem, quando tenuis meninx, quæ cerebrum instar vittæ operit, recurrit & revellitur à fornice cranij, propter cerebri contractionem. Naturalis etiam cerebri, & totius complexionis siccitas calvitium festinare solet. Hinc quia sicci plerumque astuti & machinatores, natus est vulgaris versus:

Eccle. 12.

*Si non vis falli, fugias commercia calvi.*

Inde Cæsar Iulius, ad introspicienda ingenia & affectus hominum subtilissimus, negabat se metuere ab Antonio & Dolabella, crassulis & sanguineis, sed à Bruto & Cassio, siccis & melancholicis.

Porro si crines Lunâ deficiente refecentur, compertum est, siccior & tardior recrescere, ideoque tempus hoc quidam observant, sive avaritiâ, sive quia molestum tam sæpe sub forficem tonsoris redire. Vnde *Cæsar Tiberius in capillo tondendo servabat interlunia*, & *M. Varro adversus defluvia, præcepit observandum id à plenilunijs*, ait Plinius. Vanum tamen est, certos septimanæ dies, ad unguis, barbam, aut capillitium demetendum respicere. *Ungues Mercurio, barbam Iove, Cypride crines.* <sup>Plin. lib. 16 c. 39.</sup>

Luna enim decrescens, & materiam unguium criniumque deficcans, nō verò Mercurij, Iovis, Venerisve dies aliquid conferre potest, ut resecta malignius tardiusque renascantur. Ceterum unguis, ungula, & cornua animalium ex vapore quoque fuliginoso, perinde ut crines, oriuntur & crescunt. Vnde *colores cornuum, unguium, ungularum*, inquit Aristoteles, *cutis ac pilorum colori respondent.* <sup>Arist. lib. 3. c. 9. Histor. animal.</sup> Alibi tamen hominem excipit, in quo cutis propter tenuitatem, ait, pro pilorum varietate non variat. Videmus enim cute candidissimos, interdum crine fuscis esse. Cornua quoque è pilorum materia concrefcere, probari potest illustri exemplo hominis illius cornuti, quem seculo nuper elapso, ad Galliæ Regem adductum narrat

Casaubonus. Nam cornu illud arietinum è tempore ejus enatum, fulvum & crinibus concolor erat.

## ARTICVLVS V.

*An salutaris pileolorum usus, quibus iam passim caput tegimus.*

**A**D evacuanda capillorum & cerebri excrementa, præter alia remedia, excogitati sunt pileoli, calotte, aut cuculæ, quos Philosophi nostri ridiculè appellant *pileos secunda intentionis*. Hi cerebri & capitis effluvia retinendo, caput calefactant, poros ad exhalandum aperiunt, & simul ab externo frigore & injurijs defendunt. Hòc tamen more & mollicie nimisquàm procul à veteribus Græcis ac Romanis abivimus, quorum statuæ & imagines testantur, nudo capite domi forisque egisse, nisi militia, æstus, imbres, morbus caput pileo, petaso, aut causiâ tegi suaderent. Id multis & firmis exemplis Polydorus, Brodæus, sed præcipuè Lipsius noster ostendunt. Vnde apud Homèrum nulla pilei mentio: & Iul. Cæsar, qui calvitij deformitatem iniquissimè ferebat, & sæpe obrectatorum iocis obnoxiam expertus erat; non tamen pileo contra receptum morem, eam tegebat, sed deficientem capillum, ait Suetonius, revocare à vertice assueverat, & ex omnibus decretis sibi à Senatu populoque honoribus, non aliud aut recepit, aut usurpavit libentiùs, quàm ius laurea (ad celandum calvitium) perpetuò gestanda. Non tamen tam pertinax antiqui moris fuit successor ejus Augustus, qui æstus intolerantissimus, ne solis quidem hi-berni patiens, domi quoque (quod alijs insolens erat) non nisi petasatus sub divo spatiabatur. Petasus autem, galerus est marginatus: nam qui propriè pileus dicebatur, sine margine erat. De Othone quoque Galbæ interfectore, & post eum Imperatore, tanquam nimis effeminato Suetonius: Fuisse traditur, inquit, munditiarum panè muliebrium: vulso corpore, galericulo capiti propter raritatem capillorum adaptato & annexo, ut nemo dignosceret. Et hoc enarrans Beroaldus: Galerulus, inquit, est adulteri-

Lips. c. 1. c.  
de Amphit

Suet. c. 45.  
Iul.

Suet. c. 82.  
Aug.



*adulterina coma, quando ex alienis capillis instar galeri, coma compingitur, & capiti ita graphice ac diligenter annectitur aptaturq̃, ut à vera coma internosci non queat.* Hanc comam adscititiam Petronius in feminis *corymbium* ( quia, opinor, instar corymbi hederarum, flocculi crinium in orbem dependent ) in viris *capillamentum* appellat.

Germanos & Suevos veteres cirris nodisque crinium, non alio tegmine, caput munivisse, ex Tacito quoque affirmat Lipsius. *Et comatos nostros Gallos inquit, quidni credam eâ parte intactos?* Mos etiam iste Româ Constantinopolin cum Imperio migravit; aded ut Andronico Imperatore, post An. Christi 1300. demum exoleverit: ut *passim omnes*, inquit Gregoras, & *seniores & juniores pileis uterentur, non minus in palatio, quàm in agris.*

Et sanè nescio, an tot hodie pileis & pileolis onusti, salubriori capite quàm veteres illi, vivamus. Certè nuper patres nostri in Belgio, comâ breviori, quàm nos, erant; nec tamen extra senes, aut valetudinarios vulgatus fuit secundi pileoli usus. Morem autem comam tondendi, cùm seculis præcedentibus eam, ut nos jam gestassent, à Carolo V. Cæsare coëptum existimat Fam. Strada. Cùm enim, inquit, Carolus An. 1519. ad capeffendam Imperij coronam, venisset in Italiam, & minuendo capitis dolori, *casariam deposuisset; exemplum certatim rapuerunt omnes Aulæ primores, more qui per ea retroq̃, secula tantopere vigeat, alenda coma, imitatione unius, apud omnes abolito.* Cor. Celsus, quem Hippocratem Latinum Medici appellant, Philosophis & literatis, quibus à studio imbecille caput, scribens, ut Thriverus fatetur, etsi nolit eos *ad cutem tonderi, vetat tamen caput veste velare, pileum damnat, & nuditatem capitis commendat.* Imò aquâ frigidâ quotidie perfundi jubet, & nudum supponi canali, unde aqua pluvialis, aut alia decidit. *Nihil enim capiti aquæ prodest, inquit, atque aqua frigida. Atque is, cui hoc infirmum est, per astatem id bene largo canali quotidie debet aliquamdiu subijcere.* Nam aquæ frigus densat capitis cutem, & adversus externas cæli injurias impenetrabilius facit. Hoc opinor etiam argumento Charmis,

Strad. lib. 1.  
10. de bell. Belg.

Cor. Cels.  
lib. 1. c. 4.

Romæ sub Principatu Neronis, nobilis Medicus, damnatis bainis, frigidâ hibernis algoribus, adstipulante Senecâ, non capite tantum, sed toto corpore, lavari persuasit. Tunc *videbamus senes Consulares*, inquit Plinius, *usque ad ostentationem rigentes.*

Plin. lib. 29.  
c. 1.

Quantulum enim regi caput debeat, natura docuisse videtur; nempe quanta est crinium densitas, qua illud circumsepsit. Si obijcias, oportere pileolis calefactando, aperire poros capitis, ut cerebrum superfluis humoribus illac se exoneret; illico reponetur. Ideo naturam cranij suturas, velut caminos, ad illam superfluum exhalationem, aperuisse. Deinde fuligines cerebri à crinibus ipsis, qui ijs aluntur, naturaliter exsugi.

Ierem.  
Thriver.  
ia Cels.

Quibus tamen calvitie naturale crinium hoc munimentum ademit, tenui pileolo vicem ejus supplere possunt, Et sic calvi Hippocratis vetustas imagines pileatas videmus. *Sed quid de ijs dices*, inquit Thriverius, *qui bene densam casariam non simplici pileo onerant?* Nempe isti ante tempus canescunt, si Aristotelem audiant, & perpetuò caput molle & effeminatum, circumferunt. Tale enim profectò caput illorum adolescentum hodie esse oportet, qui cucufis & pileolis in ætate tam adhuc fervidâ assuescunt. Deinde, quod pessimum est, remedijs senectutis in juventute consumptis, quid senes facient?

Arist. sect.  
10. Pro-  
blem.

Hoc tamen, ut nihil dissimulem, Aristoteles mihi suggerit, in favorem adolescentum istorum cucufigerorum. *Quibus os capitis densum*, inquit, *cerebrum est imbecille, quia exspiratio impeditur. Nam citò putrescit, cum naturâ suâ sit humidum. Quo fit, ut homo sit capite maximè piloso, & mas quàm femina diutius vivant, suturarum sui capitis beneficio.*

Igitur cum intecto capite ambulare, & omne frigus denset capitis cranium, vitandæ sunt causæ istæ putrefacientes cerebri, & cucufarum fomentis aperiendi pori & suturæ capitis, ut pluribus ac patentioribus spiraculis cerebri vapor se exhalet. Veruntamen natura, ut antè dixi, in necessarijs non defuit. Ideo enim pori capitis laxiùs, quàm in ulla alia parte corporis, hiant, idè suturis incisum cranium, idè implan-



implantati crines, qui humorem suggerent. Vnde juvenibus aut nullus, aut simplex, sine cucufa, galerus tegendo capiti sufficit. Vbi verò senium, aut calvities venerit, cucufa, five pileolo uti licebit. Calvis enim exuviæ alieni capitis, seu corymbi ex adscititijs crinibus hodie permittuntur ad necessitatem, & ornatum; qualem tamen etiam in feminis mordaci stylo confixit olim Tertullianus. *Affigitis, inquit, nescio quas enormitates sutilium atque textilium capillamentorum; nunc in galeri modum, quasi vaginam capitis, & operculum verticis, nunc in cervicem retrò suggestum. Si non pudeat enormitatis, pudeat inquinamenti; ne exuvias alieni capitis forsitan immundi, forsan nocentis & gehenna destinati, sancto & Christiano capiti apparere.*

Tertull. c. 7  
de cultu  
femina.

Feminis tamen, crinibus & vittis operire ac calafacere caput, magis quàm viris, permittitur & suadetur; quia frigidior & humidior cerebro, totaque corporis temperie sunt; ideoque cerebrum earum non tam exactè alimentum suum concoquit, pluraque recrementa habet, quæ apertioribus poris debent expirari. Vnde fallitur, & meritò à Vesalio nostro refellitur Aristoteles, qui paucioribus futuris femineum cranium, quàm virile, dehiscere censuit. Quidam tamen viri ac feminae sine futuris capitis inveniuntur; quales non paucos se vidisse narrat Laurentius. Isti verò ob impeditam cerebri expirationem, magnis capitis doloribus cruciari solent. Hippocratis quippe oraculum est, *ἡ γυνώτεροι ἐστὶ τὴν κεφαλὴν, οἱ τὰς πλείους ῥαφὰς ἔχοντες* eos capite saniores esse, qui plures cranij *suturas habent*. Vnde inter mala senectutis hoc etiam unum est, quòd ætatis frigore, suturæ istæ comprimantur; imò sic interdum conniveant & concreſcant (id enim in senibus quibusdam decrepitis advertit Vesalius) ut *suturarum situm obscure dumtaxat referant, nulla sutura imagine conspicuâ*.

Andr. Laurent. c. 6.  
de catarrh.

Hippocrat. lib. de loc. in hom.

Vesal. lib. 1. c. 6.

Hac igitur de causa, pileoli in senectute tolerabiles; ut, inquam, fotu suo calvariæ suturas, & cutis poros subapertos teneant. Maximè cum senile cerebrum, id est frigidum & humidum, malè & cum multis excrementis superfluis, sanguinem concoquat, ac deinde ex omnibus infernè corporis lacunis vapores ad ipsum scandant, & tanquam spongiam imbuant.

imbuant; multis & apertis futurarum ac pororum caminis opus habet, ut ab humoribus per expirationem liberetur. *Caput enim tectum quoddam domus calida refert*, ait Vesalius, *fumida vaporesque subiectarum partium recrementa excipiens*. Et ab hinc fons & origo omnium morborum: dum vapores illi in cerebro, tanquam mediâ aëris regione, refrigerati, in partes corporis subjectas, per apoplexiam, paralyfin, phthisin, dysenteriam, arthritidem &c. depluunt. Defluxiones enim ex cerebro *perinde evenire*, ὡς περ τῆς τῶν ὕδατος γένεσιν atque imbrum generationem, si parva magnis componere licet, docet Aristoteles. Meritò igitur S. Hieronymus gratias S. Paulino agit, quod ab eo pileolum *texturâ breve, charitate latissimum, senili capiti confovendo accepisset*.

Arist. lib. 2.  
c. 7. de  
part.  
anim.

S. Hierony.  
Epist. 254.

Quidam tamen denique, in pileolorum & cucufarum istarum usu & permutatione nimis morosi & superstitiosi sunt; ut Marfilus Ficinus, de quo Iovius: *Adeò morosè, inquit, sibi ad spem vitæ blandiebatur, ut sæpe eadem die, cum aër incalcesceret, aut aliquo spiritu moveretur, capitis tegumenta permutaret*.

Navar. lib.  
3. consil. 7.  
de celeb.  
Missar.

Quid verò de sacerdotibus censendum, qui Missæ sacrificium capite pileolato peragunt, disputavit alicubi satis diffusè Navarrus. Summa est, non peccare, si aliter celebrare per valetudinem non possint, & scandalum absit. Sed res hodie, præsertim apud Gallos, in maiorem licentiam abiit. Certè tamen juvenes & validos eâ uti non oportet. Reverentia enim & tremor tam tremendi mysterij aliud flagitat. Saltem sub consecratione, pileoli omnes abijciendi, nec ante peractam communionem resumendi sunt.

## ARTICVLVS VI.

*An crines vivant.*

**H**Oc quoque raptim hic disputare, à re Theologica non omnino alienum erit.

Sotus, Medina, Bañes, Henriquez, ac alij pluri mi docent, crines animalium informari animâ totius, ac proinde in crinibus hominis, perinde ac in carnibus, animam rationa-



rationalem ineffe. Hinc inferunt. Verbum divinum in Christo crines etiam assumpsisse: & si aqua solos parvuli crines attingat, baptismum tamen probabiliter valere; quia capilli & ungues sunt partes hominis animatæ, licet minùs principales, & ad accidentarios quosdam usus, aut ad solum ornatum factæ.

In hanc sententiam S. Thomam Bañes trahit; quia alicubi S. Tho. 4.  
dixit, quòd sicut principale instrumentum militis est gladius, d. 44. q. 1.  
ad cuius tamen custodiam, vaginam quoque gerit; ita in par- a. 2.  
tibus corporis animati quædam ordinantur ad operationes animæ exe-  
quendas, sicut cor, hepar, manus, pedes; quædam autem ad conserva-  
tionem aliarum, sicut folia ad operimentum fructuum: ita etiam ca-  
pilli & ungues in homine ad custodiam aliarum partium. Unde sunt  
de secunda perfectione corporis humani. Sed profectò, hoc non est,  
capillos animatos esse animâ rationali. Negant enim alij, ne-  
cessarium esse, ut pars secundaria animetur eadem & tam  
perfectâ animâ, quàm pars principalis. Et satis apertè alibi  
S. Thomas negat, capillis animam rationalem ineffe; ubi ait, S. Tho. 17.  
non gigni ab homine crines tanquam filios, quia non sunt p. q. 27. a. 2.  
similis naturæ.

Henriquez quoque Aristotelem ad se trahit; quia dicit, in- Arist. lib. 3.  
quit, capillos vivere vitâ vegetativâ. Sed dicat istud, non ta- c. 11. Hi-  
men dicit, vivere animâ rationali. Deinde etiam vitam vege- stor. ani-  
tativam ijs adimere videtur, ubi ait, οὐκ αὐξάνει καὶ θίπει ἀποτμη- mal.  
θεῖσα, ἀλλὰ καὶ τὸθεν ἀναρπυμένη γίνεσθαι μέζων, non accrescere crinem  
resectum, sed quia infernè repullulat, fieri maiorem. Quod vide-  
tur recidere in opinionem Medicorum, qui fortiter asserunt, Valles. lib.  
Ungues & capillos excrementa esse, augeriq; minùs propriè, atque 2. c. 5.  
nullo pacto vivere; eoq; inter partes corporis nullibi à Galeno, aut ab Controu.  
Aristotele recenseri. Falluntur tamen de Aristotele: nam capil-  
los, cornua, ungulas, ungues aliquoties partibus animalium  
accenset. Pulchrè autem Galenus generationem crinium ex-  
plicat per quandam fuliginum concatenationem, qua fuligo Galen. lib.  
prior, in poro cutis deprehensa, nec regredi, aut exire valit 2. de tem-  
per.  
da, à subsequente infernè propellitur, & hæc iterùm ab  
alia; donec longâ sequentium & se trudentium fuliginum

concatenatâ serie, totus crinis extrudatur. Et hæc est nobilis illa capillorum & comarum materies; vilissima, inquam, fuligo & cerebri recrementum, in quo hodie ad fatuitatem usque se jactant juvenes, & mustachas suos ventilant juvenulæ.

Argent.  
Com. 2.  
in artem  
Galen.

Argenterius verò aliquid amplius concedit. *Ego puto*, inquit, *pilos & ungues mediam naturam habere inter viventia & non viventia; cuius generis est corallus, fungus, spongia marina.* Sed profectò spongiæ, & ista alia vivunt; unde etiam juxta istum Medicum, oporteat pilos & ungues vitam aliquam habere. Hoc autem, quidquid me retrahant Medicorum filij, cum S. Augustino, Theologis Thomistis, imò cum Aristotele, sentio. Loquitur enim de capillorum incremento, perinde atque ceterarum partium corporis Augustinus. *In nobis*, inquit, *sine sensu nostro sunt corporis incrementa, & capilli nec cum praciduntur sentiunt, & tamen crescunt.* An tamen in crinibus & unguibus humanis sit anima rationalis, in pilis & ungulis brutorum, anima sensitiva, meritò dubites. Propior sum neganti. Nam aliàs præter alia argumenta, non crescerent in mortuis; quod tamen affirmat Aristoteles.

S. Aug. c. 8.  
contra  
Rufecil.

Itaque vitam dumtaxat vegetativam, non sensitivam, aut rationalem, in omnium animalium pilis, ungulis, calcaribus, pennis, plumis, velleribus, & id genus omnibus constituo. Crescunt enim ista, non sicut inanimata, ex fortuitâ materiæ congestionem, sed vitali motu, & fuliginosi vaporis attractione. Nam *pili qui in capite, cilijs, & supercilijs habentur, etiam nobis pueris innascuntur*, ait Galenus; *quia generatio ipsa est, non qualis herbis, sed qualis stirpibus primâ ratione à natura conditis.* Si autem cilia & supercilia oculorum, ac primi crines capitis, in prima foetus conformatione sint pars totius organizationis corporis, videntur conformari, ut ceteræ partes, tanquam animæ cujusdam domicilium. Ceteros verò deinde crines qui postea, ut herbæ ex radicibus & stirpibus suis, subvascuntur, etiam animatos esse oportet; quia sunt cum primis illis ejusdem speciei.

Galen. lib. 2  
de temper.

Dentes deinde & ungues sine anima esse Vallesius & Medici.



dici dicere non audent; igitur & crines animam habent, quia simillimo modo crescunt. Tertio, cornua animalium è fuliginibus, sicut pili concrescunt; quis verò neget cornua cervorum, in tot ramos sparsa, & tam affabrè elaborata, ab animâ aliquâ organicâ inhabitari? Simile iudicium de buccinis, turbinibus, conchis, & toto genere testaceorum, in quorū testis & cochleis miro ingenio & varietate figurandis tantopere natura ludit. Tantâ jam admiratione, & inde pretio, ut novum earum rerum inter Hollandos nuper mercimonium extiterit, mercatoribus ex Oceano Indico & undique adventibus, prout figuræ, coloris, aut molis insolentia, & raritas ijs pretium fecerit.

Anima tamen testarum non est sensitiva, nec tam nobilis, quàm animal quod eam incolit. Indicare id videtur Aristoteles. *Natura testaceorum gignitur*, inquit, *parte terrenâ in orbem durefcente, & per modum ossium & cornuum concretâ, corpus verò quod vitam habet (utique sensitivam) est intus.*

Arist. lib. 3.  
c. ult. de  
generat.  
animal.

Quarto, pennæ volucrum, ingeniosissimum quoque naturæ opus, inanimatæ non sunt, sed in omnem dimensionem accrescunt, more plantarum; igitur & capilli animam suam habent. Quid enim in hominum & quadrupedum genere aliud sunt crines, quàm in avibus plumæ, aut in piscibus squamæ? Quid verò in avibus plumæ, nisi quod in arboribus frondes? Frondes autem animatas nemo negat. Merito igitur laudati ab Aristotele Empedoclis isti versus:

Τὰυτὰ τρίχες, καὶ φύλλα, καὶ ὡτῶν πτερὰ πυκνά,  
καὶ λεπίδες γίγνονται ἐπὶ τετραπόσι μέλεσσι.

Arist. lib. 4.  
c. 9.  
Meteor.

Quæ Latinè sic versificat Vicomercatus:

*Sunt eadem frondesque, pili, densæque volucrum*

*Penna, tum squama, queis fortia membra teguntur.*

Sed *contemplantur capillorum substantiam, tam siccam & exsuccam*, ait Vallesius; *videbis nutrienda illius nullam rationem commodam inveniri posse, prater congestionem fuliginis, ut in fornacum caminis copiosa fuligines colliguntur.*

Valles. lib.  
2. c. 5.  
Centron.

Sed profectò, eodem argumento siccis quibusdam herbarum muscarijs & capillamentis adimet animam. Et quomodo

ergo, quæso, arborum ligna, animalium ossa, sicciora crinibus, nutriuntur? Quomodo dentes, & ungues, quos Vallesius non dubitat nutriri & vivere?

Verum ad radices dentium propagantur venulæ & arteriolæ, inquit, advehentes dentibus alimentum, nullæ autem ad radices crinium.

Sed signum tantum hoc est, crines viliori alimento contentos esse. Natura enim (ut prudens materfamilias, quæ putamina, cortices, & quisquilias culinæ, in utilitatem familiæ vertit) ex fuliginibus etiam, & tertiæ concoctionis recrementis aliquid utile corpori fabricat; crines, inquam, pennas, cornua, ungulas, ad tutelam, aut decorem animalis: velut etiam simili fine, arbores sua folia extrudunt & flores.

Nec refert, quod crines non videantur in omnem dimensionem se dilatare, ut folia arborum, aut avium pennæ.

Nam quis certò affirmare potest, pilos sola longitudine augeri, ne hilum autem crassescere? Nonne enim setæ porcorum, & spinæ erynaceorum crassitudinem suam paulatim & cum ætate implent? Deinde non omnibus plantis & animalibus est eadem mensura & modus adolescendi. Quædam in longum ferè tantum, alia in latum, plurima in omnes dimensiones manifestè dilatantur.

Nec verum etiam est, crines à parte tantum inferiori succrescere, & sursum ita à succedente fuligine protrudi, ut nihil alimenti per tenuissimos meatus ad cuspides usque crinium attrahatur.

Attrahitur enim aliquid minutissimum: quo fit ut obtusa illa à resectione extremitas crinis acuatur paulatim & figuram mutet. Accretio tamen à parte inferiori magis festinat, & partes superiores protrudit; quia à radice tantum, non undique materiam incrementi accipit, ideoque strenuior & evidentior est accretio ab ea parte, ubi materia magis affluit. Idem cernere est in unguibus, & dentibus. Nam maculas unguium trudi sursum videmus; licet animatos esse, & vitaliter excrescere etiam Vallesius affirmet. Qui tamen addit, *extremos ungues multum à radice recedentes, non amplius vivere, neque propriè nutriri,*  
sed



*sed solo impulsu.* Quod licet quidam Theologi nostri credant, ego non credo. Si enim pars unguis, cum infima esset, habuit animam, per meram sursum extrusionem, nulla temperamenti variatione, eam non potuit amittere.

Sed in mortuis fatente etiam Aristotele, crescunt capilli, inquit. Nam cum in sepulchris subterraneis, ad attentius & meditativius philosophandum, se abdidisset Democritus, *cre-  
menta unguium & comarum, in sepulturis aliquanti temporis denota-  
vit*, ait Tertullianus. Igitur accretio comarum vitalis non est.

Imò verò, vel ideo vitalem possumus asstruere. Nam cum in carne hominis mortui non sit anima, quæ fuligines in materiam crinium foras expellat, animula vegetativa, quæ superest in crine, materiam radice sua attrahere debet, ut crines accrescant. Remanent quippe post mortem hominis fuligines quædam circa extremam cutem acervatæ, quibus pasci & incrementa rapere aliquamdiu crines possunt. Hoc tamen argumento rectè probatur, animam quæ accretionem in crinibus humanis tunc operatur, non esse rationalem; quia vitaliter accrescere non possent in mortuis, à quibus anima rationalis universim absecessit. Nulla verò ratio est, cur pilus animâ suâ vegetativâ animatus, in cute mortua defixus, nequeat aliquamdiu perdurare; quemadmodum planta vivit in terra arenti, ex qua non potest diu alimentum conveniens trahere. Dicit satis apertè Tertullianus: *Coma alimenta sunt de cerebro*, inquit, *quod aliquamdiu in mortuis durare præstat secreta nutritio*; cranij videlicet, quod cerebro est pro-galea. Et ecce ab Aristotele etiam elegans hujus rei argumentum. Nam narrat suo tempore, *cervum captum esse, qui hederam viridem suis enatam cornibus gereret, quæ cornu adhuc tenello fortè insita fuerat.* Si igitur cornibus, aut capiti cervi inferi, & vivere in eo hederam potuit; quidni capillus vivere animâ vegetivâ (quæ similis est animæ hederaceæ) implantatus cuti animalis tam vivi, quàm mortui possit? Nam eodem modo calcaria decisa domesticis gallinaceis, recrescunt, si vertici infigantur, ubi caponibus crista abscissa fuit.

Augentur autem pili non tantum æquè, sed magis, quando

Tertull.  
c. 15. de  
anima.

Arist. lib. 9.  
c. 5. Histor.  
animal.

Arist. lib. 2.  
c. 6. de  
generat.  
animal.

*corpora decreſcunt, ſeneſcunt, aut egrotant, inquit Ariſtoteles, quia plus excrementitia materia remanet, cum minus in partes præcipuas abſumitur, propter ſenium, aut morbum. Similiter incarceratis & melancholicis eâdem de cauſâ feſtinant accreſcere; quia plus fuliginum ad incrementa ijs ex moerore ſuggeritur.*

Iob. 1.  
Iſa. 15.  
Ierem. 3.

Romani, aliâs attonſi, in luctu promittebant barbam & capillum, Græci & Hebræi contrâ, in calamitatibus radebantur. Sic Iob *tonſo capite corruit in terram.* Et Iſaias: *in cunctis capitibus calvitium, & omnis barba radetur.* Et Ieremias: *Tonde capillum tuum, & projice.* Capillum enim & barbam inter ornamenta habebant; ornari verò luctuoſos non decet. *Et apud veteres quidem hæc erat omnium conſuetudo lugentium, tondere caſariam,* ait S. Hieronymus; *at nunc è contrario, comam dimittere.* Ut nempe capilli ac barbæ promiſſa longitudo, & ſqualor horrorem quendam, & unâ miſerationem aſpicientibus commoveat.

Diſt. 24.  
c. 22.  
I. Cor. 11.

Cum verò Clerici prohibentur comam nutrire, & Apoſtolus univerſim dicit, *ſi vir comam nutriat, illi ignominiam eſſe;* de comâ calamitriſtris, pulvere, unguentis, aut aliter effeminatâ accipiendum; quales hodie nimis multas in juventute noſtra cum indignatione aſpiciamus. In quos meritò jaciatur iſte S. Ambroſij ſarcaſmus: *Ergo pariant, ergo parturiant, qui nutriunt, qui criſpant comam, ſicut femina.* Tales erant comatuli illi inclinatis cum Rep. moribus Romanis, apud Senecam: *quibus apud tonſorem multa quotidie hora tranſmittebantur, dum decerpebatur quod proxima nocte ſucceviſſet, dum de ſingulis capillis, inquit, in conſilium itur, dum aut diſiecta coma reſtituitur, aut deſiciens hinc atque illinc in frontem compellitur. Quomodo irascuntur, ſi tonſor paulò negligentior fuit? Tanquam virum tonderet. Quomodo excan-  
deſcunt, ſi quid ex iuba ſua deciſum eſt, ſi quid extra ordinem iacuit, niſi omnia in annulos ſuos reciderunt? Quis eſt iſtorum, qui non malit Remp. turbari, quàm comam ſuam? Nonne videtur troſſulos hodie quosdam deſcribere, qui comæ & jubarum effeminatione apud meretriculas fortasſe bellatuli, apud viros prudentes turpitudine & molliæ ſunt infames? Sed minutiarum  
iſtarum*

Senec. c. 12  
de brevità  
vitæ.



istarum & τριχολογῶν defino : si hoc etiam pro Philosophis dixero. Animam crinis vegetativam produci ab anima hominis, aut bruti; veluti etiam unguium, ungularum, cornuum, plumarum, squamarum producuntur animæ. Sic etiam in arboribus, foliorum, florum, fructuum animulæ non ab alia causa probabilius fabricantur, quàm ab anima principali, quæ est in ligno. An autem materia crinium, cornuum, pennarum, foliorum &c. continuetur cum materia corporis, cui illa insiguntur, an verò solùm sit contigua, ut radices arboris cum terra cui implantatur, indifferenter sustineri potest. Videntur autem glutino ac ligamine quodam tantùm affigi, quo exsiccatò crines, cornua, pennæ, folia, fructus excidunt. Partes autem propriè continuæ talia defluvia pati non solent. Certè fructus arboreos solo ligamine suspendi significat S. Thomas. *Humor arboris*, inquit, *primò ab arbore egrediens fit flos, & tandem fructus ab arboris cortice discretus, sed ei colligatus.*

S. Tho.  
lib. 4. c. 17.  
contra  
Gent.

## ARTICULVS VII

*An vivens maneat idem ante & post accretionem.*

**A**ristoteles quasi ἐπίδος μῆλον, discordia pomum, inter Philosophos hanc sententiam projecit, *Pars viventis augeri potest κατὰ τὸ εἶδος secundum formam, non verò κατὰ τὴν ὕλην secundum materiam.* Et hinc docet, vivens manere idem secundum formam ante & post accretionem, secundum materiam verò, nequaquam. Vnde plurimis & discordibus interpretationibus verba ista & seipsos fatigaverunt. Aristoteles verò mox subdit, id quod dixit intelligi posse, exemplo vasis, quo aquam situlatim metimur. Idem quippe vas manet, alia verò & alia est aqua, quæ infunditur & effunditur. Cogitemus ergo vas quod idem semper manet, esse instar formæ, seu partis formalis; aquam verò quæ fluit & refluit, esse instar materiæ.

Omissis infinitis Interpretum rixis: *Forma* Aristoteli nihil est aliud, quàm anima & temperies ejus, quarum una est causa efficiens

Arist. lib. 2.  
c. 5. de  
generat.

efficiens principalis, altera instrumentalis conversionis alimenti. Pars ergo, quæ tali duplici forma instructa potest alimentum in se transmutare, dicitur pars formalis, solaque denominatur nutrirî & accrescere; quia per formam suam potest substantiam & magnitudinem suam augere. Partes verò minutissimæ, in quibus non est ea activitas, ut per se consideratæ dici possint alimentum in se convertere, vocantur partes materiales, & instar puræ materiæ, cujus accessu partes formales augeri dicuntur, recessu minui. Hinc addit Aristoteles, *totum maius evadere accedente aliquo, & in eandem formam transeunte, ut si humidum sicco ( sanguis v. g. ossi ) accedat, siccumq; fiat. Vbi forma ista eadem aliud non est, quàm anima & temperies viventis; quâ duplici formâ induitur materia alimenti, quando in vivens transit: & à quâ duplici formâ pars aliqua dicitur formalis, si tam ampla sit, ut seorsim ab alijs sit sensibilis, & activitas in ea sic se manifestet, ut ipsa alimentum transmutare & incremento se dilatare appareat. Quod explicat Aristoteles per quodvis signum sensibile ( quale est cicatrix ) quod minus minusve fit cum humano corpore.*

Paul. Aref.  
lib. 1. d. 4.  
q. 33. sect. 3.  
de generat.

Fallitur ergo, ni fallor ego; Arefius, qui solam figuram partis putat ab Aristotele hic *formam* vocari. Nam potius figuram distinguit à forma, cum ait in accretione, *figura & forma cuilibet parti aliquid accedere.*

Vasq. 3 p. q.  
5. a. 2.

Fallitur quoque Vasquez, dum credit Aristotelem per *formam* intelligere *structuram animalis*, quæ ossibus, cartilaginibus, & nervis constat; per *materiam autem carnem*, qua replentur vacua huius *formæ & figuræ*: & ideo cum homo aegritudine aliqua confectus flaccescit & carnes perdit, non dicitur minui, & cum post integram sanitatem convalescit & carnes recuperat, non dicitur crescere.

Sed profecto etiam ἐπὶ σαρκός, καὶ τῶν ὀστέων, in carne & ijs quæ partibus similaribus constant, formam agnoscit Aristoteles. Quare partim augetur, inquit, carnis qualibet particula, partim non augetur. Nam secundum formam quidem cuilibet parti aliquid adjungitur, secundum materiam verò non. Igitur non tantum secundum ossa, cartilagine, nervos, solidamque illam corporis *structuram*, sed etiam secundum genas & malas faciei, secundum



secundum furas tiliarum, & carnosas partes homo augeſcit. Ac proinde, poſtquam vir perfectæ ætatis morbo emaciatus carnes recuperat, re verâ recreſcit. Non tamen ſecundum omnes partes proportionaliter, quia oſſa & ſolidæ partes ad incrementi ſui culmen pervenerant; ſed ſecundum carnem & partes fluxas, quæ morbo proportionem cum ceteris amiſerant, ideoque ſolæ recreſcere & veterem proportionem recuperare debent.

Docet ergo Ariſtoteles, *permanente eo quod augetur, & accedente ad ipſum aliquo, fieri accretionem, abeunte autem aliquo decretionem*: & in hoc accretionem quodammodo ſimilem eſſe alterationi, quâ ſubjectum idem manens ab una qualitate ad aliam tranſit; diſſimilem verò eſſe generationi, quâ totum aliquod deſtruitur & tranſmutatur in aliud.

Solum ergo contendit, quòd in unaquaque particulari accretione, id quod alimentum in ſe mutat & agglutinat, idem maneat; non autem quaſi vivens toto tempore vitæ eaſdem partes formales, ſecundum quas accreſcit, retineat. Nam fieri poſſe videtur, ut in digito, exempli cauſâ, hominis ſenis nulla ſuperſit particula materiæ illius digituli, qui primùm formatus in utero matris, craſſitudinem aciculæ, aut pili non exceſſit.

Cùm enim omnes partes integrales hominis, tam quæ primùm in utero fabricatæ, quàm quæ per nutritiones acceſſerunt, corruptibiles ſint, potuerunt tot annorum ſpatio, & per caloris naturalis actionem, & mutuo contrariorum temperamentorum conflictu, aut à contrarijs extrinſecus oppugnantibus labefactatæ, corrumpi & ſenſim defluxiſſe. Nam, ut optimè S. Thomas, *cùm id quod ex alimento generatur, adiungatur corpori per modum mixtionis, non poteſt alia eſſe natura* S. Th. 1. p. q. ult. a. 1. ad 2. *ejus quod advenit, & cui advenit, cùm iam ſit factum unum per veram mixtionem. Vnde nulla eſt ratio, cur unum conſumatur per calorem naturalem, & alterum maneat.*

Quid ergo? Nonne verè dixit Seneca: *Alia eſt ætas infantis, pueri, adoleſcentis, ſenis; ego tamen idem ſum, qui & infans fui, & puer, & adoleſcens?* Fortaſſe, mi Seneca. Quantum enim ad animam Senec. Epult. 121.  
S f tuam

tuam, quæ immortalis est, & eadem se per omnes materiæ particulas replicat, fateor te eundem; si verò de materia corporis tui agitur, vehementer ambigo. Imò non ambigo, quin multas alias partes infantia, alias pueritia, alias adolescentia corpori tuo assuerit, ut per omnia homo idem, ac per omnes ætatum gradus idem transisse dici non possit.

S. Basil:  
66. 162.

An tamen etiam aliquæ partes eadem à prima infantia ad ultimam senectutem perdurent, meritò ambigitur. Fortasse enim, sicut eadem dicitur civitas hodie, quæ fuit centum retrò annis, etiamsi ne unus quidem civis illius ævi supersit; ita homo senex idem dicitur qui olim infans fuit, licet nulla, præter animam, infantia particula reliqua sit. Aut sicut vetusta illa Thesei apud Athenienses navis, Thesei semper dicebatur; licet ne unam quidem tabulam ex prima illa navi retineret. Quam identitatem quidam, ait S. Basilus, ἀλλοιουμένην commutatoriam appellant, quia sit partium perpetua commutatio. Ut, unâ tabulâ v. g. Thesei navis putrescente, nova altera in locum ejus compingitur; & id toties fit, donec seculorum lapsu, ne una quidem tabula superstes sit ex ijs quibus prima navis compacta fuit.

S. Th. lib. 4.  
q. 81. con-  
tra Gent.

Sic Albertus, sic Marsilius philosophantur, sic quoque videtur S. Thomas. In corpore hominis, inquit, quamdiu vivit non semper sunt eadem partes secundum materiam, sed solum secundum speciem: secundum verò materiam partes fluunt & resfluunt. Sed quomodo igitur est idem homo, infans & senex? Nec propter hoc, ait, impeditur, quin homo sit unus numero, à principio vitæ usque ad finem. Cuius exemplum accipi potest ex igne, qui cum continuè ardet, unus numero dicitur, quia species eius manet, licet ligna consumantur, & de novo apponantur. Sic etiam est in corpore humano. Nam forma & species singularium partium continuè manet per totam vitam, sed materia partium & resolvitur per actionem caloris naturalis, & de novo aggeneratur per alimentum.

Quo exemplo intelligitur, mentem S. Thomæ esse, non manere hominem quoad corpus eundem numero, nisi morali & laxâ quadam æstimatione; sicut ignis, aut flamma candelæ non est strictè numero eadem, quæ ardet per totam horam,



horam, sed alia ac alia flamma, ex alio ligni aut ceræ alimento, perpetuo accenditur. *Ignis enim semper fiens & fluens, sicut fluvius*, inquit Aristoteles; *sed hoc latet, propter velocitatem*, quæ posterior flamma in locum avolantis se suggerit.

Arist. c. 1.  
de-luvar.

Displicet tamen Toletus hæc sententia. *Quia iam profectò*, Tolet. lib. 1  
inquit, *nullo modo esset idem numero brutum, sed specie*. Loquitur q. 9. de  
autem potius de brutis, quia in illis non solum materia; sed generat.  
particulæ animæ mortalis cum materia defluunt. Sed in homi-  
ne eadem est ratio, si secundum corpus, non secundum ani-  
mam eum spectemus. Diffluunt enim corpora hominum, per-  
inde atque brutorum. *Quare dico*, inquit Toletus, *quod partes*  
*spermatice semper manent toto vita tempore; quamvis decrementum*  
*passa sint, & sic forma* ( tam anima bruti, quam hominis ) *etiam*  
*in illis manet eadem.*

Partes spermatice ipse & Medici vocant, quæ ex sperma-  
te, sive semine utriusque parentis conformantur in prima  
animalis fabricatione. Tales ossa, nervi, cartilagine, & quæ  
siccitate & albedine, seminis indolem referunt: distinguuntque  
eas Medici à partibus carnosis, quæ ex sanguine concreescunt  
& figurantur.

Sed profectò, seminales partes non minùs ex elementis com-  
pactæ, & dissolubiles sunt, quàm aliæ. Et valde mirer, si ex ma-  
teria officuli cruris foetus, vel potius ex tenui imagine & mol-  
li filo ossis ( officula enim cum primùm in utero figurantur,  
mollia sunt instar muci ) vel hilum anno ætatis centesimo su-  
persit. Fieri tamen ( dum etiam attentè cogito ) hoc inter-  
dum potest. Nam prima illa & mollia ossium lineamenta in-  
durantur paulatim, & dum accrescunt, intertexuntur adven-  
titijs alijs ab alimento partibus, quibus à contrariorum injurijs  
satis firmiter defenduntur. Ossibus enim & duris corporis  
partibus difficulter aliquid abraditur. Vnde ossi senum non  
minora sunt ( quod notari possit ) quàm juvenum, nec de-  
crescunt eadem celeritate, aut proportionem, quâ senilis caro  
defluit:

Vnde verum esse potest, quod affirmant nostri Theologi,  
materiam illam in cruce pependisse, quam Christus olim è

Virgine matre sumpserat. Nam in ossibus, nervis, cartilaginibus, membranis, carniū fibris, & id genus alijs partibus, aliquid à sanguine matris tractum, & à lacte suctum, manere ad annum ætatis trigesimum quartum potuit, quo circiter Christum fuisse vitam credimus.

Hinc quoque apparet animalia perfectius eadem numero, toto tempore vitæ permanere, quàm flammam ignis, quàm flumina, quàm civitates, in quibus post centesimum annum ne quidem unus reliquus invenitur centenarius civis.

Homines etiam magis iidem, quàm bruta, perseverant; quia nihil animæ perdunt cum defluentibus materiæ partibus. Perdunt verò bruta, quorum animæ mortales sunt, & ita corpori suo incumbunt, ut singulæ particulæ animæ à singulis materiæ particulis sustententur; ac proinde cum ipsis decerptæ abeant & corrumpantur. Veluti etiam in nutritione bruti, pars nova animæ in materia alimenti gignitur (quid quid reclamet Scaliger;) est quæ hoc solum animæ rationali & immortalis proprium, ut indivisibiliter eadem in materiam alimenti corporis sui se replicet, & veluti dispergat.

Scal. Exer.  
101.1.51.

## ARTICVLVS VIII.

*Quibus gradibus ascendant incrementa humani corporis.*

**V**Niversa vitæ humanæ periodus in sex partes dividitur, infantiam, pueritiam adolescentiam, juventutem, virilem ætatem, & senectutem; quæ ætates appellantur. Earum discrimen temperamenta diversa faciunt, per quæ homo à principio vitæ usque ad finem gradatim transit; non per causas externas (quæ sæpe temperiem corporis humani ante tempus mutant) sed per internam pugnam qualitatum elementarium, quibus corpus contemperatum est. Vnde ætatem definiunt Medici: Vitæ curriculum, quo corporis temperies per se evidenter mutatur. S. Basilii studio Medicinæ excellenter eruditus, ut Naziazenus testatur, per hebdomadas annorum hanc mutationem, in tribus primis ætatibus fieri ait.

S. Basil.  
Psal. 114.



ait: Infantia, inquit, ἐν τῇ τῶν ὀδόντων ἀποβολῇ in dentium abiectione primam hebdomadam, sive annorum septennium explet. Primo enim septennio molles & lactei dentes abijciuntur, ut firmiores renascantur. Pueritia à primo septennio ad alterum septennium, id est ad annum ætatis decimum quartum extenditur; qui in masculis primæ pubertatis, & ætatis conjugalis initium est. In feminis verò pubertas biennio hanc anticipat ætatem. Vnde anno ætatis duodecimo, tam Civili quàm Canonico jure, viris possunt conjugari. Tertium septennium adolescentiæ datur, id est à quarto decimo anno ad vigesimum primum. Quo tempore lege Ecclesiasticâ ad solennia jejunia obligari adolescentes incipiunt; quia finitâ adolescentiâ, & stante jam corporis incremento, aut saltem lentius procedente, non aded multo alimento indigent, sicuti prioribus ætatibus, festinante incremento, indigebant. Vnde tunc legibus juniorum nondum astringebantur. Cum enim accretio ex residuo alimenti fiat, ut Theologi nostri & Medici dicunt ( id est, ex ea parte quæ necessaria non est ad reparandum quod de corpore nostro defluit & absimitur ) debet adolescens duplex alimentum sumere; ut uno fluentes corporis sui ruinas impleat, altero (quod huic fini superfluit) incrementa ædificet. Et quidem initio ita accretio festinat, ut primo quinquennio, si Aristoteli credimus, puellus *dimidium ferè longitudinis rapiat totius magnitudinis*, qua reliquo toto tempore comparatur. Licet etiam ad triennium hoc revocet Plinius. Nam in trimatu suo, inquit, cuique *dimidiam esse mensuram statuta, certum est.*

S. Th. 2. 27  
q. 147. a. 4.  
ad 2.

Arist. lib. 7.  
c. 18. de ge-  
nerat. ani-  
mal.

Plin. lib. 7.  
c. 16.

Circa annum verò vigesimum & adolescentiæ finem, prima barbitij lanugo, cute calore ætatis laxatâ, maribus erumpere solet.

*Creverat hic vultus bis denis fortior annis,*

Martial.

*Gaudebatque suas pingere barba genas.*

Vnde de Romanis tyronibus, qui anno ætatis decimo septimo incipiebant nomen militiæ dare, Silius:

*Pubescit miles castris, galeaque teruntur*

Sil. Ital.

*Nondum signata flavâ lanugine mala.*

Lisp.  
lib. 1.  
diul. 2.  
Milit.  
Rom.

Ovid.

De pube enim genarum & menti id accipiendum est: quod  
Lipsum nostrum fefellisse videtur, dum Silium accusat,  
quasi ante quarti decimi anni pubertatem milites adscriptos  
militiæ censuerit. Certè gemellâ phrasi Poëta alter, *Impubesq̃*  
*genas* dixit. Et alius,

*Parce, pubesco, iuvenesq̃ mollis*

*Contegit lanugo genas.*

Arist. sect.  
19. Pro-  
blem.

Ab anno vigesimo primo ad trigesium juvenus extenditur.  
Ad quem tamen usque homines adhuc proficiunt, inquit  
Aristoteles, τῷ πλῆθει, ἢ τῇ παχύτητι, *copiâ, aut crassitudine*. Vn-  
de licet cum finibus adolescentiæ corpus adolescere secundum  
longitudinem cesset (& ita verum sit, quod ait Scaliger, *omni-  
bus persuasum esse, post tricesimum annum augmentum cessare*) secun-  
dum tamen alias dimensiones non rarò sibi aliquid adijcere  
pergit. Nec loquimur de abdomine & pinguedine illa præ-  
ter naturam, in qua multos etiam post trigesium annum  
videmus proficere; ossibus tamen siccitate & duritiâ suâ ul-  
tra pristinam magnitudinem minimè sequacibus.

Luc. 3.

Ab anno trigesimo matura & virilis ætas incipit, & durat  
ad quinquagesimum. Vnde in Episcopo, & Abbate, ubi ma-  
turitas ad regimen magis necessaria est, Ecclesia trigesium,  
ut minimum, ætatis annum olim exegit; quando ultimi illi  
dentes erumpere solent, quos Hippocrates σωφρονιστῆρας, *dentes*  
*sapientia* appellat. Nec etiam Hebræis fas erat munus Do-  
ctoris, aut Prophetæ sumere ante illum annum. Quod Io.  
Baptista, & Christus observavit, qui discipulos colligere &  
cælestem doctrinam spargere incœpit, cum esset *quasi anno-  
rum triginta*. In Academia quoque nostra nemo, nisi per dis-  
pensationem, ad lauream Magistralem in sacra Theologia  
promoveri potest ante illum annum.

Arist. lib. 2.  
o. 14. Rhet.

Aristoteles quoque corpus maximè ἀκμάζων, *vigere* dicit,  
ab anno trigesimo ad trigesium quintum; animum verò,  
usque ad quinquagesimum & primæ senectutis limen. Tunc  
enim vigor animi cum corpore refrigescere incipit; ideoque,  
ut paulò post dicam, militia Romana militi quinquagenario  
solebat dare missionem.

Quia



Quia vero corporis plenus vigor à trigésimo & paulum ultra tenditur, & Christus ea ætate resurrexit; idcirco iuxta <sup>Ephes. 43.</sup> <sup>S. Hieron.</sup> <sup>Epist. 37.</sup> *Eccelesiarum traditiones & Apostolum Paulum, in virum perfectum & in mensuram ætatis plenitudinis Christi resurrecturi sumus. In qua ætate & Adam Iudei conditum autumant, ait S. Hieronymus.*

Ad primum sacrum Ordinem, qui est Subdiaconatus, Ecclesia solum expectat adolescentiæ finem, id est annum vigésimum primum expletum: ad Presbyteratum verò tres alios <sup>Trid. sess. 23. c. 12.</sup> adijcit, ad digerendam adhuc paulisper ætatis cruditatem, propter Ordinis excellentiam. Iure quoque civili, qui infra vigésimum quintum est, Minor appellatur, & in idoneus rerum suarum arbiter existimatur; cum inter omnes constet, inquit Vlpianus, <sup>l. 1. D. de Minorib.</sup> *fragile esse & infirmam huiusmodi ætatem consilium*; ideoque talibus dantur Curatores. Ius tamen Longobardicum plenâ pubertate, id est anno decimo octavo res suas Minoribus permittit.

Senectus prima, & cani incipiunt circiter annum quinquagesimum. Inde nullo certo annorum numero vita finitur. Multi tamen anno sexagesimo tertio cadunt, aut periclitantur; & ejus rei innumera in Belgio exempla se observasse narrat Lemnius. Ut non de nihilo Cæsar Augustus Epistola quadam ad Cajum nepotem, sibi congratuletur, <sup>Lemni. lib. 2. 32. de occult. nat.</sup> *κλιμακτηρια communem seniorum omnium; tertium & sexagesimum annum evasisse*. Medici tamen quidam rident, & nuper nobilis Academiæ nostræ Archiater Thomas Fienus, in Disputationibus publicis sæpe, nobis audientibus, climacteris istius pericula exhibilare solitus; isto ipso tamē vitæ suæ anno extinctus est. Cum tamē cum non semel differentem audivissemus, Medicum eruditum & expertum non posse decorē & sine infamia artis, ante annum septuagesimum vitâ decedere. Is enim, inquiebat; vitæ humanæ ferè communis à natura positus finis est; quem à Medico non transgredi, nullum artis dedecus est; sicut nec à natura, tanquam potentiore, vinci.

Causa verò, cur is annus tot senum mortibus sit infamis; quia lege annorum climactericâ, & per septenos, aut novenos annos scæculi cumulantur humores & materia morborum inhumano

humano corpore; qui nisi tempestivè vacuentur, in morbos putrescunt, & sæpe generant mortes. Sic per climacteres, sive per scalas septenium annorum scandendo, septimus, decimus quartus, vigesimus primus &c. sunt, climacterici. Quia verò noveni quoque anni periculosi sunt, hinc si numerus novenarius cum septenario concurrat, augent & cumulant periculum. Annus verò sexagesimus tertius, ex novies septenis, aut septies novenis consurgit.

Fernel. lib.  
3. c. 10.  
de temper.

Ceterum movere neminem debet, quod ætatis humanæ fines & articulos aliqui paulò aliter definiant. Nam res ista latitudinem aliquam habet, ac in varijs hominum temperamentis, ætatum singularum spatia longiora, aut breviora sunt. Deinde in eodem homine unaquæque ætas cruditatem & maturitatem suam habet. Hinc Fernelius *Infantiam* tertio, aut quarto anno finit; abinde *pueritiam* decimo; hinc usque ad decimum octavum *pubertatem* interponit. Decimus enim octavus censetur plenæ & maturæ pubertatis annus. A decimo octavo ad vigesimum quintum *adolescenciam*; ad trigesimum quintum, aut quadragesimum *juventutem*; ad quinquagesimum virilem & constantem ætatem; inde ad sexagesimum quintum *primam senectutem* extendit.

Sequitur *senectus decrepita*, usque ad mortem; cui natura terminum certum nullum posuit.

Possumus igitur dissidentes sententias ad aliquam concordiam revocare, dividendo (quod etiam Auctores quidam faciunt) unamquamque ætatem in primam & secundam; aut si mavis, in crudam & maturam.

Prima ergo & cruda infantia quarto circiter anno; secunda & matura septimo (quando accedere usus rationis incipit) finiatur. Hinc prima pueritia ad annum decimum; secunda ad decimum quartum extendatur. Deinde neglectâ *pubertate* Fernelij (quam adolescentia intra se satis complectitur) prima adolescentia à decimo quarto ad vigesimum primum; secunda usque vigesimum quintum porrigatur. Inde prima juvenus ad trigesimum; secunda ad trigesimum; quintum. Unde vetusta illa & sobria Roma, usque ad istum annum, vi-

num



num non bibebat, inquit Turnebus; quasi omnis infra 35-annos ætas, nimis juvenilis & fervida, viniq̃ue intolerans esset. Prima autem virilis ætas, à trigésimo quinto ad quadragesimū quintum, secunda ad quinquagesimū finitur. Senectus prima abhinc ad sexagesimum, aut (ut hoc Fernelio demus) ad sexagesimum quintum exit. Inde decrepitum & capulare senium lento gradu, & incerto fine, usque ad capulum & sepulchrum prorepat.

Ex his intelligitur, cur Saulus, qui Act. 9. *vir* appellatur, paulò antè Act. 7. *verius adolescens*, sive *juvenis* nuncupetur. Excesserat enim tunc, veriori annorum ejus calculo, ætatis trigésimum, & circiter trigésimum quintum, id est in finibus secundæ juventutis agebat; ideoq̃ue juvenis adhuc erat, & unà tamen tam adultus, ut vir haberi posset. Qui enim circa duarum ætatum confinia sunt, nunc superiori, nunc inferiori accenseri solent. Imò Seneca *adolescētiā* tam latè accipit, ut quidquid ætatis infra senectutem est, ei imputet. *Quemadmodum senectus adolescentiam sequitur*, inquit, *ita mors senectutem.* Senec.

Aliam divisionem ætatis, ad distribuenda Reip. munia, Ser. Tullius Rex Rom. olim instituit. Nam *pueros existimavit*, inquit Tubero apud Agellium, *qui minores essent annis septemdecim. Atque inde ab anno decimo septimo, quos idoneos iam esse Reip. arbitraretur, milites scripsit: eosq̃ ad annum quadragesimum sextum* (Varro & Cassiodorus pro sexto, quintum ponunt) *IVNIOR-ES*, suprag̃, eum *SENIORES* appellavit. Post quintum enim & quadragesimum annum vires & animus frigesce- Agell. lib. 10. c. 28.  
re plerisque incipiunt, & cogitationis de deferenda militia admonent. Si tamen in ætate inferiori non omnia sua stipendia implessent, ad annum quinquagesimum, ut Lipsius noster docet, militiæ tempus extendebant. Quem morem alludens Seneca, *Lex à quinquagesimo anno*, inquit, *militem non cogit.* Plato tamen in sua Rep. à vigésimo ad sexagesimum annum, militiæ idoneum tempus definivit. Aliter longè quàm sui Athenienses, qui militiā anno quadragesimo exhibant, inibant verò tyrocinium decimo octavo, id est plenā & maturā pubertate. Porro singulæ ætates sicut annis, ita temperamentis distinguuntur.

T t

Infantia

Galen. lib.  
2. de tem-  
per.

Infantia omnium calidissima & humidissima est, & omnis superior ætas, quo infantia propinquior, eo amplius de istis qualitatibus participat. Vnde senectus, quia longissimè ab infantia recedit, frigidissima & siccissima omnium est. Calor verò infantia copiam humoris, in quo laborat, paulatim digerit & exhalat, siccandoque emendat temperiem. Hinc infantes & pueri plurimum per cutem expirant, inquit Galenus, quia substantia eorum humida; parum verò exhalant ætates sicca. Quod verum est, quantum est ex parte materiae, & caloris resolventis. Nam alias pori succo nimis oppleti in parvulis impedire possunt liberam transpirationem.

Psal. 89.

Absolutissima ergo hominis temperies ea ætate contingit, *que punctum vitæ medium modico intervallo antecedit*, ait Fernellius, & *ab hoc in aliquanto maius post spatium porrigitur*. Vnde si dimidium & culmen vitæ sit annus trigessimus quintus (ut in ijs quorum omnes dies futuri septuaginta anni) temperatissima vitæ pars erit, juxta Fernellium, triennij à trigesimo quarto circiter ad trigesium septimum annum. Qui vero in potentatibus, & robore tanto sunt, ut octoginta annos victuri sint, dimidium erit quadragesimus annus, & exactissima temperies erit annorum trigesimi noni, quadragesimi, quadragesimi primi. Vnde Rex Ezechias annorum triginta novem, moerens se ex isto medio flore, & velut fastigio ætatis repente præcipitari: *Ego dixi*, inquit, *in dimidio* (Interpretes 70. *in tō vsh, in ipso excelsa*) *dierum meorum quædam ad portas Inferi*. Cum verò Deus per Prophetam ei dixisset, *Morieris tu, & non vires*, annos insuper illi quindecim, lacrymis exoratus,

S. Aug. lib.  
6. c. 17.  
de Genes.

adjecit. Vnde S. Augustinus duplicem vitæ terminum esse colligit: unum *secundum causas inferiores*, id est secundum humores & temperiem corporis, secundum quas moriturus jam jam erat Ezechias: alterum, *secundum voluntatem & præscientiam Dei*, qui omnibus causis inferioribus superior eas impellere, sufflaminare, & millesimis alijs modis flectere & moderari potest. *Vita enim hominis*, ait Augustinus, *brevius produci & non tenditur, quam Deus dispositio temporum novit universi-  
tatis moderamini consonare.*

S. Aug.  
Epist. 28. ad  
S. Hierony.

Et



Et hæc Dei universitatis moderatrix voluntas termino vitæ, quem causæ inferiores facturæ erant, quindecim illos annos Ezechiaë addidit. Priorem etiam illum vitæ terminum ultrà, aut citrà movere medicamentis suis possunt Medici, non possunt posteriorem; quia voluntas efficax Dei impediri non potest, incidet quæ certissima mors in illum præcisè terminum, quem constituit. Inde enim illud Iobi: *Constituisisti terminos eius, qui præteriri non poterunt.* Hæc eadem voluntas est, quæ multos rapit ante diem illum, quousque, causæ inferiores vitam producturæ erant, ne malitia intellectum mutet, aut ne diuturnitas vitæ scelera & æternas ærumnas nimis accumulet. Veruntamen superior illa Fernelij doctrina non usquequaque placet, quâ medium longitudinis vitæ maximè vigère credit. Nam longitudo senectutis interdum ceterarum omnium ætatum simul tempora adæquat: unde in talibus ante medium vitæ deficere, & ruere in pejus optima temperies incipit, ut Art. proximo dicemus.

Iob. 14.

Sap. 4.

## ARTICVLVS IX.

*Decrementum, & senectus hominis.*

**C**Orpus humanum non ab iisdem causis resolvitur & decrescit, à quibus incrementa sumpsit. Anima enim auget actione vitali suum corpus, ut commodum sibi domicilium fabricet; *resolutio autem & consumptio est à calore ignis*, ait S. Thomas; quæ actio vitalis non est, vitâ primâ in eam nihil influente. Anima quippe, quantum potest, substantiam corporis sui conservat, & diffuentes particulas potius alligat & continet, quàm earum fluxum incitet. Vnde licet in generando carne utatur calore naturali, ut instrumento, in resolvenda tamen, solum illum agere sinit, sicut nec frigus & ceteras causas adjuvat quæ temperiem corporis sui labefactant.

S. Th. lib. 3  
c. 147. contra  
Gent.

Hinc falli eos intelligis, qui corpus nostrum servatâ proportionem perinde decrescere, atque accrescere dicunt. Nā accretionem anima, quæ proportionem inter membra sui do-

T t 2

micilij

micilij molitur, efficit, non decretionem. Patet quoque ad oculum, ossa, quæ custoditâ exactissimâ ad alias partes proportionæ, secundum longitudinem & crassitiem adoleſcunt, in senectute nihil, quod sentiri possit, diminui; imò postea in Coemeterijs, ut notat Argenterius, multos annos pari longitudine & crassitie durare. Siccitas enim & durities ossium defendit, ne faciliè aliquid decerpi possit.

Aristot.

Molles igitur partes, & præcipuè carnes senectute desinunt: & inde contractio & corrugatio illa cutis, quam videmus in senibus, postquam succus & carnositas effluxit, quæ antea implebat & intendebat cutem. Vnde Aristoteles corpora senum pulchrè *ὡς περ τὰ παλαιὰ οἰκοδομήματα* *vetustis ædificijs similia* esse dicit; rimosa nempe & *ὑπὸ νοα* *facile transpirabilia*. Poros enim succo inanes ac hiantes habent; ideoque etiam frigus, & alias ventorum ac aëris injurias penetrabilius sentiunt senes.

St. Aug.  
Serm. 246.  
de temp.

Succo autem carniū & parrium aliarum abeunte, humidum quoque radicale evaporatur, fugitque cum eo calor naturalis, nutritionis & vigoris opifex. Succedit frigus & siccitas, id est senectus, quæ pedetentim corpus ad sepulchrum ducit. Senes enim omnes non tantum frigidi, sed etiam sicci sunt; licet muco, tussi, & destillationibus cernamus eos abundare. Sed humores isti excrementitij sunt, continenturque in receptaculis senilis corporis, ut aqua in sicco vase. Vnde S. Augustinus senum ebrietatem incessens, & ad siccitatem istam alludens: *Tantus est, inquit, in malis senibus plerumque gurgis aviditatus, & insatiabilis vorago ventris & gutturis, ut quantâ boni senes prudentiâ serenantur, tantâ isti vinolentiâ sepeliantur: quasi ad hoc in ijs arida viscera & succo exhausta curventur, ut ad vigorem pristinum reparandum, ebrietatis inundatione riganda sint.*

Itaque; ut senes utilem succum, & humidum radicale diutissime retineant, uti debent: cibus succulentis, & cocturæ facilis. Modicus enim ventriculi & viscerum calor cibos du-ros & pertinaces euincere non potest. Iactent valetudinem & vires suas senes quidam pernæ, laridi, aut crudæ halecis esu; noli imitari: si non enim jam, postea sentient. Naturam enim sine dubio labefactant, & mortis corripunt gradum.

Veteres



Veteres in senio melle plurimo utebantur, exemplo apum, quæ dulci illo humido abundant, ideoque *μακροβιώτερον ἑτέρων ζώων ζῶον*, longioris vita, quàm alia maiora animalia sunt. Aristot.  
 Modico etiam vino senum cibos irrigari iuvenit. Alit enim vinum, quidquid Mercurialis dicat, imò facillimè alituræ est, licet fluxæ nec diu pertinacis. Galenum potiùs audiamus: Si *modo quidquid alit, cibus est*, inquit, *vinum etiam in genere ciborum est collocandum. Ceterum, vinorum omnium rubra simul & crassa* Galen. lib. 3. de aliment.  
*generando sanguini sunt accomodatissima; utpote quæ minima mutatione indigeant, ut sanguis fiant.* Hinc naturæ non minùs quàm carminis consultus Homerus, Machaonem Medicum seni Nestori quantumvis saucio (quod tamen mirum, cum vinum vulnera inflammer) vinum Pramnium, *παχὺν καὶ πολὺ τροφὸν* crassum & alibile porrigentem inducit; non ad sedandam sitim, sed ad alimenti plenitudinem, ait Athenæus. Athenæ. lib. 1.

Quando autem corpora decrefcere & in senium vergere incipiant, incertum, nec in omnibus idem temporis articulus est. Quidam statim à trigesimo, alijs trigesimo quinto anno, aut seriùs, à meridie ætatis versùs occasum inclinant; sed insensibiliter ferè, donec ad quinquagesimum, id est, primæ senectutis limen pervenerint. Hoc autem in plerisque ex oculorù caligine & primo perspicillorum usu intelligitur. Ab hoc verò tempore, laxis habenis corpora defluere, & singulis annis velociùs, per mediam & ultimam senectutem, ad finem festinare incipiunt. Ultima enim ætas nostra similis est lapsui gravium deorsum, quæ quo magis ad centrum & terminum appropinquant, eò magis casum accelerant. Aded ut non de nihilo dixerit alicubi Cajetanus, *septuagenarium plus uno mense,* Cajet. 2. Cor. 4.  
*quàm quinquagenarium uno anno, deficere.*

Hinc septuagenarij senes legibus jejunijs solvuntur. Si enim maior 70. annis à muneribus personalibus excusetur, multo magis à *ieiunio, quod est maximum onus*, ait Silvester. Imò plerique jam ab anno 60. eo onere eos levant, quia sexagenarius perfectè senex est, & pluries ac modicè refici debet, ne unicà & plenà cibi ingestione calor naturalis, modicus & refrigescens, nimis obruatur.

Navarrus tamen post Cajetanum, seniles vires spectandas censet, sine certi temporis designatione. Nam gratias Deo, inquit, octogesimum annum agens, perinde possum ieiunare, ac cum agerem sexagesimum, imò & quinquagesimum. Attamen, ut opinè Cajetanus, cum dies annorum nostrorum sint 70. anni, sexagenarius communiter prope naturalem interitum est. Vnde nisi evidenter constet, quòd sexagenarij possint alimentum pro ieiunio opportunum digerere & tolerare, non debent conari ad ieiunium. Imò, ut omni eos scrupulo liberent recentiores, sexagenarium, etiam satis validum, excusant; quia deficit amplius quàm ipse intelligat, & maturè fulcra subijcienda ruinæ, quæ sine suffamine & remedio, post annum septuagesimum properare solet in mortem.

Nihilominus tamen tempus hoc defluendi & decrescendi longius sæpenuerò est, quàm accrescendi. Natura enim perficere se properat; deficit autem paulatim & quàm potest diutissimè. Similis æstui maris, qui multis in locis, quinque horis ascendendo impletur, septem descendendo relabitur.

S. Hieron.  
lib. 2. c. 8.  
advers.  
Iovin.

Si enim verum est, quod ex Hippocrate S. Hieronymus, non manere in uno statu naturam corporum, sed aut crescere semper, aut decrescere, etiamsi id semper sensu notari non possit; profectò post annum trigessimum (quando accretio, ut plurimum, stare solet) corpus in Mathematico æquilibrio inter accrementa & decrementa nullo ferè momento, aut non diu hærebit; sed sicut sol à Meridiano culmine diei mox in occasum; ita illud versus interitum devertere molliter & insensibiliter incipiet. Cum autem non solum per triginta alteros annos, id est usque ad vitæ sexagesimum, sed etiam ad octogesimum, & ultra deficere possit, patet quanto longius decretionis, quàm accretionis tempus sit. Imò verò propriæ senectutis tempus (cujus initium ab anno vitæ quinquagesimo incipit) omnes ætates inferiores simul æquare, aut superare potest. Nonnulli enim etiam hodie ad annum centesimum perveniunt, hoc est tam diu senes, quàm infantes, pueri, adolescentes, juvenes, & virilis ætatis sunt. Nullus enim senectuti, ut ceteris ætatibus, terminus certus præfixus est, sed divina



divina providentia, quæ vitas nostras, ad fines sibi placitos, corripit, aut producit, senes non solummodò centenarios, sed non paulò etiam longæviores quandoque facit. Quod non tantum olim in infantia, aut adolescentia Mundi, ante & post diluviū; sed etiam in senectute Mundi & novâ lege; maximè circa initium Ecclesiæ fecisse in pluribus, ut Dionysio Areopagitâ, Simeone Fratre Domini, Ignatio, Polycarpo, Quadrato, Hermâ Cæs. Baronius notat. Vt nempe isti qui Dominum, aut Apostolos in carne viderant, veteris doctrinæ testimonijs hæreticam novitatem confutarent. Et tamen ne miraculum esse videretur, naturæ rem sic Deus disposuerat, ut etiam inter infideles eo tempore non pauci, ultra annum centesimum senectutem extraxerint. Nam, ut ex Plinio tunc superstitè narrat Barontius, in Censu Vespasiani & Titi, ex solo uno Italiæ inter Apenninum & Padum tractu, *Annos cxx.* Plin. lib. 7. *Parma tres edidere. Brixelli unus cxxv. Parma duo cxxx.* c. 49. *Placentia unus cxxxix. Faventia una mulier cxxxii. Bononia unus. & Arimini alter cl. Tertulla cxxxvii. Circa Placentiam sex annos cx. detulere, quatuor cxx. unus cxi. Ac ne pluribus moreremur in re confessa, in regione Italia octava c. annorum censi sunt homines quinquaginta quatuor, annorum cx. homines quinquaginta septem, annorum cxxv. homines duo, annorum cxxx. homines quatuor, annorum cxxxv. aut cxxxvii; homines totidem, annorum cxi. homines tres.*

Et priore Claudij Cæsaris Censu, narrat Auctor idem, T. Fullonium Bononiensem cl. annorum censum fuisse, idg collatis, inquit, censibus quos ante detulerat, vitag argumentis (etenim id cura Principi erat) verum apparuisse. Omitto Nestorem illum triseclisenem, qui apud Poëtam de se narrat, aut fabulatur, vixi

*Annos bis centum; nunc tertia vivitur ætas.*

Certè Ioannem de Stampis, cognomento De temporibus, plus cccclx. annis vixisse faciunt, inquit Æmilius, sub Carolo Magno meruisse, & Ludovico Crassi filio decessisse. Corripit tamen ipse Æmilius tam effusum annorum numerum, & solum clx. circiter annorum vitam ei contigisse, ait; id quod tamen etiam consenscenter

Baron. ad  
An. 76.

Plin. lib. 7.  
c. 49.

Idem lib. 7.  
c. 48.

Ovid. 12.  
Met.

P. Æmil.  
lib. 5. de  
gest. Franc.

*nescente Mundo, inquit, magnum & memorabile sit.*

Psal. 89.

Nec ista cum Scriptura sacra pugnant, quæ definit *dies annorum nostrorum septuaginta annos*; tanquam scilicet terminum, ad quem pertingere plurimi homines possint, si intra temperantiæ & rationis leges viverent. Addit enim, *si autē in potentatibus*, id est, in potenti & robusta aliqua complexione, *octoginta anni*. Nec etiam ibi sistit, sed *& amplius eorum*, inquit, *labor & dolor*. Potest enim quispiam octogesimum supergredi, & ultra etiam centesimum languidam & laboriosam vitam extrahere. Ideo enim sapientes olim spatium 100. annorum, tanquam longissimam hominis vitam, pro seculo determinaverunt. Potest tamen etiam ultra exiri. Quod autem usque dici non potest, quia limes nullus positus est. Hebræi tamen, & ex Latinis Tostatus & Rupertus, 120. annos remotissimum humanæ vitæ terminum constituunt, qui quaternas Orbis Saturni revolutiones complectitur. Creduntque indicatum Gen. vi. *Eruntque dies illius (hominis) centum viginti annorum*. Et hoc interpretamentum, quamvis ab Augustino & Hieronymo rejectum, fortiter defendit Vallesius. Nam etsi, inquit, post hoc Dei decretum, à diluvio usque ad Abraham plerique omnes 400. annis (quod Augustinum movit, ut ad tempus delendi per diluvium generis humani potius verba illa referret) lex tamen de 120. annis à Deo generaliter lata, non idcirco cadit; quia dispensatio legem quidem mutilat, sed non universim interimit. Statim autem à diluvio, in tanta hominum adhuc paucitate, dispensatione, & vita longiore opus fuit, ad accelerandam humani generis multiplicationem. Dispensavit quoque aliàs Deus in ista lege ob alios fines, quos plerumque ignoramus; ut in tot infidelibus, quos ex tabulis Censûs Vespasiani paulò antè enumerabat Plinius.

Gen. 6.

Franc. Valles.  
Ies. c. 7.  
Philos.  
sacræ.

Gen. 11.

Deinde lex non sic intelligenda, quasi plerosque, aut multos senes velit Deus ad 120. annos pervenire; sed quia causas naturales tunc ita disposuit, ut omnes passim senio citra illum terminum finiantur, rarissimi ultra.

Addit quoque Vallesius, id accipiendum esse, de termino vitæ, non ultra quem nemo vivere possit; sed non possit, defectu



defectu caloris & virium, solemnia vitæ munia obire. Quod intelligens Moyses, cum annum vitæ 120. attigisset (quo etiam extinctus est) non dixit, se non posse ultra vivere, sed *centum viginti annorum sum hodie, non possum ultra egredi, & in-* Deuter. 31.  
gredi: hoc est, præ senio & defectu virium, non possum amplius Dux esse populi.

Cum verò deinde labente paulatim in pejus hominum temperamento, plerique senes, ut adhuc hodie, citra octogesimum deficerent, lex & terminus ille 120. annorum ad 80. revocatus est, dicente Davide, *Si in potentatibus, octoginta anni,* Plas. 89.  
*& amplius eorum, labor & dolor.* Post enim octogesimum, quod paucissimi pertingunt, non tam vivunt, quam diu moriuntur, instar viatorum pomorum, sine colore, odore, vigore.

*Iamq; ævo laxata cutis, sulcisq; genarum*

*Corruerat passâ facies rugosior uvâ; & vix ulla veteris vestigia forma.*

*Nec tantum gelidus tardante senectâ*

*Sanguis hebet, frigent effæta in corpore vires;* sed etiam *Debilitat vires animi, mutatque vigorem.* Et quidem in multis adeò festinè, ut lex Romana ab anno sexagesimo missionem daret Senatori, ne negotijs Reip. interessè oporteret; quasi ætas ista consilio & animo etiam delinquere inciperet. Dicit hoc Seneca. *Lex à quinquagesimo anno militem non cogit, à sexagesimo Senatorem non citat.* Senec. c. ult. de brev. vit. vitæ.  
Augēt tamen numerum Lipsius ex Seneca patre, & à sexagesimo quinto, rescribit: quia mihi nimis maturè, inquit, mitti Senator videtur, in ævo, quod prudentia maximè factum.

Et sanè tam præsens & vegetus quibusdam etiam post octogesimum est animus, ut Theophrastus, Aristotelis ille in Schola successor, 85. annorum moriens, questus fuerit, *se mori, cum inciperet vivere.* Licet enim *senum etiam sanitas quærimonys non vacet,* ut ait Galenus; tamen ubi animus adhuc utcumque viget, & secundum virtutem vivere eum delectat, gratissima est illa ætas, quæ juvenili fervore domito, pacatius tranquilliusque Deo & menti vacare potest. Sic gratissima enim *sunt poma, cum fugiunt,* inquit Seneca. Et quàm dulce est, ait  
V u fatigasse

*fatigasse ac reliquisse cupiditates.*

S. Hierony.  
Præf. lib. 2.  
in Amos.

Talem senem Mart. Navarrum nuper fuisse accepimus, qui anno ætatis 80. inclytum etiam illud suum Manuale Confessariorum scribebat, ut paulò antè narrantem audiebamus. Sanctus verò Hieronymus, ubi universa senectutis mala eleganti & suo stylo depinxisset: *Cum hac*, inquit, *ita se habeant, in malorum comparatione tolerabilius sustinebo morbos, dummodò una & gravissima domina libidine caream.* Additque: *Patitur quidem & senectus nonnunquam incentiva vitiorum sed aliud est titillari, aliud obrui voluptatibus. Hic rarò inter emortuos erineres scintilla sublucescens reviviscere nititur; sed tamen incendia non potest suscitare.*

Ita castissima illa anima omnia mala senectutis bono lubentique stomacho digere parata erat, modò unus Angelus Sathanæ carnem ejus colaphizans, manum & aculeos remitteret.

Hoc quoque sine mentione abire non debet. Theologos nostros, ætatem Mundi ad similitudinem hominis, in sex partes, per insignes temporum articulos distinctas dividere. Infantia Mundi ab Adamo ad Noe, pueritia inde ad Abrahamum, adolescentia usque ad Davidem, juvenus ad captivitatem Babylonicam, ab hinc virilis ætas usque ad Christum, senectus à Christo ad finem seculorum. Vnde *sicut in alijs hominis ætatibus*, inquit S. Thomas, *est numerus annorum determinatus, non autem in senio: quia senium (plenum) incipit ab anno sexagesimo, & aliqui vivunt per cxx. annos; ita non est determinatum, quantum senectus Mundi debeat durare.* Fortasse igitur, quia senectus hominis universas simul ætates priores aliquando æquat, & nonnunquam superat; senectus Mundi à Christo nato per quatuor millia annorum, aut ultra decurret: totidem enim circiter anni à Mundo condito ad Christi natalem effluxerant. Quod si verum est, bono animo sumus, non videbimus Antichristum.

S. Th. Heb.  
3. Lect. 5.



## ARTICVLVS X.

*Imago senectutis parabolicè depicta ab Ecclesiaste.*

**S**ed mirabili figura & imagine dicendi, senectutis incommoda describit alicubi Spiritus sanctus, quam iuvat raptim hîc repræsentare.

*Memento, inquit, Creatoris tui, in diebus iuventutis tuæ ante, Eccle. 12. quam veniat tempus afflictionis, & appropinquent anni (senectutis) de quibus dicas, Non mihi placent. Antequam tenebrescat (ob- tenebrescere videatur oculo caliganti) sol & lumen, & luna, & Senec. stella. Sic Harpastæ vxoris Senecæ fatua, nesciebat esse se cæcam. Epist. 50. Subinde pedagogum suum rogabat ut migraret, aiens, domum tenebro- sam esse. Sic senes semifatuellii quandoque conqueruntur, cæli factam mutationem, solem & dies non perinde illucescere, sicuti meminerunt in sua iuventute.*

Pergit Ecclesiastes. *Et revertantur nubes (materia nova catarrhorum) post pluviam, priori catarrho deciduo: ita ut in senibus catarrhus catarrhum sequatur, sicut pluvia (sole paulisper iaterlucente, & vaporem novum in nubes elevante) post pluviam solet. Caput enim humanum est instar mediæ regionis aëris, in qua nubes condensantur, & deorsum replaunt: aut instar capitis alembici, in quo Chymicorum fumi constipantur, & in subiecta vascula restillant. Cerebrum enim omnium partium animalis frigidissimum est, ad vapores constringendos, qui abundè ex corporibus senum ascendant; cùm eorum ferè intestina superfluis humoribus narent.*

Hinc frequentes illæ senum sputationes, humiditas & infantia nasi, repudiumque illud seniculæ uxoris:

*Iam gravis es nobis, & sæpè emungeris, exi Ocyus, & propera: sicco venit altera naso.*

Juven.

*Nubestamen post pluviam, crassos vapores qui ante oculos senum oboriuntur post frequentes lacrymas, interpretatur Andr. Laurentius, Christianissimi Regis nuper Archiater celeberrimus.*

V u 2

Addit

Addit deinde Ecclesiastes. *Quando commovebuntur custodes domus:* sensus omnes tam interni, quàm externi, qui ad custodiam corporis (quod est domus animæ) excubant in capite. Commoventur autem & contremiscunt simul omnes sensus, in tremulo & senili capite. *Et nutabunt* (Hebr. *pervertentur*, seu *curvabuntur*) *virii fortissimi:* geminæ tibiæ, quibus tanquam duobus fortissimis bajulis moles corporis sustentatur. Capita istorum virorum sunt genua, ventres sunt suræ, instar ventrii tumidæ; ideoque Græcis γαστήριον ventres tibiæ dictæ. Curvantur autem & nutant varo & titubanti incessu tibicines illi, & virii olim in juventute sua fortissimi.

*Et otiosa erunt molentes.* Dentes cessabunt molere cibum, quia senes paucis dentibus qui ijs supersunt, vix uti audent; cum alveolis mandibularum nimis laxè & infirmiter hæreant. Nec necesse est, *molentes* interpretari solos dentes, qui propriè *molares* vocantur, obtusi, & in profundo oris collocati. Nam etiam incisorijs, & omnes omnino, cibos molunt. Deinde paulò post redibit iterum mentio dentis *molentis*, qui non tam molaris, quàm incisivus & anterior debet intelligi.

*In minuto numero.* Etiam numero pauci, quia siccitate & defectu alimenti senibus excidunt; ut prodigij instar, meruerit à Spiritu sancto narrari, quòd Moyse, centum viginti annorum seni, non caligaverit oculus, nec dentes fuerint moti.

Deuter. 34 *rum seni, non caligaverit oculus, nec dentes fuerint moti.* Otiosa molentes autem, seu molitrices genere feminino dixit, quia dentes velut feminas in pistrino molentes consideravit.

*Et obtenebrescent videntes per foramina.* Caligabunt ex siccitate humorum, corrugatione tunicarum, multitudine excrementorum, paucitate & opacitate spirituum, oculi qui per foramina cranij foras prospiciunt. Hebraicè paulò concinnius, *videntes in fenestris*, Globi enim oculorum in cavis suis, tanquam fenestris, ad prospiciendum positi sunt.

*Et claudent ostia in platea.* Catarrhi & phlegmata ex cerebro senili perpetuò destillantia claudent ostium, quo aspera arteria in planitiem oris, tanquam in spatiosam plateam & forum spectat; hoc enim vox Hebraica significat. *In humilitate vocis molentis:* cum humili, exili, & rauca voce dentis unius



tis unius anterioris, qui incisivus vocatur, & unde incipit  
cibus moli. Dentes enim anteriores, percussu aëris ad eos  
allisi, ad formandam & articulandam vocem maximè ju-  
vant. Vnde anus edentulæ vix articulatè loquuntur: & præ-  
sertim laborant in pronuncianda vocali E. quæ maximè  
dentium ope debet formari. Hinc in Anglicanâ linguâ,  
ubi vocalis illa E. familiarissima est, anus & senes edentuli,  
sunt ferè muti. Similiter in Polonica & sibilante lingua. Nam  
sibili dentibus quoque frangi & exsibilari debent. *Molentis ve-*  
*rò, numero singulari, potius quàm molentium, dixit; quia seni-*  
*culi unicum sæpe dentem habent, quo se utcumque ad balbu-*  
*tiendum adiutant. Claudicat ingenium, delirat linguaque, mensque.*

*Et consurgent ad vocem volucris.* Laborabunt insomniâ, ex-  
catarrhis, nocturnâ russi, aut senili siccitate cerebri, ideoque  
omni gallicinio facilè excitabuntur, surgentque sæpius inter-  
noctu impatientes lecti.

*Et obsurdescent (Hebr. deprimentur) omnes filia carminis.* Om-  
nes citharæ, lyræ, ac universa instrumenta Musica surdo &  
depresso sonitu sonare videbuntur auribus senum gravibus &  
semisurdis. Nam frequenti humorum è cerebro pluviam irri-  
gatum tympanum, & cetera organa auditûs, intumescunt &  
gravantur, nec ab aëre sonante impulsa, resonant ut oportet.  
Alij ad cantiunculas & voces ipsius senis referunt, quas con-  
ticescere jubet senectus.

*Excelsa quoque timebunt:* Senes vertiginosi timebunt per lo-  
ca excelsa ambulare, non audentes metu vertiginum, quibus  
senectus est obnoxia, in profundum despicere. Hunc sensum  
suggerit Hebræus, qui ad verbum, *De excelfo timebunt.*

*Et formidabunt in via.* Imò in via etiam plana offendere &  
corruere timebunt, ambulantes infirmo & cespitante gradu.

*Florebit amygdalus.* Ex putri & redundantì pituitâ caput &  
barba citò canescent, sicut amygdali comæ, flore candido,  
mense Ianuario ante omnes arbores, nec expectatis folijs, so-  
lent erumpere.

*Impinguabitur locusta.* Instar locustæ, quæ tota panè venter  
est, hydropè & crudis humoribus senex implebitur.

*Et dissipabitur capparitis.* Appetentia cibi & Veneris, calore naturali à senibus fugiente, dissipabitur & evanescet. Capparitis enim edendi & rei Venereæ aviditatem facere dicitur: unde pro *capparitis*, Arias *aviditas* vertit.

*Quoniam ibit homo.* Capparitis jam omni & appetentiâ per-dita, & calore naturali paulatim extincto *in domum eternitatis suæ*. In sepulchrum, ubi manebit in æternum, id est usque ad finem seculi. Nomen enim Hebræum, quod nunc *aternitas*, nunc *seculum* solet verti, significat quodvis tempus longum, etiam si finitum sit; præsertim si finis ejus ignoretur. Vnde Arias vertit, *In domum seculi sui*.

*Et circuibunt in platea plangentes.* Per circuitus & flexus platarum, funebri pompa & planctu, efferent eum in domum illam æternitatis, extra urbem, ubi Iudæi sepulchra sua olim habebant.

Postquàm verò hoc quasi per parenthesis, Sapiens interiecit, ad absolvendam ænigmaticis suis coloribus imaginem se-nectutis, addit.

*Antequàm rumpatur funiculus argenteus.* Antequàm inflectatur, & rumpatur rectitudo candidæ spinalis medullæ, quæ instar funiculi argentei, à cerebro per 34. vertebrarum cavita-tem, usque ad finem spinæ dorsii protenditur. *Funiculum argenteum* hîc appellari ( & quidem *magnâ proprietate*, ut ait Vallesius ) medullam spinalem, Medici etiam nobiscum interpretantur. Rumpitur autem ( Hebr. *non elongatur* ) quando flexo & arcuato dorso senes incedunt, *Et vadit tardo curva se-necta pede*.

Tibull.

Tunc enim tali curvaturâ rectitudo spinæ quodammodo frangitur, & longitudo contrahitur.

*Et recurrat vita aurea.* Et antequàm se contrahat, introque versus centrum recurrat à cranio capitis recedendo involu-  
crum illud cerebri, quod instar vittæ, fluidam cerebri sub-stantiam colligit & continet. Siccato quippe in senibus cere-  
bro, unâ cum ipso contrahitur meninx tenuis, quam Arabes  
*piam matrem* vocant, *naturale cerebri involucrium*, ut Galenus lo-  
quitur. Et hinc in senibus calvitium, inquit Vallesius. Menin-  
ge enim,



ge enim unà cum cerebro recedente à cranij fornice, istud *arescit, ac prae ariditate excidunt pili, ut herba arefacta terrâ.* Et in consensum trahi potest Hippocrates, qui ἐκ τῆς ἐγκειφάλῃ ἀνα- Hippocrac.  
lib. 6. sect. 3  
de morb.  
valg. λώσεως ex cerebri consumptione dicit, τὴν φαλακρότητα calvitium provenire. Et ut breviter ac suo more Tertullianus, *Pro cerebri ubertate, vel affluit capillago, vel deserit.* Ecclesiastes autem meningem, *vittam* appellat, quia similis est vittæ, quâ feminae involvunt crines suos, & tegunt caput. Vnde alij *lenticulam*, sive *lecythum* vertunt: quod vasculum rotundum & ventricosum est, non absimile vittæ feminei capitis. *Auream* dicit, quia vetustate & corrugatione nonnihil aureæ flavedinis contrahit. Quanquam non à colore, sed à pretio, *auream* dici malit Vallesius; sicut alij *piam* vocant, propter, credo, beneficia, quæ fovendo cerebro præstat.

Verbum tamen Hebraicum ambiguum est. Vnde alij vertunt, *Et confringatur lenticula aurea.* Vel, ut Andr. Laurentius, *Et rumpatur aquarium aureum.* Id est, cor rubei & aurei coloris, quod senio flaccidum, nec valens amplius sanguinem & spiritum arterialem continere, apparetque veluti confRACTUM; ut aquarium rimosum non valens continere aquam.

*Et conteratur hydria super fontem.* Et vesica à calculis conteratur, super fontem, sive scatebram (hoc enim propriè vox Hebræa significat) per quam urina foras profilit. Vesica enim est instar hydriæ, in quam serum sanguinis, attractum à renibus, effunditur; ut inde per fontem, sine scatebram foras ebulliat. Fons igitur, quia à fundendo aquas dicitur, non tam pro conceptaculo aquarum hîc sumitur, quàm pro scatebra, unde aqua effunditur, & scatet. Calculum ergo vesicæ (familiare senibus malum) & natam inde urinæ difficultatem, quæ guttatim tantùm, velut ex hydria confRACTA, destillat, ænigmatice describit.

Laurentius tamen *hydriam*, venam cavam interpretatur, quæ *contrita super fontem* dicatur; quia ex jecore communi sanguinis fonte, non potest amplius ad irrigandum corpus, sanguinem haurire. Vnde non plus jam utilitatis corpori præstat, quàm hydria pertusa & aquæ incontinens. Sed quod de

vesica

vesica diximus, videtur concinnius. Si tamen *super* exponamus per *iuxta*, quod præpositio Hebraica patitur, *font*s valde concinnè intelligi poterit *venæ cava*, ex qua ceu fontè, sive cisternâ, ut versu proximo dicetur, renes veluti rota, attrahunt sanguinis serum, sive urinam, quam transfundunt in vesicam, velut hydriam.

*Et confringatur rota super cisternam.* Hebr. *ad cisternam*. Hoc est, Et renes calculis arenisque confringantur, aut putrescant (quod senibus non rarò accidit) appositi *venæ cavæ*, ex qua serum trahunt, tanquam rota, seu trochlea, quæ è cisterna aquam attrahit.

Quod ubi factum fuerit, nihil aliud restat, nisi ut *revertatur pulvis* (homo) *in terram suam*, unde erat (ex qua olim in primo suo parente concretus fuerat) & *spiritus redeat ad Deum*, tanquam Iudicem suum, qui dedit illum, qui creando, corpori illum inspiravit. Vnde spiritum corpori esse superstitem, & immortalem manifestè significat. Hæc mihi videtur esse maximè concinna & probabilissima obscurissimorum verborum interpretatiuncula, inter tot alias variantes & contrarias, quibus illa distrahunt, & se fatigant Interpretes.

## C A P V T V I.

### *De Generatione.*

**P**ost nutritionem & accretionem, sequitur generatio, tertia animæ vegetativæ operatio. Duæ priores circa individui sui conservationem & perfectionem occupantur, hæc tertia speciem propagat. Cum enim omnium animantium individua mortalia sint, ut naturæ saltem specificæ à principio universi usque ad finem perdurarent, debuit individuis vis quædam dari, qua unum alteri naturam specificam traderet; ut quando ipsa in priori individuo intercidit, in posteriori saltem superstes maneret. Hanc vim, potentiam generandi appellamus, actum ejus, generationem.

### ARTICV-



## ARTICVLVS I.

*Quid generatio.*

**G**eneratio dupliciter sumi solet à Philosophis: generaliter pro mutatione à non esse ad esse cuiusvis corporis naturalis: & specialiter pro generatione vitali, qua vivens unum, alterum sibi simile ex sua substantia generat. Vnde nec ortus animalium ex putri, dicitur in hac proprietate generatio, cum nullum aliud animal quidquam de sua substantia in eam conferat. Sed modus iste generandi, in animatorum generationi est similis. Eodem enim modo sol ex quilibet, aut luto Nili, murem gignit, quo ex stipulis interdum ignem accendit. In neutrius quippe generationem de substantia sua quidquam impertit.

S. Thomas consentienter Aristoteli, propriam viventibus generationem definit: *Originem viventis à principio vivente coniuncto ut simili, & ejusdem natura.* Hæc propriè vocatur nativitas, inquit S. Thomas: & sic generans appellatur parens, sic genitum filius.

S. Th. I. p.  
q. 27. a. 2.  
Lib. 4. c. II.  
contra  
Gent.

Nomen tamen parentis & filij, non in plantis, sed in ijs tantum quæ per cognitionem gignunt, solet usurpari. Ideo autem gignens debet esse conjunctum genito, sicuti totum cuidam suæ parti; ut generatio sit actio vitalis, & suo modo immanens principio principali generanti. Quia tamen multorum viventium generatio absolvitur extra ipsum generans, sufficit rudimentum aliquod perfecti foetus intra generans inchoari. Sic planta generationem plantæ inchoat à semine quod intra se format; licet ista generatio perficiatur in terra, cui semen commissum est, tanquam utero. Masculus quoque in genere animalium, est principium conjunctum tantum semini, quod in vasis à natura destinatis intra se coquit; conformatio autem & perfectio foetus in utero, feminae absolvitur. Vnde Aristoteles breviter & dilucidè marem definit, *Animal quod generat in alio*: Feminam, *animal quod generat in seipso.*

Arist. lib. 1.  
c. 2. de generatione animalium.

X x

Quia

S. Tho. 1. p.  
q. 78. 2. 2.  
ad 2.

Quia ergo masculus in alio gignit, & absens non potest proximè attingere introductionem animæ in materiam fœtûs, ideo S. Thomas cum Medicis potentiam generandi nihil aliud esse dicit, quàm virtutem præparandi semen in vasis spermaticis. Hoc enim, ut antè dixi, generatio viventium peculiare habet, quòd vivens eam intra se saltem inchoet (nempe *in semine, in quo est aliquod principium formativum corporis*, ait S. Thomas) & aliquid suæ quoddammodo substantiæ in prolem generandam conferat. Quod inanimata non faciunt, sed tantùm in materiam externam agunt, eamque ad formam suæ similem disponunt. Cùm enim ignis ignem generat, nullam sui partem ei communicat, sed ex ligno, aut aliâ materiâ externâ totum gignit.

Ex hoc modo generationis viventium nascitur in homines consanguinitas, sive cognatio carnalis. Cùm enim pater in generationem prolis semen ex sanguine venoso & arterioso purissimè decoctum conferat, sanguinem suum ei confert, meritoque dicitur ei consanguineus. Mater verò id etiam evidentius facit; cùm non tantùm semen, sed sanguinem etiam in propriâ sanguinis formâ proli contribuat.

Isa. 51.

Hinc filius dicitur aliquid esse sui parentis, & ex patre, tanquam petra minor ex majori petrâ, & ex matre tanquam cavernâ excindi. *Attendite*, ait Propheta, *ad petram, unde excisi estis, & ad cavernam laci, de qua præcisi estis*. Ac se explicans, *Attendite*, inquit, *ad Abraham patrem vestrum, & ad Saram, quæ peperit vos*.

Nec tantùm partem materiæ corporis, sed universam fabricæ materiam filius ab utroque parente simul habet. Vnde totum se ijs debet; aliter quàm prima parens Eua se suo marito, cujus unica costa, tota materia tam grandis & adulti feminei corporis esse non potuit. Hinc naturalis ille parentum in filios amor ortum habet. Quia enim quisque naturaliter seipsum amat, affectus iste etiam ad filios, tanquam ad partem à se decisam, pronissimè fluit.

Nec aliam causam istius amoris, quàm naturarū conjunctionem reddere oportet: quæ si agnoscat (potest enim pater filium ignorare: unde mater, quia certior est se genuisse, impen-



impensius quàm pater, prolem solet amare, ait Aristoteles ) Arist. lib. 8.  
illicò naturalem amorem, quo conjunctio illa foveatur & per- c. 14. Ethic.  
ficiatur, excitat.

Vnde subtiliter S. Thomas advertit, in Decalogo nullam S. Tho. 1. 2.  
amoris parentum erga filios mentionem fieri, sicut nec cujusq; q. 100. a. 3.  
hominis erga seipsum; licet filij honorare & amare parentes  
expresse jubeantur: quia nimis nota est pronitas amoris pa-  
rentum in filios, sicut ejusdem ad seipsum. Hinc etiam in  
fornicatione, *ubi proles contra votum nascitur*, inquit Augusti- S. Aug.  
nus, *nata tamen cogit se diligere*. lib. 4. c. 2.  
confess.

Filiorum quoque in parentes reciprocus, sed remissior est  
naturalis amor; quia multo major corporis parentum pars ad  
filiorum formationem nihil contulit; parentes verò filios suos  
aspiciunt, tanquam aliquid quod totum & undique ipsorum  
sit.

Et licet successu temporis, minimum illius corpusculi, quod  
initio à parentibus tractum est, superstes in filio adulto non  
permaneat, & potissima, aut universa fortè corporis moles ex  
alimento adventitia composita sit; primordia tamen sunt à pa-  
rentibus, quorum virtute & efficientiâ, accedente alimento,  
moles illa crevit. Sic totius incendij causa dicitur, qui pri-  
mam scintillam injecit, unde ingens ille ignis exarsit.

Deinde à temperie seminis temperies prolis, & inde simi-  
litudo morum; à virtute conformatrice, figura vultûs & mem-  
brorum, & plerumque viva imago alterius parentis: quæ  
incremento ætatis non evanescit, sed ad finem vitæ durat.  
Ut proinde non tantum, cum primùm formatur in ventre  
matris, sed per universam vitam filius censeatur esse totus  
sui parentis, & similitudine quadam vivâ illum regenerare.

## ARTICVLVS II.

*Ad quatum consanguinitatis gradum natura matrimonia refugit.*

**I**Ndidem etiam oritur consanguinitas, quæ matrimonium usque ad certos gradus impedit. In primo quidem lineæ rectæ, jure naturæ. Conjugium enim patris cum filia, matris cum filio, naturalis quidam horror respuit. Nam propriè dicta & naturalis conjunctio, extrema condistincta flagitat; pater verò & filia, mater & filius unum quodammodo sunt, ut diximus.

Alij addunt, naturæ ordinem, per talia connubia turbari; quia ordo generationis, similis fluminibus est, perpetuò labens deorsum: sursum verò versus fontes suos rediret, si filia patri suo rejungeretur ad generationem prolis, quæ matris suæ esset filia & unâ soror. Reverentia deinde tam propinque originis verat, horroremque magnum incutit, ne filius aut filia parentem tã inhonestè tractet, quàm solent conjuges. *Nescio enim, inquit Augustinus, quomodo humana verecundia inest quiddam naturale atque laudabile, ut cui debet, causâ propinquitatis, verecundum honorem, ab ea contineat, quamvis generatricem, tamen libidinem, de qua erubescere videmus & ipsam pudicitiam conjugalem.*

S. Aug.  
lib. 15.  
c. 16. Civit.

Suet. Claud.  
c. 15.

Hinc celebre & sapiens à Claudio insipiente Principe factum, quod narrat Suetonius: *Claudius Cesar feminam, ait, non agnoscentem filium suum, dubiâ utrimque argumentorum fide, ad confessionem compulsi, indicto matrimonio iuvenis.* Cum enim nubere ei juberetur, horrore incestus perterrita, ultrò filium suum esse confessâ.

S. Tho. 2. 2.  
q. 154. a. 9.  
ad 3.

Multi etiam in primo gradu lineæ transversalis, id est, inter fratrem & sororem, conjugium jure naturæ itidem irritum credunt. Negant alij, & inter eos S. Thomas: quia inter fratrem & sororem *non est per se & immediata cognatio*, cum unus ab altero nihil accipiat, sed uterque ab eodem tertio. Neuter ergo habet, quod alterius est, sed perinde conjunguntur, atque duo diversam aquam haurientes ex uno fonte.

Hinc



Hinc apud Persas & Ægyptios fratrum sororumque legitima erant matrimonia. Atheniensibus quoque Solon cum germanis sororibus eodem patre natis connubia permisit, vetuit cum uterinis. Contrariam legem Lycurgus Lacedæmonijs scripsit, uterinas admittens, refutans germanas.

Meliùs tamen Solon; quia frater & soror uterini plus ab eadem matre sumunt, quàm germani tantùm ab eodem patre. Nam maximam corporis molem foetus sumit à matre, si-ve primam conformationem aspicias, si-ve totum tempus novem mensium in utero, quo alitur & grandescit solo sanguine matris.

Vnde ceteri Orientales, in conjugijs sororum tam licentes, videntur uterinarum, quàm germanarum conjunctionem magis abhorruisse. Et in hanc mentem multi illud Abrahæ Gen. 26 interpretantur, *Verè soror mea est, filia patris mei, & non filia matris mea, & duxi eam in uxorem.* Quasi dicat, Saram fuisse germanam tantùm, non uterinam sororem, ideoque licuisse eam uxorem ducere.

An verò in recta ascendentium & descendentium linea, matrimonia jure naturæ sint in infinitum irrita, Theologorum nō pauci affirmant, quos sequuntur satis densè Iurisperiti, quia & Cajum suum eodem præeuntem habent. *Nuptiæ consistere non possunt, inquit, inter eas personas, quæ in numero parentum liberorumve sunt, si-ve proximi, si-ve ulterioris gradus sint, usque ad infinitum.* 1. §. D. de ritu nup.

Videretur enim sanè non tantùm à proximis parentibus, sed ab avis, proavis, & longiùs, aliquid in prole adhuc remanere. Vnde nativæ quædam & hereditariæ notæ, ab avis ad nepotes interdum transfiliunt, præterito proximo parente. Sic stigma quod avus in brachio gesserat, nec filius ejus habuerat, regeneratum esse in nepote, Aristoteles narrat. Et in Sicilia, inquit, æthiops ex adulterio filiam candidam genuit; sed hæc postea æthiopem avo similem, ex marito non æthiope peperit. Arist. lib. 7. c. 6. Histor. animal.

Vnde Covarruvias intrepidè affirmat, *In decimo quinto linea recta gradu rationes prohibitionis omnino adhuc vigere.* Covar. part. 2. c. 6. §. 6. de Matr.

Placet tamen, hanc lineæ rectæ cognitionem non ire in infinitum, ac proinde falsum esse, quod Durandus & alij ejusdem sententiæ dicunt, *Si Adam & Eva viverent, non haberent in posteris suis, cui nuberent.* Nam velut flumina fontis sui saporem amittunt longo lapsu, & qualitates alias adsciscunt à terris quas lavant; ita semen à majoribus, per multos lineæ quantumvis rectæ gradus, ad nos delapsum, indolem primam non retinet: vel si similem habeat, non eam à cæcis illis & remotissimis, sed à propinquiore gradibus per quos transivit, accepisse censetur. Vnde doctissimo Covarruvie assentiri non possum, qui saltem ad decimum quintum gradum hanc naturalem prohibitionem censet porrigi.

Imò summum est, si ad quantum possit pervenire. Indicat enim planè Innocentius III. & Conc. generale, cum ait, *Quaternarium numerum bene congruere prohibitioni coniugij corporalis; quia quatuor sunt humores in corpore, quod constat ex quatuor elementis.* Quod S. Thomas & alij sic explicant: quasi in primo gradu descendente igneum & levissimum elementum, in secundo aëreum, in tertio aqueum, in quarto terreum evanescat: unde in quinto nihil ampliùs naturalis cognitionis supersit.

Aut certè, secundum veriolem Philosophiam dicamus, semen heterogeneum corpus esse, quatuor partibus constans, quæ numero & qualitatum discrimine, Mundi elementis respondent.

Ergo imaginemur, in primo gradu, hoc est, in filio, quod levissimum & quasi igneum est seminis evanescere. Nihil enim in corpore nostro faciliùs effugit & dispergitur, quàm spiritus, & ea quæ igneam quandam levitatem habent. In nepote diffluit etiam pars secundæ levitatis; quæ instar aëris erat in avito semine. In pronepote, portio magis gravis & aquea. Denique in abnepote, pars terrestris & gravissima; quæ erat velut fæx & sedimentum seminis abavi. Vnde in gradu quinto nihil ultra seminis superest, cessatque omnis carnalis consanguinitas inter atavum & atneptem. Quod de semine paterno diximus, potest & ad semen maternum, aut etiam ad sanguinem, quem mater in foetus fabricationem confert, applicari.

Hinc

e. Non debet de consangu.



Hinc ultra quartum gradum, in quo se abavus & abneptis adspiciunt, licite & decenter *propinquitās fugiens*, ut elegantia S. Augustini utar, *rursus matrimonij vinculo revocatur.*

S. Aug.

lib. 15.

c. 16. Civit.

Nec tamen per Philosophiam istam Innocentij III. & S. Thomæ contendimus, perpetuum esse, ut per quatuor, non plures aut pauciores gradus, tota virtus humani seminis in descendentibus evanescat; sed quod frequenter ita fieri naturæ consentaneum sit.

Si obijcias, in primo gradu descendente, totum paternum maternumque semen verti in filij fabricam, nec ullam partem ejus, tenuem aut crassam, usque ad nepotem pervenire: fatebor verum esse, sed tamen per similitudinem imaginariam deficientis gradatim seminis, concinne explicari quomodo, si non substantia, saltem virtus paterni seminis deficiat.

Neque hæc ita accipienda sunt, quasi matrimonia lineæ rectæ usque ad quartum gradum, jure naturæ sint prohibita; sed solum quod Ecclesia merito usque ad eum gradum veter ea jungi. Vnde etiam Deus dicitur, *reddere iniquitatem patrum super filios, in tertiam & quartam generationem*; quasi adhuc aliquid paterni & nequam seminis in quarta generatione, seu quarto abnepotum gradu inveniatur, quod mereatur flagellari. Deuter. 5.

An autem avi cum nepte conjugium jure naturæ sit irritum, merito dubitari potest: quia avus est tantum principium per accidens suæ neptis, nec propriè de substantia sua quidquam ei communicat.

Attamen quia instar patris est, & virtus seminis aviti multum in nepotibus adhuc viget, videturque indecentissimum, ut neptis quæ verecundum & filialem honorem avo debet, eumque *magnum patrem* vocat; eundem ut maritum inverecundè tangat. Hæc verò tanta indecentia, & horror quidam naturæ insitus, qui Barbaros etiam concutit, indicat Auctorem naturæ ejusmodi matrimonia damnare, nec facere hominibus copiam & potestatem, ut inter se copulentur ex tam propinquis gradibus, ut potius identitas quædam sanguinis, quam distinctio videri possit.

Ultra avum non videtur jus naturæ dirimere matrimonia, quia

quia parum de virtute seminis proavi in pronepte manere solet. Vnde Sotus fatetur, Patres Tridentinos (inter quos ipse erat) cogitasse de abrogando quarto gradu, *dum tamen sanctissimè statueretur tertius & superiores, ut nunquam, vel non nisi ex urgentissima causa, admitteretur dispensatio.* Supponebant ergo saltem in tertium gradum humanam dispensationem posse cadere; nec inter lineæ rectæ & transversalis gradus videntur distinxisse, ut etiam Sotus affirmat: qui longam illam *consanguinitatis seriem*, quam Durandus, Paludanus, & alij usque ad Adamum extendunt, *ludicram & ridiculam* appellat.

## ARTICVLVS III.

*Principia generationis fœtus.*

**T**Res materiæ, videlicet semen paternum, maternumque, & sanguis matris menstruus concurrere debent, ut inde integrè coalescat in utero fœtus.

Semen paternum in vasis spermaticis perfectè coctū, materno semini in utero permixtum, & cū eo fermentatū, novi fœtus conformationem inchoat. Non quasi semen sit animal quoddā, quod per animam suam domiciliū sibi aliud in utero fabricet, ut Scaliger & alij credunt, quos Lib. 1. confutavimus; sed quia semini artifex & admirabilis quidā spiritus inest, qui materiam seminis crassiorem sufflat, & parte ejus faculentiore in circumferentiam rejectā, secundinas & fœtus involucri inde texere; in centro verò ex parte seminis puriore, prima fœtus lineamenta ducere & conformare incipit. Nec solum paternum semen hoc agit, sed maternum etiam iuvat, licet paterno debilius sit; sicut muliebris temperies frigidior & languidior est quàm virilis. Magis quippe Galeno hîc & Medicis quàm Aristoteli credo; quibus Anatomia, experientia, & ratio vehementer favet. Affero, inquam, non solum sanguinem menstruum matris, sed etiam semen ejus, nec materialiter tantum, sed etiam effectivè concurrere ad generationem prolis.

Nam



Nam sunt vasa spermatica in feminis, quibus semen excoquitur, perinde ac in viris, licet intus recondita. Deinde voluptatem, ut viri, percipiunt in resolutione sui seminis.

Vnde de resolutione feminei seminis, & deiectione ejus in uterum, intelligi posse illud Apostoli, *Sara sterilis virtutem in conceptionem* (Græcè, ἐὶς καταβολὴν σπέρματος in deiectionem seminis) accepit, ait Theophylactus. Nam studiosi harum rerum indagatores asserunt, inquit, mulierem etiam veluti quoddam semen à se conferre. Indicat quoque Augustinus, dum alicubi ait, *Emortuam Sara vulvam fuisse, ad emissionem seminis.*

Hebræ. I. 12.

S. Aug.  
lib. 3. c. 18.  
contra Iul.

Cum verò semen istud heterogeneous sit & parte duplici, spiritosâ & crassiore constet (unde ex spiritûs spumâ album est, non rubeum, ut sanguis menstruus) dubitandum non est, quin spiritibus ejus major, quàm parti corpulentiori activitas insit; ac proinde in conformatione & figuratione foetus, spiritus paterni seminis unâ commixti & confermentati, adjuventur à spiritibus seminis matris.

Hinc tanta interdum est activitas materni seminis, ut vincat semen paternum (à quibusdam alijs causis fortè hebetatum & impeditum) prolemque in figuram matris trahat. Hanc enim causam Galenus reddit, cur filius matri interdum quàm patri similior sit; nec eum solidè Cajetanus refellit. Putat enim Cajetanus hanc prolis cum matre similitudinem, à sanguinis menstrui, quem confert mater, qualitate, non ab activa configuratione seminis materni existere.

Cajet. 2. 2.  
9. 154. 2. 12

Quod tamen facile fortassis confutabunt Medici, qui docent effigiem quandam totam semineam partium solidarum, ex puro utriusque parentis semine, ante affluxum menstrui sanguinis, inchoari, & à primis istis etiam rudimentis, aliquam partem similitudinis cum hoc aut illo parente contrahi. Neque enim spermaticarum & carnosarum partium delineatio eodem tempore perficitur, ait doctissimus Medicus; sed si perfecta fieri debeat generatio, semina primum secunda & pura in uterum, tanquam agrum feracissimum effundi oportet, inchoatis & adumbratis solidarum partium filamentis; tum ad parenchymatum (id est, partium sanguinearum & carnosarum) structuram, tum ad totius nutritum,

Andr. Laurent.  
rent. lib. 8.  
c. 4. Anat.

Y y

affluere

*affluere debet.* Non enim antè potest affluere maternus sanguis, quàm venæ & arteriæ umbilicales sint perfectæ, quibus foetus ex venis & arterijs uteri matris sanguinem & spiritum vitalem fugit.

Cajet.  
suprà.

Et sanè delectatio Venerea quam feminæ experiuntur in resolutione sui seminis, *convincit intellectum meum*, clamat Cajetanus, *non ad dicendum, quòd semen mulieris sit verè semen ( quia novi Aristotelem hoc confutasse ) sed ad dicendum, quòd seminatio illa sit actus natura, ordinatus ad generationem, sive sit emissio seminis, sive alterius humoris, qui quandoque, ut pluries, appellatur semen: quoniam delectatio Venerea tam vehemens non frustrà est à natura.*

Sed cùm ad ejus talem qualem concocturam gemina vasa spermatica in feminis, non minùs quàm viris, natura fabricata sit, nulla est ratio, cur verum semen ( etsi crudius & imperfectius virili ) appellari non possit.

Nec hinc tamen inferas, feminam sine virili semine naturaliter concipere posse. Nam licet semen & sanguinem in structuram foetus conferat, artifex tamen est necessarius. Is autem est paternum semen, sine quo, ne molam quidem informem à femineo semine posse confici, Hippocrates & Galenus consentiunt. Patet id etiam ex avium conformatione in ovis. Nam albumen ovi est instar materni seminis, vitellus est quasi sanguis menstruus: quibus tamen accedere debet semen galli patris; alias quantacumque gallinæ incubatione nulla pulli conformatio, imò ne conformationis rudimentum apparebit.

Sanguis verò menstruus huic rei destinatus, purissimus est; qualem materiam ad primam fabricam & nutritionem tam tenelli & delicati foetus natura flagitat. Pestilentes ergo qualitates, quibus Medici quidam menstrua feminarum infamant, non inhærent sanguini, dum adhuc est in maternis venis, & unde parvulus per umbilicum, eum fugit; sed à foetido & pravis humoribus redundante utero, hanc labem & virus trahit. Uterus enim est velut sentina feminei corporis, in quam illabens menstruus sanguis, etiam purissimus, parietes lavat, & sordes unà avehit. Unde feminæ sanæ menstruis sæpe nihil,

aug.



aut minimum veneni inesse, expertissimi Medicorum hodie confitentur.

Ex dictis quoque colligunt Theologi, qui præter Aristotelem, Medicos etiam in rebus naturæ libenter consulunt, ad fabricam corpusculi Christi Domini, non solum matris sanguinem, sed etiam femineum semen à Spiritu sancto assumptum fuisse. Cum enim ceteri infantes, præter semen virile, quod à conceptione Christi abfuit, ex femineo quoque semine naturaliter concrecant & concipiantur, non est ratio (imò Virgini injuria fiat, nec perfectissima mater esset) nisi omnia principia in divinæ suæ prolis conceptum, quæ ceteræ matres solent, contulerit. Quæ est aperta sententia S. Anselmi, negantis, semen Virginis fuisse immundum; sed tantum illud, quod carnali delectatione spargitur. Vnde famosus inter recentiores Scholasticus: *Si semen maternum, inquit, simpliciter necessarium est ad concipiendum filium, consequenter dicendum est, B. Virginem partem sanguinis in semen convertisse, idq. ad debitum locum conceptionis transmississe. Quod inter Scholasticos absque formidine concedit Richardus.* Rectè tamen monet cum S. Bonaventura, non frequentandam mentionem seminis in Christi conceptione, ne suspicio aut imaginatio ingeratur seminis virilis, quod per antonomasiam semen vocari solet.

S. Ansel.  
c. 14. de  
concept.  
Virg.

Suar. 3. p.  
q. 32. a. 4.

Addendum quoque, in Virgine castissima, nulla omnino libidine, aut majori delectationis sensu, semen manu Spiritus sancti decisum esse, quàm purissimus ejus sanguis à venis in uterum est effusus. Si enim quædam femina sine ulla delectatione Venerea concipiunt, quia vasa spermatica vitioso humore in ipsis turgent, & uterus in quem semen effundunt, impurus & multo mucore obductus est; quanto magis Spiritus sanctus sine ullo voluptatis sensu potuit Virgineum semen in uterum derivare? Hinc quoque discant Confessarii, feminas non minùs quàm viros, peccato mollitiei posse pollui; dum per tactus, aut turpes imaginationes semen suum è vasis spermaticis quæ intus habent, cum Venerea voluptate, in cavitatem uteri, aut etiam foràs effundunt.

## ARTICVLVS IV.

## De humore distillatitio.

**P**Ræter verum & elaboratum semen, tam in masculis, quam feminis, est quoddam velut seminis excrementum, magis aqueum & crudum, nec spiritu illo artifice & prolifico spumofum; quem humorem distillatitium vocant, quia est materia fluxûs, quem Casuistæ distillationem appellant, & à pollutione distinguunt.

Cajet.  
Opusc.  
Tom. I.  
tract. 22.

*Ne putent Confessarij, ait Cajetanus, omnem effluxum humoris, esse seminationem. Est enim præter urinam & semen, tertius quidam humor, qui ex calefactione, seu inflammatione carnis fluit. De quo, nisi cum rebellionem carnis veniret, non magis curandum, quam de sudore videtur. Addit tamen deinde: Nunc autem non ratione sui, sed tentationis cavendus est; non tamen tanquam pollutio. Unde non excedit limites peccati venialis.*

Gerson.  
Tract. de  
pollut.

Gerson satis consentienter. *Vnus humor, ait, est verè seminalis, alius urinalis, alius quodammodo medius, qui potest appellari salivialis, vel sputalis. Hic verò humor medius, non facilè à vero femine discernitur, inquit, propter similitudinem quandam in albedine, viscositate, spissitudine. Det veniam scribenti hæc, quæso, Lector. Nam miseras istas humanas, tanquam luteas ac lubricas quasdam vias, per quas Diabolus plurimos (sic metuo) Christianorum ad Inferos deducit, Theologum, id est, Medicum animarum non ignorare oportet.*

Gerson autem humorem illum medium, quem nos distillatitium, salivalem vocat; quia, inquit, *ineptus est nutritioni & generationi, velut saliva, & alia superfluitates defluentes è cerebro.*

Unde colligas, non esse tantam obligationem naturalem ad retinendū istum humorē, quantam omnes Theologi fatentur esse ad retinendum verum semen, à natura elaboratum ad prolis generationem. Pervertitur enim finis naturæ, dum semen quod ipsa fabricavit ad effundendum sub matrimonij legibus, ut inde nascatur foetus, aliorum effunditur & disperditur.

tur.



tur: quod Casuista nostri vocant prodigere semen.

At verò humor ille distillatitius, non ad generationem à natura destinatur, sed potiùs, ut ego existimo, veri & generativi seminis est recrementum. Veluti enim hepar præter purum sanguinem, choleram utramque, tanquam sanguinis excrementa, & pituitam, velut crudum quoddam sanguinis rudimentum gignit; ita vasa spermatica, sive testes præter elaboratum illud semen (cui omnium partium conformandi novi hominis ideæ sunt impressæ) aliquid aliud excrementitium crudumque progignit.

Vesalius tamen distillatitium istum humorem, quem ipse *viscidum* appellat, in glanduloso corpore parari arbitratur, id est, in glandulis parastatis, quæ ad cervicem vesicæ in viris, ad fundum uteri in feminis, ait Paræus, sitæ; suntque veluti quædam cataraetæ, quibus semen è testibus duplici canali (quæ vasa ejaculatoria Medici vocant) eò derivatum, retinetur, & ad generationem paratum reservatur. Fieri autem potest, ut crudior illa & pituitosior pars seminis, elaborato semini permixta, majorem quandam crassitiem, visciditatemque in glandulis parastatis acquirat, ut censet Vesalius; sed in semen perfectum & generationi idoneum vix aut nunquam fortasse evadit. Hanc tamen in eo utilitatem natura spectat, ait Paræus; quòd acrimonia & mordacitate quadam ad Venerem & speciei propagationem eò stimulet. An verò sit humor stillatitius, an verum semen, quod corpore humano effluit, ex sensu delectationis distingui debet. Natura enim in resolutione veri seminis maximam omnium, ut Cicero credit, delectationem miscuit; humor verò ille stillatitius sine ullo, aut non magno voluptatis sensu effluit. Solent tamen plerumque una cum eo spiritus quidam seminei in parastatis commoveri, & sensu aliquo Venereæ delectationis titillare; propter quam castitas commotionem illam evitare debet. Vnde circumspectè antè dicebat Cajetanus, Non magis de illo stillatitio humore curandum, quàm de sudore, nisi cum rebellionē carnis veniret.

Vix tamen, aut nunquam, ait Gerson, fluxus humoris istius

Gerson  
Tract. de  
pollut.  
diurna 4.

*medij, sive stillatij causat talem modum delectationis & concussionis quasi totius corporis, & specialiter in pudendis; nec ita perstringit aut obnubilat in suo exitu iudicium rationis, sicut fit in humore verè seminali. Nam iste humor seminalis magis digestus est, & ad causationem libidinosa delectationis (nisi per infrigidationem, aut aliunde corruptus sit) proportionabilior invenitur.*

Nihilominus, quia per spiritus illos semineos humoris stillatio permixtos, delectatio Venerea excitatur, quam extra matrimonium vitare oportet; ideo talem distillationem directè in se excitare, aut causam ejus propinquam notabiliter influentem dare (ut sunt tactus, vel aspectus turpes) est grave peccatum, ut Theologi nostri censent. Nam notabilis illa spirituum seminalium commotio, est inchoata quedam pollutio, & ad pollutionis consummationem essentialiter ordinatur, inquit Sanchez.

Sanch. lib.  
9. d. 17.  
a. 17. Matr.

Aliàs verò, si causæ sint remotæ, ac proinde, quantum est ex se, non notabiliter influentes, licet ex complexione, aut alia dispositione humani corporis, spiritus illi commoveantur; peccatum censetur, ut summum, veniale, modò voluntas non consentiat in voluptatem. Tales causæ existimantur cibi quidam Venerei & calorifici; non tamen eo fine sumpti, ut Venerem excitent. Deinde confabulatio, aspectus non turpes, & id genus alia, de quibus alicubi Gerson: *Evenit facilius distillatio, inquit, & non sine aliquo sensu concomitante vel pravo, dum personam dilectam, sive pulchram sive turpem, sive juvenem sive senem, sive secularem sive religiosam, & quandoque devotam aspi-ciunt, aut tangunt, aut ei arrident, aut confabulantur, aut jocantur; etiam ubi nihil de opere carnali volunt, aut putant, nedum dicam per-agere, sed nec cogitare.*

Gerson  
suprà.

Ideo autem facilius, quàm verum semen, humor iste medi-  
us distillat, quia excrementitius est, & ferè inutilis, ideoque  
natura non tam pertinaciter ipsum retinet.



## ARTICVLVS V.

*Cur pollutio vetita iure natura.*

**Q**uia verò in materia peccatorum multos scrupulos & difficultates, quæ ex Physica aut Medicina ferè dissolvi debent, habet hæc administratio humani seminis, ideo paulisper ad quæstionem istam divertere non inutile erit; nec extra oleas ibimus, qui Philosophiam Theologiæ ancillam formamus.

Rem igitur à principijs repetendo, contemplare materiam seminis, id est sanguinem & spiritum vitalem, per venas & arterias seminales, à vena cava & aorta derivari ad testes; sicuti reliquis partibus corporis, ex iisdem fontibus per similes canales simillima materia ad alimentum suppeditatur. Aluntur quippe testes sanguine illo & spiritu vitali. Vnde veluti mammillæ v. g. sanguinem & spiritum vitalem prius dealbant, quàm in substantiam suam mutant; ita testes (alia tamen virtute & temperie) hoc etiam faciunt.

Verùm quia sanguis & spiritus ad eas corporis partes copiosius affluunt, quàm ad earum nutritionem sit necesse; ideo pars aliqua nutrimenti superfluit, quam probè excoctam natura ad alios usus reservat. In mammillis lac quod earum nutritioni superest, ad alendam prolem in lucem editam: quod verò testibus superfluit, ad novæ prolis fabricam reservatur, semenque appellatur.

Quia igitur attractio sanguinis & spiritus ad eas partes, item alteratio, & conversio in rorem, gluten, cambium directè tendunt ad mammillarum & testium, ut ceterarum partium corporis, nutritionem; possumus actiones illas naturales, & ad individui commodum directè spectantes, per artem & medicamenta adjuvare, ac de ijs quidquid ex bono & usu individui fuerit, disponere. Deinde quandoquidem quod alendis mammillis superfluit & lac appellatur, ad alterius individui nutrimentum à natura destinatur, rationem & nomen  
alimen-

alimenti induit; ideoque tanquam tale haberi & tractari à nobis potest. Vnde exfugere aut extrahere ex mammillis tanquam fontibus suis, ac in omnes alimenti usus vertere ipsum licet. Semen verò quod alendis testibus superfluum est, ubi in ipsis percoctum fuerit, natura per duos canales (quæ vasa spermatica, seu ejaculatoria à Medicis appellantur) ipsum inde abducit, & in parastatas ( sitos ad vesicæ collum in viris, ad uteri fundum in feminis ) tanquam in commune quoddam receptaculum derivat; ibique non in aliquod individui istius corporis commodum, sed in speciei propagatio- nem custodit. Vnde libera jam administratio meritò homini à natura adimitur, ut ipsum ex receptaculo illo & cata- ractis ubi retinetur, expellere pro libitu non possit; sed tan- tum in naturalem prolis cum altero sexu generationem. Et quidem intra legitimi matrimonij vinculum; quia humani & rationalis foetus dignitas hoc postulat, ad convenientem & debitam educationem.

Sanch.  
lib. 9. d. 17.  
Matr.

Semine tamen sic in parastatas derivato & custodito, non omne omnino jus in ipsum homo amittit; quia quamdiu rece- ptaculis corporis ejus præparatur, jus ipsum alterandi, co- quendi, ac proinde augendi, vel diminuendi retinet. Vnde *nemo negabit*, inquit Sanchez, *fas esse, sirupum capere semen resol- ventem in sanguinem aliumve humorem, alijs vijs expurgandum.* Quis enim tam scrupulosus, ut ab ijs cibis, aut medicamentis quæ semen & genituras consumunt, abstineat?

Imò qui castitatem valde colunt, nonne cinere anethi, aut semine cannabis quandoque genituram hebetare, aut consu- mēre nituntur? Nonne aniso, caruo, rutâ semineos flatus & spiritus discutere, aut camphorâ, agno casto, alijsve remedijs semen ipsum ficcāre tentant? Aliquibus etiam, surgente libi- dine, consilium ab Arnal. Villanovano Monachis Casæ novæ olim datum fortasse placebit: nudi que frigido marmori inside- bunt, aut partes illas aceto forti immergent, vel certè ( quod à S. Patritio, & quibusdam alijs factitatum narrant ) linteum tali aceto imbutum pubi & parastatis noctu superponent.

Alijs denique fortassis Calvi Oratoris exemplum magis allubescet



allubescet, qui plumbi laminâ lumborum & renum parti alligata impetus Veneris cohibuisse, vivēsque corporis studiorum labori custodisse traditur, ait Plinius. Ac de alio quodam Galenus: Ego inquit, cum è plebe cuidam suaderem, ut plumbi laminam renibus superponeret, quo nocturnis careret Veneris imaginibus, tali presidio adiutus postea mihi gratias egit.

Plin. lib. 34.  
c. 19.

Gal. lib. 6.  
de sanit.  
tuend.

Cum igitur hæc liceant & laudentur, signum est, fas esse retundere & expugnare semen, quamdiu adhuc fabricatur, aut sepositum in parastatis, ante effusionem, asservatur. Nec enim interea otiantur parastatæ, sed calore suo naturali ipsum fovēt, imò in substantiam suam convertere nituntur.

Sed quare actionem virtutis expulsi vae, semen nocivum expellentis, quæ naturalis est, & consequenter bona, adjuvare medicinis nefas erit? interrogat Sanchez, rationibus aliorum non acquiescens: etsi cum omnibus universim Theologis, non dubitet, quin voluntaria (per medicamentum, scilicet, vel tactus, vel imaginationem Veneream, aut alio simili modo procurata) seminis effusio extravas, sit manifestum scelus mortale contra naturam. Vnde novam hujus naturalis prohibitionis causam meditatus; legitimam rationem effecenso, inquit, cur in nullo eventu, etiam ubi ad vitam tuendam necessarium esset, liceat seminis effusionem procurare: Quia adeò vehemens in seminis emissionem delectatio sentitur, ut illam teste Abulensi c. 5. Matt. q. 184. ad 1. homines tanquam summum bonum prosequantur, illique velut suæ felicitati adherant. Propter hanc ergo causam, ut existimat, Natura in omni eventu, seminis administrationem homini denegavit. Ea enim in aliquo casu concessa, evidentissimum, inquit, subesset periculum, ne homo à passione libidinis excacatus, passim sibi persuaderet, causam effundendi iustam adesse. Atque ita semen prodigeret; indeque fornicationes, adulteria, aliaque innumera luxuria vitia, adversus commune bonum pullularent.

Sanchez  
suprà.

Sed Lessius & alij Scholastici posteriores novitiam istam Leon. Less. Sanchij inventionem meritò confutant. Quod magis ac fortius ab ipsis fieri debuit; quia dabat quibusdam ausam perniciosæ doctrinæ: quasi feminis fas esset, ad sanitatis, imò etiam pudoris ac famæ tutelam, foetum nondum animatum animâ rationali

Leon. Less.  
lib 2. c. 9.  
d. 10. de  
Iustit.

rationali directè expellere. Nam expulsio ista fit sine Venèrea delectatione; adeoque ibi non reperitur illa ratio prohibitionis, quæ est in seminis effusione.

Ratio igitur, cur natura prohibeat semen in parastatis collectum, foràs expellere, videtur esse; quia hæc expulsio censetur esse, non tam hujus individui hominis seminantis, quàm naturæ specificæ, se propagantis, & hōc homine utentis tanquam instrumento. Cum enim ultimus hic motus, & effusio seminis, principaliter & per se solum tendat in bonum speciei, sive naturæ communis, quæ per eam se dilatat, & communicat; meritò censetur ipsius esse, quia unumquodque naturaliter agit id quod sibi bonum est. Vnde meritò etiam sub dominio & administratione Auctoris naturæ talis actio in totum sic manet, ut quisque singularis homo eam administrare & licitè exercere, nisi in bonum & propagationem speciei, non possit. Nam illa effusio, & semen ipsum nullam aliam per se naturalem utilitatem habet. Vnde semen, quantum ad hoc, est instar membri, quod non est sub absoluto dominio hominis, neque ad libitum ab eo præscindi potest, sed tantum in casibus ab Auctore naturæ concessis; ut quando vita totius ex membri unius contagione periclitatur. Quamquam nec in tali etiam periculo liceret directè semen extravas naturale effundere; quia principaliter ad bonum speciei, non ad individui commoditatem à natura, ut dixi, destinatur.

Arist. lib. 2.  
c. 4. de  
anima.

Eodem alludit, quod Aristoteles alicubi ait, *Naturalissimum operum viventis, esse generare aliud, quale ipsum est: animal quidem animal, plantam autem plantam.* Causam enim subdit, ἵνα τὸ αἶμα καὶ τὸ θάλασσαν καὶ τὸ πῦρ καὶ τὸ ἀέριον, ὡς καὶ ἡ φύσις αὐτῶν, ὡς καὶ ἡ φύσις αὐτῶν, ut ipso Semper, & divino participant, prout possunt. Quia enim illa individua corruptibilia sunt, saltē speciei suæ æternitatem procurant, quantum possunt; quia speciei bonum, etiam ipsorū est. Id autem faciunt, speciei suæ famulando per generationē, quā species ad aliud individuum propagatur, in quo incolumis permaneat, si contigerit eam senectute, aut aliter in priori individuo deficere. Hoc autem naturalissimè animantia facere dicuntur, quia bonum illud speciei



speciei excellentius & sublimius est quàm bonum privatum; quandoquidem per illud sempiternitati divinæ aliquousque appropinquent. Propinquitas verò & similitudo cum divino esse, est maximè appetibilis; cum Deus sit finis ultimus & perfectissimus; quem idcirco, *omnia appetunt*, inquit ibidem Aristoteles, & illius causa agunt omnia, quacumque agunt secundum naturam.

*IN AM.*

Hinc in animalibus, quæ sola capacia erant voluptatis, maximam omnium delectationum corporalium (ut Cicero, S. Augustinus, & omnes fatentur) actioni generativæ, ut avidius divinum illud speciei bonum appeterent, natura apposuit. Quod homini maximè necessarium fuit, ut immortalis & sublimis ejus spiritus humilitatem illius actûs non abhorreret. *Homo enim rationis particeps divinum planè & excelsum animal*, ait Paræus, *nunquam se, nunquam animum suum in rem tam turpem tamq̃ abiectam quàm Veneris est coitus, demitteret atque prosterneret; nisi vel insita partibus istis Venerea catulationes, mentis eius severitatem remollirent; vel ipsa etiam ratio admoneret, non cum vita tempore esse dimittendam commemorationem nominis sui.* Et Medicus alter. *Quis enim, per Deum immortalem, concubitum, rem adeò fœdam sollicitaret, amplexaretur, ei indulgeret? Quæ femina maris in amplexum rueret, cum & nonimestris gestatio laboriosa sit, & fœtus exclusio diris cruciatibus molesta, sæpeq̃ exitiosa, & editi fœtus educatio plena sollicitudinis, nisi incredibili voluptatis æstro percita essent genitalia?* Cui etiam fini natura partibus illis sensum exquisitissimum addidit.

Paræ.  
lib. 23. c. 1.  
Chirurg.

Andr. Lan-  
rent. lib. 6.  
c. 1. Anat.

Igitur voluptas ista tanta propter actionem, tanquam finem est, & consequenter, cui actio licita est (ut in conjugio) etiam voluptas licet. Ejusdem quippe moris sunt, actio & delectatio, quæ ex ea resultat, ut appetitum ad exercitium actionis alliciat. Nam, ut post Aristotelem egregiè S. Thomas: *De delectationibus differunt in bonitate & malitia, secundum differentiam operationum.*

S. Tho. 1. 2.  
q. 74. a. 8.

Ante omnia igitur, actio inspicienda est, & ad normam ejus delectationem metiri oportet.

Vnde invertit ordinem naturæ Thomas Sanchez, quando

ex vehementia delectationis, actionem prohibitam esse colligit; cum contrâ, ex malitia actionis, malitiam & prohibitionem delectationis colligere debuisset. Aliàs enim solâ lege positivâ divinâ, propter magnitudinem delectationis ex actione alioqui licitâ resultantem, pollutio prohibita esset. Quod nemo unquam dixit. Imò apud Philosophos etiam illos, qui simplicem fornicationem non damnabant, pollutio & mollicies jure naturæ turpissima erat & infamis.

Qui enim semen aliter, quàm in agrum à natura ei assignatum, spargit, naturæ ordinem in re gravi pervertit, ac proinde naturæ & ejus Auctori est injurius.

Si verò speciei propagini vacare nolit, quia fortè voto Deo facto, aut alia de causa, cælibatum prætulit; semen sponte evacuare non debet, sed ejus administrationem naturæ permittere; quæ ubi nimîâ in parastatis affluentia turgescere coepit, ultrò se exonerare solet, aut in vigilia per gonorrhœam, aut nocte per ludibria somniorum, quando sopita & frenum remittente ratione, imaginatio potentior appetitum sensitivum & vires expultrices ei subordinatas, efficacius in operationes suas extimulat.

Vnde rarissimum est, ut valetudo cujusquam nimîâ abundantia seminis insigniter offendatur. Quod tot Coenobitarum & castorum exemplis patet, quos diutissimè sanos extremam sene&us extinguit. Non igitur de nihilo divinus Hippocrates dixit: tria maximè ad sanitatem & longævitatē conducere, *Semen retinere, citra saturitatem edere, ad laborem impigrum esse.*

Quia verò certis ferè temporum intervallis, ut in muliebri menstruo solet, plenitudo illa & fluxus seminis viris redire consuevit, Themistius gonorrhœam, virile menstruum appellavit.

Hinc deduci videtur, illicitum esse semen è parastatis foras expellere, etiamsi id sine Venereæ voluptatis sensu fieri posset. Voluptas enim ad actionem expulsiivam consequens est, ut diximus, & ubi actio licita, ut in conjugatis, voluptas non est turpis. Ex honestate ergo & turpitudine actionis manat:

honestas.



honestas & turpitudine voluptatis, non è contrà. Cum igitur actio turpitudinem à se, non à consequente voluptate habeat, turpis erit, licet voluptate careat.

Hæc tamen de semine vero & incorrupto intelligenda. Nam semen corruptum, semen non est, uti nec distillatitius ille humor, cujus Art. præcedenti facta mentio.

## ARTICVLVS VI.

*An licitum sit, foetum inanimatum expellere.*

**H**inc quoque sequitur, nefas esse, semen virile feminæque in utero commixtum & fermentatum, ante etiam animationem, quamvis sine ullo voluptatis sensu, expellere. Si enim è parastatis (ubi tantum semen servatur, ut cum semine alterius sexûs ad novi hominis generationem misceatur) per mollitiem pellere non licet; multo minùs, ubi jam in utero, tanquam naturæ figulinâ, ad foetus formationem, cum altero semine in unum corpus confusum & fermentatum est. Iam enim generationi & animationi propinquius est, quàm ubi adhuc erat in parastatis; ideoque naturæ opus provectius & perfectioni suæ vicinius disturbando, major naturæ & ejus Auctori irrogatur injuria, quàm si remotius, ac in primis rudimentis adhuc versaretur. Vnde Tertullianus ad genus quoddam festinati homicidij revocat, semina in utero coalescentia disturbare. *Nobis, inquit, ad Gentiles, homicidio semel interdicto, etiam conceptum utero, cum adhuc sanguis (maternus per vasa umbilicalia) in hominem delibatur, dissolvere non licet. Homicidij festinatio est, prohibere nasci. Nec refert, natam quis eripiat animam, an nascentem disturbet. Et ut de seminibus nondum animâ rationali animatis loqui intelligeremus, addit: Homo est, & qui est futurus, & fructus omnis iam in semine est. Canones consentienter, qui mulieri aliquid fecerit, vel ad potandum dederit, ut non possit concipere, ut homicidam teneri, decernunt. Et iure etiam civili gravissimè puniuntur, qui abortitionis peculum dant.*

Tertull. 2.  
5. Apolo.

c. si aliquis  
de homic.  
l. 38. D. de  
pœnis.

Denique Sixtus V. 1588. severissimam cum multis fulminibus Bullam adversus tales edidit ; quam tamen Gregorius XIV. An. 1591. ad terminos Iuris communis revocavit.

Arist. lib. 7.  
c. 16. Polit.

Vnde mirum omnino est , Aristotelis acumen sic in re ista delirasse, ut ἀμβλωσαν, & leges procurandorum ante animationem abortivum, Rectoribus civitatum permiserit, ubi civitas civium multitudine gravari cœpit. Nimirum, in re morum non perinde, ac in re naturæ Aristoteles valuit. Et certiùs nobis dixerit, quomodo coaguletur in utero foetus, quàm quomodo mater eum gestare & custodire debeat, ne in Dei & naturæ legem peccet. Tantundem dicimus de Hippocrate, qui Psaltriæ sexto à concubitu die, ad celandum pudorem, saltando genituram excutere suasit : quia *minimè decebat gravidam esse, ne viliori loco haberetur*, inquit.

Hippocrat.  
lib. de nat.  
pueri.

Hipp. iure-  
jurand.

Vnde viderit sanè bonus Hippocrates, quomodo consilium istud puellæ datum, steterit cum iurejurando, οὐδὲ γυναικὶ περὶ τὸν φθόρον δόσω, quo se ad non præbendum feminæ pessum subdititium, quo foetus aut embryo corrumperetur, obstrinxit. Quid enim interest, pессo, an saltu inchoatum illud naturæ opus disturbare? Nec solidè eum excusat doctissimus Medicus Andr. Laurentius : dum ait, impietatis aut perjurij malè accusari, quia Psaltria illa *non eo saltu abortivum elisit factum, sed ἐκ πύου effluxionem tantum, & genituram septem dierum nondum dearticulatam*. Neque enim, ut jam disseruimus, ejusmodi etiam seminum, præsertim jam fermentatorum, conceptionem per effluxiones dispergere licet.

Andr. Laurent.  
lib. 8.  
c. 29. Anat.

Sed multo magis mirum, Theologos Christianos quosdam eò laxitatis & audaciæ etiā prorumpere. Nam Franc. Torreblanca apertè docet, inquit Anton. Diana, *licere procurationem abortus ad tuendam vitam, vel honorem puella pregnantis*. Quam tamen opinionem novam sanè, paradoxam, & humano generi perniciosam Diana, homo aliàs minimè scrupulosus, admittere reformidat. Sed an hac opinio, inquit, sit probabilis, judicent viri docti : mihi enim omnino non placet. Si enim saltu, aut poculo abortionis, pudori consulere licet, quæ puella à fornicatione id facere non tentabit?

Diana p. 3.  
tr. 2. s. re-  
sol. 11.  
Miscell.

Multis



Multis quoque pro freno est, uteri gestandi metus, quo sublato, libido liberior & effrenior passim erit. Sanchez vero, licet celando pudori abortum inanimati foetus procurari posse neget, admittit tamen causâ valetudinis. Nec eadem est ratio, inquit, permittendæ pollutionis, ubi copiâ feminis valetudinem gravari contingit: quia *natura omnimodam administrationem seminis homini denegavit, propter periculum imminens, ob nimiam delectationem, qua in ejus effusione sentitur. Quæ ratio locum non habet in abortu, qui sine delectatione excutitur, aut excidit.*

Sed hanc rationem alij passim, & nos antè rejecimus. Non enim lege divinâ positivâ effusio feminis prohibita est propter delectationem, sed contra delectatio lege naturali vetita est, propter effusionem eâdem lege damnatam. Nec altera Sanchij ratio est validior: quòd *foetus ante animationem sit pars viscerum*, ideoque ad salutem totius liceat directè revellere, veluti matris pedem aut manum.

Nam profectò foetus propriè pars matris non est, non magis quàm arbor sit pars terræ, in qua figit radicem. Foetus enim utero matris, tanquam loco continetur, & venas ac arterias umbilicales, velut radices, fornici uteri implantat, ut ex venis & arterijs maternis alimentum sugat. Breviter & bellè Galenus: *Qualis est radicatio in plantis deorsum, talis est in foetibus insertio arteriarum & venarum in uterum.* Et Augustinus noster: *Si ad matris corpus id quod in ea concipitur pertineret, ita ut ejus pars deputeretur, non baptizaretur infans, cuius mater baptizata est aliquo mortis urgente periculo, cum eum gestaret in utero. Nunc verò cum etiam ipse baptizatur, non utique bis baptizatus habebitur.*

Magis igitur tanquam juris, quàm Medicinæ aut naturæ consultus, scripsit Vlpianus: *Partum, antequam edatur, mulieris portionem esse, vel viscerum.* Neutrius quippe est portio, sed appendix potiùs, ut fructus arboris, aut arbor telluris. Nec potest mater ad salubritatem sui corporis, de eo tanquam de portione sua disponere, sed servare necessariò debet, tanquam naturæ depositum, novo hoc germine se propagare gestientis.

An verò feminæ, in morbo apertâ venâ, sanguis foetum formando

Sanch. lib.  
9. d. 20.  
Matr.

Galen. lib. 7.  
de semine

S. August.

l. i. d. de  
inspic. ventre.

formando aut alendo necessarius extrahi licitè possit, puto affirmandum. Nam quamdiu sanguis est in venis maternis, totus ejus administrationi subest, etiam quoad eam partem quæ alendis ejus membris superfluit, & destinatur ad foetus fabricam & nutrimentum. Nec enim istud superfluum in parastatis quibusdam, ut semen, aut alio vase in corpore matris à reliquo sanguine separatur, sed ipsdem venis confuse continetur, nec censetur extra jus maternæ administrationis excidisse, nisi ubi in vasa embryonis umbilicalia excidit, per quæ ex venis matris in embryonem traicitur. Si tamen foetus animâ rationali animatus est, & putetur profusâ missione sanguinis, alimenti inopiâ exanimandus, jam erit innocentis homicidium, ideoque illicitum. Si verò mater & foetus interituri existimentur, nisi sanguis tam profusè mittatur; tunc in spem servandæ saltem matris, licebit. Si autem spes sit, ut ante mortem matris, proles ad lucem & baptismum veniat, tenetur etiam sub periculo vitæ, abstinere ab ea sanguinis missione mater, ex charitate qua vitam suam corporalem pro spiritali suæ prolis exponere debet; nec Vasquium & Pontium hîc audimus, qui aliter.

Vasq. c. 2.  
d. 7. de  
Restit.

Nam *parum refert*, ait Vasquius, *quod vita spiritalis prolis in utero periclitetur, quia mater non tenetur vitam temporalem pro illa perdere, quando de sua salute spiritali dubia est.* Imò verò tenetur. Si de salute sua dubia est, faciat quod semel faciendum, id est disponat se ad felicem mortem, si post natam & baptizatam prolem est ei moriendum. Aliàs si ij solum qui de salute spiritali certi sunt, tenentur vitam corporalem pro spiritali proximi exponere, homines sanctissimi tantum illo charitatis vinculo tenebuntur. Sed extra Philosophicas oleas longius abivi, regredior in viam.

Non etiam verum est, quod fingunt quidam, ab embryone aut foetu invadi matrem, ideoque posse expelli, quando gestatio uteri causam morbi facit. Nihil enim aliud embryo facit, nisi quod natura eum docuit, & ad faciendum jus dedit. Vnde sicut si terra Copernicana v. g. rationale animal esset, ut Io. Keplerus credit, de arboribus tamen quæ eam sugunt, tanquam



tanquam sibi injuriosus, conqueri non posset; sic de partu, aut embryone viscera ejus fugente mater minime potest. Vtitur enim embryo jure suo, agendo radices in uteri agrum, quem natura ei assignavit.

Attamen licitum matri est, sumere medicamentum, quod ad ejus curationem tendit, etsi indirecte embryo inanimis expellatur; veluti licet potionem sumere, quæ per accidens hominem poluat effundendo semen è parastatis. Sic etiam veredario equitare, confessario sacras confessiones audire licitum est, cum probabili periculo pollutionis, modò absit periculum consensûs voluntatis in delectationem.

Nam licet effusio illa seminis, & delectatio sensibilis quam secum trahit, in ejusmodi casibus non sint voluntariæ, nec magis imputentur in culpam, quàm sessori asini imputatur immunditia, quâ asinus alvum egerit, ut S. Cælestino, de hac re sollicito, Christus respondit; inclinatio tamen voluntatis & consensus in tale objectum, etiam si ab ipsa non imperatum, est turpis; cum ista inclinatio actioni & delectationi turpi sit conformis. *Cum enim aliquis, ait egregiè & profundè S. Thomas, ex deliberatione eligit, quòd affectus suus conformetur his qua secundum se sunt peccata mortalia, est peccatum mortale. Unde consensus in delectationem peccati mortalis, est peccatum mortale.* Inclinatio enim illa & consensus est amor & complacentia quædam, qua voluntas lutum illud amplectitur, se ei conformat, & eo se conspurcat.

Unde licet verum existimem, quod ait Sotus: Non peccare quemquam peccato pollutionis, *si postquam materia è lumbis, seu parastatis, est decisa (ubi actio libera finitur) estq; in motu naturali, dormiens expergesceret, & tanquam inutile excrementum elabi sineret: attamen pruritui, cujus sensum evitare non potest, voluntatem applicare, & in eo delectari, peccatum est.* Alia quæstio est, An de pollutione per somnium excitata, liceat vigilanti, propter exonerationem naturæ & sanitatem, delectari.

Aliqui affirmant. Sed profectò doctius dicitur, inquit Sotus, Quòd etsi placere liceat de sanitate, non tamen de delectatione, aut pollutione.

pollutione. Quia quod de se malum est, ob nullam causam placere debet, aut concupisci.

Nam licet pollutio talis non sit actio humana, videtur tamen esse objectum inhonestum, non secus fermè ac homicidium perpetratum à furioso. Vnde de delectatione præteritâ ex tali pollutione secutâ nullo modo videtur licitum gaudere.

Nec argumenta aliorum ampliùs probare videntur, quàm gaudium non de ipsa, sed de effectu ejus, sive sanitate secutâ, non inhonestum esse.

## ARTICVLVS VII.

*An in semine humano sit morbida aliqua qualitas, seu peccati fomes, qui animam rationalem ei infusam maculâ originali inficiat.*

**T**Alem qualitatem morbosam humano semini sæpius inculcat, & sine ea, peccati originalis translationem explicari posse negat S. Augustinus: *Fideles infidelitatem in posteros traiciunt, quod non est iam illorum per spiritum re-generatorum, sed quo in carne generati sunt, mortalis seminis vitium.*

Parentes fideles, ait iterum Iuliano, traiecerunt in filium quod iam non erat in eis, propter semen spirituale quo regenerati sunt; sed erat in eorum carnali semine, quo eum generaverunt.

Et antea: *Hoc vitium in semine non potuisse residere, à quovis callidissimo dici non potest, cum auctoritate divina superetur; qua ipsa pars corporis ob hoc iussa amputari, ut hoc vitium purgaretur. Quod nisi esset in semine, ad parvulos (quibus circumcissione illâ corporis auferendum est) nullatenus perveniret.*

Ac postea: *Secunda nativitati damnata Dei bonitas exhibetur, ut de maledicto semine rationalis natura formetur.*

Vnde & alibi: *Si semen ipsum nullum habet vitium, quid est quod scriptum est in Libro Sapientia: Semen illorum erat maledictum ab initio?*

Et iterum contra Iulianum: *Quis Christianus ignorat, quod ille qui primum hominem fecit ex pulvere, omnes fabricetur ex semine? Sed ex semine iam vitiato atque damnato; quod partim per veritatem*

S. Aug. lib.  
3. c. 9. de  
pecc. merit.

S. Aug. lib.  
6. c. 14. -  
contra Iul.

Lib. eodem  
c. 7.

Lib. eodem  
c. 19.

Lib. 2. c. 8.  
de nupt.

Lib. 3. c. 17  
contra Iul.



veritatem remanet in supplicio, partim per misericordiam liberatur à malo.

Et in Opere adversus eundem imperfecto: *Naturâ bona sunt semina; sed vitiantur & semina, ipsaque vitiatâ propagantur & vitia.* Lib. 2.  
Oper. im-  
perf.

Hoc autem vitium seminis dicit esse morbo, aut valetudini simile: Ego tanquam valetudinem malam, ait, ex origine vitiatâ ingentum esse homini dico vitium, quo caro concupiscit adversus spiritum. Lib. 6. c. 17.  
contra Iul.

Postea epitheto, quod ei Iulianus suggererat, *qualitatem affectionalem*, non *affectionem*, vocat: sive ut Philosophi jam loquuntur, *passivam qualitatem* tertiâ speciei permanentem, non *passionem* transitoriam. Lib. eodem  
c. 18.

Quæ, ut ibidem Augustinus, *de substantia ad substantiam non emigrando transit; sed quodam operante contagio, id est concupiscentia affectu; sicut de parentibus morbidis morbida proles procreatur.*

Hinc alibi, *trajectionem* istius morbi in prolem, podagræ à parente in filium propagationi comparat: *Si quis intemperantiâ sibi podagram faciat eamque transmittat in filios, quod sæpe contingit; nonne rectè dicitur, in eos illud vitium de parente transiisse? Ipsos quoque hoc in parente fecisse? Quoniam quando ipse fecit, in illo fuerunt; ac sic ipsi atque ille adhuc unus fuerunt. Fecerunt ergo non actione hominum, sed ratione iam seminum.* Lib. 2.  
Oper. im-  
perf.

Et profectò Iulianus sic intellexit & accepit Augustini mentem. Vnde irridens interrogat eum: *Qui fieri posset, ut res arbitrij conditioni seminum misceretur?* Cui, non negando, sed concedendo, respondet Augustinus: *Si fieri non posset, non esset unde parvulos nondum de corpore egressos, mortuos diceremus.* Existimat enim, ut antè dicentem audivimus, sine vitio isto & morbida qualitate semini inhærente, non posse vitium originale à parentibus ad parvulos utero matrum adhuc inclusos pervenire. Lib. 6. c. 9.  
contra Iul.

Consentiunt Magistro suo omnes S. Augustini discipuli. Vnde S. Prosper inter errores Pelagianos ponit, quòd dicerent, primos parentes formâ tantùm & exemplo, non semine nocuos fuisse suæ proli. Car. de  
Ingrat.

libertate malè usi.

A a a 2

Peccarunt,

*Peccarunt, formâ nocui, non semine proli.*

Hypog.  
lib. 5. c. 4. Et Augustinianus ille Hypognostici Auctor: *Audite apertius ad sugillationem vestram, idipsum qualiter ex Hebraeo verbo sit in-*  
Iob. 14. *Latinum translatum, à S. Hieronymo: Quis, ait, potest facere mundum de immundo conceptum semine, nonne tu, qui solus es? Parentum sordidatum parvulum dicit esse peccato; quorum sunt immunda semina, non conditione naturæ, sed prævaricantis vitio Protoplasti.*

Lib. 4. c. 7. Sordes verò istas & immunditiam seminum, inquietam & mortiferam pestem antea appellaverat: quam primi parentes, ait, in posteros transmiserunt, tanquam peccati sui testimonium, hereditario jure dimittentes nobis.

Bib. 1. c. 1. Nec alius S. Olympij sensus, quem S. Augustinus adversus  
contra. Iul. Iulianum citat: *Protoplasti mortifera transgressione, ait, vitium sparsum est in germine, ut peccatum cum homine nasceretur.* Et quid indicat aliud S. Ambrosius ab eodem memoratus, dum ait, in Christi conceptione, *Spiritum sanctum immaculatum semen inviolabili utero infudisse?* Nam alia semina maculosa esse satis aperte insinuat, qui illud unicum immaculatum excipit.

Henr.  
Quodl. 1.  
q. 2. Eadem est multorum veterum Scholasticorum, & ipsius Magistri Scholæ Petri Lombardi sententia. *Dicendum ad hoc, inquit veteris Sorbonæ ornamentum Henricus à Gandavo, quod in semine de quo formatur hominis corpus, non est originale peccatum, nisi quasi in materiali radice, & quasi quadam infectio morbo- sa existens in semine, contracta à parentibus propter fomitem manentem in ipsis, in pœnam, post originalis ablutionem in eis.*

Gabr. 2.  
di 31. q. 2. Similis ferè mens & sensus totius Scholæ Nominalium. Dicat pro omnibus Gabriel. *Quod qualitas illa, seu fomes sit in carne, inquit, probatur, quia illa est in semine, & corpore seminato, priusquam infundatur anima. Alioqui quomodo contraheretur à parente, cum omnis actio parentum cessaverit ante animæ infusionem?*

Arimin. 2.  
di 30. q. 1. Dicat & Gregorius Ariminensis, Prior quondam Generalis Eremitarum S. Augustini, & sensuum ejusdem S. Patris diligens & solers indagator. *Dicendum, inquit, quod ex qualitate existente in semine, similis qualitas causetur in carne proli, juxta illud Iobi, Quis potest facere mundum de immundo conceptum semine?*

Imò S. Thomas qualitatem in semine etiam agnoscit, licet  
eam.



eam à virtute formativa, & naturali temperie seminis non distinguat. Dicendum, ait, quòd in semine est corruptio originalis peccati non actu, sed virtute; eo modo quo est ibi virtute humana natura. Quæ quidem virtus activa in semine, est in spiritu spumoso, ut Aristoteles dicit in libr. de generat. animal.

D.Tho. q. 4  
a. 1. de  
Malo.

Et Capreolus, ac Soncinas in Epitome Capreoli: Peccatum originale, inquit, causatur in anima virtute seminis infecti, vel à carne infecta. Ratio est, quia peccatum contractum per originem causatur in anima virtute ejus quod trahitur per originem. Sed semen, vel caro infecta est hujusmodi: Ergo.

## ARTICVLVS VII.

S. Anselmus à sententia S. Augustini non recedit.

**N**Eque S. Augustino, Magistro suo adversatur S. Anselmus, dum ait, hominem dici de immundo conceptum semine: non quòd in semine sit immunditia peccati, aut peccatum, siue iniquitas; sed quia ab ipso semine, & ipsa conceptione, ex qua incipit homo esse, accipit necessitatem, ut cum habebit animam rationalem, habeat peccati immunditiam; quæ non est aliud quàm peccatum & iniquitas. Nam etsi ex vitiosa concupiscentia, semine generetur infans, non tamen magis est in semine culpa, quàm est in sputo, vel in sanguine, si quis mala voluntate expuit, aut de sanguine suo aliquid emittit: non enim sputum aut sanguis, sed mala voluntas arguitur. Et antea dixerat: Si Adam & Eva generassent sine præcedenti peccato, non tamen esset in semine justitia, nec esse posset, priusquam formaretur in viventem hominem. Si ergo semen hominis non est susceptibile justitiæ priusquam fiat homo, non potest suscipere originale peccatum antequam homo fiat. Nempe originale peccatum esse in justitiæ dubitari non debet.

S. Ansel.  
lib. de con-  
cept. vir-  
gin. c. 7.

Ibid. c. 3.

Per hæc, inquam, & similia, quæ S. Anselmus illo Libro & alibi spargit, S. Augustino minimè contradicit. Non enim loquitur de toto, ut sic dicam, peccato originis, sed de sublimissima & subtilissima ejus parte, quæ est veluti apex & anima ipsius, & quæ sola propriè rationem culpæ habet, quam

S. Augustinus *reatum* peccati originalis nominat. Clarè enim mentem suam explicat S. Anselmus, dum ibidem addit: *Originale peccatum non est aliud quàm injustitia, id est, absentia debita iustitiæ. Non enim videtur esse injustitia, nisi in natura, quæ cum debet habere iustitiam, non habet.*

S. Ansel.  
ibid.

Doctrina igitur S. Anselmi est, peccatum originale, quantum ad formale, in quo propria ratio culpæ consistit, non esse concupiscentiam illam, quæ deleta per baptismum culpâ, manet; sed esse ipsam privationem iustitiæ, quæ nec in semine, nec in corpore, sed in anima ejusque voluntate inhæret. *Sciendum enim est, addit S. Anselmus, quòd iustitia non potest esse nisi in voluntate, si iustitia est rectitudo voluntatis propter se servata; quare nec iniustitia. Non enim vocatur absentia iustitiæ iniustitia, nisi ubi debet esse iustitia.*

Eodem quoque modo de peccato originali locuti sunt Tridentini Patres, dum Anathemate feriunt illum, qui per gratiam baptismi, *reatum originalis peccati remitti negat; aut etiam asserit, non tolli totum id quod veram & propriam peccati rationem habet.* Propria enim ratio peccati & offensæ Dei in reatu culpæ consistit. Vbi signanter & meditatè, vocabulo S. Augustini, *reatum* exprimunt; ne videantur ab ipso, & S. Thomâ recedere, qui præter reatum culpæ, quæ est in anima, concupiscentiam corporalem peccati originalis veluti partem materiale esse dicunt: quia Scriptura sacra sic loquitur, & sic loqui, ac sentire necessarium esse existimant, ad explicandam culpæ originalis à parente in filium trajectionem.

Præcipua enim difficultas & lucta S. Augustini cum Iuliano & Pelagianis non tam fuit de partis materialis, quàm de partis formalis, seu de culpæ trajectione; præsertim ubi hæc in parentibus deleta est per baptismum.

Lib 6. c. 9. Insultat enim sæpe, & eum interrogat Iulianus, *Qui fieri possit, ut res arbitrij (qualis est culpa, quæ à libero arbitrio originem ducere debet) conditioni seminum misceretur?* Et alibi, Lib. 2. §. 8. Oper. imperf. majore cachinno & elegantiori stylo dicit, Augustinum *in Ecclesijs predicare, tantam esse vim peccati, ut ante membrorum formam,*



formam, ante initium adventumque animæ, iactis seminibus supervolans, in secretum matris invadat, & reos faciat nascituros, ortuq; ipso antiquior expectet culpa substantiam.

Vbi tamen, ut Hæreticorum mos est, nugas & fabulas miscet, quas affingit Augustino. Non enim Augustinus docet, veram culpam supervolare, aut inhærere feminibus ante animæ rationalis adventum. Accidens enim non expectat, sed supponit suum subiectum. Culpa autem, sive quod in peccato originali formale est, animæ rationalis est accidens; cum sit carentia iustitiæ debitæ ei inesse, ut à S. Anselmo paulò antè audivimus.

Neglectâ ergo istarum fabellarum refutatione, Iuliano tantum S. Ambrosij auctoritate & verbis respondet S. Augustinus: Quod unusquisque concupiscentiæ voluptate concretus, & genitalibus visceribus infusus, & coagulatus in sanguine in pannis involutus, prius subeat delictorum contagium, quàm vitalis spiritus munus hauriat.

Alibi verò eidem reponit, illam culpæ trajectionem, non Lib. 6. c. 4.  
facili sive ratione, sive sermone explicari. Sed etsi, addit, nulla ratione contra Iul.  
indagetur, nullo sermone explicetur; verum tamen est, quod antiqui-  
tus veraci fide Catholica predicatur, & creditur per Ecclesiam totam.

Et postea: Quod si contra vitium curiositatis humanæ, ait, cui Ibid. c. 4.  
solent comprehensa vilescere, etiam hoc Deus, quemadmodum multa,  
sic occultare voluit, ut id investigare atque comprehendere humana  
coniectura non possit; ideòne contra Ecclesiam matrem vestram ra-  
tiunculis vestris, quasi parricidalibus pugiunculis, debetis armari?

Et ne hoc solum putetur in rerum natura esse hominibus incomprehensibile, pergit: Nisi autem, sermonis longitudine, in-  
quit, nollem fatigare Lectorem, iam te mille rerum generibus, quarum  
incomprehensibilis ratio contra usitatas naturæ vias, quasi per deserta  
opaca repit, obruerem; in quibus etiam degenerantia semina, non  
quidem in dissimillimum genus (quia nec oleaster sic est ab olea discre-  
tus, ut vitis) sed in quandam si dici potest, similem dissimilitudinem;  
sicut vitis est labrusca dissimilis, qua tamen de semine vitis gignitur,  
multa monstrarem.

Vnde cum argumentis humanis, ut Philosophus Peripateticus,  
non

non *inimentis divinis*, trajectionem peccati originalis à parente iusto in prolem, oppugnaret Iulianus; Augustinus omiſſis paulisper Scripturis ſacris, armis ſimilibus eum repetit, & multis rerum naturalium exemplis undique circumvenit.

Ibid. c. 6.  
7. &c.

Nonne enim ſæpe cauſæ naturales, inquit, partem aliquam addunt, aut qualitatem allinunt effectui, quâ tamen ipſæ carebant? Quid ergo tantopere mirum, ſi parens à peccato originali liber, filium peccato ſubditum generet?

*Purgatur enim, ait, à palea triticum, ſicut homo à peccato; & tamen inde cum palea naſcitur alterum. Quid præputij retinet circumciſus, de quo præputiatus tamen gignitur, & quod iam non eſt in homine, trahitur in hominis ſemine? Fundanus Carthaginus Rhetor, cum ipſe accidenti vitio luſcus eſſet, luſcum filium procreavit.*

Et nonne etiam pinguis oleæ ſemen ſterilem tantum oleaſtrum producit? Nonne generoſa vitis ignobilem labruſcam, non vitem ſibi ſimilem parit? *Et cur non credamus, ſubdit Auguſtinus, hoc ideo voluiſſe Creatorem, ut crederemus etiam ſemen hominis poſſe vitium de gignentibus trahere, quod in eis à quibus gignitur non eſt: ut ad eius gratiam, quâ homines eruantur à poteſtate tenebrarum, & in regnum illius transferuntur, etiam baptizati cum ſuis parvulis currerent; ſicut tecum concurrit pater ſanctus (Memorius Iuliani pater, Episcopos, & S. Auguſtino amicus) neſciens eidem gratiâ quàm eſſes futurus ingratus?*

Cum enim omnia iſta naturalia, & totus Mundus propter homines ſit à Deo conditus, quid mirum, ſi talibus naturæ exemplis nos ad fidem erudire voluerit?

Etiſi verò talia exempla intellectum ad veritatis incunabula manu ducant, non tamen eam planè denudant.

Ratio ergo propria & fundamentalis eſt, quia parentes quantumvis juſti, per ſemen ſuum directè traijciunt in prolem concupiſcentiam habitualement, ſive partem peccati originalis quaſi materialem. Hæc autem eſt corporale quoddam pondus appetitum hominis inferiorem, & conſequenter (ubi gratia non reſiſtit) ſuperiorem ad res terrenas deprimens, & à Deo avertens.

Anima



Anima quippe carni peccati aggravanda miscetur, per carnem fit carnalis. & defectivo appetitu quodammodo corporascit, contagio peccati ex carne peccati obruitur, cum membris inseritur, ut S. Augustinus toties diversis locis inculcat; & denique antiquâ Tertulliani phrasi, concretionem carnis infacatur.

Quia igitur tali in corpus suum & carnales affectus depressione, voluntas etiam & supremus animæ apex à Deo habitualiter avertitur, in isto apice formale peccati originis resultat; quod nihil est aliud quam illa habitualis aversio, sive reatus, culpa, peccati vinculum, injustitia, iniquitas, macula, mors animæ, ut alibi eam S. Augustinus appellat. Quæ quia Deo odiosa est & displicet, per baptismi gratiam solvi, elui, & extinguere debet. Quod ubi factum fuerit, iam concupiscentia ipsa non est in regeneratis peccatum, ait divinæ gratiæ Magister. Nam deleta culpæ reatu, quæ in illo composito accidentario instar formæ erat, manet solum id quod materiæ vicem gerit, ac veluti peccati originis cadaver est. Manet enim in vetustate carnis, tanquam superatum & peremptum, ait S. Augustinus.

S. Aug. lib. 2. c. ult. & lib. 1. c. 33. de nupt. Contra Secund. c. 11. lib. 10. c. 16. de Genes. Tertull. c. 53. de anima.

S. Augusti lib. 1. c. 23. de nupt.

Lib. 2. c. 28. de pecc. merit.

## ARTICVLVS IX.

*Quidnam sit illa morbida qualitas semini inhærens, qua generans prolem suam peccato originis inficit.*

NVllibi dubitat S. Augustinus, quin noxia & instar morbi corporalis, qualitas à parentibus, vehiculo seminis in prolem transeat; sed non satis liquet cujusmodi essentia, aut qualem illam esse dicat. Nam hætenus tantum, eam per hæc & similia vocabula describit: *Qualitas morbida, vitiosa, mortifera, peccati fomes, lex membrorum, infirmitas, languor, concupiscentia, concupiscentiæ morbus, &c.*

Guil. Occamus, cum sua Nominalium Schola, à Gabriele citatus, eam sic definit: *Fomes est qualitas carnis inordinata, inclinans appetitum sensitivum ad actum deformem & vitiosum in habente iudicium rationis.*

Gabr. 2. d. 31. q. 1.

Dubitat deinde, an à temperie humorum, & vitioso corporis

Occam  
quodl. 3.

poris temperamento distinguere eam oporteat. *Potest dici de fomite, inquit, sicut de infirmitate corporali. Quia infirmitas causatur quandoque ex improportione humorum, imò est ipsa improportio humorum. Aliquando ex putrefactione ipsorum causatur aliqua qualitas ( ut venenum pestis ) distincta ab humoribus. Eodem modo potest dici, quod ille fomes, siue qualitas sit aliquis humor, vel humores qui causantur à causis naturalibus: puta, quando Deus propter peccatum reliquit hominem suis naturalibus. Vel fortè est improportio humorum, vel aliqua qualitas distincta ab humoribus. Sed nullum istorum potest probari, vel improbari per rationem evidentem.*

Gregor. 2.  
d. 30. q. 1.

Sed Gregorius Ariminensis, ex eadem Nominalium classe, decernit esse qualitatem à tota naturali temperie distinctam: additque ( secutus in hoc Pet. Lombardum ) ab istâ pestifera qualitate corporeâ similem aliam spiritalem infectionem realem ac positivam, in animam propagari. Et hoc voluisse putat

S. August.  
lib. 5. c. 4.  
contra Iul.

S. Augustinum, cum dixit, *animam in carne, tanquam in vitiatovase corrumpi.*

Lib. 4. c. 7.  
Hypogn.

Si quæras, à qua causâ qualitas illa pestifera imprimatur nostræ carni? Respondet Gregorius Arim. *Ex flatu illius venenosi serpentis, in quo Diabolus primos parentes tentavit.* Phrasim nempe metaphoricam Auctoris Hypognostici nimis propriè & simpliciter accipiens; ubi ait, *Sibilo venenosi serpentis, cuius callidis decepti sunt blandimentis, hanc inquietam & mortiferam pestem, eorum corpora concepisse; ac inde tanquam à fonte in corpora posterorum, seminis generationisque propagine, defluxisse.*

Sed Auctor ille Hypognost. per *sibilum serpentis*, non flatum oris, quo serpentes venena physicè propagant, intellexit; sed suasionem Diaboli, ore serpentis factam, qua Evam, ac per eam maritum, in prævaricationem seduxit. Itaque, ne S. Augustini doctrinam, Philosophorum & Medicorum calumnijs ex supervacuo obijciamus, qualitas illa venenata à toto naturali qualitatibus primarum & secundarum temperamento distincta, S. Augustino necessaria non est, ut S. Thomas, Scotus, & alij adverterunt; sed naturale seminis & humani corporis temperamentum, per justitiæ originalis subtractionem effrenatum & petulans, omnes noxas & totam infamiam illius  
noxiae



noxiae & pestiferæ qualitatibus sustinere potest. Atque hanc etiam esse S. Augustini mentem, varijs ejus testimonijs affirmare possumus.

Quid enim aliud indicat, cum ait, animas quasdam magis, aut minus bonas, vel malas esse, *Vel moribus secundum liberum voluntatis arbitrium, vel differentiâ temperatura corporum; dum alie magis, alie minus gravantur corpore, quod corrumpit & aggravat animam?* Ecce enim *temperatura isti corporum*, epithetum istud, *corrumpere & aggravare animam*, jam tribuit, quod fomiti, seu peccato originis, prout est in carne nostra, tribuere solet.

S. August.  
lib. 10. c. 17  
de Genes.

Et nonne idem alibi sat clarè significat, quando concupiscentiam accedente senectute multo maximè minui ait? Quid enim est, quod senectus in corpore mutat, nisi fervidius temperamentum, quod ipsa frigore & humore suo largiter diluit?

Lib. 1. c. 25.  
de nup.

Et alicubi iterum S. Augustinus, cum varijs exemplis & imaginibus depinxisset: quomodo alij magis, alij minus, corpore graventur (ut quoddam alij naturâ lenes, alij levissimis de causis, irâ facillimâ ardentes: alij in concubitu ita frigidi, ut vix omnino moveantur, alij libidinosisissimi, ut vix omnino teneantur, &c. quæ spectant ad varietatem inclinationum, quibus concupiscentia animas nostras versus terram, plûs, aut minus deprimit; ) addit in fine, *Medicos audere ista tribuere temperationibus corporum.* Vbi audentes eos appellat; quia etsi temperamenta corporum sint causæ proximæ earum inclinationum, est tamen alius principalis auctor, Deus, *sub cuius occulto judicio, nec injusto*, ait, ista eveniunt, & peccati originalis poenis homines magis, vel minus ad terram incurvantur.

Lib. 4. c. 3.  
contra Iul.

Et ut expressius videas, S. Augustinum nullam qualitatem à naturali temperamento effreni & dissoluti distinctam requirere, alicubi docet, ejusmodi morbidam & mortiferam qualitatem, pecorum corporibus etiam inesse. *Hoc amisso statu*, inquit, *corpus eorum duxit morbidam & mortiferam qualitatem, quæ inest etiam pecorum carni; ac per hoc etiam eundem motum qui fit in pecoribus concumbendi appetitûs, ut succedant nascentia morientibus.*

Lib. 11. c. 32.  
de Genes.

Et alibi: *Etsi homo in honore positus, & non intelligens, comparatur pecoribus, eisq; similis sit; non tamen usque adeo similis fit, ut pecus*

Lib. de pecc. orig.  
c. 40.

*fit. Comparatur namque per vitium, non per naturam; non pecoris vitio, sed natura. Tanta namque excellentia est in comparatione pecoris homo, ut vitium hominis natura sit pecoris; nec tamen ideo natura hominis in naturam vertitur pecoris.*

Quænam verò est illa qualitas pecori naturalis, quæ jam sit vitium hominis? Non alia sanè, quàm temperatura naturalis pecorini corporis, quæ naturaliter effrenis est, quia in tali corpore nullæ habenæ, nullum frenum est rationis. Non enim aliâ, nescio quâ, qualitate venenatâ, ex efflatu cujusquam serpentis, afflatæ sunt beluæ.

S. August.  
lib. 2. c. 8.  
contra Iul.

Talis verò temperatura effrenis, vitium est hominis; quia, ut ex Ambrosio suo ait Augustinus, *Princeps & domina carnis naturaliter est anima, qua domare carnem debet & regere.*

Tract. 2. in  
Ioan.

Naturale quippe est, ut spiritus dominetur carni, sicut vir uxori. Quid autem pejus domo, ait Augustinus, ubi femina habet imperium super virum?

Epist. 2. c. 3.  
de nupt.  
2. Reg. 2.

S. Ansel.  
lib. de con.  
cept. virg.  
c. 5.

S. Tho. 1. 2.  
q. 82. a. 1.

Quia verò donum supernaturale gratiæ originalis hanc naturalem subjectionem carnis ad spiritum faciebat, idè ablato per peccatum primi hominis isto freno, temperies hominis incepit esse brutalis, & appetitum inferiorem, ac dehinc superiorem, huc illuc per omnes carnalium voluptatum concupiscentias raptare. Nam *divinâ gratiâ non subveniente*, inquit Augustinus, *quid sunt homines, nisi quod ait Apostolus Petrus, velut muta animalia procreata naturaliter in captivitate & interitu? Catenâ enim originalis iustitiæ solutâ, homo velut indomita fera ruptis vinculis discurrendo savit*, ait S. Anselmus. Vnde S. Thomas: *Peccatum originale, est quadam inordinata dispositio, proveniens ex dissolutione illius harmonia, in qua consistebat ratio originalis iustitiæ: sicut etiam agritudo corporalis est quadam inordinata dispositio corporis, secundum quam solvitur aequalitas, in qua consistit ratio sanitatis. Vnde peccatum originale languor natura dicitur.*

S. August.  
lib. 4. c. 5.  
& 14. con-  
tra Iul.

Hinc S. Augustinus, quoties libidinem, sive concupiscentiam bruti à concupiscentia hominis distinguit, non aliud discrimen interponit, quàm quòd *Libido malum non sit in beluis, quoniam non repugnat rationi, qua carent.* Item alibi: *Ideo in pecoribus malum non est concupiscentia, quia non adversus spiritum concupiscit,*



*concupiscit, sed eorum potius spiritum oblectat.* Signum igitur est, quod ex parte ipsius concupiscentiæ, & ponderis quo appetitus ad concupiscendum trahitur, sit similitudo & paritas; disparitas verò solum in eo, quod in pecore non sit ratio & rationalis spiritus, adversus quem concupiscentia beluina concupiscat & rebellet.

Pondus autem concupiscendi in beluis à temperamento venit, igitur simile temperamentum, sine alia fictitia qualitate, sufficiet ad deprimendum appetitum in hominibus.

Quantum enim momenti ad inclinandas hominum concupiscentias habeat temperamentum humani corporis, ex Galeni libro, *Quod mores animæ temperamentum corporis sequantur*, discere licet. Vbi Galenus pondus, quo anima sui corporis temperamentum sequitur, perpendens, vehementer dubitat, an ipsa non sit mortalis, *nec solum gerat morem corpori, sed nihil aliud sit, quam corporis temperamentum.*

Galen. lib. 3.  
Quod mores &c.

Idem quoque temperamenti pondus & impetum, exemplis hominum ex bile, melancholiâ, aut calore Venereo furentium, vel temperamenti puerilis in virilem, aut senilem mutatione, cum maxima morum conversione, facile intelligimus. Aliud quippe temperamentum & complexio corporis alias concupiscentias & mores longè alios gignit. Vnde S. Thomas: *Solutio vinculo originalis iustitiæ, sub quo, ait, quodam ordine omnes vires animæ continebantur, unaquæque vis animæ tendit in suum proprium motum, & tanto vehementius, quanto fuerit fortior. Contingit autem vires aliquas animæ esse fortiores in uno, propter diversas corporis complexionem.*

S. Tho. 1. 2. q. 82. a. 4.

Complexionum autem ista diversitas latet in semine, sicut in scintilla, quæ futuri hominis totam complexionem accendit, & materiæ suæ corpulentio rem portionem ejusque temperiem, in partium seminalium embryonis fabricam impendit. Et hoc est, ut opinor, vitium illud seminis, quod ut à S. Augustino antea audivimus, morbum concupiscentialem, id est, complexionem & temperamentum quoddam effrene, in corpus prolis primum, deinde privationem iustitiæ in animam trajicit. Anima enim quæ tali vasi primum increatur &

infunditur, hoc est corpori tam inordinatè composito & temperato, ut temperamenti & inclinationis ad res terrenas pondus, non subfit rationis imperio; meretur justitiâ originali carere, quam in primo parente natura humana aliter instituta habuit, & peccato suo perdidit. Vnde carentia ista justitiæ, per respectum ad peccatum quo natura in Adamo peccavit, induit rationem culpe habitualis. *Originale enim, ait D. Thomas, Idem. 1. 2. q. 82. a. 1. cum sit peccatum natura, est quedam inordinata dispositio ipsius natura, qua habet rationem culpa, in quantum derivatur ex primo parente.* Atque hâc viâ & ratione non tam difficulter intelligitur, quomodo per semen, & generationem ac originem peccatum originale ad posteros dimanet.

## ARTICVLVS X.

*Quomodo verum est quod docet S. Augustinus, morbidam concupiscentiæ qualitatem pravâ consuetudine augeri, continentiam diminui.*

**H**anc loquendi phrasim quispiam non satis altè inspiciens, putabit adversari ijs quæ jam jam diximus. Certè enim temperies humani corporis non intenditur per pravam consuetudinem & vitiosos habitus; nec per charitatem, aut alias virtutes remitti potest. Habitus enim sunt in anima, temperies in corpore; gradus autem formæ qui se intendunt aut remittunt, in eodem proximo subjecto esse debent.

Augeri tamen malâ peccandi consuetudine, concupiscentialem morbum sæpe dicit S. Augustinus. Si *querat aliquis, S. August. lib. 1. q. 1. ait, unde hoc sit, quod dicit habitare in carne sua non utique bonum, ad Simplic, id est peccatum? Vnde, nisi ex traduce mortalitatis, & assiduitate voluptatis? Illud est ex pœna originalis peccati; hoc est ex pœna frequentati peccati. Cum illo in hanc vitam nascimur, hoc vivendo addimus. Quæ duo, scilicet tanquam natura & consuetudo coniuncta, robustissimam faciunt & invictissimam cupiditatem: quam vocat Apostolus, peccatum, & dicit habitare in carne sua, id est, dominatum quendam*



*quendam & quasi regnum obtinere.* Ecce, quomodo consuetudo prava roboret cupiditatem, seu concupiscentiam illam, quam Apostolus peccatum in carne sua habitans appellat.

De continentia verò, siue concupiscentia bonâ, ait etiam Augustinus, per eam imminui concupiscentiam malam: & *minora tunc adversus eam exerceri certamina, non virtutum diminutione, sed hostili; nec deficiente pugna, sed crescente victoria.* Et unde obsecro, inquit, nisi quia bona qualitas aucta, & mala minuta est? Et alibi antè: *Neque anima in sanctitate non proficit, cum magis* Lib. 6. c. 18.  
contra Iul.

*magisq; minuit eas quibus non consentit, carnales cupiditates.* Quid ergo? Minuitur, aut mutatur corporis temperies, quando homo bonâ concupiscentiâ pugnando, malam concupiscentiam vincit?

Id fieri sanè non est necessarium.

Vt autem hoc intelligatur, notandum est, noxiam illam qualitatem, quæ in semine, aut in carne nostra est, vocari ea-  
tens à S. Augustino peccatum originis, & concupiscentiam malam, quatenus est habituale quoddam veluti pondus, appetitum hominis inferiorem, & quadam sequelæ concatenatione voluntatem, ad amorem rerum terrenarum inclinans. Sub hac enim consideratione, concupiscentia appellatur.

Radix verò ejus prima, est qualitas feminis, quæ temperiem corporis humani accendit & temperat. Deinde temperies ista corporis appetitum tam inferiorem, quàm superiorem versus terram inclinât. Et quia habitus pravi idem etiam faciunt, eodemque inclinant, dicuntur augere illud concupiscentiæ originalis pondus; non intendendo ipsum additione gradûs ad gradum in eodem proximo subjecto; sed accumulando vires, & multiplicando inclinationes versus idem quasi centrum. Quemadmodum ferè, si quis impulsu manûs adjutaret gravitatem lapidis, quâ versus terræ centrum annuit.

Similiter quando concupiscentia per actus charitatis, aut virtutum minui dicitur, non necessariò temperies corporis in seipsa mutationem accipit; sed pondus ejus solum refrenatur, ne voluntatem ad rerum terrenarum amorem tum potenter inclinât.

Ex

S. August.  
lib. 10.  
c. 16. de  
Genes.

Ex quibus patet, ne quidem id quod materiale est in peccato originali, esse propriè in semine, nisi tanquam in causa temperiei, & qualitatum corporis humani foetus. Hæc enim temperies corporis est quæ proximè animam inclinât, *affigitq; humi divina particulam aurâ, & contagione peccati obruit, cum his inseritur membris*, ut loquitur S. Augustinus.

S. Prosp.  
Sent. 306.

Vnde etiam fit, ut proximorum parentum magis, aut minus vitiosæ temperies aggravent, aut relevent vetus peccati originis ab Adamo attractum pondus. Nam *sicut quidam parentes*, ait ex sententia sui Magistri S. Prosper, *aggravant originale peccatum; ita quidam relevent: sed nullus tollit, nisi ille de quo dictum est, Ecce Agnus Dei, ecce qui tollit &c.*

Patet deinde, quodd quamdiu materia hominis est sub forma irrationalis embryonis, temperies illa respectu talis forme non magis sit qualitas morbida & vitiosa, quàm sit in brutis. Verùm ubi anima rationalis advenerit, jam incipit ei esse disconveniens & morbosa, quia naturalis animæ dignitas postulat, ut temperamenti & appetitûs inferioris pondus imperio mentis ejus obediat. Hoc denique ad confusionem vitandam notandum est. A multis nomine concupiscentiæ intelligi ipsam potentiam animæ, quam appetitum inferiorem appellamus. Illa enim est, quæ temperamenti, aut pravorum habituum pondere depressa, inordinatè concupiscit.

Sed S. Augustinus de concupiscentia semper loquitur tanquam de pondere aliquo distincto ab anima, ac omnibus ejus potentijs. Vnde doctrinæ & menti ejus conformiùs loquuntur, qui illam concipiunt instar habitualis cujusdam qualitatis, quæ non sit ipse appetitus inferior animæ rationalis, sed pondus potiùs eum, & appetitum superiorem deprimens. Cujus ponderis & depressionis principium à temperamento corporis inordinato & inobedienti, à parte rei non distinguimus. Aliàs si appetitum inferiorem pondere isto gravatum, sive compositum accidentarium ex ipsa animæ potentia & pondere eam declinante, appellare concupiscentiam lubet, de verbis non disputamus: modò & in humano semine, & in corporis vitiosa qualitate, ejus mali radicem & originem esse fatearis.



fatearis. Quod S. Augustinus necessarium esse existimavit, ut peccatum originale per naturalem originem seu generationem, à parentibus ad liberos transire dici possit.

## ARTICVLVS XI.

*An in semine femineo sit etiam eiusmodi qualitas morbosa.*

**D**E vitio humani seminis, sine discrimine loquitur Augustinus. Vnde non tantum virile, sed etiam femininum semen morbidâ qualitate infectum peccato primorum parentum esse censet. Cum enim totum humani corporis in utroque sexu temperamentum effrene & spiritui rebelle sit, planè consequens videtur, ut semen, quod in generationem confert femina, eodem vitio laboret. Quod omnino potius supponit, quàm probet Augustinus. Nam cum Iulianus ex illo Apostoli, *Sicut per unum hominem peccatum intravit in Mundum* &c. imitatione, non generatione peccatum ab Adamo contrahi, & moribus ad posteros, non seminibus de veli, *irrefutabiliter confectum esse clamaret: quia aliàs dicere Apostolus debuisset, per duos, non per unum hominem, cum unus qui præbenda imitationi sufficit, generationi implenda non sufficiat.* Rom. 5. Lib. 2. Oper. im. perf. Respondet Augustinus, quod sicut initium peccati à muliere fuit, sic initium generationis à viro esse. Prior enim vir seminat, ut femina pariat. Ideo ergo per unum hominem peccatum intravit in Mundum, quia per semen generationis intravit, quod à viro excipiens femina concipit. Quo more, addit, nasci noluit, qui solus sine peccato ex femina natus est. Vnde semine maculoso feminæ etiam peccatum intrasse significat; etsi per virile semen intraverit prius, quia vir generationem inchoat, semen effundendo in agrum feminæ, quod ipsa concipit. Quamvis possem dicere, addit postea, ideo non duos, sed unum hominem dixisse Apostolum, per quem peccatum intravit in Mundum; quia duo sunt una caro, maxime quando vir adharet uxori & iuvitur concubitus. Lib. 1. c. 16. de pecc. merit. Quod & alibi olim dixerat: Sive à muliere initium peccati, sive ab Adam, inquit, dicatur, utrumque ad primum hominem pertinet. quoniam,

quoniam, sicut novimus, mulier ex viro est, & utriusque caro una est. Vnde & illud scriptum est, Et erunt duo in carne una. Igitur jam non duo, inquit Dominus, sed una caro.

S. Ansel.  
c. 9. de con-  
cept. virg.

Et S. Anselmus magis adhuc disertè & enucleatè Magistri sui verba enarrans: Illa duorum hominum copula tota intelligitur, inquit, in nomine principalis partis; sicut saepe per partem totum solet significari. Hæc apertè indicant, utriusque vitioso semine & concursu peccatum in Mundum intrasse. Vnde alibi ait, *vulnere quod per duorum hominum liberum arbitrium factum est, totum genus humanum claudicare*. Vbi duorum, non unius tantum, dicit, quasi femina perinde atque vir, illius claudicationis sit causa.

S. Aug. lib. 4.  
c. 16. contra  
Iul.

Hæc etiam intelliges, si advertas, quòd locum illum Apostoli, *Per unum hominem peccatum intravit in Mundum*, non sic accipiat ab Augustino & discipulis, quasi intraverit, quando perpetratum est; sed quando per utriusque concubitum & generationem in posteros fluxit. Et hoc sanè subtiliter. Nam prius est, peccatum fieri, quàm aliquò intrare, si præcisione subtili loqui volumus. Sic aqua fontana intrat in alveum & in flumen vertitur, non quandiu in fonte suo manet, sed quando inde effluit. Sententia igitur Augustini & Anselmi videtur esse: non tantum per Adami, sed etiam per Evæ semen, peccatum originale transisse ad posteros; quia unicum totale principium generationis est, conflatum ex utroque sexu. Licet vir sit principale, & ab eo per effusionem feminis inchoetur generatio, ideoque dixerit Apostolus, *per unum hominem peccatum in Mundum intrasse*. Semen tamen ejus solitarium, sicut ad generationem valere nihil potuit, ita nec peccatum propagare in posteros valuit. Semen igitur ejus immundum, per immundam feminæ eloacam transeundo, feminino semini immundo commixtum fuit, & utrumque in una massa immunda fermentatum, ad posteros peccatum detulit: ut valde fallatur Iulianus, cum *non seminibus fuisse deventum* dixit.

Ex his videtur confici, naturam humanam non sufficienter & plenè, tanquam in semine suo & fonte, conditam fuisse in solo Adamo, sed feminam quoque addi oportuisse, ut  
naturæ



natura fons impleteretur, qui in posteros posset manare. Et idcirco Deus condito viro dixit, *Non est bonum esse hominem solum; faciamus ei adiutorium simile sibi.*

Vnde sapientissimi hodie Medicorum refellunt, quod vulgò tanquàm ab Aristotele & Galeno traditum, jactari solet: feminam esse *marem occasionatum; natura errorem & monstrum.* Hæc enim Aristotelis & Galeni opinio nobis non probatur, ait Laurentius. *Naturam enim in femina, non minùs quàm maris generationem intendere existimamus; & feminam natura erratum ac prolapsionem dicere, indignum est Philosopho.* Quid ita? Nam feminam, inquit, necessariò creari decuit, quæ & locum excipiendo concipiendoq; semini præberet, & materiam eidem fovendo, alendo, augendoque conferret.

Andr. Laurent. lib. 8. q. 1. Anatom.

Quæ etiam SS. Patrum, & in primis S. Augustini Philosophia est. *Adiutorium quippe homini, inquit, secundum ipsum, fuisse faciendum, æterna ipsa veritas habet, per quam creata sunt omnia.* Adjutorium autem istud, propter filios procreandos esse dicit: *sicut adiutorium semini terra est, ut virgultum ex utroque nascatur.*

S. August. lib. 9. c. 2. de Genes.

Si ergo natura humana in duobus hominibus condi debuit, & utriusque semen ad naturalem ejus propagationem necessarium fuit, videtur quòd solius etiam feminæ peccatū nostram originem infecisset. Nam amissâ justitiâ originali, Eva semen morbidum ad generationem Caini contulisset, quod sano Adami semini permixtum & fermentatum, totam generationis massam corrupisset; quemadmodum unius solius parentis, etiam matris, podagra, calculus, aut alius hereditarius morbus sæpe in filios transit.

Censet enim ubique Augustinus, simili ferè modo concupiscentiæ morbum, atque istos hereditarios morbos, naturaliter ad prolem pervenire. Quomodo enim, inquit, parens mortalis nisi mortalem filium, infirmus infirmum, ac similis similem generaret? *Ut enim meliores gigneret, inquit, quàm ipse esset, non erat æquitas.*

S. August. lib. 3. c. 20. de libero arb.

Et apertè sic rem istam & Magistrum suum intellexit S. Anselmus. Vnde Evâ solâ peccante, ad avertendam à posteritate labem originalem, alium modum non invenit, quàm si Deus alteram feminam innocentē Adamo ad propagationem crearet.

S. Ansel.  
c. 9. de con-  
cept. virg.

crearet. Si non Adam, inquit, sed sola Eva peccasset, non necesse erat, totum humanum genus perire, sed solam Evam. Poterat namque Deus de Adam, in quo semen omnium creaverat, aliam facere mulierem, per quam de Adam propositum Dei perficeretur.

Lovan. in  
Nor. ad  
lib. 1. c. 16.  
de pecc-  
merit.  
Lib. 2. c. 2.  
Hypoga.

Ecce, si Adam innocens cum peccatrice Eva concubisset, quomodo existimet, totum genus humanum in posteris peritulum fuisse, ideoque alia muliere fuisse opus?

Huc quoque nostri Lovanienses in Notis ad Augustinum videntur inclinare. Et aperte Hypognostici Auctor: *In illis unis (Adam & Eva) omnes eramus, inquit, quia natura humani generis erant; sicut in omnibus nobis illi uni sunt, quia natura eorum sumus.*

S. Tho. 1. 2.  
q. 81. 2. §.

Contrà tamen censuit S. Thomas, argumento quòd femina materiam tantum, non vim efficientem ad generationem conferat. Sumpsit verò hoc ab Aristotele, quem nimisquam magni ubique facit.

Attamen dogma istud à Galeno & Medicis passim refellitur, ut Artic. III. vidimus. Maternum enim semen spiritum etiam suo artifice constat, licet imbecilliori quàm virile. Nam sæpe conformat foetum usque ad similitudinem matris, quam proles vultu & temperamento refert. Imò in congressu animalium diversæ speciei, ut rerum istarum curiosi notant, femina solet speciem ad se trahere. Nam ex ove & capro non capra, sed ovis durior lanâ; & ex capra & ariete, capella molliori pilo gignitur. Hoc autem evenit, quia mater & vim efficientem conformatricem, & plurimum materię ad prolis coagulationem contribuit. Vbi autem nascitur animal diversæ speciei ab utroque parente (ut ex asino & equâ mulus) plurimum etiam de matre proles habet. Muli quippe recalcitra-tio, pertinacia, & generositas à matre equa est, erfi patientia laborum ab asino patre.

Deinde licet semen maternum non magis, quàm sanguis menstruus, activum esset, tamen omnis materia foetus, sive sanguinea, sive seminalis, temperiem suam quam vehit, in coagululum & fabricam foetus invehit; indeque est, ut proles tam mascula, quàm feminea non raro, temperamenti similitudine  
ad ma-



ad matrem propius quàm ad patrē inclinēt. Et hinc colligitur, non opus esse activitate, ut proles temperiem matris sanam, aut morbosam contrahat, sed sufficere, ut semen, aut sanguis menstruus matris, quæ sunt primordia naturalis generationis, temperamentum suum conferat, & materiam sic temperatam artifici semini patris figurandam & conformandam obijciat.

Si ergo Eva peccatrix temperamentum materiæ, peccato vitiatam conferat, cur tota prolis temperies vitiosa non erit? Sit etenim Adami innocentis sanum semen, vincetur tamen ejus sinceritas, uxoris seminis contaminatione; cum bonum ex integra causa constet, malum ex singulis defectibus, ut S. Dionysij & vulgare Philosophorum axioma habet.

Et ita disertè sentit Henricus, qui indifferenter pronunciat <sup>Henric.</sup> contrahendum originale, *sive semen unius parentis, sive amborum* <sup>Quodl. 1.  
q. 21.</sup> infectum sit. Licet in hoc altero, contra S. Thomæ & communem sententiam erret; quòd neget necessarium esse, ut infectio ista per naturalem generationis viam in posteros defluat; sed *quòd is qui per miraculum ex aliqua parte hominis infecti generaretur, peccatum originale contraheret.*

Nihilominus doctrina S. Thomæ ( Quòd Evâ solâ prævaricante, peccatum originis in posteros non transisset ) sine mixturâ illâ falsæ opinionis Aristotelis, aliter sustineri potest. Si videlicet Adam solus consideretur ut caput humani generis, & Eva ut collum potius, quàm pars capitis. Nam ex Adamo re vera etiam profluxit Eva; & licet non communi naturalis generationis fluxu, attamen eo modo quo potuit. Quia enim sine feminâ aliâ generare eam Adamus non poterat, ex ipso tanquam ex trunco Eva excidi debuit. Et in hoc divina sapientia tam propè ad modum naturalem accessit, quàm fieri potuit. Imò modus ille primæ conditioni & creationi humanæ naturæ maximè connaturalis & consentaneus fuit.

Sicut ergo unicuique individuo Angelo, cujus natura in ipso stat, nec generatione ultrà propagari potest, gratiam pro ipso tantum servandam, Deus in prima creatione dederat; ita uni homini Adamo pro se, & totâ naturâ humanâ, quæ in

ipso continebatur, ut in fonte naturalis generationis, & etiam ut in trunco, ex quo prima femina excindi deberet: per quam deinde tanquam per collum generatio naturalis à capite illo virili in posteritatem fluere.

Vnde si Eva sola peccasset, justitiam tantum sibi amisisset; quia pro se solâ servandam acceperat. Semen tamen Adami purum per impurum feminae canalem transire debuisset, ideoque divina potentia fecisset, ut fortius virile semen femineis seminis impuritatem vinceret; quia indecens erat, ut innocentis capitis semen propter mixturâ alterius, temperamentum vitiosum & concupiscentiam in posteros transmitteret.

Aut certe, ut suspicatur S. Anselmus, aliam uxorem ei similem, & innocentem Adamo fabricasset.

Nec huic S. Thomæ doctrinæ S. Augustinus, credo, magnoperè repugnaret. Solùm enim dixit, Evam factò ipso, unâ cum Adamo, morbidam temperamenti sui qualitatem in filios trajecisse; non disputans, an privatio justitiæ originalis ei conjuncta, ex semine ipsius partim, an ex solius Adami in animam prolis resultaverit: nec quid futurum fuisset, si ipsâ peccante, Adam in innocentia permansisset.

Cum verò tam sæpe ( ut auctarium hoc etiam adijciam ) dicit & replicat Augustinus, concupiscentiam in prolem traduci per concupiscentiam Veneream quæ in congressu se miscet, tantum vult, quantum opinor, effreni illa parentum seminatione, quæ à concupiscentia actuali Venereâ imperatur, temperamentum seminis etiam effrene effundi, & modum illum feminandi, esse morborum seminis indicium. Respicit enim ad modum concumbendi statum innocentia, quando longè aliter quàm jam, voluntas rationalis membra illa moveret, tanquam manum, & tam tranquillè illis seminare, quàm manu agrum. Sicut ergo tranquillitas illa, sani seminis esset indicium; ita nunc effrenitas signum est morborum. Aliàs, si dæmon sine delectatione Venerea virile semen prostaticis eximeret, & transfunderet in feminam ( quomodo aliquos genitos quidam referunt ) proles nihilominus vitium originale contraheret,

Lib. Oper.  
imperf.

*vitio propagante vitium*, ut loquitur Augustinus, Deo creante naturam.



*naturam.* Vitium enim istud semini infidet, quomodocumque eximatur, & vitium alterum simile vulgat in prolem. Satis disertè hoc mecum Hypognosticus, dum ait, *Vitium Protoplasti trahi non posse, neque inesse homini; sine seminis effusione:* significans, modò semen illud immundum det esse homini, satis esse, ut contrahatur peccatum originale. Vnde mox Christum ab ea labe eximens, *Solus autem Christus*, ait, *absque semine ex Virgine factus est homo*, & *expers delicti, natus est Deus homo*: iterum indicans, si factus esset ex tali semine, quomodolibet effuso, secundum legem Dei ordinariam (nisi aliter eximeretur) habiturum originale. Aliud verò de semine Virginis matris, in quo concupiscentiæ morbus & peccati fomes extinctus erat. Vnde mundum, perinde ac ejus sanguis fuit, nec periculum, ne inde Christi conceptio labem contraheret. Sed etsi semen utriusque etiam parentis morbidum esset, ut S. Ioachimi & S. Annæ, ex quibus concretum est corpus Virginis; facile tamen intelligitur, quomodo macula originalis evitari possit, si animæ primo creationis instanti gratia sanctificans infundatur, sive interim concupiscentiæ fomes unà refrenetur, sive laxatus maneat. Originali tamen maculâ non careret proles illa quæ sine concubitu conciperetur, utero femina virile semen attrahente è balneo, in quo vir antè se polluerat. Quod olim factum Auerroes narrat, etsi multi Medicorum ut fabulam reiiciant.

Hypogni  
lib. 2. c. 2.

## ARTICULVS XII.

*An pudor concubitûs, & partium verendarum, ex peccato primi parentis ortum habuerit.*

**S.** Augustinus centies & constantissimè Iuliano & Pelagianis, cum clamore, & tanquam rem in sacra Scriptura perspicuè lucentem, id affirmat & inculcat.

S. Aug. lib.

*Quare illud opus coniugatorum, clamat alicubi, subtrahitur & absconditur etiâ oculis filiorum, nisi quia non possunt esse in laudanda commixtione, sine pudenda libidine? Ac deinde: Itane verò humana opera*

2. c. 6. de nupt.

Ibid. c. 6.

*pudenda*

Gen. 2.  
9. 24.

*pudenda esse non debent, sed planè glorianda, & divina ( commixtio maris & feminae ) pudenda sunt? Quid potuit Deus facere, quod eius pradicatorem ( Moysen ) pudeat dicere? Et quod est gravius, pudeat hominem alicuius operis, quod non homo, sed Deus fecit in homine: cum omnes opifices, quanto possunt labore & industria id agant, ne de suis operibus erubescant? Sed profectò illud nos pudet, quod produxit primos illos homines, quando pudenda texerunt.*

Rident tamen hæc Medici nonnunquam aut Philosophi, quod Theologos quosdam nimis Philosophos etiam facientes vidimus. Nam in naturæ puræ statu, inquiunt, motus pudendorum qualis nunc, esset, ac perinde pudendus, licet nemo peccasset. Secretum quoque concubitûs vir & uxor quærerent, & velarent quæ jam velamus. Naturalis enim inhonestas illarum partium satis est ad velamen, sicut & partium oppositarum, super quas sedemus.

Et eos adjuvare possumus, Medicè indagando unde proveniat causa involuntarij motûs genitalium, in quo Augustinus totam materiam pudoris ponit. Nam sanguis & spiritus per venas & arterias seminales ad testes attracti, & ibi in semen excocti, postea per vasa seminalia ad prostates transmittuntur; ubi tanquam catractis retinentur, donec ad generationem exiliant, aut inquieto, quo semen turget, spiritu partes pudendas commoveant. Hæ autem omnes trajectiones & motus, merè naturales esse videntur, & perinde locum habituri in quocumque naturæ statu.

S. Hieron.  
ad Ctesiphont.

Et sanè sic existimabunt plerique omnes Philosophi, & maxime Peripatetici, Pelagianorum familiares. Ideo enim, ut opinor, S. Hieron. Porphyriû Pelagij contubernalē vocat. Hi quippe ad Dei sapientem providentiā, qua Mundum, & præsertim nobilissimam ejus partem, hominem *μικρίνομοι* regit, oculos minimè attollentes, & hominis corpus ac organa per Anatomiam, ut laniones excoriatum vitulum, inspicientes; ex similitudine organorum putaverunt tam naturaliter in homine, quàm in pecude, motus istos seminis & pudendorum ire & administrari. Sed mirabiliter decepti sunt, immortalitatem nobilitatemque animæ rationalis aut ignorantes, aut non illis oculis



oculis, quibus par erat, eam contemplantes. Nobilissimus enim spiritus aliter & honestius in corpore isto, quamvis luteo & simillimo brutis, hospitari debuit. Sic enim Princeps aliquis, in tugurio rusticano quandoque hospitatur; sed decentius tamen ornato, & in quo obedientius ad nutum ejus omnia currunt, quam si vilior alius hospes intravisset.

Habeat ergo anima rationalis domum & supellectilem brutam, ventriculū caninum, hepar bovinum, renes ovinos, alvum porcina; in summo tamen ejus apice Princeps mens sedet, cujus nobilitas postulat, ut supellex & ministri familiæ aliter & obedientius ei serviant, quam ignobilibus brutorum formis.

Sic ergo homo initio conditus est, ut Dei imaginem decebat, refrenatis per justitiam originale concupiscentiæ motibus, ut nihil appetitui libêret, nisi quod voluntati placeret; & omnia externa membra sub imperio dominæ voluntatis manerent, quamdiu ipsa sub Dei.

Postquam autem natura in primo parente, à Deo per inobedientiam recessit, cetera quidem membra, ut manus, pes, caput &c. adhuc sequuntur imperium voluntatis, *exceptis tamen genitalibus.*

Cor autem & virile membrum sunt tanquam duo animalcula, ut ait alicubi Aristoteles, in majori animali homine, quæ proprios suos habent motus, neque eos accipiunt ab imperio voluntatis, quæ ceterorum membrorum motus regit. Nam neque cor, neque membrum illud voluntarijs nervis movetur, qui à cerebro & spinæ medullâ oriuntur, sed alijs sibi peculiaribus. Vnde inferuntur animali, ut Planetæ suis Epicyclis; quorum quidem latrone de loco in locum transferuntur, interea tamen suis etiam privatim motibus agitantur.

Nam quia cordis motus necessarius erat ad vitam animalis, in homine primū condito non magis, quam jam in nobis, cessare debuit. Motus autem genitalium Venereus ad solam speciei propagationem utilis erat; ideoque in statu primæ innocentiae, voluntati subijci potuit, imò debuit; quia hoc tranquilla felicitas illius statūs exigebat, si Augustino centies id inculcanti credimus.

Et nonne Scriptura sacra in primis & innocentibus illis parentibus, motus illos frenatos fuisse satis apertè indicavit, ubi demum post peccatum, & amissum iustitiæ originalis frenum, nuditatem suam erubuisse dicit? *Cur enim ex illis membris confusio post peccatum, inquit Augustinus, nisi quia extitit illic indecens motus? Quem, nisi homines peccassent, procul dubio nuptia non haberent.* Ecce quomodo non dubitet, & procul omni dubio habeat, non futurum motum illum genitalium inobedientem, ideoque nec indecentem, si peccatum non esset. Vnde alibi: *Hunc renisum, hanc repugnantiam, hanc voluntatis & libidinis rixam, vel certè ad voluntatis sufficientiam libidinis indigentiam, procul dubio, nisi culpabilis inobedientia pœnali inobedientiâ plecteretur, in Paradiso nuptia non haberent.*

Lib. 1. c. 15.  
de nupt.

Et ad Bonifacium: Respondemus, inquit, motum genitalium, & ut verbo ejus (Iuliani) virilitatem, sine qua non potest esse commixtio, Deus sic instituit, ut nihil haberet pudendum. Non enim fas fuit, ut ejus erubesceret creatura de sui opere Creatoris: sed inobedientia membrorum supplicio iusto primis hominibus inobedientibus reddita est; de qua erubuerunt, quando folijs ficulneis pudenda texerunt, qua prius pudenda non fuerunt.

Lib. 1. c. 15.  
ad Bonif.

Quomodo igitur in illo statu parentes filios suos seminassent? Membra illa, inquit, voluntati, ut cetera cuncta servirent. Ita genitale aruum vas in hoc opus creatum seminaret, ut nunc terram manus. Sicut igitur seminator ad nutum voluntatis manum implet, & spargendo vacuat; ita tunc pari nutu & immotâ mentis tranquillitate, genitali semine membrum suum è proflatis genitor impleteret, & quò natura ducit, spargeret. Alibi hanc seminationem, voluntariæ urinæ effusioni comparat.

Lib. 2. c. 31.  
de nupt.

An non etiam nunc, ait, in corpore mortis huius, humori in vesica intus posito, qui & quando eius copia non urgemur, imperatur ut profluat, & obtemperat? Imò ipsis abditis visceribus & nervis, quibus idem humor continetur, imperatur ut eum propellant, exprimant, eijciant, & si sanitas adest, sine difficultate serviunt voluntati. Quanto ergo facilius & tranquillius, obedientibus genitalibus corporis partibus, & ipsum membrum porrigeretur, & homo seminaretur; nisi hominibus illis inobedientibus, membrorum istorum inobedientia iusto supplicio redderetur. Sed



Sed ridebunt hæc fortè Medici, ut olim effusè Pelagius & Iulianus. Nam Augustinum Anatomix & rei Medicæ satis peritū negabunt, qui genitale membrū cum vesica comparet. Vesica enim nervis voluntarij motūs à spinæ medulla enatis utitur, & musculo spinthere, qui collum ejus ad nutum voluntatis claudit aut aperit, ut urinam contineat, aut excernat. Similibus autem voluntarijs nervis, aut musculis, quæ sunt organa spontanei motūs, membrum virile caret. Hanc de rebus pudendis loquendi libertatem Lectoris castitas mihi condonet; non enim aliter Medicorum quorundam nostrorum refelli error potuit, qui ad Philosophiam istam S. Augustini, non cachinnant palàm quidem, ut Iulianus, sed taciti subrident.

Concedo igitur ipsis quod elegans Medicus mihi præformat: *Motum illum localem quo membrum illud in ampliorem molem assurgit, quadantenus naturalem esse, fieriq; quadam ex parte à ligamentorum instità & vernaculâ facultate, qualis est uteri & cordis motus. Illius quidem dum semen prolestat, huius verò dum aërem & sanguinem haurit. Vnde non movemus illud cum volumus sicut movemus brachia, crura, & oculos pro voluntatis imperio. Vnde causa distensionis est calor, spiritus, flatus, corpora hæc cava, fungosa, arteriarum & venarum myriadibus, retis instar implicita implens. Sic calida omnia, spiritiuosa, flatulenta colem distendunt.*

Andr. Lan-  
rent. lib. 7.  
9. 6. Anat.

Attamen Medicus idem addit, non fieri hanc inflationem sine imaginatione, imaginationem autem motrici imperare, hanc statim obsequi, & inde inflatio.

Et ut intelligamus falsum esse, in ejus membri fabricam nulla instrumenta voluntarij motūs ingredi: Motrici huic, inquit, quatuor inserviunt muscoli, quorum duo ad illius latera feruntur. At muscutorum omnium motus animalis est, quia definitur musculus Organum spontanei motūs. Inflatio hæc voluptatem habet conjunctam, non est voluptas sine sensu. Itaque ad erectionem imaginatrix, motrix & sensifica facultas concurrunt.

Hinc concludit, motum illum ex naturali & animali, seu spontaneo esse mixtum: distinguitque à gonorrhoea & priapismo, seu inflatione morbosâ, quæ sine imaginatione & stimulo libidinis perficitur. Inflatio verò quæ morbosa non est,

*perpetuò, inquit, præcedente fit imaginatione, & voluptatem habet  
semper comitem.*

Valles. c. 8.

sacr. Philos.

Consentit fermè Vallesius. *Maxima pars Venerorum motuum, inquit, ab imaginatione fluit. Quo fit, ut Religiosi viri, & Deo adeò dediti ut imaginationem etiam compefcant, eiusmodi motus non per-  
sentiscant. Dixit tamen solum maximam partem, cum Laurentius sine limitatione, perpetuò, & omnes motus fieri sic ab ima-  
ginatione censeat; quia Vallesius, opinor, ad motus priapif-  
morum morbosos, quos etiam Laurentius excipit, aspiciebat. Deinde motus quidam ex redundantia seminis imaginatio-  
nem interdum præcurrunt, eamque ut ad exonerationem molestæ plenitudinis, opem ferat, sollicitant. Hæc tamen re-  
dundantia in statu illo innocentiae, victu ad hoc castigato, &  
alijs remedijs vitari facile potuit.*

Quid hinc autem pro Theologia nostra potest confici? Hoc fanè. Non difficulter jam posse intelligi, quomodo in statu innocentiae potuerit motus ille verendorum imperio voluntatis subijci; aliter longè, quàm diastole & systole cordis, qui sunt motus planè naturales, animæ vegetativæ cordatorum animalium merè ancillantes. Motus autè verendorum serviunt quidem etiam facultati genitrici animæ vegetativæ, sed sicut ferè pulmones; quorum motus non sic est naturalis, quin tardari, accelerari, sisti aliquamdiu possit per imperium voluntatis.

Igitur si imaginatio, & appetitus sensitivus eam consequens, imperare debent virtuti motrici, ut semen aut spiritus è pro-  
statis in membrum illud impellat & ipsum commoveat; certè in statu innocentiae imaginatrix & appetitiva facultas obedientes erant reginæ voluntati. Arque ita nullâ pænè reliquâ obscuritate intelligitur; quomodo illæ facultates tunc non præ-  
venerint nutum voluntatis, præcipitando imperium suum (ut jam faciunt) quo potentie motrici imperant implere & commovere vasa illa, antequam ratio & voluntas id fieri præcipiant. Itaque res sic jam in homine lapso se habet. Imaginatione Venerèa excitatâ, mox in concupiscentiæ actum exilit inferior appetitus, & repentino ac tumultuario imperio facultatem  
motri-



motricem impellit, ut semen, aut seminis spiritus è prostaris, ubi asservantur, in membrum genitale propellat. Et licet fortasse membrum ipsum virtute aliqua merè naturali attractivâ, ut censet Laurentius, ad se è prostatici semen pelliciat; tamen illa tam imbecillis est, ut sine imaginationis & concupiscentiæ impulsu vix quidquam possit. Imò, si attentè res examinetur, probabilius erit, nullam ejusmodi virtutem attractivam seminis in cavitatibus ligamentorum illius membri residere, sed merè canalem esse, qui non se replet attrahendo, sed repletur ab interiore virtute expultrice seminis, merè recipiendo. Si enim canalis ille semen naturaliter attraheret, nunquam otia retur, sed perpetuò, contra omnem experientiam, se impleret, & continuo nec unquam intermittente priapismo, ad Venerem sollicitaret.

Male igitur, ut equidem mihi videtur, impletionem istam cum attractione seminis ab utero, sanguinis à corde, cibi & potûs à ventriculo, Laurentius comparat.

Hinc ergo jam longè faciliùs Philosophia S. Augustini à calumnia Pelagianorum, & Medicorum expediri potest. Si namque sola vis motrix, ad imperium imaginationis & concupiscentiæ, semen commovere & in canalem illum impellere debet; igitur in statu innocentiae, quando imaginatio & concupiscentia voluntati planè subditæ erant, commotio illa seminis & membri, non sine imperio voluntatis, vires illas inferiores moventis, fiebat. Iam verò, quia concupiscentia voluntati est rebellis, etiam non expectato ejus nutu, semen exæstuarè facit & membrum commovet. Patet deinde, cur motus iste jam sit turpis. Nam veluti rebellio concupiscentiæ pudenda ac infamis est; ac contra decus animæ rationalis; ita quoque pudendus est motus ille pudendorum, quia rebellis concupiscentiæ est effectus. Cur enim aliàs brutorum animalium membra Venere commota aspicere, perinde ac hominum, non puderet?

Primi verò parentes, licet *uterque nudus esset, non erubescabant* Gen. 2. ante peccatum; non quia oculos clausos habebant, inquit Augustinus, sed quia turpitudinem nullam advertebant in suis.

membris. Apertè enim ruborem istum in peccatum tanquam causam rejicit Deus, dum timidum & erubescensem hominem interrogat, *Quis indicavit tibi, quòd nudus esses, nisi quòd ex ligno, de quo praeceperam tibi ne comederes, comedisti?*

Nam aliàs omnia tunc in homine administrabantur, sicut animali rationali dignum erat, suberantque obedientissimè inferiora superioribus. Illicò autem, ubi per peccatum harmonia illa diffilijt, ex mutuo partium pudendarum aspectu, æstum feminis & insolentem titillationem persenserunt; nec tantùm vir, in parte quæ oculis subjecta erat, sed etiam femina, in

Lib. 4. c. 13.  
contra Iul.

*isdem membris aliquid sensit occultius*, inquit Augustinus.

Et ut alibi ait, *Adam in motu aperto, Eva in occulto, contra suæ voluntatis arbitrium, inobedientia illa membra senserunt.*

Fernel.  
lib. 1. c. 7.  
de partib.

Feminæ enim in occulto, ad uteri fundum, geminos testiculos, ait Fernelius, *compressiores, minores, molliores, & humidiores quàm in maribus, habent.* Hi femineum semen coquant, & aspectu impudico ac imaginatione Venerea excitati, in uterum cum titillatione, odaxismo, & delectatione illud effundunt.

Lib. 1. c. 16  
ad Bonif.

Hac igitur novitate in membris suis, rebelli motu & sensu voluptatis, intellectâ ad folia ficus cucurrerunt, & partes illas tanquam jam pudendas occultaverunt. *Quid sibi vult, ait Augustinus, quòd accepto prohibito cibo, in illa membra aspectus intenditur? Quæ ibi novitas ignota sentitur, & se compellit adverti, quæ apertione significatur oculorum?* Dicuntur enim mox perpetrato peccato, oculi eorum fuisse aperti, hoc est *intenti ad intueendum facti*, inquit Augustinus. Nam aliàs nuditatem suam quotidie intuebantur, nec confundebantur. Nihil enim in istis membris, exclusâ rebellione, est magis pudendum, quàm in ceteris, ut ubique ingeminat Augustinus. Tota enim humani corporis interiùs exteriùs fabrica, à sapientissimo artifice cum summa arte, admiranda non erubescenda proportionem, & pulchritudine constructa est; cur ergo partes illæ conspectum sic refugiunt & sollicitè occultantur, si nulla aliunde accessit turpitudine? *Nihil enim est pudendum in operibus Dei, nec in sexu hominis honestas confunditur, ubi Deus, tanquam in excellentiore natura, digniùs operatur.*

Gen. 3.

Lib. 4. c. 11.  
contra Iul.

*Nihil enim est pudendum in operibus Dei, nec in sexu hominis honestas confunditur, ubi Deus, tanquam in excellentiore natura, digniùs operatur.* Si



Si ergo in brutis membra illa inhonesta non sunt, ideoque ea videre, aut de ijs loqui non erubescimus; cur in animali rationali primum condito, & excellentiori Dei opificio, si in nullius peccati poenam hoc factum est, erubescenda erunt? An fortè etiam beati in cælis femoralia habent, quibus nuditatem istam tegant? Certè enim si naturâ suâ membra illa pudenda sunt, ne impudentia tantæ felicitati misceatur, etiam ibi abscondi debent.

Verùm non naturâ, sed peccato pudenda sunt, & ideo nec in Paradiso ante peccatum, nec in cælo, post sanatum omne peccatum velari debent. Ex hac autem naturali membrorum honestate, præter nuditatem honestam, sequitur quoque, nullum de ijs sermonem futurum inhonestum, sed sicut aspicere, ita ea nominare, ac de ijs differere, ac denique maritalem congressum sub oculis aliorum exercere, nihil habiturum præter decus & honestum. Quæ tamen omnia negabant Pelagiani, quia sublato peccato originali, statum innocentiae cum statu hominis lapsi, contra apertam Scripturam, sed cum Philosophis Gentilium, confundebant; & proinde omnia quæ in hoc statu inhonesta & tegenda putamus, in illo ejusmodi etiam futura existimabant.

Contrà Augustinus, & post eum Theologi Scholastici. *Sine* Lib. 14.  
*ullo enim tunc timore obscœnitatis, liber sermo ferretur, nec verba* c. 23. Civit.  
*essent, quæ vocarentur obscœna.* Et ad Iulianum: *Quare non de bonis* Lib. 4. c. 99  
*qua laudas liberè loqueris? Quare non est de opere Dei verborum* 13. 16.  
*libertas, si ejus permanet intemerata dignitas, nec aliquid ibi egit pec-* contra Iul.  
*catum, unde potius incuteret pudorem, & verborum comprimeret li-*  
*bertatem? Et cum Iulianus petijset, ut sibi verecunda aures*  
*ignoscerent, reclamans illicd Augustinus: Quare, inquit, confun-*  
*deris, de Dei operibus disputare? Quare petis, ut ignoscatur tibi? Nonne*  
*abs te venia postulatio, etiam ipsa est libidinis accusatio?*

Deinde cum narrasset Iulianus, Apostolum pro sua honestate genitalia loca directè appellare noluisse, intra verba ista eum concludens Augustinus: *Nonne his verbis tuis, ait, te ipse redarguis? Honestas ergo erat, non appellare directè, quod Deus facere dignatus est rectè? Et quod creare non puduerat ipsum Iudicem, pudebat* 1. Cor. 2.  
*enunciare*

enunciare praconem? Quando istud ita esset, nisi qua ille fecerat honesta condendo, nos fecissemus inhonesta peccando?

Quod denique non tantum adulteri & fornicatores, sed etiam legitimi conjuges in concubitu maritali licito, tenebras & secretum quærant, non ex rei natura, sed ex peccato factum, sæpe replicat idem Sanctus Doctor. *Nunc omnes*, ait, *erubescunt, quando ad concumbendum secreta conquirunt, neque huius operis testes audent habere vel filios, quos inde genuerunt.* Addit, Philosophos Cynicos mirabili impudentia, naturali huic pudori reluctatos, qui quoniam licitum esset cum coniuge, palam faciendum esse censebant. Alibi tamen ait, id postea à Cynicis fieri cessatum, plusq; valuisse pudorem, ut erubescerent homines hominibus, quam errorem, ut homines canibus esse similes affectarent.

Lib. 1. c. 22.  
de nupt.

Lib. 14.  
c. 20. Civit.

Ibid. c. 18.

Lib. 2. c. 21  
de nupt.

Vnde autem tantus etiam in licito concubitu pudor? Vnde hoc, inquit, nisi quia sic geritur quod decet ex natura, ut etiam quod pudeat, comitetur in pœna? Vbi igitur nec peccatum, nec peccati pœna; concubitus inter conjuges sic deceret ex natura, ut palam celebrari posset sine impudentia Cynica. Nam in Paradiso, si peccatum non pracesisset, non esset quidem sine utriusque sexus commixtione generatio, sed esset sine confusione commixtio. Esset quippe in coeundo tranquilla membrorum obedientia, non pudenda carnis concupiscentia.

Nec aliunde difficilis est apud quosdam huius rei fides, nisi quia pudor jam post peccatum in naturam versus, assensum intellectus impedit. Mens ergo supra pudorem istum in rei naturam se elevet; aut quid fieret in caelo, si ibi nuberent & nuberentur, cogitet, & fortasse credet.

Lib. 4. c. 16.  
contra Iul.

Ex his quæ jam sparsimus, facile dissipantur argumenta quæ initio congeessimus. Nam status puræ naturæ, qualem nobis quidam fingunt, est nullus. Si enim sapientia, bonitas, & iustitia opificis potuit sapienter condere primum hominem cum rebeli & dominante concupiscentia, vana sunt & inania quæcumque S. Augustinus contra Iulianum differit. Admisso deinde tali statu, rebellio & dominatus concupiscentiæ contra rationem, non esset turpis, & ab Auctore Deo, non à peccato esset. Vnde nec ulla membra pro inhonestis & obscœnis habere



habere oporteret. Vt meritò Augustinus Iuliano statùs puræ naturæ acerrimo defensori, & *membra illa fuisse prius* ( ante peccatum. ) *honestæ consenti*, dixerit: *Non enim aliud posses, nisi blasphemâ opinione sentire.* Nam hoc esset, Deum rebellis concupiscentiæ, & inhonestorum membrorum conditorem facere,

## ARTICVLVS XIII.

*Cur potius genitalibus, quàm ceteris membris pudor & Vela-  
men additum sit.*

**V**Niversæ etiam Barbaræ nationes, quæ etsi reliquò corpore nudo, perizomatis tamē ex gossipio, arborum corticibus, vulpinis caudis &c. partes inhonestas obvelant. *Ex hoc omnes gentes, ait Augustinus, quia ab illa primorum parentum stirpe procreata sunt, usque adeò tenent insitum, pudenda velare, ut quidam Barbari illas corporis partes nec balneis nudas habeant, sed cum earum tegumentis lavant.* Et de Gymnosophistis addens: *Per opacas quoque India solitudines, cum quidam nudi philosophentur, unde Gymnosophista nominantur; adhibent tamen genitalibus tegumenta, quibus per cetera membrorum carent.*

Lib. 14.  
c. 17. Civit.

Veluti tamen athletæ penitus nudi olim in palæstris luctabantur, & hodie pauci quidam, sed impudentiâ præcipui, in juventute nostra natatores, per ripas fluminum discurrentes, ne quidem manu verenda occulunt; ita nil vetat, quasdam adeo Barbaras nationes in Orbe inveniri ( & Hollandorum Historiæ dicunt ) quæ perpetuò frontem adversus pudorem illum naturalem obducent, & instar pecudum, expositis genitalibus oberrent. Quandoquē enim consuetudo reluctan-tem naturam vincit.

Sed unde potius illorum membrorum, quàm aliorum ( quibus etiam peccamus ) tantus pudor nobis innatus? Si quis enim manu, ore, aut linguâ nefanda patnaverit, an ideo pudebit manum suam aspicere, & ne videat, chirothecâ eam induet?

Iulianus & Pelagiani, qui censebant nullo peccato membra  
Ee'e genitalia

S. August.  
lib. 4. c. 16.  
contra Iul.

genitalia esse dehonestata, & à Deo sic olim in primis parentibus condita, ideoque negabant inhonesta; comparabant ea ceteris membris, ut ventri, clunibus, femoribus &c. quæ etiam contegere solemus. *Sic enim nostra membra sunt formata, ait Iulianus, ut alia verecundiâ, alia libertate gauderent.*

lib. 5. c. 2.  
contra Iul.

Sed per Historiam Genesis eum premit & reprimat Augustinus. Si enim non major inhonestas in genitalibus, quàm in alijs membris, quæ verecundiâ quædam regit, non libertas ostendit; cur primi parentes, eo specialiter aspectu confusi erubuerunt, & folijs ficulneis obtexerunt? Deinde si sic formata sunt, ut ab hominibus tegerentur, cur ante peccatum non texerunt, & nuditatem suam agnoverunt? An fortasse innocentia illa erat impudens? Atqui *duas simul habitantes, ait Augustinus, quarum altera est optima, altera est pessima, velut inter se convenientes atque concordantes, innocentiam scilicet & impudentiam, nullus pictor pingere, nullus Poëta canere auderet.*

Gen. 3.

Verùm non impudentiam, sed inscitiam in causa fuisse, cur se non tegerent respondet Iulianus. *Nam ad solertiam humanæ operam, ut se tegerent, ait, pertinebat, quæ nondum in illis erat.* Quod meritò deridet Augustinus. Inde enim fit consequens, inquit, *ut ante peccatum inertes, peccato autem factos credas esse solertes.* Nam illicò post peccatum, *consueverunt folia ficus, & fecerunt sibi perizomata;* quasi jam primùm solertiam & artem consueendi adepti, si antea putaverint partes illas debere regi. Cur enim non texissent, si artem consueendi folia, aut quocumque alio tegumento velandi habuissent? Fuisse autem tam stupidos & infantes, ut hoc facere nescirent, stupidum & stultum est existimare.

lib. 6. c. 8.  
contra Iul.

Itaque certissimò ex Scriptura colligitur, & pudoris, & pudenda tegendi non aliam causam, quàm peccatum fuisse; & verissimè Iuliano Augustinum dixisse, *De illa confusione primorum hominum non potes invenire, quid dicas.*

Sed multa alia membra à nobis teguntur, etiam si non ea ex peccato erubescamus, inquit Iulianus. Nec tantùm, ut à frigore & injurijs aëris ea defendamus, sed tanquam injucunda aspectu; sicut locus per quem alvi faeces egerimus. Vnde  
Balbus,



Balbus (cujus auctoritate se fulcit Iulianus) apud Ciceronem dicit, *in corpore nostro loca digestionis remota fuisse à sensibus*. Quod verum, inquit Augustinus, *quia sensus nostros ea qua digerimus, non alliciunt, sed offendunt*. Propterea pars qua egeruntur, naturaliter alijs partibus altrinsecus prominentibus occultatur. Cic. lib. 2.  
de nat.  
Deor.  
Aug. ibid.

Verum licet pars ista infimæ sedis, velut inamœna, propter fordes quæ per eam transeunt, in vallem recondatur; *alia sunt*, reponit Augustinus, *qua horrorem ingerunt sensibus, quod deformia sint; alia qua pudorem mentibus, etiamsi formosa sint*. Quia illa offendunt delectationem, commovent autem ista libidinem, vel libidine commoventur. Lib. 4. c. 12.  
contra Iul.

Breviter igitur, aliâ de causâ genitalia, & aliâ partes quædam aliæ teguntur. Proprium & peculiare genitalibus est, esse inhonesta, ac pudenda, & ideo tegenda; quia motus eorum, perinde atque ipsa concupiscentia quâ commoventur, ex peccato effrenis & contra rationem contumax factus est. Inordinatum enim & turpe est in anima rationali, tales motus dominæ rationi non subesse. Ratio quippe naturalis dicat, deberi imperium in concupiscentiæ, & in istos, quos ipsa in genitalibus excitat, motus. Vnde indignatur, & inobedientiæ illorum eam pudet, & ipsa membra tanquam pudenda abscondit, in quibus illa inobedientia exercetur. Nec tantum tempore illo quo fervet rebellio, sed etiam quando refêdit. Præsertim, quia breves dare solet inducias. Libido enim pro cuiusque hominis complexione, *nunc remissioribus, nunc concitioribus motibus instigare non cessat*, inquit Augustinus. Sic Princeps, ubi leges & imperia ejus à rebellibus subditis contemnantur, irascitur non tantum rebellionis, sed omnibus etiam instrumentis quibus rebellio uti solet; nec indignatio cessat, etiam intervallo temporis, quo pax & tranquillitas redijt. Lib. 3. c. 16.  
contra Iul.

Hic autem instinctus naturæ rationalis, quasi dolentis & erubescantis se dejectam imperio, per omnes nationes, etiam quæ de lapsu primi hominis nihil sciunt, transit: comparatque eum Augustinus cum instinctu naturali, quo membra ejusdē corporis pro se invicem sunt sollicita. *Contributum est divinitus, ut pro invicem sollicita sint membra, & quod* Lib. 4. c. 16.  
contra Iul.

*dehonestavit concupiscentia, contegat verecundia.* Et S. Thomas, ubi  
 1. Cor. 12. Apostolus ait, Deum *inhonestis* membris *abundantiorem* tribuere  
 honorem, vestiendo & tegendo illa curiosius quàm cetera; ex-  
 plicat Deum id non aliter facere, quàm ex quodam divino  
 1. Job. 33. *instinctu*; secundum illud Iobi: *Aperit aures virorum, & erudiens eos*  
 instruit disciplina. Et ipse Augustinus iterum: *Honestas ergo adhi-*  
 betur *inhonestis, cum rationalis natura sensu ipso verecundante velan-*  
*tur.* Sensus enim iste, assensus est & instinctus naturalis ra-  
 tionis; tam occultus nobis, quàm innumeri alij similes, qui  
 sentiuntur facilius, quàm explicantur. Huic tamen obscuri-  
 tati faculam petere potes à Cajetano 1. p. q. 82. a. 4. Non  
 enim aliud esse videntur, quàm veluti scintillæ quædam à  
 naturali lumine intellectus emicantes, quas Deus etiam susci-  
 rat peculiari illâ providentiâ, qua naturam hominis intelle-  
 ctualem gubernat. Hoc enim pudoris genus, ait Augustinus, hac  
 1. Lib. 1. c. 16. *erubescendi necessitas certè cum omni homine nascitur, & ipsis quo-*  
 ad Bonif. *dammmodo natura legibus imperatur.*

Non tamen sic nascitur, quasi pueri statim illam erubef-  
 cendi necessitatem intelligant; sed ubi ratio ex illo primæ æta-  
 tis somno evigilaverit. Nam lex naturæ quæ eam imperat,  
 per rationem, debiti sibi dominatus dispendia occulto instin-  
 ctu quasi sentientem, debet cognosci.

In Adamo & Eva hunc sensum facilius explicamus: quia  
 utrumque statum experti erant, ex quo, & in quem decide-  
 rant; nobis verò loco experientiæ, datus est à Deo consenta-  
 neus naturæ lapsæ instinctus, quo ratio (quæ naturaliter in  
 homine principatum amat) concupiscentiæ & genitalium  
 1. Lib. 2. c. 22. inobedientiam averfatur. Pulchrè Augustinus: *Animam ratio-*  
 de pecc. *nalem naturali verecundia nunc pudet, quod in carne, in cuius servi-*  
 merit. *tutem jus potestatis accepit, nescio qua infirmitate efficere non potest,*  
*ut se nolente non moveantur membra, & se volente moveantur.* Quæ  
 propter hoc in quovis casto, meritò appellantur pudenda; quod adversus  
 dominam mentem, quasi sue sint potestatis, sicut libitum est, excitan-  
 tur: idq; solum juris in his habent frena virtutis, ut ad immundas &  
 illicitas corruptiones ea pervenire non sinant.

Vnde patet ratio, cur, ut initio objectum fuit, potius hæc  
 membra,



membra, quàm manum, quâ etiam nefanda interdum patrantur, occultemus. Nam manui, ut obnoxio mancipio, voluntas imperat, & quod manus patrat, voluntas fieri mandat; estque causa ejus magis quàm ipsa manus. Vnde sibi imputet, & si pudendum est, sui potius quàm manûs, pudere eam debet. Partes verò obscœnæ sunt instar animalculi distincti, quod homini adhærens, ut ex Aristotele supra dicebamus, suis quasi legibus, & motibus proprijs vivit, nec curat imperium dominæ rationis, quæ in homine præsidet & regit.

Verùm suis verbis hoc dicat Augustinus. *Quærens enim, quid causæ sit, Cur ira aliarumq; affectionum opera in quibusque dictis atque factis, non sic abscondit verecundia, ut opera libidinis quæ sunt genitalibus: Respondet, Quia in ceteris, membra corporis non ipsa affectiones, sed cum eis consenserit, voluntas movet, quæ in usu earum omnino dominatur. Nam quisquis verbum emittit iratus, vel etiam quenquam percutit, non posset hoc facere, nisi lingua & manus, iubente quodammodo voluntate moverentur; quæ membra etiam cum ira nulla est, moventur eadem voluntate. At verò genitales corporis partes ita libido suo juri quodammodo mancipavit, ut moveri non valeant, si ipsa defuerit, & nisi ipsa vel ultro, vel excitata surrexerit.*

Vno igitur verbo, censet Augustinus non adeò turpem esse motum, aut manum irati ferientis, quàm genitale & commotionem genitalis; quia voluntas potius quàm passio manum illam movet; genitale verò passioni solum obedit, surdum ad imperia voluntatis. Sed quid si lingua, aut manus interdum mentem præcurrat, & feriat verbo aut verbere antequam voluntas imperet?

Resp. motus illos membrorum externos à vigilantibus, vix sine voluntatis expresso, licet turbulento imperio exerceri. Si tamen interdum aliter, & evolant ante expressum voluntatis imperium; ut motus primò primi solent; mox tamen eos voluntas ad obedientiam revocat, ut voluntati obnoxij & subditi simpliciter dici possint; nec inde ipsi aut membra quibus exercentur, insigni aliquâ infamiâ notari debent, ob quam ea oporteat instar pudendorum obvelare.

Hoc quoque obscœnitatem genitalis membri augeat, quod

Venerē libidinis instrumentum; quæ inter omnes libidinis species præ ceteris turpis est, inquit Augustinus: cui nisi resistatur, contra Iul. horrenda immunda committit.

Deinde voluptates illæ tactus, infimæ sunt inter sensibiles, & maximè bestiales ac inimicæ rationi; quam in actu Venerē, teste S. Augustino & Cicerone, sic voluptas illa totam demergit, & in lutum suum sepelit, ut nihil homine dignum cogitare valeat, sed in brutum quodammodo transformer.

Lib. 14. Sed melius & explicatius hoc iterum dicit Augustinus: c. 16. Civit. *Hæc libido sibi non solum totum corpus, nec solum extrinsecus, verum etiam intrinsecus vendicat, totumq; commovet hominem, animi simul affectu cum carnis appetitu continuo atque permixto; ut ea voluptas sequatur, quam maior in corporis voluptatibus nulla est: ita ut momento ipso temporis quo ad ejus pervenitur extremum, penè omnis acies & quasi vigilia cogitationis obruatur. Res profectò foeda, & nisi posteritatis necessitas excusaret, ab homine longissime fugienda, ut non in uno loco Augustinus docet.*

L. Cor. 6. Vnde Apostolus, qui fornicatur, inquit, in corpus suum peccat, quia nempe peccato illo, humanæ figuræ & temperiei corpus contumeliâ afficit, dum illud in brutum quodammodo deformat. Sicut enim corpus bruti animam ejus irrationalē in carnem suam submergit; ita etiam fornicatoris corpus animam rationalē, dum sine ratione mentem ita deiecit, & quasi amentem facit. Vnde Hippocrates congressum Venerēum *μικρὸν ἐπιδεικνύσκει*, parvam epilepsiam, seu morbum caducum appellabat.

S. Ansel.  
c. 10. de  
concept.  
virg.

Hinc Deus, ut istam foeditatem ab innocentia statu propulsaret: Cum fecit Adam, ait S. Anselmus, fecit in eo naturam propagandi, quam subiecit eius potestati, ut ea uteretur pro sua voluntate, quamdiu ille vellet subditus esse Deo, non ut illa uteretur bestiali vel irrationali voluptate, sed humana & rationali voluntate.

Lib. 2. c. 6.  
contra Iul.

Tertium hoc ad infamiam accedit: quod peccatum originis, exitialis illa humani generis labe, illo membro in posteros propagetur. Ideo enim ibi succinxit se Adam folijs inutilibus, ait S. Ambrosius, ubi futura generationis, non fructum futurum, sed quadam peccata signaret. Et ei acclamans, ac Iulianum inclamans Augustinus: *Habesne ad ista quid dicas? Ecce unde illa confusio,*



*fusio, ecce unde contextio & succinctio foliorum. Ecce unde in posteris originale peccatum. Et brevissimè idem Chrysostomus: Folys ficus erant operti, regentes speciem peccati. Hinc ergo poena peccati originalis, siue concupiscentiæ adversus rationem rebellio in eo membro maximè apparere debuit. Bellè iterum Augustinus: Pudet huius libidinis humanam sine ulla dubitatione naturam, & meritò pudet. In eius quippe inobedientia, qua genitalia corporis membra solis suis motibus subdidit, & potestati voluntatis eripuit, satis ostenditur, quid sit hominis illius prima inobedientia retributum. Quod in ea parte maximè oportuit apparere, qua generatur ipsa natura, qua illo primo & magno in deterius est mutata peccato.*

Lib. 14.  
c. 29. Civit.

Denique membrum illud turpe & velandum est, non solum quia effrenitas ejus ex peccato originali venit, & peccatum illud ad posteros trajicit; sed etiam quia libidinem aliorum movet, & ad actualia libidinis peccata excitat. Hoc etiam supra, sæpè dixit Augustinus.

Lib. 4. c. 12.  
contra Iul.  
&c.

Et hac de causa non tantum membrum ipsum genitale, quod à se infame est, sed partes etiam vicinæ quæ ab ipsa ejus vicinia quodammodo infamantur, contegi debent. Centrum enim, ut sic dicam, turpitudinis in ipso genitali est; sed circumferentia sursum usque ad umbilicum, deorsum ad genua protendi videtur. Omnes enim corporis partes eâ circumferentiâ comprehensas homines, & præsertim feminae, propter alienam libidinem vitandam, studiosè velare solent. Statim enim atque femur supra genua, aut venter infra umbilicum incipit nudari, homo alterius sexûs, ad partes genitales & turpitudinis centrum, obscenâ & præcipiti imaginatione solet excurrere.

Vnde facilè jam solvitur argumentum obijcientium Augustino: quod non tantum partes genitales in quibus solis est effrenis ille libidinis motus, sed etiam femora ac venter aliarumque conterminæ partes velentur.

Nam turpitudo ipsa membri genitalis est hujus velaminis causa; quoniam obscenitate suâ vicinas quoque partes quodammodo aspergit. Nam vicinarum partium aspectus Venerem eodem ferè modo excitat, quo genitalium aspectus;

unde

Sanch. lib. 9  
d. 46. n. 22.  
Matri,

unde etiam Casuistæ par in utroque peccatum constituunt. Aspectus enim partium propin quarum, ut antè dixi, ad genitalia ipsarapit aut abducit infirmi hominis cogitationem.

Nudatio verò partium remotiorum, ut pectoris, dorsi, crurum, aut lacertorum, non tantam indecentiam habet, nec perinde alterius sexûs libidinem movet. Mammillarum tamen nudarum ostentatio in puellis, per Magistratus Ecclesiasticos & seculares meritò reprimi deberet. Multi enim adolescentes, præsertim initio & antequam consuetudo eos duraverit, scandalum ex infirmitate patiuntur, & exardescunt in concupiscentiam putridæ illius & fucatæ carnis.

Sat multos fomites concupiscentia cum qua nascimur, nobis suggerit, sine externis istis illecebris.

#### ARTICVLVS XIV.

*Qua ratione foetus in utero conformetur.*

**P**ostquam viri & feminae semina in utero confusa & permixta fuerint, calore & occultis facultatibus uteri incipiunt in unam massam fermentari & coagulari, & ne distillant, membranâ quadam involui. Suscitatur quoque vis in feminibus latens, ut opus conformationis incipiat; quam uteri actionem Medici propriè conceptionem vocant. *Neque enim seminis attractio, neque retentio, conceptio est*, inquit doctissimus Fernelius; *tametsi id ratio nominis videtur indicare.* Quando enim semina biduo aut triduo retenta effluunt, non dicitur conceptio facta, nec ante septimum diem, inquit Aristoteles, dicuntur abortus, sive irriti conceptus, sed effluxiones.

Fernel.  
lib. 7. c. 8.  
de hom.  
procreat.

*Est ergo conceptio, ait Fernelius, propria & peculiaris uteri actio, qua seminis potestas excuscitatur, & insitum sibi munus reipsa obit & exequitur.* Inesse verò utero vim peculiarem ad miscenda & excitanda utriusque parentis semina, inde liquet; quia si in aliam corporis capacitatem eodem calore præditam injiciantur, computrescent, nec ad conceptionem pervenient. Vnde stultum & falsissimū est, quod jactant quidam Chymici, se per

feminum



feminum, imò aliarum materiarum commixtionem, fornacum suarum tepore, in alembico posse puellum concipere, formare, & generare. Donec enim faciant, & Chymicum istum pusionē nobis ostendant, chymericum putamus. Theologi tamen nostri aliter usurpant conceptionem, dum disputant, an Christus, aut Virgo mater concepta fuerit cum peccato originis. Nam conceptio ipsis idem est, ac animatio humani corporis, quæ est finis conceptionis, & potius generatio, quàm conceptio proprii apud Medicos nominis.

In conceptione hac Medica excitatur *σπινθηριον*, sive scintilla illa admirabilis, delitescens in spiritibus seminis, ut se per materiam crassiorem diffundat, eam inflet, & in membra sua distinguere incipiat. Res prorsus stupenda, quomodo virtus creata, tot membra tam affabrè formare, tam appositè inter se conjungere, in venas, arterias, nervos tanta arte perforare, & universa accommodatissimè ad usum possit fabricare. Ut verissimè Sapiens dixerit, nos *Ignorare, qua ratione compingantur ossa in ventre pregnantis*. Et Galenus: *Invenire facultatem quæ talia efficiat, humani ingenij non est*. Eccle. xi.  
Galen. lib. 3  
15. de usu,  
part.

Vnde subtilitas Scoti nullam aliam causam hujus admirandi opificij, quàm Deum invenire potuit. De qua re Lib. i. diffusè disputavimus. Et diximus, vim creatam formatricem inesse semini, quæ per instinctum à Deo sibi datum, ad omnium ingeniorum stuporem, ea sub Deo operatur. Et Deum ideo magis admirandum esse, qui non tantum manu sua solus possit talia facere, sed infimis etiam creaturis virtutem coëfficiendi imprimere. Non oportet igitur causam secundam efficientem hinc negare. Nam apertè Aristoteles ait: *Principium & efficiens rei qua gignitur, semen est*. Et egregiè Tertullianus: *Omnem hominis in utero ferendi, struendi, fingendi paraturam aliqua utique potestas divina voluntatis ministra modulatur*. Arist. lib. 2  
c. 1 de  
partib.  
Tertull.  
c. 37. de  
anim.

Licet autem S. Augustinus quandoque soli Deo videatur hanc membrorum paraturam tribuere, tamen alibi explicat se loqui de Deo *creatore & conditore*. Creatrices verò aut conditrices negat esse causas creatas, licet sub imperio & manu Civit. Dei fabricent etiam & moliantur. *Si enim, inquit, urbem*

Romam, & Alexandriam non fabros & architectos, sed Reges quorum voluntate, consilio, & imperio fabricata sunt, illam Romulum, istam Alexandrum habuisse dicimus conditores; quanto potius non nisi Deum debemus conditorem dicere naturarum: qui neque ex ea materia facit aliquid quam ipse non fecerit, nec operarios habet, nisi quos ipse creaverit; & si potentiam suam, ut ita dicam, fabricatoriam rebus subtrahat, ita non erunt, sicut antequam fierent, non fuerunt.

Lib. 22. c. 24  
Civ. 1.

Propter ergo illam principalem & essentialem dependentiam omnis creati esse à Deo, dicitur solus conditor & creator omnium rerum, SS. Patrum phrasi. Aliàs etiam apertè ait, vim mirabilem seminum, & mirabiliorem quàm efficiantur & semina, inditam corporibus humanis, & quodammodo intextam. Ac deinde, Deum facere, ut numeros suos explicent semina, & à quibusdam latentibus atque invisibilibus involucris, in formas visibiles hujus quod aspicimus decoris evolvant.

Cap. 9.  
contra Io.  
Ierofoly.

Et S. Hieronymus elegantissimè. De acino vinacij disseramus, inquit ad Io. Ierofolymitanum. Granum parvum est, ita ut vix duobus digitulis teneri possit. Vbi sunt radices? Vbi radicum, & trunci, & propaginum tortuosa perplexio? Vbi pampinorum umbracula, & uvularum pulchritudo, futura vina parturiens? Aridum est quod teneatur, & panè vix cernitur. Sed in sicco illo grano, potentiâ Dei, & occulta ratione sementis (ecce, ut præter Dei potentiam, occulta ratio conformatrix in semine vitis) spumantia vina fundentur.

Lib. 10. c. 17  
in Genes.

Ergo in seminibus agnoscunt causas secundas efficientes, quæ numeros quos virtute continent, in ordinatissimam illam membrorum arboris, aut animalis paraturam & suppellectilem explicant. Vnde alibi Augustinus: Alius est rerum modus, quo illa herba sic germinat &c. Horum modorum rationes, non tantum in Deo sunt, sed ab illo etiam rebus creatis inditæ atque concrete.

Virtus ergo conformatrix semini concreta, statim atque semina utriusque sexus fermentata & temperata sunt, opus suum aggreditur. Et quia semen partibus heterogeneis constat, quarum aliquæ ossibus, aliæ nervis &c. fabricandis sunt magis idoneæ; ideo ab invicem eas separat, & unamquamque ineffabili solertiâ, suo loco disponit & ordinat.

Hinc Fernelius & multi Medicorum existimant semen ex omnibus.



omnibus membris decîdi, & unamquamque ejus guttulam, à parte unde deciditur, cum imagine illius partis ad testes defluere, ut ibi residua ejus cruditas percoquatur. Nam propter ideam seu imaginem, quam ab unaquaque parte corporis decēpsit, videtur, postquam actione uteri fermentatum fuerit, propriâ quasi sponte in varias particulas discedere, ut singula locum sibi competentem in structura novi animalis occupent. Fallor, aut hoc me docuit S. Augustinus: *Semen in matre, ait, per certos numeros temporum, in locorum numerum coaptatur, ut suas regiones quaque membra occupent: & si modum parilitatis servaverint, luce coloris adiunctâ, nascitur corpus quod formosum vocatur.* Lib. de v. c. 40. ra relig.

Simile quid propemodum in magnete cernimus; qui vertex suos ita sponte ordinat, ut unus ad Septentrionem, alter ad Austrum spectet.

Sed non ideo necesse est fingere semen ab omnibus partibus defluere. Quomodo enim parentes qui tibiâ unâ, aut utraque carent, prolem bipedem generarent; quomodo Iudæus apella filium præputiatum, si semen pedis, aut præputij filij, à pede, aut præputio parentis debet necessariò decîdi?

Hinc Aristoteles sententiam istam, quæ semen ab omnibus partibus defluere dicit, longissimè refellit. Nam aliàs, inquit, semen etiam arboris à radice, à trunco, à ramis omnibus decîdi oporteret; cùm tamen novella arbuscula eundem numerum ramorum, quem arbor mater habuit minimè observet. Deinde à fructibus arboris matris nihil deciditur, ait; & nihilominus fructus arboris filix, similes sunt fructibus matris. Arist. lib. r. c. 18. de generat. animal.

Non esse verò necesse, ut semen arboris, ideam futuri fructus à fructu matris accipiat, inde evidenter patet; quia surculus arboris (etiam quæ nunquam fructus ullos tulerit) arbori alterius speciei insitus, fructus tamen arboris suæ speciei conformare novit.

Quod ergo S. Augustus narrat: *Fundanum Carthagini Rheorem, cum ipse ex accidenti vitio lascus esset, lascum filium procreasse,* Lib. 8. c. 6. contra Iul. miraculi instar id fuit, & ab imaginatrice fortasse matris; non quia semen oculi in filio, ab oculo parentis proficisci debuerit.

Alias omnes lufci, aut exoculati filios oculis orbos gignerent.

Lib. de vera  
relig. c. 40.

Quod verò idem Augustinus ait, semen *sive convenientiâ duorum corporum* (ut in concubitu) *sive tali aliquo phantasmate* (ut in pollutione) *commotum, per genitales vias ab ipso vertice defluere in infima voluptate;* à veteribus quibusdam Medicis accipit, & præsertim Pythagorâ; qui semen *ταύρα ἐκκεφάλῃ* *stillam cerebri* appellabant. Quia enim semen albedine cerebri colorem refert, putaverunt totum inde defluere.

Andr. Laurent.  
lib. 8.  
§. 4. Anat.

Sed certum jam est, materiam ejus ex hepate & corde per venas & arterias feminales descendere, & ex sanguine & spiritu à testibus in illum alborem decoqui. Docti tamen Medici, inter quos Andr. Laurentius, *spiritus aëreos tenuissimos, pernicipitate veloces, per universum corpus oberrantes, ob eam, quam cum insitiis habent, familiaritatem, singularum partium ideam præ se ferentes, & vim earum formatricem deferentes, ab omni corpore ad testes influere existimant.* Sed profectò, si hoc verum, sequitur iterum, à parentibus membro aliquo truncatis mancos semper foetus generari. Spiritus enim per corpus oberrans, ideam & vim formatricem oculi ad testes deferre non potest, si parens oculum nullum habeat.

Deinde, unde, quæso, spiritum & ideam membranarum secundinarum semen accipit; quas tamen, non minùs quàm partes foetus, vis conformatrix ad involuendum foetum, fabricat? Cùm enim nec in patre, nec in matre, ante inchoatam generationem, sint ullæ secundinæ, istæ non possunt suos spiritus aut sui ideam mittere ad testes.

Tertiò, quis credat, radices, truncum, tot ramos, & ingentia quercûs unius brachia, & innumera quibus comitur folia, per tam astrictam ligni duritiem, ad minimum glandis germen, spiritus & ideas omnium transmittere, ut inde nova quercus possit conformari? Denique vias & canales in animalibus signare deberent, quibus spiritus illi confluerent in testes. Non enim aliæ viæ apparent, nisi venæ & arteriæ feminales, quæ materiam seminis, id est, sanguinem & spiritum vitalem, ad testium officinam vehunt.

Verius igitur est, testes quasi compendium quoddam totius



totius animalis esse, & virtutem habere alterandi seminis pro omnibus partibus fabricandis; ibique semen *totius animalis latentes numeros accipere*, ut eleganter loquitur Augustinus.

Lib. de vera relig. c. 40.

Sic etiam glans compendium est universæ quercûs, totamque tam vasti corporis ramorum supellectilem, virtute in se continet, & vim omnium conformatricem semini minimo, quod intra se complectitur & concoquit, imprimit. Ut proinde, veluti hepar pro alendis omnibus partibus, sanguinem coquit; cor omnibus vegetandis, spiritum vitalem format; cerebrum pro omnibus movendis & sensificandis, spiritum animale aptat; ita testes, pro omnibus partibus fructus conformandis, semen cum virtute sua conformatrice (sive unica ea sit, sive dispersita in plures singulorum membrorum artifices) insitâ sibi facultate excoquunt. Mira profecto & ineffabilis hæc testium potentia, qua virtutem tam admirabilem, ingeniosam, & omnium ingeniorum acies ludibrio quodam eludentem, semini imprimit.

Quod obtupefscens, & Philosophorum ac Medicorum acumina irridens Chrysostomus: *Semen illud iactum, unde conceptus es*, inquit, *quomodo in oculos, quomodo in aures, quomodo in manus, quomodo in cor, quomodo in tot ac tam varia compositum & figuratum est? An non mille sunt in corpore discrimina schematum, magnitudinis, qualitatum, situum, virtutum, harmoniarum? Nervi, & vena, & carnes, & ossa, & pellicula, & arteria, & cartilagine, & quacumque alia istis plura, qua Medici studiosè rimantur, qua naturam nostram continent, idg. ab illo unico semine nata? Videtur ergo totalis forma seminis composita esse ex pluribus formis heterogeneis, quarum una, per qualitates instrumentales sibi accommodatas oculum, altera aurem, alia manum &c. conformat. Hoc enim tantum, confuse & generaliter de re ista admiranda, dici potest; cetera abditissima sunt in naturæ & divinæ sapientiæ arcanis. Ac sanè pleræque naturæ opera etiam talia sunt, si quis non in superficie tantum, sed ad fundum usque inspicere velit;*

Chrys. hom. mil. 7. in 2. Thessal.

## ARTICVLVS XV.

*An unum membrum citius altero conformari incipiat,*

**A**Mbigunt quoque Philosophi ac Medici, an vis conformatrix omnium simul membrorum conformationem inchoet, an ab una parte, ut retia conficiuntur, ad ceteras successivè & catenatim procedat. Orpheus enim canit, inquit Aristoteles, *ἁμοίως γίγνεται τὸ ζῶον τῇ τῷ δικτύου πλοκῇ animal gignitur, sicuti contexitur rete.* Vnde à corde inchoari conformationem Empedocli credidit Aristoteles; quia rudi tunc adhuc Anatomia, *cor principium venarum, & primariam officinam sanguinis esse putavit.*

Arist. lib. 2.  
c. 1. de  
partib.

Hinc Galenus, refutato Aristotele, cum ab hepate potius oriri venas, & inde sanguinem fluere existimaret, hepar primum conformari dixit. Et huic opinioni *omnes ferè Medici adherent*, inquit Vallesius.

Hippocras  
lib. 1. de  
diat.

Verùm alijs & nobis longè magis placet sententia Stoicorū & divini senis: *Omnes partes simul delineari & augeri, non alias prius, alias posterius.* Vis enim illa plastica, per universam utriusque seminis massam, vectore spiritu diffusa, statim opus universum, cum admirabili omnium futurarum partium proportionem aggreditur. Ac primum ne massa diffuat, membranâ illi cōcircundat; deinde versus centrum conversa, tres bullas pellucas, pro totidem principalibus partibus, cerebro, corde, hepate, excitat; & simul nervorum, venarum, arteriarum, & breviter omnium viscerum & partium prima stamina & lineamenta ducit.

Simul quoque vasa umbilicalia formantur (sive vena una & arteriæ duæ) quibus embryo sanguinem matris per umbilicum sugere debet. Sed ne nimis citò affluens sanguis inceptum opus interturbet, & futuri hominis texturam in molam confundat; non attrahitur maternus sanguis, nisi ubi partes spermaticæ, & quidquid ex spermate utriusque parentis contexitur, fermè sit conformatum. Nam sæpe, per abortum  
embryo



embryo totus semineus expellitur, qui in aquam frigidam-  
mersus, & condensatus, omnium spermaticarum partium  
rudem effigiem exhibet. Sanguis verò deinde adducitur, ut  
fanguineæ partes inde coagulentur, & nervorum ac filamen-  
torum spatia carne repleantur.

Veruntamen licet omnes partes simul inchoëntur, non ta-  
men simul omnes absolvuntur, sed prout necessitas, aut ma-  
teriæ oportunitas unam præ alterâ maturari jusserit. Vnde *Arist. lib. 2.  
c. 6. de ge-  
nerat. anim.*  
*ungues, pili, cornua, rostra & calcaria avium, ac alia eiusmodi qua  
ex superfluo alimenti gignuntur*, inquit Aristoteles, posterius,  
& ubi animal nutrirî coepit, conformari tantum incipiunt.

Hæc autem de partium omnium ex primo semine simulta-  
neâ conformatione, veterum Stoicorum, & recentiorum Me-  
dicorum certior, & experimentis magis probata doctrina est.  
De qua proinde nimis timidè noster Lipsius: *Stoicos nostros,*  
inquit, *quis, in re ista, adiuvat? Nescio, & vereor ut inspectio &  
experimenta damnent.* Imò verò Vir Eruditissime, embryonum  
*I. Lips. lib. 3.  
diff. 6.  
Physiol.*  
abortivorum inspectio, & neotericorum Medicorum experi-  
menta non damnant, sed adjuvant validissimè. Ex quibus  
etiâ intelligitur, quàm infirmiter Aristoteles & Galenus con-  
jectent, structuram foetus à corde, vel hepate inchoari; quasi  
foetus in prima illa sui conformatione, officinâ sanguinis in-  
digeat: cum sanguis tunc nullus adhuc operi intertexi debeat,  
nec affluere eò possit, nisi postquam vena & arteriæ umbili-  
cales fuerint constructæ, & venæ ac arterijs uteri materni ap-  
plicitæ.

Hoc tamen Aristoteli & Galeno dandum existimo. Ci-  
tiùs quàm recentiores putent, cor & hepar, ac ante ingressum  
animæ rationalis, ex sanguine conformari. Nam principalibus  
istis partibus & organis nobilis illa anima videtur indigere, &  
eas præsupponere, ut valeat informare suum corpus. Deinde,  
ut Galenus & omnes fatentur, virtus conformatrix statim in  
principio operis, venam & arterias umbilicales orditur, & quan-  
tum potest, detexere properat. Dubium autem non est, quin  
mox ubi vasa ista absoluta sunt, sanguinem matris sugant. Ex  
sanguine autem isto primum omnium hepar & cor coagulari,  
inter

Fernel.  
lib. 7. c. 10.  
Physiol.

inter omnes constat. Antea verò in embryone purè semineo, venæ, arteriæ, ligamenta, fibræ illorum viscerum tantum inerant, tanquam stamina ex parte seminis glutinosâ contextas quorum vacua spatia affluxu deinde sanguinis replentur, ut universum hepatis, & cordis parenchyma, ex omnibus semineis fibris, & sanguineis partibus simul concresecat. Vnde in foetu quodam quadraginta dierum, Fernelius *hepar rubrum, amplum, & recens concreto sanguini persimile*, se advertisse ait; licet cetera *omnia alba, fibrosa, & seminis amula, nullo carnis, aut sanguinis rubore perfusa essent*. Igitur existimo, ante adventum animæ rationalis, ac sub anima sensitiva viali præcedente, embryonem excordem non esse; velut non est in brutis, quando ultima anima sensitiva vegetativæ succedit.

Ante verò affluxum sanguinis, non alitur in utero semineus embryo, si Laurentio & quibusdam Medicis credimus (aut certè, ut Fieno nostro, & nobis videtur probabilius) alitur ex semine, cui innatat, & præcipuè materno, quod mole virile semen vincit, etsi calore & energiâ vincatur.

Crescit quippe semineus embryo; ergo nutritur. Nam magnitudo ejus prima hordei molem non excedit; & tamen Laurentius sæpe se observasse narrat, *foetum quadraginta dierum, longitudinem digiti auricularis excessisse*.

Tunc autem foetus ferè adhuc totus semineus est, quantum judicio oculorum potest intelligi, & Hippocrates etiam docet; qui primam & semineam structuram (quanquam sanguinis aliquid intertextum esse, ante hoc tempus, ad hepatis & cordis, ut antè dixi, fabricam existimem) in masculo intra trigesimum tantum diem, in femella intra secundum & quadragesimum vult absolvi. Quia enim femina viro frigidior, lentius etiam conformatio ejus procedit; vi illâ architectrice virilis seminis laborante, & ferè, ut sic dicam, suffocatâ in copiosiore semine femineo, quod vincit, & sexum foetus ad se trahit.

Lib. 7. c. 4. Præclarè enim Aristoteles: *Cum foetus in utero formatur, femina tardius quàm mas perfectionem quarumcumque partium recipit, & sapius in decimum mensem, quàm mas protrahitur. Sed cum in lucem*



*lucem prodierit, femina ocyus quàm mas & accrescit, & etate floret, & senectute deficit.* Hinc pubertas puellis duodecimo ætatis anno, masculis tantum decimo quarto contingit, calore juvenili in largiori feminarum humido se magis dilatante, & incrementa festinante.

Sed nonne sententiâ illa, de omnium partium simul conformatione, Philosophiæ Iobi, inquires, videtur repugnare? Iob. 36.  
Ait enim ad Dominum, *Nonne sicut lac mulsisti me?* Ecce hominis seminatio: *Et sicut caseum me coagulasti?* Ecce fermentatio in utero: *Pelle & carnibus vestisti me.* Ecce textura corporis, à cute & circumferentiâ exoriens: *Osibus & nervis compegisti me.* Ecce progressus operis versus centrum.

Sed profectò S. Iobo mens non fuit, partium humani corporis seriem enumerare eo ordine, quo natura & Deus eas architectantur. Aliàs pellem & carnes ante ossa & nervos, hoc est, vestem ante id quod veste amicitur, minimè posuisset. Pellis enim & carnes, omnium Medicorum sententiâ, post ossa & nervos conformantur.

Vnde Ezechiel contrario, & magis naturali ordine: *Ossa arida* Ezech. 37.  
*audite. Dabo super vos nervos, succrescere faciam super vos carnes, & superextendam in vobis cutem.* Sed neque hic etiam significare voluit, partem unam corporis resurgentis formari ante aliam; sed imitatur Geometras (ut in simili ait Aristoteles) qui discipulis volentes ostendere trianguli structuram, unam lineam Arist. lib. 1. c. 10. Cæli.  
ante alteram describunt, etiamsi triangulus non priùs ex illa, quàm ex ista componatur.

## ARTICVLVS XVI.

*Quando fœtus in utero animetur.*

**T**homas Fienus Academiae nostræ nuper Archiater toto Libro contendit, animam rationalem tertio, aut citius, à concubitu die, in materiam humani fœtus immitteri, & sibi ipsi domicilium corporis architectari. Sed amicū Libro 1. rejecimus; quia nobis amior veritas fuit. Non bellè quoque sacris Canonibus, SS. Patrum decretis, & Theologicæ praxi hæc opinio censentit. Apertè etiam à

Ggg

S. Anselmo

S. Anselm. c. 7  
de concept.  
virg.

S. Anselmo refellitur. Nam quod mox ab ipsa conceptione, inquit, semen rationalem animam habeat, nullus humanus suscipit sensus. Quid ita? Sequitur enim, ait, ut quoties susceptum semen humanum, etiam ab ipso momento susceptionis, perit antequam perveniat ad humanam figuram, toties damnetur in illo anima humana; quoniam non reconciliatur per Christum: quod est nimis absurdum.

Atqui hoc dicit illa opinio. Effluxiones nempe omnes seminis fermentati, quæ inter tertium & septimum diem excidunt, animatas esse animâ rationali, ante omnem humani corporis inductam figuram: ac proinde innumeras quotidie animas per meretricum, aliarumque effluxiones, sine baptismo perire.

Non ergo verum est, statim atque viri & feminae semina, actione mutuâ, & uteri, intra duos aut tres à concubitu dies, fuerint permixta & fermentata, animam rationalem, primam omnium induci, ut membra sibi & facultatum instrumenta architectetur; sed hæc ab alijs formis imperfectioribus & viabilibus ei præparantur, ut Libro 1. satis fusè disseruimus.

Itaque fermentato, & actuato semine, ut loquuntur Medici, illicò seminei spiritus materiam crassiorem utriusque seminis, ad animam vegetativam, alterando & conformando, disponere aggrediuntur. Quia verò materia illa tota humida & fluxa est, maximè ad siccitatem & consistentiam quandam concretionemque partium debet alterari. Spiritus enim seminei ignea siccitate eo fine præditi sunt. Deinde admirabili illâ virtute plasticâ & conformatrice materiæ teneræ & obsequenti prima figurarum & membrorum lineamenta inducere incipiunt. An autem in hoc opere ideas quasdam membrorum vis illa conformatrix quasi aspiciat, Medici multi affirmant; negare tamen malim. Nam intelligi non potest, quem usum ideæ illæ habeant; cum vis conformatrix nullo intellectu, aut imaginatione, qua aspiciat illas ideas, sit prædita. Inutile ergo videtur semen tot ideis & exemplaribus partium replere (quod Laurentius & Fienus faciunt) sed sufficit, tale esse ingenium illius virtutis; nec causam ulteriores magis petendam esse, quàm quare sol illuminet, aut ignis calefaciat.

Fortasse igitur vi quadam quasi magneticâ trahit, repellit,  
& loz



& localiter sic ordinat seminis partes, ut in talem figuram torqueantur; aut certè etiam dispositionem quandam notarum nobis vel ignotarum qualitarum talem inducit, unde talis situs partium resultet & ipsa materia quasi ultrò in illam, aut illam membri figuram se induat.

Certè tamen, sicut anima rationalis, aut irrationalis, nutriendo membrum, & alimentum ei mirà arte circumfigurando, nullam ideam inspicit, sed sine sensu, per naturalem instinctum hoc facit; ita neque prima vis conformatrix ullis ideis indiget. Hinc pater, non rectè à Fieno explicari, cur anima rationalis recenti & informi semini infusa, ipsum ad similitudinem patris vel matris conformet; quia, inquit, secundum hujus aut illius parentis ideam in opere suo se dirigit. Hujus enim similitudinis causa à ficticijs ideis peti non debet, sed à virtute conformatrice, ut bene Galenus; quæ nunc in semine patris, nunc in semine matris est efficacior. Licet enim in pari mole, paterni seminis spiritus calidior & actuosior sit; spiritus tamen materni seminis multitudine & copiâ paternum vincere, & figuram foetus ad similitudinem matris detorquere potest.

Neque verum existimo, quod credit Fienus: circa ultimos tantum gestationis menses, similitudinem illam parentum induci. Sed statim inter prima conformationis initia, in ipsis rudibus lineis & filamentis embryonis, fundamenta futuræ similitudinis jaciuntur; secundum quorum configurationes, flexus & modos, vacua spatia postea carne replentur, & tandem similitudo tota completur.

Quo verò præcisè tempore embryo animetur, obscurum est. *Adèd enim sensum ab inanimatis ad animata,* ait Aristoteles, *natura transit, ut continuatione ipsa lateat eorum confinium, & mediam utriusnam sit extremi.* Vnde præcisum articulum temporis designare, quo anima vialis vegetativa, formæ inanimæ seminis succedat, est perquam difficile.

Arist. lib. 8.  
c. 1. Histor.  
anima.

Famosum est apud omnes Medicos illud Hippocratis experimentum, in geniturâ Psalteriæ: quæ septimò à concubitu die jussa saltare, excussit quippiam simile ovo crudo sine testa, sed interiore tantum & molli membrana vestitum; in

Hippocrat.  
lib. de nat.  
pueri.

quo humor pellucidus & rotundus, cui fibræ albæ ac tenues interspersæ visebantur. Igitur intra septem primos dies nondum embryo, sed semen adhuc informe est, levi tantum & primo conformationis rudimento tenuissimè inumbratum.

Arist. lib. 7.  
c. 3. Hister.  
anim.

Vnde quæ intra septimum diem excidunt *expūsus effluxiones* sunt, inquit Aristoteles; quæ verò deinde intra quadragesimum, *ἐκ τῶν ποτὶ abortus* vocantur. Abortus enim non vocantur, nisi semen utcumque conformatum, liquiditasq; ejus in rudimentum quoddam membrorum & embryonis concreta sit, & satis conspicua.

Ante septimum igitur diem nondum animatæ effluxiones illæ videntur, sed toto tempore illo virtus conformatrix veluti hirundo quædam, in informi luto laborat; ut nidum & domicilium primæ animæ vegetativæ viali præparet.

Non dudum verò post diem septimum, & fortassis intra ipsum septimum, aut etiam paulo antè (nam res ista variat, prout virtus seminis actuosior fuerit, aut remissior) anima prima vegetativa è potentia materiæ educitur. Cujus ingens & probabilissima conjectura est, si non fallit nos Hippocrates, dum narrat, *genituram septimo die habere quacumque corpus habere debet*, id est, prima & tenuissima omnium partium spermaticarum filamenta, ut Medici interpretantur, oculis etiam utcumque conspicua; si aquæ frigidæ ad condensationem, immergantur. Nec tantam rudimentorum intra septimum diem accelerationem valde mirabitur, si quis naturæ celeritatem in alijs similibus operibus cogitet. Nam plurima animalia insecta & imperfecta, non tantum ut fungi, una nocte, sed pænè momento conformantur. Et nos olim in Meteorologicis quosdam testes oculatos retulimus, qui ex gutta aquæ pluvialis in ferventem terræ pulverem cadente, ranunculum morâ ferè imperceptibili formari & omnibus suis membris exprimi vidisse se jurabant. Quibus etiam consentit Augustinus. *Ranas*, ait, *repentè ex una pluvia, terra generat.*

S. Aug. lib. 6  
c. 8. contra  
Faust.

Fortasse autem post alteram hebdomadam, id est, circa diem decimum quartum, in foetu humano anima sensitiva vialis succedit, si talem aliquam admittere oportet; quod postea disputa-



disputabimus. Solet enim natura in multis operibus suis per hebdomadas procedere, Deum quasi imitata, qui Mundi opificium hebdomade dierum complevit. Gen. 2.

Vnde Fernelius testatur, die *decimo quinto conspicuas esse partes, substantiâ & situ discretas*. Vel certè, non nisi exactâ tertiâ hebdomade, hoc est, circiter primum & vigesimum diem, anima sensitiva inducitur; præsertim in femellis, quorum architectura, propter feminis frigus, lentiùs procedit. Fernel. lib. 7. c. 10. Physiol.

Non est autem differendus animæ sensitivæ in foetum ingressus usque in tempus quo prægnans motum illius animalem percipere incipit. Aliàs non nisi quadragesimo secundo die, aut etiam tertio mense, imò interdum solum quarto, anima sensitiva adveniret. Nam *sive mas, sive femina geritur*, inquit Fernelius, *alia prægnantes semper die quadragesimo secundo, alia mense tertio, alia nonnisi medio prægnationis cursu fœtum loco dimoveri sentiunt*. Eadem quoque prægnans, addit, *aliàs secundo & quadragesimo die, aliàs quarto mense primos motuum insultus observat, cum quasi volitantis muscæ excussione, vel titillatione percipit*. Hæc igitur titillatio non est signum geniti jam primum animalis, sed satis ad motum validi, siccatis utcumque nervis & alijs instrumentis motus. Ipse tamen Fernelius, non ante diem trigesimum sextum, animam sensitivam succedere vegetativæ credit. Ita enim accipio quod ait, *sensus facultate fœtum illustrari circa diem sextum & trigesimum*. Meo animo, nimis tardè. Nam circa hos dies omnia ad introductionem animæ rationalis sunt præparata; nec opus est animam sensitivam pro tantillo, aut nullo tempore inter vegetativam & rationalem interjecto, intercedere. Quo verò tempore anima rationalis corpori insinuetur, innumerabiles & longè dissidentes Medicorum ac Philosophorum sunt sententiæ. Ibid. c. 11.

Stoici existimant non in utero, sed *effuso iam partu*, ut ait Tertullianus, advenire. Credunt enim, carnem in uteri fornace fumantem debere contactu & rigore externi aeris refrigerescere, velut ferrum candens immersum aquæ, ut humanam animam suscipiat. Stoicos Baldus, Decius, & alij quidam IC. Tertull. c. 25. de anima.

securi videntur, qui docent *nondum-natum, non esse hominē re, sed* I. cum interi C. de fidei com. liber.

Navarr. c. *solū spe*, ut refert Navarrus, damnans tanquam fidei Catho-  
 Si quis ne- licæ contrarium: & multa solet Baldus dicere in superficie pulchra,  
 cand. inquit, *quæ tamen sunt in recessu dolanda*. Et sanè Virgo non  
 concepisset Deum in utero, nec Deipara esset, si anima Chri-  
 sti demum insinuata est corpori post partum. Verbum enim  
 divinum corpus illud non assumpsit, nisi anima rationali ani-  
 matum.

Beda Io. 2. Beda, Henricus, Medina & complusculi Theologi, diebus  
 quadraginta sex hominem putant ædificari in utero, quot Iu-  
 dæi annis dicunt ædificatum suum templum Io. 2. *Quadra-*  
 S. August. *ginta & sex annis ædificatum est templum hoc*. Quod S. Augusti-  
 lib. 83. 9. 56 nus etiam refert tanquam à Philosophis quibusdam assertum.

*Tradunt*, inquit ibidem Beda, *naturalium Scriptores, formam*  
*corporis humani tot dierum spatio perfici. Quia primis sex à conceptione*  
*diebus, lactis habet similitudinem; novem sequentibus convertitur in*  
*sanguinem; deinde duodecim solidatur; reliquis decem & octo firmatur*  
*usque ad perfecta lineamenta omnium membrorum. Et hinc jam reliquo*  
*tempore, usque ad tempus partus augetur*. Numeri verò isti colli-  
 gunt 45. Cui dies unus, inquit, adijciendus est, quo fœtus  
 capere incipit incrementum.

En fabulæ & somnia quorundam illius ævi Philosophorum,  
 de conversione seminis in sanguinem. Deinde de templo hoc,  
 id est tertiæ & Herodianæ ædificationis, quod oculis cerne-  
 bant, verba illa Iudæorum probabilissimè accipiuntur: quod  
 tamen adhuc tunc post quadraginta sex annos inchoati operis,  
 & dudum postea usque ad Neronis tempora, quantum ad ali-  
 quas porticus & cohærentia membra ædificabatur, ut ex Io-  
 sephi Historia colligi potest. Aliàs principales partes, sacrificijs  
 Ioseph. lib. 20. c. 8. & cultui divino deputatæ, solis novem annis cum dimidio, ut  
 Antiq. idem est auctor, ædificatæ & consummatæ fuerant.

Medin. 3. Immeritò igitur Medina illam hominis in utero matris 46.  
 p. 9. 33. dierum ædificationem, *veram Philosophiam* appellat.

Alij diebus quadraginta masculum, feminam octoginta  
 formari docent. Colligunt hoc ex purgatione puerperæ, quæ  
 septem & triginta tribus, id est quadraginta diebus lege  
 Levit. 12. Levitici, si masculum pepererit; si feminam, quatuordecim  
 & sexa;



& sexaginta sex, hoc est octoginta diebus, jubetur *manere in sanguine purificationis suæ*. Nam Hippocrates tempora purgationis sanguinis, humorum, secundinarum, & omnium excrementorum uteri post partum, ferè congruere ait cum temporibus, quibus masculus aut femella conformantur & figurantur in utero. Si ergo tota purgatio à partu masculi, cum longissimè, ad quadraginta dies; à partu femellæ, ad octoginta extenditur: ergo masculus quadraginta, femella octoginta diebus conformata fuit.

Verùm Hippocrates & Aristoteles negant esse perpetuum, ut purgationum tempora temporibus conformationum congruant. *Est enim hoc, & non est*, ut Laconismo suo & brevissimè dicit Hippocrates. Deinde longissimam purgationē, post partum masculi trigesimo die, post partum feminæ, quadagesimo secundo plerumque finiri docet. Vnde potius sequitur, quod statim dicturi sumus, masculum trigesimo, feminam quadagesimo secundo absolvi. Deus autem lege illa Levitici partui masculi quadraginta purificationis dies (unde totidem sunt à Nativitate Christi ad Purificationem Virginis) octoginta verò partui femellæ constituit, ut tempus longissimum, ad quod unquam tenuissimæ purgationis reliquiæ pervenire possunt, comprehenderet. Alias enim vix, & ferè nunquam ad tot dies purgationes illæ protelantur. Etsi interim hoc verum sit: puerperas à partu feminino diutius purgari; quia feminæ humidiores sunt & magis excrementosæ, quàm masculi.

Inter tot igitur variantes & dissidentes de tempore formationis foetus sententias, nihil adhuc certius video, quàm quod divinus senex, ut Medici sui eum vocant, olim dixit: Masculum triginta diebus, τὸ μακρότατον, *ut longissimè*, feminam ut tardissimè, quadraginta diebus conformari.

Hippocras  
lib. de nat.  
pueri.

Huc enim, aut circiter, omnium ferè recentiorum Medicorum experimenta conveniunt. Vt mirum sit, Aristotelem tam longè ab Hippocrate, cui in talibus se adjungere solet, discessisse; ut dicat, si femineus foetus per abortum *intra tertium mensem eruperit*, ἀδιάφραστον, *inarticulatum* & informem ἐν τῷ πολὺ *ut plurimum*, apparere; qui autem *quatuor mensium est*, nondum

nondum quidem, citò tamen reliquam articulationem accipere. Incredible enim est feminam tam tardè post masculum, & triplo aut quadruplo tardiùs conformari. Cum tamen ipse Aristoteles ibidem affirmet, *masculum qui quadragesimo die excidit, si in aquam frigidam mittatur, apparere magnitudine formica majuscula, & omnia membra distinctè, usque ad genitalia, & oculos, ut in ceteris animalibus, praegrandes.* Et nuper virum fide dignum narrantem audivi, vidisse se abortum quem mater 39. dierum esse dicebat, magnitudine minimi digiti, ita omnibus membris expressum, ut etiam unguiculi apparerent.

Arist. lib. 7.  
c. 3. Histor.  
animal.

Quomodo igitur fieri posset, ut masculus non longè citiùs, quàm femella in lucem prodiret; si die quadragesimo, aut autè, sit exactè omnibus membris suis & numeris absolutus, femina autem post quartum solum mensem illam perfectionem attingat? Et tamen in omni genere animalium masculi ad partum festinare vix solent ante femellas. Gallina enim uno incubatu gallinas simul excludit cum gallis; sus eodem partu fuculas effundit cum porcellis: & in specie humana, mater gemellos diversi sexùs enititur, inter quos femella etiam non rarò ante marem exit. Omnium tamen confessione, masculi structura ab uberiore & magis artifice calore celerius perficitur, licet femina non tardiùs ad partum veniat; quia ubi omnibus artibus semel expressa fuerit, citiùs masculo, non tantùm extra uterum, sed in utero sua incrementa rapit.

Fernel.  
lib. 7. c. 11.  
Physiol.

Quomodo deinde non longè citiùs mas quàm femina, in utero matris moveretur, si tot diebus, imò mensibus, ante feminam omnibus suis membris sit expressus? Et tamen certè, inquit Fernelius, *sive mas, sive femina geritur, aliae praegnautes semper die quadragesimo secundo, aliae mense tertio &c. loco dimoveri fatum sentiunt.*

Si autem masculus proximè à quarti septenarij fine, id est, circiter diem trigesimum, femina sexto septenario exeunte, hoc est, die quadragesimo secundo, ut Hippocrati & nobis placet, perfectam undique humani corporis plasticam & effigiem habet; nihil profectò causæ jam est, cur animæ rationalis adventus differatur in longius. Figura enim corpusculi indi-



indicat ceteras materiæ dispositiones adesse, quas anima humana postulat. Hinc Canones, & jura civilia homicidij reos habent, qui *παῖδες ἐξ ὄντων* *puellum effigiatum* humanâ effigie, aut medicamentis abigunt, aut in utero occidunt. De qua re, & versione illa septuaginta Interpretum Exod. 21. *Si puellus effigiatus fuerit, dabit animam pro anima*, satis differuimus Lib. I.

c. Moyses  
32. q. 2.

l. Cicero D<sup>i</sup>  
de penis,

Deinde Ritualia Sacramentorum baptizari jubent omnes infantes, etiam abortivos, si vivant & *humanam habeant speciem*; tanquam si externa hominis species certum sit animæ rationalis argumentum.

Videtur autem à Conditore sapientissimè provisum, ne ante perfectam hominis effigiem, anima rationalis informe subiret corpusculum. Nam aliàs innumeræ animæ, in Christo non renatæ, perirent, ut cum S. Anselmo antea monebamus. Et Hippocrates narrat, *meretrices publicas, ubi cum viris rem habuerunt, scientes quando conceperint, mox conceptum intra se perimere*. Eâdem providentiâ factum, ut, Aristotele teste, plerique abortus ante diem quadragesimum accidunt, id est, ante animæ rationalis creationem, & ingressum in materiam nondum omnibus suis membris & numeris absolutam; ne tot, inquam, homines interficiantur, quot feminæ abortiunt.

Hoc tamen dubitationem facere potest, quòd Fernelius, Laurentius, Fienus, & ferè Medici recentiores, structuram istam masculi foetus die trigesimo, & feminini die quadragesimo secundo, femineam tantum esse dicant. *Hactenus, enim*, inquit Fernelius, *sola existit solidarum partium conformatio ex puro semine; quod quantulumcumque initio conceptum à parentibus, id nihil auctum, nihil amplificatum, satis est partibus omnibus confirmandis*. Igitur nec hactenus aut hepar, aut cor, aut cetera parenchymata, sanguineæque partes conformatæ sunt; cum nondum per umbilicum sanguis maternus in viscera infantis attractus sit, ex quo partes illæ, omnium consensu, concrecere debent.

Fernel. lib.  
7. c. 10.  
Physiol.

An ergo anima rationalis corpus illud purè semineum, adhuc excors poterit informare? Quàm ergo longè aberravit

H h h

Aristoteles,

Aristoteles, quando dixit, cor animalis primum vivere, ultimum mori! Certè non primum vivit, si cerebrum, nervi, venæ, arteriæ, & universæ partes semineæ animentur, antequàm parenchyma cordis fabricetur. Antea quippe nervi, & fibræ quædam semineæ, tanquam stamina & fila araneorum, loco cordis tantum erant, quorum spacia & intervalla, ad fabricam perfecti cordis, materno sanguine replenda & infercienda sunt. Quis autem credat, animam rationalem, ante cordis, id est nobilissimi visceris, & fontis vitæ totius structuram, corporis domicilium subire? Certè non credo.

Vnde fortiter assero, masculum trigesimo die, femellam quadragesimo secundo non esse excordes; aut si tunc corda eorum nondum perfecta & fabrè satis facta sunt, aliquot dies expectari oportere (nec enim tempus hoc, omnium consensione, consistit in indivisibili) donec cordis & hepatis, quæ maximè vitalia viscera sunt, parenchymata concreverint, & numeris suis absoluta sint. Circa verò dies illos absolvi, patet illustri Fernelij experimento, qui in foetu quadraginta dierum abortivo, *hepar rubrum, amplum, & recens concreto sanguini simile*, se notasse narrat.

Galen. lib.  
de foet.  
format.

Et ante ipsum Galenus: *In abortibus foetuum supra triginta dies, inquit, propè inter se sita manifestè apparent tria hæc animalis membra, hepar, cor, cerebrum; atque maius utrisque alijs hepar. Ad-*ditque adversus Aristotelem, cum assensu suorum Medicorum, hepar ocyùs quàm cor absolvi; quia *celerrimam, inquit, generationem hoc viscus ex sanguine habet, ut pote quòd substantiam ipsi quàm simillimam possideat.* Nihil enim aliud videtur esse hepar, quàm duriusculè concretus sanguis.

#### ARTICVLVS XVII.

*An inter animam vegetativam embryonis, & rationalem, necesse sit animam sensitivam intercedere.*

S. Th. lib. 2.  
c. 89. contra  
Gent.

**P**Lurimi id existimant, & S. Thomas apertè. *Anima vegetabilis, inquit, quæ primò inest, cum embryo vivit vitâ plantæ, corrumpitur, & succedit anima perfectior, quæ est nutritiva*  
& sens.



*& sensitiva simul. Et tunc embryo vivit vitâ animalis. Hâc autem corruptâ, succedit anima rationalis ab extrinseco immissa, licet præcedentes fuerint virtute seminis.*

Colligunt verò ex Aristotele, qui non tantum animam *σπειριτικὴν vegetativam*, sed etiam *αἰσθητικὴν sensitivam* præcedere dicit. *Οὐ γὰρ ἀμὰ γίνεσθαι ζῶον καὶ ἄνθρωπον, οὐδὲ ζῶον καὶ ἵππον.* Non enim, inquit, simul fit animal & homo, neque animal & equus. Additque, eandem esse rationem de quocunque alio animali.

Arist. lib. 2.  
c. 3. de ge-  
ner. ani-  
mal.

Vnde docere videtur, non tantum ante animam rationalem hominis, sed etiam ante sensitivam equi, ante sensitivam bovis, canis &c. præmittendam aliam sensitivam vialem, quæ ad ultimam, specificam, & permanentem sensitivam equi, bovis, canis &c. materiam præparet. Quæ tamen animarum sensitivarum multiplicatio videtur superflua; cum ab anima vegetativa ad sensitivas específicas equi, bovis &c. proximè, nullius aliûs animæ sensitivæ interjectu, transiri possit.

Non enim, ut opinor, anima sensitiva vialis succedere animæ vegetativæ potest, nisi post hepatis, cordis, cerebri conformationem. Atqui hæc conformatio tunc demum absolvitur, quando anima sensitiva specifica equi, bovis &c. imò rationalis, in foetum potest & debet induci.

Nam in foetu humano, ut antè differuimus; si masculus est circa diem trigessimum; si femina, circa quadragesimum secundum, hepatis & cordis ultima structura perficitur; & tunc tamen domicilium est satis ad animæ rationalis susceptionem instructum, ut ex Hippocrate docebamur. Quid igitur opus, aut quis usus præmittere ei sensitivam irrationalem? Quid ibi agat? An ut habitaculum animæ rationali construat; quod jam satis ab anima embryonis vegetativa est factum?

Non ut construat, sed ut poliat & perpoliat, fortasse in-  
quient.

Sic sanè in veri speciem responderi potest; sed quæ tamen fortè evanescet, si res intrò & sub cute sua inspiciatur. Non enim propriè est ullius animæ sensitivæ officium, membra conformare, aut perpolire; sed membris factis & perpolitis uti, ac operationes suas sensitivas, id est motum localem animalè,

H h h 2

& fun-

& functiones sensuum, per ea, tanquam instrumenta, exercere. Vnde anima sensitiva, ut talis, perinde ac rationalis inquilina tantum est, non architectrix humani corporis. Duo verò sunt alij artifices & architecti, nempe spiritus seminis, & anima vegetativa; quæ opus à virtute conformatrice seminis inchoatum suscipit, & appposito singulis membris, ipsisque configurato alimento, omnia in majus provehit, perficit & polit. Igitur non opus ulla anima viali sensitiva, quæ rationali locum & domicilium præparet, cum illud virtus seminis, & deinde anima vegetativa totum absolvere valeant.

Deinde idem ex molis, & humani partus erroribus ostendi potest. Molæ enim *vacua sunt omni animali motu; neque enim mola movetur, nisi ad uteri motum*, inquit Laurentius, & Medicis passim, quos longo ordine apud Schenkium videre licet. Et tamen, si anima sensitiva inter vegetativam & rationalem interjici necessario deberet, molæ, & alij irriti partus, ante animæ rationalis introductionem intercepti, animæ sensitivæ viali animati quandoque apparerent; quod refellunt experientia & Medici. Nam levis quarundam molarum palpitationo, non ab anima sensitiva, sed à spiritibus molæ inclusis excitari videntur; veluti etiam bovis recenter mortuæ carnes à similibus spiritibus subsiliunt & moventur.

Si obijcias, animalia bruta, quæ Medici Itali, per derisum, *fratres Lombardorum* vocant, nasci interdum ex puerperis, loco humani partus: ergo anima sensitiva rationem antecedit.

Resp. Anima sensitiva istorum Lombardorum non est vialis ad animam rationalem, sed est anima ultima & specifica alicujus monstri, ex semine humano & spurcitij uteri, fermentari. Virtus enim conformativa humani seminis impedita & interpellata, à scopo suo delirat, & cum hominem formare incœperit, deviat, & finit in brutum. Vnde villis, unguibus, rostro, monstra illa interdum armata sunt; ut illud Zelandicum, quod narrat Lemnius à se visum, *adunco rostro, longo teretique collo, vibrantibus oculis, cauda acuminata, eximie pedum agilitate, conclave stridoribus implens, atque ultro citroque discurrens*. Quæ profectò operationes, ab illius animæ sensitivæ operationibus

Andr. Laurent.  
lib. 8.  
c. 13. Anat.

Lemnius,  
lib. 1. c. 8.  
de occult.



tionibus, quæ materiam ad animæ rationalis susceptionem præparare debet, longissimè absunt. Anima igitur sensitiva vialis, ut superflua, expungenda videtur. Quod Medici illi fortasse significant, qui nullum tempus illi animæ sensitivæ constituunt, sed simulatque foetus humanus sentire incipit, animam rationalem intrasse coniectant; quasi animæ sensitivæ tantum gradus cum gradu rationali in eadem anima conjunctus, non aliqua anima sensitiva distincta, tunc inducatur.

*Ad quartum & quadragesimum diem, inquit Lemnius, cetera partes conformantur, foetusque vitalis esse ac sentire incipit, licet ob imbecillitatem aut non moveatur, aut tanta debilitate, ut gestans id sentire nequeat. Hoc itaque tempore anima rationalis uterum subire creditur, ac naturales facultates seu potentias vi sua imbuere, totumque opificium perficere. Ecce, quomodo foetus simul incipere sentire, & animam rationalem uterum subire dicat.* Ibid. c. 10.

Nec repugnat fortasse Aristoteles, sed tantum vult operationes animales in foetu humano præcedere rationales; quod alibi disertè. *Et corpus, inquit, in generatione antecedit animam, sic pars irrationalis antecedit eam partem quæ habet rationem. Patet id in pueris, quibus statim ira, & voluntas, & concupiscentia existit: at ratio & mens procedente ætate in illis fieri nata sunt.* Arist. lib. 7. c. 15. Polit.

Vbi ait, in pueris partem irrationalem antecedere eam partem quæ rationem habet, quia operationes puerorum initio irrationales sunt, & paulatim, diducente & explicante se scintilla rationis quæ in corpusculo latebat, rationales efficiuntur.

In eandem sententiam duci potest Galenus, dum refutat opinionem, qua cum Aristotele docuerat, cor, tanquam quoddam generationis fundamentum, formari circa primas gestationis dies: quia, inquit, reliquis omnibus Medicis & Philosophis complacitum esse reperi, foetus usque ad manifestam effigiationem, similiter ut plantas gubernari; ac proinde cor in principio inutile esse. Si ergo foetus usque ad manifestam effigiationem, excors est, & non ut animal, sed ut planta gubernatur; igitur ab anima vegetativa immediate ad rationalem transitur; quandoquidem tam Medici, quam sacri Canones ex manifesta hominis effigiatione colligant animæ rationalis præsentiam. Galen. lib. 1. de format. foet.

Vt tamen nihil dissimulem, S. Thomæ opinio retineri potest, si dicas, gradum vegetativum inclusum in anima sensitiva viali, esse altiore & nobiliore, quàm sit in animâ primâ purè vegetativâ embryonis; & esse necessarium, brevissimo saltem tempore ante animæ rationalis adventum, ut per illum humana complexio absolvatur, & occultæ fortasse quædam qualitates introducantur, quibus materia ad humanam animam ultimò disponatur.

Tales enim occultas qualitates, præter quatuor primas, doctissimi quique Medicorum admittunt; nec aliter explicari posse credunt, cur uni animali cicuta, aranea, bufo &c. sit venenum mortiferum, alteri non. Apparet igitur, malignam veneni qualitatem occultæ dispositioni unius animalis repugnare, alterius minimè.

Vnde & in brutis fortasse anima sensitiva vialis retineri etiam poterit, quæ occultas qualitates introducat, quibus anima sensitiva specifica ultima (exempli causâ, capreæ, aut coturnicis) adversus venena quædam muniantur, quibus animalia ista vesci & pinguescere solent.

Fernel.  
lib. 7. c. 5.  
Physiol.

Quamquam tamen profectò occultarum istarum qualitarum quædam rudimenta seminibus illorum animalium à principio insint, ut doctissimi Medicorum mecum existimant. Vnde illa fortasse satis excitari, & perfici ab anima vegetativa viali possunt; ut necesse non sit, ad eum finem, alteram animam vialem sensitivam ipsi succedaneam dare, ante ultimæ animæ introductionem.

Multi quoque censent, qualitates animantium occultas, non ab anima vegetativa, sensitiva, aut rationali, sed à formis quibusdam inanimatis, ut carnis, ossis, nervi, cordis, hepatis, ventriculi &c. dependere. Varias enim formas substantiales heterogeneas, ut vocant, singulis membris & partibus animalium inculcant. Quorum tamen Philosophiam Lib. 1. non probavimus.



## ARTICVLVS XVIII.

*Quænam causa principalis efficiens introductionis animæ in materiam foetus.*

**H**Æc quoque quæstio rixas inter Philosophos ferit: Virtus enim conformatrix, & alterativa foetus non videtur esse, nisi causa instrumentalis, siue ad educendam è potentia materiæ animam mortalem plantæ & bruti, siue ad uniendam materiæ animam immortalem hominis. Est enim virtus illa tantum accidens, quod ignobilius est substantiâ animæ, aut modo substantiali unionis, quo anima rationali corpori suo subulatur & nequitur.

Quærenda ergo est causa alia principalis, quæ effectum illum nobilitate superet, aut adæquet. Cum enim omnium Philosophorum consensu, causa principalis effectum suum continere debeat, ut illum quodammodo ex se profundere possit, necesse est, ut perfectio effectus in perfectione causæ includatur; quod fieri non posse videtur, nisi perfectio causæ æqualis sit, aut amplior quàm perfectio effectus. Vnde neque forma substantialis seminis, animam catuli, aut bovis producere, ut causa principalis, poterit; quia forma seminis imperfectior est quàm anima parentum, à qua in testibus actione æquivocâ producta fuit: ergo etiam imperfectior quàm anima foetus, quæ perfectione animam parentum adæquat.

Hinc nec ad cæli formas recurrere possumus; cum cæli sint inanimæ, & proinde formæ eorum, excellentiâ vincantur non tantum à brutorum, sed etiam à plantarum formis,

Subtilis Scotus inter has angustias compressus, ait animam matris esse causam principalem generationis foetus. Nam Scot. 3. d. 4. o. licet pater absens, imò fortè mortuus sit; mater tamen embryonem utero fovens, propinquissima est; ut facile intelligi possit, quomodo ejus anima quæ uterum informat, in instanti substantialis generationis, animam foetus bruti è potentia materiæ educat, aut animam infantis hominis, materiæ uni-

Nec

Nec deest ei vis activa ad illum effectum; cum in nutritione sui proprii corporis, anima bruti particulas animæ sibi similes in materia alimenti producat; anima verò rationalis novis unionum nexibus se replicet & extendat.

Quod à simili confirmari potest. Nam actio uteri in semen utriusque parentis, & embryonem qui inde fermentatur, similis quodammodo est chylosi qua ventriculus chylum, aut chymosi qua jecur chymum concoquit. Igitur veluti anima ventriculi post prævias dispositiones, formam chyli, & anima jecoris formam chymi ( id est formas quatuor humorum, qui in chymo continentur ) producit; ita & anima uteri materni, postquam semina satis fermentaverit & percoxerit, primò animam vegetativam vialem, deinde sensitivam producet; ac denique in humano foetu, animam rationalem divinitus creatam, corpusculo suo, injectâ unionis fibulâ, alligabit.

Et augetur hæc verisimilitudo. Quia foetus adhæret matri, ut fructus arbori: fructus autem animam suam ab anima arboris accipit; ergo & foetus suam ab anima matris.

Fateor sanè, primâ specie probabilissimè ista differuntur. Sed ecce, si altius inspectes, quæ difficultates se obijciant.

Nam in primis, communis Philosophorum sensus esse videtur, feminam in animalibus eodem fermè modo generare in utero prolem, quemadmodum terra in se conformat & generat plantam. Sed forma terræ ( utpote simplicis & omnium ignobilissimi elementi forma ) animam plantæ, ut causa principalis producere non valet; igitur neque necesse est, ad animam matris recurrere, quæ animam prolis vel producat, vel corpori suo substantialiter uniat.

Deinde quænam est causa principalis, in omni avium genere, producens animam pulli? An fortè anima volucris, quæ incubat ova? Non credo. Quomodo enim anima vilis gallinæ, quæ aquilina, aut pavonina ova interdum fovet, nobilem aquilæ, aut pavonis animam potest educere? Deinde ova

Arist. lib. 6.  
c. 2. Histor.  
animal.  
Sueton.  
Tiber. c. 14.

*Egypti, sive obruta, pullaginem, inquit Aristoteles, procreant.*  
Atqui hic nulla mater est, quæ ea ova possit animare. Livia Augusti uxor ovum incubanti gallinæ subductum nunc sua, nunc ministra-



*ministrarum manu per vices, eòsque fovit, quoad pullus insigniter cristatus exclusus est: an ergo anima Liviae Augustae, aut ministrarum, pulli animam valuit procreare? Etsi enim anima rationalis nobilior sit quàm gallinacei; non tamen quidlibet nobilius potest statim sine discrimine ignobilius producere. Aliàs anima humana asinum, bovem, & quamlibet bestiam posset generare.*

Vnde nec fratrum Lombardorum, nec Satyrorum, & monstrorum, quæ in uteris feminarum interdum fabricantur, irracionales animæ, ab anima rationali uteri procuduntur.

Terra quoque pluvijs, uligine, & spurcitijs fermentata ranas, serpentes, mures, & tot animalia sine alio semine, & extra maternos uteros gignit; quis ergo uterus hîc earum animarum erit artifex?

Ad hæc, omnium ferè plantarum femina solo terræ & solis fotu animantur; forma tamen terræ, imò solis & cæli vulgò ignobilior, quàm vilissimæ plantulæ animula reputatur.

Antequam dicam quod sentio, hoc raptim fundamentum subiicio. Causam primam Deum paulò intimiùs & penetrabiliùs, ut sic dicam, in effectus causarum secundarum influere, quàm quidam hodie Philosophi existiment.

*Deus enim operatur omnia in omnibus, inquit Apostolus. Quod interpretans ibi S. Thomas, sicut prima causa, inquit, creans omnes actiones. Et ne tamen alia causa, ait, videantur esse superflua, subdit (in omnibus) quia in causis secundarijs prima causa operatur.* 1. Cor. 12]

Operatur, inquam, actiones earum ac terminos actionum creans; id est, per essentialem aliquam, & profundissimam, ut ita dicam, dependentiam è nihilo suo extrahens. Nisi enim tali influxu & dependentiâ causam secundam adjuvaret, hæc nunquam effectus sui, qui antea nullibi & nihil erat, existentiam attingere, & ex nihilo suo attollere posset.

Hinc Philosophi olim, qui aut Deum, aut ejus cum causis secundis concursum ignorabant, nihil etiam novum in Mundo fieri, sed omnium effectuum existentiam in materia, aut alibi delitescere existimaverunt. Omnis enim effectus creati exi-

stentia est per se, essentialiter, & indispensabiliter ab aliqua existentia immutabili dependens, non tantum in facto esse, ut loquuntur, sed maxime in fieri; quando nempe, è nihilo suo proximè extrahitur, & à non esse ad esse transfertur.

Sic verissimum est, quod Philosophi diviniore olim, & S. Thomas ait, *Omni virtutem activam natura comparari ad Deum, tanquam instrumentum ad primum & principale agens.* Nam omnis causa secunda, etiam illa quam causam principalem secundam appellamus, Dei est instrumentum adjuvantis & elevantis ipsam, ut effectui, qui de se nihil est, existentiam dare possit. Nam sicut existentia effectus essentialiter postulat exire in lucem per Dei productionem; ita, si causa secunda huic operi se immisceat, postulat ut instrumentaliter tantum & sub manu Dei adjuvantis & principaliter extrahentis, ac ipsam actionem causæ secundæ sustentantis, hoc faciat. Eadem mens videtur esse S. Augustini, quando toties negat causas secundas creare, aut condere effectus suos, & dare *ut natura omnino sint.* Vnde *feminam, inquit, sui puerperij creatricem appellare non debemus. Quippe naturam illam qua gignitur, tam ipsa non fecit, quam nec ipsa se fecit.*

S. Th. lib. 2  
c. 89, contra  
Gent.  
  
S. August.  
lib. 12. c. 25.  
Civitas

Hic ergo primus & generalis modus est, quo causa prima vehementius agit, quam secunda, ut loquitur S. Thomas.

Secundus modus vehementius agendi est, *Cum actio principalis agentis pertingit ad aliquid in operato*, ait idem Sanctus, *ad quod non pertingit actio instrumenti.* Et exemplo rem declarat. *Sicut vis vegetativa, inquit, ad speciem carnis producit, ad quam non potest producere calor ignis, qui est eius instrumentum; licet operetur disponendo, resolvendo, & consumendo.* Similiter, addit, *actio Dei producit animam humanam, quam virtus seminis producere non potest, sed disponit ad eam.*

Nec tantum in hominis generatione, sed & multorum aliorum animalium, ac omnium plantarum, quæ vel ex semine, vel sponte nascuntur, actio causæ primæ ad effectum aliquem penetrat, quod actio instrumenti penetrare non valet. Nec hoc facit Deus, defectum causæ secundæ principalis propriè supplendo, ut quidam loquuntur, sed ex proprio causæ primæ officio.



officio. Effectus enim talis nullam causam secundam principalem, sed instrumentalem tantum habet, per quam, sub unica principali generalissima Dei omnipotentia, in lucem exire postulat. Si enim tales effectus causam principalem creatam flagitarent, sapientissimus universi Conditor, qui *omnia in mensura, & numero, & pondere disposuit*, causas illas principales ubique, aut pluribus locis disposuisset, ut illi effectus per ipsas in lucem prodire possent; nec opus esset tam sæpe ad causam primam, tamquam suppletentem defectum secundarum, recurrere. Est enim mali & turbati regiminis signum, quando inferiorum defectus passim per superiora corrigi, aut suppleri debent. Sap. 11.

Igitur aio, omnium in primis plantarum semina terræ mandata; item quæcumque è terrâ cælestibus influentijs fermentatâ, sponte nascuntur, à Deo solo, ut causa principali, animari. Idem dicito de animalium insectorum volucrum, aut involucrum infinitis fermè speciebus, quæ ex putri, aut exhalationis vaporisq; permixtione oriuntur. Horum enim universum nec in terra, nec in aquis, nec in aëre, ulla causa principalis assignari, & disponi bellè & convenienter potuit, quæ materiam ab instrumentis creatis præparatam animaret. Nam forma cæli, terræ, ac omnium elementorum ignobilior est animâ vegetativâ, aut sensitivâ, quæ in fine alterationis & actionis instrumentorum, introduci debet.

Disposuit igitur in universo Deus causas instrumentales alterantes & conformatrices, ut cælum, terram, ac elementa, quæ materiam generationi talium viventium fermentarent ac præpararent; ipse verò, naturâ rerû & universi Oeconomiam hoc flagitante, causæ principalis munus solus in se suscepit, & in ejusmodi effectus duplici modo *vehementius*, ut loquitur S. Thomas, & penetrabilius, quàm instrumentum creatum, agit: quia & in ipsa alteratione & conformatione, actionem instrumenti sustentat & adjuvat, ut proprium effectum suum è nihilo extrahere valeat; & insuper penetrat in effectum alium ulteriorem, quæ est anima animalis aut plantæ, quam instrumentum principaliter attingere non valet.

Idem prorsus sentio de omnibus animalibus, quæ ex cete-

rorum animalium sudore, aut vitiosâ putredine, sive in superficie corporis, sive in visceribus conformantur.

Nec enim existimo animam nostram rationalem habere vim naturalem producendi animas pulicum, syronum, lumbricorum, aut fratrum Lombardorum, mustelarum & similibus monstrorum, quæ aliquando in uteris feminarum nascuntur.

De toto deinde avium genere, quæ ovis incubatu, aut aliter fotis excluduntur, idem omnino iudicium.

Gallinæ quippe incubantis anima non potest animam pulli pavonis, cujus ovis incubat, producere, nec curruca animam cuculi, nec anima picæ animam pulli gallinacei, quem hîc in horto Clar.<sup>mi</sup> I. C. Io. Bapt. Sestich à pica fotum & eductum nuper risimus.

Si autem pica gallinacei animam fabricare, ut causâ principalis, non potest, metuo ne non sui generis etiam pulli animam valeat excudere. Eodem enim prorsus modo pica gallinæ & sua ova fovet, & simili calefactione ad utriusque conformationem & generationem concurrat. Hoc est, excitando virtutem masculini & feminini seminis, quæ in ovis latet.

Vnde si ova sint pavonina, virtus seminis, pullum pavonis, non gallinæ, quæ fortè incubat, conformabit. Quod argumentum est, alterationem & conformationem materiæ, principalius fieri virtute seminis, quàm à calore gallinæ incubantis.

Deinde calefactio ista gallinæ non magis est actio vitalis, quàm illa quâ nos manu aliquid apprehensum calefactamus. Anima enim nostra calefactioni rerum, quæ extra corpus nostrum sunt, non se immiscet, sed illam actionem totam calori, qui temperat carnem, committit. Vnde Liviæ Augustæ anima non magis vitaliter in calefactionem ovi, unde pullum exclusit, influebat, quàm simus, aut fornaces Ægypti, à quibus Aristoteles & alij narrant, pullorum cohortes facillimo negotio excludi.

Si verò anima incubantis gallinæ non influit vitaliter & secundum

Suet. c. 14.  
Tiber.



secundum se in alterationem ovi, sed solus ejus calor id facit; profecto vix crediderim, in fine alterationis, & ultimæ dispositionis ad animam, productionem animæ pulli physicè ab ea attingi. Nam, juxta communem & veriore Philosophiam, nullum naturale agens agit in remotum, nisi prius per totum medium actionē suam spargat & exerceat. Ageret verò anima avis incubantis intra ovum immediatè ut in distans, si animam pulli produceret, & nihil tamen in corticem ovi intermedium; quandoquidem ad calefactionem corticis & spatij medij usque ad germen unde pullus pullulat, ipsa nihil efficiat.

Transcamus jam ad animalia vivipara, quæ foetus suos intra suos uteros fermentant & gignunt. Hic sine dubio, major in speciem probabilitas est, animam foetus ab anima matris produci. Videtur enim, quod quemadmodum ventriculus in chylum, jecur in chymum, cor in spiritus vitales, cerebrum in spiritus animales actione vitali agunt, ut Medici censent; ita uterus in semen & materiam foetus, alterando & fermentando ipsam. Unde actionem suam usque ad productionem animæ foetus continuare poterit; ubi tota alteratio absoluta & ultima dispositio inducta erit. Ita enim ager in distans, ut etiam in venas & arterias umbilicales, quibus foetus ab utero dependet, ac per secundinas omnesque membranas foetum involventes, vitaliter aliquid, usque ad centrum & corpusculum foetus, agat.

Sic in animalium saltem viviparorum generatione, locum non difficilem, opinor, inveniet opinio Scoti, qui conjectat, animam matris esse causam principalem animæ foetus; præter hominem, cujus anima à Deo creari debet.

Sed tamen dum etiam cogito, Aristotelem & S. Thomam nolle feminas activè ad generationem concurrere, sed omnem activitatem à semine masculino esse, avertor nonnihil ab ea sententia.

Nam si ea vera est, omne animal viviparum plus activitati matris quàm patri debet; cum ab illa non tantum dispositiones accidentales, sed formam ipsam & animam accipiat. In partu autem humano, etsi animam mater non creabit,

unionem tamen ejus substantialem cum corpore, principaliter efficiet. Deinde cum vis, aut voluptas ( quod Plinius in Africæ regionibus solemne esse dicit ) animalia diversæ speciei inter se miscet; ut ex equa & asino nascatur mulus, ex canelupoque crocuta, ex homine & bruto Satyrus &c. credisne, animam mediæ illius speciei ab anima matris ( ut animam muli ab anima equæ ) produci? Ego certè nondum credo. Sic enim animam equæ infinitarum animarum diversæ speciei effectricem dicere oporteat; prout aut asinus, aut camelus, aut bos &c. cum equa coire, & semina coagulari contingerit.

Res verò adhuc certior est, quando femina à masculo nobilioris speciei, ut pardalis fortè à leone concipit. Tunc enim anima foetus ( quia aliquid de generositate paternâ etiam accipit ) nobilior est animâ matris. Si autem tunc in istis naturæ adulterijs, materna anima non efficit animam foetus, profectò magnum argumentum est, quòd nec efficiat, quando foetum legitimum ex masculo ejusdem speciei concipit.

Videtur igitur, quòd sicut avis incubans & foru suo semen ovo inclusum ad opus tantum excitat, non animam pulli fabricat; ita animalium viviparorum uterus accidentalibus alterationibus, sopitam quasi seminum virtutem expergisci faciat, & calore influentijque suis adjuvet ad opera quæ vim seminum non superant; animam verò foetus non efficiat.

Sit igitur actio uteri in foetum vitalis, & qualis actio ventriculi in chylum; ejus tamen tantum officium est, suscitare semina utero inclusa, ut in alteratione & conformatione foetus officio suo fungantur. Deinde ut seminum actiones facultatibus utero proprijs incitet ac promoveat, quousque seminum virtus ire potest; id est, citra animæ productionem, quæ perfectior & altior est, quàm ut à seminibus attingi valeat.

Anima tamen ventriculi formam chyli, veluti anima jecoris formam sanguinis, anima cordis formam spiritus vitalis, anima cerebri formam spiritus animalis, ut causa principalis producit; quia omnibus istis formis nobilior est, & quia illæ sunt formæ viales, quibus alimentum ad ultimam concoctionem,



nem, & nutritionem sui corporis præparat, aut quibus idoneum ad operationes suas vitales & animales instrumentum sibi fabricat.

Vterus verò circa foetum nullum simile officium exercet. Nec agit partes causæ principalis, ut ventriculus, jecur, cor, cerebrum, sed causæ tantum ministerialis, respectu virtutis conformatricis quæ latet in semine, & ministerio uteri excitanda est ad suum opus. Nulla autem similis causa in materia chyli, sanguinis, spiritûs vitalis, aut animalis delitescit, quam ventriculus, jecur, cor, cerebrum excitare debeant; sed tota actio qua materiæ tales excoquuntur, ab anima & facultatibus talium viscerum effluit.

Vnde nec sequitur, quodd si anima bovis, in nutritione sui corporis, partem animæ sibi similis producit, etiam animam sui foetûs producere possit. Nam animæ vegetativæ propria actio & officium est, se & corpus suum per incrementa dilatare, ac perficere. Sed ad propagationem suæ speciei aliter operatur. Præparat enim in utroque animalium sexu materiam, imprimendo ei in officinâ testium, admirabilem illam vim conformatricem; ac deinde, ubi semen ad uterum pervenerit, fovendo ipsum & virtutem in ipso latentem excitando, non producendo secuturi foetûs animam: quod Dei potius opus est, ut exemplo plantarum, & omnium animalium quæ terrâ marique extra uterum gigauntur, satis, ut puto, est probatum.

In generatione verò hominis, Deus & animam à materia independentem creat, & insuper materiæ eam unit.

Henricus tamen Gandavensis existimat, eam à Deo præsentem materiæ tantum creari, unionem verò deinde ad materiam ab anima ipsa, quasi per resultantiam effici; quemadmodum in nutritione hominis accidit, cum se anima in materiam alimenti replicat & quasi transilit.

Sed aliam in nutritione, aliam in generatione natura Oeconomiam servat, ut proximè diximus. Deinde si primam fibulam & unionem sui ad corpus suum anima rationalis fabricare potest; igitur homo per animam suam seipsum quasi generat;

nerat; quod negat Aristoteles. Denique anima separata à corpore, nisi Deus hoc impediat, in uterum prægnantis redire, & se in momento ultimæ dispositionis, materiæ reünire, & novo corpore induere naturaliter poterit; ut sit jam secundum animam Pythagoras, qui in bello Troiano Euphorbus fuit. Ex toto præcedenti discursu patet, quàm non de nihilo S. Augustinus & SS. Patres, omnium viventium animationem tribuant Deo. *Quis animat quaque viva nascentia*, interrogat ille, *nisi qui & illum serpentem* (ex virga Moysis) *ad horam, sicut opus fuerat, animavit?* Nec tamen solam seminum animationem, sed etiam conformationem, & totam plasticam Deo ascribunt; licet secundum *seminales rationes*, quas in seminibus ab initio à se conditas invenit, in unoquoque operetur; ut de grano tritici non nascatur faba, vel de faba triticum, vel de pecore homo, vel de homine pecus. Deus quippe est causa principalis, cujus manus ubique, etiam *inter secretas ventris angustias*, ut ait Hieronymus, *semper operatur, ut idem sit corporis creator & anima.* Quia videlicet nulla ratio seminalis, nulla vis conformatrix potest quidquam creare, id est, è nihilo extrahere, nisi adjuvetur ab Omnipotente illa manu. *Multi deformes, multi morbidi, horridi monstrosique nascuntur*, ait Iuliano Augustinus; *nec ideo totam illam substantiam, omnesq. partes eius, & quidquid in ea substantialiter existit & vivit, potuit creare, nisi unus bonus & verus Deus.* Vbi verba ista, & quidquid in ea substantialiter existit & vivit, legentis attentionem paulisper morari debent. Significant enim, fieri non posse, ut minima substantiæ, id est, essentiæ cuiusvis particula creetur, sive de nihilo ad esse transeat, sine immediata Omnipotentis manu. Longè aliter quàm quidam hodie Philosophi, qui docere audent, Causis secundis, divino saltem privilegio communicari posse (quod Durandus factum olim putavit) ut sine concursu causæ primæ agant. Quod gravissimi & in Philosophia & in Theologia erroris ab Augustino & SS. Patribus damnandum non dubito. Si enim actio ignis v. g. à concursu causæ primæ potest absolvi, quidni & ignis etiam ipse: ut tota causarum secundarum catenatio per se jam existat sine dependentia à Creatore?

Nimis

S. Aug. lib. 3  
c. 5. Trin.

Idem lib. 9.  
c. 17. de  
Genes.

S. Hieron.  
ad Pam-  
mach.

Lib. 6. c. 10.  
contra Iul.



Nimis magni æstiment, & nimis magnas faciunt res creatas qui sic philosophantur; cum tamen non tam res, quam rerum tenuissimæ sint umbræ, quæ in actiones suas vix se explicant ac movent; adeo imbecilles sunt & caducæ: ideoque perpetuò potentiori manu tenente & succollante indigent,

Hinc, si bonitas operationis divinæ, inquit Augustinus, subtrahatur formandis promovendisq; seminibus, & vivificandis quibusque viventibus non solum gignenda non aguntur, sed ad nihilum penitus etiam genita rediguntur. S. Aug. lib. 6  
c. 29. contra  
Iul.

Et alibi: Dei occulta potentia cuncta penetrans incontaminabili presentia, facit esse quidquid aliquo modo est, in quantumcumque est: quia nisi faciente illo, non tale, vel tale esset, sed prorsus esse non posset. Lib. 12. c. 25  
Civit.

Et quia Deus destinato consilio ita principaliter concurrit cum causis secundis, ut earum etiam velit effectus & defectus (nisi malitia moralis admisceatur) ideo S. Augustinus phrasin Philosophorum improbat, qui monstra errores naturæ solent appellare.

Ex opificis tanti manibus, inquit, tam multa non solum vitiosa, verum etiam monstrosa procedunt, ut naturæ à nonnullis appellentur errores. Qui cum operantem vim divinam, & quid cur faciat, indagare non possint, fateri eos pudet nescire quod nesciunt. Nam licet natura instrumentalis & vis seminum impedita, errare & delirare à recto dici possit in formatione monstri; natura tamen principalis, quæ Deus est, non errat, sed facit, & vult facere quod facit, ob finem plerumque ignotum hominibus. Vnde aliter longè cum virtute seminum errante, & cum voluntate peccante concurrit. Nunquam enim diceret Augustinus, Deum facere, aut ex manibus Dei procedere opus malæ voluntatis; sicut de monstris jam statim dixit. Permittit enim solum non vult errores voluntatis; vult, non solum permittit, errores conformatricis. Idem lib. 5  
c. 15. contra  
Iul.

Vnde Philosophia quorundam, qui concursus causæ primæ comparant vento, quo eodem quis rectà, vel obliquè navigare potest; aut spiritui organorum, quo Organistes ad harmonicos, aut discordes sonos uti possit; non est, sine dubio Augustiniana, nec altissimum illum divinæ operationis &

providentiæ modum attingit, quo se Dei voluntas & actio in omnes effectus creatos, usque ad ultimas radices, profundissimè insinuat & inserit: licet nec malum velit, nec libertatem agendi causarum liberarum evertat.

## ARTICVLVS XIX.

*Vnde difficultas & dolor humani partûs.*

**P**ostquam humanus foetus novem circiter à prima conceptione mensium spatio, *in obscuris & humentibus locis vitam sine respiratione duxit*, δ' ἐν τοῖς ὑποῖς ἐμπερὸν *pueros, more piscium, humidis innatans*, ut ait S. Basilus; angustiarum tandem uteri pertæsus, & respirationis, pleniorisque alimenti appetens, calcitrare incipit, & disruptis secundinis ac membranis quibus involvebatur, adjuvante uteri impulsu & matris nixu, maximo miraculo in lucem egreditur. Miraculum dico, quia Medici sic appellant; qui postquam divinam sapientiam in conformatione, & nutritione ejus in utero admirando se defatigaverunt; ubi ad partum ventum est, planè obstupescunt. Nesciunt enim, quâ viâ per tam arctas colli uteri fauces, per tam angustum inter ossa coxendicum iter, puer tam crassulus, sine fractione, sine magnitudinis penetratione, possit transire & erumpere in lucem.

S. Basil. in  
psal. 14.

Avic. lib. 3.  
sec. 21.

Andr. Lau-  
rent. lib. 8.  
c. 33. Anat.

Fernel.  
lib. 7. c. 11.  
Physiol.

Sed audiamus illos. *Cum separatur fœtus*, inquit Avicenna, *aperitur uterus apertione tali, cuius similem efficere non valet in alia bora. Et necessarium est, ut separentur quadam iunctura, & sustententur adiutorio Dei excelsi, preparante vel disponente ad illud, deinde reducete eas ad continuationem naturalem.* Et Abenzoar ait, *haud facile quidquam aliud in rerum natura magis mirandum.* Et recentior alius, *admiranda quidem sunt, inquit, natura in embryonis formatione, vitâ, & nutritione opera; sed extremus eiusdem in fœtus exclusione conatus omnem admirationis captum excedit.* Et de Galeni admiratione Fernelius: *Quo pacto*, ait, *os uteri tantopere dehiscat, ut per id fœtus elabatur, nescit Galenus, nec aliud quàm admirari potest. Sed*



test. Sed loquere ipse tu Galene nobis.

Quod os matricis, inquit, quo tempore femina in utero gerit, adeo Galen.  
lib. 15. de  
usu part. constrictum sit, ut ne specilli quidem cuspidem in matricis collum immittere queas; cum autem tempus pariendi appetit (scilicet cum fœtus iam ita perfectus est, ut per os nutriri possit) adeo aperiatur & dilatetur, ut integrum animal reddat; quoniam pacto id accadat, mirari quidem possumus, intelligere non item.

Sed altera æqualis, aut major admiratio; quomodo ossibus matris puer circumseptus, inter ossis sacri & ossium ilium ac pubis angustias, in lucem sine rupturâ elabi possit.

Arabes cum Hippocrate putant ossa pubis aut coxendices parientibus oportere divelli; quod & experimentis Sever. Pineus, & Ambros. Paræus probare conantur.

Per uteri dehiscientis osculum, inquit Paræus, dum fœtus aërem persequitur, in caput pronus fertur, sicque nascitur & natura ordine in lucem prodit; magno tum suo, propter corpusculi molliem, tum matris, propter cervicis uteri nervosa, & ossium ilium ab osse sacro, quâ via fœtui pateat, divulsionem, dolore. Alioqui nisi eiusmodi ossa divellentur, qui non modo gemelli duo mutuo complexu sibi cohærentes, sed vel unicus fœtus tam angusto colli uteri ductu prodire & emergere posset?

Et addit. Id ita esse non ratio modo, sed & experientia verum persuadet. Puerperas enim statim à partu dissecui, in quibus animadverti ossa ilium ab osse sacro, digiti intervallo distracta. Quin etiam plerisque parientibus, quæ me auxilij gratiâ in tam difficili conatu advocabant, subiectâ coccygi manu, certò & auribus hausi, & contactu percepi crepitantium, vi divulsionis, ossium strepitum. Sed & narraverunt mihi honestissima matrona multa, se aliquot ante partum diebus, eorum iam se distrahentium fragorem cum dolore percepisse. Multis etiam post partum diebus, coccygis regio ossisque sacri (quam renum regionem nominant) sic plerisque dolet, ut naturâ solutam ossium ilium continuationem reparare haud valente, in reliquum vita claudicent.

De osse verò pubis idem Auctor alibi: Ossa pubis parturientibus aperiiri dicuntur. Quanquam mihi ea de re nondum constare potuerit. Lib. 5. c. 34.

Attramen Vesalius, Fernelius, Laurentius, alijque eam aut

Andr. Lau-  
rent. lib. 8.  
c. 39. Anat.

ossis ilium, aut ossis pubis divulsionē fieri posse fortiter negant. *Ut ingenuè dicam quod sentio*, ait Laurentius adversus Pineum, *ilium & pubis ossa in partu dearticulāri posse non puto: ita enim uniuntur, ut nullo impetu divelli possint. Quod si divulsionem semel passa fuerint, quo medio copulabuntur? Quo glutino unientur? Nova enim synchondrosis fieri non potest.*

Dat tamen opinioni adversæ nonnihil: *Si aliquantulum*, inquit, *dehiscere velis, cum Hippocrate, non repugnabo.* Et sanè, quomodo tam tenellum, totum carneum, & quasi exosse infantis corpusculum durissima illa & arctissimè devincta matris ossa, suo transitu valeat discludere?

Vesal.  
lib. 1. c. 29.

Placet igitur hīc nostri Vesalij sententia, qui per discrimen aliquod, quo natura feminas paulò aliter quàm viros circa regionem illam conformavit, quæstionem istam expedit. Nam *mulieres, ait, in hoc ossium coalitū peculiare sibi vindicant, quod in ipsis non tam longā lineā quàm in viris committuntur. Deinde coxendicis ossium infima partes, dextram dico & sinistram, in mulieribus mutuò longè magis distant, quàm viris. Præterea infima pubis ossium partes invicem sub ipsorum connexu dirempta, multo etiam mulieribus quàm viris sejunguntur & distant. Adèò ut in mulierum ossibus vacua sedes inter coccygis os & internas regiones infimarum partium coxendicis ossium, multo amplior quàm in viris occurrat. Hæc, differentia est tam insignis, ut vel ipsa abundè doceat, pubis ossa in partu non recludi.*

Andr. Lau-  
rent.

Sed & hoc facilitatem transitus adjuvat, quod expertissimi Medicorum censent, *Ossis sacri extremum cartilagineum (coccygem vocant) totum retrahi, & fœtui impetu exeunti ita cedere, ut spatium amplius relinquatur. Vnde gravida in ipso partu, de coccygis & ossis sacri frequētius, quàm de ossis pubis dolore conqueri observatur.* Deinde cranium puelli adhuc molle & velut papyraceum est, ut experientia & Aristoteles testantur. Hinc fit, ut angustiarum compressioni nonnihil cedat; reliquumque deinde corpus cereum & flexile, facile sequatur quod caput præcessit. Naturali enim partu infans ἐπὶ κεφαλῇ, in caput prodit, ut Aristoteles post Hippocratem dicit. Cum enim totum pueri corpus ab umbilico tanquam staterâ, ut ait Hippocrates, ex fornice uteri matris dependeat, & partes superiores graviores sint inferioribus, soluto

Arist. lib. 7.  
c. 10. Histot.  
Animal.



soluto umbilico, caput deorsum cadit, & per uteri cervicem exit. Vnde, *In pedes procedere nascentem, contra naturam est*, inquit Plinius. *Quo argumento eos appellavere Agrippas, ut agrè partos.* Plin. lib. 7. *Qualiter M. Agrippam ( Augusti Cæsaris generum ) ferunt genitum.* c. 8. *Neronem quoque ( illius M. Agrippæ pronepotem ) pedibus genitum, parens eius scribit Agrippina. Ritu natura, capite hominem gigni mos est, pedibus efferri, ad rogam, aut sepulchrum: quia mors vitæ nascenti est contraria. Difficillimus autem agerimusq; Agripparum partus habetur, quia brachijs plerumque diductis retineri solent, agriusque tunc mulieres enituntur, ait ex M. Varro-* Agell. lib. 16. *ne Agellius.* c. 16.

Res igitur tandem eò tota redit, ut dicamus puerum capite prono per uteri cervicem sibi aperire viam; quia cervix illa, sicut uterus totus, ex nervis talibus contexta est, qui & contrahi arctissime, & latissime diduci possunt. Sic retia colligi & expandi, sic vesicam in arctum corrugari, aut tumidissime inflari videmus.

Nec ossa etiam quibus uterus circumvallatur, ita sepiunt vias, ut nullus detur puero exitus. Laxitas enim inter ossa feminarum amplior est, ut ex Vesalio audivimus, & extremitas ossis sacri, quæ vocatur coccyx, cartilaginea facta est, ut reflecti ac retrocedere, & foetui exitum molienti, viam nonnihil laxare posset.

Quod verò Hippocrates, Avicenna, Paræus, Pineus de divulsione ossium pubis, aut ilium ab osse sacro narrant, verum habere potuit in difficillimis & enixissimis partibus; quia mater fortasse nimis arcta, aut foetus nimis benè habitus, aut grandiusculus erat.

Nam aliàs contrà, viæ pariendi quibusdam sunt tam laxæ, ut ferè sine dolore & sensu, partus ipsius excidant. *Gravidis Brasiliensis*, narrat Maffæus, *haud ita multus in partu dolor. A puerperio facto puerpera confestim exsurgit, ac domestica obit impigrè ministeria. Ejus loco ( quod vix credat quisquam ) in aliquot dies, velut eger decumbit maritus. Hic officij causâ ab amicis & propinquis invisitur, huic sorbitiuncula dantur ad resovendas vires, huic de gentis more, bellaria & delicata munuscula deferuntur.* Maff. lib. 2. *Similem puerperij Comœdiam* Hiflor. *narrant* Indic.

narrant de Tabarenis Asiæ minoris populis.

Alex. ab  
Alex. lib. 2.  
c. 25.

Alij etiam Thracum, Scytharum, Cantabrarum, Celtiberarum facillima puerperia. *In Liguria quoque & Illyrico*, ait Alexander, *mulieres tam patientes laborum sunt, ut post puerperium minimè decumbant: pragnantesq; inter opus enixos pueros domum re-ferre tradunt; quos non peperisse, sed invenisse credas.* Certè ego quoque novi in Belgio nostro quandam rusticulam, quæ gemellos publicè & obiter in plateâ enixa, cum ipsis recurrens domum, cum rivulum quendam ante fores suas nudis pedibus fortè transuadaret, tertium etiam effudit; quem supparo & sinu eodem exceptum, cum duobus alijs fraterculis domum retulit.

## ARTICVLVS XX.

*An in statu innocentiae feminarum partus sine dolore esse potuerit.*

Gen. 3.

**Q**Væ jam de dolore partûs differui, nimis explicata & curiosa pro Theologo quispiam existimabit. Sed datâ operâ id à mē factum, ut facilius quibusdam Medicis & Philosophis S. Augustini & Ecclesiæ doctrinam persuaderem, quæ dolores partûs inter poenas peccati originalis ponit. Evæ enim post peccatum dictum est, *In dolore paries filios.* Sed quî fieri potuisset, ut ante peccatum sine dolore parerent? Certè enim feminarum viscera eodem modo, atque nunc post lapsum fuissent conformata, & infantes æquè crassuli, per easdem angustias in lucem erepsissent.

S. August.  
lib. 14. c. 26.  
Civit.

S. Augustinus, approbante S. Thomâ, uno verbo modum indicat; quia *ad pariendum non doloris gemitus, inquit, sed maturitatis impulsus feminea viscera relaxasset.* Si enim inter has naturæ lapsæ ærumnas, quædam feminae tam faciles habent partus, ut novissimè narrabamus; facile intelligi potest, quomodo specialis illa circa creaturam rationalem innocentem Dei providentia procurare valuerit, ut laxatis sensim, ope Angelicâ aut Divinâ, maternis visceribus, maturi partus levi impulsu, &



fu, & sponte quodammodo exciderent. Nulla quippe femina tunc arcta, nullus in tota corporis humani conformatione naturæ error accidisset. Nulli quoque Agrippæ, aut perversi partus, sed omnes capite antè & naturalissimo modo in lucem emerfissent. Si verò coccyx nonnihil reflecti, si ilium os ab ossè sacro, si ossa pubis à se invicem disjungi, aut paulisper dehiscere oportuisset; humores, & si quæ aliæ causæ nervorum & vinculorum emollientes adhiberi poterant, ut tam molliter fieret, quàm ad vitandum dolorem puerperij necesse esset. Vnde *nunc maturitas pariendi*, inquit Lud. Vives, *extendit atque aperit ossa pectinis* (pubis credo dicere voluit) *quæ alio tempore vix disjungeret securis validè impacta; sed nunc cum ingenti cruciatu, tunc sine dolore.* Quanquam quod de apertione ossium pectinis ait, Artic. proximo, cum doctioribus Medicis rejecerimus.

Vives in  
S. Aug. lib.  
Civit.

Iuvant quoque hanc doctrinam brutorum non adeò difficiles partus; quamvis quadrupedia simili ferè modo, ac feminae nostræ circa uteri angustias, conformata sint.

Gallinæ quoque sat grandia ova, dehiscente sine dolore utero, pariunt. Nec enim enitendo, clamore aut alio signo ullum doloris sensum ostendunt. *Ova tamen nasci mollia verissime est*, ait Cardanus, *aliter laderent aves.* Sed refellunt eum nostræ ancillæ, quæ ova gallinarum partui proxima, in utero jam indurata manu se palpare fatentur.

Card. lib. 7.  
c. 39. Variar.

Si denique Luna plena, fundendo humores & vias lubricando, partus lubricos & faciles reddit, ideoque olim à Romanis puerperis sub nomine Iunonis Lucinæ invocata fuit; quanto magis eadem, & majora adjumenta, Angelorum aut Dei sapiens providentia, Paradisi puerperis præstare valuit? Neque hoc violentum, sed felici statui debitum quodammodo fuisset; veluti etiam arcere feras bestias, ne homini necem, vulnera, dolorem inferrent, ejusdem providentiæ opus erat. Tam certus autem hujus sententiæ ac veritatis fuit S. Augustinus, ut alicubi fidenter dicat: *Non resistit his verbis divini Libri, quæ posui de labore hominis, & parturitione mulieris, nisi qui prorsus alienus à fide Catholica, eisdem litteris adversatur.* Sed quia experientiâ

Gen. 3.  
S. Aug. lib. 2.  
c. 33. de pecc. merit.

experientiâ probari non potest, inquit alibi, homines quidam ad ejus rei fidem duri sunt. Si tamen in omnibus experimentum, aut humanam rationem postulamus, nulla, aut paucissima fidei mysteria credemus.

Boned.  
Pere. lib. 4.  
q. 4. ha  
Gen.  
S Aug. lib.  
14. c. 26.  
Civ. l.

Addit tamen quippiam Augustinus, quod pauci credunt, & admirationem habet majorem, quàm fidem, ait Pererius. Nempe, in statu innocentie potuisse utero coniugis salvâ integritate feminei genitalis, virile semen immitti; sicut nunc potest eâdem integritate salvâ ex utero virginis fluxus menstrui cruoris emitti. Eâdem quippe viâ posset illud injici, quâ hoc potest eyci. Vnde Pererius, Augustino equidem, inquit, non assentior; sed puto signaculum virginalis integritatis etiam tunc per actum generationis apertum iri. Apertio quippe ista naturalis est, quæ etiam in ceteris animalibus observatur.

Cap. 35. de  
pecc. orig.

Lib. 14.  
c. 26. Civit.

In 2. d. 20.  
a. 2. ad 1.

Sed nescio, an Pererius satis perceperit Augustini mentem. Non negat enim Augustinus relaxanda viscera virginum in congressu maritali; sicut eadem relaxanda dixit in partu, sine corruptione integritatis ullius membri ac doloris sensu. Explicat enim se alibi. Eodem modo, inquit, non esset dolor & cruor virginis concumbentis, quo modo non esset etiam matris gemitus parientis. Cruentam igitur virginis læsionem & violentam ac doloriferam claustrum virginalis divulsionem tantum negat, non aperturam, quæ fieret sine ardoris illecebroso stimulo, cum tranquillitate animi & corporis nulla corruptione integritatis, cum maritus infunderetur gremio uxoris.

Vnde S. Thomas, 1. p. q. 98. a. 2. ad 4. doctrinam illam Augustini, de incorruptione virginalis integritatis probat; cum tamen apertè alibi dicat, in primo innocentie statu, soluta fuisset integritas carnis, cui preponderasset fecunditas prolis.

Solutum ergo, non fractum fuisset claustrum virginitatis, quidquid illud sit. Nec similitudo sanguinis menstrui, quam adhibet Augustinus, undique par & æqualis esse debet; quasi verò non laxiore aperturâ in virili congressu, quàm in fluxu menstrui cruoris, opus esset. Sed in hoc solum stat & consentit comparatio: quòd sicut sine fractura dolorifera claustro cruor ille effunditur; ita sine eâdem virile semen infunderetur.



deretur. Quod facillimè comprehendi potest, si attentè legantur, quæ de hymene, sive clauſtro & ſignaculo virginittis differunt Medicorum Expertiſſimi. Negant enim jam plerique omnes membranam aliquam talem, ad uteri collum tranſverſam, in virgine rumpi, ut veteres fabulati ſunt; ſed anguſtias tantùm oportere diduci. Quod quomodo in ſtatu innocentiae, ſine dolore, aut nullo fortasſe ſanguinis virginalis efflu-  
 xu, divinâ, aut Angelicâ manu fieri potuerit, quis tam hebes, ut non valeat intelligere? Veluti enim divina providentia Angelos ferarum beſtiarum frenatores, & adverſus tot alia pericula tutelares diſpoſuiſſet; ita aliquos tanquam *Hymenæos*, aut *Virginenſes*, ut S. Auguſtinus appellat, primæ maritali conjunctioni fortè appoſuiſſet. Nam *Partulas* & *Lucinas* (addo ego *Hymenæos*) nos officia divina, *Angelos credimus*, ait Tertull.

S. Auguſt.  
 lib. 6. c. 9.  
 Civit.

Sed ne fallere videar, Medicos Anatomicos de hymene iſto potiùs audiamus. *Putant ferè omnes Medici*, ait Laurentius, *membranam reperiri, nunc in medio ferè cervicis ductu, nunc immediatè poſt ὀφθαλμῶν, eamq; tranſverſim ſitam, quam hymenem, aut hymenæum vocant. Eam exiguo foramine in medio perviam, alij cribri inſtar perforatam, ut fluentibus menſtruis pateat aditus, exiſtimant: Diſrumpi autem & lacerari primo concubitu; proptereaq; interſeptum virginale, clauſtrum virginale, cuſtodiam virginittis dicunt.*

Tertull. lib.  
 de anima  
 c. 37.  
 Andr. Laurent.  
 lib. 7.  
 c. ult. Anat.

Ipſe verò diligenti obſervatione, in plurimis omnis ætatis virginibus negat ſe tale quid inveniſſe. *Figmenta ergo ſunt*, inquit, *quæ de tranſverſa illa membrana & perforata ſcripſerunt multi. Nam cum natura nihil fruſtrâ moliatur, quis foret illius uſus? Addit deinde, quodd ſi talis interdum adnaſcatur (qualem multi ſe vidiffè teſtantur) fuiſſe præter natura inſtitutum, & organicum morbum ex vitioſa conformatione.*

Et Paræus. *Quibuſdam virginibus*, ait, *in cervicis uteri orificio membrana reperitur, hymen veteribus dicta, quæ quia viri congreſſum arcet, ſterilitatis cauſam mulieri infert. Hanc plerique, non vulgares modò, ſed & docti Medici virginibus omnibus, tanquam virginittis clauſtrum, ineſſe dicunt. Sed illam ego, cum in pleriſque virgunculis omnis ferè ætatis, à trimatu ad duodecimum uſque annum, quarum mihi ex Noſocomio Parienſi plena copia erat, ſtudioſè exquirerem,*

Ambroſ.  
 Paræ. lib.  
 23. c. 42.

*non potui reperire.* Addit tamen se semel tantum, in virgine septemdecim annorum, *membranam eiusmodi nervosam, tenuissimam, medio sed exiguo foramine perviam, qua menses disfluere possent,* reperisse. Verum, hoc rarum, & errorem organicum virtutis conformatricis fuisse, cum Laurentio, Columbo, & plurimis hodie Medicorum censet. Est igitur hymen in quibusdam virginibus, quod *membrana ligamentalis*, sive filum lingue subnascens, in quibusdam pueris balbutientibus; id est, naturæ error.

Vnde cum in statu innocentiae nulli ejusmodi organici morbi, & conformatricis errores in corpore humano accidissent; nulla quoque unquam excrescentia hymenis, virginalis uteri aditum sepivisset, quæ in primo congressu rumpenda esset.

Si autem Vesalio, Viero, Fallopio, ac alijs daremus, in omnibus virginibus talem hymenem à naturâ non errante, ad ornamentum quoddam, aut virginitatis tutelâ, conformari; negaret tamen fortè S. Augustinus membranam istam, per congressum in statu innocentiae rumpendam fuisse: quia non effreni libidinis impetu, sed tranquillæ voluntatis imperio fieret tantum id quod necessarium foret; ut attrahente partim utero, partim infundente marito, genitale semen per hymenis foramen quo excidunt menses, ad cavitatem uteri perveniret. Attamen in partu nihilominus hymen diffringendus erat, quando proles per uteri cervicem in lucem exit. Solius enim Matris Domini privilegium est, ut sine dilatatione, sine obstantium laceratione, divinus ejus partus transierit.

PROBLE.



## PROBLEMAT A

De

*Alimento, accremento, decremento humani corporis.*

**P**roblemata quædam, tanquam præcedentium Capitulorum Analeceta hîc subijcere, nec injucundum, nec inutile fortassis erit.

I.

Quid dicere voluit Cajetanus, quando Augustæ Vindelicorum, de Luthero è colloquio recedente, ad adstantes conversus dixit: *Iste homo ovis recentibus indiget?*

An fortè ova recentia stultitiæ & intemperiei cerebri mæderi existimavit? Nam ex talibus ovis in testâ suâ leviter & ad tremorem solum decoctis, ruberrimus & saluberrimus gignitur sanguis, qui atræ bilis & insanix minimum admixtum habet.

II.

An probabile, quod ait S. Thomas: Verum aurum habere virtutem lætificandi cor, quâ *aurum*, inquit, *per Alchymiam philosophicatum* caret? An ergo aurum, tam indomitum ignibus metallum; à calore tamen naturali in substantiâ viventis, & in spiritus vitales cor hilarantes converti potest? An potius, quia influentiâ quadam salutari spiritus vitales cordis afflat? Contra enim deliquia cordis, & cardiacos affectus, annulos aureos digitis solitos inferi, post Agellium asserit Lemnius. Quid etiam aliud voluit Scaliger, dum ait, Auri scobem ideo interdû præscribi à Medicis, *ut eius splendore reficiantur spiritus*? Hac, credo, quoque imaginatione Illustrissimus Concilij Sanctioris, sub Serenissimo Principe Alberto, nuper Præses Io. Richardotus, tempore prandij ac coenæ, nummorum aureorum cumulum sub aspectû suum apponi jubebat, ut Clar. Academiæ nostræ Archiatrum Thomam Fienum sæpè narrantem audivimus.

S. Tho. 22.

q. 77. a. 2.

ad 1.

Lem. lib. 3

c. 6. occult.

LII 2

III. Nugan-

## III.

Nuganturne, an serid dicunt Scaliger & Riolanus, *Laniones consulere ovibus, dum eas quotidie in usus nostros iugulant?* Quidni autem serid? Nam res creatæ perfectionem suam assequuntur, dum ad finem cui conditæ sunt, perducuntur. Oves autem & boves ac pecora campi in alimentum hominis creata sunt.

Thauler.  
ser. 1. in  
Vigil. Pasc.

Non ergo omnino insipienter Ecclesiastes quidam clamabat nuper: *Si perdices loqui possent, à filijs Dei se comedi velle, dicerent; imò ultrò & certatim in prædestinatorum culinas devolarent.* Ut nempe in substantiam talium corporum conversæ, impassibilitate, claritate, ceterisque gloriosi corporis dotibus æternum in cælis fruerentur. Cui menti sublimis Contemplator Io. Thaulerus accedit: *Non possunt creatura, ait, nobiliori modo in suam originem redire, quàm in corpore sancto, cui in cibum uniuntur.*

## IV.

Deir. lib. 2.  
se 3. Magic.

Quare Medici, aut dæmon non possint vitam nostram in æternū, aut in ætatem primorū hominum ante diluvium producere? Dæmonem enim id posse affirmat Mart. Delrius, sed à Dei providentiā inhiberi. Nonne enim Medea suis veneficijs Æsonē in juventutē recoxit? Artem quoque illum prorogandæ in perpetuum vitæ, se calluisse Paracelsus & Campanella nuper jactaverunt. Et multi fortè credidissent, nisi ambo nondum senes extincti essent. An ergo fortè novæ siderum constellationes dæmonum & Medicorum artes eludunt? Hoc enim credit Franc. Victoria. *Deus providentiā suā ita disposuit, inquit, ut primis illis temporibus essent constellationes caelestes salubriores & efficaciores ad vitam hominis propagandam, & ut alimenta essent majoris vigoris, & etiam medicina, & aër, & aqua, & alia quæ conservant vitam mortalium.*

Victor. Re-  
lect. de  
Magia.

Attamen, nonne cælum & sidera hodie eadem quæ tempore Mathusalam? Nonne constellationes & cœtus Planetarum Fixarumque salutare, periodis suis redeunt? Nonne aër, aqua, terra, maria, venti, montes, valles, sine insigni, quæ hîc

a stimari



æstimari possit, mutatione eadem sunt?

Cur deinde arbor vitæ dæmonis arte resuscitari non valeat? Sed unde tamen illius arboris semen, aut surculum haberet? Fortassis igitur nullum in causis naturalibus remedium invenit dæmon, quo humidi radicalis fluxum & consumptionem retineat. Nam primum & sincerissimum humidum fit ex parentum semine, in eum finem à natura elaboratissimo. Quod verò deinde ex alimentis & sanguine accedit, impurius est. Augeturque in dies impuritas, dum sanguis in humidum illud fatiscens, qualitatibus suis ipsum perpetuò inquinat. Hinc ergo calor naturalis pluribus inquinamentis & fuliginibus involutus, ut impuro oleo pasta lampas, malignius ardet, ac tandem suffocatur, aut expirat.

Potest igitur dæmon ad 200. aut 300. annos vitam hominis bene nati & temperati fortassis extendere, in æternum non potest. Sed tamen nec illud permittit Deus; sicut nec ut Magos & Veneficas sibi devotas, tot thesauris sub terra marique jacentibus ditare valeat. Quis enim filiorum hujus seculi diabolo servire non velit, si 200. 300. annorum vitam ab eo impetrare possit?

Olim verò ante terram diluvio corruptam, plantæ earumque fructus, animalia quoque ipsa pasta, succi melioris erant, & humani corporis radicale humidum sincerius & diutius reparabant.

## V.

Nonne qui cibo ac potu ultra naturæ vires abstinent, seipsos directè interficiunt?

Sanè Cajetanus & Covarruvias id affirmant. Vnde negant eum qui inedia à Iudice mori iussus, posse respuere cibum, si ei clanculò offeratur. *Nam nolle uti alimento, ait Cajetanus, est occidere seipsum, non minus, quam gladio se transverberare.* Et hoc magis explicans Covarruvias: *Vititur enim, ait, actu ad mortem immediato, & ex natura sua ad eam directo ac ordinato.*

Cajet. 2.2.  
q. 69. a. 4.

Covar. lib. I  
c. 2. Var.

Contentiunt illi, qui Carthusianum homicidam sui futurum aiunt, si carnes oblatas non edat, ubi nulli alij cibi suppetunt. Nonne tamen Victoria, Sotus, & alij magis ingeniosè philosophantur,

sophantur, qui dicunt, tales magis pati, quàm sibi inferre necem.

Non enim oportet in ediam gladio, quo quis sibi transadigit costas, comparare; sed cum patiëntiâ, qua quis se ab altero sinit transfigi. Calor quippe naturalis & agentia alia, humidum radicale siccantia, propriè hominem interimunt. Alimenta verò tanquam vallum & mœnia hostibus obijciuntur, ad supplementum stragis, quam continuâ diu noctuque oppugnatione agentia illa faciunt.

Alimentis igitur abstinere, nihil est aliud, quàm labentia mœnia non reparare, & sinere se ab hoste interfici.

## VI.

Cor. Cels.  
lib. I. c. 4.

Quid sibi vult Cor. Celsus, dum studiosos quibus caput imbecillum, vetat *scribere, legere, voce contendere, utique post cœnam: post quam*, ait, *nec cogitatio quidem ijs satis tuta est*. Vultne igitur nos, ut stipites, aut statuas mutas, sine sensu & cogitatione à cœna permanere? Si enim loquimur, aut sensibus utimur, oportet etiam cogitationem aliquam miscere.

An solùm anxiam, aut intentam statim à cœna vel prandio cogitationem intutam esse valetudini, voluit dicere? Quales præcipuè quæ de figuris mathematicis, aut illis disciplinis sunt, quæ imaginationis operâ plurimùm utuntur.

Experimento enim constat, intentâ imaginatione cerebrum (quasi spiritus qui in cellulis ejus sunt non ei sufficiant) alios è ventriculo, ad quem via latissima patet, confertim attrahere. Suis verò orbatus spiritibus, & calore qui cum ijs avehitur, ventriculus frigidius concoquit. Deinde vis motiva, qua se ipsum ventriculus restringit, & constringit chylum, per imaginationis intentionem relaxatur; ut patientiore jam viâ calorifici spiritus avolent, & ventriculi parietes à chyli compressione revulsi, laxiùs & languidiùs in ipsum agant.

S. Thomas verò non credit actionem caloris ventriculi, per cogitationes mentis aut phantasiæ, quadam naturali immediatâ sympathiâ directè impediri; quia calor ille & anima ventriculi cum ipso, ut agentia merè naturalia operantur.

## VII. An



## VII.

An credibile, quod narrat Plinius, *Antoniam Drusi nunquam expuisse?* Plin. lib. 7. c. 19.

Simile quid de Constantio Cæsare, & successore ejus Iuliano Apostatâ alij referunt.

Marcellin.

An quia quorundam cerebrum, ut cælum Ægyptium, sine imbribus & destillationibus est? Habent enim

*Quidam corpora sicciora cornu,  
A quæis sudor abest, abest saliva,  
Mucusque, & mala pituita nasci.*

Catull.

An potiùs, quia cerebri sentinam non per os aut nares foras, sed per œsophagum in intestina exonerabant?

Sic enim celebris nuper apud nos Medicus Thomas Fienus, nunquam solitus expuere: non quia sputorum materia ei deesset, ut fatebatur, sed quia datâ operâ glutiebat, & derivabat in ventriculum.

Sputorum verò istam continentiam omnibus ipse suadebat; tum quia civilior & honestior sputandi consuetudine; tum quia plurimum facere credebat ad eam, quam in se experiebatur, perpetuam alvi facilitatem. Quæ studiosis cumprimis necessaria, & ijs quibus jugis enubilatæ mentis serenitas est curæ. Scio tamen, quibus minimè probabile erit istam rheumatum cloacam in ventriculum, & culinam ubi coquuntur cibi, deducere.

Sed tamen ne vereantur isti. Nam nihil, aut minimum est, quod ex crudis illis cerebri mucis & destillationibus attrahunt venę mesenterij, totumque in inferiorem alvum & foricas emititur.

## VIII.

Cur inter militares Romauorum olim poenas fuit missio sanguinis, qua Duces jubebant, *ignominia causâ*, ait Agellius, *militi venam solvi, & sanguinem mitti?* Agell. lib. 10. c. 81.

Rationem verò huius poenæ in veteribus memorijs se reperisse negat Agellius.

An ergo, quia sani non sunt, & missione sanguinis indigent, quicumque delinquant, ut ipse Agellius meditatur?

An

An potius, ut sanguinem, quem cum gloria, pro patria fundere milites noluerant, cum ignominia amitterent, quod M. Ant. Mureto placet?

Quod tamen Lipsio nostro displicet; quia pro furto, ait, etiam militi sanguis mittebatur.

An igitur, quia miles extrema & mortem commeritus (quam cum clementia remisisset, speciem tamen eius usurpabat in paulo sanguine fundendo) ut Lipsio magis visum?

Sed quid dicimus, ubi non tantum extrema meritis, sed alijs etiam non tam magna peccantibus, ignominia ista infligebatur?

An ergo denique, significare voluerunt, militem degenerem, sanguine (in quo vigor & generositas corporis ac animi) indignum esse? Simili enim ferè de causa, inter militum ignavorum animadversiones, *hordeum pro frumento datum legimus*; quasi jumentis, nec communi hominum cibo dignis. Suetonius de Augusto: *Cohortes si qua cessissent loco, decimatas hordeo pavit.*

IX.

Quid sibi vult Poëta Theocritus, cum Helenam feminarum formosissimam, & decennali Ilij obsidione dignam, sic depingit?

Theoc.  
Idyll. 18.

*Pinguis, procera, sicut procurrit sulcus in agro,  
Aut in horto cupressus, aut in curru Thessalus equus.*

An veteres habitum corporis pinguem & opimum, proceritatem uniformem & arduam, in feminarum pulchritudine præferebant?

Sulcus enim in agro, aut cupressi truncus in horto, uniformi longitudine tenditur, Thessalus & generosus equus arduo capite graditur. Talem etiam ferè Penelopen Homerus, & Dianam ipse, ac Virgilius delineat.

Virg.

*Illæ pharetram*

*Fert humero, gradiensq; Deas supereminet omnes.*

Cant. 7.

Sic sacer Canticorum sponsus arboream proceritatem in sponsa sua laudat: *Statura tua assimilata est palma.* Et ut uniformi gracilitate erectam describeret, *Virgulam fumi, ex aromatibus myrrha, & thuris, & universi pulveris pigmentarij, per desertum ascendentem facit.*

Cant. 3.

Igitur



Igitur non macrae & lignae, non breves, non mammosae aut ventrosae, non incurvicervicae, formosae olim habebantur. Ut non de nihilo antiquus Laberij de uxore deligenda versus:

*Non mammosa, non annosa, non bibosa, non procax.*

Laber. in  
Mimo.

## X.

Nonne temerarius Contemplator Io. Thaulerus, cum neminem, ante annum ætatis quadragesimum verè spiritua-lem & caelestem effici posse, tam audacter dixit?

*Faciat homo, ait, quidquid potest, omnem impendat operam, non ta-* I. Thauler,  
men ad veram pacem pertinet, nec verè essentialiter caelestis homo ser. 2. de  
efficietur, donec annum ætatis quadragesimum impleverit. Ascens.  
Dom.

Nonne enim multae animae Sanctae, ante annum ætatis quadragesimum morte interceptae hinc emigraverunt?

Fortè tamen illud Thauleri paradoxum hanc non improbabilem rationem habet: Quod ætas infra quadragesimum annum nimio adhuc calore mobilis, versatilis, & inquieta, turbulentis affectibus & imaginationibus pacem & tranquillitatem illam conturber, quam anima verè spiritualis & Deo unita habere debet. *Omnia nimis agunt juvenes.* Et ut aqua ventis agitata, ima-  
ginem solis; sic illi activitate suâ radios divinæ lucis confun- Aristot.  
dunt, ne caelestis imago in anima conformari ac imprimi va-  
leat.

Homo igitur instar arboris est, cujus fructus, id est cogita-  
tiones & affectus, vere & ætate nimis crudi & virides; ætatis  
verò autumno, qui anno quadragesimo incipere solet, matu-  
rantur. Ab hoc enim circiter anno calor humani corporis no-  
tabiliter refrigerare, declinatio in senectutem sentiri, pru-  
dentia tam civilis quàm Oeconomica augeri; & inde parsimo-  
nia, ac cura rei familiaris attentior esse incipit. Hinc admira-  
bile illud Galeni pronunciatum: *Qui in adolescentia assueverunt* Galen. lib.  
*pecuniam amare, fieri non potest, ut cum ad annum quadragesimum de curand.  
pervenerint, seipsos corrigant.* Avara enim ista ultra quadragesi- affect.  
mum annum ætas avaritiam juventutis insuper excipiens, ha-  
bitum in pravum ita indurat, ut fiat incorrigibilis.

Quidam tamen in juventute, citra autumnum suum præ-

M m m

coces

coces, anno ætatis trigesimo, temperie quadragenarij, imò quandoque quinquagenarij, & sènes ante tempus sunt. Denique gratia Dei interdum legem communem non servat, sed electos suos perficere properat, aut rapit adhuc virides, ne malitia intellectum mutet.

## PROBLEMATATA

### De Generatione.

#### I.

**Q**Uare veteri Græcorum adagio, Ἀνδρῶν ἡρώων τέκνα πῆμαλα, *Heroum filij noxa?*

Sic de Cimonis, Periclis, Socratis, Alcibiadis filijs narrat Aristoteles. Vnde *veluti fato quodam evenire*, ait Demosthenes, *ut à viris egregijs filij improbi nascantur.*

Spart. in  
Sept. Se-  
vero.

Spartianus verò Imp. Diocletiano narrat, plerosque doctrinâ aut sapientiâ præstantes viros, *aut sine liberis interijisse, aut tales liberos habuisse, ut melius fuerit, de rebus humanis sine posteritate discessisse.* Et in Romulo, Numâ, Camillo, Scipionibus, Catonibus, Iulio & Augusto Cæsaribus, Trajano, M. Aurelio, Sept. Severo, Homero, Demosthene, Cicerone, Virgilio, Terentio, Plauto exempla ponit. Et nos, si vellemus, hunc catalogum faciliè insigniter auctum iremus.

An igitur ingenij vigor in parentibus, quod sanguinis subtilissimum est, ne in semen abeat, absumit? An potius studiorum & virtutum neglectus hoc facit; dum claritate, aut opibus relictis quisque talium parentum filius satis se illustrem, aut potentem sine supervacuo labore, credit? Fallor, aut hoc Arist. lib. 2. indicat subtilis Aristoteles, dum *virorum generosorum, ut Alcibiadis & Dionysii senioris filios, in mores insanos; gravium verò & stabilium ingeniorum, ut Cimonis, Periclis, Socratis progeniem, in socordiam degenerare, dicit.*

Semina enim paternarum virtutum, ubi vitiorum instrumenta à parentibus relictæ sunt, in vitia degenerant proxima illorum



illorum virtutibus. Insania autem filij Alcibiadis, paternæ animositati; socordia filij Socratis, gravitati & modestiæ patris proximè adfider.

## II.

Quomodo verum, quodd Sapiientissimi quidam produnt, Philosophicam cibi potûsque abstinentioniam magis acuerè, quàm retundere Veneris aculeos?

Abstinentioniam Philosophicam vocant, qua Philosophi Ethnici, non à carnibus & ovis alijsque quæ materiam sementinam habent, abstinentes, temperatè tamen omnibus illis, propter valetudinem corporis, & ingenij aciem, utebantur.

An ergo vulgaris ista Philosophorum temperantia libidinem incendit, *quia per eam recta corporis valetudo acquiritur, & validior redditur natura nostra*, ut doctissimus & πολυμαθὴς Didac. Covarruvias dicit?

Covarr.  
lib. 4. c. 20.  
Var.

An potiùs, radicem ejus rei altius scrutando: quia moderatus carniù boni succi, ovorum, & id genus sementinorum usus ( addito etiam modico ad irrigandum vino ) naturalem ventriculi, hepatis, cordis, ceterarumque officinarum corporis nostri calorem relevat & acuit? Hac enim ratione, officina quoque seminis, calore & temperie suâ naturali elaboratissimum, & multo spiritu prolifico turgidum, ex materiâ à ventriculo, hepate, corde optimè antè excoctâ ac præparatâ, semen cudit. Quod deinde ad parastatarum cataractas transfusum, multo, irrequieto, & eliminatæ temperiei spiritu pruriens, parastatas insigniori voluptatis sensu vellicat, & ad erumpendum sollicitat:

Hinc enim contrariâ ratione, Aristoteles ebriosorum semen οὐ γόνιμον, non genitivum, sed infecundum esse dicit.

Aristot.  
Probl.  
Sect. 3.

Et Sennertus, ex Oporino Paracelsi familiari, Paracelsum vini ebriosissimum, adeo tamen mulierum abstinentem fuisse narrat, ut cum nulla unquam illi rem fuisse credat.

Sennert.  
lib. de Con-  
sens. c. 4.

## III.

An per causas naturales fiat priapismus ille, qui in inguinibus mortuorum quandoque apparet?

Alex. Ben.  
lib. 24 c. 19  
de morb.  
curand.

Alexander Benedictus à causa naturali esse credit. Mi

*rum est, inquit, quod in castris vidimus ad Tarum in agro Parmensi in pugna adversus Gallos. Nuda erant cadavera passim, per ripas fluminis iacentia, quorum inguina supra modum magnitudinis intenta erant: Solis ( ut puto ) vapore, ac hesterno imbre, quo corpora perfusa fuerant.*

Sed quid dicimus, quando illæ, aut similes causæ nullæ ad sunt? Certè enim sine tali profuso imbre, nuper An 1635. post solutam die 4. Iulij Lovaniensem obsidionem, milites septem sub arbore una ( incertum, an ex Gallorum, an Batavorum exercitu fuissent ) vulneribus aut morbis exanimatos, à Chirurgo quodam repertos audivimus, quibus pudenda tali priapismo starent.

Quandoque etiam ( & exempla scimus ) ijs hoc evenit, qui extra solem & imbrem, domi in lectulo suo extinguuntur.

Fernel.  
lib. 6. c. 13  
Patholog.

An ergo probabilior illa causa, quam Fernelius affert? *Causa est, inquit, flatulentus spiritus pudendi arterias fistulosumq; nervum assatim implens. Is autem vel ex crasso viscosoq; humore, caloris inopiâ suscitatur, vel ex genitalis seminis ubertate atque redundantiâ. Hoc mali genus insolens admodum est. Addit tamen, in ingulato quodam, biduo ab excessu è vita, aliquando visum fuisse.*

Galen.  
lib. 6. de  
locis affect.

Galenus verò ait, Cantores & Athletas, qui vocis, aut virium causâ, à prima adolescentia Venere abstinent, minimè hoc malo tentari; eos autem qui Venereis diu assueti, sanguinem ac materiam seminis sæpe attrahendo, vasa dilataverint, magis obnoxios esse. Vnde non erit jam fortè, quòd Alex. Benedictus de cæsis illis in pugna Tarensi tantopere miretur.

Gallienus illi milites, quorum cadavera ad Tarum fluvium, An. 1495. se vidisse narrat, Neapoli, & mercibus Neapolitanis, id est lue Venereâ onusti, in Galliam cum Rege suo Carolo VIII. revertebantur, & multâ ac foedâ Venere priapismi istius causam fortasse dederant. Qui enim ex Gallico exercitu in illa pugna ceciderant, *inconditam fermè lixarum multitudinem fuisse narrat Iovius. Fuerint igitur ex illis de quibus Phil. Cominæus, qui pugnae interfuit: En nostre ost y eut grande se- quelle de paillars & paillardes à pied.* In nostro, ait, exercitu, longum scortorum & scortatorum peditum agmen erat.

Nec Galli Bataviq; qui Lovanium nostrum Anno 1635. obsidio-



obsidione cinxerunt, in oppido vicino Thenensi paucis diebus antè expugnato, valde castè, sed effreni etiam in virgines sacras libidine egerant.

Non ergo fortè de nihilo vulgus existimat, Deum istâ priapismi infamiâ, in mortuis ostendere velle antecedentia adulteria & sacrilegia vivorum. Qui enim uxores alienas, aut virgines Deo dicatas temerare audent, habenas laxare, & libidinem latius in omnes passim feminas spargere solent.

Tales autem, propter largum materiæ seminalis & viscoforum humorum, ut à Galeno & Fernelio audiebamus, in vasa patentia affluxum, in corpore etiam mortuo (modò tamen sit à vitâ recens) ejusmodi quandoque priapismo tentantur.

Dei autem providentia sic causas naturales disponit, ut ipsæ effectus tales raros & prodigiosos edant, quando terrori mortalium id expedit. Simili enim modo, Cometarum, & variorum apparentium in sublimi causas ita regit, ut effectus suos pariant, quando bellis, peste, fame, & id genus flagellis castigationi mortalium imminet, ut olim in Mereorologicis nostris dicebamus.

## IV.

An fabulæ sint, quod tamen multi narrant, de feminarum in viros metamorphosi?

Præter vetera Plinij & aliorum exempla, addi possunt ex Plin. lib. 7. c. 4. memoria recentiori non pauca. Vnicum narrabo.

Anno 1619. ad sacram Pœnitentiariam, ait Fillucius, S. D. N. Filluc. de Censur. tract. 19. c. 6. Papæ Pœnitentiarius, data est supplicatio pro quodam, qui cum per 15. annos vixisset in Monasterio Monialium, die quadam, cum maxime conatus esset ut pondus quoddam elevaret, emisit extra vas femineum genitalia viri membra. Et cum ea de causa dimissus fuisset è Monasterio, petebat dispensari in voto castitatis, ad effectum contrahendi matrimonium. Simile exemplum Michael Montanus refert.

An ergo feminae omnes quibus virilitas obtrigit, fuere tales qualis ista: nempe androgynæ, in quibus virilia membra in abdito laterent, & postea eruperint? Quod sentit Andr. Lau. Andr. Laurent. lib. 7. q. 8. rentius.

Veruntamen, quare feminina viraginis alicujusconformatio non usque ad virilitatem, annorum aliquantorum lapsu, proficere potest? In foetu enim perfecto vis formativa non illic exstinguitur aut cessat, sed ad dentium (trigesimo quandoque etiam ætatis anno) & aliarum nonnumquam partium conformationem, aut reformationem pergere solet. Nam ut

S. Tho. q. 3.  
a. 9, de Po-  
tent.

ait D. Thomas, *Virtus formativa qua in principio est in semine, manet adveniente etiam anima rationali; sicut & spiritus, in quos ferè tota substantia spermatis convertitur, manent. Et illa qua prius fuit formativa corporis, fit postmodum corporis regitiva. Sicut etiam calor qui fuit dispositio ad formam ignis, manet formam ignis adveniente, ut instrumentum formæ in agendo.* Cui Philosophiæ consentienter

Freitag.  
disp. 4. de  
Parad. Sen-  
nert.  
Fernel.  
lib. 7. c. 9.  
de hom.  
procreat.

Io. Freitagius, docet spiritum seminalem propriè esse humidum radicale & calidum innatum, unde quaque perfusum. Et ante eum Fernelius negat spiritum illum artificem avolare, sed in totam vitam permanere.

Quid ergo vetat, raro quodam eventu, virtutem maris conformatricem, à feminina temperie, aut alià causâ interpellari, ut in feminæ effigiem degeneret, & postea resumptis viribus, trans feminam eat, & virum effigiet? Hac enim, ut puto, ratione quandoque fit, ut gallina in gallum gallinaceum transeat; quod in veterum memorijs scriptum S. Augustinus dicit. Mascula enim illa scintilla, quæ in semine galli latet, per gallinæ conformationem ad gallinaceum tandem pervenit, & totum gallinæ corpus masculino calore accendit. Hinc emicant calcaria, crista surgit, pectus & animus erigitur, vox & cantus gallula scit.

S. August.  
lib. 3. c. ult.  
Civit.

Vt mares autem in feminas deformantur, non est similis ratio; nec fabulatori Ovidio de Tirefia credo, nec istud Virgilio,

— juvenis quondam, nunc femina Canus.

V.

Cur canes execti fiunt ingeniosiores?

Hoc enim Vesalius, & experientia affirmat.

Vallef.  
lib. 1. c. 13.

An quia spiritus vitales, qui in materiam seminis absumebantur, cerebro, ad imaginationis & ingenij celeritatem, in  
cane



cane castrato famulantur? Quod probabilius, quia canis animal Venereum & feminis multi faber est.

Aut fortasse, quia nimius calor, & cholera canina, quæ volatiles & vagas imaginationes excitabant, castratione refrigerantur, & temperantur ad prudentiam. Sic pueris cholericæ complexionis, si exsecentur, crescit cum frigoris & melancholiæ mixturâ prudentia & ingenium. Vnde sunt, qui Eunuchum, non ab εὐνὴν ἔχειν, à custodiendo dominæ suæ lecto; sed ab εὐ νοῦν ἔχειν, bona mente, & ingenio derivent. Nisi Iul. Scaligero Scal. Exerc. 277. assentiri mavelis, qui Eunuchis tributam bonam mentem ait; Martial. quia antiqui amafios, amentes & insanos esse dicebant: quales non sunt, coacti non amare capones.

## VI.

Tostatus Merlinum, celebrem in Anglia vatem, ex dæmone incubo & feminâ succuba natum esse credit: an etiam accedimus?

Pererius abnuitt; quia dæmon, cum non sit veri feminis à se genitivus, à viro excipere illud debuit. Spiritus autem feminis prolificus tenuissimus est, inquit, & ubi vasis genitalibus effunditur, illic exspirat. Perer. lib. 8. disp. 3. in Genes.

Sed Medici spiritum illum magis pinguem, nec tam tenuem & exspirabilem faciunt, ut à S. Thoma, Fernelio, & Freitagio proximè audivimus. Aliàs enim nec feminæ uterus spiritum tam aëreum & volatilem compescere, & ad conformationem partium foetus applicare posset. Si igitur in fervida ista uteri fornace contineri & quiescere potest; sanè ratio non videtur, cur à dæmone tantisper coerceri nequeat ne evolet, donec in feminam (quod celerrimè facere potest) transfundatur. Præsertim, cum omnes sagæ dæmonibus succubæ fateantur (& Pererius post Cajetanum etiam testatur) corpora dæmonum incuborum semper esse frigidissima (ut pote elementari tantum frigore condensata) adeoque frigoris sui peristasi non parum idonea, ut volaticos (etsi tales essent) spiritus feminis compescant. Vnde S. Thomas hoc fieri posse admittit. Quo tamen casu, prolis pater, ait, non est dæmon incubus, sed ille ex cuius semine generatur. Cajet. 2. 2. q. 95. a. 3. S. Thom. Quodl. 6. a. 18.

## VII. Nonne

Nonne Turcæ magis sapiunt quàm nos, qui claritatem natalium, nullo in gradu & prærogativâ ad ascensum honorum & dignitatum habent?

Excepto enim uno Domûs Ottomannicæ sanguine (quem, ad evitandas turbas & bella civilia Imperio servant) ceteræ dignitates virtuti cujusque aut ingenio tribuuntur. Ad hunc enim finem, parvuli Christianorum è Provincijs tributarijs rapti, in Regia Imperatoris, quam *Serrail* vocant, sine ullo natalium delectu, educantur; ut perspectâ cujusque virtute ac indole, per varias militiæ, aut Reip. Præfecturas & officia distribuuntur.

Hanc verò è Philosophia meliori rationem se habere dicunt: Quòd animæ à parentibus in filios non traducantur, sed à Deo solo creentur. Vnde minimum & vilissimum est, quod à parentibus habemus. Qua contemplatione Plotinus Philosophus Platonici parentes suos, aut patriam nominare dedignabatur, ut in vita ejus Porphyrius scribit. Nec temperatura corporis, unde indoles & ingenium fluit, est semper optima, quæ à parentibus nobilioribus venit. Imò, sicut agricolarum & mechanicorum corpora plerumque saniora sunt; ita semen sincerius. An ergo de nihilo, & adulatoriè ad Drusum Germanicum cantillat Poëta Lyricus:

*Fortes creantur fortibus, & bonis.*

*Est in juvenis, est in equis patrum*

*Virtus: nec imbellem feroces*

*Progenerant aquilæ columbam?*

Horat.

Certè enim Pericles & Alcibiades aquilæ, filios columbas, & hic ipse Drusus Germanicus Claudium Cæsarem (nescio an corvum, an bubonem dicere velim) progenuerunt.

An potiùs istos qui sic degenerant, naturæ errores vocare malumus? Nobilitas enim, modò ad labores impigra, & ex præscripto Medicorum sobriè vivat, salutare & generosus spiritus propagini suæ infundere solet: qui si educatione & virtutum studijs exerceantur, filios regenerant genitoribus simillimos.



PHILOSOPHIÆ CHRISTIANÆ 463  
**DE ANIMA**  
**LIBER TERTIVS.**

**De Anima sensitiva.**



Anima sensitiva est, quæ sensuum omnium tam externorum, quam internorum, & appetituum inde consequentium operationes fundit.

Talem nullam terræ & elementis, item lapidibus, metallis, vel arboribus inesse, adversus Pythagoricos, Manichæos, Copernicanos, & Campanellistas Lib. I. probavimus. Brutis verò & hominibus inesse, experientia & sensus ipse probat.

Sed in hominibus anima sensitiva non est à rationali divulsa, sed in unam formam cum eâ concrefcit, includiturque in ipsâ, sicut trigonus in tetragono, ut Aristoteles eleganter olim dixit.

Est ergo anima sensitiva hominis, gradus tantum inferior animæ rationalis, quoad operationes proprias, profundius quàm mens & apex ipse animæ rationalis, corpori immersus. Quidam tamen brutorum etiam animas non esse à ratione separatas, sed superiori cuidam rationalitatis gradui, quemadmodum animas sensitivas hominum, conjunctas esse existimant. Quod jam in isto Libri III. limine disputare oportet.

## CAPUT I.

*Quid Philosophi quidam de animabus brutorum senserint.*

**I**Nter veteres, Pythagoras, Anaxagoras, Plato, Plutarchus, inter novitios Michael Montanus, Stephanus Pasquierus, Bodinus, Valla, Campanella, & alij animas brutorum ratione & discursu uti, non secus ac homines, existimaverunt.

Nec de veteribus illis adeo mirum: nam Pythagoras & Plato animas hominum, in morte nudas non remanere, sed in varia corpora bestiarum, pro moribus quos in vita humana coluissent, transmigrare docebant; ac proinde animas quæ nunc sunt brutorum, olim hominum fuisse, & cum corporibus brutorum depulsæ fuerint, non interire, sed in alia hominum, aut brutorum corpora transire & transanimari.

Bessar.lib. 2  
c. 7. contra  
Galum, Plat.

Quamquam tamen doctus ille Card. Bessarion Platonem suum ab hoc errore vindicet; quia in Timæo animas brutorum mortales esse disertè asserit. Cum igitur, inquit Bessarion, sceleratorum hominum animas in corpora bestiarum transfundi Plato dicit, non vult ex anima humana tanquam parte essentiali, bestiam componi; sed duas animas corporibus illis inesse; unam mortalem, quæ est forma bruti & operationum vitalium in illo corpore fons & principium; alteram immortalem, quæ in illo carcere animato poenas luit. Hòc fermè modo, in corporibus Energumenorum, præter animam rationalem, quæ est humani corporis forma, dæmonium aliquod mixtim inhabitat. Quem Bessarionis commentarium si recipimus, Pythagoram quoque in eandem sententiam trahere oportebit: nam Timæus, qui de *μετεμψυχώσεως* transanimatione humanarum animarum in corpora brutorum, ista apud Platonem disserit, sectâ Pythagoricus fuit.

Verùm Plutarchus, in disciplina Platonis exercitissimus, ac in plerisque Platonicus, aliorum Pythagoræ & Platonis mentem accipit.

Plutar.lib. 3  
c. 20. de  
plac.

*Pythagoras & Plato, inquit, docent animas animalium quæ vocantur irrationales.*



irrationalia, esse re verâ rationales. Non posse tamen ut ratione, propter intemperiem corporis; & quia carent eloquentia, qua conceptus mentis explicent, ut apparet in simijs & canibus.

Sed & Galenus Platonizans, rationem intus delitescentem in brutis agnoscit.

S. Chrysostomus autem credit, Diabolum transmigrationem illam animarum Platoni, & Philosophis alijs persuasisse, ut imprimeret ipsis capitalem istum errorem, animas brutorum nihil ab animabus hominum distare. Per Philosophos enim, inquit, hoc semper egit Diabolus, ut ostenderet nostrum genus nihil à brutis differre; quando nonnulli in opinionem tam absurdam venerunt, ut animalia rationis expertia dixerint rationalia esse, & animas nostras in muscas, canes, & animantia bruta transmigrare.

Chrysost.  
homil. 4.  
in Acta,

Postea verò, ubi hic error vanitate & absurditate sua evanuit, docuit Philosophos, non rationalitate & immortalitate animas hominum & brutorum, sed mortalitate pares esse; quæ etiamnû hodie opinio apud Atheos & Epicureos durat.

## ARTICVLVS I.

Quibus argumentis, quidam animas brutorum rationales esse contendant.

**O**Mnia ferè argumenta ab experimentis, quibus bruta ingenium, prudentiam, ratiocinationem, disciplinæ capacitatem ostendunt, petuntur.

Nam Plinius elephantis intellectum patrj sermonis, & imperiorum obedientiam, officiorumq; quæ didicere memoriam, amoris, & glorie voluptatem tribuit.

Plin. lib. 8.  
c. 1.

Olim sub Cæsaribus in Theatris, ad tibiæ cantum composito gradu saltare, & choreas ducere docti. Imò (quod fidem omnem superat) per funes extentos, cum se flore suo funambuli visi sunt.

Suet. c. 6.  
Galbæ

Et tot alia ingenij elephantorum exempla in Epistolam unam bene longam congerit, & ita admiratur noster Lipsius, ut ratione se omnino carere, fateatur, si prorsus illi.

I. Lips.  
Epist. 30.  
Cent. 1.  
Miscell.

Plutar. lib.  
de prudent.  
animal.

Plutarchus etiam equos, imò boves in Theatris tripudiantes se vidisse scribit.

De simijs, cercopithecis, & canibus exempla sunt protrita.

Phædimus apud Plutarchum narrat, vidisse se in navī quondam canem, qui in vas angusti oris, oleo semiplenum, lapides mitteret, ut oleum sursum extumesceret, quatenus linguā attingere, & allambere posset. Vnde penetrationem corporum naturaliter impossibilem esse, & unum ab alio extrudi, ac leviora gravioribus sidentibus superferri, intelligere videbatur.

Plutarchus integrum vulpeculæ Thraciæ syllogismum nobis figurat.

Vulpes enim, ait, in Thracia, antequam concretos gelu fluxuos transeant, aurem glaciæ admovent. Et siquidem aquæ sublabentis sonitum exaudiant, illicò regrediuntur. Sin minus, transeunt intrepide; intelligentes glaciem satis densam, & ponderis ferentem esse. Vnde necesse est, inquit, hunc syllogismum componere: *Aqua quæ sonitum edit, movetur: quæ movetur non est congelata: quæ non est congelata est liquida: quæ liquida est, non potest corporis mei pondus ferre; ergo non oportet progredi sed pedem referre.*

Syllogismus quoque divisivus canis Chryssippi per veterum Scholas olim ambulavit. Qui leporem sequens, cum ad quadrivium fortè pervenisset, & quam viarum lepus arripuisset, ignoraret; argumento à sufficienti divisione, veritatem conjectavit. Nam trium viarum initia olfactans, cum nullum feræ odorem percepisset, sine alio olfactu, in quartam viam se conjecit. Quasi secum sic ratiocinatus. Non hac, non istac, non illac transivit; ergo quartam viam arripuit.

Sed stupore præcipuo me implet canis ille Blasij Monluci, Franciæ, seculo lapso Marischalci, civitatis Senensis in Italia tunc pro Rege suo Gubernatoris. Canis enim iste, ut Belleforestus narrat, in civitate à Cæsarianis diu obsessa, exercitum canum sui generis conflaverat, & quotidie ad mœnia & propugnacula educebat, custodias & vigilias certis stationibus disponebat; & omnia disciplinæ militaris officia, non pro cane, sed pro

Bellefor.  
lib. 3. c. 2.  
Histor.  
prodigios.



sed pro homine & duce belli expertissimo obibat.

Dicam & ego, quod non in quadrupede, sed volucre nuper cum admiratione vidi. Vivarium erat gelu concretum, & circa ripas corniculæ corvique conchas quæritabant, quas rostro & unguibus diductas aperirent, & carniam inclusas pulpas ligurirent.

Sed ecce, cum corniculam quandam cum conchâ suâ pertinaciter clausâ diu & frustra luctantē vidissem, illa ingenio & arte opus esse, quando vires deessent, secum reputans; raptam unguibus in sublime concham bis, ter, quaterque in subiectam vivarij glaciem, duro satis & sonante impetu dejecit: donec laxatis paulisper valvulis, reliquum rostro perficeret, & eximeret prædam. Quod factum cum in cornicula ista subridens admirarer, ecce corvus advolans, & quasi mihi etiam vellet artem suam probare & ingenium, rapit alteram concham in altum, & corniculæ imitatione, toties deijcit & repetit, donec valvulæ ad rapinam aperirentur. Vt jam sanè credere incipiam; quod de Æschylo Poëta Tragico aliquando legere memini: talis conchæ, aut certè testudinis majoris deciduo in caput ejus ictu, exanimatum fuisse.

Cum enim, inquit, capite calvo, & ad solem splendicante, fatigatus in agro sterteret, aquila cum testudine unguibus raptâ fortè supervolans, rata caput ejus, saxum esse, testudinem librato ictu in illud dejecit, & sauciavit ad mortem.

Quid ergo iterum hîc dicemus? Nonne aves istas ingenij intellectûs, & ratiocinationis jam manifestas esse? Cur enim conchas in sublime raptas in glaciem aut saxa præcipitant? Nonne ut frangant, aut aperiant? Igitur cognoscere utilitatem medij ad talem finem, & sic ratiocinari videntur. Delapsus & allisio conchæ ad rem duram, frangit, aut aperit eam; ergo idoneum medium est ad extrahendam & devorandam ejus carnem.

Et in hac naturali ratiocinatione (ait apud Plutarchum Gryllus, qui inter socios Vlyssis, à Circe in porcum transformatus fuerat, & hominis ac bruti conditionem se expertum dicit) bestię feliciores sunt hominibus: quod non in Scholis

sub ferula Magistrorum, multo labore & ærumna, discere syllogismos suos & consequentiarum nexus debeant; sed menti suæ impressos à natura habeant.

Vi etiam quadam veluti divinâ intelligendi imminentes celi conversiones, & tempestatum articulos, supra omnes Ephemeridum calculatores, pollent bruta, docentque agricolas.

Virg.  
Georg. I.

*Hinc ille avium concentus in agris,*

*Et lata pecudes, & ovantes guttate corvi.*

Et Amyclas nauta apud Lucanum, dissuadens Cæsari Hadriæ trajectum, à piscibus & avibus edoctus, nec vanè, surrecturam mox tempestatem prædixit.

Luc. lib. 5.

*Non placet incertus, qui provocat aquora, delphin,*

*Aut siccum quod mergus amat, quoddâ, ausa volare*

*Ardea sublimis, penna confisa natanti,*

*Quoddâ, caput spargens undis, velut occupet imbrem,*

*Instabili gressu metitur littora cornix.*

Chryso.  
homil. 4. in  
Acta.

Vnde Philosophi quidam, ait Chrysostomus, omnem rationalem scientiam brutis cum homine communem facientes, etiam futurorum præsentionem & religionem apud illa esse prædicant. Corvus, inquit, novit Deum, & cornix, & prophetia donum habent, futuraq; prædicunt.

Denique equi, boves, canes, vulpes, inquit Plutarchus, in rabiem aguntur, id est, mente excidunt; igitur mentem antè habuerunt. Quod etiam ex hominis insani, & canis rabidi similitudine licet intelligere. Vterque enim charorum & familiarium memoriam amittit, desertâ hominum societate, per silvas & avia se proripit, & indiscreto in amicos an inimicos impetu, omnes passim dentibus invadit.

Deinde, nonne virtutes signa sunt mentis & rationis? addit Gryllus. Sed virtutes sunt in brutis; igitur & mens & ratio.

De virtutibus autem bestiarum, fortitudine, temperantia &c. variè disserit, & in istis bestias supra etiam homines ponit. Fortitudo enim bestiarum usque ad extremum spiritum invicta depugnat, nec prostrata hosti unquam jugulum præbet, aut supplex fit.

Cum



Cum tamen gladiatores in Arena, sæpe abjecto ferro & animo, vulnus adversarij ultrò recipere, aut misericordiam victoris implorare videamus.

De temperantia verò, bestię in cibo nullis utuntur superfluis condimentorum illecebris. Venere autem ad speciei dumtaxat propagationem, & certis tantum anni temporibus, nec in masculi libidinem ardet unquam masculus. Quæ omnia, maximo generis nostri dedecore, longè secus se habent in hominibus. Vnde hæc & paria, grunnitu suo, & Plutarchi eloquentiâ differens Gryllus, reverti in hominem, unde in porcum à Circe fuerat conversus, se velle negat.

Talia, & adhuc longius Stephanus Pasquierus, in Epistola ad Adr. Turnebum, diffundit. Et suavis Mich. Montanus: *Et quis scit, ait, An quando colludo cum mea felle, ego me cum ipsa potius, quam ipsa mecum se recreet, meq; utatur, tanquam instrumento suæ voluptatis?* Deinde. *Sicuti homines venantur lepores & cervos, inquit, ita tigres, leones, & lupi hominum venationem agunt. Sunt ergo bestia hominibus pares.*

Adduntur & Reipublicæ formicarum, & apum exempla. Nam apes, ait Campanella, habent regem, obedientiam, excubias, fabros, servos, magistrorum operum, sacerdotes (qui sunt fuci) & tanta arte cellas fabricantur, ut nostras superent.

Deus te ferver, bone Campanella, qui fucos, apum sacerdotes esse dicis. Quia, credo, mel non colligunt fuci, sed liguriunt; quemadmodum in lege veteri & novâ sacerdotes & Levitæ messem in horrea non congregant, sed decimas tamen comedunt.

Postremo, in rei totius complementum, Scriptura sacra in testem vocatur. Nam providentiam formicarum, inquit Campanella, admiratur Salomon, & ad Scholas ipsarum nos mittit. Vade ad formicam & pignus, & considera vias ejus, & disce sapientiam.

Iobum quoque interrogat Deus. Quis dedit gallo intelligentiam? Gallus enim, inquit Pasquierus, maxè evigilat, & vesperti dormitum concedit cum sole, & certis diei ac noctis articulis, cantu cum adoratur.

Denique, anima brutorum in Scriptura sacra, spiritus vocatur.

Gen. 6.

vocatur, non minus quam anima hominis. *Interficiam omnem carnem*, ait, *Dominus, in qua spiritus vitae est*. Igitur omnium bestiarum quæ diluvio perierunt, animæ spirituales sunt, & consequenter tam immortales, quam humanæ. S. Augustinus quoque, & S. Bernardus, qui phrasim Scripturæ in suam eloquentiam libenter rapiunt, nomen *spiritus*, animæ brutorum etiam tribuunt. *Diversa natura sunt*, inquit Augustinus, *spiritus hominis, & spiritus pecoris, & tamen uterque est spiritus*. Et Bernardus: *Simul, inquit, vivificare, & vivere desinit ille spiritus, quando moritur pecus*.

S. Aug. lib. 3  
c. 15. contra  
Maxim.  
S. Ber. ser. 5  
in Cant.

## ARTICULVS II.

*Animæ brutorum irrationales, & merè sensitivæ sunt.*

Arist. lib. 2.  
c. 13. de cel.

**P**rosum de ratiocinatione ista, quam bestiis illi Auctores affingunt, dicere quod de Anaximandro olim Aristoteles, Κομφῶς μὲν, οὐκ ἀληθῶς δέ, *eleganter quidem, sed non verè*.

Simpl. lib. 3  
tex. 57. de  
anima.

Negamus igitur bestias verâ ratione, sed similitudine tantum quadam rationis præditas esse. Quod ipsæ etiam illis ipsis actionibus satis produnt, propter quas alij rationem ipsis inferunt. Nam etiam in illis, agendi modum & cogitandi valde restrictum & angustum habent, ut rectè Simplicius notat; cum tamen vera ratiocinatio & discursus latius debeat expandi.

Videte enim paulisper nobiscum mores bestiarum. Omnes ejusdem speciei, ut ad finem aliquem perveniant, uno eodemque medio & modo uti consueverunt. Aviculas accipiamus in exemplum. Univerſæ unius speciei hirundines, ad generationem & educationem pullorum, nidos ex luto, eadem formâ construunt, & ex tectis, aut fenestris domorū in propatulo suspendunt. Omnes passeris latebras præferunt, & in abdito tectorum, aut cavis arborum, plumas tantum & stramenta in nidos concinnant. Omnes philomelæ è musco arborum, & fetis animalium, circumjectis arborum folijs, in ipsa superficie terræ



cie terræ inter dumos nidulantur. Omnes acanthides laneos lares hirtæ arboris ramo intexunt. Omnes linariæ lanam etiam in materiam rapiunt, sed in ruborum, aut dumorum opacitate nidos abscondunt. Omnes verò galguli eos instar corbium, è ramo arboris suspendunt. Omnes turdi & merulæ fundo oblimato muscum circumædificant. Omnes picæ spinis circumsepiunt. Et aliæ aves, quas longo ordine recensere possem, & in puericia calidus auceps adnotavi, omnes ejusdem generis unicam architectandi artem norunt.

Vnde autem tanta paritas, & uniformitas? Sine dubio, quia rationem medij & finis non cognoscunt; neque inter varias ædificiorum formulas hanc vel istam in ideam futuri operis assumere, & materiam illi fini idoneam eligere possunt. Vnde falsum omnino est, quoddà fine ad media, aut ratiocinando, aut appetendo progrediantur. Alias enim eum innumeræ sint nidorum formulæ, ad pariendum & fovendum ova perinde idoneæ, quædam hirundinum ejusdem speciei (nam domesticæ illæ nigræ bifidâ caudâ, & ripariæ à parietarijs & vulgaribus specie dissident) aliam interdum formam, & materiam operi suo seligerent; ut inter homines, Belgas, Germanos, Italos, Hispanos, Francos, aliter aliterque architectantes cernimus. Quia igitur brutæ animantes nullam artem architectonicam, defectu rationis & ratiocinationis, discere possunt, Natura, id est Deus, unam artem, quam omnes ejusdem speciei sequantur, ijs impressit. Simile argumentum ex hominis nuditate, & naturali brutorum indumento rapere possumus.

Quid enim causæ putamus, cur animalia bruta pilos, villos, plumas, testas, & id genus à natura habeant; homo verò totus investis & nudus in lucem expellatur? An, quia fortasse natura homini tristis noverca, ceteris animantibus blanda mater fuit, ut Plinius conqueritur?

Quàm fallitur Mater enim omnibus fuit, sed sagax & prudens, quæ secundum uniuscujusque indigentiam, divitias filijs dispensavit. Quia igitur bruta ratione carebant, nec naturalis eorum stoliditas apprehendere poterat proportionem certi

vestimenti ad corpus suum, nec ex qua materia illud effectus conficiendum; ideo necesse fuit, ut tanquam pueris, aut mente captis, natura vestem ipsis conficeret, ne frigore, & iniquitate cæli statim enecarentur, & nascerentur frustra. Homini verò, vice indumenti, rationem dedit, ut formam quamcumque collibitam, & materiam ad illam idoneam sibi deligeret.

Secundò, si bruta rationem, etiam loquelam haberent, quæ mentis suæ conceptus evoluerent. Communicatio enim quæ creaturæ rationales invicem misceri, & tractare postulant, exigat loquelam, qua sermocinari, & secreta suæ mentis dare & reddere valeant. Natura autem in necessarijs non avara, sed liberalis est. Vnde Angelis & hominibus, quia ratione præditi erant, loquelam dedit, quæ cum suo quisque congenere sermocinaretur. Hinc Scripturæ sacræ Latinus Interpres τὰ

S. Iud. Epist.

ἄλογα ζῷα animalia irrationalia vertit, animalia muta. Et vox Græca utrumque significat; quia irrationalium proprietas est, mutum esse. Hoc tamen argumentum bonus Campanella eludere conatus est. *Lumenta & aves se invicem vacitant, inquit; ergo*

Campanel.  
lib. 2. c. 23.  
de sensu.

*discursus habent. At nos ipsarum linguam non percipimus; quoniam nec Polonorum, aut Indorum percipimus. Omnes enim suo pronunciant quisque modo. Canes tamen nobiscum viventes, & simia bene addiscunt linguam nostram: nam in alias delati regiones, linguam accolarum non intelligunt. Vidi Neapolitanam canem Polonum nil percipere linguam Neapolitanam, nisi loquentes Polonicè. Verum pronunciare quod volunt, nequeunt; quoniam non habent organa similia nostris: sicut nos non possumus uti tubâ, ut citharâ, nec cornu edere campana sonum. Psittaci tamen palatum concavum habentes, sicuti homo, bene discunt verba multa humana. In mari quoque inveniuntur pisces homines prorsus. Et in Olanda (Hollandia, vult dicere) & Lusitania visi sunt omnes humanæ functiones obire. At linguam non discunt, ut loquantur; nam extra aquam parùm vivere poterant.*

Sed somnia ista sunt. Et Sirenes, ac Nereides illæ in littus Hollandicum aut Lusitanicum ejectæ, sive in Peloponneso, ut nuper Lib. I. cap. 111. a. 1. narrabamus, captæ, non homines fuerunt, sed pisces irracionales & à natura muti, ut postrema corporis pars, quæ in caudam & piscem disinebat, satis probaverunt.

Nec



Nec Campanella canem unquam vidit, qui linguam Polonicam totam intelligeret, sed fragmina & sibilos quorundam tantum verborum, quæ ventrem, aut officiola quædam canina spectant. Imò ne quidem fando unquam audivit, canem fuisse, qui duas syllabas articulatè posset pronunciare. Psittaci verò, graculi, & picæ aliquot sententias garrere interdum, longâ plerumque magistrorum inculcatione discunt: sed dant sine mente sonos, nec isto garritu imaginationis suæ conceptum manifestare intendunt, quia nesciunt quid dicant.

Asserere autem totum animalium brutorum genus loqui non posse, non mentis & rationis, sed instrumentorum defectu, est naturam, quasi in necessarijs desit, damnare; cum potius *quod optimum & accommodatissimum est unicuique, soleat fieri, & providere.* Arist. lib. 2.  
c. 14. de  
partib.

Nec ex paucis hominibus mutis, quos naturæ error, vel morbus elingues fecit, argumentum ad bruta trahere oportet. Quia non tantum unus aut alter equus, bos, canis &c. accidente aliquo casu, loquelâ carent, sed tota universum species: manifesto indicio, id esse omnibus naturale; ac proinde non deberi ijs à natura facultatem loquendi: si autem non loquendi; ergo nec ratiocinandi. Nam sicuti nomen Græcum λόγος & rationem & sermonem significat, quia rationem in animalibus sermo sequitur; ita ἄλογος, duplici quoque significato, tam quod ratione, quam quod sermone caret, appellatur; quia carentia rationis & carentia sermonis indivisibili inter se nexu semper copulari postulant.

Inarticulato tamen garrulo, mugitu, aut aliâ incondita voce, famem aut sitim, gaudium aut dolorem, & alias animæ suæ passiones produnt; non tamen animo eas enunciandi; sed sicuti infantes nostri solent, per quandam naturæ instinctum & sympathiam, qua unus motus, veluti catenâ quadam, alterum trahit.

Tertid, omne animal cognoscit sibi naturaliter conveniens & disconveniens; ergo si bruta ratione prædita sunt, cognoscent quid honestum, quid turpe. Nam honestum omni naturæ rationali convenit, & turpe disconvenit. Huic deinde

cognitioni etiam appetitum rationalem accommodatum habebunt, quo honestum amplecti, & turpe respuere valeant. Igitur liberum arbitrium ijs inerit, & virtutis ac vitij, meriti ac demeriti capacia erunt. Vnde & Paradisum pro columbis, anseribus, & innocuis animalibus, Infernum pro accipitribus, milvis, & tot rapacium tyrannis præparare oportebit.

Denique, non magis licebit boves, & oves in mensas nostras, quàm homines occidere. Nec profectò de brutis animalibus ad Noë dixisset olim Deus: *Omne quod movetur & vivit erit vobis in cibum: quasi olera virentia tradidi vobis omnia.*

Et quid denique per consequentias rem istam tractamus, cum Spiritus sanctus apertè vocet. *Irrationabilia pecora, naturaliter in captivem.*

Monet quoque alibi, *Nolite fieri sicut equus & mulus, quibus non est intellectus.* Error igitur hæreticus est, brutis intellectum & rationem ascribere.

Eadem denique Aristotelis & saniorum Philosophorum sententia fuit. *Alia animalia, inquit, phantasijs & memorijs vivunt, parumque experientia habent; hæc autem verò genus arte & ratiocinationibus.* Et alibi disertissimè: *Alia animalia maxime vivunt secundum naturam, parum verò secundum mores; homo autem & secundum rationem. Solus enim rationem habet.*

## ARTICVLVS III.

*Argumenta Plutarchi, Valla, Bodini, Campanella, & aliorum, quibus animas rationales brutis inserunt, dissolvuntur.*

**O**Mnes isti Philosophi similitudine veri decepti, imaginem à re ipsa discernere non valuerunt. Vnde Aristoteles perspicacior, non scientiam & prudentiam in brutis, sed *ομοίωτας* imagines solum scientiæ & prudentiæ, ac morum humanorum quædam tantum *ἵχνη* vestigia agnoscit. Vnde bestias incontinentes esse negat; quia concupiscentia in ipsis rationem, qua carent, non oppugnat, multo minùs expugnat, quod in incontinente tamen fieri debet. Et hinc

etiam



etiam S. Augustinus adversus Iulianum & Pelagianos toties concupiscentiam esse malam in pecoribus negat, quia adversus spiritum non concupiscit; sed à natura ipsis data est, ut spiritum ipsorum deleat.

Quidquid verò scientiæ, prudentiæ, & industriæ apparuit in omnibus exemplis, quæ Artic. superiori deduximus, opera imaginationis, & sensuum interiorum sunt, non veræ intelligentiæ & rationis. Dicit unico verbo S. Augustinus, cum ait, *Feras non habere scientiam, totamq. illam velut imaginem scientiæ, quam miramur, vim esse sentiendi.*

S. Aug. lib.  
de quant.  
anim. c. 23.

Sed claritatis ergò, duo genera actionum distinguenda sunt, in quibus bestię ingenium, scientiam, & solertiam ostendere videntur. Quasdam enim, nemine docente, à natura insitas habent, alias disciplinâ & exercitatione addiscunt.

Quæ à natura insitæ sunt, eodem semper modo fiunt, quia natura eadem semper manet. Et pleræque tales in executione & applicatione quorundam mediorum consistunt, quibus ad finem à natura intentum brevissimâ aut commodissimâ viâ perveniunt. Fines autem bestiarum sunt delectatio in cibo, potu, Venere, & alijs corporis sui commoditatibus, quæ ad individui conservationem, vel ad speciei propagationem pertinent; & contrariarum incommoditatum evitatio. Breviter enim & scitè D. Augustinus: *Appetere voluptates corporis, & vitare molestias, ferina vitæ omnis actio est.* Et alibi ait, *Iumenta movere membra sub sarcinis naturali appetitu sua voluptatis, & devitacione molestia.*

S. Aug. lib. 7.  
c. 8. de lib.  
arb.

Ad hos autem fines assequendos ( quia naturalis quædam eorum veluti beatitudo in illis consistit ) natura media quædam, per instinctum naturalem eas docuit. Vocatur autem instinctus, quia per illum bestię instigantur & impelluntur à natura sua in quasdam actiones; non autem seipsas movent per rationem & libertatem voluntatis. Movere enim se non dicuntur, nisi ratio ostendat, non tantum quò, sed etiam quare, sive quo fine eò vadant. Bruta autem licet cognoscant bonum sensibile ad quod eorum appetitus instigatur, non tamen sciunt, quare actionem illam exercent, & an hoc sit,

Lib. 3. c. 3.  
Trin.

medium ad assequendum alterum, tanquam illius medij finem: sed ubique in singulis actibus suis ponunt finem sui progressus, sine relatione ad aliquid ulterius. Interea tamen natura, quæ est ipsis loco rationis, catenam aliquam actionum nectit, quæ ad finem à Natura illa intelligente, id est Deo præstitutum, appetitum bruti perducit.

Sunt ergo bestię instar hominis cæci, qui ab alio sic ducitur, ut nesciat quò vadat; sed ei ad singulos passus dicitur, pedem ibi ponas, & facit; incuriosus & ignarus, quò series ista rerum exitura sit.

Ex hac doctrina sequitur, quod S. Augustinus & S. Thomas docent, bruta propriè non uti medijs ad aliquem finem, etsi possint aliquo modo dici frui fine; nec tamen, ut finis, sed ut bonum est. Sed Magistrum audiamus: *Frui quidem cibo, & qualibet corporali voluptate non adeò absurde existimantur & bestię; uti autem aliqua re non potest, nisi animal quod rationis est particeps. Scire namque quò quidque referendum sit, non datum est rationis expertibus; sed neque ipsis rationalibus stultis. Nec uti quisque potest ea re, quæ quò referenda sit, nescit, nec quisque potest scire, nisi sapiens.*

Igitur bruta illa Artic. præcedenti, quorum syllogismi & discursus à fine ad media ire videntur, re verà non ratiocinantur, nec propter rationem medij & finis inter duo extrema apprehensam, ab uno ad aliud per consequentiam intermediam (quam non intelligunt) progrediuntur; sed appetitus eorum, comitante imaginatione, ab amore unus ad amorem alterius, à naturâ instinctu quodam propellitur; ut tandem in fine totius catenæ actionum, per media (quæ tamen nescit esse media) pertingat ad finem.

Verùm, quia natura non eodem modo, nec per eosdem, ut sic dicam, passus, imaginationem & appetitum bestiarum perducit ad finem; ideo aliquæ alijs ingeniosiores, & magis versutæ esse dicuntur. Sic elephantes, simiæ, vulpes, canes plus ingenij ceteris habere perhibentur; quia non unâ & rectâ viâ, sed per varias, & sinuosas quasi semitas, ac circulares flexus, versus finem à natura instigantur. Hoc enim ad varietatem & decorem universi; deinde ad hominis usum, aut delectationem



tionem pertinebat, cui omnia animantia creata sunt.

Thraciam enim vulpem, cujus syllogismus nobis concinnat Plutarchus, capiamus in exemplum. Ipsa hieme, cum omnia concreta sunt gelu, venatum exit. Fluvium, quem aqua currente mobilem antè viderat, & jam adhuc meminit, stare vider. Instigatur à natura, ut aurem glaciei apponat. Si sonitum fluentis aquæ, sibi notum audiat, terretur & refugit; quia imaginatio hoc esse terribile & periculosum, alio naturæ instinctu ei suggerit.

Hoc autem totum sine vero syllogismo, sed per perpetuos & catenatim sibi coherentes naturæ instinctus, fieri potest; quod tamen homo ratiocinatione, & comparatione mediorum ad finem, perficeret.

Nam aliàs, si ex tam ordinata actionum serie, cognitionem medij & finis, & ab uno eorum ad alterum, verum discursum & ratiocinationem colligere liceret; profectò in arboribus quoque, & rebus insensibilibus, ratio & ratiocinatio inesset. Illa enim alimenti per radices telluri infixas attractio, concoctio, & dispensatio per universum arboris corpus, cum admirabili omnium partium proportionem; foliorum & florum extrusio, fructuum educatio, & tota illa animæ vegetativæ in nutritione sui corporis Oeconomia, non minùs ingenij & admirationis habet, quàm omnium vulpium, simiarum, canum ambagiosæ imaginationes & astutiæ.

Deinde, quid virtute conformatrice ingeniosius? Non existimo in divino illò cælestium sphaerarum & astrorum horologio, plus ingenij & admirationis esse, quàm in organica ista unius animalis, aut plantæ conformatione. Et tamè sine ratiocinatione, à virtute seminis inanità, aut certè ab animà quidam, sed operationem suam tamen non intelligente.

Quod profectò exemplum non videtur aspexisse doctissimus Medicus Franc. Vallesius, quando tam affirmatè dixit, *Rationem aliquam inesse brutis negare non possumus, citra proterviam.* Valles. 654  
Non tamen, inquit, quasi circa quidlibet ratiocinari possint. Philos.  
sicut homines; sed tantum circa quiddam, quò naturali quodam in- sacra.  
stinctu feruntur.

Sed

Sed si naturali instinctu cōferuntur, jam cessat ratiocinationis necessitas; nisi virtutem arboris conformatricem, aut nutritivam ratiocinatione etiam indigere velimus, ad operis tam ingeniōsi fabricationem.

Vnde brutis ratiocinationem, etiam ex terminis singularibus (nam universale apprehendere nequeunt, ut Aristoteles fatetur) & sensibilibus negamus. Rationem quippe veræ consequentiæ, ne quidem inter tales terminos, imaginatione assequi valent.

Hoc enim S. Thomas soli cogitivæ & memorativæ hominis docet esse proprium: & hoc, inquit, *non per id quod est sensitiva partis, sed per aliquam affinitatem & propinquitatem ad rationem universalem, secundum quandam resluentiam. Et ideo, addit, non sunt aliæ vires, sed eadem, perfectiores quam sint in alijs animalibus.*

Quantum verò ad illud, quod de præensione pluviae & tempestatum addebatur, in Meteorologicis olim à nobis explicatum est. Nec enim aves, & quadrupia tempestates præsentiant ratiocinando, & ex effectu, aut alio signo, conjectando causam; sed humore aliquo rorido molliter, ante pluviam, in aërem inferiorem & corpora illorum animalium desidente, titillantur, & in crocitationes, ac voces illas pluviae præagas, aut motus lascivos inconditosque erumpunt, unde homines (non ipsæ bestiae, quæ significationes non intelligunt) futura præfagiunt.

De ceteris verò bestiarum actionibus, quæ non à natura insitæ & concatenatæ, sed per disciplinam hominum, usu & exercitatione acquisitæ sunt, dico, nec eas verâ ratiocinatione structas & inter se colligatas esse.

Vide enim modum instituendi canes apud Cardanum; omnes eorum artes amore boli, è ventre eliciuntur, aut flagris imprimuntur Adeoque verissimum apparet, quod antè ex S. Augustino afferebamus: Bestias omnia agere *naturali appetitu sua voluptatis, & devitatione molestia.* Et alibi: *Appatere voluptates corporis, & vitare molestias, ferina vita omnis actio est.* Ut proinde Poëta tenebrosus verissimè cecinerit:

*Quis*



*Quis expedivit psittaco suum Xiphi,  
Picasq. docuit nostra verba conari?  
Magister artis, ingeniq. largitor  
Venter, negatas artifex sequi voces.*

Non igitur honesti, aut rei indifferentis contemplatione, sal-  
tus & tripudia sua docentur canes, sed voluptate ventris, aut  
flagrorum, & mali metu.

Facile verò jam est intelligere, quomodo sine verâ ratioci-  
natione, sed solo naturæ, quo ad voluptatē aguntur, instinctu,  
in ejusmodi gesticulationes, & alia quæ miramur contorqueri  
& formari possint. Viso enim bolo ē manu institutoris depen-  
dente, illicò inhiant; & quia meminerunt, post tripudia, aut alios  
corporis gyros, solere ipsis proijci, excitatur in eorum memo-  
ria, per naturalem sympathiam & sine syllogismo, species tri-  
pudiorum, sequiturque mox judicium phantasticum, quo tri-  
pudiandum esse judicant: non propter utilitatem talis mediij  
ad illum finem, sed quia voluptatem escæ tripudio tam arctè  
conjunctam, & veluteandem imaginantur, ut medium à fine  
non distinguant.

Quando verò bonitas finis absens est; ejus tamen recordan-  
tur; atque ita per imaginationem medium fini iterum copu-  
lant, nec unum ab altero separant, ut per verum & rationa-  
lem discursum ab isto ad aliud argumentando pervenire va-  
leant. Nec existimo Marischalci Monluci canem, de cujus  
militari disciplina, Artic. superiori, facta mentio, sublimiori  
quàm ventris sui sine, belli illa simulacra luisse. Si tamen  
Belleforesti illa fabula non est. Nam Monlucus, sui & rerum  
suarum minimè parcus admirator, quiq. illam Senensem An. 1555  
obsidionem exactissimo, etiam usque ad minutissima, Com-  
mentario descripsit, de cane illo suo tam militari & impera-  
tore filet.

Neque finius denique ille Paræi, appellatus *Magister Ioan-  
nes fac totum*, aliud, credo, quàm gulam suam, aut aliam belli  
corporis sui delectationem, aut molestiæ vitiationem spectabat.  
Iuvabit illius simij historiolum ad leporem & recreatiuncu-  
lam Lectoris, ab Ambros. Paræo huc transcribere.

Paræ lib. I.  
c. 34. Chir-  
urg.

Memini vidisse, ait Paræus, in adibus Ducis Somei, pręgrandem simium & morosum. Cui, quod multis molestus esset, manus abscissę fuerant. sibi curationem admoveri passus, cum vulnera cicatrice obducta fuissent, mitior evasit ac docilior. Ergo veste viridi amictus, ex cingulo quo præcinctos lumbos habebat, conspiciliorum thecam, par cultellorum, & puerile sudariolum appensa gerebat. Culina præfecto in disciplinam traditus; quod in foci angulo domicilium sibi delegisset, multa ludicra & festiva edoctus. Siquando à doctrina, præceptisq; aberraret, dicto citius, in ejus dorsum lumbosq; convolabant verbera, de quotidiano victu multa detrahebantur; quod, ut ait Persius,

Magister artis, ingenique largitor venter.

His artibus brevi tantum profecit, ut omnibus suę ætatis simijs, ingenij glorię facile antecelleret. Nullusq; peritior haberetur saltando, tripudiando, ad palum excurrando, corpus per magistri crura incredibili agilitate transmittendo. Omnia denique strenui simij opera faciendo.

Fercula reverenter admodum cum corbulonibus & sportarijs deferrebat, lances & catinos linctu emundabat, & alia infinita obsequia præstabat; sic ut vulgò, Magister Ioannes fac totum diceretur. A prandio & cœna in cathedra sedens concionatorem agebat, oculos calum versus, susq; dequę rotabat, manuum truncis pectora cum multo planctu percutiebat, preces obmurmurabat cum sonoro dentium strepitu. Infinitos denique alios ludos edebat: rectus semper, ob truncas & abscissas manus, incedens, nisi quando fessus, clunibus insidere cogeretur.

Horum, & innumerabilium aliorum dociles sunt simij, & quædam alię bestię. Nec tamen ideo rationales sunt, quia omnia sine ratiocinatione & intellectu fieri possunt. Nam, ut fatetur Paræus, flagris & verberibus in illas formas & schemata à præfecto culinæ contortus formatusque fuerat semius iste. Vnde cum saltationes & Comoedias suas agere juberetur, non erat longo syllogismo opus, ut se ad agendum resolveret; quia cessationem suam dolori verberum conjunctam, ex memoriâ præteritæ suę institutionis, imaginabatur, & ex fugâ doloris in imperatos motus & tripudia se impigrè conjiciebat; quandoquidem in talibus motibus remedium doloris expertus esset, & sine ullâ interjectâ argumentatione, ista expe-



experientia & consuetudo nexum & velut catenam quandam fecisset inter fugam verberum, & appetitum tripudiandi, aut alias actiones à magistro imperatas exercendi. Propter enim hunc nexum, fuga verberum post se actiones illas naturaliter trahebat.

Eodem modo amentes, & pueri ante usum rationis, per naturæ instinctus, ab una actione ad alteram ei connexam protruduntur, non ratione & imperio se agunt.

Denique Scripturæ sacræ loca, in fine Artic. præcedentis *Proy. 6.* citata facile explicantur, licet nullus rationis usus in brutis admittatur. Sapiens enim pigrum ad Scholam & sapientiam formicæ mittit, ut ipse per rationem imitetur, quod illa per solum naturæ irrationalem instinctum facit. Vnde in formicâ nulla propria sapientia est, sed sapientiæ tantum imago.

Similiter nec in gallo vera periodorum solarium intelligentia est; sed certis diei, aut noctis intervallis ad cantandum excitatur instinctu naturæ, non intellectu horæ, sicut intelligit vigil qui nocturnas horas è turri Ecclesiæ, sonitu tubæ indicat. *Iob. 38.* A quânam verò aliâ causâ priore instinctus ille naturæ experegiat, ut gallum cantûs sui admoneat; quidam ad influentiam solis recurrunt, ego Lib. II. Cap. III. Artic. III. causam propinquiores indicavi: nempe articulos temporum, quibus in corpore ipso galli absolvitur varia cibi potûsque, per chylosin & chymosin concoctio. Mutatio quoque auræ multum in hoc valet, facitque ut horologia ista ruris, maturius aut serius cantent.

## CAPV T II.

## De sensu in genere.

**A**NIMÆ sensitivæ naturales facultates sunt sensus. Sensus autem nihil aliud est, quàm potentia cognitiva organica. Dividitur in externum, & internum. Sensus externus est, qui ad exteriorem corporis superficiem organum suum habet: internus verò, qui intus reconditum.

Numerus sensuum externorum passim statuitur quinaris; internorum est incertus. De quo postea disputatio erit.

## ARTICVLVS I.

*Quot sint sensus externi.*

S. Aug. lib.  
de quant.  
anim. c. 23.

**V**ulgus etiam sensus externos quinque nominat. *Partitio enim ista*, inquit S. Augustinus, *vetustissima est, & ferè concionibus celebrata*. Experientiâ quippe constat, quinque esse genera sensibilibus qualitatibus, quas sensu percipimus: colores, sonos, odores, sapores, & qualitates primas elementares. Nec tamen universas unico sensu, sed diversis nos percipere experimur. Non enim sonitum campanæ per oculos, sicuti album & nigrum per ipsos cognoscimus.

Advertimus quoque organa esse quinque, non plura nec pauciora; quæ natura tanquam quasdam exploratorum speculas, circa superficiem corporis dispositas fabricat, ut animas externas noscitet. Igitur totidem sunt sensus, qui speculas illas, per modum exploratorum insident, & prospiciunt foras. Visus specula est oculus; auditus, auris; odoratus, nasus; gustus, lingua; tactus, caro nervosa.

Inter hos verò speculatores, quidam ex longinquo speculantur, ut visus & auditus: & isti acutiores & perfectiores ceteris existimantur. Alij ex proximo, & contiguo tantum, & ut expergiscantur, titillari quodammodo debent, ut tactus & gustus. Quintus qui restat odoratus, medio modo se habet, & licet non ex longinqua distantia, ultra tamen contactum sui corporis, objectum suum agnoscit.

Vnde uniuscujusque sensus conditioni objectum proprium se accommodat. Nam color & sonus ex longissimo spatio species suas ad visum & auditum traiciunt, ut eos ad functiones suas impellant & excitent; aliorum objecta ex contiguo, aut vicino tantum speciem mittunt. Hujus autem discriminis finis, est necessitas aut commoditas animalis.

Rationes Aristotelis & aliorum, quibus ex diversitate medi-  
diorum



diorum, per quæ trajiciuntur species, vel ex elemento, quod in unoquoque organo videtur abundare, numerum quinarium sensuum colligunt, Topicæ & verisimiles tantum sunt; nec solidè probant, non esse possibilem sensum aliquem sextum, quo qualitates quædam aliæ corporales, sed occultæ (quales in medicamentis, & venenis Medici agnoscunt) percipi valeant.

Quia tamen perfectissimum omnium animalium homo, non plures in se sensus externos, quàm quinque experitur, signum est, sextum aut impossibilem, aut superfluum esse. Deus autem *omnia in mensura, numero, & pondere disponens*, sicut non deest in necessarijs, ita non abundat in superfluis; *sed eterna eius lege iustum est*, ut ait S. Augustinus, *ut omnia sint ordinatissima*. Sap. I. I.

Nec tamen omnia animalia omnes quinque sensus habent, sed illa quæ perfecta vocantur, ut homines, canes, equi, boves, leones &c. quibus, præter quinque externos, interni etiam omnes sensus insunt. Cum enim animal sit essentialiter corpus sensitivum, quodnam animal perfectum potius dici convenit, quàm illud quod perfectè, id est, cunctis tam externis quàm internis sensibus est sensitivum. S. Aug. lib. 8. c. 6. de libero arb.

Vnde animal imperfectum nequaquam confundi debet cum animali insecto, vel cum eo quod ex putri nascitur; etsi nonnulli sic loquantur. Nam *εἰς τοιοῦτον insectum*, seu incisum animal vocatur, quod ex multis particulis incisim, & quasi annulatim compositum est, ut apes, & vespæ; quæ tamen omnes sensus fortasse habent. Mures verò ex putri generari possunt: & quis tamen sensus ijs deest? Imò murem tam disciplinabilem se vidisse narrat Albertus Magnus, ut ad imperium domini, pedibus primoribus, tempore cænæ, teneret candelam. Disciplinabilia autem sunt perfectissima animalium.

Talpa verò inter perfectum & imperfectum animal est velut medium. Habet enim quodammodo, & non habet visum. Nam natura ab ostreis, cochleis, & limacibus visu carentibus, per talpam ascendit ad ea quæ visu pollent. Rudimentum enim quoddam oculorum in talpa cernere licet, crassâ membranam tectum, ut Aristoteles ait, ne suffodiendo terram, eos Arist. lib. 4. c. 8. Histor. animal.

offendat. Nec enim omni visus luculâ carere inde apparet; quod si sub dium è terra emerferit, latebras suas trepidè requireret, confusus lumine solis, & ut Cacus ille Virgilianus,  
*Insperatâ deprensus luce repente.*

Virgil.  
 Æneid. 8.

Omne verò animal, ex sensibus externis tactum saltem, & ex internis imaginativam habet; quâ appetitum sensitivum ad cibi saltem appetentiam, tali quali iudicio phantastico moveat.

An autem in omni animali, præter tactum, gustus etiam additus sit, dubitant Philosophi. Ego propior sum affirmantibus; quia nullum animal solo tactu videtur cibum utilem ab inutili, sine gustu posse satis distinguere.

Igitur, sicuti omne animal aliquo foramine, aut meatu alicubi foratum est, per quem cibus ad interiora transmittitur, ut ibi concoquatur; ita vero similiter in primo talis meatus vestibulo, tanquam janitor & explorator, positus à natura est gustus, qui alimentum salutare intromittat, aut noxium respuat. Hoc enim sapientia summi opificis & naturæ conditoris videtur postulare. Nec refert, quod etiam plantæ videantur inter alimenta nocua & innocua distinguere, cum unum radice suâ attrahant, alterum quodam quasi fastidio negligant; quia quod plantæ mero instinctu naturæ, sine sensu, in talibus faciunt, hoc animalia mediante sensu solent efficere. Ideo enim animalia sunt, & in gradu naturæ proximo quidem, sed eminentiori quàm plantæ,

## ARTICVLVS II.

### *Quotuplex sit objectum sensus.*

**O**bjectum sensus in genere Aristoteles duplex constituit: sensibile per se, & per accidens. Et sensibile per se, rursus in sensibile proprium, & sensibile commune subdividit.

Sensibile per se est quod secundum se proximè à sensu attingitur. Hoc verò semper est accidens quoddam. Sola enim  
 accidentia



accidentia speciem & imaginem quandam sui in organum sensûs effundere valent, quo sensum ibi excubantem, ad operationem sensitivam excitent. Sine magna enim ratione quidam dubitant, an ex ipsâ etiam immediatè, quæ accidentibus sensibilibus subest, substantiâ non emicent, & in medium spargantur quædam *sensibus nostris improporionata* species, quæ nudæ substantiæ imaginem Angelis repræsentent,

Lud. Molin.

I. p. q. 55.

a. 2. d. 2.

membr. 4.

Ex utrâ enim parte substantiæ corporeæ funderentur illæ species? Non ex materia prima physica; quia activa non est. Non etiam ex forma substantiali; quia nec ipsa immediatè actione in subjectum externum transeunte agere potest, sed ut summum, in suo supposito, per actionem resultantiæ naturalis, suas proprietates primùm producit, aut amissas reparat. Sic enim in forma aquæ experimur: quæ nullum subjectum externum immediatè frigefacit (aliàs aqua calefacta vicinum aërem etiam frigefaceret) sed tantùm ad frigus amissum, per naturalem dimanationem, primùm se reducit, & deinde mediante frigore, vicina frigefacit.

Sensibile per se aliud proprium (quod unico sensu externo percipitur: ut color, sonus &c.) aliud est commune, quod pluribus sensibus sentitur. Talia Aristoteles quinque enumerat; motum, quietem, numerum, figuram, & magnitudinem.

Arist. lib. 27.

c. 6. de

anima.

Hæc autem non specie aliquâ sibi peculiari organa sensuum impellunt, sed speciem sensibilis proprii tantùm modificant, faciuntque ut alio modo potentiam sensitivam moveat, & anima aliquam varietatem in tali sensibili proprio advertat. Nam aliter sensus & anima afficitur, quando equum album currentem, & quando quietum; quando numerum seu gregem ovium, & quando unicam ovem; quando turrim rotundam, & quando quadratam; quando magnum gigantem; & quando parvum pygmæum videmus. Nam modus objecti similem modum speciei imprimit. Rotundæ enim albedinis species in oculo est rotunda.

Pluribus autem sensibus istiusmodi sensibilia posse sentiri patet. Nam figuram rei rotundæ, aut motum, & quietem tam

visu

visu quàm tactu percipimus. Non tamen necesse, ut omnia sensibilia communia omnibus sensibus sentire possimus. Quis enim soni, aut rei sonantis figuram auditu cognoscit? Sufficit igitur, ut sensibile appelletur comune, si duobus saltem sensibus attingi & sentiri possit.

Inter verò sensibile proprium & commune Aristoteles hoc discrimen ponit. Quòd circa sensibile proprium sensus nunquam erret; circa commune autem quandoque errare possit. Vnde definit sensibile proprium: *Quod alio sensu sentiri non potest, & circa quod error fieri nequit.* Quam sententiam varijs interpretationibus vexant Commentatores. Sed Philosophus mentem suam satis aperit, dum addit: *Visus enim non errat, quòd color sit, neque auditus, quòd sit sonus.*

Nunquam ergo errat visus apprehendendo esse colorē, quod color non est; cum circa id quod color non est, versari, & illud apprehendere non possit. Omnis enim actio visus in aliquem colorē, sub proprio & adequato objecto visus contentū, cadere debet: ac proinde non est similis sagittæ, quæ aliquando à toto scopo suo aberrat. Circa verò sensibile per accidens, & circa sensibile per se commune, errare sensus potest. Nam quando navigamus in flumine, ripæ moveri & retrocedere nobis videntur; cum tamen nullo agitentur motu, sed quiescant. Igitur à toto illo sensibili communi, quod est quies, aberrat visus, cuius loco alterū sensibile commune, nempe motum substituit.

Similiter circa numerum totaliter errat, quando ex longinquo seriem columnarum videt, nec earum intervalla distinguere valet. Tunc enim iudicat esse unum continuum murum ex omnibus columnis concretum; atque ita pro numero unitatem, id est numerum planè nullum, substituit.

Non sic autem circa totum colorem errare potest: etsi colorem unum pro alio quandoque substituat; ut cum album ex longo intervallo, nigrum aut cæruleum ei apparet.

Sed nec circa quodlibet sensibile commune visus in totum errare potest. Non enim circa magnitudinem. Quandoquidem omnis visio fiat per pyramidem, ut loquuntur Optici, cujus basis sit in objecto, & conus in oculo: basis autem pyrami-



pyramidis necessariò sub aliqua magnitudine & extensione apparere & videri debet.

## ARTICVLVS III.

*Disputatio antiqua inter Peripateticos, Academicos, & Epicureos de errore sensûs.*

**A**Lio modo, quàm hîc Aristoteles, errorem sensûs acceperunt illæ Scholæ Philosophorum, qui post mortem ejus, tantâ concertatione disputaverunt: An sensus semper, an nunquam, an aliquando solùm, & aliquando non erraret. Nam secundum illos, sensum circa sensibile suum proprium errare, non est, extra sphæram objecti sui proprii & adæquati evagari & exerrare, quod fieri non potest; sed est, circa aliquod particulare sensibile proprium errare, unum pro altero accipiendo; ut quando visus album judicat esse nigrum. Vel intra idem sensibile commune manendo, unam figuram accipit pro altera; ut turrim rotundam pro quadrata, remum curvum pro recto &c.

Hæc autem olim inter Peripateticos, Academicos, & Epicureos, de sensuum certitudine, & incertitudine disputatio celeberrima fuit.

Epicurei volebant sensus nunquam falli, sed omnia sic esse, quemadmodum sensibus apparerent. Vnde solis diametrum negabant esse majorem pedali, quia visus non longiorem esse renunciat. Hinc Seneca: *Solem, quem toto Orbe terrarum maiorem probat ratio, acies nostra sic contraxit, ut sapientes viri (Epicurei) pedalem esse contendant.* Quorum stultissimam opinionem Lucretius Philosophus & Poëta Epicureus multis versibus cantat & decantat. Seneca lib. 1. c. 4. Nat.

Academia verò novæ sectatores, quorum princeps Arcesilas, nihil in sensibus esse certi dicebant, quoniam nunc hoc nunc alio modo visa renunciant. Nam columbæ collum variè inflexum alios ac alios colores demonstrat, & remus in aqua curvus apparet, qui extra aquam rectus. Atque ita à sensibus

S. Aug. c. 20  
Euchirid.

sibus exorſi, cetera omnia in ſimilem fluctum & dubitationem mittebant, nihilque certi & comprehenſi in rebus humanis habebant. Vnde ſapientem oportere ſemper ſuſpenſo eſſe iudicio, nec ullibi in aſſenſum ſe debere demittere dicebant, ne fortè fallerentur, & errore contenebrarent & macularent humanæ mentis nitorem. Adverſus quos S. Auguſtinus, *In initio mea converſionis*, inquit, *tria confecimus volumina, ne impedimento nobis eſſent, quæ tanquam in oſtio contradicebant. Et utique, addit, fuerat removenda inveniendæ deſperatio veritatis, quæ illorum videtur argumentationibus roborari. Apud illos ergo error omnis putatur eſſe peccatum, quod vitari non poſſe contendunt, niſi omnis ſuſpendatur aſſenſus. Errare quippe dicunt eum, quiſquis aſſentitur incertis, nihilque certum eſſe in hominum uſu, propter indiſcretam ſimilitudinem falſi, etiamſi quod videtur, fortè ſit verum, acutiſſimis quidem, ſed impudentiſſimis conſtitationibus diſputant.*

Cic. lib. 1.  
de nat.  
deorum.

Ac inter hos Academicos ſe proſitetur Cicero, cum ait: *Non ſumus ij, quibus nihil verum eſſe videatur, ſed ij, qui omnibus veris falſa quadam adjuncta eſſe dicamus, tantâ ſimilitudine, ut in ijs nulla inſit iudicandi & aſſentiendi nota.*

Quare verò S. Auguſtinus huic Philoſophiæ tam ſeriò ſe opponere voluit? Ait ibidem: *Quia apud nos juſtus ex fide vivit. At ſi tollatur aſſenſus, & fides tollitur, quia ſine aſſenſione nihil creditur.*

Vnde Peripatetica, & Chriſtiana Philoſophia, inter Epicurum & Academicos novos media incedens, quædam certa, quæ merentur aſſenſum, quædam incerta & probabilia tantum eſſe concedit. In ſenſus quoque errores quorſdam cadere, ut cum remus in aqua inflexus videtur, qui in aëre & oculis, & tactu deprehenditur eſſe reſtus. Item cum in collo columbæ ad ſolem inflexo, varij apparent colores, ſive in luminis ſolis, ſive in diverſis plumulis varietas iſta depicta ſit.

Verum omnes iſti errores facilè deprehendi & iudicio intellectus corrigi poſſunt, ſi mutatâ diſtantiâ objecti, aut variato medio, vel alijs circumſtantijs, quæ videbantur impedire iudicium ſenſus, eidem objecto repetitis vicibus ſenſus admoveatur. Aut ſi ſit ſenſibile commune, circa quoddam error accidit.



accidit, adhibendo in consilium alterum sensum, sub quem illud sensibile etiam cadit. Vt in exemplo remi, aut baculi qui in aqua incurvus visui apparet, error duplici modo corrigi poterit. Primò, solo visu, mutando medium per quod baculus videbatur, sive ex aqua eum extrahendo in aërem, & periclitando, an per aërem illa curvitas apparitura sit, quemadmodum apparebat per aquam. Secundò, relinquendo in aqua, sed adhibito sensu tactus, & manu palpando, an deprehendemus curvum.

Unde L. Lucullus apud Ciceronem adversus Academicos differens: *Non hoc loco expectandum est, inquit, dum de remo inflexo, aut de collo columba respondeam. Non enim is sum, qui quidquid videtur tale dicam esse, quale videatur. Epicurus hoc viderit, & multa alia. Meo autem iudicio ita est maxima in sensibus veritas, si sani sunt ac valentes, & omnia remouentur quæ obstant & impediunt. Itaque & lumen mutari saepe volumus, & situs earum rerum quas intuemur, & intervalla aut contrahimus, aut diducimus, multaque alia facimus, usque eò, dum aspectus ipse fidem faciat sui iudicii. Quod idem fit in vocibus, in odore, in sapore; ut nemo sit nostrum, qui non sensibus suis cuiusque generis iudicium requirat acris. Adhibita verò exercitatione & arte, ut aculi picturæ teneantur, & aures cantibus; quis est qui non cernat, quanta vis est in sensibus? Quam multa vident pictores in umbris, in eminentiâ, quæ nos non videmus? Quam multa quæ nos fugiunt in cantu, exaudiunt in eo genere exercitati: qui primo inflatu tibicinis, Antiopam esse aiunt, aut Andromacham, cum id nos ne suspicemur quidem?*

Cic. lib. 4.  
Acad. quest.

Et de hac erroris sensuum, per alios sensus, & per rationem emendatione S. Augustinus: *In omnibus corporalibus visis,* inquit, *& aliorum sensuum contestatio, & maximè ipsius mentis atque rationis adhibetur; ut quod in hoc rerum genere verum est, inveniat, quantum inveniri potest.*

S. Aug lib.  
12. c. 25.  
Genes.

Hoc quoque adnotandum: nullam proprium errorem esse in sensu, præsertim externo. Non enim propriè iudicat hoc esse illud, ut v. g. remum, quem in aqua videt, esse fractum, aut curvum; sed simplici cognitione, secundum formam imaginis quæ organo imprimitur, apprehendit, & eam apprehensionem

hensionem primum imaginationi, ac deinde intellectui renunciat. Quod tantum est officij ejus; judicium verò, an ita sit, an non sit, tribunali intellectus relinquit. Fallere tamen intellectum sensus dicitur, quia ipsi (ni sibi circumspiciat) est occasio erroris. Vnde si quis remum frangi in aqua opinatur, ait S. Augustinus, & cum inde aufertur, integrari, non malum habet internuntium, sed malus est judex. Nam ille (oculus internuntius) pro sua natura non potuit aliter in aqua sentire, nec debuit. Si enim aliud est aër, aliud aqua, justum est, ut aliter in aëre, aliter in aqua sentiatur. Quare oculus rectè videt. Ad hoc enim factus est, ut tantum videat. Sed animus perversè judicat.

S. Aug. lib.  
de vera re-  
lig. c. 33.

## ARTICVLVS IV.

An sensus per irradiationem defluant à cerebro, an suis quisque organis stabiliter infideant.

**M**agna hinc inter Philosophos & Medicos rixa hodie adhuc ferveret.

Philosophi contendunt, sensus esse potentias animæ, organis suis stabiliter infixas, quæ, modò speciem ab objecto externo impressam acceperint, valeant (concurrente tamen animâ organi) cognitionem sensitivam elicere. A spiritibus verò animalibus, qui è cerebro per nervos sensorios in organa defluunt, nihil aliud sensibus conferri, quàm commodā aliquam organi temperiem, quā facilius & expeditius functiones suas obeant. Vnde spiritibus istis, inquit, longā operatione consumptis, aut levitate suā effugientibus, sequitur potentia defatigatio.

Sed isti Philosophiæ, primâ fronte tam probabili, nunquam potui acquiescere; ingenti semper suspitione sollicitatus & suspensus, longè majorem esse functionis sensitivæ à spiritu animali dependentiam, quàm ista opinio explicet, aut possit explicare.

Si enim spiritus animalis solum ad hoc valet, cogitabam, ut organum potentia calefactet, aut aliter foveat commodam ad sentien-



sentiendam temperiem; quare obturato nervi meatu, quo spiritus à cerebro defluit, v. g. in visus organum, tam subito omnis visio extinguitur? Quare anima organi, cum potentia sua visiva, & specie visibili ab objecto, oculo aperto impressâ, videre aliquamdiu non potest? Temperies enim oculi naturalis non dissolvitur, sed eadem manet, & animam organi in materia illa, tanquam naturalis ejus dispositio, fovet. Organa autem sic sunt naturaliter temperata, ut eadem dispositio quæ informationi animæ, etiam functioni potentiae quæ in organo est, subserviat.

Si verò aliquod insuper fomentum à spiritu cerebri recipere debeat, ut acrius & citra defatigationem potentia functiones suas obeat; quare intercluso omni spiritus commeatu, non languidè saltem, & ut in defatigatione solet, videre, aut alio sensu uti non valemus?

Deinde non apparet, quomodo temperies illa (quæcumque illa sit) à spiritu injecta organo, tantâ necessitate ad visionem requisita sit. Nam influxum activum nullum in illam habet, sed solum ita organum temperat, prout conservationi animæ, & potentiae in tali organo expedit. Si ergo absente spiritu, anima nihilominus & potentia visiva in organo permaneant, modo accedat species visibilis, omnia jam eliciendæ visionis principia ad sunt; etiam si anima & potentia non illam perfectissimam temperiem in organo habeant, quam flagitant, ut ipsis optimè ibi sit.

Sed nōne etiam oculo senis simile accidit? Siccitas enim illa, & contractio membranarum oculi senilis, facultati visivæ disconveniunt, & functionem ejus obnubilant. Videt interim senex, aut solis, aut conspicio adjutis oculis. Cur igitur in caro, epilepsiâ, apoplexiâ, in somno naturali, aut secto nervo, omni intercluso spirituum meatu, non tantumdem videre possumus? Postremo, diversorum sensuum organa non eadem temperie gaudent: nam oculus humore abundat, organum auditus ossèa siccitate ferè riget: quomodo ergo idem, & in eadem cerebri officina ad unam eandemque temperiem excoctus spiritus, omnia organa recreare, & uni unam, alteri

alteram qualitatem contrariam tribuere poterit?

Simile argumentum de facultate loco motivâ fieri potest. Stenim spiritus in nervos motorios influens, solummodo temperiem convenientem fovet; quare in paralyfi, obstructis nervorum illorum canalibus, potentia tamen loco motiva membri, ad quod spiritus non pervenit, saltem languidum, & quasi hominis defessi motum operari nequit?

Itaque Medici ejusmodi symptomatum experienciâ, alijs, quæ argumentis passim docent, vim ipsam sensitivam, aut certè ultimum ejus complementum, per irradiationem quandam à cerebro per nervos, in organa sensuum defluere: quâ irradiatione prorsus impeditâ, necesse sit operationes sensuum extinguï.

Galen. lib. 1.  
de sympt.  
causis.

Principem eorum Galenum, si lobet, audiamus. *Cerebrum, inquit, non ut sit sentiendi instrumentum, sed ut sensuum instrumentum vim sentiendi largiatur, à natura institutum est. Nam quod singulis animalis partibus, per nervos sentiendi facultatem transmittat, liquido patet, ubi nervus, aliquis est dissectus.*

*Siquidem pars ea in quam nervus, ille distributus & insertus est, protinus sensum amittit. Taceo, sensus inter dormiendum, aut otiosos omnino esse, aut debilitè agere: quia tunc exigua facultas à cerebro in reliquas partes defluit.*

Lib. 7. de  
placit.

Hinc alibi, spiritum animale non quidem esse animam, sed tamen primarium animæ instrumentum, probans: *Cum igitur coniunctis cerebri ventriculis, inquit, (quorum divisio motum & sensum abstulerat) paulò post rursus sentiat & moveatur animal; dicendum est, in ipsius quidem cerebri corpore animam habitare; primum autem eius instrumentum, tum ad universos animantis sensus, tum ad motus voluntarios, esse animale spiritum. Qui quidem si animæ substantia esset (quod aliquis posset existimare) simul cum eo, dum evacuatur, periret anima: cujus contrarium contingit. Nam evacuatus, donec recolligatur, sensu motuq, non vitâ destituit animal.*

Io. Argent.  
lib. 2. de  
somno &  
vigil.

Inter verò Medicos unus ferè Io. Argenterius, licet spiritum animale Galeni & ceterorum rideat ac rejiciat, cerebri tamen in organa sensûs & motûs, irradiationem admittit, quæ imitetur splendorem solis, qui in terram demittitur, & in superiora elemen-



*elementa spargitur absque ullo corpore, quod ille secum advehat.*

Quia enim in nervis nulla apparet manifesta cavitas, negat spiritum animale per ipsos tanquam canales, devehere posse facultatem sensificam ad organa sensuum; sed eam per nervorum soliditatem, sine spiritus vehiculo irradiari; quemadmodum solis splendor & radij penetrant per vitrum.

Ceteri tamen filij Medicorum suum Galenum, adversus Argenterij contradicendi pertinaciam defendunt. Et Andr. Laurentius certamen finiens: *Concludamus ergo, inquit, animale quendam esse spiritum, qui in plexibus rudimentum, in sinibus perfectionem acquirat: indeq; per totam cerebri substantiam ad functiones principes (sensuum internorum) & in medullam spinalem ac nervos, ad sensum & motum diffundatur.*

Andr. Laurent.  
lib. 10.  
q. 9. Anat.

Et in hanc, aut vicinam sententiam Theologorum vertex & Coryphæus S. Augustinus mihi præire videtur.

Non est contemnendum, inquit, quod Medici non tantum dicunt, verum etiam probare se affirmant. Quamvis omnis caro terrenam soliditatem in promptu gerat, habet tamen in se & aeris aliquid, quod in pulmonibus continetur, & à corde per venas, quas arterias vocant, diffunditur: & ignis fervidam qualitatem, cuius sedes in iecore est; verum etiam luculentam, quam velut eliquari ac supervolare ostendunt in excelsum cerebri locum, tanquam in calam corporis nostri. Vnde & radij emicant oculorum, & de cuius medio, velut centro quodam, non solum ad oculos, sed etiam ad sensus ceteros, tenues fistula deducuntur; ad aures scilicet, ad nares, ad palatum, propter audiendum, olfaciendum, atque gustandum; ipsumq; tangendi sensum, qui per totum corpus est, ab eodem cerebro dirigi dicunt per medullam cervicis, & eam qua continetur ossibus, quibus dorsi spina conseritur; ut inde se tenuissimi quidam rivuli, qui tangendi sensum faciunt, per cuncta membra diffundant.

S. Aug. lib. 7.  
c. 13. de  
Genes.

Et postea: Quoniam pars cerebri anterior, unde sensus omnes distribuuntur, ad frontem collocata est, atque in facie sunt ipsa velut organa sentiendi, excepto tangendi sensu, qui per totum corpus diffunditur (qui tamen etiam ipse ab eadem anteriore parte cerebri ostenditur habere viam suam, qua retrorsus per verticem ad medullam spinæ, de qua loquebamur paulo antè, deducitur: unde habet utique sensum in tangendo

Lib. 7. c. 17.  
de Genes.

rangendo & facies, sicut totum corpus; exceptis sensibus videndi, audiendi, olfaciendi, qui in sola facie prelocati sunt: ) ideo scriptum arbitror, quod in faciem Deus sufflaverit homini flatum vita, cum factus est in animam vivam.

Lib. 12.  
c. 19 de  
Genes.

Et alibi: Cum oculi dolent, vel extincti sunt, quia non est causa in sede cerebri, unde ipsa dirigatur intentio sentiendi, tamen fiunt eiusmodi visiones (phantasticæ) quàmvis cernendis corporalibus obstaculum existat à corpore. Magis enim cæci aliquid dormientes, quàm vigilantes vident. Dormientibus quippe consopitur via sentiendi, qua intentionem ad oculos ducit.

Epistol. 3.  
ad Voluf.

Et alio loco: Deus ex puncto; & quasi centro cerebri, sensus omnes quinary distributione diffudit, & corde, membro tam exiguo, vitalem motum, per corporis cuncta dispensat. His atque eiusmodi rebus insinuans magna de minimis, qui non est parvus in parvis.

Licet verò ea, quæ jam ex Anatomicorum sui temporis, de origine tactus ex medullâ spinæ dorsi, narrat Augustinus, diligentiori posteriorum experienciâ refellantur; quin tamen vim quandam cerebri in organa sensuum externorum irradiativam agnoverit, ex mentione ejus toties repetitâ, nullum est dubium.

Quo autem modo illa irradiatio fiat, res est omnium tenebrosissima, nec Medici aliter ferè, quàm per similitudines, & comparisonem cum solis & siderum illuminatione, clarificant.

Franc. Val-  
les. lib. 2.  
c. 24.  
Controy.

Galenus toties, ut pigeat repetere, ait Vallesius, animalis spiritus meminit, & illustrationis, & animalis influxus in instrumenta.

Quâ verò ratione Philosophicâ id fiat, explicatum non invenio.

Vallesius quoque rem totam expedit hoc exemplo. Quod dico, hoc est: Non mitti à cerebro facultatem oculis tantum visoriam, & auribus tantum auditoriam, sed utrisque sensoriam. Sensoria verò eadem, cum mittatur utramque in partem, continet visoriam, & auditoriam. Exerit verò hanc hîc, illam vim illic, ob differentiam organorum. Velut profectò sol non aliud lumen, aut alias vires mittens huc aut illuc, hîc hordenm, illic triticum gignit, pro differentia materiae varias exerens vires. Nihilominus diversa actiones diversarum facultatum sunt.

Franc.



Franc. Aguilonius ad Philosophiam profundiorē rem  
istam deducens: *Hoc animali spiritui tribuendum videtur*, inquit, *quod solis radio. Vt enim sol æstivo tempore rebus omnibus, quas bru-*  
*ma algor torpentes ac velut emortuas reddidit, vitam quodammodo*  
*restituit, novamq; agendi vim confert, ob id solum, quod suo calore eas*  
*ad agendum aptiores efficiat; ita animalis spiritus vivifico ac salutarī*  
*calore partes omnes, quibus assistit, fovet, atque insitas rebus facultates*  
*excitat, efficacesq; ac promptas reddit.*

Franc.  
Aguilon.  
lib. 1.  
Prop. 25.  
Optic.

Sed hoc antea rejecimus; quia non omnia sensuum organa  
eādem qualitate gaudent & recreantur. Deinde tantum abest,  
ut visus calore foveatur, & videndi acies eo excitetur, ut  
potius contrario frigore gaudeat; exemplo coquorum, & qui-  
cumque circa ignem frequentes, quibus acies oculorum he-  
betari, & caligare solet. Alia, de virtute generativa & nutritiva  
plantarum, est ratio. Nam istæ calore naturali, ut instrumen-  
to, utuntur, ideoque calore solis adventitio adjuvari & ex-  
citari possunt.

Denique spiritus animales non ita fervent, ut omnia sen-  
suum organa calefacere valeant. Imò in cerebro (quod Hip-  
pocrates *μετρόπολιν τοῦ ψυχῶν* metropolin frigoris appellat) po-  
tius refrigerantur spiritus vitales, qui ex ardenti cordis offi-  
cina in cerebri gelidam transfusi, ex vitalibus in animales  
temperantur.

Itaque ante omnia, contra Medicos quosdam, constituo:  
Non totam vim sentiendi à cerebro in vacua organa sensuum  
externorum transfundi, sed singulis organis stabiles potentias  
sensitivas, ut rectè probat Aguilonius, insidere; quæ tamen  
ad operationem sensitivam cum anima organi, non sufficiant,  
nisi aliqua cerebri irradiatione, per nervos sensorios illaben-  
te, adjuventur.

Ratio est, quia facultas sensitiva, quæ operationem vita-  
lem exercet, debet esse in subiecto animato; ut anima, tan-  
quam subiectum saltem inadæquatum, mediante ipsâ opera-  
tionem vitalem immanentem recipiat, ut Lib. 1. cap. vi.  
Art. v. differebamus. Spiritus autem animalis, plurimum Phi-  
losophorum & Medicorum iudicio, est inanimatus. Igitur

R r r

propriam

propriam facultatem vitalem vehere ad organa sensuum non potest.

Deinde potentia vegetativa, & concoctrices alimenti fixè inhærent singulis membris, ad quæ spiritus naturalis per venas, & spiritus vitalis per arterias appellit; ergo & in organis sensuum sunt potentia stabiles, quæ ibi affluxum spirituum animalium expectant, à quibus excitentur, & adjuvantur ad operationes sensitivas; veluti potentia vegetativa à spiritibus naturalibus & vitalibus adjuvantur. Deinde si nullæ aliæ essent facultates sensitivæ, præter virtutem illam influentem à cerebro, quæ spiritu animali vehitur, organa sensuum in somno sensibus & facultatibus suis vacua essent, nec visus in oculis, nec auditus in auribus inesset; quandoquidem obstructis nervorum sensoriorum meatibus, nulla eo tempore irradiatio & influxus à cerebro in organa sensuum perveniat. Cum tamen *naturalis illa vis quasi judiciaria quæ auribus adest, non desinat esse in silentio, nec nobis sonus eam inserat*, ait S. Augustinus, *sed ab ea potius, sive probandus, sive improbandus excipitur*. Quod autem dicit de silentio, quando etiam vigilans nihil audit, quia nullus sonus aures ejus ferit; diceret quoque, ni fallor, de somno.

S. Aug. lib.  
c. 2. de  
MUSIC.

Tunc, inquam, vim illam judiciariam etiam auribus adesse, licet sopitam, & quæ ad opus excitari debeat, non tantum à specie soni (quæ fortè aures dormientis etiam impellit) sed à spiritu animali, sive à virtute irradiativâ, quam spiritus animalis organo auditus invehit.

Denique vis ista irradiativa, vecta spiritu qui in cerebro excoquitur & elimatur, eadem est pro omnium sensuum operationibus; igitur ut in oculo visionem, in aure auditionem operetur, debet ab alia potentia in illo organo jugiter excubante, ad unam potius, quàm ad aliam operationem determinari. Nam à figura organi, aut à qualitatibus primarum, vel secundarum temperie aut mixturâ, talis determinatio fieri nequit; cum istæ organi qualitates, vel activæ non sint (ut figura) vel non eâ actione, quæ in talem functionem vitalem valeat influere.

Igitur



Igitur veluti in Mundo magno, sol siderum Rex & Imperator ex varijs aspectibus corpora Planetarum & fixarum radijs suis ferit, & Influentialas eorum evocat & exstimulat; ita in animalis Microcosmo, vis illa cerebri irradiativa, tanquam sol quidam, facultates sensuum externorum, suis organis tanquam epicyclis infixas, ex certis intervallis irradiat, & ad operationes suas excitat. Et veluti lumen solis, quamvis unius qualitatatis & essentiae, varias tamen siderum aliorum Influentialas, unamquamque ad longè diversam operationem (si Astrologis credimus) adjuvat; ita unus idemque spiritus animalis, à cerebro in organa sensuum effusus, varias & distinctæ speciei eorum operationes perficit.

Quia enim spiritus ille in iisdem cerebri ventriculis & officinis excuditur, unicam etiam temperiem, ut Medici passim docent, non aliam pro visu, aliam pro auditu &c. accipit: sed diversitas operationum in organis visûs, & auditûs, ex diversitate potentiarum quæ in oculo, & aure fixam residentiam habent, provenit. Vnde spiritus ille animalis est instar spiritûs aërei, qui musicis organis folle inspiratus, unicus tamen tam varios harmonicos sonos edit, quia alio ac alio modo in fistulis frangitur, modulationemque ac varietatem inde rapit.

Verùm tamen similitudinibus istis claudicantibus res tam impedita & recondita, nondum satis expeditur.

Itaque in primis aio: In arce cerebri, & quasi cælo corporis humani, esse re verâ facultatem quandam, quæ non propriam quidem lucem, ut sol in magno Mundo, sed aliquam virtutem analogam spiritibus animalibus ibi fabricatis infundat, & per canales aut tenuissimos nervorum poros, spiritibus plenos radiando, usque ad organa quinque sensuum eam continnet; quo ferè modo sol luminis & radiorum suorum lineas à cælo per aërem ad terram usque continuat.

Hæc verò facultas irradiativa vel in anterioribus cerebri ventriculis, ut Medici tempore S. Augustini existimaverunt; vel certè in medio ventriculo, & cerebri quasi centro; vel deniq; in quarto & postremo occipitis ventriculo, inter cerebellum & initium medullæ spinæ cervicis, ubi spiritus animales

R r r 2 putantur

putantur defæcatissimi. Perfectio enim eorum interioribus ventriculorum fornacibus inchoata, in hac tandem posteriore absolvitur. Audiamus Medicum non malum.

Andr. Laurent. lib. 10  
q. 3. Anat.

*Locus generationis spirituum animalium multiplex est, inquit Laurentius adversus Argenterium. Preparatur namque in plexibus, & superioribus (qui etiam anteriores vocantur) cerebri ventriculis. Excoquitur in tertio; perficitur in posteriore: tandemque & in nervos, & in totum cerebri corpus diffunditur.*

Vnde enim, & in nervos spinæ dorsæ, ad motum localem animale, & in nervos sensorios à cerebro propagatos, ad operationes sensuum, commodius effundi spiritus potest, quam ex sinu illo ultimi ventriculi, in quem cerebellum & initium spinæ dorsæ concurrunt? Aut in qua potius cerebri sede virtus illa irradiativa locari potest, quam in postrema & ultimæ perfectionis officina; ut ex eadem scaturigine & ipsa irradiatio, & spiritus irradiationis vehiculum profluant?

Alij tamen Medici in tota cerebri substantia: quidam, & maxime Fernelius, non in cerebri medulla constituunt, sed in meninge tenui, sive membranâ medullam proximè involvente, quam Arabes Piam matrem appellant. Quod etiam valde inclinât Vallesius.

Vallesius. 66  
Philos. sacr.

*Vitta aurea vocatur meninx tenuis, ait, sive cerebri involucrem. Ea enim, ut vitta quadam, totum cerebrum ambit, constringit, & continet. Vocatur verò ea, non ob colorem, aurea, sed ob utilitatem, quasi pretiosa. Est enim adeo, ut multi Medicorum censeant, non sine magnis argumentis, ad illam potius, quam ad cerebri substantiam pertinere sentiendi principium.*

Argent. lib. 2. de somno & vigil.  
Andr. Laurent. lib. 1.  
q. 12. Anat.

Ab Aristotele autem parum hîc præsidij expectare debemus, qui in corde, non in cerebro, principium sentiendi, & originem nervorum posuit; rei Anatomicae satis rudis, quiq; hominem sua ratione & ingenio potius constituisse videtur, quam videri unquam, qualis sit à natura factus, inquit alicubi Argenterius. Et alius. Scripsit Aristoteles, ait, Libros de generat. de partibus, & de historia animalium; sed multa ex aliorum potius, quam ex propria sententia enuntiavit: neque eum hominum corpora secuisse verisimile est. Non enim in his, qua sensibilia sunt, ita errasset.

Verum



Verum, licet nec ab Aristotele, nec etiam à Medicis posterioribus, qui per sectiones, in omnes cerebri sinus & latebras, ἀνοήτως & curiositatem suam miserunt, adhuc sciamus cubile illius irradiativæ virtutis, in arce tamen cerebri cubare non dubitamus.

Deinde hoc utcumque affirmare possumus: Illam irradiationem per corpus rarum & diaphanum transmitti oportere. Ideo enim humor, aut vapor aliquis opacus in nervum opticum deciduus, viam obstruit, ne radius ille ad oculum trajici possit. Sic in cæcitate illa, quam Medici *guttam serenam* nuncupant, accidit. Sic etiam in somno, quando cerebri rores depluunt in sensorios nervos. Nam *dormientibus consopitur via sentiendi, qua intentionem ad oculos, & alios sensus ducit*, inquit S. Augustinus.

S. August.  
lib. 2. c. 19.  
de Genes.

Tertiò, ut irradiatio in organum sensus perveniat, non est semper necesse spiritum animale continuò fluere à cerebro ad organum, ut irradiationem eò deferat. Post primum enim spiritus defluxum, ubi in nervo optico spiritus jam quiescit, videre tamen perseveramus, & radius à cerebro ad oculum per spiritum in meatu nervi stagnantem, quemadmodum radius solis per aërem immotum, trajicitur.

Quartò, intentio illa sentiendi, ut appellat S. Augustinus, videtur esse qualitas aliqua instrumentaria, quam virtus irradiativa, per spiritum, tanquam per medium, usque ad organum continuat. Nec hâc quidquam insolens est, aut novum. Nam magnes virtutem quandam velut intentionalem per medium aërem invisibiliter spargit, quâ mediante, tanquam instrumento, ferrum procul à se distans sollicitat, & ad se trahit. Sic etiam torpedo piscis virtutem fundit, qua piscatoris manum obtupefacit, & *in limo se occultans, piscium qui securi supernatantes obtorpuere, corripit*, ait Plinius. Et multis alijs naturæ exemplis ostendere possumus, tales virtutes tenues, subtiles, & intentionales, per medium à varijs causis effundi, & præmitti, ut causa principalis, per illas, tanquam per manum, aut baculum, effectum aliquem in remoto attingat.

Plin. lib. 9.  
c. 42.

Non malè igitur Vallesius istam irradiationem spiritibus

impressam comparat illuminationi solis, qua lumine per medium sparso, terram calefacit, & mediante calore, unâ cum virtute conformativa, quam invenit in semine, hordeum, aut triticum conformat & gignit. Nam simili ferè modo, potentia cerebri irradiativa intentionalem illam qualitatem spiritibus imprimit, ut actione per medios spiritus usque ad organum sensûs continuata, ibi tanquam in terra sua, concurrente simul sensu & specie sensibili, conceptum sensitivum formet & gignat.

An autem potentia ipsa in cerebro residens, proximâ causalitate in actionem sensûs externi influat; an verò totam suam causalitatem instrumento suo, sive qualitati impressæ spiritui committat, utrimque ambigi & disputari potest. Ego propius verum esse existimo, ut potentia irradiativa, ex arce ipsa cerebri, proximâ & à se effluente causalitate, effectum illum in distantia attingat.

Causam enim principalem posse effectum in loco distantia, physicâ causalitate attingere, si aliquid spargat & agat per medium, satis in Philosophia est receptum. Ignis enim ex aliquo aëris intervallo, ex stuppâ alium ignem generat, & ex longiori adhuc intercapedine naphtham celerrimè corripit & inflamat.

Plin. lib. 2.  
c. 105.

Sed quid opus causas ejusdem effectûs cumulare, inquires, cum anima cum potentia sua in organo residente, ad eliciendam visionem, aut quamlibet aliam sensationem sufficiat?

Resp. Non sufficit. Aliàs nec specie sensibili esset opus. Natura talis effectûs à tot causis, nec paucioribus emanare postulat. Cur enim similiter non contendis, non necessariam esse actionem solis, sed à sola virtute seminali hordei, aut tritici, fruges istas posse gigni? Voluit ergo Deus in hoc nostro Microcosmo, imaginem magni Mundi, brevi & admirabili compendio construere: ut sicuti sole opus fuit ad conformandos terræ viventes conceptus; ita facultas irradiativa cerebri tanquam cæli nostri, ad formandos sensuum externorum vitales conceptus necessaria esset. Tam multas causas natura & essentia rei flagitat: quid vis amplius? Essentiæ non datur ratio, Spiritus



Spiritus autem animalis unus & idem, ex eadem cerebri officina manans, non tantum omnibus sensuum operationibus, sed etiam motui voluntario facultatis progressivæ servit & sufficit: veluti idem aer telluri circumfusus, ad solis & omnium siderum Influencias in terram deducendas est satis; etiam si Influenciæ illæ in maximè varios desinant & terminentur effectus. Nam, ut idem *malleus ad varia opera fabrilis; ita in re nature idem spiritus ad multa valet*, ut ait Aristoteles.

Arist. lib. 2.  
c. ult. de  
generat.  
animal.

Doctissimi etiam Medicorum, eundem esse censent sensorium & motorium spiritum, & prout à nervis sensorijs aut motorijs, ad sensitivas vel motivas facultates deducitur, his vel illis indifferenter auxiliari.

Disertè Vallesius: *Vnicus est aut spiritus animalis, aut illustratio nis influxus. Nempe per hunc omnes vires facultatis animalis naturâ influunt. Tamen hac illustratione in oculo visio, in auditu auditio fit. Quia oculus est instrumentum comparatum ad videndum, nequaquam ad audiendum &c. Et postea: Sed neque mens humana, aut ratio capit, aliter fieri. Nam oporteret multiplices spiritus in cerebro ipso generari, alios ad oculos, ad aures alios, alios ad reliquos sensus, alios prater hos, ad motus instrumenta demandandos: & hos omnes in certa quadam proportionem. Et esse interim demonem quendam, qui magna deliberatione hos hæc, illos illac, & quò oporteret, utrosque mitteret. Quod, ut in spiritibus contingeret, quantumvis absurde; tamen in illustratione fieri nequaquam potest. Quippe quæ non hæc aut illac mittitur, neque per motum distribuitur, sed ex fulgidi corporis luce necessario in quamvis partem capacem splendoris repente producitur.*

Valles. lib. 2.  
c. 24. Con-  
trov.

Et spiritum eundem esse sensorium & motorium evidenti exemplo demonstrat Clar. noster Plempius. Nam unus & idem spiritus, inquit, in uno modo efficit tantum sensationem in hac parte, modo motionem insuper in illa parte nervi. In ramo v. g. sextæ conjugationis ad stomachum misso, efficit solam sensationem; in ramo eiusdem conjugationis ad laryngem pertinente, efficit etiam motum. Similiter in uno ramo quintæ conjugationis efficit auditionem, in altero eiusdem conjugationis ramo ad linguam & musculos temporales misso, facit motionem.

Vop. Plem.  
lib. 2. c. 3.  
Fund. Med.

Quomodo verò cerebrum hos spiritus in organa sensuum & facul-

& facultatis loco motricis à se effundat, res valde obscura est.

Quidam per systolen, qua cerebrum se comprimit, fieri credunt. Certis enim experimentis Medici jam didicerunt, cerebrum perpetua systole & diastole comprimi & dilatari, imagine simili, & pari rythmo cum corde.

Verum, tam exigua & velut formicans est ista contractio & dilatatio cerebri, ut, an ulla sit, Medici nō ignobiles ambigant. Majori igitur vi expultrice est opus. Cerebrum ergo spiritus illos, ut nutritioni suæ superfluos (quemadmodum ventriculus chylum, hepar sanguinem venosum cum spiritu naturali, cor sanguinem arteriosum cum spiritu vitali, testes semen cum spiritu spermatico) à se repellit: nisi quod ista cerebri expulsio, & spiritus animalis versus oculos, aures &c. aut versus facultatē motricem directio (praesertim quando attentē aliquid sentire, aut membra movere volumus) magis appetitus naturalis imperio sublit, quàm expulsionēs illæ ventriculi, hepatis &c. quæ sunt merè naturales. Instrumenta autem quærant Anatomici.

Spiritus autem iste animalis ē cerebri sinibus in nervos evomitur, non ut locali motu organa potentiarum, etiam facultatis loco motivæ impellant (quia non tanto impetu eunt & arietant, ut molem corporis suo impulsu progredi faciant) sed ut sint subjectum, & veluti pons, quo illustratio & virtus cerebri ad organa sensuum descendat, & per quem etiam contrā, species externorum objectorum organis sensuum impressæ, superius ascendant, & ad cerebrum commeent.

In nervos autem motorios ideo effunditur, ut ad sensum tactus, quo illi nervi pollent, illustrationem deferat, & insuper ad potentiam loco motricem, quæ in iisdem nervis residet. Hæc verò potentia motrix, ab eadem cerebri Influentiā excitata & adjuta, impetum dat proximis membris, ac deinde alia membra, totumque corpus in sequelam trahit.

Si quid tu melius meditatus es, da, quæso te, nobis, & utrâque manu arripiemus. Abditissima enim nobis sunt, quæ tam propinqua nobis, & quæ in nobis ipsis geruntur, imò quæ nos ipsi gerimus. In luce scientiæ rerum istarum homo olim est conditus, sed peccato in tenebras istas & ignorantiam decidit.



decidimus. Iam enim plurima Dei opera sunt in absconsis, & pauca  
videmus operum eius. Infinita enim Dei sapientia tam inenarra-  
bili ingenio illa omnia in mensura, & numero, & pondere disposuit;  
ut S. Augustinus clamet, Faustum & Manichæos cor & oculos  
non habere, qui ex ista organorum, partiumque unius anima-  
lis dispositione, officiorumque conspiratione, etiam si non ad  
fundum, sed in superficie tantum intellectâ, non videant  
Deum & summum rerum omnium Opificem auctorem esse.

Quid in ipsa carne, inquit, vitalia viscera totius formæ convenientia, S. August.  
membra operandi, vasa sentiendi, locis atque officijs suis cuncta distin- lib 21. c. 6.  
cta, & concordit unitate contexta, moderatione mensurarum, paritate  
numerorum, ordine ponderum; nonne indicant artificem suum Deum  
verum, cui verè dictum est: Omnia in mensura, & numero, & pon-  
dere disposuisti? Si ergo cor non perversum atque corruptum vanis fa-  
bulis haberetis, invisibilia ejus etiam per ista, quæ in hac infima &  
carnali creatura facta sunt, intellectâ conspiceretis.

Vt autem aliquam admirabilis hujus opificij divini, & spi-  
rituum per tot organorum tubos discurrentium, & virtutem  
animæ dispensantium, imaginem adumbraret Tertullianus: Lib. de  
Specta portentosissimam Archimedis munificentiam, inquit: Organum anima  
hydraulicum dico. Tot membra, tot partes, tot compagines, tot itine- c. 14.  
ra vocum, tot compendia sonorum, tot commercia modorum, tot acies  
tibiarum, & una moles erunt omnia. Sic & spiritus, qui illic de tor-  
mento aquæ anhelat, non ideo separabitur in partes, quia per partes ad-  
ministratur, substantiâ quidem solidus, operâ verò divisus. Non longè  
hoc exemplum est à Stratone, & Ænesidemo, & Heraclito. Nam & ipsi  
unitatem animæ euentur, quæ in totum corpus diffusa, & ubique ipsa,  
velut flatus in calamo per cavernas, ita per sensuality varijs modis emi-  
cat, non tam concisa, quàm dispensata.

Sed ista portentosissimæ Archimedis machinæ comparatio  
quotâ animantis machinæ (ut Columella animal appellat) partem  
similitudinis attingit? Infinitò enim amplius ingenij, & solertiæ  
incomprehensibilis in Dei quàm mortalis hominis operibus.  
Alias quasdam quæstiones, quæ hîc disputari possent, ut: An  
sensus in functionibus suis, speciebus & imaginibus objecto-  
rum necessariò uti debeat: An medium inter objectum &

potentiæ organum interjectum necessarium sit &c. in singulorum sensuum tractatibus melius & distinctius explicabimus.

CAPVT III.

De objecto visus.

**I**Nter sensus externos princeps est visus. Quia verò definitur, Sensus externus percipivus coloris, & objecta sunt priora potentijs, tanquam scopi in quos potentiæ & earum actus diriguntur; idcirco de colore ante visum & actum videndi, agere oportet.

ARTICVLVS I.

Quid lumen?

**C**olor generaliter, est qualitas tertiæ speciei visibilis. Sub se colorem specialiter dictum & lucem comprehendit. Sic de luce tanquam colore loquitur S. Augustinus, cum eam *reginam colorum* appellat.

S. August.  
lib. 10. c. 34  
Confess.

Lumen & lux sæpe usurpantur pro synonymis, quia ejusdem naturæ & speciei esse creduntur. Qui tamen scrupulosius loquuntur, lucem vocant qualitatem illam fixam in corpore luminoso, lumen verò in medio diaphano. Vnde in sole, & igne est lux, lumen autem in aëre ab ipsis illuminato.

Arist. lib. 2.  
c. 7. de  
anima.

Lumen definit Aristoteles actum diaphani, sive perspicui, qua ratione perspicuum est. Id est, Lumen est forma quæ in corpus diaphanum recipitur, secundum ipsam diaphaneitatem, tanquam potentiam susceptivam luminis. Quanquam perspicuitas potius videatur esse qualitas quædam disponens corpus, ut intrinsecus recipere lumen possit, quàm potentia passiva luminis, quæ illuminabilitas potius appellari debet. Perspicuitati autem opponitur opacitas.

An lumen sit qualitas, an corpus olim dubitatum est. Passim jam post Aristotelem, S. Thomam, & Scotum, dicimus esse



esse qualitatem; licet Gallorum pænè doctissimus Adr. Turnebus fortiter resistat. Credit ipse lumen esse corpusculorum quorundam splendentium effluvium, quod à sole effluens poros & canaliculos aëris interdiu replet ac inflat, noctu verò vacuos & conniventes deserit. Naturam enim non adedò horrere vacuum putat, quin minusculum aliquod libenter admittat.

Sed profectò, si lumen corpus esset, non in momento, sed tempore successivo, à cælo ad terram deflueret: quod falsum esse Vitello & Perspectivi demonstrant: verissimumque quod ait S. Thomas, *codem instanti quo illuminatur Luna à sole, illuminari aërem à luna*. Quod tamen falsissimum foret, si lumen solis debeat motu locali successivo ad lunam usque diffundi, & inde à luna ad aërem redire. Vacuum deinde quo Turnebus aërem, ad transitum luminis, perforat, olim explosum est tot experimentis contrarijs.

S. Tho. 1. p. 2.  
q. 63. a. 5.

Denique non solum aër, aqua, & corpora illa fluida luminis intrinsecus capacia sunt, sed etiam vitra, & crystalli, quæ minimè porosa sunt: eo argumento, quòd voces per media vitra, minus quàm per ferrum & corpora maximè opaca, exaudiri possint. Si igitur lumen corpus est, non aliter per vitri crassitiem transfundere se poterit, quàm per penetrationem dimensionum, quæ naturaliter est impossibilis.

An autem lumen sit qualitas ejusdem naturæ cum specie visibili lucis, in ambiguo est. Nos subtili Scoto assentimur, qui affirmat. Lux enim solis non eget alia specie visibili, ut ab oculo cernatur, quàm radijs illis luminosis, quos per ætherem & aërem ad oculum nostrum trajicit. Deinde radij luminis eodem modo, & genio à luce jaciuntur, & reflectuntur, quo species visibiles à colore. Frustrà igitur & ex superfluo aliæ species visibiles lucis finguntur, distinctæ à lumine. Si objicias, lumen in aurora, aëre, & nubibus videri; speciem autem visibilem coloris, esse tantum rationem & causam videndi colorem, ipsam verò non videri: falleris.

Scot. 2. d. 13

Species enim visibilis coloris, per angustum foramen in conclave obscuratum immissa, non secus oculis aspicitur,

quàm lumen auroræ, Iridis, aut nubium, ut postea demonstrabimus.

Nec refert etiam, quòd lumen sit calorificum, species autem sensibiles videantur solum actionis intentionalis, non actionis realis esse principium. Nam postea quoque ostendemus, non tantum speciem visibilem lucis, quod est lumen, sed etiam species aliorum sensibilibus objectorum realem actionem posse exercere. Vel certè, licet species aliæ intentionales fortè non alterarent aërem reali, ut loquuntur, alteratione; hoc tamen peculiare dicemus esse lumini, cujus esse non est purè intentionale, sed mixtum, ut rectè Cajetanus dicit. Ceteræ verò species à multis creduntur purè intentionales, nec ad aliam actionem idoneæ, quàm ad intentiones vitales, quibus potentia cognitiva in objecta sua tendunt & feruntur.

Quid enim sit, *habere esse intentionale*, optimè uno verbo expedit Scotus: *Est esse per se*, inquit, *rationem tendendi in objectum*. Nam hoc, ait, *sufficit ad rationem intentionis*. Indeque concludit, lumini non repugnare, ut res sit, & simul intentionis rationem induat.

## ARTICVLVS II.

### *Quid color?*

Plat. in  
Timæ.  
Scalig.  
Exer. 32 s.

**M** Iratus est olim Plato humani ingenij hebetudinem, quod naturam colorum, quos oculis tam clarè cernimus, penetrare non valet. Et Scaliger: *Quid sit color, haud facile est definire. Latet enim natura hac, sicut & alia rerum species, in profundissima caligine inscitia humana*. Et tantundem dicere possumus de ipsa luce & lumine, quæ tam validè oculos nostros feriant, nec tamen, quid sint, intellectu satis percipimus.

Ite jam ergo mortales, & de ingenij acumine vobis placeat. Ite hæretici, & istâ hebetudine in res divinas penetrare. Quæ ante pedes jacent non capitis, quomodo quæ supra cælos sunt comprehendere vultis?

Aristote.



Aristoteli omnem colorem è qualitatu primarum mixtione oriri placet. Sed quomodo igitur quæ temperamentis qualitatum primarum longissime diffident, uno colore tinguntur? An fortasse nivem, lac, calcem, farinam, saccharum, chartam, arsenicum, lilia, temperamenti unius esse dices, quia omnia simili & indiscreto candore perfusa videmus? Nonne etiam pleraque genera herbarum, temperamentis toto cælo distantia, virore tamen propinquissima sunt? Deinde si color, & sapor ex solis temperamentis resultant, cur plantæ & mixta unius coloris, saporem etiam eundem non habent? Non nego tamen primas qualitates aliquid dispositionis remotæ ad resultantiam colorum conferre, atque ideo colores, qualitatum secundarum nomen posse recipere.

Fernelius autem, ut citissime omnibus difficultatibus se expediât, ait colorem non ex temperamento, sed qualitate corporum occultâ resultare. Plato verò, cui assentior, esse *φλόγα τῶν στοιχείων ἀπορέουσα* *flammulam à corporibus emanantem*. Veluti enim in Iride, aurora, nubibus, & prismatibus, ex luminis & opacitatis mixturâ, varij colores resultant. ita ex flammulæ, sive luminis cujusdam languidi, & umbrôsæ opacitatis mixtione, colorum innumera *ποικίλματα*, sive *varietates* temperantur. Vnde idem Plato, *nihil sine igne videri* dicit, hoc est, sine luce quadam ignea, quæ aut pura est, aut opacitati mixta, colores facit.

Nec in ea sententia solus Plato, sed Aristoteles, S. Thomas, veteres Thomistæ, ut Thomas Hurtadus bellè demonstrat. Quid enim evidentius istis S. Thomæ verbis, ubi veros in Iride colores esse probat? *Principium veri coloris in actu*, inquit, *est perspicuum aliquo modo terminatum in ratione materiæ, & lumen ibi exstans actu, in ratione formæ. Sed ista ambo sunt in Iride, sive in eo in quo apparet Iris. Ergo sequitur, quod cum in Iride sint actu omnia principia veri coloris, sint ibi veri colores. Licet color ibi habeat esse debile, quia principia ejus non sunt ita permanentia, sicut in corporibus mixtis terminatis; in quibus principia coloris consequuntur principia intrinseca corporis mixti. Quæ verba S. Thomæ si vidissent sapientissimi Patres Carmeli, non dubito, inquit Hurtadus,*

Th. Hurtad.  
controv. I.  
membr. 9.  
§. 6. Præ-  
curs. Philos.  
S. Tho. lib. 3.  
Meteor.

Capreol. 2.  
d. 14.

quin intellectum ad eam sententiam defendendam applicassent. Viderat autem illa, credo, Capreolus, & post eum Soncinas, cum lucem formale albedinis appellavit.

S. Th. 1. p.  
q. 5. 1. a. 2.  
ad 3.

Et nonne etiam alibi S. Thomas aërem & nubes absolute colorari dicit? *Aër*, inquit, *in sua raritate manens non retinet figuram, neque colorem; quando tamen condensatur, & figurari & colorari potest, sicut patet in nubibus.* De propria autem coloratione, sicut figuratione, loqui eum apparet.

Ansel. Boëtius lib. 1.  
c. 15. de  
genimis.

Igitur colores illi punicei, virides, purpurei, & tot aliorum mixturæ, qui ex luminis in prismaticis, & triangularibus vitris refractione resultant, veri & ejusdem naturæ cum ceteris coloribus erunt. Probatque eruditus Belga Anselm. Boëtius in Iride gemmâ, & crystallo hexagonâ, quæ licet absolute diaphanæ sint, nec colorem ullum à se habeant, tamen ex luminis refractione in multiplices superficies, possunt varios colores gignere. *Quomodo autem id fiat, inquit, difficile est assequi. Experientia tamen ex luminis reflexi cum umbra varia mixtione id fieri docet. Difficultatem hanc intellectui parit umbra, quæ cum nihil sit aliud quam privatio, positivum tamen aliquid efficere possit. Sed à sensu recedendum non est, inquit, licet intellectus id non capiat.*

Sed tamen profecto incredibile est quod interferit, umbram aliquid positivum efficere; & potius asserendum, solum lumen, non umbram ei permixtam, esse quidquid positivum est in colore.

Hoc tamen rectum, & in favorem sententiæ S. Thomæ & Hurtadi, quod addit: *Qui nullos colores in Iride esse, sed tantum apparere arbitrantur, colorum naturam non rectè comprehendunt.*

Ephes. 5.

Quid igitur? inquires. An omne quod videtur est lumen? Omnino. Cur enim non tantum cum S. Thoma & Aristotele, sed cum S. Paulo affirmare ausim, *Omne quod manifestatur lumen esse?* Quemadmodum enim lux ad solem, ad ignem, ad lampyrides, & ad quædam alia corpora lucida se habet, in quibus fixa permanet; ita color ad flores, plantas, lapides, & cetera corpora colorata, quibus cum mixtura opaci incorporatur. Sicut deinde lux per medium diaphanum, sive perspicuum, lumen



lumen suum radiat; ita color suam speciem. Hoc solo discrimine, quod lux non indigeat antecedente illuminatione, ut diaphanum moveat, sed movendo ipsum, illuminat & immediatè à tenebris ad lumen transfert; color verò nisi per medium actu illuminatum speciem sui non trajicit. Vnde Aristoteles colorem definit, *Motivum diaphani actu*. Nam actus, sive forma quâ diaphanum sic actuatur, ut ipsum proximè actu idoneum reddat, ut à speciebus colorum moveatur & depingatur, est lumen.

Vt autem res tota à radicibus exponatur, generatio colorum nullo probabiliore modo expediri potest, quàm Theophrasti in Libro de coloribus, & præceptoris ejus Aristotelis in Libro de sensu. Nempe, ex varia commixtione diaphani & opaci, in corporibus terminatis resultare quandam luculam, magis claram, aut umbrosam, prout plus diaphani, aut opaci in ea permixtione fuerit. Luculam istam vocamus colorem. Qui non aliter à coloribus Iridis, & ijs quos apparentes appellamus, distinguitur, quàm quia hic habet esse permanens, & principia ejus, ut statim aiebat S. Thomas, *sequuntur principia intrinseca corporis mixti*: præcipuum verò principium colorum Iridis & similium, sit lumen ab extrinseco irradiatum, & opaco nubis permixtum. Pro diverso autem situ oculi, variat Iridis ille color apparentiam; quia mixtura opaci & luminis, ac reflexio ad oculum, simul cum motu oculi variantur.

Hinc si ad Iridem cornibus terram attingentem accedere velis, fugere ante te videtur, & cum ad locum perveneris, ubi cornua ejus terræ contigua videras, nullum ampliùs ibi colorem, sed aërem tantum liquidum aspicias. Et inde natum est, ut colores illi apparentes & phantastici appellentur; licet verorum colorum principia, sed in alio corpore obtineant.

Hinc intelligitur altera definitio coloris, quam Aristoteles, naturam definiti profundius, quàm Libro secundo de Anima, penetrans, nobis in Libro de sensu & sensili concinnavit: *Color est diaphani in corpore terminato extremitas*. Definitio sanè, ut mihi videtur, à paucis intellecta. Diaphanum enim interpretantur aërem, aut aquam, aut simile aliud corpus planè diaphanum, medium

Arist. c. 34  
de sensu

medium inter oculum & objectum coloratum. Quod à mente Aristotelis maximè est alienum. Nam diaphanum de quo loquitur, est *in corpore terminato*, sive cuius diaphaneitas non est tanta, ut visum transmittat, sed opacitate admixtâ ita se restringit & terminat, ut visui transitus non pateat. Cetera verò diaphana, ut aërem, & alia per quæ species visibilis & visus transit, diaphana ἀόριστα *interminata* vocat.

Vnde in eo distinguit lumen à colore, quòd lumen sit ἐν ἀόριστῳ διαφανῇ *in diaphano interminato*, ut aëre, aqua &c. color verò ἐν πέπλῳ *in extremitate* diaphani terminati. Colorem enim proximè visibilem, & ex summa cute corporum terminatorum, sive opacorum efflorescentem, tantum definit: licet admittat eandem esse naturam coloris, quo tingitur corpus ἐξω καὶ ἐνδὸς *externis & internis*.

Definitio autem est causalis. Nam *color*, inquit aperte, est *in corporis extremitate*, non ipsa corporis extremitas. In definiendo tamen voluit phrasin Pythagoræ imitari, qui dicebat, colorem esse corporis colorati ἐπιφάνειαν *superficiem*.

Quomodo? inquires. Admittitne ergo Aristoteles, in pariete, aut lapide colorato aliquam diaphaneitatem, seu perspicuitatem?

Aristotel.  
ibidem.

Omnino admittit. Et audi ipsum. Quod autem dicimus diaphanum, inquit, non est proprium aëris, vel aquæ, nec alicujus sic dictorum corporum (quæ nempe simpliciter diaphana appellantur) sed est quædam communis natura & virtus, quæ separata quidem non est, in his verò & in alijs corporibus; in his quidem magis, in illis verò minus.

In omnibus ergo corporibus coloratis, quæ terminata & absolute opaca denominantur, est quædam permixta perspicuitas, si alba, aut colore quocumque medio tincta sint, exceptis solum ijs quæ nigerrima & summe opaca sunt. Sententia igitur Aristotelis aperta est: colorem in corporibus opacis nasci ex mixtura alicujus majoris aut minoris perspicuitatis cum opaco; simili modo quo colores nubium apparentes, ex mixtione luminis cum opacitate nubilosâ. Audi enim eum iterum. Manifestum, quòd idem & ibi (in corporibus diaphanis, quando



quando lumine colorantur ) & hic ( in corporibus opacis propriè coloratis ) *susceptivum coloris est*. Quodnam verò est illud commune *δεκτικὸν τῆς χρώας* *susceptivum coloris*, in corporibus diaphanis & opacis ? Nempe diaphanum aliquod omnibus commixtum. Addit enim: *Diaphanum ergo secundum quod inest corporibus ( inest autem plus aut minus ) in omnibus colore facit participare.*

Quid magis *διαφανὲς* & perspicuè potuit dici ? Nec magis mirum, in auro, argento, lapidibus, ac omnibus universim coloratis, aliquid diaphani & tenuis perspicuitatis esse admixtum, quàm humiditati aquæ ( quæ à Peripateticis creditur non esse summa ) aliquid siccitatis, & siccitati ignis aliquid humiditatis. Sic igitur ex sententia Platonis, Aristotelis, & Theophrasti, statuendum videtur: Colorem esse quandam lucem corporis colorati, sed impuram, propter mixturam opaci in eodem corpore. Albedinem verò inter omnes colores plurimum lucis, minimum opaci habere, etiam si tantum habeat, ut res albæ, v. g. calx, aut nix transitum occludant lumini. Ceteri verò colores plus aut minus internæ lucis participant, quo propius aut longius distant ab albedine. Nigrum verò, quod nihil omnino lucis incorporatum habet, propriè coloratum non est. Vnde Aristoteles ait, τὸ μέλαν *Arist. c. 37* *ἐστὶν εἶνα τοῦ λευκοῦ*, *nigrum esse privationem albi*; & paulò ante nigredinem ad albedinem se habere, quemadmodum tenebræ ad lumen. Perfectæ autem tenebræ carent omni luce, suntque mera privatio luminis, & re verâ nihil. Vnde nec videntur conceptu positivo visivo, sed anima dicitur eas videre, quia oculis apertis experitur se nihil videre.

Egregiè enim noster Augustinus: *Tenebræ nihil sunt aliud* *S. Aug. c. 31* *quàm lucis absentia, quæ oculis non videndo discernuntur, sicut silentium auribus non audiendo. Non quia tenebræ sunt aliquid, sed quia lux non est.* *contra Epist. fundam.*

Refellit tamen, hanc nigredinis cum tenebris similitudinem Io. Buridanus, quia *lanarum nigra nullum colorem bibunt*, *Io. Burid. in Lib. de anim. Plin. lib. 8. c. 48.* ut ait Plinius. Biberent autem avidissimè, si nigredo esset albedinis, aut luminis mera privatio. Nonne enim videmus,

quàm promptè & avidè aër nocturnus, qui solâ privatione luminis nocte nigrescebat, manè auroræ ruborem rapiat?

Sed profectò, mi Buridane, non eadem tenebrofi aëris, & nigræ lanæ, in raptu aut potu colorum, est ratio. In lana enim nigra est positiva quædam obstinatæ opacitatis & inimica luci omnium colorum, dispositio; quæ nequaquam est in aëre.

Hinc sequitur, à nigredine nullam propriè speciem visibilem exilire; non magis quàm à tenebris profundæ noctis, aut profundissimi putei, in quem cum fortè despiciamus, nihil amplius videmus, quàm si clausi essent oculi.

Non ens enim nihil positivum potest producere. Pinguntur tamen in fundo oculi suo modo tenebræ, veluti umbras corporum in sole ambulantium pingi videmus picturâ mobili, in terra, vel in charta alba, opposita foramini conclavis obscurati. Quod autem quidam aiunt, umbras illas depingi, quia aliquid vicini luminis admixtum habent, per quod visibiles fiant, nullius est momenti. Quo enim umbræ minùs luminosæ sunt, eo perfectiùs & insigniùs depinguntur; unde si nihil omnino luminis permixti haberent, insigniores & nigerrimæ apparerent.

Hoc quoque species visibiles positivas nigredinis satis refellit: Quòd si aliquæ tales essent, non possent in superficie corporum candidorū dilui à lumine solis. Vnde species nigricantes hominis nigri, inter parietes albos interdiu ambulantis, apparerent & ambularent cum ipso in parietum superficiebus. Sol enim lumine suo umbras tantùm, non positivam nigredinem, aut positivas species extinguere, aut offuscare valeret.

Ideo autè nigredo apparet esse color realis & positivus, quia instar albedinis, aut cujusvis alterius coloris positivi, radiare videtur, & radij (tales quales mittit) reflectuntur, refringuntur, & omnes formas & leges radiorum positivorum subeunt. Sed quàm tamen hoc argumentum sit fallax, inde patet; quia umbrarū etiam radij (quas nemo esse entia privativa dubitat), omnes easdem reflexionum & refractionum leges recipiunt. Imò, quod est admirabilissimum, umbræ ambulantium in sole,

non



non minùs quàm veri colores, in conclavi obscurato depinguntur, nec transitu per aërem foris luminosum sic diluuntur, ut intereant.

Ex his patet, albedinem & nigredinem non opponi re verâ contrariè, sed afferri à Philosopho solùm ut similitudinaria exempla, quia exemplorum, ut dici solet, non requiritur veritas. Et *Aristoteles consuevit maximè in Libris Logicalibus*, ait S. Tho. *ponere exempla quæ probabilia erant suo tempore, secundum opinionem aliquorum Philosophorum*. Transitur tamen non instantaneè, sed successivè ab albedine ad nigredinem; quia colores non mutantur, nisi successivâ alteratione inter qualitates primas, quibus perspicuum & opacum variantur; ex quibus colores omnes, tanquam ex proximis dispositionibus, resultare videntur.

Quænam verò sit causa efficiens physica resultantis colorum, res obscurissima est, & fortè inter eas de quibus dicat sapiens, *Altiora te ne quaesieris, & fortiora te ne scrutatus fueris*. Plurimarum enim rerum naturalium superficies tantùm nobis ostendit Deus, quas si in profundo scrutari velimus, fundum non inveniemus. Hoc autem ad humilitatem nostram, ne in acumine nostro nimium nobis placeamus, sed potentiam & inscrutabilem sapientiam Dei, etiam in istis ante oculos, ut apparet, tam expositis, admiremur & laudemus. Articulo tamen sequenti dicis ergò aliquid dicemus.

## ARTICVLVS III.

*An in tenebris sint colores.*

**T**Anquam Poëta, & non ex vero, aiunt passim Philosophi, cecinit Virgilius:

*Est iter in silvis, ubi calum condidit umbrâ*

*Æneid. 6.*

*Iupiter, & rebus nox abstulit atra colorem.* Et alter:

*Ovid.*

*Iam color unus inest rebus, tenebrisq; teguntur*

*Omnia.*

Sed Cardanus sine fictione Poëtica ait, nivem quidem albam

T t t 2

esse

Card. lib. de  
gem. & co-  
lor.

esse etiam nocte sub dio, quando tenui siderum fulgore perstringitur; *at in conclavi tenebroso non videri, sed nigram esse, ut reliqua omnia.*

Et sanè, si res revocetur ad limam, non erit tam absurdus, quàm apparet primâ fronte, qui dixerit, à nocte auferri & extinguì colores rerum, sicut ipsa extinguit diem & solis lumen. Imò Albertus rerum naturalium scientiâ verè Magnus, *opinionem vulgi* appellat, quæ tenebris colores regi, non auferri existimat.

Censet igitur, nec ipse solus, colorem aliud non esse, quàm lumen solis, ignis, aut alterius luminosi, *diffusum super perspicuum terminatum.*

Variatur tamen, & in puniceum, viridem &c. colorem lumen in superficie coloratorum transmutatur, propter diversitatem dispositionum corporis quod lumine perfunditur. Cur enim in tenebris non appareret color, inquit Albertus, præsertim albus, si instar lucis, in superficie parietis albi lucet? Deinde, si colores in profundo corporum latent, quare interdiu se non manifestant, & in aspectum erumpunt; sicut lux solis, aut flammæ, non è superficie tantùm, sed ex profundo talium corporum nobis lucet?

Bened.  
Epist. ad  
Philibert.  
Pignonium

Vicinus hæc opinioni est vir Matheseos & Philosophiæ consultissimus Io. Bapt. Benedictus, qui lumen solis penetrare aliquousque infra superficiem corporum coloratorum, & eorum colore infici ac colorari credit. Vnde objectum visus, inquit, *non est color qui est in corpore colorato, sed lumen ab eodem corpore reflexum, & corporis colore tinctum.*

Sed fortasse veriùs, & Alberto viciniùs dixisset, nullum in corporibus hære colorem, sed lumen extrinsecum illabi opaco infra superficiem, & ex permixtione ejus colorari, sicut coloratur ex mixturâ opaci nubium. Neque enim te ignorare volo, inquit Benedictus, *lumina reflexa colorata non reflecti à puris proprijsq; superficiebus corporum coloratorum; eo quòd pauca corpora tam opaca reperiantur, ut immediatè lumen à superficie propriè reflectant; sed lumen penetrat aliquantulum dicta corpora, & illorum colore afficitur: ubi verò non penetrat, non coloratur colore corporis illius.*

Si



Si ergo radius solis penetret etiam intra minimæ profunditatis opacum, jam intelligi potest, mixturam luminis cum ejusmodi opaco sufficere ad colorandam summam quasi corporis illius cutem. Nam, an interius & profundius corpora sint colorata, nullo sensu deprehendi potest. Si enim melonem divides, videbis quidem in ipsis cæsuræ duabus superficiebus colorem rubeum; non tamen, qui antea ibi erat, inquit, sed qui resultat ex lumine solis, aut candelæ, ad quod interanea tui melonis aspicias.

Sed probabilius cum Aristotele existimo, corpora non tantum *ex exterioribus*, sed *interius* etiam esse colorata, & colorem esse non extrinsecum & transitorium solum, sed intrinsecum & permanens quoddam lumen. Nam non tantum in superficie & summa cute, sed etiam in profundo principia colorum delitescunt. Ea sunt, ut Aristoteles, & Theophrastus antea nos docuit, diaphanum quoddam tenue, & opacum quibus corpora colorata, etiam ad centrum usque pervaduntur ac persuaduntur.

Arist. c. 3.  
de sensu.

Ex his, quasi colorum proximis dispositionibus, emicant & diffunduntur, credo, per totum corpus colores. A qua verò causa physica efficiente? Nunquam in puteo Democriti, id est, divinæ sapientiæ arcanis, fui, ut hoc dicam. Fortasse perspicuitas est qualitas positiva, & vim habet efficiendi colorem. Nam opacitatē hoc posse, vix credere possum. Hæc enim non aliud esse videtur quam tenebræ & umbra quædam, orta ex eadem dispositione, ex qua oritur nigredo; vel aliquando ex locali situ & dispositione partium continui, hebetantium lumen & impedientium ne transeat per corpus quod vocatur opacum.

Quod exemplo glaciei, vitri, & crystalli discere licet. Nam tria hæc corpora diaphana sunt, quando partes eorum continuantur, & æquabiliter disponuntur. Si verò comminuantur, alba instar farinæ aut salis apparebunt, & tam opaca, ut nullum lumen jam valeat penetrare. Qua de causa? Quia, opinor, singulæ illius farinæ atomi suis superficiebus distinctis jam terminantur, quibus lumen repercutiunt, & innumeris repercutiōibus sic debilitant, ut vires ad penetrandū ei defi-

ciant. Albedo verò illa glaciæ contractæ non aliud esse videtur, quàm lumen solis extrinsecum, quod per reflexiones datas & acceptas in singulis particulis multiplicatur, & in candorem illorum efflorescit.

Deinde licet opacitatem qualitatem positivam esse daremus, tamen non nisi nigredinem, & fuscum, ceruleum, ceterosque colores atros, non autem albedinem, aut flavum, puniceum, & alios suo lumine ardentem producere posset.

Sed neque perspicuitas, ut equidem existimo, colores producere valet. Cur enim aliàs nocturni aëris, aut nubium perspicuitas, sine extrinseco lumine solis, non efficeret colorem, & aëra tingeret, aut nubes? Certè enim perspicui & opaci in illis corporibus sæpe mixtura sufficiens est ad coloris generationem, si non abesset causa efficiens.

Deinde, fortasse nec perspicuitas est semper qualitas positiva activa, quæ colorem, aut aliam qualitatem possit generare; sed aliquando solum est continuitas & æquabilitas quædam sitûs partium, quæ subiectum suum ad intrinsecus admittendum & recipiendum lumen disponit.

Ansel. lib. 1  
c. 14. de  
gemmis.

Hoc enim sentit eruditissimus Ansel. Boëtius, Belga Bruggensis, Medicus olim Cæsareus. *Continuitatem diaphaneitatis causam esse, inquit, ea expresse ostendunt, quæ diaphana cum non sint, talia redduntur, si id adveniat quod partes discretas continuet, hoc est, uniat absque discretione. Vnde charta simplex, opaca cum sit, affuso oleo calido diaphana & transparens redditur.*

Igitur, ut cæcus de coloribus, sic cogito, & conjecto.

Sicut à forma substantiali solis & ignis, & quorundam aliorum corporum in tenebris lucentium, lux tanquam naturalis proprietas resultat, præsuppositâ aliquâ perspicui & opaci in illis corporibus mixturâ; ita à corporum mixtorum formis resultant colores: maximâ autem ac fermè innumerabili varietate, propter numerosissimè variantem perspicui & opaci mixtionem.

Vnde veluti corpora mixta, ex quatuor elementis constant; ita formæ mixtorum aliquid de virtute quatuor formarum elementarium participant. Vim efficiendi opacitatem (eo modo



modo quo effici potest ) habent à forma terræ; vim efficiendi perspicuitatem, à formis aëris & aquæ; vim efficiendi colorem ( aut lucem potius inclusam in colore ) à forma ignis.

Formæ igitur lilij, aut rosæ, quatenus aliquid igneitis in se habent, colorem illum candidum, aut rubicundum in corpus suum effundunt; quemadmodum forma ignis illuminat ignem suum luce uberiore, quâ vincere etiam possit noctis caliginem; aut forma *carbunculi* gemmam suam, *cuius fulgor nocte non vincitur*.

S. Aug. lib.  
2. c. 10. de  
Genes.  
contra Ma-  
nichæ.

Putabit verò quispiam, non solum formas mixtorum, sed etiam formas elementorum vim habere producendi proprium colorem: cum tamen pura elementa ullo vero colore tincta esse neget Aristoteles. Aqua enim spumans albescit, & nix tam candida quid substantialiter aliud est quàm aqua?

Attamen non credo aquam à sua forma posse dealbari. Perspicuitatem habet à sua forma, non albedinem. Candor autem spumæ est lumen solis, spumeis bullis aëre plenis infusum, & fictingens. De nive idem existimant nonnulli. Sed fortasse verius est quod ait S. Thomas: *Albedinem in nive sequi principia essentialia subjecti; & ideo nivem non posse fieri nigram*. Vnde præter lumen extrinsecum affusum à sole, nix ab intrinsecis principijs essentialibus candorem aliquem habet, id est, à forma sua substantiali, non elementi aquæ, sed corporis cuiusdam mixti, præsertim quantum ad spiritus, quibus tota undique turget, & in quibus candor ille præcipue lucet. Nec enim, quia nix in elementum aquæ tam facile convertitur, signum est formam aquæ in ea mansisse. Nam multa mixta liquida facile aquefcunt, & transmutationes substantiales strenue agiliterque eunt redeuntque sæpe inter eadem extrema.

S. Tho. 1. p.  
q. 9. a. 2.

Color ergo non est, ut censebat Albertus, solis aut ignis tantum lumen, superficiem corporum opacorum illuminans, sed est interna & fixa quædam lucula, quæ à formis substantialibus naturaliter manat, sicuti à forma ignis & solis lux infinito pane uberior & plenior. Vnde tenues illæ colorum luculæ non habent satis virium, ut per tenebras noctis radient,

dient, aut saltem tam efficaciter, ut imagines suas in oculis nostris sensibilibiter efforment. Vnde *nescimus*, ait Keplerus, *an colores de profunda nocte luculas non spargant suas*. Ex profundo etiam corporum opacorum, eadem de causâ, interdum non radiant colores, quia ibi sunt tenebræ, per quas, species suas usque ad aërem illuminatum foras trajicere non possunt. Et sic ad argumenta Alberti satis puto esse factum.

Breviter ergo, sicut ad generationem colorum Iridis, auroræ, & nubium, præter perspicui & opaci mixtionem, quam nubes à se habet, requiritur lumen solis extrinsecus illabens; ita quoque ut color in corpore mixto generetur, non sufficit perspicui & opaci mixtura, sed forma substantialis mixti accedere debet, quæ sua igneitate illuminet, id est coloret tam intrinsecus quam extrinsecus corpus mixtum.

Sed ecce statim densum se mihi objicit obstaculum. Si enim in profundo glebæ auri, aut argenti sit tanta opacitas, ut radius solis non valeat nisi summam vix cutem penetrare, quomodo potest forma substantialis auri flavo colore totam illam massam illuminare? Si perspicuitas interior non sit tanta, ut ullum extrinsecum, etiam acerrimum solis lumen valeat penetrare, quâ ratione tenuis ille formæ auri fulgor universum usquequaque auri corpus potest pervadere?

Vt respondeam, velim primum cogites, inter corporum opacitatem & densitatem latum esse discrimen. Aqua enim est longè densior quam nubes, & tamen minùs opaca. Vitra, crystalli, adamantes, & tot lapides pellucidi, densissimi sæpe sunt, & tamen minimè opaci. Sic ergo ferè de auro existima. Corpus densissimū est, & tamen aliquid internæ perspicuitatis habet, cui tanquam dispositioni, forma substantialis auri rubentem illam aurei coloris luculam potest infundere. Non sufficit tamen perspicuitas tantula, ut transitum aperiat externo solis lumini. Quomodo igitur, inquires, aperit formæ auri?

Resp. Non aperit propriè; quia forma illa colorificum & auratum suum radium non trajicit ab una parte glebæ aureæ in alteram.

Attende quid velim. Pars illa formæ auri, quæ informat ducati



ducati Hispanici superficiem capitibus Regum inscriptam, non trajicit radium coloris usque ad oppositam superficiem, cui Insignia Regni Castellæ impressa sunt; sed unaquæque particula formæ auri colorat solum particulam materiæ sibi adæquatam, & cui intimè infusa est per quandam penetrationem. Vnde non jaculatur radium suum colorificum in distans, sed solum effundit colorem & tincturam suam in sinum suum, sive potius, in sinum materiæ eundem illum quem ipsa forma auri informat. Ad hoc autem longè minor perspicuitas, quàm ad trajectum luminis, sufficit. Aliqua tamen requiritur, ne nimia opacitas luculam coloris suffocer, & in nigredinem prorsus extinguat.

## ARTICVLVS IV.

*An color specie distinguatur à luce.*

**L**icet dixerimus, colorem sic se ad corpus mixtum habere, quemadmodum lux ad solem, aut ignem se habet; dubitatio tamen restat, utrum color sit qualitas ejusdem, an diversæ speciei à luce.

Plerique videntur imaginari, colorem esse qualitatem magis mortuam, & alterius longè rationis ac speciei à luce. Colligunt ex effectibus, quia lux est calefactiva & rarefactiva, non color.

Deinde si color esset lux quædam, cur albedo parietum densissima nocte non aspergeret aliquo candore totum cubiculi aërem? Certè enim lampyrides & noctilucas, inter tenebras noctis lucere in agris videmus, etsi scintillæ tantum, & veluti puncta sint languidi luminis. Oculi præterea multorum animalium sic nocturnum aërem illuminant, ut venari, & prædas agere, ac cernere inter tenebras possint. Videbat quoque internoctu Tiber. Cæsar, & Asclepiodotus tantum luminis ex oculis fundebat, ut sine alia lucerna, nocte libros, legeret. Si igitur albedo lux est, cur inter amplissimos & candidissimos parietes, noctu totus cubiculi aër non est illustris?

V u u

Sed

Sed tamen hæc argumenta non evincunt, quin colores possint dici luces quædam languidæ, & in opaco suo semisuf-focatae; quemadmodum Iridis, auroræ, & crepusculorum puniceus, viridis, purpureus colores, sine dubio, sunt vera solis lumina, licet ferè extincta in nubibus. Cum ergo corporum mixtorum colores ex simillimis causis, id est, ex perspi-cuo & opaco oriuntur, unius essentia cum luce esse videntur.

Deinde species visibiles colorum eodem prorsus modo, quo radij luminosi per medium diaphanum jaciuntur, reflectun-tur; imò dilutis à majore lumine umbris, quibus implicitæ à coloribus suis effunduntur, in puros luminis radios quasi transformantur.

Hæc enim unica causa esse videtur, cur parietes albi in-terdiu non appareant passim speciebus vicinorum colorum depicti; sicuti in conclavi obscurato, paries albus, aut charta, è regione foraminis depingitur. Species quoque albedinis perinde visum disgregant, & afficiunt oculum, sicut radij lucis.

Non igitur de nihilo S. Thomas olim dixit, *Hypostasim colo-ris esse lucem, & colorem nihil aliud esse, quàm lucem incorporatam*: quod Thomas Hurtadus animosè & subtiliter defendit. Atque apertè etiam sequitur ex opinione illa S. Thomæ, qua Art. II. colores Iridis veros esse colores, nos docuit. Certè enim hos colores, esse lumina, nemo infitias it. Et quid etiam aliud est carbunculorum color quàm lumen? Et tamen si umbrâ perfundatur, in purpuram declinat. Nam qui *sub celo flammei, umbrante tecto videntur purpurei*, ait Plinius.

Sulphuris quoque, & vini ardentis flamma, cerula fit um-brarum admixtione.

Sed color, inquit, non calefacit, sicut lux solis.

Simili argumento Iul. Scaliger probat lucem noctiluca-rum, & insectorum quæ in tenebris splendent, non esse ejusdem facultatis & naturæ cum luce solis.

Quasi verò à luce etiam nostrarum lucernarum, longè uberiori, sentiamus nos calefieri. Omnis enim lucernarum aut ignium calor, magis à calore igneo, quàm à luce venit. Cur  
deinde

Tho. Hurt.  
controv. I.  
memb. 5.  
§. 6. Præ-  
fatus Philos.

Plin. lib. 37.  
c. 7.



deinde eodem ratiocinio non colligit Scaliger, lumen solis hibernum specie differre ab æstivo?

Requiritur ergo certa mensura & multiplicatio luminis, & radiorum quidam fascis, ut sensibilis calor inde possit effluere.

Quis quoque novit, an colores qui plurimum habent lucis, ut albus, puniceus, sanguineus &c. aliquid juvent ad calefactionem? Certè aliqui se expertos dicunt, vestem albo suffultam magis calorem fovere. Vnde hoc autem, nisi quia fortè albedo spiritibus qui corpore expirant, & suffulturâ vestis retinentur, aliquod auxilium, & vim tenuem caloricam addit? Ea quoque de causa cucufas, sive calottas capitis cocco plerique apud nos suffulciunt, quia, credo (& videor experiri) color ille ardens nonnihil tenuis & blandi caloris putatur continere. Certè tamen colores illi lumini solis additi adjuvant vim cale & rare faciendi. Ideo enim, ubi nix cecidit, tepescit aër, & remittitur frigus. Et nonne notum illud Dionysij tyranni, & à Galeno narratum exemplum, qui tenebris carcerum diu inclusos, subito in aulam candore parietum & splendore solis illustrissimam educebat, ut sic excæcaret?

Et addit, milites Xenophontis pænè oculorum lumina perdidisse, dum nimis diu per nives iter faciunt. Nonne etiam ubi sternutare volumus, nares patulas, non ad solem solum, sed ad parietem insigniter candentem convertimus, & inde nares ad sternutandum incitari sentimus? Quamobrem? Quia sanè species visibiles albedinis, instar cuiusdam luminis, aliquid ad rarefactandos cerebri humores, & titillandas nares conferunt.

Albedo igitur splendorem solis, ad calefactandum, rarefaciendum, exsiccandum satis potenter quandoque adjuvat. Et nonne nos ipsi experimur, quantâ visus & oculorum noxâ, inter nives à sole illuminatas ambulemus? Quanta in oculis caligo, ubi deinde domum obscuriorem intramus?

Hoc quoque in comperto est. Res pleraque albas, ut cretam, calcem, saccharum &c. spiritibus fulgentibus scatere. Vnde (ut sæpè, & cum admiratione expertus sum) si quis cultellum sacchari glebæ in tenebris affricet, luminum fulgetra

perpetuè exsistit, nullo pænè irritò ictu.

Ceterum, in hac sententia fatendum est, omnes colores, quantum est ex parte lucis quam continent, esse unius speciei, & differre solum majori aut minori opacitate; veluti color purpureus, viridis, & puniceus in Iride.

Dicuntur tamen colores isti differre specie, sicut temperamenta quatuor primarum qualitarum; quæ licet ex iisdem qualitatibus consentiant, temperamentum tamen v. g. cholericum dicitur diversæ speciei à sanguineo; quia una species qualitaris eminet in uno, altera in altero. Sic fortè S. Thomas colorem pallidum, in quo plus opaci inest, dicit specie diffidere ab albo. Perinde videlicet ac tepidum à calido. Nam alicubi ait pallidum ita se habere ad extremos colores, sicut tepidum ad calorem & frigus. *Media, inquit, consciuntur ex extremis, & ideo virtute continentur in eis: sicut tepidum in calido & frigido, pallidum in albo & nigro.* Tepidum autem certè ex calido & frigido formaliter compositum est.

S. Tho. 1. 2.  
q. 52. a. 2.

Idem 2. 2.  
q. 179. a. 2.

Nigredo, tamen si nigerrima sit & omnem prorsus lucem excludat, nuda privatio est, ut autè monebamus. Cum verò S. Thomas adhuc inter colores positivos eam recenset, nigredinem in qua non omnes reliquæ lucis extinctæ sint, credo intelligit: aut certè Aristotelem suum, sicut Aristoteles vetustiores imitatur.

Si quis denique pertinaciter extorquere velit, coloribus includi quandam quidem lucem, sed alterius rationis & speciei à luce solis aut ignis, non usque ad rixas contendam, modò quoque adfareatur, lucas lampyridum, lignorum putrium, squamarum piscium, & spirituum animalium, quibus oculi quorundam hominum & animalium scintillant, non esse unius speciei cum luce solis. Sed tamen quid opus, tot luces specie distinguere, cum nullum argumentum id evincat?

Dices, lucas lampyridum &c. à luce solis offuscarì, ne videantur, colores verò ab eadem potius illustrari, ut videantur. Vnde oportet fateri, luculas illas quæ noctu tantum sunt conspicuæ, interdum absorberi à luce solis, majore, tanquam teruncium à divitijs Croesi, ut Cicero loquitur, quod

Cic. lib. 4.  
de fin.

later



latet quidem in majori cumulo, tamen digitiarum pars est. Sic ergo lux lampyridum ejusdem speciei cum lumine solis erit, & in unum totum cum eo coalescet, cujus ipsa pars sit. Nihil verò simile apparet in colore. Non enim absorbetur à lumine solis, sed distinctim ac separatè ab eo, in superficie corporis opaci cernitur.

Hæc aliquem sanè movere possunt, qui pauca, non omnia circumspicit. Quæro enim à te, cur lumen aëris claro die non offuscat colores Iridis, qui sine dubio, sunt ejusdem speciei cum lumine solis in aëre?

Respondebis, quia opacitas nubis quæ illos colores atrahit, non dissolvitur à lumine aëris. Idem tibi repono. Viror, inquam, prati nō offuscatur à majori lumine quod sol aërem & ipsum pratum illuminat; quia non solvitur illo lumine opacitas prati inhærens, & lucem intrinsecam in virore astringens.

Secus verò de speciebus visibilibus virescentis, & cujulliber alterius coloris. Quia enim umbræ, quas secum vehunt, diluuntur à lumine solis; ideo nec in aëre, nec in superficiebus solidorum corporum depictæ apparent; sed lux earum offuscatur à majori lumine, quemadmodum lampyridum, & lucernarum etiam nostrarum luces.

Ecce igitur, si argumentum offuscationis validum est, ut lampyridum, lucernarum, & ignium nostrorum luces probentur esse unius speciei cum lumine solis; quomodo etiam eodem argumento species visibiles colorum, quoad luces quas intra se alligant, comprobentur non differre specie. Logica ab eodem lumine solis. Si autem species visibiles colorum non differunt à lumine, nec differant etiam colores à luce. Scio tamen multis falsum, aut mirabile hoc visum iri. Cum quibus, ut ante dixi, non pertinaciter pugnabo, modò dent mihi, lucem coloratam collocari saltem sub uno communi genere lucis; quod deinde in solis & siderum, ignis, carbonum, noctilucarum, &c. ac postremo in colorum luces, tanquam in species suas dividatur. Quotiescumque etiam videbitur ei mirum, lucem coloris interceptam in virescentie prati, non differre specie à lumine solari, statim cogitationem

vertat ad virorem Iridis, quem omnes fatentur, esse ipsum radium solis demersum & semiextinctum nubium opacitate. Deinde cogitet nullum hinc videri à nobis in corporibus opacis colorem, cui simillimus ex mixtura luminis cum opaco nubis formari non possit; & fortè admiratio minuetur, aut evanescet.

## ARTICVLVS V.

*An color videatur in solis corporum opacorum superficiebus.*

**N**ihil est magis vulgare, quàm sic loqui: superficies corporum dealbari, colorari, & in superficiebus colores aspici, tanquam in summa corporum cute. Sed (quis crederet?) dum cogitationem huc demittimus, puteus Democriti est, nec in rota hac visus & visibillum materia, mihi quidquam ferè est magis reconditum & obscurius. Vt jam Platoni credere incipiam, qui colorum scientiam difficillimam omnium esse pronunciat. Nam in primis, nullas existimo in corporibus esse mathematicas superficies, lineas, & puncta, ut nuper in Labyrintho nostro ostendimus, & Mathematicorum doctissimi mecum sentiunt. Turbant quippe, non juvant compositionem continui indivisibilia illa infinita, continuantia, aut terminantia partes. Imò subtilissimi impossibilia esse fortiter asseverant.

Deinde, demus sanè ejusmodi superficies & involucria corporum; si tamen attentè & acutè inspiciamus, quid illæ sint, colorum capaces esse negabimus. Cogita enim, quæso, mecum, superficiem mathematicam non esse sic tenuem, ut est tenuissima & subtilissima tela arancarum, per quam omnia pellucet & infrà apparent; sed esse in infinitum tenuiorem, & secundum profunditatem, prorsus indivisibilem; cum tamen telæ araneæ profunditas, quantulacumque est, versus profundum sit divisibilis in infinitum.

Quomodo igitur per illam infinitā superficiem mathematicam tenui-

Plat. in  
Timæ.



tenuitatem non pellucebit color corporeæ quantitatis qui infra superficiem est? Quomodo etiam illa parietis v. g. superficies quidquam opacitatis & tenebrarum retinere potest, quo colorem suum in albedinem, rubedinem, viredinem, aut in alios colores declinet & astringat? Tota enim lumine externo solis perfusa est, & in eodem prorsus spatio penetratur & consistit cum superficie aëris, qui parietem attingit. Si ergo totus aër usque ad superficiem suam ultimam inclusive, qua parietem contingit, sit lumine solis perfusus, superficies quoque parietis, quæ in eodem adæquatè spatio est cum superficie contigui aëris, necessarîo eodem lumine perfunderetur. Non potest ergo in illa superficie color esse, sed si quidpiam in ea appareat, lumen sine mixtura opacitatis erit, non autem color.

Deinde punctorum, linearum, superficialium indivisibilia in quantitate fabricatores, proportionalia etiam indivisibilia in qualitatibus quantitati inhaerentibus construunt; ut in quantitate perfectâ corporeâ inhaereat albedo perfecta & corporea, in terminis autem quantitatis, termini albedinis. Vnde in extrema superficie parietis non erit nisi superficialis terminus albedinis, naturâ & specie ab albedine corporeâ differens; sicuti superficies quantitativa à quantitate corporea specie differt. Non ergo completâ & propriam albedinem, sed terminum solum albedinis cernimus, cum parietem album aspiciamus. Denique multi nimium crassa & rustica imaginatione decipiuntur, dum superficies extra partes corporum quæ circumdant, extare, & instar cutis aut pellis superponi imaginantur. Vnde sicuti pellis animalis cernitur, non carnes & ossa quæ sub pelle latent; ita putant illi colores in superficiebus tantum videri, latentibus aliarum partium coloribus, quasi à superficie, tanquam pelle quadam contegantur.

Sed tam pinguis & obesa cogitatio ad Mathematicam & Philosophicam subtilitatem debet extenuari.

Perpende, inquam, mecum, superficiem mathematicam omni profunditate & crassitie destitui; unde si proximè partes sui corporis contingat, necessarium esse, ut per se primo, & ita

ita vicinè attingat, ut intra spatium proximæ partis descendat ac penetret. In sententia enim Aristotelis, & omnium Mathematicorum verissima, indivisibile proximè additum indivisibili, aut divisibili non facit majus & extensius. Non enim jam hallucinationem Democriti, & Epicuri moror, qui non solum contra rationem, sed contra sensum (ut in Labyrintho nostro satis demonstravi) omnia ultimò ex punctis indivisibilibus componunt.

Si ergo superficies parietis extra situm partium illius corporis nullo pacto eminet, profectò albedo partium quibus illa superficies insensitur, tam vicina erit oculo, quam albedo superficialis, quâ dicitur superficies quantitativa depingi. Igitur ratio nulla esse videtur, cur cum albedine superficiali, albedo corporearum etiam partium à nobis non conspiciatur. Nam, ut antè monui, superficies, infinità ut sic dicam, suâ tenuitate non potest ita tegere proximas partes corporeas albedinis, quin per superficiem pelluceant, & in aspectum veniant.

Si verò ita est: igitur ad videndum parietis colorem superficies non est necessaria: cum non sola superficialis albedo, sed etiam corporea, & intra profundum recedens, cernatur.

Sed vide jam impedimentum ferè impenetrabile, quod se in hac via objicit.

Vel enim lumen solis superficiem parietis illuminans, intra corporis profunditatem descendit, aut in superficie hæret. Si intra, cur non dissolvit opacum, & colorem in purum lumen evanescere facit? Si non intrat, quomodo color qui est in profundo, speciem sui per partem profunditatis non illuminatam trajicit? Sume enim crustulam quantumvis tenuissimam parietis, suam tamen profunditatem habet, & pars ejus profundior speciem sui coloris, per aliam partem extimæ superficiei vicinior, mittere debet: quod tamen facere non poterit: quia pars ista opaca est & colorata, nec illustrata lumine solis; ac proinde medium inidoneum, per quod species visibilis trajici possit.

Hæc sunt ingenij humani ludibria, quæ hebetudinem ejus ostendunt, & opera Dei, etiam quæ tam propinqua sensibus nostris,



nostris, esse inscrutabilia, nec posse ullâ fortasse humanæ mentis acie penetrari.

Vix ergo video effugium, nisi per illud, quod suprâ Art. III. dicebat Ioan. Bapt. Benedictus: *Paucâ corpora reperiri tam opaca, ut immediatè lumen à superficie reflectant, sed lumen aliquantulum illa corpora, & colores eorum afficit. Quod tamen etiam diximus esse Aristotelis.*

Io. Bapt.  
Bened.  
Epist. ad  
Pigon.

Vbi autem lumen nullo modo penetrat, negat colorem illorum corporum propriè videri, sed lumen tantum externum, quod reflectitur, & lucet extra superficiem.

Quia igitur corpora opaca colorata aliquid perspicuitatis habent, ex qua eorum color originem ducit, non est fortè mirum, quòd radij solis tenuissimè & intra minimam profunditatem penetrare valeant, & colorem tenuissimæ crustæ v. g. parietis illuminare, ut color vires suas cum externo lumine conjungere possit, & sic adjutus speciem visibilem coloris ejaculari.

Probabilissimum enim est, lumen externum non tantum ex parte mediij, sed etiam, & maximè, ex parte objecti necessarium esse, ut colores agere valeant & species suas exspargere.

Quod & probant Perspectivi; Nisi enim ab illuminata superficie, ait Maurolycus, lux ipsius superficiæ colori similis radiaret, rerum species sub proprio colore ad oculum non pervenirent. Quare visus nihil sub proprio colore apprehenderet. Vnde hoc theorema constituit: *Omnis à pura luce illuminata superficies secundariam lucem colori sui similem mittit.* Censet igitur, lucem primariam, quæ immediatè à sole super superficiem coloratam cadit, ita permisceri colori, ut simul lucem secundariam coëfficiant, colori superficiæ concolorem; adèd ut species coloris nihil sit aliud, quàm lux secundaria à luce primariâ & colore producta. Vnde Archiepiscopus Cantuar: *Color omnem efficaciam movendi visum à luce habet. Ideo quæ ratione magis vel minus à luce illustratur & movetur, eadem quoque ratione visum movet. Colores autem debiliores sunt in fortioribus, sicut incompletum in completo. Et ideo secundum completionem lucis, est gradus complementi coloris in movendo.*

Maurolyc.  
theor. 23.  
de lum.  
& umbr.

Lib. 1.  
prop. 12.  
Perspect.  
communa.

X x x

Quod

Quod etiam nocturno isto experimento probari potest. Nam oculus in tenebris noctis facillimè colores juxta lucernam positos videt, quia colorum actio à circumfuso lumine excitatur & adjuvatur, ut species sat longè per tenebras possit usque ad oculum effundi; non ita verò, si commutato situ lucerna apud oculum statuatur, & colores tenui lumine & extremis solum lucernæ radijs collustrentur. Et nonne etiam videmus viredinon arborum & prati longè aliter species suas diffundere, quando illuminantur & adjuvantur pleniori sole? Tunc enim folia altius à lumine penetrantur, diluitur paulò amplius interna opacitas, & totus viror, quousque pertingit solis radius, candescit & fulgidior efficitur.

Nec mirum est, si attentè hoc consideras, lumen ad minimam, ut v. g. centesimam millesimam crassitudinis fili unius aranei, aut aciei novacula partem, intra omnia corpora colorata posse penetrare, & colores in tantulâ profunditate illustrare; cum Aristotele teste, & antè diximus, in omni colorato sit aliquid perspicui, tanquam dispositio necessaria ad generationem coloris. Vbi autem aliquantula perspicuitas est, quid vetat, lumen ad tenuissimam saltem crassitiem penetrare? Ideo enim tam angustam profunditatem visu non cognoscimus (sicut vini rubri, aut gemmarum semidiaphanarum profunditas ad oculum patet) sed talia colorata, longa tantum & lata esse, sine profunditate imaginamur.

Etiamne intra aurum, tam densum, & vix ullis poris dehiscens intrat radius solis? Ita intra aurum dico; alias enim fulvus ejus color nunquam à te videri posset. Sed velim iterum cogites, densitatem illam auri non esse opacitatem, sed cum densitate maximam non raro perspicuitatem, ut in adamante, crystallis, & vitris, conjunctam esse, ut Artic. III. monebamus.

Nec tamen sequitur, si ad centesimam millesimam partem crassitudinis unius pili, radius solis intra superficiem auri penetrare possit, longius etiam posse; quia tota massa auri tantundem perspicuitatis in fundo, quantum in summa cute habet.

Nam universa profunditas maris est uniformiter perspicua, & tamen radius solis non ultra 15. cubitos penetrat, ut Iod.

gemma.



gemmarum piscatores testantur. Vbi autem est summa opacitas, ut in corporibus quibusdam aterrimis, lumen nullo modo intrat, defectu internæ perspicuitatis, quæ ei viam quasi aperiat. Vnde nigredo illorum corporum (etiamsi verum & positivum colorem esse facias) à lumine foris emanente, ad sui speciem per medium spargendam juvari non posset. Adde, nullâ pænè veri similitudine dici posse, in lumine esse virtutem adjuvandi nigredinem ad producendas atras illas & tenebrosas suas species visibiles, nisi etiam tenebras à lumine effici posse affirmes.

Sed quare non dicis, inquiet aliquis, lumen in aëre tantum hære, aut ut summum, usque ad superficiem corporis opaci extendi, colorem verò corporis opaci actionem suam qua species producit, non intra corpus opacum, sed extra, in aëre illuminato inchoare?

Cogitavi hoc aliquando; sed vide, quid jam remoratur.

Quia nempe, non videbitur tunc ratio, cur potius ex profunditate unius digiti, quàm unius palmi, color corporis opaci effundat speciem in aërem circa se illuminatum.

Debet ergo determinatio profunditatis, unde incipiat productio speciei visibilis, fieri ab aliqua alia causa; nec à quâquam probabilius quàm à lumine intrinsecus penetrante: quod cum tincturâ speciei visibilis illius coloris quem in profundo contingere valuit, rursus exilit & in oculos venit.

Deinde, si nullo pacto, ne quidem ad crassitiem centesimæ millesimæ partis unius crinis, lumen intrat, nulla pars coloris quæ latet in profundo poterit per se primò agere in aërem, quin aliqua particula ejus agat per medium non illuminatum. Cum enim omnis pars coloris sit secundum profunditatem (sicut continuum ipsum) divisibilis in infinitum, necesse est, ut particula illa quæ profundior & à superficiei extimâ remotior est, effundat speciem sui per alteram, quæ inter ipsam, & superficiem media est; hoc est, per medium non illuminatum, si lumen solis in eam non penetrat, sed in aëre tantum, & superficie opaci hæret.

Cum igitur Aristoteles dicit, colorem visibilem inhære

Arist. lib. 5.  
c. 3. Top.

XXX 2

superfi-

Arist. c. 3.  
de sensu.

superficie, & in extremo perspicui terminati, item superficiem esse primum quod coloratur; non superficiem mathematicam, sed physicam intelligit, quæ est extrema & tenuissima quasi cutis corporis perspicui; quod per opacitatem quidem terminatum est, sed tamen etiam propter gradum quandam perspicuitatis admixtum, lumen extrinsecum ad aliquam minimam saltem, & ferè (ut sic dicam) indivisibilem profunditatem intramittit. Inest quippe perspicuitas omnibus corporibus, plus aut minus, quæ ea facit colorem participare. Nihil ergo aptius dicere potuit, quàm colorem qui videtur, inhærere extremæ quasi curi corporis terminati, quousque perspicuitas ejus lumen externum admittit; quia color illuminari, & adjuvari à lumine debet, ut species suas foràs effundere, & videri possit.

Hinc sequitur, quo corpus aliquod minus perspicui habet, eo minùs de colore ejus videri. Si verò radius luminis totam ejus profunditatem pervadere queat (ut in vino rubro, gemmis, & vitris coloratis) totum etiam extrinsecus & intrinsecus colorem aspectui patet. Quod in alijs quoque corporibus accidere potest, si tam tenuis superficies, seu membrana ab ijs deradatur, ut tota pelluceat, & radium solis transmittat. Quæ experienciâ quoque intelligitur, quomodo tenuissima talis membrana, etiamsi corpori suo adhuc adhæreat, lumine tamen solis perfundi valeat.

## ARTICULVS VI.

*An color videatur per aliquas species, per medium diffusas.*

Galen. lib. 7  
de plac.  
Hippocrat.

**N**egant Galenus, Durandus, & Philosophi Nominales. Per pupillæ foramen fit visio, inquit Galenus; quod quidem si expectaret portionem aliquam, aut facultatem, aut imaginem, aut qualitatem corporum extrinsecus objectorum ad se proficisci, nunquam ejus quod videtur, magnitudinem cognosceremus; ut montis v. g. maximi. Alioqui tanta imago oculis nostris incideret, quantus est ipse mons.

Quæ ratio sanè Galeni est demonstratiua, si verum est quod Epicu-



Epicurei, & quidam hodie Philosophi adversus Aristotelem & S. Augustinum dicturiunt; magnitudinem ex punctis finitis componi. Cum enim singula puncta objecti visibilis imaginem suam in fundo oculi, extra alterius puncti situm, depingere debeant, ut distinctè videri possint; profectò non poterunt plura puncta montis depingi in oculo, quàm sit multitudo punctorum quibus componitur particula oculi, cui pictura montis imprimitur. Vnde nulla ratione mons totus, aut magna ejus pars simul videri poterit, sed solum tantula ejus portio, quantula est particula illa oculi, quæ imaginem montis gerit, ut nuper in Labyrintho nostro differebamus.

Vnde nec species ab objecto ad oculum trajicientur figurâ pyramidalî, sed columnari, quæ in objecto, ubi incipit, latior non erit quàm in oculo, ubi desinit.

In sententia verò S. Augustini & Aristotelis, mons totus, imò totius cæli hæmisphærium, sat loci in oculi fundo reperire potest, ubi totam imaginem sui & speciem depingat; cum partes ibi proportionales sint infinitæ; nec referat, montem esse oculo majorem, quia imago montis est etiam monte minor: unde fieri potest, ut tota intra oculum capi possit.

Quod exemplo duorum circulorum, majoris & minoris, circa idem centrum descriptorum, declarari potest. Nam sicut ab omnibus punctis circuli majoris, lineæ rectæ duci possunt ad centrum, quæ semper transeant per alia & alia puncta circuli minoris; ita ab omnibus punctis objecti majoris quàm sit oculus (ut v. g. maximi montis, imò hæmisphærij totius cæli) lineæ rectæ ad fundum oculi deduci, & speciem suam ibi ita depingere possunt, ut nunquam duæ in idem punctum fundi oculi incidant, sed sine confusione, singulæ extra mutuum situm imaginem suam, in tabulam illam oculi imprimant. Hæc enim est Propos. 37. Lib. 1. Perspect. Commun.

*Visionem fieri per hoc, quòd in glaciâ (in retinâ tunicâ tamen, dicere potius debuit) est ordinatio speciei, sicut rerum exterius. Quam exponens Archiepiscopus Cantuariensis: Quoniam, inquit, tot sunt partes minimæ, quot sunt maximæ quantitatibus ejusdem speciei, & species visibiles sine materia, recipiuntur: ergo quantumcumque*

fit visibile quod videtur, species ejus distincte & ordinate in glaciali humore ( in tunica retinâ ) recipiunt. Quod nisi fieret, oculus rem distincte non videret. Quod etiam ad oculum videmus fieri in conclavi obscurato, si lens vitrea in parvo foramine collocetur, & imago montis albâ papyro excipiat. Ibi enim mons totus, & singulæ ejus partes, imagine illa parvâ comprehensæ visentur. Vnde D. Episcopus Cameracensis recte ex hac doctrina deducit: *Pyramidem radiosam, per quam videmus, non terminari in oculo ad punctum, sed visionem fieri sub curta pyramide, & angulo inchoato, ut dicitur Propos. 40. Lib. 1. Perspect. Et sic imaginem in oculo non esse punctualem, sed quantam.* Quod verissimum & certissimum est. Nisi enim imago objecti expansa in tabulâ retinæ esset, sed tantum punctualis, oculus nihil omnino cerneret.

Pet. Aliac.  
in Sphær.  
c. 1.

In hoc ergo exemplo, & quoties aliquod objectum videmus, fit quædam specierum pyramis, ut Optici loquuntur, cujus basis & pars latissima ab objecto visibili nascitur, ita ut omnia puncta per diversas lineas, versus oculum radient, & lineas suas magis magisque comprimant, quo propius ad oculum accedunt; adeo ut omnes sic compressæ foramen pupillæ oculi ingredi valeant, & integri objecti imaginem in tunica retina depingere.

Nominales verò non argumento Galeni rejiciunt species visibiles, sed solenni illo suo axiomate: *Frustrâ fit per plura, quod per pauciora fieri potest;* quâ novaculâ plurimas res in tota Philosophia & Theologia circumcidere solent.

Sed frustra, ubi experientia contra eos clamat. Nam species viredinis arboris in candido pariete vicinæ domûs pingi videmus, & rubedo illa quâ radius solis quasi inficitur, dum per vinum, aut vitrum rubrum transit, nihil profectò aliud est, quàm species rubedinis permixta cum lumine solis.

Vtramque experientiam, & veritatem ante nos olim vidit subtilis Scotus: *Species aliqua intensa, ait, non obstante quòd sit intentio & species alterius visibilis, potest tamen in se esse visibilis, sicut dicit Commentator Lib. de sensu c. 1. Quia quando lumen reflectitur ad virides plantas, colorantur parietes. Similiter species non sunt visibiles,*



visibiles, nisi quando terminantur ad opaca; ita ut non contiguata opacis non possint gignere species sui quibus videantur. Sicut species coloris, dum est in medio, non videtur, sed quando contiguatur opaco, tunc videri potest: sicut patet de radio transeunte per vitrum coloratum. Tunc enim apparet color in pariete, ubi terminatur radius ille.

Quod autem quidam respondent, apparere ibi rubedinem vitri in pariete opposito, tanquam in speculo, manifestè falsum est. Nam paries tam asper & scaber non est idoneum speculum: cur enim alias nostram faciem in eo, tanquam in speculo, non videremus?

Deinde non in fundo parietis, ut res in speculo solent, sed in superficie ejus summa, rubedo ista depicta apparet.

Tertiò, non ex certo tantum oculi situ, ut res in speculo videntur, sed undique, & ubicumque oculus se constituat, rubedo illa cernitur: perinde ac pictura quæ penicillo in superficie parietis expressa esset.

Vnde fallitur, sine dubio, doctissimus Toletus, qui tincturam illam parietis, ait esse vitri, per quod radius solis transit, colorem; sed parietem esse speculum minus tersum & purum, quale debilius species multiplicat, quibus minus rei distantiam percipimus. Et sic, inquit, minus apparent res in profundo speculi, quamvis ab ipso distent. Vnde si speculum anhelitu maculos, ferè in superficie rem representabit. Fallitur, inquam, quia tinctura illa non tantum ferè in superficie, ut in speculo illo anhelitu maculato, sed in ipsa summa superficie apparet. Nec speculum anhelitu conspurcatum, sursum, deorsum, in latera, & undique speciem reflectit, sicut tincturam illam parietis undique cerni experimur.

Denique, cur vultum etiam nostrum, ut jam dixi, in pariete illo tanquam in speculo saltem immundo non videremus?

Imagines quoque illæ, quæ à speculis quibusdam concavis ita reflectuntur, ut extare videantur; & si quis speculum stricto mucrone invaserit, videbitur ab altero invadi, & manus perfodi, ait Io. Bapt. Porta; & si candelam ostendas, videbitur in aere accensa candelæ, & id genus ludibria; non aliter explicari possunt, quam per species visibiles confertim, & toto quasi fascæ à concavo speculi

Tolet. lib. 2.  
q. 34 de  
anima.

Porta in  
Catechismo

speculi reverberatas. Nec deinde Nominales satis expedire possunt, quomodo vultum nostrum in speculo inspiciamus, si nulla imago à superficie speculi in oculum resiliat: nec quæ ratione per dioptram Batavicam, & perspicilla senum, omnia majora appareant, nisi species & simulachra quædam in vitris illis refringantur, & superficies rerum conspectarum quodammodo dilatent. Eodem modo, sine speciebus, remus in aqua nunquam distortus appareret.

S. August.  
lib. i. l. c. 2.  
Trinit.

S. Augustinus alio experimento idem probat. Nam si attentè solem, aut alia lumina diutule aspexerimus, & oculos in tenebras convertamus, *Versantur in conspectu*, ait, *quidam lucidi colores, variè sese commutantes, & minus minusq; fulgentes, donec omnino desistant; quos intelligendum est, reliquias esse formæ illius quæ facta erat in sensu, cum corpus lucidum videretur.*

A qua verò causa reliquiarum istarum specierum, oculo conserventur, multa disputatio est. Puto à luculâ pellucetium partium oculi partim, & spirituum visiorum, qui meatus oculorum confertim implent. Luculam enim quandam innatam habent, aut sic alterari facilè possunt, ut lux quædam permanens in ijs resultet; quæ remoto sole, speciem ab eo impressam, conservandam suscipit, & aliquantulo tempore eam, si egregiè intensa fuit, sic sustentat, ut successivè & per particulas deficiat, non evanescat universim. Commutatur verò species illa solis in colores puniceos, virides, purpureos, id est, *minus minusq; fulgentes*, ut experientia, & Augustinus advertit; quia remissio ipsa luminis tenebras & opacitatem quandam permiscet; unde temperatur color quidam medius, qui paulatim defluente lumine, in nigriorem nigrioremque colorem languescit.

Io. Bapt.  
Bened.  
Epist. ad  
Pyrrum de  
Arzon.

Denique, ut omnis tergiversatio præscindatur, familiaris jam est experientia, qua species visibiles per foramen in conclave obscurum excipiuntur, ac in charta, aut alio albo depictæ, oculis subjiciuntur. Invento non tam recenti quàm tubi Batavici novitas; licet ab hoc tempore magis coeperit vulgari. Nam de specierum illo miraculo, pridem antè Io. Bapt. Benedictus: *Nolo tibi*, inquit ad amicum quendam, *silentio involvi mirabi-*



mirabilem quendam effectum. Hoc est, ut fiat foramen cubiculi obscurati rotundum, magnitudinis tamen unius specilli. Quod foramen obturetur uno illorum specillorum, quæ pro senibus non brevis visus conficiuntur, hoc est, quorum superficies amba convexa sint, non autem concava. Deinde opponatur folium album papyri, adeò distans à foramine, ut extrinseca objecta in eo appareant. Quæ quidem objecta, si à sole illustrata fuerint, tam clarè & distinctè videbuntur, ut nihil pulchrius delectabiliusq; videri poterit; inversa tamen. Sed si ea directè videre voluerimus, hoc optimè faciemus, mediante reflexione alicujus speculi plani.

Quod autem pictura illa papyri sint species visibiles, satis probatur, quia sunt radij colorum foris existentium; & eodem modo, vel directè, vel reflexè, vel refractè transeunt per medium, ac omnes easdem servant leges, quas speciebus Optici tribuunt; ut superfluum & stultum sit, alias præterea species superfingere.

## ARTICVLVS VII.

*An species visibiles sint alterius naturæ specificæ à suis coloribus.*

**H**Oc sanè non immeritò dubitari potest. Nam species visibiles colorum Iridis, & omnium apparentium in aurora, crepusculis, & nubibus, ejusdem speciei Logicæ sunt cum suis coloribus. Sunt enim tenuiora quædam lumina colorata, propagata à crassioribus, ut sic dicam, luminibus, cum opaco nubium convolutis.

Quod enim apud quendam nuperum, nec vulgarem Philosophum legi: Iridis colores vim habere producendi, non species coloris apparentis, quales, ut putat, in Iride sunt, sed species verorum colorum, quæ toto genere differant à radijs solaribus opacitate nubium tinctis; nimis profectò Metaphysicum & falsum est. Sic enim oculus Iridem aspiciens, non videret colorem apparentem, qui re verà ibi est, sed colorem verum, longè alterius speciei & naturæ (ut ipse existimat) qui ibi non est; ut pro purpura Iridis, purpuram fortè Imperatoris

Turcarum in nubibus intueretur.

Si ergo species visibiles colorum apparentium, à nube ad oculum usque trajectæ, ejusdem naturæ & essentiæ cum coloribus suis sunt; igitur & species verorum colorum videntur esse unius essentiæ cum coloribus à quibus vibrantur. Sunt enim tennes quædam luculæ, levissimis & fugacibus umbris involutæ, à lucibus colorum emicantes; ideoque à lumine solis majore tam faciliè offuscantur, ut nec in aëre, nec in superficiebus aliorum corporum quibus illinuntur, appareant; nisi ubi submoto lumine solis, in fundum oculi, aut cubiculum obscuratum, per tenue foramen excipiuntur.

Propter autem istam tenuitatem & invisibilitatem, ut opinor, S. Thomas & Thomistæ dicunt species sensibiles habere esse quoddam diminutum spirituale, ac immateriale. Nam id ab Aristotele sumptum est, qui alicubi, ait, quoddam *sensus sit. susceptivus formarum sine materia, ut cera signum annuli, sine ferro & auro, recipit.* Quia videlicet, species viroris prati, quamvis tenuissimi cujusdam luminis & umbrarum permixtione videntes, sine tamen materia prati, in quo pinguior ille viror subjectatur, in aërem emicant, & instar spirituum, invisibiles per medium diaphanum trajiciuntur. Licet tamen ibidem admittat, oculum à specie visibili in eo depictâ, *ὡς νεχρὸν ἄνθρωπον, quasi colorari.*

Cum deinde S. Thomas, ut Artic. II. narravimus, doceat, colores quos vocamus apparentes, veros colores esse, profectò si colorum apparentium species visibiles ejusdem naturæ cum suis coloribus sunt; etiam verorum colorum species ejusdem cum veris coloribus erunt.

Atque hanc sententiam fortiter defensat Franc. Vallesius, negans species visibiles esse aliud, quàm colores remissos, qui licet contrarij sint, eodem tamen diaphano se compatiuntur, ut qualitates aliæ contrariæ solent. Calor enim & frigus remissi eidem aquæ tepidæ insunt. Quanquam Vallesius hîc mihi non placeat, ut postea dicam.

Qui deinde lumen aëris negant differre specie à luce solis unde emanat, profectò idem fortasse de specie visibili coloris & colore

Arist. lib. 2.  
c. ult. da  
anim.  
Lib. 3. c. 2.  
de anima.

Valles.  
lib. 2. c. 30.  
contro.



& colore negare debent. Emicat enim species à colore, ut radius luminis à luce.

Nonne etiam figura ab annulo impressa ceræ (cui Aristoteles speciem sensibilem comparat) eandem figuræ essentiam cum ea quæ in annulo remanet, participat? Et sanè necessarium videtur, ut species visibilis sit ejusdem rationis cum objecto à quo emanat, ut potentiam visivam in ejus cognitionem deducere possit; quemadmodum ex modo videndi infra describendo, conjecturi poterit.

Denique quis, ex tanta utriusque similitudine, non dicat, speciem visibilem rubedinis, quam radius solis transiens per vitrum rubrum, secum defert, & in opposito pariete albo depingit, esse ejusdem naturæ cum rubedine quæ vitro inhæret?

Sed ecce tamen argumentum ex adverso, quod primore aspectu insuperabile apparet. Nam species illa rubedinis, simul cum albedine inhæret eidem proximè superfici ei parietis: quomodo igitur ejusdem naturæ est cum rubedine, quæ albedini repugnat? An fortasse dicetur species rubedinis vitri solum in superficie aëris contiguâ parieti, non in ipso pariete inhærere?

Sed si hoc est, nec species quæ in fundo oculi depingitur, & quâ fit visio, perveniet usque ad tunicam retinam, quæ creditur esse organum videndi, sed hærebit tantum in humoribus oculi diaphanis, qui tunicam illam attingunt, Et nonne tamen debet species afficere intrinsecè organum, & quodammodo potentiam ipsam videndi, quæ in organo habet sedem?

Deinde si lumen (propter modicum perspicui quod in extremis partibus corporum opacorum est) intrat aliquantulam profunditatem corporis colorati, ut Artic. V. diximus; trahet etiam edusque secum speciem coloris vitri è regione positi. Vnde jam species rubedinis vitri per quod radius solis transit, penetrabit cum lumine intra superficiem & summam cutem parietis albi, in quo species illæ depinguntur; ac consequenter species rubedinis & albedo in eodem proximo subjecto erunt. Est ergo species ista alterius naturæ & conditionis

quàm rubedo unde emanat; nam rubedo & albedo sunt colores repugnantes. Sed argumentum ex doctrina Articuli II. facile dissolvi potest.

Quod enim in colore, & speciebus coloris, positivum est, lumen quoddam est; quod lumini alterius coloris non repugnat. Lumen ergo specierum rubedinis intrat superficiem parietis albi cum lumine solis. Opacitas verò, sive umbræ permixtæ lumini specierum, propter quas umbras lumen illud involutum rufescit, aut evanescunt, ut plerumque evenit, dissipatæ à lumine solis (unde parietem album nulla rubedine aspergi videmus; cùm quis coccineâ chlamyde amictus interdiu in cubiculo albato deambulat;) aut certè etiam umbræ illæ mixtim cum lumine superficiem intrant, & in ea depinguntur; sicut quando species vitri rubri radio solis trajecti, in opposito pariete candido rubescunt, implicitæ radijs solaribus.

Res profectò mira. Si enim quando lumen solis tenue & dilutius est, umbræ specierum ita evanescunt, ut nulla rubedo vitri in opposito pariete appareat; cur à majori & potentiori lumine, quod per vitrum traiecitur, non potentius dissipantur illæ umbræ; ita ut purus tantùm radius solis, non rubentibus speciebus infectus, parietem è regione positum illustraret?

Perspect.  
Commun.  
prop. 14.

Sed ratio miraculi esse videtur: quòd quando solis radius per vitream fenestram coloratam transit, tunc per lucis efficaciam color sensibiliter radiat super densum sibi oppositum, ut ait Archiepiscopus Cantuar. Hoc est, vitri color adjutorio uberioris & radiosæ lucis, speciem robustiorem, & quæ tincturam suam defendere possit, producit.

Deinde ibi non est sola species rubedinis, sed ipse radius solaris etiam, transitu ipso per opacitatem minij, aut purpurei succi, cui rubedo illa vitri inhæret, irrufatur; quemadmodum quando in Iride, vel aurorâ idem radius per opacitatem vaporum transiens, puniceum, aut purpureum colorem rapit, ex permixtione opacitatis & umbrarum quibus se involvit.

Hoc quoque argumento quispiam species visibiles diversæ esse



esse naturæ à suis coloribus, se confecisse putabit.

Species, inquit, non tantum in esse, sed in conservari continuo dependent à suis coloribus; ergo essentia earum diversa est à coloribus fixis & permanentibus.

Sed etiam argumentum istud evanescet, si cogites, colores Iridis tam in conservari pendere à luce solis, quam species ipsæ colorum Iridis, à coloribus istis productæ usque ad oculum, dependent à coloribus Iridis. Vnde quemadmodum colores illi apparentes pendent perpetuo à luce solis, ut causa conservante, ita censeo veros colores pendere efficienter in conservari à corporum coloratorum formis, aut qualitatibus.

Aut hoc modo argumentare, si mayis.

Sicut à forma substantiali solis lux solis in conservari pendet, & à luce solis radius solis ( & tamen, communi ferè opinione, lux solis à radio suo per medium sparso, essentia non differt: ) ita à forma substantiali smaragdi viredo smaragdi pendet, & à viredine ista species visibilis viredinis, quæ ejusdem essentia cum viredine smaragdi est. Nec unquam, opinor, probari poterit ( quod quidam gratis assumunt; ) nullam qualitatem esse, quæ in conservari ab altera ejusdem speciei dependeat. Nam præter lumen medij, quod à luce solis pendet, qualitas etiam illa, quam magus per medium spargit, essentialiter fortasse non differt à qualitate permanente infixâ magneti, quæ est causa efficiens illius qualitatis ferritæ gloriæ, quam per medium diffundit.

Nec tamen etiam species visibilis, tam pertinaciter dependet in conservari à suo colore, quin aliquo tempore possit ab alia causa conservante suspendi. Ut quando species solis, aut cancellorum per quos in plateam aspeximus, aliquamdiu in oculo à sole, aut à cancellis averso permanent.

Scio tamen paucos, me hic sectatores in sequelam pertrahere; ita difficile est veteribus, imaginationibus desuescere, quibus olim jam fixum est, speciem visibilem esse longè alterius naturæ à suo colore. Et præcipue decepit ipsos perperam intellectum illud oraculum Aristotelis, *Organum sensus suscipit sensibile sine materia*. Quod sic acceperunt, quasi color parietis;

Arist. lib. 2.  
c. 2. anima

cum emicat in speciem visibilem, exuat quandam velut materialitatem suam & crassitiem; adeoque effectum alterius à se naturæ producat. Cum tamen Aristoteles solum velit, speciem visibilem non recipi in oculum, aut in aërem cum simili temperamento materiæ, unde color parietis resultat; sed dependere in fieri & conservari à puro & nudo ipso colore, non à nova temperie quam oculus accipiat. Hoc modo etiam lux solis recipitur in aërem sine materiæ; quia radius luminis in aëre non dependet à tali materia, sive à talibus causis permanentibus, sicut dependet lux quæ est in sole.

## ARTICULUS VIII.

*Oculi fabrica.*

**O**culum esse organum visus satis constat, sed non per se primò. Partem ergo ejus inquirimus, in qua, ab anima inhabitante formatur visio. Ut autem inveniamus, compositio totius oculi explicanda, quam ab Anatomicis Galeno, Vesalio, Casserio, & alijs raptim, & quantum necesse, accipiemus.

Oculi in capite hominis, tanquam in speculâ quâdam ad circumspiciendum, collocati, ac sphericâ ferme figurâ, foraminibus cranij, quæ Medici orbitas vocant, inserti sunt.

Cranio verò nervis alligantur: inter quos princeps est opticus; per quem spiritus animales à cerebro ad oculos eunt redeuntque, imaginum, ut creditur, vectores.

Ita verò ex suis cavis prospiciunt oculi, ut radius à centro eorum in pavementum cadens, angulum circiter semirectum faciat. Sic enim minimo labore nervorum, qui ipsos alligant & continent, aspiciamus. Deinde hic obrutus est gravissimus & modestissimus. Qui verò longius quàm ad angulum semirectum pupillas attollit, arrogans; qui brevius demittit, pudibundus videtur; ut etiam ille qui secundum nasi sui longitudinem ante pedes suos despicit. Hic tamen aspectus viros Religiosos decet, qui majorem sensuum mortificationem professi,

arctius



arctius & castigatius oculos habere, & fenestras occludere debent, per quas tot noxiæ imagines in animum subeunt. Ceteri verb Ecclesiastici, ad angulum saltem semirectum, non longius, sine vago oculorum circumactu, ante se despiciant.

Constat autem totus oculus quinque præcipue tunicis: adhærente, corneâ, uveâ, araneâ, retinâ. Tribus autem humoribus: aqueo, crystallino, vitreo.

Prima tunica adhærens dicta, est illa suprema alba & pinguis, quæ cavitatis cranij fornicem attingit. Non involvit totum oculum, sed circulum in anteriore parte tunicæ corneæ apertum relinquit (quem ideo majorem oculi circulum, & Iridem appellant) ut species visibiles colorum illæ in profundum oculi penetrent. Nam aliàs tunica adhærens opaca est & luminis impervia.

Secunda tunica est cornea, totum oculum ambiens, & in parte sua anteriore, quæ Iridem constituit & aërem externum tangit, *in cornu imaginem degenerat*, ait Vesalius, *quod in lamina divisum & exactè levigatum, vitri loco, lucerna accommodatur, pellucidumq; est.* Nam est veluti vitrea quædam fenestra, per quam species in oculi profundum intrant. Hæc omnium partium oculi est durissima, & instar cornu in multas laminas, aut squamas dividi radique potest. *Et hinc est ea oculariorum Medicorum cura, inquit Vesalius, qua senibus hanc tunica partem deradi præcipit.* Sic enim tenuior, pellucidior, & ad trajectionem specierum magis idonea efficitur. Ab hac tunica corneâ deciderunt S. Paulo illæ squamæ, ex humore cerebri deciduo, & calore cælestis lucis oculos perstringente, subito concretæ. Ab hac quoque *albugo, quasi membrana ovi*, quâ detractâ visum recepit Tobias. Fuit enim utriusque cæcitas externa solum, per operimentum corneæ, seu Iridis oculi.

Ad hujus quoque corneæ tunicæ similitudinem allusisse putatur Virgilius:

*Sunt gemine somni porta, quarum altera fertur*

*Cornea, quæ veris facilis datur exitus umbræ.*

*Alter a candenti perfectâ nitens elephanto,*

*Sed falsa ad calum mittunt insomnia Manes.*

Virg.  
Æneid. 6.

Vt quemadmodum per corneam oculorum nostrorum portam commeant veræ rerum, quas aspicimus, imagines; per elephantinam verò, seu eburneam aurium portam (amfractus enim illi cranij, ubi fit auditus, videntur ex ebore incisi) multa falsa audimus: ita fingit ille, portam illam Inferorum, quæ vera somnia ad nos mittuntur, esse corneam; quæ falsa, eburneam.

Tertia tunica, uvea vocatur, à similitudine folliculi acini uvæ. Hæc non pellucida, sed opaca est; ideoque sicut tunica adhærens majore oculi circulo, seu Iride, fenestrat; ita uvea minore circulo aperitur, qui pupilla vocatur. Hæc enim velut rotunda quædam fenestella est, in cujus tenebrosa profunditate, cum è regione oculorum alterius adstamus, imaginem nostram, instar parvulæ pupæ (cujus diminutivum est pupilla) inspicere videmur.

Circumcirca hanc pupillæ fenestellam, superficies uveæ tunicæ varijs coloribus repleta est, qui corneam translucen-tes, Iridis nomen fecerunt. In singulis alijs animalibus, ut in omnibus equis, bobus, felibus, capris &c. colores illi uniusmodi & similes sunt; in homine, numerosissimæ varietatis. Quidam enim equinos, id est, glaucos habent, alij bovinos, alij felinos, alij caprinos; acumine cernendi præcipuos, ut Plinio placet.

Quarta tunica est aranea, tenuis, & instar texturæ aranei, subtilissima. Hæc partem illam humoris crystallini obtegit quæ extat humore vitreo, cui crystallinus immergitur.

Quinta, retina seu reticularis appellatur. Græcis ἀμφιβληστροειδής, à genere retis, quod ἀμφιβληστρον, seu undiq; complectens vocatur. Galli *esprevier*, sive accipitrē, Belgæ Gualones circa Mosam, *cottereau* nominant; quia tunicæ muliebris imaginem refert. Infernè enim rotundum est, & expansum in superficiem aquæ excutitur, ut sidente plumbo, quod circulatim ei appensum est, concludat piscium quæ subest multitudinem.

Huic reti bellè configuratur illa oculi tunica reticularis, si formam illam rotundam & concavam spectes. Amplectitur enim



enim & tegit posteriorem partem humoris vitrei, sicut pellicula ovi dimidiatum tantum ovum, inquit Vesalius.

Non vocatur autem reticularis, quasi instar retis plexa, & intervallis inanibus contexta sit. Est enim sicut ceteræ oculi tunicæ, continua; nisi quod tamen etiam venulas quasdam & arterias per continuitatem suam discurrentes ostendat.

Ex quinque jam recensitis tunicis, hæ tres, retina, uvea, cornea, maximè ad formandam visionem conferunt, & ex tribus nervi optici partibus in oculum expansis propagantur. In nervo quippe optico, præter substantiam medullarem, sunt duæ membranæ eum vestientes, quarum superior à superiori cerebri involucro, quod Duram matrem vocant; inferior à Piâ cerebri matre, ducit originem.

Igitur ubi nervus opticus in cavitatem orbitæ oculi illapsus est, medullam suam in tunicam retinam; membranam interiorem & medullæ proximam, in tunicam uveam; membranam superiorem & durissimam, in tunicam corneam diffundit.

Præter tunicas illas sunt in oculi compositione tres humores, aqueus seu albugineus, crystallinus sive glacialis, & vitreus.

Aqueus tunicæ corneæ proximè subest, ac uveæ fenestellam implet usque ad tunicam araneam, quæ humorem crystallinum tegit.

Sequitur humor crystallinus, non tam liquidus quàm duo alij, sed consistentiâ & duritie quadam præditus. Vnde exemptus formam suam *molliuscula cera ritu servat*, ait Vesalius. Innatat autem humori vitreo, ut globus aquæ vel pulti, mediâ parte extante, alterâ parte immersâ.

Vocatur crystallinus, quia nitore & pelluciditate est lucidissimæ crystallo similis. Quidam Græci *φακοειδῆ* *lentiformem* appellitant, à figura, quæ non est perfectè orbicularis, sed utrimque nonnihil instar lentis protuberat.

Tertius humor est vitreus, vitro in fornace fuso consistentiâ similis. Hic humorem crystallinum excipit, & innatantem sustentat, ut diximus: parte verò posteriori, qua nervum

opticum spectat, tunica retina continetur, ne diffuat. Hinc patet, humorem crystallinum esse ferme in centro totius oculi, inter aqueum & vitreum collocatum; nisi quod paulò elevatior & anteriori superfici ei oculi, quàm posteriori vicinioret, si Columbo hoc contra Vesalium accredere volumus.

Ex ista jam oculi compositione, in qua parte, & quo modo visio formetur, scrutari oportet.

## ARTICVLVS IX.

*Vbi visio fiat.*

Vesal. lib. 7.  
s. 14.

**G**alenus & Medici passim in humore crystallino formari visionem contendunt. Vesalius noster sapientior, nihil hinc decernere audens obstupescit tantum grande hoc naturæ arcanum. *Vt oculi fabricam, inquit, adeò studiosè soleo demonstrare, ut spectantium nemo in ipsa quidquam desideraret; ita in ipsius partium usu explicando, prorsus obmutesco: quòd mihi ipsi de primario visus instrumento non satisfaciam, atque hac in parte quòd sanum undique sit, à me non adferri posse, mihi persuadeam.*

Ratio Galeni & Medicorum Philosophorumque, qui agminatim eum secuti, est ista. Quòd crystallinus ex æquo per pupillæ fenestram quasi foràs prospiciat, & sua pelluciditate ac nitore, omnium colorum imaginibus depingi maximè capax ac idoneus sit.

Quæ ratio sanè optimè probat, esse quidem præstantissimum specillum, non verò organum illud princeps, in quo visio fiat. Vnde rem acu tetigerunt illi Medici, qui crystalloidem vocaverunt *specillum interius*. Est enim simillimum externis senum specillis, figuræ lenticularis, quæ species colorum dilatant & versus perpendicularem refringunt. Figurâ enim, pelluciditate, & ceteris quæ ad rem faciunt, proximè ad illa specilla accedit.

Optici ergo, post nuperum tubi Batavici inventum, passim

jam



jam inclinant, & ego planè huc delabor, ut tunica cornea, humor aqueus, tunica aranea, & præcipuè humor crystallinus, à natura facti sint, non ad formandam in ipsis visionem, sed ad refringendas visibilium species, ut perfectè suis coloribus & figuris in remotissimo oculi pariete, id est, in tunica retina depingantur. Planè enim, ut vitrea aut crystallina lens in foramine cubiculi obscurati posita, sic refringit & dilatat rerum, quæ foris è regione foraminis sunt, species, ut in pariete interiori cubiculi, aut in charta alba distinctè & jucundissimo spectaculo exprimantur; ita dubium non est, quin in crystalloide, quæ ad foramen tunicæ uveæ est, species externorum colorum eo modo refringantur, ut à retina sive retiformi tunica, graphicè & expressissimè (si oculus nullo partium vitio laboret) excipiantur. Nam ea de causa, admirabili Auditoris naturæ sapientiâ, tunica uvea opaca facta est, ut lumen externum nimis copiosum arceret & interioris oculi cubiculū obscuraret. Nam ideo tenui pupillæ foramine fenestratur, ut modicum lumen cum speciebus colorum intromitteret, & trajiceret ordinatâ serie depingendos, in ultimum parvuli illius cubiculi albicantem parietem; id est in tunicæ retiformis superficiem. Ideo enim etiam inter crystallinum & tunicam illam retiformem, humor vitreus medius est, ut spatium detur ordinandis speciebus, quæ in crystallino confusæ & decussatæ, perfectè & expressè depingi tantum possunt post aliquod à crystallino intervallum. Sic etenim fieri videmus in conclavi obscurato. Vbi si proximè lentem quæ in foramine est, chartam ponas, species confusæ & inordinatæ apparebunt; quæ ordinantur, si charta certo intervallo à foramine removeatur.

Fallitur ergo Eruditissimus Aguilonius, dum negat species visibiles magnitudine aliquâ localiter expansas esse, quemadmodum in tabula depictas; ideoque ait nequaquam formalem, sed solum virtuales cum objecto visibili similitudinem obtinere. Siquidem, inquit, *propos. 26. ostensum est, ejus quod videtur species debet in centrum glacialis humoris pervenire: ac magnitudo aliqua centro visis, quod solum punctum est, exaquari non potest.*

Franc.  
Aguilon.  
lib. 1. prop.  
45. Optic.

igitur per species formales, quarum representandi vis in magnitudine posita est, nequit visio celebrari.

Idem lib. I.  
prop. 27.

Sed profectò in puncto crystalloidis centrali & indivisibili, visio non celebratur, sed in superficie aliqua oculi divisibili; in quâ, velut tabellâ, singularum partium objecti species extra mutuum situm explicitæ & distinctæ depinguntur. Quod non in crystalloide, sed in retinâ, post crystalloidem & humorem vitreum, tandem perficitur; ideoque retina merito censeretur princeps videndi organum. Et nonne ipse Agnilonius antea propos. 27. in aranea tunica (quam *primarium visionis organum* esse pronunciat) species extendi & ordinari dicit, antequam coeant in centrum crystalloidis? Cum eadem tunica (aranea) crystalloidi, inquit, obvolvatur, fit, ut rerum figura araneam prius ordinatè pertranseant, quàm in medium glacialis concurrant. Quapropter res ipsas distinctè atque ordinatè dignoscit; non verò permixtas atque confusas.

Sed licet non negemus species diversarum partium objecti, per distincta superficiei araneæ puncta, intrare humorem crystallinum; expressissima tamen totius objecti imago remotius à lumine externo, ac velut in conclavi quodam obscurato, depingitur post crystalloidem & vitreum, in tunica retina, quæ est ultimus paries oculi.

Hinc etiam, quia, quanto convexitas vitreæ lentis est majoris circuli pars, eo majori spatio opus est, ut species conclavis obscurati in ordinem redigantur; ideo in majoribus animalium oculis, & ampliori humoris crystallini convexitate, spatium vitrei humoris, sive interstitium inter crystallinum & retiformem, debet esse majus. Species quoque à majori lentis convexitate refractæ, plus spatij in pictura sua occupant, minus verò, ubi lentis convexitas est minor, id est minoris circuli pars.

Vnde sequitur res prorsus admiranda: ut in minimorum animalculorum ocellis, ubi crystallini convexitas est valde parva, magnorum objectorum species, in spatio tunicæ retiformis pænè punctuali sic depingantur, ut tamen singulæ objecti visibiles partes propriam speciem extra situm alterius positam



positam obtineant. Nisi enim unaquæque objecti pars speciem suam extra alterius partis speciem in pictura illa tunica retiformis haberet, non videretur illa pars extra partem alteram distinctè collocata, sed omnes objecti partes in unum situm confusæ. Viderentur enim, sicuti in speciebus & imaginibus suis, quas excipit retiformis, depingerentur. Sic in cubiculo illo obscurato species confundi cernimus, si charta picturam excipiens nimis propè, aut nimis remotè à foramine collocetur.

Acutè igitur Io. Episcopus Cantuariensis ( nisi quod visionem in glaciali, sive crystallino fieri perperam constituat. ) *Visio, inquit, fit per hoc quòd in glaciali est ordinatio speciei, sicut rei exterioris. Quòd autem glacialis ( dicamus nos, retinæ ) parvitas non obstet, manifestum est; quoniam tot sunt partes minime, quot sunt maxima magnitudinis ejusdem speciei. Et species visibiles sine materia recipiuntur. Ergo quantumcumque sit visibile, species ejus distinctè & ordinatè in glaciali humore recipiuntur. Quòd nisi fieret, oculus rem distinctè non videret. Si enim species duarum partium rei visibilis in eadem parte glacialis reciperentur, partes rei, propter confusionem formarum morientium oculum in eadem parte, non cognoscerentur distinctè.*

Lib. I.  
propos. 37.  
Perspect.  
commun.

Sed quod de humore glaciali dicit, ad tunicam retinam transferendum est, ut jam monui; quia glacialis nimis vicinus est foramini uveæ & externo lumini, ideoque lenti crystallinæ, refringenti species versus perpendicularem & ulterius transmittenti, similior est, quàm tabulæ, in qua distinctè depingantur. Idcirco enim glacialis figurâ parvioris est lenticulari præditus est, & oculo extractus, omnia quibus inpanitur, ait Vesalius, impense, quorundam specillorum ritu, adauget.

Vesal. lib. 7.  
c. 14.

Quid ergo jam hinc conficimus? Hoc, nisi fallor. Visionem fieri non in crystalloide, ut plurimi; aut in aranea tunica eam obtegente, ut Aguilonius & pauci quidā sentiunt; sed in fundo oculi, seu ultimo ejus pariete, id est, in tunica retiformi. Vbi enim potius fiat, quàm ubi species rerum visibilium exactissimè depinguntur? Anima enim quæ est in crystalloide, si per species ab objectis sibi impressas ea cernere deberet, non nisi confu-

confusissimè id facere posset; imò non tam colores quàm lumen quoddam dilutum videret: quia species in humoris crystallini diaphano, lumini permixtæ, umbras suas amittunt, quarum tamen mixtura necessaria est, ut opacitatem, sive nigredinem coloribus, præsertim medijs, permixtam repræsentent. Hinc enim oculi noctuini & glauci, quibus tunica uvea luminis utcumque pervia, aut fenestra pupillæ nimis laxa est, dilutiùs deteriusque vident, propter copiam luminis, quod intrat cum speciebus usque ad oculi fundum, & in ipso tunicæ retinæ pariete diluit umbras specierum.

Sic enim quoque in conclavi obscurato evanescere cernimus umbras, & totam picturam specierum, si fenestra aperiat, aut foramen cui inserta lens vitrea, sit nimis latum. Igitur statuamus, in tunica retiformi, quæ ex nobilissima parte, id est, substantiâ medullari nervi optici, contexta est, visionem fieri. Potentiam verò visivam, aut per totam eam diffundi, aut saltem per portionem quæ è regione est pupillæ, sive foraminis uveæ tunicæ, per quod species visibilibus in parietem retinæ trajiciuntur.

Non tamen, quòd tantilla retinæ pars sit præcisum visivæ potentia organum, quantilla solum est laxitas foraminis uveæ. Debet enim organum potentia esse amplius, & occupare spatium retinæ quousque se extendit pictura specierum. Hoc autem majus est, quàm uveæ foramen: sicut in conclavi obscurato, amplior longè est pictura quàm charta depingitur, quàm sit foramen per quod species intrant.

Errant ergo Vitello, Alhazen, & Galenus interdum, qui non in oculo formari visionem putant, sed extra, in via cerebri, ubi duo nervi optici duorum oculorum concurrunt; & hanc causam esse existimant, cur duobus oculis res non gemina, sed simplex videatur. Species enim, inquiunt, per duos oculos & duorum nervorum opticorum canales trajectæ, in unum concurrunt, & unicam ibi visionem efficiunt.

Sed verius est, quod S. Augustinus & tot alij censent, visionem perfici in oculi fabrica. Nam species quæ extra oculorum orbis per nervos opticos versus cerebrum mittuntur, non

(sensui



sensui externo, sed tantum interno servire possunt: nec in tenebroso illo nervorum opticorum concursu ita pingi & in partes suas digeri valent, ut objectum distinctè, & quale à visu cognosci debet, repræsentent.

Debet enim sensus externus primò cognoscere objectum, secundum perfectam expressionem & effigiem imaginis quam res sensibiles ei imprimunt; ut deinde alia species, velut perfectæ illius imaginis nuntia, transmittatur ad cerebrum.

Deinde, ut sagaciter Vesalius notat, nervi optici insignem aliquam in illo suo congressu cavitatem habere deberent, si ibi sit tabula in qua rerum visibiliū imagines oporteat distinctè & explicatè depingi. Iam verò experientia constat, totum nervum ab oculo ad cerebrum usque, nullā perspicuā cavitatem terebratum esse; secus atque Galenus, Herophilus, & alij Græci existimasse videntur; qui idcirco *πρόπος ὀφθαλμοῦ* canales visivos appellant. Nam hominis, <sup>Vesal.</sup> <sup>lib. 4. c. 4.</sup> *cujus caput adhuc à decol- latione calebat, scribit Vesalius, vixq; quarta hora parte, cum nervos intuerer, obtruncatum fuerat, ipsos non oscitanter spectavi, ac calente aqua (ne pori frigore fortè coirent) sedulo fovi. Atque ut ejusmodi meatus toto nervorum progressu me penitus latuit, ita sanè in mutuo nervorum coitu is nequiquam se obtulit; utcumque tamen hunc inibi oportebat esse insignem.*

Vesalio passim consentiunt recentiores Anatomici. Nos sensilem cavitatem in nervis non admittimus, inquit Laurentius. Volumus tamen opticos nervorum omnium esse mollissimos magisq; spongiosos, ut copiosissimum deferant animale spiritum.

Hoc quoque non leve fortasse argumentum erit, visionem intra oculorum orbis fieri; quòd oculus cavo suo excussus, & ultra nasum, ex nervo adhuc dependulus, ac motu hominis ambulantis vacillans, omnia etiam vacillantia spectare videatur. Quia, ut opinor, imagines in retina tunica depictæ, vacillant & titubant ipsa oculi titubatione & motu. Illustre ejus rei experimentum ab Henrico Hero Medico nuper Leodienfi, quod totum recitasse, non erit injucundum.

Duo fratres nobiles, ait, annos nate octo (erit ergo circiter annos 1622. ut ego conjecto) inimicum cujus vitæ insidiabantur, <sup>Hen. Verus lib. Obser. vat. 4.</sup> *quia*

quia sorori vitium vel fecerat, vel certe se compressisse iactaverat, in campo, quo illum ad perdicum aucupium pellexerant, arbori adligant. Alteram oculum cultro sectum omnino erunt; alterum digitis expressum, ad extremitatem nasi, cujus partem cultro praecliderant, pendulum relinquunt; cacum, atque à bestiis noctu vorandum reliquisse rati. Ille verò sat commode visu usus, vinculis se expedivit, atque ante noctem Chirurgi domum venit. Qui oculum cavo suo repositum, aliquamdiu obligavit, sanumq; hominem probeq; videntem dimisit. Addit verò quod ad rem nostram maximè facit. Affirmavit, inquit, ille mihi, se cum propendente oculo ambulante, viam quàm incedendum optimè vidisse, sed cum agitatione vel fluctuatione quadam, qualem in superficie fluminum vento agitata observamus. Hoc ab oculo & nervo optico, motante se, inquietasq; visibilium imagines recipiente, manasse credo.

Sed eadem rerum visibilium fluctuatio, sine dubio, accidisset, etiamsi nervus opticus inter oculum & cerebrum, oculi motum non sequeretur. Vnde verò similis est fluctuantem illam visionem in oculo fluctuante, quàm in nervo optico fluctu agitato, factam esse. Quamvis tamen fatear, hoc argumentum adversus pertinacem non omnino invictum esse. Sed clariùs patebit, videndi actum in oculo exerceri, cum videndi modum paulò pòst sumus explicaturi.

Et sanè hæc est S. Augustini, qui sæpe docet, visionem non aliud esse, quàm ipsam speciem visibilem ab objecto impressam oculo, quatenus anima eam in idem objectum quasi retorquet & in eo defixam tenet, ut Artic. X. enarrabimus.

Cur deinde compressâ unius oculi pupillâ, aut divaricatis in strabonismum oculis, omnia gemina apparent, si non in oculis ipsis duplex visio, sed unica in congressu opticorum, exerceatur?

Vnde ratio, cur in naturali oculorum situ, res non geminæ appareant, non est illa unica visio in concursu opticorum, ut Virello & Alhazenus fingunt, sed quia axes & lineæ pyramidum per quas uterque oculus rem eandem cernit, in idem punctum rei visibilis concurrunt, nec ita divaricantur, ut per

unam

S. Aug.  
lib. 1.  
Trinit.



unam lineam ab uno oculo exeuntem, punctum rei visibilis in alio situ cernatur, quam per lineam quæ ab altero oculo in objectum idem extenditur.

Denique refelluntur experimento Vesalij, qui affirmat se Patavij quendam disseccuisse, in quo nervorum opti-<sup>Vesal. lib. 4. c. 4.</sup>corum nullus coitus; imò ne contactus quidem erat. *Quam sedulo autem, inquit, ac sollicitè ejus viri familiares interrogaverimus, num illi omnia gemina oculis obversarentur, neminem naturæ operum cognitione flagrantem ambigere sat scio. At nihil aliud resciscere licuit, quam ipsum de visu nunquam conquestum fuisse, visus præstanti semper valuisse, familiaresque de visorum duplicatione nihil unquam intellexisse.*

In plerisque tamen omnibus concurrunt, & iterum divari-<sup>Laurent. supra.</sup>cantur illi nervi: quia sunt omnium mollissimi, ait Laurentius, & longum iter perreptantes flaccescerent, rectaque ad utramque pupil-  
lam non ferrentur, nisi in medio unirentur. Sic natura solet quæ molliora sunt & infirmiora. medijs quasi internodijs stabilire. Postremò addit, coire debuisse nervos opticos, ut visilis spiritus ab altero oculo in alterum momento permearet, ad visus perfectionem. Ita enim clauso alterutro oculo acutiùs videmus: spiritum nempe utriusque in oculum unicum confluentem.

## ARTICVLVS X.

*An species visibiles activè ad visionem concurrant.*

**P**urimis Philosophorum placet, species necessarias esse potentia propter physicam activitatem. Et videri potest sententia S. Thomæ, ubi ait, *quod sicut calor*<sup>S. Tho. 1. p. q. 56. a. 1.</sup>  
*est principium formale calefactionis in igne, ita species rei visa est principium formale visionis in oculo.*

Sed tamen idem Sanctus alibi quoque dicit, quod *scientia ar-*<sup>Idem 1. p. q. 14. a. 8.</sup>  
*tificis sit causa artificiatorum sicut calor est principium calefactionis; & tamen Philosophi passim negant physicum influxum ideæ in opus artificis, solamque directivam ei tribuunt. Non vult igitur S. Thomas, ut opinor, similitudinem illam inter speciem*

A a a a

visibilem

visibilis & calorem in modo efficiendi, undique congruere. Sed potentia cognitiva, inquiunt alij, est causa efficiens incompleta, quæ accessu speciei debet compleri; veluti ad conceptionem foetus non sufficit uterus, nisi addatur ei semen, cum quo conformationem absolvat. Semen autem activè uteri facultatem adjuvat; ergo & species potentiam.

S. August.  
lib. 9. c. ult.  
Tria.

Hæc, credo, Philosophia sumpta est maximè ex S. Augustino, qui alicubi ait: *Liquidò tenendum esse, quòd omnis res, quamcumque cognoscimus, congeneret in nobis notitiam sui. Ab utroque enim notitia paritur, à cognoscente & cognito.* Igitur cognitum, sive objectum, ad sui cognitionem non minùs, quàm cognoscens, vel per se, vel per speciem sui concurrere debet, & congenerare conceptum cognoscentis. Hinc quippe etiam factum est, ut terminus cognitionis, seu verbum mentis, quod potentia adjuncta per speciem, in se exprimit & format, vocetur conceptus; tanquam quadantenùs similis conceptui prolis, quem uterus maternus, adjunctus semine viri activè cooperante, intra se concipit.

Idem;

Sed fallor, aut hoc à mente S. Augustini abit. Non enim contendit, notitiam objecti, ab ipso activè concurrente gigni oportere; sed sufficit ei, modò concursu objectivo, seu terminativo ab eo esse accipiat. Nam simili etiam modo dicit, objectum amoris esse principium amoris; & tamen illud objectum solùm terminat, non coëfficit aliquà specie, tanquam activo semine, actum amoris. Vnde si mens, inquit, propterea est notionis sua causa, quia noscibilis est; amoris etiam sui causa est, quia est amabilis. Ac postea: *In eo manifestè ostenditur hoc amoris esse principium unde procedit. Ab ipsa quippe mente procedit, qua sibi est amabilis antequam se amet: atque ita est principium sui amoris, quo se amat.* Vbi semper objectum amoris, quà tale, vocat principium & causam amoris, non minùs quàm objectum cognitionis, causam cognitionis. Cognitionem tamen sensitivam dicit S. Augustinus efficienter ab objecto effundi: sed tunc cognitionem appellat, non ipsam vitalem potentia sensitivæ operationem, sed speciem sensibilem, quæ ab objecto in seosum emicat.

Itaque licet ego quoque olim speciem visibilem vocaverim semen.



semen objecti, & activitatem in actum videndi ei tribuerim, magis jam inclinor, ut negem.

Nam sic philosophantes, dicunt in primis, species visibiles esse instar habituum, qui potentijs quas adjuvant, inhærent. Hoc autem speciebus sensibilibus convenire vix potest. Sicut enim species albedinis inhæret materiæ æris, quando per eum ad oculum trajicitur; ita ubi corneam oculi tunicam intraverit, non potentiam ipsam visivam, tanquam subjectum suum, sed materiam organi, occupat.

Deinde species coloris umbram aliquam, ut antè differebamus, permixtam habet, quæ lumen speciei visibilis, ne in purum liquidumque splendorem diffuat, attingit & temperat. Quod in specie, quâ color puniceus auroræ, aut Iridis videtur, est certius. Sicuti enim color ille lumen solis est incorporatum opacitati nubis; ita species quam ad oculum mittit est lumen tenuius de lumine pinguiori, involutum tenuibus quibusdam umbris, ut ipsa species irrufetur, & sit concolor lumini nubium à quo venit.

Si igitur species visibilis ex lumine & umbrâ temperetur, profectò visionem reali & physicâ actione, per se primò producere non poterit; cum umbra privatio luminis sit, nec physicam efficientiam exercere valeat. Igitur solum illud, quod reale positivum est in specie visibili v. g. panicei coloris, hoc est solum lumen, visionem cum potentiâ efficit. Sed quomodo jam solum lumen istud visionem punicei magis, quàm purpurei, aut viridis coloris efficere poterit? In speciebus enim visibilibus omnium istorum colorum miscetur lumen ejusdem naturæ: hoc solo discrimine, quòd unum densioribus, quàm alterum umbris implicetur; umbræ autem cum nihil positivum contineant, nihil etiam ad efficientiam positivam visionis conferre valent.

Vnde ad sustinendam causalitatem physicam specierum visibilium, valde oportuna foret opinio, quæ non solum nigredinem, sed opacitatem nubium, & umbram, contenderet esse qualitates quasdam reales & positivas, non minùs quàm lucem & lumen. Verùm de umbrâ saltem, nemo alicujus

acuminis Philosophus, facile credet. Nam omnes sciunt & fatentur, noctem quæ nihil aliud est, quam umbra terræ, positivam qualitatem non esse. Deinde in prismatibus, sive vitris quibusdam triangularibus, pellucidissimæ & uniformis diaphaneitatis, ex mixtura umbrarum cum lumine solis, oriuntur; quemadmodum in Iride, puniceus, viridis, purpureus, & infiniti pænè alij colores. Quis autem nescit; umbras illas colorum apparentium temperatrices, non esse in vitris tam nitidis & digestæ pelluciditatis, positivam opacitatem; sed meras privativas umbras, quæ ex angulis vitrorum & fractionibus radiorum resultant? Hoc quoque suspitione maxima non caret: Quodd natura tot tunicas & humores oculo, ad refringendas, & objecto suo configurandas species, machinata sit. Quid enim opus tam expressa similitudine &figuratione, si species ad efficiendum tantummodò conceptum visivum, oculo imprimi debet? Quid figura ad talem efficientiam confert? Certè enim, ut habitus cum potentia actum ejus coëfficiat, tantâ similitudine cum objecto suo non indiget; imò nec aliorum sensuum species ( quantum experiri, & ex organorum fabricâ conjectare licet ) tam exactam similitudinem postulant.

Species enim soni, aut odoris, figuram objecti sui non exprimit. Nec etiam semini ( cui species comparatur ) formali similitudine cum vivente a quo deciditur est opus; sed virtualis similitudo sufficit, ut conceptum & prolem viventi similem conformare possit.

Vnde nulla ratio erit, cur species visibiles multarum partium objecti in eodem organo confusæ, nec extra se explicatæ, visionem distinctam efficere nequeant, si solum ad efficiendam visionem species sit potentiæ data.

Tam exacta igitur & curiosa speciei visibilis cum objecto suo similitudo, qualem natura decircinat, & in conclavi obscurato observamus, alium quàm efficientiæ usum significat. Quis autem ille sit, proximo Artic. dicere conabimur.

Arist. c. 2.  
de sensu.

Nec Aristoteles, ut opinor, usquam disertè affirmat speciem sensibilem activè ad operationem sensus concurrere; etsi



τὸ αἰσθητὸν ἐρεργάζει τοιαῦτα αἰσθητὰ, *sensibile facit sensum operari*, alicubi dixerit. Nam facit hoc, per speciem suam, non efficiendo physicè operationem sensûs, sed objiciendo sensui speciem quoddam, per quod apprehensum & cognitum, in objectum ulterius tendat, ut jam jam explicatiùs dicemus.

## ARTICVLVS XI.

*Qua ratione species visibilis concurrat ad visionem.*

*S. Augustini Philosophia.*

**N**ihil in tota natura evidentius est, quàm nos lucem & colores visu cognoscere; nihil tamen obscurius, quàm quo id modo fiat, & quem usum imago quæ oculo imprimitur habeat, intellectu cognoscere. Quod enim Chrysostomus de omnium sensuum operatione dixit, *ἡ ἀσφαλον ἐρεργάζει* esse ineffabilem operationem, hoc in visu maxime est verum.

Multa & plura quàm Aristoteles, de visione S. Augustinus scripsit; sine Aristotele tamen, quem in Physicis nunquam vidit.

Dum enim non tantum in mente hominis, sed etiam in sensibus corporis, imaginem Trinitatis investigat; in hoc naturæ arcanum delapsus, magno suo ingenio, & penetrabili acumine veritatem attigit, aut nemo, ut puto, propius.

Docet igitur, ut homo oculis videat, tria esse necessaria.

Primò, inquit, *res ipsa quam videmus; sive lapidem, sive flammam &c.* Deinde visio; quæ non erat priusquam rem illam obiectam sensui sentiremus. S. August. lib. 11. c. 2. de Trin.

Tertiò, quod in eare quæ videtur, quamdiu videtur, sensum detinet oculorum, id est, animi intentio.

Visionem autem appellat, ipsam quam vocamus speciem visibilem; sive imaginem quæ ab objecto imprimitur organo sensûs. Ipsa forma, inquit, quæ à corpore visibili imprimitur sensui, visio vocatur.

Et quia formam istam oculis imprimi non advertimus, *tandioribus ingenijs difficillimè persuaderi posse* dicit, *formari in sensu nostro imaginem rei visibilis, cum eam videmus; & eandem formam esse visionem.* Probat autem exemplo annuli qui figuram suam aquæ imprimit, etiamsi nulla in superficie aquæ figura appareat, cum inde abstrahitur. Deinde exemplo reliquiarum lucis, aut imaginis cancellorum, quæ in oculis adhuc manet post aspectum solis, aut ubi per cancellos transpeximus.

*Erat ergo, inquit, illa forma etiam cum videremus, & illa erat clarior & expressior, sed multum conjuncta cum specie rei eius quæ cernebatur, ut discerni omnino non posset; & ipsa erat visio.*

Speciem autem visibilem vocari visionem, quia objectum & potentiam, tanquam unio quædam, inter se conjungit, non insolens est, & nobiles Philosophos, imò ipsum Aristotelem, sic locutos esse Toletus ostendit. Imò Cajetanus illos Philosophos qui putant nos aliter videre, quàm receptione speciei visibilis, pauperes appellat.

Tolet. lib.  
2. c. 5. q. 12  
de anima.

S. Augustinus tamen ad complendam rationem visionis, præter impressionem & receptionem speciei visibilis, addit animi intentionem, sive attentionem, quæ speciem visibilem cum objecto externo quasi conjungit. Nam nisi hæc intentio adsit, oculus etiam specie visibili signatus, nihil videbit. Fallitur enim Iul. Casserius, qui credit lepores hiantibus palpebris dormientes, res vicinas cernere, sed non recordari. Et nos etiam plateatim ambulantes, quàm multorum lapidum species visibiles oculis excipimus, quos tamen, aversâ inde ad fabulas cum socio attentione, non videmus?

Iul. Casser.  
Prolog.  
Pentæsth.  
c. 10.

S. August.  
lib. 11. c. 2.  
de Trin.

Itaque in tota hac visione, quæ S. Augustino imaginem Trinitatis quandam componit, tria, *quàmvis diversa naturâ,* inquit, *in quandam unitatem contemperantur id est, species (sive figura externa) corporis quæ videtur; & impressa ejus imago sensui, quod est visio sensusve formatus; & voluntas animi, quæ rei sensibili sensum admovent, in eoque ipsam visionem tenet.*

Vbi voluntatem animi appellat, quod antea intentionem animi vocavit. Per quid autem ista voluntas, seu intentio animi (quæ in brutis est simplex affectio sensitivi appetitus)

sensum



sensum objecto sensibili admovent, & in eo visionem, siue speciem visibilem tenet?

Sine dubio, applicando sensum, ut actum vitalem (quem Philosophia hujus temporis, visionem vocare solet) circa speciem visibilem oculo impressam eliciat, & per speciem istam transeundo, usque ad objectum externum, unde species in oculum fluxit, penetret; atque ita, ut S. Augustinus loquitur, imaginem istam in objecto suo teneat. *Voluntas enim, in-* S. August;  
quit, *tantam vim habet copulandi hac duo, ut & sensum formandum* ibid.  
*admoveat ei rei quæ cernitur, & in ea formatum teneat.*

Ita verò teneat, ut in tantam, ait, coeant unitatem, ut ista duo vix intercedente judice ratione discerni valeant: species videlicet corporis quod videtur, & imago ejus quæ fit in sensu, id est, visio.

Qua profundissimâ doctrina & naturam visionis, & unâ SS. Trinitatis imaginem graphicè exprimit.

Pater est res objecta oculis, quæ in sensu imaginem sui parit; Filius est ista imago, tam similis; & tam arctè parenti prototypoque suo connexa, ut visus eam ab ipso discernere non valeat. Voluntas utrumque copulans, est Spiritus sanctus. Sicut enim voluntas hominis, imaginem quæ ab objecto in organum visus manavit, rursus per potentiam visivam versus originem suam reflectit, & ei quodammodo reünit; ita Spiritus sanctus imaginem, seu Verbum Patris principio suo rejungit, tanquam utriusque vinculum, & nexus amoris.

Sententia igitur S. Augustini est ista. Lux, aut color objecti visibilis radiat in oculum, & in fundo ejus imaginem sui depingit. Potentia visiva, quæ in pariete illo tunicæ retinæ residet, per voluntatem & intentionem admota & applicata, imaginem illam, & omnes radios lucis; aut coloris, per quos ista imago ab objecto ultimo visibili, usque ad parietem illum retinæ, quodammodò delabitur, cognoscit; & denique ipsum etiam ultimum visibile, unico eodem actu vitali attingit. Vnde visio quæ est actus vitalis, ab imagine ipsa, siue à specie visibili in oculo pictâ incipit, & per totam radiorum longitudinem usque ad ultimum objectum, unde primi radij emicant, recurrit. Solum tamen hoc ultimum objectum dicitur terminare.

pare visum, quia actionem ejus non ulterius transmittit; cum ultra ipsum visus nihil videat.

Verum sicuti potentia visiva, quæ est in pariete retinæ, non distinguit lumen humoris vitrei, crystalloï, aquei, vel etiam tunicæ corneæ (imo ne quidem lumen aut pelluciditatem conspiciendorum, quæ vaso videntis inequant) à luce, aut colore objecti, quod ultimò terminat visionem; ita non mirum est, imaginem ipsam (quæ nihil est aliud, quàm extremitas radiorum illabentium in oculos) per eandem potentiam visivam discerni non posse ab objecto ultimo è regione posito, unde prima eorundem radiorum origo emanat.

S. August.  
ibid.

Hoc enim est quod ait S. Augustinus: *Corporis formam quod videmus, & formam quæ ab illa in sensu videntis fit per eundem sensum non discernimus, quoniam tanta conjunctio est, ut non pateat discernendi locus. Sed ratione colligimus, nequaquam nos potuisse sentire, nisi fieret in sensu nostro aliqua similitudo conspecti corporis.*

Vbi adverte, eum nequaquam dicere, similitudinem istam conspecti corporis quæ fit in oculo, ab oculo non videri, sed non discerni. Videri autem mox expressè probat; quia, si objectum principale removeatur, illa similitudo, aut quædam ejus reliquæ, seorsim & separatim interdum videntur; ita ut ratio colligat, antea etiã cum objecto principali visam fuisse, etiam si discernere ab eo non posset. Plerumque, inquit, cum diu sculæ attenderimus quæque luminaria, & inde oculos, clausserimus, quasi versantur in conspectu quidam luridi colores, variè sese commutantes, & minùs minùs, & fulgides, donec omnino desistant: quos intelligendum est reliquias esse formæ illius quæ facta erat in sensu, cum corpus lucidum videretur, paulatim quæ & quodammodo gradatim desciendo variari. Nam & insertarum fenestrarum cancelli, si eos fortè intuebamur, sæpe in illis apparere coloribus; ut manifestum sit hanc affectionem nostro sensui ex ea re quæ videbatur impressam. Et ne dubites, quin censeat illam formam, antequam clauderentur oculi, visam etiam fuisse: Erat ergo etiam, addit, cum videremus; & illa erat clarior & expressior, sed multum coniuncta (affinitate similitudinis videlicet; nam quoad locum, toto cælo distat, cum cælum aspicimus) cum specie rei ejus quæ cernebatur, ut discerni omnino non posset: & ipsa erat visio.

Quare



Quare autem visus discernere imaginem istam à prototypo suo non possit, ratio est; quia per easdem lineas & radios videt imaginem apud se in organo, & prototypum extra organum, nec distantiam unius ab altero, transversim intueri valet: sed unicâ directâ visione imaginem, & totam radiorum, per humores, & tunicas oculi, per conspiciilla, per aërem transeuntium longitudinem, quasi in eodem loco & situ cum objecto ultimo & principali videt. Quod inde patet: quia si contingat objectum illud principale amoveri, & tamen imaginem in oculo aliquantisper conservari (ut quando imago solis remanet in oculo, averso à sole) oculus tamen intuetur imaginem eandem, quasi extra organum, sicut antea eam intuebatur, quando eam in unum objectum cum sole confundebat. Nam veluti humores, & tunicæ oculi, aërque inter oculum & objectum ultimum, est perspicuus, & actionem visus transmittit; ita ipsa etiam imago, quæ vel in humore vitreo, tunicæ retinæ contiguo, pendula, vel in ipsa etiam superficie retinæ infixæ est.

Vnde imaginem istam imaginari oportet instar specilli diaphani, quod potentia visiva intuetur, & per quod in alia etiam ulteriora aspectum defigit.

Hæc tamen imago non est merum specillum, aut nudum simplexque medium transparens; sed simul est specimen quoddam, ac effigies objecti primi, à quo radij in ipsam emanant; ex cujus cognitione, potentia visiva in cognitionem principalis objecti traducitur; non discurrendo (sensus enim, præsertim externi, non discurrunt) sed unam eandemque cognitionem imaginis, ad respiciendum ipsum prototypum propagando, & veluti extendendo.

Cujus modi videndi causam in effectu, & imagine sua, meminit alicubi S. Thomas: *Alio modo, inquit, causa ex effectu cognoscitur, ita ut in ipso effectu videatur causa, in quantum similitudo causæ resultat in effectu: sicut homo videtur in speculo, propter suam similitudinem.* Et addit: *In isto modo, est una visio utriusque: simul enim dum videtur effectus, videtur & causa in ipso.* Visio enim ita effectum penetrat, ut usque ad causæ conspectum se exerat.

S. Thom.  
lib. 3. c. 49.  
contra  
Gent.

Igitur ut iterum S. Augustini mentem repræsentemus, imaginare potentiam visivam esse in papyro, quæ imagine objecti externi per foramen cubiculi obicinati depingitur, & potentiam illam sentire ac videre quidem imaginem, sed non quasi apud se, sed foràs quasi ejectam; & conjunctam copulatamque cum objecto externo, à quo imago illa emanat: ac dicito, illam visionis esse naturam; ut semper in objectum aliquod contra se positum collineet; ideoq; si præter imaginem illam, sit aliud objectum foris; utrumque quidem videat, sed per easdē lineas, ita ut quodlibet punctum imaginis suo puncto in objecto sic respondeat, ut anima utrumque simul aspiciens, unum ab altero distinguere non valeat; quandoquidē utrumque punctum in eodem quasi spatio & situ confusum videat.

Hinc liquet, quid alios deceperit, dum omnes tam intrepidē, & quasi rem sensu notam, affirmant speciem esse medium incognitum, nec ulla ratione à potentia videri. Quia enim visu speciem non distinguebant ab objecto externo, putabant se eam non videre. Credunt enim solum se videre opacum, quod visum terminat, non autem medium, per quod visus ulterius tendit & penetrat. Sic lumen aëris circa se, videri à se non existimant; nisi aliqua nebula occurrat, quæ saltem ex longinquo terminet visum: cum tamen certum sit, lumen solis non minus ex propinquo aëre, quàm ex remoto, ad oculum reflecti; & lumen illud re verà cerni, licet oculus id non advertat, sed per aërem vicinum (in quo nulla ei nebula esse apparet) tanquam per medium incognitum, in objectum remotius tendere sibi videatur. Sic quoque serenissimo cælo, & ubi nulla in aëre nubes occurrit, cæruleum cæli fornicem cernere nobis videmur: qui color aliud non est, quàm lumen solis, tenui cuidam opacitati superioris aëris incorporatum & ad nos reflexum; cum tamen vicinum circumquaque aërem nos non videre dicamus, quia visus per medium illum ad remotiora tendit: etsi lumen vicini aëris, multo uberius in oculos reflectatur, & tunicas oculorum pingat, ac sine dubio, videatur, quàm illud quod in summo aëre cæruleum apparet. Hoc autem nos fallit, quod objectū istud vicinius, quia visum

non



non perfectè terminat, sed ad ulteriora elabi permittit, à remotiori non distinguamus. Veluti etiam tunicae retiformis, araneæ, corneæ, ac omnium humorum oculi transparentiam, eadem de causâ, videre nos non putamus.

Sed simili falsâ & fallente experienciâ, negare oporteret nos videre vitra specillorum nostrorum, per quæ objectum remotius aspiciamus; nam ea etiam nos videre non advertimus. Colorem deinde specillorum viridem, nonne non in ipsis specillis, sed in charta, quam legendo intuemur, videre nos putamus?

Verùm, dicet quispiam, imago montis in oculo picta minimum spatij occupat; quomodo ergo eam à toto monte non distinguimus?

Sed argumentum simile in te rejicio. Quomodo fit, ut mons candidus per specillum viride conspectus, totus appareat viridis, cum toties specillo sit major? Ratio igitur est, quia visus non per lineas parallelas, sed per pyramidem in objectum collineat. Vnde lineæ quæ à punctis imaginis exeunt versus objectum exterius, perpetuò sic dilatantur, ut totum illud intercipere, & obtegere valeant. Nullum enim est objecti, quantumvis vasti, punctum quod imaginem suam per angustum uveæ foramen, in crystalloïdem & retinam non radiet: unde non mirum est, si potentia visiva per totidem easdem lineas, à cono versus basim pyramidis foras quodammodo redire, & totum objectum quasi amplecti valeat. Veluti etiam color viridis in vitro specillorum, non opacusi sed transparens est; ita tenuissimus ille specierum in fundo oculi & luminosus color, ita transpareat, ut per eum visus ad objectum exterius penetrare, possit. Et fortasse imago quam potentia proximè videt, non tunicae retinæ inhæret; sed humori vitreo, qui tunicae illius superficiem attingit; sicut aër cubiculi obscurati attingit superficiem chartæ, in qua imaginem objecti externi depictam cernimus.

Refractio quoque specierum, & omnis earum depravatio, qua objecti repræsentatio à naturali figura aut colore detorquetur, species ipsas proximè ab oculo cognosci significant.

Cur enim remus in aqua incurvus apparet, nisi quia curvitas ista est in specie, quam oculus apud se intaetur, & per quam remi figuram cognoscit? Quare sol matutinus, aut vespertinus rubicundus videtur; nisi quia species ejus in oculo rubicunda pingitur, visus & eam tali colore tinctam, ac per eam, solem rubescere judicat? Si enim species visibiles solis incognitæ, efficiunt visionem cum visu, ignorante, quo colore species illæ imbutæ sint, cur non efficiunt visionem solis non rubicundi, sed tanquam naturali sua luce fulgidi? Species enim illæ rubicundulæ, ex puro lumine solis, & umbris vaporum per quos transeunt, compositæ sunt, ut antè ostendimus: umbræ autem positivam visionem efficere non possunt; cum privatio nihil positivi pariat. Igitur tota specierum activitas in puro lumine solis residet, & puræ, non rubicundæ lucis visionem parerent, nisi ipsæ essent proximum objectum visionis.

Denique perspicilla omnia, quibus caligines oculorum detergantur, aut vitia tunicarum, vel humorum corrigantur, ut imago quàm emendatissimè oculo imprimatur, imaginem ipsam à visu agnosci probant. Addi quoque potest non esse aliam causam, cur pupillâ, sive foramine uveæ nimis hiantæ, color luminosior & dilutior videatur, quàm quia admissio per patulum foramen nimio externo lumine, specierum umbræ diluuntur; ac proinde sicut apud oculum ipsæ species dilutæ sentiuntur, ita objectum foris magis luminosum, quàm coloratum apparet. Falluntur quippe, ut existimo Medici, qui istam visûs hallucinationem, non in hanc quam dixi causam, sed in dispersionem spirituum visoriorum referre solent.

Addatur & istud: Quod pro magnitudine imaginis quæ est in oculo, reseadem major, aut minor appareat. Ideo enim viciniore ampliora, remotiora minora esse videntur. Cur istud? Quia idem objectum ex propinquo majorem, ex remoto minorem imaginem imprimit, & visus secundum mensuram visæ apud se imaginis, objecti externi magnitudinem metitur & concipit. Vnde acutissimi visûs sunt, qui minimas rerum imagines, & per ipsas objectum externum minimæ molis sentire valent. Non enim præstantiam visûs, ex magnitudine

molis.



molis objecti, sicut præstantiam loco potentiae motivæ, aestimare oportet, sed è contrà, ut rectè monuit Aristoteles.

Arist. lib. I. c. II. cæli.

Sed ecce tamen non leve contrà argumentum.

Species enim objecti externi in crystallino se interfecant, & imago capitis hominis ante nos positi, inferiore parte tunicae retinae, imago pedis in superiori parte retinae depingitur: igitur, si oculus imaginem hominis sibi impressam agnoscit, caput deorsum, pedes sursum videbit. Ita enim in charta cubiculi obscurati, imagines hominum transeuntium capite deorsum, pedibus sursum ambulantes cernimus.

Verùm imagines istas cubiculi, non ut mediū per quod cognoscitur aliud, sed ut objectum ultimò terminans visum, cognoscimus. Visus autem imaginem hominis ante se stantis, ut medium videndi aliud, ac obiter & in transitu solū inspicit. Vnde quia videt caput hominis per radium, qui ab inferiore parte oculi, ad superiorem partem hominis, foràs exit, ideo caput non deorsum, sicut est in oculo, sed sursum, prout est ante oculum, videt. Nam imaginem oculi non tanquam in tabula retinae depictam contemplatur, sed tanquam foràs ejectam & cum objecto compositam, & undique ei adaptatam considerat: veluti etiam vitrei, crystallini, aquei humorum, & araneæ, ac corneæ tunicarum splendorem, non tanquam in fabrica oculi, & quasi reflexè apud se intuetur, sed tanquam externo aëris splendori confusum cognoscit.

## ARTICVLVS XII.

*Non de nihilo Durandus negavit speciem visibilem esse utilem ad videndum, nisi à potentia visiva videatur.*

**P**hilosophi & Theologi Scholastici Durandū passim refellunt, quia dicere ausus est: *Sine dubio, de se videri absurdum, quod potentia cognitiva ducatur in cognitionem alius, cuius per tale representativum, quod est ipsi totaliter incognitum. Contrarium enim est verissimum: videlicet, quod per notum ducatur in cognitionem ignoti.*

Durand.  
in 2. d. 3.  
q. 6.

Vnde, quia communi errore deceptus, existimavit speciem visibilem nullo modo ab oculo aspicientis videri, negat talem speciem quidquam ad videndum conferre; etsi non neget oculo imprimi. *Quamvis enim color, inquit, imprimat in medio, & in oculo suam speciem, propter similem dispositionem diaphaneitatis, quæ est in eis: illa tamen nihil facit ad visionem, neque visui representat colorem, ut videatur.* Et hoc ideo, quia, ut antè dixerat, *Species coloris existens in oculo, nullo modo videtur, nec videri potest ab ipso, sicut quilibet experitur.*

Vnde patet virum acutissimum illicò in D. Augustini philosophiam descensurum fuisse, si rationem intellexisset, quomodo visus speciem coloris apud se videat, etiamsi hoc visus nesciat; sicut nescit se humores & tunicas oculorum videre, per quas tamen foràs prospicit, tanquam per vitrum.

Argumento autem Durandi, negantis speciem utilem esse ad deducendam potentiam visivam in cognitionem objecti, nisi species ipsa videatur, ab alijs responderi solet: Absurdum quidem esse, ut repræsentativum totaliter incognitum ducat potentiam in alicujus cognitionem, quando tale repræsentativum est medium cognitum; secus verò, si sit medium incognitum, quale dicunt esse speciem.

Sed profectò petunt principium, & ut dici solet, probant idem per idem. Nam hoc est, de quo quæritur: quomodo non sit de se absurdum, ut aliquod medium sit incognitum & tamen ducat potentiam cognitivam in alicujus objecti cognitionem.

Sed species datur potentiæ, inquiunt, ut cum ea efficiat cognitionem; quia potentia est causa incompleta, speciei complemento indigens. Verùm hic modus concurrendi cum potentia, potiùs ex parte potentiæ, quàm ex parte objecti se tenet. Sic enim habitus concurrunt cum potentijs, earum activitatem inclinantes & adjuvantes: ad quod munus est impertinens, an à potentia, vel ab anima quæ illis habitibus utitur, cognoscantur, an ignorentur. Species verò, non ex parte potentiæ, sed ex parte objecti concurrunt, & tanquam specimen quoddam ejus: ut quia objectum per se immediatè potentiæ se sistere, & ei adesse non potest; potentia in illo

speci-



specimine cognito, & per illud, ipsum cognoscat. Nec refert, quod S. Thomas interdum dicat: *Sicut calor est principium calefactionis in igne; ita species rei visa est principium formale visionis in oculo.* Nam similitudo, ut dici solet, non currit quatuor pedibus. Et sub generali quadam convenientiâ, res duæ multis sæpe in particulari à se invicem dissimilitudinibus recedunt. Calor ergo est forma qua, ignis tanquam principio physico ad calefaciendum utitur: species est forma, qua oculus utitur ad videndum; sed tantum ut principio determinante & unum quasi faciente, ut per ipsum actio visiva ad externum objectum ulterius transeat.

S. Tho. p.  
q. 56. a. 2.

Nam de aliorum sensuum speciebus, postea viderimus. Certè tamen speciem coloris, propter umbras & entia privativa quæ intra se implicat, non posse positivâ actione coagendo, adjuvare potentiam visivam, Art. X. satis est probatum.

Deinde figura imaginis, & alij modi non activi, quibus species illa ad exactam prototypi sui similitudinem tornatur & conformatur, clamant non ad agendum cum potentia visiva, sed ut potentia in eam, tanquam in specimen quoddam intueatur, à natura factam esse.

Falsum enim omnino est, & exemplo imaginum, quæ in conclave obscuratum accipi solent, convinci potest, quod vulgò jactant. Inter colorem & speciem coloris, non formalem, sed tantum intentionalem similitudinem intercedere. Formalis enim etiam intercedit, quæ in tincturæ, & in figuræ imitatione consistit; etiamsi modus, & quantitas imaginis, prototypo longè minor sit.

Rectè igitur hætenus philosophatus est Durandus, quod dixerit oportere speciem visibilem cognosci, tanquam specimen objecti ulterioris, ut potentiam visivam in ejus cognitionem abducatur. Ideo enim non à quolibet agente, sed à principali suo prototypo, tanquam filius à patre gigni debet, ut ipsum colore & figura referat; & sicut imago æterni Patris dicit, *Qui videt me, videt & Patrem*; ita imago solis in oculo videntis, ex vero etiam dicere possit, *Oculus qui in fundo suo me videt, uno eodemque intuitu solem patrem meum videt.*

Io. 14.

Speciem

Speciem quoque non tantum visibilem in oculo, sed etiam intelligibilem in intellectu, debere esse medium cognitum, supponere videtur S. Thomas, quando negat, Dei essentiam *videri posse per aliquam similitudinem creatam, quæ ipsam divinam essentiam representet, ut in se est.* Quomodo nempe similitudo sive species visibilis, quam sol irradiat in oculum videntis, repræsentat ipsum solem, ut in se est, tanquam similitudo, quæ sit medium cognitum, adducens potentiam cognitivam in claræ & intuitivam cognitionem sui principij. Hoc etenim pacto verissimum est, quod ibi docet S. Thomas. Et postea iterum repetit, probans, quod Angelus per imaginem Dei, quam essentia suæ Angelicæ impressam habet, *non videat ipsam Dei essentiam; Quia, inquit, nulla similitudo creata est sufficiens ad representandam divinam essentiam.*

Idem 1. p.  
q. 56. a. 3.

In nullo enim effectu creato potest tam clarè & expressè divinæ essentia infinita sublimitas *representari*, ut in illo valeat, sicut in se est, videri & apprehendi.

Suar. lib. 1.  
c. 13. de  
attribut.

Vnde Franc. Suarez subtiliter & operosè mentem S. Thomæ discutiens, *rationes, quas adducit, inquit, sunt efficaces ad excludendam obiectivam similitudinem; ad probandum autem, esse impossibilem divinæ essentia speciem impressam (quæ scilicet sit medium in cognitum, ut ipse & Scholastici plurimi statuunt) parum valent.*

D. Tho.  
lib. 3. c. 69.  
contra  
Gent.  
Idem 1. p.  
q. 58. a. 3.

Vt proinde non parva jam me suspicio invaserit, D. Thomam existimasse, cum S. Augustino, speciem visibilem, item phantasticam, ac intelligibilem, non aliter quàm mediante sui cognitione ducere potentiam cognitivam in cognitionem ulterioris obiecti. Et quidem ita, ut quando talis species fungitur officio speciei, eadem cognitio quæ proximè speciem respicit, remotè etiam exeat usque ad prototypum, cuius illa species est imago. Eâ enim de causâ sæpe dicit, uno aspectu imaginem, & simul rem illam, cuius est imago, in speculo videri. Nam alicubi: *Homo videtur in speculo propter suam similitudinem, & una est visio utriusque.* Et alibi: *Si uno inspecto simul aliud inspiciatur, sicut in speculo inspicitur simul imago rei & res, non est propter hoc cognitio discursiva.*

Et tanè Aristoteles memoriam & phantasia circa objectâ absentia



absentia sic versari docet, ut proximè in imagines apud se conseruatas ferantur, & mediantibus istis in objecta quorum sint imagines. Vnde dicit, in somnijs sæpe nos decipi, putantes imaginem Corisci, quam phantasia intuetur, esse ipsum Coriscum. Quem errorem ratio vigilantis corrigit, iudican-  
do non fuisse Coriscum, sed simulacrum, per quod verus Coriscus cognoscitur.

Aristot.  
lib. de Insom.  
fom.

Et alibi apertè dicit, quòd in recordando, memoria speculatur & sentiat simulacrum quoddam simile typo aut picturæ; non tamen secundum se tantum, ἀλλ' ὡς εἰκόνα sed tanquam imaginem. Vbi planè significat, sensum internum proximè in speciem phantasticam, & per eam vterius in objectum aliud, cuius est imago, eodem actu ferri.

Lib. de memor. c. 1.

Quæ est etiam compertissima S. Augustini sententia, multis sparsim vicibus repetita. Cum in somnijs, inquit, vel in ecstasi, corporum exprimuntur imagines, non discernuntur omnino à corporibus; nisi cum homo redditus sensibus corporis, recognoscit se in illis fuisse imaginibus, quas non per sensum corporis hauriebat. Et alio loco: Quod est ad corporis sensum aliquod corpus in loco, hoc est ad animi aciem similitudo corporis in memoria. Et quod est aspicientis visio ad eam speciem corporis ex qua sensus formatur, hoc est visio cogitantis ad imaginem corporis in memoria constitutam, ex qua formatur acies animi.

S. August.  
lib. 12. c. 2.  
de Genes.

Lib. 11.  
c. 4. de Trin.

Veluti ergo S. Augustinus cum Aristotele (quem tamen nunquam legerat) docet speciem phantasticam à sensu interiori objectivè cognosci, & per eam cognitam, μὴ ὡς περ καὶ αὐτὴν non secundum seipsam, finiendo nempe ibi obtutum, ἀλλ' ὡς εἰκόνα, καὶ ἢ ἄλλου sed tanquam imaginem, & quatenus alterius est, ut Aristoteles loquitur, imaginationem ad prototypum ipsum extendi; ita quoque censet speciem visibilem à sensu externo in oculo ipso agnosci, & per eam ad colorem & lucem quodammodo foràs prodire. Quid enim vetat, quo minùs sensus externus, in ea re & eo more sensum internum, modo quodam imperfecciori, æmuletur? Vt, inquam, ab imagine coloris, sinu suo exceptâ, usque ad colorem ipsum, intentionem & actionem suam vitalem refundat?

## ARTICVLVS XIII.

*Fortasse non erravit Plato, quando visionem jactu radiorum ex oculis fieri dixit.*

**E**Cce quid mihi jam in mentem incidat: Platonem fortè non aliâ mente, quàm S. Augustinum, dixisse visionem jactu quodam radiorum ex oculis fieri. Quasi pyramis illa radiosâ, cujus conus est in oculo, basis in objecto, ex oculi centro emicaret in objectum, non ex objecto radiaret in oculum.

Nam more & phrasi Platonis loquitur S. Augustinus, cùm ait: *Visus se foràs porrigit, & per oculos emicat. Emissio visu per oculos video. Visus est quasi oculorum virga &c.*

S. August.  
lib. de  
quant.  
anim. c. 23.

Et tamen alibi, ut Artic. XI. vidimus, dicit, tria ad videndum esse necessaria: Objectum visibile, imaginem quæ ab objecto imprimitur visui, & animi intentionem, quæ imaginem illam in objecto suo, quasi defixam tenet. Si autem imago illa (sive visio, ut eam S. Augustinus appellat) per lineas radiosæ pyramidis in oculos radiat; igitur radiatio ab objecto in oculos venit, non contrà, ab oculo in objectum emicat, adeoque productio à basi pyramidis, non à cono incipit.

Nisi velis præter istam. aliam insuper pyramidem per easdem lineas tensam, superingere, quæ ab oculo efficienter emicet in objectum, contra eam, quæ ab objecto funditur in oculum: quod esset re frustraneâ, & pondere inutili naturam onerare.

S. August.  
lib. I. c. 2.  
de Trin.

Vnicus igitur radiorum pyramidalis fascis est, per quos res visibilis, ut ait S. Augustinus, *gignit formam, velut similitudinem suam, quæ fit in sensu, cùm aliquid videndo sentimus.*

Quid igitur sunt illi præterea radij, de suo quisque oculo emicantes, quos ibidem S. Augustinus divaricari dicit, quando lucernæ flammula ebrijs gemina apparet?

Profectò nihil aliud esse videntur, quàm radij ipsi pyramidis, quæ ab objecto in oculos, totâ latitudine basis, profunditur, &



tur, & in oculos cuneatur. Ejus enim pyramidis radij ex oculis etiam emicant, tractu saltem locali, etsi non efficientiæ causalitate. Veluti enim eadem est via, quâ Athenis Thebas itur, & Thebis Athenas reditur; ita unus spatij tractus est, per quod, incipiendo à basi, pyramis ista it in oculos, & incipiendo à cono, ad basim quasi revertitur.

Vel certè radius *de suo quisque oculo emicans*, S. Augustino est operatio illa vitalis, quæ jam Philosophis visio appellatur. Hac verò nec motu aliquo locali, nec actione aliqua per medium transeunte, ut solet radius luminis, propriè effunditur vsque ad objectum; sed metaphoricè solum, & repræsentatione intentionali, quâ non tantum imaginem quæ est in oculo, sed etiam lumina radiorum per quos imago trajicitur ad oculum, & ipsum denique ultimum objectum, à quo radij effluunt, attingere dicitur. Tactu videlicet repræsentativo & metaphorico, quo visio illa dicitur eousque se exere, etiam si à parte rei, nec per se, nec per radium à se effusum, potentiam suam visuam egrediatur. Potentia quippe dicitur attingere objectum quod repræsentat, seu cujus actum vitalem sibi imprimit, licet usque ad ipsum foràs propriè non exeat.

Hac quoque consideratione ista intentio visionis in objectum vocatur lumen, & oculus lucerna, sive lampas, intra quam lumen illud est conclusum. *Lucerna corporis tui est oculus tuus*. Sicut enim lucernæ lumen illuminat, & videre facit quæ circa nos sunt; ita illa intentio vitalis, quæ in oculo tanquam in lucerna quodammodo fulget, facit ut ipse luces & colores videat.

Matt. 6.

Reliqui etiam SS. Patres, præsertim Græci, Philosophiâ Platonici, cum visionem radijs ex oculis emicantibus fieri dicunt, eo modo quo Augustinus interpretandi sunt. Nam ecce S. Basilii, qui talibus phrasibus interdum Platonizat, radios tamen lucis & coloris à basi in conum, sive ab objectis ad oculos, non contrà, ab oculis ad objecta, vehi dicit; ideoque *aëris naturam factam esse raram ac transparentem, ut omnium visibilibus acceptas species & formas, ad intuentium oculos transmittat*. Nec alia Platonis mens, quam nobis (vt jam video) Pla-

S. Basil.  
Homil. 2.  
Hexam.

tonicorum seculi elapsi Princeps, Marfil. Ficinus etiam sic exponit.

Marfil. Fi-  
cin. Com-  
ment. in  
Sympof.  
Plat. c. 4.

*Oculus, inquit, nil aliud; nisi solis aspicit lumen. Figura namque & colores corporum nunquam nisi lumine illustrata perspicuntur, neque ipsa cum materia sua ad oculos veniunt. Necessarium tamen est ut ab oculis videantur. Vbi vides expressam S. Augustini, & nostram sententiam: Species visibiles in oculis, & ab oculis videri. Pergit Ficinus: Vnum itaque solis lumen corporum omnium ab eo illustratorum coloribus figurisq; depictum sese oculis offert. Sic affectum lumen oculi suo quodam radio adjuvante percipiunt; perceptum ipsum, & quæ in eo sunt omnia vident. Quare totus hic Mundi qui conspicitur ordo, non eo modo, quo in materia corporum, sed quo in luce infusa est, cernitur. Hoc enim extremum probatur omnibus exemplis, quibus radij in oculos, aut refracti, aut enormiter à veris corporum figuris distorti, illabuntur. Isti enim radij imaginem in oculo depingunt, non similem suo corpori, sed qualis à medio depravatur; sicque visum ludificant. Pocula ita figurantur, ait Plinius, expulsis intus crebris ceu speculis, ut vel uno intuente, populus totidem imaginum fiat. Excogitantur & monstrifica, ut in templo Smyrnæ dicata. Id evenit figuræ materia: Plurimumq; refert concava sint & poculi modo, an parva Threicidice, media depressa an elata, transversa an obliqua, supina an recta, qualitate excipientis figura torquente venientes umbras.*

Plin. lib. 33.  
6. 9.

Perspect.  
commun.  
lib. 1.  
propp. 46.

Quod verò Ficinus aiebat, Oculos suo quodam radio adjuvante percipere lumen, ad pelluciditatem & luculas spirituum, tunicarum, & humorum (quæ in quorundam animalium oculis luculentiores, aut magis extinctæ esse solent) referri potest. Nec amplius vult, ut opinor, quàm Archiepiscopus Cantuariensis, cum dicit: *Lumen oculi, naturali radiostrate sua visui conferre.* Quam propos. sic explicat: *Oculus, ut dicit Aristoteles, non solum patitur, sed etiam, quemadmodum splendida corpora, agit. Lumen ergo naturale, ad alterandas species visibiles, & ad efficiendum proportionales virtuti visiva, necessarium est oculo. Quoniam species visibiles ex luce solari diffunduntur; sed ex lumine oculi connaturali, oculo contemperantur. Sic ergo patet; quod aliquo modo fit emissio radiorum, sed non modo Platónico: ut radij ab oculo emissi, in forma visibili*



visibili intingantur, & immergantur, & intincti revertantur, oculo nunciantes.

Sed Plato, quem Aristoteles *melancholicum*, & *profundissimi ingenij* fuisse dicit, non adeo simplex; credo, & puerilis fuit, ut ejusmodi nuntios ex oculis ad cælum usque mitti, & colore siderum tinctos, in oculos redire, & nunciare quæ ibi quodammodo viderint, censuerit. Vnde Platonicos quosdam posteriores, *pertinaciæ suæ auctorem*, *Platonem prætereundum*, dicit Iul. Scalig. Exerc. 325. Ille namque, ait, sicut & nos, à rebus effluere species ad oculos in *Timao*, & *Menone* scribit.

Aristoteles tamen in alium sensum Platonem interpreta- Aristot. lib. de sensu t. 2. tur, & quasi re verâ censuerit oculum esse *λαμπρότητα τοῦ φωτός* laternam quandam luminis, quæ radios ad objecta visibilia spargat, non ab ipsis accipiat.

Sed Aristoteles modum illum Pythagoricum explicandi, vel potius abscondendi res naturæ sub quibusdam mysterio- rum figuris & imaginibus, in suo Platone non probabat, omniaque ejus dicta per externum verborum corticem arripiens, mirum in modum exagitat. Sciunt enim omnes, quomodo ideas ejus, compositionem corporum naturalium ex numeris, aut figuris mathematicis, & alia id genus verè & Pythagoricè à Platone asserta, aliorum accipiat, & injustè vexer.

## ARTICVLVS XIV.

Falsò etiam à quibusdam Platoni tribuitur opinio Empedoclis, Democriti, & Epicuri: Lucis & colorum radiationem, per effluxam tenuium corpusculorum fieri.

Pet. Aliac. c. 1. Sphær. Et Aliacus, Card. & Episcopus Cameracensis, inter Philosophos, qui radios lucis & coloris censent esse quosdam fluentium corpusculorum rivulos, Platonem numerat. Sed fallitur. Idem enim hîc Plato opinatus est, quod Aristoteles: nempe per nudarum qualitarum efficientiam, non corpusculorum vel spirituum effusiones, ejusmodi radiationes effluere.

Marfil. Fi-  
cin. Com-  
ment. in  
Sympof.  
Plat. c. 4.

Platonis enim mentem Marfil. Ficinus, recentium Platoniorum facile Princeps, nobis exponat. *Lumen ipsum, ait, corpus esse non potest; cum momento ab Oriente in Occidentem, totum ferme impleat Orbem. Deinde aëris & aqua corpus, sine ulla offensione, undique penetrat. Tertio, sordibus immixtum nusquam inficitur. Hæc verò corporum natura nullo modo conveniunt. Corpus siquidem non momento movetur, sed tempore. Neque alterum absque sui, vel alterius, aut utriusque offensione, penetrat alterum. Ac duo invicem corpora mixta mutuâ se contagione inficiunt. Quod in aqua & vini, ignis & terra confusione conspiciamus.*

Tribus ergo argumentis Platonicus ille lumen non esse corpusculorum, aut ramentorum lucentium effluvium, conficit.

Primò, radius solis in instanti ab Ortu ad Occasum emicat. Item lumen lucernæ accensum, tam citò ex fine sphaeræ activitatis suæ, quàm ex principio cernitur. Signum igitur est, radios illos non effundi more fluminis, sed produci immediate ac eodem momento, tam citò in extremo, quàm in propinquo spatii illius. Aliàs enim flumen à fonte suo effusum, citius ad proximam fonti alvei partem, quàm ad remotam defluit. Et omne corpus morâ & fluxu temporis de loco in locum transit. Similis prorsus SS. Patrum Platonizantium philosophia. Vnde S. Basiliius de luce illa Mundi primæva loquens, ait eam *sursùm atherem ac calum, in latitudine omnes Mundi partes, Aquilonem, Meridiem, Ortum, Occasum ἀχρόας* line tempore *& in instanti illuminasse.*

Secundò, addit Ficinus, *lumen sine offensione, corpus aëris & aquæ penetrat.* Si autem corpus esset, profectò offenderet, & impingeret in illud aliud corpus, & loco depelleret. Aliàs duo corpora in eodem spatio simul essent; quod tot naturæ repugnantis exemplis probatur esse impossibile. Radius ergo solis per aërem, & aquam, item vitrum, crystallum, & adamantem constipatissimum, se non aliter quàm spiritus, inoffensus, & sine resistentiâ transfundit. Nec enim dici potest protrudere & expellere corpuscula, quæ quispiam intra poros & meatus crystalloꝝ, aut adamantum imaginari posset. Nam



set. Nam talia corpora ex uniformi liquidâ materiâ, cujus partes intra omnes corporis sui poros collabuntur, plerumque concresecunt; ut proinde nullis uspiam, aut rarissimis poris dehiscant, nec continenti ordine sic perforatis, ut radius corporeus ex uno in alterum deinceps illabi, & totum adamantis corpus pervadere possit. Nam ne quidem nivem, tam fungosum corpus, pererrare & pertundere radius solis valet.

Deinde, ubi quippiam in fundo, aut fundum ipsum nudum aquæ pellucens & quiescentis videmus, aquam sursum ebullientem cerneremus, si species colorum sint quædam corpusculorum & spirituum effluvia: quemadmodum, ubi ignis, spiritus vaporum ex fundo ollæ resolvit, eorum ascensu aquam intumescere & bullire videmus.

Tertiò, lumen per lutum & sordes sparsum contagione non inficitur, ut corpus mundum contactu corporis immundi solet, ait Ficinus. Quamquam huic argumento aliquid probabile reponi possit.

Sed non tam facilè duobus istis, quæ jam addam.

Sol, & corpora luminosa, imò omnia colorata, jam dudum exhausta forent, si lux & color perenni quodam spirituum corporeorum effluvio radiarent. Cum enim perpetuus, & undique in orbem, ac per omnes corporis partes sit iste effluxus, quomodo solare corpus per tot jam millia annorum non totum effluxit? Quomodo adamantis corpus tam molli & facili effluvio se erogat, cui vix malleus, aut lima hilum deterit? Quomodo etiam expirari & decrescere adamantem non videmus, aut ex imminuto pondere non intelligimus?

Si verum est, summas rerum superficies, velut membranas quasdam, corporibus perpetuò detrahi, ut per illas tanquam per simulacra & imagines in oculos influentes, corpora videri à nobis possint, ut ex Epicuri sui disciplina, cantillat Lucretius; quomodo tot superficiebus quotidie diu noctuque effluentibus, corpora illa tot annos integra & illibata remanere apparent?

*rerum simulacra vocamus,*

Lucret.  
lib. 4.

*Quæ*

*Quæ quasi membrana, summo de corpore rerum  
Direpta, volitant ultrò citroque per auras.*

Quomodo etiam vento reflante, simulacra ista & species visibiles ab oculis, sicuti soni ab auribus, non repelluntur?

Hoc denique perpende: Quodd spiritus illi lucis & colorum (si qui sint) sursum, deorsum, transversim, & undique æquali facilitate, ex corporibus emicare & effluere dicantur. Quomodo autem hoc, si corpusculorum tenuium rivi, aut flumina sunt? Certè enim omnia tenuia, etiam levia sunt, nec deorsum spontè moventur, sed sursum perpetuo nisu resurgunt. Luminis igitur, aut colorum radij, corpuscula spirituum non sunt, sed sola & liquida qualitas, quæ non motu locali, sed illuminatione efficiente, per omnia diaphana spargitur.

Laërt. in  
Epicuro

Hæc est Platonis, Aristotelis, & nobiliorum Philosophorum opinio; qui Empedoclis, Democriti, & vetustiorum pingues ac mechanicas cogitationes, elegantioris ingenij subtilitate elimaverunt. Quos tamen paulò post deseruit, & ad Democritum rediit Epicurus. Iste enim omnes lucis & coloris radiationes, ac omnium causarum naturalium actiones, per atomorum & corporum quorundam *perventura fluxus*, ut ipse vocat, fieri contendit. Homo enim crassæ Minervæ, nil nisi corporeum & palpabile apprehendere poterat: & quasi verò nullæ actiones (saltem causarum spiritualium, ut intellectus & voluntatis) sine tali corporum effluxu, elici & exerceri valerent.

Si autem intellectus & voluntas; quare non & sensus interni externique, & causæ aliæ naturales, effectus suos altiori modo, per eorum productiones, non per materiales effluxiones, edere in lucem possint? Vnde mirari soleo, quomodo quibusdam hodie acumine ingenij præstantibus Philosophis tam pingues, Democriticæ, & rudis incipientisque Philosophiæ imaginationes, de effluxu omnium actionum à suis principijs per corporales atomorum & corpusculorum rivos, placere valeant. Similes enim mihi esse videntur ijs, qui Linum Homero, Ennium Virgilio, Gracchos Cicero præferre velint. Nisi fortasse, ad ingenij exercitationem & acumen,  
per



per ingeniosas, sed falsas hypothesas ad veritatem deducere Lectores volunt; quemadmodum per flexus erroresque viarum, ad urbem destinatam interdum perveniri potest.

## ARTICVLVS XV.

*Quid videatur in speculo.*

**D**E speculis dua opinioniones sunt, inquit Seneca: alij enim in his simulacra cerni putant, id est, corporum nostrorum figuras, à nostris corporibus emissas ac separatas: alij imagines aiunt non esse in speculo, sed ipsa aspici corpora. Tertia opinio S. Thomæ conjungit utramque, & ait, in speculo inspicì simul imaginem rei, & rem. Quod quo modo fiat, explicat uno verbo Capreolus. Idem, inquit, est motus in imaginem & in rem, quando motus est in imaginem, ut imago est, ut dicit Aristoteles Lib. de somno & vigil. Vbi ait, eundem motum potentia sensitiva esse in imaginem, & in illud cuius est imago.

Eodem redibit quod alicubi bene docet Cajetanus: Similitudo est duplex: quadam ut cognita tantum; quadam ut cognita, & ratio cognoscendi.

Opinio ergo S. Thomæ esse videtur, quòd nec sola imago, nec solum corpus quod est ante speculum, sed utrumque simul uno eodemque intuitu videatur in speculo. Hoc tamen discrimine, quòd corpus sit tantum cognitum, imago verò sit cognita, & simul ratio cognoscendi aliud. Tendit enim visus in illam imaginem, ut imago est; unde visio non ibi terminatur, sed extenditur usque ad corpus, quod imaginem illam genuit, ut Artic. xi. dicebamus. Non quasi visus discurrat ab uno ad aliud; sed quia talem speciem à speculo redeuntem excipit, quæ duo objecta serie quadam & ordine; imaginem quidem proximè, corpus verò remotè repræsentat. Nam, ut verissimè S. Thomas, sensus externus simpliciter cognoscit illud, cuius speciem recipit, & nihil aliud. Non enim ex uno ad aliud discurrere potest. Simul tamen cum eo à quo speciem recipit, ipsam etiam speciem cognoscere valet: quomodo enim

D d d d

aliàs

Senec. lib. i. c. 5. Natur.

S. Th. i. p. q. 58. a. 3. ad 1.

Capreol. i. d. 35. q. 21

Cajet. i. p. q. 56. a. 3.

S. Th. q. 8. a. 5. de Verit.

aliàs, in speculo, ut antè dixit, imago rei, & res simul inspicere posset, nisi in talia duo objecta subordinata se visus extenderet?

Tolet. lib. 2.  
q. 34. de  
anim.

Nec solidè hîc S. Thomam refellit Toletus: Si imago, inquit, videtur in speculo, non appareret res major speculo. Et tamen in speculo parvo corpora grandia videntur.

Arist. c. 2.  
de memor.

Sed S. Thomas cum Aristotele respondebit, res magnas parvâ imagine posse repræsentari. Sic enim minima imaginacula montem memoriæ ingentem repræsentat. Quâ enim aliàs magnitudine, quâ nulla anima est, ait Augustinus, imagines tam magnorum corporum & spatiorum atque regionum caperet?

S. Aug.  
lib. 4. c. 17.  
de an. n.  
orig.

Ratio verò, cur tam parvâ imagine corpus tam magnum percipere valeamus; quia in imaginem  $\mu\eta\ \omega\varsigma\ \kappa\alpha\theta'\ \alpha\upsilon\tau\eta\iota\ \nu\ \eta\ \nu\alpha\iota\ \epsilon\iota\chi\omicron\iota\alpha$  ut in imaginem,  $\kappa\alpha\iota\ \eta\ \alpha\lambda\lambda\epsilon\ \&$  in quantum alterius est, ut loquitur Aristoteles, acies nostra tendit.

Arist. c. 1.  
de memor.

Ex Apostolo quoque Paulo, imaginem tantum proximè videri in speculo, colligere videtur Augustinus. Videmus nunc per speculum in anigmate. Quale sit, & quod sit hoc speculum, ait Doctor ille Sanctus, si queramus, profectò illud occurrit, quod in speculo nisi imago, non cernitur. Et ex eodem Apostolo aliâ Epistolâ: Nos autem revelata facie gloriam Domini speculantes &c. Speculantes dixit, ait Augustinus, per speculum videntes, non de speculâ prospicientes. Quod in Græca lingua non est ambiguum, unde in Latinum translata sunt Apostolica littera. Græcum quippe  $\kappa\alpha\tau\omicron\pi\iota\varsigma\ \zeta\omicron\mu\epsilon\tau\omicron\iota$  speculantes; à  $\kappa\alpha\tau\omicron\pi\iota\varsigma$  speculo, non à speculâ, derivatur. Sicut ergo in speculis creaturarum, non Dei essentiam, sed imagines tantum ejus imperfectas intuemur; ita (si similitudo perfectè constet) in speculo, non objectum quod ante speculum est, sed imaginem tantum ejus proximè intuemur. Vnde satis apertè

S. Tho.  
1. Cor. 13.  
Lect. 4.

S. Thomas: Cum videtur aliquis homo per speculum, videtur per præsentiam similitudinis, non immediatè derivata ab ipsa re, sed derivata à similitudine rei in aliquid aliud. Non enim similitudo hominis immediatè est in oculo, sed similitudo hominis resultantis in speculo.

Tho. Hurtad. Contr.  
1. memb.  
3. Præcur.  
Phil.

Atque hanc opinionem recentissimè, & animosè P. Thomas Hurtadus defensat.

Sed



Sed profectò resistunt agminatim Optici, quibus cura fuit hoc demonstrasse. Palam est, inquit Vitello, formas à speculo non procedere, ut in speculo existentes, & multiplicantes se ad visum; sed ut incidentes ipsis speculis à rebus formatis, & à speculis ad visum reflecti. Secundum ergo dispositionem linearum reflexionis, visus necessariò informatur; quandoquidem visus verè rem aliam non videt, nisi cujus formam comprehendit à speculo reflexam.

Vitel. lib.  
5. theor. 24.

Et Alhazenus: Aliqui affirmant, inquit, formam corporis speculo ei opposito imprimi, & proinde in eo videri, sicut in corporibus fit comprehensio formarum naturalium ejus. Verùm quòd aliter sit, palam fit per hoc. Quoniam si quis se viderit in aliqua speculi parte, motus in partem aliam, non videbit se in parte prima, sed in secunda. Quod non accideret, si in parte primà infixà esset ejus forma.

Alhaz. lib.  
4. th. 20.

Quod autem hìc dicit Alhazenus, facili experientià intelligitur, si quis in ripa vivarij, aut lacu quiescentis ambulet. Imaginem enim suam, quam in aqua videt, ambulando, secum quodammodo transfert; quia continuò in alia & alia parte speculi istius aquei, eam videt. Si autem in superficie aquæ, tanquam in tabula depictam videret, in eadem parte superficiei aquæ imago maneret, & progrediendo, non eam transferret, sed in priori situ eam aspiceret.

Non igitur imago ipsa est quæ videtur, sed homo ambulans seipsum videt, per species visibiles ab alia & alia perpetuò parte superficiei aquæ reflexas, & ad oculum redeunt.

Vnde S. Iacobus rectè philosophatur, & meritò dixit: Si quis auditor est verbi, & non factor, hic comparabitur viro consideranti vultum nativitatis suæ &c. Quod enim in speculo contemplamur, est ipsissimus naturalis vultus noster in quo nati, non tantum imago aliqua, in qua veluti depicti sumus.

Iac. 1.

Nec refert, quòd vultus iste extra locum suum, in speculo ipso appareat. Nam natura visionis talis est, ut objectum suum in basi, sive in fine pyramidis visualis conspiciat, cujus conus sive vertex profundum oculi intrat. Iam verò, præter pyramidem, quæ à toto vultu hominis tanquam basi exit, & conum suum versus speculum dirigit, nova & contraria pyramis à speculo resilit, cujus basis à superficie speculi incipit, &

conus versus oculos redit. Et ista posterior pyramis est, per quam vultum nativitatis nostræ alio loco, & quasi intra speculum esset. conditus, conspiciamus.

Quia enim oculi aspectus, ultra finem & basim pyramidis in oculos reflexæ, non se extendit, ideo vultum nostrum ad radicem ipsius basis videmus.

Hinc Græci speculum *κατοπτρον* appellant, quia ex adverso nos ipsos in ipso conspiciamus. Euripides verò *ἐροπτρον*, quia in ejus quasi fundo vultus noster apparet. S. Paulus & alij *ἐροπτρον*, quia oculos in ipsum dirigimus, cum nos in eo reflexe contemplari volumus.

Vt autem speculi superficies, Catulli verbo, imaginosa sit, debet esse æqualis & regularis. Ideo enim radij solis in superficiem terræ asperam cadentes, reflectuntur quidem, sed non imaginant; à superficie verò aquæ æquali replicati, & in oculos redeunt, imaginem solis figurant. Speculi enim in æqualitate ita hæc illac dissipantur radij, ut compositâ & ordinatâ basi, ac figuratâ, ut oportet, pyramide visuali, ad oculos non valeant reflecti, & corporis à quo radiantur, formam in oculi fundo effigiare. Vnde Ovidianus ille Narcissus, cum lacrymis turbasset aquam fontis, nec faciem suam amplius videre posset, credidit puerum, quem imaginabatur in fonte latentem, à se aufugere.

Ovid. 3.  
Met.

*Et lacrymis turbavit aquas, obscuraq; moto  
Reddita forma lacu est. Quam cum vidisset abire;  
Quò refugis? Remane, nec me crudelis amantem  
Desere, clamavit.*

1. Cor. 13.  
2. Cor. 3.

Duo autem illa Apostoli loca: *Videmus nunc per speculum, in enigmate.* Item postea: *Nos omnes revelata facie gloriam Domini speculantes* (Græcè, *κατοπτρίζομεν*, in speculo representantes, ut vertit Erasmus) non significant solam imaginem nostram videri per speculum oculo corporeo; quemadmodum in speculo creaturarum, oculo spiritali videmus tantum imaginem Dei, sive naturam aliquam creatam, ita ut spiritalis intuitus ibi hæreat, nec idem numero actus ad Deum usque pertingat. Imò verò contrarium potius colligi potest: nempe, & imagi-

nem,



nem, & simul prototypum, uno obtutu, in speculo attingi.

Nam quando Deum in speculo creaturarum videmus, licet non unico simplici intellectu intuitu creaturam, & simul Deum conspiciamus; discurrendo tamen, usque ad Dei cognitionem pertingimus. Angeli verb, qui formali discursu non indigent, unicum actum, quo imaginem Dei in creatura intuentur, usque ad Dei conspectum etiam extendunt.

Cajetanus autem, *Videmus nunc per speculum*, ait exponi posse, *per vitrea ocularia*, sive per obscura quædam conspiciilla, qualia sunt quæ virore aut alio colore tincta, non permittunt rem in naturali suo colore aspicere. Cajet. rj.  
Cory. 132.

Quod interpretamentum arripuerunt etiam quidam recentiores; conjectantes id quoque ex voce Græca S. Pauli, qui *speculum* ibi, non *κατόπτρον*, sed *ἐσόπτρον*; quasi dicas *inspectorium*, appellavit.

Sed profectò Græci passim, & ipse Aristoteles, *speculum* *ἐσόπτρον* etiam nominat; non quia per ipsum, ut per oculare sive conspiciillum, sed quia in profundo ejus nos, & res à tergo nostro positas inspicimus: aut certè, quia, ut antè dixi, in ipsum oculos intendimus, cùm reflexè faciem nostram in ipso aspicere volumus.

Nam aliàs conspiciilla, quibus nunc ad solatium senij & oculorum utimur, tempore S. Pauli, & diu post Mundo incognita fuere, ut veterum memoriarum diligentissimus Lipsius noster testatur. Igitur Interpres sacer *ἐσόπτρον* *speculum* rectè vertit, nec Cajetani *conspiciillum* vertere debuit. 1. Lips.  
Epist. 364.

# ARTICULVS XVI.

*An tamen defendi non possit quod S. Augustinus, & S. Thomas asserere videntur: Imaginem vultus nostri videri in speculo.*

**N**on placet, quod in S. Thomæ excusationem adfert Medina, quando in explicandâ ratione, quâ duplex objectum, serie & ordine quodam attingitur, exemplo speculi tam sæpe S. Doctor utitur. *D. Thomas, licet Perspectiva faculta-*

Medin. 3. p.  
q. 10. a. 1.

*is non indoctus, inquit Medina, explicaturus, quemadmodum res di-  
vine humanis eluceant, exemplum ponit speculi, in quo, ut ait, rei ima-  
go conspicitur: quod licet re verâ ita non sit, nobis tamen ita videtur.*

Itaque in speculi isto exemplo, apud ipsum tam vulgari & proterito, credit eum Medina, non ex suo sensu, sed vulgi & falsâ imaginatione semper locutum fuisse; quemadmodum naturæ & veri consultissimus Poëta, oculorum hallucinatio- nem, non verum secutus; dixit,

Virgil,

*Provehimur portu, terrâq; urbescq; recedunt.*

Ignosce mihi, non credo tibi Medina. Veritas enim & simi- litudo doctrinæ alterius, quam illo speculi exemplo enarrare vult S. Thomas, planissimè flagitat, ut duplex unicâ visione objectum in speculo attingatur, non tantum unum & sin- gulare quod est ante speculum. Ac apud omnes doctos & in- doctos, nihil magis in ore & promiscuo est, quàm rei imagi- nem in speculo cerni. Vnde de Narcisso suo, in fonte se speculante, & amore sui pereunte, Poëta ingeniosus.

Ovid. 3.  
Met.

*Dumque bibit, vise correptus imagine forma,  
Spem sine corpore amat, corpus putat esse, quod umbra est. Ac deinde.*

*Credule quid frustra simulacra fugacia captas?*

*Quod petis, est nusquam, quod amas avertere, perdes.*

*Ista reperiisse quam cernis, imaginis umbra est.*

*Nil habet ista sui, tecum venitque manetque.*

*Tecum discedet, si tu discedere possis.*

Postquam tamen sic more vulgi, de re conspecta in speculo, tanquam de umbrâ & simulacro locutus, puerum illum ad Philosophiam Opticorum reducit:

*Iste ego sum, sensi, nec me mea fallit imago.*

*Vror amore mei, flammâ moveoq; feroque.*

*O utinam à nostro secedere corpore possem!*

Dicit ergo se esse, quem in fonte videt & amat.

An ergo fortè cum S. Augustino & S. Thoma, & simulacrū vultus, & unâ vultum uno eodemque obtutu videri existimat? Si enim Aristoteles in Iride radium solis triplici colore, pu- niceo, viridi, & purpureo infectum videri, & unâ solem ip- sum conspici credit; cur non etiam in fonte, tanquam in spe- culo



culo alio nitidiori, quàm sit vapor in quo apparet Iris, imaginem puram nullisq̃ue umbris infuscatam, & unà vultum qui ante speculum est, cernere possumus?

Deinde quando per directum radium, solem aut lucernam aspicimus, profecto fortasse, per totam radij longitudinem ab oculo usque ad solem, visus se extendit; id est, non tantùm solem videt, sed etiam universam longitudinem radiorum pyramidis visualis; licet splendorem eorum à luce soli inhærente non distinguat: quia splendor ille radiorum visum non terminat, sed usque ad solem transmittit. Cur ergo similiter basis pyramidis reflexæ, quæ superficiei speculi incumbit, estq̃ue speculi imago; & simul vultus aspicientis, unà eademq̃; visione cerni dici non debet? Nam imaguncula, quæ in organo oculi radijs à speculo reflexis pingitur, non tantùm à vultu aspicientis, sed simul etiam à basi pyramidis, & radijs specierum visibilibus intermedijs, qui à speculo ad oculos revertuntur, efficienter producit. Imaguncula autem illa, sive species visibilis quæ in oculo est, repræsentat omne objectum, à quo tanquam causa efficiente funditur.

Visus tamen non advertit se aliquid distinctum ab objecto principali & terminante, videre; sicuti; juxta S. Augustini quam Artic. xi. tradidimus philosophiam, oculus non experitur se videre speciem in retina tunica depictam; etiamsi reverà eam sentiscat, & per eam principale objectum, quod visionem ultimò terminat.

Imago ergo vultus in speculo videri dici potest, etsi visio non in ipsâ, sed in vultu extra speculum terminetur. Vultus autem ad locum imaginis, seu intra speculum, à visione ipsa quasi attrahitur, apparetq̃ue ubi reverà non est; quia natura visionis talis est, ut sit essentialiter repræsentatio rei quasi ex adverso oppositæ & objectæ. Quem morem quoque imaginatio imitata; & à visu sensuum externorum præstantissimo, quasi mutuata, quoties aliquid imaginatur, ex adverso illud sibi opponit. Intellectus deinde & voluntas in hoc quoque more, imaginationem sequuntur: ut proinde ea in quæ tendunt & quasi collineant, *objecta* merito appellentur. Et hinc denique

denique nomen *objecti*, ad omne id significandum, circa quod quævis potentia versatur, translatum fuit.

Si autem minimam illam imagunculam, quæ ab objecto externo in oculum radiatur, & in tunica retina depingitur, ex adverso cernere possemus, visus in ea tanquam in objecto visionem terminante, nec ulterius transmittente, hæreret; quomodo in imagine, per foramen conclavis obscurati intro-missâ, & in papyrum impressâ, hæret. Ex quibus patet, S. Thomam, quando vult ostendere phantasiâ, aut intellectum, in duo objecta subordinata unico actu posse ferri, non tam ineptè quàm quidam carpunt, uti solere exemplo visûs, quem credit unâ simplici visione & imaginem in speculo, & prototypum, quod extra speculum est, attingere,

## PROBLEMAT A

### De Visu.

#### I.

**M**Irum est, sed tamen verum: Radium qui per aërem obscurum transit, non videri, nisi in corpus opacum offendat, à quo reflectatur.

Bodin. lib.  
4. Theat.

*Si enim radius solis, inquit Bodinus, per obscurissimâ domûs foramina duo penetraret, sine reflexione solidioris corporis, nulla illustratio domûs fieri posset, nec quidquam aspici.*

Idem accidere videmus, si nocturno tempore, candela foris posita, per unum foramen in cubiculum radiet, & per alterum foramen directè ei oppositum, radius effluat.

Cur tamen radius iste non undique in orbem lumen secundarium spargit, & omnes cubiculi parietes illustrat?

An quia radius luminis, ad similitudinem motûs localis, se propagat, nec in latera resilit, nisi in aliquod corpus impingat, quod rectitudinem progressûs interpellat? An potius, quia lumen laterale, quo parietes cubiculi aspergi deberent, non à solo radio per aërem cubiculi transeunte, sed à sole, aut can-

delâ



delâ radium illum jaculante, effici debet, ut Scotus in 4. d. 10. q. 9. scitè docet? Sol autem & candela in directum & lineâ brevissimâ tantum radiant, nisi corpus aliquod occurrat, quod rectitudinem radiationis in latus declinet, aut reflectat.

## II.

In quo subjecto sit cæruleus, aut viridis ille cæli color, quem serenis diebus aspicimus?

An sphaerarum caelestium tinctura est, ut Molina credit? Lud. Molina. disp. 15. de oper. sex dier.  
An verò potius lumen solis ab aëre superiori reflexum, quod modica aëris opacitas in cæruleum colorem astringit? Ita enim sentit Io. Bapt. Benedictus. Ac post eum Keplerus: *Color ille, inquit, qui sudo calo matutinis horis oculos nostros incurrit, non est color atheris, sed aëris, a solis radijs transversim illuminati.* Io. Kepler. lib. 1. Epit.

Imò, sicut auroræ purpureus color, & illa plena rosarum atria, Ovid. plerumque infra nubium stationem expanduntur; ita sereni cæli smaragdineus viror sæpissimè in aëre inferiori hæret, cui nubes innatant.

## III.

Verùmne illud, quod eruditi quidam pro comperto habent: Si lunæ superficies instar speculi tersa esset, in calo lucida non appareret, sed colore cæruleo obtutum nostrum evitaret?

Quidni autem verum hoc sit? Cum enim lumen à speculo in partem oppositam tantum reflectatur, radius solis in superficiem lunæ cadens, non redibit in terram, aut non in omnium oculos, qui faciem lunæ illustrem, ex diversis terræ regionibus simul aspiciunt. Vnde, ait Io. Tarde, *universitatis conditor lunam voluit esse superficie irregulari; montibus altissimis, cavis vallibus, & præcipitijs aspera: ut lux à diversis superficiebus repercussa, in partes diversas protraheretur, modo in longum, modo in latum, modo in transversum, & ex inordinato repercussu lux uniretur, & ex deformitate educeretur uniformitas, ut demonstrat Vitello lib. 6. prop. 63. speculis ex varijs & diversis superficiebus sphaerarum compositis.* Io. Tarde lib. de Borbon. fiderib. c. 6.

Et hinc etiam demonstrat, falli eos, qui partes lune lucidiores maria, aut stagna aquarum; maculas verò montes, agros, & loca silvis oppleta esse existimant.

E e e e

Aqua

Aqua enim instar speculi, radium solis repercuteret, & à nobis averteret. Deinde quando luna accrescit aut decrescit, in ipsâ partium luminosarum casurâ, quasi culmina quædam montium illustria, non aquam uniformis & deterasæ superficiei, per arundinem Batavicam conspiciere videmur.

IV.

Paul. Jo-  
vius lib. 2.  
Histor.

An confictum sit à Iovio, quod ipse de exercitu Caroli VIII. Francorum Regis narrat, cum Neapolim tenderet, & noctu per Urbem Romanam, sub Pontificatu Alexandri VI. transiret: *Id metum stupentibus Romanis addidisse, quod viri, equi, vexilla, arma tot passim funalibus inæquali splendore, incertam præbentibus lucem, ampliora ac majora vero viderentur?*

Falsum enim id fuisse apparet, quia facium & funalium flamma, fumi ac fuligines non ampliant rerum formas, quæ per ipsas videntur. Sicut nec siccaæ aëris exhalationes faciem solis dilatant, sed humidi rores vaporesque, propter quorum interpositionem sol exoriens amplioris disci apparet, quàm meridianus. Vnde quia totâ fermè æstate Anni illius 1635. quâ Lovanium nostrum à gemino Francorum & Batavorum exercitu obsessum fuit, sol maritinus in nebulâ sicca perpe- tuò surgebat; non facie solenti, amplâ & rubicundâ, sed exiguâ & pallidâ nobis apparebat.

Sed tamen, quare in exemplo Iovij, vapor ceræ in flammæ facium & funalium liquefcentis, militum transeuntium species, versus perpendicularem refringere, & militares formas ampliare non potuit?

Deinde fumus, flammæ mixtus & convolutus, coruscationem tremoremque militum & armorum, sine dubio, faciebat. Vnde flammâ fumoque perpetuò saltitante, militum quoque formæ unâ subsilire, omni que tripudio vibrari videbantur. Vnde horrore noctis, civibus talium spectaculorum insolentibus terrorem addebant.

V.

An non falluntur, qui in sacrorum Bibliorum textu, *per- spicillorum* mentionem se invenisse putant? Vbi enim Deu- teron. 6.



teron. 6. legimus, *Et movebuntur inter oculos tuos*, Pagninus, *Deuter.*  
& Oleaster vertunt, inquit Balthasar Paes Iac. 4. v. 11. *Erunt* *ron. 6. v. 8.*  
*specilla, seu ocularia inter oculos tuos.*

Quæ verba, addit Balthasar, *ponderans Oleaster*, ait: *Vide*  
*quàm pulchrè & rationabiliter voluerit te habere praecepta, velut spe-*  
*cilla super oculos?*

Sed profectò Hebraicum *Totaphot*, non *specilla*, aut *ocularia*,  
sed *frontalia* potiùs, ut Arias, Buxtorfius, & ipsemet Pagni-  
nus in suo Thesauro, vertendum fuit. Longè enim abest, ut  
vetustissimo illo Moyſis ævo, ullus perspicillorum fuerit usus.

Imò quidam, quia tam nuperam perspicillorum inventio-  
nem esse ex historijs intelligunt, nimis audaci & temerariâ *Quidam*  
conjecturâ suspicati sunt, senes olim non perinde ac hodie *apud Alcaf.*  
oculis caligasse; adeoque caligines senum, cùm variolis pue- *Prolog. in*  
rorum, & lue Veneria, inter morbos antiquis seculis inusita- *vet. testam.*  
tos connumerare non dubitant. Quomodo enim illorum se- *partes &c.*  
culorum senes, inquirunt, legere & scribere libros, sine per-  
spicillis potuissent, si oculos caliginibus infestos, ut nunc,  
habuissent?

Sed caligasse olim senectutem, ex litteris sacris certum est.  
*Senuit Isaac, & caligaverunt oculi ejus. Gen. 27. Heli iacebat in lo-*  
*co suo, & oculi ejus caligaverant. 1. Reg. 3. Ac ut mira & inusi-*  
*tata, de Moyſe 120. annorum sene: Non caligavit oculus eius,*  
*nec dentes illius moti sunt. Deuteron. 34. Fuit igitur tunc mor-*  
*bus, sed nondum vitreum istud inventum remedium.*

## VI.

Quoto autem seculo, hujus tam bellæ & utilissimæ inven-  
tionis gloriam debemus? Nemo, credo, facilè dicet.

I. Lipsius noster, vir tam memoriosus, & veterum panè *Cent. 31*  
omnium ejusmodi memoriarum sciens & callens, ad Carol. *Miscell.*  
Clusium: *Illud in clausula Epistola tua, inquit, jucundum, de vi-*  
*gore oculorum tuorum in hac ætate, mirando mihi & invidendo. Hen,* *Ætat:*  
*ubi ego sum? Quattuor lustris minor cæcutio; & nisi vitrea auxilia* *Lipsij tunc*  
*sublevent, vix legam aut scribam. Panè indignor: & magis, quia ve-* *54.*  
*teres hac allevatione usos non lego. Atquin & illi nonne assidui in stu-*  
*dijs? Quid dicam nescio, nisi sortem sic nostram esse: ferendam igitur.*

Ecce vir totiugi scientiâ plenus, hoc tantum promere potest. De perspicillis apud veteres nil legisse; & quomodo senes sine eorum auxilio, libris & studijs vacaverint, animi se pendere.

Plut. lib. 8.  
9. 8. Symp.

Hoc interim minimè dubium, veteri Romanorum, aut Græcorum temporum flore, nullum eorum usum, aut memoriam fuisse. Hinc apud Plinium & alios infinita illa ad discutiendas caligines, ex plantis, aut aliunde collyria, & medicamenta; de perspicillis verò, universali ferè omnium caliginum sublevamine, ne gry quidem. Plutarchus quoque quæstionem sat prolixam excitat, *Quare senes facilius ex longinquo, quam ex propinquo litteras legant?* Et ubi bellior meminendi perspicillorum occasio, si in orbe Romano, aut Græco ulla eorum notitia? Sed nec inferiori SS. Patrum ævo uspiam, quod legerim, memoria. Imò in S. Fulgentij Vita, à familiari ejus conscripta video. Sanctum istum olera, *quamdiu fuit juvenis, sine oleo, postquam verò senuit, superfuso oleo manducasse. Ideo oleum, ait Auctor, persuasus accipere, ne caligo prævalens oculorum, lectionis impediret officium.* Similibus igitur tunc remedijs solatiolum aliquod, ne saltem copiâ, aut crassamento in nubem coirent, adversus caligines quærebant: sed ne senili siccitate, tunicæ & humores oculorum corrugati, umbras illas, & radiorum divaricationem crearent, quas senes experimur, quid remedij habebant? Nullum enim, nisi in perspicillis nostris invenire possumus.

Martial.

Itaque senes litterati Anagnostis, seu Lectoribus, quod de sene Carneade narrat Laërtius, tunc utebantur. Aut etiam litteris majoribus & decumanis Libri quidam, pro senilibus oculis in papyro scribi, vel in cera exarari solebant. Tales fortasse, qui calamis majoribus & arundineis scribebantur:

*Dat calamos chartis habiles Memphis tellus.*

Sed quo igitur tandem seculo perspicilla nostra inventa?

Existimo, circiter Annum Christi 1300. quando scientia Optices, ex cujus præceptis perspicilla formanda & limanda sunt, per Vitellonem, Rogerium Baconem, & Joannem Archiepiscopum Cantuariensem è tenebris emerfit.

Vnde statim post ista tempora, mentio perspicillorum apud Medicos.

Medicos.



Medicòs quosdam fieri coepit. Nam Gordonius Medicus, qui amplius abhinc trecentis annis claruit, ait Clar.<sup>mus</sup> noster Plempius, Cap. de Visu debili, nec non Guido Cauliacus, ipso solùm quinquaginta annis iunior, perspicillorum, quæ senes ad conspiciendas minutiores litteras adhibent, meminerunt. Apud Arabes tamen potuit perspicillorum notitia & usus paulò fuisse vetustior; quia Alhazeni Arabis Perspectiva uno circiter seculo, ut quidam conjectant, videtur Vitellone esse antiquior. Quanquam scientiæ tales non illicò eant, aut deducantur in praxim & promiscuum usum; quia nemini fortè artificii ejus rei venit in mentem. Nam ecce à tot jam seculis Rogerius Bacon scientiam & modum vitra duo, cavum & convexum, tubo uno condendi, ad longinquè videndum, tradiderat; quæ res tamen nostrò demum tempore à Batavis nostris credita fuit inventa, quia praxi & usu eam vulgaverunt. Quanquam certè etiam Batavus aliquis, Baconis incogitans, alterâ jam vice invenisse potuerit.

Vop. Forr.  
Plempius  
lib. 4. c. ult.  
Ophthal.

Vixit  
An. 1279

## VIII.

An non fallitur Io. Keplerus, cùm ait non solam superficiem solis, sed etiam centrum ipsum à nobis videri?

Kepler. Paralip. in  
Vitell. c. 6.

*Solis corpus afficiens*, inquit, *nolito credere, te solam cernere superficiem. Non tantà vis hæret in superficiebus corporum, sed intus in profundo latet, ut in magnete, ideoq; supra, ne colores quidem ex nudis superficiebus derivabamus. Sed tu corpus solis aspiciens, scito te undique in totâ superficie aspectabili, centrum solis per refractionem intueri: ut cuius fortissima est illustratio.*

Sed nonne solare corpus solidum & densissimum est? Negant hoc tamen aliqui. Imò rarissimum esse credunt; quia alias, ut putant, in liquido æthere non posset suspendi. Vel certè, sit densissimum, modò instar adamantis, pellucidum sit. Sic enim radij à centro, per totam mediæ sphaeræ densitatem, in superficiem ebullire & emicare possunt. Et sanè superficialis lux solis tenuior & invalidior esse videtur, quàm ut tam largum luminis flumen effundere valeat, quo totum Mundum videmus inundari. Sic alicubi antè negavimus radios coloris à sola superficie mathematicâ corporis colorati,

sed ex aliqua saltem tenuissimâ profunditate emicare.

Si autem radij solis ex fundo etiam, & centro ipso corporis solaris effunduntur; igitur non tantum superficiem, sed interanea etiam ipsa solis videmus, à quibus radij centrales in oculos nostros effluunt.

## VIII.

Aliac. in 4.  
1. 5.

Vtrum oculus Christi in Eucharistia circumstantes videre valeat? Dominus Cameracensis affirmat. Cur Beatus enim ille Christi oculus species visibiles vultus & digitorum sacerdotis Eucharistiam tractantis excipere, ac per eas videre non possit?

Attamen ad naturalem visionem, aliqua tunicarum, & humorum oculi expansio necessaria est, ut species visibiles in ijs versus perpendicularem refringi, & in tunicæ retinæ pariete ordinatè depingi valeant. Christi verò oculus, & totum corpus sine extensione partis extra partem, sub accidentibus Eucharistici panis delitescit.

## IX.

Sennert.  
lib. 1. c. 12.  
Instit.

An verum quod Io. Bapt. Porta dicit, & Sennertus non abnuit: Nos unico tantum oculo semper videre, etiamsi duos apertos habeamus?

Nam unica vis videndi est, inquit, quæ ab uno oculo in alterum momento quasi temporis transcurrit. Aut certè, si unusquisque oculus suam virtutem visivam habeat, per spiritus tamen visorios, qui in hunc, aut in illum oculum, non in duos simul, ad imperium voluntatis, universum confluunt, visionem exercet.

Rem autem se sic habere patebit, inquit Sennertus, si inter utrumque oculum tabula aliqua, vel paries intercedat. Si enim liber obijciatur dextro oculo, rectè videbitur, sin autem & sinistro oculo alterum librum quis obijciat, non solum non legere illum poterit, dum in sinistro legit, sed neque paginas videre; nisi sinistro oculo videat solum & videndi virtutem, seu potius spiritum visorium à dextro oculo subtrahat, mutueturq; sinistro.

Sed utroque simul oculo, in illo etiam tabulæ interpositæ exemplo, utriusque libri simul characteres videmus (quod experientia mea mihi sanè dicit; quidquid experti sint Io. à Porta & Sennertus) magis tamen confusè, & distractè, quàm ut uterque



uterque liber simul legi possit. Imò, nisi duobus oculis simul rem aliquam videremus, distantiam ejus à nobis dimetiri & cognoscere haud possemus. Vnde si quis rem aliquam aliquot pedibus remotam, digito superposito præcisè contingere velit, certò facere non potest, si uno tantùm oculo eam aspiciat; quod tamen facillimè poterit, si oculo utroque simul eam conspiciat. Igitur, licet ad colorem & lumen, quæ sunt sensibilia propria, cognoscendum, unius oculi intuitus sufficiat; ad sensibilia tamen communia distinctè percipienda, utriusque oculi intuitus simul sæpenumerò est necessarius.

Itaque spiritus animales visorij, & virtus cerebri irradiativa utrique oculo simul illabitur; sed in duos rivos jam dispersa, ideoque tenuior utrobique & infirmior. Sed maximè idcirco (in exemplo Sennerti) ad utriusque libri simul lectionem vis illa sic dispersa non sufficit; quia animi attentio visuales utriusque oculi pyramides distrahit, nec in eandem basim eademque objecti puncta dirigit, neque proinde totà animi attentione eidem objecto incumbit.

An verum quod Theologi quidam affirmant, *Beatorum cor-poreos oculos non indigere lumine, ut videant?*

Hoc enim perfectioni illius statùs debitum esse videtur.

Sed tamen quandonam oculi Beatorum tenebris obscurantur, quorum totum corpus dote claritatis perfusum, & radios luminis longissimè eiacularur?

Deinde, nonne naturalis modus videndi exigit speciem visibilem, figurâ pyramidis in oculos radiatam? Ista verò species, vel est lumen ipsum, quando lux est quæ videtur; vel certè per medium lumine illustratum necessariò trajeci debet, si coloris species est. Imò antea Artic. VII. docuimus, speciem visibilem coloris nil esse aliud, quàm tenuis cujusdam luculæ radium, umbris mixtum ac involutum. Sicut igitur oculi Beatorum specie, ita lumine indigere videntur.

#### XI.

Mirum sanè, & tamen quotidianum, quod ait S. Iacobus: *Virum qui considerat vultum civitatis sue in speculo, statim oblivisci, qualis fuerit.*

Ægid.  
Coninck  
Disp. 4. d. 2.  
de Actib.  
supernat.

Iac. x.

An

An oblivio ista proprii vultûs inde accidit, quod species vultûs à speculo reflexa sit debilior, quàm directâ, & ideo minùs impressè memoriæ infigatur? Sic enim multi philosophantur.

Verùm reflexio à superficie speculi adeò vicini, tam sensibilibiter & insigniter speciem debilitare nequit. Deinde quid de speculo concavo facimus, à quo species reflexa, fortior & confertior est quàm directâ?

An ergo non de nihilo S. Iacobus, de *viro* considerante vultum suum in speculo, non de femina dixit? Viri enim rarò, leviter, & obiter in speculo faciem inspiciunt, ac mox ad alias cogitationes conversi, imaginem vultûs sui non firmiter imprimunt. Feminae autem, quæ ad speculum se comere, aut fucare solent, formam suam memoriæ magis inculcant, & impressius retinent.

Denique, hoc tam in feminis quàm viris, imaginem & recordationem proprii vultûs confundit; quod in recordando, mentem nostram ad vultum nativitatis nostræ reflectamus, prout eum apud nos gerimus, non prout extra nos in speculo, & ex adverso ipsum vidimus. Vnde quisque experitur se expressiorem vultûs sui figuram imaginari posse, si speculi quoque recordetur, & imaginem suam quasi in eo impressam, & ex adverso positam cogitet.

## XII.

Mirum est, quare lac, tam candidus, & politi lævoris liquor, ut videtur, non imagnet, nec speculi officio fungi possit. Nam vinum, aqua, & ejusmodi liquores, imagines nostras reddunt, ut in ijs tanquam speculis, nos aspicere valeamus.

An quia candor lactis speciem vultûs nostri, candore suo diluit, & umbras quæ species visibiles coloris astringunt, dissipat? Aut quia fungositate suâ species illas quodammodo absorbet?

S. Basil. in  
VII. 1. I. I. I.

An denique (quod S. Basilio placet) quia *πομφόλυγες* *bulle* quædam minutulæ & invisibiles summam lactis superficiem asperant, ne species unitè, & eo ordine reflecti possint, quo debent, ad imaginandum, & exprimendam vultûs nostri

similitu-



similitudinem? Vnde animas iustitiâ quidem candidas, sed morum tamen aliquâ adhuc asperitate inæquales, S. Basilius lacti elegantissimè comparat. Sicuti enim lac, inquit, etsi candidum, non tamen imaginem solis attrahit, propter bullularum quarundam in superficiem excrescentium inæqualitatem; ita quædam animæ, candore iustitiæ satis quidem lucent, sed morum tamen quadam adhuc inæqualitate, Dei imaginem non rapiunt, nec memoriæ suæ perpetuè impressam gestant.

## CAPUT IV.

## De Auditu.

**V**isum nobilitate sequitur auditus. Post visum enim, qui usque ad cælum & sidera extenditur, auditus longissimè foràs procurrat; si verum est, quòd usque ad locum primi soni se porrigat. Tonitrua enim fulminum, aut Tormentorum, ex multorum sæpe miliarium intervallo exaudiuntur, præsertim secundo flatu. Reliqui verò tres sensus, odoratus, gustus, tactus propinqua tantùm percipiunt, & corpulentiores ac quodammodo crassiores sunt, inquit S. Augustinus, nec se foras projiciunt, sed interiùs, quod ad eos pertinet, agunt. Quanquam odoratus aliquantulùm fortassis etiam se projiciat, & foràs excurrat.

S. Aug. lib. 4. c. 14. contra Iul.

## ARTICVLVS I.

## Quid sonus.

**O**bjectum auditûs est sonus. Sonum primus Archelaus Socratis præceptor, ἀέρος πλῆξιν aëris ictum definivit, & ab eo definitionem Aristoteles accepit.

Definitio tamen est causalis. Non enim sonus est formaliter ictus, aut motus aëris, sed qualitas tertiæ speciei, ex ictu & motu confligentium corporum resultans. Vnde à Ptolemæo, rem istam propiùs inspiciente, non vocatur πλῆξις ictus, sed πλῆθος ἀέρος πλῆθος αἰθέρος passio aëris icti. Malleus enim icit campanam, ictu rumpitur medius aër, rupturâ exilit sonus. Vnde tria corpora ad soni generationem requirit Aristoteles, duo inter se confligentia, & tertium, quod eorum complosione, in

Ffff

medio

medio frangitur. Quanquam unicum corpus, si liquidum & flexile sit, trium vicem subire possit; ut cum aër ad aërem, ventus ad ventum magno impetu alliditur. Vnde non universim verum est quod ait Aristoteles, corpora sonantia oportere esse *sepe & solida*. Nihil enim profecto solidum est in nubibus, quæ tamen fulmine ruptæ, tanto sonitu crepant. Celeritas autem ictus intendit sonum, quia plus aëris simul frangitur; ut in tonitru patet, ubi exhalatio momento ferè universim accensa, uno & celerrimo ictu displodit nubem. Simile experimentum in bombardis nostris, præsertim si meliori pulvere, & qui totus simul concipiat ignem, onerentur. Nec longè dissimile, quando pannus novus celeri impetu manibus discerpitur.

Seneca  
lib. 2. c. 9.  
Nat.

Experimento etiam notum est, quo corpora solida magis porosa & foraminosa sunt, ut æs Campanū, & omnia ferè æris genera, eo magis tinnula esse. Aër enim qui intra poros intercipitur, sonos etiam excipit, & per infinitos propemodum cæcos meatus, foràs seminat & exspergit. Nec enim video cur fallatur Seneca, dum ait, *vocem per parietum munimenta transmitti, quia solido quoque aër inest, qui sonum extrinsecus missum & accipit & remittit. Scilicet spiritu non aperta tantum intendens, sed etiam abdita & clausa*.

S. Aug.  
lib. 2. c. 17.  
Doctri.  
Christ.

Quia verò omnis Musicus sonus triformis est, & aut voce, aut flatu, aut pulsu editur, ideo tres tantum Musas initio finxit fabulosa antiquitas; ut prima vocali faucium cantui, secunda tiliarum & tubarum inspirationi, tertia cithararum & tympanorum pulsui præesset. Sed miro & ridiculo casu novem factæ sunt, quem ex doctissimo Romanorum M. Varro-  
ne S. Augustinus narrat.

Cum enim civitas quæpiam tribus artificibus terna Musarum simulacra conficienda tradidisset, ut tria & novem illis formosissima seligeret, ac in templo Apollinis dedicaret; omnia verò speciosissima apparuissent, nullo, aut difficili pulchritudinis discerniculo, placuit omnia novem dedicari: quibus postea vocabula Hesiodus fabricavit. Tam ridiculos natales habuerunt Musæ illæ filiæ Iovis, Poëtarum numina,  
sine



sine quibus nullum elegans carmen pangi, nullum Pegaseum melos cantari potest, si Poëtarum vanitati credere quis volet.

## ARTICVLVS II.

*Quanam sit causa physica soni efficiens.*

**O**Mnes corporum allisionem, causam soni efficientem dicunt; nec aliam quæreremus, si sonus aliud non esset, quàm motus localis aëris contracti & dissiliens, inter corpora quæ colliduntur. Sed profectò motus aëris, sonus non est. Plurima enim moventur, quæ non sonant. Deinde motus inter sensibilia communia numeratur, sonus sensibile proprium auditûs est.

Sed nec ipse corporum motus potest dici causa physica soni efficiens. Motus enim est tendentia ad Vbi. Tales autem tendentiæ, modi quidam tenuissimi sunt, imbecilles, & ad quidquam producendum (præsertim si effectus tam perfectus est, quàm sonus) invalidi.

Itaque præter corporum motum & collisionem, oportet qualitatem aliquam sonabilem, siue sonoram, tanquam potentiam quandam soni effectricem corporibus tam mixtis, quàm simplicibus inferere. Hæc verò non est unius speciei, sed pro diversitate temperiei, varia. Aliâ enim specie soni campana, aliâ cymbalum, aut *sonabile sistrum*, ut Naso loquitur, sonant; Ovid. quia metallis diversæ speciei constant. Nec est quod quisquam totam sonoram discrepantiam, in varias aëris inter corpora collisa, fractiones referre conetur. Nam soni metallorum, lapidum, lignorum longè invicem dissonant, licet superficies eorum simillimâ figura & pari impulsu complodantur. Quædam etiam lignorum genera surda appellantur, quia percussa nullum, aut obscurissimum sonitum reddunt.

Verissimum ergo quod ait eruditus Maurolycus: *Qualitatem soni diversificari ex qualitate materia, magnitudine corporis, & forma instrumenti.* Maurolyc.  
in Music.  
tradit,

Et hæc fortasse causa est; cur siderum globi per ætherem

Epist. ad  
Rothm.

Arist. lib. 2.  
c. 9. de  
silo.

Macrobi.  
lib. 2. c. 1.  
Som. Scip.

concitatissimo motu rapti, nullum sonitum edant; quia, inquam, nulla fortè in ipsis, aut æthereâ illâ aurâ qualitas sonabilis inest. Ideo enim Tycho aërem elementarem inter planetas sonabilem esse negat; quia *consentaneum*, inquit, foret *concitatissimo siderum motu sonum ingentem cieri, qui procul dubio auditum etiam nostrum percelleret*. Quanquam tamen res ista non tam sit indubitata, quin responderi possit: sidera cum æthere suo in orbem currente, non sonare; quemadmodum navis, aut ligneus in flumine globus defluit cum undâ, in sono lapsu. Simili enim exemplo Aristoteles Pythagoricos, qui siderum motu Musicos sonos edi censebant, refellit: *Quia in eo continuè quod fertur & non facit plagam, impossibile est sonare*.

Imò aves aërem immotum, aut pisces aquam stagnantem, nullo qui exaudiri possit sonitu ocysimè terebrant. Imò nec si aves aërem resantem, aut pisces fluvium adversum celeri & lubrico lapsu trajiciant, ullus plerumque sonitus ad aures nostras satis propinquas pervenit. Quia licet celerrimo motu dividatur aër, aut aqua, non tamen corporum illorum allisione sic frangitur, ut inde resultet sonus insigniter sensibilis. Vnde fallitur, opinor, Macrobius, dum motu planetarum, qui *in contrarium calo feruntur, sonum nasci necesse dicit; quia percussus aër ipso interventu ictus, vim de se fragoris emittit, ipsa cogente natura, ut in sonum desinat duorum corporum violenta collisio*. Fallitur, inquam, quia glans bombardaria, sive secundo, sive adverso vento aërem & ventum perforet, non sonat quod audiatur, nisi lacuna, aut asperitas aliqua superficiei glandis, aëri duriusculè se affricans, sibilum edat. Igitur nec Sphærica planetarum corpora, in liquido æthere longè tenuiore, quam aër terræ vicinus, sonitum insignem edent, licet ab Occasu versus Ortum contra ætheris raptum moveantur.

Adde jam, verius esse, planetas non ludari contra ætheris vertiginem ab Ortum versus Occasum ipsis occurrentem; sed apparere eos ab Occasu in Ortum regredi, quia segniùs quam stellæ fixæ, versus Occasum feruntur; ideoque relictæ retrò, versus Ortum se promovisse videntur.

Hinc jam non difficilis quoque redditur ratio: cur etiamsi

lana



luna montibus fortasse sit aspera (quod quidam per tubum Batavicum se certò deprehendisse putant;) sine sonitu tamen, & insigni ad ætherem plagâ, vel asperâ aliquâ confricatione moveatur. Vel certè si sibilus aliquis inde abiliat, non tam vocalis est, ut huc usque exaudiri possit. Ad hoc enim necesse foret, ætherem & aërem à luna usque ad terram vibrari & contremiscere, ut postea explicabitur.

Si verò in cælis solidæ sint sphæræ, quarum concava superioris superficies convexam inferioris affricet, nullum tamen stridorem aut sonitum edent; veluti tersissimæ duorum speculorum superficies confrictæ non sonant. Id enim fit sine ictu, quo corpus unum impellere alterum, & spatium ejus invadere conetur, fracto aëre, aut alio corpore fluido, quod interceptum est. Cardanus omni ictu, etiam lenissimo, sonitum excitari credit, etsi non exaudiatur. Quod ratione non caret. Nam quòd Aristoteles ait, *Si acus acum feriat, non sonare*, de sonitu sensibili facilè potest intelligi. Veluti etiam, cum dicuntur nives sine sono in terram decidere, ideoq; *tacitarum vellus aquarum*, Martialis eas appellat; de strepero sonitu, qualis est grandinum, accipiendum est.

Nec tamen hinc consequens est, ut omni ac minimo linguæ motu, quispiam præcepto legendi Horas Canonicas satisfaciat. Nam licet talis sonitum aliquem informem edat, non tamen illos sonos format, quos diversæ vocales, aut consonantes exigunt, ex quibus singulæ voces integrantur. Hoc patet in ebrijs & balbutientibus, quorum lingua nimis flaccida & lapsans, non ita palatum & dentes ferit, ut singularum syllabarum sonitus exprimat. Certum enim, & determinatæ quasi figuræ ictum unaquæque littera postulat. Conc. deinde Basilienſe aliquid etiam amplius, quàm sonum ad Horarum lectionem flagitat: *Vt divina laudes per singulas Horas non cursim ac festinanter, sed Asiaticè, ac tractim. & cum pausa decenti persolvantur.* Quod saluberrimum præceptum in nimis multis, prò dolor, Ecclesijs hodie negligitur. Quod autem *Asiaticè* dicat; interpretor; longo spiritu & tractu: nam Asiani olim intendendâ verborum pronuntiatione, prolixi, ac toto genere dicendi, longi & verbosi erant. Vnde Asiaticum dicendi genus

Conc. Basil.  
sess. 21.

Laconico opponi solet. Non existimo tamen, eum qui privatim & solus Horas ex præcepto recitat, teneri sonos tam elatè & vocaliter pronunciare, ut à seipso exaudiri valeat, quidquid contrà Fillucius, Reginaldus, Sanchez, &c. quos Navarrus, Malderus, Suarez, Bonacina, alijque merito refellunt.

Si quæras, cur qualitas illa sonora, quam metallis, lapidibus, lignis, & omnibus universim elementaribus corporibus asserimus, expectet ictum aëris, antequam sonet?

Dic tu mihi vicissim, cur vis calorifica piperis, ventriculi calefactionem; cur virtus seminis, uteri fermentationem; cur vis attractiva medicamentorum, aliquam viscerum antecedentem alterationem expectet, antequam agat? Postquam enim aciem ingenij exerueris, & satis exercueris, fundum nullum in istâ divinæ sapientiæ abyssu invenies, sed solum rude istud & perfunctorium dicere poteris, Talis est essentia illius causæ, ut non nisi hac conditione positâ, ac velut à somno excitata, ad operationem suam evigilet. Talis autem natura, tale ingenium sonoræ illius qualitatis esse debuit, ut ictu & corporum collisione ad sonandum excitari deberet; ne aliàs semper & incessanter sine ullo ictu, sonando, omnia undique infano sonitu diu noctuque perstreperent, & nobis aures aut effringerent, aut nos magis surdos, quàm molitores, redderent. Si autè corpora longè diversi temperamenti, ut lignum, & ferrum collidantur, aliter sonant, quàm si lignum ligno, ferrum ferro allidatur; quia sonabiles diversæ speciei qualitates ad unum sonitum concurrentes, temperiem fortasse quandam ex duobus sonis quasi temperatam, effectui communicant.

Quo etiam corpora magis porosa, ceteris paribus, eo clariùs sonant. Ideo enim fortè æs Campanum magis sonabile est, quàm plumbum.

Non est etiam indifferens, quodnam corpus liquidum inter duo dura frangatur. Duo enim lapides impetu torrentis intra aquam collisi, surdiùs sonant; quàm si in aëre, aut igne complodantur. Solum autem aërem (non verò aquam, aut ignem)



ignem ) fractum inter dura corpora, sonare, non credo. Nec enim cum fulmen tonat, solum aërem, sed etiam aqueum nubium vaporem discerpi, ac utrunque simul sonare, existimo.

Ex his patet, sonum formaliter sic definiri posse: Qualitas sensibilis proximè orta ex aëris, aut alterius fluidi corporis, inter corpora se collidentia, fractione. Nam Archelai & Aristotelicà soni definitio, Τῆ ἀέρος πλῆξις, aëris ictus, non est formalis, sed causalis, ut antè monuimus.

## ARTICULVS III.

## De voce.

**S**onus in vocem, & sonum qui vox non est, dividitur. Vox animali propria est, cetera sonitum simplicem, non vocem habent.

Vox, inquit Aristoteles, est percussio ad asperam arteriam, *facta ab anima qua in partibus est.* Arist. lib. 2.  
c. 8. de  
Anima.

Divinus enim opifex quædam formandæ vocis instrumenta fabricavit:

Primò pulmones, veluti folles, quorum motu attractus & expiratus aër, ad aliud corpus allidatur, ut sonet. Deinde asperam arteriam, ad quam fit prima aëris allisio. Tertiò, laryngem, quæ est asperæ arteriæ caput, situm ad fauces. Hæc aërem iterum frangit, & sonum modulatur. Ideo enim dilatatur se & constringit, prout gravis, aut acutus formandus est sonus. Quartò sequitur epiglottis, quæ est cartilago, figurâ folij hederæ, laryngis hiatum operculans. Quintò denique, lingua, dentes, labia. Per quæ omnia instrumenta, successivè stupendo divinæ sapientiæ miraculo, aër ineffabilibus quibusdam modis, in voces tandem perfectas & articulatas frangitur & figuratur.

Asperam arteriam Lactantius eleganter *fistulam spiritalem* appellat, quia per eam spiritus, sive aër à pulmone per laryngem, in os expiratur. Dura est, & interiùs aspera, ut aër asperiùs ad eam allidatur, & subsultim per eam decurrat. Hæc enim

Vesal. lib. 5. c. 4. Stat. enim *fistularum, tiliarum, & cornuum ritu fingi debuit, ait noster Vesalius; quandoquidem ut vox fiat, symmetriam quandam esse oportet, & robur aëris ipsius, & substantia ab eo percussa. Est ergo in naturæ organis, Quod moderata sonum vario spiramine buxus,*

Primarium autem vocis organum, laryngem esse eo argumento Vesalius & Galenus existimant, quod pro ratione & Vesal. ibid. modulo vocis, rimam ejus laxemus, aut contrahamus. Congruit etiam usu, inquit Vesalius, *quamvis non formâ, cornuum & tubarum orificijs, quæ ari illa instantes accommodamus.*

Attamen larynx, addit, *longè omnium fistularum artificium vincit. Quæ ita efficta est, ut modo minùs, modo magis eam laxare possimus, ac varias voces, non autem unicam dumtaxat (ut artificum instrumenta) edere valeamus.*

Aliqui tamen non laryngem, sed operculum rimæ ipsius, quod epiglottidem vocant, principale vocis organum constituunt; quod Vesalius refellit. Nam *nihil ad vocem facere, ex vera, inquit, sectione perspectum habemus.*

Et profectò non tantam in epiglottide vim & momentum esse, ex cantu avium tam intento & vocali facilè colligimus: in quibus tamen epiglottidem aliquam esse, quæ laryngem operiat, Aristoteles negat. *Epiglottida nulla ovipararum, inquit, habent, sed contrahunt tantùm, aut relaxant laryngis rimam. Vnde ille philomelæ cantus, perfectâ Musica scientiâ modulatus, qui nunc spiritu continuo trahitur in longum, nunc variatur inflexo, nunc distinguitur conciso, copulatur intorto, promittitur revocato, breviterq; omnia tam parvis in faucibus, quæ tot exquisitis tiliarum tormentis ars hominum excogitavit; sine ullius tamen epiglottidis vibratione & motu perficitur.*

Arist. lib. 3.  
c. 12. histor.  
animal.

Plin. lib. 10.  
c. 29.

Attamen paulò antè Vesalius dubitando dixerat, *Epiglottida fortassis quippiam ad aliquam modulationem conferre: quod omnino credo.*

Principalis autem usus epiglottidis est, ut inter edendum & bibendum, laryngis rimam operiat, ne quid cibi aut potûs in asperam arteriam & pulmones decidat. Secundarius verò, ut aëris, qui loquendo, per rimam laryngis expiratur, ictum excipiat, & voci, in animalibus quæ epiglottide non carent, modula-



modulationem aliquam addat. Vnde instrumenta vocis Galenus non tantum asperam arteriam & laryngem, sed etiam epiglottidem vocat. Galén. lib. 7  
de compos.

His tamen tribus organis, rudimentum solum quoddam vocis adhuc formatur, quod lingua, palato, naribus, dentibus in ore tandem figuratur, & novissimè labijs perpolitur, extra *ἐπὶ τὸ ὄδον* *septum dentium*, ut loquitur Homerus, velut expuitur. Ad hoc verò plurimum linguæ latitudo confert. Vnde inter omnia animalia, aves, præcipuè *πλατύγλωσσαι* Arist. lib. 2.  
c. 12. histor.  
animal. quibus lingua est latior, litteras pronuntiant, & humanam loquelam imitantur: quales psittaci, corui, sturni, picæ.

Non omnia verò instrumenta vocis singularum vocum pronuntiationi æquè serviunt. Vocalis A. in imo gutture, hiante larynge profertur, E. paulò superius. I. medium oris occupat. O. finem, & labijs ad similitudinem figuræ, qua Latini eam vocalem pingunt, corrotundatis quasi vomitur. V. compressis labijs exhibilatur.

Vocalis E. dentium ministerio maximè perficitur. Vnde senes & edentuli apud Anglos, quibus illa vocalis est familiarissima, ferè muti esse dicuntur. Veluti etiam in Polonia, & linguis illis Sclavonicis sibilantibus, loquela edentulis difficillima est, quia sibili compressis dentibus, & vehementi aëris ad eos allisione figurantur. Vnde quia Ephrathæi ad vada Iordanis sibilare & aspirare *Schibboleth*, per *W Schin* non poterant, sed loco ejus substituebant Samech, dicebantque Sibboleth, à Galaaditis isto indicio deprehensi, trucidabantur. Græci Doræ, & quibus vocalis A. familiaris est, ex gutture & apertâ larynge loquuntur. Qualiter etiam Florentini Italianam pronuntiant. Iudic. 12.

Vnde Christianissimam Galliæ Reginam, Mariam Medicæam, cum Anno 1638. per Lovanium in Hollandiam transfireret, Gallicum etiam idioma, ritu Florentino, ex imo gutture gargarizantem, cum voluptate audiebamus. Doricum quoque loquendi & hiandi modum Bergomatibus M. Ant. Muretus tribuit. *Erat Dorum in Græcia*, inquit, *eadem ferè pronuntiatio* Muret. lib. 2  
Variar.

Gggg

nunciatio, quæ in Italia Bergomatium, lato & diducto ore.

Corvi quoque, quia ex gutture naturaliter crocitant, ad nullam vocalem sunt magis dociles, quàm A. ideoque si Græcè loquerentur, sine dubio, Doricâ dialecto uterentur. Inter etiã consonantes, aliquæ uni genti faciles, aliæ duræ pronunciationis, ideoque in alias commutant. Attici Sigma Græcorum in Tau desſectebant, ut ex γλῶσσα, *lingua*, γλῶττα, & θάλασσα, *mare*, θάλαττα faciebant. Quò planè modo Belgæ Teutones asperum illud Germanicum S. in T. emolliunt: unde pro schlüssel / clavis, sleutel / pro schiessen / iaculari schieten / pronunciant. Littera enim S. σκληρός-ομος, *dura pronunciationis* est, inquit Athenæus, ideoque Musici eam non pronunciant, tanquam tibiæ modis minimè convenientem, ac in locum ejus R. tanquam facilioris ac blandioris soni assumunt.

Pueri autem, quibus lingua præ humiditate laxior & tumidior, litteram istam serpentinam S. non facilè nec libenter sibilant. Vnde si hoc verbum, *sibilare*, aut *silere*, pronunciare jubeantur, *tibilare*, & *tilere*, fermè respondere solent. Hinc etiam illud Tata, quo patrem appellitant, inquit M. Cato, quando fari primùm incipiunt. Litteram enim T. facillimè balbutiunt. Vnde nec valde fortasse fallitur, qui Atticam dialectum putaverit à pueris traxisse originem.

Plurimum verò ad rectam ceterarum linguarum pronunciationem refert, in quod idioma primùm fracta fuerit lingua puerilis. Flexus enim inde quidam linguæ, & nervis linguam moventibus imprimuntur, qui in totam vitam manent. Hinc Germani Latine, aut Gallicè loquentes, sibilis & aspirationibus Germanicis linguas istas manifestè exasperant. Anglorum verò etiam doctissimi, narrat Ios. Scaliger, tam pravè Latina efferunt, ut in hac urbe (Lugduni Batavorum) cum quidam ex ea gente per quadrantem horæ integrum apud me verba fecisset, neque ego magis eum intelligerem, quàm si Turcicè locutus fuisset, hominem rogaverim, ut excusatum me haberet, quòd Anglicè non bene intelligerem. Ille qui eum ad me deduxerat, tantum cachinnum sustulit, ut mea non minùs interfuerit pudere, quàm ipsius ridere.

Veruntamen Scaligerum non valde tunc attentum fuisse oportuit.

Ios. Scalig.  
lib. 4.  
Epist. 362.



oportuit. Intelligimus enim Anglos Latine loquentes, sed sicut Iones Græcè inter Diores, vocalem A. in E. dentibus, & collecto osculo perpetuò ferè extenuantes.

Nullam verò novimus hodie nationem, quæ linguam in omne externum idioma, Latinum, Gallicum, Hispanicum, Italicum, Germanicum, Anglicum, magis ductilem & explanabilem habeat, quàm Belgas, præsertim eos qui Teutonice loquuntur.

Miram hoc etiam est, quot homines, tot vocum discrimina, ut vultuum esse. Vnde *vox in homine*, inquit Plinius, *magnam vultus habet partem. Agnoscimus eum priusquam cernamus, non aliter quàm oculis. Totidemque sunt ea, quot in rerum natura mortales, & sua cuique, sicut facies.* Plin. lib. 11. c. 51.

Causa tantæ varietatis, in diversa conformatione asperæ arteriæ, ac præcipuè laryngis, ceterorumque organorum, per quæ vox à pulmone ad extrema labia decurrit. Minima enim figuræ, aut temperamenti diversitas inflexionem, aut tonum evariat. In quo admiranda prorsus divini opificis sapientia, uti & in vultuum discerniculis.

Vt etiam ex fistulæ gracilitate, aut crassitie, quæ minus, aut amplius aëris uno ictu frangit, deinde ex materiæ siccitate & sonabili alia temperie, vocalior aut remissior resultat tibarum, tubarum, cornuum sonus; sic in humanæ vocis organis. Hinc illa vocalitas tanta Pescennij Nigri, qui inter ceteros post Pertinacem, Imperium invasit, *ut in campo loquens*, ait Spartianus, *per mille passus audiretur, nisi ventus adversaretur.* Hinc ahenea vox Stentoris καλκροφῶν apud Homerum, qui clamore quinquaginta alios æquabat. Iliad. E.

## ARTICVLVS III.

*Quomodo species soni diffundantur per medium.*

**S**peciem soni motu quodam successivo per aërem ferri, non sicut speciem lucis & coloris, momento diffundi, experimento notum est. Sic fulminis, sic bombardæ procul distantis flammam videmus, antequam fragor & soni-

tus ad aures pervenerit. Adeò ut avis, quæ arbori insidebat, glande icta, a spectatore longinquo decidisse citius conspiciatur, quàm sonitum exaudierit.

Et tamen ignea lux non emicat extra bombardæ orificium, antequam sonitum edat. In ipsa quippe eruptione, frangitur aërem, & simul excitat sonum; qui ideo fragor appellatur.

Aristot.

Spargit autem sonus speciem sui πανταχῇ καὶ κβάλω circulariter & in orbem. Nec enim tantum κυκλικῶς circulariter in superficie, ut aqua solet, injecto in stagnum lapide; sed etiam σφαιρικῶς sphericè, & undique sursum, deorsum, & lateraliter in orbem, ut rectè apud Plutarchum philosophantur Stoici. Quomodo etiam lumen flammæ, si in libero aëre instar soni pendula sit, in orbem radiat. Non tamen color parietis sic radiare potest, quia retrò est opacum. In sonitu ergo circulus quidam, seu sphaera aërea, in omnem dimensionem protuberat, cujus centrum est, ubi plaga est, quâ aër frangitur: veluti lapis in lacum dejectus, est centrum circuli, quem undequaque in superficie aquæ diffundit.

Plutar.  
lib. 4. c. 19.  
Placit.

Arist. sect.  
II. Probl.

Aristoteles alia, nec etiam inconcinna similitudine utitur. *Vox quaquaversus spargit sese, inquit, non secus ac si proiectum pondus, dum fertur, in partes frangatur innumeras, atque etiam retrorsum se disperiat.* Sic enim gleba terræ fragilis projecta, in jactu undique dissilic, aut ovum crudum, si ex alto in pavimentum cadat.

Hinc secundum circuli leges, quanto species soni longius extenduntur, tanto magis quodammodo rarescunt, & laxius divaricantur; sicuti solent lineæ ductæ à centro versus circuli circumferentiam. Et hæc est causa, cur sonus è longinquo remissiùs audiat; quia, inquam, species juxta peripheriam circuli tenuiores sunt, densiores verò circa centrum.

Eleganter Aristoteles: *Qui longius absunt, vocem tenuiorem excipiunt, ob aëris qui movetur exiguitatem. Motus enim marcescit. Et ut numerus emarcescens in unitatem finitur, sic corpus in unam dimensionem extenuatur: quæ in corpore tenuitas est.* Circuli enim aëris quo centro suo propinquiore, eo breviores, tumidiores, & magis torosi sunt; quo verò longius recedunt, & se dilatant,

tant,



tant, sensim ita extenuantur & complanantur, ut nullus amplius sensibilis tumor appareat.

Nec alia etiam est ratio, quare ostio & fenestris clausis, sonus qui foris excitatur, longius multo distare appareat, quam si liberè per ostia patentia intraret in domum. Species enim soni, per rimas & tennes meatus in domum clausam penerrantes, perinde extenuantur, ac si ex longinquo venirent. Vnde etiam cælo nimente, aut nebuloso, omnia sonantia longius distare videntur. Memini enim, cum non ita pridem in flumine Mosa, aëre densissimâ nebulâ constipato, veherer, & fabri aliquot ferrarij ad vicinam ripam incudes suas animosè tunderent, me judcaturum fuisse, eos medio milliari à ripa abfuisse, si iudicium aurium voluissem sequi. Nix enim, & nebula circulos aëris tardiores faciunt, & debilitant species soni, quæ circulos illos comitantur.

Et simili de causa, omnes soni interdum magis confusi, quam noctu audiuntur. Nam aër diurnus, non tantum vocibus & motu vigilantium animalium, sed maximè vaporibus & exhalationibus, quæ iætæ radio solis levantur, & in aëre fluctuant, inquietior est nocturno, & sua inquietudine circulos sonorum vectores obturbat. Hæc enim causa non paulò mihi certior videtur, quam illa Aristotelis in Problem. ubi ait, voces silentio noctis clariùs, quam die audiri & distingui, quia canales aëris, per quos voces meant, noctu sunt vacui lumine; vel quia certè, anima à diurnis negotijs, & sensuum aliorum operationibus tunc feriata, attentior est ad audiendum nocte, quam die. Sed profectò in pari mentis distractione, nocturni soni liquidius in aures intrant. Altera ratio supponit, lumen esse corpus, & quoddam lucidorum ramentorum flumen; quod alibi ab Aristotele expressè refutatum. Vnde vehementer dubito, an ille Problematum Liber sit legitimus Aristotelis partus. Miratus sum etiam quandoque, cur aër maximo & crepante tonitru impulsus, vibraret tantum, non frangeret vitreas fenestras cubiculi; quæ tamen Moscheti, secundum longitudinem plateæ explosi, minore crepitu dissilirent. Causa verò est, quòd in tonitru, circulus ultimus qui vitra impellit, quia longius

Arist. Problem. sect. 11.

à centro distat, ex longinquo venit, & tardior est, ideoque minus virium ad perfringendum habet; veluti in fluctibus maris ille languidior est, qui detumuit, & ferme in planitiem est reversus. Circulum verò, vicini Moscheti ictu fenestris impactum, angustiore, acutior, velocior esse oportet, quia è propinquo venit, ideoque ad perfringendum magis est validus.

## ARTICVLVS IV.

*Cur species soni successivè per medium trajiciatur.*

**Q**uidam existimant primum aërem, qui excipit sonum, in partes innumeras undique diffingi, ac diffillire, & unamquamque aëris particulam suum secum sonum locali motu avehere usque ad auditus organum.

Senec. lib. 2.  
c. 29. Nat.

Sic philosophari oportet eos, qui dicunt *vocem nihil aliud esse, quam ictum aërem*. Aut ἀέρας ἐκ χυμωτικῶν αἰθέρων aërem figuratum, ut Aristoteles, vel quisquis est illorum Problem. Auctor.

S. Aug. lib. 7.  
c. 14. Civit.

Hinc fortasse antiqui alas & volatum vocibus tribuunt; quasi aëris quidam nodus in vocem formatus, volatū celerissimo, à loquente ad audientem trajiciatur. *Ideo alas Mercurio eloquentiæ Præsidi, in capite & pedibus posuerunt*, ait S. Augustinus, *volentes significare volucrum ferri per aëra sermonem*.

S. August.  
Epist. 3.

Inde etiam toties Homerus ἄλκα πτερόεντα verba alata appellat. Sed opinio ista satis refellitur; quod sonus idem totus à pluribus simul percipitur. Qui tamen non inter se particulatim comminuunt sonos, tanquam cibos, ait S. Augustinus, *sed omne quod sonat & omnibus totum est, & singulis totum*. Non ergo ita discerpitur cum suo aëre sonus, ut una pars uni auditori, altera alteri distribuatur.

Deinde minimus sæpe aër, qui sonantem plagam excipit, non sufficit, ut in innumeras aures, quæ circumstant & simul audiunt sonum, dividatur.

Veluti ergo color idem in suo pariete hærens, à multis simul cernitur, non singulis oculis particulatim discerpitur; ita

nec



nec sonus. Specie autem suâ auditum movet, sicut color visum. Hoc tamen discrimine, quodd species visibilis momento temporis ad oculum perveniat; species audibilis tempore indigeat, ut ad aurem pertingat. Quid ita? Quia nempe circulos aëris imago soni comitatur, qui successivè dilatantur à centro, ubi est sonus, versus circumferentiam, ubi est audientis auris. Secundum ergo proportionem temporis, quæ circuli se protrudunt, fit speciei audibilis propagatio & progressus; id est, sagittâ & omni telo velocius, si magnus sit sonitus, & aër à nebulis & vaporibus sit purus. Per aërem enim nebulâ gravem, ut circuli lentiùs currunt; ita speciei audibilis propagatio est segnior. Vnde vidi aliquando cum admiratione, quendam tempore nebuloso ligna in proximo, ex distantia vix triginta passuum, secantem, qui elevatâ securi secundum ictum imprimebat, antequam audissem primi sonitum; perinde atque si centum & ultrâ passuum intervallo à me disjunctus fuisset. Causa erat, densissima & roscida nebula, quæ & circulorum aëris, & speciei audibilis celeritatem retardabat. Nec Cleomedes vocis celeritatem ex historia Regis Persarum rectè æstimat, qui trajecto in Græciam exercitu, nuntios quosdam certis, unde se audire possent, intervallis, ab urbe Athenarum Susas usque disposuit; ut quæ in Græcia ab exercitu gererentur, in urbem Persarum regiam, proclamantibus sibi invicem nuntiis, celerrimè perferri possent. *Et inventum est, inquit, vocem per ejusmodi nuntiorum traduces, διὰ δύο ἡμερῶν duorum dierum & noctium spatio, è Græcia in Persas pervenisse.* Sed velocior est longè & circulorum, & vocis volatus. Nam primi nuntij clamor non præcisè in spatio secundi finiebatur, sed ultrâ ibat. Deinde mora quædam inter duos quosque nuntios interponi debebat, ut posterior à priori intelligeret, quid sequenti nuntiare oporteret.

Quemadmodum etiam lapide in tranquillum lacum dejecto, non idem aquæ circulus est, qui à centro usque ad circumferentiam se expandit, sed circulus unus minor majorem alium suscitatur, & unda undam propellit; ita in aëris circulis accidit. Vnde Avicenna unda undam istam soni propagationem

gationem *vocalem undam* eleganter appellavit. Cur autem species soni potius, quàm species coloris, per circulos & undas aëris successivè se propaget, vix alia, opinor, ratio reddi potest, quàm quia talis est natura soni, ut sic agat, & speciem sui cum aëris undatione promoveat. Sicuti enim ratio unica, quare species coloris, aut lucis, non nisi per medium diaphanum trajici & extendi valeat, est talis speciei natura & essentia; ita quoque, cur species soni circulatim, & successivè per medium volet, in speciei illius naturam referri debet.

Et quid verò mirum, si species soni sonum suum imitetur, & sicuti iste cum motu & fractione medijs aëris producit, ita illa, comitante ejusdem aëris motu, in longum propagetur? Species enim audibilis est ejusdem, vel proximæ naturæ cum suo sono, à quo propagatur; ut pròinde mirum non sit, si tam sine aëris aliqua vibratione propagari in longum non possit, quàm sonus sine aëris fractione non potest nasci.

Vibratio autem ista aëris varijs experimentis probari potest.

Primùm, quia soni, secundo vento, longius speciem sui transmittunt, & audiuntur faciliùs, quàm adverso & reflante vento. *Voces enim remisse elataq; sunt*, ait Seneca, *prout aër se concitavit*. Hoc autem ideo accidit, quia fluxus aëris vento incitati adjuvat, & aufert secum circulos aëris, per quos sonus speciem suam multiplicat. Simile quid evenit, quando lapis in aquam fluminis currentem projicitur. Circuli enim aquæ deorsum secundum fluminis lapsum longissimè decurrunt, sursum verò contra aquæ nixum, vix, & non nisi brevissimè explicare se valent.

Secundò, Tormenta bellica à parte anteriori qua ignem vomunt, ad maximam distantiam audiuntur; à tergo ad longè breviorē. Sic nuper An. 1635. Gallorum & Hollandorum, qui ab Occidente Lovanium nostrum quatiebant, Tormenta Mosæ - trajectum usque, per 13. horaria milliaria bombum trans mittebant; cum interim retrò, Bruxellæ ad quartum solum milliare, tantum esset silentium, ut ibi de oppugnatione oppidi nostri dubitaretur.

Ratio verò hujus discriminis est, quòd impetus flammæ

Torment

Senec. lib. 2.  
de Nat.



Tormenti aërem in illam partem impellat, & mensuram circulatorum aëris, per quos speciei propagatio decurrit, extendat.

Veluti enim circuli sonando excitati, duplici simul motu, scilicet suo, & venti, longius æquali tempore excurrunt; ita etiam sphaera activitatis speciei audibilis ampliatur. Nam activitas speciei circulos illos tam inseparabiliter, & æquali passu concomitatur, ut plurimi Philosophorum censuerint, & sonum, & speciem quâ sonus per aërem se spargit, nihil aliud esse, quàm τοῦ αἰθέρος κίνησις aëris motum.

Arist. sect.  
11. Probl.

Tertiò, quando in exercitu multi simul loquuntur, aut multæ simul ranæ coaxant, longius exaudiuntur, quàm si unica vox mitteretur. Causa iterùm in aëris motu, qui à multis simul vocibus longius, quàm ab una propellitur. Meritò ergo dixit S. Augustinus, *inter sonantem & audientem aërea spatia verberari*. Sed quousque? An semper usque ad ipsum auditus organum? Hoc enim jam raptim dispiciendum est.

Idem  
sect. 19.

S. August.  
lib. 11. c. 2.  
Civit.

## ARTICULVS V.

*An necesse sit totum aërem medium, usque ad organum auditus, vibrari?*

**N**ON quærimus, an eadem numero aëris pars, quæ inter corpora sonantia, fracta fuit, & primum sonum excepit, transire motu locali, usque ad contactum organi auditus, debeat. Supponimus enim, hoc non esse necesse, Vox enim ex centum v. g. passuum intervallo, citius auditur, quàm particula aëris, bajula primi soni, spatium illud motu locali trajicere possit. Quod hoc experimento discere possumus. Nam si quis oris flatu flammulam candelæ, aliquantulum distantem, extinguere velit, notabile temporis intervallum experitur, antequam spiritus oris usque ad candelam pertingat, & flammulam ejus concutiat.

Quærimus ergo an totum medium, usque ad auditum,

H h h h

vibrari

vibrari, & quodam velut undante fluctu moveri oporteat, ut species eòusque perveniat.

Quidam negant, voluntque species soni, etiam per corpora immota & solidissima posse penetrare. Vnde secundum istos, non erit necesse, ut aër externus impellat tympanum organi auditûs; quia species audibilis longiùs protendi poterit quàm motus circulatioque aëris, & proinde intra organum se insinuare, etiam si nullo aëris motu eòusque quasi deportetur.

Sed illi profectò falluntur. Nam ut auris sonitum percipiat, membranam ejus, quæ tympanum vocatur, aliquo levissimo saltem motu vibrari debet, ut Medici passim existimant. Id autem fieri nequit, nisi fluctus, aut crispatio aëris usque ad tympani contactum appellat.

Deinde si trajectionem speciei audibilis comitari non necessario debet aëris motus, nulla jam est solida ratio, cur resistente & adverso vento, non tam procul, ac secundo flatu, exaudiantur voces; nulla item ratio, cur post montes, rupes, ac densissimorum murorum obstacula non percipiantur sonitus qui altrinsecus in aëre excitantur. Non percipiuntur autem, nisi aliquibus rimis, aut angustissimis meatibus corpora illa pervia, & aëre, aut alio corpore fluido plena sint, per quas soni species ad aures pervenire possit.

Hinc si quis per vitrum, nullâ rimâ pervium, alteri loquatur, nihilo plus auditur, quàm si sine loquela biaret. Quod cum risu & admiratione quandoque expertus sum. Causa verò est, quòd in vitro nulli, aut ineffabilis angustiae sint pori, nec in totam vitri crassitiem perviij. Quia enim res liquidæ undique in se collabuntur, & omnes suos meatus implent, ideo poris ferè carent: ex liquido autem concresecunt vitra.

Hinc mirum esse desinit miraculum illud saxi, quod *surdum* vocant in Scotia: *In cujus imo*, inquit ex Boëthio Cardanus, *si exoneretur machina ignea, ex altera parte non exauditur. Cum enim solidum sit & surdum, sonus haud permeat. Rescenditur vero ad angulos aequales.*

Verissimè ergo omnes tam Philosophi quàm Medici sagaciores



ciores continentur, totum aëris spatium inter sonantem & audientem vibrari oportere, & speciem audibilem, cum aliqua saltem levissima aëris crispatione, in auditus etiam remotissimum penitissimumque organum debere intrare. Non tamen tam valido impulsu, ut malleolus, qui intra tympanum auris latet, agitetur, & incudem suam feriat, quod Columbus Medicus imaginatur.

Attamen, quia species audibilis, sine tremulo medij motu ne latum quidem unguem, propagari potest; in tympanum & labyrinthos illos interioris auris, ubi residet auditus pervenire nequit, nisi aëris externi tremor usque in aërem ipsum interiori auri insitum pertingat.

Nec refert, quod tot interdum dissonæ, aut consonæ in unam harmoniam voces misceantur, & simul audiantur; cum tamen aër auribus implantatus tot diversis motibus, iniquiunt quidam, nequeat simul agitari.

Nam si aër externus, in quo tam multi simul excitantur soni, innumeris circulis sese mutuo interfecantibus crispari potest (veluti etiam aquæ superficies, in quam centum, mille, aut plures calculi simul conjicerentur;) etiam sanè aër auribus internus, totidem motus & vibrationes recipere valebit.

Ex superiori doctrina patet, valde aberrare eos, qui negant aërem vibrari usque ad auditum, *quia, inquit, audimus aliquando in occultissimis & clausissimis locis, quibus non communicat aër externus.* Toler. Potest enim istud experimentum in Auctores suos retorqueri. Nam si nulla rimula, nulli pori ad continuandam aëris vibrationem, sunt necessarij, sed per densitatem corporum immotorum, perinde species soni propagatur, atque radius lucis per vitri crassitiem; nulla jam profectò est ratio, cur non semper quolibet loco arctissime inclusi, audiamus vocem foris sonantem, perinde fermè ac in aëre libero. Quid enim obstat, si species soni per mediam muri ahenei crassitiem potest trajici? Nulla itidem erit ratio, cur lapillus in vase aureo agitato, minùs exaudiat, quàm in ligneo: cur lenis pulsus unius extremitatis hastæ ligneæ, aure alteri extremitati

appositâ facillimè audiatur, non verò si par longitudo lapidea, aut solidioris alterius materiæ pulsetur.

Nec tamen existimare oportet, unum eundemque aërem per totam longitudinem venarum ligni, ab uno extremo ad alterum extremum hastæ, aut trabis decurrere: sed totum aërem, aut ligneum spiritum venis inclusum, intremiscere successivè & vibrari. *Ligneum spiritum* addidi; quia indifferens est ad soni propagationem, aërne sit, an simile aliud corpus fluidum, per quod ille tremor & vibratio decurrit.

Iam verò, cum nullibi sit vacuum, certum est omnes venas & poros corporum, etiam invisibiles & angustissimos, ejusmodi aliquo corpore plenos esse. Pororum verò istorum multi peruij sunt, & ex uno in alium proximum, si non rectâ, saltem flexu quodam transitus est, adeoque vibratio aëris, vel interioris spiritûs ligni, per universam hastæ longitudinem, circumgyrando saltem per innumeros pororum labyrinthos, transcurrere potest. Quod & hîc experimento ita discimus.

Nam mora, quæ notari possit, consumitur in trajectione soni ab una parte longissimæ hastæ ad alteram oppositam; cum tamen, si in libero aëre, ex tantulâ distantia invicem loquamur, videantur tremor aëris & species soni in instanti trajici. Diutius ergo undatio illa in pororum sinuosis flexibus & gyris hæsit, quàm in aëre libero transvolare solet.

## ARTICVLVS VI.

*Quomodo pisces sub aqua audire possint.*

Scalig.  
Exerc. 297.

**O** Bjici tamen nobis potest, quòd pisces optimè audire sciat, ut ait Scaliger, qui *mugilum nocturna interfuit piscationi*: & tamen nullus, ut apparet aëris, aut aquæ tremor ad organum auditûs eorum pervenire possit.

Plin. lib. 9.  
c. 8,

De auditu etiam delphinarum, qui tamen & auriculâ, & cavernâ, loco antriculæ, carent, Plinium audire non injucundum erit. *Delphino*, inquit, pro voce gemitus humano similis, *dorsum*



dorsum repandum, rostrum sinum. Qua de causa nomen Simonis omnes miro modo agnoscunt, maluntq; ita appellari. Delphinus non homini tantum amicum animal, verum & Musica arti: mulcetur symphonia cantu, & præcipue hydraulici sono.

Et lepidam ac miram historiam narrat, ex qua discere possumus acumen audiendi in illo pisce.

Divo Augusto Principe, inquit, Lucrinum lacum inuēctus delphinus, pauperis cuiusdam puerum, ex Bajano Puteolos in Ludum litterarium itantem, cum meridiano immorans, appellatum eum Simonis nomine, sapius fragmentis panis, quem ob id ferebat, allexisset, miro amore dilexit. Pigeret referre, ni res Mæcanatis, & Flaviani, & Flavij Alfi, multorumq; esset litteris mandata.

Quocumque diei tempore inelamatus à puero, quamvis occultus atque abditus, ex imo advolabat: passusq; è manu, præbebat ascensuro dorsum, pinna aculeos velut vaginâ condens; receptumq; Puteolos per magnum aquor in Ludum ferebat, simili modo revebens pluribus annis. Donec morbo extincto puero, subinde ad consuetum locum ventitans, tristis & mærenti similis ipse quoque (quod nemo dubitaret) desiderio expiravit.

Idem ex Appione, qui spectaculo illi se interfuisse scribit, narrat Agellius, additque, Romam omnemq; Italiam confluisse, ut piscem adamati pueri vectorem spectaret. Agell. lib. 7.  
c. 8.

Ait ergo Plinius, delphinum nomine Simonis à puero inelamatum, ex imo solitum advolare. An igitur ex fundo maris vocem inelamantis audiebat? Quis verò intermedius aër, qui voce ictus, usque ad auditum delphini tam altè demersi intremiscere potuerit? Certè nullus, quidquid Plinius contrà Plin. lib. 9.  
c. 7. dicat, qui fortiter asserit vitalem aëris spiritum, ad respirationem piscium, in profunda maris penetrare.

Aristoteli enim non credit, neganti piscium vulgus aërem respirare. Argumentum Plinij inter cetera est: quod aër sub terram, elemento aquæ spissiorè, se insinuet ad respirationem & auditum talparum. Sed terra poros ubique dehiscences habet, per quos aër in subterranea transcolatur; aqua verò in qua degunt pisces, in poros, si quos habet, undique collabitur, eosque liquiditate sua opplet, aëremque foras exprimit.

Itaque si pisces sub aqua audiunt, non aërem plerumque, sed aquam usque ad auditum eorum tremiscere & levissimè crispari oportet. Aqua enim elementum fluxum & plicabile est, sonique ac speciei sonabilis medium esse potest; licet lentius & morosius quàm aër. Nam & ἐν ὕδατι ἀκούομεν, *in aqua audimus*, inquit Aristoteles.

Ibid. c. 3.

Attamen pisces ex imo fundo maris, audire hominum in littore clamantium voces, nondum credo, nec delphini illius Bajani historia id evincit. Nam delphini, Aristotelis etiam consensu, pulmones habent & aërem respirant, nec diu, sine suffocationis periculo, vivunt sub aquis. Hinc, ut narrat post Aristotelem idem Plinius, *cùm fame conciti delphini fugientem in vada ima persecuti piscem, diutius spiritum continuere, ut arcu emissi, ad respirandum emicant, tantaque vi exiliunt, ut plerumque vela navium transvolent*. Est enim, ut ante dixit, *omnium animalium velocissimum, non solum marinorum delphinus, ocyor volucres, ocyor celo*. Non ergo Bajanus ille delphinus ex imo maris, sed ex abdito alicujus fortè rupis advolabat, ubi fistulâ suâ dorsuali, in aërem, ut ranæ rostrum solent, exertâ respirabat. Fortasse etiam voces per fistulam istam ad auditum ejus interiorē intrant. Nam, ut Aristoteles & Plinius mirantur, nec auris, nec cavitas, ullumve vestigium organi auditus in delphinis exterius apparet.

Quidquid erit, certè urinatorum experimento constat, in parva admodum aquarum profunditate voces inclamantium, aut obtusissimè, aut nihil omnino exaudiri.

Fieri quoque potest, ut minori aquæ vibratione piscium auditus indigeat; quam etiam perpetua agitatio & inquietudo maris adjuvet. Visu igitur magis, quàm auditu obambulantium littus, exterriti diffugiunt pisces. Maneat igitur, speciem sonabilem per aërem, aquam, ignem non trajici nisi medij tremor, aut minima saltem crispatio comitetur. Vnde falli mihi videntur illi Theologi, qui species soni, quibus Beati in cælo Empyreo se colloquentes audiunt, per solidam & immobilem cali substantiam, perinde ac species visibiles, transmitti existimant.

Suar. lib. 1.  
c. 5. de  
Oper. sex.  
dier.

Hoc



Hoc enim pugnat cum naturali modo, quo species audibiles, per sphaeram aëritatis soni se propagare solent. Vnde longè verius S. Thomas, auram aliquam liquidam, flexilem, & spirabilem in cælo Empyreo imaginari videtur, quæ in voces frangi, & undante quodam motu, ad specierum audibilium propagationem servire possit. *Dici potest*, inquit S. Doctor, *quod erit confractio cæli Empyreï. Et argumenta Suarij, ac aliorum dissolvens: Nec hoc, ait, erit ei ignobilitas: quia erit instrumentum motum à lingua glorificata, & materia vocis prolata in laudem divinam. Nec propter hoc sequitur, quod cælum sit generabile & corruptibile: quia raritas & densitas sunt æquivocè dicta in isto corpore, & in istis corporibus. Sicut etiam ponunt Astronomi inter duas sphaeras, quæ non possunt scindi, esse aliquod spatium repletum corpore divisibili. Cum in isto spatio sit motus Planetarum secundum motum Epicycli.* Hæc quoque, de confectione auræ liquidæ & spirabilis, in concavitate Empyreï contentæ, opinio Richardo placuit.

S. Tho. in 2.  
d. 2. q. 2. 2.

Richard. 4.  
d. 49. a. 2.  
q. 3.

Imaginare igitur cælum Empyreum tribus quasi partibus compositum esse, videlicet solido tecto, solido pavimento, & aurâ illâ cælesti fluidâ, quæ spatium inter utrumque implet: quam auram, ad loquendum Beati respirant, & per cujus undationem species sonorum propagantur, & ad distantes perveniunt.

Mea deinde imaginatio est: Aquas supercælestes, quæ interpositâ Firmamenti soliditate, secundo Mundi die, ab aquis inferioribus divisæ sunt, in auram illam Empyreï, ad commodiorem Beatorum corporum habitationem, extenuatas fuisse. Item illas esse aquas, quæ adhuc hodie, super Firmamentum cæli, Deum laudare dicuntur. Nisi enim, præter aquas nubium, quæ supra cælos aëreos sunt, & in terram quotidie depluunt, alias aquas supra Firmamentum & cælos sidereos statuamus, nunquam, ut rectè animadvertit Bellarminus, omnibus sacræ scripturæ locis, qui de aquis supercælestibus mentionem faciunt, satisfacere poterimus.

Bellar.  
Psal. 102.

ARTI

## ARTICVLVS VIII.

*An sonus audiatur, postquam esse desierit.*

S. Aug. c. 3.  
de fide &  
symb.

**S**onum rem esse successivam ac fugacem, quæ non diutius manet, quàm sonat, ut loquitur S. Augustinus, experientia notum est. Vnde in sermone humano, etiam torrentissimo & rapidissimo, sonus primæ syllabæ sequentem non expectat, ne eum obturbet & confundat; sed mox ut prima syllaba sonuit, decedit, & silendo, sequenti ad sonandum, locum cedit. Abeunt tamen interea, & dilatare se pergunt circuli aëris primi soni, & secundum eorum progressionem, species audibilis se propagare pergit, & per circulos majores majoresque expandit.

Io. Burid.  
lib. 2. q. 21.  
de anima.

Vnde aperte sequi videtur, & notat Buridanus, vocem loquentis ex aliquantulo intervallo, semper audiri, quando jam evanuit. Nam evanuisse videtur, ubi ipsemet loquens non eam ampliùs circa se audit. Distans autem tardiùs eam percipit, quàm loquens; ergo cum ipsa jam esse desijt.

Nec id tam mirum est, si cogitemus, præsentiam aut existentiam objecti non esse universim ad cognitionem necessariam, ubi potentia speciem objecti penes se habet, per quam, tanquam ejus semen, conceptum aliquem ipsius elicere & formare potest. Sic enim solis figura, in pariete obscuro aliquamdiu videri putatur ab eo, qui directis oculis, solem in cælo aliquamdiu est intuitus. Species enim lucis humoribus & tunicis oculorum intricata, aliquantulo tempore hæere potest, absente objecto visibili, & servire potentia visivæ ad videndum illud, si species illa à luce spirituum opticorum paulisper conservetur & retineatur, ne subito tota diffuat.

Quod autem in visu aliquando & rariùs accidit, in auditu frequentissimum & perpetuum esse potest; quia talis est natura soni, ut ictu aëre repente exiliat, & finito ictu, repente evanescat; relicta tamen in aëre specie, quæ se, mortuo sono, propagare pergit. Sicut enim fractio aeris icti circulum

primum



primum suscitatur, qui deinde alios & alios protrudit, etiam si primus aer ictus conquiescat; ita sonus naturam illius motus imitans, speciem spargit, quæ ab ipso in conservari non dependet, sed interempto primo sono, per circulos aeris undantes & concomitantes se dilatat.

Sic multi quidem de perceptione soni jam emortui philosophantur. Ego verò, etsi olim consenserim, jam aliter sentio. Nempe sonum qui esse desijt, nego auditu externo sentiri, sed solam speciem audibilem, post sonum emortuum, superstitem. Est enim potius negotium imaginationis, aut intellectus, quàm sensus externi, acumen suum & cognitionem ad rem non existentem extendere. Sensus enim externi sunt facultates imperfectæ, quæ circa speciem ab objecto impressam vim suam exerunt, eam percipiendo, & eâ mediante objectum externum, si illud in rerum ratione adhuc existat. Nam sensus externus foras se exerens, debet existentiam objecti sui, in rerum ratione reperire, ut per cognitionem intuitivam, in eam quodammodo incurrere possit tanquam præsentem. Quia enim sensus exterior non nisi in rem existentem, & præsentem ferri potest, ideo res aliqua *præsens*, quasi *præsensibus*, dicta fuit, ut nobis interpretatur S. Augustinus. Si autem existentia soni subtracta fuerit, & nihilominus species ejus in potentia superstes maneat, tunc species sola à sensu externo cognoscitur; sed tanquam extra organum, & è regione quasi constituta. Quod etiam in visu accidit, quando quis diutius solem intuitus, oculos in obscurum locum convertit. Tunc enim *διὰ τὴν ἐν τῷ ὀφθαλμῷ κίνησιν ἐν ταῖς ὁμασίαις* propter subsistentem adhuc objecti radiantis motum in oculis, videre se existimat orbiculum luminosum in tenebris: non qui re verâ ibi sit; sed solum videt reliquias speciei solis, quæ manent adhuc in oculis.

S. August.  
lib. 11. c. 3.  
Civit.

Arist. c. 2.  
de Insom.

Et quia natura visus est, rem è regione intueri, nec metiri aut advertere potest distantiam inter speciem quæ est in oculis, & inter locum obscurum, in quem oculos defigit, ideo imaginatio circulum illum luminis extra oculum esse credit.

Simile iterum evenit, quando per vitrum viride chartam albam intuemur. Viror enim non in vitro esse videtur, sed remotior, & in charta apparet. Sic ergo speciem soni potentia auditiva cognoscit, sed quasi extra organum, & ultra aërem insitum, qui intra tympanum inclusus stagnat.

Et licet intellectus, aut etiam sola imaginatio (ut colligimus ex brutis) sonum principalem, qui jam aufugit & esse desijt, cognoscere valeat; non tamen sensus externus, cujus solum officium est, in extrema quasi superficie corporis excubare, ut formas ab objectis externis organo suo impressas nosciter, & eas sensui communi, deinde imaginationi, ac intellectui gradatim repræsentet.

Hæ verò deinde potentia (intellectus præsertim & imaginatio) ulterius ferri possunt, & non tantum speciem ipsam soni, sed etiam sonum primarium, v. g. pulsu campanæ, aut inflatu tubæ excitatum (jam tamen emortuum antequam species ad auditum perveniat) cogitatione intuitivâ, non tanquam præteritum, sed tanquam adhuc præsentem attingere possunt. Vnde facillimè ex his tricis se expediunt, qui nullam cognitionem sensitivam in externis organis, sed in imaginativa sola censent perfici.

An verò species soni per medium propagata, à sono ipso naturâ specificâ differat, sub iudice eodem lis est, apud quem de luce & specie lucis, de colore & specie coloris, lites pendunt; de quibus Cap. præcedenti Art. VII. diximus. Nec maiorem, imò minorem rationem specificæ distinctionis inter sonum & speciem soni video, quam inter colorem & speciem coloris.

Arist. c. 6.  
de sensu

Et sanè Aristoteles speciem soni, sonum appellare solet, nec essentiâ videtur eam à sono distinguere. *Lationes*, ait alicubi (de specie soni per medium sparsâ loquens) *medium prius attingunt: videtur autem sonus alicuius quod fertur esse motus.*

Galen. lib. 7  
de Placit.

Ubi affirmat, sonum, id est, soni speciem, per medium, antequam ad finem pertingat, successivè ferri instar motûs localis. Et Galenus, cum Hippocrate suo & Platone, ita speciem soni, sonum esse dicit, ut cum sonus audiri dicitur, nihil aliud audiri



audiri censeat, quàm extremitatem speciei soni, quæ organum attingit ac impellit. Quidquid erit, etiamsi speciem soni differentiâ essentiali, à sono distingueres, censeo nihilominus, eam auditu intra ipsam organi concavitatem percipi, & deinde sonum jam emortuum, à quo species illa audibilis ad aurem venit, ab imaginatione, non ab ipso sensu externo auditus, cognosci, sicut Cap. præcedenti de visione speciei visibilis, ex S. Augustino philosophati sumus.

Quæ sanè Galeni, & Platonis, Hippocratisque ( quorum Placita ibi enarrat Galenus ) opinio esse videtur. Non frustra enim tot flexus & labyrinthos, intra penitus aurium recessus, natura & divinus Opifex fabricatus est; sed ut species audibilis fracta refractaque, ad eum modum impleretur, aut gracilesceret, prout anima postulat, ut ex cognitione speciei audibilis, in organo externo sic tornata & modulata, sensum suum internum, ad cognitionem primò ipsius speciei, auditu externo perceptæ, & insuper ad cognitionem prioris soni, qui evanuit, extendere possit.

Qui enim aliter, & simpliciori modo operationes illas sensuum fieri existimant, non satis faberrimum subtilissimumque naturæ ingenium, & ineffabilem Conditoris sapientiam æstimare mihi videntur.

Ac sanè, si species visibiles colorum & lucis, ut antè diximus, visu percipi valeant; nihil causæ aut miri est, si species quoque audibiles sub auditum cadere dicamus.

## ARTICVLVS VIII.

*Quid Echo.*

**E**cho dicta ab ἠχῇ, quod *resonare* significat. Hinc κατὰ ἠχῇ, significat instituere vivâ voce, ac per Echo & resonantiam quandam, qua Catechumeni ( qui inde etiam dicti ) easdem voces resonabant, quas à Catechistis suis acceperant. Vt, Credis hoc? Credo. Abrenuncias? Abrenuntio. &c.

Resonat autem maximè à rupibus & concavis locis Echo:

Ovid.

*Reddebant nomen concava saxa tuum.*

In silvis quoque, ubi nullæ rupes, aut saxea concavitas, sæpe tamen eam audimus, quia innumeræ foliorum, arborum-que superficies non sinunt vocem, & aëris circulos penetrare; unde resilit, *vocisque offusa resultat imago*. Magis tamen confusè, quàm à rupis aut montis concavo; quia inter tot arborum & foliorum dissutas rimas, soni species non ita colligi & confertim redire possunt, quàm à continuâ rupis concavitate. Montes ergo fortè erant mixti silvis, ubi Corydon ille canebat,

Virg.

*Non canimus surdis, respondent omnia silva. Et*

*Formosam resonare doces Amaryllida silvas.*

Cavum verò illud, unde expressior & vocalior redit Echo, Aristoteles ἀγγείον vas appellat, quia concavitate & lævitate vasi non est absimile.

Horat.

*Lævia personuere saxa.*

Præstat autem cavitas ista auditui, quod speculum visui. Ut enim à speculo imago vultus offensa resilit in oculos; ita imago vocis concavo impacta reflectitur ad aures. Hòc tamen discrimine; quòd speculum etiam planum imaginem coloris sic regerit, ut videri res in speculo possit: ut verò exaudiatur Echo, non planities, sed concavitas tanta, & talis figuræ necessaria est, quæ sufficiat ad remittendos rectà circulos aëris, unà cum speciebus soni comitantibus, usque ad auditum. Superficies autem saxi plana, & circulos aëreos, & species ad latera diffuere & dispergi finit, ne satis confertim & sensibilibiter redire valeant ad aures.

Quomodo autem itus ille & reditus soni, in Echo fiat, non consentiunt Philosophi.

Alexand.

Alex. Aphrodisius, ut eum interpretatur Simplicius, videtur existimare, esse quandam plagarum aëris perpetuam & concatenatam successionem; ita ut primus aër percussus eum qui post se est, figuret simili percussione, quemadmodum ipse à percussione figuratus fuit. Is autem rursus eum qui post se est. Et ita, non sine continuitate, ad vas usque progressus fit. Postremus verò qui prope vas percussus



*percussus & figuratus fuit, cum prohibeatur à vase ulterius continuare percussionem, retrò à solidi repercussione rejicitur, velut pila à pariete.*

Quam tamen imaginationem rectè confutat Simplicius. Nec enim post primam plagam qua excitatur sonitus, àër percussus, simili plaga àërem sequentem frangit. Non enim tantas vires habet. Nec si haberet, sonitus qui ex collisione àëris ad àërem exiliret, similis esset primo sonitui, quem allisio malleoli ad æs campanæ suscitatur. Vnde Echo dissimilis prorsus à primo sonitu rediret. Imò nunquam sonitum campanæ directè perciperemus, sed alium diversæ rationis, quem ultima plaga àëris, ante aures ipsas excuteret. Deinde àër ad àërem, aut ad concavum rupis allisus, sonum articulatum & humanum exprimere non potest; qualis ille est quem larynge, linguâ, & ceteris naturæ instrumentis homo loquens efformavit.

Itaque dicendum potiùs, non àërem posteriorem à priore sic percuti, ut sonum novum eliciat, sed species primi soni, à sono jam mortuo avulsæ alias sibi similes, gradatim per circulos usque ad concavum rupis, producant. Cùm verò nec circuli àëris, nec species circulos concomitantes, occurrente solido, ulterius tendere & explicari non possint, ultimus àër impactus solido, quasi in terga revertitur, & revertendo circulos & vibrationes àëris similes præcedentibus resuscitat, à vase, sive concavo, unde Echo venit, usque ad auditum; cum quibus àëris circulis etiam species primi soni redeunt, ut iteratò moveant sensum, ut sonus idem, qui priùs directè perceptus fuit, jam reflexè percipiatur. Sicuti autem circuli redeunt tardiores sunt & flaccidiores euntibus; ita species soni quæ eos comitatur, pigrior est, ac plus temporis in reditu, quàm in itu consumit, sensumque auditûs languidiùs impellit. Vnde ceteris paribus, ex æquali distantia, Echo obtusius auditur, quàm sonus directus. Hoc quoque notatu non indignum: Echo sive resonantiæ beneficium esse, quòd nos ipsos loquentes audire possimus. Nam nisi ab àëre nos circumdante, alijsque corporibus, in aures nostras reflecterentur voces quas eloquimur, effugerent proprias aures,

nec audiremus. Hinc si in aëre supra nubes tenuissimo loqueremur, difficilius loquelam nostram perciperemus; quia ab aëre tali nulla pænè vocum ad aures nostras fieret reciprocatio. Audiremus ergo solummodò quantum palati, & dentium, labiorumque nostrorum percussio, species soni, per interiores oris meatus, ad organum auditus remitteret.

Hinc etiam qui furdastri sunt, ad pleniorē Echo colligendam, concavitatem auris (quod Hadrianus Imp. facere solitus) manu inflectunt, ut se & alios sibi colloquentes, expressius intelligant.

Ex dictis patet, definitionem Echo, ex isto Poëtæ versu,

Virgil.

— ubi concava pulsu

*Saxa sonant, vocisq; offensa resultat imago,*

fic verè & concinnè posse formari: Echo est imago soni, quæ concavo offensa, versus sonantem resultat. Quod fortasse Hebræi etiam significare voluerunt, quando Echo *filiam vocis* vocaverunt.

## ARTICVLVS IX.

*Quænam Poëtæ de Echo sint fabulati.*

Ovid.

**N**ympham quandam ex Oreadibus & montanis fuisse dicunt, quæ lunonem garrulitate & longo prudens sermone tenebat; interea dum turpis ille Iupiter adulterijs & furtis agrestium Nympharum operam daret.

Vnde — postquam hac Saturnia sensit,

*Hujus, ait, lingua, qua sum delusa, potestas*

*Parva tibi dabitur, vocisq; brevissimus usus.*

Itaque accisâ in poenam garrulitate, non integras ampliùs sententias, sed tantùm — in fine loquendi

*Ingeminat voces, auditaq; verba reportat.*

Inchoare enim ipsa sermonem non potest, sed extrema solum verba loquentis repetere. — Nec reticere loquenti,

*Nec prior ipsa loqui didicit.* Similis balbis, qui nec tacere valent, nec eloqui.

Hæ



Hæ fabellæ à se licet vanæ, in natura tamen rei, fundum habeat.

Non didicit Echo prior loqui, quia non est vox prima, sed tantum prioris imago. Non totam seriem sermonis, sed novissima tantum verba reddit; quia dum posteriora verba pronunciantur, circuli aëris versus loci concavum euntes, obturbant & impediunt reditum contrariorum circularum, qui referunt speciem & imaginem primi soni à loco, concavo ad auditum redeuntis. Deinde vox directa ita totum sensum aurium occupat, ut dum lingua adhuc loquitur, auris percipere nequeat primorum verborum imagines, quæ interea usque ad loquentem, luctando, & turbidè revertuntur. Hoc autem impedimentum cessat in silentio, quod subsequitur ultimam vocem. Tunc enim circuli aëris à concavitate resiliētes, nullis alijs circulis in contrariam partem tendentibus occurrunt. Hinc colliges, non omnem Echo esse tam balbam & curtæ loquacitatis, quam illam Narcissi amasiam, quam paulò antè Poëta describebat. Potest enim concavitas loci, & auditor alius à loquente, sic collocari, ut omnium vocum & syllabarum imagines ad aures illius auditoris perveniant, sine occurſu contrariorum circularum aëris; quandoquidem circuli isti contrarij ore solius loquentis vomantur; auditor autem à loquente loco diffusus, taceat.

Sicut enim pila parieti obliquè impacta, non directè redit in projicientem; ita vox & aër concavo sic obliquè illidi potest, ut Echo in latus deflexa, aliò, non ad ipsum loquentem resiliat. Ac talis Echo tam eloquens esse poterit, ut integram Ciceronis orationem recitare valeat. Nonne enim, si aliquis murus sono campanæ ita obſtet, ut eum directè nō audiamus, sed Echo ex longinquo sonitum ejus ad nos referat, totam intactam seriem, etiamsi densissimè se sequantur, exaudimus? Pone ergo jam Stentorem loco campanæ, integram Ciceronis contra Antonium Philippicam detonantem, sanè universam verbatim & syllabatim orationis seriem Echo nobis respondēbit.

Sed & talis loci fornicatio esse potest, ut ipsi etiam loquenti  
integras

Cardan.  
lib. 18.  
Subtil.

integras sententias Echo regarriat, nec circuli euntes & redeuntes ita se in medio confundant, ut priorum verborum distinctæ imagines, usque ad auditum non perveniant. Vnde nec credo Cardano existimanti *demonium*, aut *sycophantiam*, in basilica illa Papiensi respondere, *in qua adeò clarè, inquit, adeò expeditè, adeò sape ac ordine certo, voces omnes exaudiuntur.*

Illud verò in experro & vulgatum est: eandem vocem bis, ter, septies, & pluries, distinctis intervallis, à dissitis concavitatibus ad loquentem reverti. Quod facilius accidit in tubæ, campanæ, aut alio valido sonitu. Nam reflexiones ultimæ debent fieri ex longinquo. Prima enim Echo ex viciniore concavitate respondet, secunda ex remotiori, tertia adhuc ex longinquiori &c.

Phn. lib.  
36. c. 15.

Hinc porticus illa heptaphonos Olympiæ olim in admiratione fuit, sic dicta, quòd vocem unam septies redderet.

Arte etiam templa quædam, aut publicæ Scholæ sic fornicantur, ut concionatoris, aut Doctoris vox etiam exilis, per varias fornicis concavitates evoluta & multiplicata, distinctè ex spatio longinquo exaudiatur. Nam & quoties in loco clauso loquimur, imagines vocis undique à parietibus, à fornice, pavimento resiliunt, & sic confertius & impressius auditum feriunt. Vnde parietes Scholarum aulaeis vestiti, mollitiæ lanæ clamorem docentis hebetant, & templa ac domus recter dealbatæ & levigatæ vocalius resonant.

Virgil.

Nocturna etiam Echo expressior est diurnâ, *Dum tacet omnis ager, pecudes, pictæque volucres.*

Circuli deinde qui imaginem à concavo, per aërem nocturnum & frigore densatum, revehunt, placidiùs & minori intervallorum confusione, nocte redeunt; ideoque nocturna Echo, quàm diurna (ut aliquando adverti) solet esse expressior, & plures vocum syllabas respondere.

Vt etiam non ex quolibet situ, oculus imaginem vultûs in speculo aspicere valet; ita nec auris excipere imaginem reflexam soni potest. Pro ratione ergo anguli, quo sonus directus in cavitatem loci incidit, & inde reflectitur, collocari debet. Hic autem situs non consistit in puncto indivisibili;



bili; aliàs nec multi eandem Echo audire; sicut nec eundem in speculo vultum videre possent.

## ARTICVLVS X.

*Quale sit organum auditûs.*

**P**ost objectum auditûs, organum quo utitur anima in soni perceptione, enarrandum est. Maximum & ingeniosissimum naturæ miraculum, cujus fabrica studium & industriam Medicorum omnem hætenus elusit.

Mirabilissimum enim auditui organum natura in cranio capitis & ultimis aurium recessibus excidit, non Aristoteli, non Hippocrati, non Galeno, sed Medicis nuper solum per anatomiam subtiliorem cognitum; etsi tamen etiam necdum omnium partium, & meatuum officia sint in propatulo. Semper enim in istis naturæ miraculis aliquid divina sapientia sibi reservat, ne penitus cognita admirationem perdant, & ut superbia nostra obedientius in obsequium divinæ fidei intellectum suum captiver, dum tam familiaria & vicina sensibus non capit.

Certè Vesalius *callidissimum divini Opificis artificium* vocat: *Vesal. cuius fabricam satis, inquit, dilucidè in Scholis quidem commonstro,* lib. 7. c. 8. *usum autem & operandi rationem non magis, quam oculi ipsius, assequor.* Additque, *omnium ferè Musicorum instrumentorum fabrica- tionem, ex auditûs organi compage desumptam esse.* Nec satis se posse Idem lib. 7. c. 15. *mirari postea dicit, Philosophos omnes de auditu, ipsiusque obiectis tam prolixè, citra organi ipsius vel maximè superficiariam cognitionem, scribere: ex quo tamen præcipuè petenda erant demonstrationes.*

In organo ergo auditûs, primum occurrit exterior auris, figuræ concavæ, ne voces ex adverso venientes, tempora capitis inoffensæ præterlabantur, sed concavitate, exceptæ, intra primum aurium meatum refundantur.

Vnde surdastri, ut amplius soni colligant, auriculam (quod de Hadriano Imp. narrant) cavâ manu versus foramen in- flectere solent.

K k k k

Hoc

Hoc primum auris foramen aëri externo patet, & pertingit usque ad membranam, quam alij tympanum, alij melius myringem, aut meningem appellant: tympani nomen, satis aptè reservantes proximæ interiori cavitati, quæ myringe, tanquam tympani corio, obtenditur. Verùm loquamur ut plures, ut ipsam membranam, tympanum; cavitatem verò interiorē ei proximam, concham cum Iul. Casserio & alijs appellemus.

S. Basil.  
homil. 3.  
Hexam.

Aristoteles universam interiorē concavitatem, à tympano usque ad ultimam organi concamerationem, cochleam vocat, & Basilius *πόρον σκολιὸν meatum tortuosum*. Sed Anatomici hodie exactiores universam istam Aristotelis cochleam in tres sinus, nempe concham, labyrinthum, & cochleam propriè & specialiter dictam subdividunt: qui singuli sinus suas etiam adhuc particulas & nomina habent. Tympanum igitur est sepimentum, quo externa auris cavitas ab interiori sejungitur. Est verò membrana omnium quæ in corpore sunt siccissima, pellucida, & tam tenuis, ut Hippocrates telæ araneæ eam comparet. Texturâ tamen tam firmâ & compressâ, ut sine poris ullis esse videatur. Habet tamen sine dubio subtilissimos aliquos; quod satis indicat tenuis ille humor, qui per medium illud sepimentum, è cavitare auris interiori, in exteriorē transsudat; & deinde in materiam flavam, quæ auribus eximitur, concrescit. Deinde per angustissimos & invisibiles hujus membranæ poros sonus, cum aëre suo bajulo, fortasse transcribatur. Siccissima hæc membrana ideo est, non tam ad resonandum, quod Medici dicunt, quàm ad liberiorē soni & aëris trajectionem. Humida quippe poros nullos, aut humore oppleros, ideoque minimè pervios habent. Hinc quibus membrana ista humore è cerebro deciduo madefacta est, surda stri efficiuntur.

A parte interiori tympanum tenuissimo per medium nervo (ut ferè corium tympani militaris, chordâ) præcingitur; unde etiam Anatomici *chordam* appellare solent. Hujus chordæ officium est, non ut impulsâ resiliat in tympanum & sonet, ut usu venit in chorda tympani militaris, etsi quidam Medicorum id affirmant; sed potius ad tympani firmamentum, ne aëris



ne aëris externi vehementi appulsu, rumpatur aut nimis longè intra conchæ capacitatem protrudatur. Deinde ut chordula istâ malleus firmitus tympano alligetur, ut Iul. Casserio placet.

Tympano enim tria ossicula, veteribus (quod mirum) incognita, à parte interiori adhærent & concreta sunt, quæ malleum, incudem, stapedem, à similitudine istarum rerum, jam appellant. Vnde quando tympani membrana ab aëre externo sonante impellitur, unâ cum eâ malleus, incus, stapes, & chorda moventur, & intra concham inflectuntur, ac cessante impetu, rursus universa simul in locum suum pristinum restituntur.

Columbus & quidam alij existimant, cum tympanum sonitu externo impellitur, incudem malleo rundi, & sic sonare. Sed falluntur. Tria enim ista ossicula, malleus, incus, stapes, simul concreta sunt, nec avelli potest malleus, ut tundat incudem. Deinde sonus iste mallei, veluti etiam & chordæ, longè à sonitu externo discreparet, ac proinde obturbaret potius (ut tinnitus aurium solet) soni exterioris sensum. Cum tamen omnia ista organa, ex naturæ destinatione, ad sincerissimam sensibilibus externorum expressionem, sint sic fabrefacta. Quanquam tamen, etiam si ossicula chordæ, instar aranæ fili, tenuissimæ, & malleus tam exiguus tantulæ incudi affricarentur, nullus inde sensibilis sonitus exilire posset; ac proinde ad illum sonandi finem instrumenta illa inutilia forent.

Quem ergo usum tria illa ossicula tympano appensa, & tam arctè inter se concreta obtineant, hætenus ignoratum. Certum tamen est, non de nihilo esse fabricata. Imò tam necessaria esse ad sonorum modulationes, Dei sapientia existimavit, ut cum cetera humani corporis ossa cum ætate, & totius corporis mole paulatim crescant; tria tamen illa omne statim incrementum in prima pueritia rapiant, nec majora in viris, quàm in pueris cernantur.

Nam in puerulis auditus organum, sicuti reliqua sensuum organa, ait Fallopius, integerrimum est; quod probant prima, secunda, & tertia cavitas, incus, malleolus, & stapes, ossicula minima, quæ partes  
omnes

Fallop. lib. I  
c. 6. de ossib;

*omnes integerrima sunt, neque per transversum pilum in pueris unius diei distant ab iisdem in senecre decipito.*

Suspicio ergo est, speciem soni, postquam per tympanum transcribata est, per osseos mallei, incudis, stapedis poros, propter certam modulationem, oportere rursus transire. Ad hunc enim finem illa ossa foraminosa sunt. Malleus ergo, qui manubrij cuspidem, membranæ tympani inseritur, species soni in incudem, incus in stapedem, stapes in fenestram labyrinthi superiorem transfundit; unde mox transitus in cochleam. Quamquam Fallopius scribat, incudem quoque uno crure proximè adhærere tympano: unde species soni non tantum a malleo, sed etiam à tympano immediatè accipere potest, & eas unà cum malleo in stapedem trajicere. Ideo enim fortasse stapes est figuræ triangularis (quemadmodum stapedes equestres olim solent;) ut nempe per utrumque trianguli sui latus, tanquam gemino canali, & à malleo & ab incude imagines soni excipiat, & per trianguli basim, quæ fenestram labyrinthi claudit, transmittat in labyrinthi concavitatem.

Moventur autem illa officula unà cum tympano, ut soni propagationem veluti ventulo quodam adjuvent, quo aërem innatum, intra proximam cavitationem inclusum impellunt, & versus ultimam cochleæ officinam, ubi sensus auditus residere putatur, undare faciant.

Prima ergo post tympanum interior cavitas est concha, plena aëre innato (alij insitum aut vernaculum appellant) quo eodem aëre sequentes duæ concavitates, labyrinthus, & cochlea, ac omnes universim earum cuniculi, ac sinuosæ ambages oppletæ sunt. Omnia enim hæc, sine ullius sepimenti discerniculo, inter se pervia sunt.

A concha quippe, per duas angustas fenestras, ad labyrinthum transitus est. Major è duabus fenestris ovalis vocatur, & basi stapedis occluditur; minor rotunda, & semper aperta est. Meatus isti in unum ampliorem concurrunt, & tandem in labyrinthi aream se explicant.

Plurimi cuniculi à labyrintho excurrunt, & in eundem, per multos gyros & amfractus, tandem iterum recurrunt.

Quia



Quia enim inter labyrinthum & cochleam distantia tam brevis est, cuniculi & ambages illæ in latera excurrere, flecti & reflecti, ac per mæandros circumduci debuerunt, ut spatio voces elaborarentur, antequam cochleæ, id est principi auditûs organo infunderentur.

Hunc enim etiam alibi morem natura observare solet. Ut semen, lac, spiritum animale &c. in plexibus quibusdam innumerabilium venularum præparat, priusquam materia ad principalem officinam perveniat, ubi ultima forma ei datur. Et quid aliud etiam sunt tunicæ, & humores tam multiplices oculorum, quàm officinæ in quibus frangitur, refringitur, & tornatur quodammodo ruditas speciei visibilis, antequam in fundum oculi penetret, ubi in tunicâ retiformi, figura ejus consummatur? In quo etiam mirabile istud divinæ sapientiæ apparet artificium: quòd tot vicibus species illa in tunicis & humoribus oculi frangatur, ac deinde, per angustias foraminis uveæ, per quas interius oculi conclave intrat, sic debilitetur, ut à pariete retinæ, tanquam à speculo reflecti retrò non valeat; ne nimio lumine interiorem illam cameram perfundens, visionem confundat. Vnde instar coloris, penicillo pictoris depicti, in superficie retinæ apparet, eodem modo, quo radius luminis, aut coloris, in cubiculum obscuratum, per angustum foramen admissus, in chartâ foramini oppansâ depingitur. Vnde si loco chartæ, speculum ponas, nullam imaginem rerum reddet, quarum picturæ antea in charta viscebantur, sed tenues tantum colorum umbras, in summa speculi superficie nantes, per species, ut vocant, secundarias, inde ad oculos spectantis redeunt, videbis. Quod aliquando sum impensè miratus. Nec miraculi causa alia mihi nunc occurrit, quàm ista ab Arabe Alhazeno suggesta: *Debilitatur color per elongationem, per reflexionem, per foramen, per quod intrat. Quod autem foramen, inquit, debilitet, planum fit per hoc: quia lux apparet major post foramen magnum, quàm post parvum. Pari modo, cum foramina stricta sunt, color post reflexionem aut nullus apparebit, aut valde modicus. Hoc, cum de visu tractarem, me effugerat, & ideo huc retrahere volui.*

Alhaz. lib.  
2. prop. 195

Simili igitur fermè modo, soni species per tot itinerum flexus, & labyrinthi cuniculos, gylando & regylando fessæ, fractæ, ac modulatæ, ad ultimam cochleæ concavitatem tam molliter appellant, ut nulla insignis Echo (nisi validissimus sit sonitus) à cavitare illa resiliat, quæ audiendi actionem obturbet.

Cochleam autem istam, sive ultimum & penitissimum organi auditûs sinum, Vesalius buccinosum antrum vocat; quia instar buccinæ, seu cochleæ marinæ, contortum & turbinatum est. Hanc enim figuram ad excipiendos exiguos & insensibiles etiam sonitus, in unumque plenior sonum convolvendos, aptissimam esse quidam inde probant; quia si quis buccinam marinam auriculæ apponat, miros susurros & tinnitus ex illa cavitare reflecti audiet.

## ARTICVLVS X.

*In qua parte organi auditûs, sonus audiatur.*

Valles. lib.  
2. c. 27. Con-  
trov.  
Vesal. lib. 1.  
c. 8. Fabric.

**V**Allesius, & eum secuti Conimbricenses tribuunt Vesalio, quod ei in mentem non venit. Dicunt enim eum sentire, primum auditûs organum esse ossicula illa duo, malleum & incudem, appensa tympano. Sed legat quilibet Vesalius; id non sentit. Nimis enim apertum est, illam duorum, imò trium ossiculorum compagem, non ad auditionem soni, sed ad præparationem solum quandam & modulationem speciei audibilis, & trajectionem ad ulterius ganum, fabricatam esse.

Arist. lib. 2.  
c. 8. de anima.

Aristoteles verò passim existimatur censuisse τὸν ἀέρα συμφύον *airērem congenitum*, sive implantatum, princeps esse auditûs organum, & ibi ab anima sensitiva sonos audiri. Nam alicubi ait, *Aërem congenitum ideo immobilem esse, ut omnes differentias motûs valeret sentire.*

Hanc ergo Aristoteli sententiam tribuunt & sequuntur Simplicius, Toletus, Conimbricenses, ex Medicis Vallesius, & quidam alij.

Sed



Sed Iul. Casserius negat eam Aristoteli mentem esse. Et profectò aliud est, *motus differentias*, aliud sonorum differentias, *sentire*. Aër enim congenitus vel metaphoricè dicitur motuum externi aëris differentias sentire, quia motibus illis concutitur & inhorrescit; vel certè causaliter, quia est proxima causa, quæ speciem soni, potentiæ sensitivæ ad audiendum tradit. Est quippe aër ille medium internum, contiguum organo in quo potentia residet. Quod verò aër iste sit pars animata viventis nullibi dicit Philosophus; imò hoc pugnat cum philosophia, quâ ipse sanguinem, lac, semen, spiritus vitales, animales, formâ totius viventis animari negat. Et sanè si animatus esset, non aër, sed spiritus potius sensitivus, aut quid simile, appellari deberet.

Deinde in conchæ, labyrinthi, & cochleæ concavitatibus, continetur, ut externus aër aut aqua in vase; neque cum partibus viventis est continuus.

Denique aër externus, per foramen quoddam ab oris palato in concavitatem conchæ, proximam tympano, pertingens, cum aëre illo interno communicat, eum destillationibus cerebri gravatum expurgat, & deficientem instaurat. Et hujus foraminis ab ore ad interiorum concavitatem organi auditûs, præter Anatomicorum fidem, manifestum experimentum est in surdastris, quibus tympani membrana, cerebri defluxione obtusa & hebetata est. Nam cum audire volunt, hiant ore sonos excipiunt. Deinde si quis obturatis auribus, extremum instrumenti Musici mordicus teneat, pulsus & sonitus omnes exactissimè percipit: non auribus, sed per canalem illum, qui à superiori concavatione oris ad organum auditûs pertinet, aëremque externum cum aëre congenito miscet. Eadem, ut existimo, de causâ venatores spiritum continent, ut acutiùs audiant, sicut narrat Aristoteles; qui veram tamen ejus rei causam non attigit.

Non est ergo aër iste congenitus pars animata viventis, sed aër quidam purior, quem ad excipiendas sonorum species & proximè in sensorium auditûs trajiciendas, natura ibi conservat. Vnde cum Aristoteles ait, τὸ τῆς ἀκοῆς ἀποτύπνον, *ἀέρος*

Arist. sect.  
II. Probl.

Arist. lib. 2.  
c. 10. de  
partib.

ἀέρος ἔναι φάμεν, *sensorium auditûs*, aëris esse fatemur, non aliud opinor, vult, quàm sensorium auditûs uti isto aëre interno, tanquam proximo & individuo ministro, qui speciem soni ei præparet, & ita moduletur, sicuti activitas potentiae audiendi exigit. Simili modo, sensorium visûs, esse aquæ, vel aqueum Aristoteles dicit, quia oculorum humores aquei, speciem visibilem refringunt & modulantur, sicut potentia videndi (quæ aut in pupilla, aut in tunica retiformi sedem habet) efflagitat. Vnde verba ista Aristotelis, quibus probat animal non in omni sua parte audire, οὐ γὰρ πάντῃ ἔχει αἶρα τὸ κινησόμενον μέρος καὶ ἑμψυχόν, ὥσπερ ἡ κόρη τὸ ὕγρον: non sicut quidam sententiam istam obscurantes, aut in contrarium trahentes, sed sic verti debent: *Quia non ubique habet aërem pars illa quæ movenda animataque est, quemadmodum pupilla humidum.* Vbi satis aperte dicit, partem aliquam animatam distinctam ab aëre, debere moveri ab aëre congenito, quem pars illa animata habet sibi ministrantem; quemadmodum pupilla habet oculi humidum.

Arist. lib. 2.  
c. 8. de  
anima.

Pars igitur illa viventis animata, non autem aër congenitus, princeps auditûs organum erit. Quænam verò illa pars est? Quam definit Galenus, nempe extremum auditorij nervi, qui ex quinta nervorum conjugatione, concavo organi auditûs illabens, in ultimo cochleæ recessu se dilatat, & ossis concavitatem vestit. In extremum enim illum cochleæ sinum species omnes soni, per tot labyrinthos antea transcribratæ, tandem coeunt & colliguntur; perinde fermè ac species colorum, ubi per tunicas & humores oculorum versus perpendicularem fractæ & modulatæ fuerint, in tunicam retiformem appellant, & eam imagine rei externæ depingunt. Vnde veluti principale organum visûs in tunica retiformi probabilissimè hodie statuitur; ita organum auditûs in tunica nervi auditorij, quæ in concavum & extremum cochleæ fornicem spargitur, & eum vestit. Ut non de nihilo dixerit Galenus, extremum illud auditorij nervi, cochleam vestiens, esse in organo auditûs quod crystallus in oculo. In crystalloide enim visionem fieri existimabat.

Galen. lib. 1.  
de sympt.  
caus.

Deinde



Deinde tympanum, malleus, incus, stapes, concha, fenestræ, labyrinthus, cum omnibus suis cuniculorum gyris & mæandris, præstare cochleæ & potentiæ audiendi, quod tunica cornea, aranea, humor aqueus crystalloidi: vel (in sententia jam veriori) quod cornea, aranea, humor aqueus, crystallinus, vitreus præstant tunicæ retiformi. Omnia quippe ista in ministerio principalis organi sunt, & species ab objectis externis immittas, ad animæ potentiā, certo modo fractas, & ut ita dicam, commolitas & cribratas transmittunt.

## ARTICVLVS XII.

*Quomodo potentia audiendi sonum percipiat.*

**S**ed difficultas sat grandis est, qua ratione nervus ille auditorius in ultimo sinu & concavitate cochleæ expansus, sonum audire valeat, cum speciem soni non in se recipiat. Solus enim aër, aqua, & id genus fluida corpora, sunt capacia soni, & speciei sonabilis.

Hæc fuit causa præcipua, cur tot Philosophi, & Medici in aëre congenito, non in parte auris solida, facultatem audiendi collocarint.

Verum aër iste non est animatus, sed ejusdem naturæ cum aëre externo elementari, ut paulò antè diximus.

Valles. lib.  
2. c. 27.  
Contrôv.

Vallesius autem non in aëre intra cavitatem cochleæ concluso, sed in spiritu animali, in auditorij nervi poris contento, potentiā audiendi residere credit. Ille enim spiritus rarus & fluens est, & perinde ac aër, soni & specierum ejus capax.

Sed iterum longè probabilius est, spiritum animale carere informante animâ. Deinde spiritus ille est instrumentum animæ universale ad omnium sensuum operationes, nec magis est peculiare organo auditûs, quàm organo visûs, olfactûs &c.

Itaque alterutrum dicendum est. Aut species soni in superficiem corporum solidorum etiam recipi, & tunicæ à nervo auditorio expansæ reverâ inhærere: aut certè in aëre tantum cum organo auditûs contiguo hærare; & hoc ad soni per speciem

speciem repræsentati cognitionem sensitivam sufficere. Nam etiam valdè incertum est, an species coloris & lucis, ut antea differebamus, in ipsa superficie organi visûs, sive tunicæ retiformis, tanquam subiecto inhæreant; an tantùm in pellucido humore vitreo, illi tunicæ contiguo.

Iuxta enim modum visionis, quem ex S. Augustini doctrinâ superius construximus, facilè intelligi potest, non esse necesse ad concursum speciei cum potentia, ut species ipsi potentia, aut proximo potentia organo inhæreat; sed satis esse, ut in proximo & contiguo corpore insit. Vnde potentia audiendi in concavo cochleæ residens, potest uti specie soni sibi proximâ & contiguâ, quæ aëri congenito inest; quia potentia per cognitionem suam potest sic in illam speciem ferri, ut ipsam sentiat, & eâ mediante sonum ipsum qui foris est, si adhuc est superstes.

Deinde licet species soni non esset medium cognitum, sed solum determinando, aut physicè coëfficiendo juvaret (quod plures hodie sentiunt;) posset tamen concurrere cum potentia; quia extrema corporis concavi & convexi, juxta philosophiam Aristotelis, sunt sibi tam vicina, ut etiam sint simul.

Vnde species soni, quæ usque ad ultimam superficiem convexam aëris congeniti, intra postremum aurium recessum pertingit, contigua & simul est cum potentia auditiva, quæ in concavo illius recessûs sedem habet.

Sicut ergo facultas vitalis chylica utitur calore naturali ventriculi, qui non ipsi facultati ut subiecto, sed materia primæ ventriculi inhæret; ita nihil est causæ, cur facultas audiendi, specie soni, quæ non auditivæ facultati, sed aëri proximè contiguo inhæreat, in vitali actione qua sonum percipit, neque uti.

Opinio enim, quæ jam invaluit: quòd species sensibilis debeat in potentiam sensitivam, tanquam proximum subiectum recipi, valde incerta, & meo animo, falsa est. Nam sicut species visibilis, audibilis &c. per materiam primam aëris extenduntur; ita cum ad organum potentiæ pervenerint,

non



non potentiam ipsam ut subiectum occupant; sed in materia prima organi, tanquam proximo subiecto, remanent: aut etiam in corpore proximè contiguo; si materia organi careat eâ dispositione, quæ necessaria est ad talis speciei receptionem.

Quod in tactu certius est, si verum est quod quidam affirmant; calorem non percipi tactu per speciem tangibilem à se distinctam, sed immediatè per seipsum. Certè enim calor non recipitur in ipsum tangendi sensum, sed in materiam primam partis viventis; aut fortè tantum in materiam proximè corporis: si non errat illa Philosophia quæ docet, frigus nivis manu apprehensè, tactu percipi, non autem solum aliud frigus, quod à nive in manu productum est.

Non igitur, quia species dicitur semen objecti, potentia verò quasi uterus (quæ duæ causæ suas activitates, ad formandum conceptum sensitivum, simul miscent) ideo species debet proximè in potentiam recipi, sicut semen animalis in utero. Nam species est solum metaphoricum semen, & potentia metaphoricus uterus, quæ non omnem cum proprio semine & utero similitudinem observare debent. Sufficit ergo, speciem oportere jungi potentiæ, ut conceptus sensitivus inde nascatur; licet alio longè modo, quàm verum semen & verus uterus, conjungantur. Nam uterus recipit semen ut locus locatum; quomodo nemo dicit speciem recipi in potentiam sensitivam.

Quà autem ratione, illicò à perceptione soni, per nervum auditorium, species ipsa soni, aut ipsius sensitivæ cognitionis imago ad cerebrum & sensum communem trajiciatur, postea meditandum erit.

Hoc etiam fermè me fugerat. Sonum quemlibet, non auditione instantaneâ, sed successivè percipi. Auditur enim, prout ad organum appellit; appellit autem, ut puto, successivè. Nam sonus est tam ens successivum, quàm fractio aëris, ex cuius quasi vulnere emicat sonus. Magis enim Aristot. & Vasquius hoc credo, quàm Io. Preposito, & quibusdam alijs Theologis, qui volunt sonum totum simul produci, in instanti ultimo

Vasq. 3. p. d.  
132. c. 4.  
n. 64.

fractionem aëris, qua excitatur sonitus, terminante.

Sed cum fractio illa sit motus successivus, & sit causa soni, si non propriè & physicè efficiens, saltem occasionalis; rationem non video, quare per totum fractionis tempus, à principio ad finem, alius & alius numero non fiat & effluat sonus. Nec reliquiæ soni quæ in campana quiescente, post validum pulsus, adhuc audiri solent, sunt antiqui soni veluti fragmina adhuc durantia; sed novelli quidam & obscuriores tinnitus, geniti ex iteratâ allissione aëris externi ad concavum campanæ; aut fortè partim etiam aëris interni, qui intra tenues aëris campani poros meatusque deprehensus est, & adhuc fluctuat. Vnde reliquiæ illæ tinnitus, per novas & successivas aëris undationes ( ut experimur ) ad auditum appellant.

## CAPUT V.

### De olfactu.

**P**ost visum & auditum, ordine dignitatis, & percipiendi longinquitate; sequitur olfactus. Extra enim organi sui ambitum se exerit, etsi brevius excurrat, quam visus, vel auditus. Gustus verò & tactus objecta sua è proximo tantum, & velut in sinu suo contrectant; ideoque magis materiales, tardi, ac crassi existimantur. Quanquam S. Augustinus olfactum etiam sensibus istis corpulentioribus & quodammodo crassioribus, qui non se foras projiciunt, sed interiùs quod ad eos pertinet agunt, accenseat; quia tantula est distantia unde olfactus objectum suum attingit, ut vix ultra cuspidem nasi videatur se foras projicere.

S. Aug. lib. 4  
c. 14. contra  
Jul.

## ARTICULVS I.

### Quid odor.

**O**bjectum proprium olfactus est odor. Quem veteres Philosophi & Medici κατὰ τὴν ἀναθυμίασιν *fumidam exhalationem* esse definiunt. Sensu ramen nimis pingui. Non enim quælibet exhalatio est odorifera, sed quæ certâ quali-

Art. c. 5.  
de sensu.



qualitate, movente olfactum affecta est. Ipsa igitur qualitas potius odor, quam exhalatio eam vehens, appellari debet. Improperie ergo loquuntur, qui coquos pasci odoribus, Democritum vitam aliquandiu odore recentis panis tolerasse, populos Indiæ Astomos *odore florum & pomorum, quem naribus trahant*, vivere dicunt. Non enim odor, sed exhalatio, quæ est vehiculum odoris, eos pascit. Veluti tabacolibulos fumus, non nidor tabaci reficit. Quanquam non existimem cuiquam hominum, ad longiusculam præsertim vitam, tam spiritale alimentum sufficere. Nam non solo halitu thymi, sed *thymo pascuntur apes, & rore cicada*; & thymi succus, ac ros pinguius aliquid est, quam macri illi & spiritales florum halitus, quibus pasci dicuntur Astomorum populi. Et tamen homines firmiori aliquo cibo indigent, quam apes & cicadæ.

Est autem odor qualitas secunda, olfactum movens ex certa primarum permixtione resultans, in qua siccitas dominatur humido. Dominatur autem eo excessu, quem Dei sapientia novit necessariam esse ad ejusmodi qualitatis resultantiam. Hinc elementa pura *doqua inodora* sunt, ait Aristoteles; ita *metalla & lapides*, quia non eam qualitatum primarum mixturam habent, quam natura ad generationem odoris flagitat. Quia verò siccitas mater odoris, non cujuscunque modi est, sed qualis ex calore multo humidum concoquente & rarefaciente provenit; ideo exhalatio quædam fumida, rara, ac levis est potissimum subiectum odoris. Naturâ & Deo sic providente, quoniam qualitas illa non nisi ex spatio proximo speciem sui diffundit; ideoque aliquo exhalationis vehiculo, in pares, ubi sensorium olfactus est, eam subvehente & organo suo admovente, indiguit. Vnde quæ parum exhalant, minùs odorata sunt; ut inter vina, dulce & crassum remissiùs, quam acre & tenue, fragrant.

Siccitatem verò esse præcipuè genitricem, & velut limam odoris, inde faciliè intelligitur: quòd regiones calidæ & siccæ, quales Syria & Arabia, inquit Aristoteles, odoratiores, & *hortensium odoratissima sent quæ sicca, ut ruta, menta, apium, & quæ in siccis nascuntur*, ait Plinius. Vnde & *quædam non nisi usta, sicut*

Arist. sect.  
12. Probl.  
Plin. lib. 21.  
c. 7.

*thura, myrraque, olent. Odoratiores quoque fieri arborum fructus, qui Aquiloni, sicco axi, obvertuntur, credidit Democritus.*

Exhalationem tamen non nimis siccam & tenuem esse, sed aliquâ humoris miscelâ temperari & pinguescere oportet, ne subtilitate nimia odor discingatur & vanescat. Hinc omnis odor verno tempore & horis matutinis acrior; cum verò dies ad meridianas horas propinquat, hebetatur, ut observat Plinius. Certè ego etiam horminium, sive scharleam vesperi, cum rores æstate refluere incipiunt, acerrimum, & longissimè odorem spargere non semel sensi. Iridem quoque arbores quibus incubuerit, odoratiores reddere in confesso est: non quia lumen ipsius arcûs id faciat, sed quia vapor roridus cui inhæret arcus, florum & plantarum siccitati superfusus, odores incitat. Defectu quoque humoris, ligni odorati cineres sunt inodori.

Quando verò corpus idem sapidum & odoratum est, ex partibus heterogeneis compactum esse oportet. In siccis enim & spiritalibus odor, in humidis & crassioribus sapor inest.

Arist. lib. 2.  
c. 9. de anima.

Hinc illud Aristotelis, *Odor est sicci, sicut sapor humidi.*

Inter odores quidam alimentarij, qui alimentum corpori amabile significant, & orexin excitant; alij naribus tantum blandiuntur, ut moschi, ambrae, rosarum, quas nemo famelicus ori ingerit & deglutire parat, etsi fragrantiam olfactu probet.

Plutar. lib.  
de Osir.

Ejusmodi autem odores, etsi nec ventriculo orexin, nec linguæ salivam moveant, cerebrum tamen exhilarant & juvant. Vnde Aristoteles scribit, inquit Plutarchus, *Aromaticum, florum, & pratorum suavem odorem, non minus voluptati, quam cerebri & corporis salubritati conducere. Nam calore & suavitate sua frigidam & humidam cerebri complexionem calefactant & temperant.*

Scalig.  
Exerc. 297.

Hinc omnium sensuum primarios fines recensens Iul. Scaliger: *Odoratus, inquit, ad juvandum cerebrum, spiritusq; in eo reficiendos. Auditus ad disciplinam, & societatis communionem. Tactus ad corpus forinsecus. Gustus ad corpus intus. Visus propter animam primo, ad inventionem.*

Licet



Licet autem halitibus odoriferis, spiritus animales cerebri recreentur, & spiritibus istis halitus in partem pabuli cedant, ut Medici testantur; nimij tamen & conferti odores cerebrum vertigine perturbant, aut gravedine opplent. *Incundissimi odoris Cydonia*, ait Scaliger, *ciunt vertigines quibusdam. Affinis nostra, virgo quaedam pulcherrima atque nobilissima, solo conspectu lilij, panè decors fit; peritura, si naribus hauserit.* Cameli etiam & jumenta Arabiæ & Orientis, aromatis onusta, odore caput invadente, quandoque aguntur in rabiem; aut ficuum halitu oppressa deficiunt.

Idem  
Exerc. 142.

Capellanus quidam noster nuper Anno 1642. in Ecclesia Collegiata B. Petri Lovanij, inter Missam suam, subito animi deliquio concidit, quia miles Hispanus moscho perfusus ei ministrabat; cujus odore à mente primùm alienatus, deinde vini odore paulisper recreatus, contractâ tamen inde feбри, paulo post est extinctus.

Attamen illud velut *Maxima quaedam tenendum est*, ait doctissimus Medicus Andr. Laurentius, *Res omnes aromaticas, odoratas, fragantes senibus in universum vehementer conducere.*

And. Laurent.  
lib. de  
senect.  
c. ult.

Antiqui Græci in symposijs suis, coronas odoríferas capitibus imponebant, & maximè myrteas, aut è rosis plexas. Nam *myrtea vini vapores astringit; è rosis conserta refrigerat, & gravedinem capitis lenit*, ait Athenæus. Hederacea quoque in usu, & quidem præcipuo fuit: quia astringendi virtute etiam pollet, & *citra odoris gravitatem refrigerat*, ait idem, *ac facie non inveniusta, corymbis & folijs virentibus frontem opacat.* Ideo illa dedicata est Baccho, qui potum invenerit, & malis inde nascentibus occurrat.

Athenæ.  
lib. 15.

Igitur Dandino minimè assentior, qui halitus odoríferos, in ventriculos cerebri penetrare negat, nullo, inquit, à naribus edusque perforato meatu. Magis Falckenburgio, & Medicis acquiesco. *Fumo tabaci*, inquit ille, *è naribus ad papillares processus datur aditus, per quos deinde in nervorum odoratoriorum manifestam penetrat fistulositatem.* Quomodo deinde Doctor Pauvius in Hollandia, referente in Tabacologia sua Neandro, juvenem secuit, cuius cerebrum planè obsitum erat atris fuliginibus, ob nimiam tabacarij fumi intemperantiam, si nihil per nares

Hierony.  
Dandinus  
lib. 2. digress.  
52.  
de Anima.  
Falckenb.  
Epist. ad  
Neandr.  
Tabacolog.

nares eat in cerebrum? Quomodo in altero, eadem de causâ, ne quidem vestigia reperta mamillarium processuum? Sed de his satis.

Ceterum odorum paucas differentias novimus, quia homini olfactus hebes est, ob frigus & humiditatem cerebri, quæ in organum olfactûs ferè semper aliquid destillat. Vnde per analogiam ad sapores, de odoribus philosophamur, & nominibus saporum odores nuncupamus, ut Aristoteles advertit: Extremos quippe odores, dulcem & amarum, medios acrem & pinguem &c vocamus. *Nam plerique odores similiter saporibus nos afficiunt*, inquit Galenus. *Siquidem acida omnia, & præcipuè acetum, similiter odoratum gustumq; movent. Tum acria quoque, veluti allia, cepa, & ipsa non minùs quàm gustum, odoratum offendunt.*

Galen. lib. 5  
c. 21. de  
simpl. fac-  
cult.

Arist. probl.  
sect. 13.

Odorata in cibo assumpta, & maxime allia, movere urinam dicit Aristoteles; quia calore suo tenuant, & colliquant, spirituque suo premunt, & evacuationem urgent.

## ARTICVLVS II.

*An odor per species ab olfactu percipiatur.*

**V**identur species sensibiles odoris esse superflua. Spiritus enim odoriferi qui rebus odoratis exhalant, usque in nares & organum ipsum olfactûs penetrant: quid ergo opus speciebus, ubi objectum præsens adest, & in seipso immediatè cognosci potest?

Et sic sanè Galeni ( Hippocratisque & Platonis, quorum Placita Galenus ibi enarrat ) opinio esse videtur, qui solum visum distantia videre credit; ceteros verò sensus, nil nisi objecta sua proximè sibi admotâ, & attrigua percipere. *Vi gustus, atque alij sensus fiant*, inquit, *opus est, ut ad animantis corpus perveniat ipsum sensibile. Visus autem per medium aërem ad coloratum extenditur.*

Galen. lib. 7  
de Placit.  
Hippocr.

Olfactus igitur, ejus mente, non nisi odorem fumidæ exhalationis sibi proximè admotum olfacit; sicut nec auditus alium sonum audit, quàm eum qui organum auditûs immediatè impellit.

Aristo-



Aristoteles tamen species quasdam odorabiles ab odore, velut à colore species visibiles, censet per aërem spargi. Nam si aliquid per expirationem semper à corporibus odoratis delibaretur, Idem ibid. minora certè, inquit, ob eam rem, effici oporteret. Nunc autem, quæ odoratissima sunt, hac potissimum eadem videmus permanere.

Deinde quidam experimento didicisse se dicunt, species odoris à speculis concavis, veluti species visibiles, reflecti; ideoque rosas tali speculo oppositas, confertius & longius odorem respergere. Quanquam hoc argumentum non valide premat. Nam non ineptè responderi potest: spiritus rosarum tenuissimos hanc illac expirantes, irrequietâ suâ levitate partim, partim aëris insensibili fluctuatione, in speculi superficiem impingere, & inde locali motu versus nares nostras reflecti. Sic enim à simili concavo speculo, frigidula quædam nivis exhalatio reverberatur, si niveus globus ante speculi superficiem teneatur. Sed alterum, quod subijcio argumentum non tam facile potest eludi.

Theologi non pauci corpora Beatorum (sive per suam temperiem, sive per aliquod velut incorruptibile balsamum, meatibus ipsorum insulum) suavissimum odorem, ad delicias & quandam beatitudinem olfactus, expiratura credunt: & tamen corpora illa, ut pote incorruptibilia, nullam odoriferam exhalationem expirabunt; quia ejus resolutio per alicujus partis detrectationem corruptionemque fieri deberet. Odor igitur illorum corporum species intentionales solum mittet, sicut lux radios luminis, sine ulla corporali exhalatione, quæ usque ad nares olfacientium, odorem vehat.

Deinde pisces intra aquam, escas odorantur, ut fatetur Aristoteles; & de delphino Plinius: *Delphini olfactus vestigia non habent, cum olfaciant sagacissime.* Nectamen gelidæ & humidæ piscium escæ, ullam fumidam exhalationem per aquam spargere videntur, quæ odorem naribus, aut organis quibus olfaciunt pisces, invehere possit. Igitur escæ illæ aquaticæ, actione tantum intentionali videntur olfactum piscium immutare.

Denique, ut postea dicemus, species odoris re verâ est odor quidam tenuis, ejusdem naturæ cum odore, qui ex certa

qualitatum primarum temperie resultat. Odor autem moschi, rosæ, pomi &c. videtur posse in aliquo subiecto produci, ubi nulli spiritus odoriferi, nec ulla temperies talis, ex qua odor vel in rosâ, vel in pomo resultare solet.

S. Ber. ser.  
1. post  
Ephiphan.

*Nonne enim*, inquit S. Bernardus, *qui pomum in manu sua tenuerit dimidia die, reliqua diei parte pomi servabit odorem?* Et odor iste manet sæpe, etiamsi manus quis abstergat, aut laver: unde non in spiritibus manui adhærentibus, sed in ipsa carne manûs videtur inhaerere.

S. Tho. in  
2. d. 2. q. 2.  
a. 2.

Atque hoc de speciei odorabilis propagatione, sine habitu comitante, sentit S. Thomas. Nam *quadam sensibilia inquit, deferuntur ad sensum secundum esse spiritale tantum; sicut species colorum. Quadam contingunt organum secundum esse inum materiale, sicut in gustu, & tactu. Quadam deferuntur utroque modo; sicut species odorum, cum permixtione fumalis evaporationis; quæ tamen species extenduntur ultra fumalem evaporationem. Et similiter est de sono, & medij motu.*

Igitur existimat corpore odorifero fumalem quandam evaporationem plerumque resolvi, ac per aërem locali motu dispergi: attamen postquam se movere & diffundere cessaverit, posse jam ex isto loco species odorabiles, spiritali tantum diffusionem, ulterius propagari.

*Spiritalem* autem diffusionem vocat S. Thomas, quando solæ species odoris propagantur, non comitante odore ipso cum subiecto suo, talibus qualitatibus primis aut secundis temperato, ex quibus odor naturaliter & permanenter resultat.

Propter illam igitur evaporationem, necesse est corpora odorata aliquantum erogari ac diminui. Hinc enim odoratos arborum fructus, ut pomorum omne genus, spatio temporis contrahi & corrugari videmus. Quia tamen moschus, & quædam ejusmodi, quæ a terrimo odore nares feriunt, non videntur notabili decremento molem suam expirare; idcirco fortè Aristoteles (quem paulò ante audiebamus) dixit, *ea quæ odoratissima sunt, potissimum eadem videri, & in sua mole perdurare.* Indeque probat, talium corporum odores, per nudas species odorabiles, sine ullâ, aut certè cum minimâ exhalatione



latione substantiæ, ab olfactu distant sentiri. Quod maximè videtur verum, quando corpora odorifera, solida & astricta denitatis sunt (quales ligna, & lapides odorati) à quibus non facile quidquam, nisi per causas vehementes, decerpi, aut delibari potest.

Licet autem ista vera esse negare nolum, species tamen odoris, non longo spatio ultra exhalationis terminos, posse promoveri existimo. Odoris enim virtus ad species illas effundendas, languida, & intra brevem admodum activitatis sphaeram restricta est.

Vnde experimentum istud Buridani, quo probat speciem odoris sat longè per aërem, quò non pervenit exhalatio, trajici: *Quia combustio modici pergameni, vel sulphuris, inquit, replet totam domum odore; quamvis non ubique per domum expandat se fumus illius: ergo aliter quàm cum fumo multiplicat se odor per medium: non valde æstimo.* Io. Buridan.  
lib. 2. q. 22.  
de anima,

Nam profectò fumus modici etiam titionis per totum cubiculi aërem ita se diffundit, ut ubique non solum nidorem, sed etiam de suâ substantiâ nebulam faciat. Nonne etiam modicum vini, aut mellis totam aquæ lagenam sapore suo aspergit? Et tamen sapor iste non per species, per aquam tanquam per medium, trajectas, sentitur; sed particula aliqua mellis usque ad contactum linguæ venit, ut Aristoteles ipse docet. Arist. lib. 2.  
c. 10. de  
anima, Vnde necesse est, ut substantia mellis, aut spiritus ejus per universam aquam diffundatur.

Hinc ergo si verum quod quidam narrant, vultures per quingenta millia passuum ( id est, centum milliaria Germanica ) odorem cadaverum aliquando perceperint; longè profectò abest, ut species odoris per tantam spatij longitudinem valuerint trajici; sed vento secundo, cadaverum exhalationes edusque fuerint perlatæ. Sed fabulam esse puto. Statim enim atq; Historicus aliquis temerè sæpe, nec tam ad fidem, quàm admirationem legentium, simile quid effutijt, credula Philosophorum natio hoc arripit, ut in eo ingenium exerceat; quia rebus falsissimis verisimilitudinem conciliaffe, ad gloriam subtilitatis sæpe plus valet, quàm quod verum est demonstrasse.

Plin. 10.  
c. 9.

Aut si hoc de vulturum olfactu, & speciebus odoris ad centum milliaria Germanica trajectis, credis; hoc etiam de iisdem, Plinio poteris accredere: *Triduo antè, aut biduo volare vultures, ubi cadavera futura sunt.* Vbi ecce, non tantum sagaces vultures, sed etiam prophetas, facit: qui viventium futura cadavera norint olfacere. Nisi tamen quandoque exercituum fortè agmina in pugnam & cædem hominum equorumque, ac avium rapacium prædam, concurrissè, ex sublimi viderint, & ex tali memoriâ, agmina militaria postea comitati fuerint, spe similis prædæ.

S. Aug. lib.  
2. c. 8. de  
libero arb.

Natura autem tam brevem activitatis sphaeram per quam diffunderet species, odori circumscripsit, ut ipsemet odor exhalatione suâ vectus, organo odoratus, ac deinde cerebro invheretur; in cuius temperiem, & spiritus animalis suave & salubre pabulum, ut antè diximus, cederet. Si enim ex longinquo, ut lux & color, percipi & delectare odor valeret; homines & animalia fumidas illas alimentorum, florum, aromatum, & infinitarum rerum exhalationes naribus attrahere non curarent; quarum tamen tepore & siccitate, cerebro maximè humano; natura mater mederi voluit.

Hinc S. Augustinus odoratum & gustum, in hoc à visu & auditu differre dicit: quod plures homines eundem colorem simul videre, & sonum eundem simul audire possint; non autem odorem, aut saporem eundem simul percipere. *Nam etsi eundem aërem naribus ambo, inquit, trahimus, aut unum cibum gustando capimus; non tamen eam partem aëris duco, quam tu, nec eandem partem cibi sumo, quam tu, sed aliam ego, aliam tu.*

Igitur, sicuti ex eadem paropside comedentes, quisque particulam suam cibi, ori ingestam gustat, & non particulam alterius; ita duo communem aërem, & odoriferam exhalationem in eo natantem, sic naribus attrahunt, ut unusquisque partem suam inde decerpat, eamque organo olfactus vel proximè apprimat, vel saltem ex propinquo, nec extra nasi ferè circumferentiam, odorem ejus percipiat. Hinc canes, ut herilem, aut quemlibet alium odorentur odorem, continuo olfactant, & aërem spiritumque odoriferum intra nares prolestant.

Nolim



Nolim tamen pertinaciter negare, duos natos sibi vicinos, posse simul eundem odorem exhalationis in aëre, extra utriusque nasi circumferentiam pendulæ, olfactu percipere: quia incompertum est nobis, ad quantulam distantiam odor ultra illam suam exhalationem, speciem odorabilem ejaculari valeat.

An autem species ista odorabilis in instanti, ut species visibilis; an successivè, ut species soni, per medium trajiciatur, nondum liquet. Nam licet odorem thuris, & incensi v.g. cujus in Ecclesia usus, non percipiamus statim ubi fumum thuribuli ascendentem videmus; inde tantum colligi potest, exhalationem ipsam fumidam, & spiritus qui eâ exhalant, successivo motu per aërem versus nos dispergi: an verò, ubi nares nostras subierit, aut in proximo constitit, speciem odorabilem in instanti, an tempore ultra illud spatium mittat, ad quod motu locali pervenit; est quod dubitem. Nam quod species soni successivè trajiciatur, fit, quia tremor & vibratio quædam aëris successiva, usque ad auditum, comitari illam speciem debet; nullus autem similis aëris fluctus necessarius esse videtur, ut odor speciem sui promoveri valeat. Nam aëre tranquillissimo odores fragrant, & species suas, non secus ac fluctuante, diffundunt. Cur igitur potius successivè, quam in momento radios specierum jaculantur: præsertim, cum nullam in aëre qualitatem repugnantem inveniant, cui expugnandæ immorari debeant?

Epicurus tamen odorem, undatione quadam aëris comitante, successivè diffundi dicit, quomodo diffunditur sonus.

Sed in Epicuri Philosophia non mirum; cum & odoris, & soni propagatio, & omnium agentium actio, nihil apud Epicurum sit aliud, quam effluxus quidam corporearum atomorum. Vade, nil miri si motu locali & undatione quadam tumidâ (quam ὄγκος tumorem, aut umbonem appellat) odoratæ atomi aërem propellant.

Dici tamen etiam in Philosophia Peripatetica potest: species intentionales odorum successivè propagari, præcedente aëris undatione, quam exhalatio odorifera facit, dum se diffundendo, aërem ante se agit. Et ideo sphaeram activitatis

odoris tam curtam & restrictam esse; quia aër ab illa exhalatione tam tenui impulsus, non procul ante exhalationem tremescit & crispatur. Et sic fatendum erit, odorem in hoc assimilari sono; quòd uterque speciem suam successivè propaget, secundum mensuram & proportionem alicujus morûs localis, qui propagationem speciei, naturâ antecedit, & tempore comitetur.

Aut certè dicendum erit, propagationem speciei odorabilis successivam, non momentaneam esse, propter agentis imbecillitatem, & quandam, ut ita dicam, segnitiam naturalem, quod Conimbricensibus placet.

### ARTICVLVS III.

*An species odorabiles naturâ specificâ ab odore differant.*

**I**Terùm hîc disceptatio & ambiguitas, qualem circa colorem & speciem visibilem, circa sonum & speciem audibilem superiùs vidimus.

Qui dicunt species sensibiles sensu non percipi, sed cooperari tantum potentiæ sensitivæ, ut ipsa eliciat cognitionem objecti, à quo species in organum trajicitur, magno consensu asserunt omnes universim species, esse qualitates diversæ rationis ab objectis, unde manant.

Sed Avicenna, Casserius, Vallesius, Durandus alijsque malunt, odorem se per medium realiter propagare, & sui similem producere. Et sanè, si lux & color, Galeni opinione, movent potentiam visivam, *mittendo ei particulam sui, specie similem & cognatam*; ut ex hoc quasi specimine cognoscat, qualis sit tota lux aut color; non est ratio solida, cur odor quoque non percipiatur olfactu, per simile aliquod specimen, quod ejusdem naturæ sit cum odore principali, quando principalis iste odor organo olfactûs proximè applicari non potest.

Mittere tamen tale specimè, esse proprium objecto potentiæ visivæ, credit Galenus: non, quia aliorum sensuum objecta mittant speciè diversæ à se rationis; sed quia nullam mittunt.

Putat

Galen. lib.  
7. de Placit.  
Hippocr.

Galen. ibid.



Putat enim ut ceterorum sensuum operationes fiant, opus esse, ut ad ipsum animantis corpus sensibile perveniat. Visus autem solus, inquit, percipit sensibile, quod movet ipsum per medium aërem.

Vnde si Galenus Aristoteli consensisset odorem ex aliquantâ distantia, olfactu posse percipi; sine dubio dixisset (quemadmodum de colore philosophatur) præmitti ab odore in organum olfactus aliquam particulam sui, specie similem & cognatam toti odori, à quo particula illa producitur. Certè enim natura in similibus suis operibus solet sibi constare, & esse uniformis.

Erit igitur omnium sensuum externorum idem generaliter sentiendi modus. Vt videlicet, vel objectum ipsum proxime organo applicitum sentiant, aut si ab organo distet, per vicariam speciem, sive per specimen quoddam ejusdem rationis cum objecto principali; ex cujus cognitione, sensus ad ulterius objectum, actionem suam extendant.

Sed Durandum hîc differentem audiamus, & probantem species colorum esse ejusdem naturæ specificæ cum coloribus suis (quod & nos Cap. III. Art. VII. approbavimus;) ac deinde ceterorum quoque sensibilibus species cum suis sensibilibus, ut speciem soni cum sono, speciem odoris cum odore &c. unius esse rationis.

Sicut se habet lux, inquit, in corpore luminoso ad lumen causatum in medio; sic videtur se habere color in corpore terminato ad speciem causatam in medio. Quia sicut proprium subiectum lucis, secundum suum perfectum esse, est corpus densum (unde & stella lucens dicitur esse densior pars suæ spheræ lib. 2. de celo:) sic proprium subiectum coloris, qui in se continet aliquid de natura lucis, secundum suum perfectum esse, est perspicuum terminatum per opacum: subiectum autem utriusque secundum esse imperfectum, est perspicuum non densum nec terminatum. Propter quod, sicut se habet lux ad lumen, sic color ad speciem. Sed lux in corpore denso, & lumen in medio sunt ejusdem rationis specificæ licet differant in modo essendi. secundum rationem perfecti & imperfecti propter diversitatem subiecti recipientis: ergo similiter color in corpore terminato, & species eius in medio, sunt ejusdem rationis specificæ; licet differant secundum perfectum & imperfectum.

Durand. in  
2. d. 3. q. 6.

*perfectum, propter diversitatem subiectorum recipientium.*

Deinde ait, quod sicuti calor distans, ut sentiatur, alium calorem in medio, & organo tactus producit; ita sonus sonum, odor odorem, sapor saporem ejusdem naturæ secum per medium spargat, & organo imprimat.

Denique, *species*, inquit, *non ducit in cognitionem alterius (ut videtur) nisi ratione similitudinis: unde & similitudo dicitur, per quandam expressionem. Similitudo autem non est differentium secundum speciem. Ergo species, quæ est medium quo res cognoscitur, & similitudo rei, non differt secundum speciem à re quam immediate representat.*

Scio Durandi argumenta passim ab alijs eludi; qui dicunt speciem sensibilem sensibilibus externorum, esse medium cognoscendi incognitum, adeoque similitudinem non propriam & specificam, sed solum intentionalem (ut vocant) inter colorem & speciem coloris, inter odorem & speciem odoris &c. intercedere.

Sed Durandi ratiocinatio philosophiæ S. Augustini est conformis: juxta quam species sensibilis etiam sensus externi, medium cognoscendi cognitum est.

Ad hoc autem, ut mediante sui cognitione, in cognitionem alterius objecti principalis, sensum abducat, nihil commodius fieri potuit, quam si inter speciem & illud objectum sit identitas specifica, & similitudo propria ac formalis, ut alibi diximus. Vnicum argumentum est, quod me olim, & alios ab ista S. Augustini philosophia ferè avertit.

Quomodo enim species odoris cum odore, species saporis cum sapore &c. unius naturæ specificæ esse potest, cum in medio, aut organo olfactus non sit temperies illa qualitatum, ex qua ille odor, aut sapor, qui à sensu percipitur, resultare debet? Nam quod Durandus paulò antè dicebat, speciem lucis esse lucem imperfectam, speciem coloris esse colorem imperfectum, speciem odoris esse odorem imperfectum &c. non videtur curiosis & subtilibus ingenijs satisfacere: nisi explicetur, in quo imperfectio ista consistat.

Dico igitur hîc de odore, quod Cap. III. Art. VII. de colore



colore dixi. Nempe, nihil ob stare, quo minus odor, ut qualitas fixa & permanens, à certa qualitatum primarum temperie, in fumida sua exhalatione primùm resultet; & tamen præterea, alium sibi similem odorem, actione intentionali, ut vocant, per aërem spargat, per quem olfactu, etiam ex spatio distanti, percipi possit. Sic enim lux solis, aut ignis in corpore suo fixa & permanens est, à forma substantiali, vel aliquâ qualitate priori talis corporis, dimanatione quadam naturali, primùm emicat, & ibi conservatur; cum tamen etiam luce ejusdem rationis, aliud subiectum diaphanum perfundere possit, quæ non à forma substantiali diaphani, vel à qualitate diaphani unâ aut pluribus, sed à luce ipsâ eternâ solis, aut ignis, in fieri & conservari dependet.

Hæc autem lux diaphani (quæ propriè lumen appellatur) nihil aliud est, ut ex Scoto, & alijs argumentis antea probavimus, quàm radius & species visibilis lucis illius, quæ soli, aut igni inhæret. Naturæ enim necessitas postulat, ut tales qualitates, lux, color, sonus, odor, &c. se expergere & propagare per medium possunt, ut in isto radio suo, velut specimine quodam, sensu externo cognosci valeant.

Eodem etiam modo calor, & frigus per medium se extendunt; licet qualitates sibi similes, quas producant, non tam pertinaciter à calore ignis, aut frigore aquæ, in conservari dependeant; quia illæ sunt qualitates primæ, quæ ad mixturam & temperationem corporum mixtorum necessariae sunt: ideoque extra ignis & aquæ præsentiam, physicumque eorum influxum, debent posse conservari.

Hinc actio, qua calor producit calorem alium, dicitur esse realis, non intentionalis: quia primarius finis ejus non est excitare, aut adjuvare potentiam sensitivam ad eliciendam aliquam intentionem (quales sunt visio, auditio, tactio &c.) circa suum objectum; sed est aliquid magis reale, substantiale, & ut ita dicam, magis crassum: nempe corporum mixtorum temperiem efficere, ac eam ingredi; aliæque utilitates plurimæ, quas calor in universo habet.

Actio verò, qua lux, color, sonus, odor &c. qualitatem

N n n n

sibi

sibi similem in medium, & in organo sensuum radiant, vocatur intentionalis; quia ad intentionem aliquam, sive sensationem in potentia sensitiva excitandam primario destinatur. Aut si qualitas per medium sparsa, duos fines æquè principales habere videatur (sicut lumen à luce solis effusum juvat oculum ad videndum, & simul producit calorem) talem qualitatem, partim realem, partim intentionalem appellant.

Arist. lib. 3.  
c. 2. de anima.

Dicit denique Aristoteles *sensorium esse susceptivum sensibilis sine materia*: quia oculus v. g. vel organum olfactûs, cum speciem coloris, aut odoris recipiunt, non simul recipiunt qualitates materiales, temperamentaque istorum objectorum sensibilem (sive coloris, & odoris) ex quibus qualitates istæ secundæ, in subjectis suis primum resultant: sed tam in medio, quàm in organis sensuum, à solâ efficientiâ illorum objectorum dependent. Et idèd potius species coloris, quàm color, species odoris, quàm odor vocantur.

Eadem de causâ, actio illa quâ color, odor &c. species suas per medium radiant, vocatur à S. Thoma, & Peripateticis actio spiritualis: quia licet species sint qualitates corporeæ; hæcenus tamen spiritualizatæ sunt, ut sic dicam, quod à qualitatibus materialibus subjecti coloris, unde color & odor primo resultant, avulsæ sint, nec à medijs, aut organi materiali temperamento dependent.

#### ARTICVLVS IV.

*Quodnam sit olfactûs organum.*

**E**Xperientia constat in animalibus nasutis, organum olfactûs in interiori naso, aut ejus viciniâ esse. Odores enim per illum nasi canalem subeuntes, ibi, & non alibi, percipimus.

Galenus usque in primos cerebri ventriculos olfactum submovet. Sed cerebrum potius sensuum internorum, quàm externorum organum censeretur. Deinde cerebrum ne quidem ullius tactûs, nisi fortè obtusissimi, est particeps: igitur nullius alterius sensûs externi est capax. Ac denique experientia ipsa docere videtur, nos non cerebro, sed summo naso,



naso, aut ex proximâ viciniâ, odorum qualitates percipere. Alij Medicorum hodie filij passim in processibus mammillaribus, sive geminis carunculis, quæ similes mammillarum papillis, interiùs è regione superciliarû, ex cerebro ipso, tanquam ejus appendices, pendulæ sunt, sensum olfactûs constituunt.

*Volumus cum Galeno, & Medicis omnibus, ait Laurentius, princeps odoratûs organum intra calvariâ esse collocatum, & portionem esse cerebri: processus quippe & tubercula duo mammarum papillis similia, quæ summo narium ossi objecta insident.*

Andr. Laurent. lib. 11. q. 12.

Atque ego quoque in hanc sententiam, sed incerto tamen & titubante gressu, vado. Nam in primis Vesalius Anatomicorum facilè Princeps: *Qui sectionem, inquit, paulò diligentius aggressi, illa cerebri tubercula, mammillarum imagine prominentia, nihil ad olfactûs organi constructionem auxiliari cognoverunt.*

Vesal. lib 4. c. 3.

Vnde ex sententia non sua, sed aliorum loqui oportet Vesalium, cùm aliquando tubercula illa mammillaria, organa olfactûs appellat. Ut quando ait: *Aëris portionem ad cerebrum trahi per octavi capitis ossis foramina, quibus olfactûs organa incumbunt.* Papillæ enim illæ mammillares incumbunt ossi ethmoëidi, quod cribriforme, quia instar cribri perforatum est, vocant.

Lib. 6. c. 1.

Quod etiam addit Laurentius, odoris species è nasi tubo, per cribrum ethmoëide, ad papillas mammillares, cerebri respiratione debere attrahi, ut odor percipi valeat; mihi videtur falsum. Nam cerebri respiratio arbitraria non est, sed naturalis. Illa verò inspiratio, quâ odores attrahimus, voluntaria est, adeoque non à cerebro, sed è pulmonibus venire apparet. Argumento satis manifesto: quòd cùm ad olfactandum, aërem inspiramus, manu diaphragmati exteriori admotâ, motum pulmonum percipiamus. Follicante tamen naso spiritum pulmonum attrahimus, & sursum impellimus.

Vnde aër è naso, inspiratione pulmonum attractus, in os cribriforme à parte exteriori potiùs impellitur, & versus papillas mammillares protrahitur; non autem metu vacui, propter cerebri dilatationem spontè subit, ut credit Laurentius. Imò plurimi Medicorum ullam esse cerebri dilatationem, & contractionem negant; sed motum, qui in cerebro maxime

parvulo-

parvulorum se prodit, non cerebri palpitationem, sed artē-  
riarum tantum pulsum esse credunt.

Iul. Casser.  
lib. 3. c. 18.

Deinde, odorem non intra capitis calvariam, & in illis  
cerebri appendiculis ē regione superciliarum, sed inferius, ad  
radicem nasi extra cranium, percipere videmur. Vbi enim  
fragrantia & voluptas rei odoriferæ sentitur, ibi operatio sen-  
sus exercetur. Voluptatem autem istam in membrana quæ  
radices nasi, in confinio calvariæ vestit, sentiet, ait Vallesius,  
quisquis attendere, & in se reflectere volet. Plures alios ex-  
perimenti hujus se interrogasse testatur, qui omnes idem con-  
fessi. Nec hoc experimentum validè confutat Iul. Casserius.  
Sensum enim voluptatis in summo naso, *propter qualitatem,*  
inquit, *tangibilem, qua halitui odorato inerat, Vallesio evenisse cre-*  
*dimus; vel omnino eo loci factum fuisse negamus.*

Atenim, de voluptate odoris, non qualitatis tangibilis lo-  
quitur, quarum unam ab altera tam facilè sensu, quàm  
odorem à calore, aut quacumque qualitate tangibili distin-  
guimus. Quòd verò negat voluptatem illam in extremo re-  
cessu nasi, sed superius intra calvariam, & in cerebri appen-  
dicibus, percipi; experiatur, & examinet se ipse, dicit Valle-  
sius, sanè tam apparet in extremo naso nos odorem, quàm in  
linguâ saporem percipere.

Valles.  
lib. 2. c. 26.  
Controv.

Quare Vallesius à communi Medicorum suorum secta  
abiens, ait organum olfactus extra calvariam esse.

Cur ergo, inquit, non olfacimus, nisi inspirantes? Respondet:  
*Quia halitus trahuntur introrsum inspiratione. Odoratus verò non est*  
*in extrema superficie cutis, sed in partibus profundioribus, ad quas in-*  
*spiratione, velut suctu, trahuntur halitus.*

Vt ergo visus in oculi postrema tunica retiformi, auditus  
in tunica ultimum cochleæ recessum vestiente; ita odoratus  
in tunica quæ ossi, in summo nasi fastigio, interiùs obducitur,  
sedem habere videtur. Vnde veluti in visu & auditu, particu-  
la illa tunicæ, in qua facultas residet, peculiari temperamen-  
to & qualitate, ad sentiendi munus idoneâ, à naturâ imbuta  
est; ita in odoratu erit.

Et licet via ad organum olfactus pateat; quia tamen nasi  
tubus



tubus plenus est aëre, inspiratione est opus, ut aër recedat & odorifera exhalatio ei succedat, aut factâ via vi, eum pervadat. Sic enim magis confertim odor organo suo admoveatur, & odoratio fit insignior. Quò etiam longitudo nasi adjuvat; quia talis figura plus odoriferi halitus concipit, & transmittit ad organum. Hinc Lacanas canes sagacissimas olim fuisse Aristoteles notat, quia nasutas egregiè.

Os autem ethmoeides, sive cribriforme videbitur factum ad cribrandas & expurgandas exhalationes, antequam in cerebrum veniant, & spiritibus ejus permisceantur.

Veruntamen hæc me in communè Medicorū viam rejiciunt.

Primò, quòd in summo nasi recessu nullus nervus odoratius se expandat, ut Vallesio Casserius objicit. Sine nervo tamen à cerebro in organum sensus externi pertinente & inserto, species odoris, vel olfactionis in sensum internum trajici nequit.

Deinde Anatomici recentiores narrant, se mollis cujusdam nervi canalem, à papillis illis mammillaribus, usque ultimum cerebri in occipite ventriculum, deductum deprehendisse. Hic autem canalistransvehendis speciebus ab organo olfactus ad sensuum internorum sedem, videtur factus.

Tertiò, animalia quæ olfactu valent (ut in cane & ove advertit Vesalius) papillas grandiores habent: uti & foramina ossis cribriformis patentiora, ad liberiore & magis confertam odorum ad suum organum trajectionem. Vesal. lib. 4. c. 3.

Quarto, papillæ mammillares, à fluxa & pallida illa temperie cerebri, cui appensæ sunt, in aliam magis carnosam & rubenrem degenerant; ac deinde porosæ, & spiritu animali multo turgidæ sunt: ut proinde officio odorandi à natura conformatæ videantur.

Quomodo igitur in ipso ultimo recessu nasi voluptatem odoris percipere videmur?

Credo idcirco accidere: quia angusto interstitio papillæ illæ à supremo nasi tubo discretæ sunt; nec præcisè & mathematicè distinguere valeamus, an in hac particula corporis nostri, an in vicina sensum alicujus rei exerceamus. Quis enim

novit in qua circumcisè parte oculi, auris, linguæ, colorem, sonum, saporem percipiat?

## ARTICVLVS V.

*An bruta animalia odoribus delectentur.*

Arist. lib. 3.  
c. 13. Ethic.

**N**egare videtur Aristoteles, cum ait hæc irrationalia animalia, non nisi κατὰ συμβεβηκός per accidens, odoribus delectari, quatenus nempe ex odoris olfactu, cibi aut Veneris voluptatem imaginantur. *Neque enim*, inquit, *canes odore leporum, sed comestione delectantur.* Idem docet Commentator ejus Eustratius. Et Io. Major causam etiam adfert, cur bruta ex nullo alio sensu, quàm gustu & tactu voluptatem percipiant. *Minor enim fuit cura Deo de belluis*, inquit, *quarum appetitus à solo instinctu naturæ movetur: & ideo non delectantur, nisi in his sensibus, quæ ad sustentationem naturæ ordinantur.*

Io. Major.  
lib. 3. c. 10.  
Ethic.

Sed cum canes, simiæ, & plurimæ bestiarum olfactent escas, antequam sumant, videntur, perinde ac pueri (quibus bestias in similibus comparare solet Aristoteles) aliquod odoris blandimentum percipere, unde cibi convenientiam intelligant; ut non ineptè adversus Peripateticos Io. Brodæus argutatur. Ut ergo pueri, & amentes odoris gratiâ ad vescendum invitentur, & amaritudine avertuntur; ita belluæ.

Io. Brodæ.  
lib. 8. c. 22.  
Miscell.

Deinde bruta nec rationem utilitatis & mediij ad finem, nec rationem boni honesti percipere valent; igitur bonum delectabile, & malum ei oppositum solum apprehendunt, ac subinde ac subditò in illud tantum appetitu feruntur. Amor autem boni delectabilis non est sine delectatione, nec odium mali oppositi sine tristitia. Fingere autem, canem nullo affectu appetitus circa odorem cibi, sed tantum circa saporem versari; tam sine ratione est, quàm de puero, aut amente idem comminisci. Igitur sicut homini amenti famelico bene olet nidor carnis assæ, ita etiam famelico cani; ac deinde delectatione odoris, tanquam objecti propinquioris, ducitur in imaginationem blandimenti saporis; quod percipiet, quando non

nasum



nasum tantum cibo admovert, sed dentem.

Itaque odorem, saltem alimentarium, cum delectatione haurire, aut à contrario cum horrore refugere, mihi bruta videntur,

Aliorum verò odorum, ut moschi, ambrae, florum &c. quos Aristoteles dicit esse proprios homini, an voluptatem nullam sentiant, est quod etiam dubitem. Nam in primis, odoratu odores illos percipere videntur; cum sicut visus & auditus, ita odoratus sit in homine & brutis unius, ut existimo, speciei & naturae. Nulla tamen ejusmodi odorum voluptate se tangi, plurima bruta satis experimento demonstrant. Tales enim odores nihil ad belluas, sed homini unice facti sunt, ad cerebri humani, ubi arx rationis locata, temperiem & medellam. Quòd tamen nullum genus bruti nullo odore, nisi alimentario, delectetur, dicere non ausim. Certè mihi vix credibile est, canem nullo blandimento odoris herilis capi, quem etiam si satur, tam blandè olfactat, jactatione caudae testante laetitiam. Imò Aristoteles, & post eum Plinius ac Solinus, *narrat odore pantherarum mirè sollicitari quadrupedes cunctas, sed capitis torvitate terreri. Quapropter occultato eo, reliqua dulcedine invitatas corripunt.* Arist. Probl. sect. 13. Plin. lib. 8. c. 17.

Ecce ergo, ceterae quadrupedes odore pantherae delectatae, eam circumludunt, non ut comedant, sed ut ab ea raptae comedantur.

Denique, *nonne peponum odore*, ait Brodæus, *elephantes in Aethiopia gaudent, bombyces alliorum ac ceparum viru exanimantur, thuris verò suffitu recreantur?* Io. Brodæus. ibid. Nonne equi quoque hircorum foetore delectantur? Ideo quippe rustici quidam prudentes, hircum unum inter equos stabulari jubent. Veruntamen omnis ista delectatio ex alia priori, & naturae medullis altius infixâ venit; nempe ex sanitatis & temperiei convenientis amore ac delectatione. Naturali enim instinctu bruta cognoscunt odores illos naturae suae temperamento esse congruentes. Halitus enim quibus tales odores vehuntur, naturam ejusmodi animalium bellè & sanè afficiunt. Et hoc sensu, universim verum esse potest, quod Aristoteli placet: Bruta

tantum per accidens, & quasi obiter odoribus delectari. Non quasi ex odore, ut proximo delectationis objecto, nulla ipsis jucunditas proveniat; sed quia transitoria est, & naturæ instinctu ad aliam tendit. Nec enim puto canem tantum domini sui odore gaudere, quantum memoriâ præteritorum beneficiorum, & futurorum spe. Hinc si dominus durus & plagosus sit, canis & odorem ejus, & præsentiam odit.

Proprium autem homini est, per delectationem odori posse inhærere, & eo, quasi dissuaviando, sic frui, ut ad ulteriorem delectationem per illam non currat. Sic enim facit, qui in rosa, aut ambra, olfactando, se delectat.

Quod de odore, etiam de sono, imò colore ausim dicere. Aliquis, inquam, belluas esse, quæ auditu etiam, & visu delectantur.

Arist. lib. 8.  
c. 6. Politic.

De auditu, ipse Aristoteles fatetur quasdam esse, quæ communi saltem Musicæ sensu, etsi non artificioso concentu, delectantur. Ait enim in Lacedæmonibus hoc proprium & mirum esse; quod Musicæ pulchritudinem intelligant, licet Musicam non didicerint. Idcirco pueros alibi ingenuos in illa arte edusque instituendos esse, *donec pulchris melodijs & rythmis delectari valeant, non tantum communi Musica sensu, ut animalia quadam, & turba servorum, ac puerorum.*

Plin. lib. 11.  
c. 37.

Ergo licet animalia bruta harmoniæ artificium non capiant, sono tamen confuso, alia alio, delectantur. In piscium gente, *delphini cantu mulcentur*, ait Plinius, *& capiuntur attoniti sono.* Ac de ijs alibi: *repandum, rostrum simum habent. Qua de causa, nomen Simonis omnes miro modo agnoscunt, maluntque ita appellari.* Additque: *Delphinus non homini tantum amicum animal, verum & Musica arti. Mulcetur symphonia cantu, & præcipue hydraulico sono.*

Idem lib. 8.  
c. 32.

De cervis quoque idem Plinius: *Mulcentur fistulâ pastorali, & cantu.* Et sanè, cum bruta, ut antè dixi, nullâ honestate, sed solâ sensibili, voluptate, ad agendum moveantur, mirum sit, nisi fringillæ illæ, quas sutoribus erudiendas tradere solemus, aliquâ cantûs delectatione, ad imitandos magistrorum suorum sibilos, & fringultus modosque vocis, moveantur. Philomelarum quoque harmonia, cuculorum tautologia, galgulorum

lyræ,



lyræ, merularum tibiæ, gallorum tubæ, columborum pro-  
cantium ronchi, regularum exultantium-zinzizulismi, ac uni-  
versa avium silvestris, artificialive Musica, etiamsi pruritu  
Veneris, aut tepore veris, similive alterâ causâ eliquetur; po-  
test tamen natura aliquod insuper ipsi cantui blandimentum  
addidisse, quo volucrum istarum corcula excitentur, & spi-  
ritus suos effundant, quorum ad Venerem, & alias naturæ  
operationes est usus.

Videntur denique quædam bruta certorum colorum, aut  
figurarum aspectu gaudere, vel offendi. Canis enim, ut lo-  
quelâ, & odore heri sui; ita obtutu videtur delectari. Elephan-  
to splendor lunæ plenæ sic in delicijs est, ut eam videatur  
adorare. Nec sine, opinor, delectatione est illa cervorum stu-  
pida admiratio. *Cervus animal simplex, & omnium reram miracu-  
lo stupens*, ait Plinius. *In tantum, ut equo, aut buculâ accedente  
propius, hominem iuxta venantem non cernant; aut si cernant, arcum  
ipsum sagittasq; mirentur.* Pavones, si locus ubi incubant ovis,  
colore candido obducatur, candidi pullos coloris excludere  
dicuntur: imaginatione & delectatione matris vulgante si-  
militudinem coloris in prolem.

Inter sensus, hebetudo olfactûs creditur esse ingenij & sub-  
tilitatis indicium. Et ideo fortasse S. Augustinus, cujus puris-  
sima anima, ne ulli terrenæ voluptati adhæresceret, tanto pe-  
re sibi meruebat ab illecebris sensuum; cum ad odores ven-  
tum est: *De illecebra odorum*, inquit, *non sat ago nimis. Cum absunt, non requiro; cum adsunt, non respuo: paratus etiam ijs semper carere.* S. Aug lib. 10. c. 32. Confess.  
*Ita mihi videor. Fortasse fallor.*

Forfitan ergo vir ingeniosissimus obtusæ naris erat, & mi-  
nimum illi periculi erat, ne in odorum fragrantia ac voluptate  
mentem nimis altè defigeret, ne liberè pergeret ad Deum;  
quem in omni operatione, ut finem respicere debemus.

Attamen si verum est, ut quibus olfactus hebes, ij sint in-  
geniosi, quibus acutus, mente obtusi: fateor me omnium  
ferè mortalium obtusissimum esse; ita sum acri olfactu, &  
naris emunctæ. Cardanus quoque, minimè hebetis ingenij  
vir, olfactu tam sagaci erat, ut non tantum halitus corpore

Card. lib. 8.  
c. 43. Variet.

proprio exhalantes, sed etiam *in aëre varios semper odores senti-*  
*ret, quos nulli alij perciperent*, inquit; & hoc miraculum *in*  
*sensûs sui subtilitatem* refert.

Hebetudo quippe olfactûs, ex cerebri nimîa humiditate ve-  
nit. Quibus autem cerebrum humore gravatum, spiritus ani-  
males lenti, viæ per quas meant, impeditæ, & pleraque ingenij  
instrumenta ad officium tardiora sunt. Itaq; paulò ab humori-  
bus defæcатиorem cerebri temperiem, ad ingenij celeritatem,  
preponam. Certè viros quosdam eruditos, ab humiditate cere-  
bri satis quidè memoriosos, non tamen impendiò acutos novi.  
Hoc tamen vulgatum est, & verum non abnuo: Fatuos sapien-  
tibus præstantiâ olfactûs plerumq; meliores esse: non tamen  
quia sapientes naturali temperie humidius, sed quia mole am-  
plius cerebrum habent. Magnitudo quippe cerebri & capitis  
ad sapientiam, prudentiam, & ingenium ab Aristotele & Me-  
dicis laudatur. Vnde fatui *ὀξεφαλοὶ* acuto & parvo capite ferè  
esse solent. Vbi autè parum cerebri, pauciora sunt humiditatis  
recrementa, quæ organum olfactûs inquinant & labefactent.

Ingenij igitur argumentum in capitis ( præter conforma-  
tionem ) magnitudine, & aliquantulo cerebri calore, qui sub-  
stantiam ejus attenuet, vias aperiat, spiritus animales poliat  
& clarificet. Tale autem cerebrum olfactui minimè malum  
& inidoneum est. Bruta tamen multa acumine olfactûs nos  
superant, quia cerebri parum habent, & temperies ejus sic-  
cior & ardentior est. Hinc mira illa canum sagacitas, quâ he-  
rorum suorum, ferarumque tenuissimos & subtilissimos hali-  
tus deprehendunt, qui nasutissimos & emunctissimæ naris  
homines prorsus effugiunt.

Nec S. Augustinus antè citatus, ad olfactûs sui inusitatam  
alijs passim hominibus hebetudinem respicit: sed non admo-  
dum ab odorum illecebra sibi metuere, ne capiatur, atque in  
Musicis sonis plus periculi esse, dicit; quia melodia potentiùs  
aures, quàm fragrantia nares rapit. Homo enim omnis, ob  
cerebri magnitudinem, humiditatem, & frigus, remisso ol-  
factu est, si ad bruta, & præsertim canes, vultures &c. com-  
paretur: unde nec odoribus, perinde ac ceterorum sensuum  
objectis gaudet.

Odores



Odores deinde, minori peccandi periculo, quàm sonos intromittimus; quia odorum fragrantia peculiariter humano cerebro, non sonorum harmonia, opitularur: atque ita finem honestum plerumque habemus, ad quem narium delectationem (non verò aurium titillationem) referre possimus. Aristotelis quippe, & naturæ scitum est: *Quod sapor ad nutritionem, hoc valet odor ad sanitatem.*

Arist. lib. de  
sensu c. 5.

Quod verò Bodinus ait: *Si Opifex homini olfactum acerrimū dedisset, non modò aliorum, sed ne sui ipsius quidem odorem ferre potuisset;* in olidis Iudæis præcipuè, in ceteris tamen etiam ex parte fortasse verum est. Si enim major longè copia, & pondus olentium vaporum humani corporis, per cæcos cutis meatus quotidie expirat, quàm exeat per manifestos alvi vesicæ, & oris canales, ut Medicos fatentes audivimus; molestissimum profectò esset, si omnes illos vapores acerrimo olfactu, ut Lacanæ canes, exciperemus.

Bodina. lib. 4  
Theat.

## CAPUT VI.

## De Gustu.

**O**lfactui succedat gustus; sensus olfactu materialior & crassior, ut vulgò creditur: ideoque non tam procul, quàm olfactus, foràs se exerit per medium externum, aërem scilicet vel aquam; sed per medium solum internum, quod est pars corporis animalis, speciem gustabilem recipit, ut Aristoteles tradit. Vnde quia res sapida, ut gustu percipi possit, debet tangere partem animalis, per quam tanquam per medium, speciem sui in organum gustus transmittit, Aristoteles gustabile, quoddam tangibile esse dicit.

Arist. lib. 2  
c. 10 de  
anima.

## ARTICULVS I.

## Quid sapor.

**O**bjectum gustus est sapor: qualitas secunda movens gustum. Qui dicunt in temperie primarum qualitatū, unde resultat sapor, humiditatem debere superare, tam experienciā, quàm Aristotelis auctoritate refelluntur. In

O o o o 2

fale

sale enim & saccharo, quæ tam valde & jucundè sapiunt, humiditas à siccitate superatur. Aristoteles quoque non quod illi volunt, sed hoc dicit: *Nihil facit saporis sensum, sine humiditate; sed habet actu, vel potentiâ humiditatem.* Id est, quod actu humidum est, qualis cibus liquidus, & omne potabile, humore suo medium organi gustûs (summam videlicet & porosam linguæ carnem, quæ nervum gustatorium vestit, in opinione Aristotelis) ipsumque organum humectant; cibi verò solidi, ut sal, ait Aristoteles, liquantur salivæ permixti; vel certè, si liquefcere naturâ non possunt, saliva medium illud ijs lubricat & humectat, ut species gustabilis, per carnem illam porosam, in organum transire possit. Sic corticis mali citrij, linguæ superpositi, saporem percipimus; quia cutis, & porosa linguæ caro à salivâ satis humescit. Sic etiam gallina grani tritici suavitatem, momento quasi degustat, & devorat, quia subtilissimâ linguæ salivâ speciem ejus rapit. Hinc patet, saporem definiri posse: Qualitatem secundam sensibilem, quæ speciem sui per medium internum & humectum trajicere postulat.

Cùm verò ab Aristotele & Peripateticis sapor, odor, & ejusmodi qualitates secundæ, dicuntur ex certâ crasi, & primarum qualitatum temperie oriri; causalitas tantum dispositiva significatur. Nam propriâ & physicâ causalitate, à formis corporum mixtorum, aut ab alijs causis resultant. Omnes enim qualitates primæ in unam simul crasin collectæ, non magis virtute & eminenter, ut Scaliger & ego putamus, saporem, aut odorem in se continent, quàm aut gustum, aut olfactum, ceterasve animæ sensitivæ, aut vegetativæ facultates, ad quarum physicam resultantiam, qualitates primæ organa corporis animati disponunt. Verisimile quoque est, saporem, odoremque esse qualitates secundas, primis (excepto fortè calore) nobiliores. Vnde ab alia causa physica sublimiori dimanare illas oportet. Sic quoque ad virtutem ferri tractoriam, materiam magnetis qualitates primæ disponunt; & tamen nemo credit, virtutem illam magneticam à primarum qualitatum temperie, sed à forma potius magnetis physicè effluere.

Ceterùm



Ceterum, naturam saporum exactè nosse, & exponere impossibile nobis esse, rectè olim à Galeno dictum puto. Res enim ista, etsi sensu ipso tangamus, nullo tamen humani ingenij acumine potest penetrari. Et quid tamen etiam, quæso, est in natura rerum, quod ingenio magnoperè, & usque in fundum penetremus, quantumvis videamur nobis acuti? Profundum & tenebras in omni re tali posuit Deus, ut superbiam nostram deprimeret, & nos ingenij mentisque aciem altitudini rerum quæ supra nos sunt, & fidei Christianæ obedi-  
tius humiliusque submitteremus.

Galen. lib. 1.  
c. 37. de  
simplic.  
facult.

Facilius ergo superficiali linguæ, aut palati sensu sapor-  
rem degustamus, quàm essentiam, & causas ejus intelle-  
ctu comprehendamus. Quod tamen sapor ex aliqua humidi  
cum sicco permixtione nascatur, ex sapore aquarum, quæ  
per venarum metallicarum siccitatem transeunt & percolan-  
tur, quales sunt thermæ Aquisgranenses, acidula Spadana &c.  
intelligi potest. Aqua quoque sincerissima, & expers omnis  
saporis, si per siccos cineres transcoletur, illicò amaritudi-  
nem rapit. Non tamen necesse est, ut siccum ab humido sem-  
per vincatur, ut patet in pane, saccharo, & cibus solidis. Etsi, ut  
paulò antè dictum, ut sapor speciem sui per medium effun-  
dat, requirat humidi quidpiam, tanquam vehiculum. Vnde  
lingua sicca, ait Aristoteles, sapores nullos percipit.

Arist. lib. 2.  
c. 10. de  
Anima,

Sapores extremi Aristoteli sunt, dulcis & amarus: quia mo-  
do maximè contrario sensum gustûs afficiunt. Sicut enim, ut  
Plato ante Aristotelem dixit, albedo disgregat, nigredo con-  
gregat visum, calor solvit tactum, frigus constringit: ita sa-  
por dulcis fundit gustum, amarus corrugat. Inter illos, me-  
dios alios ponit sex: pinguem, qui proximè dulci, salsum,  
qui amaro adfidet. Præter quos, alij quatuor intermediij, acer,  
austerus, acerbus, acidus: & sic universim octo. Dulcis in melle,  
& saccharo. Amarus in felle, & absynthio. Pinguis in lacte,  
& butyro. Salsus in sale, & marinâ. Acer in pipere. Austerus  
in uvâ viridi. Acerbus in pomis immaturis. Acidus in aceto.

Porro omnia animantia nutriri dulci testatur Aristoteles. Vnde gustui, cum à naturali habitu non declinat, ait Galenus,

Galen. lib. 2.  
de Sympt.

Pachym.  
lib. 8. c. 2.  
de sensu

*maximam voluptatem adferunt omnes succi dulces, pinguesq̃, tanquam corporis essentia familiarissimi. Attamen dulci cetera saporum genera, pro condimento, commiscuntur, inquit Pachymerus. Salsum enim & acidum retrahunt dulce; quia dulce plurimum alit, & redundandi facultatem obtinet.*

Galen. ibid.

*Si verò gustus aliquo ipsum infestante recens vitium contraxerit, succi pingues eum delectare solent, ut sapienter Galenus: quia ij exasperatas partes maximè lenire solent. At ubi homo iam morbo afficitur; tunc succi contrarij ijs qui morbum excitant, delectare videntur.*

## ARTICVLVS II.

### *Quodnam sit organum gustus.*

**L**inguae organum gustus vocat Aristoteles. Sed non in omni sui parte sapores percipit. Suprema enim linguae cutis, & caro infra eam spongiosa, sunt medium internum, per quod species saporis ad organum suum trajiciuntur, ut Aristoteli placet. Vnde præcisum gustandi organum, in extremitatibus quorundam nervorum tertiæ & quartæ conjugationis, per linguae substantiam disperforum, constitui solet. Per hos enim nervos, spiritus animalis, & vis cerebri irradiativa in extremitates illas, corpori linguae insertas, delabitur, ut facultatem gustandi ibi exciter, & eam in exercitio sui actus adjuvet.

Vesal.  
lib. 4. c. 6.

*Hinc non futili profectò argumento, quidam Medici adversus Aristotelem colligunt, non tantum in surculis nervi, qui intrant profundius linguae substantiam, sed etiam in summa linguae cute, sensum gustandi inesse. Nam idem nervus est, qui linguae supremam tunicam contexit, & qui ramos illos per substantiam ejus diffundit. Dicat in re hac experientissimus Vesalius: Maior portio, inquit, crassioris tertij paris nervorum radicis, quando lingua basi committitur, cum alterius lateris nervo lingua tunicam efformat, aptum saporibus dignoscendis instrumentum. Deinde exiguos quoque surculos penitus in linguae substantiam dispensat.*



pensat. Horum enim, & tunica lingua producendorum gratiâ, tertium par potissimum à rerum Opifice creatum arbitramur. Atque ut primum par visûs, quintum verò auditûs, sic hoc tertium gustûs censetur instrumentum, gustatoriusque nervus meritò nuncupatur.

Si autem nervus gustatorius convolvitur & contextitur in linguæ tunicam, profectò verisimile est, ope spiritûs animalis, qui per illum nervum in istam tunicæ texturam defluit, sensum aliquem saporis in ea tunica perfici.

Ex hac quoque historia Anatomica colligitur, quare quibus nervi istius rami per conformationis errorem, in linguam non perveniunt, sed aliò reflectuntur, gustu careant. Qualis erat Patavinus ille heluo, quem Vitrivoracem appellabant. Hic nullo gustu præditus erat, ait Columbus, nullam in edendo voluptatem, nihil in jucundum sentiebat. Insipida, amara, dulcia, pingua, salsa, acria non distinguebat. Vitrum, saxa, lapides, ligna, viva animalia, carbones, pisces è vivario extractos adhuc salientes vorabat. Columb.  
lib. 15.  
Auat.

Quænam verò causa sensum gustandi ei abstulerat? Dicat idem Columbus, qui Patavij mortuum secuit. Quarta nervorum coniugatio, inquit, qua gustûs gratiâ in alijs hominibus à natura producta est, in hoc Lazaro (hoc ei nomen erat) Vitrivorace, neque ad palatum, neque ad linguam reptabat, sed ad occipitium reflectebatur.

Deinde, quibus ex vulnere, aut aliâ noxâ, nervi illi offensi sunt, gustandi facultatem amittunt, aut depravatam habere solent: quia fortasse nervi cæcûra, vel cicatrix spirituum vitalium, & virtutis irradiativæ defluxum in linguam impediunt. Inde exemplum illud Augustini Corbetæ, nostræ urbis patricij, ait Cardanus, cui ex offensâ nervorum tertij & septimi paris, ablatu est totus gustus. Sentiebat odores, sed non percipiebat saporis. Percipiebat ex pipere dolorem, sed non saporem. Cardan.  
Comment.  
ad lib. 2.  
Hippocrat.  
de alim.

Et exemplum vicinius, ac Belgicum in Wilhelmo Nassovio, moderni Principis Orangiæ avo, habemus, quod narrat Ioan. Bodinus, in Theatro Natur. ad Quæstionem, Cur in laryngibus vulnerati, sape sermonem sape quoque saporem amittant? Bodin. lib. 4.  
Theat.

Respondet enim: Equidem non sine admiratione spectavi Wilhelmu Arausiorum Principem, accepto in collo vulnere, sensum

*sensum gustus amisisse: & militem Gallum consimili mutum evasisse.* Vulnus verò Arausiorum Principis, istud est quod Antverpiæ Anno 1582. à Ioan. Laurengio adolescente Cantabro, ex oppido Bilbao, accepit. Nam Bodinus tunc Antverpiæ aderat, Francisci Ducis Alençonij Consiliarius. Historiam illam, præter ceteros, graphicè Laurentius Surius describit.

Sur. Com-  
mentar. ad  
An. 1582.

*Adolescens, inquit, sclopeto parvo, duplici globo onerato, & pugione armatus, in Aula, ad ianuam cubiculi, in quo Auraicus prandebat, eum egressurum operiebat. Venit Princeps, accessit adolescens, & Libellum offert supplicem. Quo acceptando, & explicando dum occupatur Auraicus, Ioannes sclopetum clam in faciem Auraici collimat, & simul explodit. Globulus sub mento intrans, caput trajcit, & sub dextra aure rursus exivit: utraq; maxillâ perforatâ, dente uno aut altero excusso, linguâ tamen intactâ. Ignis verò barbam & faciem adussit.*

Bodin. ibid.

*Causam verò utriusque miraculi, gustus in uno, vocis in altero amissæ reddere conatur: Est enim, inquit, nervus duplex, à tertia coniugatione manans, qui in laryngibus inseritur. Altero quidem ramo, lingua sermoni apta redditur, altero saporis percipiuntur. Et hoc quidem resecto, gustus, illo, sermonis usus amittitur. Et ultra progressus: Quod cum Aristoteles non prospiceret, inquit, pro decreto posuit: Nullum animal sine gustu vivere posse. At Princeps Arausius amisso gustu, tamdiu vixit, quoad occideretur, An 1584. die Iul. 10. At tamen si cibos condimentis acerbis, acidis, salsis parari juberet, nihil tamen gustu percipiebat, ut quidem ab illo accepimus. Addit quoque Bodinus: Minus quidem mirum esse, gustum Principis amissum; sed amitti sermonem ab illo milite, qui audiebat, linguâ integrâ, incredibile antea mihi, ait, videbatur, nisi experienciâ compertum haberemus.*

*Illo autem Wilhelmi Principis Arausiorum exemplo probari videtur, nullam, aut valde obtusam percipiendi saporis facultatem palato inesse; cum læso solius linguæ nervo, palatum ejus nullos saporis sentisceret. Aut certè potius, nervus quoque quartæ conjugationis, qui palati tunicam contexit, glande sclopeti etiam vulneratus fuit; ut proinde tam linguæ, quàm palati gustum amitteret.*

Vesal.  
lib. 4. c. 6.

*Nam quartum par nervorum, cum ex cerebri sede, ad palatum elabatur*



elabatur, ait Vesalius, in surculos quosdam partitum, in palati tunica degenerat. Quæ cum lingua tunica sit aliquantulo durior, iure etiam quartum par, posterius tertio pari, originem ducit: ac proinde etiam palati tunica sensu hebetiori, quàm lingua tunica, donatur.

Et sanè Aristoteles levi saltem aliquo gustandi sensu, palati fornicem aspersum esse docet. Quod tamen Plinius homini Plin lib. II. c. 37. inter animantia peculiare esse existimat. Nam intellectus saporum, inquit, est ceteris in prima lingua, homini & in palato. Ac certè, in extremâ saltem ad fauces, & mollissimâ palati parte, ubi mox à somno nondum ablutum est os, amarorem quendam ex vaporibus cerebri, nocturno tempore refluentibus, manifestè quandoque experimur; etiam si lingua palatum non attingat. Vnde signum est, saporis illius sensum, non in lingua, sed in palati cute hæreere. Vnde sententiæ Iobi sensus jam Iob. 12. elucere potest: *Nonne auris verba dijudicat, & fauces comedentis, saporem?* Hebr. *Et palatum cibum gustabit sibi?* Re enim verâ in illo palati recessu ad fauces, prope columellas, est aliquis gustus, & saporis iudicium.

Prima tamen palati concameratio, quia duriori & cartilagineosâ cute vestitur, nullâ, aut surdâ tantùm fatuâque gustandi facultate imbuatur.

Avis denique illa Indica, quam Batavi An. 1596. ex Insula Iava, Amstelrodamum revexerunt, cygno grandior, sed colore nigram, alis & linguâ carentem, & tamen non omni, opinor, gustu, à naturâ tam sapiente & providâ destitutam; satis indicat, in palato aliquem saporis sensum inesse. *Natura miraculum videtur*, inquiunt Batavi, *quòd careat lingua.* Diar. Nat. ticum An. 1596. *Quidquid edit, inglutit. Imò pomum magnitudine pugni inglutire potest. Quodq; longè mirabilius est, prunas ardentes inglutit sine aliqua eius læsione. Glaciei frustra libenter deglutit, refrigerationis causâ. Nominatur Indicâ voce, Eme.*

Nec tamen Aristoteles, quod paulò antè ei imponebat Bodinus, dicit, nullum animal sine gustu, per vulnus amisso (ut in Wilhelmo Nassovio) vel per errorem conformationis (ut in altero Columbi exemplo) posse vitam ducere; sed naturam, si destinatio ejus ab aliâ incidente causâ non interpellatur,

P p p p . . . . . omni

omni animali tribuere gustandi sensum, tanquam vitæ vegetativæ necessarium, ad explorandum cibum & potum, antequam transeant fauces, & demittantur in ventriculum. Ideo enim gustatus habitat in ea parte oris, ait M. Tullius, qua esculentis & poculentis iter natura patefecit. Unde & nares, inquit, eo quod cibi & potionis iudicium magnum earum est (odoris enim alimentarij olfactu, de qualitate cibi potulque homines & animantia judicant) non sine causa, vicinitatem oris consecuta sunt.

Cic. lib. 2.  
de nat.  
deor.

Sæpius tamen nares, quam lingua, in ciborum iudicio & delectu errant. Linguae enim certius iudicium: quia lingua ijs potissimum delectatur succis, ait Galenus, quibus ventriculus indigere videtur. Et rationem addit: Consensus autem huiusmodi (inter linguam & ventriculum) potissima causa est, vestiens membrana. Eâdem quippe perpetuâ membranâ, qua lingua vestitur, cesophagus quoque, & ventriculus induuntur: unde fit, ut cibus, aut medicamentum, à parte membranæ altera, quâ ventriculi interior superficies induitur, obortâ ex solo gustu, per consensum, nausêâ, revomatur, aut ructibus ad exitum sollicitetur.

Galen. lib. 2  
de sympt.

Tales quippe naturales instinctus sapientissimus naturæ Conditor partibus illis animalis inseruit; ut quia ventriculus venis, & visceribus necessaria alimenta coquere, & ministrare debet, ijs delectetur succis, ait Galenus, qui ipsis necessarij sunt. Ac deinde, quia lingua est ipsiusmet ventriculi prægustatrix, sic à natura instructa est, ut cibos illos gustu probet, qui ventriculo utiles videri possunt, respuatque contrarios. In quo iudicio tamen (sicut etiam expertissimis cocis quoque evenit) propter similitudinem nonnunquam salubris, & noxij saporis, interdum errat.

Hinc deducere possumus, quare quibusdam, etiam extra morbum, sed ex solo quodam naturæ instinctu, cibus unus gratus, alijs ingratissimus appareat. Quot enim sunt, qui à sapore casei, ut à veneno abhorrent; quem alij plenis buccis & hiantibus faucibus tam avidè liguriunt? Hanc rem, qui omnia solet, tangit alicubi S. Augustinus. Ita se res habent, inquit, ut pro uniuscuiusque corporis congruentiâ, vel delectet esca, vel offendat. S;

S. Augst.  
lib. 21. c. 13  
contra  
Faust.



*dat. Si delectat, dulcis aut suavis dicitur: si autem offendit, amara sive aspera, sive aliquâ insuavitate respuenda. Nonne ipsi nos homines ita sumus, ut plerumque alter appetat alimentum, quod alter exhorreat: sive pro temperatione naturæ, sive pro usu consuetudinis, sive pro affectione valetudinis: quanto magis longè diversi generis corpora bestiarum possunt illud habere iucundum, quod nobis amarum est?*

Vbi tres signat causas. Primò, *temperamentum naturæ*. Quæ sanè causa est, cur unius hominis gustui caseus iucundus, alteri iniucundus, videatur. Pro qualitate enim & temperatione ventriculi talis hominis, lingua prægustatrix iudicat. Ventriculus autem aliquis caseum respuit, quia temperamento ejus, & reliquarum partium corporis, quibus alimentum præcoquit, non congruit. Eadem causa est, cur bovi fœnum, cani caro, & os iucundè sapiat. Secunda causa, *usus consuetudinis*. Sæpe enim quæ initidò gustum offendunt, consuetudine leniuntur, & gratiam acquirunt. Sic cerevisia Belgis & Germanis usque ad ebrietatem sapit; quam tamen multi Itali, Hispani, Galli expuunt.

Tertia causa, *affectio valetudinis*. Inde quippe est, ut lingua & palatum ægri non eundem cibum approbent, quem amabant sani. Ventriculus enim malè affectus non alimentum jam tantummodò, sed medicamentum quærir.

## ARTICULVS III.

*An gustus mediante specie gustabili saporem percipiat.*

**P**hilosophia Peripatetica saporem, non immediatè, sed per speciem, à sapore, organo gustûs impressam, percipi credit. Ideo enim Aristoteles gustui suum etiam medium assignat. Non externum, quale est medium visûs, auditûs, odoratûs, qui per aërem, vel aquam species recipiunt à suis objectis; sed internum, quod est cutis, & caro porosa linguæ, per quod sapor cibi linguam tangentis, speciem ad nervum gustatorium trajicit.

Sed plurimi Medicorum non acquiescunt. Cùm enim linguæ tunica, sive extrema cutis, ex nervi gustatorij filamentis

contexatur, nulla videtur ratio, cur sapor isti tunicæ contiguus, non immediatè percipiatur à facultate gustandi, quæ filamentis illis inhæret. Dicere verò facultatem solum inexistere *exiguis quibusdam furculis, qui à nervo illo gustatorio, tunicam texente, penitus in lingua substantiam dispensantur*, ut Artic. superiori loquebatur Vesalius; gratis, & sine experimento, imò contra experimentum, asseri videtur; ut effatum illud Aristotelis, velut sacrosanctum, pertinaciter ubique & in omni sensu retineatur: *Sensibile positum supra sensum, non efficit sensationem.*

Itaque hoc in primis ex Medicorum sententiâ, verum esse existimo.

Facultas, inquam, gustandi quæ per linguæ aut palati cutem conspersa est, saporem sibi contiguum, sine specie, per medium etiam internum effusâ, percipit. Ratio est, quia medium internum (id est, quod sit pars animalis) ibi nullum est; cum summa etiam linguæ cutis, facultate gustandi imbuta sit, & istâ facultate saporem panis, aut vini sibi contigui degustet.

Deinde alterum quod addunt, magnâ dubitatione apud me fluctuat. Altera enim, inquiunt, gustatoriæ facultatis pars, quæ in furculis nervi gustatorij, intra profundum linguæ immersis, residet, saporem cibi superficiem linguæ attingentis, & loco à facultate ipsâ distantem percipit, per species gustatorias, quas sapor ille per tunicam & carnem linguæ porosam, tanquam per medium internum, facultati transmittit.

Hoc, inquam, apud me in dubio & ancipiti est. Nam si sapor ex spatio distantis, per tale medium internum percipi à facultate potest; cur non etiam per medium externum? Quare, inquam, sapor cibi, uno pede à lingua distantis, degustari nequit per species gustatorias, quas per medium aërem aut aquam, ad linguam trajicit?

Si dicas enim, medium internum, sive partem linguæ superiorem, esse capacem, ut species illas gustatorias recipere valeat, in aëre verò vel aquâ similem non esse capacitatem; rem prorsus incredibilem dicere videberis. Nam ut lingua specierum istarum susceptiva sit, humectari debet, ut experientia fatetur,



fatetur, & Aristoteles; cur ergo aqua, tam humida, eas etiam suscipere nequibit? Et tamen species saporis, per medium externum, ad organum gustûs trajici, Aristoteles expressè negat. Quia sine dubio, contra experientiam esse videbat, ut sapor rei à lingua distantis, gustu percipi possit. Ideo quippe gustum esse quendam tactum, & gustabile esse quoddam tangibile dixit: quia, ut sapor degustetur, organum gustûs contingere debet. *Vnde, inquit, si in aqua essemus, sentiremus utique impositum dulce; non autem esset nobis sensus per medium, sed eo quod miscetur humido, sicut in potu.*

Arist lib. 2.  
c. 10. de  
Anima;

Hoc est, si in aquam melle perfusam os & caput immergeremus, gustaremus aliquam dulcedinem; non tamen per aquam tanquam per medium externum, sed dulcedinem permixtam aquæ, sicut percipimus dulcedinem potûs, quando ipsum ore haurimus, & linguâ ac palato contrectamus.

Aut ut Themistius, Interprete Hermolao, paraphrasticè exponit: *Si in aqua fueris, sentire potens saporem eum qui continetur in aqua, ut urinantes assolent, qui salsuginem maris percipiunt, non tactu sed gustu. Neque tamen aquam, ut intermediam sentiunt, sed ut id cui sapor ille immixtus est. Etenim cum bibimus, quanquam humor est ille quem bibimus; non tamen humorem, ut intermedium, gustamus, sed ut id quod aliquem saporem recipit.*

Themist.  
lib. 2. c. 35.  
de Anima;

Cum ergo neget gustum per medium externum, saporem percipere, sed solummodo organo gustûs primum & attiguum; nihil occurrit aliud quod dicam, nisi species saporis non in quodvis medium posse recipi, sed solum in id quod habet talem qualitatem crasin & temperiem, qualis soli cuti & carni linguæ inexistit. Vnde aërem, aquam, & quodcumque aliud externum medium, ineptum esse, ut per ipsum species gustatoriæ trajiciantur. Quænam verò sit illa linguæ temperies, aut qualitas dispositiva, Deus scit, nos ignoramus. Constat tamen, exemplo specierum visibilium, fieri posse, ut aliqua ejusmodi dispositio mediæ requiratur ad specierum gustabilium trajectionem. Nam species lucis non nisi per diaphanum, species coloris non nisi per diaphanum actu illuminatum trajici potest.

Aut certè potius dicendum erit, saporem immediatè, sine specie sensibili & sine medio, etiam interno, degustari. Ideo enim fortasse caro linguæ fungosa & foraminosa facta est, ut non tantùm summâ suâ cute, sed etiam parte nervi gustatorii infra carnem illam immersâ, saporem contiguum valeat degustare. Per poros enim illos & foramina carnis, cibi saltem utcumque liquidi, ad partem illam nervi descendere, & se ex proximo ac contiguo degustandos præbere possunt.

S. August.  
lib. 4 c. 14  
contra Iul.

Casser, lib. 1  
c. 2. de Or-  
gano tact.

Hoc est fortasse quod S. Augustinus dicere voluit, cùm ait, gustum & tactum ( & olfactum quoque conjungit ) *corpulentiores & quodammodo crassiores, qui non se foràs projiciunt, sed interniùs, quod ad eos pertinet, agunt.* Quam sententiam disertè Iul. Casserius sic exprimit: *Alij sensus, inquit, obiectum habent, quod materialiter organum ingredi nequit, sed per speciem; ad cuius prolestationem, medio opus est. Tactus verò & gustus materialiter obiectum recipiunt. Neque enim horum obiectum spiritualiter è corporibus exire potest: quare ipsis assignari medium non debet.*

## CAPUT VII.

### De Tactu.

**S**ensuum externorum ultimus, crassissimus, & corpori profundissimè immersus, tactus est. Ad hoc, animal à natura datus, ut pro incolumitate ejus excubet, & ubi causæ inimicæ temperiem ejus naturalem labefactare, aut continuitatem partium incidere moliantur, admoneat animam, ut principijs obstet, & noxam amoliri conetur. Vnde, quia amor vitæ est omni animali communis, omne animal habet tactum, quo vitam à noxijs defendere valeat. Ideoque hic sensus necessitatis, ceteri commoditatis esse dicuntur.

Non omnibus tamen animalis partibus tactus inest. Non enim ossibus, propter naturam siccam nimis & terrestrem. Aliquid enim amplius substantiæ humentis requiritur, ut in parte aliqua tactus ab anima resulter.

Sed nec partes omnes, quæ plus humidi participant, illicò ad re-



ad resultantiam tactûs sunt idoneæ. Nam *cerebri, & viscerum* Andr. Lan-  
*ferè omnium, ut hepatis, lienis, pulmonum substantia insensilis est,* rent, lib. 10.  
 ait Laurentius. Hinc vulnera cerebri mitissima sunt: aded ut q. 10.  
 Chirurghi tota interdum medullæ cerebri cochlearia, sine sen-  
 su lauciati, exhauriant.

Alij tamen cerebro, & alijs illis visceribus tactum quendam, sed obscurum & stupentem tribuunt. Cephalalgia ergo, & omnis capitis interioris dolor, non in substantia medullari, sed in meningibus & cerebri membranis, aut nervis hæret. Velut colicus dolor, non hepar, lienem, & viscera illa principalia, nullius ferè aut obtusi tactûs, sed illa infestat, quæ spiritu ultra naturalem modum distenduntur.

Est igitur quædam temperies in partibus animalis, nobis ineffabilis & ignota, quam anima flagitat, ut sensum tactûs in illud membrum effundere possit. Ad quam temperiem perficiendam, spiritus animales à cerebro influentes, item vicinarum partium qualitas multum conferunt, ut patet in nervis; qui etsi naturali siccitate ad naturam ossium accedant, tactu tamen acerrimo pollent.

## ARTICVLVS I.

*Quodnam obiectum tactûs.*

**Q**ualitas tangibilis, tam prima quàm secunda est obiectum tactûs. Primæ, calor & frigus, humiditas & siccitas. Tangibiles secundæ, mollities durities, asperitas lenitas, raritas densitas, gravitas levitas, friabilitas unctuositas, crassities tenuitas.

Hinc, cum sint tot paria contrariorum tactu sensibilibum, multos tactus specie differentes in eodem animali Aristoteles multiplicat. Vt veluti unus speciei visus circa unicum par contrariorum, album & nigrum versatur; unus auditus unum par tantum contrariorum sonorum, acutum & gravem, pro obiecto habet: ita una species tactus sit, quâ calor & frigus, cum suis temperamentis intermedijs; altera quâ humiditas & siccitas &c. percipiatur.

Cardanus

Cardanus verbò aliter species tactuum distribuit. *Sensus tactus quadruplex esse videtur, inquit. Vnus, qui calidum, frigidum, humens, siccumq; dyudicat. Secundus, qui dolorem agnoscit & voluptatem. Tertius, qui propriè Veneris gaudia percipit. Cum in nulla alia corporis parte talem affectum, aut illi similem sentiamus. Quartus est, qui grave & leve distinguit.*

D. Thom.  
I. p. 9. 78.  
q. 3. ad 3.

Opinionem Aristotelis Buridanus, & multi Peripatetici defensant. Plures ab eo deficiunt, D. Thomas dubitat: & propendet ut unicus specie sit in toto corpore tactus; quia *dici potest, inquit, quòd omnes illa obiecti tactus contrarietates conveniant in uno genere communi, quod est obiectum tactus, secundum rationem communem. Sed illud genus commune est innominatum: sicut etiam genus proximum calidi & frigidi est innominatum.*

Illà autem ratio communis, secundum quam gradus unus genericus ab omnibus obiectis tactus abstrahi per intellectum potest, est peculiaris modus immutandi organum tactus, qui obiectis aliorum sensuum, respectu organorum suorum minimè convenit, ut S. Thomas ibidem ad 4. ostendit.

Igitur non est necesse, ut tactus specie multiplicentur, cum unicus omnem qualitatem tangibilem valeat percipere. Et licet sub qualitate tangibili in genere sint plura paria contrariarum qualitatum, quàm sub qualitate visibili, sub qualitate audibili &c. solum inde sequitur, tactum habere obiectum latius diffusum, & sphaeram activitatis ceteris sensibus ampliore.

Quòd verò in partibus Venereis, cum resolvitur semen, talis voluptas sentiatur, qualis in nulla alia parte corpore; non ideo hoc accidit, quia illarum partium tactus sit alterius rationis & speciei, quàm ceterorum membrorum tactus ut imaginatur Cardanus; sed quia illarum partium tactus est exquisitissimus, propter peculiarem temperiem; deinde modus quo illa voluptas, sive qualitas tangibilis voluptatis efficiens celerrimè se affricat organo, & intra rapidissimum tempus, tactus delectabiles quasi condensat, est maximè sensibilis.

Sic quoque titillatio organi tactus sub axillis longè aliter afficit animam, quàm in capite, aut manu. Ita etiam dolor,

qui



qui in nervi incisione percipitur, acrius penetrat, & acerbius urit, quàm si incidatur sola cutis. Et tamen facultas tangendi in nervo, & cute est ejusdem rationis.

## ARTICVLVS II.

*An voluptas & dolor sint quædam peculiaria obiecta tactûs, præter vulgares qualitates tangibiles primas & secundas.*

**V**oluptas & dolor propriè actus vitales appetitûs sensitivi significant. Sed per metonymiam sumuntur etiam pro qualitatibus, circa quas passionibus illæ appetitûs versantur. Dicimur enim tactu voluptatem aliquam, aut dolorem percipere. Et re verâ, id quod percipimus, non est in corde, aut cerebro, ubi putatur esse officina, in qua exercentur actus vitales appetitûs sensitivi; sed in parte illa corporis, quæ voluptatem, aut dolorem sentire dicitur.

Quid igitur est illa voluptas, quam libidinosus in partibus genitalibus, gulosus in gula & faucibus percipere dicitur?

Res ista, licet tam sensibilis sit, profectò est intellectu difficillima.

Quidam non immeritò existimare possunt, qualitatem aliquam peculiarem ex affricu temperiei seminis ad talem partem membri genitalis, in organo tactûs resultare; eo ferme modo, quo ex contactu mallei ad campanam, emicat qualitas soni. Qualitatem autem illam voluptuosam, & voluptatis (quâ, teste Cicerone in Hortensio, *nulla potest esse maior*) effectricem ibi resultare fortè voluit naturæ Auctor, ut homines ad complexus conjugales, & speciei humanæ propagationem allicerentur: quia nisi tanta esset in illo actu delectatio, homines, inquit Avicenna, ad rem tam foedam & abjectam vix adduci possent. Et *idecirco tali fœditati Natura adjunxit incendium eiusmodi*, ait Scaliger, *ut panè à nobis alieni feramur eò.* Scalig. Exerc. 299.

Simile quid, de voluptate, quam gula, sive fauces percipiunt in transitu & affricu cibi & potûs, dicendum est. Nisi enim esset ista in edendo & bibendo voluptas, apud multos studium & cura transmittendi alimenta ad ventriculum, &

Q q q q

indivi-

individui sui sustentandi, refrigeraret.

Suar. lib. 5.  
c. 5. de  
Anima.

Franc. Suarez lib. 5. c. 5. de Anima, eodem modo, doloris, sive qualitatis doloriferæ resultantiam, post Simonem Portium, expedit.

*Dicendum, inquit, in dolore, non calorem tantum, vel frigus sentiri, nec solam divisionem, aut commotionem organi tactus, sed qualitatem inde resultantem, quæ dolorifera qualitas dici potest. Veluti cum ex calefactione vehementi fit dolor, quem tactus sentit, eius obiectum non est calor, nec calefactio. Nam si à calefactivo separes manum, cessat calefactio, & tamen dolor sentitur, ac fortè vehementior. Est ergo obiectum qualitas aliqua tangibilis, quæ ex calefactione, seu intemperie inductâ resultat. Similiter cum per divisionem causatur dolor, non ipsa divisio est quæ sentitur; cum citò transeat, nec ferè dum sit, ullus fit dolor: sed eâ factâ aliquis humor accurrit, distemperamentum cansans, unde resultat dolorifera qualitas secunda, quæ sentitur. Vtpote per se sufficiens immutare tactum, violentiamque ac dolorem inferre.*

*Ita hanc rem, sanè difficilem, explicat Portius. Et proportionaliter videtur loquendum de delectatione tactus, quæ dolori opponitur.*

Et Lib. 8. c. 13. de Angel. sibi consentienter: *Lesio carnis, inquit, ei disconveniens, per doloriferam qualitatem, est obiectum doloris.*

Arist. lib. 6.  
c. 6. Top.

Aristoteles autem tantum dicit, *Divisionem partium naturâ conjunctarum, non esse dolorem, sed effectivam doloris.* Sed non dicit, an divisio illa proximè, an mediante aliquâ aliâ qualitate doloriferâ, dolorem efficiat.

Verum, licet experientia favere videatur, tam in voluptate, quàm in dolore, percipi tactu qualitatem aliquam peculiarem, quæ per modum qualitatis secundæ, à primis, vel alijs secundis resultet; apud Peripateticos, tamen, aut alios veteres Philosophos, ejusmodi qualitatis mentionem non invenio. Vnde grandis mihi oboritur suspicio, illam supernumerariam & fictitiam esse.

Ad excitandam enim delectationem, vel dolorem in appetitu sensitivo, sufficit, ut tactus, & deinde phantasia cognoscat qualitatem, sive dispositionem convenientem, vel discon-



disconvenientem organo tactûs: qualis est illa dispositio, ex qua qualitas ista nova delectabilis, vel dolorifica resultare dicitur. Quem ergo usum talis qualitas habet; cum si dispositio, quæ est causa resultantiæ ejus, tactu immediatè percipiatur, delectatio, vel dolor in appetitu sensitivo, eodem modo excitandus sit? Nam ex perceptione ejus, quod secundum naturam conveniens est, illicò emicat in appetitu delectatio; sine alia qualitate, tactum quasi deliniente. Nam tametsi interponeretur talis qualitas, non aliâ tamen ratione, in appetitu delectationem suscitaret, quàm quia naturæ esset conveniens. Quid enim delinimentum, aut blandimentum istud, quo qualitas illa nova delinire, & blandiri tactui dicitur, aliud esse potest, quàm quædam cum naturâ animali convenientia, congruitas, & symmetria? Si igitur congruitas inveniatur in dispositione organi tactûs, ex quâ blandula illa qualitas resultare jubetur; quid opus ista qualitate, nisi ut congruitatem iteret, & cumulet ex supervacuo?

Et eodem modo de dolore philosophandum. Nempe, ubi tactus & phantasia solam organi tactûs intemperiem perceperint, etiamsi quæcumque alia qualitas dolorifera abstergetur, dolor immediatè in appetitu sensitivo excitabitur.

Duæ sunt autem generaliter doloris causæ: *Vna quidem*, Galen. lib. 2. *dum temperies subitò mutatur*, ait Galenus, *altera dum continuas* de loc. affect. *solvitur*. Priori modo dolet, qui subito & vehementi frigore corripitur. Altero modo, cui vulnere, aut contusione aliquod membrum læditur. Etsi tamen ipsa præcisa & nuda divisio continui, non videatur per se & proximè tactu sentiri, & dolorem inferre; sed intemperies potiùs organi, ex humore aliquo mordace, ad vulnus, aut ad partem læsam affluente. Nam affluxus ille humoris, quia certis solùm temporum intervallis ad partem offensam appellit, aut ibi paulatim in quandam mordacitatem acefcit; videtur esse causa, quare vulnere non statim initid, sed tertio circitèr die gravissimus sit dolor, ut docet Vallesius ad illud Gen. 34. *Die tertio, quando gravissimus vulnere dolor est.* Gen. 34.

Hinc argumentum Suarii superius propositum facile dissolvitur. Colligebat enim doloriferam quandam qualitatem ex nimia calefactione resultare in organo tactûs, & eam, non autem calorem, sentiri, quando manus nostra nimio calore ustulatur. Hæc verò collectio invalida est. Nam, ut ipse fatetur, per talem caloris excessum inducitur quædam intemperies, organo disconveniens. Hæc autem sub ratione doloriferi à tactu immediate percipi potest; neq; opus est aliâ qualitate dolorificâ, ut anima crucietur. Illa autem intemperies partim ex calore nimio, partim ex defectu frigoris congruentis, item densitatis, aut raritatis, ceterarumque qualitatum secundarum debitarum organo, componitur. Vnde mirum non est, quòd cuncta ista intemperies aliter, & sub ratione doloriferi percipiatur, quàm quando calor modicus solitarie sentitur. Nam eadem qualitas prima, ut exemplo docet Galenus, nunc ut delectabilis, nunc ut dolorifera, prout huic, aut alteri qualitati, vel circumstantiæ conjungitur, tactu percipitur.

Idem lib.  
de tremor.

*Quemadmodum enim, inquit, quod ad naturam palam revertitur, est incundum; ita quod à natura pari modo recedit, dolorificum est. Quare unum idemq; frigus aliàs delectat, aliàs dolore afficit. Nam si frigus corpori extra modum calefacto admotum fuerit, id prorsus delectat. At si corpus suam naturam retinens confertim refrigeretur, dolebit.*

Pro ratione autem diversitatis intemperierum, aut humorum, organum tactûs morsicantium, resultant dolores diversæ speciei in appetitu. Sicut etiam intemperies crucians longè aliter tactu percipitur in uno dolore, & altero. Aliam enim dolorificam qualitatem sentire se experitur qui podagrâ, & aliam qui colicâ laborat. Veluti aliam longè voluptatem, qui Venereo, & qui gulæ pruritu titillatur.

Non solum autem tactus, sed & ceteri sensus, dolore affici dicuntur, quando objecta ipsorum, cum impetu & vehementia quadam in eos incurrunt. Sed tamen dolor tactûs, per excellentiam dolor appellatur. Est enim maximè atrox; quia tactus est crassissimus, ait Fernelius; atque in compactiore materia posuit, primus sensuum, & omnium animantium communis, & qualitates

Fernel.  
lib. 2. c. 6.  
de morb.



*tates in quibus hic versatur, sunt maximè efficaces.* Imò, si res acutè inspicatur, quando alij sensus dicuntur ab objectorum suorum vehementia lædi, & dolere, solius tactûs dolor est. Temperies enim, vel continuitas organi violatur, quam noxam sentit tactus, qui cum illo alio sensu, in eodem organo stabulatur. Vt cum lux vehemens fundit humores, aut intendit tunicas oculi; cum tonitruum, aut bombardæ sonitus, aëre in aurem impulsio, tympani membranam laxat &c. non visus, vel auditus propriè, sed tactus cruciatur, id est, cruciantem qualitatem percipit, unde dolor resultat in appetitu.

## ARTICVLVS III.

*Quenam pars animalis sit organum tactûs.*

**M**agna hîc inter Medicos, & Peripateticos est rixa. Aristoteles, quia ad operationem sensûs, præter objectum & organum, aliquod insuper medium inter utrumque requirit, per quod objectum speciem sui in organum trajicit; negat carnem animalis esse organum tactûs, sed nervum potiùs quendam, expansum sub carne. Tactum enim & gustum in eo assimilât & pariat. In gustu autem, caro linguæ porosa (secundum ejus philosophiam) est medium, per quod species saporis trajicitur ad organum gustûs, sive ad nervum gustatorium, qui sub carne later.

Arist. lib. 2.  
c. 11. de  
Anima,

Aliàs enim, nisi caro inter objectum gustûs & tactûs, ac sensoria eorum, media intercederet, metuit, ne sensibile positum supra sensum, sensationem efficere posset. Quod effatum, quia in visu verum esse apparebat, voluit irrefragabiliter in omni sensu locum habere.

Sed tamen idem Aristoteles alibi postea, in Anatomia animalium fortasse magis eruditus, *Caro*, inquit, & quod *carni analogum est, vim sentiendi obtinet.* Si autem in carne, & partibus carni analogis, proportionemque cum ea habentibus, tactus inest; igitur caro non tantum est medium sentiendi, sed est organum ipsum, saltem partiale, tactûs. Imò in fine

Lib. 2. c. 5.  
de part.

Lib. 3. c. ult.  
de Anima

etiam tandem Librorum de Anima, tactui medium necessarium esse negat; nisi quis verba ejus sat clara, quæsitâ interpretatione, ut quidam faciunt, infuscare velit. *Omnia sensoria, inquit, per aliud sentiendo, faciunt sensationem, & per medium: tactus autem est in tangendo ipsa. Vnde & hoc nomen habet.*

Si autem sensorium tactûs, sine medio quocumque objectum suum tangit, & ideo vocetur tactus; non est jam opus carne mediâ inter organum tactûs, & rem, quam manu tangimus: ac proinde nulla superest ratio, quare carnem & cutem non dicamus partialia organa tactûs; præsertim cum experientia huic rei tantoperè faveat.

Vesal. lib. 2.  
c. 5.

Vnde Vesalius antiquam Aristotelis opinionem refellens: *Mihi ridendi videntur, inquit, qui cutem ob hoc sentire posse avversantur; quòd nullum sit hic medium. Quasi verò etiam nervum proprijs membranjs prorsus denudatum, aut etiam in medio divisum, gravissimè affici non videremus, quoties ipsius denudata substantia acriores pulveres insperguntur. Etsi tamen medium etiam, addit, præter rationem, in tactûs sensu desideraremus; nonne in promptu est ipsa cuticula, cuti obnata, & interim (ut putamus) sensu privata?*

Itaque sensus tactûs non tantùm nervo, sed etiam carni, cutis membranæ, & omnibus partibus animalis inest, ad quas perveniunt nervi, spirituum animalium vectores, quibus illæ partes animalis perfusæ, ac velut illustratæ, virtutis sensificæ complementum accipiunt; nisi ubi propter temperamentum ineptitudinem, spiritus nullam vim sensitivam animalis invenit; ut in ossibus, propter nimiam siccitatem, & in cerebro propter nimiam humiditatem, accidit.

Dentium verò siccam substantiam (non solum membranas & nervos, qui cavitati eorum inseruntur) sentire Galenus & politiores Medici existimant, propter peculiarem temperiem, & spirituum animalium copiam, qua perfunduntur.

Cutis autem, quia extrema pars animalis, & velut in excubijs posita, ut tactu suo noxas quæ extrinsecus incurrunt, renunciet, exactissimi sensûs est. Vnde etiam, quia tactus solas qualitatum primarum exuberantias percipit, cutis temperamentum inter calidum & frigidum, humidum & siccum, ferme



fermè æquilibre habet; ut omnium excessus, quantum fieri potest, ex æquo persentiscat. Infiniti quoque propemodum nervorum surculi ad cutem appellant, per eam sparguntur, eamque intexunt; ut proinde cutis nihil aliud sit, aiunt Medici, quàm nervus carnosus, aut caro nervosa. Nervuli autem isti sunt spirituum animalium canales, quibus tota cutis, ad tactûs sensum, ac ejus acrimoniam, rigatur ac imbuatur.

Omnes quippe nervi, sive ex cerebro proximè, sive ex medulla spinæ dorsi nascentur, spiritum animale à cerebro illapsum vehunt, quo facultas tangendi, in operatione sua, valeat uti.

Vnde Galenus: *Tactilem facultatem*, ait, quòd ad cognitionem spectat, natura ceterarum crassissimam fecit. Quam uni definito loco, sicut alias omnes, minimè adscripsit, sed per corpus universum dispersit: ac proinde plures ei nervos exiliores durioresque, & qui magna ex parte à spinali medulla oriuntur, indidit.

Galen. lib. de Organo olfact.

Ideoque idem alibi: *Omnes nervi*, ait, utramque facultatem, sensitivam & motricem habent: etsi molles ad sensum aptiores sint, duri ad motum. Propter quæ ultima verba, nescio quid sibi velit Vesalius noster, ubi ait, ridendam esse *Anatomicorum Principis rationem*, qua is confingit, quosdam nervorum surculos motui tantum, alios autem sensui præesse. Quasi verò quis nervorum surculus sensu tactûs destitueretur. Nam profectò Lib. I. de Locis affect. quem Vesalius citat, id dicere Galenus mihi non videtur.

Idem lib. 4. Anat.

Vesal. lib. 4. c. 14.

Docet ergo Galenus, quod Vesalius, nervos etiam illos duriores & motui destinatos, spiritum animale à cerebro, ut lumen à sole, in nervum defluentem, præbere nervo non solum vim motricem, sed etiam sensificam.

Et Fernelius: *Tactionis sensus*, inquit, quem omnes ex aquo animantes participant, nervis nervorumque fibris in omne corpus diffusis indiget: quibus suscepta tractabiles qualitates, cum spina medullâ, & cerebro, qua sensus & motus principia sunt, continuatione communicantur.

Io. Fernel. lib. 1. c. 2. de Physiol.

Præter verò cutem, quæ est pars animalis extrema tactu prædita, est cuticula, Græcis ἐπίδερμις, cuti superinducta, tanquam vagina, aut lorica ejus. Hæc aërem, corpus nostrum ambientem

ambientem proximè tangit. Tenuis, sicca, & pellucida est, ut per eam cutis ex parte transpareat. Vnde à cute visu discerni nequit, nisi ab ea divulsa fuerit: ut cum infusâ cuti aquâ fervente, in vesiculas pustulasque pellucas surgit. Hanc Vesalius, Laurentius, & Medici (non omnes tamen) negant animatam, & sensu præditam esse. Est enim, inquiunt, quædam tantum efflorescentia cutis, ex recrementis ejus unctuo-  
sis, in superficiem rejectis, & ibi induratis, concinnata.

In manuum tamen volâ, & plantâ pedum crassior & durior est, ut experientia docet, quando duro labore manuum, aut longo itinere pedum, excitantur vesiculæ, quibus cuticula à cute inferiore divellitur; quæ vesiculæ, acu transiguntur, nullo cuticulæ sensu.

Hanc cuticulam unguentis & frictionibus, ad solem, aut aliter, dicebantur olim feminæ, aut effeminati curare:

*Quæ tibi summa boni est? unctâ vixisse patellâ  
Semper, & assiduo curata cuticula sole.*

Perf.

Andr. Laurent.  
sent. lib. 6.  
c. 4.

Laurentius *primarium cuticula usum* esse dicit, *ut sit medium tactus*. Non quasi tale medium, ad transmittendas species tangibiles in organum tactus necessarium sit (quale medium respuunt Medici) sed ut cutis illo cuticulæ operimento lorata, aëris & contrariorum agentium injurias patientius ferat. Aliàs enim cutis nostra rubicundula, & tenera nimis, cutique infantium recens natorum similis esset, in quibus nondum cuticula planè effloruit.

#### ARTICVLVS IV.

*An tactus ad sentiendum speciebus tangibilibus indigeat.*

**V**T brevissimè absolvam, qualitates tangibiles secundæ à primis separandæ sunt.

Dico ergo in primis, qualitates tangibiles secundas nullâ intermediâ specie tangibili, sed immediatè tactu percipi, eo modo quo percipi possunt. Ut mollitiem luti dicimur tactu cognoscere, quando pedi nostro calcanti lutum cedit

infra



intra seipsum: duritiem verò lapidis, quando resistit imprimenti. *Molle enim est*, inquit Aristoteles, *quod cedit in seipsum, & non obstitit.* Arist. lib. 2.  
c. 2. de  
Generat.

Contrà verò, si aliquod corpus cuti nostræ prementi non intra se recedat, sed cutem potiùs repellat, aut comprimat, durum appellamus.

Ad hæc autem percipienda, non opusest peculiari aliquâ specie tangibili, distinctâ à specie tangibili qualitatum primarum, si hæc fortasse speciem aliquam habent. Nam recessus corporis mollis, vel repulsus, aut compressio cutis, quæ fit à corpore duro, sunt motus tantùm locales: motus autem localis est sensibile non proprium, sed commune; quod peculiari specie non indiget, sed speciei sensibilis proprij modificationem quandam solum imprimit, ut superiùs ostensum est.

Simili modo, asperitas, lenitas, & reliqua tangibilia secunda, aut motu aliquo, aut quiete locali percipiuntur. Si enim organum tactûs, per superficiem tabulæ tractum, offenda-  
tur, & hîc, aut ibi resiliat, sensus judicat tabulam esse asperam: si non resiliat, sed æquabiliter decurrat, dicimus esse lenem.

Gravitas quoque & levitas motu aut quiete organi tactûs percipiuntur. Si enim corpus manu, aut capite gestatum, deprimat brachium, vel cervicem, judicamus esse grave; si non, vocamus leve. Vnde pro ratione virium hominis sustentantis, quippiam grave, aut leve appellatur. Onus quippe pueri grave, viro leve sæpe dicitur.

Qualitatibus verò tangilibus primis, Peripatetici plerique dant species tangibiles, quibus illæ qualitates percipiuntur. Vnde calor ignis, inquit, præter calorem similem, etiam speciem tangibilem, diversæ à se rationis, per aërem spargit, & organo tactûs hominis se calefacientis imprimit. Quâ opinione adjuvant se multi veteres Scholastici, in explicanda ratione, quâ ignis dæmones, & animas corporibus exutastorquere valeat in Inferno. Nam licet ignis calorem, inquit, non ijs imprimat, speciebus tamen tangibilibus eos perstringit, & sic torquet.

Verum species tangibiles re verâ sunt qualitates corporeæ, nec magis dæmoni, aut animæ rationali à corpore separatæ imprimi possunt, quàm calor, aut alia qualitas prima.

Dico igitur calorem, & ceteras qualitates primas activas, nullam speciem tangibilem aliam producere, quàm qualitatem sibi similem. Calor enim alium calorem, frigus aliud frigus efficit, nullam aliam speciem. Natura enim non gaudet superfluis, nec ulla experientia ad alias species tangibiles agnoscendas nos cogit.

Imò earum superfluitas hòc argumento sat validè ostenditur. Nam calor nunquam organo tactûs actione intentionali, ut vocant, speciem tangibilem, fatentibus etiam adversarijs, imprimit, quin etiam simul actione reali, calorem sibi similem imprimat; cùm experientiâ constet, organum tactûs semper calefieri, quotiescumque calorem percipit. Si enim sine calore concomitante, species tangibilis imprimi posset, calidum ut quatuor, ab organo calido ut quatuor, tactu percipi valeret. Si verò semper speciem tangibilem comitetur calor; quid opus tali specie, cùm ejus vicem, & totum speciei officium calor organo impressus implere possit?

Respondent quidam, calorem nimis crassum esse, ut speciei officio fungatur.

Sed crassamentum istud caloris, imaginarium est. Nec simplex caloris qualitas est magis plena & obesa, quàm fictitia speciei tangibilis tenuitas.

Imaginatio verò ista tenuitatis, & cujusdam veluti spiritualitatis speciei sensibilis, ab objecto visûs occasionem & originem sumpsit. Quia enim color, in pariete palàm visibilis est, apparet aliquid crassius & pinguius, quàm species, quæ invisibiliter per medium aërem in oculos venit. Et inde ceterorum sensuum species, aliquid tenuius macriusque, quàm sint objecta à quibus mittuntur, imaginati sunt. Cùm tamen in philosophia nostra, quam toties antè inculcavimus, omnium sensuum objecta fundant & radient species ejusdem secum naturæ & rationis. Vt enim calor non aliam speciem, quàm calorem sibi similem; ita nec lux nisi radium luminis, ejusdem



eiusdem secum essentia & rationis, sonus nisi sonum, odor nisi odorem, sapor nisi saporem effundit; etiam si aliorum sensuum species magis in conservari dependeant à suis objectis, quam calor genitus à calore qui eum genuit. Quia videlicet, calor qualitas prima est, quæ temperamenta corporum mixtorum intrare debet; ideoque ab alio calore perpetuo præsentente pendere non debuit, nec potuit.

Aliàs enim absente igne, illicò dissolverentur omnia mixta, quæ ipse calore suo miscuit, & generavit.

Sed calor impressus manui nostræ à calore ignis, debetne appellari species tangibilis caloris ignei, qui eum produxit?

Resp. Si manus non tantum percipiat calorem qui ei inhæret, sed etiam calorem à se distantem, qui in igne est; calor manûs potest vocari species tangibilis illius alterius ignei caloris. Quippe officio speciei fungitur; quandoquidem tactus nostræ manûs mediante tali calore ab igne impresso, ducatur in cognitionem caloris qui igni inhæret.

Et sic opinatur Durandus. *Calor distans*, inquit, *ad hoc ut sentiatur, oportet ut calefaciat medium usque ad organum, ut experimur. Et idem est de sapore. & quocumque alio sensibili. Ergo à simili, videtur quod actio caloris in medium, & in organum sit una voca: quod non esset, nisi calor, & sua species essent univocationis.*

Durand. in  
2. d. 3. q. 6.

Sed apertè contra Aristotelem, qui negat ullum esse medium externum tactus. *Omnia enim sensoria, ait tandem in fine Librorum de Anima, per aliud sentiendo, faciunt sensum, & per medium. Tactus autem est in tangendo ipsa. Et ideo hoc nomen habet.*

Arist. lib 3.  
c. ult de  
Anima.

Vnde secundum Aristotelem, manus hominis ante ignem positi, non sentit calorem igni inhærentem, per aërem tantquam per medium externum; sed tantum sentit calorem quem tangit (ideo enim, ait, iste sensus, *tactus* vocatur) hoc est, calorem manui impressum, aut etiam calorem spirituum, qui ab igne evolant, & manui circumfunduntur, ac cuti ejus artigui sunt, ac eam perstringunt.

Igitur calor manui impressus, aut ei contiguus, non fungitur officio speciei tangibilis respectu caloris remoti, sed est

ipsum solum & unicum objectum, quod tactu percipitur. Quod planè existimo verum; et si Suarez valde refragetur, propter experimentū, quodd proximo Art. inspiciendum erit.

## ARTICVLVS V.

*Argumenta, quibus species tangibiles videntur asseri.*

Io. Porta  
lib. 17. de  
Catopt.

**P**rimò, calor & frigus à speculis concavis, non secùs ac lux aut color, reflectuntur, ait Io. à Porta: igitur sunt quædam caloris & frigoris species, per quas fit illa reflexio.

Resp. Reflexionem istam esse caloris & frigoris, non specierum alterius rationis à qualitatibus primis. Vnde frigus, quod oculo se excipere sentit, is qui nivem à tergo suo in speculo concavo videt, est ipsum frigus oculo ejus inhærens, non alterum, quod nivi inhæret.

Secundò, Quando baculo rem duram, aut mollem attingimus, non minùs duritiem, aut mollitiem tactu percipimus, quàm si manu immediatè tangeremus: ergo species quædam tangibiles per baculi longitudinem ad manum tangens transmittuntur, quibus tactus duritiem & mollitiem loco distantes cognoscit.

Resp. Baculus aliter comprimit manum, & nervos tactiles, quibus manus baculum regit, dum baculo rem duram ac resistantem, & dum rem mollem & cedentem contingimus: & inde, an res dura sit, an mollis, colligimus. Aliàs enim si per species, ab extremitate baculi ad manum trajectas, durities & mollities tactu manûs perciperentur; si extremitatem baculi igni imposeremus, illicò etiam calorem ignis, per species ignei caloris, multo magis sentiremus.

Tertiò, si medius digitus decussatim superponatur indici ejusdem manûs, & globulus aliquis cuspide utriusque digiti simul, vel etiam cuspide solius indicis, contrectetur, globulus duplicatus & geminus nobis apparebit: ergo hoc fit per geminationem speciei tangibilis; veluti geminatâ & divarica-



divaricatâ specie visibili, res oculis strabonis gemina apparet.

Miraculum istud digitorum cancellatorum inexplicabile, & habere *causam abditam* dicit Bodinus. Et verè, mira res est. Sed ignorantia & admiratio nostra inde, credo, provenit, quòd non perinde compositionem, & labyrinthos nervorum organi tactùs, & modum operandi istius sensùs cognoscamus; quemadmodum per tot Anatomicas subtilitates, oculi straturam & modum videndi utcumque intelligimus: ideoque, quomodo res simplex oculis per strabonismum divaricatis, quasi in duobus locis replicata appareat, faciliùs, per diversas pyramidum visualium bases, explicamus.

Io. Bodin.  
lib. 4.  
Theat.

Resp. tamen, Ad explicandum miraculum illud geminatæ rei, si tangatur duobus digitis cancellatis ejusdem manûs, non opus esse speciebus tangibilibus. Nam res illa utroque digito simul, aut altero saltem, proximè tangitur; unde, cùm objectum sit præsens & organo contiguum, per seipsum, sine vicariâ specie, sensum movere potest.

Sed si uno tantùm digito tangatur globulus, nonne alter digitus, qui non tangit ( & tamen duritiem, figuramque globuli etiam sentire sibi videtur ) speciem tangibilem à priori digito, ad sentiendum, accipit?

Resp. nullam tamen, opinione meâ, speciem tangibilem ab digito uno ad alium transmitti. Vnde repetitis ejus rei experimentis, causa miraculi in errore imaginationis mihi videtur consistere.

Digitus enim inferior cui decussatim alius superponitur, tangit globulum; species verò tactionis ( aut quidquid illud est, quod ab organo sensùs externi mittitur ad sensum interiore ) communicatur etiam nervo digiti superioris, ubi digitum inferiorem premit: & sic species illa duplici viâ ad cerebrum & sensum internum perveniens, rem quasi duplicem imaginationi exhibet. Apparet enim non tantùm à digito inferiori ( qui verè eam tangit ) sed etiam à superiori digito contingi; qui tamen aliquanto intervallo ab ea est remotus. Si quis aliud subtilius & verius possit, dicat: nos certè in re tantulâ non parvum naturæ miraculùm agnoscimus.

mus. Et hoc etiam auget admirationem, quòd superiori digiti cuspis, quæ ne quidem tabulam tangit, in qua digitus inferior globulum volvit, sentire tamen eundem globulum, quasi in aëre pendulum, sibi videtur.

Suar. lib. 3.  
c. 26. de  
Anima.

Quartò, *Arguitur principaliter*, inquit Suarez. *Quòd tactus maiorem calorem percipiat, quàm sibi inhæreat: ergo non percipit sibi inhærentem, sed potius rei calefacientis. Si enim proprium sentiret, illum certè, & non maiorem sentiret. Antecedens verò ostenditur. Nam cum quis igni applicatur, sentit illicò vehementem ac molestum calorem; & tamen totum nondum recepit: tum quia longiori egeret morâ, tum etiam, quia si ab igne removeatur, protinus illam caloris vehementiam non sentiet.*

Vnde confici existimat, calorem qui in igne est, trajicere quasdam species intentionales, diversæ rationis à calore, quibus tactus calorem distantem percipiat, & ab eo crucietur.

Sed profectò tactum non cruciat, nisi quod aut continuitatem, aut temperiem organi violat: hoc autem species per se facere non potest; cum potius detur organo, & potentiæ sensitivæ, ut eam in operatione sua perficiat.

Deinde hæc philosophia cum Aristotele, Art. præcedenti citato, manifestè pugnat. Docet enim Aristoteles, tactum per nullum medium externum sua objecta sentire, sed ex proximo & contiguo tantum; & ideo *tactum* vocari. Pugnat quoque cum illo S. Augustini scito: *Tres sensus, odoratus, gustus, tactus, corpulentiores, & quodammodo crassiores sunt, nec se foràs proyiciunt, sed interiùs, quod ad eos pertinet, agunt. Quomodo enim tactus non foràs, etiam usque ad cælum, perinde ac visus, se proyicit, si causa nos calefaciens tam procul absit?*

S. August.  
lib. 4. c. 14.  
contra Iul.

Nam cum Suarez sibi objecisset: *Quòd homo soli expositus sentiat calorem, perinde ac si sol foret ignis: ergo cum in sole nullus sit calor, solùm sentire videmur calorem, qui organo tactûs inhæret.*

Suarez  
ibid.

Respondet N. C. aitque ipsammet virtutem calefactivam solis sentiri. *Qua virtus, inquit, producendo calorem in nobis, producit etiam in tactu species intentionales ejusdem rationis cum ijs, quas ipse calor ignis produceret. Vnde juxta hanc philosophiam, tactus noster*



noſter hinc, ex tanto terræ cælique intervallo, virtutem ſoli inhærentem cognoscit, & ab ea torqueri poteſt. Quod certè magno paradoxo ſimile mihi apparet. Virtus enim calefactiva ſolis, quæ calor non eſt, non magis eſt objectum per ſe tactûs, quàm temperies lactis, ex qua albedo reſultat, ſit objectum viſûs; aut, quàm malleus excitans ſonum, ſit objectum auditûs.

Itaque dico, in illo experimento, quod Suarem decepit, non calorem igni inhærentem ſentiri, ſed illum ſolùm qui organo ab igne diſtante, & ſimul ab igneis ſpiritibus imprimi-  
tur, qui perpetuo quaſi flumine, ex igne expirant, & manum aut faciem hominis ante ignem poſiti perſtringunt, cutem uſtulant, & organum tactûs lædunt.

Cùm autem manum, vel faciem ab igne avertimus, vel aliquid interponimus, quod ſpiritus igneos arceat, minus caloris percipimus; quia affluxum illorum ardentium ſpirituum declinamus; non autem, quia ſpecies tangibiles ignis diſtantis, ne ad nos trajiciantur, impedimus. Probabile tamen quoque eſt, nos non tantummodo percipere calorem cuti noſtræ inhærentem, ſed etiam ſimul illum, qui ſpiritu, aut igni organo tactûs contiguo inhæret. Sine tamen ſpecie tangibili, ſed per ipſummet calorem immediatè. Cùm enim corporum contiguorum extrema ſint ſimul, calor inhærens ſpiritu igneo, manui noſtræ contiguo, cenſetur etiam quodammodo manui inhærere, adeoque valde veriſimiliter poteſt tactu percipi. Vnde jam mirum non eſt, retractâ manu ab igne, ſenſum illum ardentis caloris illico deſinere.

Poſtremò tamen, ſpecies tangibiles videntur aſtrui argu-  
mento, quo corpora dura in aëre, vel aquâ, negantur ſe immediatè contingere. Igitur cùm manus lapidem apprehendit, ſi aër inter ſuperficiem manûs & lapidis ſit intermedius, frigus & durities lapidis, quæ tactu manûs percipiuntur, ſpeciem aliquam tangibilem, per aërem illum medium, trajicere debent ad manum. Antecedens probatur ab Aristo-  
tele, duorum lapidum experimento; qui licet in aqua ad oculum, & ad omnem ſenſum videantur eſſe ſibi immediati & contigui,

Ariſt. lib. 2.  
c. 11. de  
Anima.

contigui, superficies tamen, in quibus se contingere videntur, humectas habent: ut proinde necesse sit, humorem aliquem intercedere. Nam humiditas illa non est in lapidibus ut subiecto, sed in humore aqueo lapidibus adhærente. Ergo etiam, quando in aëre duo lapides, aut lapis & manus apparent esse contigui, aliquid tamen modici aëris interponitur; etiam si, inquit Aristoteles, id sensu deprehendi non possit, sicut in aqua; quia aër est invisibilis.

Deinde alio longè certiori argumento probatur, quòd quando duo corpora dura, in aëre, vel in aqua ad mutuuum contactum motu locali veniunt, nequeant se in superficie divisibili contingere. Nam si id fieret (quantumcumque parva esset illa superficiiei particula;) aër iste inter utramque superficiem interceptus, vel immotus manet, vel loco cedit. Si manet immotus; ergo duo illa corpora, si usque ad immediatum contactum perveniant, ita ut eorum extrema sint simul, penetrant illius aëris profunditatem: quod fieri non potest, quia penetratio dimensionum naturaliter est impossibilis.

Si aër loco cedat; non potest in momento cedere, nec tam citò è mediâ areâ superficierum ex marginibus, quàm aër marginibus vicinior, recessisse: nisi transiliret, per motum ab extremo uno ad alterum, sine transitu per medium: quod iterum naturaliter est impossibile.

Restat igitur, ut è mediâ superficierum ad contactum convenientium areâ, successivè per extremos margines aër mediæ areæ expellatur; & proinde, ut interea temporis vacuum à tergo, in mediâ illâ areâ relinquatur, quia nullus alius aër ei succedit. Nam in ultimo momento, quo aër extremo margine superficierum excidit, fieri deberet immediatus duarum superficierum in medio & extremitatibus simul contactus, sine ullo prorsus aëre interjecto, qui eas superficies disiungat.

Vnde, si hoc capis, tam certum est, inter duas tales superficies aliquid aëris interesse, quàm est certum, penetrationem dimensionum, motum ab extremo ad extremum sine transitu per medium, & denique vacuum in rerum natura non posse dari.

Secus



Secus est verò, ubi alterum duorum corporum est molle & flexibile. Tunc enim potest alterum immediatè tangere; quia mollitiæ & flexibilitate suâ, ita se circumfundere, & componere valet, ut sine ullo ex tribus illis inconvenientibus, alterum immediatè contingat. Sic aër, vel aqua lapidem contingit, & superficie concavâ proximè eum ambit.

Ex antè dictis sequitur, quod in Scholâ Philosophicâ olim discipulis meis sæpe demonstravi: sphæram ferream Tormenti majoris murum lapideum frangere, etiamsi in solo puncto, non in parte divisibili, eum tangat. Id est, licet re verâ non tangat; quia ubique inter superficiem sphæræ, & superficiem muri, est aër intermedius. Nec ideo impetus est mollior: quia aër ibi à natura retinetur immobilis, nec minùs impellit, quàm si ferreus esset.

Ad argumentum igitur superius, neganda sequela. Nec enim, quia manus mediante tenuissimâ aëris, ut sic dicam, membranâ lapidem tangit, ideo species tangibiles frigoris aut duritiæ lapidis, per illum aërem, ad manum quæ frigus & duritiem tactu percipit, trajici est necesse. Sed sicuti manus induta chirothecâ percipit frigus, sibi mediante chirothecâ à lapide impressum; ita etiam mediante illo tenuissimo aëre, qui quasi chirothecæ vicem subit. Durities autem sentitur, non per species aliquas tangibiles, sed ipsâ compressione organi tactûs, qua lapis ei non cedit, sed resistit, ut superius diximus.

Deinde quia caro manûs mollis est & porosa, facilè accidere quoque potest, sicut notat Philoponus, ut aër intermedius poros manûs subintret, & sic inter manum & lapidem fiat immediatus contactus. Quanquam tamen, si de carne manûs sentiente loquamur, inter eam & lapidem semper interponatur cuticula, quæ sensu caret, imò animâ, ut plurimi Medicorum censent.

## ARTICVLVS VI.

*Cur excellentia tactûs dicatur signum ingenij.*

Arist. lib. 2.  
c. 9 de  
Anima.

**A**Ristotelis doctrina est : quòd sicut homo cetera animalia ingenio & prudentiâ antecit; ita etiam excellentiâ tactûs cuncta superet. Vnde etiam qui inter homines bonitate tactûs alijs præstant, ingenio quoque emineant. Bonitas verò tactûs, ex organi, sive carnis optimâ temperie pendet; cuius index est mollities carnis. Mollities, inquam, non aquea & crudior, qualis in feminis; sed aërea & temperato calore decoctior, qualis in ingenio præstantibus viris. Hinc *κλῆροσάρκους* duos carne, mente ineptos esse, *μαλακασάρκους* molles carne, ingenio pollere dicit.

Laërt. in  
Diogene.

Et abhinc etiam *παχύδερμος* crassæ pellis homo, pro stupido solet usurpari. Qui enim crasso stamine pellem & carnem contextam habent, ingenio, sicut & tactu, plerumq; obtusi sunt. Crassities autem ex crasso, aut multo cibo sæpe concreescere solet. Quamobrem rogatus quondam Diogenes, cur athletæ ad ictus cæstum, & luctas, contortionesque membrorum tam insensibiles essent: *Quia, inquit, suillis & bubulis carnibus edificati sunt.* Ad robur enim corporis, multâ carne suillâ & bubulâ athletæ inferciebantur, & isto alimenti crassamento tactum pariter & ingenium obruebant.

Athenæ.  
lib. 10.

Thebani quoque, ac universim Bœoti, quos Poëta Eubulus apud Athenæum, *totos guttura, & ad convivandum die noctuque, viros strennos* appellat, stupore mentis infames erant.

Themist.  
lib. 2. c. 32.  
de Anima.

Ex tenuitate autem staminum cutis & carnis, unde proximè oritur excellentia tactûs, subtilitas etiam ingenij intelligitur: *Quia in tali corpore, ait Themistius, primus innatusq; spiritus animæ facilius funditur, & liberiùs expeditusq; discurrit. Contrà verò, durities & crassitudo obturant oppilantque meatus, & quasi repagulo sunt, ne purus & liquidus transmittatur.*

Io. Bever.  
lib. 2. c. 32.  
de Anima.

Corpora autem, quibus talis tenuitas molliciesque carniū, & ingenij acumen contigit, *non valde pingua, ait noster Beverus, alba mixto rubore sunt, cutis subtilis, pili non valde duri, nec valde*



*valde nigri, ut scribit Aristoteles in Physiognomicis.* Albertus inter ista ingenij signa, *tenuitatem unguium* addit. Tenuitatis autem signum esse puto, si caro per ungues, roseo colore transpareat.

Sola tamen libertas meatuum, per quos discurrunt spiritus animales, non satis est ad ingenij celeritatem, & acumen, etiam si Themistius non aliam causam assignet; sed præcipua causa in spirituum perspicuitate & agilitate poni debet, quibus rerum sensibilibus imagines vehuntur, & ante oculos mentis eunt, redeuntque, per circuitus & discursus rationationum.

In summâ igitur, quibus caro mollis, id est tenuis & bene temperatâ, valent tactu; quia excessum cujusque qualitatis tangibilis statim persentiscunt. Si verò caro bellè à naturâ temperata est; igitur & cerebrum, quod spirituum animalium officina est. Nam natura, in partibus corporis humani, nisi impediatur, temperamentum ad justitiam, ut vocant, id est secundum proportionem Geometricam moliri & fabricare solet. Vt si caro temperiem perfectam, in ratione temperiei debitæ carni, habeat; etiam cor, cerebrum, ceteræque corporis partes proportionalem, & optimam sibi que condebitam complexionem nanciscantur: ita ut in Geometricam & harmonicam quandam proportionem universa membra conspirent. Si ergo caro, & instrumenta tactus consentaneam naturæ suæ temperiem nacta sunt; igitur & cerebrum, ac membranæ, ventriculi que ejus, & universa spirituum animalium officina naturali suo igne tepet, sicut ad optimorum spirituum generationem est necesse.

Debet tamen præterea adesse materia conveniens, quæ domari, & in spirituum perspicuitatem bonitatemque transformari facilis sit. Vnde multum refert, quo cibo ac potu utantur homines, & in quo aëre vivant: quia partem aëris, per nares attracti, in spiritus animales subigi & edomari à cerebro, Medici existimant. Denique ad consummatam ingenij perfectionem, debet, præter temperiem, capitis quoque & cerebri, membranarumque certa mensura, figura, & conformatio accedere.

Io. Argent.  
Comment.  
2. Arrem  
Gal.

Andr. Laurent. lib. 10.  
c. 3.

*Figura autem capitis, apud Hippocratem & Galenum, si naturalis sit, ait Laurentius, spherica oblonga, anteriore & posteriore parte protuberans, & utrimque ad latera depressa, signum est prudentis hominis. Contrà, acuminatum & turbinatum caput, Pothæ dicunt, quale censetur fuisse Thersitus apud Homerum, fatuum, stolidum & amentem arguit. Quod à Vesalio sumptum est.*

Quale tamen acuminatū & stultorum caput, in aliquot ingeniosissimis & sapientissimis viris me deprehendisse memini. Nam tale Excellentissimi Marchionis Ambrosij Spinolæ fuit. Nec ab hac imagine pleraque Genuensium capita dicuntur abluere. Tale quoque Eximij M. N. S. Theol. Doctoris, Ioannis Wiggers, qui egregia Commentaria in totam S. Thomæ Summam nuper edidit. Tale & Eruditissimi D. Nicolai Bardouli, Philosophiæ Professoris Primarij, & in Pædagogio Falconis Lovanij Collegæ quondam nostri. Adeo leges istæ Naturæ nunquam tam inflexiles sunt, quin multis exceptionibus valeant infringi.

Quærit etiam Beverus noster: Quare bonitas quoque visus, aut alterius sensus, non perinde sit index ingenij bonæque mentis, ac subtilitas tactus?

Io. Bever.  
lib. 2. c. 9.  
de Anima.

Respondet: *Quia instrumentum tactus per universum corpus fufum est, non ut reliquorum sensuum, in certa ejus parte situm. Quare ad totius corporis temperationem idem pertinet. Quam temperationem quia animi constitutio sequi solet; idcirco qui hujus sensus judicio inter homines excellunt, idem reliquis ingenio præstant, quoniam carnem habent molliorem & melius temperatam.*

Colon.  
Albertistæ  
lib. 2.  
Tract. 3.  
de Anima.

Hanc autem temperamenti bonitatem, Laurentiani Colonenses, cum suo Alberto, in quadam qualitatum primarum mediocritate constituunt, qua caro humana (& maxime cutis, quæ est extrema ejus vestis) tam propè quàm fieri potest, accedit ad *temperamentum*, quod vocare solent ad pondus.

Tactus enim, qui talem in organo suo temperiem obtinet, statim agentium externorum alterationes percipit. Nam talis est natura tactus, ut exuberantias tantum qualitatum primarum sentiat; hoc est, qualitatem magis intensam, quàm sit ea, quæ



ea, quæ organum ejus temperat. Vbi autem omnes qualitates organi ad mediocritatem reductæ sunt, faciliè ab agentibus externis adjicitur quod exuberat; & sic tactu percipitur.

Quia verò sensum, quo in partibus pudendis voluptas Veneris sentitur, *sextum sensum* esse Scaligero negamus, sed partem tactûs, ejusdem rationis cum aliarum partium tactibus, esse diximus; verisimile est, ingeniosos homines illarum quoque partium tactu præstantiori esse. Vti & illo tactu, qui in cibi potusque per fauces transitu & affrictu, voluptatem gulæ percipit. Ista enim voluptas non ad linguæ gustum propriè, sed ad tactum faucium pertinet, ut alibi diximus. Quod Aristoteles appposito Philoxeni gulonis exemplo probat: qui non linguam latiorem bove, sed *φάρυγγα μακρότερον γέρας* fauces longiores grue, sibi optabat; ut longioris tangibilis voluptatis affrictu, non ampliori saporis degustatione, frueretur.

Inl. Scalig.  
Exerc. 286.

Arist. lib. 3.  
c. 13. Ethic.

Hinc colligi videtur; hominibus ingeniosis, ut pote tactu excellentibus, difficiliorem esse temperantiam Veneris & gulæ. Quo enim voluptas utraque vivaciùs sentitur, eo petulantior, & adversus frenum moderationemque contumacior est.

## ARTICVLVS VII.

*In quibusnam sensibus, pronunciatum istud Peripateticum verum est? Sensibile positum supra sensum non efficit sensationem.*

**M** Vlti Peripatetici Aristotele ipso pertinaciores sunt, qui hoc pronunciatum in omni sensu valere; nec unquam fieri posse, ut sensus ullus rem supra organum suum positam percipere valeat, contendunt.

Aristoteles tamen fluctuat, dum nunc carnem medium tactûs, nunc eam organum ipsum tactûs appellat. Nam *ἐὰρ ἐξ καὶ τὸ ἀνάλογον, ἀφ' ἧτις καὶ, Caro*, inquit, & id quod cum carne proportionem quandam habet, sensitivum est. Si autem caro sensitiva est, sive sensum tactûs habet; ergo jam non tantum

Arist. lib. 2.  
c. 5. de  
partib.

SSSS 3

est me-

Lib. 2. c. 11.  
de Anima.

est medium, ut in Libris de Anima dixerat, sed etiam est organum tactûs. Vnde quandoquidem rem positam super carnem, carne ipsâ sentiamus, aliquod sensibile positum super sensum, id est, super organum sensûs, ipso sensu qui in tali organo residet, sentire possumus.

Quod etiam experientia affirmat. Nam siue caro, siue nervus sub carne latens, sit organum tactûs, si incidatur, qualitatem doloriferam tali parti inhærentem, tactu percipit. Ridiculum enim est, quod quidam respondent, partem carnis, aut nervi non sentire dolorem suum, sed vicinæ partis, à qua, inquit, speciem tangibilē recipit. Hoc enim est contra finem, propter quem natura partibus animalis tactum dedit: ut unaquæque scilicet pars organica tactu dolorem suum percipiat, & animam noxæ, quam patitur, admoneat. Hinc plurimi Peripateticorum tactum excipiunt ab isto generali pronunciato, *Sensibile positum supra sensum &c.*

Sed & gustum oportet excipere. Nam gustus, tactus quidam est, ut Aristoteles ait. Tangere quippe linguam debet res sapida, ut gustu percipiatur. Summa verò linguæ tunica, quæ attingit, saporem etiam percipit; quia ex filamenti nervi gustatorij contexta est, ut antea ex Vesalio ostendimus.

Deinde, licet in solo nervo, sub tunica, & carne fungosâ linguæ abscondito, gustus resideret, potest tamen liquor sapidus usque ad ejus nervi contactum, per superiores linguæ poros, descendere, & ibi sapor gustu percipi.

In olfactu quoque, probabilissimum mihi videtur, vaporem odoriferum qui subit nares, & ipsas papillas mamillares imbuit, aut proximo contactu ijs circumfunditur, odoratu sentiri. Superiùs enim eam S. Augustini mentem esse excitavi, ubi ait: *Odoratum, gustum, tactum, esse tres sensus corporis lentiores, & quodammodo crassiores, nec se foras projicere, sed interiorius, quod ad eos pertinet, agere.*

S. August.  
lib. 4. c. 14.  
contra Iul.

Imò de auditu & visu idem cogimur dicere. Licet enim foras se projiciant, ut S. Augustinus loquitur, speciem tamen sensibilem organo inhærentem, aut saltem contiguam cognoscunt, & per eam cognitam, foras ad objectum aliud principale, in quo



in quo tota cognitio sensitiva tandem terminatur, se projiciunt.

Vnde re verâ, loco pronunciati istius Peripatetici: *Sensibile positum supra sensum non efficit sensationem*, hoc S. Augustini effectum, probabilius reponatur: *Visus & auditus projiciunt se foras, odoratus, gustus, tactus quod ad se pertinet, interiùs agunt*: ita ut hi tres nunquam aliter operentur, quàm circa sensibile organo sensûs superpositum. Superponi autem potest duobus modis: aut informando ipsum organum; quomodo calor informat cutem manûs, quæ eum percipit: aut per solum localem contactum; quomodo gustus mel degustat, quod linguam attingit. Cui S. Augustini effato experientia, mater Philosophiæ naturalis, non parùm profectò favet, & facillimè defendi potest.

Quia tamen Aristoteli, in præcedentibus Capitibus, aliquid amplius concessimus, & ab olfactu, & gustu odorem & saporem, ex aliquantulo intervallo percipi posse non abnuimus; ideo dogma aliud, doctrinæ tamen S. Augustini vicinum ex Aristotele depromptum, tradere possumus: *Visus & auditus ἀσπάζονται ἐμίνους*; olfactus, & tactus ἐγγύθεν κομίνους; Arist. lib. 2. c. 11. de Animæ objecta sua percipiunt. Nisi quodd Aristoteles olfactum accenseat ijs sensibus, qui eminus, & longè foras se projiciunt: repugnante S. Augustino, & veritate ipsâ, ut opinor, sicut suprà satis multis docui.

Hæc quoque doctrina supponit, sonos in longinquo foris sonantes auditu percipi: cùm tamen antea vehementer dubitaverim; imò in contrariam opinionem delapsus sim: quia soni illi jam evanuerunt illo tempore, quo species eorum audibiles ad organum auditûs appellunt.

## CAPUT VIII.

## De sensibus internis.

**A** Sensibus externis ad internos, quasi à luce solis, in subterranea, & metallicas fossas descendimus. Omnia enim quæ ad sensus istos pertinent, tam potentia, quàm earum sensoria & instrumenta, atque operationes magis

magis in abdito & obscuro sunt, quàm quæ de sensibus externis hæcenus differuimus. Infinitus sim, si per omnium Philosophorum variantes hæc opiniones velim discurrere, & refellere quæ non probo. Deinde castiganda Libri nostri moles, quam jam ultra primam meam destinationem video excrevisse.

Itaque non tam expansè & laciniosè quàm hæcenus, sed paulò accinctior posthac incedere constitui.

S. August.  
lib. 2. c. 3.  
& 4. de  
libero arb.

Atque præter quinque sensus externos, *aliquem etiam interiorem, ad quem ab illis quinque cuncta referantur, & qui omnibus communiter præsideat, etiam in bestiis*, probat S. Augustinus; quia bruta ipsas sensuum externorum operationes, & inter eas, earumque objecta discrimen aliquod percipiunt; quod nullo sensu externo facere possunt. Visus enim nec suam, nec auditus, aut alterius sensus operationem videre potest (quia operationes istæ coloratæ non sunt;) nec quid inter videre & audire, aut inter colorem & sonum interfit, comprehendere valet. Et tamen canis aperit oculum, non arrigit aurem, ut aliquid videat; aliquid inter videre & audire, discrimen agnoscens. Multa etiam appetenda, aut fugienda bestię judicant, quæ nullo externo sensu cognoscunt.

## ARTICVLVS I.

*Quanam sit sensuum internorum sedes.*

**S**ensus quidam interni vocantur, quia organum intus reconditum, non ad superficiem corporis, velut ad excubias expositum, habent.

Aristoteles & Stoici eos in corde, Hippocrates, Galenus, & Medici in cerebro eos collocant: quod omnino certum est. Nam ex rudi adhuc illius temporis Anatomia, Aristoteles putavit in corde, nervorum principium esse; cùm sine dubio, à cerebro sit eorum origo.

Organum igitur & sedes sensuum internorum est cerebrum: quia in cerebrum, non in cor, imagines sensibilibus externo-



externorum, per canales nervorum, à sensibus externis trajiciuntur. Quò autem imagines illæ appellant, ibi est sedes sensuum internorum, qui imaginibus illis in operatione sua utuntur. Vitiatâ deinde imaginatione, aut alio sensu interno delirante, cerebro, non cordi, Medici remedia adhibent.

Sententiam tamen utramque, Aristotelis, & Medicorum, problematicè, ex sacra Scriptura defensat Guil. Estius, ad ista verba Apostoli, *Obscuratum est insipiens cor eorum*. Cor enim sæpe in Scriptura pro mente, seu intellectu usurpatur: ideo, ut apparet, quia cogitativa hominis, unde intellectui species intelligibiles, per abstractionem à phantasmatibus, subministrantur, sedem habet in corde.

Guil. Estius  
Comment.  
Rom. I.  
v. 21.

Vnde Christus: *Ve quid cogitatis mala in cordibus vestris?* Et postea: *Ne corde intelligant*. Deinde: *De corde exeunt cogitationes malæ*.

Matt. 9.  
13. 15.

Sed cogitationes, & operationes intellectus tribuuntur cordi, quia in cor quodammodo à cerebro delabuntur, & ibi se per bonos malosve affectus cordis, manifestant. Et hoc modo dixit S. Augustinus: *Cogitationes malæ sunt in pravo corde, & bonæ in recto corde*.

S. August.  
Psalm. 7.

Aliàs philosophia ubique S. Augustini est, Cerebrum esse principium sentiendi. Aitque *non contemnendum quod Medici non tantum dicunt, verum etiam probare se affirmant: De cerebri medio, velut centro quodam, non solum ad oculos, sed etiam ad sensus ceteros, tenues fistulas deduci; ad aures scilicet, ad nares, ad palatum, propter audiendum, olfaciendum, atque gustandum: tangendi sensum, qui per totum corpus est, ab eodem cerebro dirigi dicunt per medullam cervicis &c.*

Idem lib. 7.  
c. 13. de  
Gen. ad  
litter.

Ac deinde, idem cerebrum, sicut *qualitatem quandam luculentam*, per fistulas illas nervorum, in organa sensuum externorum inspirat; ita etiam, ex sententia eorundem Medicorum, ipsum sensuum internorum officinam esse docet: tres in eo distinguens ventriculos, *in quibus anima, tanquam in organo agit*.

Ibid. c. 18.

## ARTICVLVS II.

*Quot sint sensus interni.*

**M**agna hîc Philosophorum inter se rixa. Nec Medici quoque concordēs.

D. Tho. I. p.  
q. 78. a. 4.

Avicenna in animalibus perfectis, sensus internos quot externos facit, scilicet quinque. Galenus solum tres, D. Thomas inter eos medius, quatuor esse mavult: Sensum communem, imaginationem, sive phantasiam, æstimativam, & memorativam.

Numerum istum ex diversitate operationum colligit. Sensus communis res sensibiles unâ cum sensibus externis, in præsentia objectorum, percipit. Phantasia retinet imagines rerum sensibus externis, ac sensu communi perceptarum, & circa easdem, in objectorum absentia, negotiatur.

Æstimativa novas quasdam intentiones, à sensibus externis non acceptas, apprehendit. Sic æstimativa ovis amicitiam canis, & inimicitiam lupi, nullo priore sensu notam, cognoscit.

Hæc in homine cogitativa, & ratio inferior, & ratio particularis vocatur; quia cogitando, & cogendo inter se terminos, & propositiones singulares, ratiocinatur, & sub ratione superiori, sicut rota minor sub maiore volvitur, & discurrit.

Memorativa servat, tanquam thesaurus, imagines intentionum, quas æstimativa ei tradidit, & ex illis præteritarum intentionum recordatur.

Hæc in homine, quemadmodum æstimativa, perfectior est quàm in brutis, nec tantum simpliciter recordatur, sed etiam reminiscitur; syllogisticè redeundo in præteritorum memoriam. Vnde homini propria est reminiscentia.

Vulgaris tamen hodie Medicorum opinio, teste Sennerto, tres solum sensus internos: sensum communem, phantasiam, & memoriam statuit: quæ etiam videtur mens Aristotelis, qui nomina trium istorum sensuum, nec plura, in ore habere solet.

Conim-



Conimbricensibus tamen binarius, id est, sensus communis, & phantasia sufficit.

Conimbr.  
lib. 2. c. 2.  
de Anima.

Alexander Halensis omnia tandem ad unitatem redigit: ut unus sit sensus interior, quamvis ex varietate operationum, varia nomina induat. Quæ videtur quoque mihi S. Augustini sententia fuisse: imò potentias universim ab anima fortè non distinxisse; aut certè minimum de ea re curasse, verissimilimum est, ut Lib. 1. Cap. vi. Art. 111. dictum fuit.

Itaque facillimè & probabilissimè defendi potest, unicum esse sensum interiorem, ad quem ab istis quinque notissimis sensibus cuncta referuntur, ut S. Augustinus ait. Hic autem nec visus, nec auditus, inquit, nec olfactus, nec tactus dici potest, sed nescio quid aliud, quod omnibus communiter præsidet. Quod cum ratione comprehendamus, hoc ipsum tamen rationem vocare non possum; quoniam & bestiis inesse manifestum est. Et vocat sensum interiorem apud animam. Item, sensum intus in ipsa anima. Deinde, sensum interiorem præcellentem sensibus corporis. Ac sæpissimè, & semper singulari numero, sensum appellat: ut planè appareat, non plures, sed singularem unicumque existimare.

S. August.  
lib. 2. c. 2.  
libero arb.

Alibi verò ex sententia Medicorum sui ævi, tres in cerebro ventriculos distinguit. Unus est anterior ad faciem, à quo sensus omnis (per virtutem scilicet irradiativam, qua cerebrum in sensuum exteriorum operationes influit: ) alter posterior ad cervicem, à quo motus omnis: tertius inter utrumque, in quo memoriam vivere demonstrant.

Idem lib. 7.  
c. 18. Genes.  
ad litter.

Vnde unicum iterum sensum interiorem, in medio cerebri ventriculo constituere videtur, quo anima imaginatur, reminiscitur, & cetera omnia sensuum internorum officia obit & exercet. Nam opinio illorum Medicorum erat, priorem ventriculum irradiationi, posteriorem motui locali animalium destinatum esse.

Et reverà, quid opus est sensum communem à phantasia distinguere, quandoquidem eadem animæ facultas possit cum sensibus externis objecta præsentia apprehendere, & etiam circa simulacra absentium objectorū imaginando phantasiari. Falsitatisq; jam compertum est, quod antiquitas existimavit.

unicum esse in anteriori cerebri regione, sensui communi peculiariter deputatum ventriculum, à quo, tanquam à centro, nervi sensorij ad omnium sensuum externorum organa propagantur. Non enim unicus ibi, sed bini collateraliter dispositi ventriculi sunt, ut ex diligentiori Anatomia constat.

Quid deinde opus phantasia à memoria dividere; cum facultas quæ imaginatur, possit etiam suorum simulacrorum thesaurus esse? Et nonne intellectus unus idemque & intelligit præsentia, & recordatur præterita, & species suas intelligibiles in seipso asservat, tanquam earum arca & thesaurus?

Io. Argent.  
Comment.  
2. in artem  
Gal.

Videat ergo ne fallatur Argenterius, cum memoriae suæ defectum in conformationem sui capitis refert, quod protuberatione occipitis, & cavitate satis amplâ ad memoriae ibi residentiam carebat. *Nam ego, inquit, qui nullam intemperiem in meo cerebro agnosco, minimum tamen in omni ætate, memoriâ valui; nimirum, quod caream eminentiâ occipitis: Quasi verò memoria in solo occipite, & postremâ cerebri cellâ habitaret. Argenterius enim patriâ Pedemontanus fuit. Quotquod autem hîc in Belgio Pedemontanos, aut Sabaudos vidi, complanato tali, & prærupto occipite esse animadverti. Non igitur ipsius singulariter, sed totius gentis suæ ista capitis conformatio fuit. Et tamen inter Sabaudos occipite planissimo, egregiè memoriosos novi. Ac inter alios D. Georgium Ramum, in Pædagio Porcensi hîc Lovanij, Philosophiæ Professore Primarium.*

Deinde Schenkius ex Theodorico Medico narrat, cuidam fabro, ex vulnere occipitis, totum postremæ cellæ occipitis cerebrum à Chirurgo evacuatum fuisse; & tamen mansisse ei memoriâ suæ artis, sicut antè.

Non ergo refert, quòd Anatomici tres numerent (imò recenti & certâ jam experienciâ; quatuor) cerebri ventriculos: quasi totidem sint, ut minimùm, sensus interiores, ut Medici Arabes contendunt. Nam Galenus falli eos, & alium esse ventriculorum illorum usum docet. Ridetque Vesalius antiquum suum in Pædagio Castri Lovanij Philosopho-

Vesal. lib. 7.  
c. 1.



Philosophiæ Professore, qui per ternas cerebri cellas totidem sensus internos disponebat.

Duo enim ventriculi priores, ad summam utrimque frontem collocati, primæ spirituum animalium fabricationi sunt destinati, ut pro certo & comperto Medici hodie, post Galenum affirmant. *Certissimum enim est*, ait Laurentius, *animalem spiritum in cerebri ventriculis superioribus primum generari.*

Galen. lib. 8.  
de usu part.

Andr. Laurent. lib. 10.  
p. 9.

Ventriculus medius primum illud spirituum rudimentum polire pergit. Tertius, qui in occipite est, perpolit, & ultimam formam tribuit. Aliàs nisi ad officia ista, per varias quasi fornaces, spiritus perpoliendi essent, unus ventriculus sufficeret.

Vnde Galenus non per ventriculos numerum sensuum internorum distribuit; sed omnes per universam cerebri substantiam extendit. Licet molliorem humidiorémque cerebri partem ad imaginandum, duriorém sicciorémque ad memorandum aptiorém esse dicat.

Sed majus profecto naturæ & divini Opificis, in cerebri fabricatione, ingenium miraculumque, quàm Medici & Philosophi passim apprehendant, inesse autumo.

Si enim tot oculorum fenestrationes, & aurium labyrinthos tam ingeniosè, ad figuranda & modulanda simulacra quæ foris incidunt, natura architectata est; non dubito, quin millecuplo amplius ingenij & solertiæ in instruendo cerebri organo, quod sensuum internorum, & humanæ mentis arx est, impenderit.

Perpendo enim in primis verba ista Vesalij: *Erasistratum elegantissimè gyros ac revolutiones cerebri, tenuium intestinorum anfractibus assimilasse. Esse enim sinus permultos penitus in cerebri substantiam penetrantes, & profecto imagine intestinorum tenuium revolutionibus simillimos.*

Vesal. lib. 7.  
c. 4.

Cui verò fini facti sunt sinus isti, revolutiones, ac labyrinthi per cerebri substantiam penetrantes, & discurrentes? Natura enim nihil facit frustra. Quis ergo non suspicetur, hæc forsitan esse sensuum internorum latibula? Quem enim alium usum habent?

Andr. Laurent, lib. 8.  
q. 8.

Ista deinde Expertissimi Medici Andr. Laurentij verba peniculo. *Preparatur*, inquit, *(spiritus animalis in plexibus, & superioribus duobus ventriculis, excoquitur in tertio, perficitur in posteriore: tandemq; in nervos, & in totum cerebri corpus diffunditur.*

Denique ex sententia Medicorum, cui experientia vehementissimè favet, ut suprâ Cap. II. Art. IV. dictum est: In cerebro vis quædam irradiativa habitat, & præsidet, quæ per nervorum canales, in organa sensuum externorum, operationesque eorum, tanquam causa quædam universalis, influit; quomodo fermè sol, per Influentiæ suæ radios, causas inferiores (ut animalium, aut plantarum semina) ad operationes suas excitat.

Propter enim hanc cum Influentiâ solis analogiam, Galenus & Medici virtutem *irradiativam* appellant. Sine cujus virtutis adminiculo, nemo hætenus satis expedire valuit causam, quare per obstructiones nervorum, intercipientur & cessent sensuum externorum functiones.

Diximus quoque virtutem illam probabilissimè in ultimo cerebri, ad occiput ventriculo habitare. Ed enim omnium sensuum externorum nervi & canales tandem appellant. Deinde ventriculus ille omnium siccissimus, & ab humorum superfluitatibus purgatissimus, quibus ventriculi priores, ut plurimum, inquinantur. Vnde etiam spiritus animales inter ista priorum officinarum inquinamenta, rudimentum tantum crudæ cujusdam concoctionis rapiunt, ultimâ perfectione dilatâ in postremum ventriculum, tanquam sicciorum fornacem, ubi spiritus illi in ultimam suam temperiem, & fortasse in novam formam substantialem excuduntur. Hoc facto, per virtutem expultricem (qualis etiam est in ventriculo, ubi coquuntur cibi) spiritus animales insufflat in nervos, ac in omnes universim cerebri revolutiones & labyrinthos; quos Erasistratus tenuium intestinorum revolutionibus elegantissimè comparat, ut jam à Vesalio audiebamus.

Vis denique irradiativa, ex eodem postremo cerebri sinu radios suos, per spiritus illos animales, tanquam sol per li-  
quidam ætheris auram, ad organa sensuum tam internorum,  
quàm



quàm externorum trajicit, ac unumquemque in functione sua adjuvat. Non enim solos sensus externos, sed etiam internos, & sibi viciniore, à virtute illa irradiativa irradiari & afflari existimamus. Sicut sol non tantum terræ semina, tam longè à se remota, sed etiam Planetarum, inter quos versatur, Influentialias modulatur & temperat.

Quæ sententia vera esse potest, siue unicus specie sensus internus, per varios cerebri sinus & revolutiones sparsus sit; siue plures diversæ speciei sensus interiores, in distinctis cerebri cellis, aut revolutionum sinibus collocare placet.

Si enim sensus communis, phantasia, cogitativa, memoria, aut quocumque alio nomine censeantur, distinctis cerebri cellis & habitaculis separatæ sint; aut certè unicus sit specie infimâ sensus, qui plurifariam habitans, omnes illas sensuum internorum functiones ( licet unam in unâ cerebri parte, alteram in alterâ perfectiùs, propter diversam & heterogeneam cerebri temperiem ) obeat; potest tamen eadem vis irradiativa in omnes illos cerebri sinus ( nisi viæ & canales obstructi sint ) radios suos spargere, & in varias operationes, pro varietate sensuum, vel temperamenti hujus, aut illius regionis cerebri, influere: simili modo, quo virtus illa eadem radio suo in diversissimas sensuum externorum functiones illabitur.

Alio denique argumento probari potest, vim istam irradiativam in occipite, & cellâ postremâ, quæ in confinio cerebri, & spinæ dorsî posita est, residere. Vt scilicet commodius valeat, tam in cerebrum nervosque ex eo progerminantes, quàm unâ in cavitatem medullæ spinæ dorsî, & in nervos ejus, sensum tactûs in totam regionem inferiorem corporis deferentes, radios jaculari. Vnde & vim irradiativam motûs progressivi in eadem cella Medici collocare solent; quia inde commodissimè in canalem medullæ spinæ dorsî, Influentialiam suam trajicere potest. Imò, fortasse eadem est animæ facultas, quæ & in sensus, & in motum progressivum influit & irradiat.

Hoc quoque novissimè addo: Nomen *sensus communis*, in istam

istam virtutem irradiativam satis bellè posse competere: cùm influxus ejus sit causa communis ac universalis, in omnium sensuum externorum operationes illabens. Et si propriè sensus non sit; quia operatio ejus non est immanens, sed transiens in materiam externam; qualis est irradiatio, qua sol Mundum cælestem, & elementarem illuminat.

### ARTICVLVS III.

*An sensus interni speciebus ad cognoscendum indigeant.*

**P**ER easdem nervorum vias, quibus vis cerebri irradiativa in organa sensuum externorum defluit, species quasdam à sensibus externis redire ad cerebrum, Medicina, & Philosophia Peripatetica suadent, & experientia persuadet.

Nisi enim imagines quædam sensibilibus externorum in cerebrum subirent, in absentia eorum, nec homines nec bestię se vidisse, se audisse &c. recordarentur. Per imagines quippe in ventre memoriæ asservatas fit eorum recordatio.

Sed, suntne ipsæmet species sensuum externorum, quæ ab objectis externis, continuatâ actione usque in cerebrum radiantur?

Non existimo. Nam ab organo visûs, ubi formatur visio, in toto nervi optici tractu usque ad cerebrum, sunt tenebræ spissiores, quàm ut species coloris (præsertim si debilis est) perrumpere valeat usque in cerebrum; & maximè in extremum ejus ventriculum. Deinde species audibilis, quæ per aërem ad auditum trajicitur, non momento, sed temporis morâ progreditur; species verò altera ab organo auditûs in cerebrum momentaneo jactu trajicitur. Simile quoque in alijs sensibus accidit. Tam citò enim imaginatio dolorem tactûs in extremo pedis articulo percipit, quàm in gutture, aut aliâ parte vicinissimâ cerebro. Calor quoque, ut antè docuimus, non per aliquam speciem tangibilem, à calore ipso distinctam, tactu cognoscitur: & tamen ab organo tactûs ad

cerebrum



cerebrum, species alia, quæ non est color, & quidem in instanti trajicitur.

Species igitur sensûs externi, alterius rationis esse videntur à speciebus phantasiæ. Verùm, si ab objecto sensûs externi non trajiciuntur species usque in cerebrum, à quonam alio objecto proximè radiantur? An sensus fortè aliquis agens est, qui eas fabricet pro sensibus internis; quemadmodum intellectus agens fabricat species intelligibiles pro intellectu passibili?

Resp. Sensum talem agentem non agnoscit Philosophia Peripatetica: nec tanta ejus necessitas, quanta intellectûs agentis est. Nam phantasma corporeum in intellectum spiritualem radiare speciem intelligibilem non potest (ideoque intellectu agente est opus; ) sicut imago corporea sensûs externi aliam imaginem corpoream producere & trajicere in cerebrum valet.

Igitur restat (& propagines viæque nervorum, ab organis sensuum externorum ad cerebrum, hoc suadent: ) ut sensuum internorum species impressæ, à speciebus sensuum externorum expressis, in organa sensuum internorû radientur.

Sic ergo se res ista caliginosissima habere videtur.

Potentia visiva oculi exprimit in se imaginem intentionalem, sive conceptum visivum coloris ante se positi. Ista imago aliam sui imaginem in cerebrum jaculatur, ut ex intuitu ejus, sensus interior tam imaginem illam oculi, quàm objectum foris positum valeat cognoscere. Vnde imago cerebri est quædam quasi Copia, ut Pictores loquuntur, imaginis Originalis, quæ est in oculo. Non tamen quasi phantasia visionem abstractam, sed colorem ut visum cognoscat.

Sed cui subjecto imagines illæ imprimuntur? Cerebrone, an spiritibus, qui in cerebri ventriculis continentur?

Resp. Vtriusque. Nam per spiritus animales, quibus nervi sensorij imbuti sunt, imagines illæ, quasi per pontem, trajiciuntur; qui eas imagines deinde per omnes cerebri sinus & revolutiones (ubi sensuum internorum latibulum & sedes est) evehant ac dispensent. Postremus enim ille occipitis sinus videtur esse promptuarium, ex quo imagines illæ, sicut & spiritus

V u u u

earum

earum vectores, promuntur & dispensantur.

Deinde substantiæ etiam cerebri similes imagines ab imaginibus spirituum quodammodo affricantur; id est, una imago parit aliam similem. Nisi enim hoc fiat, omnium illic, diffugientibus suâ levitate & mobilitate spiritibus, oblivisceremur. Hærent ergo etiam in substantia cerebri quædam imagines, quæ multos annos, & quandoque totâ hominis vitâ edurant.

Hinc cerebro molliori facilius, duriori contumaciùs imprimi species Medici, & experientia probant. Diffuente autem substantiâ, aut mutatâ temperie cerebri, species amittuntur, aut obliuerantur; & hinc obliuio. Remedium autem ad imagines fugitivas, & evanescentes revocandas, esse solet; ejusdem rei frequenter meminisse. Reminiscencia enim novos quasi colores superinducendo, eas reparat. Aut potiùs novellas imagines, prioribus gemellas ac omnino similes regenerat. Vnde multorum, quæ in pueritia nostra acciderunt, meminimus, quia frequenti reminiscenciâ eadem recolimus; multorum etiam memoria fugit, quia obliuerata quasi rescribere, occasio non fuit.

Aliquando etiam imagines spiritibus impressæ cerebro inscribi non possunt; aut tam tenuiter, ut vestigia ad reminiscencia non sufficiant. Vt cum ebrij, quibus cerebrum vaporibus natat non recordantur manè, quod pridie perpetrarunt in ebrietate. Nebula enim illa vaporum vini, aut cerevisiæ non sinit imagines rerum præsentium satis expressè & graphicè spiritibus animalibus (qui sunt proprij earum vectores) imprimi, nec deinde cerebro satis altè inscribi. Hinc *madida memoria* vocatur, quæ imagines, ob cerebri madorem, non retinet, sed diffuere statim sinit. *Tanquam enim in aquam fluentem incidit tunc*, ait eleganter Aristoteles,

Cecil.

Arist. lib de *figilli impressio*. Addit quoque, *nec valde juvenes, nec valde senes memoria valere. Fluunt enim illi propter augmentum, hi verò propter decrementum*. Variatio enim & inconstantia cerebri crescere, aut decrefcere festinantis, turbat & abolet impressas imagines. Similiter, inquit, & multum ingenio veloces, & multum tardi, neutri videntur memores. Illi enim humidiores sunt, quàm

con-



convenit hi vero duriores. Illis igitur non manet phantasma in anima, hos vero non tangit, nec imprimi facile potest.

Quandoque etiam ( sed eventu raro ) tanta est cerebri, & spirituum animalium alteratio, ut veteres imagines subito deleantur, & præteritarum rerum universim, aut partim inducatur oblivio. Quidam scetus lapide oblitus est litteras tantum, narrante Plinio. Ex præalto tecto lapsus, matris & affinium propinquorumq; cepit oblivionem. Alius agrotus, servorum etiam; sui nominis, Messala Corvinus Orator.

Plin. lib. 7,  
c. 24.

In peste illa sevirissima, quæ tempore Thucydidis, quæque ipse correptus, invasit Græciam; multi, ubi revaluerant, deletis omnibus cerebri imaginibus, nihil amplius præteritorum meminisse poterant. Pestis verò illa primas in capite sedes collocarat, cum perpetuis vigilijs & insomnijs, ut idem Auctor ait. Albertus Magnus, Philosophia naturalium tam instructus, triennio ante mortem, totius istius disciplinæ dicitur memoriam amisisse. Quod tamen divino, ac Deiparæ Virginis miraculo quidam adscribunt; cuius intercessione divinitus eam secretorum naturæ scientiam putatus est accepisse.

Thucyd.  
lib. 2.  
Histoc.

Ioannem Suifferum, cognomento Calculatorem, quem ab imaginatione maximè valuisse Cardanus, ingenij humani modum penè excessisse Scaliger scribit; senem suorum Mathematicum ita cepit oblivio, ut inventa sua legens, nec intelligens, steterit.

Cardan.  
lib. 16.  
Subtil.

Potest & alio modo, quàm per specierum abolitionem, nasci oblivio: Si species incolumes quidem maneant, sed humore aliquo vias sapiente, è latebris suis ad potentiam evocari non possint; aut si potentia in illis latebris resideat, vis irradiativa nequeat fortasse, propter meatûs obstructionem, ad sedem illam penetrare; quemadmodum irradiatio in sensus externos cessat, quando nervorum sensitivorum canales sunt oppleti.

Hoc quoque indictum abire non debet. Quod non tantum rerum imagines quas externo sensu hausimus, sed multorum aliorum phantasmatum simulacra in illo memoriæ thesauro recondita sint, quæ imaginatio ex rerum sensibilibus primis imaginibus excudit.

S. August.  
lib. 10. c. 8.  
Confess.

*Venio in campos, & lata Pratoria memoria mea, ait Augustinus, per istas etiam vias Deum suum quæritans; ubi sunt thesauri innumerabilium imaginum de rebus sensus invectorum. Ibi reconditum est quidquid etiam cogitamus vel augendo, vel minuendo, vel utcumque variando ea quæ sensus attigerit; & si quid aliud commendatum & repositum est, quod non absorbit & sepelivit oblivio.*

Ratiocinationum quoque innumerabilium, longâ serie imaginum, connexæ catenæ ibi sunt, quas cogitativa hominis die nocteque tot annos contexuit.

Denique & maxima imaginum turba, quæ nec per sensuum externorum fenestras intraverunt, nec ex ijs fabricatæ, sic intraverunt, sed ab Auctore naturæ in prima generatione sunt infusæ.

S. Th. q. 22.  
a. 7 de  
Verit.

Tales enim in brutis saltem agnoscit S. Thomas: *Alijs enim animalibus, inquit, sunt indita, secundum naturalem æstimationem, quædam substantiales conceptiones, eis necessaria; sicut ovi, quod lupo sit ei inimicus, & huiusmodi.*

Scalig.  
Exerc. 138.

Hæ autem conceptiones, sine speciebus & ideis non formantur. Vnde Scaliger: *Habent bruta in se secum species concreatas, quarum ideâ motus, supervolantem milvum fugiet pullus, non fugiet corvum.*

Ac sanè sine specie & ideâ aliquâ naturali filorum, & texturæ, quomodo araneus telam texeret, quam nunquam dicit, nec vidit?

#### ARTICVLVS IV.

*Quomodo sensuum internorum operationes per species exerceantur.*

**H**ÆC res admirabilissima, & obscurissima est, si quid sit in tota rerum natura. Vnde nullus, quem sciam, in hunc puteum Democriti ad fundum descendere, ne quidem conatus est: sed Aristoteles, Themistius, Pachymerius, ceterique circa oram & superficiem hærent, quam pinguibus quibusdam similitudinibus incrustare, satis habent.

Atque in primis displicet nobis plurimorum recentiorum philosopho-



philosophia, qui sensuum internorum operationes, ut phantasiationem, memorationem, & reminiscentiam, circa imagines recenter, aut olim spiritibus, vel cerebro impressas versari negant; sed proximè circa objecta quæ foris sunt. Ut cum quis meminit se vidisse leporem currentem, memoria, inquiunt, non intuetur & attingit imaginem leporis in cerebro asservatam, sed solum leporem ipsum, qui cursu trajiciebat campum. Imago enim aiunt, nullo modo est objectum actûs memorandi, sed cum potentiâ memorativâ, ut causa partialis incognita, ad externi objecti tantum cognitionem concurrir.

Quod tamen Aristoteli, Themistio, & omnibus veteribus Interpretibus, S. Augustino, & S. Thomæ repugnat.

Arist. lib. de  
Memor. c. 1

Aristoteles enim apertè docet, imaginem phantasticam, quemadmodum imaginem in tabula pictam, duplici modo posse considerari: ut est pictura tabulæ, cujus colores & artificium contemplamur; & ut est ἐνδὲ καὶ μνημόνευμα ἄλλου *imago & memoriale alterius*. Atque ita per talem imaginem, sub ratione imaginis consideratam, tanquam per objectum proximum, & præsens, sensus internus, usque ad illius imaginis prototypum, actu memorandi se extendit. Vel ut Hermolai Barbari, Interpretis Themistij, verbis utar: *Cum sensus internus non ipsum simulacrum in se considerat, sed ut simulacrum alterius est, tunc representatio dicitur, ad memoriam pertinens, & actus talis memoria nominatur.*

Themist.  
lib. 1. c. 12.  
de Memor.

Deinde apud S. Augustinum sæpissimè, simulacra & imagines illæ raptæ à sensibus externis, dicuntur à sensibus internis postea cognosci & cogitari. Cum jam, ait, non ex corpore (quod foris objectum sensûs externi fuit) *sensus corporis, sed ex memoria formatur acies animi, cum in ipsa memoria species inhaerit corporis, quod forinsecus sensimus; illam speciem, quæ in memoria est, quasi parentem dicimus ejus quæ sit in phantasia cogitantis. Erat enim in memoria priusquam cogitaretur à nobis, sicut erat corpus in loco, etiam priusquam sentiretur, ut visio fieret. Sed cum cogitatur, ex illa quam memoria tenet, exprimitur in acie cogitantis, & reminiscendo formatur ea species (expressa, ut hodie vocatur)*

S. August.  
lib. 11. c. 9.  
de Trinitate

*quæ quasi proles est ejus quam memoria tenet.*

Videtur igitur, quomodo phantasma expressum, ut jam loquimur, habeat se ad phantasma impressum, quod in memoria latet, sicut ad corpus externum visio, quæ oculo ipsum videmus, sitque proles ejus, sicut visio est proles corporis, quod ante nos intuemur?

Lib. II. c. 18.  
Confess.

Et alibi: *Pueritia mea, quæ jam non est in tempore præterito est quod jam non est: imaginem vero ejus, cum eam recolo & narro, in præsentis tempore intueor, quia est adhuc in memoria mea.*

Deinde, quàm sæpe dicit, somniantes speculari phantasmata, quæ intus sunt, non immediatè res ipsas, quæ gestæ aut visæ sunt aliquando foris?

Lib. 4. c. 17.  
de origin.  
animæ,

*Multa, inquit alicubi, videmus in somnijs, calum, terram, mare, solem, lunam, stellas, fluvios, montes, animalia. Hac qui corpora esse credit, incredibiliter desipit: Sunt tamen corporibus omnino simillima. Ac deinde: Hujusmodi species velut corporum, non tamen corpora, & vigilantium cogitatione formantur, & profunditate memoria continentur, & ex ejus abditissimis sinibus, nescio quo admirabili & ineffabili modo, cum recordamur, prodeunt, & quasi ante oculos prolata versantur.*

In novellâ tamen Philosophiâ, non sunt species corporum, sed vera corpora, licet absentia, quæ in somnijs videntur. Nam qui de sole, aut luna somniat, non intuetur simulacra solis aut lunæ, inquiunt, in cerebri ergastulo conclusa, sed imaginatio foràs in solem & lunam, quos somnians aliquando in cælo vidit, immediatè tendit.

Vnde non se, sed S. Augustinum potius desipere, dicere debent, qui proximum illius somniculosæ imaginationis objectum, solis & lunæ corpora esse affirmant. Negant enim speciem phantasticam, perinde ac speciem sensibilem externi sensûs, esse medium cognitum, sed solum incognitum, ducens immediatè phantasiam in cognitionem objecti alterius. S. Thomas quoque, Aristotelis, in re naturæ, fidelissimus discipulus, intellectum intueri, & speculari phantasmata, sæpe dicit. Et ubi modum, quo dæmones sensibus internis illudunt, explicat, semper id fieri censet per motum localem spirituum,

spirituum,



spirituum, quo impressa ipsis phantasmata, ante oculos quodammodo potentiae imaginativae adducant. *Aliud quippe, ait, praexistit in corpore, quod per quandam transmutationem localem spirituum & humorum, reducitur ad principia sensualium organorum, ut sic videatur ab anima, imaginariâ vel sensuali visione.*

S Th. q. 16.  
a. 11. de  
Malo & 1.  
p. q. 111 a. 3.

Idem denique experimentis somniorum probari potest. Nam quibus cerebrum pituitâ madet, torrentes, & aquarum diluvia somnare solent; quos bilis infestat, tenebras, & subterranea loca perambulare sibi videntur. Scio, qui cum in coena particulam casei flavi sumpsisset, & haustulo vini Hispanici irrorasset, secutâ nocte, somnio aviculæ flavi coloris huc illuc volitantis, occupatus fuerit. Flavedo casei in aviculæ tincturam transierat; volitatio, spiritus vini erat: qui non satis confertus & mobilis erat, ut plenum volatum, sed volitationem tantum quandam aviculæ repræsentaret. Talia autem somnia satis indicant, phantasmata quæ in spiritibus cerebri volant, aut pituitæ vel alijs cerebri sordibus implicata sunt, reverâ à somniantibus aspici. Vnde etiam laurus, & plantæ odoriferæ, aromata, tabaci suffitus, & spiritosa omnia, vagæ & inquieta somnia excitare solent; quia spiritus cerebri phantasmatum vectores movent & ante oculos imaginationis traducunt.

Senibus autem sæpius quàm juvenibus accidit, ut somnient de rebus concoloribus cibo aut potui, quos vesperi sumpserunt: quia ventriculus senilis, & cerebrum debile non satis valent spiritus nocturnos concoquere coloremq; mutare, qui è ventriculo in caput noctu exhalant. Hinc qui ante somnum, syrupum è viridibus plantis sumunt sæpe hortos & virescentes campos somniant; quia phantasmata, simili vaporum colore implicata, imaginatione conspiciunt.

Nec tantum sensus internos circa imagines in cerebrum haustas, sed etiam sensus externos, circa species ab objectis externis impressas, proximè versari (etsi paucos hodie mihi assensuros prædixerim) suprâ Cap. III. Art. XI. docuimus.

Sed quomodo species hominis mihi noti, per oculos hausta, & substantiæ cerebri impressa, aut in spiritibus natans, potest

potest hominis effigiem, cum capite, ventre, pedibus, repræsentare; cum in nervorum opticorum transitu figura speciei confundatur, nec imago distinctionem illam partium retineat, quâ in oculi pupillâ, vel tunicâ retinâ, ab objecto externo depicta fuit?

Quod hîc respondere possum, tantum hoc est. Quia species phantastica, non ab objecto externo, sed ab ipsa visione formata in oculo, trajicitur per nervos opticos in cerebrum: unde intentionalem tantum, non formalem similitudinem cum objecto externo habere debet, ut ejus colorem & figuram sensui interno repræsentet. Non enim tantum objecti externi, sed simul ipsiusmet conceptus visivi (ex quo proximè fluxit) est imago. Sicuti enim conceptus phantasticus vestigium & simulacrum sui, quo ejus postea recordari possumus, cerebro insculpit; ita & sensus externi conceptus imaginem sui, per nervorum sensoriorum canales, ad cerebrum transmittit: quæ imago imaginis est, & velut Copia ex priori Originali expressa.

Et hinc potentia imaginativa ex talis imaginis intuitu, non tantum objectum extremum, quod oculus vidit, sed etiam ipsam visionem potest præsentem cognoscere, aut ejus, ut præteritæ meminisse. Propter enim ocularis visionis imaginem, quam anima in suo cerebro invenit, naturali instinctu cognoscit visionem illius rei tempore aliquo præterito se habuisse, à qua visione imago illa in cerebrum fluxit. *Asinus enim qui superiore anno in foveam ceciderit, ait Themistius, si hodie*

Themist.  
lib. 1. c. 5. locum videat, recognoscet & meminerit se in scrobem collapsum fuisse.  
de Memor.

Itaque sicuti nobis ineffabile est, quâ ratione bruta tempus præteritum, ex illa specie phantastica, confuse saltem cognoscant; sic ignorantia nostra modum non penetrat, quo asinus vel etiam homo, ex tali specie, in qua nec caput, nec pes est, hominem omnibus partibus suis absolutum imaginatione depingere possit. In plerisque enim talibus ad pontem istum asinorum, & ignorantiae asylum recurrere oportet: Talis est natura rei: Essentiæ non datur ratio &c. Et perpetuo habere in ore debemus, quod tam sæpe ingeniosus & humilis Augustinus: *Altiora te ne quasieris, & fortiora te ne scrutatus fueris.*

Eccli. 3.

A R T I -



## ARTICVLVS V.

*Quomodo tanta imaginum turba cerebro tam angusto contineri  
& spiritibus vectoribus, tantâ velocitate currere, & re-  
currere, sine confusione possint.*

**H**oc maximum naturæ miraculum, & altissimum di-  
vinæ sapientiæ profundum est. *Multa mihi super hoc*  
*oboritur admiratio, ait S. Augustinus, stupor apprehendit*  
*me. Et eunt homines admirari alta montium, & ingentes fluctus ma-*  
*ris, & latissimos lapsus fluminum, & Oceani ambitum, & gyros side-*  
*rum, & relinquunt seipsos, nec mirantur.*

S. August.  
lib. 10. c. 8.  
Confess.

Quomodo enim tot & maximarum, & innumerabilium  
rerum imagines cerebro tam parvo inscribi, sine mutuâ ob-  
litteratione, & confusione possunt? An sicuti fortasse in exi-  
guâ oculi pupillâ, aut tunicæ retinæ plagulâ, integrum ferè  
cæli hemisphærium, partibus tamen omnibus extra mutuum  
situm expansis, depingi potest? Vix crediderim. Non enim  
in cerebro video organa necessaria ad refringendas, aut sic  
modulandas phantasticas species, ut singularum rerum ima-  
gunculæ, in distinctis cerebri particulis valeant depingi;  
quemadmodum in oculi fabricâ fieri posse conspiciamus. Ibi  
enim tunicæ & humores, per quos species visibiles transeunt,  
versus perpendicularem ita refringunt & modulantur spe-  
ciem v.g. cæli stellati, quod nocte serenâ & sidereâ suspici-  
mus; ut singularum stellarum imagunculæ, distinctis tunicæ  
retinæ particulis punctatim valeant inscribi.

Quale quomodo in cerebri imaginibus fieri possit, non in-  
telligo.

Igitur infinita illa propemodum imaginum cerebri turba,  
eandem cerebri partem occupant, eodemque spiritûs unius  
animalis vehiculo discurrunt: sicut species intelligibiles An-  
gelicæ, aut humanæ non in distinctis potentiæ intellectivæ  
(quas non habet) partibus, sed eidem indivisibili subiecto,  
sine confusione tamen, impressæ sunt. Et licet in eodem

X x x x

veluti

veluti punctuali situ intricatæ sint, vocatæ tamen & citatæ, ordine suo, sine confusione ( etsi quis longissimam Cicero- nis Orationem ex memoriâ intellectivâ recitet ) ex angustiis illis suis prodeunt.

Iuxta similem igitur ferè modum, eidem parti divisibili cerebri ( aut fortè integræ totique medullæ cerebri, ut Ga- lenus existimare videtur ) omnium rerum, quas memoriâ gerimus, imagines impressas esse existimo. Deinde quas- dam earundem rerum imagines mobili spirituum animalium vehiculo infixas, ac per meatus, anfractus, gyrosque cana- lium cerebri, cum spiritu suo vectore, currere huc illuc, & recurrere.

Sed quâ causâ spiritus illos impellente, aut revocante? Fa- teor in naturæ arcanis hoc profundè abditum esse.

Imagino tamen, hæc aut simili œconomîâ, rem istam ad- ministrari.

Vbi per quinque sensuum exteriorum canales, imagines rerum externarum postremam officinam cerebri, ubi spiri- tus animales siccissimi, & in ultimam suam formam sunt ex- cocti, pervenerunt; imagines istæ tingunt pinguntque spiritus ibi repertos, actione quâ species una sensibilis alteram sibi similem propagat. Deinde spiritus isti sic picti & imaginosi, partim per potentiam expultricem illius postremi ventriculi cerebri, in meatus Erasistratæos, seu intestiniiformes, qui sub- stantiam cerebri penetrant, expuuntur; partim per potentiam tractricem, à meatibus illis spiritus animales, ex postremâ cere- bri fornace attrahuntur: & hoc ad phantasiæ, & appetitûs sen- sitivi imperium. Nimis enim pertinaces, & contra experien- tiam pugnaces illi Medici mihi videntur, qui negant ullum in animali motum voluntarium esse, nisi qui per musculos aut nervos administratur. Certè enim, quando aliquid reminisci volumus, experiri videmur, nos spiritus illos imaginû vectores ad certam aliquam cerebri regionem, ante quasi oculos ima- ginationis revocare, & tandem imaginem quam volebamus, agnoscere. *Ibi quando sum* ( per intentionem, qua aliquid re- minisci volo ) *posco ut proferatur*, ait S. Augustinus, de re ista

memo-



memoriæ philoſophans, quidquid volo. Et quadam ſtatim pro-  
deunt, quadam requiruntur. Quadam catervatim ſe proruunt; & <sup>S. Auguſt;</sup>  
dum aliud petitur & queritur, proſiliunt in medium, quaſi dicentia: <sup>ibidem,</sup>  
Ne fortè nos ſumus. Et abigo ea manu cordis à facie recordationis mea,  
donec enubiletur illud quod volo, atque in conſpectum prodeat ex ab-  
ditis. Alia faciliter atque imperturbatâ ferie, ſicut poſcuntur, ſugge-  
runtur. & cedunt præcedentia conſequentibus, & cedendo conduntur,  
iterùm cum voluero, proceſſura. Quod totum fit, cum aliquid narro  
memoriter.

Cum verò iidem ſpiritus tot imaginibus diverſiſſimarum  
rerum ſint onuſti, voluntas remiſcentis ad illam potiùs,  
quàm ad aliam imaginem recognoſcendam, phantaſiam deter-  
minat; & una deinde imago alteram poſt ſe trahit, velut ha-  
bitu quodam, aut catenatione (mirabile dictu, mirabile cogi-  
tatu) prout imago una quaſi juxta aliam collocata fuerit.  
Quod in memoria locali, eſt maniſeſtius.

Quandoque tamen catena iſta rumpitur, & ab iſto catenæ  
annulo ad alterum diſtantiſſimum tranſilimus. Quod in Horarum  
Canonicarum recitatione, ubi diſtractiones mentis incidunt,  
ſæpe uſu venit. A verſu enim unius Pſalmi, qui certâ voce fi-  
nitur, ſaltamus ex improvifo quandoque ad alterius Pſalmi  
verſum, quem ſimilis vox immediatè præcedit.

Quæret etiam aliquis. Quare aded facile oblivſcimur tam  
recentis lectionis alicujus Pſalmi è Horis Canonicis? In qua  
re magna crux poſita eſt hominibus ſcrupuloſis; qui identi-  
dem idem repetere ſolent, quia an recitaverint, memoria  
nulla manſit.

Reſp. Quia ab aſſuetis, ut dici ſolet, non fit paſſio. Species  
enim lectionis ita leviter, & vix ſpiritibus animalibus, vel  
cerebro imprimuntur, ut nullum veſtigium ad recordatio-  
nem idoneum remaneat. Deinde, mente alijs cogitationibus  
diſtractâ, etſi ad voces & recitationem ſint utcumque atten-  
ti, nullam omnino temporis præſentis, ne quidem confuſam,  
cogitationem habent: unde nec illicd poſtea recitationem  
illam valent, cum reſpectu ad tempus jam jam præteritum,  
apprehendere. Ipſa etiam ſollicitudo ne diſtrahantur, avertit

imaginationem & animum ad cogitandam ipsam distractionem, facitque eos magis distrahi, & recitationis suæ oblivisci. Quare prudentes Confessarij vetant tales, si se legisse dubitant, unquam repetere.

Igitur, ut brevem iterum horologij istius interioris, & motuum ejus imaginem ob oculos ponam.

Quatuor cerebri ventriculi bini priores, unus medius, & postremus in occipite, non sunt sensuum internorum sedes, sed officinæ tantum & fornaces ad spirituum animalium cocturam & perfectionem.

Sensuum verò sedem esse existimo in parte aliqua determinata angustissimorum meatuum & cuniculorum, qui per revolutiones cerebri ducuntur, & insculpuntur, quas Erasistratus elegantissimè, ut ait Vesalius, tenuium intestinorum revolutionibus comparat: unde meatus illos *intestiniformes* vocare possumus. Per hos multiplices gyros gyrat & discurrit spiritus animalis, imaginum bajulus.

Vesal. lib. 7  
c. 4.

Quando verò imago satis perfectè impressa est organo, ubi facultas residet, statim facultas potest recordari.

Si verò organum imagine caret, vel vestigium tantum tenue, nec recordationi sufficiens habeat; anima, per potentiam attractricem, quæ in eodem organo, ad famulandum dominæ phantasie adsidet, ex omnibus circumquaque cerebri gyris & revolutionibus spiritus advocat, & ante phantasie, sive memoriæ, oculos transire quasi jubet, ut memoria imaginem, quam quærit, deprehendat. Sic enim paulò supra S. Augustinus indicabat. *Ampli verò memoria campi, lata pratoria, aula ingens, penetrabile amplum & infinitum, grandis recessus, ineffabiles sinus, thesauri distincti colorum, sonorum, odorum, saporum, & tangibilium qualitatuum*: quasi imagines objectorum uniuscujusque sensus externi, peculiare suum loculamentum ac thesaurum in cerebro haberent; nomina tantum metaphorica sunt, ad significandam imaginum multitudinem, & varietatem inconfusam.

S. Aug. lib.  
10. c. 8.  
Confess.

ARTI-



## ARTICVLVS VI.

*Quomodo insomnia fiant.*

**S**omnum definit Aristoteles, vinculum sensus communis. Somnus enim formaliter est cessatio operationum sensuum externorum, inducta per obstructionem nervorum sensoriorum, qui à sensu communi, sive potius (secundum philosophiam Medicorum) à sede virtutis irradiativæ, ad sensuum externorum organa propagantur. Illis enim nervis, per vaporem aliquem roridum, è cerebro deorsum molliter relabentem, abstractis, spiritus animales viam ad organa sensuum externorum invenire non possunt. Nec vis etiam irradiativa, quæ operationes sensuum adjuvat, radios suos illac trajicere valet.

Ros iste obstruens vigiliæ portas, est illa aqua Lethes, quâ singulis noctibus deus Somnus, apud fabulatores Poëtas, implet suum cornu, irrigat animantia, & in soporem placidum, aut implacidum quandoque, ac gravibus insomnijs sollicitum, sternit.

*Cum consanguinei mixtus caligine lethi,  
Rore madens Stygio, morituram amplectitur urbem  
Somnus, & implacido fundit gravia etia cornu.*

Stat.

Interea enim sæpissime non feriuntur sensus interni, sed circa imagines arcâ memoriæ inclusas negotiantur: quæ negotia, somnia vel insomnia appellantur. Quæ quomodo fiant, non erit fortasse difficile; utcumque ex doctrina superiori explicare.

Nam spiritus animales, variarum rerum imaginibus picti, levitate ac mobilitate suâ per cerebri gyros & anfractus, tempore somni vagantes, & sinum illum cerebri, ubi phantasia residet, præterlabentes, ostendunt ei imagines suas, & ad earum aspectum & considerationem movent. Hinc fabæ, inquit Plinius, & omnia ventosa legumina, ac universum cibi potusque spiritosi in coena assumpti, insomnia facere solent.

Plin. lib. 18.  
c. 12.

X x x 3

Exhala-

Exhalationes enim è ventriculo in cerebrum evolantes, agitant spiritus imagnum vectores, & imagines ad locum sensus interni, ordine composito, vel perturbato adducunt, ut Lib. de Insomnijs c. 17. Themistius docet. Hinc quoque temporibus ventolis, & quacumque causâ spiritus animales agitante, plura sunt insomnia. Memini hieme Anni 1627. fluente, & 1628. inchoante, ventosissimâ & sine gelu, omnes passim homines de insomnijs & nocturnâ inquietudine conquestos fuisse. Quia deinde respiratio ventilat cerebrum; qui volunt inquietudinem phantasmatum, in oratione compescere, solent pulmonis flabellum continere.

Quibus exemplis etiam probari potest, sensum internum non in universo cerebro, ut Galenus putat, sed in determinata cerebri cella, aut sinu residere; ad quem successivâ quadam serie, imagines appellant, & pertranseant. Aliâs si in totâ cerebri medullâ, phantasia dispersa esset, pluribus simul locis, ab innumeris imaginibus, per omnes cerebri meatus palantibus, operationem & imaginationem ejus experiremur. Nobis quoque vigilantibus, & alia prorsus cogitantibus, non rarò accidit, ut spirituum animalium fluctus adveniat ex improvviso in conspectum phantasiæ imagines rerum absurdarum, aut de quibus nulla antea erat cogitatio. Simili spirituum impulsu & vehiculo Deus, aut Angeli boni, Prophetis, & alijs interdum, futura aut occulta revelant in somno: dæmon verò etiam in vigilia foedis & obscœnis imaginibus animas suas in oratione sua turbat.

Humores quoque, & causæ naturales morborum multiplicant, aut variant somnia; nec de nihilo Medici eruditi & experientes, agros interdum rogant, quid somniaverint. Sciunt enim febrientes, qualibus somniorum chimæris aliquando exagitantur.

Amor denique, vel odium multorum somniorum aurigæ sunt.

*Venator defessa toro dum membra reponit,*

*Mens tamen ad silvas, & sua lustra redit.*

Claudian.

Appetitus enim inferior, qui non secus ac phantasia vigilat in somno



somno, excitat potentiam attractricem spirituum, ut spiritus illarum imaginum, quas amant, vectores adducat ad phantasiae organum. Hinc amasiorum de suis Corynnis, & Lesbii somnia. Casti verò, Aristotele & experienciâ teste, castius somniant; aded ut obscœna somniorum ludibria, quæ dæmon dormientibus ingerit, abigere conentur, & dormientes, ex habitu quodam in appetitu inferiori relicto, faciant quod vigilantes solent.

Arist. lib. 7.  
c. 13. Ethic.  
& Probl.  
Sect. 30.

Dubitatum tamen meritò à sapientibus, An intellectus humanus, & voluntas non se etiam immisceant operationibus somniorum. Poëtæ enim, quasi in Parnasso suo somniantes, versus inter somnia interdum faciunt. Imò Theologi, quod mihi non semel contigit, de SS. Trinitate, & rebus maxime spiritualibus quandoque somniant. Rerum verò tam sublimium somnia ad rationem, non ad solam phantasiam spectare videntur.

Sed hoc argumentum non est infallibile. Nam quoties intellectus vigilantis de rebus etiam altissimis ratiocinatur, cogitativa, quæ sensus interior est, suam etiam argumentationem subneçtit, & tanquam sphaera inferior trahitur ad motum sphaeræ superioris. Ideo quippe ratio inferior, & intellectus ratio superior appellantur.

Inter somniandum igitur, si quis in Parnasso somniet, & componat versus, per cogitativam hoc facere potest; uti etiam argumentari de omni materia, ex qua materialia quædam phantasmata, tanquam rota figuli lutum, sub majori rotationis superioris, convolvit & format.

Hæc igitur tam composita, & bene nexa phantasmata, sunt, quæ in eandem cogitativam recurrunt in somniis.

Quo experimento etiam confutatur, quod Toletus & quidam alij Philosophi credunt, supremum sensuum interiorum, qualis est cogitativa hominis, & æstimativa bruti, nullum in cerebro vestigium relinquere expressi sui phantasmatum, quo operationem suam præteritam cognoscere postea possit.

Tolet. lib. 3.  
c. 2. q. 3. de  
Anima.

Nam nisi argumentatio phantastica, quæ in vigilia, sub intellectu argumentante, nexa & catenata fuit, aliquod phantasma

tasma impressum reliquisset, inter somniandum occurrere non posset. Per istud præterea phantasma impressum, sive in vigilia, sive in somno, prioris nostræ ratiocinationis recordari possumus.

Sed si cogitativa hominis suæ propriæ operationis, per phantasma impressum recorderetur, sensus materialis, inquit, supra propriam suam operationem se reflectet.

Sed quidni per actum posteriorem, memorativum prioris, hoc facere potest?

Arist. lib. de  
Memor. c. 2.  
& lib. de  
insom.  
c. ult.  
Scot. in 4.  
d. 45. q. 3.

Certè enim hoc Doctor Subtilis, imò Aristoteles, docet, fatente etiam Suarez Lib. 3. c. 11. de Anima. Nec ullo argumento satis valente hætenus vidi oppositum firmari. Quod enim asserunt, videri nimis excellentiæ, & potentiæ spirituali proprium, supra actum suum se reflectere; tam facile rejicitur, quàm gratis assumitur sine magna ratione. Non enim fermè majoris perfectionis est, operationem sensûs externi per speciem phantasticam à tali operatione (aut à sensu quodam agente, ut Suarez mavult) impressam, primâ vice cognoscere; quàm propriam suam operationem phantasticam præteritam, per phantasma ab ea cerebro impressum, & in eo relictum, prioris suæ operationis meminisse. Nec ullâ, ut puto, ratione ostendi potest, hoc altitudinem excellentiæ supremi sensûs interni transcendere. Denique experientia favet satis apertè.

Suarez  
lib. 3. c. 9.  
de Anima

Sed demus tamen, in argumentosis, istis somnijs, aliquam etiam intellectûs operam misceri: dormitabunda tamen adeo est hæc intellectûs operatio, ut vigilem & liberam voluntatis actum nequeat dirigere. Cogitativa enim, & appetitus inferior tempore somni dominantur; & illa intellectum, iste voluntatem, naturali quadam sequelâ post se trahunt, voluntasque magis agitur, quàm agat seipsam; quomodo se agere debet, quando operatur liberè.

Arist. lib. 1.  
c. 13. Ethic.

Hinc bellè Aristoteles: *Somnus est otium animæ, quæ bona & mala dicitur.* Quia videlicet, in somno nihil bene, aut malè agere, aut concupiscere anima potest. Vnde S. Augustinus

S. August.  
lib. 2. c. 25.  
Civit.

negat ullum in concupiscentia somniantis culpam admitti. *Quod si, inquit, illa concupiscentialis inobedientia, quæ adhuc in membris*



*membris moribundis habitat, præter nostræ voluntatis legem, quasi lege suâ movetur; quanto magis absque culpa est in corpore non consentientis, si absque culpa est in corpore dormientis?*

Nec refert, quod cogitativa, non solum ad præteritarum argumentationum reminiscentiam, sed etiam ad novarum inter dormiendum fabricationem se extendat. Hoc enim non indicat, intellectum tunc vigilare, aut se immiscere phantasticæ ratiocinationi; sed cogitativam hominis sublimius operari posse, quàm æstimativam bruti; ideoque meritò rationem inferiorem appellari. Vnde, quia humana imaginatio vivaciùs in somno, rerum Venerearum imagines apprehendit, & perfectiùs operatur, quàm phantasia bruti; Aristoteles docet solum hominem inter animalia, solere *ἐν υπνώσει* in somnio pollui. Arist. Prob. 2. Sect. 10.  
Et tamè ceteris animantibus somnia etiam contingere, canum exemplis, qui dormientes interdum latrant, probari potest.

Interim, quantumcumque somnia humana ad vigilias intellectûs videantur accedere, longè tamen adhuc distant; manifesto hòc indicio: quod sæpe cum homine, quem mortuum scimus, in somnio, tanquam cum vivo, colloquamur, & expergefatti illicò ac in momento advertamus errorem. Latius quippe circumspicit intellectus, & ubi phantasma Platonis viventis mihi vigilanti ultrò fortè occurrit, evocato mortui phantasmate, novit phantasma prius abigere. Phantasia autem somniantis obvium quodque phantasma arripit, & circa illud sine magna circumspeditione (nisi etiam circumspeditionis ipsius phantasma sese ingerat) negotiatur.

Sed neque ratio vigilat in noctambulis, qui somniantes è stratis surgunt, & huc illud semisopiti ambulant, ac interdum tectorum sublimia & præcipitia scandunt. Licet enim canalis spinæ dorsi pateat, quâ spiritus motorij per nervos & musculos spargi valeant; sensuum tamen viæ adhuc oppilatæ, & intellectus ligatus manet. Vnde nec voluntas in ipsis libera & soluta est. Iudicio enim phantastico, aut intellectivo quidem, sed imperfecto, quod simile est phantastico, in moribus suis perfectis & voluntarijs dirigi voluntas non potest. Hinc Clemens, unica. de Homicid.  
Clemens V. in Conc. Vien. negat fieri irregularem, qui *dormiens*

*dormiens hominem mutilat, vel occidit. Quales dormientes sunt illi noctambuli, aut quicumque manus ad feriendum movere possunt; et si sopiti sint sensus. Sicut enim aliqui dormiendo loquuntur; ita sunt etiam qui dormiendo agunt, ait ibi Glossa.*

## ARTICVLVS VII.

*Imaginationis vires in signaturâ fœtûs.*

**H**oc quoque inter maxima, & abditissima naturæ miracula cenferi debet. Quâ enim viâ, & modo vis imaginativa gravidæ matris, aut incubantis avis, ad tingendum colore, aut figurandum certâ effigie fœtum, pervenire potest? Et ta men exemplis certissimis, tam in hominibus, quàm in brutis id fieri constat. Pueros enim non paucos rubrâ maculâ vultu deformes nasci videmus, quia gravida mater vino rubro, in convivio fortè perfusa, aut pudore suffusa, eam faciei partem defricuit. Fuit etiam nuper Antverpiæ, Patriciae familiæ matrona, quæ faciem, & gesticulationem simiæ referret, quia mater ejus prægnans domesticam simiolam in lusu & delicijs habuisset. Altera in eadem civitate, cum selem armario apud petasoneum inclusam reperisset, & exterrita, palmâ manûs femur suum percussisset, puerum cum figura petasonis femori insculptâ peperit. Hippocrates quoque, ut S. Augustinus narrat, mulierem quandam accusatione adulterij, quòd filium formosissimum ex marito, & ipsâ matre deformi, genuisset, liberavit; *solvens questionem*, ait Augustinus, *illis admonitis querere, ne fortè aliqua talis pictura esset in cubiculo: quâ inventâ, mulier à suspitione liberata est.*

S. August.  
q. 93. in  
Genes.

Scalig.  
Exerc. 59.

Iul Scaliger in Norwegia & nivosis locis, vultures, aquilas, accipitres, milvos, cervos, vulpes, candidos nasci refert.

*Et in Allobrogum, inquit, Alpibus, & perdices albas, & lepores estavimus. Et causam candoris existimat: quòd nivium aspectus afferat matricum phantasia, speciem coloris hujus: ut vel parturiendo, vel incubando fœtus edant, aut excludant concolores.*

Sed



Sed nobile est hujus signaturæ foetus exemplum in ovibus Labani, quæ ex variorum colorum imaginatione, agnos varios & maculosos pariebant: quia Iacob virgas detracto cortice candidas, viridibus virgis permixtas ponebat ubi biebant, & ab arietibus ascendebantur oves, *Vt in ipso calore coitus, intuerentur virgas.* Gen. 30.

Qua ratione verò id fieri possit, Philosophorum, & Medicorum dissensus satis indicat, scientiam mortalium in istud Trophonij antrum penetrare non posse.

Aristoteles, qui in omnes naturæ rimas, & minutias nasum ingerere est solitus, hîc, præ desperatione, credo, nihil est conatus. S. Augustinus, hoc ovium Labani exemplo, peccati originis à parentibus in filios propaginem adumbrans, tantum ait: *Colores virgarum quas variavit Iacob, afficiendo transivisse in animas pecorum matrum; atque inde rursus eadem affectione transiendo, apparuisse in corporibus filiorum.* S. August. lib. 5. c. 14. contra Iul.

Similia alibi: sed quo modo hoc fieri possit, explicat nulli. Nemo, quod sciam, in hoc naturæ arcanum altius intravit; aut potius, pluribus argumentis, ut introiret, ambitiosius circumivit, quàm Clar.<sup>mus</sup> quondam Academiæ noster Archia- ter Thomas Fienus: sed neque sibi adhuc, neque alijs fecit satis. Tho. Fienus lib. de virib. imaginat.

Plurimi, ut apud eum Lib. de virib. Imaginat. q. 14. videre est, putant phantasma expressum, quod formatur in cerebro matris, imprimere spiritibus animalibus quandam speciem phantasticam, quæ deinde per nervos, vel certè (postquam communicata fuerit spiritui vitali, vel sanguini) per arterias, vel venas illabatur in uterum, & semini materno ac paterno ita commisceatur, ut virtus foetus conformatrix, eam, tanquam ideam aspiciat, in conformando illo membro, quod debet cum simili signaturâ construi.

Sed multa sunt in hac opinione ferè incredibilia.

Nam in virtute conformatrice nullus sensus, nullus intellectus est, quo ideam illam valeat, in formando foetu, aspicere; sed sine cognitione operatur, sicut agens merè naturale.

Deinde, ut species illa phantastica ad cor, & ad hepar à cerebro, ali-

bro, aliquâ viâ trajici valeret, qua ratione ad uterum matris pervenire posset?

Per arteriam, & venam umbilicalem, fortasse inquierent.

Gen. 30.

Sed qui sic respondent, non cogitant, *in ipso* etiam calore coitus, ut Scriptura de ovibus Labani loquitur, causas signandi futuri foetus, in uterum cum primo semine posse illabi. Tunc verò umbilicus, aut arteriæ & venæ umbilicales, quibus foetus utero matris adhæret, nondum sunt conformatæ.

Quâ igitur viâ species illa phantastica, aut quæcumque species alia, in uterum penetrabit?

Deinde quo umbilico ova gallinæ, aut columbæ adhærent incubantium ventribus, ut species phantastica incubantis, ad pullum ovo inclusum trajici possit? Et tamen etiam pullos ab imaginatione incubantis signari, Medici, & Rei rusticæ Scriptores in comperto habent. Nam Avicenna gallinam incubantem, à supervolante milvo perterritam, pullos milvino capite exclusisse scribit. Et Oppianus modum præscribens, quo columbini pulli ostro, aut flammeo colore, incubantium imaginatione tingi valeant, canit:

*Stragula flammeolis oculis, rubrosq; tapetes,*

*Et vestes ostro perfusas objicit auceps.*

*Sicq; oculos pascens, animos eludit amantes,*

*Et pullos edit rubeo discrimine mixtos.*

D. Tho. lib.  
3. c. 103.  
contra  
Gent.

Itaque, ut ego etiam in istis tenebris manu aliquid palpem; censeo in primis, istud D. Thomæ esse verum: *Ex apprehensione non sequi aliquam immutationem corporis, nisi apprehensione adjuncta fuerit affectio aliqua, ut gaudij, vel timoris, vel concupiscentiæ, vel alterius passionis.* Vnde sicut imaginatio non est causa ruboris propriæ faciei, nisi mediante aliqua passione, qua cor spiritum & sanguinem effundit; ita ad signaturam foetus, passio matris intercedere debet, quæ sit quasi instrumentum imaginationis. Quod etiam existimat S. Augustinus, ubi de Api, bove maculoso, quem Ægyptij pro Deo colebant, & uno mortuo, alium simillimis coloribus maculosum substituere debebant; ait dæmonem effecisse, ut talem reperire possent, obijciendo imaginationi alicujus vaccæ concipientis,

S. August.  
lib. 18.  
c. 5. Civit.

aut



aut prægnantis, imaginem tauri, Api concoloris; Vnde libido matris attraheret, quod in ejus fœtu jam corporaliter appareret: sicut Jacob de virgine variatis, ut oves & capra variæ nascerentur, effecit.

Libido igitur, & ardens desiderium appetitûs, ad imaginationem accedere debet, ut istâ libidine mediante signetur fœtus. Vnde imaginatio proximè movet appetitum cordis; cor verò spirituum suorum vitalium, & aliorum in recessibus quibusdam abditorum commotione, alterationem & æstum suscitât, qui per membranam uteri, & in avibus incubantibus, per testam ovi, ad spiritum illum pervenit, qui conformat & organizat materiam seminis; ac cum eo talem mixturam facit, ut inde occulta qualitas resulet, quæ sit virtutis conformatricis in colorando, vel figurando toto, aut in aliquâ certâ parte, fœtu, secundum imaginationis determinationem. In alijs quippe etiam multis causis, conditiones quædam extrinsecæ causalitatem causæ operantis determinant, & modulantur. Quod facilius intelligitur, quando determinatio fit per naturalem sympathiam, qua actio una ad aliam actionem, eandam causam determinat. Qualis sympathiæ quandam saltem imaginem hîc reperire possumus.

Verum, inter animam matris, & formam seminei spiritûs non potest esse naturalis sympathia, inquit Fienus: quia sympathia in eadem animâ, quæ hîc unum effectum, alibi alium, à seipsa excitatâ operatur, radicari debet.

Tho. Fienus lib. de virib. Imaginat. q. 15.

Resp. Inter animam cerebri, & animam cordis bovini, aut alterius bruti animalis, est quædam naturalis sympathia. Dum enim anima cerebri imaginatur, anima cordis appetit, & spiritum cordis ebullire facit. Et tamen plurimorum Philosophorum & Medicorum Philosophia statuit, animas illas esse partes integrales realiter distinctas unius animæ totalis, diffusæ per universum bovis corpus. Imò multi contendunt esse partes heterogeneous, & diversæ speciei Logicæ.

Si igitur inter duas tales partiales formas naturalis sympathia esse potest; cur non etiam inter animam matris, & formam seminei spiritûs à matre decisi, & ad fabricandum fœtum, in suo utero permixti semini patris?

Nam semen femineum est quodammodo pars animantis, & instar furculi, ex quo, tanquam particulâ, novum animans construitur. Quamdiu ergo utero feminae continetur, & cum semine virili miscetur, foveturque, est quasi pars matris; sicut etiam postea ipse foetus, quando absolutâ conformatione, per umbilicum alligatur utero matris. Pendet enim tunc à matre, sicut pomum à ramo arboris. Pomum autem est quasi pars rami; etsi formâ substantiali, ut opinor, ab arbore differat.

Sic etiam (quod magis mirum) semen ovi gallinae suppositi, quamdiu ab ea incubante fovetur & influxum ejus excipit, tanquam matris; sympathiam cum anima, & imaginatione gallinae habere potest.

Si me roges, quare pars ista foetus, potius quam altera, signetur per imaginationem matris?

Dic tu mihi prius, quænam causâ sit, quæ istam partem seminis ad caput, alteram ad collum, aut ad pectus fabricandum determinat. De qua re tamen, Lib. II. Cap. I. Art. II. aliquid balbutire conati sumus. Ista quippe sunt in putei Democriti fundo, & abstrusissima in naturæ thesauris. Ignoras enim, *Sic Sapiens, qua ratione compingantur ossa in ventre pregnantis.*

Isid. 11.

Valles. c. 11

Philos.

sacra.

Gen. 30.

Si verò foetus, non tantum matris, sed etiam patris imaginatione signetur, quod Franc. Vallesius existimat; & inde colligit, quòd Scriptura, Iacobum non tantum ante oves, sed etiam ante arietes, posuisse virgas narret (*ponebat, enim inquit, Iacob virgas in canalibus aquarum, ante oculos arietum & ovium, ut in earum contemplatione conciperent:*) non aliter fieri potuisse videtur, quàm si imaginatio, & ardor libidinis arietum, imaginationem & ardorem matrum adjuverit: ita ut ex mixtione spirituum & temperamenti utriusque seminis, in tali fervoris, & ceterarum qualitatum gradu, resultaverit occulta qualitas, quæ fuerit instrumentum virtutis conformatricis, in colorandâ, & figurandâ illâ signaturâ foetus, juxta determinationem imaginationis. Nam occultas quasdam alias qualitates, præter primas & secundas vulgò notas, omnes jam passim Medici in lapidibus, plantis, &c. venenatis, aut medicamentosis, experimentorum evidentiam victi, admittere coguntur.

Deinde



Deinde in diversis partibus & recessibus corporis, animalis variæ sunt proprietates (quas Medici formis heterogeneis tribuere solent) quibus naturales, & in varia temperamenta, & occultas, mirabiliumque nonnunquam operum effectrices qualitates, decoquuntur. Hi verò spiritus, non ad omnes, sed ad certas quasdam imaginationes, per naturalem sympathiam, è latebris suis ebulliunt, & evocantur, seminibusque animalium permiscentur; quorum mixturâ ac ministerio virtus conformatrix mirabilia quædam, extra legem ordinariam, texturæ foetus quandoque, quasi ludendo miscet, & interfecit.

Spiritus verò, aut humores certos, quibusdam, non omnibus sine discrimine, imaginationibus evocari, patet: quòd rei suavis & palato blandæ imaginatio salivam dulcem in linguam evocet; & hinc phrasis quâ dicere solemus: Hic, aut iste cibus potusve *mibi salivam movet*. Item limæ stridentis, aut panni mordicùs apprehensi imaginatio, spiritus quosdam pruritu fremituque suo molesto laceßentes, nescio unde, in dentes attrahit, & eos quasi exacuit.

Si quis deinde oculos lippientes, si tibiam alterius putrescentem aspiciat; spiritus in oculos proprios, aut in tibiam affluentes, qui alterationem aliquam efficiant, sentiet.

Si denique alijs quibusdam (quod facile potes) de istâ signaturâ foetus, interrogatiunculis me fatiges; ut me celerim expediam, in pontem asinorum aufugiam, & clamabo: Talis est natura & essentia rei: Essentiæ non datur ratio.

## CAPUT IX.

*De appetitu sensitivo.*

**P**Ræter sensum, tam externum quàm internum, quo anima sensitiva versatur circa objectum suum per cognitionem, est aliud potentiæ vitalis genus, quo in ipsum fertur per appétitionem.

Cùm enim *operans*, juxta Peripateticam S. Thomæ doctrinam,

S. Tho. 1. p. 1. q. 78. a. 1. *Strinam, debeat aliquo modo conjungi suo objecto, circa quod operatur;*  
 hoc duobus modis fieri potest. Primum, si objectum vel per se, vel per aliquod sui specimen ad potentiam accedat, & ei conjungatur; secundo, si potentia ipsa per sui inclinationem objecto quodammodo sese admoveat. Priori modo potentia cognitiva, posteriori appetitiva operatur.

Inclinatio verò ista versus objectum, fieri iterum dupliciter potest. Vel enim cæco modo, ac sine prælucente cognitione; vel præeunte quadam veluti cognitionis lucernâ. Prima inclinatio vocatur appetitus naturalis; qualis est inclinatio corporis gravis ad centrum, item inclinatio materiæ primæ ad formam.

Secunda inclinatio vocatur appetitus elicivus; qui est proprius animalium, & utentium cognitione. Hic enim est, qui amat, & odit: *quod autem quis prorsus ignorat, ait S. Augustinus, amare nullo pacto potest.*

S. August.  
 lib. 10. c. 1.  
 Strin.

Deinde, ut sapienter S. Thomas, appetitus naturalis non est multiformis, sed ad unum appetendum determinatus; appetitus verò animalis plurima appetere debet, quibus animal indiget: unde per cognitionem præviam, ad hoc vel illud, hoc vel illo tempore, aut loco appetendum, determinari debet.

## ARTICVLVS I.

*Appetitus animalis in quo organo resideat.*

**Q**uidam imaginatur, singulorum sensuum externorum organis inhærere peculiarem illi sensui appetitum, quo objectum conveniens appetat, inconueniens respuat.

Sed multitudo ista appetituum non placet. Appetitus enim animalis, non iudicium imperfectum, & quale est sensus externi, sed tantum sensus interni, quod perfectius & eminentius est, immediatè sequi potest, & debet. Vnicus ergo in toto animali appetitus, sicut unica imaginatio est, cuius decreta & sententias appetitus audit.

Hoc



Hoc enim aliter opinantes decipit: quodd dolor, qui sensum tactûs torquere dicitur, videatur esse actus elicitus ab appetitu quodam, qui illi sensui externo, in eodem organo, assistat.

Sed, ut Cap. VII. Art. II. nuper dicebamus, id quod in membro sauciato, aut ustulato nos torquet, non est ipse dolor proprius & formalis, ab appetitu sensitivo elicitus; sed qualitas quædam membro illi disconueniens, quam non solum tactus cognoscere, sed eminentiori phantasiæ tribunali etiam fisti, & ab eo judicari debet: quo facto appetitus (ubicumque ille sedem in corpore animalis habeat) eam qualitatem averfari potest.

Cujus rei signum est: Quodd si depravata, vel habitu quodam in contrarium indurata phantasia fuerit, de qualitate illâ doloriferâ malè judicet, & mitiorem, quàm re verà est, repræsentet, dolor tolerabilior erit; etiam si tactus externus im-  
peditus non sit, & totam illius qualitatis sævitiam persentiscat. E contrà verò, si phantasia acerbiolem illius qualitatis cruciatum, quàm est & à tactu judicetur, apprehendat, appetitus quoque magis dolorosum actum eliciet. Igitur non sequitur proximè judicium externi tactûs, sed internæ imaginationis.

Igitur, pro omnibus sensuum externorum, & internorum objectis appetendis, unicus est appetitus sensitivus. Quem Aristoteles, & Peripatetici passim in corde, tanquam proprio organo, Medici verò in cerebro collocant, juxta ipsum imaginationis tribunal & organum, ex cujus dictamine se movere debet.

Sed necesse non est, in cerebro ponere. Quia etiam si in corde sedem habeat; per sympathiam tamen, aut alium influxum, à phantasia, quæ arcem cerebri tenet, dirigi potest.

Plura verò sunt indicia, quare appetitus sensitivus in corde, quàm in cerebro stabiliendus sit.

Nam omnes ejus passionés, ut amor, odium, ira, timor &c. cor alterant & arterias varijs motibus agitant. Sicut igitur ex melancholia, aut alijs cerebri humoribus vel alterationibus imaginationem depravantibus, conjectamus adversus Aristotelè,

Z z z z

phanta-

phantasiam in aliquo cerebri anfractu delitescere; ita simili conjecturâ pro Aristotele, appetitum in aliquo cordis sinu abditum esse colligimus.

Nec refert, facultatem aliquam à cerebro distantem (qualis v. g. est illa, quæ in partibus genitalibus pruritum spirituum libidinosorum excitat) à phantasia cerebri posse commoveri; nam aliâ longè ratione & modo cor excitari, quàm partes genitales, aut quàm aliud membrum animalis, à regione cerebri distans, experiri videmur. Affectu enim amoris videtur se effundere, & quodammodo tentare erumpere è pectore cor nostrum, ut se rei amatæ jungat; & quia hoc non potest, ideo homo rem amatam pectori suo interdum apprimat, ut cordi quantum valet admoveat. Signum igitur est, glutinum illud amoris in corde sedem habere.

Prov. 6.  
Job. 31.

Cui opinioni faver ubique sacra Scriptura, quæ passim amorem in corde reponit. *Non concupiscat pulchritudinem ejus cor tuum. Si deceptum est cor meum super muliere &c.* Et indifferenter cor tam pro appetitu inferiori, quàm superiori accipitur: *Diliges Dominum Deum tuum ex toto corde tuo: Obdurabo cor Pharaonis &c.*

Nam quia appetitus inferior, qui est in corde, appetitum superiorem movet, idcirco superior dicitur etiam in corde juxta ipsum residere; licet non in organo corporeo, sed in anima spirituali sedem habeat. Quomodo etiam ratio superior in arce cerebri tribunal suum habere dicitur; quia ratio inferior, à quâ illa species suas intelligibiles haurit, & cujus phantasmata speculatur, in cerebro habitat.

Quo sensu verò, etiam sensus interni, & ratio dicantur operari in corde, & de corde exire pravæ cogitationes, nuper Cap. VIII. Art. I. dictum est. Certè S. Augustinus cogitativam & sensus internos in cerebri arcem submovet, licet concupiscentiam in corde locet.

An verò appetitus inferior in duas potentias reapse distinctas, concupiscibilem videlicet, & irascibilem, distinguere oporteat, hodie & olim dubitatum est. Plato distinguebat, & concupiscibilem in hepate, irascibilem in corde statuisse videtur.



detur. Alij contrà, concupiscibilem in corde, irascibilem in hepate locant.

Sed Aristoteles organo eas non distinguit. Vtraque igitur sit in corde.

D. Thomas credit duplicem esse potentiam, non tantùm D. Th. 1. p. 9. 81. a. 2. differentes ejusdem potentiae actus: quia facultas irascibilis est quasi miles, defendens bonum quod amat concupiscibilis. Officium enim ejus est irasci ijs qui boni istius affecutionem impedire, aut possessionem turbare volunt.

Negant tamen plurimi distinctionem istam potentiarum esse necessariam, sed discrimen officiorum ejusdem potentiae sufficere. Sic enim ratio concupiscibilis, & irascibilis in voluntate sunt conjunctae. Facile quippe intelligi potest, quomodo, sicut idem appetitus concupiscibilis bonum sensibile concupiscit, & malum contrarium fugit; ita unus idemque iste appetitus bonum concupitum etiam contra oppugnantem defendat. Vnicus quippe omnium istorum motuum est cardo: bonum nempe appetitum, quod & ad sui amorem primariò trahit, secundariò ad contrarij fugam impellit, ac novissimè contra oppugnantem arma expedit.

Vnde videtur tam eundem appetitum, concupiscibilis & irascibilis officio posse fungi, quàm eosdem esse dentes, quibus canis unus ossis sui delicias rodit, & quos adversus alterum canem competitorem stringit.

Sed in re distinctionis, D. Thomas solet esse similis diviti patri familias, cujus culina & supellex multitudine ac varietate instrumentorum gaudet; ut divisis officijs omnia sine confusione concinnius peragi possint. Nec curat parsimoniam Nominalium, quibus tam curta & paupertina supellex, ut cum Diogene scutellam abjiciant, si cavâ manu bibere valeant; ingeminantes vulgare illud ubique suum: *Frustra fit per plura, quod fieri potest per pauciora.* Item: *Nomina plura, res autem una.* Vnde plurima quæ Thomistæ, & Scotistæ in res disperitiunt, ipsi ad nominum tantùm pluralitatem redigunt: ut meritò Nominales vocentur.

## ARTICVLVS II.

*Quodnam sit appetitûs sensui di objectum.*

**A**ppetitûs sensitivi objectum est bonum sensibile, delectabile. Nec enim imaginatio aliud bonum, quàm delectabile appetitui proponere valet. Bonum enim honestum sphaeram activitatis ejus transcendit. Aliàs enim bruta, non tantùm imagine honestatis, sed verà honestate possent duci.

Bonum etiam utile non cognoscunt; quia proportio medijs ad finem, in qua ratio utilitatis consistit, est incognita ipsis. *Vnde nesciunt, ait Medina, quomodo coitus ordinetur ad generationem, quomodo nidus ad incubandum ovis: igitur non possunt appetere aliquid ut utile ad finis consecutionem.*

D. Tho. 1. 2. q. 4 a. 1. Sed dicat potius Magister ejus S. Thomas. *Apprehensio sensitiva, inquit, non attingit ad communem rationem boni, sed ad aliquod bonum particulare, quod est delectabile.*

Idem 1. 2. q. 16 a. 2. Postea etiam negat bruta uti membris suis, vel ullâ aliâ re; *Quia, inquit, Vti, importat motum appetitus ad aliquid in ordine ad alterum. Quod solius rationis opus, unum ad aliud referentis, esse dicit.*

Idem 1. p. q. 78 a. 4. Sed quomodo igitur sibi constat, ubi alibi dicit: *Avis colligit paleam, non quia delectet sensum, sed quia est utilis ad nidificandum?*

Resp. Non delectat palea, qualitate aliquâ sensibili sensum externum avis, sicut qualitates tangibiles primæ, vel secundæ delectant tactum; sed delectat appetitum interiorem, ex imaginatione intentionis, quam non percipit sensus exterior, ut loquitur ibi D. Thomas. *Sicut ovis videns lupum venientem, fugit, non propter indecentiam coloris, vel figura, sed quasi inimicum naturæ. Et rationem optimam addit: Quia necessarium est animali, ut quærat aliqua, vel fugiat, non solum quia sunt convenientia, aut non convenientia ad sentiendum; sed etiam propter aliquas alias commoditates & utilitates, sive nocumenta.*

Interim utilitates istæ, & nocumenta non ab imaginatione brutorum, sed ab Auctore naturæ tantùm futura prævidentur;



tur; qui idcirco naturam bruti sic instituit, ut avicula, v. g. repore primi veris resoluta & excitata judicet delectabile esse paleas sic tractare, ut in nidum concinnentur: deinde ova ibi deponere, ac tandem incubare. Ita ut, licet non sensus exterior, phantasia tamen tali veluti lusu, & serie actionum delectetur. Hæret enim phantasia, & appetitus bruti in proximo ubique delectabili objecto, nec ulterius prospicit; sed naturæ instinctu, ab una actione ad aliam, ei naturali nexu devinctam, protruditur. Et sic videtur in proximo objecto intruere utilitatem conducentem ad finem qui postea sequitur; etsi hoc re verâ non faciat. Tantum enim ab uno delectabili lusu ad alium connexum, pedem promovet. Nec mirum, quod firmiori & constantiori passu, quàm homo, qui ex deliberatione medium ad affecutionem finis adhibet; quia sapientia & potentia Auctoris naturæ, qui actiones brutorum tam arctè inter se devinxit, certior & validior est, quàm omnis humana virtus. Videsis quæ de hoc brutorum ingenio superius Cap. I. Art. III. differuimus.

Cum igitur S. Thomas supra dicebat paleam ab ave colligi, *quia est utilis ad nidificandum*; verum est, de materiali (ut sic dicam) utilitate, quam non avis ipsa, sed naturæ Auctor cognoscit. Avis verò in locum futuræ utilitatis, sensus interioris præsentem delectabilitatem substituit.

Quia deinde idem oppositorum est appetitus; potentia quæ in bonum delectabile & jucundum se inclinat, eadem ab opposito malo indelectabili & injucundo se avertit.

Ista verò averfio; etsi virtualiter sit conversio & quidam reditus indirectus ad bonum jucundum; est tamen (quidquid aliqui dicant) actus formaliter, & specie à conversione diversus. Longè enim aliter afficitur appetitus; quando avertitur ab amaro, & quando ad dulce convertitur.

An verò omnium animalium appetitus sint upius speciei infimæ, sicuti sunt externi sensus (visus enim aquilæ, & nostræ non creduntur specie differre) ambigi potest.

Ego appetitum bovis non credo ejusdem speciei esse cum canis appetitu. Cur alias enim tota species bovina in fœno,

canina in omnibus deliciis reperiret?

Sed nec eorum phantasiæ unius speciei sunt. Quare enim phantasia bovis fœnum semper jucundum, nunquam ossa, phantasia canis contrà, perpetuò judicaret? Tanta etiam & innumerabilis ingeniorum distantia ac varietas ( & hæc non in uno tantum, aut altero individuo, sed in tota universim specie ) specificum phantasiarum discrimen satis altè clamat.

Denique actus phantasiæ, qui appetitui præire in appetendo, aut refutando objecto debet, non cujuscunque modi, sed judicativus esse debet; & imitari judicium intellectûs, quod appetitum superiorem regit. Phantasia enim bruti quosdam actus per modum simplicis apprehensionis, alios per modum judicij elicit. Ovis enim nonnunquam defixis oculis canem aspicit, quasi speculans canisne, an lupo sit. Nec prius accedit, nisi postquam amicum canem esse judicaverit; neque lupo fugit, nisi postquam de lupo ut inimico sententiam tulerit. *Indicat enim ovis*, ait S. Thomas, *videns lupo, eum esse fugiendum, naturali judicio.*

D. Tho. I. p.  
q. 83. a. 1.

Sed quomodo appetitus audire dictamen judicij phantastici potest, si judicium istud in cerebro, sedes appetitûs in corde sit, inquiunt Medici?

Sed ab istis vicissim peto: Si appetitus sensitivus in arce cerebri, juxta phantasiæ tribunal, ut volunt, resideat; quomodo gaudio suo cor dilatat, & mœrore constringit?

Respondebunt, opinor, per naturalem sympathiam.

Hoc idem repono ipsis. Phantasia enim capitis, sympathiâ quâdam, & radicatione in eadem animâ, movet appetitum cordis, etsi à capite distet intervallo colli & pectoris. Nec enim, credo, fingent aliquam irradiationem, quâ phantasma è cerebro speciem quandam in cor ad excitandum appetitum, dejiciat. Nam appetitivæ potentiæ ad functiones suas obeundas, ministerio specierum non indigent.

At quomodo ergo reciprocè, phantasia, inquires, ex arce capitis, affectum cordis cognoscit, & imaginatione eum attingere valet?

Quidam censent, ab affectu cordis effluere quandam speciem



ciem phantasticam in cerebrum, quâ affectus ille se phantasia repræsentet; sicut à colore species visibilis in oculum emicat. *Salvo meliori iudicio*, inquit Molina, *puto, ex motibus seu actibus appetitus sensitivi in corde, & hepate residentibus* (vim enim appetitus concupiscibilem in corde, vim irascibilem in hepate juxta fel constituit) *derivari ad phantasiam, sed residentem in capite, species, quibus illos intuitivè, & per experientiam cognoscit. Ex tali verò cognitione remanere imaginem, & quasi vestigia quadam in thesauro memoria sensitiva, quibus illorum postea recordamur.*

Molin. 1. p.  
q. 57. a. 4.

Verum, non opus est, novum genus speciei phantasticæ fingere, quæ ab actibus potentiarum appetitivarum in potentias cognitivas effluat. Nam licet affectus potentiarum appetitivarum possint quidem habitum, tanquam vestigium sui, in facultate sua relinquere; non tamen speciem, nescio quam, in phantasiam, vel in aliam potentiam cognitivam trajicere. Certè de tali specie non memini alibi me legisse.

Deinde non apparet nervus aliquis à cerebro ad cor, vel ad hepar à natura factus, qui sit canalis, per quem species illa à corde ad cerebrum transmeet.

Igitur, sicuti D. Thomas docet actum voluntatis immediate sine alia specie, ab intellectu percipi; ita etiam de affectu appetitus sensitivi philosophandum existimo.

S. Tho. 1. p.  
q. 87. a. 4.

Si objicias, affectum voluntatis esse intimè præsentem intellectui; cum voluntas & intellectus sint duæ facultates ejusdem animæ indivisibilis: & proinde ab intellectu faciliè percipi posse. Resp. Intimam illam præsentiam, ad cognitionem parum conferre. Nam habitus voluntatis sunt etiam intimè intellectui nostro præsentem; nec tamen eos immediatè percipimus, sed ex facilitate actuum eos nobis inesse conjectamur.

Per sympathiam igitur, & quia ab eadem anima vitaliter effluunt actus voluntatis & actus intellectus, ideo intellectus actum voluntatis cognoscit. Nam anima per intellectum proponit sibi objectum amandum; deinde seipsam excitat ad amandum per voluntatem; & tertio se amare, iterum per intellectum cognoscit. Unde quia similis sympathia est inter appeti-

appetitum sensitivum & phantasiam, eadem anima quæ in corde afficitur, cognoscit in cerebro affectum sui cordis. Sympathia enim, & identitas animæ faciunt, ut affectus cordis sit phantasie satis præsens, in ratione cognoscibilis. Cognoscit autem phantasia illum affectum, ut cetera solet, non quid sit, sed an sit.

Nec absurdum est, animam sensitivam reflecti supra operationem suam, si operationes ad diversas animæ potentias spectent. Sic enim etiam reflectitur, cum se videre, aut cujuslibet sensus externi operationem se exercere imaginatur.

Imò non tantum eadem anima sensitiva, sed etiam eadem animæ sensitivæ potentia supra actum suum priorem reflecti potest: ut quando memoria actus, sui præcedentis meminit, sicut nuper docuimus.

Ferrar. lib.  
4. c. 11.  
contra  
Gent.

Quando igitur vulgò jactatur: Potentiæ spiritalis, sive intellectus & voluntatis proprium esse supra seipsam reflecti, de perfecta & quasi circulari reflexione id accipere oportet, ut Ferrariensis alicubi ingeniosè dicit: per quam scilicet, animæ potentia, quæ est principium actus, sic in seipsam redit & reflectitur, ut sit etiam proximus terminus extrinsecus, sive objectum immediatum sui actus.

Tunc enim est perfecta reflexio, quando potentia non tantum in actum suum priorem, vel in aliquid sibi inhærens, sed in seipsam immediatè redit: quomodo descriptio circuli absolvitur, quando in idem punctum revertitur, à quo egressa fuit. Hoc pacto sola ratio superior, & appetitus superior supra se reflectuntur; quia & intellectus sub objecto adæquato intellectus, & voluntas sub objecto adæquato voluntatis continentur. Non sic phantasia, aut appetitus inferior intra latitudinem sphaeræ suæ activitatis, sive objecti sui comprehenduntur.

ARTI-



## ARTICVLVS III.

*Quot sint passiones appetitus sensitivi.*

**A**ctus appetitus sensitivi vocantur specialiter passiones, non tantum, quia sunt formæ quas patitur, & in se recipit potentia eas eliciens; sed quia insuper ad eas, in corpore animalis sequuntur sensibiles quædam, per manifestam alterationem, passiones. Vt ad amorem sensualem dilatatio, ad odium constrictio cordis: spes vultum accendit, & erigit, metus in pallorem extinguit & dejicit.

Hæ autem passiones, si secundum rectæ rationis lineam funduntur, aut contrahuntur, vitiosæ non sunt. Nam tales in Christo etiam fuerunt. Quem iratum, & pavidum legimus. Ioan. 2.  
Marc. 14.

Si autem limites rectæ rationis transiliant, *perturbationes* vocantur; quas Stoici in sapientem cadere negant. Si quis enim supra id quod oportet, irascatur, aut paveat, jam non operatur, aut se habet, ut sapiens.

Quia verò bonum, aut malum est id circa quod appetitus sensitivus versatur, ideo passiones in duas classes rediguntur.

Circa bonum effunduntur, desiderium sive cupiditas boni absentis, & fruitio, sive gaudium boni præsentis. Circa malum, metus, sive abominatio absentis mali, & dolor, sive tristitia mali præsentis. Exprimit has quatuor passiones eleganter unico, nec toto, versu Virgilius, ut S. Augustinus animadvertit: S. August.  
lib. 14. c. 3.  
Civit.  
Æneid. 4.

*Hinc metuunt, cupiuntque, dolent, gaudentque. —*

Præterea dantur aliæ duæ passiones, amor & odium, ut docet D. Thomas. Sed istæ sunt tantum principia & velut rudimenta aliarum; ideoque illæ priores, principales appellantur.

Prima enim immutatio appetitus ab appetibili, vocatur amor, ait Sanctus Doctor. *Qui nihil est aliud, quam complacentia appetibilis.* D. Tho. 1.2. Est ergo amor (ut a desiderio, & gaudio distinguitur) prima inclinatio, & simplex complacentia in bono secundum se, non considerando illud ut absens, aut præsens. Unde est D. Tho. 1.2.  
q. 26. a. 2.

A a a a

velut

velut simplex quædam unio, & coaptatio, ut loquitur S. Thomas, *appetitus cum appetibili.*

Ex hoc simplici amore sequitur desiderium, sive cupido absentis boni: denique gaudium, sive delectatio, vel fruitio boni præsentis. Hôc enim delectationis affectu anima quiescit, aut volvit se ac revolvit quasi circulariter in boni præsentis dulcedine, non evolvendo se, & tendendo ulterius. Loquendo tamen latius de amore, in desiderio, & fruitione boni, aliquis etiam amor intrinsecè includitur, tanquam gluten quoddam quo appetitus cum objecto amabili absente, vel præsentem colligatur.

Odium est simplex mali displicentia. Inde sequitur metus, sive abominatio mali impendentis; ac postea de præsentem tristitia. Græci deum amoris, flammeo telo armatum, simpliciter *E'pala Amorem* appellant, Latini Cupidinem; quia, ut opinor, cupiditas futuri & sperati boni urit & cruciat, non ita simplex complacentia, aut gaudium boni præsentis.

Atque prædictæ sex passionem, Amor, desiderium, gaudium, odium, metus, dolor, sunt appetitus sensitivi, ut concupiscibilis est. Appendix præterea gaudij in hominibus, est risus:

Franc. Val-  
les, lib. 5.  
c. 9. Contr.

quem Vallesius *vibrationem quandam septi transversæ, & musculorum thoracis ac oris*, definit. Motus autem iste, ut verus non Sardonicus risus sit, debet ex gaudio proficisci. Sed præter gaudium, jungendam etiam esse admirationem, ut risus excitetur, contendit cum Fracastorio, adversus Valeriolam Vallesius. Nam jucunda & nova simul conjuncta, inquit, solent excitare risum. Iucunda verò gaudium, nova admirationem creant. Vel potius, modus quo excitatur risus, ut videtur

Quintil.  
lib. 6. c. 3.

Quintiliano, inenarrabilis est. Non omnes enim ejusdem de causis rident. Nihil tamen universim potentius ad excutendum risum, quàm subitum & inexpectatum quid, si cum jucunditate veniat. Risus si in sonitum pulmonum emicet, cachinnus vocatur.

Ut risus gaudij, ita fletus tristitiæ appendix est. Vnde est motus risui contrarius. *Risu enim ait Vallesius, dilatatur cor, & cum eo thorax, & faciei muscoli; quæ omnia per fletum constringuntur.*



*guntur. Hac compressio lacrymam exprimit. Si autem fletus in vocem exeat, lamentum, aut ejulatus appellatur.*

Præter sex superiores appetitûs, ut concupiscibilis est, passionibus, numerantur quinque aliæ, ut est irascibilis: spes & contraria desperatio, audacia & contrarius timor, & denique ira, quæ caret contrario.

Omniū harum passionum *objectum est sensibile bonum, vel malum*, ait D. Thomas, *non tamen absolute* (sic enim sunt objectum passionum concupiscibilis; ) *sed sub ratione difficultatis vel arduitatis*. Vis enim irascibilis est quasi satelles virtutis concupiscibilis: quæ, ubi bonum à concupiscibili concupitum obtentu arduum est, vel malum quod fugit, evitatu difficile est, viam concupiscibili, sperando, audendo, irascendo facit. *Ad hoc enim tendit*, inquit iterum S. Thomas, *ut superet contraria, & superemineat eis*. Si verò non satis animi habeat, desperat, & timet. Quia verò præcipue irascendo supereminet contrariis, & impedimenta affecutionis boni, aut evasionis mali disjicit; ideo ira dat ei nomen, vocaturque vis irascibilis potius, quam sperabilis &c.

D. Th. 1. 2. q. 23. a. 2.

Idem 1. p. q. 81. a. 2.

Timor autem, five metus ponitur passio tam irascibilis, quam concupiscibilis, sed in diversa significatione. Est passio concupiscibilis, prout simplicem fugam & recessum à malo significat; vocatur autem passio irascibilis, quatenus difficultatem evadendi respicit, & ne ab ea superetur, trepidat.

Non est etiam necesse, vim irascibilem subjecto à vi concupiscibili distinguere, ut nuper dicebamus; sed utramque in corde, cum Aristotele locamus. Nec refert, quòd fellis, five bilis flavæ laguncula ex hepatis latere dependeat, ut vim irascibilem in hepate sedem posuisse, cum Molina conjecimus. Quia in ira non hepar, sed cor maximè commovetur. Imò folliculus ille cholæræ ex hepate pendulus, repurgat hepar, ejusque sanguinem à flava bile, ut animal mitescat, & cholæræ minùs obnoxium sit; sicut splen atram ei bilem exugit, ut minùs melancholici simus. Hinc enim natum, ut *splene ridere*, & cachinnones esse dicamur. Quod tamen Poëta tenebrosus aliorum accepit, & putasse videtur, splenem in risu

Molin. 1. p. q. 59. a. 4.

Perf. sat. 1.

rifu & cachinnis, petulanti vibratione insolescere.

*Quid faciam? sed sum petulanti splene cachinno.*

At fortasse aliquis objiciet, non tantum in corde, aut hepate, sed etiam in ventriculi orificio appetitum aliquem sensitivum esse. Ibi enim latrat fames, & hiat sitis; qui sunt appetitus sicci, aut humidi.

Galen lib. 1  
de sympt.  
causis.

Respond. famem, & sitim non esse propriè actus appetitûs sensitivi animalis, sed esse sensum quandam pruritûs & convulsionis ventriculi, qui antecedit actum appetitûs, quem Medici ponunt in cerebro, nos in corde. Dicit hoc eleganter Galenus. *Primum symptoma, inquit, est inanitio. Secundum est inanitarum partium naturalis (non animalis) appetentia. Hanc sequitur per venas, qua porriguntur in ventriculum, suctio. Deinde suctio sensus: qui fames est. Postremò ipsa animalis appetentia, omnium ultima.*

Quæ de passionibus appetitûs sensitivi tam concupiscibilis, quàm irascibilis jam differuimus, cadunt in appetitum hominis indifferenter, stantis, & lapsi. Tamen enim secundum, quàm contra rectam rationem concupiscere potest homo, & irasci.

Iac 1.

Aliud ergo in sacris litteris significat concupiscentia, vel cupiditas, cum passim sumitur in malam partem. *Vnusquisque tentatur à concupiscentia sua, abstractus & illectus. Deinde concupiscentia, cum conceperit, parit peccatum.* Quam proinde peccati matrem, nomine filij sui, peccatum Apostolus Paulus appellat.

Rom. 7.

*Non ego operor illud, sed quod habitat in me peccatum.* Nihil verò hoc peccatum aliud est, quàm pars animi vitiosa, sive appetitus sensibilis, in omnes tam concupiscibiles, quàm irascibiles passiones solutus & effrenis, merito culpæ originalis. Aut certè (& res tamen eòdem redibit) est *qualitas* quædam *affectionalis*, ut etiam interdum vocat eam S. Augustinus: sive, ut alibi, *morbida*, aut *mortifera qualitas*, distincta ab appetitu, qui est animæ nostræ pars sive facultas. Qua affectionali qualitate, tanquam pondere, anima in rerum terrenarum affectus propendet. Est quippe S. Augustino perinde, sive facultatem animæ sic inclinatham, sive pondus eam inclinans concupiscentiam voces. Illud verò pondus & qualitatem morbidam

S. August.  
lib. 6. c. 18.  
contra Iul.



non videtur S. Augustinus à temperamento humani corporis, post sublatum vinculum iustitiæ originalis, distinguere: cum dicat, *Amisso suo statu, corpus primorum parentum duxisse morbidam & mortiferam qualitatem, quæ inest etiam pecorum carni.* Idem lib. II c. 32. de Genes. Certè enim pecorum carni non alia morbida qualitas inest, quàm naturale temperamentum, animam pecoris in suam carnem altissimè deprimens. Vnde alibi: *Tanta, inquit, excellencia est, in comparatione pecoris, homo, ut vitium hominis, natura sit pecoris.* Idem lib. de pecc. orig. c. 49. Et sæpe ingerit Iuliano, similem concupiscentiam, quæ mala est in homine, esse bonam in pecore; quia nulla in pecore est ratio, adversus quam concupiscentia valeat concupiscere, & dimicare.

Et per Magistri sui vestigia ambulans S. Thomas, probat materiale peccati originis, siue concupiscentiam esse inæqualem in hominibus, quia temperamenta in quibus nascimur, ponderibus inæqualibus in vitia, & rerum terrenarum amores nos inclinant. Nam *soluta vinculo iustitiæ originalis,* S. Th. I. 2. q. 82. a. 4. ad 1. *inquit, sub quo, ordine quodam omnes vires animæ continebantur, unaquæque vis animæ tendit in suum proprium motum; & tanto vehementius, quanto fuerit fortior. Contingit autem vires aliquas animæ esse fortiores in uno, quàm in alio, propter diversas corporis complexiones. Quòd ergo unus homo sit pronior ad concupiscendum quàm alter, non est ratione peccati originalis formaliter sumpti; cum in omnibus aqualiter solvatur vinculum originalis iustitiæ, & aqualiter in omnibus partes inferiores animæ sibi relinquantur; sed accidit hoc ex diversa dispositione potentiarum.*

Alio enim impetu & modo in diversas appetitûs sensitivi vitiosas passiones cholericæ, sanguineæ, phlegmaticæ, melancholicæ ruunt; alio armorum genere adversus rationem & spiritum rebellant. Quantum verò temperamenta corporum ad inclinandum appetitum inferiorem, & eo mediante, superiores valeant, nimium quantum experimur, & legi potest apud Galenum, in Libello, *Quòd mores animi sequantur temperamenta corporum.*

## CAPUT X.

*De potentia loco-motiva animalium.*

**P**ost appetitum sensitivum, sequitur potentia, quâ anima corpus loco movet, ad appetitûs imperium. Sæpe & maximoperè miratus sum tenebras, quas ingenium humanum reperit in pervestigatione & intelligentiâ naturæ motûs localis, quo tam evidenter nosipfos movemus, & quo in rerum natura nihil videtur nobis esse familiarius. Quando enim pedem, aut manum moveo: quid ago? Producōne aliquid, an non? Si aliquid, quid est illud? Quidquid autem istud est: evanescitne cessante motu, an permanet? Excitaturne mediante impetu à se distincto, an à potentiâ animali immediatè funditur? Et plurima alia, quibus ingenium humanum fatigatur, possumus exquirere. Sed multa non ad hos Libros de Anima, sed ad Librum 8. Physic. vel ad Staticam, aut Mechanicam spectant.

Vnum tamen, aut alterum dubium, quod omnem motum localem concernit, huc attrahere, & raptim attingere, non inutile, nec fortè injucundum erit.

## ARTICVLVS I.

*An Vbi, quod est terminus motûs localis, spatium aliquod  
imaginarium respiciat.*

**A**ristoteles veteres illos Philosophos refellit, qui inane quoddam spatium astruebant, cui per quandam veluti penetrationem dimensionum immerfus esset hic Mundus, & extra ultimam cæli sphaeram, in infinitam undique expansionem se extenderet. Hæc quoque opinio inter placita Stoicorum recepta: qui ideo Vniversum à Mundo distinguebant. Vniversum enim completi etiam spatium illud inane supercæleste, Mundum verò ultra cælum

Lipf. lib. 2.  
Diff. 6.  
Physiol.

non



non extendi, dicebant. *Cogitatio nostra*, ait Seneca, *celi muni-  
menta perrumpit, nec contenta est id quod ostenditur scire. Illud scrutor  
quod ultra Mundum iacet. Vtrumne profunda vastitas sit, an hoc ipsum  
terminis suis cludatur?* Graphicè autem & pulchrè imaginationem,  
quam de eo spatio inani formabant Stoici, Cleomedes Stoicus nobis describit. *Simplicissima est ejus conceptio*, inquit, *ut  
quod incorporeum & intactile sit, quod nec figuram habeat, nec sit fi-  
guratum, quod neque agat, neque patiatur, sed tantum suscipere cor-  
pus aptum sit.* Prorsus tale, ni fallor, vacuum illud supercæleste  
plurimi Philosophi, nec pauci Theologi hodie sibi mente fi-  
gurant. Vnde ut Stoicos suos etiam hîc propugnet I. Lipsius. *Quid Augustinus*, inquit, *an non extra Mundum infinita spatia lo-  
corum cogitari ostendit? Ut Stoicorum assertio neque tam singularis  
sit, neque ex facili aspernanda: imò Theologorum optimis etiam hodie  
propugnanda.* Sed Augustinus loco à te citato, I. Lipsi, cogi-  
tari quidem talia extra Mundum spatia dicit, non tamen co-  
gitationem probat. *Si infinita spatia temporis ante Mundum cogi-  
tant*, ait, *in quibus eis non videtur Deus ab opere cessare potuisse; simi-  
liter ergo cogitent extra Mundum infinita spatia locorum, &c.* Ac  
postea: *Si dicunt, inanes esse hominum cogitationes, quibus infini-  
ta imaginantur loca, cum locus nullus sit præter Mundum; respondetur  
eis, isto modo homines inaniter cogitare præterita tempora vacationis  
Dei, cum nullum tempus sit ante Mundum.*

Senec. lib.  
de otio  
sap. c. 32.

Ibid. Diss. 9.

S. August.  
lib. 11. c. 5.  
Civit.

Idem lib. 7.  
c. 1. & 5.  
Confess.

Alibi verò cogitationem suam, quam sibi in Manichæismo formaverat, de Dei essentiâ, tanquam de mari quodam im-  
menso, penetrante intra Mundum velut intra spongiam, &  
undique per infinita spatia circumquaque circumfusum, re-  
prehendit: vocatque lepidè, & subridendo, spatia illa inania,  
*spatiosum nihil.*

Vnde qui hodie spatia illa totis imaginationis viribus reti-  
nent, etiam imaginaria vocant, & in classe entium rationis,  
quæ nihil & consequenter nullibi sunt, ea reponunt. Et tamen  
(quod mirum) si verba & cogitationes suas attendant, sic de  
ijs loquuntur, ut in Stoicorum, & veterum Philosophorum  
imaginationem prorsus recidant, & verum, non fictitium  
ens esse cogitent. Volunt enim esse quandam vacuum, im-  
mobilem

mobilem, nullave rarefactione, aut condensatione mutabilem extensionem; quæ proinde sit vera & certissima mensura distantiae, aut propinquitatis inter corpora. Hæ autem sunt, sine dubio, conditiones veri & realis spatij. Nisi enim spatium reale esset, non inde vera, realis, & certa mensura, sed chimærica tantum & fictitia, desumi & mensurari posset.

Deinde volunt, tale spatium ab Vbi, sive a præsentia locali, tanquam terminum essentialis habitudinis respici; & corpora per verum ac realem motum localem ad talis chimærici spatij partem appellere, ac ei velut immergi. Quod tamen tam est impossibile, quam vero locali motu ad Chimæram accedere, & se ei per penetrationem dimensionum immergere.

Quod verò, de iudicio intellectus fabricantis ens rationis, & habitudine essentiali Chimæram respicientis, tanquam simile allegant, simile non est. Nam proprium opus intellectus est imagines & similitudines objectorum exprimere & formare; possunt autem tam rerum falsarum, quam verarum imagines fieri. Nihil quippe vetat, connexionem inter ea quæ cohærere nullo modo possunt, ab intellectu, per errorem cogitari; ut leonem, capram, & draconem in unius Chimærae corpus, iudicio errante colligari. Sed motus localis non fingit spatium imaginarium, sed invenit in rerum natura jam existens, & ei se admovet, aut immergit.

Vnde Philosophi isti & Theologi, si ad seipsos reflectant, re verâ aliud ens æternum & incorruptibile, præter Deum, in rerum naturam invehunt.

Deinde, si quantitas, seu spatium reale, indiget altero spatium, quod imaginarium vocant, in quo locetur; quare hoc spatium imaginarium, adhuc alio imaginario perinde non indiget, & sic detur τὸ τοῦ τόπος, καὶ τοῦ τοῦ ἐν αὐτῷ τοῦ τόπου τοῦ τόπου, & Arist. lib. 4. *hoc in infinitum*, ut Aristoteles olim veteribus objecit?

Spatium quoque istud imaginarium plurimas in Physicam difficultates, præsertim circa condensationem, & rarefactionem corporum, latenter invehit. Vix enim imaginabile est, quomodo condensatio, sine partium in illo spatio mutuâ penetratione; deinde quomodo rarefactio, sine interjecto vacuo, aut



aut sine partium ex mutuo situ educatione, fieri possit.

Denique puto ipsâ experientiâ posse refelli. Nullum, inquam, esse ejusmodi spatium immobile, cui hic Mundus immersus sit, & ad quod motus locales corporum, aut præsentia per motum productæ collineent, ac respiciant.

Dum enim ab annis jam complusculis, pro statu terræ, & motu cæli adversus Copernicanos luctor, tandem experimento, & ratiocinatione didici, verum esse quod contendunt: Pondus è concavo clausæ & velocissimo statu impulsæ navis demissum, tam rectâ lineâ in subjectum carinæ fundum decidere, quàm si navis in anchoris immobilis staret.

Aio verò hoc impossibile esse, si aliquod sit spatium, quale imaginantur, immobile, præter spatium verum & mobile aëris, intra alvum navis conclusi.

Nam si sit aliud spatium immobile, per cujus aliquam lineam, glans v. g. plumbea, intra navem clausam cadens, rectâ versus terræ centrum tendat, ut spatij imaginarij fabricatores volunt; necesse est, ut nave ventis celerrimè incitata, glans non in idem carinæ navis punctum cadat, in quod caderet, si quiesceret navis; sed in aliud retrò versus puppim; imò ultra puppim, ac extra totam navis longitudinem, si motus navis sit admodum velox & rapidus. Quod tamen experientia longè refellit.

Quare verò in idem omnino punctum, directè per lineam aëris, puncto superiori unde incipit casus, oppositum, cadat, siue stet, siue moveatur navis; nulla alia est ratio, quàm quia pondus decedens nullam aliam lineam sequitur, nec sequi potest, præter lineam spatij aërei realis, quod pari passu vehitur cum navi, in qua aer tenetur captivus.

Nam linea illa aërea, per quam plumbum versus terræ centrum initio cadere incipit, non relinquitur retrò: nec ulla est alia causa, quæ plumbum retroagat, & faciat ad aliam aëris lineam migrare, ut non pergat cadere per eandem lineam, quâ incoepit.

Alio, sed non dissimili, experimento probari potest, motum & præsentiam localem tantum aspicere ad spatium reale,

reale, non ad imaginarium. Nam si quis navi velificante saltet à puppi versus proram, secundum cursum navis; non saltat (pari imperu & conatu) longiùs intra navem, quàm si navis immobilis staret: ergo signum est, motum & impetum saltantis commensurari immediatè solo spatio reali & extensioni navis, non autem alicui spatio imaginario, quod decuplo, imò quandoque centuplo majus (prout navis segniùs, aut magis strenuè volat) saltans conficit, eo tempore quo in aère pendet ejus saltus: perinde atque comparatione alvei, vel riparum fluminis, longè plus spatij emeritur qui secundum cursum navis saltat, quàm qui æquali conatu ac labore, in nave quiescente saltat. Quænam verò sit hujus rei sat admirandæ causa, verbo uno, in hoc transitu, dicam.

Quia sicut sedenti in navi communicatur, sine labore & conatu, motus navis, resultantibus in eo tot successivè præsentij, quoties navis ventis aut remis impulsæ, locum mutat; ita dum in navi saltans, saltu suo in aère pendet, resultant in eo præsentia, comites motûs navis, præter illas, quas saltu suo, respectu spatij navis, efficit.

Ex his quoque colligitur: quòd si intra Mundũ, nullum sit spatium, præter veram rerum extensionem, nullum quoq; esse extra Mundum: ac proinde nec Deum magis jam in quadam immensa ibi vacuitate esse, quàm erat in sole, aut lapide antequam sol, aut lapis crearentur. Hinc omnes ferè antiqui *Theologi*, ait Hugo Cavellus, *tenent ipsum modò non esse extra calum*. Nulla quippe vacuitas, habens partem extra partem, sicut imaginamur, magis ibi est, quàm Samariæ, aut Marathonij campi, quando eos cogitatione supra cælos expandimus. Aliàs non omnino absurdè Epicurus alios infinitos Mundos extra hunc nostrum statuisset; quia, ut aiebat, tam absurdum videtur, tantam vacuitatem unico Mundo occupari, quàm immensum campum, pro unicâ spicâ creari.

Difficulter tamen, nisi longâ meditatione, hanc spatij imaginarij imaginationem homines corrigunt. Cujus tamen vanitatem, adversus Molinam, Suarem, Valentiam, Lessium, sat clarè ostendit Lud. Maratius Disp. 3. de Deo. Atque opinio-

Schol. ad  
Scot. l. d. 37.

Leon. Less.  
lib. 2. c. 2.  
de divin.  
perfect.

nem



nem Lessij statuentis (*extra cælum vera intervalla, aut spatia realia, non quidē corporalia, sed spiritalia, quæ nō nisi ratione ab immensitate Dei distinguuntur*) nec Deo, nec ingenio Lessij dignam esse dicit.

Argumenta autem quæ pro fabricando isto spatio imaginario strui solent, attentè inspecta, sophistica & veram realemque extensionem in re chimæricâ perpetuò imaginari & supponere mihi videntur. Vnde ad corrigendam falsam istam imaginationem, plurimum juvabit, loco spatij imaginarij, substituere Chimæram, cum tota sua longitudine & extensione, quam habet à dentibus usque ad caudam. Quando verò Scripturæ affirmant Deum esse excelsiorem cælis, cælos cælorum eum non capere &c. non aliud volunt, quàm terræ & cæli Orbem non esse sphæram adæquatam suæ immensitatis, sed alios & alios sine fine cælos, & Mundos posse condere, quos perinde atque hunc implere valeat. Antequam verò ullum Mundum condidisset, nullibi erat, sed in seipso, ut SS. Patres loquuntur, hoc est, non in alio.

Iob. 11.  
3. Reg. 8.

Quod verò difficulter apprehendamus, aliquid existere, & tamen in nulla parte spatij, existentiam ejus quasi defixam esse, ideo accidit; quia omnia quæ sensibus corporis hîc videmus, aut attingimus, in aliquo spatio esse experimur; unde ex hac assuetudine, similem ad Deum imaginationem perperam transferimus, quasi ante Mundi fabricationem, in *spatio* quodam *nihilo*, ut S. Augustinus suprâ loquebatur, otiosus desideret. Cum tamen non magis in tali spatio, quàm in Chimæra fuerit. Nec tantum de modo loquendi, ut quidam putant, sed de re ipsâ etiam, est hîc contentio.

S. August.  
lib. 7. c. 1.  
Confess.

Quomodo? inquit: nonne, si Deus aërem inter duos cubiculi parietes medium annihilaret, & vacuum ibi faciat, Deus in medio remanebit?

Respondeo, casum istum impossibilem esse. Parietes enim isti proximi & immediati necessario jam fient, si nulla vera extensio, ac reale intervallum sit positum in medio. Vacuum enim etsi videatur esse aliquid, nihil tamen omnino est, ait Aristoteles, contra veterum & cæcipientium Philosophorum hallucinationes. Implicat enim contradictionem, cor-

Arist. lib. 2.  
c. 7. de ge-  
nerat. ani-  
mal.

pora duo à se invicem re verâ distare, & tamen nullum reale intervallum inter ea intercedere. Vacuitas autem omnimoda tam re verâ est extensio & intervallum, quàm Chimæra est verum animal. Corrige igitur falsam illam Democriti, Leucippi, Epicuri, & tot aliorum, de *spatioso nihilo* imaginationem, & fortè rem ita se habere intelliges. Rectè autem advertunt Conimbricenses, ut, *qui negant spatium extra calos, affirmare etiam debeant, tanquam hujus opinionis consuetudinem, vacuum nequidem divina virtute, intra cali complexum dari posse.* Et profectò nisi tanta vacui impossibilitas esset, nulla hactenus solida ratio inventa est, cur minutulam saltem vacuitatis rimam natura adedò refugeret.

Conimbr.  
lib. 4. c. 9.  
Phyfic.

Quid igitur ex omnibus istis conficimus? Potentiam locomotivam efficere Vbi, sive præsentiam, quæ spatium tantum reale respicit; quandoquidem nullum sit spatium imaginarium, corpore plenum aut vacuum, quod præsentia illa respicere possit. Infirmitas tamen humani intellectûs, talis spatij imaginatione & fictione se juvat; quia nullum in universo reale spatium est, quod omnino immobile sit: unde mensuram quandam invariabilem fingit, quæ à dimensionibus realibus æqualibus successivè impleri possit.

An autem Vbi, quod motûs localis dicitur esse terminus, cessante motu, permaneat; an mobile per nudam coexistentiam, & contactum ad reale spatium, præsens esse possit, disputari potest; sed extra oleas, in quibus jam ambulamus.

### ARTICULVS II.

*An potentia loco-motiva, mediante impetu distincto à motu, impellat mobile.*

**R**es ista varijs perplexitatibus est involuta. Vt, quantum possumus, evolvamus, opus est aliquâ motuum distinctione.

Ac in primis: Quando res mobilis portatur ad motum alterius, non videtur opus impetu, sed motus ei communicari potest immediatè. Cum enim quis in navi sedens placidissimo motu aufertur, nullum sentit, aut in eo apparet indicium impetûs



Impetûs, seu impulsûs ad motum prævij. Sic etiam potest Angelus seipsum, aut aliquod corpus immediate de loco in locum, sine impulsu prævio transportare. Cur enim potentia ejus loco - motiva, sine tali interposito instrumento, non potest Vbi illud fluens (ut motum localem Scotus appellat) successive producere?

Attamen, in quibusdam motibus, movens principale videtur uti impetu, aut alio simili instrumento.

Patet in virtute illa attractiva, quam magnes imprimit ferro. Hæc enim distincta est à motu, cum cessante motu, non statim evanescat, ut fugitivus impetus solet; sed multis diebus, & annis permaneat in ferro magneti affricato.

Motus quoque projectorum non facile expediri potest sine fugace aliquo impetu, à projiciente impresso: quo durante lapidis, aut telum per aëra, absente projiciente, volat, cessatque illo impetu evanescente.

Aristoteles tamen ubique, motum projectorum, non ab impetu impresso, sed ab aëre lapidem, aut sagittam vehente fieri dicit; quem plerique veterum Peripateticorum, & inter recentiores Hieron. Dandinus sequuntur, Scaliger cespitat, D. Thomas cum deferit. Statuit enim virtutem quandam (quam impetum solemus vocare) à projiciente imprimi, similem quodammodo virtuti, quæ semini imprimitur à generante; cum hoc tamen discrimine: quod *virtus illa quæ est in semine à patre, sit virtus permanens ab intrinseco, non fluens ab extrinseco, sicut virtus moventis, quæ est in projectis.*

Aristoteles tamen quendam etiam impetum, cujus successive accumulatione gravia motum deorsum, cadendo accelerant, videtur admittere. Nam Lib. I. c. 8. de Cælo indicat incremento gravitatis, celeritatem motus naturalis elementorum gravium versus centrum, augmentum proportionale colligere. Cum enim propria & permanens gravitas lapidis non crescat cadendo, oportet de gravitatione transitoria, sive de impetu per gravitationem successive producto, sententiam illam ejus accipere.

Hanc gravitationem (ut barbarè jam appellamus) alibi

Arist. lib. 3.  
c. 8. Physic.  
Lib. 3. c. 2.  
Cæli & c.  
Dandin.  
lib. 2. Di-  
gress. II.  
de Anima.

S. Tho. q.  
Vnic. de  
Anima. I. 2.

Arist. lib. 4.  
c. 1. de  
Cælo;

Aristoteles *ῥοπήν inclinationem* posse vocari dicit. Impetum verò Io. Keplerus, inter Copernicanos nuper celeberrimus, *speciem motûs* (sive, quâ mediante efficitur motus) appellat; ex specierum visibilium quadam, ut opinor, similitudine: quia impetus res tenuis est, immateriata, & invisibilis; quæ conditiones speciebus visibilibus solent tribui. *Ex anima jaculantis lapillos, inquit, species motûs in lapillis adhærescit, quâ provehuntur illi, etiam cum qui jaculatus est, manum ab illis reduxit.*

Io. Kepler.  
Lib. de  
Marte c. 34

Quando etiam Angelus non manu, non ullo corporeo membro (quo caret) lapidem jactat, non videtur alio modo id facere posse, quàm ex potentia sua loco-motrice talem speciem, sive impetum in lapidem effundendo, quo deinde, tanquam vehiculo, succolletur & promoveatur ulteriùs.

Cùm enim Angelus non magis proximè in distans, quàm homo agere valeat, si per potentiam suam loco-motricem immediatè, sine impetu, lapidem ex loco proximo dimoveat, producendo novum Vbi ad spatium sequens; lapis ibi manebit, nisi ipse Angelus sequatur, & per singula spatia ulteriùs protrudat. Cùm igitur potentia loco-motiva aliquando immediatè, aliquando ministerio imperiûs motum localem efficiat; an progressiva animalium, impetu utatur in movendo corpus, aut membra animalis, an sine impetu, mox apparebit. Sed antè dispiciendum,

### ARTICVLVS III.

*In qua parte corporis, potentia loco-motrix animalis organum suum habeat.*

**R**ixantur hîc Aristoteles & Peripatetici cum Galeno & Medicis. Aristoteles principium motûs animalis in corde ponit. Quod hoc sensu verum esse potest: quia ex corde, tanquam primâ officinâ fluunt spiritus motorij, qui deinde in primis cerebri ventriculis recoquuntur, ac denique in postremo perficiuntur, ut sint idonea instrumenta motûs animalis.

Sed in



Sed in hoc Aristoteles, rudi adhuc tunc temporis, Anatomia, erravit; quod nervos motorios, quibus motus animalis perficitur, à corde originem ducere credidit. Galenus & Medici contrà (quod omnino verum) à cerebro propagines nervorum nasci, & inde spiritus motorios, tanquam à fonte, fluere dicunt. Nam à cerebro spinæ medulla traducitur; ab istâ medullâ nervi, sicut rami è trunco, funduntur.

Dat ergo Aristoteli Galenus, cor principium esse motûs naturalis, quo se & arterias secum perpetuâ diastole ac systole, die ac nocte movet; motum tamen voluntarium animalis, quem appetitus imperat, in cerebro principium habere, & meritò, contendit. Galen. lib. 2  
de Placit.

Itaque Medici in posteriori cerebri cellâ vim quandam irradiativam residere docent, non tantum ad influendum in organa sensuum; sed etiam (sive eadem, sive alia potentia sit) quæ in cavitatem medullæ spinæ dorsæ, & in propagines nervorum ex ea sparsas, quandam virtutem loco-motricem effundat. Hinc enim, si via illa spinæ obstructa, vel incidatur, omnis partium inferiorum motus interit. Deinde, sicuti præter cerebri virtutem irradiativam generalem, in organis sensuum est quædam potentia particularis, quæ irradiationem illam ad certam actionem sensitivam determinat, ut visus ad visionem, auditus ad auditionem &c. ita in musculis, quibus propagines & fibræ nervorum inseruntur, est potentia loco-motiva exequens, quæ irradiationem cerebri excipit, & ad motum localem voluntarium, sive animale determinat.

Eleganter Laurentius: *Facultatem movendi defert nervus, spirituum animalium lator; musculus spiritus radijs illustratus, statim contrahitur; partemque variè, pro voluntatis (aut appetitus sensitivi, in brutis) imperio immediate agit. Et ut equus habens equum impellit, ita vis animæ fictrix (sive imaginativa) in cerebro sedens, nervis quasi habenis, musculos movet.* Andr. Laurent.  
lib. 5.  
cap. 5.

Et quia imaginatio non proxime, sed mediante appetitu motum imperat, idem alibi ait: *Facultas animæ appetens, in cerebro pro tribunali sedens, nervis quasi habenis, musculos equis simillimos movet. Cui tamen, appetitum in cerebri arce locanti, non consentimus.* Idem lib. 4  
cap. 14.

sentimus. Antea enim sedem ejus, cum Aristotele, à cerebro in cor retraximus.

Vesal lib. 2.  
cap. 3.

Quia igitur musculus est instar equi, in quo residet potentia loco - motiva quæ equitem portat, aut currum trahit; in parte quoque animalis, quæ musculus appellatur, potentia illa, quâ animal motu voluntario corpus suum, aut aliquod membrum, ut pedem, caput, manum &c. movet, ponenda erit. Vnde Vesalius: *Est musculus, voluntarij motus instrumentum, ut oculus visus, & lingua gustus.*

Musculum autem Hippocrates σάρκα περιφερéα carnem orbicularem vocat. Nomen habens à quadam muris similitudine: unde in eo caput, caudam, & ventrem distinguunt Medici.

Cùm verò musculis variæ partes quibus constant, ut venæ, arteriæ, fibræ, nervi, tendines, caro, inferantur, disputant Medicorum filij, quænam musculi pars sit proprium & immediatum movendi organum.

Vesalius, & plures carnem fibrosam esse consentiunt. Hæc enim est præcipua, & velut substantialis musculi pars, cui nervorum canales spiritum animale, & virtutem cerebri irradiativam infundunt.

S. Basil.  
Homil. 24.

Hæc autem caro, propter fibras nerveas quibus contextitur, firma & robusta est, ac ad motum suscipiendum, & alijs partibus communicandum maximè idonea. Tendines verò quibusdam musculis adduntur, ad majus robur, & intendendam motus vehementiam. Incredibili enim robore opus est, ut musculi quidam, non tantum in equis, bobus, camelis, elephantis, gravissima onera vehant, aut sustinent; sed etiam in hominibus. Ut exempli gratiâ, Polydamas in Olympijs, ait S. Basilii, *currentes agitatoque currus manu injectâ retinebat. Et Milo à scuto oleo peruncto & lubricato, nullâ vi, nullâ impulsu amoveri poterat; sed tanquam statua quædam plumbo conglutinata resistebat.*

Mutium Sfortiam, Principem claritudinis Sfortianæ gentis in Insulribus, tam firmâ digitorum compage ac fortitudine fuisse narrat Lovius, ut distractam in diversum utraq; manu, equi ferream soleam facillè disrumperet.



## ARTICVLVS IV.

*Quo modo exerceatur motus voluntarius animalis.*

**H**Æc quæstio magnâ ex parte, in Artic. præcedenti deflorata fuit. Quemadmodum enim vis irradiativa, ex ultimo & sicciſſimo cerebri ventriculo, in organa sensuum per nervos sensorios, tanquam causa universalis influit; ita eadem, aut alia specie diversa virtus, per canalem spinæ dorsi, & nervos inde effusos & pendulos, irradiationem in musculos trajicit. Hic potentiam motivam, motus voluntarij executricem invenit, & eam ad movendum primò ipsum musculum, ac eo mediante, ossa & reliquas partes vicinas, adjuvat.

Qualitas verò, musculo irradiata, unâ cum facultate motrice permanenter organo infixâ, ac cum animâ musculi, quandam impetum immediatè (nam inde incipit motus) musculo imprimunt; simili ferè modo, quo virtus magnetica ferro imprimit, vel quo Angelus, sine manu, aut alio simili instrumento corporeo, effundit impetum in lapidem quem projicit.

Impetum autem, non motum localem immediatè, cum moventur animalia, musculo imprimi inde colligere possumus: quod animal in pleno cursu, motum suum illicò abrumperè & sistere non possit, etsi maximè velit; sed procurrat longius, quòdque impetus à facultate motrice impressus ipsum aufert.

Hic quoque impetus est causa, cur animalium cursus non statim in initio, sed paulò post, ubi multiplicatis impressionibus, impetus vires acquisivit eundo, soleat esse velocissimus.

Hinc Iul. Cæsar, narrante Plutarcho, Pompeij in pugna Pharsalica, meritò damnavit consilium: quòd aciem suam stare immobilem, & Cæsarianos magno impetu advolantes, pede fixo excipere jussisset. Impetus enim ex cursu auctus (modò lassitudine miles spiritum, & vires non amiserit)

C c c c

corpora

corpori ac animo robur, ad findendas & disjiciendas contrarias acies, addit.

Nec potentia motiva animalis solum impetum fugacem ac transitorium, qualem projectis imprimimus, efficit; sed etiam permanentem & statarium; qualis est ille, quo corpus nostrum in eodem statu & situ ( ne proprio, aut superposito pondere collabatur ) retinemus.

Sicut enim anima vegetativa habet potentiam loco - motricem merè naturalem, qua sine directione cognitionis, non solum impetu transitorio, superfluum alimentum abigit, sed etiā quod utile est trahit, & sibi apprimat firmiterque retinet; ita animam sensitivam, in motu voluntario sui corporis, similibus facultatibus instructam esse oportet. Quales quoque facultates abigendi, attrahendi, retinendi ferri, in quibusdam corporibus magneticis Philosophi Naturales agnoscunt.

Tertull. lib.  
de Anima  
c. 8.

Et sanè, sine ejusmodi, & quidem validissimâ, potentiâ musculos, tendines, & ossium ligamenta firmandi, ac in eodem statu, ne sub onere fatiscant, retinendi; quomodo saccigeri, ceterorumque gravissimorum onerum bajuli, pondera illa corpore tam fragili valerent sustinere? Nimis enim pinguis est comparatio Sorani & Tertulliani, qui credere videntur, corpus ( ab animâ corporeâ, ut putant ) sicut navem à mari sustentari.

Hoc denique magnam habet admirationem: quomodo animalia bruta statim atque ex utero, vel ovo exclusa, omnium instrumentorum quibus membra sua movent, usum cognoscant.

Galen. lib.  
de format.  
foet.

Galenus causam esse putat: quòd anima partes illas instrumentarias construxerit, & non ab alio factis utatur.

Sed faber ferrarius securim etiam conficit, nec tamen illicò eâ uti, & fabrilignarij opus exercere novit.

Dicendum igitur potius: quòd siue anima musculos, nervos tendines, & vincula sui corporis ( id est instrumenta motûs ) siue causa alia sublimior ac diviniore ( quod dubitat Galenus ) architectata sit; nullo sensu externo, aut interno instrumenta illa, aut eorum usum propriè cognoscat. Lepus enim




enim currens non novit quid musculus, quid nervus; neque cogitat, quomodo ista instrumenta contrahenda, aut explicanda sint, ut cursus fiat.

Imò homo, tanto sapientiæ intervallo bestiis excellentior, quando pedem vel manum movet, de musculis, & ceteris instrumentis motûs nullam omnino plerumque cogitationem habet. Nec enim corpora nostra musculis & nervis, sicut fabri trabes funibus & trochleis, quorum instrumentorum usum ab arte didicerunt, movemus; sed instrumenta nostra, à naturâ opifice fabrefacta, ex naturæ ejusdem instinctu ad opus cæco modo applicamus.

Nec refert, quòd motus isti tam in brutis, quàm hominibus appellentur voluntarij. Ad hoc enim sufficit, ut confusa quædam cognitio motûs localis, & voluntas, sive appetitio cum exercendi præcedat; etiamsi nulla alia determinata notitia instrumenti motûs, aut modi illo utendi adjungatur, sed ex priori illâ confusâ cognitione, & appetitione motûs localis, applicatio talis instrumenti, & modus utendi, per naturalem sympathiam resultet. Nam ideo solùm isti motus dicuntur voluntarij, ut à motibus merè naturalibus, qui nullâ omnino præcedente cognitione, & appetitu elicitò, à suis causis effluunt, distinguantur. Quali motu merè naturali cor palpitât, arteriæ micant, chylus ad hepar trahitur, sanguis per venas in totum corpus dispensatur.

PHILOSOPHIÆ CHRISTIANÆ  
**DE ANIMA**  
 LIBER QVARTVS.

De Anima rationali.



Andem per inferiores animæ gradus, ad supremum & rationalem ascendimus.

Materia philosophandi vasta, varia, & difficilis. *Quanta difficultas probandi, tanta operositas suadendi,* inquit Tertullianus; ut merito Heraclitus ille tenebrosus, vastiores caligines animadvertens apud examinatores animæ, radio questionum pronunciarit: terminos animæ nequaquam invenisse, omnem viam ingrediendo.

Tertull. lib.  
 de Anima  
 cap. 2.

1. Tim. 1.

Ipse verò Tertullianus, certius aliquid se invenisse putans: Christiano, ait, paucis ad scientiam hujus rei opus est. Nam & certa semper in paucis, & amplius illi quærere non licet, quàm quod inveniri licet. Infinitas enim quæstiones Apostolus prohibet. Porro non amplius inveniri licet, quàm quod à Deo discitur. Quod autem à Deo discitur, totum est.

Verum, quantum quandoque exerrent, qui à Deo ex Scripturis sanctis se doceri putant, exemplo hic suo egregiè docuit Tertullianus; qui animam humanam, homuncionem quendam corporeum, capite, pectore, manibus, pedibus, ac omnibus membris expressum, corpori majori, tanquam thecæ aut vaginæ, inserrum esse credidit.

S. August.  
 lib. 10. c. 15  
 Genes.

Non ob aliud, inquit S. Augustinus, nisi quòd animam incorpoream cogitare non potuit; & ideo timuit, ne nihilesset, si corpus non esset.

2. Cor. 4.  
 Luc. 16.

Vnde non satis est, rapere fragmina verborum ex Libris Scripturarum, veluti Hominem qui intus est, à Paulo, Linguam animæ



animæ Epulonis, à Luca; & inde animam in intestinis nostris habitantem, linguâ, dentibus, capite, & omnibus, instar exterioris corporis nostri, membris fabricare, ut factum à Tertulliano; sed verum & interiorem Scripturarum sensum, non vacuum corticem oportet in hanc de Anima doctrinam convertere.

Inter SS. Patres autem, de substantia animæ rationalis, ejusque operationibus, nemo plura Augustino scripsit. Quæ Deus illum docuit, dum adversus Manichæos & Pelagianos, pro fide Christiana dimicat; quorum errores circa animæ substantiam, & operationes maximè versabantur. Vnde vir modestissimus, licet multa se adhuc ignorare dicat: *Ego tamen, quàm multa possim de hominis natura scientissimè disputare, si explicare velim, plura volumina implebo.*

S. August.  
lib. 4. c. 24  
de orig.  
animæ.

Et hanc de Anima Philosophiam tam familiarem habuit, ac tantas in ea delicias invenire solitus, ut in hoc genere obscurissimarum rerum, ait alicubi de eo Erasmus, perlibenter versari soleat: adeo ut si quando casu inciderint, illic veluti viator ad amænum fontem, itineris propemodum oblitus, desideat.

Erasm. ad  
calcem lib.  
S. Aug. de  
Trin.

Cujus igitur potius, quàm S. Augustini Scholam, ad discendum quæ animæ nostræ sunt, intrabimus?

## CAPUT I.

## De immortalitate animæ rationalis.

**T**haletem primum inter Philosophos, animæ nostræ immortalitatem asseruisse, sunt qui existiment, ait Laërtius. Sed Cicero eam laudem Pherecydi, Pythagoræ præceptoris defert. Cui credidisse videtur S. Augustinus. Nam Epistolâ ad Volus. ait: *Quis nunc extremus idiotæ, vel quæ abjecta mulierculæ non credit animæ immortalitatem, vitamque post mortem futuram?* Quod apud Græcos olim primus Pherecydes Assyrius cum disputasset, Pythagoram Samium, illius disputationis novitate permotum, ex Athleta in Philosophum vertit.

Cic. lib. 1.  
Tusc.

S. August.  
Epist. 3.

Vterque autem, Thales, inquam, & Pherecydes origine Syrus fuit, & facillè potuit, ut à vicinis Hebræis veritas ista

ad ipsos manaverit. Potuit quoque Pherecydes à Thalete accepisse. Nam Eusebius Thaletem Romulo synchronum, facit aut paulò vetustiorē, regnante apud Iudæos Achaz; Pherecydes verò ceterior, *meo regnante gentili*, inquit Cicero, id est Servio Tullio, qui quintus à Romulo fuit.

*Hanc autem, de immortalitate animæ, opinionem discipulus Pherecydis Pythagoras maximè confirmavit, addit Cicero; qui cum regnante Tarquinio Superbo, in Italiam venisset, tenuit magnam illam Graciam cum honore & disciplina, tum etiam auctoritate. Multaque secula postea sic vixit Pythagoreorum nomen, ut nulli alij docti viderentur.*

A Pythagoreis deinde ad Anaxagoram, Socratem, Platonem, Aristotelem, & nobilissimos quosque, ac sublimioris ingenij Philosophos fluxit eadem opinio. Democriti maximè Scholâ, ac Epicuri deinde in diversum abeunte, & hominum mores, unâ cum animæ immortalitate, interficiente.

Plutar. lib.  
de animæ  
generat.

Quapropter Plato, qui in istos animorum carnifices acriter invehebatur, quàm ejus atas ferret, ut narrat Plutarchus; ita Democritum oderat, ut inter Philosophos habendum negaret, & in tot suis Libris, ne minimâ quidem mentione eum dignatus sit.

Democritus enim & Epicurus materiales, & pinguiissimæ Minervæ Philosophi, nil nisi corporeum, & atomotum concursu cohæsum, ac deinde solutile, apprehendere poterant. Unde etiam Cicero, cum omnium de immortalitate animæ sententias recenseret, ubi ad Democritum ventum est: *Democritum*, ait contemptim, *illum magnum quidem virum, sed levibus & rotundis corpusculis efficientem animum, concursu quodam fortuito, omittamus. Nihil enim est apud illum, quod non atomorum turba conficiat.*

Vid. I. Lip.  
lib. 3. dif-  
fert. II.  
Physiol.  
Stoic.

Stoici verò, ut lepidè idem ait, usuram nobis largiuntur, tanquam cornicibus; diu mansuros aiunt animos, semper negant. Id est, morienti corpori superstites quidem manere dicebant, sed post annorum aliquas periodos dissolvi. Animas enim subtilem quandam ignem esse credebant, qui, cum tardissimè, publicâ Mundi Conflagratione absumeretur. Et tunc tales nos futuros dice-



dicebant, quales fuimus antequam nasceremur, id est, futuros nihil.

Et si enim virtutem, & sapientiam jactarent & creparent Stoici, crasso tamen adhuc admodum ingenio erant, nec spiritum igneo subtiliorem poterant cogitare. Vnde anima rationalis, imò Deus ipse, spiritus igneus & corporeus ipsis erat.

Sed quinam sunt illi, quos Tertullianus animam *plusquam* Tertull. lib. de Anima cap. 3. *immortalem* affirmasse dicit? Alij, inquit, *immortalem* negant animam, alij *plusquam immortalem* affirmant.

Sine dubio, Gnosticos, & ejus farinae hæreticos (quos secuti deinde Manichæi & Priscillianistæ) intelligit, qui animam divinæ particulam auræ, sive Dei partem integram esse delirabant. Si enim pars Dei est, *plusquam immortalis* erit; quia non per participationem tantum, ut creatura, sed per essentiam, ut Dei pars, paris immortalitatis cum suo toto.

Pestilentem verò Epicuri, *quem tamen doctissimus quisque* Cic. lib. 1. Tuscul. *contemnit*, aiebat olim Cicero, de animorum nostrorum mortalitate opinionem, à sesqui jam seculo instauravit in Italia Pet. Pomponatius, edito volumine (ait Paul. Iovius, ejus in Schola Bononiensi auditor) quo animas, post corporis mortem interituras, ex sententia Aristotelis probare nitebatur; secutus Aphrodisæi placita. Cujus dogmate ad corrumpendam inventutem, dissolvendamque Christiana vite disciplinam, nihil pestilentius induci potuit.

Hoc infame & plusquam hæreticum dogma tot Macciavellos, novos Epicureos, & Diagoras, aliosque per Italiam Atheos genuit. Vnde paulò post, in Conc. Lateranensi Leo X. adversus eos Decretum vulgare coactus fuit: quod hîc adscribere inutile non erit.

Decretum

Decretum Leonis Papæ X.  
in Conc. Lateran. Sess. viii.  
Anno MDXIII.

**C**um diebus nostris ( quod dolenter referimus ) zizania seminator, antiquus humani generis hostis, nonnullos perniciosissimos errores à fidelibus semper explosos, in agro Domini supereminare, & augere sit ausus, de natura præsertim animæ rationalis: quod videlicet mortalis sit, aut unica in cunctis hominibus; & nonnulli temerè philosophantes, secundum saltem Philosophiam, verum id esse asseverent. Contra huiusmodi pestem opportuna remedia adhibere cupientes, hoc Sacro approbante Concilio, damnamus & reprobamus omnes asserentes animam intellectivam mortalem esse, aut unicam in cunctis hominibus, & hæc in dubium vertentes. Cum illa non solum verè, per se & essentialiter humani corporis forma existat; sicut in Canone felicitis recordationis Clementis Papæ V. prædecessoris nostri, in Generali Viennensi Concilio edito, continetur; verum & immortalis, & pro corporum quibus infunditur, multitudine, singulariter multiplicabilis, & multiplicata, & multiplicanda sit. Quod manifestè constat ex

Matt. 10. Evangelio, cum Dominus ait: Animam autem occidere non possunt. Et alibi: Qui odit animam suam in hoc Mundo, in vitam æternam custoditeam. Et cum æterna præmia, & æterna supplicia, pro merito vitæ judicandis repromittit. Alias, Incarnatio, & alia Christi mysteria nobis minimè profuissent, nec resurrectio expectanda foret, & sancti ac iusti miserabiliores essent, juxta Apostolum, cunctis hominibus.

Cumque verum vero minimè contradicat, omnem assertionem veritati illuminata fidei contrariam, omnino falsam esse definimus: & ut aliter dogmatizare non liceat, districtius inhibemus. Omnesque huiusmodi erroris assertionibus inhaerentes, veluti damnatissimi hæreses seminantes, per omnia ut detestabiles & abominabiles hæreticos & infideles, Catholicam fidem labefactantes, vitandos & puniendos fore decernimus.

Insuper



*Insuper omnibus & singulis Philosophis in Vniuersitatibus studiorum generalium, & alibi publicè legentibus, districtè præcipiendo mandamus, ut cum Philosophorum principia, aut conclusiones, in quibus à recta fide deviare noscuntur, Auditoribus suis legerint sen explanaverint, hoc est, de anima mortalitate, aut unitate, & Mundi eternitate, ac alia hujusmodi, teneantur eisdem veritatem religionis Christiana omni conatu manifestam facere, & persuadendo, pro posse, docere, ac omni studio hujusmodi Philosophorum argumenta, cum omnia solubilia existant, pro viribus excludere atque resolvere.*

Ex hoc Leonis X. & Conc. Lateranensis Decreto sumptum videtur solenne illud juramentum, quo Facultas Artium Vniuersitatis nostræ Lovaniensis in Promotione ad Licentiam post exactum studij Philosophici biennium, suos obstringit.

*Iurabitur insuper, quod si contingat vos quæstionem aliquam determinare debere, qua & Philosophiam & Fidem tangat; quod eam determinabitis pro Fide, & rationes contra Fidem solveris, prout vobis solvenda videbuntur.*

## ARTICVLVS I.

*Quid Aristoteles de animæ immortalitate senserit.*

**A**lexander Aphrodiseus, Græcus, & Pet. Pomponatius, Latinus Aristotelis Interpretes, magna profectò injuria præceptorem suum affecerunt, dum eum animarum nostrarum carnificem fecerunt.

Hinc enim factum, ut Athei Macciavellistæ, & novi Epicurei Philosophum omnium ingeniosissimum, quem Averroës *humani ingenij finem* vocat, in infamem Scholam suam attrahere conentur. Vnde Urbanus Papa VIII. cum adhuc Bononiæ Legatum ageret, jussit Augustinum Oregium, Philosophum insignem, diligenter in sententiam Aristotelis inquirere: ut si hujus erroris ac infamiæ compertus inveniretur, re ad Summum Pontificem relatâ, Lectiones ejus de ea materia, à Scholis Christianorum proscriberentur. Sed Oregij calculo absolutus est.

Oreg. lib.  
de Immor-  
tal. animæ  
cap. 5.

D d d d d

Nec

Nec tamen nova hæc est de mente Aristotelis dubitatio. Nam præter Scotum, Henricum, Hervæum, Beverum nostrum, Conimbricenses, & pauculos alios Scholasticos, qui inter mortalitatem & immortalitatem fluctuasse volunt, sanè S. Gregorius Nazian. *Aristotelis mortales de anima sermones* appellat. Origenes quoque, Gregorius Nyssenus, alijque quidam ex Patribus in sequiorem partem eum interpretantur.

Naz. Orat.  
33.

Sed istam de mente ejus dubitationem mos scribendi Aristotelis, credo, fecit, qui datâ operâ ac studio sæpe tortuosus & obscurus est. Vnde veteres eum sepiam appellabant, qui suo se atramento infuscarêt. Deinde, ut docti quidam animadverterunt, non omnia uno loco edicere solet; sed quæstiones hîc excitatas, non rarò in aliam, quam prospicit, majorem opportunitatem differt: aut certè, quia se; vel Lectorum suum propriâ cogitatione paulisper suspendere, maturitatis & prudentiæ interesse putat.

Plurimis verò testimonijs intima ejus de immortalitate animæ mens ostendi posset, & ante factum ab alijs; sed paucula, & quæ manifestissimè, ni fallor, eam nudant, seligimus.

I. Famosus est ille Lib. 1. c. 1. de Anima locus. *Si est aliqua operatio anima propria, ait, continget utique eam separari; si nulla operatio est propria, non erit separabilis.*

Vbi animam illam à corpore separabilem, & mortuo corpori superstitem fore affirmat, si operationem aliquam propriam, non corpori communem habeat. Operationem autem communem vocat, quam anima per organum corporeum exercet.

II. Libro autem 2. c. 2. de Anima hanc dubitationem resolvere incipiens: *De mente autem, inquit, & speculativa potentia, nihil adhuc manifestum est (ex ijs quæ hæcenus dixerat: sed videtur genus aliud anima esse; & hoc solum posse separari, sicut perpetuum à corruptibili.*

III. Sed Lib. 2. c. 3. de Generat. animal. resolutissimè. Cum enim dixisset, *animas brutorum non posse seorsum à corpore existere; quia quorum principiorum operatio est corporalis, hac sine corpore*



corpore esse non posse manifestum est, addit: *Restat igitur solam mentem* ( sic animam rationalem, secundum supremum rationalitatis gradum appellat ) *extrinsecus advenire, solamque divinam esse. Nihil enim cum ejus operatione communicat operatio corporalis.* Quid magis disertè potest? Libros autem istos senem & post Libros de Anima ( quos aliquoties in istis memorat & citat ) scripsisse constat.

Ex eodem etiam loco patet, quam operationem anima propriam Libro I. c. I. Tex. 13. de Anima, Aristoteles vocaverit; nempe eam, cui opponitur operatio, quam hoc Lib. 2. c. 3. de generat. animal. ἐνέργειαν σωματικὴν operationem corporalem appellat: quæ videlicet per organum corporale ab anima exercetur, ac in illud recipitur. Talis quippe operatio non est animæ rationali propria, sed ei cum corpore communis. Propria, autem est, in qua οὐ κοινὰν σωματικὴν ἐνέργειαν non communicat operatio corporalis, ut ait.

Si igitur talem operationem propriam mens humana in corpore exercere valeat: ut quando ultra omnia sensibilia, ad res spirituales, usque ad Angelos, & Deum ipsum cogitandum, aciem suam elevat, signum est, esse immaterialem, & minimè à corpore dependentem; ac proinde dissoluto corpore superstitem permanere. Cum enim operari sit quædam proprietas naturaliter fluens ex essentia principij operantis, debet esse ei naturali quadam proportionem commensurata. Vnde si operatio ita sit independens à corpore, ut nullo ne quidem instrumento corporeo indigeat, non est ratio, cur à corpore dependeat, & cur sine unione ad corpus, talem operationem exercere non valeat.

Quod à contrario, per animarum brutalium corruptibilitatem ostendi potest. Hujus enim incorruptibilitatis radix est, quodd illæ animæ nullam naturalem operationem habeant, nisi corporalem & exercitam per corpus. Vnde si à corpore seorsim existerent, essent immobiles, & ad modum glirium dormientium torperent, ut lepidè S. Hieron. inactuosæ videlicet & frustra; cum tamen Deus & natura nil frustra faciant, aut esse patiantur in rerum ratione. Hinc paulò antè citatus

S. Hieron.  
contra Io.  
Ierosol.

Aristoteles, tantâ asseveratione dicebat: *quorum principiorum operatio est corporalis, manifestum esse, sine corpore non posse existere.*

Atque licet prædicta Aristotelis demonstratio, quæ incorporalitatem animæ colligit ex incorporalitate cujusdam operationis quam in corpore exercet, non sit tam evidens & certa, ut protervum ingenium cogere ac convincere valeat; ad persuadendum tamen ingenuo & bene disposito homini, sufficit. *Non oportet enim, ait alicubi Aristoteles, exactam certitudinem ubiq; requirere, sed in singulis juxta materia subjecta capacitatem.*

Arist. lib. 1.  
c. 7. Ethic.

## IV.

Quid deinde isto testimonio luculentius? Libro enim 1. c. 4. de Anima dicit: *Mens ( sive anima rationalis ) videtur ingigni, essentia quadam existens ( per se subsistens, etiamsi corpori inexistat ) neque corrumpi.* Cujus assertionis luce Alex. Aphrodiseus, qui alibi ad animæ mortalitatem Aristotelem deducere non cessat, perstrictus, dat hîc manus, & re verâ Aristotelem sensisse animam nostram incorruptibilem, tandem fatetur.

## V.

Imò Lib. 8. c. 1. Metaphys. ipsemet Aphrodiseus non tantum Aristoteli, sed veritati reconciliatus: *Anima, inquit, non omnis separatur à materia, sed tantum particeps rationis.* Item: *Nunquam forma materialis absque materia esse potest, sed illa solum, quæ rationis sunt compotes.*

Eant jam ergo Niphus & Scaliger, & Aphrodiseum animorum carnificem appellent. Ab ista igitur macula merito eum purgat Eugubinus: ac protrocinio ejus posthac abstineant novi Epicurei & Pomponatius.

## VI.

Libros deinde Ethicorum Aristoteles ad filium suum Nicomachum scripsit: quem moriens ( & eum amici Nicanoris tutelæ tradens ) in testamento suo *puerum* appellat. Vnde patet, non dudum ante mortem Libros illos conscriptos fuisse; cum filio dedicaverit, qui in morte parentis, *puer* adhuc erat.

Libro autem Ethic. 10. c. 6. & 7. duos homines in uno homine distinguit, ait eruditus ejus Interpres Eustratius: *Vnum, qui animâ & corpore constat; alterum ( qui verè, maximè, & præcipuè homo est ) esse mentem nostram.* Cujus altissima contemplatione homo efficitur felix. De qua mente, progrediendo, ita dicit: *Separata autem à corpo-*



à corpore, est ipsum id quod est. Quibus ex verbis, addit Eustratius, patet, eos qui dicunt Aristotelem mortalem esse animam opinari, nihil dicere.

Hinc in eundem Libri 10. Ethic. locum 10. Major : Ego sanè reor, inquit, Aristotelem velle, consequenter ad dicta Libro 3. de Anima, animam immortalem dicere. Et non solum hoc; sed etiam, eam separatam perpetuò contemplari celestia, & non habere commercium cum vita humana.

Et nonne locus etiam iste Lib. 3. c. 5. de Anima, satis est illustris? Intellectus agens, inquit, separabilis est, & immixtus, ac impassibilis : passione videlicet corruptivâ. Intellectus autem agens, S. Thomæ & optimorum Interpretum explanatione, potentia animæ est, non substantia aliqua spiritalis, extrinsecus animæ assistens.

Mens quoque Aristotelis satis liquida, ex Lib. 4. c. 10. de partib. animal. Solus homo omnium animalium erectus est, ait, quia natura ejus & essentia divina est. Officium quippe divinisimè est, intelligere & sapere. Hæc autem essentia hominis divina, intelligens, & sapiens, non est hominis corpus, sed rationalis ejus anima.

Cum autem Aristoteles aliquam essentiam divinam vocat, ἀθάνατον incorruptibilem intelligit, & Deo, per quandam æternitatem participatam, similem.

Libro 12. c. 3. Metaphysic. postquam dixisset, nullam Formam composito suo antiquiorem esse: An verò, ait, aliqua posterius maneat, considerandum est ( alibi, videlicet in Libris de Anima. ) In quibusdam formis enim nihil prohibet. Veluti, si anima talis sit, non omnis, sed mens.

Nec refert, quòd videatur dubitare, cum ait, Si anima talis sit. Nam mos Aristotelis fuit, ut ubi etiam sententia ei firmissimè sedet, mollissimè tamen, & quasi dubius, secumque adhuc disputans, loquatur, per particulas, Si hoc est, vel, fortasse, aut, videtur &c. ne aliorum Philosophorum Scholas offenderet, quæ Athenis tunc oppositum fortiter sustinebant. Vnde in illo Metaphysicæ loco, immediatè subdit : Omnem namque animam fortassis impossibile est, nempe posterius manere, dissoluto

luto corpore. Vbi vides additum *fortassis*: cum tamen in Schola ipsius certum & affirmatissimum esset, non omnem animam ( non enim brutorum ) seorsum remanere. Sed propter Pythagoricos & Platonicos, qui animas hominum per *μετεψυχωσιν* *transanimationem* censebant in corpora brutorum migrare, sic suam sententiam emollic.

Arist. lib 6.  
c. 1. & 2.  
Physic.

Et ut morem istum ejus in alio exemplo ostendam: quid in Lyceo ejus magis fixum & resolutum, quam continuum non componi ultimo ex atomis indivisibilibus? Nam alicubi sine ullo fluctu dicit: *Manifestum esse, quod omne continuum sit divisibile in semper divisibilia*. Item: *Demonstratum esse, quod impossibile sit, ex indivisibilibus aliquod continuum esse*. Et tamen Lib. 13. c. 2. Metaphys. quasi dubitans ait: *Nihil ex lineis, aut ex superficiebus, aut ex punctis videtur consistere posse*.

Hac animadversione plurima loca Aristotelis facile exponi possunt, quæ nobis objectantur ab ijs, qui contendunt eum de animæ immortalitate ambiguum fuisse.

Hoc denique addamus. Lib. 3. c. 4. de Anima laudat Anaxagoræ sententiam, qua dixit: *Necesse esse, mentem, quia omnia intelligit, esse impermixtam, ut ipsa dominetur, id est, ut cognoscat*. Debet quippe spiritualitate quadam extra conditiones corporis mens nostra elevari, nec ei, quemadmodum animæ brutorum, immergi ac permisceri, ut omnia, etiam spiritualia, valeat cognoscere.

Anaxagoram autem hoc dixisse, quia animam rationalem censeret immortalem, est in comperto.

Laërt. in  
Vita  
Anaxagor.

Hinc indignanti cuidam, quod extra patriam, in solo alieno moreretur, Respondit Anaxagoras, inquit Laërtius, *bono animo esto: equalis undique in Infernum est descensus*. Vbi manifeste supponit animam mortuo corpore superstitem, ad Inferos, aut cælum ire. Nam & alteri cuidam irascenti & interroganti ( quia amore Philosophiæ cetera omnia prorsus negligebat: ) *Ergone nulla patriæ cura tibi est?* illicò reposuit Anaxagoras: *Mihi verò patriæ cura, & quidem summa est; digitum in cælum intendens*.

Cic. lib. 1.  
Tuscul.

Quid Cicero? Nonne sententiam Aristotelis sic interpretatur,



tatur, ut quinta quadam natura ab Aristotele inducta, primum deorum sit, & animorum: esseque singularem quandam naturam, atque vim animi, ab his usitatis notisq; naturis seiunctam?

Et quidquid illud est quod sentit, quod sapit, quod vult, quod vi-  
get, caeleste & divinum esse; ob eamque rem aeternum sit, necesse esse?  
Et Eruditissimus Aristotelis interpres Themistius: *Intellectum* Themist.  
lib. 3. c. 35.  
de Anima. (quem jam possibilem vocant.) nulla dubitatio est, quin  
impatibilem, & separatam Aristoteles putaverit. Item, qui cum corpo-  
re misceri non possit, & cui nullus usus corporei instrumenti sit.

Quid Theophrastus, Aristotelis discipulus, & in Schola suc-  
cessor? Nonne ex Magistri sui disciplina, immortalitatis ani-  
morum est assertor? Denique tot testimonijs & signis Philo-  
ponus, nobilis & acutus Aristotelis Interpres, hoc patescere  
existimat, ut insanire eos dicat, qui putant Aristotelem opinari ani-  
mam esse mortalem. Et eruditus quidam apud Photium:

Plato & Aristoteles unanimi consensu, inquit, immortalem dicunt  
animam; licet quidam profundam Aristotelis mentem non penetrantes,  
putent dixisse eam esse mortalem. Philop.  
lib. 1.  
Text. 66.  
de Anima.  
Phot. Bi-  
bliotec. ex  
Vita Py-  
thagoræ.

De Platone verò nulla unquam dubitatio. Nimis enim  
dilucidè & ex professo (cum ira etiam adversus Democritum  
& aliter sentientes) animas nostras immortales asseruit. Nec  
mirum, cum animam non informare corpus, sed regere, ut  
nauta navem, censuerit. Vnde Cleombrotus Ambraciota, le-  
cto Platonis de Anima Libro, ubi ejus immortalitatem tantâ  
affirmatione inculcaverat, mori gestiens, ait S. Gregor. Naz. S. Naz.  
Orat. 3.  
Lactant.  
lib. 3. c. 18  
de altissimo muro se præcipitavit. Simile fermè de Uticensi  
Catone Lactantius. Romana sapientia princeps Cato, ait, antequam  
se occideret, perlegisse Platonis Librum dicitur, qui scriptus est de  
aeternitate animarum, ad summum nefas, Philosophi auctoritate com-  
pulsus est.

Et in eadem mente fuerunt omnes, quos Cicero Philoso- Cic. lib. 1.  
Tusc.  
phos Consulares, Lactantius Reges Philosophorum appellat; ce-  
teri, ut Democritus, Epicurus &c. plebey tantum sunt, nec  
in hoc Senatu audiendi.

## ARTICVLVS II.

*Quibus conjecturis Aristoteles mortalitati animæ fuisse putatus est.*

**C**apitale hoc est, & quo non tantum Aphrodiseus & Pomponatius præcipue moti, sed etiam Cajetanus, qui ubique alibi Aristotelem, cum S. Thoma in bonam partem interpretatur, Commentario Libri 1. de Anima, mutatâ subito sententiâ, cadit in adversam, & Aristotelem animæ interfectæ reum agit.

I. Nam Lib. 1. c. 1. Aristoteles definitè ait: *Si intelligere anima est imaginatio quedam, aut non sine imaginatione, non continget utique hoc sine corpore esse.* Atqui Lib. 3. c. 3. de Anima dicit intelligere animæ non esse sine imaginatione. Ait enim: *Necesse esse speculantem, aliquod simul phantasma speculari.*

Resp. Aristotelem ibi loqui de speculatione, qua intellectus speculatur rem sensibilem, mediante phantasmate, quod à sensu externo rapuit. Vnde addit: *Talia phantasmata esse, respectu intellectus ea speculantis, veluti sunt sensibilia, respectu externi sensus.*

D. Thom.  
lib. 2. c. 80.  
contra  
Gent. Quod clarissimè interpretatus D. Thomas: *Intelligere, inquit, licet non sit operatio per aliquod organum corporeum exercita; tamen objecta ejus sunt phantasmata, quæ ita se habent ad ipsam, ut colores ad visum.*

Talis quippe rei sensibilis speculatione, intellectus in phantasma illius rei, tanquam in objectum proximum; sicuti sensus externus in externum sensibile, tendit.

Sed ubi intellectus res spirituales, ut justitiam, sapientiam, aut Dei essentiam, quæ nullum proprium phantasma habent, speculatur, in quonam, quæso, phantasmate, ut objecto proximo, res illas speculatur?

Ac licet interea, dum intellectus speculatione sua in Dei usque essentiam erectus est, phantasia, per naturalem cum intellectu nostro sympathiam, circa aliquod phantasma (quod propriè Dei phantasma non est) ludat; hoc tamen non ostendit illam



illam intellectus operationem ita alligatam esse phantasmati, & consequenter, corpori, ut sine corpore esse non possit.

Prior ergo illa Aristotelis sententia: *Si intelligere anima non est sine phantastica imaginatione, non continget illud esse sine corpore*, hoc modo accipienda est: Si intellectus nihil intelligere possit, nisi in phantasmate, quod ideo imaginatio ei proponit, ut rem aliquam aliam in eo phantasmate intueatur; profectò talis intellectio separari à phantasmate corporeo non poterit; quandoquidem ipsa à tali phantasmate, ut ab objecto proximo essentialiter dependeat.

Secundò, Libro 3. c. 5. de Anima, docet, inquit, *II. παθητικὸν τοῦ φανταστικῶν ἔντα παθivum intellectum corruptibilem esse.*

Resp. Themistium, Philoponum, Averroem, D. Thomam, Buridanum, Bricotum ( & quis non? ) *intellectum passivum* interpretari phantasiā, sive cogitativā hominis, quæ ratio inferior appellatur & potentia organica est, quā homo sensitivus ratiocinatur & discurrit sub homine spiritali, id est, sub animā intellectivā, ut rota inferior sub superiori. Hæc autem inferior ratio, in morte hominis, sicut ceteræ omnes potentia organicae, corrumpitur.

De intellectu autem spiritali & à corpore separabili, ibidem ait, *μόνον ἀθάνατον, καὶ ἀϊδίον ἔντα solum immortalem, & sempiternum esse.*

Tertio, Libro de Memoria c. 1. ait memoriā & reminiscentiā non posse esse sine phantasmate. Ac proinde reminisci competere per se sensitivo primo, id est, principali sensui interno; per accidens verò competere intellectui: gratiā videlicet phantasmatum, quod intellectus in reminiscendo debet intueri. Ergo Aristoteles non potuit existimasse animā intellectivā esse à corpore separabilem: quia aliàs posset anima separata sine phantasmate, per species intelligibiles olim à phantasmatibus haustas, eorum quæ in hac vita egit reminisci.

Resp. Posse re verā animā separatā tali modo reminisci. Sed *reminiscentia*, apud Aristotelem, est phantasmatum cuiusdam inventio, inquit Philoponus. Phantasma autem istud in aliquo, ut sic dicam, memoriæ angulo, aut sinu delitescens,

E e e e e potest

potest ab ipso principe sensu interno, sive cogitativâ hominis, per discursum ex propositionibus singularibus inveniri, & recognosci; vel per intellectum, spirituali cognitione in memoriâ sensitivâ thesaurum descendentem, & ibi phantasma ejus rei vestigantem, cujus volumus reminisci. Tali autem, & tam sensitivo, ac, ut sic dicam, demisso modo anima separata reminisci nequit; quia sensitivâ memoriâ arcam secum non asportat, quam aperire, & phantasma aliquod in ea quærere, ac invenire valeat.

S. August.  
Epist. 72.

S. Augustinus autem ab Aristotele (quem nunquam in ea re, aut in tota Physica legerat) discedens, Nebridium suum docet, ad hujus etiam vitæ reminiscentiam, nullo proprio phantasmate esse opus. Sicut enim negat res spirituales in aliquo phantasmate, tanquam proximo objecto, à nobis primùm intelligi; ita, quando reminiscimur, negat intellectū nostrum ad aliquod memoriâ sensitivâ phantasma debere converti, & in arca illa memorię sensitivę illud quærere. *Quamobrem enim, ut alia omitam, inquit, æternitas, nec aliqua imaginaria figmenta requirit, quibus in mentem, quasi vehiculis veniat, nec tamen venire posset, nisi eius meminissemus; potest esse quarundam rerum, sine ulla imaginatione, memoria.*

Simili modo dissolvitur, quod ex Libro Aristotelis de Longitud. vitæ c. 2. objici potest; ubi *corruptis animalibus, sanitatem & scientiam corrumpi* dicit.

Nam in morte brutorum, scientia eorum phantastica, cum anima irrationali, prorsus interit: in morte hominum, habitus scientiæ in intellectu animæ separatæ manet; sed ejus à phantasmatibus dependens usus, qualem habuit in corpore, perit, dum avellitur à corpore.

Arist. lib. 1.  
c. 6. Poster.

Sic alibi docet Aristoteles, per morbum, vel per oblivionem medij, scientiam corrumpi. Non quodd habitus scientiæ, qui est in anima, deleatur; sed quia actus & usus ejus intercipitur, deletâ, aut aliter impeditâ specie phantasticâ, sine quâ phantasia operari, & intellectui phantasmata speculanda ob-  
IV. jicere, aut ei cooperari nequit.

Quartò, Aristoteles negat ullum dari posse infinitum actu.

Si



Si tamen animæ rationales, ejus opinione, sint incorruptibiles, numerus earum jam erit infinitus actu. Opinatur enim Mundum fuisse ab æterno, & consequenter, infinitos annos elapsos esse, intra quos infiniti homines sint mortui, quorum animæ jam superstites maneant.

Resp. Averroëm hujus argumenti angustijs conclusum, ut evaderet, infame illud paradoxum confinxisse: Vnicam nempe in omnibus hominibus, præteritis, præsentibus, & futuris, animam incorruptibilem esse. Quod in Conc. Lateranensi à Leone Papa X. hæreseos damnatum, ut in Decreto ejus præ recitato vidimus.

Eruditus Bessarion hæc, & alijs conjecturis contendit, Aristotelem fuisse in errore sui Platonis, & Pythagoræ, de animarum μεταψυχώσεις transanimatione, quâ dicuntur de corpore uno hominis morientis, in aliud nascentis transmigrare. Sic enim, etsi homines per infinitorum seculorum successionem fuerint infiniti, non est tamen necesse totidem animas fuisse, & jam simul coëxistere. Nam anima Euphorbi, in bello Troiano à Menelao occisi, tot annis postea, per μεταψυχώσεις migraverat in Pythagoræ corpus, si credere vis Pythagoræ hoc affirmanti.

Bessar. lib. 2.  
c. 7. contra  
Calumniat.  
Plat.

Et Io. Crassotius Bessarioni assentiens, inde conjecturam facit, Aristotelem Pythagoricam illam transmigrationem animarum non longè rejecisse: quod ipse eam non oppugnet pro sententiæ celebritate, & suâ in oppugnandis alienis consuetudine.

Io. Crassot.  
lib. 3. c. 4.  
de Anima.

August. Oregius existimat Aristotelem hanc quæstionem de animæ immortalitate, cum Mundi æternitate nunquam contulisse, quod ego sciam, inquit, adhibita multorum annorum diligentia. Idem ante eum opinatus est Durandus.

Durand. in  
2d. 18. q. 3.

Sed incredibile est, tam acuto, & in omnem partem versatili Aristotelis ingenio, collisionem duarum illarum opinionum nunquam in mentem venisse.

Vero similis igitur est, de Mundi æternitate dubitasse; quia quærebat modum, & nondum invenerat: quomodo eam cum animarum immortalitate posset conciliare. Vnde alicubi: Sunt de quibus, ait (quia magna & ardua sunt) statuere

Arist. lib. 1.  
c. 9. Topic.

nihil

nihil possumus, rati difficilem esse causæ explanationem: veluti, *Virum Mundus sit æternus, nec ne.*

D. Tho. lib.  
2. c. 81.  
contra  
Gent.

Avicenna denique & Algazel, quos sequi maluit D. Thomas, volunt *Aristotelem in corporibus tantum naturalibus, non autem in substantiis immaterialibus negasse infinitum actu.*

Cujus sanè rei non obscurum indicium: quòd Lib. 3. c. 5. Physic. (ubi tamen inimici ejus clamant, quarumcumque rerum infinitudinem eum rejecisse) expresse dicat: *Fortasse hæc quæstio est universalior, Virum fortè contingat infinitum aliquod esse in rebus mathematicis, & in ijs quæ solo intellectu apprehenduntur, ac in ijs quæ carent magnitudine (quales profectò sunt animæ rationales.) Nos enim (in Libris istis Physic.) contemplamur sensibilia, & ea quorum doctrinam hic scribimus, Virum in ijs sit, an non sit infinitum accretione. Vbi Philosophus negat se de rerum spiritualium infinitudine quidquam decernere.*

V. Quintò, Lib. 1. c. 11. Ethic. censet absurdum esse, *hominem mortuum dicere felicem*: igitur animam humanam à morte corporis superstitem esse non existimat.

Resp. De felicitate non solius animæ, sed totius hominis, ut compositi physici eum loqui. Aliàs in calce ejusdem capituli: de prosperis, & adversis amicorum rebus dicit aliquid ad defunctos pervenire. *Conferre aliquid, ait, defunctis prosperi amicorum successus videntur, simili modo etiam infortunia. Ita tamen ac tantum, ut neque felices reddere infelices, neque quippiam talium efficere valeant.*

### ARTICVLVS III.

*Quid Hippocrates senserit de animæ immortalitate.*

S. August.  
lib. 14. c. 19  
de Trin.

I. Lips. Epist.  
ad Ianum  
Doulam.

**V**T antiquis Philosophis, hisque maximis, longèq; clarissimis placuit (ait Cicero in Dialogo Hortensio apud S. Augustinum) *æternos animos ac divinos habemus.* Inter autem maximos Philotophos, omnium consensu, fuit Princeps Medicorum Hippocrates: quem I. Lipsius noster (& Homerum, Aristotelemque ei conjungit) *in hominibus humanam fastigium excessisse credit.*

Qui-



Quidam tamen Hippocratem tam cæcum faciunt, ut animæ humanæ immortalitatem vidisse negent.

Docet enim, inquit, *animam hominis usque ad mortem semper gigni*. Item, *ignis & aquæ habere concretionem*. Hæc autem certissima mortalitatis signa sunt. Hippocrat. lib. de Diæta.

Sed, ut optimè cum explanat Laurentius, non de anima rationali, sed de anima Medica loquitur: quæ nihil est aliud, quàm *calidum innatum, humido primigenio, & spiritibus undique perfusum*. Andr. Laurent. lib. 10. q. 1.

Hanc enim animam præcipuè curant Medici, satagentes tantum, ut eam in corpore alant, & quàm purissimam conservent. Est quippe humidum illud, quod alij radicale vocant, veluti nexus animæ rationalis cum humano corpore. Vnde eo exsiccato, aut fugiente, anima quoque rationalis deserit corpus.

An verò sit alia, præter illam, anima rationalis in homine, aut irrationalis in bruto, nihil ad Medicum, ut Medicus est. Theologi quippe sibi solis, inquit Vesalius, *liberam de resurrectione, animarumque immortalitate altercationem, & sententiam vendicant*. Vesal. lib. 1. c. 28. Hippocratem tamen ut Philosophum, animam præterea aliam agnovisse rationalem & immortalem, quam *naturam invisibilem, & inalterabilem* appellat, verbis ejus Laurentius demonstrat.

Hippocrates enim, ait Laurentius, *sub finem Libri primi de Diæta, verbis auro insculpendis: Anima nostra, inquit, quoad essentiam mutari non potest, aut alterari, sive cibi, sive potus, sive cujuscumque rei alterius accessu. Referenda est enim alterationum omnium causa, aut ad spiritus, quibus se immiscet, aut ad vasa, sive organa, quæ permeat*. Andr. Laurent. lib. de Melanch. c. 2.

Galenus verò Hippocrate suo longè stupidior, animæ humanæ essentiam se ignorare, sæpissimè fatetur: & eo argumento, Quod animi mores temperiem corporis sequantur, inclinât, & ferè labitur, ut, animam tam humanam, quàm brutalem, corporis temperamento nihil amplius esse dicat. Galen. lib. Quod mores animæ, corporis temper. seq.

Ambigit tamen perpetuò; sicut & de plurimis alijs quæ ad animam pertinent: Vt, *Cur nimis refrigeratum, aut calore astuans corpus*

corpus, penitus ab anima relinquatur, longâ indagine, inquit, fatigatus, nondum reperi. Veluti neque, cur flavâ bile copiosiore in cerebro collectâ, desipimus; atrâ verò, melancholiâ vexamur. &c.

Sed ex ista morum animæ, cum temperamenti corporis mutatione: Noli, ô Athee, inquit Laurentius, deducere animam in essentia quidquam perpeti, adeoque corruptibilem esse. Nunquam alterationem subit ipsa, neque patitur quidquam; solum ipsius organum offensum maleq; dispositum est.

Andr. Laurent. lib. de Melanchol. cap. 2.

Percipies hoc, si lubet, solis exemplo. Quemadmodum sol nullam fulgoris ac luminis sui diminutionem patitur; licet obscurari, aut deliquum pati videatur (sit aut nubium crassitie, aut luna interpositione:) ita anima nostra pati nonnunquam videtur, cum tamen non nisi instrumentum, & organum ipsius male affectum sit.

Sed neque ex similitudine, & paritate sinuum cerebri humani & brutorum, colligere licet animæ nostræ communem cum brutis mortalitatem. Nam licet simias, canes, equos, oves nullo cerebri sinu superari ab homine, inter dissectandum se conspexisse, & cetera omnia (si modò molem, & temperamenti ad justitiam integritatem excipias) inter se simillima, Vesalius fateatur; illud tamen temperamenti ac molis discrimen, & occultæ aliæ, sine dubio, qualitates cerebri hominis ad sublimioris & immortalis animæ susceptionem præparare valent. Aliàs enim, si ex solo numero ac similitudine ventriculorum cerebri, ad identitatem specificam animarum liceat argumentari; concludemus animam pulli gallinacei, ejusdem esse rationis & speciei cum anima bovis; quia simillimam habet sinuum cerebri conformationem.

Vesal. lib. 7. cap. 6.

Sed sicut araneus in eodem Musæo texit telam, in quo Sol crates philosophatur; ita nihil vetat, animam bovis in simillimâ cellâ cerebri tantum imaginari, ubi anima humana etiam ratiocinatur. Vnde Vesalius non ideo deferit animæ humanæ immortalitatem. Sicut eam quoque retinet, imò seriò & fortiter inculcat Io. Fernelius, quem Gallicum Avicennam Galli appellant. Sed & Avicenna Arabs idem censet, & quicumq; Medici aliquid amplius ingenij, & æthereæ mentis habent, ut supra id quod in corporum humanorum dissectione vident

vident  
quipp  
sen  
Vn  
ad Ep  
porcor  
rum m  
ris, &  
quant  
Omnia  
modo  
quia  
aliquo  
inter h  
& i  
confor  
hum  
In Ve  
Q  
illo  
A  
in  
Num  
nis, si  
pollu  
inquit  
viam  
loqu



vident & palpant, intellectum suum attollere valeant. Magni quippe ingenij est, ut ait quidam (M. Tullius est) *sevocare mentem à sensibus*, inquit S. August. & cogitationem à consuetudine abducere. S. August. Epist. 3.

Vnde pingua & obtusa quorundum Medicorum ingenia ad Epicureismum interdum tentantur, ex tam vicinâ bouum, porcorum, & præcipuè simiarum, cum humanorum corporum membris similitudine. Figuræ epim cerebri, cordis, jecoris, & partium vitalium interiorum, simillimæ sunt. Ac etiam quantum ad membra externa,

M. Ennius

*Simia quàm similis, turpissima bestia nobis?*  
*Omnia quippe in simia similia homini; nisi, quòd ἐπὶ τὸ θνητὸν δέσποιν* Arist. lib. 2, c. 8. Histor.  
*modo quodam magis fero*, ait Aristoteles. Nec dubito denique, quin etiam in conformatione partium cerebri, sit leve saltem aliquod discerniculum, quod Anatomicorum oculos fugiat, inter hominis & brutorum cerebrum: & in istis magis rudem & ἐπὶ τὸ θνητὸν δέσποιν esse figurationem, quàm in homine; ubi conformatio exactior requiritur, ut superioris causæ, sive humanæ mentis esse valeat instrumentum.

#### ARTICVLVS IV.

*In Veteri Testamento parcius & obscurius, in Novo sepius & clarissimè indicata animæ humanæ immortalitas.*

**Q**uia Testamentum Vetus, bonorum temporalium hujus vitæ, Novum spiritualium futuræ promissionem maximè continet; ideo animæ immortalitas in isto sapius, quàm in illo revelata fuit.

Adeò autem nebulosa in Pentateucho Moyſis, ejus rei est insinuatio, ut S. August. tractans juxta 70. versionem, locum Num. 19. *Omnia qui tetigerit mortuum ab omni anima hominis, si mortuus fuerit, & non fuerit purificatus, tabernaculum Domini polluit; exterminabitur anima illa ex Israël, subjungat: Notandum est,* inquit, quòd difficillimè reperitur in his Libris aliquid evidentius de *vita animæ post mortem, fuisse conscriptum.* Exponens videlicet ita locum istum; ut exterminatio illa usque ad poenam animæ post

S. August. q. 33. in Num.

Idem lib.  
16. c. 27.  
Civit.  
Lib. 2. c. 6.  
contra Iul.  
&c.

post mortem corporis etiam extendatur : quemadmodum & ista verba Gen. 17. secundum eorundem 79. versionem: *Masculus qui non circumcidetur carne præputij sui octavo die, interibit anima illa de genere suo*, de interitu damnationis animæ post hanc vitam, sæpissime contra Pelagianos interpretatur; & inde peccatum aliquod originale in parvulo incircumciso hæsisse probat, propter quod animula illa à corpore suo, ante expiationem separata, puniretur, ac è populo numeroque Sanctorum expungeretur.

Gen. 2.

Indicari quoque animæ immortalitatem, S. Augustinus existimat, quando initio Geneseos dicit Moyses: *Inspiravit Deus in faciem ejus (hominis) spiraculum vitæ*: cum non sic de productione animarum brutalium, sed, *Producat terra animam viventem in genere suo, jumenta, & reptilia &c.* loquatur.

S. Aug. lib. 13. cap. ult. Civit. Arist. lib. 2. c. 2. de generatione animal.

Nam animam rationalem, inquit, non sicut aliarum carnium, aquis & terrâ producentibus, sed Deo flante creatam voluit intelligi. Hoc est, quod Aristoteles ait, Animam humanam *θύραθεν εξ- trinsecus* in corpus hominis ingredi; animas verò brutorum in potentiâ materiæ contineri, ac inde quodammodo educi.

2. Machab. 7.

Hinc quicumque in populo Iudæorum verè pij, credebant animæ immortalitatem, & unâ corporis resurrectionem; sicut, præter Sanctos Prophetas, in matre 7. Machabæorum, & filiis ejus est manifestum.

Act. 23.

Erant tamen inter Iudæos Sadducæi, qui animam mortui cum corpore contendebant, Græcorum Epicureis simillimi. *Sadducæi enim dicunt*, ait S. Lucas, *non esse resurrectionem, neque Angelum, neque spiritum*; id est animam, à corpore, quod ipsa animabat, superstitem.

Matth. 10.

In lege verò Evangelica ubique fermè ista immortalitas aut palam revelatur, aut implicite insinuatur. Quid apertius illis Christi verbis, quibus Leonem X. in Conc. Lateran. adversus istos animæ canices usum esse, supra narratum est:

Philip. 1.

*Animam autem non possunt occidere?*

2. Cor. 5.

Et Paulus desiderium habebat dissolvi & esse cum Christo.

Et alibi: *Scimus enim, quoniam si terrestris domus nostra huius habitationis dissolvatur, quòd ædificationem ex Deo habemus, domum*



*non manufactam, aternam in calis.*

Eleganter autem corpus *terrestrem animæ domum* appellat. *Certe enim, ait Tertullianus, domus animæ caro est, & inquilinus* Tertull. lib. de Ani- ma. c. 38. *carnis anima. Inquilinus autem non tibi cinatur ( id est, non fulcitur ) sed continetur à domo sua.* Significat ergo Apostolus, animam humanam non fulciri & sustentari à corpore suo, ut animas brutorum, neque destructâ domo unâ dissolvi, sed superstitem permanere.

Hinc Scriptura mortem hominis, sæpenumerò somnum 1. Cor. 7. vocat; quia altera ejus pars incolumis manet, reparatò corpori reunienda, ut utraque simul, velut ex somno, ad vigiliam redeat, ac in pedes resurgat. Non sic autem de morte brutorum loquitur; nec enim equum aut canem, cùm moritur, dormire dicet.

## ARTICVLVS V.

*Ex speculatione, qua intellectus se supra phantasmata elevat, animæ humanæ probata immortalitas.*

**D**emonstrationi Aristotelis, qua ex operatione intellectus, ut Artic. I. meminimus, animæ immortalitatem probavit, addendum ex SS. Patribus & Platoniciis aliquid, unde lucem, & firmamentum accipiat.

Nam licet anima nostra, parte suâ inferiori, qua in sensuum operationes influit, animæ bruti simillima sit; parte tamen superiori ( etiam cùm de rebus materialibus & sensibilibus differit ) modum cognoscendi infinitò quodammodò sublimiorem omnibus, etiam sagacissimis brutis, à natura habet. Nam non tantùm coloris, soni, odoris &c. existentiam, ut sensus tam externi, quàm interni solent, intellectus cognoscit; sed essentiâ ab existentia abstrahit, essentiâ in genus & differentiam resolvit, genus in suas species dividit, proprietates ab essentia manantes considerat; & plurima alia in ejusmodi rebus sensibilibus, *secundum rationes incorporeales & sempiternas*, ut loquitur S. Augustinus, *indicamus.* Hic autem cognoscendi S. August. lib. 12. c. 1. Trin. **F ffff** modus

modus altiùs supra omnes sensus & phantasmata brutorum elevatur, quàm cælum à terra distat.

S. August.  
ibid.

Omnes rerum sensibilibus figuras, visu & tactu cognoscere nobiscum possunt bruta: sed figurarum proprietates indagare: ut, An triangulus contineat tres angulos duobus rectis æquales, An quadranguli diameter sit incommensurabilis costæ, & sexcenta similia, quæ Euclides & Geometria docet, nullum prorsus phantasma, nulla cogitatio brutis esse potest. Nam *de corporalibus istis iudicamus*, ait idem S. Augustinus, *ex ratione dimensionum atque figurarum, quam incommutabiliter manere mens novit*. De istis autem bruta imaginatio nihil novit. Vnde si contingat nostram imaginationem circa objectum sensibile errare (ut cùm baculum rectum in aquam defixum, curvum esse putat) seipsam ex Opticæ rationibus & regulis corrigere non potest, sed ad intellectum, qui in tribunali superiori, sensibus & sensuum iudicijs præsidet, hoc referri debet.

Vbi verò jam intellectus circa sensibilia, per regulas & rationes insensibiles est philosophatus, in objecta sublimiora, quæ omni phantasmate carent, sed phantasmatum, tanquam nubium regionem supergrediuntur, aciem suam erigit.

Rom. 1.  
S. Tho.  
ibid. Lect. 6.

De seipso enim, & actibus suis spiritualibus, de vitijs & virtutibus, de Universi summo etiam Numine & Rectore, de ejus providentia, & alijs attributis, quæ nullo phantasmate depingi possunt, differit. Vnde verba ista Apostoli, *Invisibilia eius per ea quæ facta sunt, intellecta, conspiciuntur*, enarrans S. Thomas: *Intellectu enim*, ait, *cognosci potest Deus, non sensu, vel imaginatione, quæ corporalia non transcendit; Deus autem spiritus est*, Io. 4.

Vnde patet, quid sibi velit S. Thomas, cùm toties cum Aristotele suo dicit: In omni naturali operatione sua, intellectum speculari phantasmata. Non enim vult phantasiam semper formare phantasma illius objecti, quod intellectus speculatur. Hic enim apertè negat, Deum, & invisibilia ejus quæ Philosophi per creaturas, intellectu cognoverunt, aliquo imaginationis phantasmate potuisse cognosci. Sed tamen, dum intellectus Deum speculatur, imaginatio, per sympathiam, ut suprà Artic. 1. dictum est, circa aliquod phantasma rei sensibilibus



sensibilis ludit; ad cuius quodammodo similitudinem speculationis intellectus declinat, luxque spiritualitatis ejus, nebula aliqua phantasmatis quasi obvolvitur; sive, ut S. Thomas alia phrasi ait: *nondum ab appendicijs materia absolvitur*. Speciebus quippe non divinitus infusus, sed è núbilo phantasmatum receptis utitur: quas deinde per multas simplificationes, ut D. Thomas loquitur, & velut per alembicorum sublimationes, idoneas reddit, ut semen aptum ad rei spiritualis formandum conceptum esse valeant.

Vnde qui sincerius res divinas & spirituales intelligere volunt, omnia, quantum possunt, phantasmata abigere, aut mentis aspectum ab ijs avertere solent. Hòc naturæ rationalis instinctu indicante: esse quendam alium intelligendi modum, quo anima nostra separata à corpore, extra phantasmatum nubem, spiritualia valeat cognoscere, & *nuda cum essentijs illis nudis*; ut ait D. Gregorius Naz. *conversari*.

Nec in objectis istis spiritualibus stat intellectus nostri elevatio, sed rerum spiritualium sphæram stationemque transcendens, in omne ens imaginabile, & intelligibile, supra omne tempus, & omnem locum se diffundit; æternitatem sine principio & fine, immensitatem nullo spatiorum termino circumscriptam apprehendit.

Cùm autem modus cognoscendi ex modo essendi naturaliter consequatur, ut testantur Philosophi, signum sat evidens est, animam, cuius intellectus tam amplam & quasi infinitam intelligendi sphæram habet, supra corpus suum naturali subsistentiâ eminere; ac in altiori substantiarum gradu consistere, quàm ignobiles illas ac brutas animas, corporibus suis ita immerfas, ut nihil cognoscant, nisi quod per sensus corporis ad ipsas intravit: aut certè pauca præterea quædam insensata, ut vocant; veluti amorem, odium &c. quæ aliquo confuso & imperfecto modo, (sive per speciem aliquam naturalem, ut Marsil. Ficinus existimat, sive per naturæ instinctum, sine alia specie) apprehendunt, quantum ad conservationem talium animalium necessariū erat. Sic ovis amicitiam canis, odium lupi imaginatione quodammodo concipit; ut illi tanquam defensori

sori se jungat, hunc ut inimicum fugiat.

Denique sublimitas humani intellectus manifestatur ex luminibus & fulguribus supernaturalibus, quibus ad res divinas contemplandas, multæ piæ animæ quandoque abripiuntur.

S. August.  
lib. de  
quant. Ani-  
mæ c. 33.

S. Augustinus, ubi sex cognitionum & affectionum in anima rationali gradus distinxisset: *Iam verò in ipsa visione atque contemplatione veritatis*, inquit, *qui septimus atque ultimus anima gradus est, neque iam gradus, sed quadam mansio, quò illis gradibus pervenitur: quæ sunt gaudia, quæ perfructio veri & summi boni, cuius serenitatis atque eternitatis afflatus, quid ego dicam? Dixerunt hæc, quantum dicenda esse judicaverunt, magnæ quadam & incomparabiles anima, quas etiam vidisse, ac videre ista credimus.*

Ac deinde de hujus contemplationis puritate & sublimitate, iterùm: *Tanta autem in contemplanda veritate, ait, voluptas est, quantacumque ex parte eam quisque contemplari potest, tanta puritas, tanta sinceritas, tam indubitata rerum fides; ut neque quidquam præterea scisse se aliquando aliquis putet, cum sibi scire videbatur: & quæ minus impediatur anima toti tota inherere veritati, mors quæ antea metuebatur, id est, ab hoc corpore omnimoda fuga & elapsio, pro summo munere desideretur,*

Quis igitur dubitet, animum quæ in hac mortali vita, supra omnia mortalia, contemplatione & affectu sic evehi potest, ut mortem & à corpore abrumpi, pro summo munere habeat, esse incorpoream & immortalem? Est quippe talis anima in horizonte diei & noctis, lucis ac tenebrarum, & tenebras à corporeis phantasmatibus sibi aspergi indignata, plenam dici lucem supra se prospiciens, corporis nexum, ut toto & liquido die perfruatur, frangere gestit.

S. Gregor.  
lib. 8. c. 18.  
Moral.

Eleganter S. Gregorius: *Superna gratia carnalem cogitationem nostram, per admixtionem suæ contemplationis irradiat, & ab originali cacitate hominem ad intellectum reformat. Ac paulò post: Divinitatis contemplatio sensum tangit, sed plenè mentem non rescit; quoniam perfectè animus conspiceret non valet, quod adhuc, quia caligo corruptionis præpedit, raptim videt. Ecce enim electorum mens iam terrena desideria subjicit: iam cuncta, quæ considerat præterire,*

tran-



transcendit: iam ab exteriorum delectatione suspenditur, & quæ sunt bona invisibilia rimatur. Atque hæc agens, plerumque in dulcedinem supernæ contemplationis rapitur: iamque de intimis aliquid, quasi per caliginem conspicit, & ardenti desiderio interesse spiritualibus Angelorum ministerijs conatur, gustu incircumscripti luminis pascitur; & ultra se evecta, ad semetipsam relabi dedignatur. Sed quia adhuc corpus quod corrumpitur, aggravat animam, inharere diu luci non valet, quam raptim videt. Ipsa quippe carnis infirmitas transcendentem se animam retrahit, atque ad cogitanda ima, ac necessaria suspirantem reducit.

Non ambigo, quin ex proprio suo experimento, hoc narret S. Gregorius. Nam de simili etiam S. Augustinus: *Ali-* S. August.  
lib. 10. c. 4.  
confess.  
quando intromittis me in affectum multum inusitatum introrsus, ad nescio quam dulcedinem. Quæ si perficiatur in me, nescio quid erit, quod vita ista non erit. Sed recido in hæc ærumnosis ponderibus, & resorbeor solitus, & teneor, & multum fleo, sed multum teneor.

Lucem autem quandam dulcedini isti fuisse mixtam, in fundo animæ lucentem, in qua divina essentia ( licet adhuc sub nubilo & in ænigmate ) reluceret, existimat sublimis Contemplator Io. Thaulerus: Philosophus quidam, ait, alteri æquæ Philosopho, dignam Philosopho sententiam depromsit: Percepi quippiam in me, resplendens intellectui meo. Quod equidem aliquid esse experior, sed quid sit intelligere nequeo. Videtur tamen mihi, si apprehendere possem, omnem me, veritatem perspecturum.

De hoc etiam S. Augustinus ait: Sensi quiddam in me, resplendens anima mea: quod si perficeretur in me, dicere non dubitarem, id vitam esse æternam. Occultat se, & nihilominus manifestat se; indicat ex parte, ut per hoc animam alliciat, provocet, & post se trahat, imò & sibi ipsi auferat.

Per ejusmodi verò experimenta, Contemplativi, & simplices ac ineruditæ quædam animæ clarius & certius animæ humanæ nobilitatem immortalitatemque cognoscunt, quàm Aristoteles, Plato, ac omnes Mundi Philosophi. Vnde statim post Thaulerus: Quis novit quantam excellentiam & nobilitatem Deus natura humana contulerit; necdum ab ulla Philosopho conscriptum, sed illis omnibus absconditum? Quotquot enim Philosophi de animæ nobilitate aliquid in scriptis reliquerunt, eò dumtaxat pertin-

gere potuerunt, quò naturalis eos ratio perducebat. Necdum verò in ipsum fundum devenerunt. Vnde & plurima illis occulta mansere & incognita.

## ARTICVLVS VI.

*Si aliquid in Vniuerso, rerum humanarum providens Numen est, anima humana est immortalis.*

**H**oc argumentum, à providentia Dei præmiante bonos, puniente improbos, non tantum SS. Patres Augustinus, Nazianzenus, Chrysostomus, Damascenus, Lactantius, D. Thomas &c. sed etiam Plutarchus alijsque Philosophi Gentiles melioris mentis & ingenij, validum ad probandam animæ immortalitatem censuerunt.

Ex cælestium enim motu, & tota Vniuersi gubernatione (quidquid Diagoristæ & Epicurei reganniant) satis constat, aliquem esse Mundi Rectorem, qui præcipui saltem Mundi incolæ, hominis, inquam, habeat providentiam, & gerat curam.

Constat deinde, multos homines, tam in desertis, aut Monasterijs, quàm in mediâ etiam seculi frequentia, ab illicitis voluptatibus, & Mundi illecebris corpus & animum castum servare, & ultroneâ patientiâ, propter divini Numinis amorem, multa mala, totâ hac vitâ mortali, tolerare. Quosdam verò alios inter voluptates & blandimenta vitiorum, nullo respectu, aut metu Numinis, ducere omnes dies suos. Quando igitur illi præmium, isti pœnam recipient? Certè neutri in hac vita recipiunt; ergo restat altera, in qua iustitia in utroque exerceatur. Cujus rei imaginem apud S. Lucam Christus in paupere Lazaro, & divite Epulone nobis figurat, dum Abrahamum dicentem inducit:

*Fili, recordare, quia recepisti bona in vita tua, & Lazarus similiter mala: nunc autem hic consolatur, tu verò cruciaris.*

Luc. 16.  
Scot. in 4.  
d. 43. q. 2.

Hoc tamen argumentum subnervare conatur Scotus. Primò: *Quia non apparet per rationem naturalem, inquit, quòd sit unus*

*Rektor*



*Reſtor hominum, ſecundum leges juſtitia retributiva & punitiva. Secundò. Eſto ſit. Dicitur tamen, quòd unicuique in bono actu ſuo, ſit retributio ſufficiens; & in malo punitio. Nam, ut Hugo Cavel- luseum explicat: Bona opera trahunt ſecum conſolationem ſuam, & mala ſuum conſcientiæ vermem.*

Cavell. lib.  
de Anima  
diſp. 1.  
ſect. 13.

Sed à Melchior Canus, & Thomiſtis utrumque reſellitur. Nam ſicut Romulus v. g. Romanam civitatem imprudenter condidiſſet, ſi nulla præmia bonis, nulla ſupplicia improbis conſtituiſſet; ita multo magis Deus Vniverſitatis conditor, hanc Mundi Remp. malè & perperam inſtituit, ſi bonos & morigeros nullo præmio afficit, malos nullâ poenâ mulctat. In Deum verò nulla imprudentia, nulla ordinis ab eo inſtituti indecentia cadere poteſt. Deus quippe eſt eſſentialiter ipſa decentia, omniſque decentiæ creatæ exemplar: cui non magis aliqua inſipientiæ labes miſceri poteſt; quàm juſtitia ejus injuſtitia, vel ſapientiæ inſipientia. Hinc enim celebre illud S. Anſelmi pronunciatum: *Sicut in Deo quantumlibet parvum inconveniens ſequitur impoſſibilitas; ita quantumlibet parvam rationem, ſi maiori non vincitur, comitatur neceſſitas.*

S. Anſel.  
lib. 1. c. 10.  
Cur Deus  
homo.

Vnde adverſus Scotum clamat Melchior Canus: *Demonſtratum eſt, animas eſſe immortales tam evidenti & neceſſaria ratione, quæ reſelli non valeat, niſi Deum facias aut improvidum eſſe & negligenter rerum humanarum, aut eam urbem ſtultè conſtituiſſe, in qua nullus ſupplicij timor ſit, præmij expectatio nulla.*

Melch.  
Can. De  
Loc. c. ult.

Gaudium verò, quod ex actibus virtutum, in hac vita, percipiunt boni, non eſt propriè præmium, ſed tanquam propria quædam paſſio, ex ipſis actibus naturaliter effluens; ut hòc veluti pauxillo melle amaritudinem, quæ actibus virtutum sæpe allinitur, Deus conſolaretur, & animos adderet ad perfeverantiam.

Deinde præcipuum gaudium ex futuræ retributionis ſpe venit. Sicut enim de ſpe meſſis Poëta olim dixit, *Spes alit agricolas*; ita dicere poſſumus, *Spes æternæ vitæ bonos alit.*

Egregiè Plutarchus: *Athletæ non quamdiu pugnant, ſed poſt pugnam coronantur. Ita ſibi bene conſcij, qui ſecum reputant, bonis poſt hæc vitam præmia retribui, mirum in modum propter virtutum ſuarum*

Plutar. lib.  
contra Epi-  
cur.

*suarum conscientiam, & spem illam futurorum exultant.*

Si autem anima post hanc vitam superstes non manet, obiectum talis spei prorsus evanescit.

Et Plutacho succinens Lactantius, negat hanc vitam esse idoneum, ad recipiendam virtutis mercedem, tempus. *Virtutem enim, inquit, cum finita est, merces sequitur. Virtus autem nunquam nisi morte finitur: quoniam & in morte suscipiendâ, summum eius officium est. Ergo præmium virtutis post mortem est.*

Denique tantillum gaudij, quo multæ animæ sanctæ in hac vita asperguntur, nimis tenue, & ut sic dicam, macrum est, si ad labores & ærumnas earum comparetur: & mali homines ex seculi voluptatibus sæpenuerò longè ampliorem fructum decerpunt.

Absurdissimum autem providentiæ genus est, quo præmium grandius hominibus scelestis, quàm probis constituitur. Ideoque Apostolus intulit, nos miserabiles omnibus, si in hac vita tantum in Christo sperantes sumus; nec ulla alia quies & præmium post hujus vitæ agonem nos sequitur.

Vnde S. Augustinus, de statu vitæ deliberans, fatetur se palmam Epicuro fuisse daturum, si animam cum corpore existimasset mortalem. *Non me revocabat, ait, à profundiore voluptatum carnalium gurgite, nisi metus mortis, & futuri iudicij tui; qui per varias quidem opiniones, nunquam tamen recessit de pectore meo. Et disputabam cum amicis meis Alipio & Nebridio de finibus bonorum & malorum, Epicurum accepturum fuisse palmam in animo meo, nisi credidissem post mortem restare animæ vitam, & tractus meritum; quod Epicurus credere noluit.*

S. August.  
lib. 6. cult.  
Confess.

## ARTICVLVS VII.

*Naturali quodam omnium hominum instinctu probata animæ humane immortalitas.*

Chrys. Homil. 7. in  
I. Cor.

**N**Otat Chrysostomus Diaboli astutiam, qui Gentilium Philosophos in falsis unanimis, in veris, & præcipuè in animarum immortalitate (unde plurimum utilitatis in mores hominum redire poterat) discordes fecit. Sic enim



enim adversus Academicos & Peripateticos suscitati ab eo Epicurei & Stoici, qui immortalitatem ab illis assertam conarentur labefactare.

Nihilominus naturalis ille omnium nationum instinctus, non ita multitudine argumentorum & sophismatum, etiam in ipsis Epicureis obrui potuit, quin aliqua semper immortalitatis suspicio reliqua in animis ipsorum manserit. Illustre exemplum est in C. Cassio illo, qui inter primos in Iul. Cæsaris necem conjuratores fuit. Cum enim secta Epicureus esset, & animas, aut manes post mortem corporis ullos superesse negaret; ubi tamen in Curiam Pompeij (ubi cædes patranda erat) cum Cæsare & conjuratoribus venisset, oculos in statuam Pompeij, quæ ibi posita, erexit, cum submissâ magnium Pompeij invocatione, ut sibi essent auxiliares. Contra tamen Philosophiæ ejus, & Epicuri decreta, inquit Plutarchus.

Plutar. in Iul. Cæsar.

Ceteri quoque Epicurei, addit alibi idem Auctor, mortem ita horrebant, ut ad solum mortis nomen, expallescere. Quidquid eos magister Epicurus objurgaret, qui concupiscendam, aut metuendam mortem negabat. Quid enim tantopere times, si mors omnia delet, nec anima scelesti ad poenam superstes manet? Hac quippe cogitatione timorem pellunt, & se ad fruendum bonis invitant illi apud Sapientem Epicurei. Quia ex nihilo, inquit, nati sumus, & post hoc erimus

Plutar. lib. contra Epicur. Senec. Epist. 24.

tanquam non fuerimus. Et licet isti, aut alij similes sic obtenebrati essent, ut ultima veritatis illius scintilla extincta foret: specimen tamen natura non à talibus, sed ex optima quaque natura capi debet, inquit M. Tullius. Omni autem antiquitate uti possumus; quæ quo propius, ait, aberat ab ortu, & divinâ progenie, eo melius ea fortasse quæ erant vera cernebat. Vnum verò illud erat insitum priscis illis, quos Cæscos appellat Ennius: esse in morte sensum, neque excessu vita sic deleri hominem, ut funditus interiret. Idq; cum multis alijs rebus, tum è Pontificio iure, & ceremonijs sepulchrorum intelligi licet: quas maximis ingenijs præditi, nec tantâ curâ coluissent, nec violatas tam inextinguibili religione sanxissent, nisi habisset in eorum mentibus, mortem non interitum esse omnia tollentem atque delentem; sed quandam quasi

Cic. lib. 1. Tuscul.

Ggggg

migra-

*migrationem commutationemq; vitæ, quæ in claris viris & feminis dux in calum soleret esse; in ceteris humi retineretur, & permaneret tamen.*

Ac deinde inferiùs: *Omni in re consensio omnium gentium, lex natura putanda est. Quis est igitur, qui suorum mortem primum non eo lugeat, quòd eos orbatos vita commodis arbitretur? Sed illa lugubris lamentatio fletusq; manens ex eo est, quòd eum quem dileximus, vitæ commodis privatum arbitramur, idq; sentire. Atque hac ita sentimus naturâ duce, nullâ ratione, nullâq; doctrinâ.*

Senec.

Epist. 117.

M. Tullio consentienter etiam Seneca: *Multa dare solemus, ait, presumptioni omnium hominum. Apud nos veritatis argumentum est, aliquid omnibus videri. Cùm de animarum aternitate differimus, non leve momentum apud nos habet consensus hominum, aut timentium Inferos, aut colentium.*

Tertul. lib.

de Anima

c. 2.

Et de hoc tam publico immortalis animæ sensu, & unde eum habeamus, Tertullianus differens: *Naturâ pleraque, inquit, suggeruntur, quasi de publico sensu, quo animam Deus ditare dignatus est.*

S. August.

lib. 6. c. 11.

Confess.

Denique ex tam admirabili Christianæ religionis, & cum tantâ eminentiâ auctoritatis, toto Orbe diffusionem eandem animæ immortalitatem probat S. Augustinus.

*Non vacat, non est inane, inquit, quòd tam eminens culmen auctoritatis Christianæ fidei toto Orbe diffunditur. Nunquam tanta & talia pro nobis divinitus agerentur, si morte corporis etiam vitæ animæ consumeretur.*

## ARTICVLVS VIII.

*Reditus quoque animarum defunctorum ad vivos, earum immortalitatem probat.*

**P**urima de animarum defunctorum reditu ad vivos, per historias & Vitas Sanctorum sparsa, colligere possem, nisi Mart. Delrius, Disquis. Magic. lib. 2. q. 26. sect. 5. hoc me labore levasset.

Si autem animæ, à morte, in corporibus assumptis adhuc apparent; ergo post corporis funus superstites manent. Nec  
ulla



ulla causa est, quæ eas postea corpore nudatas interficiat: sicut Stoicis placuit, qui animas corporeas & igneas esse, ac extinguere posse corpore jam exutas, ut ignes, existimaverunt.

Si verò animæ incorporeæ & spirituales sunt, sicut fides divina & verissima Philosophia probant, per nullas causas naturales possunt corrumpi, ubi corporibus fuerint nudatæ. Si igitur unâ horâ, aut momento, post corpus superstites sunt, semper manebunt.

Nam ex optima philosophia S. Thomæ: *Nulla forma corrumpitur, nisi vel actione contrarij, vel per corruptionem sui subiecti, vel per defectum sue cause.*

S. Tho. lib.  
2. c. 79,  
contra  
Gent.

Quia verò anima à corpore separata, in nullo amplius est subiecto, non potest aut per introductionem contrarij in subiectum, aut per corruptionem subiecti, perire. Sed neque etiam per defectum causæ; sicut per occasum solis corrumpitur lumen in nostro aëre: quia Deus, à cuius solâ Omnipotentia anima separata, per creationem conservativam suspenditur, nec moritur, nec mutatione locali, præsentiam suam subducere potest; quemadmodum sol per occasum à nostro hemisphærio se subducit. Nec denique ulla alia occasio naturalis occurrere potest, propter quam Deus influxum conservativum ab anima separata retrahat.

Animas autem defunctorum quandoque redire, omnium seculorum memoriæ testantur. Nam præter tot animas, quas Christus, & Apostoli, alijque tam in veteri quàm novo Testam. in corpora sua revocaverunt; innumeras manium & umbrarum apparitiones, non tantum levibus & imaginosis mulierculis, sed viris gravissimis factas, citare possemus: quas omnes falsas & illusorias fuisse, sine pertinaci impudentia contendere nemo potest. Plurimæ enim fuerunt sanctorum hominum animæ, quæ pias & justissimas relictas ad vivos causas habuerunt.

Famosa quoque inter alias est, animæ Marsilij Ficini, celeberrimi Philosophi Platonici, post mortem nuper apparitio; quam narrat, & à Michaëlis Mercati Miniatenfis nepote, probato morum, atque doctrinâ spectato viro, se audivisse refert Cæs.

Baronius

Baron.  
Tom. 5.  
Annal.

Baronius ad An. Christi CCCCXI.

Cum enim Marsilius & Michaël Mercatus, ambo Philosophiâ Platonici, de animæ immortalitate ex Platone suo, quondam solito ferventiùs disputassent, eò disputatio provecta, ut uterque jurejurando alteri sponderet, appariturum se socio post mortem, ut animæ superstitis statum edoceret.

Elapso inde non paucò temporis spatio, Michaël Mercatus quodam summo manè studijs suis intentus, audivit celerem equi prætervolantis cursum; & cum paulisper ante domûs ejus fores restitisset, equitem notâ Marsilij Ficini voce clamantem audivit: *O Michaël, O Mihaël, vera, vera sunt illa.* Vnde amici sui Marsilij vocem agnoscens, apertâ illicò fenestrâ, vidit à tergo equitem candidatum, concolori equo aufugientem; & cum ipse *Marsilium, Marsilium* inclamaret, ex oculis evanuit. Et statim missò Florentiam, qui viseret quidnam Marsilius rerum ageret, defunctum eâdem horâ, quâ eques apparuerat, invênit. Inde Michaël Mercatus *valedicens Philosophicis disciplinis*, ait Baronius, *soli Christianæ Philosophiæ, ceteris eminentioris, propensior cultor effectus, quod reliquum fuit temporis, Mundo defunctus, soli vitæ futura vixit; specimen edens absolutissimi omnibus numeris Christiani, qui inter Philosophos sui temporis magna cum laude claruerat, nulli secundus.*

Sed negabunt aliqui fortasse spiritus defunctorum esse, sed Genios, sive Angelos bonos, aut malos, talibus eventibus, hominibus vivis apparere.

Verùm hoc respondere non possunt Epicurei, qui tam olim quàm hodie omnem spiritum, non tantùm humanum, sed etiam Angelum perimunt. Vnde Hebræorum Epicurei, Sadducæi dicebant, teste S. Lucâ, *non esse resurrectionem, neque Angelum, neque spiritum*, humanum superstitem corpori. Et C. Cassius, dux alter Romani exercitûs cum M. Bruto, bello civili adversus Augustum & M. Antonium, cum secûdâ Epicureus esset, collegam suum Brutum, nocturno spectro (quod ei dixerat: *malus Angelus tuus sum, & apud urbem Philippos, ubi proprio gladio se interfecit Brutus, me videbis*) perterritum irrîsit: quia ex Epicuri sui disciplina, *spiritus, aut Angelos*

Platâr. in  
Bruto.

Act. 23.

illos



illos esse negabat, ait Plutarchus.

Nec sanè immeritò duo ista spirituum genera simul ita copulantur, ut qui unum rejicit, vel admittit, alterum quoque rejiceret, vel admittere debeat.

Uterque enim spiritus iste, ut S. Gregorius Naz. dicit, ad Vniversi perfectionem & complementum spectat: ut Deus <sup>Naz. Orat. 39.</sup> tam superum, quam inferum laudatorem habeat. Superus laudator, Angelus est, inferus homo: qui tam pro se, quam pro ceteris creaturis corporalibus, quæ Creatorem suum agnoscere non possunt, eum laudare debet.

Deinde, sicut in Vniverso dantur creaturæ purè materiales, ut bestiae, & purè spirituales, ut Angeli; ita ad complementum, quædam ex utrisque mixtæ dari debent: ut homo, corpore materialis, animâ spiritualis, superiorum inferiorumque horizon, & Vniversi compendium. Hoc est quod Conc. Lateranense An. MCCXV. sub Innoc. III. definit: *Deum condidisse creaturam humanam, quasi communem, ex spiritu & corpore constitutam.* <sup>Cap. Firmiter de summ. Trin.</sup>

Nimis autem futile est, quod Plinius metuit: ne sedes & locus tot umbrarum & animarum hominum à tot seculis defunctorum, capax inveniri non possit. *Quæ sedes enim, inquit, quantæ multitudo tot seculis animarum, velut umbrarum? Puerilium ista deliramentorū, avidæq; nunquam desinere, mortalitatis commenta sunt.* <sup>Plin. lib. 7. c. 55.</sup>

Imò, tu ipse puer Plini. Umbræ quippe istæ, quas vocas, sine corpore sunt, nec sedem ullam aut locum implent.

Cum verò etiam de animâ corpore suo exutâ interrogas: *Vbi cogitatio illi? Quomodo visus, auditus, aut quid agit, qui usus ejus, aut quod sine his bonum?* jam ostendis Lipsium nostrum falli, qui te inter Stoicos suos reponit; cum verba ista tua: *Quod sine his (corporis sensibus) bonum?* te purum putum Epicuri de grege porcum fuisse clamant. Stoici enim non in voluptate sensuum corporis unicum, aut summum bonum, ut tu, sed in animo ponunt. <sup>I. Lips. lib. 2. dissert. 13. Physiol.</sup>

Anima verò avulsa à corpore sensus suos, id est, intellectum, pro cunctis sensibus corporis, habet, ut otiosa (quod metuit Plinius) non sit, sed agere aliquid possit.

Ecclef. 3.

Plinio denique & Epicuro fratres gemelli sunt, qui apud Sapientem ista garriunt: *Vnus interitus est hominis & iumentorum, & aqua utriusque conditio. Sicut moritur homo, sic & illa moriuntur; similiter spirant omnia, & nihil habet homo iumento amplius.*

Ecclef. 12.

D. Tho. lib.

2. c. 79.

contra

Gent.

Et postea: *Quis novit, si spiritus filiorum Adam ascendit sursum, & si spiritus iumentorum descendat deorsum?* Nam hanc impiorum quæstionem infrà resolvit ipse Salomon: *Revertitur pulvis ( corpus hominis ) in terram suam unde erat, & spiritus redit ad Deum qui dedit illum.* Verba enim priora, ore impiorum depromi D. Thomas, & SS. Patres passim interpretantur. Nisi mavis ( quod aliqui faciunt ) Sapientem loqui in propria quidem persona, sed de vita corporali hominis, quæ instar vitæ pecudum, generatur, adolescit, senescit, moritur, nullo sæpe evidenti discerniculo; ideoque mirum non esse, quòd pius ab impio, in hac vita nequeat discerni, sed discrimen in futurum reservetur. Vnde addit ibidem Sapiens: *Iustum & impium indicabit Deus, & tempus omnis rei tunc erit.*

Quando verò interrogat: *Quis novit, si spiritus &c.* non ambigit de veritate, sed cognoscendi difficultatem insinuat, ut S. Hieronymus & alij interpretantur.

## ARTICVLVS IX.

*An anima humana secundum supremum rationalitatis apicem, quo est immortalis & à corpore independens, sit forma corporis.*

**E**rror Platonis in Scholis famosus est, qui docebat animam nostram esse in corpore, non sicut forma est in subiecto, sed sicut *nauta in navi*, aut Diogenes in dolo; vel potius, ut *limax vel ostreum in sua cochlea*, cui adhæret aliquo nexu.

Vnde Plato dicebat, *hominē esse animā corpore vestitam*, inquit Nyssenus. Idem quoque Philosophus Anaxarchus; qui cū à Nicocreonte Cypri tyranno vivus in mortario cōtunderetur.

*Tande,*



*Tunde tunde*, clamabat: *Anaxarchi follem tangis, non Anaxarchum.*

Quid aliud dicit Tertullianus, cum animam, homuncionem quendam esse imaginatur, corpori nostro exteriori, ut pyxidi vel vaginæ insertum? Imò universim Stoici, qui hominis animam, divini spiritus (hoc est, ætherei ignis, ut interpretatur Lippius noster) partem esse, ac veluti scintillas quasdam astrorum, in terras desiluisse, atque alieno loco hasisse, censebant; negare quoque debebant esse formam corporis. Ignis enim, qui ligno, aut volanti pyroboli chartæ adhæret, chartam quidem quodammodo animat, sed non informat.

Senec. lib.  
de Vita  
beat. cult.

Campanella verò negat animam sensitivam esse formam sui corporis, sed spiritum corporeum, mobilem, tenuem, non affixum organo, discurrentem de uno in aliud, ut per musicorum organorum fistulas, ventus.

Campanel.  
lib. de sensu.  
c. 18.

De anima verò rationali, propter Clementis V. in Concilio Viennensi definitionem, id dicere non audet; sic enim non esset forma corporis. De anima autem sensitiva, supponunt potius, ex Philosophia Peripatetica, Concilij Patres, quàm opus fuerit hoc definire. Nam plerique omnes Platonici & Averroistæ, qui animam rationalem negant esse formam informantem, de sensitiva brutorum non dubitant.

Concil. Viennense veritatem illam Philosophicam definire voluit, propter Hæresiarcham quendam illius ævi, Petrum Ioannis nomine, qui ex Schola Averrois, inter ceteros suos errores, assererat: *Substantiam animæ rationalis seu intellectivæ, verè ac per se humani corporis formam non esse.* Adversus quem editum hoc Decretum: *Quisquis deinceps asserere, defendere, seu tenere pertinaciter presumpserit, quòd anima rationalis seu intellectiva, non sit forma corporis humani per se & essentialiter, tanquam hæreticus est censendus.*

Anno  
MCCCXV

Multa enim absurda contra fidem Christianam ex eo errore Philosophico sequuntur. Vnde etiam ante Concil. Viennense, ait Guido Carmelita, talis fuisse hæreticus indicandus est. Quia per hoc negatur meritum & demeritum in homine: negatur necessitas sacramentorum, & peccatum, & virtus: negatur totale fundamentum fidei, & fides ipsa, qua præcipitur habenda hominibus: & vita aterna, & salutaris

Guid. Carmel.  
c. 2.  
De errorib.  
Pet. Ioan.

salutaris adventus Christi in carnem, & adventus ad iudicium, & missum Spiritum sanctum ad sanctificandum homines, & cetera quæ fide creduntur; si homo non habeat tanquam veram & essentialem formam, animam rationalem per essentiam.

Nam si anima rationalis non informet, sed assistat solum corpori animâ sensitivâ cogitativâ informato (quod est somnium Averrois) re verâ homo bruti species quædam esset, & veluti asina Balaami, quæ substantia spiritualis intelligens, sine informatione inhabitaret, eique solum extrinsecus imaginationem & linguam moveret. Actum verò intelligendi aut volendi, communicare ei non posset. Ut enim verè & vitaliter homo intelligat aut velit, non ab altero actum intelligendi aut volendi, sed à semetipso recipere, hoc est, sibi imprimere debet.

Vnde anima rationalis homini solum assistens, intelligere quidem, seu in se actum intelligendi formare poterit; non tamen efficere, ut suppositum illud cui assistit, illo eodem actu intelligat. Aliàs pileus meus intelligens denominari posset, quia caput meum illi inexistens, intelligit.

Cajet. 1. p.

q. 76. a. 1.

Non igitur de nihilo, sed verè, & unâ facietè Cajetanus: Averroëm, & sequaces eius esse (propriâ ipsorum opinione) essentialiter animalia bruta; & propterea non esse mirum, si nihil intellexerint de seipsis.

Sed dicent fortasse, vocem istam *homo* non tantum significare compositum physicum ex corpore & animâ cogitativâ, sed complecti etiam animam rationalem, quæ tali composito assistit.

Verum hoc pacto, homo non erit verum animal; cum ens per se non sit: omne autem animal sit inferius entis per se. Nec aliter homo differet à simiâ, aut satyro, quàm compositum ex equo & equite differt à nudo equo qui infessore caret. Fac ergo, ut anima rationalis assistens, deserat suum ex animâ cogitativâ & corpore suppositum; ecce jam ex homine relinquetur nobis satyrus; qui hominum societatem fugitans, silvarum latebras quæret. Quod quidam Averroistarum (credo, ut nos deleant, & rideamus) non verentur concedere.

Alij



Alij tamen arctiorem unionem inter illud cogitativum suppositum, & animam rationalem interponunt, quàm ut tam facile abrumpi possit.

Sit ergo homo Averroicus, ut Hippocentaurus, ex equo & homine concretus, aut ut ostreum, ex testâ suâ cochleâ & animali adhærente compositum.

Attamen unio ista non erit per se, sed instar plumbaturæ, quâ unum metallum cum alio, ut ferrum cum cupro, aut lapis cum ligno ferruminatur. Vnde homo non erit magis unum per se, quàm sedes, aut domus, cujus partes non propria unione integrali, sed ferrumine & ligaturâ tantum inter se devinciuntur: quidquid dicat Plotinus & Platonici: qui licet animam rationalem informare corpus negent, *ita tamen ei alligant*, ait Ficinus, *ut ex ea & corpore unum animal componatur*; ideoque à materia mox ita insciatur, *ut & passionibus fiat obnoxia, & motus immoderatos, more corporis, subeat in excessum atque defectum.*

Marfil. Fic.  
cin. com-  
ment. in  
Ennead. x.  
c. 4. Plot.

Sed hæc animæ rationalis ab animæ sensitivæ passionibus infectio, potius indicat unionem animæ rationalis ad corpus esse essentialem, seu informativam; atque eandem esse animam, quæ & operationum sensitivarum, & rationalium sit origo ac principium.

Quod etiam ex sympathia, qua actiones humani intellectus interpellant actiones sensitivas; ut cum vehemens & attentata speculatio actionem videndi, vel audiendi, aut motum progressivum suspendit, colligitur. Quod profectò non fieret, si anima rationalis sensitivo animali extrinsecus tantum assisteret. Nec enim speculatio attentissima equitis motum equi progressivum interpellat, aut impedit.

Hinc ergo patet, veram esse Philosophiam Aristotelis, qui animam rationalem non extare quodammodo, & attollere apicem mentis supra hominem sensitivum, sentit, sed eam usque ad corporis sui informationem deprimat. Et si tamen in uno homine, *duplicem hominem constituat*, ait nobilis ejus Interpretæ Eustratius: *Vnum qui ex anima & corpore constat; alterum intellectum. Vocat autem intellectum, ipsam rationalem anima partem. Quem sane intellectum & verè, & primò, & maximè hominem esse statuit.*

Eustrat.  
lib. 10. c. 6.  
Ethic.

Hhhhh

Prorsus

Prorsus cum Apostolo nostro Paulo consentienter, qui rationalem & supremam animæ partem, *hominem interiorem*; partem sensitivam ac inferiorem, *hominem exteriorem* appellat. Hominem quoque interiorem esse maximè hominem significat, quando negat se facere, quod pars sensitiva, secundum concupiscentiæ legem in ipso agit; sed illud quod pars rationalis, secundum æternam Dei legem operatur. *Si quod nolo illud facio: iam non ego operor illud, sed quod habitat in me, peccatum.*

Rom. 7.

Si autem anima rationalis supra corpus & supra animam sensitivam sic emineret, ut corpus non informaret, nulla sanè virtus, aut vitium, meritum, aut demeritum homini sensitivo tribui posset, & omnia absurda illa sequerentur, quæ Guido Carmelita Petro Ioannis hæretico, in initio Articuli obiectabat.

Inter res enim specie, & tam longè differentes, quàm differunt anima rationalis & corpus, non potest alia unio per se unum constituens, intercedere, præter essentialem, qua extrema per modum actûs & potentiæ copulantur. Unde virtus & vitium, ac universim intellectûs & voluntatis operationes, animæ tantum extrinsecus assistenti, non homini proprio, quod est animal sensitivum, tribuentur. Nec enim homo (qui debet esse ens unum per se) intra significationis suæ peripheriam, animam rationalem sic extantem ut non informet, poterit circumplecti.

## ARTICVLVS X.

*Argumenta aliquot, contra animæ humanæ informationem objecta, reijciuntur.*

**S**ed anima rationalis est spiritualis & indivisibilis, igitur materiam corporalem & divisibilem informare non potest, inquitur. Vulgare quippe axioma est: *Quidquid recipitur, ad modum recipientis recipitur.*

Resp. Axioma istud sumptum esse à liquoribus, qui poculis & vasis infusi, superficie suâ convexâ, modum & figuram superfi-



superficie concavæ vasorum rapiunt.

Postea longius tractum est; ita ut jam omnis forma in subiectum suum, ad modum recipientis recipi dicatur. Sic albedo ovi, ad modum subiecti sui recipitur; quia figuram ovalem induit, similem figuræ testæ ovi.

Denique adhuc longius illud axioma extensum est: ut universim quælibet forma dicatur recipi ad modum recipientis, si sufficientem cum subiecto receptivo proportionem habeat; adeo, ut modus ille subiecti, nihil aliud esse videatur, quàm aptitudo subiecti, correlativè respondens aptitudini informandi, quæ est in forma. Aliàs enim si forma deberet induere omnes modos & conditiones subiecti in quod recipitur; accidens non posset in substantiam recipi, nisi quandam substantialitatem ab eo contraheret.

Igitur anima rationalis in materiam corporis sui, ad modum recipientis recipitur, eo ipso, quo materia illa est ens physicè incompletum, susceptivum cujuslibet formæ incompletæ, quæ ad ipsam dicit essentialem ordinem. Inter quas formas est anima rationalis.

Sed qua ratione, substantia animæ partium integralium expers, per omnes partes integrales sui corpus potest diffundi?

Dic tu mihi antè: qua ratione Angelus sine partibus, sphaeram suæ replicationis, aut Deus totum Universum implet? Nam S. Augustinus in existentiam animæ in corpore, cum in existentia qua Deus Mundum replet, solet comparare. Sed de re ista plura proximo Capite.

Secundò obijciunt: Potentiæ animæ rationalis, ut talis est, nempe intellectus & voluntas, non sunt potentiæ organicæ, procumbentes in materiam corporis: ergo anima propter illas non postulat informare corpus; imò purius & sincerius operationes potentialium spiritualium exercet, quando separata est à corpore.

Resp. substantia animæ rationalis, quæ est radix, non tantum vegetativarum & sensitivarum, sed etiam spiritualium potentialium, est essentialiter ens incompletum, & appetens materiæ complexum. Unde licet intellectus ejus non jaceat

& sustentetur in materia, ut potentia organica; ei tamen contra naturale est, ut speciebus intelligibilibus, haustus ex fumo, ut sic dicam, corporalium phantasmatum utatur. Hæ enim species, ut ait S. Thomas, sunt magis accommodatæ imperfectioni humani intellectûs, qui in genere intellectuum est infimus.

S. Tho. 1.  
p. 1. q. 89. a. 2.

Ad fabricandas igitur tales, & isti modulo suo commensuratas species intelligibiles, anima etiam ut rationalis, naturâ suâ communicationem & complexum cum materia corporis sui flagitat.

Idem 1. p.  
q. 89. a. 4.

Species autem Angelicis similes, quæ animæ separatæ infunduntur, puriores quidem & sinceriores sunt, sed minus intellectui humano accommodæ, ut philosophatur S. Thomas. Vnde licet *Angeli*, inquit, *per huiusmodi species habeant perfectam & propriam cognitionem de rebus; anima tamen separata tantum confusam*: Sicut fortè species lucis solaris, oculis aquilinis licet accommodæ, oculos tamen noctuæ obturbant, & imperfectam solummodò visionem gignunt. Aut si alia comparatio placet: Sicut convexæ lentes in specillis, oculorum senescentium lumina plerumque clarificant; & tamen myopas, quibus brevis est oculorum acies, confundunt. Quæ tamen comparationes, quia à rebus sensibilibus ad spirituales translatae sunt, cave, ne nimis exactas esse putes, & eas quatuor pedibus (ut dici solet) facias currere. Sententiæ enim S. Thomæ sufficit, ut quemadmodum anima nostra est forma postulans naturaliter unionem ad corpus, & conjunctionem cum phantasmatibus, à quibus species in intellectum suum rapit; ita tales species, & actus intelligendi ex talibus geniti (quamvis Angelicis imperfectiores) humano intellectui magis & aptius quadrent.

Idem 1. p.  
q. 89. a. 1.

Tertio, si unio animæ rationalis ad corpus est ei naturalis; igitur separatio, inquiunt, erit contra naturam. Et tamen S. Thomas dicit solum esse *præter naturam*. *Esse enim separatam à corpore*, inquit, *est præter rationem naturæ suæ; & similiter, intelligere sine conversione ad phantasmata, est ei præter naturam*.

Resp. statum separationis re verâ esse animæ contra naturam. Vnde aliquid *esse præter naturam*, usurpatur hîc à S. Thomâ

pro



pro, esse contra naturam. Imitatur quippe Aristotelis sui phrasim, qui motum contra naturam (ut gravium sursum, levium deorsum) passim vocat *παρὰ φύσιν* prater naturam. Hoc ex comparatione S. Thomæ ibidem patet. *Habet anima, inquit, alium modum essendi, cum unitur corpori, & cum fuerit à corpore separata; manente tamen eadem naturâ. Non ita, ut uniri corpori sit ei accidentale, sed per rationem suæ naturæ, corpori unitur. Sicut nec levis natura mutatur, cum est in loco proprio, quod est ei naturale, & cum est extra proprium locum, qui est ei prater naturam.*

S. Tho. 1. p.  
q. 89. a. 1.  
& q. 76.  
a. 1. ad 6.

Ecce, quomodo locum deorsum, qui est contra naturam corporis levis, vocet prater naturam, & comparet cum statu animæ extra corpus. Vnde alibi apertè, & extra omnis dubitationis nubem: *Anima corpori naturaliter unitur. Est enim secundum essentiam suam corporis forma. Est ergo contra naturam anima, absque corpore esse.*

S. Thom.  
lib. 4. c. 79.  
contra  
Gent.

Hæc autem philosophia, & modus loquendi S. Thomæ verior est, quàm multorum Recentiorum, qui statum separationis, neutrum, aut praternaturalem (qualis est circularis motus elementi ignis;) aut aliquo modo naturalem vocant.

Licet enim sententia D. Thomæ sit difficilior, ut fatetur Cajetanus, naturam tamè animæ rationalis profundius penetrat; ideoque, inquit Cajetanus, *S. Thomas ubique semper hanc tradit doctrinam, nec unquam voluit Avicenna facilitatem sectari.* Docet verò Avicenna utrumque animæ statum esse naturalem successivè: sicuti homini naturale est, primum in utero concipi, deinde nasci, postremò extra uterum vivere.

Cajet. 1. p.  
q. 89. a. 1.  
Avicen.  
lib. 9.  
Metaph.

Sed statum separationis esse contra naturam, conformius est Concilio Viennensi, quod decernit *Animam rationalem verè, per se, & essentialiter formam corporis esse.* Si enim illi ut sic, sive secundum præcisum rationalitatis gradum (qui Concilij sensus esse debet; nam quin secundum inferiores gradus, forma corporis esset, nemo ambigebat) per se & essentialiter competit esse formam corporis; profectò naturale est corpori conjungi, & cum abruptitur à corpore, naturalis quædam ejus proprietas destruitur, sub cujus merâ privatione extra corpus manet; non autem ad

aliam proprietatem æquè naturalem successivè transitur: sicut (quæ est Avicennæ similitudo) quando à conceptione pueri in utero, ad partum, & deinde ad vitam extra uterum gradatim ascenditur.

Si denique status animæ extra corpus est secundum naturam, nulla jam ratio naturalis adversus Platonem & Origenem satis valida est; cur animæ nostræ ante corpora, in statu suo naturali, ac velut in aëre serenissimo, extra omnium phantasmatum nebulas, creatæ non sint; & deinde in corpora, tanquam in tenebrosos carceres, contra naturam detrusæ.

S. Hieron.  
lib. contra  
Jo. Ierosol.

Vnde S. Hieronymus adversus Origenistas disputans, ante omnia destruit statum animæ naturalem extra corpus, per argumentum ab absurdo, quod inde sequeretur.

*Si enim, inquit, naturale est anima esse sine corpore, ergo contra naturam est esse in corpore. Si contra naturam est esse in corpore, ergo resurrectio corporis contra naturam erit. Sed non fiet resurrectio contra naturam. Ergo iuxta sententiam vestram, corpus quod contra naturam est resurgens, animam non habebit.* Vbi etiam cernis, S. Hieronymum, nullum in hac materiâ statum medium inter secundum naturam, & contra naturam agnoscere; sed immediate inferre, statum in corpore futurum contra naturam, si status extra corpus sit naturalis, ut credebant Origenes & Platonici.

Atque hæcenus de appetitu naturali animæ, qui nihil est aliud, quàm passiva aptitudo ad unionem cum corpore, locuti sumus. Appetitu verò elicitò, anima separata statum istum separationis, quantumvis contra naturam sit, præferre potest redditui ad corpus mortale quod aggravat animam. Tot enim miseriarum torrentes, quæ ex vitiatâ peccato primi hominis origine, corpus nostrum incurrerunt, sufficere possunt, ut anima malit sub dio, ut sic dicam, permanere, quàm domum adeò incommodam subire. Vt enim rectè olim Theophrastus: *Anima profectò multum corpori solvere debet pro usu hospitij sui.*

Verùm, si corpus immortale, quale erit in cælo, aut quale etiam in primo homine factum est, animæ proponatur, deserto



deserto, ut opinor, separationis statu, in corporis complexum, tanquam maximè connaturalem ruerit.

Imò S. Augustinus tam vehementem hunc animæ ad corpus appetitum (cum fluctu tamen dubitationis) esse credit; ut Beata anima, corpore exuta, *retardetur quodammodo, ne totâ intentione pergat in illud summum cælum* (Deum: quem tertium cælum interpretatur, ad quod S. Paulus est raptus) *quamdiu non subest corpus, cujus administratione appetitus ille conquiescat.* Quæ etiam est S. Bernardi, Haymonis, & olim S. Thomæ sententia; licet in Summa eam deseruisse videatur.

S. August.  
lib. 12.  
c. 35. Genes.  
S. Ber. ser.  
de Omnib.  
Sanct.  
Haym. c. 6.  
Apocal.  
D. Thom.  
q. 93. a. 6  
Suppl.

Sed sanè, non difficulter fortasse defendi potest. Gratia enim naturam non destruit. Est autem anima separata ens quoddam solum dimidiatum, quod cum altera sua comparte in unum tertium compositum coalescere postulat. Ex istâ verò naturâ mutilâ, ut sic dicam, & dimidiatâ emicat naturale desiderium ad corpus: quod per modum simplicis velleitatis, cum absolutâ resignatione in Dei beneplacitum, in animâ separatâ manere, ad manifestandam ejusmodi animarum imperfectionem, finit Deus.

Possè autem actûs supernaturalis fervorem remitti per actum naturalem; adeoque inter eos sympathiam intercedere, experiri videmur in actibus charitatis hujus viæ, quos aliquis boni creati permixtus amor debilitat. S. Thomas etiam 2. 2. q. 175. a. 4. ad 1. eandem sympathiam indicat; Theodor. Smilingus, contra multos recentiores, Tract. 2. de Deo d. 6. q. 9. n. 293. insigniter probat.

Interim, qui sympathiam illam inter visionem beatificam & naturale desiderium corporis, quam asserere videtur S. Augustinus, tam longè ab anima beata rejiciunt, viderint, quæ probabiliori conjecturâ explicent; quod S. Augustinus ibidem dicit: *Minimè esse dubitandum, raptam hominis à carnis sensibus mentem, & post mortem ipsam carne depositâ, & transcendens etiam similitudinibus corporalium, non sic videre posse incommutabilem substantiam, ut Sancti Angeli vident.* Sed nec in hoc plerique fortè S. Augustino credent; quidquid dicat: *Minimè esse dubitandum.*

S. August.  
lib. 12.  
c. 35.  
Genes.

## CAPUT II.

*De animæ rationalis indivisibilitate.*

**Q**ui animam rationalem, corpoream faciunt, ut Stoici & Epicurei, integraliter quoque divisibile fabricant. Idem quoque facit Tertullianus, ex historia animæ Lazari & Epulonis Luc. 16. ubi anima istius, *punitur in flamma, cruciatur in lingua, de digito felicioris implorat solatium romanis*. Et ex revelatione cujusdam ecstasticæ sororis (de hæresi Montani erat) quæ Tertulliano narraverat, se in spiritu vidisse animam teneram, & lucidam, & ærei coloris, & formâ per omnia humanâ. Dabat ergo animæ & caput, & manus, ceteraque membra humani corporis: ita ut hominis interioris (sic animam appellabat) capitellum in capite, pectusculum in pectore, corculum in corde, brachiola in brachijs, manciolæ in manibus, pediculi in pedibus hominis exterioris, sive corporis nostri, tanquam pyxidi aut vaginæ inserebantur.

Tertull.  
lib. de ani.  
ma c. 7. 9.

S. August.  
lib. 4. c. 14.  
de orig.  
Animæ.

Gemella imaginatio Vincentij Victoris, qui, ut narrat S. Augustinus, dicebat, *interiorem hominem* (id est, animam) *veluti in formâ vaginæ corporalis inclusum, & per membra exterioris hominis cucurrisse, & gelasse, ut figmentum fusile in formâ luteâ.*

Quia tamen Victor & Tertullianus, ut Christiani, animam immortalem esse dicebant, negabant in partes suas dividi posse; veluti cælum Peripateticum suis partibus integratur, in quas tamen naturaliter est indivisibile.

Si enim corpusculum animæ membratim concidi posset, sanè etiam consumi tandem ac interfici valeret.

S. August.  
lib. 10.  
c. ult.  
Genes.

Sed philosophiam istam Tertulliani, tam obesam & pinguem admirans S. Augustinus: *Quis hunc crederet, inquit, cum isto corde tam disertum esse potuisse? Sed tremenda ista sunt, non ridenda. Ad hoc enim nunquam cogeretur, si aliquid cogitare posset, quod & sit, & corpus non sit.*

Hæc autem opinio est contra fidem Christianam; quia animam



animam corporis formam esse negat. Deinde oporteret illi animæ, sive homuncioni interiori aliam adhuc secundam animulam inferere: quia ille homuncio non per materiam corpusculi sui, sed per aliud principium, materiæ infusum, vitales operationes, & præcipue intellectus & voluntatis, administrat.

Aliorum (& inter istos nobilis inter Germanos Medici Dan. Sennerti) sententia est, animam rationalem sic informare corpus, ut pars animæ partem corporis, & tota totum informet; & nihilominus sit immortalis. Breviter enim respondemus, inquit Sennertus: *Omnem formam, quæ materiam informat, eiq; unitur, & cum ea unum compositum constituit, extendi ad extensionem materiæ, & propterea totum in toto corpore, partem autem ipsius in parte esse.*

Dan. Sennert. lib. 6.  
c. 1. Epist.

## ARTICVLVS I.

*Anima rationalis est integraliter indivisibilis.*

**P**latonici & Aristotelici, quanto Stoicis & Epicureis acutiores & sapientiores, qui animæ rationalis spiritualitatem, & indivisibilitatem cernere potuerunt!

Isti verò nihil ultra sensus & imaginationem sapientes, & animam, & Deum ipsum corporeum esse statuebant. Merito igitur de Stoicis & Epicureis S. Augustinus:

*Eos iam nostrâ, inquit, ætate sic obmutuisse conspiciamus, ut vix iam in Scholis Rhetorum commemoretur tantum, quæ fuerint illorum sententia.*

S. August. Epist. 56.

Aristoteli igitur vobis mens, sive anima rationalis, æque pers, ac indivisibilis. Quod & S. Augustinus sibi certum & persuasum esse dicit. *Incorpoream esse animam, ait ad S. Hieronymum, est difficile tardioribus persuaderi potest; mihi tamen fateor esse persuasum.* Et sensum suum explicans: *Per totum quippe corpus, quod animat, inquit, non locali diffusionem, tota simul adest, nec minor in minoribus, & in maioribus maior, sed alicubi intentius (per operationem) alicubi remissius, & in omnibus tota, & in singulis*

Arist. lib. 1.  
c. 3. de Anima.  
S. August. Epist. 28.

*gulis tota est.* Hoc autem est, quod jam dicere solemus: Esse totam in toto, & totam in singulis partibus.

Hoc autem inexistendi modo evidentiùs se ostendit animæ immortalitas, & independentia ejus à materiâ. Nam materiæ coëxtendi, & non colligi per omnia membra totam, sed partem formæ parti materiæ coaptari, signum est, talem formam procumbere in materiam, & ab ea sustentari, sicut animæ brutorū, aut formæ accidentales materiales procumbunt.

Deinde, quis talium partium in animâ immortalis est usus? Certè enim vis intelligendi partibus integralibus sui subjecti non indiget. Quod probant substantiæ Angelicæ, quæ tanto intelligendi acumine pollent; & tamen partes nullas integrales habent.

Nec etiam ad informandum, & implendum suum corpus, anima partibus indiget; quia replicatione indivisibilis substantiæ suæ hoc facere potest; sicut Angelos & animam humanam, substantiæ spiritualitate, & ijs quæ talem spiritualitatem consequuntur (inter quæ est indivisibilitas substantiæ) comparat, & æquiparat tacite. Conc. Lateranense: *Deus ab initio temporis, inquit, utramque de nihilo condidit creaturam, spirituales & corporales, Angelicam videlicet & mundanam: ac deinde humanam, quasi communem, ex spiritu & corpore constitutam.*

Cap. Fir-  
miter. De  
sum. Trin.

Ecce, quomodo spiritum corpore humano indutum, nudæ creature spirituali Angelicæ faciat similem.

Tertiò, si anima rationalis per partes suas, sicut animæ brutorum, membratim coëxtenditur corpori: igitur in nutritione hominis, nova pars animæ, virtute caloris naturalis, in materia alimenti, ab anima viventis producet. Hæc autem productio tantum potest esse educativa, non creativa; ergo pars illa animæ est corruptibilis; cum è potentia materiæ sustentantis educatur.

Quartò, cum abscinditur homini brachium: vel pars animæ informans brachij materiam, interit; aut retrahit se in reliquum corpus; aut corpore absoluta vagatur.

Si interit, ergo anima immortalis non est; cujus omnes partes



partes cœsim & carptim possunt interire. Si retrahat se, & *in* S. August. lib. 4. c. 18. de orig. animæ.  
*alias corporis partes, densando se colligat*, ut Vincentio Victori placet: igitur anima proximæ partis intenditur, per accessum partis animæ, quæ erat in brachio abscisso.

Attamen formæ substantiales non intenduntur, publico ferè Philosophorum consensu. Quis enim talis intensiois usus? Simplex enim, & sine intensioe anima, modò naturalibus suis potentijs accincta sit & adjuta, ad omnium functionum suarum vitalium exercitia sufficit. An fortè quisquam expertus est actiones vitales, in corpore brachijs & cruribus mutilato, magis strenuè exerceri quàm antè; sicut experimur calorem vehementius agere, postquam ei nova accessit intensio? Non credo.

Si denique pars animæ decisa, nuda jam & sine corpore per inane vagatur; profectò, ne toto illo tempore, instar somniculosi gliris, ut S. Hieronymus loquitur, nihil agat; potentias suas spirituales, intellectum, voluntatem, & locomotricem secum deferre debet. Quomodo enim sine istis potentijs vagaretur, & loco se moveret? Vnde jam non tantum est pars animæ, sed integra anima.

Et quia non est eadem quæ mansit in reliquo corpore; erit ergo quidam velut ab ea recisus surculus. Vnde sicut ex unius arboris ramis innumeri decidi possunt surculi, qui in alias arbores adolecant; ita ex membris unius hominis recisis, novæ sine fine animæ rationales decerpi poterunt, quæ à corpore absolutæ, inter lemures, larvas, & umbras volabunt. Quæ omnia imaginationum ludibria, & ægroti veteris somnia sunt.

## ARTICVLVS II.

*Argumenta quibus animæ rationalis indivisibilitas oppugnari potest.*

**V**idemus caput hominis à corpore recisum adhuc saltitare, & mordere. Imò corpus truncum sine capite, aliquot interdum passus conficere. Nam *corpus amputato capite progredi posse, nihil est absurdi*, inquit Aristoteles. Arist. lib. 3. c. 10. de partib. Alia

Alia exempla revifere potes, quæ Lib. I. Cap. IV. Artic. III. attulimus.

Ex quibus confici videtur, animam, sicut corpus ipsum, in duas partes dividi; cum utraque corporis pars se moveat. Et unde, nisi à partibus animæ, quæ utrimque in partibus corporis manent?

Sed si caput, & truncus humani corporis seorsim adhuc vivunt; eadē potius indivisibilis anima rationalis, intercisa unionis continuitate, tantisper durat, donec exhalante calore naturali, temperies in tantum mutata sit, ut jam cadaveris, vel alia forma, in materiam illam, pulsā animā rationali, succedere debeat.

Aut certè, si eadem anima rationalis materias discontinuas informare nullo casu possit, saltus ille partium abscissarum, non ab anima, sed à spiritibus vitalibus & animalibus fiunt, qui per arterias, nervos, ceterosque corporis meatus, in illa extrema fuga tumultuantur, & corpus agitant.

Et à simili causâ, *bovis excisam linguam per totum diem palpitasse, & vervecis cor exemptum, horam amplius unam totam fluctuas-* *se* ( quorum illud Cardanus, istud se vidisse Scaliger testatur ) existimo. Etiam si enim bovis & vervecis animas, divisibiles esse fortasse sit verum; partes tamen animæ perfectorum animalium non tam diu in partibus illis avulsis permanere possunt.

Certè tamen corpus humanum capite & cerebro truncum, motu animali progredi non potest; cum imaginationis & cerebri influxu careat, qui ad motum animale est necessarius.

Sed quomodo, inquiunt, si anima spiritualis & indivisibilis est, materiæ corporali ac divisibili adsubulari & connecti valet?

Fateor hujus rei imaginatio est difficilis. Vnde S. Augustinus: *Deus incorpoream corporeamq̃, ait, naturam miris modis copulans & connectens, animantem facit.* Ac Nazianzenus: *Deus arcano & ineffabili modo, terram cum mente, & mentem cum spiritu alligat.* Attamen, sicut Angelus & Deus, quadam veluti replicatione

S. Auguſt.

lib. 22.

c. 24. Civit.

Naz. Orat.

26. n. 14.



trione totius substantiæ suæ, spatio divisibili & continuo præsentiam suam exhibere possunt; ita anima rationalis & præsentiam suam, & unâ substantialem quandam sui unionem omnibus partibus corporis quod informat, insigere potest.

An igitur, inquiunt, solis materiæ suæ punctis insigitur & unitur anima? Nequaquam: sed etiam partibus sine fine divisibilibus. Quid si enim in materiâ, nulla (quod multi probabilissimè putant) puncta indivisibilia sunt? Deinde sint sanè puncta: sed sicut puncta partibus divisibilibus immediatè copulantur, quidni & indivisibilis animæ substantia iisdem partibus uniri poterit? Nec tamen unicum in continuo situm habet, sicut puncta singula; sed per totam materiam suam, & omnia organa diffundi postulat, ut omnibus suis potentijs materialibus per organa dispositis præsens adsit, & in earum operationes influat. *Anima enim non est indivisibilis ut punctum, ait S. Thomas, habens situm in continuo: contra cuius rationem esset, in loco divisibili esse. Sed est indivisibilis per abstractionem à toto genere continui. Vnde non est contrarationem eius, si sit in aliquo divisibili toto.*

S. Tho. q. 1.  
de spir.  
creat. 2. 4.  
ad 16.

Dispositiones, enim quæ præeunt, & quasi locum unioni animæ cum materia præparant, non tantum per materiæ puncta, sed etiam per partes in infinitum divisibiles diffunduntur.

## ARTICVLVS III.

*Verius est, unionem indivisibilis animæ ad corpus divisibile, esse in partes integrantes divisibilem.*

**G**abr. Vasquez, contendens præsentiam Angeli ad spatium divisibile, esse nihilominus indivisibilem, ait hoc facile posse intelligi. Nam sicut, inquit, *modus in anima rationali, quem habet in corpore, quando illi unitur, in se est indivisibilis; sic etiam modus Angeli potest ipsum corpori divisibili unire, etiamsi in se indivisibilis sit.*

Sed profectò obscurum per æquè tenebrosum declarat. Non enim minùs obscurum est, unionem animæ ad corpus,

quàm præsentiam Angeli ad spatium, esse indivisibilem. Pro omni verò ratione, quare unionem animæ, & præsentiam Angeli neget divisibilem Vasquez, hoc adfert: *Quia extensio localis videtur esse propria corporis, & accidentis corporei; cuius capax non est substantia spiritualis.*

Atqui hoc sanè est, de quo disputamus: an capax non sit extensionis cujusdam, non corporeæ, sed spiritualis. Cum enim alia sit pars materiæ in capite, & collo, in manu, & brachio hominis, videtur etiam esse alia unio ejusdem indivisibilis animæ ad materiam manûs, & ad materiam brachij; ac proinde extensio quædam spiritualis in tali unionem, ex diversis partialibus unionibus consutâ.

Pet. Hurtad. disp. 2.  
sect. 3. de  
Anima.

Negat tamen istam diversitatem Vasquez. Et suppetias fert ei Hurtadus. Quia si unio animæ, inquit, vel accidens spirituale possit esse divisibile in partes integrales extensivas; nullum jam est argumentum, quo ex spiritualitate animæ indivisibilitatem ejus colligamus.

Sed responderi potest: spiritualitatem cum substantia strictæ entitatis (qualis est anima rationalis, & Angelus) inducere indivisibilitatem in partes integrales; quia multitudo partium integralium in tali substantia esset superflua & inutilis. Deus autem & natura abhorrent à superfluis.

In puris verò modis (quales sunt unio animæ & Angeli cum Vbi) magna partium extensivarum potest esse utilitas, imò necessitas: ut videlicet modus spiritualis, per tales partes, non tantum punctum spatij, sed spatium divisibile occupet; quod ad alium effectum, necessarium esse potest. Ut v. g. talem unionis suæ extensionem anima postulat, ut simul omnibus corporis sui organis præsens esse possit.

Vasq. supra.

Sed eâdem indivisibili, & in omnibus organis replicatâ unionem hoc fieri potest, aiunt Vasquez & Hurtadus. Et Doctores Theologos ac Philosophos nostri temporis vehementer miror, ait ille, quòd de Angelis (aut anima rationali) spiritualibus differentes, nondum corporea hac & materialia obliviscantur, & in subiecto spirituali & omnino indivisibili constituent aliquod accidens formaliter loco extensum, & ut dici solet, loco commensuratum, cujus partes



*partes inter se disita sunt, & loco distantes.*

Qua Vasquij admiratione se perstrictum sentiens Suarez: <sup>Suar. lib. 4. c. 17. de Angel.</sup> *Non erubesco, ait modestè, confiteri ingenij mei tarditatem. Nam suppositis nonnullis principijs in quibus convenimus, intelligere non valeo; quomodo esse possit talis modus ( Vbi Angelicum, vel unio animæ rationalis ) indivisibilis in ordine ad spatium, vel ad corpus; vel cur opposita divisibilitas repugnet spirituali accidenti, in subiecto spirituali existenti.*

Quæ sententia Suarij mihi quoque longè videtur verior. Nam veluti res spiritualis ( etiam strictæ entitatis ) partium integralium intensivarum capax esse potest, ut in habitibus intellectûs & voluntatis patet; ita nil vetat, quin spiritualis aliquis modus partes extensivas recipere possit. Manebit enim nihilominus spiritualis: quia spirituale, sive incorporeum vocatur; quod nec corporeæ quantitatis capax est ( qualiter materia prima ) nec à corpore ut subiecto sustentatur, sicut color, calor, & cetera accidentia corporalia.

Vbi autem Angelicum nec est capax corporeæ quantitatis, nec à corpore sustentatur, sed à subiecto spirituali. Unio etiam animæ rationalis est incorporea, sive spiritualis, si ex parte animæ tantum, ut subiecto, se teneat, & materiam corporis, ut terminum respiciat.

Si verò tam animam quam materiam proximè afficiat &  $\pi\pi\sigma\sigma\pi\pi\sigma\sigma$  adfibulat, ut loquitur Plato; sic ut non unicum tantum extremum, sed utrumque simul instar fibulæ, immediatè mordeat; tunc corporea potius dici debet, quam spiritualis. Nam absolutè à corpore, ut subiecto, pendet, licet interrim simul à subiecto spirituali etiam pendeat. Sed non ideo spiritualis dici debet. Bonum enim ( quale est esse spirituale ) oriri debet ex integra causa; malum ex singulis defectibus. Vnde si à materia prima corporea simul dependeat, non est ( simpliciter loquendo ) spiritualis, sed corporalis.

Hoc autem argumento, adversus Vasquium & Hurtadum, satis probatur non esse eandem prorsus & indivisibilem; quia aliàs, quando abscisso brachio, unio inter animam & materiam brachij substantialiter destruitur, uno ac eodem ictu,

unio

unio eadem per universum corpus sparsa destrueretur, & homo totus interiret. Quod enim substantialiter in uno loco interficitur, in omni loco cadere debet. Existentiâ enim subiecti ruente, omne ejus accidens (qualis est præsentia localis) corruere oportet.

Deinde, quando in nutritione accedit nova pars materiæ hominis, unio in omnibus partibus corporis renovari deberet. Nam unio antiqua quæ præerat, non respiciebat essentiali habitudine novam istam materiam alimenti quæ accessit, quam tamen nova hæc jam unio respicit. Si ergo eadem indivisibilis unio sit unâ cum animâ, in toto corpore replicata; alia profectò jam est in omni partibus corporis (ut in corde, cerebro &c.) quàm immediatè antè fuit; atque ita priori homine interempto, novus, ex eadem quidem animâ & corpore, sed novâ unione, gignitur.

Vasq. 1. p.  
d. 188. c. 7.

Nec verò hanc unius hominis in alium metamorphosin evitat, quod Vasquez addit: *Unionem tamen esse divisibilem eo modo, quo habitus dicitur habere divisionem, cum extenditur ad plures conclusiones; quam vocant divisionem virtuales.*

Hoc enim modo videtur ei unio animæ quæ præerat, posse sine accessione novæ partis, se extendere ad uniendam corpori partem materiæ alimenti quæ accedit.

Sed certè non potest. Nec exemplum habitûs est simile. Nam extensio ejusdem habitûs ad varias conclusiones, est effectiva, sive, per varios assensus, quos habitus nunc ad hanc, nunc ad illam conclusionem se vertendo, elicit: extensio verò unionis ad novas partes materiæ, quæ accedunt, non est effectiva, sed formalis, sitque per accessum unionis, quæ novam partem materiæ cum anima formaliter copulat.

Imò exemplum illud in Vasquium regeri potest. Sicut enim habitus non eodem actu, sed per alios & alios assensus, ad diversas conclusiones se extendit; ita unio quæ in corpore præerat, ad hanc, & ad istam materiæ alimenti accedentis partem, non per se & immediatè, sed per diversos novarum unionum quasi ramusculos se porriget.

Hanc quoque laciniam extremo hujus Articuli non ineptè possumus



possumus assuere. Scaliger ait, Aristotelem Lib. 2. de generat. animal. c. 3. *animam rationalem adeò divinam agnoscere rem, ut nefas putaverit, sine medio conjungi posse corpori corruptibili, cui illud illam conciliaret.*

Scalig.  
Exerc. 107.  
§. 20.

Subtilis Scotista Hugo Cavellus dari quoque posse animam separatam & Angelis materiam quandam spiritualem; ac S. Thomam in eandem sententiam, sed frustra, sollicitat. *Anima quippe, ait S. Thomas, unitur corpori (corruptibile utique intelligit) ut formae ejus: forma autem unitur materia absque omni medio. Per se enim competit forma, quod sit actus corporis, & non per aliquid aliud.* Igitur corpus illud spirituale & incorruptibile impediret potius, quam promoveret & adaptaret unionem animae rationalis cum corpore nostro corruptibili.

Cavell. lib.  
de anima  
q. 15.

S. Tho. lib.  
2. c. 71.  
contra  
Gent.

Deceptus autem videtur Scaliger interpretatione Aristotelis falsâ, licet primâ fronte, verisimili. Ait enim Philosophus, *Πάντος ψυχῆς δύναμις, Omnis animae potentiam videri participare aliud corpus magis divinum, quam ea quae elementa appellantur.* Mox autem subdit, divinum istud corpus esse, *πνεῦμα ἐν τῷ ἀφρόδει σπέρματι, spiritum in parte spumosa seminis.* Addit deinde, *ἀνάλογον ἔχει τῷ τῶν ἀστέρων στοιχείῳ, Analogiam & proportionem habere cum stellarum elemento.*

Arist. lib. 7.  
c. 3. de ge-  
nerat. ani-  
mal.

Loquitur ergo Philosophus, non de materiâ aliquâ spirituali, inter animam rationalem & corpus corruptibile interjectâ, sed de spiritu spumoso, corporis animalis conformatore; & simili spiritu, quo anima in suis operationibus vitalibus utitur. Vnde de omni anima, non de sola rationali loquitur. Et quia potentia animae est, quæ proximè illo instrumento utitur, ideo signanter ait, *potentiam omnis animae participare illud corpus divinum, seu caeleste.* Nec tamen dicit, esse cæli vel ætheris partem, ut multi falsò commentantur; sed *analogum* quid cum cælo, & *stellarum elemento.* Est quippe in eo spiritus calor quidam, non crassus & amburens, qualis solet esse elementaris, sed subtilis & vitalis, quali sol & sidera terram, & animantium omnium semina fecundant.

## CAPUT III.

## De animæ rationalis creatione.

**S.** Augustinus, tam sublimis, & illuminati divinitus ingenij vir, usque ad finem vitæ dubitavit: An anima rationalis, nova in singulis hominibus à solo Deo crearetur ex nihilo; An, sicut corpora posterorum Adæ ex corpore ejus, ita animæ illorum ex hujus animâ traducerentur. Sic enim via facilior ad explicandum, quomodo peccatum originale in posteros manaret, aperiri videbatur, si ab illa una anima, quæ in primo homine peccavit, animæ posterorum originem & traductionem haberent. *Illa enim anima* (inqui-

S. August.  
lib. 10. c. 15.  
Genes.

bat, & secum disputabat Augustinus) *cui quadam contagio tracta de carne peccati, si de illa prima anima peccatrice non creata est, nullo modo imputari potest. Neque enim ullo peccato, sed naturâ, quâ sic facta est, & Deo dante, carni data est. Cur alienabitur ab æterna vita, si baptizando infanti nemo subvenerit?*

*Ibid. c. 13.* Et ante: *Quid meruit anima infantis, unde illi perniciosum sit, non percepto Christiani baptismi sacramento, exire de corpore, si nec proprium aliquod peccatum commisit, nec ex illa est, qua in Adam prima peccavit?*

*Ibid. c. 11.* Et antea iterum: *Anima innocentissima est, si ex Adam propagata non est. Vnde quomodo possit justè ire in condemnationem, si de corpore, sine baptismo exierit, quisquis istam sententiam de anima tenens, potuerit demonstrare, mirandus est. Rem enim istam abditissimam esse existimabat Augustinus. Vnde infra: Hic pro sua causa quid respondere possint, qui secundum Scripturas sanctas, vel quod apud eas inveniatur, vel quod eis non adversetur, conantur asserere animas novas, non de parentibus tractas, corporibus dari, nondum me audisse, vel aspiciam legisse fateor.*

*Ibid. c. 15.*

Metuebat quippe cautissimus & prudentissimus Pater, ne Deum peccati originalis auctorem facere videretur, si diceret eum creare animas prorsus novas, & eas innocentes membris humani corporis inferere, à quibus contaminarentur. Nam ideo Pelagiani fortissimè contendebant animas parvulorum



lorum non traduci ex anima parentum, sed novas à Deo creari, ut majori verisimilitudine garrerent, impossibile esse ut peccato aliquo originis inficerentur; nisi Deum illius peccati auctorem impie vellemus constituere.

Vnde timebat Augustinus, ne si tam certò & incunctanter assereret, *Hæreticos Pelagianos adiuvaret*; qui propterea, inquit, persuadere conantur, ab omni noxa puras esse animas parvulorum; ne scilicet eadem noxa in auctorem Deum recurrat & redeat; quòd insonites animas, quibus nec lavacrum regenerationis subventurum esse præscivit, dando carni peccatrici, esse compulerit peccatrices; nullà baptismi gratiâ subventurâ, qualiberentur à damnatione perpetuâ:

S. August.  
lib. 4. c. 11.  
de orig.  
Animæ

Hinc tam sæpe Iulianus S. Augustinum, & Catholicos *Traducianos*, per ludibrium appellat: quia ad facilitatem doctrinæ peccati originis, traductioni animarum magis interdum, quàm puræ creationi favere videbantur.

Contumelioso ore Traducianos, ait ei Augustinus, vocas Cyprianum, Ambrosium, Gregorium, ceterosq; socios eorum, confitentes originale peccatum. Et fanè tamen maxima pars Occidentalium, teste S. Hieronymo, autumabant, ut quomodo corpus ex corpore, sic anima nasceretur ex anima; & simili cum brutis animantibus conditione subsisteret.

S. August.  
lib. 1. c. 7.  
Oper. im-  
perf.

S. Hieron.  
Epist. 82.

Quod profectò mirum est, si verum est, propagationem animarum ex anima Adami, propagationem peccati originis non iuvare, ut Bellarminus, & multi Scholastici affirmant. Vnica quippe ratio, cur Augustinus, & tot Patrum Occidentalium accerrima ingenia animarum traductioni, quàm creationi, proniores fuerint, erat adjutorium, quod ex ista philosophia ad expediendas peccati originis difficultates, sperabant.

Bellar.  
lib. 4. c. 11.  
de amissio.  
grat.

Vnde signum non obscurum est, veteres illos Patres aliâ viâ & modo quàm modernos quosdam Theologos, peccatum primi hominis iu posteros traduci existimasse.

Tempore S. Gregorij Magni, id est ducentis fermè post S. Augustinum annis, ista quæstio in eadem caligine & ambiguo versabatur. Nam S. Gregorius Epistola ad Secundinum: *Dulcissima mihi tua charitas sciat, quia de origine animæ inter Sanctos Patres requisitio non parva versata est; sed, utrum ipsa*

S. Gregor.  
lib. 7.  
Epist. 53.

ab Adam descenderit, an certè singulis detur, incertum remansit. Eam-  
que in hac vita insolubilem facti sunt esse questionem. Gravis enim est  
questio, nec valet ab homine comprehendì. Quia si de Adami substan-  
tiâ, anima cum carne nascitur; cur non etiam cum carne moritur? Si  
verò cum carne non nascitur, cur in ea carne, qua de Adam prolata  
est, obligata peccatis tenetur?

Ediner. in  
Vita S. An-  
sel. apud  
Surium die  
21. April.

Imò usque ad tempora S. Anselmi, hoc est Annum Chri-  
sti M. C. in Occidente durasse videtur hæc de animarum tra-  
ductione dubitatio. Nam cum paulò post moriturus S. Pater  
decumberet, dixisse scribit familiaris & convictor ejus Edi-  
nerus: Si Deus mallet me adhuc inter vos saltem tam diu manere, do-  
nec questionem, quam de anima origine, mente revolve, absolvere  
possem, gratiosus acciperem: eo quòd nescio, utrum aliquis eam, me  
defuncto, sit absoluturus.

#### ARTICULVS I.

Quenam sit illa traductio, quâ quidam Patres putave-  
runt, aut dubitaverunt, animam rationalem à pa-  
rentibus in filios traduci.

**Q**Uoniam SS. Patres passim Tertulliani nimis cras-  
sum, de animæ rationalis corporalitate, errorem re-  
jecerunt; S. Augustinus, & ceteri qui de animæ tra-  
ductione ambigui, spirituales quandam traductionem, non  
corporalem imaginabantur.

S. August.  
Epist. 157.  
ad Optat.

Dicat S. Augustinus: Illi qui animas, inquit, ex una propagari  
asserunt, quam Deus primo homini dedit, atque ita eas ex parentibus  
trahi dicunt; si Tertulliani opinionem sequuntur, profectò eas non  
spiritus, sed corpora esse contendunt, & corpulentis seminibus exoriri.  
Quo perversius quid dici potest?

Mem.  
Epist. 28.

Quia igitur S. Augustinus, alijque Orthodoxi Patres ani-  
mam rationalem incorpoream, sive spirituales, indivisibi-  
lemque ( ut veritas habet, & S. Augustinus Epistolâ ad  
S. Hieronymum fateretur ) esse credebant; non de traductione,  
ne, quæ corpulentis seminibus fieret, sed de spiritali quadam  
propa-



propagatione animæ spiritalis ab anima spiritali, tota fuit disputatio.

Hanc autem duobus modis fieri posse meditabantur.

Primo, ut sicut lucerna de lucerna accenditur, ait S. Augustinus, *S. August. Epist. 197.*  
& sine detrimento alterius alter inde ignis existit; sic anima de anima parentis fiat in prole, vel traducatur in prolem.

Alter modus, si cogitetur incorporeum semen animæ, suâ quâdam occultâ & invisibili viâ seorsum ex patre currere in matrem, cum fit conceptus in femina; vel, quod est incredibile, in semine corporis lateat.

Vt autem modi illi metaphorici traducendi, penitiùs intelligantur: quid propriè traducere, aut propagare; quid traduces, & propagines in re rusticâ sint, dicere raptim oportet.

Traduces vocantur, vitium, aut aliarum fruticum, vel arborum rami, qui de una arbore in aliam traducuntur. Vnde *validam vitam in ramos diducere censeo*, inquit Columella, & traducibus dispergere atque diradiare. Et iterum: *Cum annis & robore vitis convaluit, traduces in proximam quamque arborem mittenda.* Columell. lib. 5. c. 6.

Alius modus traductionis vocatur propagatio: cum arboris in terram depressus stolo, aut ramus sinitur fibras ac radices concipere. Deinde à matre sua abscinditur, fitque arbuscula nova ac singularis. M. Catonem audi: *Propagatio pomorum, ceterarumq; arborum sic fit. Arboribus ab terra pulli* (in arboribus enim etiam pullos, Casci illi Romani dicebant; sicut & hodie arbores in stolones & ramos pullulare aut pullulascere dicimus) *qui nati erunt, eos in terram deprimito, & extollito, uti radicem capere possint.* M. Cato lib. de rustic. c. 133.

Inde translatione factâ, semen masculi animalis, in feminam traducti & propagati, tradux & propago appellari coepit. Et animalia quæ sic generantur, per traducem aut propaginem generari dicuntur. Semen quippe est quasi pars animalis, quæ in feminæ terram depressa, in animal novum regerminat.

Metaphora deinde longius protracta est ad causas quascunque univocas, etiamsi nullum semen inter causam & effectum

effectum interjiciatur. Sic lucerna lucernam, ignis ignem dicitur per traducem & propaginem accendere: quia licet non eadem numero flamma, eadem tamen species flammæ, ab uno individuo in alterum se quasi traducit & propagat. Quando enim causalitas est univoca, sive effectus unius speciei infimæ cum sua causa, secundum castigatissimam S. Augustini phrasin, effectus *traducitur, propagatur, nascitur, & emanat* à sua causa. Quod non ita propriè dicitur, quando causa & effectus toto genere, aut specie dissident. Vnde S. Augustinus, *corpus, animam, & spiritum viri ac mulieris*, dicit, *non ex Deo nata, vel tracta esse, vel manasse, ita ut, inquit, eius natura sint.* Sic etiam animalia insecta, vel aurum in terræ visceribus à sole traduci, propagari, trahi, vel emanare non dicimus. Nec enim profectò natura solis in ejusmodi æquivocos effectus se traducit, aut propagat: etiamsi causalitate æquivocâ ab eo effici credantur.

S. August.  
lib. 1. c. 17.  
de origin.  
animæ.

Iam igitur explicemus traducem & propaginem illam animæ, quam SS. Patres Occidentis & Orientis tam celebri disputatione inter se olim ventilaverunt.

Ac in primis, quia animam rationalem esse spiritalem, simplicem, ac incorpoream nobiscum esse censebant, nulla verisimilitudine credere poterant, eodem planè modo traduci ab anima parentis, sicut corpus à corpore: quod sic traducitur, ut parens materiam seminalem subministret, quæ in membra & corpus prolis formatur. Anima quippe simplex forma est, carens membris & corpore.

Vnde traductionem animæ hominis, traductioni animæ pecoris (quia propiùs ad eam accedebat) magis comparabant, quàm traductioni corporeæ molis corporis humani.

Quomodo autem anima pecoris à parentibus traducitur?

An equus partem animæ cum semine in equam transfundit? Medici nonnulli hoc quidem asserunt, ut Lib. 1. Cap. 11. Artic. 1. narratum; sed nos cum doctioribus rejecimus. Semen enim animalis negat Aristoteles animatum esse animâ corporis à quo deceditur.

Tradux ergo animæ equinæ est genitura, sive semen in-

animum



animum, in quo vehitur vis corporis equini conformatrix, & materiam corporis ad animæ equinæ introductionem disponens; ac animam etiam fortasse pulli equini, tanquam instrumentum separatum animæ parentis, seipsam propagantis, producens: sub Omnipotentī tamen Dei manu, virtutem illam seminalem (sive hæc forma substantialis spiritūs seminis sit, sive facultas aliqua accidentalis) ad productionem animæ equinæ elevantis.

An simili igitur aliquā ratione, anima rationalis à parentibus in prolem propagaretur, inter SS. Patres non immerito dubitatum est.

Cujus enim, quæso, contradictionis, aut insignis absurditatis manifestus erit, qui animam rationalem, quantumvis immortalem, dicet *ex traduce, iuxta bruta animalia, ut quomodo corpus ex corpore, sic animam ex anima generari?*

S. Hieron.  
Epist. 61.  
c. 6.

Nonne enim nec pauci hodie Philosophi, Theologique docent, Deum, sine ulla contradictionis implicantia, posse in creatione animæ rationalis, vel Angeli, creati instrumento uti? Sit ergo fortasse semen aliquod spiritale (hoc est virtus quædam spiritalis) ab anima parentis productum in materia seminis, unā cum virtute conformatrice & temperatrice humani corporis. Semen verò illud spiritale talis forte naturæ esse poterit, ut à manu creantis Dei eousque elevari possit, ut animæ rationalis creationem, unā cum Dei Omnipotentia instrumentaliter valeat attingere.

Aut certè (sine ullā talis virtutis spiritalis fictione) ipsa fortè vis formatrix & temperatrix humani corporis, ubi officio suo circa corpus functa fuerit, apta & sufficiens etiam erit, ut ad creationem animæ assumi valeat & attolli.

Est enim nobilior & excelsior virtute conformatrice & temperatrice pecorini corporis. Ideoque fortasse non valde mirum, si ut instrumentum Dei, sub manu ejus, ad productionem substantiæ spiritalis, & à materia independentis, possit cooperari. Multi enim credunt saltem unionem animæ (quam modum substantialem spiritualem esse putant) à virtute corporei seminis instrumentaliter physice attingi. Phantasma

tasma quoque corporeum, à plurimis existimatur concursum quendam physicum spiritalem, ad speciei intelligibilis, cum intellectu agente, generationem conferre.

Quæ à me dicuntur & cumulantur, ut ostendam, non tam longè & absurdè extra rationalis Philosophiæ oleas ivisse illos Patres, qui animam humanam, instar pecorinæ, propagari olim crediderunt, ex humani seminis traduce. Interim tamen etiam à Deo creari dicebant: quia *creare*, aut *condere*, SS. Patres solum tribuere solent causæ principalissimæ, quæ nullius superioris concursu & adiutorio indiget. Vnde negant causas secundas physicas suos effectus creare, sed hoc tribuunt soli Deo. Nec accipiunt verbum *creandi*, tam stricte, quàm Philosophi hodie; qui creationem distinguunt ab actione educitiva, qua aliquid dependenter à materia producitur.

Vnde SS. Patres Deum Creatoris officio fungi, & creare etiam dicunt, quando quippiam actione educitiva facit. *Deus enim creat hominem, quem homo generat*, S. Augustini phrasi.

Idem  
Epist. 157.

Idem lib. 1.  
c. 14. de  
orig. ani-  
mæ.

Notanda etiam ( ne Philosophi hodie aliter loquentes decipiantur ) altera hæc S. Augustini phrasis: *Queritur*, inquit, *an Deus nova quidem corpora faciat ex uno, animas verò novas ex nihilo*. Item alibi: *Querendum est, anima hominis unde ab illo efficiatur, à quo efficiente donatur: Vtrum ex parentibus, an ex nihilo*. Vbi, *ex nihilo*, non tantum significat, Ex nulla causa secunda materiali; sed generalius, Ex nulla causa secunda etiam efficiente; qualis esset vis aliqua seminalis, qua Deus ut instrumento uteretur in creatione animæ.

Lib. 10.  
c. 15. de  
Genes.  
Ibid. c. 21.

Nam in tota hac de origine animæ quæstione, opponit, *Create ex nihilo*, & *Create ex parentum traduce, aut propagine*. Opponit quoque inter se, *Animas novas*, & *Animas de parentibus tractas*. Denique *Animam quæ ex parentibus, & quæ de super sit*.

Si enim Deus immediatè & solus eas creet, sunt *desuper*; quia nullam causam coëfficientem hîc inferius reperiunt; qualem habent animæ brutorum, quæ ex traduce & propagatione parentum, à Deo fiunt.

Sunt



Sunt etiam speciali modo *nova*, interprete eodem Augustino: *quia nulla earum ratio causalis præcessit in primis illis sex dierum operibus Dei.* Ibid. c. 3.

Si verò ab una anima Adami tunc creatâ ceteræ per propagationem jam fluunt, censentur veteres, ab initio conditi Orbis in sua causa productæ, & Adamo, in illa una anima, insufflata. Hinc illud sæpe repetitum: *Dicuntur anima nova nascantibus insufflari* ( sicut nempe prima anima corpori luteo insufflata est; ) *non de parentibus trahi.* Trahi, inquam, sine tamen diminutione: sicut *ignis lucerna integer manet, cum de illa altera accenditur.* S. August. lib. 1. c. 19, de orig. animæ. Ibid. lib. 3. c. 4.

Verum quid ista animarum ab una propagatio facilitatem fluxûs peccati originis in posteros adjuvaret? interrogant Scholastici quidam, admirantes S. Augustini & Patrum Occidentis, hac in quæstione imaginationem.

Sed profectò adjuvat plurimum. Facilius enim intelligitur, qua ratione labes illa, non tantum corpora, sed etiam animas posterorum inficiat, si ipsæ animæ ab anima primi hominis peccatrice, proximâ, vel remorâ origine defluant, aut sicut flamma lucernæ posterior à priore, accendantur. Hòc enim modo, animæ posterorum in illâ unâ, ut causâ efficiente, & seipsam usque ad ipsas propagante, continebuntur, ac ipsæmet in illâ suâ causâ peccaverint.

Solet enim S. Augustinus peccati originalis propagationem, quæ per omnes Adæ posteros, fluxu naturalis generationis transit, exemplo hereditariorum morborum qui à parentibus in filios vulgantur, explicare; non autem, ut multi Recentiores, virtute alicujus pacti cum Adamo initi, cujus vinculo etiam constringi possent qui ab eo non essent geniti.

Nec refert ( quod quidam objectant ) animam parentis non posse trajicere morbum originale in filij animam, si parens baptizatus, ab eo morbo sanatus sit.

Nam licet baptizati anima malo illo, quod est quasi formale in peccato originali, careat; causam tamen morbi, quæ est concupiscentia, & quædam animæ ad res terrenas depressio, adhuc retinet: quæ causa si in animam filij trajiciatur,

L I I I I

formale

formale peccati originalis in ipsa quodammodo resultabit; licet eo tempore in parente esse desisset. Sic pater à podagra sanatus, podagrosus tamen filium generat, quia podagræ causas in semine adhuc hærentes, in filij sui temperiem transfundit.

S. August.  
Epist. 157.

Si tamen animæ à Deo solo, sine traductione, immediate creantur, species cujusdam injustitiæ se statim ingerit; quasi animæ innocentes, quæ nec in seipsis, nec in suis causis quidquam mali designarunt, corporibus infectis concludantur, à quibus labem & tabem contrahant. *Si enim anima nostra nullam de illa peccatrice originem ducit*, ait S. Augustinus, *qua causa est anima subeundi originale peccatum? Nec enim Deus cogit inson-tem; quia peccati auctor non est: nec ulla mali natura; quia non est.*

## ARTICVLVS II.

*Anima rationalis non traducitur à parentibus, sed à Deo solo creatur.*

**P**atrum Orientis, S. Hieronymo teste, sententia fuit, animam filij non ab anima parentis traduci, sed interci-  
so propagationis (qualis inter pecudum animas est) filo, immediate à Deo creari.

Epist. 28.  
ad Hieron.

Hæc quoque S. Hieronymi inter Occidentales, opinio erat. Vnde S. Augustinus ad eum: *Licet*, inquit, *nemo faciat optando, ut verum sit quod verum non est; tamen si fieri posset, optarem ut hac sententia vera esset. Sicut opto, ut si vera est, abs te liqui- dissimè atque invictissimè defendatur.*

Epist. 157.

Et de eadem sententia, ad Optatum: *Id quod ille (Hieronymus) sentit, promptissimè ac libentissimè defensurus sum, si me docere potuerit: quomodo anima non ex Adam veniant, & tamen ex illo iustam sortem damnationis invenient, nisi ad remissionem peccatorum renascendo perveniant.*

Et si igitur inter utramque sententiam ambiguus esset Augustinus; pronior tamen in eam erat, quæ animas novas quotidie creari, & corporibus inspirari, non à parentum animâ tradi-  
duci,



duci, affirmabat; nisi iustitiæ Dei, animas à se creatas & corporibus labe originis infectis inclusas, damnantis, indignum aliquid metuisset.

Nunc tamen res ista satis ab Ecclesia censetur esse determinata, aut indicata, in Conc. Lateranensi sub Leon. X. Vbi anima humana immortalis, & pro corporum quibus infunditur, multitudinem singulariter multiplicabilis, dicitur. Si enim infunditur, ergo foris venit, ut loquitur Aristoteles, non intus ex parentum traduce semine fabricatur.

Conc. Lateran. sess. 8.

Arist. lib. 2. c. 3. de generat. animal.

S. Hieron. Eccle. 12.

S. Hieronymus tractans illud Ecclesiastæ 12. Revertatur pulvis in terram suam, unde erat, & spiritus redeat ad Deum, qui dedit illum: ait Manifestum esse, Deum patrem animarum esse, non homines. Ex quo satis ridendi sunt, inquit, qui putant animas cum corporibus feri, & non à Deo, sed à corporum parentibus generari.

Verum S. Augustini ingenio locus iste minimè satisfecit, etiam si ex eo satis ridendos, qui animas cum corporibus feri putant, S. Hieronymus dixerit.

S. August. Epist. 157.

Nam facillimè respondetur, ait subtilis Augustinus: Corpus in terrâ de qua factum est primum hominis corpus, & spiritus ad Deum, à quo facta est prima hominis anima, reverti. Sicut enim nostrum corpus, inquit (animarum Traduces) quamvis ex primo illo corpore propagatum sit, eo tamen redit, unde ipsum primum corpus effectum est: sic anima nostra quamvis ex illâ animâ propagata, non ad nihilum, quia immortalis est, sed ad illum redit, à quo prima anima facta est.

Alios quoque Scripturæ locos ab Hieronymo objectos, verisimili aliâ interpretatione sic declinat Augustinus, ut translationem animæ non validè feriant. Vnde fidenter dicit, se aliquid certum de anima origine nondum in Scripturis Canonicis comperisse.

Et hinc vereor, ne loci illi, quos tam splendida claritatis adversus animarum Traduces, Beza existimat: Fortissime Deus spirituum: Deus fingens spiritum hominis in eo: Pater spirituum &c. facillimè etiam ab Augustino aliorum valeant exponi. Vtrum enim, inquit, cum Deus fingit, ex alioingat, an ex nihilo, incertum est. Idem respondet, cum appellatur Deus, sive Creator, aut Pater spirituum. Nam Deus phrasi Scripturæ, vocatur Creator omnium

Num. 16. Zachar. 12. Hebræ. 12. S. August. Epist. 157.

nium quæ facit; etiamsi actione generativa & ex aliqua materia, aut cum aliqua alia causa secunda aliquid faciat: propter scilicet sublimissimum, & profundissimum agendi modum, quo in omnium effectuum existentias necessariò penetrare debet, ut à causis secundis è nihilo suo extrahi valeant. Vnde non tantum animarum nostrarum, sed etiam corporum, S. Hieronymo etiam teste, Creator appellatur. *In generatione hominum, inquit, recipit terra, id est vulva, quod suum est, & receptum conforvet, confortum corporat, corporatum in membra distinguit. Et inter illas secretas ventris angustias, Dei manus semper operatur, idemque est corporis, & animæ Creator.*

Sed licet Traductores animarum, ex Scripturis obrui, sine rixa, nequeant, imò tela etiam, quibus se in speciem defendent, inde rapere possint; Ecclesia tamen jam dudum in S. Hieronymi & Patrum Orientalium, toto agmine discessit sententiam; favente Aristotelis & Platonis philosophiâ.

Nam vis seminalis, quæ humani foetus materiam conformat & temperat, non potest (nisi fortè maximo & supernaturali miraculo) animam rationalem immortalem, & per se subsistentem, naturali causalitate, etiam instrumentaliter & sub Dei principaliter operantis manu, attingere.

S. Hieron.  
Epist. 61.  
c. 6.

D. Thom.  
lib. 2. c. 86.  
contra  
Gent.

Idem 1. p.  
q. 118. a. 2.

Modus enim agendi causæ efficientis, ex modo effendi fuit. Vnde sicut virtus illa seminalis semini, ut subjecto inhæret, & ab eo sustentatur; ita nullam connaturaliter formam, nisi subjecto inhærentem, ac per actionem educivam, producere potest. Cum igitur anima rationalis è potentia materiæ non educatur, nec ab ea dependeat, sed per se stet, à virtute seminali effici non potest. Si enim posset, à materia sustentaretur, & tam mortalis, quàm animæ brutorum, esset. Et hac ratione, & sensu D. Thomas pronunciavit, *Hereticum esse dicere, quòd anima intellectiva traducatur cum semine.* Hòc enim modo traduci, nihil est aliud, quàm dicere mortalem, instar animæ equi & muli, in quibus non est intellectus. Sed de tali traductione, nullus fluctus, nullum dubium S. Augustino fuit; qui omnibus suis dubitationibus, animæ humanæ immortalitatem semper supposuit.

Si



Si autem intercoisâ omni propagine, anima à solo Deo creetur, sicut veritas habet, quomodo tamen originali labe infici posset, declarat adversus Iulianum S. Augustinus. *Profecto, inquit, aut utrumque ( corpus & anima ) vitiatum ex homine trahitur, aut alterum ( anima ) in altero ( corpore ) tanquam in vitiato vase, corrumpitur.* Ita videlicet, ut labe corporis, in animam ei infusam, refundatur. S. August. lib. 5. c. 4. contra Iul.

Hoc egregiè dicit Auctor Libri de spiritu & anima, qui non Augustinus, sed tamen doctrinâ Augustinianus est. *Parvulus, ait, habent originale peccatum non per animam, sed per carnem, utique contractum, animaque refusum.* Quid ita? Quomodo potest anima spiritualis à carne corporali sic infici? *Carni namque, inquit, ita unitur anima, ut cum carne sit una persona.* Quia enim anima est forma incompleta, & dimidiata tantum, naturâ suâ unionem arctissimam cum corpore, tanquam altero integri hominis dimidio, flagitat, & in ens per se unum unamque personam cum eo coalescit. Dicat iterum ille Auctor: *Auctore Deo fit, ait, caro & anima unum individuum, unus homo.* Unde salvâ naturâ utriusque proprietate, adjicitur carni quod anima est, & animæ quod carnis est, pro unitate persona, non pro diversitate nature. Lib. de spir. & anima. c. 4. Ibid.

Propter ergo illam naturæ utriusque incomplectionem, & arctam unionem, ita concresecunt in unum, ut mutuas proprietates sibi communicent, & per carnem, ut ait S. Augustinus, anima fiat carnalis. S. August. lib. 1. c. 33. de nupt.

Aut, ut apertius, ac sine ullo verborum involucro res eadem dicatur.

Quia anima nostra est naturaliter forma informans sui corporis, eademque à parte rei cum gradu vegetativo & sensitivo, quorum operationes corporales sunt, & per organa corporea exercentur; ideo supremus animæ apex, qui mens dicitur, & intellectum voluntatemque comprehendit, deorsum cum gradibus illis inferioribus, in carnem deprimitur, fitque quasi caro & sanguis; nisi Conditor eum releveret, & graduum inferiorum pondera suspendat: quemadmodum in prima hominis creatione factum est. Aliàs enim gratiâ divinâ

S. August.  
lib. 2. c. 8.  
de nupt.  
2. Pet. 2.

*non subveniente, quid sunt homines, inquit S. Augustinus; nisi quod ait Apostolus Petrus, Velut muta animalia, procreata naturaliter in captivitatem & interitum?*

Idem lib.  
contra Se.  
cund. c. 11.  
Psalm. 2.

Tam altè enim mens nostra, quæ animæ caput est, intra carnem & corpus suum affectu demergitur, ut *defectivo appetitu quodammodo corporascit*. Vnde divinus Psalter merito clamat ad Dominum: *Domine gloria mea, & exaltans caput meum*, id est, *spiritum meum*, ait Augustinus, *quod est caput anima & carnis*.

Itaque sicut decebat, ut anima primi hominis, quæ corpori tam erecto, & affabre harmoniceque, divini figuli arte formato institutoque, primum inspirabatur; gratia etiam suâ erigeretur ornareturque, ne à habitaculo suo abnormis esset, & incola vilis palatio veluti regio intruderetur: ita, ubi peccato illius primi hominis, dissoluta est harmonia primævi corporis, & posteros corpore sibi similes jam homo generat, congruebat, ut anima quoque, dono primæ gratiæ nudata & deformis, deformi corpori, in visceribus maternis, inspiraretur.

Nuditatem istam gratiæ, quæ instar calvitiei cujusdam, caput animæ deformat, est id quod in peccato originali, formale appellatur: materiale verò est concupiscentia habitua-  
lis, sive temperamentum bestiale & infrene, quod appetitum animæ inferiorem, in voluptates carnis & terrenas, excusso rationis freno, abripit, & ea quæ non oportet, concupiscere facit.

S. August.  
lib. 11.  
c. 32. de  
Genes.

Dicit autem S. Augustinus peccatum originis, naturali generatione transfundi in liberos; quia cum humano semine directè transfunditur quod materiale est peccati originalis: hoc est, temperamentum illud pecorinum & infrene (*est enim morbida & mortifera qualitas, quæ etiam pecorum carni inest*) quod primò appetitum inferiorem, animæ prolis deinde ex consequenti, superiorem in res terrenas inclinat, & à divinis avertit. Ac ex ista aversione, in parte superiore animæ resultat formale peccati originalis, quod animulam à primæ Adami animæ origine discordem, & Deo odibilem facit.

Nec refert, quod anima parentis animam filij, sicut flamma una candelæ alteram flammam, physica efficientiâ non pro-



propaget ac traducat, sed anima filij à Deo solo, ut à physicâ causâ creetur. Non enim idcirco Deo imputari debet peccatum originis, & conspurcatio animæ in vase impuro vitiati corporis. Lex quippe naturæ statuta est, ut corpori, virtute humani seminis sic conformato, & temperato anima infundatur. Et quia à nullo agente secundo, propter suam excellentiam, sed à Deo solo creari potest; non tenetur Deus naturæ legem infringere, & creatione animæ abstinere, ne ipsa spurci corporis in se contagium rapiat. Quemadmodum etiam nullo æternæ suæ sapientiæ dictamine prohibetur, ne causis secundis, ad malè agendum paratis, concursus generalem adjungat.

Denique si res illa ex propinquo & attentè inspiciatur, quandam hîc animæ prolis ab anima parentis translationem, si non physicam, moralem tamen (ut Philosophi hodie loquuntur) videbimus.

Nam eo ipso, quo anima parentum semen præparat, fermentat, digerit, & in membra, temperiemque humanam conformat, morali quoque causalitate animam prolis propagat; quia Dei Omnipotentiam ad creandum invitat & determinat. Imò philosophiâ etiam multorum probabili, unionem animæ à Deo creatæ, physicè producit, & corpus animamque confibulat. Sic anima Caini, & Sethi ab anima primi parentis Adami, morali propaginis traduce fluxit, & inde simili translationis flumine, ad nos usque defluxit.

## ARTICVLVS III.

*Philosophi quidam Gentiles, solo ratiocinationis ductu, arbitrati sunt animam humanam aliter olim à Deo creatam, quam in hoc ærumnoso & mortali corpore.*

**P**hilosophi ingenio, & rerum divinarum sapientiâ sublimiores, quales Platonici, alienum à divina providentia, bonitate & iustitia existimaverunt, animas humanas à manibus Dei creantis recentes, illicò mortalibus corporibus,

ribus, sine ulla sua culpa, includi. Crediderunt ergo nudas seorsim à corporibus, inter sidera olim creatas, & pro malis vitæ superioris meritis, intra corpora hæc ærumboſa detru-di. Vnde & quæ corpus dictum eſſe, quaſi & ſepulchrum puta-bat Plato: in quo corpore velut mortuo & putreſcente, anima foret ſepulta, & una computreſceret.

Hanc verò animæ depravationem, à materia, & malignis corporis qualitatibus fieri dicebant.

Ennead. 1.  
lib. 8. c. 5.  
Plot.

Hinc ſententiam Plotini, principis inter ævi ſui Platonicoſ, enarraſis Maſſil. Picinus: *Concludit Plotinus*, ait, *animam non eſſe mali principium; quia non eſt natura mala, cum intellectualis natura ſit, & intellectus ſit ipſi bono quàm proximus. Quippe cum ad ipſam bonum ( quod Deus eſt ) & intellectus proximè, & per in-tellectum anima convertatur.* Vnde igitur in malitiam iſtam de-pravatur? Dicit mox: *Quatenus, inquit, ad materiam & materia-le quiddam afficitur. Ex quo animus latenter avertitur à Deo; dum ſcilicet convertitur ad oppoſitum.* Ac infra: *Quamvis*, ait, *anima natura divina ſit; quia tamen eſt proxima naturalibus, ſenſim malum admittit, quia nimium inſit cura natura inferiori commercium.*

Galen. lib.  
Quodd mo-  
res anima  
temperam.  
corpor.  
ſeq.

Vnde verò hoc eveniat, ut anima tam nobilis & ſpiritualis, in illud cum corpore ſuo & rebus corporalibus commercium adeò inclinata ſit, Galenus ex Platonis & Hippocratis ſui ſententia exponit: *Hippocrates voluit, non ſolum irascibilis appeti-tivæq; partis anima, ait, ſed etiam cogitatricis vires & facultates corporis temperatura adherere, atque illam omnino ſequi.* Nec ſecus Plato, ex terra diverſis habitationibus, ex vario ſpiritu, & inſo-lationibus: ac denique ex varietate nutrimentorum, non ſolum ipſo-rum corporum, ſed animorum etiam proſicitur naſci diverſitates, tem-peramento ipſo interveniente.

Galen. ibid.

Ac de eodem Platone: *Ex vitioſo corporis habitu, ait, languere animam, ac neminem ſponte eſſe malum, ſed ob pravam habitudinem corporis, ac rudem educationem, & proinde non debere turpia vitu-perari, proſeſſus eſt Plato in Timæo.*

S. Auguſt.  
lib. 10 c. 17.  
de Genel.

Quod S. Auguſtini doctrinæ aſſidet, ubi illud Sap. 9. *Sortitus ſum animam in bonam verſans: Vnde bona aut magis bona ſeu non bona vel minus bona anima, niſi vel moribus ſecundum liberum voluntatis*



voluntatis arbitrium, vel differentiâ temperatura corporum; dum alia magis, alia minus gravantur corpore, quod corrumpit & aggravat animam? Ac deinde: Sortitus sum animam bonam, videlicet ex paterno ingenio, vel corporali temperamento. Nam sicut quidam parentes (ut ebriosi, aut Venerei &c.) aggravant originale peccatum, ait S. Prosper, ita quidam (temperantes) relevant; sed nullus tollit, nisi ille de quo dictum est, Ecce Agnus Dei &c.

S. Prosp.  
Sent. 306.

In eo tamen erroris compertus Plato, quod negavit, Galeno teste, turpia debere vituperari: quia licet concupiscentia, temperamento corporis deprimente, voluntatem ad turpia inclinet, non tamen cogit, nec libertatem ejus ita præcipitat, ut interimat.

Ex quibus probabilissimè etiam colliges, vitium illud originale, quod inest carnali parentum semini, & cujus contagio ex carne peccati, anima obruitur, cum membris inseritur, quæque etiam peccorum carni inest, non aliud esse, quàm bestiale & infrene quoddam corporis humani temperamentum: quod ita animam aggravat, & mentem in appetitum inferiorem, rerumque terrenarum affectus deprimit; ut miser Galenus animam humanam esse mortalem, ac aliud nihil, quàm corporis temperamentum, suspicari se dicat.

S. August.  
lib. 6. c. 4.  
contra Iul.  
Lib. 10.  
c. 16. lib. 11.  
c. 32. de  
Genes.

Galen. lib.  
Quod ani-  
mi moris  
&c.

Aristoteles verò, qui animam immortalem, nec ante corpus creatam existimavit, vehementer istam nobilissimæ animæ conjunctionem cum carne tam vitiosè temperatâ miratus est, nesciens, unde hoc carnis vitium duceret originem. Vnde ex Ciceronis Hortensio refert S. Augustinus, Aristotelem dixisse (ethi in Libris ejus, qui hodie exstant, minimè reperiatur) Simili nos affectos esse supplicio, atque eos qui quondam, cum in prædonum Hetruscorum manus incidissent, crudelitate excogitatâ necabantur: quorum corpora viva cum mortuis, adversa adversis accommodata quàm aptissimè colligabantur. Sic nostros animos cum corporibus copulatos, ut vivos cum mortuis esse coniunctos.

S. August.  
Lib. 4. c. 15  
contra Iul.

Quam crudelitatem in Mezentio Hetruscorum Rege depingens Virgilius, ait:

Mortua quin etiam jungebat corpora vivos,  
Componens manibusq; manus, atque oribus ora.

Virgil.  
Æneid. 3.

M m m m m

Tormenti

*Tormentigenus. Et sanie taboq̃ue fluenti,*  
*Complexu in misero, longâ sic morte necabat.*

Apta sane comparatio. Sicut enim Mezentius, & alij Hetrusci tyranni, aut latrones, homines vivos ventribus adversis, mortuorum cadaveribus superligabant, ut unâ computrescerent; ita anima humana, corpori sub, per peccatum primi hominis tabefacto, superfusa & colligata, simul cum eo contabescit, & in terrenos affectus *computrescit, ut iumentum in stercore suo.*

Ioël. 1.

S. Auguſt.  
lib. 6. c. 8.  
contra Iul.

Vnde illi Philosophi Pelagianis multo sapientiores fuerunt: cum vel aliquod vitæ superioris peccatum, ut Plato, vel occultam aliam, quam ignorare se fatebantur, causam subesse, ut Aristoteles, existimaverunt; quare Deus tam nobilem animæ humanæ substantiam corpori tam iniquo & adverso illigasset. Neque enim *nulla iniquitas est*, ait S. Augustinus, *cum in uno homine vel superiora inferioribus turpiter serviunt, vel inferiora superioribus contumaciter reluctantur; etiamsi vincere non sinantur.* Pelagiani verò hoc sine ullius prioris peccati, saltem originalis, merito, evenire pertinaciter contendebant. Cum tamen considerando divinam providentiam, ait D. Thomas, & dignitatem superioris partis humanæ, satis probabiliter probari possit; huiusmodi defectus esse pœnales. Et sic colligi possit, humanum genus peccato aliquo originaliter esse infectum.

D. Tho.  
lib. 4. c. 52.  
contra  
Gent.

#### CAPUT IV.

*De Intellectu, supremâ animæ rationalis potentiâ.*

**I**N supremo humanæ mentis apice, & veluti capite, est intellectus, tanquam spiritalis quidam oculus, quo sursum, & undique in orbem anima nostra rerum universitatem circumspectat.

Arist. lib. 3.  
c. 4. de  
anima.

Quia verò Aristoteles negabat Platoni, animas ante corpora creatas, & ideis ac speciebus intelligibilibus à Deo signatas, in carceres corporum suorum demitti; sed intellectum animæ recens in visceribus maternis creatæ, esse *instar tabulae*

raſa,  
appo  
scrib  
ceſt, qu  
potest  
Itaqu  
ligibil  
relle  
lumen  
viſibil

I Ne  
vulg  
cies  
pic ac p  
intellect  
ſolus vit  
rellectu  
actione  
à tali act  
niſter in  
cans & n  
paſſibili  
D. Th  
noſtra  
diverſa  
ra obire  
te diſtin  
& piſtor  
intellect  
lis. Ille  
ſuas intel  
Io. Ma



*rasa, cui nihil actu inscriptum est; idcirco debuit illi tabulæ apponi aliqua manus, quæ speciebus intelligibilibus eam conscriberet, sine quibus non magis intelligere quidquam potest, quàm pupilla, aut tunica retina oculi, sine specie visibili potest videre.*

Itaque excogitatus est intellectus agens, specierum intelligibilium inscriptor, quique respectu oculi animæ, sive intellectus passibilis, tali officio fungeretur, quale colores & lumen externum oculo corporis præstant, quando speciebus visibilibus ad visionem necessarijs illum depingunt.

## ARTICVLVS I.

*Quid intellectus agens, & ejus officia.*

**I**ntellectum duplicem facit Aristoteles, passibilem (quem vulgò possibilem appellant) & agentem. Passibilis species intelligibiles, ab intellectu agente sibi impressas recipit ac patitur; & deinde ijs in intelligendo utitur. Solus enim intellectus passibilis propriè est potentia intellectiva; cum solus vitales intelligendi actus eliciat, & in se recipiat: intellectus verò agens species intelligibiles tantum efficiat, & actione transeunte eas in intellectum passibilem trajiciat. Et à tali actione, intellectus agens appellatur. Est enim quasi minister intellectus passibilis, intellectus instrumenta ei fabricans & ministrans. Sub iudice tamen lis est: An ab intellectu passibili reapse distinctus sit.

D. Thomas tamen, & plures distinguunt: quia familia animæ nostræ, ut sic dicam, bellior & concinnior erit, si in eâ tam diversa officia deputentur distinctis ministris, non unus plura obire debeat. In artibus quoque, subalterna à subalternante distingui solet; nec in civitate rectè instituta, idem molitor & pistor, typopœus & typographus esse solet. Opus autem intellectus agentis est subalternum operi intellectus passibilis. Ille enim huic fabricat & ingerit typos, quibus vitales suas intellectiones in tabula mentis suas efformet.

Io. Major tamen & Nominales aperta falsitatis revinci

non possunt, qui in eandem animæ potentiam, intellectus agentis & passibilis officia confundunt.

Sed de Nominalibus nihil mitum, qui nec intellectum passibile, nec voluntatem, nec ullam omnino potentiam vitalem ab anima reipsa distinguunt: homines nominum divites, rerum pauperrimi. Imò, qui Thomistas, aliosque realium distinctionum paulò liberaliores, quasi per ludibrium, Reales vocare solent.

Sed quare, inquit, idem intellectus non potest species intelligibiles sibi imprimere, & ipsidem, intelligendo, uti?

Res non est tanti. Sibi hoc habeant, si pertinaciter retinere velint. Philosophi verò quidam, & maximè Arabes, Deum intellectus agentis officium erga hominum animas exercere jubent. Cum enim ipse sit Intellectus agens Angelorum, quibus species intelligibiles infundit; cur non & idem animabus nostris præstare velit?

Sed inter animas humanas, & Angelos manifestum est discrimen.

Nam anima est forma corporis, speciesque suas ad intelligendum necessarias, per sensuum fenestras in intellectum rapere debet; adeo, ut vulgato Aristotelis axioma, Nihil dicatur esse in intellectu, quin prius aliquo modo fuerit in sensu. Angeli verò incorporei non illà viâ species attrahere possunt, sed à Deo Creatore, tanquam Intellectu ipsorum agente, accipere debent. Vnde etiam puriores, sincerioresque sunt eorum species, nullo phantasmatum fumo infuscatæ; quemadmodum species intelligibiles humanæ.

Intellectus autem nostri agentis varia assignantur officia. Primum est, illuminare phantasmata. Vnde Aristoteles vocat intellectum agentem, *ὁ γὰρ τὸ φῶς similem lumini*. Sicut enim sol illuminans medium, & colores, facit, ut color species suas effundat in oculos, ita intellectus agens phantasmati assistens, est causa principalis, cur phantasma, tanquam intellectus agentis instrumentum, vires accipiat imprimendi speciem intelligibile rei sensibilis in intellectum passibilem. Non autem imaginandum est, ut rectè monet Cajetanus, quod ab intellectu agente

Arist. lib. 3.  
c. 3. de  
Anima.

Cajet. 1. p.  
q. 79. a. 3.

agente



agente fluat aliquod lumen in phantasma, & quod phantasma illo suffultum lumine, producat speciem intelligibilem, quemadmodum corpus coloratum movet visum.

Ingeniosius, & per subtiliores ambages istam illuminationem Ferrariensis extricare conatus: Nihil est aliud, inquit, Intellectu agentem illuminare phantasmata, quam essentiam animæ, ex hoc quod est intellectiva, & fundamentum intellectus agentis; producere, secundum naturalem concomitantiam, virtutem phantasia talem, ut ab ipsâ phantasmata clara & habilia, ad concusandum cum ipso intellectu agente species intelligibiles in intellectu possibili, provenire possint.

Ferrar. lib.  
2. c. 77. contra Gent.

Sed hoc profectò non est phantasmata ab intellectu agente illuminari, sed à radice intellectus agentis, sive ab anima intellectiva perfectiorem potentiam phantasticam (quæ in homine cogitativa appellatur) resultare.

Secundum intellectus agentis officium est, exuere phantasma suâ materialitate. Quod non fit abstrahendo rem aliquam à phantasmate, sed spiritalizando ipsum, non formaliter, sed effectivè. Quia cum ob suam materialitatem ineptum sit ad producendam speciem intelligibilem spiritalem; ex consortio tamen intellectus agentis, activitatem ejus elevantis, ad talem actionem spiritalem aptum redditur.

Hinc opinio Buridani refellitur, qui à solo phantasmate materiali, sine ope ullius intellectus agentis, credit speciem intelligibilem produci.

Io. Burid.  
lib. 3. q. 7.  
de Anima.

Sicut enim color speciem sui trajicit in oculum, & deinde visio oculi aliam speciem propagat ad sensum communem, à cognitione sensus communis alia iterum ad imaginativam, & ab imaginativa denique, ad cogitativam trajicitur; ita à phantasmate in cogitativâ (quæ sensuum internorum apex & culmen est) expresso, in intellectum passibilem irradiari speciem intelligibilem spiritalem existimat. Et ne tamen omnem intellectum agentem negare & destruere videatur, nomen intellectus agentis, Deo, concursu solum generali activitatem phantasmatis adjuvanti, tribuit.

Sed materialitas phantasmatis nimis obesa & pigra est, ut sic dicam, & in altum ab alia causa principali succollari & elevari

elevari debet, ut productionem speciei intelligibilis spiritualis valeat attingere. Vt enim posset esse causa principalis, deberet perfectione effectum suum superare, aut saltem adæquare: species autem intelligibilis est nobilior phantasmate.

Licet ergo specierum sensibilibus perpetua catena, à sensu externo, usque ad culmen supremi sensus interni, sine ullius sensus agentis (quem aliqui inutiliter interponunt) adjutorio, currere possit: ubi tamen eò usque perventum est, alia causa (quam intellectum agentem vocamus) supremo phantasmati manum velut injicere & ipsum attollere debet, ut activitatem suam in superiorem rerum spiritualium regionem valeat extendere.

Tertium officium assignatur, denudare phantasma à conditionibus individuantes, & speciem intelligibilem, quæ solam naturam specificam, aut genericam repræsentet, ab eo abstrahere.

Sed de hoc officio magna & longa est controversia.

Cur enim intellectus agens non abstrahit directè speciem intelligibilem rei singularis, quæ relucet in phantasmate? Phantasia Platonis v. g. videt hunc equum; quare intellectus agens directè & immediatè hujus ejusdem equi speciem intelligibilem non abstrahit? Est enim agens naturale, & agit quantum potest & valet, juxta totam & ultimam phantasmatum determinationem.

An fortè nobilitas intellectus passibilis humani tam determinatæ speciei capax non est?

Verùm, conceptus rei singularis capax est (cùm etiam intellectus Angelicus, imò divinus hunc solem singularem, aut hunc Deum repræsentet:) cur igitur intellectus noster speciem intelligibilem rei singularis respiciet, & rem singularem, ut v. g. hunc solem, tantùm per conversionem ad phantasma hujus solis, conceptum illum singularizans, intelliget?

Quare enim non directè conceptum suum ad hunc solem, per speciem intelligibilem hujus solis, determinare potest?

Certè enim anima nostra corpore suo exuta, & omnibus phantasmatum nubibus dissipatis, hoc facere poterit.

Denique



Denique rem facere universalem, sive sub statu universalitatis eam constituere, videtur esse immediatum opus intellectus illius qui intelligit, id est, passibilis, non autem intellectus agentis. Ex multorum enim individuorum collata & intellecta similitudine, natura communis, per conceptum abstrahitur. Hic autem conceptus, non intellectus agentis, sed passibilis & intelligentis est effectus.

Cum ergo Aristoteles dixit: *Sensum singulare, intellectum universale esse*; de intellectu passibili, non de agente hoc intellexit. Dicere enim voluit: Sensus corporeos tam externos quam internos, representationes, quas in se formant, in aliquid singulare objectum semper desigere; intellectum vero posse etiam altius, & in objectum universale cogitationem suam attollere.

Omnibus igitur rite perpenſis, omnia illa intellectus agentis officia, unico actu absolvuntur, quo speciem intelligibilem spiritualement, concurrente una corporeo phantasmate, efficit, & intellectui passibili imprimit. Unde officiorum illa multiplicatio, ex quibusdam Aristotelis phrasibus metaphoricis nata, ad confundendam potius & obscurandam (ut quidam prudenter notarunt) quam ad digerendam & illustrandam rem istam valuit.

Dubitatione etiam non caret: An concursus phantasmatiscum intellectu agente, physicus sit, an tantum moralis.

Res, quantum existimo, ferè pendet inde: An quando actus unus vitalis alterum in eadem sua potentiâ, vel in aliâ excitat, physicâ causalitate illum alterum efficiat. Vt, An assensus antecedentis assensum consequentis; aut amor finis electionem medijs, vel denique iudicium intellectus amorem voluntatis physicè producat.

Si enim hoc verum est, tunc quoque phantasma physicam causam speciei intelligibilis esse, nihil vetabit.

Sed tamen, quia magis propendeo, ut inter actus illos, unus alterum morali tantum impulsu excitet, & potentiam in illum inclinando determinet; ideo etiam pronior sum, ut phantasma, citra physicam efficientiam, intellectum agentem, ad produ-

cendam

cendam & imprimendam speciem intelligibilem objecti sensibilis, quod in phasmate expresso relucet.

## ARTICVLVS II.

*An necesse sit, intelligentem phantasmata speculari.*

Aristoteles  
lib 3. c. 7. 8.  
de Anima.

**C**elebre est illud Aristotelis pronunciatum: *Anima rationali phantasmata, ut sensibilia sunt. Quapropter nunquam sine phantasmate intelligit anima.* Item postea: *Quando intellectus speculatur, necesse est, quia φαντάσματα una cum phantasmate, (vel ut legit Theod. Gaza, diuino vocabulo, quia φαντάσματα simul phantasma aliquod) speculari.* Et rationem addit. *Nam phantasmata velut sensibilia sunt; praterquam quod sint sine materia.*

S. Tho. 1. p.  
q. 84. a. 7.

Idem 1. 2.  
q. 50. a. 4.  
ad 1. & 3.

Quæ Aristotelis verba, nisi ad improprietatem detorqueantur, significant intellectum specie intelligibili quamvis signatum, reflectere tamen & figere obtutum suum in phantasmata; quemadmodum sensus externus, v. g. visus figit in sensibilem colorē, quem ante se intuetur. Quæ est S. Thomæ etiam interpretatio, ubi Articulo expresso hanc quæstionem tractat, & resoluit: *Impossibile esse, intellectum secundum presentis vite statum, quo passibili corpori coniungitur, aliquid intelligere in actu, nisi convertendo se ad phantasmata.* Et alibi: *Phantasma comparatur ad intellectum possibilem, ut objectum; sicut dicitur in lib 3. de Anima.* Et iterum: *Vires apprehensivæ interius preparant intellectui possibili proprium objectum: ideo ex bona dispositione harum virium, ad quam cooperatur bona dispositio corporis, redditur homo habilis ad intelligendum.*

Hoc autem maximè & propriè verum est, in primâ intellectione, qua intellectus passibilis objectum sensibile externum, per speciem intelligibilem immediatè à phantasmate talis objecti sensibilis haustam, intelligit. Tunc enim in opinione Aristotelis, S. Augustini, & S. Thomæ (de qua Lib. III. Cap. III. Artic. 21. pluribus differuimus) intellectus suam speciem intelligibilem apud se cognoscit, & eâ mediante phantas-



phantasma ex quo hausta fuit; tertio sensus externi operationem; ac denique objectum ipsum sensibile, circa quod occupatur sensus externus. Vna enim eademque cognitione, intellectus videntis solem, se imaginari, & deinde se videre solem, ac ipsum etiam solem cognoscit. Vnde illa operatio intellectus, ex apice mentis (ubi residet intellectus) non locali motu, sed vitali quadam intentione, & habitudine essentiali, per phantasma, & operationem sensus externi (si ea praesens adest) usque ad objectum externum decurrit. Et id videbimur, ut puto, experiri, si quis attentè operationis suae decursum & flexus apud se perpendat, & intelligat.

Acumine tamen ad hoc experiendum, est opus; propter densas nebulas, quibus animae nostrae operationes involutae sunt; & quas nos quidem ipsi operamur, sed tanquam nocturnus faber, ad modicae lucis scintillas incudem suam tundens, & formans ferrum in tenebris.

Verumtamen, ubi jam per species intelligibiles recenter & proximè è phantasmatibus haustas, intellectus componendo, dividendo, ratiocinando, ac discurrendo, longius se extra nimis sensibilibus phantasmatum evolvit caligines, speciesque illas primas *simplificavit*, ut loquitur S. Thomas; non videtur necesse, ut in talium specierum usu, intellectus intueatur phantasmata; quia res ejusmodi nullum proprium phantasma habent, quo depingi & figurari valeant. Nam Deus, Angeli, anima nostra, virtutes, & vitia animi, proprijs phantasmatibus carent. Vnde S. Augustinus contra quosdam nimis pinguis Minervae homines, qui non nisi corporaliter quidlibet concipere & intelligere solent: *Ita feruntur in phantasias vel phantasmata imaginum, quae cogitatio de corporibus versat, ut his subtractis tanquam per inane pereundum sit, reformident. Ita necesse est, ut & iustitiam, & sapientiam pingant quodammodo in cordibus suis, cum formis & coloribus; quia non possunt incorporeas cogitare. Nec tamen dicunt, quando iustitiâ vel sapientiâ moventur, ut vel laudent eas, vel secundum eas aliquid agant, quem colorem, quam staturam, quae lineamenta, vel quales formas conspexerint.*

*Sed de his aliàs, inquit, & multa iam diximus, & si Deus voluerit,*

N n n n n

ubi

S. Tho. q. 19  
a. 1. de  
Verit.

S. August.  
lib. 10.  
c. 24 de  
Genes.

*ubi res videbitur postulare, dicemus.*

Erasmi. in  
fine libr.  
de Trin.

Inexplicandâ enim, & illustrandâ tenebrosissimâ hujus Philosophiæ parte, quæ sensuum, & mentis nostræ operationes spectat, multus ubique est S. Augustinus, & ut Erasmus alicubi ait, *In hoc genere perlibenter versari solet: adeo ut si quando casu inciderit, ille veluti viator ad amicum fontem, itineris propemodum oblitus, desideat: Vnde non ambigo, quin plurima in istâ phantasmatum, & rerum obscurissimarum nocte, ex superioris & divinæ lucis fulgetris ac illustratione S. Augustinus aspexerit.*

S. Tho. 1.  
q. 84. a. 7.

S. Dionys.  
lib. de di-  
vin. nomi-  
nib. c. 1.

Attamen, licet justitia, sapientia, veritas, & res ejusmodi spirituales nullo colore, nullâ figurâ phantasmatis depingi valeant; interea tamen dum intellectus eas animo versat, per *comparationem ad corpora sensibilia, quorum sunt aliqua phantasmata, illas cognoscit, ait S. Thomas. Sic veritatem intelligimus ex consideratione rei, circa quam veritatem speculamur. Deum autem, ut Dionysius dicit, cognoscimus ut causam, & per excessum (supra res sensibiles & creatas) & per remotionem (negationem, quâ omne ens sensibile & creatum ab eo removemus.) Alias etiam incorporeas substantias, in statu præsentis vitæ cognoscere non possumus, nisi per remotionem, vel aliquam comparisonem ad corporalia. Et ideo cum de huiusmodi aliquid intelligimus, necesse habemus converti ad phantasmata corporum; licet ipsorum non sint phantasmata.*

Arist. lib. 3.  
c. 8. de  
Anima.

Vnde patet, non esse necesse, ut intellectus noster objectum suum in phantasmate ipsum repræsentate contempletur; sed sufficere, ut, quando objectum proprio phantasmate caret, intellectus oculum suum in alterius rei phantasma simul detorqueat; ad cujus comparisonem, vel per cujus remotionem, objectum illud intelligit. Et tam latè accipiendum est, quod Aristoteles pronuntiavit, *Necesse est intelligentem, & quæ φάντασμα τι simul aliquod phantasma speculari.* Vel, ut lectio alia, & clarior, habet, *μὴ φαντάσασθαι unâ cum phantasmate speculari.*

Nec ista philosophia cum S. Augustino pugnat, ubi adversus Democritum & Epicurum (qui omniâ per imagines corpo-



corporum in animos nostros influentes, nos intelligere dicebant) disputans, ac irridens, ait: *Quasi verò non multa, ac propè innumerabilia cogitentur incorporaliter atque intelligibiliter, ab eis qui talia cogitare noverunt, sicut ipsa sapientia, & veritas.*

S. August.  
Epist. 56.

Negat enim solum Augustinus, sapientiam, & veritatem, ac ejusmodi virtutes spirituales, proprio phantasmate corporali posse ab imaginatione depingi; non autem negat, cum de ijs cogitamus, oculum mentis ad aliquid sensibile, obliqua tuentibus hircis, nos unà respicere. Se enim explanans deinceps subjungit: *Quam (veritatem) si isti non cogitant, miror, quomodo de illa utcumque disputent. Si autem cogitant, vellem mihi dicerent, vel de quo corpore (unde fluere dicebant sapientiæ & veritatis imagines, tanquam corporum illorum exuvias) vel qualis in eorum animos veniat imago veritatis.*

Aliquando verò, licet res corporalis sub phantasma directè cadat, & eo exprimi possit; ita tamen per intellectum conciditur, ut ad illas minutias decrescat, quas imaginatio apprehendere, & dividendo, sequi intellectum non possit. Dicit hoc egregiè & mathematicè S. Augustinus.

*Ratio docet, inquit, minutissima etiam corpuscula infinitè dividi. Cum tamen ad eas tenuitates vel minutias perventum fuerit, quas visas meminimus, exiliores minutioresq; phantasias iam non possumus intueri; quamvis ratio non desinat persequi ac dividere.*

Idem lib.  
I. c. 10.  
Tria.

Imaginativa ergo, quia non potest minores, & minores partes in infinitum apprehendere, quamlibet magnitudinis particulam sub aliquantulâ extensione imaginari debet; eo quòd omnis species sensibilis phantastica objectum suum aliquâ latitudine expansum repræsentet. Stat ergo imaginatio in grani v. g. sinapis, aut milij magnitudine, vel minutissimæ scobis, aut farinæ atomo. Intellectus nihilominus ex ratiocinatione partium infinitarum cujuscumque continui, pergit dividere, relicta retrò imaginatione.

Vnde Democritus, & Epicurus, ac quotquot hodie ex atomis & punctis continuum consueunt, imaginationem suam potius, quam intellectum & ratiocinationem sequuntur. Puncta enim quædam rotunda, id est orbiculos &

N n n n 2 sphaeru-

sphærulae tam minutas, quàm phantasia eorum apprehendere valet, in unam lineam (quasi Rosariolum precatorium) conglomerant.

Ex qualibus punctis, sive sphærulis, in quibus est sua circumferentia & centrum, magnitudinem ampliorem posse componi, non dubitavit Aristoteles. Si autem intellectui apprehenderent, quid sit punctum mathematicum, puderet eos, credo, S. Augustino, Aristotele, Euclide, & totâ Geometriâ reclamante, continuum ex ejusmodi verè & mathematicè indivisibilibus punctis velle componere.

Præcedentibus hoc quoque addendum. In visionibus quibusdam supernaturalibus, intellectum sine ullo omnino phantasmate, tanquam in aëre sereno & omnibus fumosis imaginibus enubilato, interdum res divinas intelligere.

S. Aug. lib. 12. c. 2.  
de Genes.

Nam D. Augustinus duo raptuum genera esse dicit: unum à sensibus externis (cùm anima à sensu externo averfa, tantum contemplatur similitudines rerum sensibilium, seu phantasmata quæ in memoria sensitiva sunt; ) alterum à sensibus etiam internis; quando cessante omni lusu & strepitu phantasmatum, anima spiritalibus intellectivæ partis delicijs unicè vacat. *Si enim, ait, anima, quemadmodum rapta est à sensibus externis corporis, ut esset in istis similitudinibus corporum, quæ spiritu videntur (spiritum vocat interiorē partem sensitivā animæ, quæ nobis cum brutis adhuc est communis: ) ita & ab ipsis similitudinibus rapiatur, ut in illam quasi regionem intellectuum, vel intelligibilem subvehatur: ibi sine ulla corporis similitudine, perspicua veritas cernitur, nullis opinionum falsarum nebulis offuscatur. Ibi virtutes animæ non sunt operosa ac laboriosæ. Neque enim opere temperantia libido frenatur, aut opere fortitudinis tolerantur adversa, aut opere iustitiæ iniqua puniuntur, aut opere prudentiæ mala devitantur. Vna ibi & tota virtus est, amare quod videas, & summa felicitas habere quod amas. Ibi enim beata vita in fonte suo bibitur: unde aspergitur aliquid humana vita, ut in tentationibus huius sæculi temperanter, iustè, prudenterq; vivatur.*

Dion. Carthuf.  
Ag. 7,

Et de illa sublimi, supra phantasmatum nubes, purè intellectuali contemplatione Doctor Extaticus: *Reor, inquit, quòd*



quod visio S. Stephani fuit anagogica pura, & intellectualis sine admixtione phantasmatum: medio modo se habens inter visionem viam per fidem, & patriam per speciem. Eratque per splendidissimam quandam irradiationem increata aeterna lucis, in superiori parte animae eius; imò in apice intellectus: sicut in contemplatione mystica Theologia, seu unitivae sapientiae fieri solet. Unde quia tales sine phantasmate videntes, quid viderint, explicare alijs inexpertis non possunt.

Et propter fortasse has causas & casus, Philoponus negat illud dictum Aristotelis: Oportet intelligentem speculari phantasmata, esse universim verum: etsi pauca tamen sint, inquit, operationes intellectus, sine imaginatione. Nam & quando, ait, circa divina operatur, praeoccupat imaginatio ante ea quae figuris & typis carent, typos & figuras imponens.

Philop lib:  
3. text. 55.  
de Anima.

## ARTICULVS IV.

*Phantasmatum puritas & agilitas quantum ingenio conferant.*

**S**I igitur semper aut plerumque oporteat intelligentem phantasmata contemplari, profectò jam intelligimus, quantum ad ingenij & mentis acumen referat digesta quaedam ac ordinata claritas puritasque phantasmatum, ex quibus & species intelligibiles abstrahi, & in quibus humanarum divinarumque disciplinarum principia & conclusiones à nobis debent cerni.

Sicuti enim magni refert, ex quo fonte hausta sit aqua; ita an à phantasmate limpidò, an turpido species intelligibilis sit abstracta. Aut, quia species istae per quandam veluti sublimationem ex phantasmatibus educuntur; mirum non est, si species intelligibiles adhuc tenuibus umbris phantasmatum respersae sint; cum quintae Chymicorum essentiae resipiant humores, unde extractae & sublimatae sunt.

Puritas verò & agilitas phantasmatum, quae intellectui, & ejus ratiocinationi velut satellites deserviunt, ex optimà conformatione, & temperie cerebri, ac spirituum animalium pendent.

Hinc capita ferè rotunda, molliter tuberante occipite,

Nnann 3

optima

optima ingenio creduntur, si pro modo & reliquorum membrorum corporis symmetriâ, nec nimis grandia sint, ut nanorum, nec nimis exilia, ut fatuorum esse solent. Totius verò corporis statura nec stolidâ sit & ingens, nec in pumilam brevitatem suppressa. Mediocre enim altitudinem, ad ingenium, omnibus præfert Plato.

Plat. in  
Timæ.

In capite amplo, ventriculi & sinus omnes cerebri spatiores sunt, & mobilitati ac agilitati spirituum, in quibus phantasmatum species vehuntur, vias laxant & expediunt. In minuto autem & arguto capite, angustia viarum impedimento sunt.

Pessima capitis conformatio putatur, angusta & in verticem turbinata; qualis plerumque stultorum, & Therfitis, turpissimi omnium ducum qui in bellum Troianum sunt profecti.

Sic enim eum nobis Homerus depingit:

Homer.  
Iliad. 2.

*Strabo erat, claudus altero pede, humeri*

*Curvi, & in pectus contracti, ac desuper*

*φοῖός ἐν κεφαλῇ. Acuto erat capite.*

Athenæ.  
lib. 11.

φοῖός enim acutum & fastigiatum in modum ambicum, interpretatur Athenæns. Ambices autem poculi genus acuminatum erat.

Capitum verò ista turbinatio & acumen superiorem fortè cerebri partem, quæ ad cranij verticem est, & sinus illos Erasistratæos nimis comprimit, quorum Lib. 111. Cap. viii. Artic. 11. ex Vesalio mentionem fecimus, & sensuum interiorum regionem ac sedem ibi locavimus.

Sedibus autem imaginatricis ac cogitativæ humani capitis nimia angustia compressis, libertatem spirituum impediri, figuram organorum depravari, ac deinde potentiarum functiones turbari, certum est.

Non omnia tamen φοῖός & Therfiticæ formæ capita, fatua sunt. Nam Lælius Bisciola pleraque Genuensium capitella ejusmodi esse dicit, & nos antè Lib. 111. Cap. vii. Art. vii. trium præstantissimi ingenij virorum capita exilia, & acuminata vidisse narravimus.

Itaque



Itaque in quibusdam, quod prava capitis figura denormat, temperamenti bonitas, aut alia causa restituit.

Porro temperamenti calore ingenium excitari, in com-  
perito est. Vnde Belgis, qui amplius aliquanto quàm Galli,  
Itali, Hispani, phlegmatis habent, modicâ vini sorbitione in-  
genium crescit: & virum eruditum novi, qui mihi dixit, ca-  
lore febris ingenium sibi ita notabiliter accendi, ut quæ aliàs  
in disciplinis intelligere non poterat, servaret in accessum  
febris, à qua lumen intelligentiæ affulgere sentiebat.

Hinc pueri cholericici vulgò ingeniosi putantur; quamvis  
desultorij esse soleant & leves. Ingenio verò tardi, moribus Plat. in  
Theætet.  
solent esse graves. Vnde Plato in rarâ adolescentis Theæteti  
laude ponit; quòd gravis, & tamen ingeniosus esset.

Si autem puerili cholerae, aliquid melancholici artificialis,  
studio acquisitæ, superveniat, quæ calorem temperet, & spi-  
rituum volubilitatem tarditate modicâ alliget, tunc ingenio  
judicium accedit, & sapientem facit. Hòc, credo, sensu Ari-  
stoteles omnes sapientes melancholicos fuisse dicit.

Magni refert, quali in corpore locati sint animi, inquit Cicero. Cic. lib. 1.  
Tuscul.  
*Multa enim è corpore existunt, quæ acuant mentem, multa quæ obtun-  
dant. Aristoteles quidem ait omnes ingeniosos melancholicos esse; ut  
ego me tardiozem esse, non molestè feram. Sanguinei enim & festi-  
vissimi ingenij erat Cicero. Enumerat multos ( Philosophos,  
Poëtas, Rectores civitatum, Heroas. ) Idg, quasi constet, ratio-  
nem, cur ita fiat, affert. Miscet autem Aristoteles melancholici  
calcrem, qui frigus ejus molliat, & tarditatem excitet. Nam  
aliàs pura & terrestris, id est frigida & sicca, melancholia  
excellenti ingenio est inepta.*

Ceterum Argenterius meritò Montanum & Akachiam Argent. lib.  
in artem  
Gal.  
sugillat, qui dicunt ingenium nihil aliud esse, quàm virtutem quæ  
recipit species rerum.

Hoc enim memoriæ potius, quàm ingenij munus est. Ma-  
gnæ autem memoriæ adeo plerumque ingenio destituuntur,  
ut Galli, cum ingenij in viro notare tarditatem volunt, di-  
cere soleant: *Habet bonam memoriam.* Et certè Claudius, Cæsar  
tam memoriosus, ut totam Homeri Iliadem memoriter  
teneret,

teneret, stupore tamen ingenij tam insignis & attonitus.

In pueris tamen memoriam, pro futuro ingenij prognostico habet Quintilianus. *Ingenij signum in parvis*, ait, *præcipuum, memoria est. Eius duplex virtus, facile percipere, & fideliter continere.*

Quintil.  
lib. I. c. 4.

Argenter.  
ibid. (supra)

In altero tamen Galenum immeritò carpit Argenterius; quòd dixerit, *Ingenium ostendere cerebri substantiam esse tenuium partium*. Si enim cerebri textura sit tenuium partium, & diaphana, sive ex talibus partibus contexta, quæ in multas superficies concisæ non sunt, plurimum hoc valere ad ingenium excellentes Medici existimant.

Per talium quippe partium cerebri texturam, & perspicuitatem, spiritus animales, & vis irradiativa liberius penetrant, & diffunduntur; ut sensuum internorum officiis ubique præstò adesse valeant. Licet enim virtus cerebri irradiativa, alterius speciei lumen fundat, quàm sol vel ignis; nimiam tamen opacitate, & multitudine superficierum in quas offendit, retunditur ad modum luminis solaris. Ideo enim, in morbo, quem Medici *guttam serenam* vocant, per nervi optici meatus humore opaco oppletos, usque ad oculum pervadere non potest.

An autem cerebrum ex tenuibus, vel crassis partibus sit contextum, ex sanguine intelligi potest. Nam hominum ingeniosorum sanguis cerebro similis est, brevi & tenui texturâ; hebetum verò & stupidorum sanguis, fibrosior & longiori crassiori quæ stamine contextus. Quod faciliè apparebit, si sanguinem utrumque in pelvi concretum discutias, & attentè fibras ac stamen introspecias.

Præstantia igitur ingenij ex tribus: calore melancholiam paulisper accendente, ex cerebri figurâ, & denique ex substantiâ partium, tenui filo contextâ, intelligitur. Inde enim puritas, & agilitas spirituum, quibus puriora quoque & splendidiora phantasmata imprimuntur, & expeditius celeriusque imaginationi & cogitativæ hominis subserviunt. Cogitativa verò velox & expedita, ratiocinationē & discursum intellectus mirè adjuvat ac incitat. Currit enim ac recurrit cogitativæ  
motus



motus sub discursu mentis, ut rota minor sub majore. Quibus porro celer & agilis est mentis discursus, ij ingeniosi appellantur. Quid enim aliud est ingenium, quàm *perfectio* Argenter. in Artem Galen. *discursiva virtutis*, inquit Argenterius?

Sed & quantum hoc accedere debet ad consummandam ingenij perfectionem; vigor nempe virtutis tam expulsiuæ, quam attractivæ spirituum animalium. Antè enim Lib. III. Cap. II. Artic. IV. & alibi docuimus, spiritus animales, in postremo occipitis ventriculo perfectos & elimatos, inde in omnium sensuum externorum, & internorum organa expui; ac insuper, in singulis organis vim aliquam eorum attractricem, & retentricem esse. Si igitur vis ista spirituum motrix morbo, aut senio debilitata sit, spiritus lentè per canales suos eunt, & segniter imaginationi & cogitivæ serviunt.

Hinc varijs de causis senum memoria pigrior, & ingenium labascit. Quia videlicet defectu caloris, & humore viarum, spirituum agilitas tardatur, & vis illa ipsos movens, ætate segnior efficitur. Nec de nihilo Medici quidam dicere solent: nullum esse certius senectutis indicium, quàm memoriæ, aut ingenij antea strenui, oborta lentitudo ac segnities.

Inde adagium, *Bis pueri senes*. Etsi enim multarum rerum, quas totâ vitâ collegerunt, species in thesauro memoriæ senilis reconditæ sint; perinde tamen habentur, ac si nullæ, aut paucae forent, sicut in pueris rerû inexpertis esse solent. Nam etsi nimio humore, aut dilapsu spirituum, vel partiû cerebri, nondum extinctæ sint, inutiles tamen, aut segniter cogitivæ facultati ministrant ac deserviunt. Non pauci enim senes Claudio Cæsari similes sunt: *In quo, inter cetera, ait Suetonius, Claud. c. 39. mirati sunt homines & oblivionem & inconsiderantiam: vel, ut Græcè dicam, μετεωρίαν καὶ ἀβλεψίαν.* In talibus quippe spiritus ac species phantastice, vel è memoriæ thesauro citatæ non obediunt facultati motrici, quæ eas mittit aut trahit ad organum cogitivæ; vel certè aliò divertunt, vel angustijs viarum, aut humore replente implicitæ, pervenire non possunt quò vocantur. Vnde pessimam cogitivæ ac reminiscentiæ facultatem in Claudio his exemplis notat Suetonius: *Occisâ, ejus jussu,*

O o o o o

Messallinâ

Messallinâ uxore suâ, paulò postquam in triclinio decubuit, Cur domina non veniret, requisivit. Multos ex ijs quos capite damnaverat, postero statim die & in convivium, & ad alea lûsum admoneri iussit; & quasi morarentur, ut somniculosos per nuntium increpuit.

Sueton.

Claud. c. 3.

Sed tanta oblivio & attonitus stupor in Claudio minimè fortè mirandus; quem ejus mater Antonia Portentum hominis, nec absolutum à natura, sed inchoatum tantùm dictabat.

## ARTICVLVS V.

*An noster intellectus quædam in ideis, seu rationibus divinis & æternis intelligat.*

Senec.  
Epist. 58.  
S. Aug. Lib.  
83. q. 46.

**S**eneca Ideas propriam Platoniorum supellectilem appellat. Sed S. Augustinus id refellit. Credibile enim est, inquit, etiam præter Græciam, fuisse in alijs Gentibus sapientes. Quod etiam Plato ipse, non solum peregrinando, sapientiæ perficiendæ gratiâ, satis testatus est; sed etiam in Libris suis commemorat. Hos ergo, si qui fuerunt, non existimandum est, ideas ignorasse, quamvis alio fortasse eas nomine vocaverint.

S. August.  
ibid.

Et explicans, quidnam sint istæ tam famosæ Platoniorum ideæ: Sunt, inquit, ideæ, principales formæ quædam, vel rationes rerum, stabiles atque incommutabiles, quæ ipsæ formatae non sunt; ac per hoc æterna, ac semper eodem modo sese habentes, quæ in divinâ intelligentiâ continentur. Et cum ipsæ neque oriantur, neque intereant, secundum eas tamen formari dicitur omne quod oriri & interire potest, & omne quod oritur & interit.

Vnde insigniter præceptor suus imposuit Aristoteles, dum interpretatur, eum ideas quasdam per se, extra divinum intellectum subsistentes finxisse.

S. Th. I. p.  
q. 15. a. 3.

Duo verò genera idearum, quæ S. Augustinus simul convolvit, evolvit & distinguit S. Thomas. Cum ideæ, inquit, à Platone ponebantur principia cognitionis rerum, & generationis ipsarum; ad utrumque se habet ideæ, prout in mente divina ponitur. Et secundum hoc quod est principium factiōis rerum, exemplar dici potest; & ad practicam cognitionem pertinet. Secundum autem quod est princi-



*est principium cognitivum, propriè dicitur Ratio; & potest etiam ad scientiam speculativam pertinere.*

Hòc igitur loco ideam per modum rationis, & ut est principium cognoscendi accipimus.

Sæpe autem sic loquitur S. Augustinus, ut propositiones necessariae veritatis in rationibus æternis, à nobis videri dicat. Et de puero illo apud Platonem celebrato, qui de rebus quibusdam mathematicis, quas nunquam didicerat, interrogatus, rectè tamen ac consequenter respondebat. *Credendum est, ait S. Augustinus, mentis intellectualis ita conditam esse naturam, ut rebus intelligibilibus, naturali ordine disponente conditore, subiecta, sic ista videat in quadam luce sui generis incorporea; quem admodum oculus carnis videt quæ in hac corporea luce circumadjacet; cujus lucis capax eiq; congruens est creatus.*

Plat. in  
Phæd.

S. August.  
lib. 12. c. 15.  
Trin.

Quibus verbis significare videtur, ideas & rationes in quibus intellectus noster intelligit v. g. hominem debere esse rationale animal, aut circulum debere omnes lineas rectas à centro ad circumferentiam, habere æquales &c. esse lumen quidem creatum, animæ rationali circumadiacens & circumfufum, sicut lumen solis, coloribus circumfunditur: sed tamen esse radium increatæ lucis, quem Deus super animam rationalem sigillat, & ei quandam divini sui luminis participationem imprimit, quando animam creat. Etiam si, ut quidam interpretantur, illarum propositionum assensus, usque ad ipsas ideas & rationes increatas, quæ in Deo sunt, non ascendat & penetret: veluti etiam, quando colorem in circumfuso lumine solis videmus, non semper solem ipsum eodem videndi actu attingimus.

Quo modo S. Augustini phrasin interpretari videtur D. Thomas. *Cum enim queritur, inquit, Vtrum anima humana in rationibus æternis omnia cognoscat: Dicendum est, quòd aliquid in aliquo dicitur cognosci dupliciter. Vno modo, sicut in objecto cognito: sicut aliquis videt in speculo ea, quorum imagines in speculo resultant. Et hoc modo anima, in statu presentis vite, non potest videre omnia in rationibus æternis. Sed sic in rationibus æternis cognoscunt omnia Beati, qui Deum vident, & omnia in ipso.*

D. Th. 1. p.  
q. 84. a. 5.

*Alio modo dicitur aliquid cognosci in aliquo, sicut in cognitionis principio. Sicut si dicamus, quod in sole videntur ea quæ videntur per solem. Et sic necesse est dicere, quod anima humana omnia cognoscit in rationibus æternis; per quarum participationem omnia cognoscimus. Ipsum enim lumen intellectuale quod est in nobis, nihil est aliud, quam quædam participata similitudo luminis increati, in quo continentur rationes æternæ. Iuxta illud, Signatum est super nos lumen vultus tui Domine. Quasi dicat, per ipsam sigillationem divini luminis in nobis, omnia demonstrantur.*

Pfal. 4.

S. August.  
lib. 14. c. 15.  
Trin.

*Et juvabit in hunc sensum, insignem S. Augustini locum adscribere. Etiam impii, inquit, cogitant æternitatem, & multa rectè reprehendunt, rectèque laudant in hominum moribus. Quibus ea tandem regulis indicant, nisi in quibus vident, quemadmodum quisque vivere debeat, etiam si nec ipsi eodem modo vivant? Vbi eas vident? Neque enim in sua natura; cum procul dubio mente ista videantur, eorumque mentes constet esse mutabiles, has verò regulas immutabiles videat, quisquis in eis & hoc videre potuerit. Nec in habitu sue mentis; cum illæ regulæ sint iustitiæ, mentes verò eorum constet esse iniustas. Vbinam sunt istæ regulæ, ubi quid sit iustum & iniustus agnoscit, ubi cernit habendum esse quod ipse non habet? Vbi ergo scriptæ sunt, nisi in Libro lucis illius, quæ veritas dicitur? Vnde omnis lex iusta describitur, & in cor hominis qui operatur iustitiam, non migrando, sed tanquam imprimendo transfertur; sicut imago ex annulo in ceram, & annulum non relinquit. Qui verò non operatur, & tamen videt quid operandum sit, ipse est qui ab illa luce avertitur, à qua tamen tangitur.*

*Propter verò illam impressionem, quasi imaginis ex annulo in ceram, dicit alibi animam connexam esse, & pendere ex divinis rationibus.*

Idem lib. 3.  
c. 5. de  
libero arb.

*Humana anima naturaliter divinis, ex quibus pendet, connexa rationibus, cum dicit, hoc melius fieret quàm illud: si verum dicit, & videt quod dicit, in illis, quibus connexa est, rationibus videt.*

*Ex quibus, & tot alijs locis, colligi potest, mentem S. Augustini esse, ut participatio illa divini intellectus, sive lumen intellectuale quod humanæ animæ imprimitur, sursum reflectatur in Deum per assensus propositionum, quæ æternam*  
verita.



veritatem, & existentiam omnibus expositam, & semper manentem habeant: sive, ut loquitur alibi S. Augustinus, quam omnes ratiocinantes, suâ quisque ratione atque mente communiter videant. Cum illud quod videtur præsto sit omnibus, nec in usum eorum quibus præsto est, commutetur, quasi cibus aut potio, sed incorruptum integrumque permaneat, sive illi videant, sive non videant.

S. August.  
lib. 2. c. 8.  
de Lib. arbi.

Quando autem cogitamus, ubinam sit talis æterna veritas, non alibi profectò, quàm in Deo ipso invenire possumus; cuius solius existentia, & veritates immobiles ei quasi inscriptæ, est æterna. Nam veritates quæ in intellectu humano vel Angelico sunt, non magis æternæ esse possunt, quàm intellectus, quibus sunt infixæ. Res quoque, sive propositiones objectivæ, quæ à talibus intellectualibus veritatibus respiciuntur, nullam in rebus creatis, sed solum in Dei essentia propriam æternitatem semper manentem habent.

Vnde D. Thomas cum S. Augustino Platonizans: *Dicendum est, inquit, quod ratio circuli, & duo & tria esse quinque, habent æternitatem in mente divina.*

S. Tho. I. p.  
q. 16. a. 7.

Et cum sibi objecisset, quoddam etiam rerum creatarum essentia, & universalia dicantur esse ubique & semper; ergo æterna etiam esse: Respondet, *Aliquid esse semper & ubique posse intelligi dupliciter. Vno modo, quia habet in se, unde se extendat ad omne tempus & ad omnem locum; sicut Deo competit esse ubique & semper. Alio modo, quia non habet in se, quo determinetur ad aliquem locum vel tempus. Et per hunc modum, quodlibet universale dicitur esse ubique & semper, in quantum universalia abstrahuntur ab hîc & nunc. Sed ex hoc non sequitur ea esse æterna, nisi in intellectu, si quis sit æternus.*

Ibid.

Quandoquidem igitur regulæ agendorum, ad quas lege naturæ astringimur, & etiam omnes propositiones speculativæ, quæ vocantur æternæ veritatis, ut *duo & tria esse quinque &c.* concipiantur à nobis fixæ & immobiles in publico velut aliquo Libro, ad quem omnes possint aspicere, & ubi in æternum sic incommutabiliter permaneant; signum est omnium hominum, etiam Gentilium Philosophorum, aliorum-

S. August.  
lib. 14. c. 15  
Tria.

que qui illas regulas apprehendunt, intelligentiam usque ad *Librum lucis*, ut superius S. Augustinus appellabat, extendi.

Vnde, quia iste *Liber lucis*, Dei intellectus, & Deus ipse est, quicumque regulas illas & veritates non tantum secundum esse possibile, sed etiam secundum esse existentia, immobiliter cum æternitate stantes cogitant, intellectum suum usque ad Deum, sub ratione entis immobilis & æterni, in quo regulæ illæ & veritates incommutabiles scriptæ sunt, extendunt.

Propositiones verò ceteræ, quæ non sunt necessariae & æternæ veritatis, non censentur omnibus in illo *Libro lucis* expositæ, neque omnes qui oculos ad Librum vertunt, eas ibi scriptas inveniunt: & tamen videntur scintillâ illâ creati luminis, quam ab infinita luce divini intellectus anima humana participat. Vnde S. Augustinus, quando dicit regulas illas juris naturæ immobiles, & propositiones æternæ veritatis in *Libro lucis* conscriptas ab omnibus posse legi & videri, aliquid amplius velle videtur, quàm lumine ab illa æterna luce de cædo & participato videri.

## ARTICVLVS VI.

*An Philosophi Gentiles, præsertim Platonici, sublimiori, & supernaturali cognitione fuerint aliquando Deum contemplati.*

**A**dmiranda prorsus sunt, quæ Platonici de divinis luminibus & fulguribus, quibus intellectus ipsorum, supra omnes phantasmatum nebulas in Deum interdum subvehuntur, referunt, & Sancti Patres etiam dicunt.

S. August.  
lib. 9. c. 16.  
Civ.

Apud S. Augustinum Apuleius Plonicus ait: *Vix sapientibus viris, cum se vigore animi, quantum licuit, à corpore removerint, intellectum huius Dei (summi & omnium Creatoris) & id quoque interdum velut in altissimis tenebris rapidissimo coruscamine, candidum lumen intermicare.*

Marf. Fic.  
cin. lib. 16.  
c. 8. de  
immortal.  
animæ.

Et alius ceterioris ævi Plonicus: *Totum hoc Philosophiæ studium, ut inquit Plato, est meditatio mortis. Siquidem mors est animæ à corpore liberatio. Nec terribilis mors est Philosophis: quoniam familiaris*



familiaris ipsis & domestica est. Nec latet eos, qualis futurus sit post obitum puri animi habitus. Talis enim erit, qualem fermè experiuntur quotidie in summo contemplationis fastigio, Tranquillus videlicet atque serenus. & idearum formulis, quasi stellarum radijs, circumfusus, & divini solis splendore coruscans.

Et quia Platonici iste, Christianus erat, ostendit fidei quoque nostræ consentienter ista dici: Hinc Propheta Daniel, inquit: Fulgebunt docti tanquam splendor Firmamenti, & qui multos ad iustitiam erudierint, tanquam stella in perpetuas aternitates.

Hinc illa Platoniorum Gentilium, ætate S. Augustini superbia, quâ se supra Christianos efferebant. Quia enim nonnulli eorum, ait S. Augustinus, potuerunt aciem mentis ultra omnem creaturam transmittere, & lucem incommutabilis veritatis quantulumcumque ex parte contingere; quod Christianos multos ex fide interim solâ viventes, nondum potuisse derident.

S. August.  
lib. 4. c. 15.  
Trin.

Et profectò Plotinus, Porphyrius, alijque Platonici tanta de seipsis & alijs superioris, aut sui ævi Platonici jactant, quanta de sanctissimis Christianis, & sublimissimâ contemplatione in cælum elevatis mentibus, SS. Patres, & posterioris temporis Contemplativi Thaulerus, Rusbrochius, Gerson, Dionysius Carthusianus, & alij id genus Theologi Mystici narrare solent.

Quam enim excelsas & ecstáticas contemplationes istas Platonis esse oportuit? Ego sapius, inquit ipse de se, animo contemplans, relicto corpore visus sum perfrui summo bono cum voluptate incredibili. Quare hæsi quodammodo attonitus, me esse partem quandam superioris Mundi, atque me adeptum vitæ immortalitatem sentiens, sub luce maxima, quæ neque oratione exprimi potest, neque auribus percipi, neque cogitatione comprehendi. Tandem verò hac contemplatione defessus intellectus recidit in phantasiâ; tuncq; illa luce deficiente, factus sum tristior.

Auctor  
divinæ sapient.  
secundum  
Ægypt.  
lib. 1. c. 41

Narrat quoque in Vita Iamblichi Platonici Eunapius, eum aliquando tanto orationis fervore exæstuaré solitum, ut plusquam decem cubitis in aërem toto corpore elevatus, suspenderetur à terra. Quid aliud de nostris Sanctis, pro maximis & divinis miraculis Scriptores nostri Ecclesiastici referre solent?

Eunap. de  
Vitis Philo-  
soph.

Quid

Thauler.  
fer. 2. in  
festo S. Io.  
Bapt.

Quid ergo hîc dicimus? An quod alicubi sublimis Con-  
templator Io. Thaulerus? Certè Gentiles quidam, inquit,  
fundo suo tam fuerunt familiares, ut contemptis caducis omnibus  
hoc solum sectarentur, huic soli vacarent. Vnde factum est,  
ut miram ex ipso notitiam consequerentur. Et Platonem ac  
Proclum, in exemplum tot aliorum citans: Hoc verò, addit,  
quàm nobis turpe est quàmq̃ ignominiosum, dilectissimi, dum nos  
miseri ac steriles, tamen Christiani simus, tantaq̃ undique qua nobis  
auxilio sunt habeamus: puta Dei gratiam, sacram fidem, veneranda Sa-  
cramenta, & plura alia maxima adminicula; semper tamen velut caca  
gallina circumimus, & neque nosipsos, neque quid in nobis sit agnos-  
centes, nec ullam fundi nostri vel tenuissimam habentes notitiam.  
Cuius si à me ratio poscatur, ipsissimam reddo: Quòd plùs satis in  
multa distrahamur, plùs satis externi simus, plùs satis sensibus opere-  
mur, ac nostris conceptibus & institutis inordinatè inharemus, solis  
externis exercitijs perpetuo incumbentes. Vipotè, multa vocali oratio-  
ni, lectioni, studijs ex propria voluntate propriaque quæsitione, negle-  
cta vitiorum mortificatione, assumptis impedimur ac detinemur; ut  
ad nosipsos nusquam ingredi, nec ad animæ nostræ fundum, nudi ac pu-  
ri pertingere queamus.

Quamvis autem tam altè à terra in divinorum contempla-  
tionem evecti quidam Platoniorum, non tamen naturæ ter-  
minos transcederunt, ut Thaulerus fatetur. Magna enim  
& acuta, subtilissimique spiritûs ingenia ita phantasmata  
extenuare, &, verbo S. Thomæ, *simplificare* potuerunt, ut  
species intelligibiles, quæ inde abstrahebantur, vix cum ali-  
quâ tenui sensibilitatis umbrâ, objecta sua repræsentarent.  
Deinde si intellectui in rerum spiritualium contemplatione  
occupato, crassiora, ut sic loquar, phantasmata se ingerant  
sublimia illa ingenia altius se elevant, ut phantasmatum nubes  
infra se despiciant. Intra quas tamen, tandem fatigati, ut  
antè dicebat Plato, recidunt, tenebrisque earum rursus im-  
plicantur.

Quâ autem ratione id fiat, res est abditissima. Fieri tamen  
beneficio cuiusdam lucis interioris & velut scintillæ, quæ ex  
inferiori cerebri statione in verticem emicare, & ibi se dila-  
tare vi-



videatur, quidam Contemplativi narrant. Quod proximo Articulo, Deo dante, dilucidare conabimur. Nullum enim unquam Scriptorem legi, qui quid illa lucis interioris scintilla esset, nifus sit explicare.

Interim tanta elevatio mentis supra nebulosa rerum sensibilibium phantasmata, fortasse purè naturalis est, nec etiam omni phantasmate carens: sicut aëris serenitas nunquam tam liquida & enubilata est, quin tenuissimi saltem vaporis livore sit inumbrata.

Quidam etiam videntur existimare, Platoni aliquid supernaturalis, saltem quoad modum, tanquam gratiam gratis datam contigisse. Tales enim gratias Deus quandoque etiam impijs & infidelibus, propter tales-quaes virtutes, aut virtutum umbras, solet elargiri. Sic Sibyllæ ob virginittis meritum, factæ putantur Prophetissæ: sic inter Catholicos Ioannes Evangelista, inter Ethnicos Plato, ait Conradus, *altriùs de divinis scripserunt. Quia vita sanctitas atque integritas magnam apud Deum meretur illuminationem, & signanter castitas.* Vnde negabant Plato & Platonici, omnes homines ad tam sublimes divinarum contemplationes, sed solum puras à vitij crassioribus animas, & præsertim quæ vitæ contemplativæ amore ac studio tenerentur, idoneas esse. *Talis enim Deo charissimus videtur,* inquit Aristoteles. Nam si aliquam humanarum rerum curam dii habent, sicut habere videntur; consentaneum est, ipsos re illâ quæ optima est, atque ipsis maximè cognata, delectari, quæ est intellectus: eosque qui ea maximè amant & honorant remunerari. Vt-pote qui eorum, quæ ipsis sunt amica, curam habeant, rectèq; ac honestè agant.

Platonici tamen posteriores, præsertim Plotinus, Porphyrius, Olympius, Amelius, Iamblichus, alijque qui circa tempora Diocletiani Imp. & deinde vixerunt, *Magicarum rerum curiositate depravati sunt,* ut narrat S. Augustinus. Nam cum à peccatis, quibus mentes suas gravari sentiebant, liberari vel-  
lent, nec à seipsis possent; quærentes mediatorem, ut ait ali-  
bi idem S. Doctor, in dæmones superbix suæ socios incide-  
runt, & sacrificijs ijs oblati se expiare tentaverunt.

P p p p

Et

Conrad.  
Tract. 7. de  
contract. q.  
100. concl.  
1.

Arist. lib. 10  
c. 9. Ethic.

S. August.  
Epist. 56.

Idem lib.  
10. c. 42.  
Confol.

Et profecto Plotinum, cujus Schola usque ad Constantinum Magoum Romæ floruit, Magicis artibus implicitum ostendit Porphyrius discipulus ejus. Nam narrat eum *demonem familiarem habuisse, ad quem divinum semper sua mentis oculum sublimius erigeret.*

Porphyr. in  
Vita Plot.

Talis igitur familiaris dæmon mentem Platoniorum altius evehere potuit, & per imaginariam quidem, sed excellentioris phantasticæ lucis coruscationem, spiritum ab inferiori animæ parte, sine divino miraculo, eo modo quo mox dicemus, separare, & Sanctorum Christianorum contemplationes & ecstases imitari. Non enim de nihilo est, quod statim post tempora Christi, plerique omnes Platonici ad Magicas artes defluerint; diabolo id providente, ne Christiani aliquid præcipui in sanctitate, raptibus, ecstasibus, & miraculis habere viderentur, quo supra Philosophos Ethnicos apparent excellere.

Paracelsistæ quoque, homines plerumque non nimis sancti, & nigræ Magiæ in quibusdam comperti, aut suspecti, rerum naturalium cognitionem ex lumine aliquo simili interiori, non ex Libris & studio se haurire jactant; quod Articulo sequenti narrabitur.

## ARTICULVS VII.

*Discrimen inter Platoniorum, & Christianorum illustrationes.*

**E**Xercitijs pænè iisdem, quibus Christiani pii ac sancti Contemplatores, Platonici ad sublimes illas mentis illustrationes & ecstases pervenisse videntur. Mentem videlicet perpetuo a rerum sensibilibus voluptatibus avertendo, & introrsus in animam suam, ubi Dei & virtutum locus est, reflectendo.

Porphyr. in  
Vita Plot.

De magistro suo Plotino Porphyrius: *Simul secum erat, inquit, & cum alijs, intentionemq; mentis ad se conversa nunquam intermittebat, nisi forsitan cum dormiret. Quamvis & somnum ab eo procul excusserit tum cibi parcitas (sæpe enim panem etiam abstinebat)*



*tum assidua quadam conversio ipsius ad mentem.*

Ac de Platone, & alio Platonico, Proclo Thaulerus: *Quod* Thauler.  
fer. 2 in  
festo Nati-  
vit: S. Io.  
Bapt.  
*si quis, ait, ad suum intimum fundum cerebrò se reciperet, eiq; foret*  
*familiaris, perciperet inde per plures nobilissimos fulgores, per quos,*  
*quid sit Deus, multo lucidius apertiusque cognosceret, quàm oculi eius*  
*corporei materialem hunc visibilemque solem cognoscant. Certe Genti-*  
*les quidam huic fundo tam fuere familiares, ut contemptis caducis*  
*omnibus, hoc solum sectarentur, huic soli vacarent. Vnde factum, ut*  
*miram ex ipso notitiam consequerentur. Successerunt deinde praelari*  
*Philosophi, ut Plato, & Proclus, & alij complures: & ipsi alijs, qui per*  
*se se eam tam exactè reperire non poterant, planissimam apertissimamq;*  
*huius notitiam tradiderunt. Inde est, quòd & S. Augustinus fateatur* S. August.  
lib. 7 c. 9.  
Confess.  
*Platonem, S. Ioannis Euangelium, usque ad id loci ubi dicitur, Fuit*  
*homo missus à Deo, integrè pronunciasse; licet abditis & tectis*  
*verbis.*

Continua quippe illa mentis, à voluptatum externarum  
illecebris, introrsum refuga conversio, phantasmatum nubes  
extenuat & illustrioribus enubilatae mentis coruscationibus  
adaptat. Vnde de Epicureis, Cyrenaicis, Stoicis, Peripa-  
teticis nihil simile, atque de Platoniciis legimus. Quanquam ex  
Aristotelis lib. 12. Metaph. narret Cajetanus, Deum erga  
substantias intellectuales singularem providentiam exerce-  
re; *quia sunt in Vniverso velut filij. Et animas nostras ratione im-* Cajet. 1. p.  
q. 82. a. 4.  
*materialis naturæ, superiores influxus intellectualium aliquo modo re-*  
*cipere. Ac tanto magis, quanto magis ab his corporalibus recedunt, ut*  
*eodem libro Aristoteles dicit.*

Peripatetici tamen, voluptatibus carnis suæ magis impli-  
citi, non uni animo excolendo, & ultra humana in Deum at-  
tollendo, perinde ac Platonici, ex professo studebant.

Quia tamen superbiâ omnes universim Philosophi tumidi,  
non verâ magnitudine alti erant; præcedenti Artic. Magi-  
cum quid, Platoniorum elevationibus & ecstasibus se inter-  
dum miscuisse, suspicati sumus.

Quod de Paracelsitis etiam vehementer metuendum.  
Doctrinam enim suam Paracelsiticam non studio, sed ab in-  
no quodam & divino lumine sibi affundi jactant. Vnde stu-

dium Academiæ in ludibrio & risu habere solent.

Vide Sen-  
nert. lib. de  
Consensu.

*Essentialis enim intrinseca cognitio, ait Crollius, non est ex carne & sanguine, nec in multitudine librorum & lectionis, nec in pluralitate experientia, & antiquitate dierum, nec in persuasionibus humani verbi, & contentione rationis, sed in ipsa passione divinorum; non in discendo, sed in patiando, hominis mens perficitur.*

Sed profectò, si discipuli isti non sint magistro suo Paracello ( quantum nobis eum Thomas Erastus describit ) sanctitate vitæ puriores; verisimile non est, tam spurcis vasis divinum Chymia & Medicinæ Paracelsistica lumen cælitus infundi. Adde, lumen illud, ceu fatuum, non qualè à Deo fundi & venire meretur, à Galenistis infamari.

Etiamsi verò Platoniorum sublimes coruscationes à Deo & cælo essent, longo tamen intervallo, ab illis quas S. Augustinus, S. Bernardus, Thauleristæ, & Mystici Christiani expertos se fatentur, distant. Platonica enim illa fulgetra, lumen sunt sine igne, scientia inflans, sine charitate ædificante.

Rom. I.

Magna quippe ingenia, solâ etiam humanâ ratiocinatione, sine extraordinariâ illâ luminis interioris coruscatione, invisibilia Dei, à creatura Mundi, per ea quæ facta sunt, intellecta conspexerunt: & quod notum est Dei, manifestum fuit in illis; Deus enim illis manifestavit.

*Sed cum cognovissent Deum, non sicut Deum glorificaverunt.*

S. Fulg. lib.  
I. c. 22. de  
verit. præ-  
delt.

*Quid ita? Illa quippe manifestatio, qua cognoverunt Deum qui cognitum non dilexunt, ait Fulgentius, gratiam non habuit, qua Deus sic cognoscitur, ut ametur.*

S. August.  
lib. 4. c. 3.  
contra Iul.

*Non enim Deum, sed seipsum amaverunt, illum ad se recte ætentes. Quò enim appropinquaverunt intelligentiâ, inde superbiâ recesserunt, ait de Pythagora & Platone divinus Augustinus: quos tamen multo excellentiore ceteris Philosophiâ nobilitatos fuisse dicit.*

Act. 10  
S. August.  
lib. de præ-  
delt. sanct.  
c. 7.  
Rom. I.

*Vel si rarissimi quidam inter ipsos, Cornelio Centurioni similes, verâ pietate Deum coluerint, non sine aliqua fide ( ut S. Augustinus de Cornelio loquitur ) id faciebant.*

*Plerique verò ferè omnes alij, sicci & frigidi speculatores erant, evanescentes in cogitationibus suis; in quibus locum nullum.*



nullum habebat charitas, quia totum occupabat vanitas.

Et hinc alterum discrimen nascitur: Quod pij quidam & humiles Christianorum Contemplatores, quia illustratio-  
ni intellectus, charitatem voluntatis semper sociare student,  
& raptim sub quodam quasi coruscamine scintillula transeuntis, tenui-  
ter vix attracti, amore, inardescunt, ut S. Bernardus loquitur; ad  
illam tandem contemplationis celsitudinem, Dei gratiâ suc-  
collati, quandoque ascendunt, ut radijs supernæ lucis perpe-  
tuò collustrentur, nullâ terrenâ ac turbidâ re, ait Nazianzenus,  
se immiscente, atque in lumen divinum incidente. Talibus quippe  
Contemplativis, inquit Rusbrochius, tam facile, promptum, &  
paratum est contemplationi fruitionique vacare, quàm vitam vivere  
naturalem. Et quid mirum? Hi enim perfecti, excellentes, atque no-  
biles homines (sublimis Contemplator Thaulerus loquitur)  
omnia transcendendo, nihil omnino vel amore, vel intentione prose-  
quuntur, nisi solum Deum purè in seipso. Et quidquid ex  
illius munere perceperunt in ipsum omni tempore & purè refe-  
runt, offerunt, refundunt; nec quidquam sibi inde usurpare  
vel adscribere presumunt. Et quemadmodum flumina ex mari  
exeunt, & in ipsum, tanquam suam originem, revertuntur: ita & hi  
præclarissimi homines omnia divina charismata & dona ad illam re-  
ferunt ac refundunt originem unde profluxerunt, simulq; cum eis in  
Deum resiliunt.

S. Ber. ser.  
18. in Cant

Naz. Orat. 3

Rusbroc.  
lib. de cal-  
cuio filior.  
Dei c. 13.

Thauler.  
ser. I. Dom.  
Septuag.

Cui nihil umquam simile in sanctissimis Gentilium Philo-  
sophis auditum: qui perpetuò in seipsos, aut aliam creaturam,  
non in Deum, tanquam omnis amoris sui centrum recurre-  
bant. Aut si quandoque, hoc facerent certe rarissimè id  
accidebat; nec nisi quando inter densas illas Gentilitatis te-  
nebras, tenue divini luminis fulgetrum raptim intermicabat.  
quod non tantum eorum intellectum perstringeret, sed  
etiam levi afflatu concuteret voluntatem. Quamquam enim  
S. Augustinus fidem Christi dicat esse omnis gratiæ initium;  
istæ tamen in media infidelitatis nocte coruscationes, ad fi-  
dem spectant, aut reduci debent; cum sint quædam ad fidem  
præparationes, & velati ad eam conatus; sive usque ad fidei  
plenitudinem perveniant, sive in irritum antè cadant.

P P P P P 3

Piorum

Piorum tamen etiam Christianorum contemplationes sæpius cogitationibus alijs interpellantur; quia pauci sunt, quorum conversatio ita est in cælis, aut extra hunc rerum sensibilem Mundum tam longè summora, ut dicere semper cum Propheta possint: *Ecce elongavi fugiens, & mansi in solitudine.*

Psal. 54.

S. August.  
lib. 2 c. 16.  
de libero  
arb.

Vnde illustrationes illas Sanctorum S. Augustinus, *coruscationes* (quæ subito videlicet emicant, & mox extinguuntur) *in hoc tenebroso itinere*; S. Bernardus *tempus earum modicum, & subito, dum teneri sponsus putatur, elabi dicit.*

S. Bernard.  
ser. 23. in  
Cant.

Et iterum: *Est locus, ubi verè quiescens & quietus cernitur Deus, locus omnino non Iudicis, non Magistri, sed sponsi, & qui mihi quidem (nam de alijs nescio) planè cubiculum sit; si quando in illum contigerit introduci. Sed heu, rara hora, & parva mora.*

#### ARTICVLVS VIII.

*Quidnam sit illa lucis interioris scintilla, qua ad Dei visionem elevari, & in ea se tenèri, Contemplativi narrant.*

S. August.  
Epist. 72.

**P**ost varias mortificationes, quibus resistitur corporis sensibus: quæ nobis sacratissima disciplina est, inquit S. Augustinus; tandem raræ quædam & amabilissimæ Deo animæ, ad eam munditiem cordis perveniunt, ut Deum, quantum in tenebroso hoc itinere vitæ mortalis licet, videant, & ferè jugiter contemplantur.

Naz. Orat.  
33.

Verum, quia *ἡ γρηγορία τῶν νουῶν princeps nostri pars*, ut ait S. Gregorius Nazian. qua cerni Deus debet, *improbis vagisq; imaginibus & simulacris confunditur*, lux, aut quali lux quædam interior, singulari Dei beneficio oboritur, quæ animam à spiritu quodammodo dividit, & sicut in hoc Mundo elementari fieri videmus, in capite humano inferiorem & nebulosam phantasmatum regionem, à superiore & sereniorè quasi distinguit.

Sæpe & vehementer admiratus sum (non ex meâ, sed pijsimarum quarundam animarum, in utroque sexu, experientiâ) quid ista lucis, ut appellant, scintilla esset. Nec quenquam unquam Scriptorem legere potui, qui mihi in hujus rei indagine viam præiret.

De



De ea, ut opinor, loquitur Thaulerus, quando dicit per virtutem humilitatis: Nos nobilem ac divino tinctam colore scintillam cognoscere. Quæ cum nobis multo, quam putemus ipsi, interior viciniorque sit, ob immodicam tamen superbiam nostram, quæ & in spiritu & naturâ plus satis abundamus, admodum nobis incognita est & aliena.

Thauler.  
ser. 1. Dom.  
3 post. fest.  
Tria.

Et de elevatione mentis, quæ illius scintillæ beneficio peragitur, dum homo Contemplativus vocaliter orat: Sese ad seipsum, inquit, intrò recipiet recolligetque, atque ad fundum suum interiorum cum elevata mente, viribus extensis, interno divina præsentia contuitu, intimo gratissimæ voluntatis Dei præ omnibus desiderio, convertet; tam à seipso, quam rebus creatis omnibus deficiens, ibique altius atque altius, in clarificatam Dei voluntatem sese immergens.

Idem ser. 1.  
Dom. 5.  
post fest.  
Tria.

Hujus quoque lucis adjutorio perficitur, quantum existimo, altissimus ille vivendi modus, de quo Rusbrochius: Si altissimum, inquit, ac cellissimum vivendi modum, qui possit in hac vita obtineri sentire ac vivendo exercere velimus, spiritus noster ab anima dividatur oportet, seque supra rationem, supra imagines, supra virtutum (actuosarum) exercitationem erigat, nudo aspectu in divino lumine, intusque sursum respiciat, ac nudo amore cohareat Deo. Et in hac quidem actione inter nos, & Deum discrimen diversitatemque sentimus. Ibi verò spiritu in Deum, eiusque infinitam extensam celsitudinem, ibi cum Deo in essentiali illius unitate quiescimus, & habitamus, semper cum Deo immoti, & absque actione perpetuò otiōsi permanentes: atque hoc pacto perenniter & quiescimus, & operabimur; quod est vivere sine labore. Et hic supremus modus est, quo quidem in nobis deiformem possumus sentire vitam, æterna veritate illustratam.

Rusbroc.  
lib. de vera  
contempl.  
c. 51.

Fortasse etiam lucis istius interioris vehiculo intrabat S. Augustinus, quò se aliquando vectum alicubi narrat: Aliquando introducis me, ait Deo, in affectum multum inusitatum introrsus, ad nescio quam dulcedinem. Quæ si perficiatur in me, nescio quiderit, quod vita ista non erit. Sed recido in hæc, ærumnosis ponderibus, & resorbeor solitis. In talibus autem mentis elevationibus, fit quædam animæ & spiri-

S. August.  
lib. 10 c. 40.  
Confess.

Thauler:  
ser. 4. in  
ferijs Pa-  
schal.  
Hebræ. 4.

& spiritûs divisio. De qua iterum Thaulerus: *In hac divisione anima & spiritûs*, inquit, *anima ipsa & quidquid corporeum est, inferius manet: spiritus autem & quidquid spiritale est, sursum tendit, atque abstractum, sive divisum ab anima, Deo copulatur coniungiturque; sicut Apostolus ait: Qui adheret Deo, unus spiritus est.*  
1. Cor. 6. *Mira prorsus divisio, ubi quidquid corporeum & rude est inferius manet: quidquid verò subtile est & spiritale ad divina gloria contemplationem sublevatur, atque secundum Apostoli sententiam, in eandem imaginem transformatur à claritate in claritatem, tanquam à Domini spiritu. Tum verò quando hoc pacto superior pars ad Dei gloriam & gaudia contemplanda rapitur, subvehiturque, magna pace & quiete pars inferior potitur. Hinc ergo advertere licet, quòd quanto spiritus à rebus caducis ac temporalibus, atque ab ipsa quoque anima, iuxta hunc modum disiungitur, tanto facilius perfectiusque ingrediatur in Deum.*

Varia ejusdem argumenti testimonia, ex alijs Theologis Mysticis, & pijs Contemplatoribus consarcinare possim; sed à nullo, de luce ista interiore animam & spiritum dividente, plura & secretiora didici, quàm à R. P. Ioanne Euangelista An. 1635. Capucino Lovaniensi; qui nuper, Autumno illo pestilenti post obsidionem Lovanij à gemino Francorum & Batavo-exercitu, cum opinione sanctitatis extinctus est. Ego enim contractâ cum eo non paucorum annorum familiaritate, plurima de vitæ istius interioris miraculis (quæ ille humiliter & sincere, tanquam amico respondebat) indagavi, quæ continuo ferè 20. annorum experimento hauserat; & tandem à me exoratus, brevi etiam Latino scripto comprehendit: quod fortasse, si vita mihi dureret, & Deus det, nostris Notulis illustratum lucem aliquando videbit.

Certè enim meretur. Nam licet nec philosophicè satis, aut theologicè, arcani illius naturam explicet; docet tamen, in quantam puritatem deterfa ac decocta anima esse debeat, ut Deum qualitercumque in hac vita mortali contemplari valeat. Deinde ex proprio suo experimento (cui in alijs etiam quibusdam pijs animabus affine quidem & suppar, nunquam æquale deprehendi) multam philosophandi inabditis animæ opera-



operationibus, materiam præbet. Denique, ut ipsemet in Libelli sui calce dicit: *Ad hanc potentiam* (sic lucem illam, qua anima in hac vita Deum videt, appellat) *referuntur omnia quæ passim dicunt Mystici; licet subinde confusus & obscurius, propter abditissimum & paucissimis cognitum illum operandi modum, quem in se sentiunt, & difficulter verbis explicare possunt, ut ex antè dictis aliquatenus constat; qui interim præfata potentia proprius & naturalis est. Vnde etiam eiusdem naturâ & conditione semel bene explicatâ, videtur tolli posse omnis difficultas, & erroris suspicio, à Scriptis Mysticorum.*

Quantum ad me, fateor ingenij mei bolidem nimis curtam esse, ut profundi hujus fundum attingam. Mihi tamen è longinquo apparet, lumini intellectuûs aliquid etiam imaginarium admixtum esse. Hoc est, lumen principale, quo Mystici & pij isti Contemplatores (longè tamen infra Beatos cæli incolas) Deum se videre dicunt, esse quidem in intellectu; sed aliam corporeæ præterea lucis scintillam humani cerebri spiritibus animalibus inhærere, in quam defixa & admirabunda imaginatio, ab aliorum phantasmatum aspectu interiores suos oculos avertit. Potentiæ quoque spirituum motrices eo tempore cessant, ne phantastica simulacra, quæ spiritibus illis vectantur, ultrò & petulanter imaginationi se ingerant, & eam offuscent; unde, per sympathiam imaginatricis & intellectuûs, contemplationis intellectuivæ claritas aliquâ caligine involvatur.

Cur autem scintillam illam lucis, aut luci similem, existimem esse corpoream, & ad imaginatricem facultatem pertinere, has conjecturas habeo.

Quia morbo corporis, aut aëris mutatione aliquam alterationem suscipit.

I.

Deinde, ut P. Io. Evangelista in suo ad me Libello scribit, *instar scintilla petit summum capitis apicem & verticē, in eoq; incomparabili simplicitate residens velut in centro suo, & loco sibi connaturali, conservat & regit internū hominē, in tranquillitate & serenitate, quam tempore orationis, & externa abstractionis habere consuevit. Atque ita spiritali & Angelico planè modo, in summa spiritûs unitate*

II.

Qqqqq

inter

*inter res externas, quantumvis multiplices, & sensuum varijssimas operationes, anima immota permanet, ac si nihil ageret, nihil videret, nihilque sentiret.*

Quia primò apparet contracta velut in punctum, deinde se dilatat, & rarefcit, ac postremò, nisi per aliam succedaneam reparetur, evanescit, ut sæpe à pio illo R. P. Ioanne Euangelista narrari audivimus.

Quapropter ista Simeonis Iunioris, pijssimi Contemplatoris verba, de hac Mysticorum scintilla, lubenter accipimus.

Simeon.  
Episc.  
Thessalon.  
lib. Sacr  
Comment.  
cap. 36.  
Tom. 12.  
Bibliot.  
SS. Pat.

*Procul, ut stella exoriens videris, inquit ad Deum, & paulatim dilataris ( non tu ipse hoc patiens, sed mentem servi ad videndum aperiens ) sensim maior, & instar solis cerneris. Fugientibus quippe & evanescentibus tenebris, advenire te puto, qui ubique præsens es.*

Vide Bar-  
thol. de  
Martyr.  
Compend.  
spirit. p. 2.  
c. 13.

Hinc quoque colligere licet, quomodo Angelus satanæ transformans se in Angelum lucis, scintillam istam phantasticam concinnare, & Platoniorum, & impiorum hominum spiritibus animalibus imprimere possit. Quanquam nec insolens sit, ut à cælesti Patre, ut Artic. proximo diximus, tale beneficium venire potuerit: qui, ut ait Io. Gerson, aliquando *servis nequam, & filiis infidelibus exhibet panem filiorum, & satiat eos adipe spiritualium consolationum: veluti Princeps, qui damnato ad mortem, & iam iam ad supplicium destinato, mittere potest pretiosum ferculum de mensa sua, quod filio suo, cui regnum servat, dare negligit.*

Sed quâ de causâ, scintilla illa phantastici luminis ad apicem & verticem cerebri, ut antea R. P. Ioan. Euangelista aiebat, ascendere apparet?

Res ista tenebrosissima est, & ex fundo putei Democri erunda esset. Fortasse aliàs descendâ; nunc tantum dico: virtute organi phantasiæ, spirituum animalium attractivâ id fieri.

Motum autem spirituum cerebri, ab imaginatione percipi, exemplo eorum qui vertigines patiuntur, constat.

Recordare deinde, nos superius Lib. III. Cap. VIII. Art. II. sensuum internorum arcem, non in inferioribus, & capacibus illis cerebri ventriculis, sed in superiori medullâ collocasse; adeoque ibi animæ sensitivæ *ἡγεμονικόν*, & principatum præsidere. Fallor etiam, aut ideo antiqui illi Poëtæ fabulatores.



bulatores sapientiæ deam Minervam, è patris sui Iovis cerebro natam, finxerunt per cranij verticem in lucem erupisse.

In summo autem medullæ illius fastigio, videtur præcipua vis attractrix & retentrix spirituum animalium, & imaginum quæ illis spiritibus insident ac vehuntur, consistere.

Quapropter cum volumus sine perturbatione memoriæ, & confusione phantasmatum, aliquid memoriter recitare, vel meminisse, spiritum è regione inferiori cerebri videmur in verticem revocare, & è fastigio illo, imaginum seriem ante oculos facultatis cogitativæ, ordine imperturbato transeuntem, veluti recensere. Hac enim ratione dicimur supra phantasmata, in inferiori regione tumultuantia, nos erigere, & cogitativam nostram sub tranquillitate intellectivæ par-  
 tris, ac sub illustrationibus divinis quæ supernè defluunt, proximè componere. Virtus ergo illa spirituum animalium attractrix videtur scintillam illam flammulamque Mysticam sursum in regionem sereniorē & tranquilliorē cerebri, unā cum spirituum, in quibus illa lucet, nodo evocare. Lucē enim quandā innatam Medici spiritibus animalibus, qualem ferè in lampyridibus videmus, donare solent. Veluti etiam spiritibus cordis vitalibus Io. Keplerus. *Nec dubito, enim, ait, quin hanc luculam oculis quoque simus excepturi, si nobis contingat, exclusā diei luce, in cordis tenebras, illas flammā hac, introspicere.*

Io. Kepler.  
 Paralip  
 in Vitell.  
 prop. 32.

Verum difficultatis non spernendæ mihi jam in mentem venit: Quomodo lux, aut pelluciditas illa spirituum in nodum visibilem & scintillam contracta, ab imaginatione proximè, sine visu externo, cerni queat. Imaginatio enim uti solet specie non immediatè ab objecto haustā sed mediante visione sensus externi.

Sed in primis, certum non est, visionem in oculo exerceri. Multis enim & magnis Philosophis placet, speciem externi objecti, per oculum quidem transire, sed primam visionem in cerebro, aut in interiori ad cerebrum viā, fieri. Deinde, cur phantasia lucem in ipso cerebro exortam, sine transitu per oculum, non potest videre? Certè enim quibus cerebrum flavā bile accensum est, ignes & incendia sæpe somniant, &

Q q q q q 2

lumen

lumen imaginarium vident, cujus species nunquam per oculos transivit.

Deinde lucis externæ imagines spiritibus animalibus, aut cerebro impressas videri per insomnia, Aristoteles, S. Augustinus, S. Thomas, & probabiliore Philosophi, ac Medici, & nos Lib. III. (quidquid alij contrâ) docuimus.

Fieri ergo poterit, ut species phantasticæ rubei, aut flammei coloris, condensatæ ac in nodum unum collectæ, speciem scintillæ imaginationi exhibeant, & sic interno & phantastico visu cernantur. Nam species ipsas cerebro impressas ab imaginatrice videri, centies S. Augustinus affirmat. Nam quæ in somnijs videntur, *species velut corporum, non tamen corpora sunt*, inquit, & *vigilantium cogitatione formantur*, & *profunditate memoria continentur*, & *ex eius abditissimis sinibus, nescio quo mirabili & ineffabili modo, cum recordamur, prodent, & quasi ante oculos prolata versantur*.

S. August.  
lib. 4. c. 17.  
de origin.  
animæ.

Enchirid.  
c. 21.  
Act. 12.

Vnde Apostolus Petrus, inquit idem alibi, *quando existimans se visum videre, aliud pro alio sic putabat, ut à corporum imaginibus, in quibus se esse arbitrabatur, vera, in quibus erat, corpora non distingueret; nisi cum ab illo Angelus discessit*.

Non igitur sunt Augustinianæ, imò nec Aristotelicæ Philosophiæ, qui hodie docent, imaginatricem in somnijs, non circa interna phantasmata memoriæ, aut cerebro impressa, sed circa objecta sensuum externorum, proximè versari.

Quare autem Contemplatores (R. P. Ioannis Evangelistæ testimonio, & exemplo, quod vidi, & miratus sum) pulmonum respirationem suspendant, quamdiu divina contemplantur?

An quia aëris inspiratio, spirituum cerebri, quibus aër externus permiscetur, silentium perturbat, tranquillitatemque confundit, quæ contemplantibus est necessaria? Nam etiam, quando attentè & vehementer aliquid admiramur, solemus pulmonum officium suspendere.

Posse enim nullo, aut modico & insensibili pulmonum fabello, hominem aliquamdiu vivere, Medici magni docent.

Nam.



Nam divinus Hippocrates & Galenus, ait Iul. Casserius, *universum corpus, inspirabile & expirabile, (per pororum occulta spiracula) optimè dixerunt. Atque inde, quòd Heraclitus Tarentinus se modum, quo homo sub terra latibulis, sine ulla respiratione, per triginta dies, vitam trahere posset, invenisse gloriabatur. Id quod etiam suo nos exemplo hysterica femina docent, quæ quandoque longum temporis spatium sine respiratione supervivunt. Siquidem hoc nullo pacto fieri posset, si foraminulis non esset perforata cutis.*

Casser. lib. 2  
c. 3. de organ. tacte

## ARTICVLVS IX.

Quomodo, & quando intellectus humanus ad usum rationis perveniat.

**A**nima rationalis, quanquam spiritalis & immortalis, aliquamdiu tamen, non tantum in utero, sed extra uterum, temperamento corporis sui veluti submersa, aut tanquam profundissimam ebrietate obruta, ad operationes mentis inutilis jacet. Imò sensibus corporis vix utitur, sed tota, instar ferè animæ plantæ, operationibus vegetativis vacat. Expectandum enim est tempus, ait S. Augustinus, *quo nescio quam velut ebrietatem, non per unam noctem, sicut qualibet gravissima solet, sed per aliquot menses, atque annos paulatim digerat.*

S. August.  
lib. 1. c. 36  
de pecc. merit.

Post enim unum, aut alterum annum ista infantis ebrietas evidenter digeri incipit; quando parvuli membris uti, & animi sui motus qualibuscumque lingua signis promptitare iam possunt.

Ibid. c. 37.

Sed tempus, & seriem progressumque istius digestionis à M. Tullio audiamus. Parvi primo ortu, inquit, sic iacent, tanquam omnino sine animo sint. Cum autem paulum firmitatis accesserit, & animo utuntur, & sensibus, connitunturque ut sese erigant (mentitur ergo Atheus Iul. Cæs. Vaninus, cum ait infantes, ut bruta, quadrupedes permanfuros, nisi se in pedes erigere docerentur, & assuescerent) & manibus utuntur, & eos agnoscunt à quibus educantur: deinde aequalibus delectantur, libenterque se cum his congregant, dantque se ad ludendum, fabellarumque auditione ducuntur &c.

Cic. lib. 5.  
de finib.

Plenus autem rationis usus, quando honestum à turpi discernere queunt ( unde & anni discretionis vocantur ) circa septimum ætatis annum plerumque accedit. Alijs tamen interdum ferius, aut citius; prout naturalis illa cerebri humiditas tardius, aut ocyus digeritur. Sicut nec omnes ebrii uno tempore ad mentem, vini aut cerevitiæ vapore jam demersam, redeunt.

Simili enim de causa ebrii, & infantes, propter scilicet nimis fluxam cerebri humiditatem, usum rationis amittunt. Sed quomodo ista humidas impediatur usum rationis, & cur verissima sit illa Heracliti sententia, *Lux sicca, anima sapientissima*, profectò dilucidum non est.

S. Tho. 1. Certum quidem est illud S. Thomæ: *Vsus rationis requirit*  
2. q. 33. a. 3. *debitum usum imaginationis, & aliarum virium sensuivarum*: sed quamobrem imaginatio ab humore cerebri nimio in usu suo impeditur?

An quia, ubi cerebrum humore natat, spiritus animales in pueris crudi, in ebrijs vapore gravati, non expedite imaginationi serviunt, & citati, ex tempore non respondent, & phantasmata ac imagines quas bajulant, non illicò, vel certè ordine perturbato, ante oculos imaginationis repræsentant? Viæ quoque & canales cerebri, per quos illi meant, humore aut nebulâ impediti, remoram & confusionem injiciunt. Sicut enim à similibus causis, sensuum externorum officia cessare, vel perturbari videmus; ita de sensibus internis conjectandum videtur.

Debet autem spiritus animalis imaginem sibi impressam, in certa quadam extensione locali ante organum phantasiæ præsentare, ut ejus excitet cognitionem; sine qua intellectus agens abstrahere nequit speciem intelligibilem. Nec veteri etiam specie, in ebrijs, uti valet; quia intelligentem ( etiam per speciem antea abstractam ) oportet phantasmata præsentia speculari.

Fieri etiam potest, ut species phantastica sit quidem satis ampla & extensa, sed non satis intensa, ut sufficiat ad imaginandum tam expresso & vivo, ut sic dicam, phantasmate, quale



quale requiritur ad movendum intellectum.

Diceret suâ linguâ Cajetanus: *Talia phantasmata inepta sunt, ut per lumen intellectûs agentis luceant.* Cajet. 2. 2.  
q. 173. a. 2.

In cerebro enim ex propria temperie tam humido, aut infusis aliunde vaporibus tam humecto, non nisi diluta, obscura, & suffocata quodammodò phantasmata imprimi queunt.

Deinde licet phantasmata ad abstractionem speciei intelligibilis quandoque sufficere possint; non tamen ad rationis & ratiocinationis usum. Amplius enim virium, & luminis ad ratiocinandum requiritur, quàm ad speciei abstractionem, aut quàm ad nudam objecti apprehensionem, quæ solius speciei adjutorio perficitur.

Intellectum quippe ratiocinantem & discurrentem ratio inferior ( quæ est hominis cogitativa ) comitari, & ab intellectu in sequelam trahi debet. Quapropter si cogitativa præ nimio cerebri humore nimis pigra sit, aut in discursu suo delirans, intellectûs quoque ratiocinationem depravat.

Pueri tamen ad rationis usum, ratiocinationem, & consultationem de rebus sensibilibus, quarum species hauserunt, citius perveniunt, quàm ad boni & mali moralis discretionem.

Nam puer primo ætatis quinquennio, quadriennio, imò triennio, discursus suos vacillantes & infirmos habet; licet nondum boni, aut mali meriti capax sit.

Ratio est, quia intellectûs agens speciem intelligibilem honesti vel inhonesti moralis, ex tam mollibus, ut sic dicam, & imperfectis phantasmatibus nondum abstrahere potest. Quæ virtus circa annum septimum, ficcato paulisper cerebro, putatur accedere. Vnde septennes pueri vulgò malitiæ & peccati capaces habentur. Ac meritò refellit eos S. Augustinus, qui pueris grandiusculis peccatum proprium nolunt attribuire, nisi ab anni quartidecimi articulo, cum pubescere ceperint. Quod meritò crederemus, inquit; si nulla essent peccata, nisi qua membris genitalibus admittuntur. Et quidem opere externo perpetrata, & consummata. Nam cogitationibus, & tactibus impudicis multi ante annos pubertatis peccant.

Licet autem puer ante ante finem primi septennij re verâ ratio-

S. August.  
lib. 10 c. 23;  
de Genes.

ratione utatur & libera voluntate multa operetur, per antonomasiam tamen dicitur ad usum rationis, & libertatis arbitrij pervenisse, quando ad tantam usûs perfectionem venit, ut inter bonum & malum morale possit discernere; & consequenter arbitrij libertatem in tali materia exercere: quod fit, ut plurimum, exacto primo septennio. Et idcirco Iura Canonica decernunt, tunc demum validè sponsalia ab ipsis iniri. *Præsumuntur enim septennes pueri usum rationis* (hoc est, honesti & inhonesti moralis discretionem) *adepti*, ait Augustinus Barbosa, & passim Canonistæ. Vnde etiam comprehendi incipiunt prohibitionem illam Tridentini: *Ingredi intra septa monasterij Monialium nemini liceat, cuiuscumque generis, aut conditionis, sexûs, vel ætatis fuerint. Ætas quippe ista, annorum usûs rationis, seu discretionis intelligitur. Vnde nondum septennes, isto decreto à septis talium Monasteriorum non arcentur, ut ex Sanchio & Bonacinâ docet idem Barbosa. Secus de illis, inquit, qui ad peccandum movere possunt, ut sunt fatui. Qui licet intrando non peccent, peccant tamen Moniales eos admittentes.*

Trid. sess.  
25. c. 5.

Augustinus  
Barbos.  
lib. 1. c. 44.  
nu. 94. iur.  
Ecclæs.

Quare autem dormientes rationis usum amittant, & evigilando, in istu oculi ad eum redeant; eadem fermè ratio est, quæ ebrijs & infantibus rationem ligat: vapor nempe & humiditas quæ cerebrum, & cerebri, ad sensuum exteriorum organa, vias replent.

In primis enim, si tanta, & tam spissa vaporis nebula fuerit, quæ non tantum sensus externos, sed etiam imaginationem liget, ut nulla appareant phantasmata; sicut præcipuè accidit, ait D. Thomas, cum aliquis incipit dormire, post multum cibum & potum; causa amissi omnis usûs rationis in comperto est; quia sine phantasmate nihil possumus intelligere.

D. Tho.  
ibid.

Rarescente verò vaporis nube, imaginatio in insomnium resolvitur; sed oppletis adhuc sensuum exteriorum canalibus, durat somnus.

Cur autem expeditâ tunc dormientis imaginatione, intellectus vigilare, & ut suâ ratione nequeat, res sanè est in perplexo: & certius per experimentum, quàm per manifestam  
philoso-



philosophiam discere possumus. *Nam illi qui dormiendo syllogizant*, ait D. Thomas, *cum excitantur, semper recognoscunt se in aliquo defecisse*. Sepe etiam inter somniandum, quem mortuum scimus, quasi viventem alloquimur; & nomen hominis familiaris notissimum, somnianti non occurrit, & multa alia in somnio conantes meminisse, non possumus; quæ tamen dissipatâ somni nebulâ, quasi in luce clarissima, vigilante intellectu illicò videmus. Sphæra enim animæ somniantis valde angusta est, & veluti in subterraneo specu, pauca ante oculos nostros, quasi ex propinquo videmus; nec quæ undique circumstant circumspicimus, sicut in vigiliâ solemus. Hæret quippe somnians in imaginibus memoriæ cerebroque impressis, nec eas à rebus ipsis distinguit. Vijs enim à cerebro ad sensus externos, per quas imaginatio foras prospicere jam non potest, somno interceptis, intentionem suam introrsus convertit, & contemplatur solum imagines, quas in illo suo cerebri conclavi pictas invenit. *Tunc autem ita exprimuntur eadem imagines*, ait S. Augustinus, *tanquam foris sentiantur, non intus cogitentur*.

D. Th. ibid.

S. August.  
lib. 10. c. 6.  
Trin.

Quia verò imaginatio impeditur, ne per sensuum fenestras foras prospicere valeat; intellectus quoque (qui ab imaginatione in operando dependet, & cui imaginatio in ista prospiciendi libertate præire deberet) ligatus manet, ne per amplissimam activitatis suæ sphæram foras erumpere, & ut ratio superior operari possit. Vnde si somnijs nostris (ut plurimis Philosophis & Theologis videtur) intellectus se immisceat, ad imagines in conclavi imaginatricis clausas retrahitur, & circa eas præeunte & trahente imaginatione negotiatur. Vnde modo imaginario & brutali operatur. Deinde voluntas talem operationem intellectus, in appetendo sequens, non ut appetitus superior, sed ut inferior, & brutali quoque impetu exilit in amabile sic sibi propositum.

Quamobrem S. Augustinus imaginariam somniantis fornicationem negat esse peccatum. *Phantasia*, inquit, *quæ fit in cogitatione sermocinantis* (de rebus Venereis) *cum ita expressa fuerit in visione somniantis, ut inter illam & veram commixtionem*

S. August.  
lib. 12. c. 15.  
de Genes.

Rrrrr

corporum

corporum non discernatur, continuo movetur caro, & sequitur quod eum motum sequi solet. Cum hoc tam sine peccato fiat, quam sine peccato à vigilante dicitur; quod ut diceretur, sine dubio, cogitatum est.

Si autem in superiori hac, quam assignavi, causâ ligati usûs rationis in somniantibus, non totam Lectoris impleverim curiositatem, non mirabor: neminem enim unquam legi, à quo nihil amplius in hac difficultate solvendâ requirerem.

## ARTICVLVS X.

*An quispiam in una materia desipere, & in alia uti plenâ ratione, ac sapere valeat.*

**L**Oquimur de ijs qui ætate grandiores, ad plenos annos discretionis pervenerunt.

Francisc.  
Victor. Re-  
lect. 13.

Victoria, Omnino puto esse impossibile, inquit, ut quis habeat usum rationis circa aliquam materiam moralem, & non circa omnes. Nam principia moralia sunt eadem circa omnes materias: ergo qui habet iudicium ad principia unius materia, iam aliquo modo habet circa omnes. Ut qui iudicat, quod non est nocendum proximo, iam habet principium, quod non sit furandum, & quod non occidendum. Sicut qui scit quod syllogismi in Barbara, sit bona consequentia, scit hoc tenere in omni materia.

Deinde, eadem est via & ratio ad consultandum de materia iustitiæ, quæ de materia temperantiæ: ergo impossibile est, ut quis habeat usum rationis ad consultandum in materia iustitiæ, & non temperantiæ.

Sanchez. lib. 1  
d. 8. de  
Matrim.

Victoriæ tamen sententiam refellit Thomas Sanchez: *His tamen minimè obstantibus, ait, credo verius esse, inveniri sæpe delirantes in aliqua speciali materia; ac proinde in illa rationis, liberi arbitrij, meriti, atque demeriti expertes esse, sed naturaliter brutorum instar, imaginatione uti. In alijs verò rebus ratione uti, & liberè operari, capacesque esse merendi, & demerendi, ac subinde posse confiteri, alia sacramenta recipere, sponsalia ac matrimonium celebrare.*

Probat autem Sanchez testimonio Galeni, qui vitiatâ & delirante per morbum suâ imaginatione, narrat tamen iudicium



dicium & rationem sibi constituisse. Quod & plurimis alijs, ac mihi etiam olim in juventute evenisse memini. Imaginatio enim me urgebat, & ferè cogebat, ut ex cubiculo superiori, ubi in ardente febris cubabam, per fenestram defilirem: sed ratio fortissimè mirabili luctà resistebat, & imaginationis errorem stultitiamque refellebat.

Exemplo altero sibi cognito confirmat Sanchez, de pastore quodam ovium Hispano, qui non tantùm in munere pascendi oves sapiens ac catus erat; sed etiam de Trinitatis ac Incarnationis mysterio interrogatus, necessariam pro captu rationem reddebat, peccataque frequenter confitebatur; & denique in omnibus ratione ducebatur, si hoc unum excipias: quòd vehementer angebatur, ne ad habitum Monachalem induendum cogeretur. Precabatur autem, & enixè contendebat, ut chirographo aliquo sibi dato, tutus redderetur, fore ut nullo tempore ad id compelleretur. Illoq; sibi tradito mirum in modum letabatur.

Illustre quoque in Augustino Nipho, Philosopho Italo, tot Commentarijs in Aristotelem, & alijs ingenij sui operibus nobili, exemplum.

Is enim ingenio & judicio cætera adhuc fat validus, susceptus liberis, & senescente uxore, septuagenarius senex, ait Iovius, Paul. Iov. in Elog. puella, citra libidinem, impotenti amore correptus est usque ad insaniam. Ita ut plerique Philosophum senem atque podagricum, ad tibia modos saltantem, miserabili cum pudore conspexerint.

Alia exempla affert Io. Gerson. Io. Gers. de passion. animæ. Cognovi quendam tempore meo, inquit, qui ingeniosissimus erat, & peritus valde in Medicina; qui tandem fugit in nemora occulta, nec ultra comparuit. Sic aliquis existimabat se gallum, & more galli cantabat. Alius murilegum, & sub lectis mures quarebat. Alius imaginans se habere cornua in fronte, verecundabatur quotiescumque videbat se inspicì, & frontem tegebat. Alius imaginans se habere pedes ferreos, calcabat validissimè super terram. Alius ambulare non audebat, phantasians pedes suos esse vitreos. Sic salvant expositores aliqui, quomodo Nabuchodonosor Dan. 5. comedebat fœnum sicut bos, & cum feris habitabat; quia se bovem esse phantasiabatur.

Talia sunt innumerabilia. Nam infinitæ sunt species huiusmodi phantasia.

*phantasiarum & melancholiarum, secundum traditionem Medicorum. Et in Ecclesiastico dicitur, quod stultorum infinitus sit numerus.*

Fernel. lib.  
5. Pathol.  
cap. 2.

Licet verò Sanchez, ex Fernelio, causam talis delirii, aut phrenesis constituat *in humore, aut vapore ferventissimo in cerebri substantiam, eiusq; ventriculos effuso, cuius impulsu & agitatione mens in falsa quedam & fictitia traducatur*; adhuc tamen obscurum est, quare qui in una materia delirat, in ceteris omnibus non idem ei error patiens contingat. Nam quomodo imaginativæ deliratio, illasâ cogitativa, accidere possit, causa fortè non adeo recondita est: quia forsitan diversæ potentia, ut multis placet, & distincta organa sunt; unde vapor organum imaginatricis, organo cogitatricis intacto ac incolumi, infestare potest. Sed quâ viâ eadem facultas cogitatrix, quam rationem inferiorem vocamus, quæ unica est, & unicum organum pro omnibus suis operationibus habet; in una tamen operatione rectè ratiocinatur & discurret, in altera verò, extra oleas sic errat & delirat?

Videtur sanè ista diversitas semper, aut plerumquæ ex aliqua vehementi passione oriri. Passio enim amoris, odij, metûs, spei, iræ, avaritiæ, ambitionis, zelotypiæ, & aliarum id genus, postquam frequentatione actuum, aut impotenti vehementiâ radicem & vires accepit, imaginationem, & rationem inferiorem ita immutat ac perturbat; ut quotiescumque illius rei, circa quam passio versatur, species & memoria occurrit, ratio inferior phantasmata sua perversè ordinet, & impetu passionis, ratiocinationem in præceps, aut per circulos, per quos non oportet, impellat.

Vnde licet delirus probè sciat in alia materia frenum suæ ratiocinationis & discursûs intra gyrum rectæ rationis continere; ubi tamen ad materiam dominantis passionis ventum est, amittit lineas & metas recti discursûs, & aliter hîc & nunc judicandum & ratiocinandum esse, ei videtur; quia passio rationem obnubilat, & in pravum detorquet.

Non tantum ergo circa materiam, ut Victoria ait, sed etiam circa materiæ formam delirat. Quasi sibi dicat: In alia quidem materia sic judicandum est, in hac verò secus.

Sic



Sic maritus zelotypus innumeris, & levissimis conjecturis, omni loco, & tempore, uxoris castitatem exagitat & suspectat; quas conjecturas in alia materia nullum prorsus habere pondus, probè novit.

Sic Canonicus ille Insulensis in Belgio nuper (ex ambitionis & vanitatis afflatu, ut opinor) passim conquerebatur, & in Sanctiori suæ Majestatis Concilio Bruxellæ audientiam, de facta sibi à Cardinalium Conclavi injuria, postulavit: quòd in locum Clementis VIII. ipse non fuisset Rom. Pontifex electus.

Argumentum ejus erat, quod ab ipso rescivi, cum casu in consortium ejus incidissem: Quia esset Canonicus Theologalis Ecclesiæ Collegiatae immediate subjunctæ Rom. Pontifici.

Inde hanc deliram ratiocinationem consuebat.

Clemens VIII. est immediatus Ecclesiæ Insulensis Episcopus: ille me Vicarium suum, ad docendum, vice & auctoritate sua populum Insulensem, constituit: sed Vicarius est, morali æstimatione, eadem persona cum suo principali: ergo Clemente defuncto, remansi solus Ecclesiæ Insulensis Doctor supremus: nec ullum jam amplius supra me in tota Ecclesia agnosco caput. Hinc ulterius inferebat, injuriam sibi grandem factam à Cardinalibus, qui Leone XI. & Paulo V. in Sedem Clementis VIII. inducto, caput novum supra se in Ecclesia Insulensi posuissent. Sed, ut supremi & Oecumenici Doctoris (ita enim se appellabat) jus ipsi incolume maneret, debuissent eum in locum Clementis VIII. toti Ecclesiæ præficere.

Cum verò discursus istius absurditatem ei ostenderemus, stultæ tamen spei & ambitus vanitate illectus, ac mente jam evanescens, nunquam ab ea avelli potuit; etiamsi in ceteris sat sapiens videretur, & Libros, Tractatusque non ineruditos componeret.

Sed labentibus annis, de malo in pejus, de delirio in insaniam apertam proficiens, Christum se esse imaginatus, & palàm professus est: unde necesse fuit Alexianis, & vinculis

Hippocraticis eum tradere, & coërcere. Sic enim talibus, nisi maturè resipiant, evenire solet.

In principio nondum inveteratæ passionis, mentis adhuc suæ, libertatis arbitrij, meriti ac demeriti compotes sunt: sed cum mala per longas invaluere moras, revocari ab insania non possunt: ac tandem solâ imaginatione, & ratione inferiori, ut bruta, aut homines somniantes, non ratione superiori ducuntur.

Gerf. supra  
cit.

*Hinc apparet, ut sapienter monet Gerson, quàm periculosum sit homini, dimittere se nimis labi & profundari in imaginationes vel phantasias, præsertim vitiosas, & circa peritura, semperq; labentia, ut sunt beneficia, honores, & divitiæ. Nam cum generentur habitus ex actibus frequentatis, & habitus causent naturaliter, fit ut pondere suæ inclinationis sic immutent imaginativam virtutem, & ex consequenti, totum hominem; ut necessitate quadam trahatur homo, velut brutum, & sicut fit in illis, quos Philosophus bestiales appellat.*

*Sic utique verum est, quod omnis imaginatio profundata, habet suam insaniam, vel ebrietatem, & quasi dæmoniacam passionem, sicut dicit Origenes.*

Hæ tamen dæmoniacæ passionēs plerumque temperiem corporis aliqua etiam parte immutant, aut vapore melancholico, vel bilioso cerebrum feriunt; sic ut ex utraque simul causâ, morbo scilicet corporis, & animi, alteratione cerebri, & passionis impetu, rationis usus usque ad delirium in tali materia perturbetur.

## ARTICVLVS XI.

*Quo sensu D. Augustinus carentiam usûs rationis in parvulis, dixit esse effectum peccati originis.*

**M**ulti, non tantum Philosophi, aut Medici, sed etiam Theologi mirantur, imò compertæ falsitatis accusant S. Augustini doctrinam; qua parvulis, merito peccati originis, ademptum usum rationis dixisse videtur. Quasi verò infantes in uteris matrum, inquirunt, aut à partu recen-  
tes, si



res, si status innocentiae mansisset, illico rationis usum adepti fuissent.

Negat enim hoc apertè D. Thomas: *Quia in homine, ait, est speciale impedimentum, propter abundantiam humiditatis cerebri, quæ naturaliter sopit puerilem intellectum, & rationis usum intercipit.* D. Tho. 1. 2. p. 101. a. 1.

Quapropter ex regula, quam paulò antè præscripserat Idem 1. p. 99. a. 1.  
( *In omnibus asserendis sequendam esse naturam rerum; præter ea quæ auctoritate divinâ traduntur, quæ sunt supra naturam* ) colligit parvulos, etiam si primus parens non peccasset, nascituros mente humiditate cerebri submersâ; quia naturale est sic nasci, nec auctoritate divinâ aliud nobis traditum est.

S. Augustinus verò dignitatem animæ rationalis, imaginis Dei, & specialem Dei conditoris erga istam suam imaginem, providentiâ perpendens: *In illas ignorantia densissimas tenebras, ait, ubi anima infantis recentis ab utero ( utique anima hominis, utique anima rationalis ) non solum indocta, verum etiam indocilis iacet: quare, aut quando, aut unde contrusa est; si natura est hominis sic incipere, & non iam vitiosa est ista natura? Cur non talis creatus Adam? Cur ille capax præcepti, & valens uxori & omnibus animalibus nomina imponere?* S. August. lib. 1. c. 36. de pecc. merit.

Si enim talem statum natura hominis, nullo peccato temerata, initio flagitaret, in omni individuo, atque adeo in primo etiam suo fonte, Adamo, talem creari oporteret: ut scilicet postquam per omnes ætatum gradus ( ut ceteri hodie homines ) adolevisset, scientia & sapientia tanta ei daretur, quanta capiti, & doctori futuræ suæ posteritatis necessaria erat.

Non autem existimo S. Augustinum voluisse, omnes parvulos in illa plenitudine rationis, & sapientiæ nascituros fuisse, in qua primus parens est creatus; sed contendere solum, quod ubique contra Pelagianos facit: *Si nullum esset contagium primi parentis (cùm parvuli nullum suum proprium habeant) profectò nulli malo parvuli obstricti, nihil mali vel in corpore, vel in anima, sub tanta Dei iusti potestate, paterentur.* Hoc autem ex Scriptura sacra, & divina revelatione colligitur. Unde si ostendi potest, ignorantiam tantam & tam horrendam, S. August. lib. 2. c. 6. contra Iul.  
ut lo-

ut loquitur S. Augustinus, esse quoddam infantium malum, & miseriam, cenlet, non à natura, sed à peccato proprio, aut originali descendere. *Deus enim, inquit, humana, in ipsa conditione, natura, vitia non infligit immerita.* Ac alibi: *Si detrahitis animarum peccatis, miseria perseverat, aut etiam præcedit, rectè deformari dicitur ordo atque administratio Vniuersitatis.*

Ibid. c. 6.  
Lib. 3. c. 9.  
de lib. arb.  
  
S. August.  
lib. 1. c. 35.  
36. 37 de  
pecc. merit.

Notandæ ergo sunt istæ S. Augustini phrasæ, & exaggerationes: *Profundissima ignorantia, Ignorantia densissima tenebra, Horrenda ignorantia infantium, Velut ebrietas, non per unam noctem (sicut qualibet gravissima solet) sed per aliquot menses, atque annos paulatim digerenda.* Atque alia id genus, quæ altissimum velut somnum non naturalem, sed ex profunda ebrietate opprimentem significant.

Vnde non negat, ut opinor, S. Augustinus vitam infantium in Paradiso, velut à somno quodam naturali, nec longissimo, potuisse inchoari, donec causæ naturales quas Dei providentia disposuerat, humorem puerilis cerebri digessissent; sed solum negat somnum quendam prolixissimum profundissimæ & horrendæ cuiusdam ebrietatis. Qualem, non purum & sincerum semen, naturalisque innocentium parentum temperies induceret; sed à vitio, tam per originale peccatum, quàm per proximiorum parentum longas ebrietates, & intemperantias, semine, in prolem derivari solet.

Nam neque somnum quotidianum (quo spiritus vitales, animalēsque naturaliter reparantur) imò nec somnia placida à Paradisi felicitate Augustinus arcet; cur ergo vitam parvuli, ex naturali cerebri infantilis temperie, à somno quodam tranquillo, nec nimis profundo, aut vitioso incipere, tantopere renuat? De somnis enim, ac somnijs Paradisi ad Iulianum: *Si erat in Paradiso, inquit, vicissitudo vigilandi atque dormiendi, ubi non erat malum concupiscendi; tam felicia erant somnia dormientium quàm vita vigilantium.* Tantùm ergo à vita illa beata parvulorum Paradisi (si peccato primi parentis intercepta non fuisset) excludit molestias & mala tam corporis quam animi, quæ illos infelices reddere poterant: inter quæ non erat carentia usus rationis tempore somni, aut in moderato illo quasi

Lib. 5. c. 10.  
contra Iul.



quasi somno, à quo parvuli vitam inchoassent. Cerebrum quippe infantis ex nullo superfluo inquinamento, sed ex purissimo vtriusq; parentis semine, ceterisque fabricam illam innocentem ingredientibus temperatissimum, in primo limine vitæ, placidissimo veluti somno, sine dolore aut molestia sopitum non quâdam tanquam inundante ebrietate obrutum fuisset: donec evigilante paulisper per singulos ætatis gradus ratione, ad plenissimum usum ejus pervenisset; & ut de Christo loquitur S. Lucas, *profecisset sapientiâ & ætate apud Deum & homines.*

Vnde nihil in hac re, quantum existimo, S. Augustinus adversus S. Thomæ philosophiam, si undique mens ejus circumspiciatur, videtur contendisse.

Denique in hac peccati originis materia, & ijs quæ adhærent, aut circumstant, servandum omnino puto, quod in simili de materia gratiæ Dei, sapienter pronunciat Franc. Suarez: *Non tantum in rebus, quas Augustinus certas existimat, sed etiam in his omnibus, quæ simpliciter tanquam vera, & probabiliora constanter, & ubique amplectitur, sententiam ejus esse præferendam: nisi communis Patrum, vel Ecclesiæ auctoritas obstare videatur: quod rarò, vel nunquam continget. Nam si alicubi id occurrerit, explicandus erit Augustinus potius, quàm reprobandus.*

Suar. Prolog. 6. c. 6. de grat.

Rationem hujus sui judicii paulò antè depromit: *Quia tot annus, tantâ diligentia, & instantia; & quod caput est, tot Dei donis & auxilijs præditus, pro divina gratia tuenda & explicanda (addo ego, & pro peccato originis adstruendo) laboraverit.*

Nemo quoque divinam, erga animam rationalem & humanum genus, providentiam sublimiùs & eminentiùs contemplatus fuit, & profundius penetravit; totamque hominis stantis & lapsi œconomiam, & quid Deus in uno, vel altero statu decrevisset, diligentius ac studiosius perlustravit.

## CAPUT V.

## De varietate operationum intellectûs.

**V**bi intellectus passibilis speciem intelligibilem, ab intellectu agente, ex phantasmate haustam accepit, statim simplici apprehensione ad idem objectum se vertit; deinde ad judicandum, si ita videtur, aut etiam ad circa illud idem ratiocinandum, se evolvit.

Simplex apprehensio vocatur prima mentis operatio, judicium secunda, ratiocinatio tertia. Secunda enim operatio supponit primam, & tertia secundam. Nam antequam intellectus judicet, apprehendere debet extrema propositionis; ratiocinatur autem & discurrit ab judicio uno ad alterum.

Id autem quod per apprehensionem, vel judicium in mente producitur, vocatur verbum: *quia est quædam similitudo intellectu concepta de re intellecta, quam voces exteriores significant*, ait S. Thomas. Vnde etiam vocatur conceptus; *quia in verbo nostri intellectûs*, inquit alibi, *invenitur similitudo rei intellecta*; videlicet tanquam parentis ad sobolem. Verbum enim est quasi conceptus quidam & τέκνον τοῦ νοῦς proles mentis, ut Plato ait: quæ ab objecto, sive à re intellecta, per speciem quodammodo seminatur. Species verò utero mentis excepta, germinat verbum, tanquam conceptum prolemque, objecto seminanti similem.

S. Thom.  
lib. 4. c. 11.  
contra  
Gent.  
Idem 1. p.  
q. 27. a. 2.

Plat. in  
Phileb.

S. August.  
lib. 9. c. 12.  
Trin.

Pulchrè enim & concinnè S. Augustinus: *Liquido tenendum est*, inquit, *quòd omnis res, quamcumque cognoscimus, congenerat in nobis notitiam sui. Ab utroque enim notitia paritur, à cognoscente, & cognito.*

Vnde notitiam vocat quoque partum & prolem mentis. *Inde est*, inquit, *ut pro invenire, utamur verbo reperiendi. Nam quæ reperiuntur quasi pariuntur, & proli similia sunt. Vbi, nisi in ipsa notitia? Ibi enim quasi expressa formantur. Nam etsi iam erant res, quas querendo invenimus; notitia tamen ipsa non erat, quam sicut prolem nascentem deputamus.*

Res ergo paritur, cum in suo proprio esse primùm producitur;



ducitur; quando verò perdita reperitur, in sui notitia, & conceptu mentis quasi reparitur, sive denuo paritur.

## ARTICVLVS I.

*In quo simplex apprehensio intellectûs à iudicio differat.*

**P**Rima operatio intellectûs non ideo simplex apprehensio vocatur, quia objectum ejus semper sit res simplex. Possumus enim etiam rem complexam simplici apprehensione attingere: ut quando rem per propositionem ultimò significatam, prius apprehendimus, quàm ei per iudicium assentiamur.

Ideo ergo apprehensio, simplex apprehensio appellatur, quia externam quasi objecti (sive complexi, sive incomplexi) quasi superficiem tantùm lustrat ibique hæret, non tendit ulteriùs & intrat per assensum, vel dissensum.

Vnde apprehensio est solùm noscituratio quædam, & inchoata cognitio; quam iudicium assensu, aut dissensu suo complet. Nam ideo D. Thomas dicit, *Iudicium esse completivum cognitionis.*

D. Tho. 2. 2.  
q. 173. a. 2.

Philosophi tamen quidam recentiores, iudicium nihil aliud esse volunt, quàm cognitionem intrinsecè compositam ex nudis prædicati, subjecti, & copulæ apprehensionibus.

Sed nunquam potui ipsis assentiri. Experimentiâ enim ipsâ videntur mihi refelli. Nam si supra actus nostros nos attentè reflectamus, experiemur, credo, nos aliter longè affici, cum objectum aliquod nudè apprehendimus, & cum de eo iudicamus, & sententiam ferimus.

Iudicando enim, annuimus, aut abnuimus rem ita se habere: quorum neutrum facimus, quando simpliciter tantùm rem illam apprehendimus, & contemplamur.

Quod ex ἐποχῇ & suspensione iudicij Pyrrhonorum & Academicorum patet; qui omnes propositiones apprehendebant quidem & lustrabant, sed sustinebant, assensum aut

S s s s s 2

dissen-

diffensum, ne judicando errarent. In solo enim judicio est propria veritas aut falsitas, in nuda apprehensione, neutra.

Discrimen quoque ex diverso effectu ostendi potest. Sola enim objecti practici apprehensio nondum movet voluntatem; judicium verò practicum movet ad agendum. Qui enim tantum apprehendit quid agendum, & nondum judicat agendum esse, nondum se movet.

Vasq. 1. 2.  
d. 39. c. 5.

Vnde non semel miratus sum illud subtilis aliàs Vasquij: *Ego, inquit nunquam intelligere potui, assensum esse actum intellectus distinctum ab apprehensione extremorum in propositione, cum ordine convenientia unius ad aliud; aut ab apprehensione clara, in propositionibus evidentibus; aut ab apprehensione obscura, in propositionibus sola opinione notis, & creditis.*

Falsum quoque mihi videtur, quod multi dicunt: Apprehensionem propositionis objectivæ semper fieri cum ordine ad voces, aut ad alia signa, quibus objectum illud significatur. Nam sæpe, sine ulla cogitatione de vocibus aut signis, dubitando de veritate propositionis objectivæ, objectum illud apprehendimus, antequam in assensum, aut diffensum ejus nos resolvamus.

Possunt ergo apprehensio, & judicium circa idem omnino objectum versari; sed nihilominus distincti specie actus erunt, quia diversis specie modis tendunt in objectum idem. Nam judicium affirmativum est mentalis quidam nutus, quo intellectus annuit copulæ talium extremorum: judicium negativum est abnutus, quo abnuir, & quasi dissolvit illam copulam: Apprehensio neutrum facit, sed quantum in se est, suspendit, & quid judicandum, adhuc quasi deliberat.

Sed estne necesse judicium intellectus ex pluribus conceptibus subjecti, prædicati, copulæ complexum esse?

Non existimo. Possumus enim uno simplici actu, copulæ inter talia extrema annuere, aut abnuere. Cadit verò talis actus super utrumque extremum simul, quæ affirmando conjungit, aut negando disjungit. Simplicitas quoque assensus probari potest ex Aristotele, qui assensum intellectus comparat voluntatis amori, & diffensum odio. Amor autem, quo

Arist. lib. 6.  
c. 2. Ethic.



quo voluntas inclinatur se bono, & odium quo refugit à malo, sunt & is non compositi, sed simplices.

Differunt etiam apprehensio & iudicium causis proximis efficientibus. Nam apprehensio mediante specie intelligibili talis objecti elicitur; iudicium ex naturali lumine potentiae intellectivae immediativè funditur.

*Circa cognitionem enim humanae mentis, duo oportet considerare,* ait D. Thomas. *scilicet acceptionem, sive representationem rerum, & iudicium de rebus representatis.* Aitque porro, representationem, sive apprehensionem rerum, quae per iudicium copulantur, fieri per species intelligibiles è phantasmatibus haustas; *iudicium autem, inquit, humanae mentis fit secundum vim intellectuales luminis.* Materia ergo iudicii subvehitur intellectui è phantasmatibus; lumen verò intellectus eam disponit, & partes inter se ordinat, ac postremo assensu eas affirmat, aut dissensu quasi dissipat.

D. Thom.  
loco cit.

Pari modo ratiocinatio, quae intellectus ab antecedente ad consequens discurrit, non est proximè artificium speciei intelligibilis, sed opus luminis humanae mentis.

An autem conceptus apprehensivi externorum coope-  
rentur luminis intellectus physicè & efficienter, ad eliciendum iudicium assensus, res in ancipiti est.

Magis inclinor, ut negem. Quid opus enim multiplicare causalitates physicas, ubi res sine istis, æquè, aut bellius, cum sola simplici determinatione, expediri potest?

Intellectus enim à conceptibus v. g. animalis, & hominis, sine ullo adiutorio physicae causalitatis, satis determinatur ad iudicium, quo hominem esse animal iudicat. Deinde oportet dicere, in uno conceptu hominis v. g. esse vim physicae causalitatis ad eliciendos infinitos assensus, & dissensus specie & genere toto diversos. Infinita enim prædicata, aut subiecta per assensum, vel dissensum cum homine conjungi possunt: quos omnes simplex conceptus hominis cum intellectu physicè producet. Sicut enim hunc assensum, Homo est animal; ita istum dissensum, Homo non est lapis &c. physica causalitate efficere debet. Incredibile verò est, in quolibet

simplici mentis conceptu tantam ad res diversissimas & syn-  
categorematicè infinitas physicè producendas, inesse effica-  
ciam.

Simili de causa, nec in tertia operatione mentis, sive dis-  
cursu, existimo iudicium antecedentis physicam causalita-  
tem exercere in iudicium consequentis. Intellectus enim ab  
assensu antecedentis, citra causalitatem physicam, sufficien-  
ter ad assensum consequentis determinatur.

Deinde sæpe assensus majoris, aut utriusque præmissæ  
antecedentis, jam evanuit, eo temporis momento, quo in-  
tellectus consequenti assensum præbet. Causa verò actu non  
existens, nihil physicè operari valet.

Hoc denique discrimen inter iudicium & apprehensionem  
intercedit: quòd iudicium motivo aliquo propriè indigeat,  
nec sine ratione aliqua, rationale lumen intellectûs, in assen-  
sum vel dissensum se inclinare possit. Apprehensioni verò  
eliciendæ (quæ est simplex objecti repræsentatio, sine nutu  
vel abnutu) speciem in intellectu impressam habere sufficiat.

*Io. Major. in Prolog. 4* *Homo enim non potest assentiri huic, Astra sunt paria, inquit Io. Major, nisi habeat rationem ad assentiendum. Ad quod est experien-  
tia, & auctoritas Philosophi Lib. 2. de Anima, ubi ait, Imaginari  
possumus, cum volumus; opinari autem non possumus, cum volumus.*

Re verâ enim experimur, nos non ex corde, & animi no-  
stri sententiâ assentiri talibus propositionibus, *Astra sunt paria*,  
vel *Arena maris sunt pares*; quando nulla omnino ratio assen-  
tiendi potius, quàm dissentendi occurrit. Vnde qui dicit se  
assentiri, ore tantùm hoc dicit, non mente; adeoque men-  
titur, inquit Major. Voluntas enim non magis potest cogere  
intellectum ad assensum, sine ullo intrinseco, vel extrinseco  
motivo, quod aliquo modo ostendat hoc verum esse; quàm  
cogere valeat potentiam visivam, ut videat rem nullo colore,  
aut lumine tinctam. Verum enim dicitur esse objectum  
assensûs intellectûs, quemadmodum color & lumen obje-  
ctum visûs.



## ARTICVLVS II.

*Quomodo scientia, opinio, fides, suspicio, dubitatio inter se distinguantur.*

**S**cientia generatim est assensus evidens. Vocatur etiam specialiter intellectus, sive intelligentia, quia tunc deum rem propriè intelligere dicimur, cum sic se habere, evidenter cognoscimus. Opinio est assensus ex ratione tantum probabilis. Unde infirma est, & formidolosa. Potest tamen opinans, ex pertinacia, aut temeritate, actu non formidare. Fides generaliter est assensus elicitus propter testantis auctoritatem. Si auctoritas divina est, dat assensui maiorem certitudinem, quàm ratio scientifica etiam evidentissima. Licet enim certitudo, à cernendo derivata sit, quia propositionis evidenter certitudo est illustrior; certitudo tamen divinæ fidei est immobilior. Simile fermè est S. Bernardi inter illa tria discrimen.

*Intellectus, ait, sive scientia, rationi innititur, fides auctoritati, opinio solâ verisimilitudine se tuetur. Habent illa duo certam veritatem, sed fides clausam & involutam, intelligentia nudam & manifestam.* S. Ber. lib: 5. c. 3. de Considerat.

*Ceterum opinio, certi nihil habens, verum per versimilia querit potius, quàm apprehendit.*

Et quia in rebus Christianæ fidei periculosum est, hos actus inter se confundere: Omnino, inquit, in his cavenda confusio: ne aut incertum opinionis fides figat (ut in hæreticis, qui opiniones suas pertinaciter, tanquam certos & fixos fidei Articulos defensant;) aut quod firmum fixumque est fidei, opinio revocet in questionem (ut faciant illi, etiam Catholici, qui anticipatarum suarum opinionum amore, Articulos fidei jam olim fixos, ingenio suo ventilant, & in partes suas labefactando incurvare laborant.)

*Et hoc sciendum, addit Bernardus: Quia opinio, si habet assertionem, temeraria est (non enim formidat de opposito:) fides, si habet habitationem, infirma est (& proinde, ne fides quidem divina*

divina jam est. ) *Intellectus*, si signata fidei tentet irrumpere, reputatur effractor, scrutator maiestatis. Tales sunt quicumque fidei Christianæ abdita mysteria, ad ingenioli sui lucernulam, tanquam in claro meridie cernere volunt.

Altero etiam hōc discrimine ea separat D. Bernardus ibidem. *Opinio potest*, ait, *putari intellectus*. ( Si videlicet speciem scientiæ mentiatur : sicut orichalcum à non acutè cernentibus potest videri aurum ) *Intellectus opinio putari non potest*.

*Vnde hoc accidit ?* Profectò, inquit, *quia opinio falli potest, intellectus non potest. Aut si falli potuit, intellectus non fuit sed opinio. Verus nempe intellectus certam habet, non modò veritatem, sed notitiam veritatis*. Qui enim scit, novit etiam se scire. Scientia enim in anima, ut scintilla quædam lucet : aut si tenebris involuta apparet, jam probabili tantum & incertâ ratione niti videbitur, & certitudine illâ carebit, quâ scientem firmare deberet ; ideoque scientia non est.

Hoc denique inter scientiam, seu assensum objecti evidentis, & inter opinionem fidemque illustre discrimen est. Quod evidentia objecti, intellectum illicò in assensum necessariò rapit : opinio autem & fides expectant imperium voluntatis.

Sicut enim apertis oculis admotum in clara luce colorem necessario cernimus, nisi tota intentio animi sit averfa, & occupata circa objectum aliud ; ita intellectus à voluntate directè retineri nequit, quin objecto clarè sibi ostenso annuat. Et hoc, puto, verum esse experientia nobis dicet, si eam consulamus.

Cic. lib. 4.  
Acad.

Certè tamen apud Ciceronem testatur Lucullus : *Vt enim necesse est*, inquit, *lancem in libra ponderibus impositis deprimi ; sic animū perspicuis cedere*. Opinio verò & fides, quia non objecti veritatem nudam, nec in cute, ut sic dicam, suâ expositam cernunt ; ideo non statim ad primam apprehensionem intellectui assensus suus eripitur ; sed expectare animæ oportet impullum, qui fit per voluntatem. Et hinc est, ut assensus divinæ fidei requirat in voluntate, piæ affectionis imperium, quo voluntas in obsequium fidei captivèt intellectum.

Sed



Sed nonne tamen res in nebulâ ante oculos nostros posita, tam necessario cernitur, quàm si in clarissimâ luce collocaretur?

Fateor. Sed non ideo illicò & necessario extorquetur intellectui assensus rei, cujus veritas in nebula illa latet; ut, sitne id quod per nebulam ambulat, equus, an homo? Apprehensio tamen imaginationis nostræ, imò intellectûs, necessitate quadam naturali, ex apprehensione visûs, introrsus resultat & consequitur. Attamen intellectus adhuc sustinet ultimum assensum, quod est cognitionis apprehensivæ complementum, ut ex S. Thomâ Artic. præced. est dictum.

Intellectus tamen, illo etiam casu, assensum aliquem præcipitanter & necessario elicit; nempe, aliquod corpus esse, quod nebulâ involutum ante oculos nostros stat, aut movetur. Hoc enim verum esse, nebulosum non est, sed clarum intellectui ac manifestum.

Suspicio opinioni vicina est, sed infirmior. Est enim assensus animi levibus indicijs fulta.

Dubitatio verò carentiam determinati assensûs in alterutram partem significat. Hoc ideo dubium negativum appellatur: quia licet utrimque vacillet, in neutram tamen partem cadit. Si verò in unam partem cadat, cum formidine de oppositò, dubium affirmativum vocant. Sed istud, propriâ significatione, dubium non est, sed positivus & opinativus quidam assensus.

Qui enim propriè dubius est, utrimque anceps & ambiguus suspensusque manet.

Et tamen etiam qui in unam partem opinatur, nomen dubitantis adhuc retinet, propter infirmitatem assensûs, & formidinem de veritate oppositi. Hinc enim fit, ut intellectus nondum stabiliter in illam partem defixus sit; sicut defigitur, quando vel evidentiam scientiæ, vel certitudine divinæ fidei est firmatus. Nam ideo apud Græcos *ἐπιστήμη* scientia, & *πίστις* fides, ἀπὸ τῆς σταθερᾶς à stabilitate nomen suum derivant: quia nostram in rebus sistunt & stabiliunt mentem, si Clementi Alexandrino credimus.

Clemen.  
Alexand.  
lib. 5.  
Strom.

Tttt Quam-

Iac. 1.

Quamdiu verò tantum opinamur, dicimur adhuc *hæitare* (Græcè, *διὰ πρὸς ἑκατέρωθεν* in utramque partem disceptare, ut S. Iacobus loquitur) & similes esse fluctui maris, qui à vento movetur & circumfertur. Qui enim tantum opinatur, meritò disputat adhuc, & rationes, aut motiva investigat, quibus se in hanc, vel alteram partem stabiliat, & omni sedato fluctu, si fieri potest, omnino conquiescat.

## CAPUT VI.

## De voluntate.

S. Augst.  
lib. 8. c. 4.  
& lib. 10.  
c. 1. Trin.

**V**oluntas est appetitus rationalis. Rationem enim ducem habet; sicut appetitus sensitivus sensum interiorem. Omnis quippe appetitus cæcus est, & aliqua cognitione indiget, quæ præeat ei viam, & ostendat quid appetendum. *Quis enim diligit quod ignorat?* rogat S. Augustinus. Et alibi iterum: *Certè enim amari aliquid, nisi notum, non potest.*

Et ut à discipulo ejus Bernardo alicubi scriptum memini: Non possumus magis incognitum amare, quàm super inane pingere.

Talis quippe est natura voluntatis, aut animæ sub facultate illâ amantis, ut vitali appetitione se effundere non possit, nisi in bonum, quod intellectu sibi quasi ex opposito, & ante oculos constituit.

## ARTICVLVS I.

*Sed quomodo igitur Theologi Mystici dicunt, Voluntas intrat, ubi intellectus foris stat?*

**V**idetur ergo in incognitum ferri voluntas, & amore suo penetrare, quousque intellectus foris stans, faciem ei non præfert. Nam quando divina quadam caligine, inquirunt, involutus intellectus caligat, & à suo actu suspenditur,



*suspenditur, tunc voluntas maximè agit, ait præclarissimus ille Archiepiscopus Bracharensis, & Hispaniarum Primas. Ideo, inquit, Bonaventura dicit, entientibus ad unitivum amorem, intellectuales conceptiones fugiendas esse. Existens autem verè in hac caligine, cum ardentissima voluntatis dilectione, dicitur esse in ultima dispositione ad unitivum amorem, & unionem passivam, ac amorem fructivum. Et antea: Quamdiu intellectus positivis conceptibus intentus erat, vis illa voluntatis affectiva ita arctabatur, ut extra cogitationis præscriptos limites progredi non posset; & cum conceptus imperfectè ostenderent, quid Deus esset, voluntas minùs libere ac perfectè amabat, conceptibus tantummodò se coaptans. Expulsis verò conceptibus, libera remanet voluntas ad ingrediendum pelagus illud divinae bonitatis, efficacissimis actibus amoris. Et ideo dicimus voluntatem ascendere, quò intellectus pervenire non valet.*

Barthol. de  
Martyr. in  
Compend.  
doctr. spirit.  
Part. 2. c. 27.

Ac deinde objectans sibi quod suprà nobis objecimus, *Quomodo intellectu ab omni actu & conceptu erga Deum suspenso, possit voluntas libere actui dilectionis insistere?*

Respondeo, inquit, *intellectum in ea existentem caligine, non omnino manere otiosum. Sed cum expellat omnes positivos conceptus, manet in quodam negativo conceptu longè illis perfectiori: videlicet incomprehensibili, inconceptibili, inintelligibili.*

Ex qua doctrina patet, intellectum illa caligine circumfusus, non ab omni omnino actu feriari, sed confusum quendam rei incomprehensibilis, aut inintelligibilis conceptum positivum elicere; quem Mystici negativum appellant, quia objectum ejus est negatio; quæ non quid Deus sit, sed quid, aut qualis non sit, significat.

Non amat ergò tunc voluntas omnino incognitum, sed quod sub negatione incomprehensibilitatis clausum latet; etiamsi intellectus in illud profundum non penetrat, nec aperiat voluntati quid, aut quale in ultimo suo recessu sit.

Aliquando tamen ex illo clauso infiniti luminis arcano radij quidam, veluti per rimas emicant: sed, quia in apice intellectus, per splendidissimam increatae lucis irradiationem, sine admixtione phantasmatum, ut ait Carthusianus, hoc fit; edicere alijs, quid viderint, non possunt: quandoquidem lumine illo

Dion. Car.  
tus. Act. 7.

purè intellectu ali omnis phantasmātū umbra consumpta, aut tam tenuis relicta fuerit, ut res visa nequeat per illam depingi, ad caput eorum, qui simile quid nunquam sunt experti.

Si denique ea, quibus Mystici ex obscuris & perplexis istis utcumque se explicant, attentè inspiciantur, voluntas profectò non profundius in Dei arcana intrat, quàm intellectus, sed foris etiam manet; & ante januam stans, ut sic dicam, amat quod intus clausum latet. Quid enim amat? Certè aliquod ens infinitum, incomprehensibile, quale intellectus ei representat.

Sicuti ergo in futura & beata vita, utraque potentia intrat; quia intellectus clarissimā & beatificā visione, voluntati præluet, eamque introducit; ita in hujus vitæ miseria, intellectus obscurā suā laternā voluntatem etiam præit & usque ad januam adducit; nec voluntas duce suo ibi relicto, intrat sola, sed uterque foris in nocte expectat, donec beatæ æternitatis illucescat dies. Propter tria tamen, ut opinor, voluntatem solam in has tenebras intrare imaginamur.

Primum, quia voluntas in objectum suum aliter fertur, quàm intellectus. Effundere enim seipsam dicitur, & quasi ruere in complexum boni amabilis. Vnde meritò cogitatur in clausa & obscura illa rerum divinarum irrumpere, ut se illi summo & inintelligibili bono conjungat. At verò intellectus rapit in se speciem objecti, ut apud se illud noscitet. Secundò, quia distinguere & componere, ait D. Thomas, ad intellectum pertinet; ideoque ad cognitionis ejus perfectionem spectat, ut cognoscat singulatim quidquid est in re, sicut partes, virtutes, & proprietates. Amor verò voluntatis respicit rem, secundum quod in se est.

D. Th. I. 2.  
q. 27. a. 2.

Tertiò, quia amor excedit mensuram cognitionis intellectus. Nam ex tenui quandoque & frigida cognitione intellectus, accenditur in voluntate magnum incendium amoris. Ut proinde, non à tali cognitione tenuiter, & ex longinquo Deum speculante, ista flamma accendi videatur; sed ex propinquitate ipsius objecti infinitè amabilis, in quod voluntas se quasi abjicit, & in quo quandoque, tanquam cera in igne, liquefcit.

A R T I.



## ARTICVLVS II.

*Judicium, & quidem practicum, in intellectu requiritur, ut voluntas se moveat, nec nuda apprehensio sufficit.*

**S**I Philosopho credere, & acquiescere vellemus, res confecta esset.

Negat enim iudicium speculativum esse principium motus in animalibus; quia tale iudicium non versatur circa aliquid practicum & agibile: aut, si circa tale quid versetur, *ὃν κέλνει φεύγειν, ἢ διώκειν*, non præcipit fugere illud, aut prosequi. Unde voluntas non se movet. Quod experienciâ probat. Arist. lib. 3. c. 9. de Anima. Nam sæpe, inquit, quædam terribilia cogitamus, & tamen non magis fugimus, aut terremur, quàm si ea in picturâ contemplaremur; quia appetitus ea fugere non præcipit. Propter eandem rationem postea dicit: *scientificum non movet.* Ibid. c. 11.

Si autem assensus scientificus, etiam in scientijs practicis, qualis est scientia de moribus, non movet ad operandum, nisi imperium quoddam accedat; multo minùs nuda objecti practici, citra assensum, apprehensio movere poterit.

Quod etiam experimento uniuscujusque confirmat Bellarminus. *Nemo enim est, ait, qui, si ab eo queratur, cur aliquid agat, non respondeat, Quia iudico ita esse faciendum.* Bellar. lib. 3. c. 8. de grat. & lib. arb.

Verè quoque & Peripateticè Cajetanus: *Apprehensio*, inquit (sumit autem apprehensionem latè, ut etiam iudicium comprehendat) *requisita ad hoc, ut voluntas appetat aliquid, non est quacumque cognitio (alioqui intellectio speculativa sufficeret; cuius oppositum habetur in Lib. 3. de Anima; ) sed est cognitio iudicans, & præcipiens hoc esse appetendum. Nunquam enim aliquis aliquid appetit, quod non iudicat appetendum, iudicio subito, vel deliberato, expedito, vel impedito &c. Nunquam etiam aliquis iudicata appetenda esse eligeret, nisi imperet sibi ipsi animus appetendum esse.* Cajet. 1. 2. q. 77. a. 2.

Aliàs enim perfectio virtus prudentiæ, quæ Aristoteli *ἐπιτακτικὴ* præceptiva, & imperiosa est actuum voluntatis, necessaria minimè foret; contra Philosophos morales, & expressam S. Thomæ sententiam, qui ait, *Semper cum actu vir-* D. Tho. 1. 2. q. 74. a. 4. ad 2.

*tutis moralis, qui perficit vim appetitivam, esse etiam actum prudentiæ, qui perficit vim rationalem.*

Plin. lib. 8.  
c. 32.

D. Tho. 1. p.  
q. 69. a. 3.

Idem 1. p.  
q. 83. a. 1.

Talis igitur est naturalis conditio voluntatis, ut, quia cæca est & imprudens, suspendatur, nec moveat se, donec consiliarius ejus, intellectus judicet id esse faciendum. Quod in appetitu brutorum proportionaliter suum etiam habet locum. Nam quamdiu bruta aliquid sibi noxium phantasticâ contemplatione, & quadam veluti admiratione (ut cervus venatoris arcum sagittalique, sicut Plinius narrat) citra judicium practicum de fugiendo, considerant, nondum movetur eorum appetitus, ut pedibus imperet fugam; sed tunc demum, ubi judicat esse fugiendum. Ac quamvis tale judicium irrationale, informe, imperfectum, indeliberatum, & à solo naturæ instinctu præcipitatum sit; aliquid tamen ultra nudam apprehensionem est. Vis à S. Thoma audire? *Ovis, inquit, fugit lupum, ex quodam judicio, quo existimat eum sibi noxium. Et postea: Quadam agunt judicio, sed non libero; sicut animalia bruta. Iudicat enim ovis videns lupum, eum esse fugiendum, naturali iudicio, & non libero, quia non ex collatione, sed ex naturali instinctu hoc iudicat. Et simile est de quolibet iudicio brutorum animalium.*

Similia quoque sunt infantium, fatuorum, & actuum primò primorum practica judicia. Subito enim velut naturæ instinctu ac impulsu emicant & præcipitantur, non molli & libero voluntatis imperio effunduntur.

Arist. lib. 3.  
c. 10. de  
Anima.

Hinc D. Thomas negat talia agentia habere liberum arbitrium; quia judicium ultimò practicum (quod arbitrium quoddam est, quo intellectus arbitratur & practice judicat hoc faciendum esse) naturali ac necessario impulsu, ab appetitu velut extrahitur, non à voluntate libera imperatur. In hoc tamen judicio practico brutorum, imperium etiam quoddam naturale, tumultuarium, & impetuosum appetitus agnoscit Aristoteles. *Nam & phantasia, inquit, quando movet, non movet absque appetitu.*

Vbi autem anima rationalis liberè operatur, non solum actus voluntatis formaliter liber est, sed etiam arbitrium illud



illud intellectus, quo ultimò decernitur, hoc esse faciendum, à voluntate libera imperatur.

Quod inde evidenter patet, quia actus virtutis prudentiæ, quæ elicit tale iudicium practicum, est liber; non autem formaliter, ut putavit Durandus, ergo imperativè.

Deinde hæc vera est ratio, cur affectus vitiosæ voluntatis dicitur corrumpere prudentiam intellectus: imperando videlicet intellectui pravum & imprudens iudicium practicum, quo iudicat esse faciendum, quod faciendum non est.

Sic voluntas incontinentis imperat intellectui suo, ut contra rectam rationem iudicet & decernat, esse hîc & nunc fornicandum.

Tertiò, objectum talis iudicii practici (nempe, hoc esse faciendum) in plerisque humanis negotijs non est evidens, nec ex aliquo antecedente per evidentem consequentiam infertur; ergo intellectus hærebit, nec ad tale iudicium elicendum determinabitur, nisi à voluntate imperetur; sicut in alijs iudicijs inevidentibus speculativis fieri solet.

Cajet. 1. 2. q. 77. a. 2.

Meritò igitur Cajetanus: *Cùm prudentia scientia, inquit, sit in intellectu, ut subest voluntati, rectitudo rationis non ex evidentia terminorum ad rationem absolutè, sed ad rationem motam à recto appetitu, dependet. Vnde in 6. Ethic. dicitur, quòd verum intellectus practici (quo scilicet practice iudicamus, hoc esse faciendum, aut omittendum) est conformiter se habens appetitui recto.*

Arist. lib. 3. c. 110. de Anima.

Nec solùm in Libris Ethic. sed Lib. 3. de Anima Aristoteles: *Appetitus, inquit, est principium practici intellectus. Vltimum verò (id est, iudicium ipsum ultimò practicum) est principium actionis.* Ex isto quippe iudicio practico, electio voluntatis, & actio externa propinquiùs fluit, quàm ex appetitu, qui illud iudicium practicum imperat.

Vtrum autem voluntas, ut iudicium ultimò practicum intellectui liberè imperet, alio iudicio practico superiori indigeat, res perplexa apparet.

Si enim alio indiget; ergo istud aliud iudicium practicum iterùm imperabitur à libera voluntate. Hoc verò imperium voluntatis, rursus altero iudicio practico voluntatem determinante

terminante indigebit. Et cum omne iudicium practicum à voluntate imperari debeat; & tamen voluntas alio priori ad imperium illud eliciendum, iudicio practico semper egeat; dabitur progressus in infinitum, inter actus intellectus & voluntatis. Nam ante quodlibet iudicium practicum intellectus, præcedet actus voluntatis; & rursus ante quemlibet actum voluntatis anteibit aliud iudicium practicum intellectus. Hanc infinitam catenam acutè prævidens, & metuens Durandus, statuit non solam voluntatem in actibus suis elicitis, sed intellectum quoque, in isto iudicio ultimo practico eliciendo, formaliter liberum esse. Sic enim ad istius iudicii practici libertatem, necesse non erit, ut à libera voluntate imperetur, sed suam libertatem ( & quidem formalem, non tantum imperatam ) habeat à sua potentia intellectiva, à qua elicitur.

Durand. in  
2. d. 24. q. 3

Sed tam procul extra Scholæ Peripateticæ oleas aufugere, necesse non fuit.

Si enim iudicium practicum liberum est, ideo hoc est; quia anima vult ipsum elicere. Vult autem, non certè intellectu, ut sic, sed voluntate; sive interim intellectus & voluntas sint potentiæ distinctæ à substantia animæ, sive non. Igitur formalis libertas in solo actu voluntatis, non in iudicio intellectu, ut sic, debet constitui.

Vnde anima per voluntatem liberè vult, sibi quæ imperat elicere iudicium practicum, non per eandem voluntatem, sed per intellectum; si intellectus sit potentia animæ ( quod multi Philosophi negant ) distincta reipsa ab animâ & voluntate. Non indiget autem voluntas, ad hoc volendum, alio iudicio practico priori, sed ex solo iudicio speculativo bonitatis objecti, potest se determinare; propter peculiarem conditionem & officium talis iudicii practici: de quo eliciendo non instituitur ulla consultatio, sed obiter tantum intercurrit, tanquam medium & instrumentum concludendi consultationem, quæ de medijs alicujus electione fuit instituta. Quæ veritas, quia caliginosa, & quodam veluti perplexo actuum intellectus & voluntatis nodo involuta & abscon-



abscoudita est, aliquo raptim exemplo evolvi debet. Vt si quis consultationem instituat, an pedes, an equo, an curru, Lovanio Bruxellam proficisci velit, & majorem currus commoditatem esse judicaverit: ex hoc judicio speculativo, anima per voluntatem illico impellet seipsam, ut per intellectum eliciat hoc judicium ultimò practicum, Ergo iter curru faciendum est. Vnde mox eadem anima iterum, per voluntatem medium istud eliger, dicetque sibi, Volo curru vehi Bruxellam.

Hic autem nulla consultatio initur, An anima per voluntatem velit impellere se, ut per intellectum eliciat hoc judicium practicum, Iter curru faciendum est: sed tantum consultatur, An currus eligendus sit. Et ideo judicium practicum, quod finire debet consultationem, meritò proximè interponitur ante electionem quâ voluntas currum eligit. Actus autem, quo voluntas intellectui judicium practicum imperat, & ipsum judicium practicum, ita simul convolvuntur, ut habeantur quasi unus idemque actus, qui viam ad electionem proximè sternat: nec ulla de tali actu voluntatis, judicium practicum imperante, initur consultatio.

Atque hæc est ratio, quare hos duos actus, in unum sic quasi convolutos, re verâ unicum simplicem actum esse Durandus existimaverit; & ideo intellectum in eliciendo judicio isto practico esse formaliter liberum dixerit. Cum tamen judicium practicum libertatem istam non à seipso, & quatenus ab intellectu elicitur habeat; sed ab actu voluntatis obiter & raptim ei permixto & implicito. Et quisque, nisi fallor, veritatem istam in perplexitate spinarum mentis suæ delitescentem introspiciet, si attentè & acutè in eas oculum defigat.

## ARTICVLVS III.

Arist lib. 3.  
cap. 11.  
de Anima.

*An verum sit istud Aristotelis: Voluntatem in electione semper eligere quod majus est.*

**H**oc est, quod Hierony. Dandinus, hunc Aristotelis locum enarrans, ait: *Sicut bonum ubique sectamur, sic pluribus bonis propositis, maius semper bonum eligimus, minoriq; anteponimus.*

S. Tho 1.2.  
q. 13. a. 6.

Quid si igitur æqualia proponantur, ad quod voluntas se vertet? Resp. S. Thomas: *Circa alteram considerabitur aliqua conditio, per quam emineat, & magis flectatur voluntas in ipsum, quam in aliud.*

Cajet. ibid.

Sed quid si iterum, utrumque tam simile & par sit, quam ovum ovo, quomodo intellectus inveniet in uno quod emineat? *Voluntas tamen non arcebitur ad neutralitatem, nec perplexa suspensaque manebit, ait Cajetanus: quia si eminentiam in altero non inveniat, apponet. Excogitando videlicet motiva & rationes, & eas imponendo illi lanci, quam præponderare volumus.*

Nihil etiam in doctrina S. Augustini ferè vulgatius, quam voluntatem nostram non amare, nisi quod eam delectat, & è duobus semper illud præferre, quod delectat magis. In illam enim partem voluntas iudicium practicum, & mox electionem suam inclinat.

S. Augst.  
in Epist. ad  
Galar.

Nam quod magis nos delectat, ait aperte, secundum id operemur, necesse est.

Et ibidem iterum: *Si ex adverso consistant duo, præceptum iustitia, & consuetudo carnalis, & utrumque diligitur, id sectabimur quod amplius dilexerimus. Addit deinde: Si tantundem utrumque diligitur, nihil horum sectabimur; sed aut timore inviti trahemur in alterutram partem; aut si utrumque æqualiter etiam timemus, in periculo, sine dubio, remanebimus (inter unius & alterius mali fugam utrimque suspensi;) fluctu dilectionis, & timoris alterante quassati.*

Hinc



Hinc jam intelligimus, quare in conflictu carnis & spiritus, partem illam semper victricem esse dicat Augustinus, à quâ delectatio major stat. Et hominem posse tunc esse sine peccato. *si nihil eorum quæ pertinent ad iustitiam nos lateret, & eas sic delectarent animum, ut quidquid aliud voluptas, sive dolor impedit, delectatio illa superaret.*

Idem lib. de  
spir. & litt.  
cap. 35.

Consentit quoque alibi S. Thomas. *Illud enim, inquit, ad quod mens magis se habet, eligit; nisi per rationis discussionem ab eo abducatur.*

S. Thom.  
lib. 3. c. 16.  
contra  
Gent.

Tunc enim in alteram partem apponit aliquid, ut antè dicebat Cajetanus, quo tollatur æqualitas, & partem illam præponderare faciat.

In hujus etiam Philosophiæ Peripateticæ basi stat illa sententia D. Anselmi: *Angeli Beati adepti sunt quidquid potuerunt velle: nec iam vident quod plùs velle possint; & propter hoc peccare nequeunt.* Si enim aliquid viderent & judicarent amabilius Deo, amorem suum eò verterent.

S. Ansel.  
lib. de casu  
Diab. c. 6.

Non me fugit tamen, quàm multi hodie aliter philosophentur, & actum de arbitrij libertate putent, nisi voluntas in æquilibrio inter duo undique æqualia pensilis (nullâ accessione ex parte intellectus hæc, aut illàc adjectâ) valeat se determinare: imò etiam, nisi quod minus judicatum est, possit reiecto maiori, amplecti.

Sed contrariam quæ Aristotelis, S. Augustini, S. Thomæ est sententiam, ex Recentibus Bellarminus & Vasquez egregiè defensant. Et indicat, credo, divinus Psalmista; *ubi cum cecinisset, Dei mandata, desiderabilia esse super aurum & lapidem pretiosum multum, & dulciora super mel & favum;* probat hoc à posteriori, & isto signo: *Etenim servus tuus, inquit, custodit ea.* Quasi dicat: Eminentia ista dulcedinis inde probatur, quòd sancta servi tui voluntas ea auro & melli, id est, omnibus creatis voluptatibus in amore anteponat.

Psal. 18.

Probat verò Bellarminus, voluntatem præmissâ consultatione, semper necessariò, sive infallibiliter eligere id quod intellectus judicaverit, omnibus perpensis esse altero utilius, aut commodius:

Bellar. lib. 3.  
c. 8. de grat.  
& lib. arb.

*Quia voluntas non potest aliquid velle, nisi precedente iudicio rationis: ergo si iudicium sit indeterminatum, & ipsa erit indeterminata, si iudicium determinatum sit, & ipsa determinata erit. At iudicium practicum est omnino determinatum. Dicit enim tunc ratio: Hoc nunc, omnibus consideratis, est faciendum. Igitur voluntas necessario eligit id quod ultimum iudicium practicum determinavit esse eligendum.*

Ac deinde probat ab absurdo contrariæ opinionis. Nam si cum iudicium est planè determinatum ad unum, voluntas possit aliud eligere aut illud non eligere, nulla reddi poterit ratio, cur voluntas aliud non iudicatum elegerit, aut istud iam iudicatum non elegerit. Atque ita dabitur electio sine iudicio, & actio sine objecto, quod fieri non posse, iam ostendimus.

Experientia quoque idem constare dicit. Nemo enim est, inquit, qui si queratur ab eo, cur aliquid agat, non respondeat, Quia iudicio ita esse faciendum.

Et cum sibi obiecisset, quod quis posset contra determinationem ultimi iudicii practici eligere, ut ostendat suam libertatem. Respondeo, ait, Hoc ipsum tunc futurum ultimum iudicium practicum. Omnibus consideratis, bonum mihi est nunc contra rationem agere, ut me liberum esse demonstrum.

S. Bern. lib.  
de lib. arb.

Atque hoc est plane quod ingeniosè olim dixit S. Bern. Habet voluntas, quodcumque se voluerit, semper rationem comitem. Non quod semper ex ratione, sed quod nunquam absque ratione moveatur. Nam etiam, quando contra rationem se movet, novâ assumptâ ratione id facit, & præveniendò iudicium practicum ex priori ratione concipiendum, aliud substituit, quod voluntas in eligendo sequitur, & executioni mandat.

Vasq. 1. 2.  
d. 43. c. 2.

Eandem sententiam ex definitione electionis probat Vasquez. Nam dicitur id eligi, inquit, quod ex deliberatione antè positum est. Finitâ enim deliberatione, intellectus ante voluntatem quasi ponit illud medium, quod tanquam maximè conveniens eligere debeat. Vnde Aristoteles dicit eligibile esse aliquid certum & ἀπορισμένον definitum.

Arist. lib. 3.  
c. 5. Ethic.

Hæc quoque Eustratii Interpretis Aristotelis, Gregorij Nysseni, Io. Damasceni sententia, ut Vasquez ostendit, & re verâ



re verâ omnium veterum Peripateticorum una & consensuens est.

Nec tamen propter unicum istud *eligibile definitum*, quod unico iudicio ultimo practico, intellectus omnibus consideratis, ante voluntatem ponere debet, ut ipsa eligat, timerunt illi veteres, ne voluntas non liberè eligeret: manifesto jam argumento, eos aliter naturalem voluntatis nostræ libertatem intellexisse, quam faciant hodie illi, qui iudicium hoc Peripateticum ultimò practicum, tanquam humanæ libertatis hostem & suffocantem, tanto impetu oppugnant, & nulli deliberationi intervenire volunt.

## ARTICVLVS IV.

*Quid illa delectatio, quam ad actum volendi necessariam esse S. Augustinus tam sæpe affirmat?*

**D**OCTRINAM quandam S. Augustini valde solemnem, & per omnia Scripta ejus resperfam, nempe (*Non amari, nisi quod delectat*) cum doctrina iudicii practici superiori, in copulam & consensum reducere, operæ fortasse pretium erit; ne Augustinus à S. Thomâ & Aristotele, in caligine ista operationum humanæ mentis videatur dissentire. Certè enim nec Aristoteles, nec S. Thomas, aut Scotus, vel alius Scholasticorum solet in rebus morum, aut in operationibus voluntatis, principium illud operandi tam solemniter, & ferè ubique inculcare.

*Quis enim animo amplectitur, ait alibi Augustinus, quod eum non delectat?* Et postea: *Voluntas, nisi aliquid occurrerit quod delectet, atque invitet animum, moveri ad amandum, nullo modo potest.* Atque alibi, *Tunc bonum concupisci incipit, quando cœperit dulcescere.* Et Commentarij ejus præcipue in Psalmos, hujus mellis dulcedine toti sunt resperfi. *Nisi Deus pluerit, quid prod est quod seminatur? Hoc est, Dominus dabit suavitatem, & terra nostra dabit fructum suum.* Et similia, ubi non?

Quid ergo mel illud delectationis est, per omnia amabilia tam dense, & universè respersum?

Vuuu 3

In

Lib. 1. q. 2.  
ad Simpli.Lib. 2. c. 2.  
ad Bonif.

In Psal. 34.

In primis, non existimo ( quod quidam Philosophi ) delectationem qualitatem aliquam esse, quæ ab objecto delectabili, per intellectum apprehenso, dimanet in voluntatem, & eam quasi confricat atque titillet, jucundæque afficiat, ut eam sic ad se amandum proripiat.

Nam in Aristotelis, S. Thomæ, & S. Augustini Schola, delectatio, actus vitalis esse debet; quem non tantum voluntas patiatur, sed etiam efficiat. Aliàs enim erit veluti mel linguæ callosæ & insensibili superfusum, quod linguam nullo sensu afficit; quia illud non degustat, nec ullo vitali actu attingit.

Deinde notandum, non loqui passim S. Augustinum de delectatione illa strictè sumptâ, quæ est propriè fruitio, & quies quædam appetitûs in fine adepti. De qua ipse intelligitur, quando ait: *Cum pravus est amor, vocatur cupiditas vel libido; cum autem rectus, dilectio vel charitas. Amore enim movetur, tanquam ad locum quod tendit. Locus autem anima non in spatio aliquo est, quod forma occupat corporis, sed in delectatione, quod se pervenisse per amorem, letatur. Delectatio autem perniciose sequitur cupiditatem, fructuosa charitatem.*

Talis igitur delectatio est fruitio, seu lætitia quædam jucundo in complexu finis, ad quem, tanquam ad centrum pondere suo amor tendebat.

Sed mel illud delectationis, quod omnibus actionibus delectabilibus S. Augustinus aspergit, multo latiùs patet; nec tantum bonitati adepti finis, sed etiam intentioni absentis & sperati; ac omnibus universim actionibus, per quas ad finem tendimus, adhæret.

Omnis quippe actio operantem delectat, quæ affectui ejus congruit.

Delectat, inquam, obiter, saltem & velut in transitu ac fugâ; licet plena fruitionis quies tantum sit in fine.

Docet igitur S. Augustinus, voluntatem nostram guttâ saltem aliquâ melleæ hujusmodi delectationis tangi oportere, ut hoc quasi gustulo invitata, torum amoris poculum hauriat.

Sed cujusmodi essentia est iste delectationis actus?

Resp.



Resp. S. Augustini philosophiam à S. Thomæ, & Aristotelis, ut puto, hic non discordare. Igitur amor quidam molli ac dulcis, alicujus boni concupiti in omni actu delectationis intrinsecè includitur, & permiscetur; sicut favus cum melle suo.

Dixi, *boni concupiti*; quia ex respectu concupiscentiæ ad bonum, quod nobis, aut alteri ex amicitia volumus, amor rationem & dulcedinem illam delectationis imbibit, ut Vafquez subtiliter animadvertit. Delectamur enim in bono, quod alicui volumus.

Et hinc D. Thomas, Aristoteles, & ipse S. Augustinus, delectationem ex amore (videlicet amicitia) tanquam prior, nasci interdum dicunt. De nutrice enim cum parvulo suo balbutiente loquens Augustinus: *Num enim delectat*, inquit, *nisi amor invitet, decurtata & mutilata verba immurmurare?*

Vnde quia amorem quendam boni concupiti in qualibet delectatione immersum esse existimat, hinc delectationes appetitûs tam inferioris quàm superioris, amores, aut desideria sæpe appellat, & utrumque appetitum adversis delectationibus concupiscere dicit, quotiescumque oppositis amoribus & desiderijs compugnant. Et quando appetitus superior, gratia Dei armatus vincit: *Est delectatio iniquitatis in corpore*, inquit, *sed maior est delectatio voluptatis verbi sapientia, & precepti Dei.*

Et ne putares, delectationem vocari amorem, vel concupiscentiam, sensu non formali, sed causali tantum, explanans alicubi versum istum: *Prævenisti eum in benedictionibus dulcedinis &c.* Quid aptius, inquit, intelligitur (nomine dulcedinis, sive delectationis istius) quàm ipsa, de qua loquimur, cupiditas boni? Et alibi magis ex professo; cum de natura quatuor principalium passionum animæ (quæ sunt cupiditas & metus, delectatio & tristitia) differeret: *Voluntas, ait, est in omnibus, imò omnes nihil aliud quàm voluntates sunt. Nam quid est cupiditas & lætitia (sive delectatio) nisi voluntas in eorum consensum, qua volumus? Et quid est metus atque tristitia, nisi voluntas in disensionem ab his qua volumus?*

Itaque

Itaque ubi intellectus voluntati rem aliquam amabilem objecit, & eandem voluntatem iudicio practico ad rem illam suavi velut osculo dissuaviandam inclinavit; voluntas delectationem primam elicit, id est, dulci quodam concupiscentiæ amore quasi eam delibet, & osculo attingit.

Quia verò natura peccato primi parentis depravata, affectus sui incontinenens facta est, ideo lubrica, futilis, præceps, & indeliberata jam. Ille solet ista prima amorosa delectatio, sive amor delectans. Est enim tanquam festinati cuiusdam amoris abortus.

Verum tamen, quia natura nihil frustra in lucem erumpere sinit, ista abortiva delectatione, tanquam instrumento utitur, ad inclinandam voluntatem in ulteriorem, plenum, deliberatumque consensum erga illud objectum quod prima & subita delectatio præcucurrit. In naturæ tamen integræ statu, ubi nulli repentini, & primo-primi motus, sed omnes animi affectus sic erant in habentis, ut nullus effugere gestiret ante imperium voluntatis; non erant ulli præcipites, & irriti ejusmodi delectationum foetus: sed primus etiam omnium, qui ex objecto delectabili immediate concipiebatur, perfectus & tranquillâ libertate maturus effundebatur. Quales etiam aliquos ex nobis existere, in hoc perditio statu, nihil vetat; quando pederentim & circumspectè ad aliquid amandum, & in eo delectandum accedimus.

Ser. 17. de  
verb. Apo-  
sol.

Sed quomodo igitur tunc verum est illud Augustini: *Non amatur, nisi quod delectat*; si nihil indeliberatæ delectationis, subitæque complacentiæ, liberum amoris actum antevertit?

Resp. Quandoquidem prima delectatio sit etiam amor quidam dulcis, ut ex S. Augustini doctrina antè diximus; non debet, nec potest talis amor (sive liber, sive indeliberatus sit) originem ducere ex priori amore, sive delectatione, quæ voluntatem ad talem amorem pellexerit. Primus enim amor non esset, si alium priorem ante se haberet. Amatur tamè etiam tunc id quod delectat; sed quod delectat isto ipso primo amore, qui delectatio quædam, & simul amor est, ut jam dictum fuit. Vel certè, si delectationem aliquam illo amore



amore priorem & antiquiorem invenire oportet; assignari solum poterit delectatio objectiva, quæ, per metonymiam, delectatio quoque & voluptas appellari solet. Hæc autem objectiva delectatio nihil aliud est, quàm delectabilitas & bonitas objecti, qua objectum delectationem formalem, amorem, quæ in voluntate parit.

Plerumque autem S. Augustinus, in explicanda divinæ gratiæ efficaciam, utitur istâ voluntatis divinitus immisâ delectatione: ut sit spiritalis dulcedinis veluti quidam ros, quo concupiscentiæ malus ardor extinguitur. Et quia delectationem illam nihil aliud esse censer, quàm actum, & veluti radium quendam divinæ charitatis, eum infundi per inspirationem *flavissimam, & luminosissimam charitatis*, dicit. Deinde sententiam istam celebrem Apostoli: *Charitas Dei diffusa est in cordibus nostris per Spiritum sanctum, qui datus est nobis*, de charitate istâ actuali, quæ est delectatio cælestis, & medicinalis gratia Salvatoris, sæpissimè exponit. Atque eam aut *dilectionem*, aut *delectationem* passim & promiscuè appellat. *Benedictio dulcedinis, est gratia Dei, ait, quæ fit in nobis, ut nos delectet & cupiamus, hoc est, amemus quod præcipit nobis*. Et postea vocat *inspirationem dilectionis, ut cognita sancto amore faciamus; quæ propriè, inquit, gratia est*.

Quando autem interdum dilectionem & delectationem istam, *suavitatem ineffabilem* nominat; non vult isto divinæ gratiæ melle totam contrariæ concupiscentiæ amaritudinem semper dilui, & illicò evanescere (quod sanè fieri non solet, nisi quando cælestis illa dulcedo à vertice animæ in inferiorem concupiscentiæ vallem sensibilibiter defluit; ) sed vult hoc interdum fieri; aliàs verò miris & ineffabilibus alijs modis, Deo adjuvante, vincere & superesse. Nam sæviente non rarò partis inferioris maximâ tempestate, ubi unica, ut sic dicam, cælestis olei gutta, concupiscentiæ fluctibus involuta & suffocata videtur, emergit tamen, ac in supremum animæ apicem recepta, inferioris partis tumultus ex alto quasi despicit, & leni ac tranquillâ quadam activitate digerit & dissipat; aut in culmine illo & gradu suo se tenens, expectat, donec tempestas suo conflictu seipsa quasi frangat, & conflagrescat.

XXXXX

Quod

Lib. de  
grat. Chri-  
sti cap. 35.  
Rom. 5.

Lib. 2. c. 9.  
ad Bonif.

Lib. 4. c. 5.  
ad Bonif.

Lib. de  
grat. Chri-  
sti cap. 13.

Lib. de  
grat. & li-  
bero arb.  
cap. 16.

Quòd verò S. Augustinus non semper exigit illam delectationē esse magnitudine, & quadam dulcedinis profusione *ineffabilem*, inde patet; quia tantam solum postulat, quanta ad efficaciter volendum est necesse. *Certum est, inquit, nos mandata servare, si volumus. Sed quia preparatur voluntas à Domino, ab illo petendum est, ut tantum velimus, quantum sufficit, ut volendo faciamus. Certum est, nos velle, cum volumus; sed ille facit, ut velimus bonum. Certum est, nos facere, cum facimus; sed ille facit, ut faciamus, præbendo vires efficacissimas voluntati: qui dixit, faciam ut in justificationibus meis ambuletis, & faciatis.*

Ser. 17. de  
verb. Apo-  
stol. c. 3.

Ac alibi ad suum Auditorem: *Interrogo, inquit, Virum ames iustitiam? Respondebis, amo. Quod non responderes veraciter, nisi te aliquatenus delectaret. Non enim amatur, nisi quod delectat.*

Lib. de spi-  
rit. & litt.  
cap. 35  
In Expof.  
Epist. ad  
Galat.

Sufficit ergo Augustino, ut bonum aliquatenus delectet: ea-tenus videlicet, ut voluntatem in suas partes flectere valeat, sive, *ut tantum delectet, quantum diligendum est.* Vnde quando alicubi dixit: *Quod amplius nos delectat, secundum id operemur necesse est;* amplitudo ista & excessus delectationis, non in majori diffusionē, sensibilitate, & titillatione cordis; sed in majori virtute, & operandi efficacia consistit. Vnde cum David contra concupiscentiam suam pugnans clamaret, *Et tu Domine usquequo?* vice Domini Augustinus respondet: *Quousque probes, quia ego subvenio. Si enim cito subvenirem, luctamen non sentiret. Si luctamen non sentiret, tanquam de tuis viribus superbires; & per istam superbiam, nunquam ad victoriam pervenires.* In qua lucta tanē patet, plus sensibilis anxietatis, quàm delectationis misceri.

Ser. 3. de  
verb. Apost.

## CAPUT VII.

### De libero arbitrio.

**I**N confesso jam ferè apud omnes est, Liberum arbitrium non esse aliam animæ facultatem, quàm voluntatem; quæ sola formaliter libera est. Sed tamen, quia non in omni actu suo libertatem suam exerit, distinguendi sunt actus liberi, à non liberis; ut intelligamus, quorumnam actuum comparatione, liberum arbitrium vocari possit.

In qua materia ita versabor, ut intra Philosophiæ purè naturalis & Peripateticæ cancellos me contineam, nec San-  
ctissimorum



Castissimorum Pontificum decretis vetitam tractari, divinæ gratiæ & liberi arbitrij concordiam attingam.

## ARTICVLVS I.

*Voluntatis actus in somnijs, infantia, amentia, ebrietate, motibus primo-primis, perfecti iudicij defectu, liberi non sunt.*

**I**Nter somnians, actus aliquos intellectus & voluntatis interdum misceri, probabile antea diximus. Certè enim ita S. Thomas censuit: *Per modum enim quo sensus solvitur & imaginatio in dormiendo, inquit, liberatur iudicium intellectus; non tamen ex toto.*

D. Tho. 1.  
p. q. 84.  
a. 8. ad 2.

Si autem inter dormiendum solvatur ex parte iudicium intellectus, consequenter, dimidiata quasi face, voluntati præluere potest, ut ipsa se utcumque movere, & aliquid appetere valeat. Quod alibi etiam D. Thomas apertius dixit: *Vsus enim liberi arbitrij, inquit, sequitur iudicium rationis, & ideo usus liberi arbitrij, per quem voluntas in Deum convertitur, in dormiendo sufficiens esse non potest: quia, etsi sit aliquis motus voluntatis, magis sequitur phantasiam, quam iudicium completum rationis.*

Idem q. 28.  
a. 3. de Verit. ad 6.

Nam phantasia somniantis, intellectum secum rapit, intellectus verò voluntatem. Vnde phantasia mediante intellectu raptat voluntatem, sicut phantasia eadem appetitum inferiorem huc illuc immediatè vexat & agit.

In eadem sententia est S. Augustinus, dum castissimorum hominum voluntates, inter ludibria somniorum, turpidini interdum consentire conqueritur apud Deum, & deplorat; etsi ullum hinc peccatum imputari neget.

S. August.  
lib. 10. c. 30.  
Confess.

*Rerum, ait, imagines, quas ibi (in memoria) consuetudo mea fixit, & occurrant mihi vigilantibus quidem carentes viribus, in somnis autem non solum usque ad delectationē, sed etiam usque ad consensionē, factumq; simillimum. Et tantum valet imaginis illusio in anima mea, ut dormienti falsa visa persuadeant, quod vigilantibus vera non possunt. Nunquid tunc ego non sum, Deus meus? Et tamen tantum interest inter meipsum & meipsum, intra momentum, quo hinc ad soporem transeo, vel huc inde retranssea. Et pergit interrogans & mirans, quomodo ratio turpitudinem illam permittat. Vbi tunc est, inquit,*

XXXXX 2 ratio,

ratio, quâ vigilans animus talibus suggestionibus resistit, & si res ipsa ingerantur, inconcussus manet? Nunquid clauditur cum oculus? Nunquid sopitur cum sensibus corporis?

Sicuti autem rationis perfectus usus, & libertas voluntatis brevi somno quotidiano in nobis sopiuntur; ita in infantibus longiori aliquot mensium, aut annorum sepeliuntur.

Idem accidit in profunda ebrietate. Vbi enim phantasmatum nubes quasi involvunt lumen rationis, & imaginatio intellectum regit, necesse est judicia intellectus esse imperfecta, & similia judicijs imaginativis; & proinde voluntatem à talibus judicijs sic agi & præcipitari, quemadmodum appetitus inferior ab aurigâ suo, imaginatione solet; id est, instinctu, & impetu quodam, non ex electione, aut liberè.

Iul. Scalig.  
& Andr.  
Laur. lib. 4.  
q. 1.

Quod docti etiam & elegantes Medici non ignorant; cum Dormientiū, & infantīū, ac brutorū voluntates οὐ κατὰ προαίρεσιν non ab electione, ἀλλὰ κατὰ ὄρμην sed ab instinctu existere, dicunt.

Arist. lib. 3.  
c. 4. Ethic.

Denique τὰ ἐξ ἄφρωνs *repentina*, ut Aristoteles appellat, sive motus primò-primi, qui instar volucrum famulorum, excurrunt antequam totum domini sui imperium acceperint, liberi etiam non sunt; quia ante perfectum arbitrium, sive iudicium rationis evolant: cum tamen homo per arbitrium rationis, sit actuum suorum dominus, ait S. Thomas.

S. Tho. 2. 2.  
q. 158. a. 2.  
ad 3.

Comparatione igitur talium actuum, voluntas liberum arbitrium vocari non potest; quia in illos non perfectâ sponte se demittit, sed instinctu impetuque naturali, ut appetitus brutorum, præcipitatur.

Habent autem isti motus primò-primi à sensibus nostris initium. Quia enim objectum aliquod sensibile, vel species sensibilis in thesauro memoriæ asservata, subitò imaginationem impellit; similis quoque motus resilit in intellectum; ac deinde concutit voluntatem. Quod facilius evenit, quando in voluntate est habitus & pronitas in illam partem. Vnde ex *repentinis*, ait S. Thomas, *signum interioris habitus præcipuè accipi potest.*

S. Th. lib. 3.  
c. 160. contra  
Gent.

Suar. lib. 3.  
c. 16.

In Angelis verò, ubi nulla imaginatio, nullus internus vel externus sensus est, qui simili aliquo impulsu intellectum ex impro-



improvisò concutere & vibrare valeat, nullos etiam motus primò-primos agnoscere solent Theologi.

In omnibus autem illis supradictis somniantium, infantium, amentium, ebriorum, & repentinis voluntatis motibus, est spontaneum quoddam imperfectum, sicuti in brutis; quorum judicia turbulenta, & impetus, homines illi imitantur. Tale verò spontaneum ad libertatem minimè sufficit. Vnde Philosophi & SS. Patres modum agendi brutorum opponere solent modo agendi humano & libero.

*Homo ad volendum judicio rationis inclinatur*, ait S. Thomas, *non impetu nature, sicut bruta*. Et alibi: *Animalia bruta & planta non habent vitam rationalem, per quam à seipsis agantur, sed semper aguntur quasi ab alio, naturali quodam impulsu*. Quod ab Aristotele sumptum est, cum dixit: *Nullum inanimatum agere dicimus, neque etiam ullum animatum, præter hominem*.

Et S. Bernardus: *Carentia ratione animalia sensu aguntur, feruntur impetu, rapiuntur appetitu*. Et S. Augustinus: *Anima rationalis, voluntatis arbitrio vel consentit visis, vel non consentit: irrationalis autem non habet hoc iudicium; pro suo tamen genere atque natura, viso aliquo tacta, propellitur*. Quo autem modo non se agat, sed quasi ab alio propellatur, infra enarrabitur.

## ARTICULVS II.

Stante etiam perfecto judicio rationis, voluntas divino, fatali, Stoico, aut Manichæo impulsu sic præcipitari posset, ut actus ejus non foret liber.

**I**udicio rationis vigilante, & imperturbato, Deum raptu, aut impulsu quodam violento posse voluntatem creatam sic præcipitare, ut actus non remaneat in ejus potestate, nec liberè effluat, sed more actionis naturalis, extrudatur, multis argumentis, adversus Vasquium, & quosdam alios, contendit Suárez Prolog. 1. de Gratia.

Idem Theod. Smising. novissimè probat: *Quia Deus habet supremum in omnem causam secundam imperium, longè efficacius, quàm habeat potentia superior in inferiorem, & potentia in habitum suum*.

S. Th. lib. 1.  
c. 88. contra  
Gent.  
Idem 2.2.  
q. 64. a. 1.  
Arist. lib. 1.  
c. 12. magna  
moral.

S. Ber. ser.  
81. in Cant.  
S. August.  
lib. 9. c. 14.  
de Genes.

Suar. Prolog.  
1. c. 4. §.  
de Grat.  
Theod.  
Smising.  
Tract. 3. d.  
2. §. 111.  
de Deo.

*suum. Ideoque si potentia superior determinet & necessitet inferiorem ad exercitium actûs potentia inferioris, & potentia determinet & necessitet habitum suum ad exercitium actûs communis utrique; multo magis Deus potest necessitare voluntatem ad exercitium sui actûs, ad quem Deus concurret immediate.*

*Hoc autem faceret Deus concursu aliquo extraordinario, rapiendo voluntatem in alteram partem, ceu brutam pecudem, ut loquitur Dom. Sotus: raptum videlicet illum appetitui pecorino naturalem, transferendo in hominis aut Angeli voluntatem, ut eam simili modo subigat, & servire faciat, quo raptus ille subigit pecudis appetitum.*

*Et hoc modo negat S. Ioan. Damascenus omnia prædeterminari à Deo, quando ait, Omnia quidem præcognoscit Deus, non autem omnia prædeterminat. Nam ut D. Thomas interpretatur: Damascenus nominat prædestinationem, impositionem necessitatis; sicut est in rebus naturalibus, quæ sunt prædeterminatæ ad unum. In quem sensum Damascenum in Opere contra Gentes iterum interpretatur.*

*Chaldæi quoque ita hominum voluntates à siderum Influentijs suspendebant, ut ijs impellentibus in hanc, aut illam partem, velut obnoxia pecudes agerentur. Et hoc est famosum illud Astrologorum fatum, quo SS. Patres humanæ voluntatis libertatem prosterne conquesti sunt. De eo quoque Phavorinus Philosophus apud Agellium: Minimè ferendum esse censebat, quòd non modò casus & eventa, quæ evenirent extrinsecus, sed consilia quoque ipsa, & arbitria, & varias voluntates, appetitionesque, & declinationes, & fortuitos repentinosque in levissimis rebus animorum impetus, recessusque, moveri agitarique desuper è calo putarent. Tanquam si fortè in balneas ire volueris, ac deinde nolueris, atque id rursum volueris; non ex aliqua dispari variaque animi agitatione, sed ex necessaria quadam errantium siderum reciprocatione contigerit: ut placeat homines, non quod dicitur, λογικά ζῷα rationalia animalia, sed ludicra & ridenda quadam νευρόβαρα nervis alienis mobiles machinæ esse videantur: si nihil sua sponte, nihil arbitrati suo faciunt, sed ducentibus stellis & aurigantibus.*

*Talis igitur, & tam durus siderum attractus, & vectatio nostra*

Sot. lib. 1.  
c. 16. de  
nat. & grat.

S. Th. 1. p.  
q. 23. a. 1.

Agell. lib.  
24. c. 1.



nostræ voluntatis æquivalet, ut minimum, naturali instinctui brutorum, & humanam libertatem prostermit.

Vnde si Mars influxu suo in affectum occidendi, Venus in affectum fornicandi, voluntatem sic raperet, ut ei tali modo dominaretur; profectò homicida, aut fornicator non magis delinqueret, quàm si id in somniis ei accidisset.

Sic enim fatum, vel stellarum dispositio esset causa humanorum actuum, inquit S. Thomas, oporteret actus humanos ex necessitate accidere, sicut & causa necessaria est. Ita videlicet necessaria, ut impetuosa etiam sit, & intractabilis; non autem instar habitus voluntatis, qui licet causa necessaria, ac non libera sit, est tamen tractabilis, & liberæ voluntatis imperio se submittit.

In similem errorem quidam fatum Stoicorum explicant: quasi illi Adrastiam, vel Atropon quandam imaginati fuerint, quæ decreto suo Deum etiam ipsum involvat, & necessitate naturali voluntates & omnium rerum eventus in unam partem rapiat, & ibi clavo velut adamantino affigat.

Quali haud dubiè raptu voluntates humanæ in bonum, sine merito laudis, in malum sine dedecore culpæ præcipitentur. Ad quod fatale dogma Romani milites, Cannensis cladis reliquiæ, respicientes apud Livium, aut Livius ipse: *Nec fato, cuius lege immobilis rerum humanarum ordo seritur, sed culpa perimus ad Cannas. Cuius tandem ea culpa fuit? Militum, an Imperatorum?*

Sed fata Stoicorum in molliorem & meliorem partem S. August. interpretatur; ut fatum istud nihil sit aliud quàm divinæ voluntatis decretum, quod creatæ voluntati nullam necessitatem injicit. Cum enim voluntas divina sit efficacissima, ait D. Thomas, non solum sequitur, quod fiant ea, quæ Deus vult fieri, sed quod etiam eo modo fiant, quo Deus fieri vult. Vult autem quedam fieri necessariò; quedam contingenter; ut sit ordo in rebus ad complementum Universi.

Venit quoque jam in mentem, quod de Pharisæis Iudæorū Iosephus scribit: eos videlicet fatali isto dogmate simillimos fuisse Græcorum Stoicis, uti Sadducæos Epicureis; qui procul extra fatorum vincula & raptus, omnia in incertum, & casus

S. Tho. q. 27  
a. 1. de Ve-  
rit

S. August.  
lib. 5. c. 8.  
Civit.

D. Tho. 1. p.  
q. 19. a. 8.

Ioseph. lib.  
18. c. 1.  
Antiq.

& casus fortuitos dabant.

Vnde quemadmodum S. Augustinus Stoicorum sensus in Christianam divinæ providentiæ viam reducit; ita placet & Phariseos à fatali illo, & libertatis humanæ interfectore, errore abducere.

Deinde de necessitate Manichæa sic sæpissimè S. Augustinus loquitur, tanquam humanæ voluntatis libertas naturalis sic ea comprimi videatur, ut opprimi & suffocari appareat.

S. August.  
lib. 10. c. 13.  
de Genes.

Manichæi enim, cum viderent, inquit S. Augustinus, non posse carnem sine anima concupiscere, aliam quandam animam suam, ex aliâ naturâ Deo contrariâ, carnem habere putaverunt, unde concupiscat adversus spiritum.

Disput. 2.  
contra Fortunat.

Hujus verò carnalis animæ malitiâ spiritum, sive animam bonam sic opprimi dicebant, ut peccaret invita. Vnde liberum animæ bonæ, ad bene faciendum, arbitrium negabant.

Ex quo argumentatur Augustinus: Si anima bona cogitur facere malum, non est illa qua malum facit. Quod probat hoc exemplo: Si quis, verbi causâ, ligaretur ab aliquo ceteris membris, & de manu eius falsum scriberetur, sine eius propria voluntate: quæro, si hoc Iudici patefieret, possit hunc hominem falsitatis crimine condemnare? Nequaquam, sine dubio. Quia licet manus ab alio impulsâ moveretur, & scriberet, non tamen propria voluntas esset, quæ eam moveret. Sic igitur quoque, si anima bona cogitur peccare, re verâ non peccat, sed, ut S. Augustinus dicit, alia natura de illa peccat.

De Act.  
cum Fel.  
lib. 2. c. 8.

Vnde in illa Disputatione contra Fortunat. ait: Penam naturæ mala sola debet mereri, non anima bona, à qua non est peccatum. Imò neutram peccare, aut mereri poenam, in Actis cum Felice decernit. Gens enim, inquit, tenebrarum (cujus particulam esse animam malam Manichæi somniabant) non peccat, quia suam naturam facit. Natura lucis (ex qua animam bonam decertam esse delirabant) non peccat, quia quod facit, facere cogitur.

In omnibus nihilominus illis actibus humanæ voluntatis, per Manichæam, Stoicam, fatalem, aut divinam coactionem & raptum extortis, tale quale spontaneum & voluntarium adhuc superesset, licet naturalis libertas prostrata & extincta jaceret.

Plurimi



Plurimi verò tam Catholici, quàm Arminiani hæretici, opinionem Lutheri & Calvinii de servo, non libero arbitrio, sic interpretantur, ut necessitatem Manichææ, aut fatali, vel Stoicæ similem, humanæ voluntati injecisse putentur. Ideo enim Calvinii Scholam, *Stoam Genevensensem* appellant.

Dan. Tilén.  
Armin.

Et sanè, licet Calvinus in loquendo varius sit, & tortuosus ut coluber; sufficit tamen ei, voluntatem humanam à Stoica, aut fatali necessitate impulsam, non merè pati, sed influxum qualemcumque ( etiam qualem agentia naturalia ) conferre. Vnde & bonorum malorumque operum merita aufert, & libertatem humanam esse nomen sine re, palàm cum Luthe- ro confitetur.

## ARTICVLVS III.

*Ante liberam electionem, non necessario precedere debet consultatio.*

**D**Eus enim in electionibus suis liber est, nec tamen consultat de agendis. Consultare enim & delibera- re est ignorantis, ut ait S. Io. Damascenus.

Io. Damasc.  
cen. lib. 2.  
c. 22. Orth.  
D. Tho. 3.  
p. q. 18. a. 4.

Hinc S. Thomas & Scholastici negant Christum, ante libe- ras suas electiones, deliberasse. *Si enim aliquid judicetur, ut agen- dum, inquit D. Thomas, absque dubitatione & inquisitione prae- dente, hoc sufficit ad electionem. Et sic patet, quòd dubitatio, siue in- quisitio non per se pertinet ad electionem, sed solum secundum quod est in natura ignorante.*

Similiter in Angelis, ait, est electio; non tamen cum inquisitiva deliberatione consilij, sed per subitam acceptionem veritatis. Vnde quando Aristoteles electionem definit, esse appetitum praecon- siliati: loquitur, inquit S. Thomas, de electione, secundum quod est hominis. Homines autem in plerisque humanæ vitæ negotijs ignorant per quas vias ad destinatos fines commodissime per- venire possit; ideoque consilium & deliberationem adhibent, ut per eam tanquam exploratricem, viam maximè certam & idoneam inveniunt, eamque eligant.

Idem 1. p.  
q. 59. a. 3.  
Arist. lib. 3.  
c. 4. 5. Ethic.

Yyyy

Sed

Sed neque ante cujuslibet medij electionem homo instituit deliberationem, ut experientiâ notum est. Quando enim aliâs ex negotio aliquo paulò longiusculo nos evolveremus, si ad singulos voluntatis liberos actus & ictus, oporteret subsistere & deliberare? Et tamen intra brevissimi temporis morulas, centum fortasse aliquando millia liberarum operationum intellectûs & voluntatis rapidissimè convolvimus.

Tales nihilominus voluntatis operationes vocantur deliberatæ; non quòd formaliter, sed quia virtualiter deliberatæ sunt.

Diriguntur enim à perfectâ cognitione & pleno judicio rationis, quale finitâ deliberatione formari solet. Et hinc factum est, ut omnis electio libera, etiam appelletur deliberata; actus verò primò-primi vocentur indeliberati.

Igitur in plurimis negotijs, quæ celeri cursu, & tamen liberè peragimus, electiones nostræ more Angelorum, *sine inquisitiva deliberatione consilij*, fluunt, ut paulò antè S. Thomas dicebat, *per subitam acceptionem veritatis*. Quod præsertim usu venit, quando ex habitu & consuetudine liberè operamur. Ex antecedenti quippe scientiâ tunc novimus, quodnam medium sit maximè accommodum; & statim ac immediatè illud arripimus. Quæ omnia in artibus præsertim mechanicis, & omni generi hominum tam comperta sunt & palpabilia, ut homines vulgares communis sensûs, Philosophos delipere, aut joculari existiment, cum ea ab ipsis in controversiam intelligunt vocari.

Scot. in 3.  
d. 18, q. 1.

Maneat ergo firma & immobilis ista Doctoris Subtilis sententia: *Si sententia ultimata posset haberi sine discursu, ita perfectè poterit voluntas eligere in instanti, sicut precedente discursu.*



## ARTICVLVS IV.

*Etiam quando deliberatio in utramque partem, libera electioni præmittitur, voluntas ex unico iudicio practico se ad eligendum resolvit.*

**N**Am, ut Cap. præced. Artic. III. ex Bellarmini, Vasquij, Aristotelis, S. Thomæ, & veterum Peripateticorum sententiâ diximus, voluntas finitâ deliberatione unum medium, certum & ἀπορισμένον definitum eligit. Illud autem per unicum iudicium practicum definitur, & ab intellectu voluntati eligendum proponitur. Arist. lib. 3.  
c. 5. Ethic.

Sicut ergo, postquam lis aliqua coram Iudice utrimque disputata fuit, unica sententia fertur pro parte illa, à qua jus stare & præponderare videtur; ita hîc in fine deliberationis etiam accidit.

Deinde, sicut duæ sententiæ Iudicis, quibus jus totum uni colliganti, & totum alteri adjudicatur, sunt impossibiles; sic duo iudicia practica ultima, ut Bellarminus loco citato dicebat, ita compugnant, ut simul in eodem intellectu consistere non possint. Nunquam enim intellectus, finitâ consultatione iudicat, aut iudicare potest: Hoc omnibus consideratis est eligendum, & simul, Illud (priori oppositum) omnibus consideratis est eligendum.

Tertiò, sicuti Iudex, ex argumentis unius tantùm partis, quæ jus potius habet, rem definit, & sententiam fert, nec necesse est, ut alterius partis argumenta, quæ minus ponderis habere visa sunt, in memoriam ampliùs revocet; ita post deliberationem ventilatam & jactatam inter duo media, non est necesse ad liberam electionem, ut eo instanti quo hæc elicitur, intellectus repræsentet voluntati rationes factas pro electione alterius medij, quod rejicitur. Quis enim id experitur? Imò, quis contrarium non experitur? Certè enim, post deliberationem, An curru, an equo, an pedes velim aliquò proficisci: quando iudicio practico, ad currum me determino,

commoditates currûs tantùm , in iudicio illo formando, intueor; nec ad rationes quæ iter equestre, vel pedestre suadere possunt, ampliùs respicio.

Falsa igitur, nec Peripatetica est illa philosophia, quæ ad electionis libertatem requirit, ut eo instanti quo elicitur, voluntas sit æquè proximè parata & accincta, ut alterum medium, quod omittitur, eligat. Nam hoc instanti, de rationibus quæ ad alterius medij electionem movere possunt, intellectus non ampliùs cogitat, sed tantummodò de motivis, quibus deliberationem concludit, & ad hujus medij electionem, neglecto altero, se determinat. Si autem de alijs tunc non cogitat, voluntas profectò proximè accincta non est, ut alterum medium eligat; cùm incognitum appetere, & sine motivis ab intellectu ei ad illud eligendum propositis, eligere non possit.

Manet nihilominus voluntas libera libertate etiam contrarietatis; potestque aliud medium eligere, si intellectus ad deliberationem iterandam applicetur, & sufficientes rationes voluntati proponat, quæ eam ad illius medij electionem valeant permovere.

#### ARTICVLVS V.

*Non tantùm electio medij, sed etiam intentio finis libera esse potest, secundum doctrinam Aristotelis.*

**I**N primis, res evidens & certa est, si voluntas applicet intellectum ad deliberandum, Vtrum intentio, sive amor alicujus finis hîc & nunc eliciendus, an potiùs ab amore illo supersedendum sit; aut etiam, an voluntas amare finem oppositum velit. Sic homo continens à concupiscentia tentatus, deliberare potest, An amare voluptatem carnis, an potiùs continere, vel amare honestatem castitatis, melius sit. Quod etiam in amore finis ultimi, ac summi boni, locum habere potest. Homo enim inter miseras hujus vitæ adhuc positus, interdum deliberat, An amori divino, an voluptatibus vacare velit.



velit. Licet enim in tali objecto, qui Deus summè bonus est, nihil mali inveniatur, in exercitio tamen ipso amoris ejus, difficultates reperit; & maximè, quia amor iste à voluptatibus sensibilibus voluntatem abstrahit, ad quas concupiscentia eam retrahit & sollicitat.

Deinde duo fines possunt esse inter se oppositi, & dubitare, ac deliberare possumus, Vtrum ex duobus pro fine ultimo nobis constituere velimus.

Inde enim fabula illa celebrata Herculis in bivio positi, quem virtus in unam, voluptas in alteram viam invitat ac pellicit. Hinc quoque Stoicorum & Epicureorum altercationes & pugnae; dum illi in honestate virtutis, isti in blandimento voluptatis summum & beatificum bonum constituunt.

Vbi autem finem aliquem, sive ultimum, sive subalternum nobis præfiximus, non ampliùs de eo deliberamus. *Consultamus enim*, ait Aristoteles, *non de finibus, sed de ijs quæ ad finem tendunt. Nam neque Medicus, an sanare; neque Orator, an persuadere; neque Politicus, an legibus bene institutam reddere patriam debeat; neque ex alijs quisquam de fine consultat: sed omnes, cum finem quempiam statuerint, quo modo & per quæ media ad illum pertingere possint, considerant.*

Arist. lib. 3.  
c. 5. Ethic.

Sic alibi de Intemperante, ut v. g. Sardanapalo, aut Smindyride Sybaritâ aliquo, qui voluptatem ubique ex professo tanquam finem sectatur, Aristoteles docet, eum non ex electione, sed præter electionem & consilium, excessus jucundorum appetere ac profèqui.

Lib. 7. c. 6.  
Ethic.

Itaque omnes isti, Medicus, Orator, Politicus, Intemperans, si finis in quem ex professo collimant, ijs per-intellectum proponatur; illicò sine deliberatione, an appetere velint, nec ne, finem illam appetunt.

Deinde inter voluntatem finis, & electionem mediorum hoc discrimen statuit Philosophus: *Quòd electio nullo modo sit voluntas ( id est, actus voluntatis ut sic ) licet proxima ei esse videatur. Electio siquidem non est impossibile. Quæ si quis diceret se eligere, stolidus esse videretur. Voluntas verò est etiam impossibile; ut immortalitatis. Voluntas præterea est eorum etiam, quæ ab eo qui*

Lib. 3. c. 4.  
Ethic.

vult, agi nullo modo possunt: ut Histrionem aliquem, aut Athletam victorem evadere volumus. Cujusmodi sanè nihil quisquam eligit, sed ea tantum, quæ à se fieri posse existimat.

Lib. eod.

c. 5.

Ac tandem rem ad istam conclusionem adducit: *Consultamus de agendis quæ sunt in nostra potestate.* Et deinde electionis definitionem formans: *Electio*, inquit, *est consultativa appetitio eorum quæ sunt in nostra potestate.* Ex quibus, & similibus Aristotelis verbis, multi Theologi Scholastici hoc quasi Peripateticum dogma fabricaverunt: Voluntatem operari per modum naturæ, adeoque liberam non esse in amore finis, quando nulla consultatio antecessit; in sola autem mediorum electione libertatem ejus exerceri.

Quasi Philosophus dixisset, electionem mediæ esse in nostra potestate, intentionem verò, sive amorem finis minimè. Quod profectò non est ita. Solum enim in illo discrimine dixit, Voluntatem posse etiam esse impossibilem, item eorum quæ ab alijs, non tamen ab ipsomet volente agi possunt: electionem verò tantum esse eorum, quæ ipse eligens in sua esse potestate, seu à se agi posse existimat.

Vbi loquitur non de actibus internis à voluntate elicitis, sed de objectis externis circa quæ amor finis & electio mediorum versantur. Quòd scilicet voluntas non tantum appetere possit fines, qui sunt in nostra potestate, sed etiam impossibiles, & cognitos ut tales (sicut nunquam mori;) velleitate saltem conditionatâ; nunquam verò eligamus aliquod medium, nisi existimemus nobis illud esse possibile.

Lib. 3. c. 4.  
Ethic.

Quantum verò ad actus internos, utrumque perfectè spontaneum & in nostra potestate, ut puto, situm esse existimat. Vnde non tantum electionem mediæ, sed etiam amorem finis, propter perfectam spontaneitatem, & similem libertatem quæ in electione mediæ reperitur, electionem aliquando nuncupat. Nam licet voluntas, inquit, electio propriè non sit, proxima tamen ei esse videtur. Vnde etiam in usu quotidiano loquendi, addit Interpretes Eustratius, *Velle, & Eligere, quasi idem significant, pro eodem accipere consuevimus. Ut cum dicimus, Eligo agrum colere, id est, volo.*

Atque adeò Aristoteles virtutem moralem definiens, *Habitu*



*tum electivum* eam vocat. Virtutes autem morales non tantum circa media, sed etiam circa fines versantur. Omne enim illud est finis, quod propter suam honestatem appetitur. Nam bonum honestum, & bonum delectabile, ut sic, propter se, & ut fines, solam autem bonum utile, ut medium, in Schola Peripatetica, appetuntur.

Si igitur voluntas honestatem temperantiæ, ut finem appetat, non minus actum virtutis temperantiæ, laudis & meriti dignum eliciet, quam si abstinere ab hoc cibo eligat tanquam medium, quo mediocritatem & honestatem illam temperantiæ attingat. Unde amor ille honestatis temperantiæ ut finis, perfecte spontaneus, voluntarius, & liber erit, licet nulla præmissa deliberatione, ex perfecto iudicio rationis, à voluntate eliciatur, non, ut motus primò-primus, impetu naturæ excutitur.

Nam, ut antea ex S. Thoma dicebamus, etiam electio quæ ex simili unico iudicio rationis, per subitam acceptionem veritatis, sine deliberatione elicitur, libera est in Angelis. Huius quoque doctrinæ Peripateticæ signum est, quod Aristoteles volens ostendere spontaneum latius patere liberâ electione, pro exemplo spontanei non-liberi non alleget amorem finis, sed brutorum, & puerorum appetitiones, ac motus repentinos, seu primò-primos: quasi intentio finis, licet propriè electio non sit, attamen electioni, quantum ad perfectam spontaneitatem & libertatem, simillima sit.

*Spontaneum, inquit, latius patet. Nam spontaneum cum pueris, & reliquis animalibus commune est, electio minimè. Et qua derepentè fiunt, spontanea sunt, non autem ex electione.*

Deinde Lib. 2. Phisic. causam efficientem universim bi-  
membrem tantum esse significat: ut alia sit τὸν φύσιν, eorum quæ  
fiunt per naturam, & altera τὸν ἀπὸ διαβολῆς eorum quæ fiunt per  
mentem, sive per intellectum, qui voluntatem tanquam auriga  
regit. Deinde etiam voluntatem, ipsam mentem imperatricem  
S. Damascenus appellat. Unde divisio illa causæ efficientis  
solet sic concipi, & ex Aristotele verti: Causa efficiens alia  
est naturalis, alia voluntaria, sive libera. Sub quo ultimo  
membro

D. Tho. 1. 2.  
q. 59. a. 3.

Arist. lib. 3.  
c. 4. Ethic.

Lib. 2. c. 6.  
Phisic.

S. Augusti.  
lib. 5. c. 2.  
Civit.

membro non tantum voluntatem respectu electionis medij, sed etiam respectu amoris finis, comprehendit.

Scot. ia 1.  
d. 1. q. 4.

Quam doctrinam egregie & fortiter, adversus D. Thomam (ut ipse putat) asserit Doctor Subtilis. *Necessitas naturalis, ait, non stat cum libertate. Quod probo: quia natura & voluntas sunt principia activa habentia oppositum modum principiandi; ergo cum modo principiandi voluntatis non stat modus principiandi nature: sed voluntas liberè vult finem, ergo non potest necessitate naturali velle finem; nec, per consequens, aliquomodo necessario.*

*Assumptum, scilicet quod voluntas liberè velit finem, probatur: quia eadem est potentia quæ vult finem, & illud quod est ad finem; ergo habet eundem modum agendi: quia diversi modi agendi arguunt diversas potentias. Liberè autem operatur circa ea quæ sunt ad finem; ergo & circa finem.*

Scot.  
Quodl. 16.

Et alibi iterum Peripateticum hoc fundamentum inculcans: *Voluntas, inquit, semper habet suum modum causandi proprium, scilicet liberè. Non magis igitur voluntas potest esse naturaliter activa, quàm natura, ut est principium distinctum contra voluntatem, possit esse liberè activa.*

Nam voluntas connaturali suo modo, præeunte sufficienti iudicio rationis, ita agit, ut seipsam agat; agens verò naturale, agitur potius à natura, tanquam ab alio.

Vnde jam patet, divisionem istam agentis in naturale, & voluntarium, esse adæquatam. Omne enim agens in actionem suam se resolvit, vel à se, vel tanquam compulsus ab alio.

Eadem est prorsus S. Augustini, S. Prosperi, S. Fulgentij, S. Gregorij Magni, S. Io. Damasceni, Ven. Bedæ, S. Anselmi, S. Bernardi, S. Aëlredi, & omnium veterum S. Augustini discipulorum sententia; ut multa densaque testimoniorum nube demonstrare non esset difficile; nisi in materias vicinas hodie tanto strepitu disputatas, ingredi jam nollem. Nemo verò omnium SS. Patrum hanc philosophiam è suis latebris longius extraxit, & clarissimo soli exposuit, quàm S. Bernardus.

Illi ergo SS. Patres inter voluntatem & liberum arbitrium nihil distinguunt; sed sive finem, sive media voluntas respiciat, sem-



semper verâ libertate libera est, & indifferenter voluntatem, & liberum arbitrium appellant. Nam *neceſſe eſt*, ait S. Auguſtinus, *ut cùm volumus, libero velimus arbitrio*. S. Bernardus quoque voluntatem & liberum arbitrium tam circa finem quàm circa media, in unum confundens: *Vbi voluntas*, inquit, *ibi libertas*. Et hoc eſt, quod dici puto liberum arbitrium.

S. Auguſt.  
lib. 5. c. 10.  
Civit.

S. Ber. lib.  
de Libero  
arb.

Ratio verò eſt, quia ſive in fines ſurſum, ſive in media deorſum voluntas ſe moveat, ſemper actûs ſui imperatrix eſt, eumque imperio formaliter, vel virtualiter ſuper ipſum reflexo, à ſe exire jubet. *Omne enim quod vult*, ut ex veterum Patrum philoſophia S. Bonaventura, *ad ſuiipſius imperiũ appetit: quia ſic vult, ut velit ſe velle illud*. Et S. Anſelmus, cujus veſtigia ſequitur: *Omnis volens*, ait, *ſuum Velle vult*. Et poſtea: *Sicut cùm homo mentitur vult ipſum Mentiri; ſic cùm vult mentiri, vult ipſum Velle*.

S. Bonan. in  
2. d. 25. q. 2.

S. Anſel. lib.  
de Libero  
arb. c. 5.

Et propter hanc cauſâ voluntas dicitur ſeiſpâ uti, quemadmodum ceteris animæ facultatibus utitur. *Noli mirari*, ait S. Auguſtinus, *ſi ceteris per liberâ voluntatē utimur, etiã ipſâ liberâ voluntate per eam ipſam uti nos poſſe; ut quodammodò ſeiſpâ utatur voluntas, quæ utitur ceteris, ſicut ſeiſpâ cognoscit ratio, quæ cognoscit & cetera*.

S. Auguſt.  
lib. 2. c. 19.  
de libero  
arb.

Et ſubtilis Cajetanus: *Dum utor voluntate mea, applicando illam ad amandum Deum* ( qui proſectò eſt amor finis, non mediæ electio ) *conſentio in talem uſum, & eligo illum*. Et ſic uſus habet rationem, & cum hoc eſt volitus ut obiectum conſenſûs, & electionis. Quo ſanè modo non ſe movet appetitus brutorum, qui ſine tali reflexione, & ſuiipſius uſu, rectâ quaſi lineâ, à natura, velut ab alio, in obiectum ſuum protruditur. Adeoque non eſt propriè *Instrumentum ſeiſpâ movens*; quomodo S. Anſelmus appellat & definit voluntatem. Iſta quippe eſt eminentia & dignitas imaginis Dei, quæ in mente, id eſt, in ſupremo apice, & veluti capite animæ rationalis ( quod intellectum & voluntatem uno velati nodo complectitur ) conſiſtit. *Mentem enim roũ apud Græcos, non aliud quid intelligimus*, ait eruditus ille Afer, *quàm ſuggeſtum animæ ingenitum & inſitum, & nativum proprium, quo agit, quo ſapit, quem ſecum habens ex ſemetipſa, ſe commoveat in ſemetipſa, atque ita moveri videatur ab illo, tanquam ſubſtantia alia*.

Cajet. 1. 2.  
q. 9. a. 4.

S. Anſel.  
lib. de conſ.  
cord. c. 21.

Tertull. lib.  
de Anima  
cap. 21.

Hic quoque *anima suggestus*, est ἡγεμονικὸν principale illud Græcorum, quo mentis illa pars, quæ voluntas dicitur, se ipsam & alias animæ potentias movet & gubernat. Vnde ubi Psal. 50. Interpretes 70. verterunt, πνεύματι ἡγεμονικῷ *spiritu principali*, Arias vertit, *spiritu voluntario*, confirma me.

Propter verò illud imperium quo voluntas connaturaliter quidlibet ad imperium sui ipsius vult, quia sic vult, ut velit se vel le illud, ut D. Bonaventura superius loquebatur; in tali actu voluntatis est spontaneitas perfecta, quam Bonaventura & Scotista *libertatem essentialem*, S. Bernardus & S. Thomas *libertatem naturalem* appellant: estque veluti cardo qui tam, in quo liberum voluntatis arbitrium huc atque illuc liberum flectitur. Sine isto enim libertatis essentialis cardine, nulla esset in actibus voluntatis, contrarietatis aut contradictionis accidentaria libertas; ut ex brutorum, & hominum amenum, vel somniantium appetitionibus pater. In omnibus enim istis est quædam etiam indifferentia, qua nunc hoc, nunc illud appetunt; & tamen nulla propria contrarietatis, vel contradictionis libertas; quia talis indifferentia in cardine libertatis essentialis non vertitur, sed illi actus bruto naturæ instinctu, ac impetu effreni nunc in hoc, nunc in illud contrarietatis aut contradictionis latus expelluntur.

Vt jam appareat, quàm solidè, & à priori D. Thomas tam sæpe probet in Deo, Angelis, & hominibus inesse arbitrij libertatem, quia ad volendum iudicio rationis, non impetu naturæ, sicut bruta, inclinantur.

D. Tho. lib.  
1. c. 88.  
contra  
Gent.

Impetus enim ille naturæ brutorum, perfectæ spontaneitatis, sive libertati essentiali directe opponitur, quæ liberi arbitrij lances agitare debet, ut huc illuc in diversa liberum flectatur.

Quidam tamen hanc essentialem, sive perfectè spontaneitatis libertatem nomine libertatis non dignantur. Sed immeritò. Est enim libertatis contrarietatis & contradictionis veluti anima; sine qua duæ istæ tam famosæ libertates, veræ libertatis nomen non merentur. Nam in somniantibus, & phreneticis quandam interdum consultationem intellectus,

& in-



& indifferentiam voluntatis, in appetendo experimur; verâ tamen contrarietatis vel contradictionis libertate inanem & cassam; quia naturæ impetus, non libertatis essentialis imperium resolvit phrenetici, aut dormientis voluntatem in hanc, aut illam partem.

Iam etiam intelligimus, cur S. Prosper *Liberum arbitrium* definierit, *Rei sibi placita spontaneum appetitum*. Illud quoque S. Augustini: *Moveri per se animam sentit, qui sentit in se esse voluntatem. Nam si volumus, non alius de nobis vult. Et iste motus anima spontaneus est. Hoc enim ei tributum est à Deo. Uterque autem de perfecto spontaneo loquitur; quod est pars præcipua illius divinæ imaginis, quam Conditor impressit creaturæ rationali.*

S. Prosp.  
contra  
Collat. c. 19.  
S. August.  
lib. 83. q. 84.

Huic denique spontaneo, sive voluntario perfecto, repugnat necessitas illa quam S. Anselmus *præcedentem & cogentem* vocat. Hæc enim ita actum voluntatis antecedit, ut eam cogat & præcipitet; qualis est necessitas, quam superius brutalem, fatalem, Stoicam, aut Manichæam appellavimus.

S. Ansel. c. 2.  
3. Concord.

Hanc enim S. Anselmi *præcedentem necessitatem*, perfectæ spontaneitati inimicam; exponens Subtilis Scotus: *Duplex, inquit, est necessitas. Una prævia est ad voluntatem; ut voluntas intel ligatur cadere sub necessitate tanquam impellente in actum, & figente in actu. Si autem, sic esset, voluntas ageretur, & non ageret, nec staret in tali actu libertas. Altera est necessitas concomitans (sive consequens; ) ita ut ipsa intelligatur cadere sub voluntate, sic ut voluntas, propter firmitatem libertatis suæ, sibi ipsi necessitatem imponit in eliciendo actum, & in perseverando, seu figendo se in actum. Quam posteriorem necessitatem S. Bernardus ideo voluntariam appellat, negatque quidquam ab ea de libertatis integritate delibari; ut S. Anselmus, Scotus, ac Henricus, alijque consentiunt. Nam necessitas sequens, nihil esse cogit, inquit S. Anselmus. Prior verò necessitas cogens nuncupatur; non quod ita cogat, ut causa quam cogit, nihil omnino agat (quomodo enim aliàs, ad agendum eam cogeret?) sed quia sic cogit, ut id quod cogitur, actionem suam in sua potestate & freno non retineat, sed in illam à necessitate cogente præcipitetur. Sic*

Scot.  
Quodlib.  
16. q. 2.

S. Ansel. c. 2.  
Concord.

S. Damascenus & Patres negant bruta, cum appetunt, seipsa agere, sed à natura agi, & ad appetendum cogi. Quia licet violentia & coactio proprie solum locum habeat, quando id quod violentiam & coactionem patitur, nihil omnino agit; SS. Patres tamen necessitatem fatalem, aut Manichæam, in quibus causa ad agendum tali necessitate coacta & compulsa, aliquid simul agit, *per verbum*, cogendi, *explicare solent*, ait Franc. Suarez: *vel quia non est aliud verbum Latinum, quo effectus ille explicetur, vel quia illa necessitas, nisi adhibendo vim aliquam, inferri non potest.*

Suar. Pro-  
log. 1. c. 4.  
n. 20. de  
Grat.

## ARTICVLVS VI.

*An deliberatio, quæ medij electionem in nobis antecedere solet, intrinsecum modum se movendi & determinandi voluntatis immutet.*

D. Th. 1. p.  
9. 83. a. 3.

**D.** Thomas, qui liberum arbitrium *Vim electivam* definit, & peculiarem libertatem voluntatis in electione mediorum agnoscere videtur, quam in amore finium ut sic, non invenit; tanti facit deliberationem intellectus, quæ electiones nostras antecedere solet, ut liberi arbitrij actum per eam in potestate nostra dominioque constitui, ac consequenter, libertatem suam inde accipere dicat.

Idem 1. 2.  
9. 6. a. 2.

*Dicendum, ait alicubi, quod ex hoc contingit quod homo sit dominus sui actus, quod habeat deliberationem de suis actibus. Ex hoc enim, quod ratio deliberans se habet ad opposita, voluntas in utrumque potest.*

Verumtamen cum deliberatio, sive consultatio adhibeatur ad instruendum liberum arbitrium de medio maximè idoneo ad assecutionem finis, ipsa est aliquid prorsus extrinsecum electioni, quod modum connaturalem se movendi voluntatis non immutat, sed objectum solum ei ostendit, in quod naturali suo modo se inclinet. Vnde si voluntas à se illum modum (quæ naturalis, sive essentialis libertas ejus est) non haberet, deliberatio antecedens eam, illi nequaquam dare posset.

Fac



Fac enim, post omnem, & longissimi temporis deliberationem, ut in puncto, quo se ad eligendum determinare voluntas debet, fatalis raptus, amentia, aut plena ebrietas homini superveniat; electio quantumvis sic antè deliberata, libera tamen nequaquam erit.

Deinde nec ipse D. Thomas, ad omnem liberam electionem, ut suprà Artic. III. diximus, deliberationem requirit. Damasceni quippe vulgari pronunciato: *deliberatio est ignorantis*. Vnde Deus & Angeli, ait D. Thomas, *habent promptam electionem liberi arbitrij: homo verò in eligendo difficultatem patitur, propter incertitudinem & dubitationem*. Dubitatio ergo & ignorantia hominis eum deliberare facit. Et cùm alibi definitionem electionis sibi objecisset, *Electio est appetitus praconsiliati*, Respondet: *Electio pra-supponit consilium ratione iudicij, vel sententiae. Vnde quando iudicium, vel sententia manifesta est absque inquisitione, non requiritur consilij inquisitio*.

Idem q. 24.  
a. 3. de  
Verit.  
Idem x. 2.  
q. 14. a. 4.

Vbi ergo iudicium, quod deliberationis est clausula, minime dubium citra deliberationem haberi potest, ad libertatem electionis deliberatione non est opus. Sic autem in humanis artibus contingit, addit D. Thomas, *quæ per determinatas vias procedunt ad determinatos fines. Sicut scriptor non consiliatur, quomodo debet trahere litteras: hoc enim determinatum est per artem*.

Vbi tamen multa media voluntati per intellectum, ante ultimum iudicium practicum, ostenduntur, nova quædam laxitas, & veluti campus voluntati aperitur, in quo libertatem suam essentialem versare, & hæc aut illac indifferenter exerere possit; quàm libertatem contrarietatis solemus appellare. Et quia intellectus hanc laxitatem libertatemque voluntati aperit, idcirco dicitur esse radix libertatis, qua liberum arbitrium fit potens in diversa ferri. Quanquam tamen etiam intellectus sit radix libertatis essentialis, quia eam voluntas exerere non potest, nisi circa objectum (etiam unicum) quod intellectus ei proposuerit.

Idem x. p.  
q. 83. a. 1.

Hoc autem discriminis inter essentialem, & accidentalem contrarietatis libertatem interest; quòd licet essentialis libertas (celebri S. Bernardi sententiâ) non minuat, nec maior

S. Ber. lib. de  
libero arb.

*in iusto sit, quàm in peccatore, nec in Angelo, quàm in homine: libertas tamen contrarietatis augeri, & minui possit. Laxitas enim indifferentiæ ejus ampliatur, aut restringitur, prout plura, aut pauciora media ab intellectu ostenduntur, ad quæ voluntas electionem suam convertere potest.*

Verùm quantumvis indifferens illa laxitas tempore deliberationis fuerit amplissima, & centum ( si vis ) mediorum millia intellectus circuevit, & voluntati demonstraverit; amplitudo tamen ista paulatim contrahitur, & tandem ad unicum medium, quod *maius est, & eminentius*, redigitur, ut antea ex Aristotele, & D. Thoma Cap. VI. Artic. III. docuimus. Intellectus enim unicum medium, omnibus consideratis, libero arbitrio eligendum proponit. Nec propter tamen istam contractionem, & determinationem ad unum, perit contrarietatis libertas: quia voluntas istas sibi angustias facit, dum intellectui iudicium de unico medio practicum & ultimum imperat, & se ipsa etiam illicò ad illius unici medij electionem determinat. Si enim eandem semper laxitatem & indifferentiam, ad contrarietatis libertatem salvandam, manere oporteret, nunquam sequeretur unius medij electio. Nam ultima voluntatis determinatio, nisi depressâ illâ pensili indifferentiâ, fieri non potest.

Licet autem eo instanti voluntas ad unum determinata sit; ista tamen determinatio non est similis determinationi ad unum, quæ agenti naturali dicitur esse propria.

Hæc enim agentis naturalis ad unum determinatio, servilis est, & à natura dominante, & in unam partem cogente ac affigente facta: determinatio autem voluntatis ab ipsamet voluntate, suoque imperio seipsam movente, efficitur; ideoque est voluntaria. Determinatio autem voluntaria libertatem non enecat, sed eam intrinsecè includit, & quasi in sinu fovet.



## ARTICVLVS VII.

*Utrum electio medij liberior sit, quàm intentio finis, quia in electione voluntas perfectius se movet.*

**S.** Thomæ doctrina, aut certè phrasès iterùm hîc nobis facessunt negotium.

Docet enim non semel, voluntatem solùm in electione medij, non in amore finis, ut finis est, seipsam movere.

Mover autem se ad eligendum dupliciter, seu duplici quasi impetu sibi impresso, consilio, sive deliberatione; & finis intentione.

Verùm non in omni electione, voluntas per deliberationem se movet, ut Articulo superiori, & antea Artic. III. docuimus. Restat ergo modus, quo se movet per intentionem finis. *Voluntas enim movet seipsam*, ait D. Thomas, *in quantum per hoc quod vult finem, reducit seipsam ad volendum ea quæ sunt ad finem.* Et addit: *Hoc autem non potest facere, nisi consilio mediante.* Quæ tamen ultima clausula, quatenus vera sit, ex jam dictis patet. Veritatem enim habet, non universim, sed *in natura* ignorante, ut D. Thomas ipse exponit. Hæc enim sola consilio & deliberatione ante electionem indiget.

Negat verò S. Thomas voluntatem seipsam movere, quando intendit aut appetit finem. Quia *si quidem*, inquit, *voluntas moveret seipsam ad volendum* (v. g. sanitatem, quo exemplo ante est usus) *oporteret quòd mediante consilio hoc ageret, ex aliqua voluntate præsupposita: hoc autem non est procedere in infinitum: id est, talis processus ab actu voluntatis uno ad alium superiorem, non potest ire in infinitum. Vnde necesse est ponere, inquit, quòd in primum motum voluntatis, voluntas prodeat ex instinctu alicujus exterioris moventis, ut Aristoteles concludit in quodam cap. Ethica Endemica.*

Ex quibus S. Thomæ verbis liquet, eum de motu loqui quo voluntas, ad modum intellectûs ab antecedente ad conclusionem ratiocinando discurrentis, se movet. Hanc enim compa-

comparationem inter rationem ratiocinantem & liberum arbitrium S. Thomas ex professo instituit, concluditque:  
 D Tho. 1. p. 9. 83. 2. 4. *Manifestum esse, quod sicut se habet intellectus ad rationem; ita se habeat voluntas ad vim electivam, id est, ad liberum arbitrium.*

Quo enim modo intellectus immediatè principiis per se notis assentitur, & ratio deinde à tali assensu ad assensum consequentis discurret; ita voluntas immediatè bonitati finis per intensionem, seu amorem se inclinat, quem deinde liberum arbitrium excipit, & ab ea ad electionem medij se evolvit. In quo posteriore motu est aliquis terminus à quo, & terminus ad quem ( intentio scilicet finis, & electio medij ) atque ideo motus iste propinquiorem similitudinem habet cum motu locali; qui omnium motuum princeps, & maximè proprius, reliquorumque quodammodò mensura est.

Vnde, sine dubio, liberum arbitrium magis propriè in electione medij se movet, quàm voluntas in immediato amore finis; ante quem nullus alius actus voluntatis, tanquam terminus à quo illius motus, præcessit.

Atque ita, quandoquidem perfectionem libertatis, ex perfectione se movendi metiatur S. Thomas ( *liberum enim est causa sui actus*, ut tam sæpe repetit: ) voluntas perfectiori modo in electione medij, quàm in amore finis, libertatem suam essentialem exercet. Ita tamen, ut nisi motui, quo ab amore finis ad electionem medij voluntas quasi discurret, accederet, & tanquam fundamentum supponeretur motus alius intimior libertatis essentialis, quo voluntas ad suipsum imperium electionem elicit; electio ista neutiquam libera esset. Vnde si ipso ultimo instanti, quo electio medij ex præcedenti amore finis, à libero arbitrio elicienda est, fatalis aliquis raptus, aut phrenesis homini superveniret; quamvis sequeretur electio, non tamen libera, sed præceptus, & instar brutorum instinctus esset.

Vt jam pateat, præcipuum, & quod instar animæ est in libero actu voluntatis, esse motum illum, quo voluntas tam in amore finis, quàm in medij electione, imperiosè seipsam movet, & ad imperium sui appetit, ut S. Bonaventura ait. Quod autè

S. Tho.

Lib. 2. c. 47.  
48. contra  
Sent. &c.

D. Bonav.  
in 2. d. 25.  
q. 2.



S. Thomas crediderit non tali modo voluntatem se movere in amore finis; sed naturaliter instar bruti, aut lapidis ad centrum ruentis, sine ulla prorsus libertate, quodammodo in actum suum extrudi, difficulter ( quidquid multi Thomistæ aliter ) de tanto S. Thomæ ingenio credere possum. Si tamen illi Thomistæ in sententia defixi perseverent, fatendum erit, Subtilem Scotum in hac re acumine suo longius penetrasse, quàm Doctorem Angelicum; quando Scotus ita pronunciat: *Voluntas liberè vult finem; quia eadem est potentia quæ vult finem, & illud quod est ad finem: ergo habet eundem modum agendi. Quia diversi modi operandi arguunt diversas potentias.* Vnde si voluntas circa finem ex impetu naturæ, & more appetitûs brutalis, prælucente tamen perfectò judicio rationis, se effunderet; non esset eadem potentia, quæ circa media tam diverso operandi modo electionem exerceret.

Scot. in 1.  
d. 1. q. 42

Attamen Sanctus Doctor in amore finis ( quando est perfectè voluntarius, non tantum motus primo-primus ) quandam libertatem naturalem ubique etiam admittit, quam *libertatem à coactione* appellat.

Vnde cum toties sibi objicit doctrinam S. Augustini: *Quod si aliquid sit necessarium, non est voluntarium* hoc est, liberum; semper Respondet: *Verbum Augustini intelligendum esse de necessario necessitate coactionis. Necessitas autem naturalis non aufert libertatem voluntatis, ut ipsemet in eodem Libro dicit. Et alibi: Libertas, secundum Augustinum, opponitur necessitati coactionis, non autem naturalis inclinationis: qualem videlicet inclinationem voluntas habet ad bonum; quod maximè est finis.* Vnde quando inclinatione suâ naturali bonitati finis annuit, libertatem istam à coactione retinet & exercet.

S. August.  
lib. 5. c. 10.  
Civit.  
D. Tho. 1.  
p. q. 82. a. 1.

Idem q. 22.  
a. 5. de  
Verit.

Ceterum, fatendum tamen etiam est, D. Thomam, quando explicat *libertatem* istam naturalem, quæ est à coactione, semper recurrere ad propriam & strictam coactionem, seu violentiam, quam Aristoteles Lib. 3. c. 1. Ethic. definit: *Coactum est, cujus principium est extrà, nihilq; ad id confert ille qui cogitur.*

Idem 1. p.  
q. 83. a. 2.  
ad 3.

Vnde alicubi: *Quamvis, ait, quadam necessaria inclinatione ultimum finem velit voluntas, nullo tamen modo concedendum est, quod*

Idem q. 22.  
a. 5. de  
Verit.

A a a a a a

ad illud

ad illud volendum cogatur. Coactio enim nihil aliud est, quàm violentia cuiusdam inductio. Violentum autem, secundum Philosophum in 3. Ethic. est cuius principium est extrà, nil conferente vim passo. Sicut si lapis sursum projiciatur; quia nullo modo, quantum est de se, ad hunc motum inclinatur. Sed cum ipsa voluntas sit quadam inclinatio, eo quòd sit appetitus quidam, non potest contingere, ut voluntas aliquid coactè vel violenter velit, si aliquid naturali inclinatione velit.

Quæ verba, si præcisè accipiantur, & à voluntate tantum excludant rigidam illam coactionem seu violentiam, qualem lapis patitur dum projicitur sursum, profectò libertas à tali coactione, in appetitibus brutorum etiam invenitur. Non enim talem vim & coactionem bruta patiuntur, quando in affectus suos à natura præcipitantur, sed influxum aliquem activum in appetendo contribunt.

Vt igitur doctrina ista S. Thomæ, in S. Augustini, S. Bernardi, ceterorumque Patrum mentem & sententiam extendatur, debet coactio paulò latius sumi, ut non tantum coactionem Aristotelicam strictissimam, cui vim passum nullo prorsus influxu activo cooperatur; sed etiam coactionem illam comprehendat, quâ agentia naturalia à natura ad suas actiones coguntur, & in eas præcipitantur.

Libertas enim à tali coactione sic extensâ, & generaliùs, quàm ibi ab Aristotele definita est, acceptâ, est propria & peculiaris voluntati. Hæc enim non tantum immunis est à violentiâ tali, qualem gravitas lapidis projecti sursum, nihil ad eum motum cooperando, patitur; sed etiam immunis est à violentia quadâ laxiore, quâ lapis irresistibili naturæ impulsu deorsum, & omne agens naturale simili impetu in actionem suam abripitur. Tali enim naturæ impetu bruta in appetitus suos ruunt; tali etiam voluntas, si fati necessitate impelleretur, aut Stoicorum Adraistiâ; vel gentis tenebrarum (quam fabulantur Manichæi) vi opprimeretur, non iret suapte sponte, sed adacta & coacta, in actiones volendi ferretur: & proinde nec propriè volendi actiones essent, sed fuitiles & irriti quidam voluntatis præcipitate partus; quales ferè sunt actus nostri primo-primi. Voluntas enim ut voluntas operans, ex  
impe-



imperio suo se movet, actionemque habet, toto cælo distantem à vi, raptu, & modo agendi agentium naturalium; quem SS. Patres, ut Franc. Suarez confitetur, *coactionem* appellare solent.

Suar. Pro-  
log. 1. c. 4.  
de Grat.

Vnde, nisi Thomistæ patiantur libertatem à coactione, non tantum negare coactionem illam Aristotelicam, ut S. Thomæ verba præ se ferunt, sed etiam coactionem, ut sic appellem, Patristicam; pati etiam debent, D. Thomam à S. Augustini, S. Bernardi, & aliorum Patrum philosophiâ deviasse; & S. Augustini mentem Lib. 5. c. 10. Civit. malè, vel saltem mutilè interpretatum fuisse: quando varijs locis rories dicit, *Auctoritatem S. Augustini* (docentis quandam esse necessitatem, quæ consistere nequit cum libera voluntate) *intelligendam esse de necessitate coactionis, quæ repugnat voluntati, & libertati eius naturali.* Non tantum enim S. Augustini mens est, coactionem strictam & Aristotelicam repugnare naturali voluntatis libertati; sed etiam coactionem, qua agentia naturalia à natura coguntur. Nam libertatem illam à coactione, veram esse & propriam libertatem, *qua aliquid est in nostra potestate, & qua rectè, vel perperam vivitur, & qua aliquid libero volumus arbitrio,* eo loco affirmat S. Augustinus, ut cuilibet legenti patet. Libertas verò à sola coactione Aristotelica, non est vera & propria libertas, *qua rectè, vel perperam vivitur &c.* cum talis libertas sit nuda & simplex spontaneitas, quæ in appetitu brutorum etiam reperitur. Canis enim in appetitu offæ, à coactione Aristotelica liber est. Non enim principium activum istius appetitionis est extra canem; nec verum est, quodd anima canis nullam vim activam ad illam actionem conferat. Deinde illi Thomistæ S. Thomam à simili etiam S. Bernardi philosophiâ palam abducunt. *Consensus voluntarius*, ait Bernardus, *nos discernit à brutis. Est enim habitus animi liber sui. Siquidem non cogitur, non extorquetur. Est quippe voluntatis, non necessitatis.*

D. Tho. 1.  
p. q. 82. a. 1.  
Item q. 22.  
a. 5. de Ve-  
rit. &c.

S. August.  
lib. 5. c. 10.  
Civit.

S. Ber. lib.  
de lib. arb.

Vbi aperte docet, consensum liberum distinguere ab appetitu bruti, per negationem coactionis. Non autem per negationem coactionis strictæ tantum & Aristotelicæ, quia negatio ista appetitui brutorum etiam competit; ergo per negationem

tionem illius coactionis, qua bruta dicuntur à natura cogi, agi, & præcipitari in suos appetitus.

Quando autem S. Bernardus hominis consensum, propter istam negationem coactionis, liberum esse dicit, de vera & propria libertate loquitur, ut ex principio illius Libri constat. Fuerat enim à quodam discipulo rogatus, ut ei illam arbitrij libertatem explicaret, quæ necessaria est ad actiones humanas, quibus per viam mandatorum Dei ad vitam & salutem æternam itur.

Finio ergo, & Thomistas rogo, ut etiam atque etiam cogitent: An S. Thomas existimaverit nihil absurdi fore, si quis dicat, finem ultimum, aut quemvis subalternum ( si ut finis, non ut medium consideretur ) amari à nobis in hac vita, tam necessario, & præcipiti, ac non-libero amore, quàm bruta amant, & agentia naturalia in actiones suas à natura præcipiuntur; licet alicubi dicat: *Simpliciter voluntas est idem, quod voluntas ut natura: electio autem est idem, quod voluntas ut ratio; & proprius actus liberi arbitrij?* Item, an non refugeret fateri: Admitti posse ( quantum est ex parte modi amandi finem ) si vera influere in actus voluntatis nostræ circa fines, sicut admitterit in aliorum animalium naturales instinctus; negat verò in nostras electiones?

D. Tho. 3. p.  
q. 18. a. 4.

Idem lib. 3.  
c. 85. contra  
Gent.

Si enim electiones nostræ, inquit, evenirent ex impressione corporum caelestium, oporteret quòd naturaliter evenirent; ut scilicet sic homo naturaliter eligeret operari suas operationes, sicut naturali instinctu bruta operantur, & naturaliter corpora inanimata moventur. Non ergo erunt, inquit, propositum ( siue voluntas, ut alij Aristotelem vertunt ) & natura duo principia agentia, sed unum tantum, quod est natura. Cujus contrarium patet per Aristotelem in 2. Physic. Ad utrum ergo membrum principij agentis pertinet voluntas finium?

An ad naturam, eo modo quo instinctus brutorum? Credat qui volet, ego cum M. Varrone dicam: *Cras foriè credam, hodie nihil.* An autem D. Thomas crediderit, nescio. Hoc tamen scio: quòd et si subinde dicat, amorem finis, ut finis est, naturaliter, vel etiam instinctu naturali, à voluntate produci; alicubi



alicubi tamen, *produci naturaliter*, distinguat, à *produci per modum naturæ*. Quid si igitur amorem finis, ut finis est, *produci naturaliter*, non tamen per modum naturæ, existimet? *Dicitur autem* aliquid *produci naturaliter*, inquit, *propter naturalem habitudinem quam habet ad suum principium; per modum naturæ verò produci dicitur, quod producit ab aliquo principio sic producente, sicut natura producit*: cum impetu videlicet effreni, & velut ab alio duriter acta, non tanquam seipsam agens placido suo nutu.

Idem q. 10:  
a. 2. de Potent.

Denique perpendant illi Thomistæ, amorem finis, etiam ultimi, juxta S. Thomæ doctrinam, esse nobis in hac vitâ liberum libertate contradictionis, ut Artic. proximo dicemus: ergo non impetu brutali, & ad modum effectûs agentis naturalis elicitur. Cum tali enim impetu nulla contrarietatis, aut contradictionis vera libertas consistere potest, ut Sanctus Doctor sæpe repetit. Aliàs enim etiam in actibus nostris primo-primis veram libertatem inesse quid vetaret?

## ARTICVLVS VIII.

*In omnibus actibus liberis hujus vitæ, libertas essentialis humane voluntatis usque ad libertatem contrarietatis, vel contradictionis descendere potest.*

**L**ibertas contrarietatis est, cum voluntas potest hoc obiectum, & etiam alterum ei contrapositum ( ut v. g. virtutem & vitium ) diligere.

Libertas verò contradictionis, cum voluntas unum idemque diligere, & non diligere potest.

Omnes porro res creatæ sunt ejusmodi, ut quantum est ex se, non ita rapiant voluntatem, quin propter rationes intrinsecas, vel extrinsecas ab intellectu voluntati propositas, possint respui, & aliud ipsis in amore, licitè vel illicitè, præponi. Vnde circa talia voluntas libertate contrarietatis passim est libera.

Circa verò beatitudinem, licet voluntas ita versetur, ut oppositum velle non possit ( omnes quippe beati esse volunt, nemo

S. August.  
lib. 13. c. 34.

*miser*, ut ait Augustinus; ) est tamen libera libertate contradictionis, ut experiētiā patet, cum à cogitatione beatitudinis intellectum liberè avertimus. *Potest enim aliquis de quocumque obiecto non cogitare* ( inquit D. Thomas, de hac eadem libertate exercitij, sive contradictionis disputans; ) & *per consequens, neque actu velle illud.*

D. Tho. I. 2.  
q. 10. a. 2.

Cogitatione namque extinctā, extinguitur consequenter actus voluntatis, quæ in incognitum ferri nequit. Vnde quia cogitatio, seu cognitio objecti est principium necessarium ad eliciendum amorem finis, eo destructo, destruitur ille effectus.

Quidam autem ad hanc libertatem contradictionis sufficere putant, si actus voluntatis quocumque modo, etiam naturali, cesset; ut si v. g. voluntas per supervententem somnum, ab amando cessaret.

Quod profectò verum esse non potest.

Nam sicuti, si amor inciperet per motum primo-primum naturaliter & non liberè, etiam si postea liberè desineret; nemo inter illa duo contradictoria ( amor & non-amor ) libertatem contradictionis intercessisse diceret; ita nec intercedit, quando ordine inverso, amor liberè libertate essentiali ( nulla intercurrente de cessando cogitatione ) elicitur, & postea naturaliter, ac sine ulla libertate cessat.

Nam ista definitio potentia, libertate contradictionis, libertatē: *Qua positus omnibus ad agendum prærequisitis, potest agere, & potest non agere*; ita, sine dubio, interpretanda est, ut non tantum agere, sed etiam non-agere, sit liberum, neutrum verò naturale; quales sunt actus primo-primi, & omnes actiones, aut non-actiones, quæ à causis naturalibus non-liberis proveniunt. Vtrumque enim ( & agere, & non-agere ) ab illa excellenti & peculiari potestate *évolvas*, quam voluntas super actus suos exercet, fluere debet & dependere.

Vnde non solum actio, sed etiam non-actio cognosci ab intellectu debet, & voluntati proponi. Quod expressè docet S. Thomas: *Potest homo*, inquit, *velle & non velle, agere & non agere* ( libertate contradictionis; ) *potest etiam velle hoc, aut illud* ( libertate contrarietatis. ) *Cuius ratio ex ipsa virtute rationis accipi-*

S. Tho. I. 2.  
q. 13. a. 6.



*accipitur. Quidquid enim ratio potest apprehendere ut bonum, in hoc voluntas tendere potest. Potest autem ratio apprehendere, non solum hoc, quod est velle, aut agere; sed hoc etiam, quod est non velle, & non agere.*

Et alibi probat, quodd in potestate liberi arbitrij sit, non uti habitu; quia potest hoc ipsum, quod est non uti habitu, sibi proponi sub specie boni.

Idem q. 27.  
a. 8. de  
Verit.

Deinde libertas contradictionis est species quædam libertatis indifferentiæ, & electionis, non minus quàm libertas contrarietatis: igitur ut voluntas suam indifferentiam vel erga actionem, vel erga actionis omissionem exerceat, intellectus aliquam utilitatem vel bonitatem tam actionis, quàm non-actionis, ante oculos voluntatis suspendere debet. Nam etiam puta. omissio actûs voluntatis, ut voluntaria liberaque sit, & à voluntate emanare intelligatur, debet esse rationalis, seu ratione aurigante gubernari.

Quapropter falsum omnino videtur, quod quidam imaginantur: liberam cessationem actûs volendi posse à voluntate liberè effici, positis omnibus principijs & conditionibus ad eliciendum actum positivum volendi requisitis; licet nulla nova ratio ex parte intellectûs accedat, quare voluntas debeat, aut possit actum illum volendi suspendere.

Vt v. g. si intellectus proposuerit voluntati omnes rationes, quæ suadent Romam proficiscendum esse, & res etiam usque ad iudicium ultimum practicum deducta sit, *Resolve te ad volendum Romam proficisci*; nullâ prorsus allatâ ratione, aut factâ mentione quare expediat ab hac eundi volitione superfedere: aiunt illi Philosophi, voluntatem nihilominus pro suo arbitrio, & contradictionis libertate, posse actum illum volendi immediatè suspendere.

Falsum hoc, inquam, & Aristoteli, S. Thomæ, & experientię contrarium est. Quomodo enim illa suspensio voluntaria, & rationalis erit, si voluntas interrogata, cur actum illum volendi suspendat, nullam prorsus rationem reddere valeat? Voluntas etiam sine ullo motivo movebitur, cum nulla ei ab intellectu, illius suspensionis aut cessationis mentio

facta

facta fuerit? Profecto, si res ista attentè inspiciatur, non magis potest voluntas voluntariè ac liberè cessationem propriæ suæ actionis sibi injicere, quàm aliud medium incogitatum, immediatè eligere, post hujus medij eligendi factam ab intellectu practico determinationem.

Idem 2. 2. 9. 158. a. 2. Vt enim tam actus, quàm suspensio actûs sit in potestate voluntatis, necesse est, ut sub potestatem istam adducatur per judicium intellectûs. Nam ideo *motus qui præveniunt iudicium rationis, non sunt in potestate hominis*, ut S. Thomas ait.

Alij verò spinas omnes & difficultates se transilijisse putant, dicendo, ad libertatem contradictionis sufficere, ut bonum voluntati proponatur tanquam indifferens.

Si autem eos interroges, quid sit, *proponi tanquam indifferens*: Respondent, *tanquam non necessariò amandum*. Vnde summum etiam bonum in hac vita, dicunt proponi voluntati ut indifferens; ideoque amorem ejus libertate contradictionis liberum nobis esse.

Sed sanè, si bonum proponatur, tanquam non necessariò amandum, in isto jam conceptu, non tantùm amor, sed etiam non-amor satis expressè relucet. Quid enim est, quod dicitur amandum non necessariò, nisi quod potest amari, & non amari?

Quamquam etiam nec speculativus iste conceptus, *potentis non amari*, in Peripatetica & S. Thomæ philosophia, ad actua-lem suspensionem amoris sufficiat; sed speculationem illam ad judicium practicum, *Noli hoc bonum amare*, deducere oporteat.

Si verò bonum tale ( ut bonum sanitatis, bonum divitiarum, aut summum etiam bonum ) voluntati nostræ simpliciter proponatur, nullâ contrarij, aut contradictorij vel levissimâ interjectâ mentione; illud bonum liberè quidem poterit amari, sed solâ essentiali, non accidentali contrarietatis vel contradictionis libertate. Cum enim, ut superius dixi, hæ duæ postremæ sint cujusdam indifferentiæ libertates, debent ab intellectu ( sive per deliberationem, sive alio modo ) proponi duo contraria, aut contradictoria, suis stipata rationibus, ut ex



ut ex illa indifferentia descendatur ad iudicium ultimum practicum alterutrius partis. Quod sanè non fit, quando unicum bonum, & rationes amorem ejus tantummodò suadentes, voluntati objecta proposita que fuerunt. Nec enim per unici boni ostensionem, aperitur libero arbitrio laxitas & amplitudo illa, quæ ei necessaria est, ut intra eam verset suam indifferentiam, & ex pluribus bonis tandem se determinet ad unum.

Quando tamen proposito solùm unico objecto, voluntas, sine actuali indifferentiâ inter amorem & suspensionem ejus, ex essentiali tantùm libertate, ad amandum se resolvit; in ejusmodi amore censetur esse virtualis quædam libertas contradictionis: quia cùm talis amor non sit necessarius, & tam non esse, quàm esse possit; si intellectus paulisper super amorem istum se reflectat, statim sufficientem rationem invenire poterit, ut iudicio practico imperet voluntati suspensionem ejus. Atque ita potestas ad suspendendum censetur (propter iudicium practicum tam propinquum & paratum) esse moraliter proximè expedita; quia, vulgato Philosophi axiomate, *Quod parùm distat, nihil distare videtur.* Et sicut ait D. Thomas: *Illud habere dicimus, quod in promptu est, ut habeamus. Sicut Geometer (ex Geometriæ principijs) modico studio acquirit scientiam alicujus conclusionis, quam nunquam consideravit.* Arist. lib. 2.  
c. 5. Physic.  
D. Tho. 1. 2.  
q. 65. a. 1.

In propria autem & formali contradictionis, vel contrarietatis libertate, quia deliberatio inter opposita, aut saltem utriusque oppositi ante oculos voluntatis repræsentatio præcessit; potest voluntas immediatè, antequam iudicium practicum de uno eligendo imperet, iudicium de eligendo altero imperare; aut saltem iudicium de revocanda ad examen priori deliberatione, ac tandem se determinare in oppositum, si ita visum fuerit.

Nam sæpe manet memoria prioris deliberationis, & argumentorum alterius partis (quibus subito aliquid ad præponderandum adjici potest) usque ad illud instans, quo voluntas iudicium practicum de uno certo eligendo imperat. Unde voluntas faciliè & subito in alteram partem, suam indiffe-

rentiam convertere potest. Antea enim Cap. VI. Artic. II. docuimus, voluntatem ex sola cognitione speculativa, sine præcedenti alio iudicio practico, posse ad imperandum intellectui iudicium ultimum practicum, seipsam resolvere.

Ex quo denique patet, quomodo in tali iudicio practico à voluntate imperato, & in electione mox secuta, & à voluntate elicitā, propria & actualis contingentia possit esse.

Ex doctrina verò jam tradita definitiones istæ possunt formari.

D. Tho. 2. 2. q. 6. a. 1. & c. Spontaneum, sive voluntarium latè, est actus cujus principium est intrā, cum cognitione finis. Hoc latius patet, quàm liberum.

Liberum libertate essentiali, est actus quem voluntas ex potestate sua principali sibi imperat, directā ex sufficienti iudicio rationis.

Hæc est libertas, quam SS. Patres *naturalem*, & libertatem à necessitate cogente appellant, de qua S. Augustinus, S. Bernardus, & alij Patres loquuntur, cum ajunt: *Vbi voluntas, ibi libertas.*

Ista quoque libertas in contrarietatis & contradictionis libertatem, velut anima quædam, necessariò subintrat. Libertates enim accidentariæ sine essentiali subsistere non possunt. Et hinc libertas contrarietatis & contradictionis dicuntur esse signum libertatis essentialis: unde & hæc essentialis libertas, per libertatis contrarietatis, & contradictionis indifferentiam, qua libertas essentialis inter opposita se versat, tanquam per quid notius, solet explicari.

Si enim proposito bono voluntas non necessariò in illud feratur, sed possit ducem suum intellectum, ad aliud bonum, vel ad amoris sui suspensionem considerandum avertere; signum est, non esse naturæ coactu ad unum serviliter determinatam, sicut bruta, & agentia naturalia; quæ ad primum convenientis boni aspectum, repentino & abrupto impetu in illud feruntur; sed habere supra suos, & ducis sui actus quandam reflexionem, & imperium: quos ideo non sinat à natura sibi extorqueri, sed jussu suo imperet in lucem exire.

Motus



*Motus enim, ait S. Augustinus, quo huc atque illuc voluntas convertitur, nisi esset voluntarius atque in nostra positus potestate (i.e. voluntas videlicet, seu in potestate illâ, quâ voluntas potens & imperiosa sui est; ) neque laudandus, cum ad superiora, neque culpandus homo esset, cum ad inferiora detorquet quasi quendam cardinem voluntatis.*

S. August.  
lib. 3. c. 1.  
de libero  
arbit.

Qua potestate & cardine voluntatis, quia caret brutorum appetitus; licet cum aliqua indifferentiâ nunc in hanc, nunc in oppositam partem à natura expellatur; non tamen dicitur actus propriè voluntarios, aut in potestate sua habere: unde etiam nec laude, nec culpâ sunt digni.

Liberum libertate contrarietatis est, quod voluntas sic agit, ut contrarium possit agere.

Liberum libertate contradictionis est, quod voluntas potest agere, & non agere.

*Voluntas enim, ait D. Thomas, indeterminata est respectu actûs: quia circa objectum determinatum potest uti actu suo ( quod libertatis essentialis est officium ) cum voluerit, vel non uti. Potest enim exire in actum volendi respectu cuiuslibet, & non exire ( si nempe rationes non exeundi, ab intellectu ei suggerantur, ut ex ipso D. Thomâ suprâ docuimus. ) Quod in rebus naturalibus non contingit. Grave enim semper descendit deorsum in actu, nisi aliquid prohibeat.*

D. Tho. q.  
22. a. 6.  
de Verit.

Denique vulgaris ista potentia libera libertate contradictionis definitio: *Potentia, quæ positis omnibus ad agendum prærequisitis, potest agere, & non agere; rectè se habet, si prout Aristotelis, & S. Augustini philosophia flagitat, exponatur.*

Non enim sensus est: quod omnibus requisitis eodem modo se habentibus, nullo variato ex parte sui, vel alterius, ut Gabriel imaginatur, *potentia libera, siue voluntas, habeat in potestate ita non producere, sicut producere.* Nam unum ex prærequisitis ad agendum, est iudicium practicum intellectûs, per quod, producere, seu agere, ponitur proximè in potestate voluntatis. Cum hoc autem iudicio practico consistere non potest aliud iudicium practicum, quo intellectûs, propter certas alias rationes, cessandum ab actione iudicat.

Gabr. in 2.  
d. 25. q. 1.

Ad libertatem ergo illam contradictionis sufficit, sicut alii-  
quoties antè diximus; ut voluntas, per potestatem illam  
imperatricem qua seipsam movet & regit, aliquod princi-  
pium agendi variare, & ad conditiones requisitas ad liberè  
non-agendum, se emovere possit.

## ARTICVLVS IX.

*An in appetitu inferiori aliquid naturalis libertatis insit.*

Medin. I. 2.  
§. 74. a. 3.

**S**ententia Cajetani est, quam Medina *novam & ingenio-  
sam* appellat: In appetitu nostro sensitivo aliquid liber-  
tatis inesse, quæ quidem ad peccatum veniale, non ta-  
men ad mortale committendum sufficiat.

S. Thom.  
ibidem, &  
I. p. q. 81.  
a. 3.

Fundamentum Cajetani sumitur ex D. Thomia: Quia si-  
cuti imaginativa est perfectior in homine quàm in bruto,  
propter conjunctionem cum ratione superiori, & emanatio-  
nem ab eadem anima rationali; ita appetitus sensitivus ho-  
minis, propter similem conjunctionem cum appetitu supe-  
riori, & originem à nobiliori radice, aliquid excellentiæ, &  
*vestigium quoddam libertatis*, inquit Cajetanus, *sortitur*. Et in-  
de est (quantum ipse putat & interpretatur) ut S. Thomas,  
in sensualitate hominis, peccatum veniale, non mortale inve-  
niri posse affirmet.

Arist. lib. 7.  
c. 14. Polit.

Sed si satis attentè D. Thomas legatur, dicet tantum quod  
Aristoteles: *Dua sunt partes anime quarum altera rationem per se  
habet, altera non habet quidem per se, verum rationi obtemperare potest.*

Vbi Philosophus nullam libertatem, aut libertatis aliud  
vestigium inferiori parti anime, sive appetitui sensitivo do-  
nat, quàm quòd rationi obtemperare possit. Hoc autem fa-  
cere potest, etiam si omni prorsus (quantumvis tenuissimâ)  
libertate naturali careat. Nam manus, & alia id genus mem-  
bra corporis, longè obedientius & ad nutum rationi parent,  
& tamen nullâ prorsus libertate prædita sunt.

Imò ideo, inquit Cajetanus, in appetitu nostro sensitivo  
est quiddam voluntariæ libertatis, quia minùs obedit ratio-  
ni, quàm membra externa corporis.

Ratio



Ratio enim & voluntas in membra corporis, *imperium des-*  
*poticum*, sive dominicum (quale est domini in servos suos qui  
 resistere non possunt) exercent; in appetitum verò inferio-  
 rem, *imperium politicum & regale* (quale est Regis in subditos *Idem lib. 1.*  
 liberos, qui jus interdum renitendi habent) ut eleganter *e. 5. Polit.*  
 Aristoteles docet. Igitur appetitus inferior aliquid liberta-  
 tis habet, quo appetitui superiori valeat reniti, nec, instar ob-  
 noxij mancipij, sinat se perpetuò in consensum voluntatis,  
 obtorro quasi collo, abripi.

Attamen non ea Aristotelis mens est. Reniti enim appeti-  
 tus inferior superiori valet, etiamsi renitus iste non sit mo-  
 tus liber (qualis est civium adversus suum Principem resi-  
 stentia) sed effreni & bruto impetu exiliat (ut agentia natu-  
 ralia solent) adversus rationis & voluntatis imperium. Nonne  
 enim conspectâ formosâ virgine, casti adolescentis volun-  
 tati, pruritus libidinis sæpe resistit, & in parastatis genitura  
 bullit, motu non libero, sed effreni & merè naturali?

Sic ergo passio appetitus inferioris exurgere & tentatione  
 suâ assultare voluntatem potest, naturali non libero assultu.

Et nisi D. Thomas (quidquid ei imponat Cajetanus)  
 censuisset nihil esse in appetitu inferiori veræ & humanæ li-  
 bertatis, nunquam, credo, dixisset, *Passiones secundum se non*  
*esse peccata, sed secundum quod applicantur ad aliquod malum vitu-*  
*perari, sicut & laudantur ex hoc quòd ad aliquod bonum applicantur.*  
*D. Tho. 2. 2. q. 35. 2. 1.*

Essent autem vera peccata, saltem venialia, ut etiam con-  
 tendit Cajetanus, si verâ libertate adversus rationem & vo-  
 luntatem niterentur.

Vnde etiam in ipso spiritus & concupiscentiæ carnalis con-  
 flitu; spiritu vincente, nec post concupiscentias malas eun-  
 te; peccaret tamen homo, si non voluntatis, attamen appeti-  
 tus inferioris tali quali libertate. Nec usque quaque verum  
 foret illud Apostoli: *Si quod nolo, illud facio* (nempe, appetitu  
 inferiori adversus spiritum concupiscente:) *iam non ego operor*  
*illud, sed quod habitat in me, peccatum.*  
*Rom. 7. 5.*

Nam sanè libere jam, & humano quodam, licet inferiori  
 modo, illud operatur, si in appetitu illo sensitivo concupis-

cente, sit aliquid veræ libertatis, quo illud, ratione quantumvis comprimere nitente, operatur.

Fatui denique, & somniantes, veri nominis peccato peccare possent; quia licet auriga voluntatis ratio sopita sit & ligata; vigilat tamen imaginatio, & appetitus inferior, qui ab imaginatione gubernatur, libertatemque suam, si quam haberet, in alicujus honesti, aut dehonesti facinoris affectum laxare posset. Peccata tamen in fatuis, aut somniantibus non admittit S. Augustinus, nec SS. Patres: qui uno consensu peccata non nisi voluntate committi dicunt. Nam S. Augustini oraculo: *Peccatum sine voluntate esse non posse, verissimum est.*

S. August.  
lib. 1. c. 15.  
Retract.

Nec, quia appetitus hominis inferior ab eadem anima cum voluntate resultat, debet ideo aliquid de libertate voluntatis participare.

Aliæ enim sunt dotes; alia privilegia, quæ ex nobiliori ista origine, & honestioribus natalibus ei debentur, ad quæ appetitus brutorum nequit aspirare. Nam sicut cogitativa hominis, propter emanationem ab anima intellectiva, ad infinita propemodum, nullis sensibus externis percepta, in axe inferiori, sub majori intellectu rotâ se volvendo & discurrendo, excurrit, ad quæ imaginatio bruti pertingere non potest; ita appetitus noster inferior, qui cogitativam ducem sequitur, ad longè plura affectus suos extendere valet, quàm appetitus brutorum: licet non liberâ sponte, sicut voluntas, sed naturali & brutali impetu hoc faciat.

## ARTICVLVS X.

*Quomodo appetitus superior inferiorem, & inferior superiorem moveat.*

Arist. lib. 3.  
c. 11. de  
Anima.

**A**ristoteles similitudine sanè concinnâ, docet appetitum inferiorem à superiori moveri, sicut in cælis sphaera superior trahit inferiorem. Nam Mobile primum omnes sphaeras Planetarum ab Oriente versus Occidentem rapit; nec tamen interim proprios motus sinit, quibus



bus Planetæ contrariò nisu regrediuntur ab Occasu in Ortum. Sic appetitus inferior, licet à superiori, in homine v. g. continente, ad temperantiam & virtutem abducatur; non tamen sine rixa, qua in contrarium obnititur. *Accidit tamen præterea hic aliquid, quod non potest in cælis. Nam cum ibi sphaera inferior superiorem trahere non possit; appetitus tamen inferior superiorem nonnunquam; ut in homine intemperante, secum abripit. Quomodo autem duo isti appetitus se invicem sollicitent, & in partes abducant, res sanè in obscuro & difficili est.*

Medina existimat tribus modis voluntatem posse appetitum inferiorem movere. Medin. l. 2. q. 9. a. 2.

Primo, mediatè & indirectè, applicando videlicet intellectum ad alicujus objecti convenientis, aut disconvenientis considerationem, ex qua judicium intellectivum, ac deinde mox phantasticum in imaginatione, sive cogitativa hominis excitetur; à quo demum judicio phantastico proximè appetitus inferior moveatur. Hic autem modus est quidem indirectus, sed maximè naturalis; quia est ex parte objecti, quod voluntas per operam intellectus, & deinde sensus interni, ponit ante oculos appetitus sensitivi, ut ab eo proximè & connaturaliter excitetur & moveatur.

*Sic cum homo timet pœnas Inferni, ait Medina, per voluntatem movet intellectum, & per intellectum, imaginationem ad formandum aliqua phantasmata pœnarum: ut ignis urentis, vermis rodentis &c. Et exinde sequitur passio timoris in appetitu sensitivo.*

Secundò, directè, ac per immediatum imperium, quod voluntas ab intellectu directè, exercere potest in appetitum inferiorem. Sicut scribit Aristoteles de viro forti, inquit Medina, qui videns esse utilem iram ad pugnandum, vult irasci. Et mulier, cui placet mors viri, excitat dolorem in appetitu sensitivo ad exprimendas lacrymas.

Sed profectò Aristoteles non dicit, iram illam viri fortis à voluntate & intellectu immediatè in appetitum inferiorem, quasi per saltum, nulla intermedia imaginatione, illabi. Nam proximus & naturalis auriga appetitus inferioris est imaginatio; quæ

tio; quæ fortasse non nisi per grande miraculum potest præteriri: sicut in sphaeris cælestibus, Firmamentum nequit sphaeram Iovis, nisi commotâ intermediâ sphaerâ Saturni, ab Ortus versus Occasum rapere.

Deinde cum iudicium intellectûs, quo se regit voluntas, non sit proximus & idoneus auriga rectorque appetitûs inferioris; tali solum rectore velle uti, perinde est, ac nullo; & per consequens, velle cogere appetitum inferiorem in incognitum ferri; quod palam est impossibile.

S. August.  
Tract. 15.  
in Ioan.

Nec S. Augustinus simile quid voluit, cum dixit partem animæ inferiorem tanquam feminam, ab intellectu tanquam viro gubernari.

Non enim censuit sic immediate moveri & gubernari, ut nullum dictamen imaginationis (quæ est proxima & familiaris directrix appetitûs inferioris) deberet intercedere.

Nec uxor, quæ pessimi mariti morte lætatur, & tamen simulare per lacrymas dolorem, honoris sui interesse credit; per intellectum solum, oculos suos flere erudit, ut Poëta ingeniosus de feminis loquitur:

*Vt fierent oculos erudire suos:*

sed etiam eruditio ista seu suasio ab intellectu primum in imaginationem, tanquam hypodidascalem intellectûs, deinde in inferiorem appetitum defluit.

Et licet intellectus rationibus quandoque spiritualibus passionem in appetitu sensitivo excitari suadeat; imaginatio tamen idola quædam, tanquam altioris cogitationis rudimenta, formare potest, quibus argumenta intellectûs, sensibili & familiari suo modo, appetitui sensitivo intimer ac insinuet.

Arist. lib. 3.  
S. 8. de  
Anima.

Nec ullâ experienciâ contrarium constare potest; quandoquidem inter actus nostri intellectûs, & imaginationis nullum fermè discerniculum advertere possumus: quia quamdiu anima corpori alligata est, intelligit cum phantasmatibus, imò intelligendo, phantasmata speculatur, ut superius ex Philosopho exposuimus; ideoque spiritualis intellectio in quadam veluti nube corporalium phantasmatum sic involuta & intricata est, ut



ut actum intellectus ab actu imaginationis distinguere, & evolvere nequeamus.

Fateor tamen, me à viris spiritualibus & Mysticæ Theologiæ devotis, præcipuè à R. & Ven. illo Lovaniensi Capucino P. Io. Evangelistâ, de quo supra hâc Lib. IV. Cap. IV. Artic. VIII. facta mentio, aliquando audivisse: solitū se distinguere, quando intellectus suus & voluntas uterentur intermediâ operâ imaginationis, & quando non uterentur; sed immediatè facultati loco-motrici manūs, in scribendo, vel pedis, in ambulando, imperitarent, imperioq; suo in functiones suas impellerent.

Sed non acquiescebam. Nihil enim aliud ex narratione istâ ejus elicere poteram, quàm ἡγεμονικόν, & principem illam partem imaginationis, quæ cogitativa vocatur in homine, in summa cerebri arce residere, & quoties volumus quidpiam tranquillè cogitare, aut meminisse, spiritus animales eò per virtutem attractivam revocari, ac quietos in malaciâ quadam ibi retineri; ut intellectus cum ministrâ suâ cogitativâ, tranquilla phantasmata valeat, tanquam in regione superiori ac sereniori, contemplari. Non autem inde probari, intellectum imperando motum manūs aut pedis, operâ imaginationis non uti.

Cū verò intellectus non sic se elevat, sed quasi in inferiore spirituū animalium regionem, ubi spiritus illi liberè discunt & tumultuantur, descendit ac velut se immergit; profectò obscuriùs, tanquam in nubium regione, ac facillimâ imaginationis ac memorię perturbatione, omnia intelligimus. Quod omnes, credo, si attentè se introspiciant, fatebuntur; tamen mihi certè quotidiano meo experimento satis constat. Omnes enim penè intellectus hallucinationes eveniunt, quia ipse non sat altè supra regionem phantasmatum se elevat.

Tertiò, ex sola redundantia voluntatis deorsum, ait Medina, appetitus inferior potest moveri. Probat: *quia ex tristitia voluntatis de peccato spirituali naturali consequio, sequitur tristitia in appetitu: & gaudente voluntate de aliquo etiam non delectabili, sequitur delectatio in appetitu.* Sed hic iterum modus non placet, nisi commentariolo adjuvetur.

Tristitia enim, aut delectatio voluntatis non defluit imme-

Ccccc

diatè

diatē *per redundantiam* in appetitum inferiorem, quemadmodum liquorem ex lagena superiori in inferiorem defluere videmus. Cū enim tristitia & delectatio sint actus vitales tam superioris quā inferioris appetitūs; ut ex istis voluntatis affectibus, similes in appetitum inferiorem defluant, debent inferiūs vitaliter excitari. Ut autem appetitus inferior vitales motus eliciat, oportet ut objectum triste, vel delectabile per imaginationem ipsi repræsentetur. Naturale quippe ei est, ut nullum objectum prosequi, aut in eo delectari tristitave valeat, nisi præeunte phantasticā imaginationis face.

S. Thom.  
q. 25. a. 4.  
de Verit.

Suppositā autem hac phantastica objecti cognitione, non abnuo quandam à voluntate in appetitum inferiorem redundantiam fieri posse, nullā ex parte cognitionis objecti factā mutatione. Hæc quippe S. Thomæ mens est & doctrina; cū ait: *In viribus ordinatis adinvicem & connexis, ita se habet, quod motus intensus in una earum, & præcipuè in superiori, redundat in aliam. Vnde cū motus voluntatis per electionem intenditur circa aliquid, irascibilis & concupiscibilis (quæ sunt duæ partes appetitūs inferioris) sequitur motum voluntatis. Vnde dicitur in 3. de Anima, quod appetitus movet appetitum superior scilicet inferiorem, sicut sphaera sphaeram in corporibus calestibus.*

Sicut enim intellectus, per quendam naturalis sympathiæ consensum, trahit secum imaginationem, ad ejusdem objecti rudem saltem aliquam contemplationem; ita voluntas (quando stante eadem cognitione intellectuāli objecti invariata, proprio conatu suum amorem intendit) simili etiam sympathiā, ac per quendam veluti redundantiam, appetitūs sensitivi amorem accendit, eadem prorsus cognitione phantasticā circa illud objectum permanente.

Si enim voluntas, sub ejusdem planè & invariatae cognitionis directione, adhibito solo majori conatu, amorem suum intendere valeat; nulla videtur ratio, cur appetitūs inferioris (quem secum ut sphaera sphaeram vehit) affectum non possit simili modo, solo sympathiæ consensu, magis inflammare



In summa igitur, duo tantum sunt modi, quibus appetitus superior inferiorem movet.

Primus, per propositionem objecti, ministerio intellectus & imaginationis ipsi factam.

Secundus, augendo, aut diminuendo amorem inferiorem sensitivum, per amoris superioris intensiorem, aut remissionem.

Primum modum S. Thomas *ex parte rationis*, posteriorem *ex parte voluntatis* appellat. S. Thom.  
ibidem,

Totidem etiam sunt modi, quibus appetitus inferior superiorem trahit.

Nempe, primum ex parte objecti, mutando iudicium intellectus, & ducem voluntatis sic deprimendo, ut consentiat imaginationi, quæ est dux sensualitatis.

Deinde ubi utriusque iudicia inter se consenserint, sensualitas per immediatam sympathiam intendere, & magis accendere potest amorem voluntatis. Et hoc sensu veram existimo Medinæ opinionem, quam quidam, tanquam valde falsam, asperè rejiciunt. Primus modus similis est modo, quo subditus affectum Regis ad se trahit, corrumpendo Consiliarios ejus: alter, quo amorem ejus immediatè ad se allicit. Prior est ordinarius, & maximè naturalis: ut videlicet vis passionis à sensualitate, seu appetitu inferiori, gradatim, ac per naturales quodammodò scalas, ad arcem voluntatis ascendat. Medin. r.  
q. 9. a. 2.

Primo enim passio ducem suum imaginationem movet, ut rem sensibilem fortiter apprehendat. Imaginatio deinde, per sympathiam, intellectum ad ejusdem rei contemplationem excitat: intellectus deinde proponendo objectum, secundum sensum amabile, voluntatem inflammat.

In isto autem ascensu, intellectus præteriri nequit: quasi ab imaginatione proximè ad voluntatem saltari possit. Imaginatio enim proximus auriga voluntatis naturaliter esse non potest: sed sicut voluntas Angelica, ita & humana, intellectu proximè aurigante, movere se debet.

Secundo modo sensualitas movet voluntatem, quando

nulla nova ratio per imaginationem suggeritur, nec ipsa etiam imaginatio circa sensibile objectum intenditur; sed ex naturali corporis complexione, vel actuali ejus alteratione, passio magis accenditur, & per sympathiam, affectum voluntatis circa idem objectum ardentius inflamat.

Si enim aliquid ex voluntate in sensualitatem, per immediatam sympathiam, delabi possit; non video, cur per eandem viam, ex sensualitate ad voluntatem aliquid sursum redire non possit.

Quotiescumque verò uno, vel altero modo voluntas in consensum sensualitatis attrahitur, dicitur superior animæ pars aggravari, deijci &c. quia amor ejus, qui sursum spectare deberet, ad terrena & inferiora amanda quodammodo deprimitur.

S. Ber. Ser.  
81. in Cant.

Sap. 9.

S. August.  
lib. 2. c. 29.

de peccat.  
merit.

Lib. 1. c. 33.  
de nupt.

Lib. contra

Secund. c. 11.

Lib. 2. c. 8.

de nupt.

Lib. 1. c. 22.  
de nupt.

*Peccato enim factum est, inquit S. Bernardus, ut corpus quod corrumpitur, aggravet animam, sed amore, non mole. Et de concupiscentia carnali, in ardore concubitus, dicit S. Augustinus, quod totum animum in se deiectum conetur attrahere. Imò animam, per carnem, factam esse carnalem, & defectivo appetitu quodammodo corporascere.*

Vnde sumus veluti Centauri equi suis hominibus implexi, ut eleganter olim Minutius Felix. Nam, ut rursus S. Augustinus, *Gratiâ non subveniente, quid sunt homines, nisi quod ait Apostolus Petrus, velut muta animalia, procreata naturaliter in captivitate & interitum?* Ideo enim concupiscentia ista tam fortis & in mentem nostram efficax, *Lex peccati*, ait alibi, *verbis Apostolicis nuncupata est; quod hominem sibi subditum fecerit, quia Deo suo subditus esse noluit.*

Præter hos autem sursum in animam, sunt alij deorsum in corpus nostrum corporales concupiscentiæ influxus; quos Medici viribus imaginationis tribuere solent; non quia ab imaginatione proximè effluant, sed quia imaginatio appetitui inferiori præit, ac eum ad talem influxum, extimulat & accendit.

Ejusmodi sunt innumeræ alterationes, quas ad morbos, aut valetudinem corporis, passionibus animi excitant, vel in toto corpore



corpore, vel in certis quibusdam membris. Talis quoque est motus dilatationis cordis in gaudio, & restrictionis in tristitia. Ex quo simili motu cordis, ut & cerebri, plurimæ in corpore alterationes accidunt. Nam per spiritus vitales cordis, aut animales cerebri, plerique corporales passionum effectus administrantur.

Sed ille mirus, & tamen familiarissimus est. Quod ad imaginationem cibi, aut potûs blandi & dulcis, non tantum moveatur in appetitu inferiori orexis, sed etiam saliva in ore bulliat, & dulcescat.

Hoc autem fieri videtur, per naturalem quandam sympathiam inter appetentiam cordis (vel motum pruritûs qui inde in ventriculum resilit) & inter organum gustûs. Dulcedinem verò salivæ, ex subitâ permixtione & temperaturâ spirituum vel vitalium vel animalium cum humore salivæ, resultare puto. Siccitas enim spirituum cruditatem humoris in dulcedinem temperare, & veluti decoquere solet. Imò, si quid in omnium aliorum sensuum objectis dulce & blandum imaginamur, similem salivæ in ore æstum ac dulcedinem, largiûs aut parciûs, commover. Quin imò, in meditatione spiritali, quando scintilla ardoris, à superiori charitatis igne emuncta, in cor decidit; statim etiam lingua hoc sentit, & dulcedinem cordis testatur, quæ nullo tamen gustu percipi potest. Sicuti enim quid quid blandum & jucundum est, *dulce* appellamus; ita, miro naturæ consensu, jucunditatis istius testimonium mox annunciat lingua, quæ organum est illius sensûs qui propriam dulcedinem percipit.

Aut dicere possumus: cor esse epicylum amoris, tanquam blandi cujusdam sideris; cujus Influentia illicò in oculos, & linguam manifestè exilit. Ad amorem quippe jucundæ rei, statim suis spiritibus clarescunt & hilarescunt oculi, lingua verò salivæ dulcis osculo palatum suum allambit.

## CAPUT VIII.

## De Habitibus.

**Q**uia in appetitu maximè, tam superiori quàm inferiori, ex actibus ipsorum, vestigia quædam impressa relinquuntur, quæ vocamus habitus; ideo hîc τύπη, ac summatim, materiæque superficiem strîctim veluti deflorantes, de habitibus pauca addemus; plenam materiam, in partes suas dissecandam, tradentes Philosophis Ethicis.

## ARTICVLVS I.

*Quid sit habitus, & unde producat.*

**I**N quibusdam potentijs animæ, post breve aut longum exercitium, manere quandam in agendo facilitatem & promptitudinem, experienciâ est notissimum. Hanc Philosophi Græci ἔξις, à verbo ἔχειν *habere*, ideoque Latini meritò *habitus* appellaverunt.

Senec.  
Epist. 113.

Seneca verò etymologicam hujus nominis rationem suggerere nobis videtur, cum de habitu virtutis ait: *Virtus nihil aliud est, quàm animus quodammodò se habens.*

Igitur habitus inde nomen accepisse videtur; quòd animus per eum certo quodam modo se habeat, & affectus sit.

Est autem habitus, non otiosa tantùm quædam potentia ad futurum actum dispositio, sed promptitudo efficax, quæ cooperando adjuvat potentia activitatem. *Habitus enim*, inquit

D. Tho. 1. 2.  
q. 71. a. 3.

D. Thomas, *est causa actus, in genere causa efficientis.*

Idem 1. 2.  
q. 78. a. 2.

Hinc facilitatem, & pronitatem majorem in operatione talis potentia, anima experitur: ex qua deinde delectatio quædam peculiaris resultat, quæ non erat in operationibus, quas antè potentia sola, sine habitu eliciebat. Vnde *qui peccat ex habitu*, ait S. Thomas, *semper gaudet de hoc, quod ex habitu operatur, quamdiu habitu utitur.* Delectatio enim quædam, per modum



modum proprietatis resultat ex actu, qui cum illa facilitate ab habitu effluit. Vnde dura & aspera, *paulatim voluptati sunt, quæ necessitate cæperunt*, inquit Seneca.

Senéc. lib.  
de provid.  
c. 4.

Si tamen mel istud, infusâ aliunde majoris doloris amaritudine quasi suffocetur, anima amittit delectationis sensum: ut in illis accidit, qui dolentes, ex consuetudine tamen, quam detestantur, peccant. Qualis in principio conversionis Augustinus; de quo ipse ad Deum: *Voluntas nova quæ mihi esse cæperat, ut te gratis colerem, fruique te vellem, Deus sola certa iucunditas, nondum erat idonea ad superandam priorem vetustate roboratam. Ita due voluntates meæ, una vetus, alia nova, illa carnalis, ista spiritalis, conflugebant inter se, atque discordando dissipabant animam meam.*

S. August.  
lib 8. c. 8.  
Confess.

Pronitas verò habitûs, & veluti nifus quidam, aviditasque ad operandum, ex actibus repentinis, quibus potentia ad agendum perpetuò quasi sollicitatur, maximè intelligi potest. *In repentinis enim*, inquit D. Thomas, *signum interioris habitûs præcipuè accipi potest.* Sunt enim repentini isti actus (non in amoenâ Aristotelis comparatione) famulis expeditis, & semper currere prurientibus similes, qui ante auditum totum domini imperium, foràs emicant, nescientes quò & quare. Tam promptus autem & præceps actuum excursus, antecedentem potentiæ promptitudinem, quæ ex inclinatione habitûs provenit, significat.

D. Thom.  
lib. 3. c. 160.  
contr. Gent.  
Arist. lib. 7.  
c. 7. Ethic.

Licet verò habitus per actuum frequentationem acquisiti, talem promptitudinem potentiæ suæ addant; non omnes tamen habitus id faciunt. Nam habitus supernaturales ex pronitate & facilitate potentiæ agnosci non possunt. Non enim ad facilitandam merè potentiam, sed ad elevandam ipsam ad actus superioris ordinis, facti sunt. Vnde isti habitus aliquid de ratione potentiæ participant. Licet enim activitatem quandam imperfectam & inchoatam in potentia sua supponant, quam ad actus supernaturales elevant; hæc tamen inchoatio, inferioris ordinis est, & prima activitas supernaturalis ab ipso habitu incipit. Potentia enim, nisi ab habitu supernaturali, vel ab alio supplente vicem habitûs, elevatur,

vetur, nullum omnino actum supernaturalem elicere valet.

Deinde nomen *habitus* tam latè aliquando sumitur, ut species, quibus potentia cognitiva in operationibus suis utuntur, comprehendat. Species verò istæ non tantum ad promptitudinem potentia dandam, sed ad substantiam actus ejus, sunt simpliciter necessariae. Vnde species longè alterius rationis habitus sunt, quàm illi qui in appetitu superiori. aut inferiori, ex actibus frequentatis generantur. Sine talibus quippe habitibus acquisitis, potentia actus suos elicere potest; imò generatio habitus à primo potentia actu incipere debet.

D. Tho. 1. 2. q. 67. 2. 2. Licet autem S. Thomas species intelligibiles, quandoque habitus & virtutes intellectuales appeller; sæpius tamen habitus, in ratione tam superiori quàm inferiori, à speciebus distinguit. Nam de habitu memorativo: *In viribus sensitivis apprehensivis interius, inquit, ponuntur aliqui habitus. Quod patet ex hoc precipuè, quòd Philosophus dicit in Libro de Memor. quòd in memorando unum post aliud, operatur consuetudo; quæ est quasi quædam natura. Nihil autem est aliud habitus consuetudinalis, quàm habitudo acquisita per consuetudinem, quæ est in modum natura.*

Vbi probat, in memorativa hominis esse quosdam habitus; non quia sunt species in thesauro illo memoriae reconditæ, sed quia ex ipso specierum memorativarum usu, habitus & habilitas quædam acquiritur, & ibi relinquitur, ad similem specierum usum, & reminiscentiam unius post alterum. Quod in memoria, qua quis longam v. g. Ciceronis Orationem, sæpicule recitando, memoriter addiscit, est evidentiissimum.

Vnde habitus intellectus (quales sunt scientiæ, opiniones &c.) propriè vocamus, non species intelligibiles, quæ ad simplices conceptus de rebus formandos, instruunt & juvant intellectum; sed inclinationes quasdam, quæ ex judicijs naturali lumine intellectus expressis, in memoria intellectiva relinquantur.

Ex jam dictis, habitus generaliter, & ut etiam species tam intelligibiles, quàm sensibiles complectitur, definiri potest: Qualitas superaddita potentia naturali, ad adjuvandam operationem ejus. Habitus acquisiti adjuvant facilitando; reliqui ad



qui ad actus superioris ordinis elevando ( quod faciunt habitus supernaturales, ) aut præbendo potentiaë necessarium concursum ex parte objecti : quod proprium specierum officium esse, hodie Philosophi passim existimant.

In Philosophia tamen S. Augustini (imò Aristotelis, quam Libris superioribus approbavimus, ) species non sunt qualitates naturalibus potentijs, ad adjuvandam effectivè earum activitatem, superadditæ ; sed sunt proxima quædam sensitivæ, vel intellectivæ cognitionis objecta, per quæ potentia, tanquam per specimen & imaginem ulterioris objecti ad objectum istud ulterius, pertingit.

Et sanè species sensibiles tam externi, quàm interni sensûs, non videntur esse qualitates potentijs sensitivis naturâ suâ inhærentes: cum species v. g. visibiles, instar radiorum luminis, per aërem ad oculum trajiciantur, & in aëre subjectentur : species verò phantasticæ in spiritibus animalibus, per omnes cerebri cuniculos & meatus ambulent.

Producuntur autem habitus acquisiti, non ab ipsa immediate potentia, ut quidam hodie philosophantur ; sed ut Aristoteles, D. Thomas, & vetustior meliorque Philosophia docet, ex actibus proximè, tanquam eorum quædam vestigia, in potentia relinquuntur : ac per novorum actuum quasi inculcationem, radicem altius figunt & intenduntur.

Arist. lib. 2.  
E. 1. 2.  
Ethic. &c.

Habitus tamen supernaturales non per actus, sed à Deo infunduntur, nec actibus etiam physicè intenduntur. Tales enim habitus sunt instar potentiarum supernaturalium, quæ ad multa genera actuum se extendunt; adeoque longè superiores & nobiliores sunt singulis actuum speciebus, à quibus ( non tanquam à causis tantum instrumentarijs, sed principalibus ) deberent intendi. Nulla tamen causa principalis physicè efficiens, suo effectû ignobilior potest esse.

Quomodo igitur, inquires, ex actuum supernaturalium frequentatione, facilitatem operandi sentimus crescere, si actus supernaturales non intendunt suum habitum ?

Fatendum est, ex actibus habituum supernaturalium quasdam etiam ad actus quodammodò similes in intellectu nostro, aut voluntate inclinationes & pronitates nasci. Vnde

D d d d d nullo

nullo certo experimento deprehendere possumus, an actus ejusmodi ex habitibus naturalibus, an supernaturalibus emanent. Unde ex actibus supernaturalibus videntur habitus quidam inferioris ordinis progigni, qui facilitatem quandam addant potentiæ, & quorum actus, quamvis ordinis naturalis, ab actibus supernaturalibus nequeamus experienciâ distinguere.

Quod facilius fortasse intelligeretur, si habitus istos, non ab actibus supernaturalibus, sed à potentiâ ipsâ naturali, per actus supernaturales determinatâ, physicè diceremus produci.

Sed nihil etiam erit absurdi ( imò probabilius est ) si, veluti de ceteris habitibus, ita de istis asseramus eos ab actibus physicè effici, ac potentiæ inculcari.

Quid enim verat, à causa sublimioris & supernaturalis ordinis, aliquem effectum in inferiori ordine produci?

Certè experimento manifestum est: Catholicum qui in hæresim, aut apostasiam à fide excidit, recordari assensuum fidei, quos olim in Religione Catholica elicit. Igitur vel speciem intelligibilem, vel habitum in intellectu assensus illi reliquerunt, per quem hæreticus iste actuum præteritorum supernaturalium postea recordatur.

Deinde, sanctæ animæ, solitæ sperare in Domino, & amare eum, si per superveniens peccatum, habitum spei, aut charitatis supernaturalis amittant, aliquam tamen adhuc permanentem ad sperandum, vel amandum Deum inclinationem, veterisque vitæ quasdam veluti reliquias experiuntur: quæ nihil aliud esse videntur, quàm habitus quidam & impressiones naturales ex antiquis actibus residuæ.

Tales autem naturales habitus nullo modo amplitudinem habitus supernaturalis adæquant, sed singuli particulare aliquod objectum, intra latitudinem objecti adæquati habitus supernaturalis comprehensum, actusque solum quosdam circa particulare illud objectum elicitos, & eliciendos respiciunt. Qui enim ex Catholico in hæresim delabitur, non circa omnem fidei Catholicæ Articulum aliquam inclinationem servat, sed circa illos tantum, quibus aliquando & sæpe, in Ecclesia Catholica assensus est.

ARTI,



## ARTICVLVS II.

*In quibus potentijs generentur habitus.*

**N** Vlla animæ potentia certiùs habituum capax est, quàm voluntas. Est enim sola formaliter libera, & ad virtutum vitiorumque moralium actus indifferens, ex quibus deinde permanentes habitus in ea potentia generantur.

Finis namque, cur à Deo & naturâ habitus inventi instituti que sint, fuit, ut variâ quasi suppellectile instruerentur quædam potentia, quæ intra sphaeram activitatis suæ, ut sic dicam, varietatem quandam objectorum partialium continent, ad quæ per habitus determinari, & adjuvari debent; ut activitate potentia per habitum roboratâ, ipsa faciliùs per obstantes difficultates valeat penetrare, & in actus suos exire.

Intellectus deinde, non solum specierum intelligibilium, quas vel ex phantasmatibus immediatè haurit, vel ex prioribus suis conceptibus sibi fabricat; sed etiam propriorum habituum, tam speculativorum, quàm practivorum est capax. Habitus practici sunt artes & prudentia. Speculativi, Physica, Metaphysica, Mathematicæ, & tot aliæ disciplinæ.

Sensus quoque interni species suas sensibiles, & habitus quosdam habent, quos per usum, & ordinationem specierum sibi acquirunt; ut de potentia memorativa, ex S. Thoma, S. Tho. I. 2. q. 67. a. 2. Artic. præced. audivimus.

Sicut verò cogitativa hominis, propter conjunctionem cum ratione superiori, ratio inferior appellatur, & longè nobilior est, quàm imaginativa bruti; ita quoque nobiliores habitus, motibus illis quibus in obsequium rationis superioris trahitur, sibi comparat. Adeo, ut etiam prudentia cujusdam habitus in ea sit, quo virtutes illas morales, quas Aristoteles & D. Thomas in appetitu inferiori collocant, gubernat. D. Tho. I. 2. q. 56. a. 4.

Virtutes autem istæ sunt temperantia, in parte concupiscibili, fortitudo in irascibili. Cum enim utraque ista appetitus

titus inferioris pars continuò rebellet superiori, in illa habitus quarundam virtutum ponuntur, ut sint ipsis tanquam frena quibus cohibeantur, ne tam ferociter partem animæ superiorem assiliant, sed obedientius se reflecti sinant intra rationis gyrum.

Vasq. r. 2. Multi tamen Scholastici negant veram virtutem temperantia & fortitudinis residere in appetitu inferiori, sed in voluntate, quæ sola, inquiunt, in honestatem virtutis assurgere valet. Habitum tamen aliquem, qui si non perfecta virtus, certe tamen rudimentum quoddam virtutis temperantia, & fortitudinis sit, ab appetitu inferiori non respuunt.

In sensibus verò externis, aut eorum organis, præter species sensibiles ab objectis externis impressas, nulli proprii habitus admittuntur. Actus enim istorum sensuum ne quidem speciem sui in potentijs suis relinquunt, sed eam in sensus internos tantum trajiciunt. Nulla verò potentia acquirit habitum, nisi quem proprii actus, tanquam vestigium sui, ei ipsi potentia imprimunt.

Deinde potentia quæ capax est habitus, debet posse uti habitu in absentia objecti. Ideo enim actus relinquunt in potentia sua habitum, ut eo valeat uti, quando voluntati allubescit, sive objectum absens sit, sive præsens. Habitibus enim utimur, cum volumus, ut vulgare Philosophi axioma habet. Sensus autem externi à natura solum instituti sunt, ut circa sensibilia præsentia tantum se exerant, aut statim ubi primum evanuerint: si verum est, sonum, etiam postquam evanuit, auditu percipi.

In facultate denique loco-motiva nulli proprii habitus sunt: sed in ejus organoabilitas tantum quædam & dispositio corporalis, per frequentes actus gignitur. Qualis in digitis citharizantium, aut pedibus saltantium est mollities, & flexibilitas nervorum, qui potentia loco-motrici deserviunt. Propria verò ars, quæ habitus est, residet in mente.

In brutorum autem appetitu, & imaginativâ, cur habitus quidam saltem imperfecti non concedantur, non satis intelligo. Profecto enim canes assuetudine multa ab hominibus docen-



docentur imaginari, & amare, vel odiffe.

Et licet bruta tali habitu non utantur cum volunt, quia voluntatem & libertatem nullam habent; usus tamen voluntarius non videtur ad essentiam habitûs, sed ad accidens quoddam tantum pertinere.

Atque hîc tandem, ante absolutam quam animo delineaveram scriptionis meæ ideam, calamum pono. In calce enim Libri I. de intellectu, & voluntatis, virtutumque intellectuum, ac moralium objectis, hîc Libro IV. multa dicere, & ad introspectiendâ Ethicæ Aristotelis, & Theologiæ practicæ interiora, velut fenestras quasdam aperire proposueram. Quæ jam, nimis longitudinis metuens, in densam Moralis scientiæ silvam rejicere malui.

Interim si quid dilucidè, aut simile vero, in omnibus istis Libris, à nobis assertum, aut disputatum est, id non mihi ingenijque mei tenebris, sed supernæ gratiæ lumini adscribi volo. Cui laus & gloria in secula seculorum. Amen.

## FINIS.



# INDEX CAPITVM

E T

## ARTICVLORVM

### LIBRI I.

#### De Anima in genere.

CAP. I. Quid sit Anima. pag. 1.

ART. I. Quid Philosophi veteres de anima sint opinati. 2

ART. II. An anima nihil sit aliud, quàm temperies sui corporis, aut spiritus vitales, ut Medicis quibusdam, & Epicureis placet. 5

ART. III. Medici quidem Hippocratem & Galenum ab errore Epicureorū liberare conantur. 7

ART. IV. Animam non accidens, sed substantiam esse. 9

ART. V. Non sola anima, sed formæ etiam quædam inanimæ aliquam partium materiæ suæ conformationem flagitant. 10

ART. VI. An lapides & metalla vivant, ut placet Cardano, Campanellæ, & alijs. 14

ART. VII. An terra vivat, ut Keplerus contendit. 17

ART. VIII. An sidera sint animata. 23

ART. IX. Definitio animæ. 28

ART. X. Quid vita secunda, sive actio vitalis. 31

CAP. II. De conformatione corporis animati. 34

ART. I. Anima seminis non conformat prima membra foetus. Vallesius, Sennertus, Scaliger, Argenterius &c. rejecti. ibid.

ART. II. Opinio Argenterij, & quorundam Medicorum, qui animam rationalem semini adhuc informi, ad illud conformandum, inesse dicunt, ex sacris litteris refelli potest. 39

ART. III. An solus Deus conformet membra corporis humani in ventre matris. 48

ART. IV. Angelos non esse fabros primi domicilij animæ. 53

ART. V. Nec anima matris est causa efficiens conformationis sui foetus. 56

ART. VI. Virtus inanimati seminis à parentibus decisa, prima foetus stamina in utero matris orditur. 59

ART. VII. Rejiciuntur quæ contra hanc inanimati seminis vim conformatricem obijci à quibusdam Medicis solent. 65

ART. VIII. Vis formatrix quæ est in semine animalis, post inductam animam vialem vegetativam, usque ad formam membrorum animalis, materiam conformare pergit. 71

ART. IX. Iul. Scaligeri, & aliorum de successione animarum dubitationes dissipantur. 76

CAP. III. De divisione animæ in vegetativam, sensitivam, & rationalem. 82

ART. I. An tres istæ animæ species sint



## INDEX CAPITVM

- sint infimæ, an genera subalter-  
 na. 85  
**CAP. IV.** De unione, qua anima  
 corpus organicum informat. 89  
**ART. I.** An unio animæ rationalis  
 ad corpus sit spiritalis, an mate-  
 rialis. 90  
**ART. II.** An animæ animalium im-  
 perfectorum, quæ *symplicia*, seu *inse-*  
*cta* vocantur, sint totæ in quali-  
 bet parte sui corporis. 93  
**ART. III.** An animæ animalium  
 perfectorum sint totæ in qualibet  
 corporis parte. 96  
**ART. IV.** Quare S. Augustinus pu-  
 taverit animas animalium inse-  
 ctorum etiam indivisibiles. 103  
**CAP. V.** De unitate & multitudine  
 animarum in eodem corpore. 105  
**ART. I.** Philoponi opinio, de plu-  
 ralitate animarum in eodem ho-  
 mine, non satis valide à quibus-  
 dam recentioribus rejicitur. 106  
**ART. II.** Opinio Philoponi & Oc-  
 cami nimis gravi Censurâ à To-  
 leto & alijs notari videtur. 108  
**ART. III.** Vnica anima est in uno-  
 quoque homine, quæ ex tribus  
 gradibus vegetivo, sensitivo, ra-  
 tionali, solâ ratione distinctis co-  
 alescit. 111  
**ART. IV.** An formæ quædam sub-  
 stantiales in animâ, præter animas,  
 in viventibus sint ponendæ. Et  
 primum, An elementorum for-  
 mæ. 115  
**ART. V.** An in corpore animato,  
 præter animam, sint formæ sub-  
 stantiales in animæ organorum &  
 membrorum, ut oculi, auris, ce-  
 rebri, cordis, carnis, ossis &c. 120

- ART. VI.** Medica quoque pro for-  
 mis organicis argumenta parum  
 valent. Fernelius, Vallesius, alijs  
 quæ confutati. 127  
**ART. VII.** Nec argumenta Theo-  
 leogica satis fortiter formas or-  
 ganicas asserunt. 135  
**ART. VIII.** An anima sit in omni-  
 bus partibus sui corporis. 142  
**ART. IX.** An anima per partes sui  
 homogeneas, an heterogeneas,  
 omnia membra corporis sui in-  
 former. 145  
**CAP. VI.** De potentijs animæ in  
 genere. 152  
**ART. I.** Potentiæ vitales realiter ab  
 anima distinguuntur. *ibid.*  
**ART. II.** An Aristoteles distinxerit  
 potentias ab anima. 158  
**ART. III.** An S. Augustinus poten-  
 tias ab anima distingui existima-  
 verit. 160  
**ART. IV.** Quid adversus distinctio-  
 nem potentiarum ab anima obje-  
 ctent Nominales. 166  
**ART. V.** Potentiæ organicæ in quo  
 proximè sint subjecto. 171  
**ART. VI.** Potentiæ anime speciem  
 & distinctionem suam sumunt ab  
 objectis. 177

## LIBRI II.

### De Anima vegetativa.

- CAP. I.** Quid anima vegetativa. 185  
**CAP. II.** De Alimento. 186  
**ART. I.** An alimentum debeat esse  
 corpus mixtum. 187  
**ART. II.** An spiritus odoriferi cat-  
 nium, florum, tabaci &c. alimen-  
 tum esse possint corporis huma-  
 ni. 191

ART.

# ET ARTICVLORVM.

- ART. III.** An spiritus tabaci naturale jejuniū solvat. 192
- ART. IV.** An alimentum debeat esse ignobilius vivente. 196
- ART. V.** An carnes crudæ in cibo utiliores coctis. 200
- ART. VI.** Vtrum assis, an elixis carnis vefci utilius. 202
- ART. VII.** An edere carnes expediat Musarum cultoribus. 204
- ART. VIII.** An Scaliger meritò reprehendat Cardanum, Quòd dixerit studia ad vitæ longitudo- nem conferre. 209
- ART. IX.** An vini potus sit homini- bus salutaris. 214
- ART. X.** An varietas cibi ac potus utilior, quàm simplicitas. 219
- ART. XI.** Quo ordine sumi debent à nobis alimenta. 224
- ART. XII.** Plurimi Medici suadent cenam largiorem prandio. 230
- ART. XIII.** Litterarum tamen stu- diosis cæna prandio parcior & ficior convenit. 233
- CAP. III.** De chylosi, seu prima concoctione quæ fit in ventricu- lo. 236
- ART. I.** De vi alimēti attrahente. 237
- ART. II.** Qua ratione alimentum coquatur in ventriculo. 242
- ART. III.** Quanto tempore ventri- culus indiget, ut chylum perficiat. 247
- ART. IV.** Quanto tempore indigent species Eucharisticæ, ut à ventri- culo corrumpantur. 251
- CAP. IV.** De chymosi. 254
- ART. I.** Qua ratione sanguis gene- retur in hepate. 255
- ART. II.** An sicut sanguis in hepate, ita vinum in uva generetur. 261
- ART. III.** An sanguis sit animatus. 275
- ART. IV.** De triplici spiritu, qui ex sanguine gignitur. 282
- ART. V.** De lacte, & semine. 287
- CAP. V.** De nutritione. 292
- ART. I.** Quid nutritio. Quid ac- cretio. 293
- ART. II.** Qua proportionē partes corporis humani accrescant. 298
- ART. III.** An nutritio & accretio sint mutationes continuæ. 302
- ART. IV.** De tertiæ concoctionis excrementis. 303
- ART. V.** An salutaris pileolorum usus, quibus jam passim caput te- gimus. 308
- ART. VI.** An crines vivant. 312
- ART. VII.** An vivens maneat idem ante & post accretionem. 319
- ART. VIII.** Quibus gradibus ascen- dant incrementa humani corpo- ris. 324
- ART. IX.** Decrementum, & sene- ctus hominis. 331
- ART. X.** Imago senectutis parabolice depicta ab Ecclesiaste. 339
- CAP. VI.** De Generatione. 344
- ART. I.** Quid generatio. 345
- ART. II.** Ad quatum consanguini- tatis gradum natura matrimo- nia refugit. 348
- ART. III.** Principia generationis foetus. 352
- ART. IV.** De humore distillatio. 356
- ART. V.** Cur pollutio vetita jure naturæ. 359
- ART. VI.** An licitum sit, foetum in- animatum expellere. 365

ART.



# INDEX CAPITVM

- ART. VII. An in femine humano sit morbida aliqua qualitas, seu peccati fomes, qui animam rationalem ei infusam maculâ originali inficiat. 370
- ART. VIII. S. Anselmus à sententia S. Augustini non recedit. 373
- ART. IX. Quidnam sit illa morbida qualitas femini inhærens, qua generans, prolem suam peccato originis inficit. 377
- ART. X. Quomodo verum est quod docet S. Augustinus, morbidam concupiscentiæ qualitatem pravâ consuetudine augeri, continentiaâ diminui. 382
- ART. XI. An in femine femineo sit etiam ejusmodi qualitas morbida. 385
- ART. XII. An pudor concubitûs, & partium verendarum, ex peccato primi parentis ortû habuerit. 391
- ART. XIII. Cur potius genitalibus, quàm ceteris membris pudor & velamen additum sit. 401
- ART. XIV. Quâ ratione fœtus in utero conformetur. 408
- ART. XV. An unum membrum citius altero conformari incipiat. 414
- ART. XVI. Quando fœtus in utero animetur. 417
- ART. XVII. An inter animam vegetativam embryonis, & rationalem, necesse sit animam sensitivam intercedere. 427
- ART. XVIII. Quenam causa principalis efficiens introductionis animæ in materiam fœtus. 431
- ART. XIX. Vnde difficultas & dolor humani partûs. 442

- ART. XX. An in statu innocentia, feminarum partus sine dolore esse potuerit. 446

## LIBRI III.

### De Anima sensitiva.

- CAP. I. Quid Philosophi quidam de animabus brutorû senserint. 466
- ART. I. Quibus argumentis, quidam animas brutorum, rationales esse contendunt. 467
- ART. II. Animæ brutorum irracionales, & merè sensitivæ sunt. 472
- ART. III. Argumenta Plutarchi, Vallæ, Bodini, Campanellæ, & aliorum, quibus animas rationales brutis inferunt, dissolvuntur. 476
- CAP. II. De sensu in genere. 483
- ART. I. Quot sint sensus externi. 484
- ART. II. Quotuplex sit objectum sensûs. 486
- ART. III. Disputatio antiqua inter Peripateticos, Academicos, & Epicureos de errore sensûs. 489
- ART. IV. An sensus per irradiationem defluant à cerebro, an suis quisque organis stabiliter insideant. 492
- CAP. III. De objecto visûs. 506
- ART. I. Quid lumen. ibid.
- ART. II. Quid color. 508
- ART. III. An in tenebris sint colores. 515
- ART. IV. An color specie distinguitur à luce. 521
- ART. V. An color videatur in solis corporum opacorum superficiebus. 526
- ART. VI. An color videatur per alias quas species, per mediû diffusas. 532
- E e e e e ART.

# INDEX CAPITVM

- ART. VII. An species visibiles sint  
alterius naturæ specificæ à suis  
coloribus. 537
- ART. VIII. Oculi fabrica. 542
- ART. IX. Vbi visio fiat. 546
- ART. X. An species visibiles activè  
ad visionem concurrant. 553
- ART. XI. Qua ratione species visibi-  
lis concurrat ad visionem. S. Au-  
gustini Philosophia. 557
- ART. XII. Non de nihilo Duran-  
dus negavit speciem visibilem  
esse utilem ad videndum, nisi à  
potentiâ visivâ videatur. 565
- ART. XIII. Fortasse non erravit  
Plato, quando visionem jactu ra-  
diorum ex oculis fieri dixit. 570
- ART. XIV. Falsò etiam à quibusdam  
Platoni tribuitur opinio Empe-  
doclis, Democriti, & Epicuri:  
Lucis & colorum radiationem,  
per effluxum tenuium corpuscu-  
lorum fieri. 573
- ART. XV. Quid videatur in speculo.  
577
- ART. XVI. An tamen defendi non  
possit quod S. Augustinus, &  
S. Thomas asserere videntur:  
Imaginem vultûs nostri videri  
in speculo. 581
- CAP. IV. De Auditu. 593
- ART. I. Quid sonus. ibid.
- ART. II. Quænam sit causa physica  
soni efficiens. 595
- ART. III. De voce. 599
- ART. IV. Quomodo species soni  
diffundantur per medium. 603
- ART. V. Cur species soni successivè  
per medium trajiciatur. 606
- ART. VI. An necesse sit totum aërem  
medium, usque ad organum au-  
ditûs, vibrari? 609
- ART. VII. Quomodo pisces sub aqua  
audire possint. 612
- ART. VIII. An sonus audiatur post-  
quam esse desierit. 616
- ART. IX. Quid Echo. 619
- ART. X. Quænam Poëtæ de Echo  
sint fabulati. 622
- ART. XI. Quid sit organum audi-  
tûs. 625
- ART. XII. In qua parte organi au-  
ditûs, sonus audiatur. 630
- ART. XIII. Quomodo potentia au-  
diendi sonum percipiat. 633
- CAP. V. De olfactu. 636
- ART. I. Quid odor. ibid.
- ART. II. An odor per species ab ol-  
factu percipiat. 640
- ART. III. An species odorabiles  
naturâ specificâ ab odore diffe-  
rant. 646
- CAP. VI. De Gustu. 659
- ART. I. Quid sapor. ibid.
- ART. II. Quodnam sit organum  
gustûs. 662
- ART. III. An gustus mediante spe-  
cie gustabili sapore percipiat. 667
- CAP. VII. De Tactu. 670
- ART. I. Quodnam objectum tactûs.  
671
- ART. II. An voluptas & dolor sint  
quædam peculiaria objecta ta-  
ctûs, præter vulgares qualitates  
tangibiles primas & secundas. 673
- ART. III. Quænam pars animalis  
sit organum tactûs. 677
- ART. IV. An tactûs ad sentiendum  
speciebus tangibilibus indigeat.  
680
- ART. V. Argumenta, quibus species  
tangibiles videntur asseri. 684
- ART.



## ET ARTICVLORVM.

**ART. VI.** Cur excellentia tactûs dicatur signum ingenij. 690

**ART. VII.** In quibusnam sensibus, pronunciatum istud Peripateticum verum est: Sensibile positum supra sensum non efficit sensationem. 693

**CAP. VIII.** De sensibus internis. 695

**ART. I.** Quænam sit sensuum internorum sedes. 696

**ART. II.** Quot sint sensus interni. 698

**ART. III.** An sensus interni species ad cognoscendum indigeant. 704

**ART. IV.** Quomodo sensuum internorum operationes per species exerceantur. 708

**ART. V.** Quomodo tanta imaginum turba cerebro tam angusto contineri, & spiritibus vectoribus, tantâ velocitate currere, & recurrere, sine confusione possint. 713

**ART. VI.** Quomodo insomnia fiant. 717

**ART. VII.** Imaginationis vires in signaturâ fœtus. 722

**CAP. IX.** De appetitu sensitivo. 727

**ART. I.** Appetitus animalis in quo organo resideat. 728

**ART. II.** Quodnam sit appetitus sensitivi objectum. 732

**ART. III.** Quot sint passiones appetitus sensitivi. 737

**CAP. X.** De potentia loco-motiva animalium. 742

**ART. I.** An Vbi, quod est terminus motus localis, spatium aliquod imaginarium respiciat. 744

**ART. II.** An potentia loco-motiva

mediante impetu distincto à motu, impellat mobile. 748

**ART. III.** In qua parte corporis, potentia loco-motrix animalis organum suum habeat. 750

**ART. IV.** Quo modo exerceatur motus voluntarius animalis. 755

## LIBRI IV.

### De Anima rationali.

**CAP. I.** De immortalitate animæ rationalis. 757

**ART. I.** Quid Aristoteles de animæ immortalitate senserit. 761

**ART. II.** Quibus conjecturis, Aristoteles mortalitati animæ favisse putatus est. 768

**ART. III.** Quid Hippocrates senserit de animæ immortalitate. 772

**ART. IV.** In Veteri Testamento parcius & obscurius, in Novo sapissimè & clarissimè indicata animæ humanæ immortalitas. 775

**ART. V.** Ex speculatione, qua intellectus se supra phantasmata elevat, animæ humanæ probata immortalitas. 777

**ART. VI.** Si aliquod in Vniverso, rerum humanarum providens Numen est, anima humana est immortalis. 782

**ART. VII.** Naturali quodam omnium hominum instinctu probata animæ humanæ immortalitas. 784

**ART. VIII.** Reditus quoque animarum defunctorum ad vivos, earum immortalitatem probat. 786

**ART. IX.** An anima humana, secundum supremam rationalitatis apicem, quo est immortalis & à corpore

Eeeee 2 inde-

# INDEX CAPITVM

- independens, sit forma corporis. 790
- ART. X. Argumenta aliquot, contra animæ humanæ informationem objecta, rejiciuntur. 794
- CAP. II. De animæ rationalis indivisibilitate. 800
- ART. I. Anima rationalis est integraliter indivisibilis. 801
- ART. II. Argumenta quibus animæ rationalis indivisibilitas oppugnari potest. 803
- ART. III. Verius est, unionem indivisibilis animæ ad corpus divisibile, esse in partes integrantes divisibilem. 805
- CAP. III. De animæ rationalis creatione. 810
- ART. I. Quænam sit illa traductio, quâ quidam Patres putaverunt, aut dubitaverunt, animam rationalem à parentibus in filios traduci. 812
- ART. II. Anima rationalis non traducitur à parentibus, sed à Deo solo creatur. 818
- ART. III. Philosophi quidem Gentiles, solo rationis ductu, arbitrati sunt animam humanam aliter olim à Deo creatam, quàm in hoc ærumnoso & mortali corpore. 823
- CAP. IV. De Intellectu, supremâ animæ rationalis potentiâ. 826
- ART. I. Quid intellectus agens, & ejus officia. 827
- ART. II. An necesse sit, intelligentem phantasmata speculari. 832
- ART. III. Phantasmatum puritas & agilitas quantum ingenio conferant. 837
- ART. IV. An noster intellectus quædam in ideis, seu rationibus divinis & æternis intelligat. 842
- ART. V. An Philosophi Gentiles, præsertim Platonici, sublimiori, & supernaturali cognitione fuerint aliquando Deum contemplati. 846
- ART. VI. Discrimen inter Platoniorum, & Christianorum illustrationes. 850
- ART. VII. Quidnam sit illa lucis interioris scintilla, qua ad Dei visionem elevari, & in eâ se teneri, Contemplativi narrant. 854
- ART. VIII. Quomodo, & quando intellectus humanus ad usum rationis perveniat. 861
- ART. IX. An quispiam in una materia desipere, & in alia uti plenâ ratione, ac sapere valeat. 866
- ART. X. Quo sensu D. Augustinus carentiam usûs rationis in parvulis, dixit esse effectum peccati originis. 870
- CAP. V. De varietate operationum intellectûs. 874
- ART. I. In quo simplex apprehensio intellectûs à judicio differat. 875
- ART. II. Quomodo scientia, opinio, fides, suspicio, dubitatio, inter se distinguantur. 879
- CAP. VI. De voluntate. 882
- ART. I. Sed quomodo igitur Theologi Mystici dicunt, *Voluntas intrat, ubi intellectus foris stat?* ibid.
- ART. II. Iudicium, & quidem in intellectu requiritur, ut voluntas se moveat, nec nuda apprehensio sufficit. 885
- ART. III. An verum sit istud Aristotelis:



## ET ARTICVLORVM.

Aristotelis : *Voluntatem in electione  
semper eligere quod maius est.* 890

ART. IV. Quid illa delectatio, quam  
ad actum volendi necessariâ esse  
S. Augustinus tam sæpe affirmat?  
893

CAP. VII. De libero arbitrio. 898

ART. I. Voluntas actus in somnijs,  
infantiâ, amentia, ebrietate, mo-  
tibus primis, perfecti ju-  
dicii defectu, liberi non sunt. 899

ART. II. Stante etiam perfecto ju-  
dicio rationis, voluntas divino,  
fatali, Stoico, aut Manichæo  
impulsu sic præcipitari posset, ut  
actus ejus non foret liber. 901

ART. III. Ante liberam electionem,  
non necessariò præcedere debet  
consultatio. 903

ART. IV. Etiam quando deliberatio  
in utramque partem, liberæ ele-  
ctioni præmittitur, voluntas ex  
unico judicio practico se ad eli-  
gendum resolvit. 907

ART. V. Non tantùm electio medijs,  
sed etiam intentio finis libera  
esse potest, secundum doctrinam

Aristotelis. 908

ART. VI. An deliberatio, quæ me-  
dijs electionem in nobis antecede-  
re solet, intrinsecum modum se  
movendi & determinandi volun-  
tatis immutet. 916

ART. VII. Vtrum electio medijs li-  
berior sit, quàm intentio finis,  
quia in electione voluntas perfe-  
ctius se movet. 919

ART. VIII. In omnibus actibus li-  
beris hujus vitæ, libertas essentia-  
lis humanæ voluntatis usque ad  
libertatem contrarietatis, vel  
contradictionis descendere po-  
test. 925

ART. IX. An in appetitu inferiori  
aliquid naturalis libertatis insit.  
932

ART. X. Quomodo appetitus supe-  
rior inferiorem, & inferior su-  
periolem moveat. 934

CAP. VIII. De Habitibus. 942

ART. I. Quid sit habitus, & unde  
producatur. 947

ART. II. In quibus potentijs gene-  
rentur habitus. 947



# INDEX RERVM MEMORABILIVM.

## A

- A** **BORTVS** plerique accidunt ante diem quadragesimum. 425
- Accretio** quid. 297
- Qua** proportionem corpus humanum accrescat. 298
- Actio** vitalis quid. 31
- Actio** potest esse vitalis, licet potentia à qua elicitur non sit in anima ut subiecto. 173
- Actiones** sensitivæ sunt strictiori modo vitales, quàm vegetativæ: ibid.
- Actiones** sensitivæ brutorum recipiuntur in materiam & animam, ut adæquatum subiectum. ibid.
- Actio**ne vitali aliquo modo potest agens dici movere se ipsum, sed non sicut actio liberâ. 33
- Actio** qua gallina fovet ova, non est vitalis. 436
- Actio** qua anima generat sibi simile, est vitalis. 31
- Actio** naturalis resultantiæ remoto principio tribui solet. 32
- Actio**ne naturalis resultantiæ seipsum reparare, quibus tantum conveniat. 265
- Ætatis** hominis quomodo sit facienda divisio. 324. & seq.
- Alimentum** potest esse corpus simplex. 187. & seq.
- Alimenta** quo ordine sumenda. 224 & seq.
- Alimentum** quomodo attrahatur à stomacho. 237
- Albedo** splendorem solis ad calefaciendum, rarefaciendum, & efficcandum adjuvat. 523
- Albedo** qua ratione nares ad sternutandum incitet. ibid.
- Amor** finis, propter spontaneam libertatem aliquando nuncupatur electio. 910
- Amor** finis potest esse liber, etiam quando aliquid amatur sine consultatione. 908. & seq.
- Amori** finis Scotus libertatem tribuit. 912
- In** amore finis, quando est perfectè voluntarius, an D. Thomas libertatē agnoverit. 919. 921. 924
- Amor** parentum erga filios quare sit major quàm filiorum erga parentes. 347
- De** Animo sententiæ veterum. 2. & seqq.
- Animæ** definitiones Aristotelicæ explicatæ. 28
- Animam** tantum esse in corde, vel in cerebro, quo sensu verum. 142
- Animæ** etiam brutorum ac plantarum substantiæ sunt, non accidentia. 9.
- Animæ** divisio in vegetativam, sensitivam, & rationalem declaratur. 82
- An** tres gradus animæ sint species infimæ. 83. 84
- An** animæ sensitivus gradus in homine, & bruto sit ejusdē speciei. 84
- Animæ** divisibilitas non rectè probatur,



# INDEX RERVM

- tur, eo quod corpus truncum sine capite aliquando ambulet. 803
- Augustinus omnium animalium animas putavit esse indivisibiles. 103
- Quomodo anima indivisibilis partibus materiae divisibilibus uniri possit. 92
- Insectorum, sive animalium imperfectorum animae non sunt totae in toto & totae in singulis partibus. 93
- Insecta in partes dissecta in singulis partibus vivunt, & sentiunt, ac se movent. 94
- Animae animalium perfectorum an sint totae in toto, & totae in singulis partibus. 96. & seq.
- Exempla quaedam animalium perfectorum, ac etiam hominum, viventium & moventium se, parte aliquâ principali excisâ. 97. 98
- An anima bruti per partes homogenias, an heterogenias omnia membra informet. 145
- Anima bruti ejusdem per omnia membra rationis, tamen in diversis partibus diversas dispositiones postulat. 149
- Anima vegetativa quid sit, & quomodo differat à sensitivâ & intellectivâ. 185
- Anima viventis cur potius producat ut causa principalis formam chyli, sanguinis &c. quam animam foetus. 438
- Anima bovis v. g. cur potius in nutritione partem animae similis, quam animam foetus producere possit. 439
- Anima in conformatione membrorum corporis non dirigitur intellectu, aut aliquâ ideâ artis. 67
- Anima sensitiva quid? 465
- Anima sensitiva supponit vegetativam. 19
- Animas brutorum rationales esse quidam contendunt. 467. & seq.
- Animae brutorum irrationales, & merè sensitivae sunt. 472. & seq.
- Animae hominum, secundum Pythagoram & Platonem, transmigrant in corpora bestiarum. 466
- Anima quâ rationalis, est forma corporis. 790
- Multa absurda contra fidem ex contrario errore sequuntur. 791
- Animam esse formâ corporis Conc. Viennense definivit, contra errorem Petri Ioannis. ibid.
- Argumenta contra animae humanae informationem objecta rejiciuntur. 793
- Animae rationalis indivisibilitas probatur. 801
- Animam rationalem Tertullianus divisibilem facit. 800
- Anima spiritalis & indivisibilis quomodo materiae divisibili possit uniri. 804
- Animae indivisibilitas non habet necessarium conjunctionem immortalitatem. 96
- Animae immortalitatem quis inter Philosophos primus asseruerit. 757
- De anima, Democriti, Epicuri, & Stoicorum sententia. 758
- De animae immortalitate Leon. X. decretum. 760
- Animam rationalem esse immortalem sensit Aristoteles. ibid.
- Animae tamen mortalitati fuisse falsò insinulatur. 768
- Animae immortalitas in vet. Test. parcius

# MEMORABILIVM.

parcius, in Novo sepulsimè & clarissimè indicata est. 775  
 Animæ rationalis immortalitas variè probatur. 777. 784. & seq.  
 Animarum in eadem materia successio, authoritate S. Thomæ, & Aristotelis asserta. 71  
 Anima peculiaris sensitiva, vialis in generatione hominis, non necessariò intercedere debet inter vegetativam vialem & animam rationalem. 426  
 Contraria sententia S. Thomæ, quâ ratione defendi possit. 429  
 Cur in nutritione non transeat per animam vegetativam & sensitivam ad rationalem. 79  
 An sint in homine tres animæ specie distinctæ, una in corde, altera in cerebro, & tertia in hepate. 143  
 Anima unica in unoquoque ex tribus gradibus, rationali, sensitivo, & vegetativo, solâ ratione distinctis coalescit. 111  
 Philoponi opinio de pluralitate animarum in eodem homine non satis validè à quibusdam Recentioribus rejicitur. 106  
 Philoponi opinio de animarum pluralitate, nimis gravi censurâ à quibusdam notatur. 108  
 Anima rationalis cur potius unionem sui cum materia producat, in nutritione sui corporis, quàm in prima generatione fœtus. 439  
 Philosophi gentiles solo rationis ductu, arbitrati sunt animam aliter à Deo creatam quàm in tali, quale jam gerimus, corpore. 823  
 Aristoteles in conjunctione hac animæ cum corpore supplicium

agnovit, licet causam se ignorare fateatur. 826  
 Animæ rationalis à corpore separatio est ei contra naturam. 796  
 Anima separata statum separationis appetitu elicitò præferre potest redditui ad mortale corpus. 798.  
 Animam beatam, propter appetitum ad corpus, retardari, ne totâ intentione pergat in Deum, credidit S. Augustinus. 799  
 Sententia illa quomodo defendi possit. ibid.  
 Animal perfectum quid sit. 485  
 Animal imperfectum non debet confundi cum insecto, vel cum eo quod ex putri nascitur. 101. 485  
 Annus sexagesimus, an sit periculosior alijs. 327  
 Appetitus sensitivus unicus est, & residet in corde. 729. 734  
 Appetitus sensitivus hominis non est liber. 933  
 Ad plura se extendere potest, quàm appetitus brutorum. 934  
 Appetitus sensitivus dupliciter movet voluntatem. 939  
 Appetitus sensitivus etiam alterat corpus. 940  
 Quare ad appétitionem cibi aut potus blandi, saliva in ore bulliat & dulcescat. 941  
 Apprehensio simplex quomodo differat à iudicio. 875  
 An apprehensio extremorum cooperetur physicè intellectui ad eliciendum iudicium. 877.  
 Aristoteles rudis in anatomia. 750  
 Aristotelis mos fuit, etiam de re sibi certâ, dubitanter loqui. 765  
 Aristot-

Aristoteles loquens  
 Aristoteles  
 Aristoteles  
 Audire  
 In qua pat  
 630.  
 Quo sensu  
 torum  
 Cur si quis  
 mum in  
 cūs ten  
 cipat.  
 Quomodo  
 miratus h  
 tati appo  
 611  
 Quomodo  
 aqua.  
 Augustinus  
 sensibili  
 Augustini  
 da in m  
 quæ illu  
 Augustinus  
 rima de a  
 riâ & op  
 Non tempe  
 totas ing  
 gultinus  
 Vitur sap  
 nionibu  
 do, sed  
 Augustinus  
 spum S  
 B. E. A. T.  
 specie  
 liquid  
 Bege ad  
 cupillib



# INDEX R E R V M

Aristoteles non approbat modum loquendi Pythagoricum. 573  
 Aristoteles non videtur esse Auctor libri Problematum. 605  
 Auditus organum describitur. 625  
 In qua parte organi audiatur sonus. 630. & seq.

Quo sensu dixerit Aristoteles, sensorium auditus aëreum esse. 632

Cur si quis obturatis auribus extremum instrumenti musici mordicus teneat, sonitum exactè percipiat. 631

Quomodo lenis pulsus unius extremitatis hastæ, aure alteri extremitati appositâ, tam faciliè audiatur. 611

Quomodo pisces audire possint sub aqua. 612

Augustinus quàm alienus ab omni sensibili voluptate. 224

Augustini auctoritas quanti facienda in materia peccati originis, & quæ illud circumstant. 873

Augustinus inter omnes Patres plurima de animæ rationalis substantiâ & operationibus scripsit. 757

Non semper in istis naturæ rebus totas ingenij vires impendit Augustinus. 167

Vtitur sæpe in Philosophia opinionionibus Platonis, non asserendo, sed recitando. ibid.

Augustinus non est auctor libri de spiritu & anima ipsi adscripti. 170

## B

**B**EATI in cælo etiam recipiunt species soni, per auram aliquam liquidam & fluctuantem. 615

Belgæ ad pronuntiandas voces cuiuslibet idiomatis, maxime

ductilem linguam habent. 603

Bestijs intellectum adscribere, est error hæreticus. 476

Campanella bestiis loquelam & discursum attribuit. 474

Bestiæ omnes ejusdem speciei, ut ad finem aliquem perveniant, uno eodemque medio & modo uti consueverunt: & unde tanta uniformitas. 472. 473

Bestias natura docuit per instinctum naturalem media quædam, ad fines suos assequendos. 477

Bestiæ non cognoscunt rationem mediæ aut finis. 478

Bestiæ propriè non utuntur medijs ad finem. ibid.

Bestias ratiocinari & syllogizare, malè colligitur ex ordinata actionum earum serie. 480

Bestiæ rationem consequentiæ assequi imaginatione nō valent. ibid.

Bestiæ quomodo sine ratiocinatione tempestates & pluvias præsentiant? ibid.

Bestiæ sine ratiocinatione disciplinantur, & solo naturæ quo ad voluptatem trahuntur, instinctu in varias gestulationes contorquentur. 481

Bestiæ si rationem, loquelam etiam haberent. 474

Bestiæ si ratione præditæ essent, cognoscerent quid honestum & quid turpe. 475

Bestiæ aliquæ cur alijs ingenioiores esse dicuntur? 478

Bestiæ statim ut natæ, quomodo cognoscant instrumenta ad se movendum. 754

Bestiæ videntur etiam delectari odoribus. 655

F f f f f f

Item

Item cantu & certis coloribus. 656

657

Bestiæ quo sensu dicantur moveri  
potius quàm seipsas movere. 33

Bestiæ cur pilos, villos, plumas, te-  
stas, & id genus à natura habeant;  
homo verò totus investis & nu-  
dus nascatur. 473

C

**C**ALOR ignis non est diversæ  
rationis à calore naturali  
ventriculi. 202

Calvities ex defectu humidi est 305

Aliæ causæ calvitiei. 307

Canities quare aliquando subito  
obveniat. 306

Canities ex defectu caloris prove-  
nit. 305

Capitis conformatio angusta & in  
verticem turbinata, pessima in-  
genio. 838

Id tamen non est verum in omni-  
bus. ibid.

Carnibus humanis vesci est illicit-  
tum: an etiam in extrema neces-  
sitate? 197. & seq.

An caro hominis vivi & mortui sit  
eadem specie. 126

Cerebri ventriculi ad quid ser-  
viant. 284. 701

Ciborum varietas an utilis. 220.  
& seq.

Chylus an nutriat ventriculū. 246

Chylus quomodo veniat ad hepar.  
254

Chyli concoctio quomodo fiat, &  
quæ illam meliorem faciant. 243  
& seq.

Quanto tēpore perficiatur. 235. 247

Chyli mala concoctio an per se-

quentes concoctiones possit e-  
mendari. 246

Cogi etiam aliqua dicuntur à SS.  
Patribus quæ aliquid agunt, ut  
Suares fatetur. 916. 923

Color an rectè definiatur, diaphani  
in corpore terminato extremi-  
tas? 511

Color ex sententia Platonis, Ari-  
stotelis, & Theophrasti, est lux  
quædam corporis colorati, sed  
impura propter mixturam opaci  
in eodem corpore. 513

Color est flammula à corporibus  
emanans. 509. 511

Colorum varietates ex flammula,  
sive luminis cujusdam languidi,  
& umbrosæ opacitatis mixtione  
temperantur. ibid.

Colores qui ex luminis, in prisma-  
tis & triangularibus vitris, refra-  
ctione resultant, veri sunt &  
eiusdē naturæ cum ceteris. 510

Colores Iridis & similes, cur appa-  
rentes & phantastici appellen-  
tur? 511

Color non differt specie à luce. 521

Cur parietes albi interdum non ap-  
pareant speciebus vicinorū co-  
lorum depicti. 522

Color an calefaciat. ibid.

Colores an sint in tenebris. 515

Corpora non tantum exterius, sed  
etiam interiùs sunt colorata. 517

Color non est extrinsecum & tran-  
sitorium solum, sed intrinsecum  
& permanens quoddam lumen.  
517. 519

Colores à qua causa efficiente phy-  
sicâ resultant? 517. & seq.

Formæ substantiales corporū mix-  
torum



# INDEX RERUM

torum colores producunt. 518  
 Nix candorem aliquem habet à  
 forma sua substantiali, non ele-  
 menti aquæ, sed corporis cuius-  
 dam mixti. 519  
 Color non oritur ex mixtione pri-  
 marum qualitatum; qualitatis  
 tamen secundæ nomen recipere  
 potest. 509  
 Colores à qua causa debeant in  
 conservari? 341  
 Colores omnes, quantum est ex  
 parte lucis quam continent, sunt  
 unius speciei. 524  
 Colores qua ratione dicantur spe-  
 cie inter se differre? ibid.  
 Colores cur à luce solis illustren-  
 tur, cum lucis lampyridum, li-  
 gnorum putrium &c. ab eadem  
 obfuscentur? ibid.  
 Color videtur per species. 534  
 Colores non videntur in solis cor-  
 porum opacorum superficiebus.  
 526  
 Color corporis opaci actionem  
 suam qua species producit, non  
 inchoat extrà in aëre illuminato,  
 sed intra corpus opacum. 531  
 Concoctiones tres principales in  
 animalibus. 186. 236  
 Concupiscentiæ nomine quid in-  
 telligatur. 384  
 Concurfus Dei non rectè à quibus-  
 dam comparatur vento, aut spi-  
 ritui organorum. 441  
 Causam secundam sine concursu  
 primæ posse agere, non admit-  
 terent SS. Patres. 440  
 Conformatio foetus nō in omnibus  
 animalibus æquali tempore ab-  
 solvitur. 75

Conformatio foetus à qua causa  
 fiat. 51  
 Consanguinitas non videtur diri-  
 mere matrimonium ultra secun-  
 dum gradum lineæ rectæ, jure  
 naturæ. 351  
 Consanguinitatem in linea trans-  
 versali nullum matrimonium jure  
 naturæ dirimere multi putant,  
 etiam S. Thomas. 358  
 Contemplatores respirationem pul-  
 monum cur suspendant. 860  
 Philosophi gentiles an sublimiori  
 & supernaturali cognitione fue-  
 rint aliquando Deum contem-  
 plati. 846  
 Contemplationes Platonicoꝝ ex-  
 celsæ & ecsticæ. ibid.  
 Platonici posteriores magicarum  
 rerum curiositate depravati. 849  
 Inter Platonicoꝝ & Christianoꝝ  
 rum illustrationes discrimen. 850  
 Paracelsistæ doctrinam suam non  
 studio, sed ab interno quo-  
 dam divino lumine affundi sibi  
 jactant. 851  
 Metuendum ne magicum quid eo-  
 rum philosophiæ admisceatur. ibid.  
 Contemplativi narrant, se lucis ali-  
 cujus scintillâ ad Dei visionem  
 elevari. 854  
 Quid illa sit. ibid.  
 An corporea, & ad imaginatricem  
 pertineat. 857  
 Cur ad apicem & verticem cerebri  
 ascendere appareat. 858  
 Corpus mixtum inanimatum an  
 possit aliud corpus in se conver-  
 tere. 266  
 Corpus mixtum, ex unico elemen-  
 to generari potest. 268  
 F f f f f 2 Corpo-

# MEMORABILIVM.

Corpora quædam inanimata quo  
sensu membra & organa quædam  
habeant. 10. 12  
Adami, Evæ, & Christi corpora  
omnium formosissima. 32  
Quo sensu corpus Christi vivum  
fuerit idem cum corpore ejus  
mortuo. 135  
Creandi verbum aliter SS. PP. ac-  
cipiunt quàm moderni philoso-  
phi. 816. & 819  
Ex nihilo effici aliquid, quid si-  
gnificet apud Augustinum. 816  
Crines probabilius vivunt, sed tan-  
tùm animâ vegetativâ. 312. & seq.  
Crines densiores & crassiores sunt  
indiciũ longævitatũ. 305

## D

**D**ECRETIO non fit ab ani-  
ma, nec servatâ partium  
proportione. 331  
Delectatio, quam ad actum volendi  
necessariam Augustinus affirmat,  
quid sit. 893  
Deliberatio etiam potest esse circa  
finem ultimum. 908  
Deliberatio quando præcedit ele-  
ctionem, non mutat intrinsicum  
modum agendi voluntatis. 916.  
& seq.  
Deo omnium rerum conditionem  
& architecturam Scriptura tri-  
buit. 48  
Deus est causa principalis omnium  
rerum, creatarum & quomodo  
penetrabilius & vehementius  
influit quàm instrumentũ crea-  
tum. 49. 433  
Deus ad effectum concurrens, non  
semper ejus auctor & conditor

dicatur. 49  
Deus solus, ut causa principalis,  
producit animas animalium &  
plantarum. 435. & seq.  
Deus tamen non facit hoc supplen-  
do defectum causæ secundæ prin-  
cipalis, sed ex officio causæ pri-  
mæ. 434  
Deus vult errores naturæ, non vult  
errores voluntatis. 441  
Dolor qui est objectum tactûs, non  
est aliud quàm dispositio discon-  
veniens organo tactûs. 675  
Dolor tactûs est maximè atrox.  
676.  
Dolor propriè est solius tactûs. 677

## E

**E**CHO quomodo fiat. 619  
Echo potest esse tam eloquens,  
ut integram Ciceronis oratio-  
nem recitare valeat. 623  
Cur aliquando multiplex Echo  
audiatur. 624  
Sine Echo non audiremus nos ipsos  
loquentes. 621  
Requiritur certus situs ad recipien-  
dam speciem reflexam soni, sed  
ille situs non consistit in indivi-  
sibili. 624  
Electionis definitio. 910  
Electio mediij in quo differat ab  
amore finis. 909  
Libertas electionis non requirit, ut  
voluntas eo instanti quo unum  
eligit, sit proximè omnino ex-  
pedita ad eligendum alterũ. 908  
Electione liberâ non debet necessa-  
riò præcedere consultatio. 905  
Omnis electio libera, est delibera-  
ta, quo sensu. 906  
Electio



# INDEX RERVM

Electio medijs est aliquo modo li-  
berior quàm intentio finis. 919.

920

Elementorum formas non manere  
in mixtis, est communis senten-  
tia Philosophorum. 116

Eucharistię species quamdiu in sto-  
macho durent sine corruptione.  
251. & seq.

Excrementa secundę concoctionis.

255

Excremēta tertię concoctionis. 303  
Plus excrementi transpirat homo  
per poros cutis, quàm per alvum  
& vesicam. ibid.

Excrementa tertię concoctionis  
imbuuntur qualitatibus corporis  
304

## F

FELLES infantibus sæpe exitiales.  
ibid.

Femina in viros interdum mutan-  
tur. 461

Fœtus materia. 352

Fœtus generatio non habet pro  
causa principali virtutem con-  
formatricem, nec formam femi-  
nis, vel cæli. 431

Nec animam matris. 432. 437

Sed Deum solum. 435

Fœtus quando animetur, varię sen-  
tentię. 417

Fœtus femineus in utero tardiùs  
quàm masculinus perficitur; sed  
cùm in lucem venit, citiùs cre-  
scit, floret, & deficit. 416

Fœtus non animatur animâ ratio-  
nali ante cordis & hepatis con-  
formationem. 425

Fœtus animatur animâ vegetativâ

non dudum post septimum diem.

420

Fœtus, si masculus est, animatur  
animâ rationali tricesimo die; si  
femina, quadragesimo. 423

Fœtus qua ratione in utero confor-  
metur. 408. & seq.

Fœtus conformatur à virtute la-  
tente in semine, & suscitâtâ ab  
utero. 408

Fœtus non conformatur à semine  
ab omnibus partibus viventis  
defluente. 411

Fœtus secundum omnia membra  
simul, incipit conformari. 414.  
& seq.

Fœtus adhuc semineus, nutritur. 416

Fœtus similitudo cum altero pa-  
rente unde. 419

Fœtui aliquando inuruntur notę  
ab avo, præterito proximo pa-  
rente. 349

Fœtus signatura quomodo fiat. 722  
& seq.

Ex sola apprehensione, sine affe-  
ctione non sequitur immutatio  
corporis. 724

Fœtum inanimatum expellere non  
licet. 366. & seq.

Fœtui inanimato alendo sanguis  
necessarius, in morbo matris, ex-  
trahi potest ex venis. 368

Quid si fœtus sit animatus animâ  
rationali. ibid.

Formę inanimę quędam, aliquam  
etiam partium materię suę con-  
formationem flagitant. 10

Formę organicę diversorum mem-  
brorum corporis rejiciuntur.

120

Forma cadaveris qualis, 123  
Ffffff 3 Et

## MEMORABILIVM.

Et quomodo in materiam intro-  
ducatur. 124. 127. 132

Forma cadaveris cur non conser-  
vet corpus mortuum à putredi-  
ne. 125

Forma cadaveris an immediatè as-  
sumpta à Verbo. 137

### G

**G**ALENVS dicitur vixisse 140.  
annis, & quam ob causam? 212

Gallus gallinaceus, cur cantet in  
fine secundæ, & quartæ vigiliæ. 249

Generatio viventium, & inanima-  
torum quomodo differant. 345

Gula quomodo frenanda in convi-  
vijs. 222. 239. & seq.

Gulæ voluptas maximè pertinet ad  
sensum tactûs. 239

Gustûs organum, & in qua ejus  
parte percipiatur sapor. 662.  
& seq.

Quare cibus unus alijs gratus, alijs  
in gratissimus sit. 666

### H

**H**ABITVS quid sint, & unde  
producantur. 943

An comprehendant species sensibi-  
les & intelligibiles. 945

Diversitas inter habitus naturales  
& supernaturales. ibid.

Habitus quidam naturales etiam  
producentur ab actibus super-  
naturalibus. 946

Sed hi amplitudinem habituum su-  
pernaturalium nō adæquant. ibid.

Habitus in quibus potentijs gene-

rentur. 948

Non inveniuntur in sensibus exter-  
nis, nec potentiâ locomotivâ. 948

Habitus in appetitu, & phantasiâ  
brutorum. ibid.

Humorem distillatitium non ita  
retinere obligamur, sicuti se-  
men. 356

Humor distillatitius effluxu suo  
discerni potest à femine. 357

Humidum radicale quid. 282

### I

**I**DÆ Platonicorum. 842

Iejunium naturale potest solvi  
sumptione per nares. 193

Tabaci sumptio an solvat jejunium  
naturale. 192. & seq.

Iejunium naturale potest solvi per  
id quod non est cibus, nec potus.  
195

Impetus in quibus motibus requi-  
ratur. 748. & seq.

Datur etiam impetus quo potentia  
locomotiva retinet corpus suum  
in eodem situ. 754

Ingenij excellentiam aut stupidita-  
tem quæ significant. 260. 657.  
690. & seq.

Ingeniosiores fiunt ex cæci canes.  
462

Ingenij præstantia unde. 840

Ingenium calore temperamenti ex-  
citatur. 839

Belgis modicâ vini sorbitione in-  
genium crescit. ibid.

Ingenium cujuscumque calore febrili  
accedente acuebatur. ibid.

Cholericis magis ingeniosi. ibid.

Intellectûs variæ operationes. 874

In-



# INDEX RERUM

Intellectus agens & possibilis quid.  
827

An sint potentiae inter se realiter  
distinctae? ibid.

Intellectus agentis officia. 828. 831

An intellectus agens abstrahat spe-  
ciem intelligibilem rei singularis.  
830

Intellectus noster an in ideis, seu in  
rationibus divinis & aeternis ali-  
quid intelligat. 842

Intellectus aliquando visione su-  
pernaturali, sine ullo phantas-  
mate, res divinas intelligit. 836

Intellectus duplici raptu rapitur:  
uno à sensibus externis tantum,  
altero simul ab internis. ibid.

Intelligentem debere phantasmata  
speculari, quo sensu dixerit Ari-  
stoteles. 832. 834

De qua intellectione id proprie &  
maximè verum sit. 832

Phantasmatis concursus cum intel-  
lectu agente, an sit physicus, an  
moralis. 831

Durandus quare intellectum sta-  
tuerit esse formaliter liberum.  
888. 889

Iudicium antecedentis, an physicè  
concurrat ad iudicium conse-  
quentis. 878

Iudicium indiget motivo aliquo,  
licet apprehensioni sufficiat spe-  
cies impressa. ibid.

Iudicium practicum in intellectu  
requiritur, ut voluntas se mo-  
veat, nec sufficit nuda apprehen-  
sio. 885

Iudicium aliquod practicum, etiam  
ut appetitus brutorum se moveat,  
suo modo requiritur. 886

Iudicium illud prævium ad actus  
liberos à voluntate liberè impe-  
ratur. ibid.

An ut voluntas iudicium practicum  
intellectui imperet, alio iudicio  
practico priori indigeat. 887

Quomodo id fiat sine processu in  
infinitum. 888

Iudicium non est actus intrinsecè  
compositus ex apprehensione  
subjecti, prædicati, & copulae. 875

Iudicium est actus simplex. 876

Iudicium & apprehensio possunt  
habere idem objectum. ibid.

## L

Ac quomodo generetur. 287  
Libertas Calvinistica. 905

Libertas essentialis non minuitur,  
nec major est in iusto quàm pec-  
catore, in Angelo quàm homi-  
ne: sed libertas contrarietatis au-  
geri & minui potest. 918

Necessitas præcedens lædit liberta-  
tem, non consequens. 915

Libertas contrarietatis, & libertas  
contradictionis quid sint. 925

Ad libertatem contradictionis re-  
quiritur potestas ad agendum li-  
berè libertate essentiali, & ad ces-  
sandum liberè libertate essentiali.  
914. 926

In omnibus actibus huius vitæ li-  
bertas essentialis potest descen-  
dere usque ad libertatem con-  
trarietatis vel contradictionis.  
925. 929

Semper adest in illis actibus virtua-  
lis quædam libertas contradi-  
ctionis. 929

Libertas contrarietatis & contra-  
dictionis,

# MEMORABILIVM:

dictionis, sunt signum libertatis  
 essentialis. 930  
 Ad libertatem contradictionis non  
 requiritur, ut voluntas cum om-  
 nibus iisdem prærequisitis, possit  
 non agere; sed sufficit ut hoc  
 possit, aliquod principium agen-  
 di variando. 932  
 Lues venerea unde ortum habere  
 dicatur. 197  
 Lumen est qualitas ejusdem naturæ  
 cum specie visibili lucis. 507  
 Omne quod videtur est lumen. 510  
 Lumen non est corpus. 507. 574.  
 & seq.  
 Lumen solis intra minimam cor-  
 porum coloratorum profundita-  
 tem penetrare valet, & colores  
 ibidem illustrare. 529. 530  
 Lumen externum non tantum ex  
 parte medij, sed etiam ex parte  
 objecti necessarium est, ut colo-  
 res valeant species suas spargere.  
 529

## M

**M**EMORIA magna ingenij de-  
 fectum sæpe arguit. 839  
 Senibus memoria, & ingenium  
 quare deficiant. 841  
 Motus partium verendarum quo-  
 modo efficiatur. 395. & seqq.  
 Motus progressivus quomodo fiat.  
 753  
 Motus progressivus quomodo vo-  
 luntarius. 755  
 Musarum novennarius numerus  
 unde. 593  
 Musculus quid sit. 752

## N

**N**IGREDO ad albedinem se ha-  
 bet ut tenebræ ad lumen. 513  
 514  
 Nigredo nullam speciem mittit. 514  
 Nigrum quod nihil lucis incorpo-  
 ratum habet, propriè non est  
 coloratum. 513  
 Nutritio quomodo fiat, quid sit, &  
 quæ ejus causæ. 292. & seq.

## O

**O**BLIVIO unde. 706  
 Si sensuum operationes in  
 animam reciperentur, nullius rei  
 oblivisceremur. 157  
 Oblivio quare in Angelos non  
 cadat. ibid.  
 Quare in horis canonicis tam faciliè  
 obliviscamur recentis lectionis  
 alicujus Psalmi. 715  
 Oculi organum. 543  
 Imago objecti visibilis in oculo  
 non est punctualis, sed extensa.  
 534. 548. 549  
 Oculus totam imaginem montis  
 intra se capere potest, in senten-  
 tia Aristotelis de compositione  
 continui; non autem in senten-  
 tia Epicuri. 533  
 Oculi majores, & in quibus amplior  
 est humoris crystallini convexi-  
 tas, majus habent inter crystalli-  
 num & retiformem interstitium.  
 548  
 Oculi noctuini & glauci cur dilu-  
 tius & deterius videant? 550  
 Odor quid sit, & unde oriatur. 637.  
 Odor an pascat. ibid.  
 Odores



# INDEX RERVM

Odores quid faciant cerebro. 639  
 Odores nominibus saporum appellamus. 640  
 An idem odor possit sentiri à pluribus, sicuti potest idem color, & idem sonus. 644  
 Cur homo minùs sibi metuere debeat ab illecebra odorum, quàm soni musici. 658  
 Quando idem corpus odoratum est & sapidù, est heterogeneum. 638  
 Olfactus organum quale sit: & in qua parte percipiat odor. 650.  
 Omissio non potest esse libera, nisi cognoscatur ratio omittendi. 927. 928  
 Opacitas, & densitas multum differunt. 520  
 Opacitas quid, & unde oriatur? 517  
 Glacies, vitrum, & cristallum si comminuantur, cur alba appareant & opaca? 517  
 Ova non sunt animata. 37  
 Ova tepore fornacum Ægypti, pullos excludunt. 58

## P

**P**ARTVS dolor unde oriatur. 442  
 Pariunt quædam feminae line dolore. 445  
 Partus in statu innocentia fuisset sine dolore. 446  
 Passio appetitus sensitivi quotuplex. 737  
 Peccatum originis naturali generatione transfundi, quo sensu dicat Augustinus. 822  
 Eva solâ peccante peccatû originis fuisset propagatum in posteros. 387  
 Quomodo sententia contraria S. Thomæ possit defendi. 389

Quomodo peccatum originis non sit imputandû Deo, licet ipse novus semper animas creet. 821. 823  
 Perspicuitas quid? 518  
 Perspicuitas colores producere non valet. 518  
 Corpus quò minus perspicui habet, eo minus de colore ejus videtur. 532  
 Pileolorum sive calotiarum usus an sit salutaris. 308  
 De potentiarum ab anima distinctione, variorum sententiæ. 158. 161. & seq.  
 Sententia D. Thomæ, potentias ab anima distingui realiter, probatur. 153  
 Potentia irradiativa in qua parte cerebri resideat. 499. 500. 702. 703  
 Potentia irradiativa cerebri eadem est pro omnium sensuum operationibus; determinatur verò ad certam sensationem à potentia organo insidente. 498. 499  
 Potentia istius irradiatio qua ratione cerebro in organa sensuum perveniat? 499. 501. 502  
 Potentia irradiativa cerebri ad efficiendum localem motum. 751  
 Potentia locomotiva animalis residet in musculis. 752  
 Potentia animæ vegetativæ proximè inhærent soli materiæ. 174  
 Potentia attractrices alimentorum à temperie & figurâ organicâ diversæ. 156  
 Potus etiam alit. 217. 257. 333  
 Priapismus membri virilis in quorundâ cadaveribus an naturalis.

459

Gggggg

Proce-

# MEMORABILIVM.

Procera animalia in genere suo vivaciora brevibus. 214

Pubertas accelerata, signum vitæ brevis. ibid.

An pudor concubitûs & partium verendarum, ex peccato primi parentis ortum habeat, 391. & seq.

Genitalia cur potiùs pudenda, & velanda quam cetera membra. 401. & seq.

Pudor genitalium quare tam communis omnibus hominibus? 401

## Q

VLTRA qualitates primas admittendæ sunt aliquæ qualitates occultæ. 271. 726

Qualitates secundæ oriuntur à primis ut dispositionibus, non ut proprijs causis. 660

## R

ROEVSTORVM hominum tria insignia exempla. 752

## S

SANGVIS an sit animatus. 275. & seq.

Pars affirmativa malè adscribitur D. Thomæ. 277

Sanguis an possit dici pars animalis, si sit inanimatus. 280

Fuit hypostaticè unitus Verbo. 282

Sanguis quomodo generetur in hepate. 255. & seq.

Cum sanguine generantur in hepate quatuor humores excrementitij. 255

Ex his tantùm pituita & serum venis illabuntur cum sanguine. 256. 257

Sanguinis circulatio per venas & arterias an sufficienter à novellis Medicis probetur. 259

Sanguis ingeniosorum dissimilis sanguini stupidorum. 260. 281. 840

Sanitatis corporis meritò habenda cura. 204. 229

Sanitati nocet, tempore refectionis, & magis paulò post refectionem res graves animo tractare. 223 246

Sapor quid, & unde oriatur. 660. 661

Scientia, opinio, fides, suspicio, dubitatio, quomodo inter se distinguantur. 879

Senectus quando incipiat, & quamdiu durare possit. 331

Senectus multorum se extendit ultra 100. annos, & quomodo hoc fiet cum S. Scriptura. 335. & seq. Senectutis imago lepidà parabolà depingitur ab Ecclesiaste. 339. & seq.

Septuaginta Interpretum quanta sit auctoritas. 41

Semen quomodo generetur. 288

Semen quo sensu dicatur mori. 39

Semen an sit animatum. 35. & seq.

Semini adhuc informi inesse animam rationalem refellitur ex S. Scriptura. 39

Seminis inanimati virtus à parentibus decisa primam fœtus conformationem in utero orditur. 59. 63

Semen habet partes heterogeneas. 60

Seminis materia quæ. ibid.

Semen maternum effectivè concurrat ad



# INDEX RERVM

rit ad generationem fœtus, 70.  
352. 388

Quid de eo senserit Aristoteles. 69

Semen antè effusionem, hebetare, &  
consumere licet. 360

Quomodo id aliqui faciant. ibid.

Seminis foràs expulsio, cur sit pec-  
catum mortale. Ratio Thomæ  
Sanchez refutatur. 361. & seqq.

Seminis abundantia rarissimè lædit  
valetudinem, quia seipsum ultrò  
exonerare solet. 364

Feminæ etiam possunt peccato  
mollitiei pollui, semen suum in  
proprium uterum, aut foràs ef-  
fundendo. 355

Semen humanum, est infectum  
morbidâ qualitate, propter quam  
anima peccato originali infici-  
tur. 370. & seq.

Morbida qualitas in semine huma-  
no non differt à temperamento  
naturali. 377. & seq.

Morbida illa qualitas, an pravâ  
consuetudine augeatur, & con-  
tinentiâ minuatur. 282

Semen femineum etiam infectum  
est simili labe. 388. & seq.

Semen infectum quomodolibet  
effusum, prolem inde formatam  
inficit peccato originali. 390

Quo sensu S. Augustinus dicat in  
statu innocentia potuisse utero  
conjugis, salvâ integritate fe-  
minei genitalis, virile semen in-  
fundi. 448

Sensus quid & quotuplex. 483. 484

Animal omne habet tactum, gu-  
stum, & imaginativam. 486

Sensus an per irradiationē desinant  
à cerebro, an suis quisque orga-

nis stabiliter infideant? 492. 497  
& seq.

In sensu præsertim externo nullus  
proprius error est. 491

Sensus externus requirit existen-  
tiam sui objecti. 617

Sensuum duo, Visus & auditus, pro-  
jiciunt se foràs; odoratus, gustus,  
tactus, quod ad se pertinet inte-  
rius agunt, ait S. Augustinus. 619  
642. 668. 670. 686. 695

Sensum aliquem interiorem admit-  
tit S. Augustinus. 696

Sensus interni quot. 698

Probabilissimè defenditur esse uni-  
cum: & videtur esse mens S. Au-  
gustini. 699

Sensuum internorum sedes an sit  
cerebrum, an cor, problemati-  
cè disputat Estius. 697

Certum videtur, esse cerebrum, non  
cor. 696

Sunt in certa tantum parte cerebri.  
718

Sensus interni indigent speciebus.  
704

Hæ non sunt ipsæmet species sen-  
suum externorum, sed à conce-  
ptu sensus externi producuntur  
& imprimuntur spiritibus ac ce-  
rebro. 704. 706

Sensus internus novas intentiones,  
à sensu externo non acceptas, ap-  
prehendit. 698

Sensus internus per sympathiam  
cognoscit affectum cordis; non  
quid sit, sed an sit. 735. 736

Sensus internus in homine, saltem  
imperfectè, potest discurrere.  
698. 719

Sensus internus supra operationem  
G g g g g 2 suam

# MEMORABILIVM.

- suam potest se reflectere. 720. 736  
 Sensus internus quosdam actus per  
 modum apprehensionis ; alios  
 per modum iudicij elicit. 734  
 Sensibile commune non emittit pe-  
 culiarem speciem , sed tantum  
 modificat speciem sensibilis pro-  
 prij. 487  
 Sensus numquam errat circa sensi-  
 bile proprium : sed aliquando  
 circa commune , & per accidens.  
 488  
 De quibus sensibus verum est: Sen-  
 sibile supra sensum positum non effi-  
 cit sensationem. 693  
 Quo sensu dicat Aristoteles : Senso-  
 rium esse susceptivum sensibilis sine  
 materia. 650  
 Somnus quid sit. 717  
 Somnus quare inventus à natura.  
 148  
 Somnus quanto tempore debeat  
 durare. 248  
 Bibere paulò antè somnum , est no-  
 xium valetudini. 233  
 Somnia unde oriantur. 717. 718  
 An in somnijs operetur intellectus  
 & voluntas. 719. 865  
 Sonus quid. 593. 599  
 Soni causa est qualitas sonora , in  
 diversis corporibus diversæ spe-  
 ciei. 595  
 Cur qualitas hæc ictum aëris ex-  
 spectet, antequam sonet. 598  
 Sonus percipitur successivè. 635  
 Cur sonus è longinquo remissiùs  
 audiatur. 604  
 Sonus non auditur, postquam esse  
 desijt. 617  
 Sonus cur non excitetur tam rapi-  
 do motu stellarum. 596  
 Sonus quantus requiratur in lectio-  
 ne horarum. 597  
 Cur sonus foris excitatus , fenestris  
 clausis, videatur longiùs distare.  
 605  
 Cur soni interdiu magis confusi,  
 quàm noctu audiantur. 605. 624  
 Cur sonitu Moscheti è platea po-  
 tiùs frangantur vitreæ fenestræ,  
 quàm fragore tonitruï , longè  
 majori. 605  
 Spatium imaginarium negatur. 744  
 Spatium imaginarium non respici-  
 tur à præsentia locali. 745.  
 & seq.  
 Species sensibilis non debet proxi-  
 mè recipi in potentiam sensiti-  
 tivam. 555. 634. 635  
 Species sensibiles quo sensu à  
 S. Thoma dicantur haberi esse  
 quoddam diminutum & spiri-  
 tale? 538  
 Species visibiles dari multis argu-  
 menti probatur. 534  
 Species visibiles lucis non sunt di-  
 stinctæ à lumine. 507  
 Substantia non emittit species sen-  
 sibiles. 487  
 Species visibiles colorum sunt ejus-  
 dem speciei cum coloribus. 537.  
 538  
 Species visibilis coloris non omni-  
 no necessariò dependet in confer-  
 vari à suo colore. 341  
 Species visibilis ex lumine & um-  
 brâ temperatur. 538. 555  
 Species visibilis est formalis imago  
 objecti. 567  
 Species visibiles non concurrunt  
 activè ad visionem. 553  
 S. Augustini sententia de concursu  
 speciei



# INDEX R E R V M

speciei visibilis ad visionem. 557.  
& seq.  
Species visibilis est medium cogni-  
tum. 562. & seq. 566. & seq.  
Species visibiles colorum cur nec  
in aëre, nec in superficiebus soli-  
dorum corporum depictæ appa-  
reant? 525. 538  
Specierum reliquarum à qua causa  
conserventur in oculo, à sole ad  
tenebras converso: & qua ratio-  
ne in varios colores commuten-  
tur? 536  
Species visibiles per foramen in  
conclavè obscurum exceptæ, &  
in charta depictæ, oculis subji-  
ciuntur. ibid.  
Si in cubiculo clauso, loco chartæ  
ponatur speculū, non apparebunt  
imagines rerum, sicut antè. 629  
Species vitri rubri radio solis traje-  
cti, cur in opposito pariete ru-  
bescant; non autem quando lu-  
men solis tenuè & dilutius est.  
540  
Tunc non rubedo vitri tamquam  
in speculo, sed species rubedinis  
in pariete apparet. 534. 535  
Species visibiles rubedinis & albe-  
do, qua ratione in eodem subje-  
cto proximo esse possint? 539  
Species visibiles magni objecti in  
minimis ocellis extra mutuum  
situm depinguntur. 533. 549  
Quare lac species visibiles non re-  
flectat. 592  
Species soni an distinguatur essen-  
tialiter à sono. 617  
Species soni diffunditur circulari-  
ter in orbem. 604  
Species soni non longius protendi-

tur quàm circulatio aëris. 610.  
& seq.  
Cur species soni per medium suc-  
cessivè trajiciatur. 606. & seq.  
Species soni est medium cognitum.  
619.  
Species odorabiles an dentur. 640  
An species odorabiles essentialiter  
differant ab odore. 648. & seq.  
An producantur successivè usque  
ad organum. 645  
Solvitur argumentum quomodo  
producantur in medio, in quo  
non est temperies ex qua debet  
resultare odor. 649  
Species gustabilis an detur. 667  
Species sensibus internis à Deo in-  
fusas, agnoscit D. Thom. saltem  
in brutis. 708  
Species sensuum interiorum sunt  
medium cognitum. 569. 709  
Species sensuum interiorum sunt  
similitudo intentionalis tam  
objecti, quàm ipsius conceptus  
externi. 712  
Quomodo species sine confusione  
continentur in cerebro, & per  
meatus ejus currant & recur-  
rant. 713. & seq.  
Motus specierum sæpe sunt volun-  
tarij. 714. 716  
Quando diversæ species sunt in jis-  
dem spiritibus, voluntas deter-  
minat phantasiam ad cognos-  
cendam unam præ alia. 715  
An ulla specillorum, sive lunularum  
mentio in sacra Scriptura. 586  
A quo tempore inventa specilla. 587  
Species intelligibilis est medium  
cognitum. 568  
Quare intellectus cognoscat actum  
G g g g g 3. volun-

# MEMORABILIVM.

voluntatis sine specie. 735  
 Species intelligibilis non produci-  
 tur à solo phantasmate. 829  
 Spiritus naturalis, vitalis, & ani-  
 malis, ubi & quomodo gignan-  
 tur ex sanguine: & eorum officia,  
 282. & seq.  
 Ex spiritibus odoriferis cum aëre  
 attractis & mixtis sanguini, fiunt  
 spiritus vitales & animales. 191  
 Spiritus odoriferi carniū, florum,  
 tabaci &c. an alere possint cor-  
 pus humanum. ibid.  
 Spiritus sensorius & motorius idem  
 est. 503  
 Spiritus sensorij & motorij quo-  
 modo & ad quid à cerebro in or-  
 gana sensuum & facultatis loco  
 motricis effundantur? 504  
 Spiritus animales qui è cerebro per  
 nervos sensorios in organa de-  
 fluunt, non solam organi tem-  
 periem sensibus conferunt. 492  
 Spiritus qui fabricavit fœtum, ubi  
 maneat post conformationem. 81  
 Spiritualia entia etiam habere pos-  
 sunt partes integrales extensivas.  
 91  
 Studiosis an expediat esus carniū.  
 204. 213  
 Studia an ad longitudinem vitæ  
 conferant. 209  
 Studiosis cerebrum friget. 233  
 Studiosorum debilis est stomachus.  
 202. 209  
 Studiosi sæpe solent esse difficilis  
 alvi. 203. 221  
 Studio deditis cœna levior magis  
 convenit. 233  
 Studijs dediti cur sæpe sint edaces  
 210

Studijs dediti, multi tamen longæ-  
 vi. 210. & seq.

## T

**T**ABACI fumus non nutrit. 192  
 Tactus inest omnibus anima-  
 libus, sed non in omnibus eorum  
 partibus. 670  
 Tactus specie distincti non dantur  
 in eodem animali. 672  
 Tactus non indiget speciebus tan-  
 gibilibus, ad percipiendum qua-  
 litates primas vel secundas 680.  
 & seq.  
 Solvuntur argumenta in contra-  
 rium. 684. & seq.  
 Tactus organum. 677  
 Talpa inter perfectum & imperfe-  
 ctum animal est veluti quoddam  
 medium. 485  
 Talpæ non omnino visu carent.  
 486  
 Terra quid conferat in conforma-  
 tionem plantarum. 56  
 Traductio animarum ab una Ada-  
 mi anima quid facilitatem pro-  
 pagationis peccati originis in po-  
 steros adjuvaret. 817  
 Anima rationalis non traducitur,  
 sed creatur à solo Deo. 818  
 Augustinus quoque in eam senten-  
 tiam pronior, nisi aliquid ab ea  
 justitiæ Dei indignum, metuif-  
 set. ibid.  
 Traductio illa qua quidam PP.  
 putaverunt, aut dubitaverunt,  
 animam rationalem à parentibus  
 in posteros traduci, qualis. 812  
 Traducere, propagare, tradux, pro-  
 pago, quid in re rusticâ propriè, &  
 quid metaphoricè significant 813  
 Animam



# INDEX RERVM

**A**nimam rationalem esse ex traduce, ut SS. Patres illam phrasim accipiunt, nec contradictionem, nec absurditatem insignem implicat. 815  
**S.** Augustinus usque ad vitæ finem dubitavit, An anima rationalis esset ex traduce. 42  
**S.** Augustinus tamen non est Traducianorum numero accensendus. 44  
**A**nima proles ab anima parentis morali quadam causalitate traducitur. 823  
**T**raductio animæ pecoris à parentibus quomodo fiat. 814

## V

**V**acuum implicat contradictionem. 747  
**V**entriculi conformatio. 227  
**V**inum posse in se convertere aquam, est sententia Aristotelis, D. Thomæ, Scoti, & vera. 262  
**S**olvuntur argumenta in contrarium. 262. usque 273  
**V**ini vapor non habet essentiam vini. 253  
**V**inum celerrimè alteratur. 245. 250  
**V**ino mixta aqua, an per artem possit separari. 262  
**V**inum purissimum, adhuc est corpus heterogeneum. 263  
**V**inum modicum, quare paulatim non convertat magnam copiam aquæ. 264  
**V**inum quomodo possit dispositiones aquæ expellere & suas introducere. 269  
**V**ini potus an salutaris. 214. & seq.

**V**inum an possit convertere aquam per solam partium usque ad minima naturalia divisionem. 273  
**V**isus quid? 506  
**V**isus semper fertur in objectum ut ante se positum. 617  
**V**isiva potentia in tunica retina residet. 550  
**V**isio fit in tunica retina. 548. & seq.  
**A**n erraverit Plato, quando visionem jactu radiorum ex oculis fieri dixit. 570  
**P**lato non docuit radiationem lucis per ejaculationem atomorum fieri. 573  
**Q**uare non videamus res ut inversas, cum species in oculo pingantur inverso modo. 565  
**C**ur in naturali oculorum situ, res simplices, non geminæ, videantur. 552  
**Q**uid videatur in speculo. 577. & seq.  
**A**n videamus colorem cæli Empyreï. 585  
**A**n videamus centrum solis, ut Keplerus putat. 589  
**A**n oculus Christi in Eucharistia videat circumstantes. 590  
**A**n unico tantum oculo semper quidlibet videamus. ibid.  
**A**n visus Beatorum indigeat lumine. 591  
**C**ur in speculo faciem suam videns, statim obliviscatur suæ formæ. ibid.  
**V**itam lapidibus, metallis &c. tribuunt Cardanus, Keplerus, & alij. 12  
**D**e vita terræ, Campanellæ sententia. 17  
**S**idera

# MEMORABILIVM.

Sidera vivere, qui Philosophorum  
olim senserint. 23  
SS. Augustini, Hieronymi, de fide-  
rum vita, dubitatio. 24  
An sit contra Catholicam fidem,  
stellas vivere. ibid.  
Vitæ austeritas an omnibus sectari-  
da sit. 241  
Unio quæ anima unitur corpori, sit-  
ne una, an multiplex. 89  
Unio animæ utrique extremo pro-  
ximè inhæret. ibid.  
Unio animæ rationalis cum corpo-  
re, licet sit proximè etiam in  
anima, est tamen materialis. 90.  
807  
Constat partibus integralibus. 90.  
805  
Vocis instrumenta. 600  
Non omnia instrumenta singulis  
vocibus formandis æquè serviunt.  
601  
Vocum unde in diversis hominibus  
tanta varietas. 603  
Voluntas an & qua ratione cæca  
rectè dicatur. 169  
Si intellectus & voluntas influxum  
eiusdem animæ non participa-  
rent, difficile esset explicatu,  
quomodo voluntas non ferretur  
in incognitum. 169  
An voluntas in electione semper  
eligat quod majus est. 890  
Quid futurum, si bona undique equa-  
lia proponantur voluntati. ibid.  
Voluntas id tantum amat, quod  
magis delectat. 890. & 893

Voluntatis actus in somnijs, infan-  
tiâ, amentia, motibus primò-pri-  
mis, liberi non sunt. 899  
Quo sensu verum istud, *Voluntas in-  
trat, ubi intellectus foris stat.* 882  
Voluntas dupliciter movet appe-  
titum inferiorem. 939  
Voluntas an per immediatum im-  
perium possit movere appetitum  
sensitivum, non motâ phantasiâ.  
935  
Vnde fiat, quòd voluntas & intelle-  
ctus aliquando videantur agere  
sine phantasia. 937  
Voluptas quæ est objectum tactus,  
non est aliud quàm dispositio  
conveniens organo tactus. 674  
Vfus rationis plenus advenit circa  
annum septimum. 862  
Vfus imaginationis nimio cerebri  
humore impeditur. ibid.  
Pueri ad rationis usum in rebus  
sensibilibus citiùs perveniunt,  
quàm ad boni malivè moralis  
discretionem. 863  
Vfus rationis interdum in una ma-  
teria, & non in altera. 866. 867  
868. 869  
Dormientes quare usum rationis  
amittant. 864  
Dormientis imaginatione expedi-  
tâ, cur homo ratione uti ne-  
queat. 864  
Augustinus quo sensu carentiam  
usûs rationis in parvulis, pœnam  
peccati originis esse dixerit. 879

FINIS.



infan-

o-pa-

899

as in-

882

appe-

819

in im-

etium

ntalia.

ntelle-

agere

937

tactus,

polio

674

circa

862

cerebri

phid.

rebus

niunt,

moralis

863

na ma-

6. 867

ationis

864

expedi-

uri ne-


864

entiam

pcnati

it. 879







112  
X

